

IPILI NUTESAMENE



The New Testament and portions of the Old Testament in the
Ipili Language of Papua New Guinea

IPILI NUTESAMENE
The New Testament and portions of the Old Testament in the Ipili
Language of Papua New Guinea
Nupela Testamen na sampela hap long Olpela Testamen long
tokples Ipili long Niugini

Copyright © 2008-2023 Bible Society of Papua New Guinea

© Faith Comes by Hearing

Language: Ipili

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-10-09

PDF generated using Haiola and XeLaTeX on 18 Apr 2025 from source files dated 9 Oct 2023

5864307b-f60d-5b59-a38f-2ddd464ca545

Contents

FRT	1
Molo Peke Leane	2
Lutu	8
Jona	13
Matiyu	16
Maki	81
Luku	119
Jone	184
Aposolo	231
Lomo	294
1 Kotini	323
2 Kotini	351
Galesia	369
Epesasa	380
Pilipai	389
Kolosi	395
1 Tesalonaika	401
2 Tesalonaika	407
1 Timoti	410
2 Timoti	418
Taitasa	424
Pilimone	428
Iputu	430
Jemesa	451
1 Pita	458
2 Pita	466
1 Jone	472
2 Jone	479
3 Jone	480
Jutu	482
Lapana Yane	485

IPILI NUTESAMENE

The New Testament in the Ipili language of Papua New Guinea

Nupela Testamen long tokples Ipili long Niugini

Ipili Nutesamene
The New Testament in the Ipili language of
Papua New Guinea
[ipi]

Translation by Wycliffe Bible Translators
© 2008 Bible Society of Papua New Guinea

Print publication, 2008 by The Bible
Society of Papua New Guinea

Web version
2014, Wycliffe Bible Translators, Inc.
www.Wycliffe.org

<http://pngscriptures.org>
www.ScriptureEarth.org

This translation is made available to you
under the terms of the Creative Commons
license (Attribution-Noncommercial-No
Derivative Works).

<http://creativecommons.org/licenses/by-nc-nd/3.0>

Your are free to share – to copy, dis-
tribute and transmit the text under the
following conditions:

- **Attribution.** You must attribute the
work to *Wycliffe Bible Translators* (but
not in any way that suggests that they
endorse you or your use of the work).
- **Noncommercial.** You may not use this
work for commercial purposes.
- **No Derivative Works.** You may not alter,
transform, or build upon this work.
- **In addition,** you have permission to
port the text to different file formats, as
long as you don't change any of the text
or punctuation of the Bible.

Notice – For any reuse or distribution, you
must make clear to others the license terms
of this work.

Tok Orait

Dispela Buk Baibel i kam wantaim tok orait
na lo bilong Creative Commons Attribution-
Noncommercial-No Derivative Works li-
cense. Em i tok olsem **yu ken givim kopi**
long narepela manmeri. Yu ken wokim

kopi na givim long husat i laikim. Tasol,
yu mas tok klia dispela samting i kam long
<http://tokplesbaibel.org>. Yu no ken kisim
mani na salim dispela. **Yu mas givim nat-
ing.** Na tu, **yu no ken senisim Tok.**

Ol piksa i kam wantim ol Baibel na narapela
buk i stap long dispela sait i gat tok orait
long usim wantaim dispela samting tasol.
Sapos yu laik narapela tok orait, yu mas
askim husat i papa bilong copyright long
dispela ol piksa.

Sapos yu laik stretim samting i no orait
long dispela tok orait, stretim tok, salim Buk
Baibel, o tainim Tok bilong God long nupela
tok ples, yu ken **askim mipeila.**

Olgeta tok orait na lo long tok ples English
i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim
mipeila.**

Pii Utupa Aninga Eyape Lo Andape

Gene Luu[tab]Gene Tomaki[tab]Pepa
Yokone

Balana Wandakali Tupa Gote-to Molo Peke Leane Gote-to Piape Mosesa Mayae-pia

(Sapeta 1 - 4)

Isipi Tane Tupamane, Isatale Yame Tan-daka Mayaini-pia

¹⁻⁵ Josepe bala Isipi kanditi okonena wamba poto atenenga, matili Jekopo bala iwanane tupa towa Isipi peaini-pia. Utupane yakamana wanda andopane tupa pitaka atu peaini-pia. Iwanane peaini utupanena gene utupa, Lupene, Simiyone, Lipai, Juta, Isaka, Sepulane, Benjamene, Dana, Napatali, Gata, Asete, utupane peaini-pia. Okone angii Jekopo bala yame Isatale akali angu, payisa yanasia (70) peaini-pia.

⁶ Matili Josepe balapi, balana amene tupa-pi, wandakali okone angii ateaini utupane pitaka omokoyo peaini-pia.

⁷ Omokoyo penenga, matili Isatale yame utupanena mandiyene yame ateaini tupamane andopane kambua wete mandeaini-pia. Isatale utupane, yame tai kambua wete kanditi Isipi okonena ateaini-pia.

⁸ Matili ee ana kambua penenga, kinji wenene mindimane kanditi Isipi okone ando atea-e-pia. Kinji okone mane wamba Isipi yuu okonena Josepe-to piape mina ika layawa pua ateane tupa balato anda napeae-pia.

⁹ Kinji okone mane balana wandakali tupa lamawuato, matili Isatale yame wandakali yakama kambua tai wete atoto nanima yanda pinguto sia minilu peyai.

¹⁰ Yanda pene mindi tupamane nanima yanda pingendo, Isatale yame utupa mane yame utupane tako puato, nanima peyo sia minoto, yuu oko tepa alu yakama palaka polopeyai. Isatale yame utupa yakama kambua gulo ata napeakale, nanimato asini mindi ayia puato jia lamakale leae-pia.

¹¹ Isipi tane akali kawane tupa mane, Isatale yame tupamane piape pulai tupa bosa-lo ando atea-kale loto akali mindi tupa ate leaini-pia. Akali utupane mane Isatale yame tupa piape andane tandaka pene peakale leaini-pia. Wuane peai-kola Isatale yame utupane mane kinji okonena tomo mindi taka tupa mandu amunguli pua yata yakale loto, tano andane Pitomo Lamesese-la pimayaini-pia.

¹² Isipi yame mane Isatale yame tupa mino koyaini tekeko, yakama yame andane kambua tumbi-lo wete ateaini-pia. Kambua wete gulea-kola, Isipi tane tupamane

Isatale yame tupa ando yuku wete yaini-pia.

¹³⁻¹⁴ Yuku wato, Isipi tane tupamane Isatale yame tupa ondo naene piape tai-lo peakale leai-kola, Isatale yame tupamane bitiki waa piki, ee anda tupa pi-maiki peakale leai-kola, utupane kuilo atanapene tandaka koo noo ateaini-pia.

¹⁵ Kinji okone mane Isatale wanda yamena andopane mandeakale-lo moyolapi-kola wanda mindimane iwana mindi manda-ando liyambato andopane iwana okone peyo ome lalapape. Wana mandeando, pe-teakale kondalapape leae-pia.

¹⁶ Liyambato Iputu wanda mindi mane andopane mandeakale loto moyolapi-kola wanda mindimane iwana mindi manda-ando liyambato andopane iwana okone peyo ome lalapape leane pua napene konda yapele-pia.

¹⁷ Wuane leane tekeko, wanda okone lapo mane Gote yuku wato, kinji-to iwana tupa peyo ome lalapape leane pua napene konda yapele-pia.

¹⁸ Kondeae-pi-kola, kinji okomane wanda okone lapo epeakale loto, anupiakale

liyambato andopane iwana tupa ateakale

ando kondala pipe-lo pii tai mane loto tipa

peae-pia.

¹⁹ Tipa pea-kola, wanda okone lapomane kinji okone lamawuato, Iputu wanda tupa Isipi wanda yale jia, Iputu wanda utupane tai yuku pene. Wanda utupane mane andopane baini mandiki piyaini. Andopane yakama tane ini mandiki penenga nalipa matili puku piyapale leapele-pia.

²⁰⁻²¹ Wanda okone lapomane Gote yuku wato wuane piki peapi-kola, Gote-to wanda okone lapo moo kui laya wato, liyambato-pi andopane mandeakale lea-kola, Isatale wandakali tupa yame kambua puato tai yuku pene mindi tupa ateaini-pia.

²² Matili kinji okone mane Isipi tane wandakali tupa lamawuato, Iputu yamena andopane iwana mandulaini tupa pitaka moto ipa Naile-na awua aindaka lalapape. Andopane wana tupa peteakale ando kondala-pape leae-pia.

2

Andopane Mosesa Napeleaini-pia

¹ Okone angii, Lipai yame akali mindimane, wanda Lipai yame teke mindi kee leae-pia.

² Matili wanda okone mane iwana epene payia mindi mandeae-pia. Angini mane iwana payia okone oma napeakale nembo toto, ana tepo too pua yatawa peteae-pia.

³ Balato andopane okone katu-lo too pua yatawa napiti-pe-pene guleae-pia. Wuane pea-kola, kembolo itane mane waa pene basekete mindina, kolota mane asia titi tupa mina-ombo wato iwana okone

basekete okonena palekale loto ipa matene mandaka enjo tombene mindisa too pua yata yaeae-pia.

⁴ Iwana okonena imalini wana okomane iwana okone anu pua paleyape-lo andoyale bala aja amonga yale andatawa ateeae-pia.

⁵ Kinji wanane bala wasa-wasa peyoyale balana piape wanda tupa towa ipa okonena peaini-pia. Balana piape wanda utupane ipa matene organe epoko pua ateeai-kola balato ipa okonena basekete mindi enjo tombenenga yakola andeae-pia. Andoto balana piape wanda mindi mane molo peakale leae-pia.

⁶ Kinji wanane okone mane basekete okone lumboto andea-kola iwana mindi basekete okonena paleae-pia. Paleane okone ika loto ai lea-kola andoto ondo yae-pia. Ondo wato, iwana oko Iputu yame tupana andopane mindi yako leae-pia.

⁷ Wuane lea-kola, andopane okonena imalini amonga ateane okone epoto kinji wanane oko lamawuato, iwana oko andu mayakale nambato Iputu wanda mindi ayia pua andolo poape-lo tipa peae-pia.

⁸ Kinji wanane okone mane, katu-lo leleko nimbato andolo puu lea-kola, wana okone mane angini atu epeae-pia.

⁹ Angini atu epea-kola, kinji wanane okone mane angini okone lamawuato, nambato nimba yole pukaleko. Andopane oko nimbato kui-lo andu maula mia leae-pia. Wuane lea-kola, angini okone mane andopane okone moto andu mawua yatawu peteae-pia.

¹⁰ Iwana okone andane guu lele pea-kola, angini mane kinji wanane oko peteanga atu peae-pia. Pea-kola kinji wanane okone mane iwana okone balana andopane gulyaya wato wua leae-pia. Andopane ipa pangosia pene oko nambato moo ayu lewa okonena balana gene oko Mosesa lokale leae-pia.

Mosesa Palaka Midiana Peae-pia

¹¹ Mosesa bala andane atoto matili bala yame Iputu tupa andolo peae-pia. Bala yame Iputu utupane mane kinji okonena piape tandaka wete pene pua ateeai-kola andeae-pia. Isipi mindi mane, Mosesa bala yangone Iputu mindi wayumane wete mino-koyo pelea-kola andeae-pia.

¹² Mosesa-to wandakali mindi ateyaipe-lo anda amo-nena puato andea-kola, wandakali mindi organe ata napeaini-pia. Ata napeai-kola, kapoyale balato Isipi tane akali okone peyo ome loto, ipamau mane yame peyo ombo yae-pia.

¹³ Anate-lene Mosesa bala peke loto andea-kola, Iputu yame akali mindi lapo liyamba tane lapo-lapo peya-peya peapele-pia. Akali bulupane tee-yane okone

lamawuato, anu piakale nimbato nimbana Iputu yangone oko pelelepe leae-pia.

¹⁴ Lea-kola akali okone mane Mosesa pii okone yano peyoto, apito nimba jasa atoto nanima ando, atape lapiape. Nimbato Isipi tane akali mindi tuni peyo ome lapiko, andipa nimbato namba wuane pua teke, peyo ome lokale nembo toto lelepe leae-pia. Wuane lea-kola, nambato akali peyawuuo wandakali mane andapiainiya nembo toto bala yuku yae-pia.

¹⁵ Matili, Isipi tane kinji okone mane Mosesa-to peane tupa ale wato Mosesa peyo ome loyale pea-kola Mosesa bala kinji tepa alu palaka Midiana yamenya yuu okona peae-pia. Bala palaka poto ipa yuli tombayene mindina mandaka peteae-pia.

¹⁶ Kanditi okonena Pitisa, akali Jesoto lene mindi ateeae-pia. Pitisa okonena wanane yanasisa peteaini-pia. Mosesa bala ipa yuli organe poto petea-kola wana yanasisa utupane yakama ayianena sipisipi meme, tupa ipa neakale ipa ambu gae-lo maiyiani bokisa okonena maimakale loto peaini-pia.

¹⁷ Petea-kola sipisipi waka yatawa atalaini akali mindi tupa epoto wana utupane pulupa-lo peyo wateai-kola, Mosesa balato akali utupane peakale-lo peyo watoto, matili wana utupanena meme, sipisipi tupa ipa neakale-lo ambu mayae-pia.

¹⁸ Matili wana utupane yakama ayiane Jesoto ateanga andaka ini peke leai-kola, yakamana ayiane okomane wana utupane tipa puato, andipa anu pua yakama ini andaka peke leyaipo leae-pia.

¹⁹ Utupane mane yano peyoto, Isipi tane akali mindi mane nanima moyoto sipisipi waka ando atalaini akali tupa watoto, nani-mana sipisipi meme tupa ipa neakale ambu mayia-kola nanima baini andaka epeyama leaini-pia.

²⁰ Wuane leai-kola, ayiane okone mane wana utupane tipa puato, akali okone aninga ateyape, anu piakale yakamato bala amonga atekale epalaipe. Bala nanima towa tomo namakale epeakale ee-lolo pulupa, lea-kola utupane mane Mosesa atu epeaini-pia.

²¹ Jesoto bala towa Mosesa atu atapakale nembo teyo lea-kola, Mosesa-to okone katu yalu leae-pia. Katu lea-kola, Jesoto-to bala wanane Sipota Mosesa maya-kola Mosesa-to wana okone kee leae-pia.

²² Matili Sipota-to iwana mindi mandeae-pia. Mosesa bala tane nembo toto wua leae-pia. Namba akali kanditi waka tane oko yuu okona epo ateyo, tene okonena nambato balana gene oko Getesomo leyo leae-pia.

²³ Ee ana mindi tupa wamba penenga matili Isipi tane kinji okone omeae-pia. Okone angi Isipi yame tupa mane Isatale

yame tupu piapē tandaka pene peakale lea-kola tandaka noo atoto, Gote nimbato nani-moya-lo ai-lo ateaini-pia.

²⁴ Gote-to aii leaini okone ale wato wamba Apatakame, Aisake, Jekopo, utupane towa pii-loyake peaini okone nembo teae-pia.

²⁵ Gote-to, Isatale yame tandaka noo ateai tupu andoto moyokale nembo teae-pia.

3

Gote-to Mosesa Ee Leae-pia

¹ Okone angi Mosesa-to bala imane Mid-iana tane pitisa akali Jesotona, meme sipi-sipi tupa yatawa ateae-pia. Ole mindi Mosesa-to sipi-sipi meme tupa atu yuu kapu mindi kalo piyu poto, Gote atalane yuu wangiane, Otepe okona peae-pia.*

² Mosesa ongane ate-a-kola, Akali Andane okona enjole mindi ita lungu-gulo ita mindina yokone kembone, utupana ita-lungu too ika lea-kola andea-pia. Mosesa-to ita lungu teya-lo andeane tekeko, ita lungu okone mane ita okonena kembone, yokonepi, tanapeae-pia.

³ Ita lungu okone mane ita okone ta-naapea-kola, Mosesato nembo kambua toto, wakataka mindi peyako, nimbato mandaka poto andolo poa leae-pia.

⁴ Akali Andane bala ita lungu okonena tombenesa ateae-pia. Atoto andea-kola Mosesa-to ita lungu okone andolo mandaka epeae-pia. Epea-kola, Gote-to Mosesa, Mosesa, leakola, Mosesa-to yaa, namba ateyoko, anu peyape, leae-pia.

⁵ Wuane leakola, Gote-to namba ateyo mandaka onga nimba naepene konda. Nimbana sendolo peleko yoko-yata. Andipa yuu nimba atele oko nambana yuu epene wete, jia latane okona ateleko leae-pia.

⁶ Namba nimba yumbane Apatakame, Aisake, Jekopo, utupanena Gote oko ateyo leae-pia. Wuane lea-kola Mosesa-to Gote andolo wane-lo yuku wato, balana lee-inga yame peleae-pia.

⁷ Akali Andane okonena bala lamawu-to, nambana wandakali tupa Isapi yame tupamane tandaka mawua mino koyo atapiak-kola, nimbato andawua. Akali kawane utupanena kinina nanima tandaka koo wete noo ataimako, nimbato nanima molo peke laa-lo namba ee-lapia-kola nimbato wamba ale awua.

⁸ Isatale yame yakama Isapi yameni kinina andi latane atapiak-oko, andipa nimbato yakama atu kamaka epeyo. Atu

epoto yuu andane ipane petene tomo tende pene pitaka yalane, yuu okone yakama gukale. Yuu okonena anduanne akali yame Kenane, Iti, Amoto, Petesa, Ipi, Jembusa utupane yakamana yuu tene utupanena ateyai.

⁹ Isipi yame tupamane Isatale yame utu-panga mana koo mino atapiak tupa nam-bato wamba andawua. Andoto utupane mane aii-lo atapiaiko nimbato ale wua.

¹⁰ Andipa, Mosesa, nimba puu. Isipi tane kinji okomane namba yame Isatale tupa nimbanga tupa yakale, nimbato utupane atu epola lamolo puu leae-pia.

¹¹ Wuane lea-kola, Mosesa-to Gote lamawuato, namba apipe, namba yale-mane anupua katu-lo Isipi tane kinji oko ateyanga poto, Isatale yame tupa Isipi tupa yakale atu epokalepe leae-pia.

¹² Wuane lea-kola, Gote-to bala lamawu-to, namba nimba towa atokaleko. Yakamato Isipi tupa alu yuu wangiane okona epoto namba-lo lotu lolai okone angi, nimba Isipi tane kinji oko ateyanga nimbato puu lapiya-lo nimbato andolo-pele.

¹³ Wuane lea-kola, Mosesa-to Gote lamawuato, nimbato Isatale yame tupa ateyanya Isipi yuu okona poto, nanima yumbanena Gote okomane yakama lamolo pulupa lakakola nimbato yakama lamolo epeyo lokale. Wuane lolowa-kola, utupane mane balana gene apipe-lo namba tipa peindo, nimbato aki loto yano peyokalepe leae-pia.

¹⁴ Wuane lea-kola, Gote-to wua leae-pia. Namba Ateyo oko Namba. Nimba-to Isatale yame tupa lamawuato nambana gene oko, Namba Ateyo Oko lape. Gote okone mane namba yakama ateyai-nga puu lala.

¹⁵ Nimba poto Isatale yame tupa lamawuato, yakama ayianena yumbane Apatakame, Aisake, Jekopo, utupanena Akali Andane Gote okomane yakama lamolo puu lala-kola, nimbato yakama lamolo epeyo lape. Nambana gene, Akali Andane,[†] atapowa-atapowa atalawane oko yakamana yumbane atolai utupane mane atapowa atapowa atalane gene oko teke lolopeyai leae-pia.

¹⁶ Nimba Isatale yame akali kawane tupa ando amunguli puato wua lamaipe. Nanimba yumbane Apatakame, Aisake, Jekopo, utupanena Gote Akali Andane oko nimbanga ipupia. Epoto wua lapia. Isipi yame tupa mane mana koo pitaka yakamanga miniyai-kola andatawa atalawane lapia.

* 3:1: Yuu wangiane okonena gene mindi Sanai. † 3:15: Iputu pii loto Gotena gene Yhwh oko-lo peyalaini-pia. Akali mana andene mindi tupamane gene oko Yawe lamakale nembo teaini-pia. Iputu pii loto gene okonena tene oko, Namba Ateyo Oko Pene Teke Atapowa Atalawane (ves 14). Iputu yame tupamane gene Yawe lanapimakale jia wete lalaini-pia. Buku tupana Yhwh gene peyalaini tekeko, gene loyale Akali Andane angu lalaini-pia.

¹⁷ Kanditi Isipi okona andi-latane atoto, tandaka noo ateyaiko, tepe alapale. Nambato yakama atu poto, akali yame Kenane, Iti, Amoto, Petesa, Ipi, Jembusapi, akali utupanena yuu andane epene ipane petene eya okonena atu poto atalapale lokale lapia.

¹⁸ Nimbato Isatale yame akali kawane tupa lamaule-kola utupane mane nimbana pii loleko ale olopeyai. Nimbato Isatale yame akali kawane tupa atu, Isipi tane kinji oko pitulanga poto, wua lalapape, Iputu yamena Akali Andane Gote oko nanimatia ataimanga ipupia. Okonena andipa nanimato ole tepo angu wandakali napalene yuu okona poto, nanimana Gote okone opa malu makale, nimbato pulupa lola loto nimba tipa pulu epeyama lalapape.

¹⁹ Isipi tane kinji okone mane yakama pulupa-lo tepe naolo-peya-lo nembo-teyo tekeko, nambato balanga piape tai mindi tupa puluwa-kola balato yakama pulupa-lo tepe olopeya.

²⁰ Kanditi Isipi okona mangene-taka, tai mindi-pene mindi-pene tupa nambato piyu, Isipi yame tupanga nambato mana mawuakale. Wuane puluwa-kola, kinji okone mane yakama pulupa loto tepe olopeya.

²¹ Isipi tepe alu yakama mee ipu-napulu peyai. Isipi tane utupanena wenonga nambato gene andane yakama guluwa-kola, Isipi tepe-alu epolo-peyai.

²² Isipi wanda yakama towa anda mindiki palyaini tupapi, wanda yakama towa mandaka atolaini tupa pitaka mane, tonapi, yati epene silipa, golo tupamanne waa-pene tupa Isatale wanda yame yakama geakale-lo tipa pua mialapape. Yati epene utupane moto, yakamana andopane tupa mane yati peakale, piyia mayiapape. Wuane pulaini mana okone mane yakamana yandapene tupa sia minoto, mindaka milaini pua Isipi yamena minditaka yola tupa pitaka yakamato molopeyai, Gote-to wuane leae-pia.

4

Gote-to Tai-lene Mosesa Mayae-pia

¹ Mosesa-to Gote lamawuato wua leae-pia. Isatale yame tupamane, namba andayo, nimbato Akali Andane oko andanapene ato, owato pii naniman langulu epele loto, nambana pii ale nayaindo, nambato anu pukalepe leae-pia.

² Wuane lea-kola, Akali Andane-to Mosesa tipa pulu peke loto, nimbato aki mindi nimbana kinina aelepe. Wuane lea-kola, Mosesa-to kalango ayo leae-pia.

³ Kalango okone yuunga tepa-aa lea-kola, Mosesa-to kalango okone yuunga tepaya-kola, puya guleae-pia. Okone andoto bala palaka peae-pia.

⁴ Palaka pea-kola Akali Andane okomane Mosesa lamawuato, nimba palaka punapene nimbanan kini tepe wato puya okonena etenenga mina leae-pia. Wuane lea-kola Mosesa-to puya okonena etenenga minia-kola puya okone kalango guleae-pia.

⁵ Isatale yame tupa ateyainga poto, nimbato pilipua pipe. Wuane pule-kola enene wete, yakamana yumbane Apatakame, Aisake, Jekopo, utupanena Gote Akali Andane oko nimbanga ipupiyo-lo nembo tolopeyai leae-pia.

⁶ Akali Andane-to Mosesa lamawuato, nimbanan kini oko saketenga aindaka laa leae-pia. Leane pua Mosesa-to kini aindaka loto molo peke lea-kola, balana kini akepuato tapa pitanane atae-pia.

⁷ Lapone teke Akali Andane okomane nimbanan kini oko saketenga aindaka lolo peke laa leae-pia. Aindaka loto molo peke lea-kola, balana ombaini epene atalane okone pene atolo peke leae-pia.

⁸ Akali Andane oko mane wua leae-pia. Nimbato pii lole tupa ale nayaindo, metekolo piape bulupane okone pipe. Nimbato wuane pule-kola, andoto nimbanan pii ale nayaindo, nimbato metekolo piape lapone okone pipe. Wuane pule-kola, wandakali utupane mane andoto nembo tolopeyai.

⁹ Utupane mane metekolo piape lapo nimbato pule okone lapo andoto teke, nimbanan pii lolene tupa ale nayaindo, nimbatu ipa andane Naile ambu moto yuu tai mindinga gae lape. Gae lole-kola ipa utupane wandakali tundupa gulolopeya leae-pia.

¹⁰ Wuane lea-kola Mosesa-to loto, Akali Andane, nambato wandakali wenonga pii kuai-lo lanapi-yawane. Andipa pii lape-lo nimbato namba langeleko. Nambato pii teng-a-mane lalawane tekeko, anu pua pii lokalepe-lo nembo nateyo leae-pia.

¹¹ Wuane lea-kola Akali Andane okomane bala lamawuato, apito wandakalina ambulini lenepi, ateakale leaepe. Apito wandakalina alene, ambulinipi, tuma-pene ateakale leaepe. Apito wandakalina lene teakale lata, tuma pita peakale leaepe. Akali Andane namba-to angu utupane pitaka piyawane.

¹² Andipa nimba baini puu. Nimbato wandakali pitaka pii lamaula tupa, wua lape-lo nambato nimba moyo langukale leae-pia.

¹³ Wuane lea-kola, Mosesa-to Gote lamawuato, Akali Andane, nambato pii katulo pitaka lamai napulu peyoko, nimbato akali waka mindi peakale laa leae-pia.

¹⁴ Wuane lea-kola Akali Andane-to Mosesa towa yataka wato, nimba amene

miniyene Atone bala Lipai yame ateya oko dee. Andipa teke balato nimba ayiapima epeyako, balato nimba andoto epele wete olopeya. Balato nimba moyoto pii tupa pitaka katu-lo wandakali tupa lamalu peya nembo teyo.

¹⁵ Balato pii leakale nimbato bala lamaipe. Liyambato pii kui-lo lalapale, liyambana ambulini lumboyawa tai laya wakale. Liyambato wua piyapape-lo nambato liyamba mana langukale.

¹⁶ Atone bala nimbana ambulini gulo atoto, nimbato pii lole tupa pitaka wandakali utupane lamayakale. Atone wenonga nimba Gote gulo atoto, pii nimbato lole tupa pitaka, balato wandakali tupa lamayakale, nimbato bala lamaiki pipe.

¹⁷ Matili nimbato metekolo piape mindi tupa kalango okomane pulako, andipa kalango oko ayu, nimba puu leae-pia.

Mosesa Isipi Peke Leae-pia

¹⁸ Akali Andane-to puu lea-kola, Mosesa bala imane Jesoto ateanga peke loto wua leae-pia. Namba yame Isipi kanditi okona ateaake epewane tupa wamba omo koyo peapi, ateyaipe-lo nimbato andolo pokale nimbato puu-laa leae-pia. Wuane leakola, bala imane okone mane katuko, nimba mini epene palu puu leae-pia.

¹⁹ Mosesa bala Isipi ini puu napene Midiana yuu okona mee atea-kola Akali Andane oko mane Mosesa lamawuato, nimba peyo ome loyale pua atapiakai akali tupa yakama wamba omapiako, andipa nimba Isipi kanditi okona puu leae-pia.

²⁰ Puulea-kola Mosesa bala wetenepi, balana andopane okolapopi, utupane dongi mindina peteakale laya alu, Gotena kalango oko moo ayu kanditi Isipi okona peaini-pia.

²¹ Akali Andane oko mane Mosesa lamawuato, nimba Isipi peke lole okone angi, nimbato metekolo pula nimbato nimba tai laya wakaleko, nimba poto kinji oko wenonga metekolo piape tupa pipe. Pule-kola teke, kinji oko mane pii tanga leakale lolowa-kola, balato Isatale yame tupa peakale-lo tepa nalopeya.

²² Wuane pulupe-yako, matili Mosesa nimbato kinji oko lamawuato, Akali Andane okomane Isatale yame utupane nambana iwana bulupane yame ateyai.

²³ Nambana andopane yame utupane mane namba-lo lotu lolo epeakale, nimbato utupane tepa ape. Nimbato utupane tepa nawakale lendo, nambato nimbana iwanane bulupane oko peyo ome lokale, wuane lala-lo nimbato kinji oko lamaipe leae-pia.

²⁴ Isipi payole asini poto paliyaini yuu ongane, Akali Andane oko mane Mosesa malanda wato peyo ome loyale peae-pia.

²⁵ Wuane pea-kola, Sipota-to ana nene atene mindi moto bala iwanane okonena yalapene ombaini katuto Mosesana kee tokonga yata wato wua leae-pia. Nimba nambana akalini tekeko, nimba tundupa akali leae-pia.

²⁶ Akali Andane-to Mosesa peya napene ando kondaya-pia. Wanda Sipota-to ombaini katiyaini mana okonena, Akali Andane-to Mosesa peyo ome lanapene kondeya nembo toto, akali tundupa leae-pia.

²⁷ Akali Andane-to Atone lamawuato, Mosesa bala yuu kapu okona epeyako nimbato bala malanda ola puu leae-pia. Atone bala Gotena yuu wangiane okonena epoto Mosesa malanda wato ope-lo nunu leae-pia.

²⁸ Wuane piyu, Akali Andane okomane Isipi yame tupanga pii lalapape leane tupa, metekolo piyapape leane tupa, pitaka Mosesa-to Atone lamayae-pia.

²⁹ Matili Mosesa, Atone-la Isipi poto Isatale yame akali kawane tupa moo amunguli peapele-pia.

³⁰ Akali Andane-to pii Mosesa lamayane utupane pitaka Atone-to Isatale yame tupa lamawuato, utupane wenonga metekolo piape tupa peae-pia.

³¹ Akali Andane okomane pii Mosesa lamayane tupa pitaka Atone-to Isatale yame tupa lamaya-kola, enene leya loto nembo teaini-pia. Isipi yame tupa mane mana koo Isatale yame tupanga minapi tupa Akali Andane balato andatawa atalawane-lo Atone lamayane pii okone ale wato, Isatale yame yakama yuunga tombawua loto Akali Andane-lo lotu leaini-pia.

Gote-to Isatale Yame Molo Peke Leane Oko

5

(Sapeta 5:1 - 15:21)

Mosesa Atonela Kinji Andolo Peapele-pia

¹ Matili Mosesa, Atone-la Isipi tane kinji okone ateanga poto, wua leapele-pia. Naniwa Isatale yamena Akali Andane, Gote okomane wua lala. Minditaka ata-napene yuu kapu okonena, nambana wandakali tupa amane nambana gene minayu-lo lotu lolo peakale nimbato wandakali utupana tepa ape lala leapele-pia.

² Wuane leapi-kola, kinji okomane lapeke loto, Akali Andane okone bala apipe. Anu piakale nimbato balana pii alewato yakama pulupale-lo tepa wakalepe.

Nambato Akali Andane okone bala anda-napeyanaweko, yakama pulupa-lo tepa naeyo leae-pia.

³ Wuane lea-kola, Mosesa, Atone-lamane loto, nanimma Iputu yamena Gote oko nalipa ataipanga ipupia. Gote Akali Andane okone opa malu, ole tepo angu yuu kapu okonena makale, nimbato nanimma pulupa-lo tepa-aa. Nanimma tepa naendo, siki andane mindi yandopi, yanda-pene andane mindi yandopi, nanimanga epeakale lola-kola nanimma koyolomane leapele-pia.

⁴ Kinji okomane Mosesa, Atone-la lamawuato, wandakali tupamane nambana piape anupua konda yakale loto, liyambato wuane leyapipe. Taimane yakama atalaini yanga piape pima peke lalapa.

⁵ Andipa Isatale yame yakama kambua ateyama loto, nambana piape napene kondamakale nembo teyapipe.

⁶ Okone angi teke, Isipi tane kinji okone mane andi-latane ando atalaini Isatale yame akali kawane tupapi, Isipi tane akali kawane tupapi, epo amunguli piyapa loto wua leae-pia.

⁷ Bitiki waa peakale loto, tani kaputene Isatale yame mayiani pua, andipa mainapene kondala-pape, yakama tane molo peakale.

⁸⁻⁹ Piape puyale kepa wato Gote opa malu makale tepa-aa leyai-ko, piape kambua wete tandaka noo pulai okone mane, owato pii ale-apepene oto mindi yanapekale. Utupane mane bitiki wamba kambua waa piyani pua teke waa peakale lalapape leae-pia.

¹⁰ Isatale yame piape peakale-lo ando atalaini akali kawane, utupane mane Isatale yame tupa atevinga poto, kinji-to tani kaputene bitiki waa piyapale giyae piako maulaini jia lala-lo lamayaini-pia.

¹¹ Yakama tane tani saka katu mandulu poto, bitiki wamba waa piyaini mana mindiki okone pene teke waa peakale lalapape lala leaini-pia.

¹² Wuane leai-kola Isatale yame tupamane Isipi yamena yuu tupa pitakana poto tani arjako mindi-mindi ateane tupa pitaka molo-tone pua ateaini-pia.

¹³ Akali kawane piape ando atalaini utupane mane Isatale yame tupa andatawa ata-ta puato, wamba tani eya-kola bitiki kambua waa piyaini wuane pua teke waa piyapa laka pua ateaini-pia.

¹⁴ Isipi tane akali kawane tupa mane anu peakale yakama-to bitiki wamba kambua waa piyaini pua, andipa, tuni-la waa napiyapipe, loto Isatale yame piape ando atalaini akali kawane tupa peleaini-pia.

¹⁵ Wuane peai-kola Isatale yamena akali kawane utupane kinji oko petenga poto, anu

peakale nimbato mana okone nanimanga minelele leaini-pia.

¹⁶ Yakamato tani nanimma ginapene ato, bitiki wamba waa piyaini pua teke waa piyapa loto, nanimma peleyaipe. Yakama tane kopeta puato, nanimma mee wete peleyaiko leaini-pia.

¹⁷ Wuane leai-kola, kinji okone mane utupane lamawuato, yakama palako yame, yakama kepa-wato Akali Andane opa malu makale tepa aa-lo namba tipa peyai-pe leae-pia.

¹⁸ Baini yakama piape pima peke lalapa. Yakama tani ginapea-kaleko, yakamato bitiki wamba waa piyaini wuane pua teke waa piyapape leae-pia.

¹⁹ Isatale yame ando atalane akali kawane tupa mane kinji-to bitiki wamba waa piyaini mana okonena teke waa peakale laene pii okone ale wato, kenda pene andane wete mindi nanimanga baa ipulua-lo nembo teaini-pia.

²⁰ Utupane mane kinji okone tepa alu, Mosesa, Atone-la maliyo ateaapele ongane peaini-pia.

²¹ Isatale yamena akali kawane tupamane okone lapo lamawuato, wua leaini-pia. Kinji balapi, balana akali kawane tupa pitaka mane wandakali nanimma minditaka koo wete, mindiya nembo toto, nanimma peyo ome leakale loto yandate toko maipiapeleya. Liyambato mana minapiapele tupa Akali Andane okomane wamba andapiya. Okonena kenda pene mindi balato liyamba geakale leaini-pia.

Mosesa Mini Kenda Wato Pote Leae-pia

²² Wuane leai-kola, Mosesa-to utupane tepa-alu poto Akali Andane-lo pote wua leae-pia. Akali Andane, anu peakale nimbana wandakali tupanga mana koo oko minelepe. Anu piakale namba puu lapipe.

²³ Nambato pii lamalu puu lee okone angi ato tewa, kinji okone mane nimbana wandakali utupa tandaka andane neakale mayako, nimbato utupane ondo wato aja mindi moo yanapele okonde leae-pia.

Lutuna Pii Temane Oko

Elemeleke Balapi Balana Wanda Andopanepi, Moapa Yuu Okona Atama Peaini-pia

¹ Wamba Isatale yamena kinji mindi ata napea-kola, yakamana akali kawane mindi ataka puato, Isatale yame yakama tane ando ataka peaini-pia. Oto okone ang, yuu okonena ulia nono andane wete mindi yaepia. Juta yuu Beteleme tano okonena tane, akali mindi balana wetenepi, iwanane lapo towa Moapa kanditi okonena atama peaini-pia.

² Akali okone balana gene oko Elemeleke. Balala wetene okona gene oko Naomi. Balana iwanane oko lapona gene Malono, Kilionela. Utupane yakama Epalata yame, Juta yuu okonena tano Beteleme ukusane ato epoto, Moapa yuu okonena ateaini-pia.

³ Moapa yuu okonena ateai-kola, Elemeleke bala omeae-pia. Omea-kola, Naomi bala iwanane okone lapo towa yakama angu ateaini-pia.

⁴⁻⁵ Yuu okonena atoto, matili bala iwanane oko lapomane Moapa wanda lapo kee leapele-pia. Wanda okone lapo liyambana gene Lutu, Opa-la. Utupane yakama ee ana payisapi mindi, yuu okonena peteai-kola matili iwana Malono, Kilione-lapi omeapele teke-pia. Naomi bala akalinipi, iwanane okone lapopi, utupane pitaka oma yake lea-kola, bala angu peteae-pia.

Naomi Lutu-la Beteleme Peke Leapele-pia

⁶ Matili Naomi bala Moapa yuu okona pituto aleya-kola, Akali Andane-to balana wandakali tupa moyoto, tomo kambua wete balana yuu okonena ika leakale lapia-kola, tomo nolane kambua eya leai-ko aleyae-pia. Ale wato, bala ayane wanda okone lapo towa Moapa yuu okone tepa alu, balana yuu tene okonena moyale mandeke peaini-pia.

⁷ Naomi bala ayane wanda okone lapo towa Moapa yuu okone tepa alu Juta yuu okona peke loyale asini peaini-pia.

⁸ Asininga poto Naomi-to wanda okone lapo lamawuato, liyamba angini towa pitima liyamba andaka peke lalapa leape-pia. Liyamba akalini omeapiapi okone lapo ondo wato, namba moyo pitipiapi wuanne pua teke, Akali Andane okomane liyamba ondo wato moyo kui laya yakale.

⁹ Akali Andane okomane liyamba ondo wato moyo yola-kola, liyamba katulo akali

waka poto, akali okone lapona andaka kuilo pitulu peyapi leae-pia.

Wuane lalu Naomi-to bala yamena mana mindi wato minoto, wanda okone lapo pulupa loto nunu lea-kola, wanda okone lapo mane ai andane loto,

¹⁰ jia, nalipa nimba yame ateyainga Juta yuu okonena atu makale leapele-pia.

¹¹ Wuane leapi-kola, Naomi-to namba wanane liyamba andaka peke lalapa leae-pia. Anu piakale liyambato namba watama epeyapipe. Nambato iwana mindilapo mandulu peke lolowa-kola okone lapo mane liyamba kee leakale nembo toto, liyambato namba watama epeyapipe.

¹² Namba wanane lapo, liyamba andaka peke lalapa. Namba wanda miniyene pe-teyoko, nambato katulo akali waka mindi na-polopeya. Nambato andipa utulu oko angi teke akali waka mindina poto, iwana mindi lapo mande-wando,

¹³ okone lapo anda yakale, liyambato malivo mee pitulu-peyapipe, jia katu-lo liyambato napitulu peyapipe. Akali Andanena tailene oko nambanga ika loto, andipa namba mino koyeya. Kenda pene nambanga epeya okomane liyambanga kendane epeya oko sia miniya, okonene nambato liyamba ondo wete eyo leae-pia.

¹⁴ Naomi-to wuane lea-kola, Lutu Opala, lapone teke, ai leapele-pia. Matili Opa-to nimba yuunga pupe loto, Naomi nunu lalu, bala andaka peke leae-pia. Tekeko, Lutu-to Naomi tepa naene minatawa mee ateae-pia.

¹⁵ Lutu-to minatawa ateai-kola, Naomi-to Lutu lamawuato, nimba akini Opa bala, balana yamepi, balana gote tupa ateyainga pekeleya pua, nimba atu peke lalapa leae-pia.

¹⁶ Wuane lea-kola, Lutu-to Naomi lamawuato, nimbatu namba tepa alu puu, lele oko konda. Nimba pole tupana namba atu polo-peyapa. Nimba pitule yuu okonena namba atu teke pitulu-peyapa. Nimba yame tupa namba yame teke atolopeyai. Nimbana Gote okopi nambana Gote teke atolo-peyaya.

¹⁷ Nimba omole yuu okonena teke namba omoto mali atokale. Omene mane angu nalipa tale pulupeya. Nambato nimba tepa alu mindisa pewando Akali Andane-to kenda pene andane wete mindi nambanga yata yakale leae-pia.

¹⁸ Lutu-to bala atu bakale-lo tai wete lea-kola, Naomi-to Lutu towa pii mindi lanapene kondayai-pia.

Naomi Ondopene Beteleme Peke Leane Oko

¹⁹ Okone lapo liyamba poto, Beteleme tano okona peke ayu leapele-pia. Pekayu

leapi-kola, Beteleme tane wandakali pitaka mane moko-lo andeaini-pia. Andoto yuu okonena wanda peteaini tupamane wanda okone apiya, okone enene Naomi yape, api yape, laka peaini-pia.

²⁰ Wuane laka peai-kola, Naomi-to utupane lamawuato namba ando Naomi laka napene kondalapa leae-pia. Gote tai lene tupa pitaka yene oko mane namba mino koyapiane, tene okonena nambana gene oko Mata lalapa leae-pia.

²¹ Wamba nambato yuu oko tepa alu pewa okone-angi, mindi taka kambua yene pewane tekeko, andipa nambanga mindi taka yanapeya-kola, Akali Andane-to namba mee atu pekeleya. Gote tai lene tupa pitaka yene oko mane namba mino koyoto mee atu peke leya okonena anu peakale namba ando Naomi-lo ee leayaipe.

²² Lasia bali dini yapepene oto okone tewa epea-kola, Naomi bala ayane Moapa wanda Lutu liyamba Moapa tepa alu Beteleme tano okonena pekaiyu leapele-pia.

Lutu-to Boasa Eenga Bali Dini Aiya Pulu Peane Oko

2

Lutu-to Bali Dini Aiya Pulu Peane Oko

¹ Boasa bala Naomi akalini Elemenleke yame akali amango gene yene mindi yuu okonena ateae-pia.

² Oto mindi angi, Lutu-to Naomi lamawuato, lasia katu puta pua mandu ateyai, ee tupana namba pokale konda leae-pia. Namba lasia ee okonena polowa-kola, piape akali tupa mane namba ondo wato katulo piape pi-leaindo, lasia yuunga tepaene yolane tupa nambato yapa-lo puta pua yatawakale. Wuane lea-kola, Naomi-to bala lamawuato ayane, okone katu-lo leleko nimbatu wuane pipe leae-pia.

³ Lutu bala lasia ee okonena piape akali tupa masianga watama poto lasia dini itane towa yuunga tepa yaini tupa, yapa-lo puta pua ateae-pia. Lutu-to, bala ayane Elemenleke yame tundupa mindiki Boasana eenga piape pua ateyo-lo nembo natene ateae-pia.

⁴ Okone angi teke Boasa bala Beteleme ato balana piape akali tupa piape pua ateainga epoto, wua leae-pia. Otonga, Akali Andane yakama towa ateya, wuane lea-kola, utupane mane balana pii yano peyoto, Akali Andane-to nimba mo kui leakale teke leaini-pia.

Boasa-to Wanda Oko Api Yame Ateyape-lo Tipa Peane Oko

⁵ Boasa-to balana piape ando atalane akali bulupane okone tipa puato wanda oo epo ateyako api yamepe-lo tipa peae-pia.

⁶ Tipa pea-kola, ee ando atalane akali okone mane, wanda ateya oko bala Naomi towa ipupia-pele, Moapa tane mindi ateya leae-pia.

⁷ Wanda okomane namba tipa puato, nimbania piape akali utupa watama poto, lasia dini itane towa yuunga tepa olane tupa mo yake pua yatawakale okone katupe-lo namba tipa piya. Wanda oko mane upapitane piape angu puato, epapu wete, oto mialaini anda okonena aja oto mo peteyako.

⁸ Wuane-lo lamaya-kola, Boasa-to Lutu lamawuato namba wanane, nambato pii leyoko ale-aa. Nambana ee oko tepa alu, ee waka mindina nimba polene. Nambana piape wanda oo ateyai utupa towa nambana ee okona angu nimbatu piape pua atape.

⁹ Nambana piape akali tupa aninga lasia mandu ate yaipe-lo andoto nambana piape wanda atolaini tupa towa pipe pua atape. Nambana piape akali tupa mane nimbania mana koo mindi mina napeakale-lo nambato utupane lamayo. Nimba ipa nono peando, ipa nalaini sisopenenga wamba ambu yata apiani peteyai tupana nape.

¹⁰ Wuane lea-kola, Lutu bala aiki lekawa tombawua loto, Boasa ando wua leae-pia. Namba, wanda yuu waka tane, anu piakale nimbatu namba ando, namba towa mini epene paluto epele elepe leae-pia.

¹¹ Wuane lea-kola, Boasa-to pii okone yano peyoto wua leae-pia. Nimba akalini omea-kola nimbatu nimbania wanda ayane towa mana minalene tupa wamba wandakali mane temane langipiai-kola, nambato ale awua. Nimbania, ayiane, angini, yuu-pi, utupane pitaka tepa alu, wandakali wamba lee-inga anda napelene tupana yunga ipipi.

¹² Isatale yamena Akali Andane Gote oko ateyanga nimba epele. Balana papakane pangosia nimba kuilo pitula yame peyoto ando atekale. Akali Andane-to nimbania mana epene minapi tupa andoto balato yole epene mindi nimba geekale. Balato mindi taka kambu nimba geekale leae-pia.

¹³ Lutu-to Boasa lamawuato wua leae-pia. Akali andane, nimba-to pii epene langele okone mane nambana yamapane moo tambo laya ele. Namba nimbania piape wanda epene peteyai okone-pene mindi jia tekeko, nimbania pii oko mane namba mino tai laya ele leae-pia.

¹⁴ Otonga ulia nalaini angi, Boasa-to Lutu lamawuato, nimba onga epoto betesa mindi tupa moto waene ipa okona atelo naa leae-pia. Wuane lea-kola, piape wandakali peteaini ongane, Lutu bala

poto utupane towa atu peteae-pia. Petekola, Boasa-to lasia dini muti-lo yangene minditupa Lutu neakale mayae-pia. Laisa utupane ini ato katulo noo-embo yakola akinane yangi tepa yae-pia.

¹⁵ Lutu bala tomo noo koyo piyu, lasia dini itane towa yuunga tepa yane tupa yake puyale ika lea-kola, Boasa-to balana piape wandakali tupa lamawuato, wua leae-pia. Lasia dini itane towa yake pua yata olaini tupana mindi tupa yuunga tepa ene yolane tupa Lutu-to yapalo yake peando, yakamato bala loo yala olaini leae-pia.

¹⁶ Yakamato lasia dini itane towa yake pene tupana minditupa meakale yuunga aya-lo tepa alapape. Yuunga tepane tupa yapa-lo moo puta pula-kola yakamato yateka wato laiya lolaini leae-pia.

Eenga Minditaka Peane Tupa Lutu-to Naomi Lamayae-pia

¹⁷⁻¹⁸ Lutu-to lasia dini puta pua yomowa atea-kola, ole leae-pia. Ole lene lasia imbuni angane tupa peyo papaka loto nuu andane mindina lasia utupane tumbi-lo manduyu Beteleme tano poto, bala ayane wanda okone andawa leae-pia. Andawa lalu, lasia akenane otonga noto mandeane tupa bala ayane mayae-pia.

¹⁹ Maya-kola, balana wanda ayane okone mane bala tipa puato, andipa nimbato lasia utupa aninga mandilipe. Akali api eenga nimba piape pulu pelepe-lo tipa peae-pia. Nimba moyo atalaya akali okone bala, Akali Andane-to moo kui laya yakale leae-pia. Wuane lea-kola, Lutu-to pii okone yano peyoto, akali Boasa lene mindina eenga piape pua ata-lo leae-pia.

²⁰ Wuane lea-kola, Naomi-to, akali okone bala Akali Andane-to moo kui laya yakale leae-pia. Akali Andane-to wandakali omene, sakapi, utupane towa potomisa pii leyane tupa embesawa konda napiyaneko. Akali Boasa okone nanima yame tundupa mindiki oko, balato nanima katu-lo moyolo peya leae-pia.

²¹ Boasa-to pii mindi namba languto wua lala. Lasia dini tupa mandu koyo puato witi dini tupa tewa mandu koyo pulai angi kondola nimba nambana piape wandakali utupa towa atu pipe pua atalapape-lo langiya leae-pia.

²² Naomi-to bala ayane Lutu lamawuato, nimba akali waka mindina eenga piape pua atole-kola, ee okonena piape akali atolaini tupane mane nimbanga mana koo minulaini nimba Boasa balana eenga piape wanda tupa towa atu piape pua atape leae-pia.

²³ Lutu-to Boasana piape wanda tupa towa atu atoto, lasia mandu koyo piyu, witi dini tupa mandulu tone puato mandu koyo

peaini-pia. Bali witi utupane mandu koyo piyu bala ayane wanda okone towa atu peteapele-pia.

Boasa-to Mana Epene Miniane Oko

3

Naomi-to Lutuna Akali Mindi Aiya Pi-mayane Oko

¹ Oto mindi angi, Naomi-to Lutu lamawuato wua leae-pia. Ayane, nimba kui-lo pitula nambato nimbana akali mindi ayia pingukale leae-pia.

² Ayane, andipa nimbato ale-aa, piape wanda tupa towa nimbato piape pimawua atapi, akali Boasa bala nanima yame tundupa mindiki. Andipa utulu akali okone bala lasia takiloto, yata alaini ama okonena imbuni angane tupa peyo papaka lolo polopeya.

³ Andipa nimbato wasa-wasa kui-lo peyoto, wele tunduma epene piyane tupa ayia alu, tona epene tupa moo piyu, lasia takilo, yata alaini ama okonena nimba poto pitipe. Balato nimba pituleko andolane ando, topua pitipe. Bala, tomo ipapi ini nokoyo peakale nimba maliyo topua pitipe.

⁴ Tomo nalu, bala aninga paleyape-lo nimbato kuilo andape. Bala pangula ongane tengamane wete poto, balana kene yolane ongane palangisa minayu loto nimba palipe. Matili, wua pipe lo balato nimba langulu peya.

⁵ Lutu-to, pii okone yano peyoto wua leae-pia. Nimbato pipe lele pua nambato wuane pukale leae-pia.

Lutu-to Boasa Paleanga Tengamane Peane Oko

⁶ Naomi-to pipe leane pua Lutu bala lasia imbuni peyo papaka lalaini ama okona poto ataeae-pia.

⁷ Boasa bala, ulia ipa tupa nokoyo piyu, mini epene pelea-kola, lasia yata yaini mandaka ongane bala poto palia-ondo yae-pia. Palia-ondo yakola, Lutu bala tengamane wete poto, Boasana kene yanenga palangisa minayu loto, paleae-pia.

⁸ Matili utulu tombene wete okona Boasa bala moo peke loto andea-kola, wanda mindi balana kene yanga palea-kola, andoto bala moko leae-pia.

⁹ Moko loto, nimba apipe-lo tipa peake-kola, namba nimbana piape wanda Lutu leae-pia. Nimba Elemeleke yame tundupa mindiki, nimbato namba moyo ando atape peneko, nimbato namba keela leae-pia.

¹⁰ Boasa-to pii okone ale wato, wana Akali Andane okomane nimba moo kui laya yakale. Mana epene nimbato andipa minele oko mane, wamba nimbana ayane wanda oko towa mana epene minapi

tupa sia miniya. Iwana patane minditaka kambua yenepi, yaa napenepi, ateyai utupanena mindimane nimba kee leakalelo nembo natapiniya leae-pia.

¹¹ Wana, tano okona, wandakali pitakamane nimba wanda epene mindi petele-lo andeyaiko, nimba yuku olene, nimbato lele pua nimbato pukale leae-pia.

¹² Nimbato enene wete lele. Nimba akalini bala namba yame tundupa mindiki, nimbato kuilo nimba ando atape pene. Tekeko balana tundupa mindiki wetete akali mindi ateya okone mane piape okone pipe-pene.

¹³ Andipa nimba onga piti. Anati upapene nimbato akali okone tipa pulu pokale. Balato nimba kee loto moyo ando atokale leando, katu. Tekeko, balato jia leando nimbato nimba kee loto moyo ando atokale. Akali Andane-to andeya-kola nimbato enene wete leyoko. Waa leakale andipa nimba pangulu peke laa leae-pia.

¹⁴ Yuu waa-lo muna pea-kola, Lutu bala ika leae-pia. Ika lea-kola, Boasa-to bala lamawuato, nimba onga epoto paliliya-lo mindi mane andolaini andopupe leae-pia.

¹⁵ Boasa-to Lutu lamawuato, lasia mindi tupa gukale, lapo-lapo dumi oko lapona kinimane duli-lo minatawa-ata leae-pia. Boasa-to lapolapo okonena lasia 30 kg gaelo yataya-pia. Yata wato bala andaka awua peakale loto Lutuna kawanenga moo aiyamaiyu Boasa bala tanonga peke leae-pia.

Boasa-to Peane Tupa Lutu-to Naomi Lamayane Oko

¹⁶ Lutu bala andaka peke lea-kola, bala ayane wanda okone mane, namba wanane, nimba anu pua pele-pe. Wuane lea-kola, Boasa-to peane tupa pitaka bala ayane oko lamayae-pia.

¹⁷ Namba ayane, nimba peteleyanga namba mee peke nalola nembo toto, Boasa-to lasia utupa mandu puu loto namba giyakola, mandu epeyo leae-pia.

¹⁸ Wuane lea-kola, Naomi-to ayane, aki mindi nimbanga pulupeyape-lo nalipato nembo nateyapa tekeko mangene pula tupa andolanga mali yaa. Boasa bala mee ata napulu-peya. Jia. Piape okone baini kapoyale balato moo tika pulu peyako, leae-pia.

Akali Andane-to Naomi Moyane Oko

4

Boasa Bala Amene Towa Pii-lo Tika Peane Oko

¹ Wandakali amunguli piyaini tano asia lomba, ama okonena Boasa bala poto peteae-pia. Petea-kola, Elemeleke yame

tundupa mindiki akali okone bala epeakola, Boasa-to amene, nimbato pii ajako mindi nimba langukale nimba pitipakale onga ipu-lo ee leae-pia. Wuane lea-kola akali okone bala poto Boasa peteane ongane peteae-pia.

² Petea-kola, Boasa-to yuu okonena akali kawane paityasa epeakale loto, yakama epoto pitiyapa lea-kola, utupane ongane peteaini-pia.

³ Peteai-kola, akali Elemelekena yame tundupa mindiki okone lamawuato, Naomi bala Moapa tepa alu peke loto peteya. Bala akalini Elemelekena yuu okone balana tundupa mindiki, nalimbana mindi mane kambo mialapale-lo nembo teya leae-pia.

⁴ Okonena nimbato nimba ini tipa peyo. Nimbato yuu okone kambokale nembotendo nimbato akali kawane oo peteayai tupana wenonga yuu okone kambokale-la, jia nimbato kambo miana pukale lendo, nimbato kambo miana pukale lo namina yame wandakali ateyai utupa pitakana wenonga yuu okone kamba napukale-lo namba langule-kola nimbato yuu okone kambo mokale. Anu peakale-pe, yuu okonena pii nalipato lo-tika pipe pene. Nimbato ini lole-kola namba nimbana masinenga atape pene. Boasa-to wuane lea-kola akali okone mane loto nimbato yuu okone kambo mokale leae-pia.

⁵ Wuane lea-kola, Boasa-to wua leae-pia: Nimbato Naomi-na yuu okone kambo mole ang Moapa tane wanda yalo Lutu balapi molopele teke. Wuane pule okomane akali omene okonena yuu paluni okone bala yame tupana yamalupeya leae-pia.

⁶ Wuane lea-kola, akali okone mane loto, enene wete mindi taka utupane nimbana tekeko, mindi taka nimbana tupa andopane waka tupa towa tale pua mai napukaleko. Nimbato katu-lo yuu okone kamba napukale. Andipa mindi taka utupane nimbana eyako nimbato kambo mia leae-pia.

⁷ Wamba Isatale yame tupa mane yuu-pi, mindi taka mindi akali mindi mayuale pii ini lo tika piyu yakamana sendolo yokoto mayiani mana mindi yalae-pia.

⁸ Akali okone mane mana okone wato minoto balana sendolo yoko, Boasa mawuato, nimba tane yuu okone kambo mia leae-pia.

⁹ Wuane lea-kola, Boasa-to akali kawane peteaini tupapi, wandakali ateaini tupa pitaka lamawuato, Elemelekepi Kiline, Malonopi utupanena mindi taka tupa pitaka Naomi-to ando yatawa pitipiako. Andipa nimbato utupane pitaka yakamana wenonga kambo meyo oko, yakama pitaka mane andeyai-koni leae-pia.

¹⁰ Andipa nimbato yakamana wenonga

pii mindi teke tako pua leyo. Moapa tane wanda yalo Lutu, Malono wetene oko nam-bato kee leyo, Malono balana yuu tene oko, balana paluni yolopeya. Bala yame tupamanne yuu okone balana gene atene eyalo nembo tatawa atolo peyai. Andipa nam-bato peyoko yakamato andeyai-koni leae-pia.

¹¹ Wandakali peteaini tupapi, akali kawane yame utupane pitaka mane wua leaini-pia. Andipa nanimato andeyama, wanda oko bala nimba andaka epeya. Akali Andane-to Isatale yame nanimana wanda awuane, Liya, Lesolo-la yale guu laya ola-kola, Epalata yuu okona nimba akali andane gene yene mindi Beteleme tano okona atolopele.

¹² Akali Andane okomane andopane kam-bua liyamba gula-kola, nimba yame tupa gene andane yene nimba yumbane Juta, Tamala iwanane Petesa yame ateane pua atolopeyai leaini-pia.

*Naomi Auwane Iwana Mindi Lutu-to
Mandeane Oko*

¹³ Boasa-to Lutu kee lea-kola, Akali Andane-to Lutuna ini moo tika peae-pia. Wuane pea-kola, balato iwana mindi mandeae-pia.

¹⁴ Wanda minditupa mane Naomi lamawuato, nanimato Akali Andane nim-bana gene layu lama. Balato nimba angu pitula-lo ando kondanapeya. Jia. Nimba moyo ando atekale nimba yumbane iwana mindi Akali Andane okomane nimba geya. Iwana okone bala Isatale yamena gene yene akali mindi atekale leaini-pia.

¹⁵ Nimbana ayane okone mane nimba wayu mane wete epele eya-kola nimbato-pi, bala epele alane teke. Nimbato iwana yanasia mandipi-yale, epele-ene nimbanan wanda ayane okonga eya okone mane utu-pane sia minapiyale. Tekeko, andipa balato iwana mandeya okomane nimba saka lee taya olo peke laya eya. Nimba mini yole okone angi, iwana okone mane moyo ando atolo-peya.

¹⁶ Naomi-to andopane okone moto, yatawa peteae-pia.

¹⁷ Wanda yuu okonena mandaka peteaini tupa mane Naomi-to iwana mindi wamba opelo aiya leaini-pia. Wuane loto iwana okonena gene Opeta leaini-pia. Opeta-to Jesi mandeae-pia. Jesi-to Dapiti mandeakola, bala Isatale yamena kinji andane mindi atea-pia.

mandeae-pia. Boasa-to Opeta mandeae-pia. Opeta-to Jesi mandeae-pia. Jesi-to Dapiti mandeae-pia. Akali utupane pitaka Petesana mandi-yene yumbane yame tupa ateaini-pia.

Utupane Kinji Dapiti Yumbane Yame

¹⁸⁻²² Petesa-to Esetone mandeae-pia. Esetone-to Lamo mandeae-pia. Lamo-to Aminatape mandeae-pia. Aminatape-to Nasono mandeae-pia. Nasono-to Salamone mandeae-pia. Salamone-to Boasa

Jonana

Pii Temane Oko

Pii Ini Dii Lape-pene Oko

Jona-na pii temane okona tene oko nembo toyale, pii ukupini pepa pelene eya oko ini dii lalapape. Ninipe tano tane wandakali tupamane mana koo wetete tupa minu ateai-kola, utupane-mane yamapane mo peke leakale nembo toto, Gote-to Isatale yamena potopesa akali Jona lamawuato, Ninipe tane tupamane mana koo wete miniyai tupa konda yakalenga nimbato nambana pii oko utupanenga lamalu puu leae-pia. Gote-to wuane leane tekeko, nambato pii lamauluwa-kola, Ninipe tane wandakali tupamane yamapane peke lolai-kola Gote-to utupane minu koya napulu-peya yalua nembo toto, bala mini koo paluto, Gote ateanga ata napukale nembo toto, bala Tasisa tano okona palaka moyape peae-pia. Gote-na pii temane okomane nanima mana langiyane. Balato balana pii wato mina napene, bala towa yanda-pene wandakali tupa ondo wato, moyo atalane. Wuane pua teke, temane okomane Jonapi, nanimapi, nanima towa yanda-pene wandakali waka tutapi ondowa moyape-pene leya.

Jonato Gote Tepa Alu Palaka

Poyle Peane Oko

Sapeta 1-2

Jona Palaka Peane Oko

1-2 Ole mindi Gote-to akali Amaita iwanane Jona bala lamawuato, Ninipe tano andane okona tane wandakali tupamane koo andane wetete pua atapiai tupa nambato wamba andawuako. Mana koo utupane konda yakale nimbato nambana pii oko tailo lamalu puu leae-pia.

3 Jona-to Gote-na pii lamaulu pupe-pene tekeko, Gote tepa alu, palaka Tasisa tano okonena moyape, solewata ayatenenga Jopa tano okona peae-pia. Poto sipi mindi Tasisa moyape okonena sipi anduane okonenga yole mayu, bala sipi okonena pekayu lo peetae-pia.

4-5 Jona bala limu wato, sipi okonena tene anda-pangosa poto, limu paliondowa paleae-pia. Limu paliondo ya-kola, matili Gote-to popo tai andane wete mindi epeakale leae-pia. Popo okone-mane sipi okone peyo-keao laka peae-pia. Piape akali tupamane sipi okone keao leya-lo andoto, yakama yuku yaini-pia. Yuku wato, yakamana gote tupamane yakama moyakale loto yale-yale pote laka peaini-pia. Wuane piyu, pinju kenda peane mandeaini okomane sipi okone landa

peyoto ipa pangosa polane lo yuku wato, pinju yane tupa solewatanga moo tepaka peaini-pia.

6 Wuane pua ateai-kola, sipi ingane minalane akali okomane Jona ayia pua andoto, anu piakale nimba pali-ondowa eleae-pia. Nanimanga omolomane nimbato pote laa. Nanimanga kendane epeyako nimbana gote okomane andoto nanima ondo wato moyakale, nimba ika loto, nimbana gote oko-lo ee-lo pote laa leae-pia.

7 Okone ang, piape akali tupamane wua leaini-pia. Kendapene nanimanga epeya okona tene oko apinga eyapello andamakale, nanima pitakana gene tupa yale-yale pepa tupana peyoto, pene mindina aindaka lamakale. Pene okonena gene molomane akali okone balanga tene atola-kola, nanimanga kendapene mee epeya-lo nanimato katulo andolo-peyama leaini-pia. Utupane-mane wuane peai-kola Jona balana gene oko epeanga andeaini-pia.

8 Andoto, utupane-mane Jona lamawuato, kenda-pene nanimanga epeya okona tene oko nimbato nanima langi. Nimba onga aki pua atalepe, nimba akali anitanep. Nimba akali yame andokope-lo tipa peaini-pia.

9 Wuane lo tipa peai-kola, Jona-to utupanena pii yano peyoto, namba akali yame Iputu. Ati-kenga Gote ateya okomane yuupi, ipa solewata-pi, yakale lalane, Gote okone tungi peyo nambato lotu lo atawawane.

10 Gote okone tepa alu, namba palaka moyape epo peteyoko leae-pia. Wuane lea-kola, akali utupane yakama yuku wete yaini-pia. Yuku wato, utupane-mane Jona lamawuato nimbato kopeta pipi-kola, Gote-to solewata mina ika loto nimba peyo ome loyale peyape leaini-pia.

11 Popo tai towa-towa ipa sii andane ika leayako tepa ola-kola nanima kuilo makale nanimato nimbanga anu pimape-lo akali utupane-mane Jona tipa peaini-pia.

12 Balato pii okone yano peyoto, popo andane tai oko towa-towa ipa kingi epeya okona tene oko nambanga ateya. Popo kingi okolapo tepa ola-kola, yakama epene pulupalenga yakamato namba ipa solewata okona awua aindaka lalapa leae-pia.

13 Piape akali tupa mane sipi okone ingane minu-awua ayatenenga makale nembo toto makande peaini tekeko, sii-andane wete ika lea-kola utupane-mane katulo ipa ayatenenga napupe-pene guu leae-pia.

14 Utupane mane katulo ipa ayatenenga napolo-peyama yaa-lo andoto, Gote ee loto, wua leaini-pia. Gote nimba tane pukalelo nembo tapi pua teke pele oko. Akali

okomane koo mindi napiya-kola nanimato bala ipa solewata okona omea-kale loto aindaka leyama. Bala omola okonena tene oko nanimanga eya loto, nimbato nanima omamakale-lo ando konda napipe-lo pote leyama leaini-pia.

¹⁵ Utupane-mane wuane lo pote lokoyo piyu, Jona minoto, ipa solewatanga awua aindaka leai-kola, sii andane ika leane okone kapoyale okone angi teke tepa yae-pia.

¹⁶ Akali utupane mane ipa solewata ika lea oko kapoyale tepaya-kola andoto Gote yukuwa, opa maiyu, potomisa loto, balana pii wato minamakale leaini-pia.

¹⁷ Oto okone angi, Gote-to pisa andane wetete mindimane Jona goae leakale laya ya-kola, Jona bala pisa andane wetete okonena ini andapangosa utulu otongapi, ole tepoi paleae-pia.

2

Jona Pisa Ininga Panguto Pote Leane Oko

¹ Jona bala pisa andane wetete okona ini anda pangosa paluto, balana Gote Akali Andane okone-lo pote leae-pia:

²⁻³ Akali Andane nambanga kendapene ipupia-kola nimba ee lawuako, nimbato yano peyapi. Namba wandakali omene atalaini yuu okona atoto, nimbato namba moyola-lo aila lawuako-kola, nimbato nambana ai lawuako alewato yano peyapi. Nimbato solewatanga namba awua aindaka lapi-kola solewata mane namba ombo atane pango nenanga wete ateyo.

⁴ Nimbato namba wato apipini-yalo lawua tekeko, nimbato nimbanwa lotu anda andane ateyo oko andolo peke lokaleya.

⁵ Solewata ika loto, namba yame peya mangua wato namba peyo ome loyale pi-pia. Solewata okona tani kamalumbi ateane tupamane nambana kawanenga epoto, yame peyo ombo apiya.

⁶ Solewata kundu pango nenanga wete okona namba andi lapi-kola, solewata mandaka ati peleya tupana pini tupamane namba andi latane atauwa tekeko, nambana Gote, nimbato namba molo peke lapi.

⁷ Namba omape-pene guu-lo yoto nimbato Gote nimba nembo tolo-peke loto, pote lawuako nimbanwa lotu anda andane okona atoto, ale apini yaa.

⁸ Owato gote tupamane katulo wandakali tupa moya napiyaini tekeko, wandakali mindituka-mane utupane-lo lotu lalaini. Gote-to owato gote lotu lalaini wandakali utupane ondo wato, moyapia-yale tekeko, utupane-mane balana ondo ene oko masia mayiaini.

⁹ Gote nimbato angu nanima molo peke lalene. Tene okonena nambato wee-tomo tupa loto, opa nimba giyu, nimbana gene oko layu lokale. Minditaka pukale-lo nimba towa potomisa lawua tupa pukale leae-pia.

¹⁰ Jona-to wuane lea-kola, Gote-to ale wato, pisa andane wetete okonane Jona miangu-tangu, solewata ayatenenga aikamaka leakale lea-kola pisa okone mane Jona miangu-tangu aikamaka leae-pia.

Jonato Gotena Pii Ninipe Tane Lamayane Oko

3

Sapeta 3-4

Jonato Gotena Pii Watoto Ninipe Peane Oko

¹ Gote-to lapone teke Jona lamawuato,

² Nimbato tano andane Ninipe okonena puu. Poto, nimbato nimba pii giwa tupa tano okonena tane wandakali tupa lamaipe leae-pia.

³ Gote-na pii okone wato minuto, Jona bala Ninipe tano okonena peae-pia. Ninipe tano okone, tano andane gene yene mindi yaepia. Wandakali mindimane tano okonena ayatene ukusa tole ato kee asini angu poto, tano okonena ayatene amoyangisia moyale peando, katulo, ole-tepo pitaka palane.

⁴ Tano andane okonena Jona-to ole-mindikina angu poto, pii taimane wandakali ee-loto wua leae-pia. Matili ole payisia tukumindi (40) tupa pokoyo pulakola, Ninipe tano oko wete koyolo-peya leae-pia.

⁵ Ninipe tane wandakali utupamane Gotena pii okone alewa nembo minoto, wua leaini-pia. Akali gene yenepi, nayenepi, nanima pitaka mane tomo nanene jia loto, nanima tane ondo leyama-lo andawa loto, nanima pitaka mane ondo tona pimakale leaini-pia. Pimakale leaini wuane pua, teke peaini-pia.

⁶ Ninipe tane kinji okomane pii okone ale wato kinji pitiyane sia toko okone tepe yae-pia. Balana tona piyane tupa yata wato, yamapanne peke leyo-lo andawa loyale laisa beke mane waa-pene ondo tona moo-puato, bala ita talane pete-yanenga peteae-pia.

⁷⁻⁸ Wuane piyu, Ninipe tane kinji okomane wandakali pitakanga pii wua-lo awu tawe yakale leae-pia: Nambapi, nambana akali kawane yame, nanima pitaka mane pii oko yakama langeyama. Yakama pitaka mane tomo ipapi nanene kondalapape. Wandakali yakamapi, dee, yakamana bulumakao, sipisipi, memepi, utupane pitaka mane tomo ipapi, jia-loto nanene konda yakale lalapape. Yakama pitaka mane yamapanne peke leyama-lo andawa

loyale, laisa beke mane waa pene ondo tona piyaini taka tupa pua atalapape. Wuane piyu, yakamato yakamana sipisipi, bulumakao, memepi, utupane pitaka beke mane waa pene lapolapo tupamaneyame peyamai yapape. Yakama pitaka mane koo piyaini tupa pitaka kondalapape. Gote-to nanima ondo wato koo namimana apiangeakale yakamato pote tai-lo lalapape.

⁹ Nanima pitaka-mane wuane pulumakola, Gote-to nembo-tene lawa puato, nanima peyo ome lanapene kondeyape-lo andamakale leae-pia.

¹⁰ Utupane-mane koo pua ateaini tupa awua tepa alu lawa peyama-lo wuane pua ateakola, Gote-to andoto, balana nembo-tene lawa puato, utupane peyo ome naleae-pia.

4

Gote-to Ninipe Tane Ondo Yakola, Jona Yataka Yane Oko

¹ Gote-to balana nembo tene lawa puato, Ninipe tano okone mino koya napea-kola, Jona bala mini koo paluto, yataka wete yae-pia.

² Balato Gote ando pote wua leae-pia. Gote nimbato ini kapoyale embo aa-napilini. Jia. Ole dindi lo nimbato wandakali tupa wayumane wete ondowato epelewa yamapane yoo atalene. Nimbato wamba ini wandakali tupa minu koyoyale mandeke pitawa atoto teke, matili mino koya napilini. Wamba namba andaka atoto, wua lo nembo tewa: Namba yame towa yandapene Ninipe tano okona poto, nimbana pii oko wandakali utupane lamaewando, nimbato Ninipe tane wandakali tupa peyo ome nalolo-pele-yalo nembo toto, nimbato nimbala tupa alu, palaka Tasisa tano okona moyale pewako.

³ Namba yame towa yanda pene Ninipe tane tupa Gote nimbato peyo ome lanapene kondele okonena, namba omewando, katu lolo peyako nimbato namba ini mino ome laa leae-pia.

⁴ Jona-to wuane lea-kola, Gote-to balana pii okone yano peyoto, Jona nimbato katu-lo yataka elepe leae-pia.

⁵ Tano okonena aki mindi peyape-lo andoyale, Jona bala tano okone tupa alu poto, nai-epalanesia anda mindi pitawato okonena peteae-pia.

⁶ Gote-to Jona nai toto olane loto, eyaka yokone pata atalane okone taka mindi, ayi-akame okone yame peyo ombo yakale leae-pia. Jona bala eyaka okonena tambo pangosa pitoto bala epele wete yae-pia.

⁷ Anate-lene upanda wete Gote-to eyaka yokone nalane sau-nana mindimane eyaka

okone noo kapu teakale lea-kola, kapu teae-pia.

⁸ Matili nai tea ang, Gote-to nai epalanesia ato popo toto pene wetete mindi epekal lea-kola, nai toto peane okone mane Jonana kawane tandaka piya wato, moo malawai laya yae-pia. Malawai lea-kola yuunga lombape-pene yoto, namba omokale okone mane katu-lo namba moyolopeya. Namba omanape-wando katu-lo namba moya napulu-peya leae-pia.

⁹ Wuane lea-kola, Gote-to Jona lamawato, eyaka kapu tala oko towa nimbato yataka eleko. Nimbato tika pua yataka elepe lea-kola, Jona-to pii yone yano peyoto, namba yataka wete eyoko, namba ometwando okone kuai leae-pia.

¹⁰ Jona-to wuane lea-kola, Gote-to Jona lamawato, utulu mindiki okona ato eyaka oko ikalo anda-yoo atala, utulu lapone okona eyaka oko omala. Nimbato pi-ape ajako mindikipi mindi eyaka okona pinapili, dee andane guleakale-lopi mindi lanapili tekeko, ajako okona nimbato wayumane wete ondo elepe.

¹¹ Nambatopi Ninipe tano oko ondo wete eyo. Tano oko andane wete mindi eyakola, wandakali andita tuaindi tausene (120,000) wata aipeke-lo ateyai. Wandakali utupane pitaka mane mana epene mindi anda napayaini. Bulumakaopi, kambua wete tano okonena ateya leae-pia.

Yakamato pii temane okone ale wato, pii ukupini pepa pelene eya tupa dii loto ale-alapape. Gote-to lapone Jona lamawato, nimbato nambana pii oko Ninipe tane wandakali tupa lamalu puu leae-pia. Jona-to Gotena pii wato minuto, Ninipe tane bala towa yanda pene wandakali tupa Gotena pii lamaiyae-pia. Utupane mane yamapane moo peke leakola, Gote-to utupane ondo wato, minu koya napeae-pia. Wuane pua teke, naminatopi yanda pene tupa ondo wato, moyape-pene leya.

MATIYU

Gotena Pii Layene Epene

Matiyuto Pepa Peleane Oko

*Jisasa Yumbane Yamena Gene Tupa
Luku 3:23-38*

¹ Jisasa Kataisana yumbane yame atama epeaini tupana gene tupa pepa okona peyataney eye. Jisasa bala Dapiti yame okona mandiyene mindi ateapia. Dapiti bala Apatakame yame okona mandiyene mindi ateapia.*

² Wamba Apatakameto Aisake mandaipia. Aisaketo Jekopo mandaipia. Jekopoto Jutapi, Jutana amene tupapi, utupane mandaipia.

³ Juta-la, wanda Tema-la, okonelapo-mane Petesa, Seto-la, okonelapo mandaapele-pia. Petesato Esotone mandaipia. Esotoneto Lamo mandaipia.*

⁴ Lamoto Aminatape mandaipia. Amimatapeto Nasone mandaipia. Nasoneto Salamone mandaipia.

⁵ Salamone-la, wanda Leapa-la, okonelapo-mane Boasa mandaapele-pia. Boasa-la, wanda Luta-la, okonelapo-mane Opeta mandaapele-pia. Opetato Jesi mandaipia.

^{6a} Jesito kinji Dapiti mandaipia.

^{6b} Dapitito Solomone mandaipia. Wamba Solomone okona angini oko bala akali Yutaya okona wetene oko peteapia.*

⁷ Solomoneto Leapome mandaipia. Leapometo Apiya mandaipia. Apiyato Asa mandaipia.

⁸ Asato Josapata mandaipia. Josapatato Jotama mandaipia. Jotamato Usaya mandaipia.

⁹ Úsayato Jotama mandaipia. Jotamato Easa mandaipia. Easato Esakaya mandaipia.

¹⁰ Esakayato Manasa mandaipia. Manasato Emone mandaipia. Emoneto Josaya mandaipia.

¹¹ Josayato Jekonayapi, balana amene tupapi, utupane mandaipia. Okone angi, Bapilone yuu okona tane tupamane Isatale tane wandakali tupa andi lo awua peainipia.*

¹² Bapilone yuu okona tane tupamane Isatale tane tupa andi lo awua peai-kola, Jekonayato Siatele mandaipia. Siateleto Setapa-pele mandaipia.*

¹³ Setapa-peleto Apiata mandaipia. Apitato Elaya-kimi mandaipia. Elaya-kimito Eso mandaipia.

¹⁴ Esoto Setoko mandaipia. Setokoto Ekimi mandaipia. Ekimoto Eliyutu mandaipia.

¹⁵ Eliyututo Eliasato mandaipia. Eliasato Matane mandaipia. Mataneto Jekopo mandaipia.

¹⁶ Jekopoto Josepe mandaipia. Josepe bala wanda Matiya okona akalini. Matiyato Jisasa mandaipia. Wandakali-mane Jisasa gene mindi Kataisa lalaini.

¹⁷ Wamba wetete Apatakame atea-angi ipapo wato, Dapiti atea-angi gäu loto, yumbane yame atama epeaini utupane yame ingasa ateainipia. Dapiti ateane okone angi atama ipapo wato, Bapilone tane tupamane Isatale tane tupa andi lo awua peaini-angi gäu loto, yumbane yame atama epeaini tupa yame ingasa teke ateainipia. Bapilone tane tupamane Isatale tane tupa andi lo awua peaini okone angi atoto, ipapo wato, Matiyato Kataisa mandeane-angi gäu loto, yumbane yame atama epeaini tupa yame ingasa teke ateainipia. Jisasa yumbane yame ingasa tepo tupa pitaka wuane pua atama epeainipia.

Matiyato Jisasa Mandeane Oko

Luku 2:1-7

¹⁸ Matiyato Jisasa Kataisa mandeane pii temane okomane wua leya: Wamba Matiya yame tupamane bala Josepene peakale leaini tekeko, liyamba mina mindiki naleyapi wete, Oli Sipitisa okomane andopane mindi Matiyana ininga pete lea-kola, wandakali-mane Matiya bala andopane mindi mandulu-peya ya lo andeaini-pia.*

¹⁹ Bala bakale lene Josepe oko bala akali epene tika-pene mindi atoto, Matiya moyala aya na-wakale loto, wanda oko kee na-lene, mee tenga-mane tepa wakale nembo tatawa paleaipia.

²⁰ Josepeto wuane nembo tatawa palea wete, kombeya-mane Akali Andane okona enjoje mindi epoto, Dapiti yamena mandiyene Josepe nimbatu Matiya nimba bakale lene oko lamoyale yuku naene, lamiape leaipia. Andopane mindi balana ininga petecko o Oli Sipitisa okomane pete lea apiane mindi petecko.

²¹ Balato iwana okone mandula-kola, matili iwana okonemane bala yame tupana koo tupa apoto, utupane molo-peke lolopeya-ko. Nimbatu balana gene Jisasa lape. Enjole okonemane wuane leaipia.*

²²⁻²³ Wamba potopesa akali mindimane Akali Andane okona pii mindi leane oko loto, ale alapape, wana mapokae akali mindi towu mina mindiki naleyapi.

* **1:1:** 1Tem 17:11; Jen 22:18 * **1:3:** Jen 38:29-30 * **1:6b:** 2Sa 12:24 * **1:11:** 2Ki 24:14-15; 2Tem 36:10; Jet 27:20

* **1:12:** Esa 3:2 * **1:18:** Lk 1:26-27,35-37 * **1:21:** Lk 1:31; 2:21

mindina ininga andopane mindi pitulupuya leaipia. Wana okonemane iwana mindi mandula-kola, wandakali-mane balana gene oko Emanuale lolopeyai. Gene Emanuale okonena tene oko Gote nanima towa atu ateyama leaipia. Potopesa akali okonemane pii leane okone enene guleakale loto, Goteto mangene utupane pitaka wuane piya yaepia.*

²⁴ Josepe bala limu paliyu, ika loto, Akali Andane okona enjoje okonemane bala lamaiyane pua, wanda Matiya oko kee leaipia.

²⁵ Balato bala kee leane tekeko, Matiya bala Josepe towa mina mindiki nälene teke pitima pulu, iwana oko mandaipia. Mandea-kola, Josepeto iwana okonena gene oko Jisasa leaipia.*

2

Mana Andene Akali Minditupa-mane Jisasa Andolo Epeaini Oko

¹ Etote bala kinji atea-angi, Matiya bala Jutiya disitiki tano Beselekeme okona pituto, Jisasa mandaipia. Mandea-kola, kaiyanda tupana mana andene akali minditupa nai epelanesa-tole yuu mindina ato Jutusaleme epeainipia.

² Epoto, utupane-mane pii mindi loto, nanimato andaima-kola, Juta yame kinji okona kaiyanda oko nai epalanesa-tole epo atapi leainipia. Kaiyanda okone andalu, iwana mindi matili Juta yamena kinji atolopeya okone bala mandiyene eya nembo teyama. Wuane nembo toto, nanimato iwana okone lo lotu lolo epeyama-ko. Bala aninga mandiyene eyape lo tipa peainipia.*

³ Jutusaleme tane wandakali tupamane pii okone ale wato, utupane pitaka-mane nembo kambua teainipia. Kinji Etote balatopi pii okone ale wato, anu puape lo nembo kambua teke teaipia.

⁴ Nembo kambua toto, balato pitisa akali kawane tupapi, loo tupana mana andene akali tupapi, utupane pitaka epeakale loto, mo amunguli peainipia. Amunguli peai-kola, balato utupane tipa puato, angini-mane Mesaya oko yuu andokona mandulu-peya layene eyape leaipia.

⁵⁻⁶ Wuane lea-kola, utupane-mane bala lamauwato, wamba potopesa akali mindimane Gotena pii mindi pepa peyoto, wanda mindimane Jutiya disitiki tano Beselekeme okona pituto, ando atolane akali mindi mandulu-peya. Mandula-kola, akali okonemane Isatale tane wandakali nambana yame atekale lata ewane tupa moyo ando atolopeya leane leainipia.

Akali okonemane wuane pua atala-kola, Beselekeme tano nimba Jutiya disitiki okona tano kambua tupa sia minuto, nimba tano gene yene wete mindi yolopele lo pepa pelene eya. Nanimato pepa okone dii lo andoto, angini-mane Mesaya oko bala Jutiya disitiki tano Beselekeme okona mandulu-peya layene eya lo andeyama leainipia.*

⁷ Wuane lea-kola, Etoteto kaiyanda utupane mana andene akali utupane angu epeakale loto, utupane tenga-mane too pua tipa puato, andoko angi kaiyanda okone epo atapipe leaipia.

⁸ Utupane-mane balana pii okone yano peleai-kola, balato utupane lamauwato, nambatopi andopane okone lo lotu lokaleko. Yakamoto Beselekeme yuu okona poto, bala aninga eyape lo wayumane aiya piyapape. Yakamoto bala aiya pua andolai-angi, namba langima peke lapapape leaipia.

⁹⁻¹⁰ Wuane lea-kola, utupane-mane kinji okona pii okone ale alu, Beselekeme tano okona moyale asini peainipia. Asini peai-kola, wamba nai epalanesa-tole atoto epeane kaiyanda andeaini okone ingane peainipia. Ingane pea-kola, kaiyanda tupana mana andene akali utupane-mane kaiyanda okone andoto, epele wete wato, kaiyanda okone watama peainipia. Watama peai-kola, kaiyanda okone ingane poto, andopane yane anda okona tokonga ateaiapia.

¹¹ Atea-kola, akali utupane yakama anda okonena kolandaka loto, andopane okola, balana angini Matiya-la, okonelapo andeaini-pia. Andoto, akali utupane-mane aiki leka wato, andopane okone lo lotu leainipia. Lotu lo koyo piyu, utupane-mane yakamana nuu tupa tanguto, golopi, tua tunduma-pene pautapi, ita tongone tunduma-pene yole andane-mane kambene minditupapi, utupane moto, andopane okone bala petesene mayainipia.*

¹² Maiyu, utulu paleai-kola, Goteto akali utupane kombeya pimauwato, yakama kinji Etote ateya okona peke lolaini leaipia. Wuane lea-kola, akali utupane-mane ika loto, asini waka mindina yakama yuunga peke leainipia.

Isipi Yuu Okona Palaka Peaini Oko

¹³ Akali utupane peke lea-kola, Goteto Josepe kombeya mindi pimaya-kola, Akali Andane okona enjoje mindimane panakame epoto, Josepe lamauwato, Etoteto andopane oko peyo ome lokale nembo toto, bala aninga eyape lo aiya puyale mandeke peya leaipia. Balato

* 1:22-23: Ais 7:14 * 1:25: Lk 2:21 * 2:2: Nam 24:17
60:6

* 2:5-6: Mai 5:2; Jo 7:41-42 * 2:11: Sam 72:10-15; Ais

andopane okone peyo ome lolane. Nimba ika loto, andopane angini-la atu aiyu, Isipi yuu okona palaka poto atalapape. Matili nambato yakama peke lalapa lolowa-angi, yakama peke lalapale leaipia.

¹⁴ Enjole okomane wuane lea-kola, utulu okone angi teke Josepe bala ika loto, andopane angini-la atu aiyu, Isipi yuu okona peainipia.

¹⁵ Poto, utupane Isipi yuu okona ateai wete, Etote bala omeaipia. Wamba potopesa akali mindimane Akali Andane okona pii mindi leane oko loto, nambana iwanane oko bala Isipi yuu oko tepa alu, epeakale lewa leaipia. Pii okone enene guleakale loto, matili Etote omenenga, Goteto Jisasapi, balana angini ayianepi, utupane Isipi yuu oko tepa alu epeakale leaipia.*

Iwana Kambua Peyo Ome Leaini Oko

¹⁶⁻¹⁸ Wamba potopesa akali Jetemayato pii mindi loto, wanda Lesolo okona andopane tupa omolai-kola, bala yali ee lo ai andane lo pitulu-peya leaipia. Ai lo pitula-kola, Lama tano okona tane wandakali tupamane ale wato, balana yamapane mo epele piya amakale nembo tolopeyai tekko, balana andopane tupa ata napulai-kola, Lesolo bala mini epene pali napene, mini kendawa pitulu-peya leaipia. Kaiyanda tupana mana andene akali tupamane Etote minakasa wato, asia waka mindina peke leai-kola, Etoteto utupanena mana okone andoto, yataka wete yaepia. Yataka wete wato, kaiyanda tupana mana andene akali tupamane kaiyanda okone ole oko angi epo atapia lo bala lamai-yaini okone nembo tolo-peke leaipia. Okone nembo tolo-peke loto, balato akali minditupa lamawuato, yakama Beselekeme tano okonapi, Beselekeme ongane mandaka yuu yalane tapanapi, yuu utupane pitakana poto, iwanaaja mali lapo penepi, mali lapo napeneipi, utupane pitaka peyo ome lalapape leaipia. Wuane lea-kola, akali utupane-mane iwana utupane pitaka peyo ome leaini okomane pii wamba potopesa akali Jetemayato leane okone enene guleaipia.*

Nasatesa Tano Okona Peaini Oko

¹⁹⁻²⁰ Kinji Etote omea-kola, Josepe bala Isipi yuu okona atoto, kombeya mindi pea wete, Akali Andane okona enjole mindi epoto, andopane oko peyo ome loyale makande pua atapiak akali tupa omapiai-ko. Nimba ika lalu, andopane angini-la atu aiyu, Isatale yuu okona peke laa leaipia.

²¹ Balato wuane leane oko ale wato, Josepe bala ika loto, andopane angini-la atu aiyu, Isatale yuu okona peke leainipia.

²² Josepe bala peke loto, ale ya-kola, Etote iwanane Akele-yasa lene oko bala ayanena banda moto, Jutiya disitiki oko ando ateya lene oko ale yaepia. Ale wato, Josepe bala yuu okonena moyale yukuwa atea-kola, Goteto Josepe kombeya mindi pimawuato, Josepe nimba Jutiya disitiki okona polene leaipia. Wuane lea-kola, Josepe bala ika loto, andopane angini-la atu aiyu, Galili disitiki okona peapipia.

²³ Poto, utupane Nasatesa tano okona ateainipia. Wamba potopesa akali tupamane pii mindi loto, wandakali tupamane Mesaya oko bala Nasatesa tane mindi ateya lolopeyai leainipia. Jisasa bala Nasatesa tano okona poto atea-kola, potopesa akali utupanena pii okone enene guleaipia.*

3

IPA PEYA-MAIYANE AKALI JONETO GOTENA PII LEANE OKO

Maki 1:2-8; Luku 3:1-22; Jone 1:19-28

¹⁻⁴ Okone angi, ipa peya-maiyane akali Jone oko bala Jutiya disitiki okona epoto, wandakali napalene yuu mindina ateapipia. Balana tona yia kamele itini-mane waapene mindi umbaininga piyu, matipu bulumako umbaini-mane waa-pene mindi pua atalaepia. Balato neme ipane-mane waa-pene tomo oni lene siapusa lialane tupapi, palai tupapi, utupane no atalaepia. Wamba potopesa akali Aisayato Jone andayo, Gotena pii mindi loto, akali mindimane wandakali napalene yuu mindina atoto, pii taimane loto, yakamoto Akali Andane oko epolane asini mindi mandeke pua yata mawuato, balana asini anjako tupa mo tika piyapape lo atolopeya leaipia. Potopesa akali Aisayato pii okone leane pua teke, Jone bala wandakali napalene yuu okonena atoto, Gotena pii oko wandakali tupa lamaiki puato, ati kenga yuu epene okona atalane akali okomane yakama moyo ando atoyale mandaka gulo epeya-ko. Yakamoto yamapane peke lalapa lamaiki peapipia.*

⁵ Joneto wuane loto, pii lamaiki pea-kola, Jutusaleme tanepi, Jutiya tanepi, ipa Jotane mandaka atalaini wandakali tupapi, utupane pitaka bala ateanga ipuku peainipia.

⁶ Ipuku puato, utupane-mane yakamana koo piyaini tupa lo pana aka peai-kola, Joneto ipa Jotane okona atoto, utupane ipa peya-maiki peapipia.

⁷ Joneto utupane ipa peya maiki pea-kola, Patasai tupapi, Satusi tupapi, utupanena

* 2:15: Ose 11:1 * 2:16-18: Jet 31:15; Jen 35:19 * 2:23: Lk 2:39; Ais 11:1; 53:2; Jo 1:45 * 3:1-4: 2Ki 1:8; Ais 40:3;

kambua minditupa ipa mia-makale lama epeainipia. Epeai-kola, Joneto utupa andoto, yakama etulu gepo-mane mandiyene yame ateyai leaipia. Goteto yakama towa yataka wato, kenda-pene minditupa yakama gulupeya-ko. Apito wuane lo yakama langipia-kola, Goteto kenda-pene utupane yakamanga epeakale lolane lo yuku wato, yakama palaka epoto, ipa mia-makale leyaipe. *

⁸⁻¹⁰ Goteto ana oo eya utupa Apatakame yame gulalapa leando, ana utupa-mane katulo Apatakame yamena mandiyene wandakali tupa gulolo-peyai. Wuaneko, yakama teke-teke pii lalawa puato, nanimia Apatakame yame wandakali ateyama-ko. Goteto nanimia towa yataka wato, kenda-pene mindi nanimia gii napulu-peya lolaini, ando atalapape. Goteto ita koo tupa yokoyale, uu mindi ita tenenga yata yane eya. Dini epene lia napiyane ita tupa pitaka balato yoko wato, ita too atene okona yangolo-peyako. Ita epene tupanga dini epene lialaini pua, yakama mini peke loto, mana epene tupa wato minalapape. *

¹¹ Akali mindi epolopeya okonena tai-lene okomane nambana tai-lene oko sia minulu-peyako. Nambato balana sukee pula oko ai maipe-pene namba akali epene mindi jia. Yakama yamapane peke leyai-kola, nambato ipa-mane yakama ipa peyageyo tekeko, akali matili epolopeya okomane Oli Sipitisa okola, ita kaiyapiane okola, okonelapo-mane yakama ipa peyagulupeya. *

¹² Balato sapolo mindi awua ateya okomane witi dini epene tupa balana tomo yalane anda okona yata wato, witi imbuни tupa aki puato, ita too koyo napiyane mindina yangolo-peya. Wuane piyu, balato utupanena minditupa balana piapе piyane ama okonena mee yakale lo ando konda napulu-peya. Jia. Joneto wuane leaipia.

Joneto Jisasa Ipa Peya-maiyane Oko Maki 1:9-11; Luku 3:18-22

¹³ Okone angı, Joneto bala ipa peyageakale nembo toto, Jisasa bala Galili disiti oko tepe alu, ipa Jotane okona epeaiapia.

¹⁴ Jisasa ipa molo epeane tekeko, Joneto bala lamawuato, nimbato namba ipa peya gipi-yale, okone kuai lapia-yaleko. Anu peakale nambato nimba ipa peya-gii lama epelepe leaipia.

¹⁵ Wuane lea-kola, Jisasato balana pii okone yano peyoto, nimbato namba ipa peya-geendo, mana okonemane Gotena mana epene tika-pene oko nalipato wato

minulupa-kola pulu-peyako. Andipa nambato leyo pua nimbato nambanga pii leaipia. Wuane lea-kola, Joneto balana pii okone wato minuto, bala ipa peyamaiyaezia.

¹⁶ Jisasa bala ipa mialu, ipa oko tepe wato, andea-kola, ati iyu oko yapu lo toko lea-kola, Gotena Sipitisa oko eka uya gulo balanga epo peteanga andeaipia. *

¹⁷ Okone angı, pii layene mindi ati kenga atala epeane okomane Jisasa andayo pii mindi loto, akali oo ateya oko bala nambana iwanane yamapane yene oko. Nambato balana mana tupa andoto, epele wetete eyo leaipia. *

4

Sataneto Jisasa Minu Mandeke Peane Oko

Maki 1:12-13; Luku 4:1-13

¹ Okone angı, Sataneto Jisasa minu mandeke peakale loto, Oli Sipitisa okomane Jisasa atu aiyu wandakali napalene yuu mindina peaipia. *

² Yuu okonena atoto, ole paiyasa tukumindi utulu otongapi, Jisasa bala ulia nanene atea-kola, matili bala ulia nono wete yaepia. *

³ Ulia nono wete ya-kola, mandeke piyane akali koo Satane oko bala Jisasa ateanga epoto, enene, nimba Gotena iwanane ateendo, nimbato ana oo eya utupa betesa gulekale laa leaipia.

⁴ Wuane lea-kola, Jisasato balana pii okone yano peyoto, tomo-mane angu wandakali mindi saka atekale lo ataya na-alane. Jia. Gotena pii layene epene tupa pitaka-mane wandakali mindi saka atekale lo ataya alane lo pepa pelene eya leaipia. *

⁵ Wuane lea-kola, Sataneto bala atu aiyu Gotena tano epene wete Jutusaleme okona poto, lotu anda andane okona kenga wete ate leaipia.

⁶ Ate lalu, balato Jisasa lamawuato, Gotena pii pepa pelene eya mindimane loto, ana-mane nimbanee kee nolane nembo toto, Goteto balana enjoje tupa lamawuato, yakamato kii wanga latawa atalapape lolopeya layene eya-ko. Enene, nimba Gotena Iwanane ateendo, anda kenga wete okona atoto, peakalena laa leaipia. *

⁷ Wuane lea-kola, Jisasato balana pii okone yano peyoto, nimbanee Akali Andane Gote oko minu mandeke napipe lo pepa pelene eya teke leaipia. *

* 3:7: Mt 12:34-35; 23:33-36 * 3:8-10: Mt 7:15-20; Lk 13:6-9; Jo 8:33,39; Lom 4:12 * 3:11: Jo 1:26-27,33; Ap 1:4-5
* 3:16: Jo 1:32-33 * 3:17: Sam 2:7; Ais 42:1; Mt 12:15-21; 17:5; Lk 9:35 * 4:1: Ip 2:17-18; 4:15 * 4:2: Ek 34:28
* 4:4: Lo 8:3 * 4:6: Sam 91:11-12 * 4:7: Lo 6:16

⁸Wuane lea-kola, Sataneto Jisasa atu aiyu yuu wangiane kenga wete mindina poto, kanditi yane tupu pitakapi, kanditi utupanena minditaka epene wete yane tupapi, utupane pitaka balanga andawa leaipia.

⁹ Andawa loto, balato Jisasa lamawuato, nimbato tombawua loto, namba lo lotu leendo, nambato utupa pitaka nimba gukale leaipia.

¹⁰ Wuane lea-kola, Jisasato bala lamawuato, nimbana Akali Andane Gote oko angu lotu lo atoto, balana piape oko angu pimawua atape lo pepa pelene eya-ko. Satane nimbato namba tepa alu puu leaipia.*

¹¹ Wuane lea-kola, Sataneto Jisasa tepa alu pea-kola, enjole minditupa epoto, Jisasa moyaini-pia.

Jisasato Gotena Piape Bulupane Tewa Peane Oko

Maki 1:14-15; Luku 4:14-15

¹²⁻¹⁶ Wamba Galili disitiki okona wandakali yame waka minditupa ipa Jotane amo yangi ateai-kola, potopesa akali Aisayato pii mindi utupane lamawuato, Sepulane, Napatali-la, yame okone-lapona yuu mindi ipa angini Galili okona matenenga mandaka atalaini wandakali yame waka tupa yakamato ale alapape. Wamba wandakali minditupa undupi pangosa atoto, omene gulo ateaini tekeko, matili tii-pene andane mindi epea-kola, utupane-mane tii-pene okone andeaini leaipia. Matili Etoteto Jone andi lea-angi, Jisasato pii temane okone ale wato, Galili disitiki okona peke leaipia. Peke loto, balato pii wamba Aisayato leane okone enene guleakale nembo toto, Nasatesa tano oko tepa alu, Sepulane, Napatali-la, yame okone-lapona yuu okonena peaipia. Poto, ipa angini Galili okona matenenga Kapaneame tano okona ateapia.*

¹⁷ Kapaneame tano okonena atoto, Jisasato balana piape tupa bulupane tewa puato, Gotena pii oko wandakali tupa lamawuato, ati kenga yuu epene okona atalane akali okomane yakama moyo ando atoyale mandaka epeya-ko. Yakamato yamapanie peke lalapa laka peaipia.*

Jisasato Akali Tukumindi Bala Watama Epeakale Leane Oko

Maki 1:16-20; Luku 5:1-11

¹⁸ Saimone balana gene mindi Pita lene okola, balana amene Endutu okola, okonelapo-mane pisa moto, bisanisa piape pua atalapele-pia. Alu mindi okonelapo-mane pisa mialapele umbene nuu andane wete mindi ipa angini okona aindaka lo

ateapi-kola, Jisasa bala ipa angini Galili okona ayatenenga epo poto, okonelapo andeaipia.

¹⁹ Andoto, balato okonelapo lamawuato, liyambato wandakali mialapale lo nambato mana langukalenga, namba watama ipulupa leaipia.

²⁰ Wuane lea-kola, okone angi teke akali okonelapo-mane pisa mialapele umbene nuu tupa yakale tepa alu, bala watama peapelelia.

²¹ Bala aja amonga-yale poto, akali Sepiti iwanane Jemesa, balana amene Jone-la, okonelapo andeaipia. Akali okonelapo liyambana ayiane Sepiti oko towa sipi mindina pituto, yakamana pisa mialaini umbene nuu tupa tambu lo peteai-kola, Jisasa ato akali okonelapo ipulupa leaipia.

²² Ipulupa lea-kola, okone angi teke, akali okonelapo-mane sipi okola, liyamba ayiane okola, okonelapo awua tepa alu, Jisasa watama peapelelia.

Wandakali Kambua Jisasa Watama Peaini Oko

Luku 6:17-19

²³ Jisasa bala Galili disitiki okona yuu tupa pitakana epoko pua atoto, Juta yameni lotu anda tupana poto, Goteto wandakali tupa moyo ando atalane lo, Gotena pii layene epene oko lamawua ateapia. Pii lamawua atoto, balato wandakali siki waka-waka pelene tupa pitaka mo atu yaka pua ateapia.*

²⁴ Wuane pua atea-kola, wandakali minditupa Sitiya potopinjia okona yuu tupa pitakana poto, balato wuane peya loto, pii lo tawe yainipia. Pii okone lo tawe yai-kola, wandakali-mane yangone siki pelene tupa pitaka Jisasa ateanga atu aiyu ipuku peainipia. Tandaka andane no atalaini wandakali tupapi, siptisa koo atene wandakali tupapi, yuunga lomba-pene yoto, putiti peyalaini wandakali tupapi, kulini manda-tene wandakali tupapi, wandakali okonepene tupa atu ipuku peai-kola, Jisasa ato wandakali utupane pitaka mo atu yaka peaipia.*

²⁵ Mo atu yaka pea-kola, Galili tanepi, Dekapolisa tanepi, Jutusaleme tanepi, ipa Jotane amo yangi tanepi, Jutiya disitiki okona tanepi, yuu utupane pitakana tane wandakali kambua-mane bala watama peainipia.*

5

Jisasa Bala Yuu Wangiane Mindina Atoto, Mana Lamaiyane Oko

Luku 6:20-23

* **4:10:** Lo 6:13 * **4:12-16:** Ais 9:1-2; Mt 14:3-5; Mk 6:17-20; Lk 3:18-22 * **4:17:** Mt 3:1-4; 19:27 * **4:23:** Mt 9:35;
Mk 1:39; Ap 10:37-38 * **4:24:** Mk 6:55-56 * **4:25:** Mk 3:7-8

¹ Wandakali yame kambua-mane bala watama epeaini tupa andalu, Jisasa yuu wangiane mindina poto, petea-kola, utupane-mane bala peteanga epeainipia.

²⁻³ Epeai-kola, balato utupane mana lamawuato, wandakali minditupa-mane Gotena wenonga tipia ateyama nembo teaindo, Goteto utupane moyo ando atolopeya leaipia. Balato utupane moyo ando atolopeya nembo toto, wandakali utupane-mane epelewa atape-pene. *

⁴ Goteto wandakali ai lo atalaini tupana yamapanane mo epene pale lolopeya-ko. Utupane-mane epelewa atape-pene. *

⁵ Matili Goteto yuu tupa pitaka wandakali tambo lo atalaini tupanga maulu-peyako. Utupane-mane epelewa atape-pene. *

⁶ Wandakali tomo ipapi nauwa lakae lo nemboto talaini pua teke, Gotena mana epene tika-pene tupa wato minauwa lakae lo nemboto ateaindo, Goteto utupane moyolo-peya. Moyola-kola, utupane-mane katulo mana epene tika-pene utupane wato minulu-peyako. Utupane-mane epelewa atape-pene. *

⁷ Wandakali yangone ondo wato moy-alaini wandakali tupa Goteto ondo wato moyolo-peya-ko. Utupane-mane epelewa atape-pene.

⁸ Goteto andola-kola, wandakali minditupana yamapanenga koo tene mindi nayando, utupane-mane Gote andolopeyako. Utupane-mane epelewa atape-pene.

⁹ Wandakali minditupa-mane yanda pua atolai-kola, wandakali waka minditupane-mane yanda kondalapa loto, yanda pua atolaini okone minu koyo piya yaindo, Goteto wandakali utupane balana andopane ateyai lolopeya-ko. Utupane-mane epelewa atape-pene.

¹⁰ Wandakali minditupa-mane Gotena mana epene tika-pene tupa wato minu atolai-kola, wandakali waka minditupane-mane kenda-pene andane tupa utupane mai-yaindo, Goteto wandakali epene utupane moyo ando atolo-peyako. Utupane-mane epelewa atape-pene. *

¹¹⁻¹² Wamba yakama ata napenenga, wandakali minditupa-mane potopesa akali ateaini tupa andayo owato pii kambua loto, utupane koo ya loto, kenda-pene andane minditupa utupanenga mayainipia. Wuane pua teke, andipa ateyai wandakali yakama nambana yame ateyai lo andoto, wandakali minditupane-mane kenda-pene andane okonepene

tupa yakamanga gulupeyai tekeko, namba yamena yole andane mindi ati kenga yuu epene okona yolopeya. Tene okonena, wandakali minditupa-mane kenda-pene andane okonepene tupa yakamanga gulangi, namba yame wandakali yakamato ati kenga poto, yole andane oko molopeyama nembo toto, epelewa atape-pene. Jisasato wuane leaipia. *

*Yakama Sole Gulo Ateyai Leane Oko
Maki 9:50*

¹³ Okone angii, Jisasato pii mindi tako pua loto, yakama wandakali pitakana sole gulo ateyai tekeko, sole minditupa tende napene guleando, nanimato anu puato, sole okone dee lapone mo tende piya olo-peyamape leaipia. Sole koo okonemane wandakali mindi moya napulu-peya nembo toto, wandakali-mane aveyai-kola, wandakali waka tupamane asiniga epo poto, keemane anggo alaini leaipia.

*Yakama Lamu Gulo Atoto, Tii Piyawa
Atalapape Leane Oko
Luku 14:34-35*

¹⁴ Wuane lalu, Jisasato pii mindi tako pua loto, tano mindi yuu wangiane mindinga yando, tano okone katulo too pua nayalane leaipia. Ale tii peya-kola, wandakali-mane asia katulo andalaini pua teke, yakamato Gotena pii lamai-yaikola, wandakali pitakamane balana asia epene oko katulo andalaini. *

¹⁵ Wandakali-mane lamu mindi kayuto, sisopene mindimane lamu okone ombowa yata na-alaini. Jia. Utupane-mane lamu mindi kayuto, tepolo tokonga yata eyai-kola, wandakali andaka pitulai tupa pitakanga tii pikoyo piyane. *

¹⁶ Wuane piyane pua teke, wandakali-mane yakamana mana epene tupa andoto, yakamana ayiane ati kenga atalane okona gene oko laiyu leakale nembo toto, yakama lamu gulo atoto, wandakali tupa tii piyawa atalapape. Jisasato wuane leaipia. *

Goteto Leane Pua Jisasato Peane Oko

¹⁷ Wuane lalu, Jisasato pii mindi tako pua loto, nambato Gotena loo tupapi, potopesa akali tupana pii tupapi, utupane mo mee gulaya olo epeea-ya lo yakamato nembo na-talapape leaipia. Pii utupane enene guleakale nembo toto, nambato Gotena loo tupapi, potopesa akali tupana pii tupapi, utupane-mane leaini pua pulu epewane. *

¹⁸ Nambato pii enene mindi yakama langeyo. Gotena loo okomane leya pua mindimane piyiale lola-kola, loo okona

* **5:2-3:** Ais 57:15 * **5:4:** Ais 61:2-3; Lap 7:16-17 * **5:5:** Sam 37:11 * **5:6:** Ais 55:1-2 * **5:10:** 1Pi 3:14
* **5:11-12:** 2Tem 36:16; Ap 7:52-53; 1Pi 4:14 * **5:14:** Jo 8:12; 9:4-5 * **5:15:** Mk 4:21-22; Lk 8:16; 11:33 * **5:16:** Ep 5:8-9; 1Pi 2:12 * **5:17:** Lom 3:31

piape oko koyo pulupeya tekeko, yuu ati-la alu napula-kola, Goteto balana loo utupanena pii ajako wete mindi yandopi, pepa maki ajako mindi yandopi, utupanena mindikipi mindi mo apia napulu-peya. *

¹⁹⁻²⁰ Tene okonena, yakamana mana epene tika-pene tupamane loo tupana mana andene akali tupapi, Patasai tupapi, utupanena mana epene tika-pene tupa sia minape-pene. Yakamana mana tupamane akali utupanena mana tupa sia mina napeaindo, Goteto yakama moyo ando ateakale nembo toto, yakama tane ando konda napulai-kola pulupeya lo nambato yakama langeyo. Tene okonena, wandakali mindimane Gotena loo ajako wete mindi kalo puato, wandakali waka tupamane wuane teke peakale lo mana lamai-yando, Goteto wandakali okone balana wandakali waka tupana nappinga yale ateya lolopeya. Balato wuane lolopeya tekeko, wandakali mindimane Gotena loo utupane wato minuto, wandakali waka tupamane wuane teke peakale lo mana lamai-yando, Goteto wandakali okone bala gene andane mindi mawuato, bala wandakali waka tupana lipinga-yale ateya lolopeya. Jisasato wuane leaipia. *

Yangone Tupa Towa Pii Lo Tika Piyapape Leane Oko

²¹ Wuane lalu, Jisasato pii mindi tako pua loto, loo tupana mana andene akali tupamane nanimana yumbane tupa mana lamawuato, nimbato wandakali peyo ome nalape leainipia. Wandakali mindimane balana yangone mindi peyo ome leando, bala kote lape-pene leainipia. Yakamoto pii okonelapo wamba ale yai okoni. *

²² Yakamoto pii okone ale yai tekeko, andipa nambato pii mindi tako pua loto, wandakali mindimane balana yangone mindi towa yataka yando, bala kote lape-pene leyo. Dee, wandakali mindimane balana yangone mindi ando nimba kee ene ya leando, Juta yamena kanjole okomane balana pii okone lo tika pipe-pene. Wandakali mindimane balana yangone mindi ando lamba loto, pii koo mindi leando, bala yuu koo ita too atapowa atene okona pupe-pene. *

²³⁻²⁴ Tene okonena, nimbato minditaka Gote opa mayuale balana alata toko yalane okona mandaka gulo pole-angi, nimbato nembo tolo-peke lape. Nembo tolo-peke lole-kola, wandakali yangone mindimane nimba towa yatakawa ateando, nimbato minditaka opa mayuale awua polene okone ongane yakale lape. Yakale lalu, nimba

poto, wandakali yangone okone towa pii ini lo tika puato, liyamba yamapane mindiki paliyapape. Wuane piyu, nimba peke loto, minditaka Gote opa mayuale awua polene okone opa maipe. *

Wandakali Waka Tupa Towa Pii Lo Tika Piyapape Leane Oko
Luku 12:57-59

²⁵⁻²⁶ Wandakali mindimane nimba kosimi leando, balato nimba atu poto, pii lo tika piyane jasa okonga malupeya. Jasa okomane nimbana kote ale wato, nimba yanda yene tupanga malua-kola, utupane-mane nimba andi loto, katapusa pua aindaka lolopeyai. Aindaka lolai-kola, nimbato akali okonena yano nimbanga yola tupa pitaka wete yano peya napene konda eendo, nimba katapusa anda okone tepa alu, takita naepolo-pele lo nambato pii enene mindi nimba langeyo. Tene okonena, wandakali mindimane nimba kosimi loyale peando, kenda-pene lalo utupane nimbanga epolane nembo toto, liyamba kote loyale asininga polapi-angi, nimbato akali okone towa wamba ini pii lo tika puato, liyamba yamapane mindiki paliyapape. Jisasato wuane leaipia.

Nimbato Mana Koo Mindi Minulene, Tika Ando Atape Leane Oko

²⁷ Okone ang, Jisasato pii mindi tako pua loto, loo tupana mana andene akali tupamane yakama mana languato, wanda akalila, liyambato pamuku na-piyapape lalaini leaipia. Yakamoto pii okone wamba ale yai okoni. *

²⁸ Yakamoto pii okone ale yaini tekeko, nambato yakama mana languato, akali mindimane wanda mindi andoto, okone towa pamuku piwa laka lo nembo teando, nembo-mane wanda okone pamuku pulaka kola pulupeya leyo.

²⁹ Wuaneko, nimbato mana koo okonepene mindi minula loto, nimbana lene tika-mane mo piya yando, Goteto nimbana umbaini utumane ata-pata yuu koo wetete okona awua aindaka lola-kola, nimba kopeta wetete atolopele. Nimba lene mindiki tene atole-kola, Goteto nimba yuu koo wetete okona awua aindaka nalene konda yando, katu lolopeya-ko. Nimbana lene tika okonemane nimbato koo mindi pula lo mo piya oyale peando, lene okone luku apiiae. *

³⁰ Wuane pua teke, nimbato koo mindi pula loto, nimbana kii tika okomane mo piya yando, Goteto nimbana umbaini utumane ata-pata yuu koo wetete okona

* **5:18:** Lk 16:17; 21:33 * **5:19-20:** Jem 2:9-11 * **5:21:** Ek 20:13; Lo 5:17 * **5:22:** 1Jo 3:14-15 * **5:23-24:** Mk 11:25-26 * **5:27:** Ek 20:14; Lo 5:18 * **5:29:** Mt 18:9; Mk 9:43-48

awua aindaka lola-kola, nimba kopeta wetete atolopele. Nimba kini mundu atole-kola, Goteto nimba yuu koo wetete okona awua aindaka nalene konda yando, katu lolopeya-ko. Nimbato koo mindi pula loto, nimbana kii tika okomane mo piya oyale peando, nimbana kini tika okone kando lo apiape. Jisasato wuane leaipia.*

Wetene Peyo Wata-Alaini Mana Oko
Matiyu 19:9; Maki 10:11-12; Luku 16:18

³¹ Wuane lalu, Jisasato pii mindi tako pua loto, loo tupana mana andene akali tupamane yakama mana languato, akali mindimane balana wetene oko peyo wateando, wanda peyo watolane pepa mindi moto maipe-pene lalaini leaipia.*

³² Utupane-manu wuane lalaini tekeko, nambato yakama mana languato, akali mindina wetene okomane pamuku napulakola, akali okonemane bala peyo wateando, akali mambele wanda okonemane akali waka mindi pola oko towa pamuku pulakola pulupeya leyo. Dee, akali mindimane wanda peyo watene mindi kee leando, akali okonemane wanda okone pake mola-kola pulupeya. Jisasato wuane leaipia.*

Weno Minuto, Enene Wete Leyo Nalape Leane Oko

³³ Wuane lalu, Jisasato pii mindi tako pua loto, wamba loo tupana mana andene akali tupamane nanimana yumbane tupa mana lamawua ateaini leaipia. Utupane-manu mana lamawua atoto, nimbana weno minuto, nimbato mangene mindi enene wete pukale lo Akali Andane oko lamaindo, nimbato konda naene, pukale lolene pua pipe leainipi. Yakamato pii okone wamba ale yai okoni.*

³⁴ Utupane-manu wuane leaini tekeko, yakamana weno minuto, yakamato enene wete leyo oko Goteto andeya, laa na-piyapape lo nambato yakama langeyo. Ati kenga oko Gotena pitulane toko eya-kola, balato pitaka taka bosa lo ando pitiyane-ko. Yakamana pii lolai tupa lo tai laya oyale yakamato ati kenga okona gene oko nalalapape.*

³⁵ Yuu oko Gotena kene yata olane toko mindi eya okonena, yakamana pii lolai tupa lo tai laya oyale yakamato yuu okona gene oko laa na-piyapape. Jutusaleme oko kinji andane wete okona tano eya okonena, yakamana pii lolai mindi lo tai laya oyale, yakamato Jutusaleme okona gene oko laa na-piyapape.*

³⁶ Dee, nimbana kawa itini tupana mindikipi mindi nimbato mo kama atayawapi, pombo tayawapi, mindi katulo napulu-peleko. Nimbato nimbana pii lole mindi lo tai laya oyale, nimbana weno oko minuto, enene wete leyo oko Goteto andeya nalape. Jia.

³⁷ Wandakali mindimane bala tanena pii lolane mindi lo tai laya oyale, mangene mindi peando, Sataneto bala minu mandeke pula-kola pulu-peyako. Yakamato wandakali mindina pii okone yano peyoto, atu yalua leaindo, atu yalua angu lalapape. Yakamato jia leaindo, jia angu loto, balana pii okone yano peyalapape. Jisasato wuane leaipia.

Nimbanga Koo Peakale Lo Ando Kondape Leane Oko
Luku 6:29-30

³⁸ Wuane lalu, Jisasato pii mindi tako pua loto, loo tupana mana andene akali tupamane yakama mana languato, wandakali mindimane balana yangone mindina lene peyo lukeando, yakamato paini balana lene peyo luku ape. Dee, wandakali mindimane balana yangone mindina nene peyo longeando, yakamato paini balana nene mindi peyo longape lalaini. Loo tupana mana andene akali tupamane wuane leaikola, yakamato pii okonelapo wamba ale yai okoni.*

³⁹ Yakamato pii okone ale yaini tekeko, nambato yakama mana languato, wandakali mindimane nimbanga koo mindi peando, wuane peakale lo ando kondape leyo. Wandakali mindimane nimbana wakenane tikasa-tole kii apene-mane peleando, yangisa-tolepi wetete peleakale loto, nimbana kawane oko mopeke lape.

⁴⁰ Wandakali mindimane nimbana singilisa mokale nembo toto, nimba kosimi leando, balato nimbana sakesa okopi wetete meakale lo ando kondape.

⁴¹ Dee, wandakali mindimane pii mindi nimba langeyo nayu languato, nimbato nambana pinju oko awua mandaka ambinga kilomita mindiki angu puu leando, nimbato bala wayumane moyoto, balana pinju okone amonga yale kilomita lapo auwa apeyape.

⁴² Wandakali mindimane yano mindi gii lo tee leando, nimbato bala masia mawato, jia nalape. Wandakali mindimane minditaka mindi gii lo tee leando, okone maipe. Jisasato wuane leaipia.

* 5:30: Mt 18:8; Mk 9:43-48 * 5:31: Lo 24:1-4; Mk 10:4 * 5:32: 1Ko 7:10-11 * 5:33: Ek 20:7; Pit 19:12; Nam 30:2; Lo 23:21 * 5:34: Ais 66:1; Jem 5:12; Mt 23:22 * 5:35: Sam 48:2; Ais 66:1 * 5:38: Ek 21:24; Pit 24:20; Lo 19:21

*Yanda-pene Tupa Towa Epelewa Yama-
pane Yo Atalapape Leane Oko
Luku 6:27-28,32-36*

⁴³ Wuane lalu, Jisasato pii mindi tako pua loto, loo tupana mana andene akali tupa manayakama mana languato, nimbana yame tupa towa epelewa yamapane yo ato, nimbana yanda-pene tupa towa embo wete wa atape lalaini leaipa. Yakamoto pii okone wamba ale yai okoni. *

⁴⁴⁻⁴⁵ Yakamoto pii okone ale yaini tekeko, andipa nambato yakama mana languato, yakamana ayiane ati kenga ateya okomane wandakali tika-penepi, tika napenepi, utupane pitakanga nai oko teakale lalane leyo. Dee, wandakali tika-penepi, tika napenepi, utupane pitakanga balato kingi epeakale lalane. Yakama ayiane okonena andopane tupa atamakale nembo toto, yakama towa yanda-pene wandakali tupa towa epelewa yamapane yo atalapape. Utupane-mane kenda-pene andane tupa yakama giki peaindo, Goteto utupanena mana koo utupane apeakale lo yakamoto pote lalapape. *

⁴⁶ Wandakali minditupa-mane takisa muni mialaini akali tupa towa epelewa yamapane yo ateyai-kola, takisa muni mialaini akali utupane-mane wandakali utupane towa epelewa yamapane yo atalaini teke. Yakamoto wuane teke puato, yakama towa epelewa yamapane yo atalaini wandakali tupa towa angu epelewa yamapane yo ateaindo, yakamoto yole epene andoko molo-peyaipe.

⁴⁷ Dee, Gote lo bilipi nalene wandakali tupamanayakamana yame tupa angu epele wato, utupane towa pii lalawa pua atalaini. Wuane pua teke, yakamoto yakamana yame tupa angu epele wato, utupane towa pii lalawa pua ateaindo, yakamoto mana epene wete andoko wato minuto, Gote lo bilipi nalene wandakali tupa sia minulu-peyaipe.

⁴⁸ Yakamana ayiane ati kenga ateya oko bala tika-pene wetete ateya pua, yakamapi tika wetete pua atalapape. Jisasato wuane leaipa. *

6

*Wandakali Tipia Tupa Moyalapape
Leane Oko*

¹⁻² Wuane lalu, Jisasato pii mindi tako pua loto, wandakali minditupa-mane mana koo mindi minuto, wandakali waka tupa minakasa wato, wandakali epene tika-pene gulo atalaini leaipa. Wandakali-mane utupanena gene tupa

laiyu leakale nembo toto, utupane-mane lotu andakapi, asinigapi, utupanena poto, biakulu mindi peyoto, wandakali tipia tupa moyo minditaka mayaini. Mayai-kola, wandakali waka tupamanayakamana mana epene tupa andeakale nembo toto, yakamoto mana epene utupane wandakali waka utupana wenonga mineaindo, yakamana ayiane ati kenga ateya okomane yakamana mana epene minulai utupanena yole mindi yakama gii napulu-peyako. Wandakali-mane yakama epene ya lo andeakale nembo toto, yakamana mana epene tupa wandakalina wenonga mina na-piyape. *

³⁻⁴ Nimbato too pua moyo minditaka maindo, nimbana ayiane okomane nimbana mana epene okone andoto, yole mindi nimba gulupuya-ko. Nimbato wandakali tipia tupa moyo minditaka mindi maule-angi, nimbana mana epene okone too pitane atekale nembo tape. Wuane nembo toto, nimbana kii tika okomane wandakali tipia tupa moyo minditaka maule okone nimbana kii koya okomane anda napeakale lo too pua moyo maipe. Jisasato wuane leaipa.

*Yakamoto Pote Loto, Wua Lalapape
Leane Oko*

Luku 11:2-4

⁵ Wuane lalu, Jisasato pii mindi tako pua loto, minakasa alaini wandakali tupamanayeteyai-angi, wandakali waka tupamanayutupane andapiai lakae lo nembo toto, utupane-mane lotu anda tupanapi, asia kembo tupanapi, utupanena atoto, pote lo atalaini leaipa. Wandakali waka tupamanayutupanena mana okone andalaini okone angu minakasa alaini wandakali utupanena yole gulo yalane loto, nambato pii enene mindi yakama langeyo. *

⁶ Nimbato pote lole-angi, wandakali utupane-mane piyaini pua napipe. Jia, Nimba palilini lumu okona kolandaka loto, asia tuma puato, Ayiane Gote oko ando pote lape. Nimbato too pua pote lole-kola, balato nimbana mana okone andoto, yole mindi nimba gulupuya.

⁷ Wandakali yame waka tupamanayutupane pote loto, pii kambua leyama mambele, Goteto ale olopeya nembo toto, pii tene andane napalene kambua lalaini. Yakamoto

* 5:43: Pit 19:18 * 5:44-45: Ek 23:4-5; Lk 23:34; Ap 7:60; Lom 12:14,20-21 * 5:48: Pit 19:2; Lo 18:13 * 6:1-2: Mt 23:5 * 6:5: Mt 23:5; Lk 18:10-14 * 6:7: 1Ki 18:26-29

pote lolai-angi, wandakali utupane-mane piyaini pua na-piyapape. Jia.*

⁸ Yakamoto minditaka gi lo tee nalolai-kola teke, yakamana ayiane Goteto yakamanga minditaka jia eya tupa wamba ini nembo talane-ko. Yakamoto wandakali yame waka tupana mana tupa wato mina na-piyapape. Jia.*

⁹ Yakamoto pote lolai-angi, wua lalapape: Nanimana ayiane ati kenga atene oko, nimbana gene oko tika pua yakale.

¹⁰ Nimbato nanimana moyo ando atape. Ati kenga ateyai tupamane nimbato nembo tele pua piyaini. Wuane pua teke, yuu okona wandakali-mane piyapa lape.*

¹¹ Nanimma tomo andipa namakale gipe.

¹² Nanimato wandakali wakana koo tupa apialamane pua teke, nimbato nanimana koo piyamane tupa apia-gipe.*

¹³ Koo tupamane nanimma minu makande pulu epolaini. Nimbato ando atape. Koo tupamane nanimma minu koyoyale peaindo, nimbato nanimma moyape. Yakamoto wuane loto, pote lalapape leaipia.*

¹⁴ Wandakali-mane yakamanga koo pulai-kola, yakamoto utupanena koo tupa apia-maiyaindo, yakamana ayiane okomane yakamana koo pulaini tupa apia-gulupeya teke.*

¹⁵ Balato wuane pulupeya tekeko, yakamoto wandakali waka tupana koo pulaini tupa apia-mai napeaindo, yakamana ayiane ati kenga ateya okomane yakamana koo pulaini tupa apia-gii napulu-peyako. Yakamoto wandakali waka tupana koo tupa apia-maiyapape. Jisasato wuane leaipia.

Tomo Nanene Konda Alaini Mana Oko

¹⁶ Wuane lalu, Jisasato pii mindi tako pua loto, minakasa alaini wandakali tupamane pote kambua lamakale nembo toto, ole ukupini mindilapo tomo nanene konda olai-angi, tomo nanene ateyai lo wandakali waka tupamane andeakale nembo toto, utupane-mane wenonga yo epoko piyaini leaipia. Wandakali waka tupamane utupanena mana okone andalaini okone angu utupanena yole gulo yalane lo nimbato pii enene mindi yakama langeyo. Utupane-mane wuane piyaini tekeko, yakamoto pote kambua lamakale nembo toto, ole ukupini mindilapo tomo nanene kondolai-angi, wandakali utupane-mane piyaini pua na-piyapape. Jia.*

¹⁷⁻¹⁸ Nimbato pote kambua lokale nembo toto, oto ukupini mindi tomo nanene kondolu atole-angi, nimbato wuane pule oko wandakali waka tupamane anda

napeakale nembo toto, nimbana lee-inga wasa-wasa peyalu, nimbana kawa itininga wele epene mindi gae lo aiya wato, mo kuai laya ape. Ole ukupini mindilapo nimbato pote kambua lokale nembo toto, tomo nanene kondolu atole-angi, wandakali-mane anda na-piyaini ayiane okomane angu nimbana mana okone andoto, yole mindi nimba gulupeya. Jisasato wuane leaipia.

Ati Kenga Tawe Minditaka Epene Tupa Mo Yomowa Atalapape Leane Oko

Luku 12:32-34

¹⁹⁻²¹ Wuane lalu, Jisasato pii mindi tako pua loto, yakamoto yuu okona tawe minditaka epene tupa mo yomowa ateaindo, puya-puya tupamane minditupa nalu, minditupa ipakula tolopeya leaipia. Pake mialane akali tupamane yakamana anda tupa keao loto, minditupa pake molopeyai tekeko, yakamoto ati kenga tawe minditaka epene tupa mo yomowa ateaindo, mindimane pake mia napulu-peyai. Puyapuya-mane nanolo-peyai. Ipakula taa napulu-peyako. Yakamoto yuu okona tawe minditaka epene tupa mo yomowa ata na-piyapape. Jia. Yakamoto ati kenga tawe minditaka epene tupa mo yomowa atalapape. Jisasato wuane leaipia.*

Lene Oko Umbaini Okona Lamu Yale Gulo Atalane Oko

Luku 11:34-36

²² Wuane lalu, Jisasato pii mindi tako pua loto, lene oko umbaini pitakana lamu gu-lene. Lamu mindimane kuai lo tii peando, minditaka yola tupa nimbato kuai lo andolopele. Wuane pua teke, nimbana lene kuai lo teando, nimbato pitaka taka kuai lo andolopele.

²³ Wuane tekeko, nimba lee koo ateendo, nimbana umbaini utumane undipi pangosa wete atene gulo atolopele. Goteto tii-pene oko nimba gula-kola, nimbato anda napeendo, nimba undipi-lene andane wete okona atolopele. Jisasato wuane leaipia.

Nembo Kambua Tolaini Leane Oko

Luku 12:22-31; 16:9-13

²⁴ Wuane lalu, Jisasato pii mindi tako pua loto, wandakali mindimane akali andane lapona piape pimawua ateando, balato akali andane mindi epelewa yamapano yoto, balana piape kuai lo pimaulu-peyai leaipia. Akali okonena piape kuai lo pimawuato, akali andane mindoko koo ya lo embo wete wato, masia malu-peyako. Mindimane akali andane lapona piape akali ati napepe-pene. Tene okonena,

* **6:8:** Mt 6:31-32 * **6:10:** Lk 22:41-42 * **6:12:** Mt 6:14-15; 18:21-35 * **6:13:** Lk 22:40; Jem 1:13; Jo 17:15; 2Tes 3:3; 2Ti 4:18 * **6:14:** Mk 11:25-26 * **6:16:** Ais 58:5-9 * **6:19-21:** Mt 19:21; Lk 18:22; Jem 5:1-3

yakamoto Gote-la, muni-la, okonelapo lapotakana piape akali guleaindo, mana okone kuai nalolo-peyaya.

²⁵⁻²⁷ Yakamoto eka tupa andalapape. Eka utupane-mane ee mindi na-piyaini. Dee, utupane-mane tomo minditupa matili namakale loto, mandu epoto, yakamana anda tupana yata aa na-piyaini tekeko, yakamana ayiane ati kenga ateya okomane utupane tomo neakale maiyane. Wandakali yakamoto eka tupa sia minu, utupanena lipinga yale ateyai. Goteto yakamana umbaini oko waa puato, yakama saka ataya yaepia. Piape pitete-pene okone wamba ini puato, andipa balato pitete wato, tomoppi, tonapi yakama gii napene kondolo-peyape. Jia. Goteto mali ana atola lo guyane tupa atalu, wandakali mindi bala tanena tai-lene okomane ana mindikipi mindi katulo kimbu pua ata napulu-peyako. Yakamoto umbaininga tona pulane tupapi, tomo ipa nolane tupapi, utupane ani tawe mia-makalepe lo nembo kambua tatawa atolaini.*

²⁸ Anu peakale yakamoto tona ani tawe mia-makalepe lo nembo kambua teyaipe. Yakamoto palawa dini epene yati-pene sia-pusa liya tupa nembo talapape. Utupane yakama tane piape pii, yati pii, mindi na-piyaini. Jia. Goteto utupane kuai lo wete yati piya maiyane.

²⁹ Utupane mee lialaini tekeko, palawa dini utupanena yati epene wetete okomane kinji Solomone balana tona yati-pene epene wete wamba pua ateane tupa sia miniya lo nambato yakama langeyo.*

³⁰ Palawa dini utupane angini mindi jia. Palawa dini utupane andipa angu epene lialaini. Anate-lene wandakali-mane palawa utupane yokowa apoto, yangalaini. Goteto palawa dini utupanena yati wayumane piya maiyu, wandakali yakamana yati tona tupa gii napene kondolo-peyape. Jia. Goteto yakamana tona gii napene kondolo-peyaya nembo teaindo, yakamoto balanga wayumane tungi peyo bilipi lo ata napulai-kola pulupeya.

³¹⁻³² Gotena pii ale naene aitene wandakali tupamane tomo ipa nolane tupapi, umbaininga pulane tona tupapi, utupane ani tawe mia-makalepe lo nembo kambua too atolaini. Utupane-mane wuane nemboto atalaini tekeko, Gotena wandakali yakamoto okonetaka pitaka miape-pene lo yakamana ayiane ati kenga ateya okomane nembo teyako. Yakamoto tomo ipa nolane tupapi, tona pulane tupapi, utupane

ani tawe mia-makalepe lo nembo kambua tatawa ata na-piyapape. Jia.*

³³ Wuane nembo natene, Goteto yakama moyo ando ateakale nembo toto, balana mana tika-pene tupa wato minuyale mandeke pua atalapape. Yakamoto wuane pua ateaindo, balato yakamana tomo ipa nolane tupapi, tona pulane tupapi, utupane pitaka yakama gulupeya.*

³⁴ Ole dindi lo kenda-pene waka-waka tupa epalane tekeko, kenda-pene anati epolopeya tupa anati teke nembo tapapeneko. Anati kenda-pene mindi epolane nembo toto, andipa yakamoto nembo kambua tatawa ata na-piyapape. Jisasato wuane leaipia.

7

Wandakali Waka Tupa Yapa Lo Tale Na-piyapape Leane Oko

Luku 6:37-38,41-42

¹⁻² Wuane lalu, Jisasato pii mindi tako pua loto, yakamoto wandakali yangone tupanga mana minulai pua, Goteto mana okone teke yakamanga minulu-peyaya leaipia. Yakamoto wandakali waka tupa koo ya lo yapa leaindo, Goteto yakamapi koo ya lo yapa lolopeya-ko. Goteto yakama koo ya lo yapa lolane. Yakamoto wandakali waka tupa koo ya lo yapa na-lalapape.*

³ Nimba amene mindina lenenga lee kunu anjako mindi eya-kola, nimbato okone andoto, mo apokale lalene tekeko, nimba tanena lenenga ita palanja andane mindi eya-kola, nimbato okone mo apokale nembo natalene. Anu peakale nimbato wuane pilinipe.

⁴ Nimba tanena lenenga ita palanja andane mindi eya-kola, nimbato kuai lo anda napilini-ko. Anu peakale nimbato amene okone lamawuato, nimbanan lenenga lee kunu eya oko nambato mo apia-gua lanenepe.

⁵ Wandakali yangone tupamane nimbanan pii okone ale wato, nimbanan koo mindi naeya nembo teakale nayuto, nimbato wuane lalene-ko. Nimba tanena lenenga ita palanja andane mindi eya oko nimba tane wamba ini mo apiae. Apialu, nimbanan lene epene toto, nimba amene okona lee kunu yola oko katulo mo apolopele. Jisasa wuane leaipia.

⁶ Yakamoto mamaku epene wete tupa yia kapua tupa ateyainga peyamo leaindo, utupane-mane minditaka epene wete utupane mee kee-mane anga mangua alu, mopeke loto, yakama nolopeyai-ko. Yakamoto wuane na-piyapape. Dee, yakamoto

* **6:25-27:** Mt 10:28-31; Lk 12:4-7; Pl 4:6; 1Ti 6:6-8; 1Pi 5:5-7

* **6:29:** 1Ki 10:4-7; 2Tem 9:3-6

* **6:31-32:** Mt 6:8

* **6:33:** 1Ki 3:13-14; Sam 37:4,25; Lom 14:16-17

* **7:1-2:** Mk 4:24-25; Lom 2:1; 1Ko 4:5; Jem 4:11-12

Gotena minditaka epene wete tupa piango anatope gulene wandakali tupa mai napiyapape.

*Pote Lalapape Lo Mana Lamai-yane Oko
Luku 11:9-13*

7-8 Wuane lalu, Jisasato pii mindi tako pua loto, wua leaipia: Wandakali-mane pote loto, Gote nimbato mangene mindi pipe leyai-kola, Goteto mangene okone piyane. Yakamoto pote loto, Gote nimbato mangene mindi pipe leaindo, Goteto mangene okone pulupeya-ko. Gote nimbato mangene mindi pipe lo pote lalapape. Minditaka ayia pua atalaini wandakali tupa pitakamane minditaka ando mialaini. Yakamoto aiya pua ateaindo, yakamoto minditaka ando molopeyai-ko. Yakamoto minditaka ayia pua atalapape. Wandakali-mane anda asia lomba peya geao-geao lo atalaini tupa pitakana asia Goteto lumba maiyane. Yakamoto asia lomba peya geao-geao lo ateaindo, Goteto asia lumbulu-peyako. Yakamoto asia lomba peya geao-geao lo atalapape. *

9 Akali mindina iwanane okomane balana ayiane oko tee loto, ulia nokale gii leando, balana ayiane okonemane ana mindi malupeyape.

10 Dee, iwanane okonemane pisa mindi nokale gii leando, balana ayiane okomane etelu koo nanimato naa na-piyamane mindi malupeyape. Jia.

11 Yuu okona ateyai Ayiane koo tupa yakamoto minditaka epene tupa yakamana andopane tupanga mayaini. Wuane pua teke, yakamana minditupa-mane ayiane ati kenga ateya oke tee loto, minditaka epene tupa nanimi gii leaindo, balato yuu okona ayiane ateyai tupa sia minuto, minditaka epene utupane yakama gulupeya. *

12 Yakamana yangone tupamane yakama moyoyale, mana epene minditupa mineakale nembo teaindo, yakamoto wandakali yangone utupane moyoyale, mana epene utupane pitaka minalapape. Gotena loo tupapi, potopesa akali tupana pii pepa pelene eya tupapi, utupane pitakamane pii mindiki okone teke langiyaini. Jisasato wuane leaipia. *

*Geta Ajako Okona Kolandaka Lalapape
Leane Oko*

Luku 13:23-28

13-14 Wuane lalu, Jisasato pii mindi tako pua loto, yuu koo okona polane asini oko andane wete eya leaipia. YUU koo okonena kolandaka lolane geta okopi andane

teke eya. Okonelapo andane eya-kola, wandakali kambua-mane polane asini andane okone watama poto, kolandaka lolane geta andane okonena poto, koyalaini. Wandakali saka atapowa atolane yuu okona polane asini oko ajako eya. Gotena yuu epene okonena kolandaka lolane geta okopi ajako teke eya. Ajako eya-kola, wandakali ajalapu minditupa-mane angu polane asini ajako okone andalaini. Yakamoto saka atapowa atene yuu okona polane asini ajako okone watama poto, yuu okonena kolandaka lolane geta ajako okona pulupape. Jisasato wuane leaipia.

*Yakamoto Waiwa Ando Atalapape
Leane Oko*

Luku 6:43-44; 13:23-28

15-20 Wuane lalu, Jisasato wandakali tupa tipa puato, eyaka ikilimbu ani atene mindina butusa dini epene tupa lialaepe leaipia. Pee, taweyame itane mindina apate dini epene tupa lialaepe. Jia. Ita koo mindina dini epene mindi katulo lia napene, dini koo teke lialane. Dini epene lia napiyane ita tupa pitaka wandakali-mane yoko wato yangalaini. Dee, ita epene mindinga dini koo mindi katulo lia napiyane. Jia. Ita epene mindinga dini epene teke lialane. Tene okonena, yakamoto ita tupana dini tupa andoto, ita mindi epene ya, ita mindoko koo ya loto, ita tupa katulo yapa lo tale piyaini. Wuane pua teke, potopesa akali tupana mana minulai tupa andoto, yakamoto akali mindi bala potopesa akali enene mindi ya, akali mindoko bala owato potopesa akali mindi ya lo potopesa akali tupa katulo yapa lo tale pulupayai. Owato potopesa akali tupamane yakama minakasa oyale, yia sipisipi gulene epolopeyai tekeko, utupanena yamapanne anda-pangosa peango anatope gulo epolopeyai. Akali utupane-mane yakama minu koyalaini. Waiwa ando atalapape. *

21-22 Wandakali yapa lo tale pulane oto oko epola-angi, wandakali kambua-mane namba languato, Akali Andane, Akali Andane, nanimato nimbana gene oko loto, potopesa akali atoto, piape pua atema. Nanimato nimbana gene oko loto, wandakali tupanga yama koo atene tupa peyo watoto, metekolo piape tai-lene kambua tupa pemane lolopeyai. Wandakali kambua-mane wuane lolopeyai tekeko, wandakali utupanena minditupa Gotena yuu epene okona napolopeyai. Jia. Nambana ayiane ati kenga ateya okona nembo-tene oko wato

* 7:7-8: Mk 11:24; Jo 14:12-14; 15:7-8; 16:23-24; 1Jo 3:22; 5:14-15 * 7:11: Jem 1:17-18 * 7:12: Mt 22:39-40; Lk 6:31; Lom 13:8-10 * 7:15-20: Mt 3:8-10; 24:23-24; Lk 3:8-9; Jo 15:4-6; Ap 20:28-29; 2Pi 2:1; Ga 5:19-23; Jem 3:9-12; Mt 12:33
* 7:21-22: Lk 6:46-49; Jem 1:25

minalaini wandakali tupa angu balana yuu
epene okona polopeyai. *

²³ Ayiane ati kenga ateya okona nembo-tene oko wato mina na-piyaini wandakali minditupa-mane Akali Andane, Akali Andane lolopeyai tekeko, nambato utupane panakame lamawuato, Gotena loo angowa atalaini wandakali yakama nambato anda na-peyaneko. Yakama namba tepa alu, pulupa lokale. Jisasato wuane leaipia. *

Anda Pulane Mana Lapo Okona Pii Kokoli Oko

Luku 6:46-49

²⁴⁻²⁵ Wuane lalu, Jisasato pii mindi tako puu loto, wamba akali wai-ene mindimane balana anda oko yuu tai ana tokonga peane leaipia. Matili popo taimane lea-kola, kingi andane epeaipia. Epea-kola, ipa lii andane mindi lua awua epoto, anda okone peyo keao loyale peane tekeko, anda okone yuu tai ana tokonga pitane ateane okomane tai duli lo atea-kola, peyo keao naleaipia. Wandakali mindimane nambana pii oko ale wato, wato minu ateando, bala akali wai-ene wamba ateane okonepene teke atolopeya.

²⁶⁻²⁷ Wuane tekeko, wamba akali wai naene kuati minene mindimane balana anda oko yuu kayiki ipa mau mindinga peapiapia. Matili, popo taimane lea-kola, kingi andane epeane okomane ipa lii andane mindi lua awua epeaipia. Epoto, anda okone taimane pelea-kola, anda okone lai loto, yuunga kapoyale tepe yaepia. Wandakali mindimane nambana pii oko ale wato, tailo wato minu ati napeando, bala akali wai naene wamba ateane okonepene teke atolopeya. Jisasato wuane leaipia.

²⁸⁻²⁹ Loo tupana mana andene akali tupamanne mana lamai-yaini pua, Jisasato mana lamai napeaipia. Jia. Mana lamaulane tai-lene tupa balanga ya-kola, balato utupane sia minuto, pii manapi utupane lamai-yaepia. Tene okonena, balato pii utupane pitaka lo koyo pea-angi, wandakali kambua peteaini tupamane mana balato lamaiyane utupane nembo toto, moko andane leainipia.*

8

Jisasato Akali Tapa-mane Koyene Mindi Mo Atu Yane Oko

Maki 1:40-44; Luku 5:12-14

¹ Jisasa bala yuu wangiane okone tepe alu, puu nena lea-angi, wandakali kambuanne bala watama peainipia.

² Watama peai-kola, akali tapa-pene mindi bala Jisasa ateane ongane mandaka

epoto, aikini leka wato, Akali Andane, nimbato namba mo atu yokale nembo teendo, nimbato katulo wuane pulupele leaipia.

³ Wuane lea-kola, Jisasato balana kini oko akali okonenga yata wato, nambato wuane bukale. Nimba atu yaa lea-kola, okone angi teke akali okonena tapa peane oko atu yaepia.

⁴ Atu ya-kola, Jisasato akali okone lamawuato, nambato nimba mo atu eyo oko nimbato wandakali mindikipi mindi lamaulene andape leaipia. Nimba Gotena pitisa piape piyane akali oko ateyanga poto, nimbanba umbaini oko balanga andawa lape. Andawa lalu, Goteto nimbanba tapa tupa mo atu yala lo wandakali tupamane andeakalenga, Mosesato opa maipe leane pua nimbato maipe. Jisasato wuane leaipia. *

Jisasato Ami Opisa Mindina Piape Akali Mo Atu Yane Oko

Luku 7:1-10

⁵ Jisasa bala Kapaneame tano okona peakaiyu lea-angi, Lomo tane ami yanda yene andete mindiki ando atalane opisa mindimane epoto, pii mindi bala lamai-yaepia.

⁶ Balato pii okone bala lamawuato, Akali Andane, nambana piape akali oko bala kusuku pituto, tandaka andane wete no andaka peteane oko mee peteaya leaipia.

⁷ Wuane lea-kola, Jisasato namba epoto, bala mo atu yokale leaipia.

⁸⁻⁹ Wuane lea-kola, ami opisa okonemane balana pii okone yano peyoto, namba akali epene mindi jia leaipa. Nimba akali epene oko nambana andaka epeendo, mana okone katu nalolo-peya. Akali mindimane namba ando atalane pua teke, nambatopi ami yanda yene minditupa ando atalawane. Nambato ami yanda yene mindi peakale leyo-kola, bala palane. Nambato ami yanda yene mindi epeakale leyo-kola, bala epalane. Nambato nambana piape akali oko lamawuato, nimbato piape oko pii leyo-kola, balato piape okone piyane. Wuane pua teke, nimbato mee nambana piape akali oko atu yokale lole-kola, bala atu yolopeya leaipia.

¹⁰ Wuane lea-kola, Jisasato moko loto, wandakali bala watama epeaini tupa lamawuato, nambato pii enene mindi yakama langeyo leaipia. Ami opisa oko bala Isatale tane mindi jia tekeko, balato nambanga tungi peyoto, bilipi leya pua, Isatale tane wandakali mindikipi mindimane nambanga tungi peyoto, bilipi leyainga nambato anda napewane.

* ^{7:23:} Sam 6:8; 2Ti 2:19 * ^{7:28-29:} Mk 1:22; Lk 4:32

* ^{8:4:} Pit 14:1-32; Mt 9:30; Lk 17:14

¹¹ Matili Goteto wandakali pitaka yapa lo tale pula-angi, nai epalanesa tanepi, nai andaka palanesa tanepi, wandakali yame waka kambua epoto, Gotena yuu epene ati kenga eya okona poto, Apatakamepi, Aisakepi, Jekopopi, utupane towa atu tomo kambua no pitulu-peyai. *

¹² Utupane-mane wuane pulupeyai tekeko, Isatale tane minditupa ati kenga yuu epene okona polo-peyama nemboto atolai-kola teke, Goteto utupane yuu koo undupi-lene okona pulupa loto, wata nena lolopeya. Wata nena lola-kola, wandakali utupane yuu koo okonena atoto, yamataka lo nene geleto laka pua atolopeyai leaipia. *

¹³ Wuane lalu, Jisasato ami opisa oko lamawuato, nimbato nambanga tungi peyoto, bilipi lele pua, nimbanda piape akali oko atu yolopeya-ko. Nimba andaka puu leaipia. Wuane lea-kola, okone angti teke ami opisa okonena piape akali oko atu yaepia.

Jisasato Wandakali Kambua Mo Atu Yane Oko

Maki 1:29-34; Luku 4:38-41

¹⁴ Jisasa bala Pita andaka kolandaka loto andea-kola, Pitana wanda imane oko siki omoto, umbaini toto andane pea-kola, tokonga palu yanga andeaipia.

¹⁵ Andoto, Jisasato wanda okonena kinina minea-kola, balana umbaini toto andane peane okone atu yaepia. Atu ya-kola, wanda okone ika loto, Jisasana tomo yanga mayaepia.

¹⁶⁻¹⁷ Matili, nai andaka pea-kola, wandakali minditupa-mane sипитиса koo atene wandakali yangone kambua Jisasa ateanga atu aiyu epeainipia. Wamba potopesa akali Aisayato pii mindi pepa peyoto, nanimi siki omoto, tandaka no aterma-kola, balato nanimana siki mindipene-mindipene tupa mo atu yane leaipia. Gotena pii layene okone enene guleakale nembo toto, Jisasato wandakali utupanena sипитиса koo ateaini tupa peakale lo peyo wataka piyu, wandakali siki pelene tupa pitaka mo atu yaka peaipia. *

Jisasato Nimba Namba Watama Ipu Leane Oko

Luku 9:57-60

¹⁸ Wandakali kambua-mane Jisasa bala ato mapu peaining andoto, balato balana disaipolo tupa lamawuato, nanimi ipa angini okona amo yangi maa leaipia.

¹⁹ Wuane lea-kola, loo tupana mana andene akali mindimane Jisasa ateanga epoto, tisa, namba nimbanda disaipolo atoto,

yuu nimba pole tupa pitakana namba atu bakale leaipia.

²⁰ Bakale lea-kola, Jisasato bala lamawuato, peango anatope tupana pangulane yuli tomba-yene yalane. Dee, eka tupana paliyaini anda atalane tekeko, Akalina Iwanane oko oto mo kawane yata olane kawa kanda mindi nayalane leaipia. *

²¹ Wuane lea-kola, Jisasa watama epoko pua atalane akali waka mindimane bala lamawuato, Akali Andane, namba wamba ini poto, nambana ayiane oko mali pukale. Mali piyu, matili namba nimbanda disaipolo atoto, yuu nimba pole tupa pitakana atu pepando, okone katu lolo-peyape leaipia. *

²² Wuane lea-kola, Jisasato bala lamawuato, omene gulo atalaini wandakali tupa-mane yakamana yangone omene tupa mali peakale lo ando kondalu, nimbato namba watama ipu leaipia.

Jisasato Popo Andane Lo Auwa Epeane Mindi Tepa Yakale Leane Oko

Maki 4:36-41; Luku 8:22-25

²³ Wuane lalu, Jisasa bala sipi mindina peakaiyu lea-kola, balana disaipolo tupa bala towa atu peainipia.

²⁴ Ipa angini okona tombenenga peai-kola, popo andane wete mindi lo awua epeane okomane ipa andane wete mindi taimane ika leaipia. Ipa ika leane okone-mane sipi oko ango mangua yane tekeko, Jisasa bala sipi okonena limu paleaipia. *

²⁵ Limu palu ya-kola, balana disaipolo tupamanne bala peya ika loto, Akali Andane, nanimi omoyale peyama-ko. Nimbato nanimi molo-peke laa leainipia.

²⁶ Wuane leai-kola, balato utupane tipa puato, anu peakale yakamato Gote lo bilipi leyama nayu nalene, yukuwa ateyaipe leaipia. Wuane lalu, bala ika loto, popo andane leane okola, ipa taimane ika leane okola, lapotaka laiya loto, tepa alapa lea-kola, popo andane leane oko tepa yaepia. Tepa ya-kola, ipa taimane ika leane okopi tepa alu, ema anjakopi mindi naapeaipia. *

²⁷ Wuane pea-kola, sipi okona peteaini akali tupamanne nembo kambua toto, pii mindi leaini oko loto, Jisasato popo andane lala okola, ipa taimane ika lala okola, okonelapo laiya loto, tepa alapa leya-kola, lapotaka-mane balana pii ale eyapi-ko. Bala akali anu-pene mindi ya andeyamape leainipia.

Jisasato Akali Lapona Sipitisa Koo Ateaini Tupa Peyo Wateane Oko

Maki 5:1-17; Luku 8:26-39

* ^{8:11:} Lk 13:29-30 * ^{8:12:} Mt 22:13; 25:30; Lk 13:23-28
19:20 * ^{8:24:} Sam 4:8 * ^{8:26:} Mt 14:31; Sam 89:9 * ^{8:16-17:} Ais 53:4 * ^{8:20:} 2Ko 8:7-9 * ^{8:21:} 1Ki

²⁸ Jisasa bala ipa angini Galili okona amo yangi poto, Gatata yamenya yuu okona peakaiyu leaipia. Sipitisa koo atene akali lapo yuu okonena atoto, wandakali omene tupa mali pitane ateaini ongane mandaka atalapele-pia. Ole dindi lo akali okonelapome mane wandakali tupa taimane peyoyale peyapi-kola, wandakali tupa katulo ongane mandaka gulo na-palainipia. Jisasa bala Gatata yuu okonena peakaiyu lea-kola, akali okonelapome mane wandakali mali tupa analu epoto, bala malanda yapelebia.

²⁹ Jisasa malanda wato, akali okonelapome pii taimane loto, Gote Iwanane nimbato nalipanga aki pulape. Nimbato tandaka andane nalipanga gulane oto oko naepeya-kola teke, nimbato nalipa tandaka andane gulu epele leapelebia.*

³⁰ Amonga-yale yia yomo andane mindi tani no ateainipia.

³¹ Ateai-kola, sipitisa koo utupane-mane pii taimane loto, Jisasa nimbato nanima akali okolapo tepa alu pulupa lo peyo wateendo, nanima yia ateyai utupana ini anda-pangosa kolandaka lalapa lape leainipia.

³² Wuane leai-kola, Jisasato yakama pulupa leaipia. Pulupa lea-kola, sipitisa koo utupane-mane akali okonelapome tepa alu poto, yia utupanera ini pangosa kolandaka leainipia. Kolandaka leai-kola, yia utupane pitaka yuu wangiane mindina atoto, taimane puu nena loto, ipa angini mindi peteane okona peakoto, ipa nalu, omeainipia.

³³ Omeai-kola, yia yatawa atalaini akali tupamane okone andoto, tano okona taimane peainipia. Poto, utupane-mane wandakali tupa lamawuato, Jisasato sipitisa koo atene akali okone-lapona sipitisa koo ateaini tupa peyo wateane okopi, mangene waka peane tupapi, utupane pitaka wua piya leainipia.

³⁴ Wuane leai-kola, tano okonena tane wandakali tupa pitaka-mane Jisasa malanda olo epoto, bala andeaini-pia. Andoto, utupane-mane bala taimane lamawuato, nimba nanimana yuu oko tepa alu puu leainipia.

9

Jisasato Akali Kusuku Mindi Mo Atu Yane Oko

Maki 2:1-12; Luku 5:17-26

¹ Wandakali tupamane Jisasa nimba puu leai-kola, bala sipi mindina peakaiyu lo pitiyu, ipa angini okona amo maita bala atalane Kapaneame tano okona peke leaipia.*

² Peke lea wete, akali minditupa-mane akali kusuku mindi takeanga awua Jisasa ateanga epeainipia. Jisasato andea-kola, akali utupane-mane bilipi loto, akali okone awua epeyai lo andoto, balato akali okone lamawuato, iwana, nimbato nimbana koo pilini tupa apeyo-ko. Nimba mini epene pilai leaipia.

³ Jisasato wuane lea-kola, loo tupana mana andene akali ongane ateaini tupana minditupa-mane yakama tane teke-teke pii lalawa puato, Goteto angu wandakali tupana koo tupa apialane-ko. Jisasato akali kusuku oko lamawuato, nimbana koo tupa apeyo leya okomane Gote ando lamba leya leainipia.

⁴ Wuane leai-kola, Jisasato utupane tipa puato, anu peakale yakamato nembo koo palu ateyaipe leaipia.*

⁵ Nimbato akali kusuku oko lamawuato, nimbana koo tupa apeyo leyo oko pi-ape pitete-pene mindi jia. Nimbato bala lamawuato, nimba ika lalu, andaka puu loto, balana siki oko mo atu yewando, pi-ape okone pitete-pene yolopeya.

⁶ Wuane tekeko, Goteto yuunga wandakalina koo tupa apolane tai-lene oko Akalina Iwanane nambanga geane oko yakamato andalapale nembo teyo leaipia. Wuane lalu, balato akali kusuku okone lamawuato, nimba ika lalu, nimbana takeea toko mo awua andaka puu, leaipia.*

⁷ Wuane lea-kola, akali okone bala ika lalu, andaka peaipia.

⁸ Jisasato akali kusuku okone mo atu yane oko andoto, wandakali kambua ateaini tupamane moko andane wete leainipia. Moko loto, mo atu yolane tai-lene okonepene tupa Goteto yuu okona akali mindinga mayae-ya nembo toto, utupane-mane Gotena gene oko layiu leainipia.

Jisasato Matiyu Andoto, Namba Watama Ipu Leane Oko
Maki 2:13-17; Luku 5:27-32

⁹ Jisasa poto andea-kola, akali Matiyu lene mindi takisa muni mialaini anda mindina peteanga andoto, namba watama ipu lea. Wuane lea-kola, Matiyu ika lalu, Jisasa watama pea.

¹⁰ Jisasapi, balana disaipolo tupapi, utupane Matiyu towa atu balana andaka peaikola, takisa muni mialaini akalipi, koo piyaini wandakalipi, wandakali okonepene kambua epoto, utupane towa atu tomo no peteai.

¹¹ Jisasato utupane towa atu tomo no peteai-kola, Patasai tupamane andoto, Jisasana disaipolo tupa tipa puato, anu

* 8:29: Mk 1:24; Lk 4:41

* 9:1: Mt 4:12-16

* 9:4: Mt 12:25; Lk 9:47; Jo 2:24-25

* 9:6: Jo 17:1-3

* 9:11: Lk

peakale yakamana tisa oko bala takisa muni mialaini akalipi, koo piyaini wandakalipi, utupane towa atu tomo no peteyaipe leai.*

¹² Wuane leai-kola, Jisasato utupanena pii okone yano peyoto, dokosa-mane wandakali siki napalene tupa mo atu yolane tene mindi ata napeya lea. Dokosa-mane wandakali siki pelene tupa angu mo atu yalaini.

¹³ Wuane pua teke, namba epewane oko wandakali epene tika-pene tupa ee lo molo na-epewane. Jia. Koo piyaini wandakali tupa ee lo molo namba epewane. Gotena pii pepa pelene eya mindimane loto, wandakali-mane mee opa angu namba giyaini mana oko nambato epele aa na-piyawane. Jia. Wandakali-mane yakamana yangone tupa ondo wato moyalaini mana oko nambato epele alawane layene eya. Pii okonena tene oko andoko paleyape lo yakamato mana molo pulupa. Jisasato wuane lea.*

Pote Kambua Loyale, Tomo Nanene Atalaini Mana Oko

Maki 2:18-22; Luku 5:33-39

¹⁴ Okone angi, Jonena disaipolo tupa Jisasa ateanga epoto, alu minditupa Patasai tupamane pote kambua loyale, ole ukupini mindilapo tomo nanene atalaini leai. Nanimatopi wuane teke piyamane-ko. Anu peakale nimbana disaipolo tupamane wuane na-piyainipe leai.*

¹⁵ Wuane leai-kola, Jisasato utupane tipa puato, akali mindimane wanda mindi kee loto, balana amene tupa towa atu ateyai-kola, balana amene utupane-mane mini kenda alainipe lea. Jia. Okone angi utupane-mane mini kenda aa na-piyaini tekeko, matili akali minditupa-mane bala andi lo awua polai-angi, balana amene tupamane pote kambua loyale, ole ukupini mindilapo tomo nanene atolopeyai lea.

¹⁶ Wandakali mindimane lapa-lapa palai-lene wenene mindi moto, tona wambane asia titi yene mindina ataenge lo tambu leando, balato tona okone wasa-wasa peyolangi, lapa-lapa palai-lene wenene oko kingi tupi loto, tona wambane okone lapone lete laya ola-kola, asia titi wamba yane okone andane gulolo-peya. Wuane pulane nembo toto, wandakali mindikipi mindimane wuane napiyane. Jia.

¹⁷ Dee, wandakali-mane ipa waene wenene tupa ipa pene wambane meme umbaini-mane waa-pene tupana ambu pete leaindo, ipa waene wenene okonena popone-mane anda yoto, pene wambane utupane tula lolai-kola, ipa waene oko alu

pulupeya. Wuane pulane nembo toto, wandakali mindikipi mindimane wuane napiyane. Jia. Wandakali-mane ipa waene wenene tupa pene wenene tupana ambu pete leyai-kola, ipa waene tupapi, ipa pene tupapi, utupane pitaka kuai lo yalane. Jisasato wuane lea.

Jisasato Wanda Mindi Mo Atu Yalu, Wana Omene Mindi Mina Ika Leane Oko

Maki 5:22-43; Luku 8:41-56

¹⁸ Jisasato pii utupane Jonena disaipolo tupa lamawua atea-kola, Juta yamen lotu anda ando atalane akali Jaitusa lene oko epea. Epoto, bala Jisasa ateanga aiki leka wato, nambana wanane oko epapu omala tekeko, nimba epoto, balanga kini yata eendo, bala dee lapone saka atolo-peke lolopeya lea.

¹⁹ Wuane lea-kola, Jisasa ika lalu, akali okone towa atu peapi-kola, Jisasana disaipolo tupapi atu peai.

²⁰⁻²¹ Okone angi, mali alesa pitakana ole dindi lo kii kalo teke pitiyane wanda mindi tano okonena peteaipia. Wanda okone-mane Jisasa epo peangga andoto, nambato balana tonanga wata ewando, nambana siki oko koyo pulupeya nembo toto, Jisasa masianesa epoto, balana tona okona duninga wata ya.*

²² Wata ya-kola, Jisasa bala mopeke loto, wanda okone andoto, wana nimbato nambu lo bilipi lele mambele, nambato nimbana siki oko mo atu eyo-ko. Nimba mini epene palu puu lea. Wuane lea-kola, okone angi teke wanda okone atu ya.

²³ Atu ya-kola, Jisasa bala Jaitusa okona andaka poto, anda-pango kolandaka loto andea-kola, akali minditupa-mane wana omene oko mali puyale pupe tupa lo atea-kola, wandakali waka tupamane ai lo yaya peyo yamataka lo atea.

²⁴ Wuane pua atea-kola, Jisasato utupane lamawuato, wana oko oma napene, mee limu paleya-ko. Yakama pulupa lea. Wuane lea-kola, balato kopeta leya nayuto, wandakali utupane-mane bala andayo giwa yai.

²⁵ Giwa yai-kola, balato utupane pitaka kamaka peakale lo peyo watalu, wana omene yane lumu okona kolandaka loto, balana kininga minia-kola, wana omene yane oko saka pitulu-peke lalu, ika leaplia.

²⁶ Jisasato wana okone saka pitulu-peke laya ya-kola, wuane piya lo wandakali tupamane pii temane okone yuu ukusane yene tupa pitakana lo tawe yainipia.

Jisasato Lee Koo Akali Lapo Mo Atu Yane Oko

²⁷ Jisasa bala yuu okone tepa alu pea-angi, lee koo lapo akali-mane bala watama epoto,

* 9:13: Mt 12:6-8; Ose 6:6 * 9:14: Lk 18:12 * 9:20-21: Mt 14:36 * 9:27: Mt 20:29-34

Dapiti yame akali nimbato nalipa ondo aa lo pii taimane leapi. *

²⁸ Jisasa bala andaka kolandaka leangi, akali lee koo okonelapo bala ateanga epeapi-kola, balato okonelapo tipa puato, nambato katulo liyambana lene mo tee laya olopeya lo liyambato bilipi leyapi lea. Wuane lea-kola, okonelapo-mane balana pii okone yano peyoto, enene, Akali Andane, nimbato katulo wuane pulupele lo nalipato bilipi leyapa leapi.

²⁹ Wuane leapi-kola, Jisasato balana kini oko akali okone-lapona lenenga yata wato, nambato katulo liyambana lene oko mo tee laya olopeya lo liyambato bilipi leyapi pua teke, nambato liyambana lene oko mo tee laya eyo lea.

³⁰ Wuane lea wete, akali okone-lapona lene teapi-kola, Jisasato akali okonelapo pii lamaiyo nayu lamawuato, nambato liyambana lee mo tee laya eyo oko liyambato wandakali mindikipi mindi lamaulaapele lea. *

³¹ Jisasato wuane leane tekeko, akali okonelapo liyamba poto, Jisasato liyambana lee mo tee laya apiane lo pii temane okone yuu ukusane yene tupa pitakana lo tawe yapelepi.

Jisasato Akali Pii Na-lalane Mindi Mo Atu Yane Oko

³² Akali okonelapo Jisasa tepa alu, peapi-angi, wandakali minditupa-mane yangone mindi atu aiyu Jisasa ateanga epeai. Sipitisia koo mindi akali okonenaga atea-kola, balato katulo pii na-lalaepia.

³³ Jisasato akali okonenaga sipitisa koo ateane okone peyo watea-kola, akali okonemanee pii lea. Pii lea-kola, wandakali amunguli pua ateaini tupamane moko wete loto, nanima Isatale tane tupamane andema-kola, alu mindikipi mindi akali mindimane pii na-lalane akali mindi pii laya yanga anda napema leai. *

³⁴ Wandakali utupane-mane wuane leaini tekeko, akali Patasai tupamane loto, sipitisa koo yame ando atalane sipitisa kawane Belesa-pulu balato Jisasa minu tai laya eya-kola, Jisasato sipitisa koo tupa katulo peyo wata alane leai. *

Jisasato Wandakali Tupa Ondo Yane Oko

³⁵ Okone ang, Jisasa bala tano andanepi, anjakopi, utupane pitakana epoko puato, Juta yamenia lotu anda tupana poto, Gotena pii layene epene oko wandakali tupa mana lamawuato, Goteto wandakali tupa moyo

ando atalane lea. Wuane loto, balato wandakali siki pelene tupa pitaka mo atu yaka pea. *

³⁶ Okone ang, balato andea-kola, wandakali kambua ateaini tupa yakama sipsipi yatawa atalane akali mindi atu napene manyani gulo atoto, anu pimape lo tatake aka pua ateaininga andoto, balato utupane ondo ya. *

³⁷ Ondo wato, balato balana disaipolo tupa lamawuato, eenga tomo kambua mandipe-pene eya tekeko, tomo mandulane wandakali aqjalapo angu ateyai-ko. *

³⁸ Ee anduane okomane bala eenga tomo mandulane wandakali minditupa mo tako peakalenga, yakamato bala lo pote lalapape lea.

10

Jisasato Balana Disaipolo Alesa Tupa Pi-ape Pulu Pulupape Leane Oko
Maki 3:13-19; 6:7-13; Luku 6:12-16; 9:1-5

¹⁻⁴ Aposolo akali bulupane oko Saimone balana gene mindi Pita lene oko. Balana amene Endutupi, Sepiti iwanane Jemesapi, balana amene Jonepi, utupane aposolo akali ateaini teke. Dee, Pilipipi, Batolomiyupi, Tomasapi, Tatiyusapi, takisa muni mialane akali Matiyu okopi, Alipusa iwanane Jemesapi, Selote yamenia akali Saimone okopi, Jutaso gene mindi Isakatiyote lene matili Jisasa ene peteane okopi, akali alesa utupane pitaka aposolo akali ateai. Jisasato utupane bala ateane ongane mandaka ipulupa loto, yakamato sipitisa koo tupa peyo watoto, wandakali tupana siki mindipene-mindipene tupa pitaka mo atu yaka pua atalapape lea. Wuane loto, balato piape okonelapo pulane tai-lene oko akali utupanenga maya. *

⁵⁻⁶ Jisasato akali alesa utupane piape pulu pulupa loto, yakamato Samatiya tane wandakali tupana tano mindi yandopi, wandakali yame waka tupana yuu mindi yandopi, utupanena puu napene kondalapape. Yakamato Isatale tane wandakali sipisipi alu pene gulo ateyai tupanga angu pulupa lea. *

⁷⁻¹⁰ Wandakali mindimane wandakali waka mindina piape pimai-yando, piape anduane okomane bala yole maipe-peneko. Yakamato muni yandopi, ane pausa mindi yandopi, nuu mindi yandopi, singilisa lapo yandopi, sukee lapone yandopi, utupanena mindi mandi napene, kalango mindi ai napene, mee pulupape. Yakamato Isatale tane wandakali tupa ateyainga poto, Gote

* 9:30: Mt 8:4 * 9:33: Mk 2:12 * 9:34: Mt 12:24; Mk 3:22; Lk 11:15 * 9:35: Mt 4:23; Mk 1:39 * 9:36: Mt 14:14; Nam 27:17; 1Ki 22:17; Sak 10:2; Mk 6:34 * 9:37: Lk 10:2 * 10:1-4: Mk 6:7; Lk 9:1 * 10:5-6: Jet 50:6

ati kenga ateya okomane pitaka taka ando atolane gii oko wamba mandaka guleya lo lamai-yapape. Lamaiyu, yakamato wandakali siki pelene tupa mo atu yalu, wandakali omene tupa ika laya alu, wandakali tapa-pene tupa mo atu yalu, sipitisa koo tupa peyo watalu, piyapape. Yakamato piape utupane piyapale loto, nambato tai-lene yakamanga geyo okonena yole mindi yakamato namba giyapa naleyo. Wuane pua teke, yakamato wandakali tupa moyo piape utupane pulai-angi, yakamato yole mindi giyapa nalene, utupane mee moyo piape utupane pua atalapape. *

11-13 Yakama tano mindina polai-angi, wandakali epene tika-pene mindi aiya piyapape. Wandakali mindimane yakama andaka ipulupa lola-kola, yakamato balana andaka kolandaka leaindo, yakamato wandakali anda okonena pitulai tupa lamawuato, yakama mini epene palu atalapa lala-pape. Wandakali utupane-mane yakama wayu epalai ya leaindo, yakamana yamapanne tambo laya olane pii epene oko utupanenga yolopeya oko yakale lalapape. Yakale lalu, yakama anda waka mindina pali-pali napene, anda mindiki okonena angu palu atoto, tano okonena epoko pua atalapape. Matili yakamato piape pikoyu pulai-angi, tano okone tepa alu pulupape. Yakama anda mindina kolandaka lolai-angi, wandakali anda okonena pitulai tupamane yakama wayu epalaiya lo lamia napeaindo, yakamana yamapanne tambo laya alane pii okone yakama tanenga peke leakale lo ando kondalapape. *

14 Tano mindina wandakali mindikipi mindimane yakamana pii lolai tupa ale naene, yakama yatawa pali napeaindo, yakamato tano okone tepa alu moyale atolai-angi, yakamana sukee okona yuu kangalamu atolane tupa tanda lo tepa alu, yakama yuu waka mindinga pulupape. *

15 Nambato pii enene mindi yakama langeyo. Matili Goteto wandakali tupa yapa lo tale pulu epola-angi, Goteto Sotomo, Gomota-la, tano okone-laponatane wandakali tupa malinga ika laya wato, kenda-pene mindi utupanenga malupeya. Wuane tekeko, yakamato pii mindi lolai-kola, tano mindina wandakali tupamane yakamana pii okone ale naene, yakama yatawa pali napeaindo, matili Goteto kenda-pene andane wete mindi wandakali utupanenga maulupeya. Jisasato wuane lea. *

Kenda-pene Kambua Epolopeya Leane Oko

Maki 13:9-13; Luku 21:12-17

16 Wuane lalu, Jisasato balana disaipolo tupa lamawuato, sipisipi gulene akali tupa yakama peango anatope gulene wandakali tupana tombenenga poto, piape pua atalapape leyo-ko. Etelel tupamane tenga-mane waiwa yalaini pua teke, yakamatopi waiwa atalapape. Dee, eka iti puluma tupamane mana koo mindi paini mina na-piyaini pua, yakamatopi mana koo mindi paini mina na-piyapape. Jia. *

17-18 Yakamato namba lo bilipi leyai oko awua tepa alapale nembo toto, Juta yame-mane yakama andi lo awua poto, yakamana kanjole tupana wenonga kosimi loto, yakamana lotu anda tupana atoto, yakama kunju-mane peyolo-peyai. Utupane-mane wuane pulaini. Yakama waiwa ando atalapape. Yakamato nambana pii layene epene oko gapomane akali andanepi, kinjipi, wandakali yame waka tupapi, utupane pitaka lamai-yapale nembo toto, alu minditupa Goteto ando konda ola-kola, wandakali minditupa-mane yakama andi lo awua poto, yakama kosimi loyale, akali utupanena wenonga ataya olopeyai. *

19-20 Yakama akali utupanena wenonga atolai-angi, yakamato pii lolai tupa yakama tane nembo toto, laa napulu-peyai. Jia. Ayiane Gotena Sipitisa yakamanga ateya okomane yakamana nembo-tene tupa mina ika laya wato, yakamato wua lalapa lolopeya-ko. Wandakali-mane yakama kosimi lolai-angi, yakamato aki loto, wandakali utupanena pii lolai utupane yano peya-makalepe lo nembo kambua natlapape. *

21 Okone angi, akali mindimane namba lo bilipi lola-kola, balana amene okomane bala kosimi loto, gapomane okomane bala peyo ome leakale lo malupeya. Ayiane mindimane balana andopane oko kosimi loto, wuane teke pulupeya. Andopane minditupana angini, ayiane-la, okonelapo liyamba nambana yame atolapi-kola, andopane utupane-mane okonelapo masia mawuato, kosimi loto, gapomane okomane okonelapo peyo ome leakale lolopeyai. *

22 Yakama nambana yame atolai-kola, wandakali kambua longo-mane yakama towa embo wetete olopeyai tekeko, wandakali-mane namba awua tepa naene, nambanga tungi peyo bilipi lo atapowa atolai-kola, Goteto utupane molo-peke lolopeya.

* **10:7-10:** Mt 3:1-4; 4:17; Lk 10:4,6-9,11; 1Ko 9:14 * **10:11-13:** Lk 10:5-7 * **10:14:** Lk 10:10-12; Ap 13:51 * **10:15:** Mt 11:24; Ju 7 * **10:16:** Lk 10:3; Lom 16:17-19 * **10:17-18:** Mk 13:9-10; Lk 21:12-13 * **10:19-20:** Jo 14:26; Lk 12:11-12 * **10:21:** Mai 7:6; Mt 10:34-36; Mk 13:12; Lk 21:16

²³ Nambato pii enene mindi yakama langeyo. Yakamoto Isatale yuu okona tano tupa pitakana poto, piape pikoyo napulai-kola, Akalina Iwanane oko peke lolopeyako. Tano mindina wandakali tupamane kenda-pene andane tupa yakama giki peaindo, yakama tano waka mindina palaka pulupape.

²⁴⁻²⁵ Mana kambua tisa tupanga eya-kola, mana aŋjalapo angu sukulu pai tupanga yalane. Wuaneko, mana mene wandakali mindimane balana tisa oko sia minuto, bala lipinga yale ata napiyane. Jia. Mana mene mindimane mana moto, balana tisa ateya okopene teke guleando, okone katu. Wuane pua teke, piape akali mindimane balana piape ando atalane akali ateya okopene teke guleando, okone katu. Namba anda anduane ateyo-kola, wandakali minditupamane nambana gene Belesa-pulu geyai-ko. Wuane pua teke, yakama nambana yame ateyai lo andoto, utupane-mane gene koo wete minditupa yakama gulupeyai. Jisasato wuane lea. *

Yakamoto Gote Angu Yukuwa Atalapape Leane Oko

Luku 12:1-7

²⁶ Wuane lalu, Jisasato pii mindi tako pua loto, andipa wandakali-mane mana too pua miniyai tupa pitaka matili panakame yolopeya lea. Pii andipa too pene eya tupa pitaka matili wandakali-mane ale wato, nembo tolo-peyai. Yakamoto wandakali mindikipi mindi ando yuku olaini. *

²⁷ Andipa undupi pangosa nambato pii minditupa yakama langeyo tekeko, matili nai tola-angi, yakamoto pii utupane panakame lamai-yapape. Andipa nambato pii minditupa akatete-mane yakama langeyo tekeko, matili wandakali pitakame ale yakale nembo toto, yakamoto anda tokonga atoto, pii utupane taimane lalapape.

²⁸⁻³¹ Wandakali-mane katulo eka pilipimbi lapo ana mindiki-mane kambalaini tekeko, yakamana Ayiane Goteto eka aŋjako utupanena mindi oma naapeakale nembo teando, eka okone oma napulu-peya. Wandakali yakamoto eka pilipimbi kam-bua tupa sia minuto, lipinga-yale ateyai-kola, Goteto yakamana kawa itini ateya tupa dii lo andalane-ko. Wandakali-mane yakama peyo ome lolaini loto, yakamoto yuku aa na-piyapape. Enene, wandakali-mane katulo yakamana umbaini oko peyo ome lolopeyai tekeko, utupane-mane yakamana tandini oko katulo peyo ome nalolo-peyai. Goteto katulo yakamana

umbaini, tandini-la, lapotaka yuu koo wetete okona awua aindaka loto, minu koyolo-peyako. Wandakali-mane yakama peyo ome lolaini lo yuku naene, yakamoto Gote angu yukuwa atalapape. Jisasato wuane lea. *

Namba Jisasana Yame Ateyo Lo Lapana Ape-pene Leane Oko
Luku 12:8-10

³²⁻³³ Wandakali tupana wenonga atoto, wandakali mindimane namba Jisasa yame ata naapeyo leando, matili nambana ayiane ati kenga ateya okona wenonga atoto, nambato wandakali okone bala namba yame ata naapeya lolopeyawa. Wuane tekeko, wandakali tupana wenonga atoto, wandakali mindimane namba Jisasa yame ateyo leando, matili nambana ayiane ati kenga ateya okona wenonga atoto, nambato wandakali oko bala namba yame ateya lolopeyawa teke. *

³⁴⁻³⁶ Yuu okona wandakali tupamane yanda napene atoto, yame mindiki ateakale hayuto, namba epeane lo yakamoto nembo na-talapape. Jia. Ayiane mindimane nambana yame atola-kola, balana iwanane okomane bala yanda pimalu-peya. Angini mindimane nambana yame pitula-kola, balana wanane okomane bala yanda pimalu-peya. Akali mindina angini okomane nambana yame pitula-kola, akali okonena wetene okomane balana wanda imane okone yanda pimalu-peya. Akali mindimane nambana yame atola-kola, balana yame anda mindikina paliyaini tupamane bala yanda pimalu-peyai. Wandakali yame palu pula tupa pitaka yapu lo lapo peakale nembo toto, namba epewane. Wandakali minditupa-mane yanda pimakale nembo toto, kandepa luu tupa awua epalaini pua teke, nambana pii oko kandepa luu mindi guleya-kola, nambato okone awua epewane. *

³⁷ Wandakali mindimane balana ayiane yandopi, angini yandopi, okone-lapona mindi wayumane epelewa yamapano yo atalane wuane pua teke, balato namba towa epelewa yamapano yo ata naapeando, wandakali okone bala katulo nambana yame ata napulu-peya. Mindimane balana iwanane yandopi, wanane yandopi, okone-lapona mindi wayumane epelewa yamapano yo atalane wuane pua teke, balato namba towa epelewa yamapano ata naapeando, wandakali okone bala katulo nambana yame ata napulu-peya teke.

³⁸ Wandakali mindi bala nambana yame atola mambele, kenda-pene minditupa

* **10:24-25:** Mt 9:34; 12:24; Mk 3:22; Lk 6:39-40; 11:15; Jo 13:14-16; 15:20

Jem 4:11-12; Mt 6:25-27

* **10:26:** Mk 4:21-22; Lk 8:17

10:32-33: Mk 8:34-38; Lk 9:23-26; 2Ti 2:11-12

* **10:28-31:**

* **10:34-36:** Mai 7:6

balanga epoto, balana ita malamanda oko gulo yolopeya. Balato kenda-pene utupane mo awua, namba watama na-epaando, bala nambana yame atolane wandakali epene mindi jia. *

³⁹ Wandakali mindi bala nambana yame ateando, namba towa yanda piyaini akali tupamane katulo bala peyo ome lolopeya. Wandakali mindi bala omolowane nembo toto, nambana yame ata napeando, bala epene saka atapowa ata napulu-peya. Wandakali mindi bala nambana yame atola mambele, wandakali mindimane bala peyo ome leando, wandakali okone bala epene saka atapowa atolane tene oko ando molopeya.

⁴⁰ Wandakali mindimane yakama wayu epalai ya loto, yakama yatawa paleando, balato namba wayu epeleya loto, yatawa palula-kola pulupeya. Wandakali mindimane namba wayu epeleya loto, namba yatawa paleando, balato namba ati kenga atala yuunga puu leane Gote oko wayu epeleya loto, yatawa palula-kola teke pulupeya. *

⁴¹ Mindimane potopesa akali mindi moyokale nembo toto, bala wayu epeleya loto, yatawa paleando, Goteto balana potopesa akali tupa yole epene mindi maulupeya mindiki okonepene teke wandakali okone maulupeya. Dee, wandakali mindimane Gotena wandakali epene tika-pene mindi moyokale nembo toto, bala wayu epeleya loto, yatawa paleando, Goteto wandakali epene tika-pene mindi yole epene mindi maulupeya mindiki okone teke wandakali okone maulupeya.

⁴² Nambato pii enene mindi yakama langeyo. Wandakali mindimane nambana yame wandakali tupana mindi moyokale nembo toto, ipa kaka-ene ambuto, nambana yame wandakali gene nayene wete mindi neakale mayando, Goteto yole epene mindi wandakali okone maulupeya. Jisasato wuane lea.

11

*Jonena Disaipolo Lapo Akali Jisasa
Ateanga Epeapele Oko
Luku 7:18-35*

¹ Yakamoto wua piyapape loto, Jisasato balana disaipolo alesa akali tupa mana lamai koyo piyu, bala yuu okone tepa alu, yuu ongane mandaka tano yane tupana poto, Gotena pii mana tupa lamawua atea.

²⁻³ Okone angi, ipa peya-maiyane akali Jone oko bala andi latane atoto, Jisasa Kataisato piape pua ateya lene oko ale

yaepia. Ale wato, balana disaipolo lapo akali lamawuato, liyamba Jisasa ateyanga poto, bala tipa puato, nimba akali mindi epolopeya layene pia okope. Pee, matili akali waka mindi epolopeya lo nanimoto maliyo atamakalepe lo tipa piyapape leaipia.

⁴⁻⁶ Wuane lea-kola, akali okonelapo Jisasa ateanga epoto, bala tipa peapi-kola, Jisasato okone-lapona pii okone yano peyoto, nambato piape pua ateyo-kola, wandakali lee koo tupamane kuai lo andeyay lea. Wandakali kee koo tupa asini peyai. Wandakali tapa-pene tupa umbaini epene ateyai. Wandakali ale tuma tupamane pii ale eyai. Wandakali omene tupa malinga ika loto, saka ateyai. Wandakali koo tipia tupamane Gotena pii layene oko ale eyai. Wandakali mindimane nembo lapo pali napene, namba Mesaya oko ateya lo bilipi leando, matili bala epele wete olopeya-ko. Liyamba Jone ateyanga peke loto, nambana piape lee-mane andeyapi tupapi, nambana pii ale-mane ale eyapi tupapi, utupane pitaka bala lamai-yapape. Jisasato wuane lea. *

⁷ Wuane lea-kola, Jonena disaipolo okonelapo Jone ateanga peke leapi-kola, Jisasato wandakali kambua ateaini tupa tipa puato, wamba Jone bala wandakali napalene yuu okona atea-angi, bala akali anu-pene mindi atea-kola, yakamoto bala andolo peaipe lea. Popo leya-kola, kambe tundupalina dini tupa pua amo nena piyane pua, Jone bala akali nembo lapo palu atea-kola, yakamoto bala andolo peaipe. Jia. Bala nembo mindiki palu atoto, piape pua atea.

⁸ Balato tona epene wete minditupa pua atea-kola, yakamoto bala andolo peaipe. Jia. Tona epene wete piyaini akali tupa kinji tupana andaka pitiyaini.

⁹⁻¹⁰ Jone bala potopesa akali mindi atea-kola, yakamoto bala andolo peaipe. Enene. Jone balato potopesa piape pua atolopeya nembo toto, Gotena pii pepa pelene eya mindimane loto, Ale alapape. Nambana pii wai lo awua epolane akali oko bala wamba ingane epeakale lolowa-kola, balato nimbanas asini oko mandeke pua yata olopeya layene eya. Joneto potopesa piape okone puato, potopesa akali wamba ateaini tupa pitaka sia minea. *

¹¹ Nambato pii enene mindi yakama langeyo. Ipa peya-maiyane akali Jone oko balato yuu okona wandakali tupa pitaka sia minu ateya tekeko, Goteto wandakali gene nayene wetete tupa moyo ando atola-kola, utupane-mane Jone sia minuto, kuai lo wetete atolopeyai.

* **10:38:** Mt 16:24-26; Mk 8:34-35; Lk 9:23-26; 17:33; Jo 12:25

* **10:40:** Mk 9:37; Lk 10:13-16; Jo 13:18-20 * **11:4-6:**

12-13 Wamba Mosesapi, potopesa akali tupa pitakapi, utupane-mane pii minditupa pepa peleai-kola, akali minditupa-mane pii utupane wandakali tupa lamawua atama ipulu, ipa peya-maiyane akali Jone oko bala ateane gii okona giau leainipia. Jone bala epoto, Goteto pitaka taka onto atalane lo pii lamawua ateane okone ang i tewa atoto, wandakali pitaka-mane balana pii okone ale wato, Goteto utupane moyo ando ateakale lo taimane atete pima epeaini oko epoto, oto andipa ateyama okona giau leya. *

¹⁴ Wamba potopesa akali tupamane pii mindi loto, matili potopesa akali Ilainja bala peke lolopeya leainipia. Yakamato utupanena pii okone enene ya lo nembo teaindo, ipa peya-maiyane akali Jone bala Ilainja peke lene gulo ateane nembo talapape. *

¹⁵ Wandakali ale asia yene tupa yakamato pii okone ale alapape.

¹⁶⁻¹⁹ Ipa peya-maiyane akali Jone bala ipa waene naa napene atea. Ole ukupini mindilapo balato pote angu lokale nembo toto, ulia nanene kondea. Kondea-kola, wandakali tupamane bala lamba loto, sипитса koo mindi balanga ateya-kola, balato ipa waene ulia ima nanene kondalane leainipia. Andipa Akalina Iwanane oko epo atoto, ipa waenepi, uliapi neyakola, wandakali andipa ateyai tupamane balapi lamba loto, akali okomane ipa waenepi, uliapi kambua wete no atoto, takisa muni mialaini akali tupapi, koo piyaini wandakali tupapi, utupane towa yandeke ando atalane leyai. Wuane leyakola, nambato andipa ateyai wandakali yakama andopane yame towa makande peyo. Andopane tupamane makesa ama tupana pituto, andopane yangone tupa lamawuato, yakamato nanima towa kindi pua mali lialapale loto, nanimoto yakama mina kindi pua musiki lalama tekeko, yakamato nanima towa kindi pua mali lia napiyai lalaini. Nanimato kindi puato, wandakali mali puyale wee lalaini mindi lalama tekeko, yakamato nanima towa kindi pua ai lama na-lalai. Wandakali andipa ateyai tupa yakama andopane okonepene gulo atoto, pii okonepene leyai tekeko, wandakali wai-ene tupamane Gotena pii layene oko tika-pene ya lo nembo toto, Goteto leya pua piape piyaini. Jisasato wuane lea. *

*Yamapane Peke Nalene Wandakali Tupa
Koyolo-peyai Leane Oko
Luku 10:13-16*

20-21 Wamba Jisasa bala Kotasinipi, Betesaitapi, Kapaneamepi, tano utupanena atoto, metekolo piape tai-lene andane kambua wete peane tekeko, tano utupanena tane wandakali tupamane yamapane peke naleai. Yamapane peke naleai-kola, balato wandakali utupane laiya loto, Kotasini, Betesaita-la, tano okone-lapona tane wandakali yakamato ale alapape lea. Wamba namba yakamana yuu okone-lapona atoto, metekolo piape andane minditupa pewa tekeko, yakamato utupane andoto teke, yamapane peke naleai. Akali mindimane Taya, Saitone-la, tano koo okone-lapona poto, metekolo piape andane utupane pea-yale, tano okone-lapona tane wandakali tupamane mana koo minu atalamae-ya nayu, mini kenda wato, yakamana angati itini pundi loto, wamba wete yamapane peke leai-yale. Yali, ae, Kotasini, Betesaita-la, tano okone-lapona tane wandakali yakama yamapane peke naleyai okonena, yakama koyolobeyai nembo toto, nambato yakama ondo eyo. *

²² Goteto wandakali tupa yapa lo tale pula-angi, balato Taya, Saitone-la, tano okone-lapona tane wandakali tupa kenda-pene minditupa maulupeya tekeko, balato kenda-pene andane wete minditupa Kotasini, Betesaita-la, tano okone-lapona tane wandakali yakamanga gulupeya.

²³ Okone ang, Goteto Kapaneame tano okona tane wandakali yakamana gene tupa ati kenga laiyu lolo-peyape. Jia. Yakamapi yamapane peke naleyai okonena, balato yakamapi yuu koo wetete okona wata ai nena lolopeya. Wamba namba yakamana tano okona atoto, metekolo piape andane minditupa pewa okoni. Wandakali mindimane Sotomo tano okona atoto, metekolo piape andane utupane pea-yale, wandakali utupane yakamapi yamapane peke leai-yale. Wuane peai-yale, Goteto Sotomo tano oko minu koya napea-kola, tano okone mee yapia-yale. *

²⁴ Goteto wandakali yapa lo tale pula-angi, balato Sotomo tano okona tane wandakali tupa malinga ika laya alu, utupanenga kenda-pene minditupa maulupeya tekeko, balato kenda-pene andane wete mindi Kapaneame tano okona tane wandakali yakamanga gulupeya. Jisasato wuane lea. *

*Jisasato Yakama Mana Mo Atalapape
Leane Oko
Luku 10:21-22*

* **11:12-13:** Lk 16:16 * **11:14:** Mal 4:5; Mt 17:10-13; Mk 9:11-13 * **11:16-19:** Mt 9:14 * **11:20-21:** Ais 23; Ese 26:1-28:26; Jol 3:4-8; Emo 1:9-10; Sak 9:2-4 * **11:23:** Ais 14:13-15; Jen 19:24-28 * **11:24:** Mt 10:15; Lk 10:12

25-27 Okone angi, Jisasato pii mindi tako pua loto, minditaka eya tupa pitaka nambato ando atola loto, Ayiane Goteto utupane pitaka nambanga geane lea. Wandakali mindikipi mindimane bala tanena tai-lene okomane Ayiane Gote oko bala okopene lo anda napiyane. Jia. Gote Iwanane oko balana tai-lene okomane Ayiane Gote oko bala okopene ateya lo andalane. Andoto, balana ayiane oko bala okopene ateya lo wandakali mindinga andawa leando, wandakali okonemane Ayiane Gote oko bala okopene ateya lo andolopeya teke. Wuane pua teke, wandakali mindikipi mindi bala tanena tai-lene okomane Gote Iwanane oko bala okopene ateya lo anda napiyane. Jia. Ayiane Gotena tai-lene okomane bala Iwanane okopene ateya lo andalane. Andoto, balana Iwanane oko bala okopene ateya lo wandakali mindinga andawa leando, wandakali okonemane Iwanane oko bala okopene ateya lo andolopeya teke. Wuane lalu, Jisasato pote loto, Ayiane Gote, nimbato yuu ati-la, lapotaka ando atelene lea. Wandakali wai-enepi, mana kambua andenepi, utupane-mane pii lalo utupane anda napeakale nembo toto, wamba nimbato pii utupane mo too pee. Andipa andopane ajako yale gulo ateyai wandakali tupamane nimbana pii utupane andeakale nembo toto, nimbato pii utupane wandakali utupanenga andawa lele. Enene, ayiane, nimbato kuai lo nembo toto, wuane pele okonena, nambato nimbana gene oko laiyu leyo. Jisasato pote loto, wuane lea. *

28 Pote lalu, Jisasato wandakali tupa lamauwato, kenda-pene andane awua atalaini wandakali yakama oto mialapale lokalenga, yakama namba ateyonga ipulupa lea. *

29-30 Nambato wandakali tupana napinga yale gulo atoto, utupane towa tengamane tambo lo atene mana oko minu atalawane. Yakama nambana pangosa ateaindo, piape nambato yakama guluwa oko kenda napene, yambo-yambo gulokola, yakama oto mo atene gulo atolopeyaiko. Yakama nambana pangosa atoto, piape nambato yakamanga guluwa okone puato, mana nambato yakama languluwa tupa mo atalapape. Jisasato wuane lea. *

12

Sambasa Angi Piape Na-piyaini Mana Oko

Maki 2:23-28; Luku 6:1-5

* **11:25-27:** Mt 28:18; Jo 3:33-35; 17:1-3; Pl 2:9-11; Jo 1:15-18; 10:14-15; 1Ko 1:26-29 * **11:28:** Jet 31:25 * **11:29-30:** 1Jo 5:1-5 * **12:1:** Lo 23:25 * **12:2:** Ek 20:10 * **12:3-4:** Pit 24:5-9; 1Sa 21:1-6 * **12:5:** Nam 28:9-10 * **12:6-8:** Mt 9:13; 12:41-42; Ose 6:6

¹ Sambasa mindina, Jisasa bala witi ee tupana tombenenga asia epo pea-kola, balana disaipolo tupamane bala watama epoto, ulia nono wato, witi dini tupa yoto, naka pima peai. *

² Yoto naka pima peai-kola, Patasai tupamane andoto, Gotena loo okomane loto, Sambasa angi wandakali-mane piape napipe-pene leya tekeko, nimbana disaipolo tupamane witi dini tupa yoto, naka pima peayai okonde leai. *

³⁻⁴ Wuane leai-kola, Jisasato utupanena pii okone yano peyoto, Gotena loo okomane loto, Gotena lotu anda okona betesa Gote maiyene yalaini tupa pitisa akali tupamane angu nape-pene layene eya lea. Wandakali waka mindimane betesa utupane naa napiyapape layene eya tekeko, wamba Daptipi, akali bala towa atu ateaini tupapi, utupane yakama ulia nono yai-kola, balato Gotena lotu anda okonena kolandaka loto, betesa utupane noto, bala towa atu ateaini akali tupapi neakale mayane lo pepa pelene eya. Yakamato pii okone wamba dii lo anda napeaipe. *

⁵ Dee, Mosesato pii mindi pepa peyoto, Sambasa angi pitisa akali tupamane lotu anda andane okona atoto, piape piyaini tekeko, Goteto koo tene mindi utupanenga yata na-alane leaipia. Yakamato pepa okone wamba dii lo anda napeaipe. *

⁶⁻⁸ Yakamato lotu anda andane oko angini wete mindi ateya nembo teyai tekeko, namba epo atoto, lotu anda andane oko sia minuto, piape andane wete tupa piyawane lo nambato yakama langeyo. Akalina Iwanane nambato Sambasa oko ando atalawane. Gotena pii pepa pelene eya mindimane loto, wandakali-mane namba opa gipia lakae lo nambato nembo nateyo. Jia. Wandakali-mane yakamana yangone tupa ondo wato moyapiai lakae lo nambato nembo teyo layene eya. Yakamato pii okonena tene oko nembo tapiai-yale, koo tene mindi nambana disaipolo tupanga yaa napeya lo andapia-yale. Andoto, yakamato koo tene mindi utupanenga mee yata aa napiyaii-yale. Jisasato wuane lea. *

Sambasa Angi Jisasato Akali Kii Koo Mindi Mo Atu Yane Oko

Maki 3:1-6; Luku 6:6-11

⁹ Wuane lalu, Jisasa bala yuu okone tepa alu poto, Juta yamena lotu anda okona kolandaka lea.

¹⁰ Kolandaka loto andea-kola, kini yangisa angu manda-tene akali mindi petea. Petea-kola, akali peteaini tupamane

Jisasa kosimi lamakale nembo toto, bala tipa puato, Gotena loo okomane aki leyape. Sambasa angi akali mindimane wandakali siki pelene tupa mo atu yando, mana okone katupe, nakatupe leai. *

¹¹ Wuane leai-kola, Jisasato utupane tipa puato, Sambasa angi yakamana sipisipi mindi kundu mindina peakeando, yakamato sipisipi okone mia napene, kundu okonena yakale lo ando kondolo-peyaipa. Jia. Yakamato sipisipi okone yo lo molopeyai okoni. *

¹² Wandakali-mane yia sipisipi tupa sia minu, lipinga wete ateyai. Tene okonena, Gotena loo tupamane nanima languato, Sambasa angi, wandakali mindimane mana epene mindi minuto, yangone mindi mo atu yando, mana okone katu lolopeya leya.

¹³ Jisasato wuane lalu, akali kii koo okone lamawuato, nimbana kii koo oko tiyongo laa lea-kola, akali okonemane balana kii tiyongolea. Balato balana kii okone tiyongo lea wete, balana kii koo okone atu yoto, yangisa epene ateane okopene teke gulea.

¹⁴ Sambasa angi Jisasato akali okonena kini mo atu ya-kola, Patasai utupane lotu anda oko tepa alu poto, nanimato anu puato, Jisasa peyo ome lamakalepe lo asia mindi aiya peainipia. *

Goteto Jisasa Balana Piape Akali Ateakale Leane Oko

¹⁵⁻²¹ Patasai tupamane Jisasa peyo ome lamakale lo asia aiya pua ateaiko Jisasato andoto, yuu okone tepa alu pea. Pea-kola, wandakali kambua-mane bala watama epeyai oko andoto, Jisasato pii mindi Goteto bala andayo leane oko nembo tolo-peke lea. Pii okone nembo tolo-peke loto, balato Patasai utupane lamawuato, wamba potopesa akali Aisayato pii mindi pepa peyoto, nambato akali oo ateya oko towa epelewa yamapane yo atoto, balana mana tupa epele wete alawane leaipia. Nambato bala nambana piape akali ateakale lata ewane. Matili nambana sипитиса око баланга епекале лолоу-кала, балато намбана мана тика-пене тупа wandakali yame tupa pitaka lamaaulu-peya. Balato utupane towa pii yanda pimawua, taimane nalolo-peya. Kambaiya mindi aja leka-getane atola-kola, balato okone minu leka wete na-lolopeya. Ita lengane mindi tee puyale pula-kola, balato okone minu tee wete piya na-lolopeya. Balato mana epene tika-pene tupa wato minu atama pulu, mana koo tupa sia minula gii okona giao lolopeya. Wuane pula-kola,

wandakali yame tupa pitaka-mane balanga tungi peyoto, balato utupane moyolo-peya lo maliyo atolopeyai. Wamba potopesa akali Aisayato wuane loto, pepa okone peleane nembo tolo-peke loto, Jisasato Gotena pii okone enene guleakale nembo toto, wandakali siki pelene tupa pitaka mo atu yaka pea. Utupane mo atu yaka piyu, balato utupane lamawuato, nambato yakama mo atu eyo oko yakamato mindi wandakali lamaulaini. Jia wete lea. *

*Jisasa Belesapulu-la, Okonelapo
Maki 3:20-30; Luku 11:14-23; 12:8-10*

²² Okone angi wandakali minditupame akali sипитиса кoo atene mindi Jisasa ateanga atu aiyu epeai. Sипитиса koo mindi akali okoneng atea-kola, akali okone bala katulo pii na-lalaepia. Jisasato sипитиса koo okone peyo watalu, akali okone mo atu yaka, akali okone bala lee talu, pii lalu, pea.

²³ Okone andoto, wandakali amunguli pua ateaini tupa pitaka-mane moko leai. Wandakali minditupame akali oko bala kinji Dapiti yame mindi epolopeya layene yene pia okope lo tipa peainipia.

²⁴ Tipa peai-kola, Patasai tupamane ale wato, Belesa-pulu bala sипитиса koo tupana akali kawane atoto, Jisasa minu tai laya eya-kola, balato sипитиса koo tupa peyo watale leai. *

²⁵ Wuane leai-kola, Jisasato utupane lamawuato, kinji mindikina yame oko yapu lo lapo puato, yakama teke-teke yanda peapindo, yame okone koyolo-peya lea. Dee, tano mindikina yandopi, anda mindikina yandopi, wandakali paliyaini tupa yapu lo lapo puato, yanda peapindo, utupane tai ata napulu-peyai.

²⁶ Belesa-pulu namba minu tai laya apia-kola, nambato sипитиса koo yame oko peyo watawu-yale, Satane yame okone yapu lo lapo puato, yanda-pene gulapiyale, anu puato balana yame oko tai atapia-yalepe.

²⁷ Belesa-pulu balato namba minu tai laya eya-kola, nambato sипитиса koo tupa peyo watawu-yale, Belesa-pulu Patasai yame yakamana disai polo tupa minu tai laya eya-kola, utupane-mane sипитиса koo tupa peyo watapiyale-yale. Yakama tanena disai polo tupamane yakamana pii okone yapa lo tale puato, yakamato pii kopeta leyai lolopeyai.

²⁸⁻²⁹ Anu puato, wandakali mindimane akali tai mindina andaka kolandaka loto, minditaka yola tupa katulo mo awua polopeyape. Balato akali tai oko wamba ini eyaka-mane andi lata yando, balato akali okonena andaka kolandaka loto, minditaka yolane tupa katulo mo awua polopeyape.

* **12:10:** Lk 14:3 * **12:11:** Lk 14:5 * **12:14:** Jo 5:16

* **12:15-21:** Ais 42:1-4; Mt 3:17; 8:4; Mk 3:12 * **12:24:** Mt

Wuane pua teke, Gotena Sipitisa okomane namba minu tai laya eya-kola, nambato akali tai Belesa-pulu oko wamba ini andi lata wato, balana andaka kolandaka loto, balana sipitisa koo tupa peyo wata alawane-ko. Goteto yakama moyo ando atolo ipupia lo yakamato nembo talapape. *

³⁰ Nambana yame ata na-piyaini wandakali tupamane namba yanda pingiyaini. Nambana sipisipi tupa mo amunguli na-piyaini wandakali tupamane nambana sipisipi tupa puu toko leakale loto, wata apilaini. *

³¹ Wandakali mindimane mana koo okonepene mindi miniandopi, yangone mindi lamba leandopi, mana koo waka minditunga mineandopi, Goteto balana mana koo utupane pitaka apia-malupeya tekeko, wandakali mindimane Oli Sipitisa oko lamba leando, Goteto balana koo okone apia-mai napulu-peya lo nambato yakama langeyo. *

³² Dee, wandakali mindimane Akalina Iwanane oko andayo pii koo mindi leando, Goteto balana koo okone apia-malupeya tekeko, wandakali mindimane Oli Sipitisa oko andayo pii koo mindi leando, andipapi, matili-matilipi, Goteto balana mana koo okone apia-mai napulu-peya. Oli Sipitisa okomane namba minu tai laya eya-kola, nambato sipitisa koo tupa peyo wata alawane. Wuane tekeko, yakama Patasai tupamane loto, sipitisa koo Belesa-puluto namba minu tai laya eya-kola, nambato sipitisa koo tupa peyo wato apialane leyai. Yakamato wuane leyai okomane Oli Sipitisa gene koo Belesa-pulu mawuato, bala lamba leyai okonde. Jisasato wuane leaipia.

*Wandakali Epene Koo-la, Okolapo Ando
Pii Leane Oko
Luku 6:43-45*

³³ Ita epene tupanga dini epene teke lialane. Ita koo tupanga dini koo teke lialane. Ita utupanena dini lula tupa andoto, wandakali-mane ita tupa yapa lo tale puato, ita oko epene ya, ita oko koo ya lalaini. *

³⁴⁻³⁵ Wuane pua teke, wandakali epene tupana nembo-tene epene kambua paleya-kola, utupane-mane mana epene kambua minuto, pii epene teke lalaini. Wandakali koo tupana nembo-tene koo kambua paleya-kola, utupane-mane mana koo kambua minuto, pii koo teke lalaini. Tene okonena, Patasai yame yakama etelu koo

gepo-mane mandiyene gulene atoto, pii epene mindi katulo na-lalaini. *

³⁶⁻³⁷ Nimbato pii lolene tupa Goteto ale wato, nimba yapa lo tale pulupeya. Nimbato pii epene tupa lalene yando, Goteto nimba wandakali epene ya lolopeya. Nimbato pii koo tupa lalene yando, balato nimba wandakali koo ya lolopeya. Tene okonena, matili Goteto wandakali tupa yapa lo tale pula-angi, balato wandakali mindiki-mindiki lo tipa puato, anu peakale nimbato pii koo tupa wuane leepe lolopeya. Balato wuane lo tipa pula-angi, wandakali mindiki-mindiki lo balana pii okone yano peyoto, tene mindi wua pea-kola, nambato wuane lewa lape-pene gulolo-peya. Jisasato wuane lea.

*Metekolo Piape Mindi Pula Leaini Oko
Maki 8:11-12; Luku 11:29-32*

³⁸ Okone angi, loo tupana mana andene akalipi, Patasaipi, utupanena minditunga Jisasa lamawuato, tisa, Goteto nimba moyo ateya-kola, nimbato piape pilini oko andamakale-ko. Nimbato metekolo piape mindi pula leai. *

³⁹ Wuane leai-kola, balato utupanena pii okone yano peyoto, wandakali yame koo andipa ateyai tupa yakamato Gote enene oko awua tepa alu, gote waka tupanga tungi peyo bilipi lalaini okomane yakama pamuku piyaini wandakali gulo atalaini lea. Yakamato namba languato, Goteto nimba moyo ateya-kola, nimbato piape pilini oko andawa loyale, metekolo piape mindi pula lalaini tekeko, nambato metekolo piape mindi andipa napukale. Jia. Wamba Goteto potopesa akali Jona balanga metekolo piape peane okonepene mindiki nambato matili pukale. *

⁴⁰ Wamba Goteto metekolo piape andane okone pea-angi, Potopesa akali Jona bala utulu otongapi oto tepo pisa andane mindina ini anda-pangosa paliyu, kamaka epeaipia. Wuane pua teke, matili Akalina Iwanane oko bala utulu otongapi ole tepo yuu pangosa paliyu, kamaka epolopeya. *

⁴¹ Wamba Jona balato Gotena pii oko Ninipa tane wandakali tupa lamaiyakola, utupane-mane ale wato, yamapane peke leainipia. Andipa Jona sia minene akali mindi epoto, Gotena pii lamawua ateya tekeko, wandakali andipa ateyai tupa yakamato ale wato, yamapane peke naleyai. Tene okonena, matili Goteto wandakali tupa yapa lo tale pulangi, Ninipa tane wandakali tupamane

* ^{12:28-29:} Ap 10:37-38; 1Jo 3:7-8

* ^{12:30:} Mk 9:39-40; Lk 9:50

* ^{12:31:} Ip 6:4-6

* ^{12:33:} Mt 7:15-20

* ^{12:34-35:} Mt 3:7; 15:18; Lk 3:7; 6:45

* ^{12:38:} Mt 16:1; Lk 11:16; Jo 6:30-31

* ^{12:39:} Mt 16:4; Mk 8:12

* ^{12:40:}

Jon 1:17 * ^{12:41:} Jon 3:5

wandakali andipa ateyai tupa yakamanga koo tene minditupa yata olopeyai.*

⁴² Wamba kuwini wanda mindimane Simba yuu oko ando peteane-angi, wandakali-mane kinji Solomone bala akali mana andene mindi ateya leainipia. Wuane leai-kola, kuwini wanda okone-mane balana pii ale wakale nembo toto, Simba yuu oko tepa alu, asia luu wete mindina pea-kola, Solomoneto Gotena pii oko bala lamai-yaepia. Andipa kinji Solomone sia minene akali mindi epo ateya tekeko, wandakali andipa ateyai tupa yakamato balana pii ale naeyai. Tene okonena, matili Goteto wandakali tupa pitaka malinga ika laya wato, utupane yapa lo tale pula-angi, kuwini wanda okonemane koo tene minditupa wandakali andipa ateyai tupanga yata olopeyai. Jisasato wuane lea.*

*Sipitisa Koo Mindi Pulu, Peke Leane Oko
Luku 11:24-26*

⁴³ Wuane lalu, Jisasato pii mindi tako pua loto, sipitisa koo mindi wandakali mindi balanga atolane oko awua tepa alu pey-angi, bala wandakali napalene yuu tupana epoko puato, oto mo atolane panda mindi aiyia piyane lea.

⁴⁴ Aiya pitete wato, anda nambato wamba awua tepa alu epewa okonena namba peke loto atokale lalane. Wuane lalu, bala anda okonena peke loto andeyakola, anda ukuna okonena kangalamu yane tupa mindimane aki pua apea-kola, anda okone yati pitane epene ateyanga andalane.

⁴⁵ Andalu, balato sipitisa koo wete yanasa bala sia minene tupa lamoto, utupane towa atu anda okonena peke loto atlaini. Wamba sipitisa koo mindiki akali okonenga atea-angi, bala kopeta ateane tekeko, andipa sipitisa koo kitupasa utupane balanga ateyai-kola, bala kopeta wete atlane. Wuane pua teke, wandakali yame koo andipa ateyai tupa matili kopeta wete atolopeyai. Jisasato wuane lea.*

*Jisasana Yame Enene Oko
Maki 3:31-35; Luku 8:19-21*

⁴⁶ Jisasato wandakali kambua ateaini tupa ppi lamawua atea-kola, balana angini amene ima epoto, bala towa ppi lamakale lo kamaka maliyo ateainipia.

⁴⁷ Maliyo atea-kola, mindimane Jisasa lamawuato, nimbana angini, amene, utupane-mane nimba towa ppi lamakale loto, kamaka maliyo ateyai lea.

⁴⁸ Wuane lea-kola, Jisasato balana pii okone yano peyoto, nambana angini amene ima tupa api tupape lea.

⁴⁹⁻⁵⁰ Nambana Ayiane ati kenga ateya okona nembo-tene wato minalaini wandakali tupa nambana angini, amene, imalini, ima ateyai-ko. Yakamoto nambana angini amene ima andalapa loto, Jisasato balana disaipolo tupa balana kii-mane waiyataka pea.*

13

Tomo Waini Papaka Leane Okona Pii Kokoli Oko

Maki 4:1-9; Luku 8:4-8

¹ Ole okone angi teke, Jisasa bala andaka atalu, kamaka poto, ipa angini okona matenenga petea.

² Petea-kola, wandakali kambua wetete bala peteanga epo amunguli puato, ipa matene okonena ateai-kola, Jisasa bala sipi mindina peakaiyu lo petea.*

³ Bala pituto, pii kokoli kambua utupane lamaiya. Bulupane balato pii kokoli mindi loto, akali mindimane tomo waini minditupa balana ee okona papaka lolo peane lea.

⁴ Papaka lea-kola, tomo waini minditupa ambe asininga tepa ya-kola, eka minditupa epoto, utupane neainipia.

⁵ Tomo waini minditupa ambe ana tokonga yuu aŋako yane organe tepa wato, wamba kapoyale poka lo ika leainipia.

⁶ Waini utupane poka lo ika leaini tekeko, pini ana okona pea-kola, nai-mane ana oko toto peane okomane utupane kapu tamangua yaepia.

⁷ Tomo waini minditupa ambe tani koo ani atene tupa ika lalane yuu mindina tepa wato, poka lo ika leaini tekeko, tani koo ani atene tupa kapoyale anda yoto, utupane peyayo neaipia.

⁸ Tomo waini minditupa yuu epene mindinga tepa yaepia. Waini utupanena minditupanga dini paiyasa tepo liaepia. Minditupanga dini paiyasa wataka liaepia. Minditupanga dini wane andete liaepia.

⁹ Ale asia yene wandakali yakamoto pii okone ppi lo ale wato, pii okonena tene oko nembo talapape. Jisasato wuane lea.

*Pii Kokoli Leane Okona Tene Oko
Maki 4:10-12; Luku 8:9-10*

¹⁰ Jisasato pii kokoli okone lea-kola, balana disaipolo tupamanne bala ateanga epoto, anu peakale nimbato pii kokoli angu loto, wandakali tupa lamailini lo tipa peai.

¹¹⁻¹² Tipa peai-kola, balato utupanena pii okone yano peyoto, wandakali mindimane Gotena pii oko bilipi leyo nayu leando, Goteto balana bilipi oko minu tai laya

ola-kola, wandakali okonemane Gotena pii oko bilipi leyoy nayu lolopeya lea. Disaipolo tupa yakamato Gotena pii oko bilipi leyama nayu leyai okonena, Goteto pitaka taka ando atalane loto, nambato pii mana wamba too pene yane tupa yakamanga andawa lalawane. Wuane tekeko, wandakali waka tupamane Gotena pii oko bilipi leyama nayu naleyai okonena, Sataneto akali utupanena bilipi oko mo alu piya olopeya. Tene okonena, Goteto pitaka taka ando atalane lo pii mana wamba too pene yane tupa nambato wandakali utupanenga panakame lamai napene, pii kokoli lo angu lamai-yawane.*

13-15 Wamba Goteto wandakali okonepene tupa nembo toto, pii mindi potopesa akali Aisayanga lamaiya-kola, Aisayato pii okone pepa peleapipa. Balato Gotena pii okone loto, wandakali utupanemanne nambana piape tupa lee-mane andalu, nambana pii oko ale-mane ale alu, nambana pii okona tene tupa kuai lo nembo toto, yamapane peke lapiayale, nambato utupane mo kuai lauwa-yale lea. Nambato utupane mo atu yauwa-yale tekeko, nambato wuane pulane nembo toto, utupane-mane nambana pii ale ape-pene kepa alu, lene mungu lalu, yakamana nembo-tene tupa ana yale gulo ateaini. Tene okonena, wandakali utupane-mane nambana pii oko ole kambuangale wato teke, pii okonena tene oko matili-matilipi nembo natolo-peyai. Utupane-mane piape nambato piyawane tupa ole kambuangale andoto teke, namba api ateyape lo matili-matilipi anda napulipeyai layene eya. Andipa nambato piape peyo-kola, wandakali minditupa-mane andoto teke, namba api ateyape lo anda naipayai. Utupane-mane nambana pii oko ale wato teke, pii okonena tene oko nembo nateyai. Utupane-mane wuane peyai okomane pii Aisayato wamba leane okone enene guleya-kola, nambato pii kokoli lo angu lamai-yawane.*

16-17 Wamba potopesa akali tupapi, wandakali epene tika-pene tupapi, utupanena wandakali kambua-mane pii andipa yakamato ale eyai tupa ale aimalakae lo nembo teaini tekeko, utupane-mane ale nayainipia. Andipa nambato mangene minditupa peyo-kola, yakamato lee-mane andeyai. Wamba potopesa akali tupapi, wandakali tika-pene tupapi, utupane-mane mangene utupane andaimalakae lo nembo teaini tekeko, utupane-mane anda naapeaini. Nambato pii enene mindi yakama langeyo-kola, yakamato minditaka

lee-mane andeyai oko andoto, minditaka alene-mane ale eyai oko ale wato, yakama kuai lo ateyai. Jisasato wuane lea. *

*Tomo Waini Papaka Leane Kokoli Okona
Tene Oko*

Maki 4:13-20; Luku 8:11-15

18 Wuane lalu, Jisasato pii mindi tako pua loto, akali mindimane tomo waini papaka leane lo kokoli pii lalo okonena tene oko wua yalua lo yakamato ale alapape lea.

19 Akali mindimane tomo waini papaka lea-kola, minditupa ambe asininga tepa ya-kola, eka minditupa epoto, utupane neainipia. Wuane pua teke, akali mindimane Gotena pii oko loto, Goteto pitaka taka ando atalane leya-kola, wandakali minditupa-mane ale wato, pii okonena tene tupa wayumane nembo nateyai-kola, Satane epoto, Gotena pii utupanena nembo-tengena eya oko mo alu piya alane.

20 Tomo waini minditupa ambe ana tokonga yuu anjako yane mindina tepa wato, poka lo anda yane tekeko, ana toto peane okomane pini tupa kapu teapipa. Wuane pua teke, wandakali minditupa-mane Gotena pii oko wamba ini bulupane epelewa ale wato, bilipi lalaini.

21 Wuane tekeko, utupane-mane Gotena pii oko bilipi lo ateyai-kola, wandakali waka minditupa-mane kenda-pene andane tupa utupane maiki piyaini. Wuane peyai-kola, Gotena pii bilipi leyama nayu nalene wandakali utupane wayumane pini peyayapene gulo atoto, ole ukupini anjalapo angu bilipi lalu, wamba kapoyale bala awua tepa alaini.

22 Tomo waini minditupa ambe tani koo ani atene tupa ika lalane yuu mindina tepa wato, poka lo ika leane tekeko, tani koo ani atene tupa kapoyale anda yoto, utupane peyayo neapipa. Wuane pua teke, wandakali minditupa-mane Gotena pii ale wato, bulupane bilipi lalaini tekeko, matili munipi, waka minditaka tupapi, utupane kambua miaima laka lo nembo talaini mana okomane wandakali utupane minakasa wato, Gotena pii oko ombo alane. Tene okonena, wandakali utupane-mane yuu okona minditaka eya tupa anu pua mia-makalepe lo nembo kambua teyai-kola, Gotena pii yakamanga eya okomane dini lia napiyane.*

23 Tomo waini minditupa yuu epene mindinga tepa wato, dini kambua lialane pua teke, wandakali minditupa-mane Gotena pii oko ale wato, pii okonena tene oko pailo nembo toto, bilipi leyama nayu lalaini. Wandakali utupanena

* 13:11-12: Mt 25:28-29; Mk 4:24-25; Lk 8:18; 19:26 * 13:13-15: Ais 6:9-10; Jo 12:37-41; Ap 28:26-27 * 13:16-17: Lk 10:23-24 * 13:22: Lk 12:16-21; 1Ti 6:9-10,17-19

minditupanga dini paitasa tepo lialane. Minditupanga dini paitasa wataka lialane. Minditupanga dini wane andete lialane. Jisasato wuane lea.

Tani Koo Ika Leane Okona Pii Kokoli Oko

²⁴ Wuane lalu, Jisasato pii kokoli waka mindi wandakali tupa lamawuato, Goteto wandakali tupa wua pua ando atalane lo nambato pii kokoli mindi leyo. Akali mindimane witi waini epene tupa balana ee okona papaka leaipia.

²⁵ Papaka lalu palea-kola, utulu okona akali okone towa yanda-pene akali mindi epoto, tani koo waini tupa ee mindiki okonena teke papaka lo tako piyu, peapipa.

²⁶ Matili witi oko poka lalu, anda yoto, dini luyale pea-kola, tani koo tupa towa atu andayo ateanga andeaini-pia.

²⁷ Andoto, piape akali tupa poto, ee anduanne oko lamawuato, akali andane, wamba nimbanee ee okona nimbato tomo waini epene tupa angu papaka lee-kola, nanimato andema-ko. Tani koo ateya tupa apito papaka leape leainipia.

²⁸ Wuane leai-kola, balato utupane lamawuato, yanda-pene mindimane tani koo waini utupane papaka lo tako pipiae yalua leaipia. Wuane lea-kola, balana piape akali tupamane bala tipa puato, nanimato tani koo utupane lopolo pupiai lakae lo nembo telepe leainipia.

²⁹ Wuane leai-kola, balato utupane lamawuato, yakamato tani koo tupa angu lopo apeyama nayuto, witi minditupa towa ambe lopo apolaini leaipia.

³⁰ Lopo apolomane. Andipa lapotaka atekale lo ando kondalapa. Matili tomo mandu yolane oto oko epola-angi, nambato tomo mandulai akali tupa lamawuato, wamba ini bulupane yakamato tani koo tupa lopoto, utupane yangoyale puta piyapape. Puta piyu, witi dini tupa mo yomo wato, nambana tomo waini yalawane anda okona yata alapape lokale. Ee anduanne okomane wuane leane lo Jisasato pii kokoli okone lea.

Maseta Waini Okona Pii Kokoli Oko

Maki 4:30-32; Luku 13:18-19

³¹⁻³² Wuane lalu, Jisasato pii kokoli waka mindi wandakali tupa lamawuato, maseta waini tupamane tomo waini waka yalane tupa pitaka sia minuto, aŋako wetete eya lea. Aŋako wete eya tekeko, wandakalimanane maseta waini tupa balana eenga papaka leyai-kola, utupane anda yoto, eenga tomo waka tupa pitaka sia minuto, andane ita yale guleya-kola, eka tupa epoto, maseta kembone tupana anda piyaini. Wuane pua teke, Goteto wamba ini bulupane wandakali aŋalapo minditupa angu ando atoto,

piape pua ateya-kola, matili balana yame tupa andane wetete gulalaini. Jisasato wuane lea.

Palawa Yangalaini Pauta Okona Pii Kokoli Oko

Luku 13:20-21

³³ Wuane lalu, Jisasato pii kokoli waka mindi wandakali tupa lamawuato, wanda mindimane palawa yangoyale, palawa kambua disa andane mindina gae lalane lea. Gae lalu, balato palawa yangalaini pauta yisa lene okona aŋako mindi palawa utupanena tombenesa tupa wato, palawa ipa minu yata eya-kola, matili pauta aŋako okonemane palawa okone mo anda yalane. Wuane pua teke, wamba ini Goteto wandakali aŋalapo minditupa angu ando ateya-kola, matili balato piape pua ateya-kola, balana yame andane wetete gulalane. Jisasato wuane leaipia.

Jisasato Pii Kokoli Tupa Angu Lamaiyane Oko

Maki 4:33-34

³⁴⁻³⁵ Wamba potopesa akali mindimane Gotena pii mindi loto, Goteto yuu oko yakale lea-angi, pii minditupa too pitane ateane oko atama ipapo wato, andipa ateyama okona giao leya leaipia. Andipa nambato pii kokoli loto, pii too pitane utupane wandakali tupa lamawukale lea. Gotena pii okonemane wuane leane pua, Jisasato wandakali kambua epo ateaini tupa mana lamawuato, Goteto wandakali tupa ando atoto, wua piyane lo pii mee mindi wandakali tupa mana lama'i napea. Jia. Balato pii kokoli angu loto, mana lamawua ateane okomane potopesa akali okonena pii leane okone enene gulea. *

Pii Kokoli Leane Okona Tene Oko

³⁶ Wandakali kambua amunguli pua ateaini tupa yakama andaka pulupa lalu, Jisasa bala andaka kolandaka lea. Kolandaka lea-kola, balana disaipolo tupa bala peteanga epoto, tani koo eenga ateane okona pii kokoli lale okonena tene oko nimbato namina langi leai.

³⁷ Wuane leai-kola, balato utupanena pii okone yano peyoto, tomo waini epene papaka leane akali lalo okone bala Akalina Wanane oko lea.

³⁸ Ee lalo okone yuu eya tupa pitaka makande pua lalo. Tomo waini epene lalo tupa wandakali Goteto moyo ando atalane tupa makande pua lalo. Dee, tani koo lalo tupa wandakali Sataneto ando atalane tupa makande pua lalo.

³⁹ Tani koo waini papaka leane akali yanda-pene lalo okone bala Satane. Tomo

mandulane gii lalo okone yuu koyo pulane gii oko makande pua lalo. Dee, tomo mandulaini akali lalo utupane enjoje tupa makande pua lalo.

⁴⁰⁻⁴¹ Wandakali-mane tani koo tupa lopoto, yangalaini pua, oto andipa eya oko koyo pula-angi, Akalina Iwanane okomane balana enjoje tupa lamawuato, yakamoto piape pulu pulupa lolopeya. Pulupa lolakola, utupane-mane yuu balato ando atalane tupa pitakana poto, yangone-mane koo peakale lo mo piya alaini wandakali ateyai tupapi, Gotena loo ango alaini wandakali tupapi, utupane pitaka mo amunguli pulupeyai.*

⁴² Enjole utupane-mane wandakali utupane mo amunguli puato, ita too atapowa atene yuu koo okona wato aindaka lolopeyai. Aindaka lolai-kola, wandakali utupane ita too atapowa atene okonena atoto, yamatata lo nene geleto laka pua atolopeyai.*

⁴³ Okone angi, nai tii piyane pua, Ayiane Goteto ando atalane yuu okona atoto, wandakali epene tika-pene tupa tii pua atolopeyai. Ale asia yene wandakali yakamoto ale alapape. Jisasato wuane lea.*

Minditaka Epene Wetete Okona Pii Kokoli Oko

⁴⁴ Wuane lalu, Jisasato pii kokoli mindi tako pua loto, Goteto pitaka taka ando atalane mana oko epene wete eya loto, nambato wua leyo lea. Minditaka epene wetete mindi ee mindina too pitane ya-kola, akali mindimane okone ando moto, ee okonena teke too pulu-peke leaipia. Too piyu, bala epele ama poto, balana minditaka wamba yatawa ateane tupa pitaka wandakali waka tupamane kambeakale leaipia. Kambeai-kola, balato muni meane okonemanee ee okone kambeaipia. Wuane pua teke, wandakali mindimane andola-kola, Goteto wandakali tupa kuai lo moyo ando atalane lo andolopeya. Andalu, balato epele wato, balana minditaka yuu okona eya tupa pitaka masia mawuato, Goteto bala moyo ando ateakale lo atolopeya. Jisasato wuane lea.

Mamaku Epene Wetete Okona Pii Kokoli Oko

⁴⁵ Wuane lalu, Jisasato pii kokoli waka mindi loto, Goteto pitaka taka ando atalane mana oko epene wete eya loto, nambato wua leyo lea. Bisanisa piape piyane akali mindimane mamaku epene paiva wete mindi aiya pua ateapia.

⁴⁶ Mamaku epene wete mindi aiya pua andalu, bala poto, balana minditaka yane tupa pitaka wandakali waka tupamane kambeakale leaipia. Kambeai-kola, balato muni meane okonemanee mamaku epene wete okone kambo meaipia. Jisasato wuane lea.

Pisa Mialane Umbene Nuu Okona Pii Kokoli Oko

⁴⁷ Wuane lalu, Jisasato pii kokoli waka mindi loto, Goteto wandakali tupa wua pua ando atalane lo nambato pii kokoli mindi leyo lea. Wamba akali minditupa-mane pisa mialaini umbene nuu mindi ipa angininga aindaka loto, pisa yame mindipene-mindipene tupa pitaka meinipia.

⁴⁸ Pisa mialane umbene nuu okone tumbi lea-kola, utupane-mane nuu okone kilau lo ipa matenenga mo yata yainipia. Mo yata alu, utupane-mane, pisa epene yame tupa yakamana pene tupana aindaka lalu, pisa koo yame tupa apeainipia.

⁴⁹ Wuane pua teke, yuu oko koyo puyale pula-angi, koo piyaini wandakali atolai tupa wandakali tika-pene tupa towa atu atolai-kola, enjoje tupa epoto, utupane yapa lo tale pulupeyai.

⁵⁰ Tale piyu, enjoje tupamane wandakali koo tupa ita too atapowa atalane yuu koo okona wato aindaka lolai-kola, wandakali utupane-mane yamatata lo nene geleto laka pua atolopeyai. Jisasato wuane lea.*

⁵¹ Wuane lalu, Jisasato balana disaipolo tupa tipa puato, yakamoto pii kokoli utupane pitakana tene tupa nembo teyaipe lea. Wuane lea-kola, utupane-mane bala lamawuato, nanimato nembo teyama leai.

⁵² Wuane leai-kola, balato utupane lamawuato, anda anduane mindimane balana minditaka epene yalane lumu okona poto, minditaka wambanepi, wenepi, lapotaka mo awua epalane. Wuane pua teke, loo tupana mana andene akali mindimane mana moto, Goteto wua pua wandakali moyo ando atalane lo mana mola-angi, balato mana wambanepi, wenepi, lapotaka wandakali tupa mana lamaiyane. Jisasato wuane lea.

Nasatesa Tane Tupamane Jisasa Masia Mayaini Oko

Maki 6:1-6; Luku 4:16-30

⁵³ Jisasato pii kokoli utupane lamai koyo piyu, yuu okone tepa alu pea.

⁵⁴⁻⁵⁶ Yuu okone tepa alu, balana yuu tene okona poto, yakamana lotu anda okona pea. Poto, mana lamawua ateakola, wandakali tupamane moko wete loto,

* **13:40-41:** Mt 24:31; 25:31; Mk 13:27; Jo 15:4-6
13:23-28

* **13:42:** Mt 8:12 * **13:43:** Dan 12:3 * **13:50:** Mt 13:42; Lk

pii lalawa puato, akali oko bala kamanda okona iwanane pia oko andeyama leai. Bala angini oko Matiya. Jemesapi, Josepi, Saimonepi, Jutasapi, utupane balana amene tupa ateyai. Balana imalini tupa pitaka nanima towa atu wali pitiyamae pia oko yako. Akali okomane pii mana utupa ami tawe meae-yaape. Balato tai-lene andane oko ani tawe moto, metekolo piape andane tupa piyanepa leai. *

⁵⁷ Wuane loto, utupane-mane bala towa yamapane koo paleai-kola, Jisasato utupane lamawuato, potopesa akali mindimane piape peya-kola, balana yuu tene okona atalaini wandakali tupapi, balana anda okona atalaini wandakali tupapi, utupane-mane balana gene oko na-lalaini tekeko, yuu waka pitakana wandakali tupamane balana gene oko laiyu lailaini lea. *

⁵⁸ Balana yuu tene okona tane wandakali tupamane bala lo bilipi naleai-kola, Jisasa bala yuu okonena atoto, metekolo piape tai-lene kambua pii napene, konda ya.

14

*Etoteto Jone Maa Pai Leane Oko
Maki 6:14-29; Luku 3:18-22; 9:7-9*

¹ Okone angi, wandakali minditupame piie temane loto, Jisasato metekolo piape tupa pua ateya leai-kola, gapomane akali andane Etoteto pii okone ale yaepia.

² Ale wato, balato balana piape akali tupa lamawuato, metekolo piape pua ateya akali okone bala ipa peya-maiyane akali Jone yalua. Goteto bala malinga ika laya wato, minu tai laya ya-kola, balato katulo metekolo piape utupane pua atalua leaipia.

³⁻⁵ Etoteto Jone peyo ome leane okona tene oko andipa nambato yakama langeyo. Wamba Etoteto bala amene Pilipina wetene Etoti-yasa lene oko tondo moto, kee lea-kola, Joneto Etote lamawuato, nimbato wanda oko tondo moto, kee lalu atele okomeane Gotena loo oko angowa atele okonde lo lamaiki peaipia. Wuane lo lamaiki pea-kola, Etoteto Jone peyo ome lokale nembo teane tekeko, wandakali kambuamane Jone bala potopesa akali mindi ateya nemboto ateainipia. Tene okonena, Etoteto utupane ando yuku wato, Jone peyo ome nalene, mee andi loto, katapusa anda okona aindaka leaipia. *

⁶ Matili alu mindi Etote angini-mane bala mandeane oto oko epea-kola, wandakali kambua epoto, bala towa atu tomo no peteaini-pia. Tomo no peteai-kola, Etoti-yasa wanane oko bala epoto, wandakali

utupanena tombenenga atoto, danisa lea-kola, Etote bala epele-mane omeaipia.

⁷ Epele-mane omoto, balana weno minuto, potomisa pii mindi wana okone lamawuato, nimbato minditaka mindi gii leendo, enene wete nambato okone gukale leaipia.

⁸ Wuane lea-kola, Etoti-yasato balana wanane okone lamawuato, nimbato Etote lamawuato, ipa peya-maiyane akali Jonena kawane oko pelesa andane mindina yata wato, onga awua epoto, namba gii lo bala lamai leaipia. Wuane lea-kola, wana okone-mane Etote lamai-yaepia.

⁹⁻¹⁰ Lamaiya-kola, kinji Etote bala yamapane kenda yane tekeko, wamba wandakali kambua alewa peteai-kola, balana weno minuto, nimbato minditaka mindi gii leendo, enene wete nambato okone gukale leane oko nembo teaipia. Wuane nembo toto, balato akali mindi lamawuato, nimba katapusa andaka poto, ami yanda yene mindi ando, nimbato Jonena maa pai loto, balana kawane mo awua ipu lape leaipia.

¹¹ Wuane lea-kola, akali mindimane Jonena kawane pelesa andane mindina yata wato, awua epoto, wana oko mayaepia. Maya-kola, wana okonemane Jonena kawane oko awua poto, balana angini oko mayaepia.

¹² Wuane pea-kola, Jonena disaipolo tupa epoto, balana umbaini oko mo mali piyu, Jisasa ateanga poto, bala lamai-yainipia.

Jisasato Akali Tausene Yau Tupa Tomo Neakale Mayane Oko

Maki 6:31-44; Luku 9:10-17; Jone 6:1-13

¹³ Jonena disaipolo tupamane Jone omapia leai-kola, Jisasato ale alu, sipi mindina pitiyu, yuu okone tepa alu, wandakali napalene yuu mindina bala angu pokale nembo toto, peane. Wuane tekeko, wandakali tupamane bala yuu okonena moyale peya ale wato, tano tupa tepa alu, asini poto, yuu bala moyale peane okonena peainipia.

¹⁴ Jisasa bala sipi oko tepa alu, ipa matenenga pea-angi, wandakali kambua wete epo ateasinga andoto, ondo wato, utupanena siki tupa mo atu ya.

¹⁵ Ole lea-kola, balana disaipolo tupamane bala ateanga poto, bala lamawuato, wandakali napalene yuu okona ateyama-kola, andipa ole leya-ko. Wandakali utupa tano anjako tupana poto, yakamana ulia nonlane tupa kambolo peakalenga, nimbato utupane peakale laa leai.

¹⁶ Wuane leai-kola, Jisasato utupane lamawuato, wandakali utupane-mane tomo kambolo polane tene mindi ata

naapeya-ko. Yakamoto utupane tomo neakale mayapa lea.

¹⁷ Wuane lea-kola, utupane-mane bala lamawuato, nanimanga betesa yau, pisa lapo angu eyama okonde leai.

¹⁸ Wuane leai-kola, balato tomo utupane mo awua ipulupa lea.

¹⁹ Tomo utupane awua epeai-kola, balato wandakali tupa lamawuato, yakama tani tupana pitiyapa lea. Peteai-kola, balato betesa yau tupapi, pisa lapo okolapopi, utupane moto, ati kenga andaiyu loto, Gote wayu pele loto, betesa tupa kondé lea. Konde loto, balana disaipolo tupa mayakola, utupane-mane tomo tupa tale puato, wandakali tupa neakale mayai. *

²⁰⁻²¹ Mayai-kola, wanda andopane ima dii nalene, akali angu tausene yaipi mindi tomo utupane neai. Wandakali utupane pitaka-mane no embo yai-kola, balana disaipolo tupamane akenane yane tupa moto, basaketa nuu alesa mandu tumbilaya wato, yata yai.

Jisasato Bala Ipa Angini Okona Tokonga Kee Atama Peane Oko

Maki 6:45-52; Jone 6:16-21

²² Okone angi teke, Jisasato balana disaipolo tupa lamawuato, nambato wandakali tupa peakale lokalenga, yakama sipi okona peakaiyu lo pitiyu, ipa angini okona amo-yangi ingane pulupa lea.

²³ Wuane lalu, balato wandakali kam-bua ateaini tupa pulupa lalu, bala angu yuu wangiane mindina pote lolo peaiapia. Undupi lea-kola, bala angu wangiane okonena ateaiapia. *

²⁴ Balana disaipolo tupa sipi okona pitiyu, ipa matene oko tepe alu, ipa angini okona tombenenga peai wete, utupane moyale peaini ukusane ato popo andane mindi lo awua epeane okonemane ipa taimane awua ika laka puato, sipi okone mo mindisa aimo laka piki peaiapia.

²⁵ Matili yuu waa loyale muna peangi, Jisasato utupane peteaini sipi okona epoyale, ipa angini okonena tokonga kee atama epea.

²⁶ Bala utupane mandaka epea-kola, balana disaipolo tupamane bala ipa angini okona tokonga kee atama epeanga andoto, yama mindi epeya loto, yuku-mane omoto, taimane kalae leai. *

²⁷ Kalae leai-kola, Jisasato utupane wamba kapoyale lamawuato, namba Jisasa epeyo-ko. Yakama yuku naene, mini palu pitiyapa lea.

²⁸ Wuane lea-kola, Pitato bala lamawuato, Akali Andane nimba teke epeendo,

nimbato namba ipa okona tokonga kee atama nimba atelenga ipu laa lea.

²⁹ Wuane lea-kola, Jisasato nimba ipu lea wete, Pita bala sipi okone tepe alu, ipa okona tokonga kee atama Jisasa ateanga moyale peea.

³⁰ Balato moyale peane tekeko, popo andane leane oko andoto, bala yuku wato, ipa pangosa moyale poto, Akali Andane nimba namba moyo pii taimane lea.

³¹ Wuane lea-kola, Jisasato Pita wamba ini kapoyale minata wato, anu peakale nimba namba lo bilipi leyo nayu nalene, nembo lapo palelepe lea. *

³² Liyamba sipi okona peakaiyu leapi-kola, popo andane leane oko tepe ya.

³³ Tepa ya lo andoto, sipi okona peteaini akali tupamane bala lo lotu loto, enene wetete, nimba Gotena iwanane atele leai.

Jisasato Genesa-leta Tane Tupana Siki Tupa Mo Atu Yane Oko

Maki 6:53-56

³⁴ Jisasapi, balana disaipolo tupapi, utupane yakama ipa angini okona amo-yangi poto, Genesa-leta yuu okona peakaiyu leai.

³⁵ Peakaiyu leai-kola, yuu okonena tane wandakali tupamane akali epeya oko bala Jisasa ya lo andeai. Andoto, Utupane-mane Jisasa epo ateya lo yuu mandaka yane tupa pitakana wai laka peai-kola, wandakali-mane utupanena yangone siki pelene tupa pitaka awua epeai.

³⁶ Awua ipulu, utupane-mane Jisasa lamawuato, wandakali siki pelene tupamane nimbanza tonu duninga wata yakale lo nimbando ando kondape leai. Jisasato katu yalua lea-kola, bala wataka peaini wandakali tupa pitakana siki tupa atu yaka pea. *

15

Gotena Loo Tupamane Yumbanena Mana Tupa Sia Minalane Leane Oko

Maki 7:1-13

¹⁻² Okone angi, loo tupana mana andene akali tupapi, Patasai tupapi, utupanena minditupa Jutusaleme tepe alu, Jisasa ateanga epeai. Utupane-mane bala lamawuato, Gotena wenonga nanimana yumbane tupana kii kalato atene guu naleakale nembo toto, utupane-mane kini wasa-wasa ini peyoto, tomo nalaini mana mindi yata yaini-ko. Anu peakale nimbanza disaipolo tupamane mana okone wato mina napene kondeyaipe leai.

³ Wuane leai-kola, Jisasato utupanena pii okone yano peyoto, anu peakale yakamato

* ^{14:19:} Mt 15:35-39; Mk 8:6-10 * ^{14:23:} Lk 6:12; 9:28-32

yumbane tupana mana mindi wato minuyale, Gotena loo mindi kalo piyainipe lea.

⁴ Wamba Goteto loo okone yata wato, nimbanza angini, ayiane-la, okone-lapona pangosa atoto, nimbato okone-lapona pii ale amawua atape leaipia. Dee, wandakali mindimane balana angini yandopi, ayiane yandopi, okone-lapona mindi ando pii koo mindi leando, yakamato bala peyo ome lalapape leaipia.*

⁵⁻⁶ Goteto wuane leane tekeko, yakamato wuane na-piyaini. Jia. Yakamato loto, wandakali mindimane balana angini yandopi, ayiane yandopi, okone-lapona mindi moyo minditaka maipe-pene guleyakola teke, okonelapo lamawuato, nambato liyamba moyo minditaka gipe-pene tupa Gote mayuale mandeke pua yata ewa lalu, balato okonelapo moya napene konda yando, okone katu lalaini. Yakamato wuane lalaini okonemane yumbane tupana mana tupa wato minuyale, Gotena pii layene oko mo mee gulaya alaini.

⁷ Yakamato wuane piyaini mana okone-mane yakamana yangone tupa minakasa alaini wandakali gulo atalaini. Wamba potopesa akali Aisayato yakamana mana okone wayumane nembo toto, wua leaipia:

⁸ Wandakali utupane yakamana ambulini-mane nambana gene oko layu lalaini tekeko, yakamana nembo-tene, yamapanne-la, okonelapo nambanga yaa napene, amonga waka gulo atalaini.

⁹ Wamba yakamana yumbane-mane mana minditupa yata yai-kola, yakamato mana utupane wandakali tupa lamawuato, Gotena loo tupa mana langeyama lalaini. Wuane, utupane-mane namba lo lotu lalaini mana okonemane dini angini mindi liya napiyane. Wamba potopesa akali Aisayato wuane leane lo Jisasato pii okone lea.*

*Gotena Wenonga Minditaka-mane Wandakali Mo Kalato Ataya Alane Oko
Maki 7:14-23*

¹⁰ Wandakali kambua amunguli peai-kola, Jisasato utupane mandaka ipulupa lea. Epeai-kola, balato utupane lamawuato, yakamato nambana pii ale wato, wayumane nembo talapape lea.

¹¹ Wandakali-mane minditaka mindi nee asianga mo aindaka loto, nalaini okomane wandakali okone Gotena wenonga mo kalato ataya na-alane. Jia. Minditaka mindi wandakalina nee asianga ato kamaka epalane tupamane Gotena wenonga bala mo kalato ataya alane lea.*

¹² Jisasato wuane lea-kola, balana disaipolo tupa epoto, Patasai tupamane nimbanza pii okone ale wato, nimba towa yamabane koo paleyai oko nimbato andelepe leai.

¹³ Wuane lea-kola, balato utupanena pii okone yano peyoto, nambana ayiane oko bala ati kenga atoto, balana ee oko ando atlante lea. Balato minditaka yanda naopeyakola, mee ika leando, balato utupane pitaka pini towa lopalane.

¹⁴ Patasai tupa lee koo gulo atoto teke, asia epene tupa wandakali waka tupa andawa lamakale nembo talaini tekeko, wandakali lee koo mindimane lee koo yangone mindi asia andawa loyale, atu peapindo, wandakali okonelapo lapotaka kundu mindina aiya peyolo-peyapiko. Patasai utupane-mane namba towa yamapanne koo paleakale lo yakamato ando kondalapa. Jisasato wuane lea.*

¹⁵ Wuane lea-kola, Pitato bala lamawuato, nimbato pii kokoli wamba lale okonena tene oko nanima langi lea.

¹⁶ Wuane lea-kola, Jisasato balana disaipolo tupa puato, yakamapi wai naene atoto, pii kokoli okonena tene oko nembo nateyaipe lea.

¹⁷ Minditaka wandakalina nee asia okona aindaka leyai tupa pitaka ini anda-pango okona poto paleya-kola, ii too apialaini oko yakamato nembo nateyaipe.

¹⁸⁻²⁰ Wandakali mindimane kii wasa-wasa napelene, tomo nalu, matili balato tomo okone ii too apialane. Tene okonena, kii wasa-wasa peya napene tomo nalane mana okonemane Gotena wenonga bala mo kalato ataya na-alane. Wuane tekeko, minditaka wandakalina ambulininga ato kamaka epalane tupamane Gotena wenonga wandakali tupa mo kalato ataya alane. Anu peakale nambato wuane leyope. Wandakali-mane nembo koo toto, wandakali mindi peyo ome lokale, yangone mindi ando owato pii lokale, yangone mindi layangokale, minditaka pake nokale, pamuku pukale nembo talaini. Nembo-tene koo utupane pitaka wandakalina yamapanengga paleya-kola, balato nembo-tene koo utupane wato minukale nembo talaini mana okomane Gotena wenonga bala mo kalato ataya alane. Jisasato wuane lea.

*Kenane Yame Wanda Mindimane Jisasa
Lo Bilipi Leane Oko
Maki 7:24-30*

²¹ Jisasa bala yuu okone tepa alu, Taya, Saitone-la, tano okonelapo mandaka yuu mindina pea.

²² Yuu okonena pitiyane Kenane tane wanda mindi Jisasa ateanga epoto, pii taimane loto, sипитиса koo mindimane nambana wanane oko wete minu koyalane-ko. Kinji Dapiti yame Akali Andane, nimbato namba ondo wato, moyape lea.

²³ Wanda okonemane wuane laka pima epea-kola teke, Jisasato balana pii okone yano peyo, pii mindikipi mindi lamai napene konda ya. Konda ya-kola, Jisasana disaipolo tupamane Jisasa lamawuato, wanda okomane nanima watama epoto, pii taimane laka peya-ko. Bala nanima tepa alu peakale. Nimbato bala lamai leai.

²⁴ Wuane leai-kola, Jisasato wanda okonena pii okone yano peyoto, Goteto namba languato, yia sipisipi alu pene gulo Isatale tane wandakali ateyai tupa angu moyolo puu leane lea.*

²⁵ Jisasato wuane leane tekeko, wanda okone bala Jisasa ateane ongane epoto, aikini leka wato, Akali Andane, nimbato namba moyo lea.

²⁶ Namba moyo lea-kola, Jisasato lapeke loto, nimbato andopane tupana tomo tupa moto, peango tupamane neakale lo peyamo lewando, kuai nalolo-peya lea.

²⁷ Wuane lea-kola, wanda okonemane lapeke loto, Akali Andane, nimbato enene lele tekeko, akali andane mindimane tepolo tokonga tomo no peteya-kola, balana peango tupa toko pangosa atoto, tomo pululene tepa eya tupa nalaini lea.

²⁸ Wuane lea-kola, Jisasato bala lamawuato, wanda nimbato namba lo bilipi leyoyayu lele-ko. Nimbato nimba moyo pingipia lakae lo nembo tele pua pingeyo lea. Wuane lea-kola, okone angi teke wanda okonena wanane okone atu ya.

Jisasato Wandakali Siki Pelene Kambua Mo Atu Yane Oko

²⁹ Jisasa bala yuu okone tepa alu, Galili ipa angini okona mandaka ongane poto, yuu wangiane mindina puu iyu lalu, petea.

³⁰ Petea-kola, wandakali siki pelene tupa atu aiyu epoto, wandakali kambua longo bala peteanga epo amunguli peai. Utupane-manе wandakali kee koopi, kulini wuanga-penepi, lee koopi, pii na-lalainipi, dee wandakali siki waka-waka pelene kambua atu aiyu epoto, Jisasana kee yane ongane yata aka peai-kola, balato utupane pitaka mo atu yaka pea.

³¹ Mo atu yaka pea-kola, pii na-lalaini wandakali tupamane pii lalu, kulini wuanga-pene tupa mo tika piyu, kee koo tupa asia pulu, lee koo tupa lee talu, peai-kola, wandakali kambua ateaini tupamane andeai. Andoto, utupane moko wete loto,

Isatale tane tupana Gote okona gene oko laiyu leai.*

Jisasato Akali Tausene Tukumindi Tupa Tomo Mayane Oko Maki 8:1-10

³² Okone angi Jisasato balana disaipolo tupa ipulupa loto, pii mindi utupane lamawuato, wandakali utupana namba towa ole tepoai atalai-kola, utupane ulia nolane naeya lea. Nimbato utupane ulia naa napene, mee andaka peakale lewando, utupane asininga ulia nono wato, lemowa malawai lo lomba-pene yolaini lo ondo piyua-ko. Nimbato utupane ulia namene mee peakale na-lokale lea.*

³³ Wuane lea-kola, balana disaipolo tupamane bala tipa puato, wandakali napalene yuu okona ateyama-ko. Nanimato betesa kambua wete ani tawe moto, wandakali kambua wetete utupa neakale malupeyamape leai.

³⁴ Wuane lea-kola, balato utupane tipa puato, yakamanga betesa aki-tupi eyape lea. Wuane lea-kola, utupane-mane betesa yanasa tupa towa pisa ajalapo nanimanga eya leai.

³⁵ Wuane leai-kola, balato wandakali tupa lamawuato, yakama yuunga pitiyapa lea.

³⁶ Peteai-kola, balato betesa yanasa tuppapi, pisa tutupapi, utupane moto, Gote wayu lalu, utupane konde lea. Konde loto, balana disaipolo tupa maya-kola, utupane-mane tomo utupane tale puato, wandakali tupa neakale mayai.

³⁷⁻³⁸ Mayai-kola, wanda andopane ima dii nalene, akali angu tau sene tukumindimane tomo neai. Wandakali utupane pitaka-mane no embo yai-kola, Jisasana disaipolo tupamane tomo akenane yane tupa mo yomo wato, basaketa nuu andane yanasa tumbi laya wato yata yai.

³⁹ Yata yai-kola, Jisasato wandakali utupane pitaka pulupa lalu, bala sipi mindina peakaiyu lo pitiyu, Makatana yuu okona pea.

16

Metekolo Piape Mindi Pula Leaini Oko Maki 8:11-13; Luku 12:54-56

¹ Matili Patasai tupapi, Satusi tupapi, utupane-mane Jisasa ateanga epeai. Bala minu mandeke puyale, utupane-mane bala lamawuato, Goteto nimba moyo ateya-kola, nimbato piape pilini oko andawa loyale, nimbato ati kenga tawe metekolo piape mindi pula leai.*

* 15:24: Mt 10:5-6

* 15:31: Mk 7:37

* 15:32: Mt 14:14

* 16:1: Mt 12:38; Lk 11:16

² [Utupane-mane wuane leaini tekeko, balato utupanena pii okone yano peyoto, ole-lene nai oko andaka peya-kola, ati ate pele peya-kola, yakamato utupane yapa lo andoto, anati panyu pulupeya ya lalaini lea.

³ Dee, upa pitane, mole yoto, yuu undupi leando, yakamato mole utupane yapa lo andoto, andipa popo loto, kungi epolopeya ya lalaini. Yakamato mole okonepene eya oko andoto, wua pulupeya ya lo kuai lo yapa lalaini-ko. Anu peakale yakamato mangene nambato pua ateyo tupa andoto, wua pulupeya ya lo katulo yapa naleyaipae.]

⁴ Wandakali yame koo andipa ateyai tupa yakamato Gote enene oko awua tepa alu, gote waka tupanga tungi peyo bilipi lalaini okomane yakama pamuku piyaini wandakali gulo ateyai. Yakamato namba languato, Goteto nimba moyo ateya-kola, nimbato piape pilini oko andawa loyalty, metekolo piape mindi pula lalaini tekeko, nambato metekolo piape mindi andipa napukale. Jia. Wamba Goteto potopesa akali Jona balanga metekolo piape peane okonepene mindiki angu nambato matili pukale. Wuane lalu, Jisasa bala utupane tepa alu pea. *

*Waiwa Ando Atalapape Leane Oko
Maki 8:14-21*

⁵ Jisasana disaipolo tupa bala towa ipa angini okona amo-yangi moyale peai-angi, utupane-mane betesa mo mandi napene, embesa yai.

⁶ Embasa yai-kola, Jisasato utupane lamawuato, Patasai tupapi, Satusi tupapi, utupanena palawa yangalaini pauta okomane yakama mo lawa piya olane. Waiwa ando atalapape lea. *

⁷ Wuane lea-kola, balana disaipolo tupamanale apulu, yakama teke-teke pii lalawa puato, nanimato betesa mo mandi napene, mee epalama okonena, balato wuane leya leai.

⁸ Wuane leyai nembo toto, Jisasato utupane tipa puato, anu peakale yakamato betesa mandi na-piyama loto, yakama teke-teke pii lalawa pua ateyaipe lea. Nambato katulo betesa yakama giu napulu-peya nayuto, yakamato nambanga wayumane tungi peyo ata nafeayaipae.

⁹⁻¹⁰ Wamba nambato betesa yau angu tale puato, akali tausene yau tupamanale no embo yakale maewa-kola, yakamato akenane yane tupa basaketa nuu alesa tumbi laya wato, yata yai oko embesa eyaipae. Dee, nambato betesa yanasa angu tale puato, akali tausene tukumindi tupamanale no

embo yakale maewa-kola, yakamato akenane yane tupa basaketa nuu wataka tumbi laya wato, yata yai oko embesa eyaipae. Pii nambato leyo oko yakamato tatake eyaipae. *

¹¹ Nambato betesa enene andayo pii naleyo-ko. Anu peakale yakamato wuane nembo naleyaipae. Nambato pii kokoli mindi yakama languato, Patasai tupapi, Satusi tupapi, utupane-mane mana langulai tupa palawa yangalaini pauta gulo yoto, yakama mo lawa piya olane. Waiwa ando atalapape leyo okoni. Jisasato wuane lea.

¹² Wuane lea-kola, balana disaipolo tupamanale palawa yangalaini pauta okomane nanima mo lawa piya olane Jisasato naleya nembo teai. Patasai tupapi, Satusi tupapi, utupane-mane nanima mana langulai okone palawa yangalaini pauta gulo yoto, nanima mo lawa piya olane. Waiwa ando atalapape leya nembo teai.

*Pitato Nimba Mesaya Atele Leane Oko
Maki 8:27-30; Luku 9:18-22*

¹³ Jisasa bala Sisatiya Pilipai tano okona mandaka poto, balana disaipolo tupa tipa puato, wandakali-mane Akalina Iwanane namba andayo api ateya lalainipe lea.

¹⁴ Wuane lea-kola, utupane-mane bala lamawuato, wandakali minditupa-mane nimba ipa peya-maiyane akali Jone atele lalaini leai. Minditupa-mane nimba Ilainja atele lalaini. Minditupa-mane nimba Jetemaya yandopi, potopesa akali waka mindi yandopi, utupanena mindi atele lalaini leai. *

¹⁵ Wuane lea-kola, Jisasato utupane lamawuato, utupane-mane wuane lalaini tekeko, yakamato namba andayo api ateya lalainipe lea.

¹⁶ Wuane lea-kola, Saimone Pitato balana pii okone yano peyoto, nimba Gote saka atapowa atalane okona Iwanane Mesaya oko atele lea. *

¹⁷ Wuane lea-kola, Jisasato bala lamawuato, Jone iwanane Saimone, yuu okona wandakali mindimane namba Gote Iwanane Mesaya oko ateya lo nimba andawa naleya lea. Nambana Ayiane ati kenga ateya okomane namba Gote Iwanane Mesaya oko ateya lo nimba andawa langeya-ko. Nimbato epelewa atape-pene. *

¹⁸ Andipa nambato pii mindi nimba langeyo. Akali mindimane anda mindi ana tokonga peando, anda okone tai atolopeya. Wuane pua teke, nambana yame tupa tai ateakale, nimbato ando atola loto, nambato nimbanda gene mindi Pita geyo. Nambana

* **16:4:** Mt 12:39; Lk 11:29 * **16:6:** Lk 12:1-3 * **16:9-10:** Mt 14:17-21; 15:34-38 * **16:14:** Mt 14:1-2; Mk 6:14-16;
Lk 9:7-9 * **16:16:** Jo 6:68-69 * **16:17:** Ga 1:15-16

yame utupane tai gulolai-kola, wandakali omalaini mana okona tai-lene okomane katulo nambana yame oko minu koya wete napulu-peya. *

¹⁹ Nambato wandakali moyo ando atalawane kii tupa nimba gukale. Nimba yuu okona atoto, kii utupane-mane asini mindi loko peleendo, ati kenga ateya Gote okomane asini okone loko peyola-kola teke pulupeya. Dee, nimbato yuu okona atoto, kii utupane-mane asini mindi lumbu tepa eendo, ati kenga ateya Gote okomane asini okone lumbu tepa olo-kola teke pulupeya lea. *

²⁰ Wuane lalu, Jisasato balana disaipolo tupa pii mindi lamaiyo nayu lamawuato, namba Mesaya oko ateya lo yakamato wandakali mindikipi mindi lamai na-piyapape. Jia wete lea.

Namba Omalu, Malinga Ika Lolo-peyawa Leane Oko
Maki 8:31-9:1; Luku 9:21-27

²¹ Okone ang, Jisasato pii wenene mindi balana disaipolo tupa bulupane tewa lamawuato, namba Jutusaleme pupe-pene guleya lea. Polowa-kola, Juta yame ando atalaini akali tupapi, pitisa akali kawane tupapi, loo tupana mana andene akali tupapi, utupane-mane namba kosimi lolai-kola, namba tandaka kambua nape-pene guleya. Akali-mane namba peyo ome lolai-kola, ole tepo penenga, Goteto namba malinga ika laya olopeya lea.

²² Wuane lea-kola, Pitato Jisasa atu aiyu amonga yale poto, bala laiya loto, Akali Andane, Goteto nimba ondo wato moyolakola, matili-matilipi kenda-pene okone nimbanda na-epeakale lea.

²³ Wuane lea-kola, Jisasato mopeke loto, Pita andata wato, nimbato Gotena nembotene oko wato minuto nalele lea. Nimbato wandakalina nembo-tene wato minuto, nambana polane asini oko kando lokale nembo toto, Satane gulo pii okone lele-ko. Nimba nambana masianesa puu lea.

²⁴⁻²⁶ Wuane lalu, Jisasato balana disaipolo tupa tipa puato, wandakali mindimane yuu okona minditaka eya tupa pitaka mialu, bala saka atapowa ata napeando, matili balana minditaka utupane pitakamane anu puato bala moyolo-peyape lea. Balato aki mindi mawuato, balana saka atapowa atolane oko kambo molo-peyape. Wandakali mindi bala omolowane lo yuku wato, nambana yame ata napeando, bala saka atapowa ata napulu-peyape. Wuane tekeko, wandakali mindi bala namba yame

atola oko andoto, wandakali-mane bala peyo ome leaindo, bala saka atapowa atolopeyako. Wandakali mindimane namba polowa okona epokale nembo teando, bala tane nembo natene, kenda-pene balanga epola tupa balana ita malamanda gulo yola oko mo awua, namba watama ipupe-pene. *

²⁷ Anu peakale nambato wuane leyope. Matili Ayiane Gotena tai-lene andane oko Akalina Iwanane okonga yola-kola, balana enjole tupa towa atu epolopeya. Epoto, balato wandakali pitakana mana minalaini tupa nembo toto, utupane mindiki-mindiki lo yole epene yandopi, yole koo yandopi, mindi maluopeya. *

²⁸ Nambato pii enene mindi yakama langeyo. Matili wandakali oo ateyai utupanena minditupa wamba ini oma napene andolai-kola, Akalina Iwanane oko bala akali andane kinji mindi gulalu epolakola, utupane-mane andolopeyai. Jisasato wuane lea.

17

Jisasa Bala Waka Guleane Oko
Maki 9:2-13; Luku 9:28-36

¹ Ole wataka pea-kola, Jisasato Pitapi, Jemesapi, Jemesa amene Jonepi, utupane atu aiyu yuu wangiane kenga wete mindina iyu poto, yakama angu ateainipia.

² Utupane yakama angu ateai-kola, Jisasa ana tona peane tupa ake wete puato, tii pikoyo peaipia. Dee, nai-lene tii wete piyane pua, balana lee-ingapi tii wete pea-kola, bala waka guleaipia. *

³ Waka gulea-kola, Mosesa Ilainja-la, okonelapo panakame epoto, Jisasa towa atu pii lalawa pua ateai-kola, Jisasana disaipolo tepo tupamane okonelapo andeaini-pia.

⁴ Andoto, Pitato Jisasa lamawuato, Akali Andane, nanima yuu okona ateyama-kola, kuai leya-ko. Nambato anda aiyakame tepo pipia laka lo nimbato nembo teendo, aiyakame tepo utupanena mindi nimbanda, mindi Mosesana, mindi Ilainjana pingukale leaipia.

⁵ Pitato pii okone lo ateai-kola, mole tii-pene wete mindi epoto, akali utupane yame peyo, ombo ya-kola, mole okonena tombenesia ato pii leane mindimane loto, akali oo ateya oko bala nambana iwanane yamapane yene oko ateya leaipia. Nambato balana mana tupa andoto, epele wete alawane. Yakamato balana pii oko ale amai-yapape leaipia. *

* **16:18:** Jo 1:42; Ep 2:20-22 * **16:19:** Mt 18:18; Jo 20:23

* **16:24-26:** Mt 4:8-9; 10:38-39; Lk 14:27; 17:33; Jo 12:25

* **16:27:** Mt 25:31; Sam 62:12; Man 24:12; Lom 2:6; Lap 22:12

* **17:2:** 2Pi 1:16-18 * **17:5:** Sam 2:7; Ais 42:1; Mt

3:17; Mk 1:11; Lk 3:18-22; Lo 18:15

⁶ Wuane lea-kola, balana disaipolo tupamane pii okone ale wato, yakama yuku wete wato, yuunga tombawua leanipia.

⁷ Tombawua lo yai-kola, Jisasa epoto, balana kini-mane utupane wata wato, yakama yuku naene, ika lalapa leaipia.

⁸ Jisasato wuane lea-kola, disaipolo tepo utupane-mane andeai-kola, akali waka mindi Jisasa towa ata napeaipia. Jia. Bala angu yakama towa atu ateanga andeainipia.

⁹ Jisasa balana disaipolo tepo utupane towa atu yuu wangiane okone tepe oyale, asini puu nena loto, balato utupane pii lamaiyo nayu lamawuato, yakamato minditaka andalai oko wandakali mindikipi mindi lamai napene atama pulu, matili Akalina Iwanane oko malinga ika lola-angi, yakamato wandakali tupa lamai-yapape leaipia.

¹⁰ Wuane lea-kola, disaipolo utupane-mane Jisasa tipa puato, Akalina Iwanane oko malinga ika lalu, wamba ini epolopeya yando, anu peakale loo tupana mana andene akali tupamane loto, potopesa akali Ilainja wamba ini ingane yuunga peke lolakola, Akalina Iwanane oko matili ipu-pe-pene lalainipe leanipia. *

¹¹ Wuane leai-kola, Jisasato utupanena pii okone yano peyoto, enene, Gotena pii pepa pelene eya mindimane loto, matili Ilainja bala epoto, Akalina Iwanane oko pepeakale lo minditaka kambua mo tika pulupeya layene eya leaipia.

¹² Gotena pii okonemane wuane leya tekeko, Ilainja bala wamba epea-kola, wandakali-mane akali okone bala Ilainja ya lo anda napeaini lo nambato yakama langeyo. Bala Ilainja ya lo anda napene, utupane-mane balanga mana koo minamakale nembo teaini tupa pitaka balanga miniaini-pia. Wuane pua teke, wandakali-mane Akalina Iwanane oko balanga mana koo minditupa minulai-kola, bala tandaka nolopeya. Jisasato wuane leaipia. *

¹³ Wuane lea-kola, balana disaipolo tupamane ale wato, balato ipa peya-maiyane akali Jone oko andayo wuane leya nembo teamipia. *

*Jisasato Sipitisa Koo Atene Iwana Mindi
Mo Atu Yane Oko*

Maki 9:14-29; Luku 9:37-42

¹⁴ Wandakali kambua amunguli pua atea-i-kola, Jisasapi, balana disaipolo tepo tupapi, utupane epo peakaiyu leai. Peakaiyu leai-kola, akali mindi bala Jisasa ateanga epoto, aiki leka ya.

¹⁵⁻¹⁶ Akali okonemane Jisasa lamawuato, Akali Andane, ole kambuangga nambana iwanane oko peango-ngo puato, aiya peyoto, ipanga pulu, itanga talu, peya-kola, balana umbaini oko koyalane lea. Nambato bala nimbanza disaipolo tupa atalainga atu polo tekeko, utupane-mane bala katulo mo atu nayalai-ko. Nimbato bala ondo wato, mo atu yaa lea.

¹⁷ Wuane lea-kola, Jisasato pii mindi loto, wandakali yame koo andipa ateyai tupa-mane kuai lo nembo natene, mana koo tupa minuto, Gote lo bilipi na-lalaini lea. Ole aki-tupinga namba yakama towa atokale yape. Dee, ole aki-tupi nambato yakamana kenda-pene tupa awua ata gukalepe. Iwana okone atu aiyu namba ateyonga ipulupa lea.

¹⁸ Utupane-mane iwana okone atu aiyu Jisasa ateanga epeai-kola, Jisasato iwana okonenga sipitisa koo ateane oko laiya loto, puu lea-kola, sipitisa koo okonemane iwana okone tepe alu, peaipia. Pea-kola, okone angi teke iwana okonena siki okone atu ya.

¹⁹ Atu ya-kola, matili disaipolo tupa yakama angu Jisasa ateanga epoto, bala tipa puato, anu peakale nanimoto sipitisa koo okone katulo peyo wata na-piyamape leai. *

²⁰ Wuane leai-kola, balato utupane lamawuato, yakamato Gote bilipi leyama nayu naleyai mambele, yakamato katulo sipitisa koo okone peyo wata napiyai lea. Nambato pii enene mindi yakama langeyo. Yakamana bilipi oko anjako mee komba dini okopene angu yando, okone katu teke. Yakamato Gote mee teke bilipi leaindo, yakamato mangene minditupa pimakale nembo tolai tupa pitaka katulo pulupeyai. Yakamato yuu wangiane oo eya oko lamawuato, nimba lopalu, amonga peyolo puu leaindo, yuu wangiane okone katulo lopalu, amonga peyolo polopeya. *

²¹ [Yakamato Gote angu nembo tamakale loto, ole ukupini mindi tomo nanene atoto, Gote lo pote lapiai-yale, yakamato sipitisa koo okonepene tupa katulo peyo watapiai-yale. Sipitisa koo okonepene peyo watolane asia waka mindi naeya lea.]

*Akalina Iwanane Bala Omalu, Ika Lolo-peya Ole Lapone Leane Oko
Maki 9:30-32; Luku 9:43-45*

²² Alu mindi Jisasana disaipolo tupa Galili disitiki okona amunguli peai-kola, balato utupane lamawuato, akali mindimane Akalina Iwanane oko ene pituto, bala towa yanda-pene akali tupana kininga maulupeya lea. *

* **17:10:** Mal 4:5 * **17:12:** Mt 11:14 * **17:13:** Lk 1:14-17 * **17:19:** Mt 10:1-4 * **17:20:** Mt 21:21; Mk 11:23; Lk 17:6; 1Ko 13:2 * **17:22:** Mt 16:21

²³ Maula-kola, akali utupane-mane bala peyo ome lolopeyai. Bala omalu, ole lapo mali pitane atola-kola, ole teponena, Goteto bala malinga ika laya olopeya lea. Wuane lea-kola, balana disaipolo tupamane mini kenda wete yai.

Lotu Anda Andane Okona Takisa Muni Mayane Oko

²⁴ Matili Jisasa balana disaipolo tupa towa Kapaneame tano okona peakaiyu leai-angi, lotu anda andane okona takisa muni mialaini akali tupa Pita ateanga peainipia. Poto, utupane-mane Pita tipa puato, yakamana tisa okomane lotu anda andane okona takisa muni peyalanepe, peya na-piyanepa leainipia.*

²⁵ Wuane leai-kola, Pitato utupane lamawuato, uli, balato takisa muni okone peyalane leaipia. Wuane lalu, Pita bala anda Jisasa ateane okona kolandaka loto, pii mindi lata naya-kola teke, Jisasato pii mindi Pita tipa puato, Saimone, nimbato aki nembo telepe lea. Yuu okona kinji tupamane apinga takisa muni mialainipe. Utupane-mane yakamana iwanane tupa lamawuato, takisa muni giyapa lalainipe. Pee, utupane-mane wandakali yame waka tupa lamawuato, takisa muni giyapa lalainipe lea.

²⁶ Jisasato wuane lea-kola, Pitato balana pii okone yano peyoto, yuu okona kinji tupamane wandakali yame waka tupa lamawuato, takisa muni giyapa lalaini tekeko, yakamana iwanane tupamane takisa muni geakale na-lalaini lea. Wuane lea-kola, Jisasato utupane lamawuato, kinji tupana andopane tupamane takisa muni bala mai na-piayaini okonena, namba Gotena iwanane okomane namba ayiane okona lotu anda andane okona takisa muni mai napipe-pene.

²⁷ Mai napipe-pene tekeko, nanimato akali utupane mo yataka olomane. Nimba ipa angiri okona poto, pisa mialaini uku mindi aindaka lape. Pisa bulupane mole okonena nene minu angatawa puato, muni mindi pangula oko ando molopele. Moto, nalipana takisa peyoto, akali utupanenga maipe. Jisasato wuane lea.

18

Akali Gene Andane Wete Yene Api Ateyamape Leaini Oko

Maki 9:33-37; Luku 9:46-48

¹ Okone angi teke, Jisasana disaipolo tupamane bala ateanga poto, bala tipa puato, Goteto balana wandakali tupa moyo ando

ateya tupana gene andane wetete apina eyape leai.*

² Wuane leai-kola, Jisasato andopane mindi epeakale loto, balana disaipolo tupana tombenenga ata lea.

³⁻⁴ Andopane okone epo atea-kola, Jisasato balana disaipolo tupa lamawuato, andopane oo ateya oko bala tane wandakali waka tupana napinga ateyo nembo teya. Wuane pua teke, Gotena wandakali mindi bala tane Gotena wandakali waka tupana napinga ateyo nembo teando, Gote ati kenga ateya okomane wandakali okonena gene andane wete eya lolopeya. Wuaneko, yakama gene yene ateyama nembo talaini mana oko lawa puato, andopane tupamane wandakali waka tupana napinga ateyama nembo talaini pua yakamato nembo tapepene. Nambato pii enene mindi yakama langeyo. Yakama tane wandakali waka tupana napinga eyama nembo nateaindo, matili-matilipi Gote ati kenga ateya okomane yakama moyo ando ata napulu-peya. Jia wete.*

⁵ Wandakali mindimane namba lo nembo toto, andopane oo ateyo okopene mindi moyando, balato namba moyola-kola teke pulupeya. Jisasato wuane lea.*

Koo Peakale Lo Mo Piya Alaini Mana Oko

Maki 9:42-48; Luku 17:1-2

⁶⁻⁷ Wuane lalu, Jisasato balana disaipolo tupa lamawuato, wandakali minditupamane utupanena yangone tupamane koo peakale lo mo piya eyai-kola, utupane-mane mana koo tupa wato minalaini lea. Utupane-mane wuane piyaini okonena, wandakali pitaka ondo ape-pene tekeko, koo peakale lo mo piya alaini wandakali tupamane yole koo wetete mindi molopeyai nembo toto, utupane ondo wete ape-pene. Tene okonena, andopane oo ateyai utupana mindimane nambanga tungi peyo ateya-kola, andopane okonemane koo peakale lo wandakali mindimane bala mo piya oyale peando, wandakali okonemane wuane napeakale nembo toto, akali minditupamane ana andane mindi wandakali okonena manenga andi loto, ipa solewata angini okona tombenenga wete awua aindaka leaindo, andopane okonemane koo peakale lo balato katulo mo piya na-lopeya. Wuane napula-kola, Goteto yole koo wetete yuku-pene mindi wandakali okone mai napulu-peya.

⁸ Nimbanza kinipi, kenepi, lapotaka atene atole-kola, Goteto nimba ita too atapowa atene yuu koo okona awua aindaka leando,

* **17:24:** Ek 30:13; 38:26 * **18:1:** Lk 22:24 * **18:3-4:** Mt 19:14; Mk 10:15; Lk 18:16-17 * **18:5:** Mt 10:40; Lk 10:13-16; Jo 13:18-20

nimba kopeta wete atolo-peleko. Nimbana kini yandopi, kene yandopi, utupanena mindimane nimbato koo pula lo mo piya oyale peando, nimbato okone pai lo apiape. Pai lo apialu, nimbana kini yandopi, kene yandopi, mindiki angu atene atoto, nimba saka atapowa kuai lo wete atolopele. *

⁹ Dee, nimbana lene lapotaka tene atolekola, Goteto nimba ita too atapowa atene yuu koo wetete okona awua aindaka leando, nimba kopeta wete atolopeleko. Nimbato koo pula lo nimbana lene okomane mo piya oyale peando, nimbato lene okone luku apiape. Luku apialu, nimbana lene mindiki angu tene atoto, nimba saka atapowa kuai lo wete atolopele.

¹⁰⁻¹¹ [Akalina Iwanane okomane wandakali alu pitane ateyai tupa molo-peke lolo epea.] Wuaneoko, nambato pii kokoli mindi yakama langeyo. Enjole minditupa ati kenga atoto, ole dindi lo nambana ayiane ati kenga ateya oko towa atu atoto, andopane oo ateyai utupa moyo atalaini-ko. Yakamoto andopane utupanena mindikipi mindi bala angini mindi jia ya, bala mee ya lo nembo tolaini. Waiwa ando atalapape. Jisasato wuane lea. *

Sipisipi Mindiki Alu Peane Okona Pii Kokoli Oko

Luku 15:3-7

¹² Wuane lalu, Jisasato pii mindi loto, akali mindimane sipisipi (100) wane andete yatawa atola-kola, utupanena mindiki angu alu peando, balato anu pulu-peyape. Balato sipisipi (99) paiyasa pilisanga pilisa tupa yuu wangiane mindina ateakale lalu, sipisipi mindiki alu pulane okone aiya pulu polopeya.

¹³ Nambato pii enene mindi yakama langeyo. Balana sipisipi (99) paiyasa pilisanga pilisa tupa alu napulai-kola, balato epele olopeya tekeko, balato sipisipi mindiki alu pulane okone aiya puato, ando meando, bala epele wete olopeya.

¹⁴ Wuane pua teke, yakamana ayiane ati kenga ateya okomane andopane ateyai utupana mindikipi mindi alu napipia lakae lo nembo talane. Jisasato wuane lea.

Wandakali Yangone Mo Tika Pulane Mana Oko

¹⁵ Wuane lalu, Jisasato pii mindi tako pua loto, Kitisene wandakali mindimane nimbanga koo mindi peando, nimbato bala atolanga pupe lea. Poto, liyamba angu mindinga pituto, nimbato nimbanga koo mindi wua pipini lo bala lamaipe. Lاماulekola, balato nimbana pii lolene okone ale

yando, nimbato bala molo-peke lole-kola, bala nimbana amene gulo atolopeya. *

¹⁶ Wuane pulupeya tekeko, balato nimbana pii okone ale nayando, matili nimbana wisana tupamane nimbana pii tupa pitaka lo tai laya yakale nembo toto, nimbato wandakali mindiki yandopi, lapo yandopi, mindi lamialu, wandakali okone atolanga atu peke lapapape. *

¹⁷ Nimbana wisana tupamane nimbana pii okone bala towa atu mo tika puyale makande pulai-kola, balato ale na-wakale nembo teando, nimbato sosa oko lamaipe. Amunguli pitane okomane bala towa atu pii okone lo tika puyale makande pulai-kola, balato ale na-wakale nembo teando, nimbato bala aitene wandakali mindi yandopi, takisa muni mialane akali mindi yandopi, okonepene mindi ateya nembo tape.

¹⁸ Nambato pii enene mindi yakama langeyo. Yakamoto yuu okona atapuluto, asini mindi loko peleaindo, ati kenga ateya Gote okomane asini okone loko peyola-kola teke pulupeya. Yakamoto yuu okona atoto, asini mindi lumbu tepa yaindo, ati kenga ateya Gote okomane asini okone lumbu tepa olo-kola teke pulupeya. *

¹⁹⁻²⁰ Dee, nambato pii mindi tako puato, wandakali lapo yandopi, tepo yandopi, namba nembo toto, mindinga amunguli pulai organe namba tane wandakali utupanena tombenenga atolo-peyawa leyo. Tene okonena, yuu okona wandakali lapo liyambato namba nembo toto, nembo mindiki paluto, nambana ayiane ati kenga ateya okomane mangene mindi peakale loto, liyambato tee lo pote leapindo, balato mangene okone pulupeya. Jisasato wuane lea. *

Ondo Aa Napiyane Akali Okona Pii Kokoli Oko

²¹ Okone angi, Pita bala Jisasa ateanga poto, bala tipa puato, Akali Andane, wandakali yangone mindimane ole kambuangna nimbanga koo piki peando, ole aki-tupinga nambato balana koo utupane apia-maiki bukalepe. Ole kambuangna balato nimbanga koo piki peando, nambato balana koo utupane ole yanasa angu apia-maiki piyu, konda wakalepe lea.

²² Wuane lea-kola, Jisasato bala lamawuato, wandakali yangone mindimane ole kambuangna koo nimbanga piki peando, ole yanasa angu nimbato balana koo utupane apia-maiki piyu, kondape lo nambato nimbanga koo nimbanga piki pua atapowa ateando, ole paiyasa yanasa angu apia-maiki piyu, balana koo

* **18:8:** Mt 5:29-30 * **18:10-11:** Lk 19:9-10; Ip 1:14

* **18:15:** Lk 17:3; Ga 6:1

* **18:16:** Lo 19:15; Jo 8:16-17

* **18:18:** Mt 16:19; Jo 20:23

* **18:19-20:** Mk 11:24; Jo 15:7-8

* **18:22:** Lk 17:4

pulane okone tuma teke ole yanasaanga apia-maiki pua atape-pene leyo. *

²³ Anu peakale nimbato wuane pipe leyope. Wamba akali andane kinji mindimane balana piape akali tupa ando ateane pua teke, ati kenga ateya Gote okomane yuu okona wandakali tupa ando atalane. Wamba kinji okonemane yano minditupa balana piape akali tupa maiyu, matili balana muni mia-peke lokale nembo teaipia.

²⁴ Kinji okonemane piape okone tewa pua atea-angi, akali mindimane kinji okonena piape akali mindi lamo atu epeaipia. Piape akali epeane okone balanga yano andane kambua longo wetete kina miliyone paiyasa yaepia.

²⁵ Piape akali okone balana yano andane okone peyolane muni naya-kola, kinji okonemane balana piape akali yangone tupa lamawuato, akali waka mindimane piape akali okonepi, balana wetene andopanepi, utupane pitaka kambola-kola, utupane-mane akali okonena katapusa piape pua ateakale leaipia. Dee, akali mindimane piape akali okonena andapi, pinjupi, minditaka eya tupa pitaka kambeakale teke. Kambola-kola, muni epola okomane piape akali okonena yano oko peleakale leaipia.

²⁶ Wuane lea-kola, piape akali okonemane kinji oko peteane ongane poto, aiki lekawa, bala tee lamawuato, matili nambato yano okone pitaka peyokalenga, nimbato namba towa wamba ini kapoyale yataka naene, maliyo ata-kae leaipia.

²⁷ Wuane lea-kola, kinji okomane balana piape akali okone onto wato, balana yano oko peleakale nalene kondalu, bala mee peakale tepa yaepia.

²⁸ Kinji okonemane wuane peane tekeko, balana piape akali okone kamaka poto, piape akali yangone balana yano yene mindi andeaipia. Yangone okonenga yano tene kina angu yane tekeko, piape akali okonemane piape akali yangone okonena pendokone mina pai loto, nimbato nambana yano tupa pitaka gii leaipia.

²⁹ Wuane lea-kola, balana yangone okonemane aikini leka wato, matili nambato niimbana yano okone peyokalenga, nimbato namba towa wamba ini kapoyale yataka naene, maliyo ata-kae leaipia.

³⁰ Wuane lea-kola, piape akali okonemane maliyo ata napukale nembo toto, balana piape akali yangone okone katapusa pua aindaka lalu, balana yano peyo koyo pula-angi, bala takita epeakale leaipia.

³¹ Piape akali okonemane wuane peakola, balana piape akali yangone waka tumpamanne balana mana okone andoto, mini

kenda wete yainipia. Mini kenda wete wato, utupane-mane poto, piape akali okomane wuane piya lo yakamana akali andane kinji oko lamai-yainipia.

³²⁻³³ Lamai-yaikola, akali andane okone-mane balana piape akali okone epeakale leaipia. Epea-kola, akali andane okomane bala lamawuato, wamba nimbato namba ondo aa lale-kola, nambato nambana yano andane nimbanga yapia tupa pitaka mia napene yakale kondalo-ko leaipia. Nimbato nimba ondo alo pua teke, nimbatopi nimbana piape akali yangone okone ondo ape-pene tekeko, nimbato wuane napene kondele-ko. Nimba piape akali koo wete mindi ya leaipia.

³⁴ Wuane lalu, akali andane okonemane yataka wato, balana piape akali okomane balana yano peleakale nembo toto, akali minditupa-mane bala tandaka mawua ateakale leaipia. Akali okonemane balana yano pitaka peyo koyo pula-angi, utupane-mane tandaka mawua ateaini okone kondeakale leaipia. *

³⁵ Kinji okonemane wuane leane loto, Jisasato pii kokoli leane okone lo koyo piyu, pii mindi tako pua loto, wandakali yangone mindimane yakamanga koo mindi pula-kola, yakamato mindiki-mindiki lo balana koo okone apia-mai napeaindo, nambana ayiane ati kenga ateya okomanepi wuane pua teke, yakamana koo tupa apia-gii napulu-peya lea. *

19

*Wetene Peyo Wata Alaini Mana Oko
Maki 10:1-12; Luku 16:18*

¹ Jisasato pii utupane lo koyo piyu, Galili disitiki oko tepa alu, ipa Jotane amo-yangi Jutiya disitiki okona pea.

² Poto, balato wandakali kambua bala watama peaini utupanena siki tupa mo atu yaka pea.

³ Okone angi, Patasai minditupa-mane Jisasa minu makande pimakale nembo toto, bala ateanga epeai. Utupane-mane bala tipa puato, tene mindi atu napula-kola, akali mindimane balana wetene oko mee peyo wateando, loo Goteto yata yane okomane akali okonena mana okone yapa lo tale puato, katu lololo-peyape leai.

⁴ Wuane leai-kola, Jisasato utupanena pii okone yano peyoto, Goteno pii pepa pelene eya mindimane loto, wamba wete Goteto pitaka taka yakale leane-angi, balato wanda, akali-la, lapotaka waa peane layene eya lea. Yakamato pii temane okone dii lo anda napeaipe. *

* **18:34:** Mt 5:25-26

* **18:35:** Mt 6:15; Mk 11:25-26; Ep 4:32; Kol 3:13

* **19:4:** Jen 1:27; 5:2

⁵ Okonelapo waa piyu, Goteto pii mindi loto, akali mindimane balana angini, ayiane-la, okonelapo tepa alu, balana wetene oko towa mina mindiki lolapi-angi, liyamba umbaini mindiki gulo pitulupeyapi leaipia. *

⁶ Wamba Goteto wuane leane oko nembo toto, andipa wanda, akali-la, liyamba lapo gulo napeteiyapi. Liyamba umbaini mindiki gulo peteiyapi-ko. Goteto wanda, akali-la, okonelapo mina mindiki leane nembo toto, wandakali-mane okonelapo mo toko nalape-pene. Jisasato wuane lea.

⁷ Wuane lea-kola, Patasai tupamane bala lamawuato, wamba Mosesato loo mindi yata wato, akali mindimane wetene peyo watolane pepa mindi mo maiyu, bala puu leando, mana okone katu leane leainipia. Wanda, akali-la, okonelapo toko nalappene yando, anu peakale Mosesato mana okone katu loto, loo okone yata yaepiape leai. *

⁸ Wuane lea-kola, Jisasato utupane lamawuato, yakamato tuu pua Gotena pii tanga loto, yakamana wetene tupa peyo wata alaini. Wuaneko, akali tupamane yakamana wetene tupa peyo wateakale lo Mosesato ando konda yane tekeko, Goteto wandakali tupa wamba ini bulupane waa peane-angi, akali-mane wanda peyo wateakale loto, mana mindi yata nayaepia. Jia.

⁹ Tene okonena, nambato yakama lan-guato, wanda mindimane pamuku napulakola teke, balana akalini okomane bala mee peyo watalu, wanda waka mindi kee leando, akali okone bala tane pamuku pulukola pulupeya leyo. Jisasato wuane lea. *

¹⁰ Wuane lea-kola, balana disai polo tupamane bala lamawuato, wanda peyo watolane asini mindi nayando, akali-mane wanda kee nalene, kondeaindo, utupane kuai lo atolopeyai leai.

¹¹ Wuane lea-kola, Jisasato utupane lamawuato, akali minditupa-mane katulo wanda kee nalene, mee ata na-piyaini. Jia. Goteto mana okone akali minditupanga maya-kola, utupane-mane angu katulo wanda mindi kee nalene, mee atalaini.

¹² Wanda mindimane iwananja umbaini koyene mindi mandeando, matili iwana okone andayola-angi, balato wanda katulo mia napepe-pene gulola-kola, wanda kee nalene, bala mee atolopeya. Akali mindina wangali tolo apene yando, bala wanda kee nalene, mee atolopeya teke. Dee, Gote ati kenga ateya okomane wandakali tupa moyo ando ateakale nembo toto, akali

minditupa-mane balana piape oko pua atamakale loto, wanda kee nalene, mee atalaini. Mana okone katulo wato minula akali okomane mana okone wato minape-pene. Jisasato wuane lea.

Andopane Tupa Epeakale Lo Ando Kon-dalapa Leane Oko

Maki 10:13-16; Luku 18:15-17

¹³ Okone angi, Jisasato andopane anjako tupanga kii yata wato, pote leakale nembo toto, wandakali-mane andopane tupa atu aiyu bala ateanga epeai-kola, balana disai polo tupamane wandakali utupane laiya loto, yakamato andopane tupa atu aiyu naepene kondalapa leai.

¹⁴ Kondalapa leai-kola, Jisasato utupane lamawuato, ati kenga ateya Gote okomane andopane anjako okopene gulo atalaini wandakali tupa moyo ando atalane-ko. Yakamato andopane utupana minandi halene, namba ateyonga epeakale lo ando kondalapa lea. *

¹⁵ Wuane lalu, Jisasato andopane anjako utupanena kawanenga kii yata wato, pote lalu, bala yuu okone tupa alu, pea.

Jisasato Akali Amango Mindina Pii Yano Peleane Oko

Maki 10:17-31; Luku 18:18-30

¹⁶ Alu mindi akali amango mindi bala Jisasa ateanga epoto, bala tipa puato, tisa, namba saka atapowa atokalenga, nambato mana epene andoko minu atokalepe lea.

¹⁷ Wuane lea-kola, Jisasato akali okone tipa puato, anu peakale nimbato mana epene andoko minu atokalepe lo namba tipa pelepe lea. Gote bala angu epene. Nimbato saka atapowa atokale nembo teendo, nimbato balana loo tupa pitaka wato minu atape lea. *

¹⁸ Wuane lea-kola, akali okonemane bala tipa puato, nimbato loo andutupa andayo lelepe lea. Wuane lea-kola, Jisasato bala lamawuato, nimbato wandakali yangone mindi peyo ome nalape lea. Nimbato pamuku napipe. Nimbato pake mia napipe. Nimbato wandakali yangone mindi kosimi loto, owato pii nalape. *

¹⁹ Nimbanta angini, ayiane-lana pangosa atoto, nimbato okone-lapona pii lolapi tupa wato minu atape. Dee, nimbato tane epelewa atalene pua teke, nimbato wandakali yangone tupa towa epelewa yamapano yo atape layene eya lea. *

²⁰ Wuane lea-kola, akali okonemane bala lamawuato, nambato loo utupane pitaka wato minu atalawane. Nambato

* **19:5:** Jen 2:24; Ep 5:31 * **19:7:** Lo 24:1-4; Mt 5:31 * **19:9:** Mt 5:32; 1Ko 7:10-11 * **19:14:** Mt 18:2-4 * **19:17:** Pit 18:5; Lk 10:28 * **19:18:** Ek 20:12-16; Lo 5:16-20 * **19:19:** Ek 20:12-16; Pit 19:18

mana epene andoko tako pua wato minape-penepe lea.

²¹ Wuane lea-kola, Jisasato bala lamawuato, nimba akali epene tika-pene wete mindi atokale nembo teendo, nimba poto, wandakali waka tupamane nimbana minditaka eya tupa pitaka kambeakale lape lea. Kambolai-kola, nimbato muni mole tupa wandakali koo tipia tupa maipe. Wuane peendo, matili nimbana minditaka epene wetete tupa ati kenga yolopeya-ko. Nimbato namba watama ipupe lea.

²² Wuane lea-kola, akali amango okone-mane balana pii okone ale alu, balana minditaka kambua wetete yane tupa pitaka awua tepa na-wakale nembo toto, bala mini kenda wato, Jisasa tepa alu, pea.

²³ Pea-kola, Jisasato balana disaipolo tupa lamawuato, nimbato pii enene mindi yakama langeyo. Goteto utupane moyo ando ateakale lo akali amango tupamane ando kondape-pene oko pitete alaini.

²⁴ Dee, nimbato pii mindi tako puato, yia kamele mindi bala yana asia titi anjako mindina kolandaka loyale makande pipi-yale, pitete apia-yale tekeko, Goteto utupane moyo ando ateakale lo akali amango tupamane ando kondape-pene oko pitete wete alaini lea.

²⁵ Wuane lea-kola, balana disaipolo tupamane balana pii okone ale wato, moko wete loto, Jisasa tipa puato, wuane yando, api katulo saka atapowa atolo-peyape leai.

²⁶ Wuane lea-kola, Jisasato utupane andapeyo yoto, pii mindi loto, wandakali yakama tane katulo saka atapowa atamakale lo saka ataya na-olopeyai tekeko, Goteto katulo pitaka taka piyane. Tene okonena, akali amango mindimane Gotenga tungi peyo bilipi leando, Goteto katulo bala saka atapowa ateakale lo ataya olopeyai lea.
*

²⁷ Wuane lea-kola, Pitato bala tipa puato, nanimana minditaka yemane tupa pitaka awua tepa alu, nanimato nimba watama epeyama okone nimbato andee oko yako. Matili nanimato aki mindi molo-peyamape lea.

²⁸ Wuane lea-kola, Jisasato balana disaipolo tupa lamawuato, nimbato pii enene mindi yakama langeyo lea. Matili minditaka eya tupa pitaka wenene gulolangi, Akalina Iwanane oko bala gene andane wetete mialu, kinji pitiyane toko epene wetete mindina pitulu-peya. Okone angi, namba watama epeyai akali alesa tupa yakamato kinji piyaini toko alesa tupanga pituto, Isatale tane alesa tupa ando atolopeyai.*

²⁹ Dee, wandakali minditupa-mane nimbana piape oko pukale nembo toto, yakamana ee anda yandopi, amene imalimi yandopi, angini ayiane yandopi, andopane yandopi, utupanena mindi tepe alaini. Wuane piyaini wandakali utupane pitakamane matili okonetaka kambua longo wete konda pua moto, saka atapowa atolopeyai.

³⁰ Utupane-mane wuane pulupeyai tekeko, wandakali andipa gene andane wetete yene ateyai utupanena kambua minditupa matili gene nayene wetete atolai-kola, wandakali andipa gene nayene wetete ateyai utupanena kambua minditupa matili gene andane wetete yene atolopeyai. Jisasato wuane lea. *

20

Piape Akali Tupana Pii Kokoli Oko

¹ Wuane lalu, Jisasato pii mindi tako pua loto, wamba getepe ee anduane mindimane balana piape akali tupa ando ateane pua teke, ati kenga ateya Gote okomane yuu okona wandakali tupa ando atalane lea. Wamba upa pitane wete ee anduane okone bala ika loto, akali minditupa-mane balana ee okona piape pingeakale lo utupane lamolo peapipa.

² Poto, akali mee atearini tupa lamawuato, yakamato ole mindiki nimbana piape pingeaindo, nimbato yakama mindiki-mindiki lo wandakali-mane ole mindikina yole mialiani pua, Lomo tane wandakali muni silipa-mane waa-pene mindi gukale leaipia. Akali utupane-mane yole okone atu yalua lea-kola, ee anduane okonemane akali utupane lamawuato, yakamato nambana ee okona piape pulu pulupa leaipia.

³ Matili upa pitane naini kilokopi mindi lea-kola, ee anduane okonemane wandakali epo amunguli piyaini ama okona poto andea-kola, akali waka minditupa mee ateainga andeaipia.

⁴ Balato utupane lamawuato, yakamato nimbana piape pingeaindo, nimbato yole tika pua gukale-ko. Nambana ee okona piape pulu pulupa leaipia.

⁵ Wuane lea-kola, utupane-mane balana piape pulu peainipia. Matili otonga tualo kiloko lea-kolapi, ole-lene siti kiloko lea-kolapi, ee anduane okonemane pai pua wuane teke peapipa.

⁶ Wuane piyu, ole-lene taeme paepe kilokopi mindi lea-kola, bala poto andea-kola, akali waka minditupa mee ateainga andeaipia. Andoto, balato utupane tipa puato, anu peakale yakama ole luu oko pitaka mee atalaipe leaipia.

* **19:26:** Jop 42:2 * **19:28:** Mt 25:31; Lk 22:28-30; Lep 3:21

* **19:30:** Mt 20:16; Lk 13:29-30

⁷ Wuane lea-kola, utupane-mane balana pii okone yano peyoto, akali mindimane piape mindi nanima gii napiya-kola, nanima mee atalama leaninipia. Wuane leai-kola, balato yakamapi nambana ee okona piape pulu pulupa leaipia.

⁸ Sikisa kiloko lea-angi, ee anduane okomane balana ee ando atalane akali oko lamawuato, nimbato piape akali tupa ipulupa loto, yole maipe. Akali matili ole-lene wete piape pulu epalai tupa wamba ini bulupane yole maiyu, yole maima pulu, akali wamba ini bulupane wete piape pulu epalai utupane yole mai-koyo pipe leaipia.*

⁹ Wuane lea-kola, matili ole lene wete paepe kilokopi mindi tewa piape pulu peaini akali tupa mindiki-mindiki lo yole muni silipa-mane waa-pene mindi miaka peainipia.

¹⁰ Akali utupane yakama muni silipa-mane waa-pene mindi yole meainga andoto, akali wamba ini bulupane wete epoto, piape pua ateaini tupamane yakama yole minditupa tako pua molopeyama ya lo nembo teaini tekeko, utupane pitaka mindiki-mindiki lo muni silipa-mane waapene mindiki teke yole miaka peainipia.

¹¹ Yole mindiki wuane pua teke meaini okone andoto, akali utupane-mane ee anduane okona mana okone andoto, mulumulu leaninipia.

¹² Mulu-mulu loto, akali utupanena mindimane ee anduane oko lamawuato, nai popo piya-kola teke, nanima wamba upa pitane wete tewa, ole luu oko pitaka piape ayawa wete pua atalama-ko. Akali matili wete epalai utupane yakama awa mindiki angu piape piyai tekeko, nimbato yole nanima gele mindiki okone tuma teke akali utupane yole maele okonde leaipia.

¹³⁻¹⁵ Wuane lea-kola, ee anduane okomane piape akali okonena pii okone yano peyoto, amene, namba tanena muni tale pukale nembo teyo pua tale peyokola, Gotena loo okomane jia leyape. Akali okomane ole-lene wete epoto, piape piyakola, nimbato bala moyo yole nimba geyo okone tuma teke bala mauwakale nembo toto, maeyo. Nambato wuane peyo-kola, anu peakale nimbato akali okone towa apiangu pimailepe. Wamba nambato muni silipa-mane waa-pene mindi gukale lalokola, nimbato yole okone atu yaluu lale okoni. Tene okonena, andipa nimbato muni silipa-mane waa-pene mindi nimba yole geyo okomane nimbangaa koo mindi naapeyo-ko. Nimbana yole oko mialuu, puu

leaipia. Ee anduane okomane wuane leaipia.

¹⁶ Ee anduane okonemane balana piape akali tupa yole mayane pua teke, ati kenga ateya Gote okomane balana piape akali tupa yole malupeya. Maula-angi, wandakali wamba bulupane balana piape pua ateaini tupana minditupa gene nayene wete atolai-kola, wandakali matili masianenga balana piape pimaulaini tupana minditupa gene andane wete yene atolopeyai. Jisasato wuane lea.*

Akalina Iwanane Bala Omalu, Ika Lolopeya Ole Tepone Leane Oko
Maki 10:32-34; Luku 18:31-33

¹⁷⁻¹⁸ Wandakali kambua Jisasa towa atu Jutusaleme moyale asini peai-kola, balato wandakali waka tupa tepa alu, balana disaipolo alesa akali tupa angu atu aiyu amonga-yale poto, utupane lamawuato, ale alapape. Andipa nanima Jutusaleme moyale asini peyama lea. Poloma-kola, akali mindimane Akalina Iwanane oko ene pituto, pitisa akali kawane tupapi, loo tupana mana andene akali tupapi, utupanena kinninga malupeya. Maula-kola, utupane-mane bala kosimi loto, omeakale lolopeyai.*

¹⁹ Omeakale lalu, akali yame waka tupamanne bala lamba loto, kunju-mane peyalu, ita malamanda okona peyo yuka yakale nembo toto, utupane-mane bala akali yame waka tupana kinninga maulu-peyai. Bala omola-kola, ole teponena, Goteto bala manglinga ika laya olopeya. Jisasato wuane lea.

Jemesa, Jone-lamane Akali Gene Yene Atapakale Leapele Oko
Maki 10:35-45

²⁰ Okone ang, Sepiti okona wetene okomane balana iwanane lapo lamo atu Jisasa ateanga epoto, aiki leka wato, nimbato mangene mindi pipi lakaee lo nembo teyo leaipia.

²¹ Wuane lea-kola, Jisasato bala tipa puato, nimbato mangene aki mindi nambato pipia lakaee lo nembo telepe leaipia. Wuane lea-kola, wanda okonemane bala lamawuato, nimba akali andane kinji gulole-angi, nimbato nambana iwanane okolapona mindi nimbana kii tikasatole peteakale lalu, mindoko nimbana kii koyasa-tole peteakale lapi lakaee lo nembo teyo leaipia.*

²² Wuane lea-kola, Jisasato balana pii okone yano peyoto, nimbato wuane pipia lakaee lo yakamato nembo teyai tekeko, matili mangene anu-pene tupa pulupeyape lo yakamato wayumane nembo

* **20:8:** Pit 19:13; Lo 24:15 * **20:16:** Mt 19:30; Mk 10:31; Lk 13:29-30 * **20:17-18:** Mt 16:21; 17:22-23 * **20:21:**

natene, mee tee leyai leaipia. Wuane lalu, balato Sepiti iwanane okolapo tipa puato, minditaka mindi kapo penenga petene nambato nolowa oko liyambato katulo nolo-peyapipe leaipia. Wuane lea-kola, okonelapo-mane Jisasa lamawuato, nalipato okonetaka katulo nolo-peyapa leapeleopia.*

²³ Wuane leapi-kola, Jisasato akali okonelapo lamawuato, enene, minditaka mindi kapo penenga petene gulola oko nambato nolowa-kola, liyambatopi nolo-peyapi tekeko, nambana kii tikasa-tole yandopi, nambana kii koyasa-tole yandopi, akali mindi bala peteakale lolane piape oko nambana jia. Wamba nambana ayiane okomane akali lapo toko okone-lapona peteakale lata yane leaipia.

²⁴ Amene okonelapo-mane akali andane atapakale leapi-kola, matili Jisasana disaipolo waka paiyasa tupamane pii temane okone ale wato, disaipolo okonelapo towa yataka yai.

²⁵ Yataka yai-kola, Jisasato balana disaipolo tupa pitaka ipulupa loto, wua leaipia. Wandakali yame waka tupamane akali kawane tupana pii wato mineakale loto, akali kawane tupamane wandakali utupanena lipinga atoto, utupane taimane ando atalaini lo yakamato nembo teyay.

²⁶ Utupane-mane wuane piyaini tekeko, yakamato mana okone wato mina napiyapape. Jia. Yakamana mindimane akali andane mindi atauwa lakae lo nembo teando, bala yakamana piape akali gulo atape-pene.*

²⁷⁻²⁸ Akalina Iwanane oko epoto, wandakali-mane balana piape pingakale nembo nateaipia. Jia. Balato utupanena piape pimawuato, wandakali kambua kambo molo-peke lokale nembo toto, bala omolo epea. Wuane pua teke, yakamana mindimane akali andane wetete mindi atauwa lakae lo nembo teando, balato yole mia napene, yakamana piape tupa mee wetete pingua atape-pene. Jisasato wuane lea.*

Jisasato Akali Lee Koo Lapo Mo Atu Yane Oko

Maki 10:46-52; Luku 18:35-43

²⁹ Matili Jisasa balana disaipolo tupa towa atu Jetiko tano oko tepa alu peai-kola, wandakali kambua longo-mane bala watama peai.

³⁰ Okone angi, wandakali-mane Jisasa epeya leai-kola, lene koo akali lapo-mane asini okona mandaka gulo pituto, pii okone

ale wato, Dapiti yame Akali Andane nim-bato nalipa ondo ape lo pii taimane laka peapeleopia.

³¹ Wuane laka peapi-kola, asini epeaini wandakali kambua tupamane okonelapo laiya loto, liyamba pii nalene kondalapa leaini tekeko, okonelapo-mane pii taimane wete loto, Dapiti yame Akali Andane nim-bato nalipa ondo ape leapi.

³² Wuane leapi-kola, Jisasa bala asini puapo naene, organe atoto, akali lee koo okonelapo lamawuato, liyamba ipulupa lea. Epeapi-kola, balato akali okonelapo tipa puato, nambato liyamba moyo, anu pipi lakae lo nembo teyapipe lea.

³³ Wuane lea-kola, akali okonelapo-mane bala bilipi loto, Akali Andane, nimbato nali-pana lene mo tee laya api lakae lo nembo teyaya leapi.

³⁴ Wuane leapi-kola, Jisasato akali okonelapo ondo wato, balana kini okomane liyambana lenenga yata ya-kola, wamba kapoyale okone angi teke, liyamba lene toto, Jisasa watama peapi.

21

Kirji Tupamane Palaini Pua Jisasa Bala Jutusaleme Peane Oko

Maki 11:1-11; Luku 19:28-40; Jone 12:12-19

¹⁻⁵ Wamba potopesa akali mindimane pii mindi loto, yakamato Sayone tano okona tane tupa lamawuato, yakamana kinji oko bala akali gene nayene gulo atoto, bala yia dongi mindina masianenga pitiyu epeya. Bala dongi talua okona masianenga pitiyu epeya oko andalapa lo lamai-yapape leaipia. Potopesa akali okonemane pii leane okone enene guleakale nembo toto, Jisasa balana disaipolo tupa towa Jutusaleme moyale Olipi wangiane okona puu iyu loto. Betepasi tano okona peakaiyu leai-angi, balato balana disaipolo lapo akali lamawuato, liyamba tano anjako amo eya okona pulupa lea. Poto andolapi-kola, dongi mindi balana andopane oko towa atu andi latane atolapinga liyambato wamba kapoyale andolo-peyapi. Liyambato dongi okone-lapona ende tita lolapi-angi, akali mindimane liyamba tipa puato, anu peakale liyambato wuane peyapipe leando, liyambato bala lamawuato, Akali Andane okomane dongi mindina pituto, mangene mindi pukale nembo teya lalapape. Wuane lolapi-kola, akali okonemane dongi okonelapo wamba ini atu pulupa lolopeya. Wuane lola-kola, liyambato okonelapo atu namba ateyonga ipulupape. Jisasato wuane lea.*

* ^{20:22:} Mt 26:39; Jo 18:11

* ^{20:25:} Lk 22:25-27

* ^{20:26:} Mt 23:11; Mk 9:35 * ^{20:27-28:} Lk 22:25-27; Pl 2:7

* ^{21:1-5:} Sak 9:9

⁶ Wuane lea-kola, disai polo okonelapome poto, balato piyapape leane pua peapilipia.

⁷ Liyambato dongi angini, andopane-la, okonelapo atu epoto, Jisasa dongi talua okonena masianenga peteakale nembo toto, akali okonelapo-mane liyambana tona luu kenga peapili okolapo yokoto, dongi okonena masianenga yata yapili. Yata yapi-kola, Jisasa bala dongi okona masianenga pitiyu, Jutusaleme moyale pea.

⁸ Bala Jutusaleme moyale pea-angi, wandakali kambua longo-mane yakamana tona luu kenga peaini tupa yokoto, Jisasa moyale peane asininga panda pima pea. Dee, wandakali minditupa-mane ita kembone anako tupa yando moto, asininga panda pua yatama peai.

⁹ Wandakali bala moyale peane okona asininga ingane peaini tupapi, bala masianenga watana epeaini tupapi, utupanemanee pii taimane lama poto, yakamoto kinji Dapiti yumbane oko laiyu lalapa leai. Akali Andane Goteto bala epeakale leyakola, bala epeya-ko. Goteto bala wayumane moyo ateakalenga, ati kenga wetete ateya Gote okona gene oko laiyu lalapa lama pea. *

¹⁰ Wuane lama poto, utupane yakama Jisasa towa atu Jutusaleme peakaiyu lea-kola, Jutusaleme tane wandakali pitakana nembo-tene ika lea-kola, akali epeya oko apipe lo tipa peai.

¹¹ Tipa peai-kola, Jisasa towa atu epeaini wandakali tupamanee utupane lamawuato, akali oko bala Galili disitiki tano Nasatesa tane potopesa akali Jisasa oko ateya leai.

Jisasa Bala Lotu Anda Andane Okona Peane Oko

Maki 11:15-19; Luku 19:45-48; Jone 2:13-22

¹² Okone angi, Jisasa bala lotu anda andane okona ende anda-pangosa kolanda loto andea-kola, minditaka makesa yo peteaini wandakali tupapi, minditaka kambo ateaini wandakali tupapi, utupane pitaka peyo watea. Utupane peyo watoto, muni lawa pua peteaini akali utupana tepolo toko tupapi, eka uya salimi lo peteaini akali utupana pitiyaini toko tupapi, utupane kulembo lo apea.

¹³ Apialu, balato wandakali utupane lamawuato, Gotena pii pepa pelene eya mindimane loto, wandakali-mane nambana anda oko bala pote lo pitulane anda mindi ateya lolopeyai layene eya tekeko, yakamoto nambana anda oko pake nene wandakali tupa epo pitiyaini anda mindi gulaya eyai lea. *

¹⁴ Wuane lalu, Jisasa bala lotu anda andane okonena atea-kola, wandakali lee koopi, kee koopi, utupane bala ateanga epeai. Epeai-kola, balato utupane mo atu ya.

¹⁵ Jisasato metekolo piapé andane utupane pea-kola, andopane minditupa lotu anda andane okonena ende anda-pangosa atoto, balana gene oko laiyu loto, Dapitina yumbane oko laiyu lalapa, laka peai. Wuane laka peai-kola, pitisa akali kawane tupapi, loo utupana mana andene akali tupapi, utupane-mane andoto, yataka-mane omeai.

¹⁶ Yataka-mane omoto, utupane-mane Jisasa tipa puato, andopane tupamanee pii leyai okone nimbato ale naelepe leai. Wuane leai-kola, Jisasato utupane lamawuato, nambato utupanena pii okone ale eyo tekeko, Gotena pii pepa pelene eya mindimane loto, Gote nimbato andopane andanepi, kambolopi, utupane-mane nimbana gene oko laiyu leakale laya alene layene eya lea. Yakamoto pii layene okone alu mindikipi mindi wamba dii lo anda napeaipe lea. *

¹⁷ Wuane lalu, balato pitisa akali kawanepi, loo utupana mana andene akalipi, utupane ateakale loto, Jutusaleme tepa alu, Betani tano okona poto, palea.

Yakamoto Pote Lolai Pua Goteto Pulu-peya Leane Oko

Maki 11:12-14,20-24

¹⁸ Upa pitane wete Jisasa bala Jutusaleme peke loyale asini poto, ulia nono ya.

¹⁹ Ulia nono wato, balato ita pikii mindi asia ayatenenga ateane oko andoto, dini liyape lo andolo mandaka pea-kola, ita okonena dini mindikipi mindi lia napene, yokone angu ateanga andea. Andoto, balato ita pikii okone lamawuato, matili-matilipi nimbato dini mindikipi mindi lia napula lea-kola, ita pikii okone wamba ini kapoyale okone angi teke kuu lo kapu tea.

²⁰ Kuu lo kapu tea-kola, balana disai polo tupamanee andoto, yakama moko wete loto, anu puato ita pikii oko wamba ini andipa teke kapoyale wete kuu lo kapu teyape lo bala tipa peai.

²¹ Tipa peai-kola, Jisasato utupanena pii okone yano peyoto, nambato pii enene mindi yakama langeyo lea. Yakamoto mini lapo palu atu napene, Gote lo bilipi leyama nayu leaindo, nambato ita pikii okonga mangene mindi piyo okopene yakamatopi katulo pulupeyai. Dee, yakamoto yuu wan-giane oo eya oko lamawuato, nimba lopalu poto, ipa solewata angini andane okona tombenenga peaka nena laa leaindo, Goteto

yuu wangiane oko lopalu, ipa solewata andane okona tombenenga aindaka lolopeya.
*

²² Yakamoto pote lolai pua Goteto pulupeya lo bilipi leyama nayu loto, Gote nimbato mangene mindi pula lo pote laka peaindo, Goteto mangene utupane pitaka piki pulupeya. Jisasato wuane lea.*

Piape Utupane Pipe Lo Apito Nimba Langeape Leatin Oko
Maki 11:27-33; Luku 20:1-8

²³ Jisasa bala lotu anda andane okonena ende anda-pangosa poto, wandakali tupa mana lamawua atea-kola, pitisa akali kawane tupapi, Juta yame ando atalaini akali tupapi, utupane yakama Jisasa ateanga epeai. Epoto, utupane-mane bala tipa puato, nimbato apina pii wato minuto, wandakali utupa mana lamawua atelepe. Apito nimba languato, piape utupa pipe lapia-kola, nimbato piape utupa pua atelepe leai.

²⁴ Wuane leai-kola, Jisasato utupane lamawuato, nimbato pii mindiki yakama tipa peyolea. Yakamoto nambana pii okone kuai lo yano peleaindo, piape utupane pipe lo namba langeane akali okona gene oko langukale.

²⁵⁻²⁶ Wamba Goteto Jone lamawuato, nimbato wandakali tupa ipa peya-maipe lea-kola, balato wandakali tupa ipa peyamawua ateape. Pee, wandakali-mane bala lamawuato, ipa peya-maipe leai-kola, balato wuane peape lea. Wuane lea-kola, akali utupane yakama teke-teke pii lalawa puato, wandakali pitaka-mane Jone bala potopesa akali mindi ateane nembo talainiko. Nanimoto Jisasana pii okone yano peyoto, wandakali-mane Jone lamawuato, nimbato wandakali tupa ipa peya-maipe leai-kola, balato wandakali tupa ipa peyamawua ateane lemando, wandakali pitaka-mane nanima towa yataka ollopeyai lo yuku eyama. Wuane tekeko, nanimoto balana pii okone yano peyoto, Goteto Jone lamawuato, nimbato wandakali tupa ipa peya-maipe lea-kola, balato wandakali tupa ipa peyamawua ateane lemando, Jisasato nanima tipa puato, wuane yando, anu peakale yakamoto Jonena pii oko bilipi naleaipo lolopeya leai.*

²⁷ Wuane lo yakama teke-teke pii lalawa piyu, utupane-mane Jisasana pii okone yano peyoto, nanima nembo nateyama leai. Wuane leai-kola, balato utupane lamawuato, wuane yando, piape utupa pipe lo namba langeane akali okona gene oko nambato yakama langi napukale teke lea.

Iwanane Lapona Pii Kokoli Oko

²⁸⁻³⁰ Jisasato pitisa akali kawane tupapi, Isatale tanena akali kawane waka tupapi, utupane pii mindi tako pua lamawuato, wamba akali mindina iwana lapo ateapele lea. Balato balana iwanane mindi ateanga poto, iwana, andipa nimbato getepe ee okona piape pulu puu leaipia. Wuane lea-kola, iwana okonemanne balana ayiane lamawuato, akali andane, nambato piape pulu pokale leane tekeko, bala puu napene, konda yaepia. Balato piape pulu naapea-kola, ayiane okomane balana iwanane mindoko ateanga poto, iwana, nimbato getepe ee okona piape pulu puu leaipia. Wuane lea-kola, iwanane okonemanne balana ayiane lamawuato, nambato piape okone pulu napokale leane tekeko, matili balana nembo lawa piyu, piape pulu peaipia.

³¹⁻³² Iwanane okone-lapona andokomane ayiane-mane nembo teane pua peaipiye. Yakamoto aki nembo teyaipe. Jisasato akali utupane tipa puato, wuane lea-kola, utupane-mane bala lamawuato, iwana piape pulu peane okomane bala ayiane okomane nembo teane pua peaipia leai. Wuane leai-kola, Jisasato utupane lamawuato, nimbato pii enene mindi yakama langeyo lea. Wamba Joneto mana tika-pene tupa yakama langulu epea-kola, yakamoto pii balato leane tupa bilipi naleaini tekeko, takisa muni mialaini akalipi, pamuku wandapi, utupane-mane Jonena pii leane oko ale wato, bilipi leai. Utupane-mane bilipi leaini okone andoto, Pitisa akali kawanepi, Isatale tanena akali kawanepi, yakamoto yamapanne lawa puato, pii balato leane tupa bilipi naleai. Tene okonena, takisa muni mialaini akalipi, pamuku wandapi, utupane-mane Gotena yuu epene okona makale nembo toto, yakama sia minuto, Gote nimbato nanima moyo ando atape ini kapoyale lalaini. Jisasato wuane lea.*

Getepe Ee Ando Ateaini Akali Koo Tupana Pii Kokoli Oko

Maki 12:1-12; Luku 20:9-19

³³ Wuane lalu, Jisasato pitisa akali kawane tupapi, Isatale tanena akali kawane tupapi, utupane pii mindi tako pua lamawuato, yakamoto pii kokoli waka mindi ale alapa lea. Yuu anduane mindimane getepe ee mindi yandoto, ende pua wata aindaka leaipia. Wuane piyu, matili dini tupana ipane penge lo mokale nembo toto, balato ana andane mindi kua peaipia. Kua piyu, akali mindimane ee okone ando ateakale loto, balato anda

* 21:21: Mt 17:20; Lk 17:6; 1Ko 13:2; Jo 14:12-14

* 21:22: Mt 7:7-11; 18:19-20

* 21:25-26: Mt 14:3-5

* 21:31-32:

kenga luu wete mindi peaipia. Wuane piyu, balato akali minditupa lamawuato, yakamato nambana ee oko ando atalapape lalu, bala yuu tepanda waka mindinga poto ateaipia.*

³⁴ Matili getepe dini tupa mandulane oto oko epea-angi, ee anduane okomane balana piape akali minditupa lamawuato, nambana getepe ee ando atalaini akali tupamanne getepe dini minditupa yo geakalenga, yakamato molo pulupa leaipia.

³⁵ Balato wuane leane tekeko, ee ando atalaini akali tupamanne balana piape akali utupane minuto, mindi kunju-mane peyalu, mindi peyo ome lalu, mindi anamane peyalu, peainipia.

³⁶ Wamba ee anduane okomane piape akali ajalapo angu pulupa lea-kola, balana ee ando atalaini akali utupane-mane akali utupane minu koyainipia. Tene okonena, ee anduane okomane balana piape akali kambua tako pua lamawuato, akali utupane-mane getepe dini minditupa yo geakalenga, yakamato molo pulupa leane tekeko, balana ee ando atalaini akali utupane-mane wamba peaini pua teke puato, balana piape akali utupane minu koyaini tekepia.

³⁷ Wuane peai-kola, matili ee anduane okomane pii mindi loto, nambana ee ando atalaini akali utupane-mane nambana iwanane okona pii ale olopeyai lea. Wuane loto, balato balana iwanane oko lamawuato, akali utupane-mane getepe dindi minditupa yo geakalenga, nimbato molo puu leaipia.

³⁸ Balato wuane leane tekeko, balana ee ando atalaini akali utupane-mane balana iwanane oko epeanga andoto, yakama teke-teke pii lalawa puato, matili iwana epeya okomane bala ayiane okona minditaka eya tupa pitaka paluni tane molopeya-ko. Nanimato bala peyo ome lalu, ee oko nanima wetete mia-makale leainipia.*

³⁹ Wuane lalu, utupane-mane bala minata wato, ee okonena ende kamaka awua poto, bala peyo ome leainipia.*

⁴⁰ Pii kokoli okone lalu, Jisasato pitisa akali kawane tupapi, Isatale tanena akali kawane waka tupapi, utupane tipa puato, balana ee ando atalaini akali utupane-mane wuane peaini okonena, matili ee anduane oko epola-angi, balato akali utupane towa anu pulu-peyape lea.

⁴¹ Wuane lea-kola, utupane-mane bala lamawuato, balato akali koo utupane tandaka andane mawuato, peyo ome lalu, akali waka minditupa-mane balana getepe ee

okone ando atekale lolopeya. Wuane lola-kola, getepe dini mandulane oto oko epololangi, akali utupane-mane getepe dini tupa yoto, minditupa bala maluveyai leai.

⁴² Wuane leai-kola, Jisasato utupane lamawuato, Gotena pii pepa pelene eya mindimane loto, anda piyaini akali tupamanne anda mindi puato, ita mindi andoto, oko koo ya loto, mo apeaini mindiki okone teke, Goteto moto, anda okonena pingina gulaya yane. Nanimato andeyama-kola, Gotena mana okone kuai-lene wete eya andeyama layene eya. Yakamato Gotena pii layene okone wamba alu mindikipi mindi dii lo anda naapeaipe.*

⁴³ Piape akali utupane-mane piape kopeta peaini pua teke, yakamato Gotena piape oko kuai lo ando ata na-piyaini. Tene okonena, yakamato balana ee oko ando atalapale lo balato ando konda napulu-peya. Jia. Wandakali yame waka mindimane balana ee oko ando atekale lo maula-kola, utupane-mane balana ee okona dini tupa yoto, bala maulupeya.

⁴⁴ [Wandakali mindi aiya peyoto, anda pingina okona tokonga lomba-pene yando, wandakali okone bala tele lo toko lolopeya tekeko, anda pingina okone tepa wato, wandakali mindi peyo tele lola-kola, wandakali okone bala yuu kangalamu gulolopeya lea].

⁴⁵ Jisasato wuane lea-kola, pitisa akali kawane tupapi, Patasai tupapi, utupane-mane ale wato, balato pii kokoli utupane nanima andayo leya nembo teai.

⁴⁶ Wuane nembo toto, utupane-mane bala andi laima lakae lo nembo teaini tekeko, wandakali kambua atekai tupamanne Jisasa bala potopesa akali mindi ateyaa nembo teai-kola, Juta yamena akali kawane tupamanne bala andi loyale yuku wato, konda yai.

22

Wandakali Ipulupa Leane Tupana Pii Kokoli Oko

Luku 14:16-24

¹⁻² Okone ang, Jisasato pii kokoli waka mindi Juta yamena akali andane tupa lamawuato, wamba kinji mindina iwanane okomane wanda mindi kee loyale pea-kola, kinji okonemane tomo kambua yangeane lea. Tomo yangal, balato wandakali tupa lamawuato, yakama tomo nolo ipulupa leaipia. Wuane leane pua teke, ati kenga ateyaa Gote okomane wandakali tupa moyo ando atokale nembo toto, utupane lamawuato, yakama ipulupa lalane.

³ Kinji okonemane tomo yangoyale atoto, wandakali yame mindi wamba ini lamawuato, matili nambato tomo yandolowakola, yakama tomo nolo ipulupale leaipia. Wuane lalu, matili wandakali utupane-mane balana tomo okone nolo epeakale nembo toto, kinji okonemane balana piape akali tupa lamawuato, yakamato wandakali utupane ipulupa lolo pulupa leaipia. Wuane lea-kola, akali utupane-mane poto, yakama ipulupa leaini tekeko, wandakali utupane-mane napumakale leainipia.

⁴ Na-ipumakale leai-kola, kinji okonemane balana piape akali waka minditupa lamawuato, yakama poto, wandakali wamba nambato epeakale lauwa tupa lamawuato, kinji okomane pii mindi yakama langiya oko yakamato ale alapape lala lalapape leaipia. Nambana iwanane okomane wanda mindi kee loyale peyakola, nambana yia bulumako maipa tupapi, sisisipi kataiya atene tupapi, utupane peyoto, nambato tomo kambua makande piyo. Pitaka taka wamba makande pitane eya-ko. Yakamato tomo nolo ipulupape. Kinji okomane wuane lala lo yakamato utupane lamai-yapape leaipia.

⁵ Wuane lea-kola, balana piape akali tupa poto, wandakali utupane wuane lo lamaiyai tekeko, wandakali utupane-mane pii okone ale oyale embo alu, waka-waka puku peainipia. Wandakali mindi bala eenga peainipia. Wandakali mindi balana bisanisa piape pulu peainipia.

⁶ Dee, wandakali waka tupa pitaka-mane kinji okona piape akali utupane minu koyalu, peyo ome leainipia. *

⁷ Tene okonena, kinji okonemane yataka wete wato, balana ami yanda yene tupa lamawuato, yakamato wandakali utupane minu koyolo pulupa leaipia. Pulupa lea-kola, utupane-mane poto, balana piape akali peyo leaini wandakali utupane paini peyo ome loto, utupanena tano oko yango apeainipia.

⁸ Wuane peai-kola, kinji okomane balana piape akali waka tupa lamawuato, nambana iwanane okomane wanda kee loyale peyakola, tomo kambua makande piyene mee eya tekeko, wandakali tomo nolo epeakale lauwa utupane yakama wandakali koo wete atalaini ya leaipia. Wandakali koo okonepene tupamane nambana tomo tupa naneakale. Jia.

⁹ Tene okonena, yakamato asia kembu utupana poto, wandakali yame waka yakamato andolai tupa pitaka lamawuato, nambato tomo kambua yangeyo-ko. Yakamato nolo ipulupa lala lo lamai-yapape leaipia.

¹⁰ Wuane lea-kola, balana piape akali utupane-mane asini tupana poto, wandakali koo epenepi andeaini tupa pitaka mo amunguli peainipia. Amunguli peakola, kinji okona iwanane okomane wanda kee lea-angi, tomo no peteaini anda oko tumbi wete leaipia.

¹¹ Akali mindimane wanda mindi kee leya-angi, akali waka tupamane tona epene mindi piyainipia. Utupane-mane wuane piyaini tekeko, wandakali tomo no peteaini tupa andokale nembo toto, kinji okomane anda okona anda-pango kolandaka loto andea-kola, akali mindimane tona epene okonepene mindi pii napene, mee peteinipa.

¹² Tona epene okonepene naapea-kola, kinji okomane akali okone tipa puato, amene, anu peakale nimbato tona epene mindi napene, tona koo wambane mindi puato, anda okona kolandaka lalepe leaipia. Wuane lea-kola, akali okonemane balana pii okone yano peyolane asia mindi nayaepia.

¹³ Asia naya-kola, kinji okomane balana piape akali tupa lamawuato, akali okone bala yuu koo undupi-lene okonena atoto, bala yamataka lo nene geleto laka pua ateakale. Yakamato balana kini kene tupa yake puato, bala takita awua apialapape. Kinji okomane wuane leane lo Jisasato lea. *

¹⁴ Pii kokoli okone lalu, Jisasato wandakali tupa lamawuato, Goteto wandakali kambua ee lalane tekeko, balato wandakali anjalapo angu balana anda okona anda-pango epeakale lalane lea.

Takisa Muni Maipe-penepe Lo Tipa Peaini Oko

Maki 12:13-17; Luku 20:20-26

¹⁵ Okone angi, akali Patasai tupa poto, pii mindi lo yake puato, nanimato Jisasa langalanga pimawua pii mindi loloma-kola, balato gapomane oko andayo pii koo mindi lolopeya. Pii koo mindi lola-kola, balana pii lolane okonemane teke nanimato bala kosimi lamakale leainipia. *

¹⁶ Wuane lalu, Patasai utupane-mane yakamana disaipolo minditupa kinji Etote yame akali minditupa towa atu Jisasa ateanga peakale leainipia. Akali utupane yakama epoto, Jisasa lamawuato, tisa, wandakali mindi bala gene yene yandopi, nayene yandopi, okonena tene mindi ata naopeya nembo toto, nimbato wandakali mindikipi mindi ando yuku aa napilini leai. Yuku naene atoto, nimbato pii enene angu loto, Goteto nanima wua pipiai lakae lo nembo talane loto, mana kuai lo lamailini nembo teyama.

* 22:6: Mt 21:35 * 22:13: Mt 8:12; 25:30; Lk 13:23-28

* 22:15: Mk 3:6

¹⁷ Tene okonena, nimbato aki nembo telepe lo nanimoto nimba tipa peyama. Juta yame wandakali nanimoto takisa muni tupa Lomo tane gapomane akali kawane Sisa oko maipe-penepe, mai napipe-penepe leai.

¹⁸ Akali utupane-mane nembo-tene koo palu, bala tipa peai lo andoto, Jisasato utupane lamawuato, yakama minakasa alaini akali ateyai lea. Anu peakale yakamato namba langa-langa pinguyale minu makande peyape.

¹⁹ Yakamato takisa peyalaini muni mindi namba andawa lalapa lea. Wuane lea-kola, akali utupane-mane muni mindi awua epoto, bala andawa leai.

²⁰ Andawa leai-kola, Jisasato utupane tipa puato, apina lee-inga waa pitane okola, gene peyatane okola, okonelapo muni okona ateyape lea.

²¹ Wuane lea-kola, utupane-mane bala lamawuato, Lomo tane gapomane akali kawane Sisa okona lee-inga waa pitane okola, balana gene peyatane okola, okonelapo muni okona eya leai. Wuane leai-kola, Jisasato utupane lamawuato, wuane yando, yakamato Sisana minditaka yolai tupa bala maiyu, Gotena minditaka yolai tupa Gote maiyapape leai.*

²² Wuane lea-kola, akali utupane-mane ale wato, nembo kambua wete toto, bala tepa alu peai.

Wandakali Malinga Ika Lolopeyai Leane Oko

Maki 12:18-27; Luku 20:27-40

²³⁻²⁵ Ole okone angi teke, Satusi yamena akali minditupa Jisasa ateanga epeai. Utupane-mane wandakali omene tupa malinga ika nalolo-peyai lalainipia. Akali utupane epoto, Jisasa tipa puato, tisa, wamba akali mindina iwanane yanasa nanima towa wali atema leai. Amene bulupane okomane wanda mindi kee lalu, andopane mandi napene, omea-kola, balana wetene oko yalo petea. Wamba Mosesato pii mindi loto, akali mindimane wanda mindi kee lalu, andopane mindi mandi napene omeando, andopane mindimane akali omolane okonena panda meakale nembo toto, balana amene mindimane wanda yalo oko kee loto, andopane mindi mandi maiyakale lea. Pii okone nembo toto, akali omeane okonena amene okomane wanda yalo okone kee lea.*

²⁶ Kee leane tekeko, wuane pua teke balato andopane mandi napene omea-kola, amene tepone-mane wuane teke pea. Wuane teke pima pulu, amene yanasa tupa

pitaka-mane wanda mindiki okone teke kee lama pulu, oma yiake leai.

²⁷ Matili wanda yalo okone balapi omea.

²⁸ Amene yanasa utupane pitaka-mane wanda mindiki okone teke kee leai-ko. Matili wandakali omene tupa malinga ika lolai-angi, wanda okone bala amene yanasa utupanena mindi andokona wetene pitulu-peyape leai.

²⁹ Wuane leai-kola, Jisasato utupanena pii okone yano peyoto, yakamato Gotena pii pepa pelene eya tupapi, balana tai-lene okopi, okonelapo nembo natene ato, kopeta nembo toto, pii okone nambanga tipa peyai.

³⁰ Matili wandakali omene tupa malinga ika lolai-angi, wanda-mane akali napulu, akali-mane wanda kee na-lalu, utupane-mane ati kenga enjole atalaini pua teke atolopeyai.

³¹⁻³² Gote bala wandakali omene tupana Gote jia. Bala wandakali saka ateyai tupana Gote oko ateya. Tene okonena, wamba Goteto yakama languato, namba Apatakame, Aisake, Jekopo ima utupanena Gote oko ateyo lea. Gotena pii okone pepa pelene eya-kola teke, yakamato pii okone wamba dii lo anda napea-ape. Akali tepo omeaini utupanena tandini tupa saka ata napea-yale, Goteto bala akali utupanena Gote ateyo nalene, bala akali utupanena Gote atewa lea-yale. Tene okonena, nanimoto balana pii pepa pelene eya okone dii loto, matili wandakali tupa malinga ika lolopeyai nembo teyama lea.*

³³ Jisasato wuane lea-kola, wandakali amunguli pua peteaini tupamane balana pii okone ale wato, moko wete leai.

Loo Andoko Lipinga Wetete Eyape Lo Tipa Peane Oko

Maki 12:28-31; Luku 10:25-28

³⁴ Jisasato pii lala okonemane Satusi yamena nee asia tambu lala lo wandakali-mane pii lo tawe yai-kola, Patasai yame okomane pii okone ale wato, Jisasa ateanga elo amunguli peai.

³⁵ Akali utupanena mindi bala loo tupana mana kambua andene akali loya mindi ateaipia. Balato Jisasa minu makande buyale pii mindi bala tipa pea.

³⁶ Balato Jisasa tipa puato, tisa, Gotena loo tupana andoko-mane loo waka tupa pitaka sia minuto, lipinga wete eyape lea.

³⁷ Wuane lea-kola, Jisasato balana pii okone yano peyoto, nimbana Akali Andane Gote oko towa wayumane wetete epelewa yamapanie yo atoto, nimbana yamapanepi, tandinipi, nembo-tenepi, utupane pitaka bala angu mawua atape lea.*

³⁸ Loo bulupane okonemane loo waka tupa pitaka sia minuto, lipinga wetete eya.

³⁹ Gotena loo lapone oko mindiki okopene teke eya. Loo okonemane loto, nimba tane wayumane epelewa yamapane yo atalene pua teke, nimbato wandakali yangone tupa towa epelewa yamapane yo atape leya. *

⁴⁰ Gotena loo okonelapo balana loo waka tutapi, potopesa akali tupana pii tutapi, utupane pitakana tene oko eya. Jisasato wuane lea. *

*Mesaya Bala Dapiti Yamena Mandiyene
Angu Jia Leane Oko*

Maki 12:35-37; Luku 20:41-44

⁴¹⁻⁴² Patasai yame tupa amunguli piyu, ongane ateai-kola, Jisasato utupane tipa puato, Mesaya oko bala apina mandiyenepe. Yakamato aki nembo teyaipe lea-kola, utupane-mane balana pii okone yano peyoto, Mesaya oko bala Dapitina yamena mandiyene mindi ateya leai. *

⁴³⁻⁴⁴ Wuane leai-kola, Jisasato utupane lamawuato, wamba Oli Sipitisa okomane Dapitina nembo-tene mina ika laya ya-kola, balato pii mindi loto, Akali Andane Gote okomane nambana Akali Andane Mesaya oko lamawuato, nambato nimba towa yanda-pene wandakali tupa nimbanda kene pangosa aateakale lokalenga, nimbato nambana kii tikasa-tole pitipe leaipi. Matili Dapitina yame okomane Mesaya oko mandula-kola, bala mee Dapiti yamena mandiyene mindi atolopeya yando, anu peakale Oli Sipitisa okomane Dapitina nembo-tene mina ika laya ya-kola, Dapitito Mesaya oko balana Akali Andane oko ateya leaipi. *

⁴⁵ Dapitito Mesaya oko andayo, bala nambana Akali Andane ateya leaipi-ko. Anu pua, Mesaya oko bala katulo mee Dapiti yamena mandiyene mindi atolo-peyape. Jisasato wuane lea.

⁴⁶ Wuane lea-kola, akali mindikipi mindimane katulo balana pii okone yano napeleai-kola, ole okone angti ato tewa, Juta yame wandakali pitaka-mane pii mindi Jisasanga tipa puyale yuku yai.

23

*Yakamato Mana Koo Utupa Wato Mina
Na-piyapape Leane Oko*

Maki 12:38-40; Luku 11:43,46; 20:45-47

¹⁻² Okone angti, wandakali kambua Jisasana disaipolo tupa towa atu amunguli peai-kola, balato utupane lamawuato, loo tupana mana andene akali tutapi, Patasai tutapi, utupane-mane Mosesana panda

moto, Gotena loo tupamane wua leya lo mana langiaini lea.

³⁻⁴ Utupane-mane mana epene tupa yakama langeyai-kola, yakamato utupanena pii pitaka ale wato, wato minapene tekeko, yakamato utupanena mana koo tupa wato mina na-piyapape. Jia. Akali utupane-mane wandakali tupa mana lamawuato, loo kambua wetete wayumane wato minalapape loto, kenda-pene andane tupa utupanena paiyanenga yata-maiyaini tekeko, yakama tane-mane kenda-pene okonepene tupana aajakopi mindi aimakale lo makande pua ai na-piyaini. Jia. *

⁵ Akali utupane-mane Gotena pii pepa pelene eya minditunga puta andane-yale lapo puato, mindi yakama tanena wenonga yake pua ate lata alu, mindoko yakama tanena kinina kitambu ayu, piyaini. Dee, utupane-mane yakamana tona luu piyaini okona duninga eyaka luu minditunga andi lo tepe aka piyaini. Wandakali waka tupa-mane utupanena mana okonelapo andolai-kola, loo tupana mana andene akalipi, Patasai, utupane-mane Gotena pii wayumane wato minalaini ya lo andeakale nembo toto, utupane-mane mangene okonepene tupa pitaka piyaini. *

⁶ Wandakali kambua-mane tomo andane mindi no peteyai-angi, akali utupane yakama akali kawane pitiyaini toko tupana pitima laka lo nembo talaini. Utupane yakama Juta yamena lotu andaka poto, toko bulupane tupana pituyale epele wete alaini.

⁷ Wandakali waka tupamane utupane andoto, akali andane, nimba ani pelepe lapi laka lo nembo toto, akali utupane-mane wandakali kambua amunguli piyaini ama tupana palaini. Dee, akali utupane yakama gene yene ataima laka lo nembo toto, wandakali-mane yakama andayo tisa lapi laka lo nembo talaini teke.

⁸ Akali utupane-mane wuane piyaini tekeko, yakamana tisa mindiki angu atekiyea-kola, yakama pitaka amene teke-teke ateyai-ko. Wandakali-mane yakama andayo tisa leakale lo yakamato ando konda na-piyapape. Jia.

⁹ Yakamana ayiane mindiki angu bala ati kenga ateyai-ko. Yakamato yuu okona akali mindina gene oko laiyu loyale, ayiane nalalapape. Jia.

¹⁰ Dee, Kataisa bala yakamana akali andane mindiki angu ateyai-ko. Wandakali-mane yakama ando akali andane leakale lo yakamato ando konda na-piyapape. Jia.

* ^{22:39:} Pit 19:18; Mt 7:12 * ^{22:40:} Lom 13:8-10; Ga 5:13-14 * ^{22:41-42:} Jo 7:41-42 * ^{22:43-44:} Sam 11:0; Mt 26:64 * ^{23:3-4:} Mal 2:7-8 * ^{23:5:} Mt 6:1-2; Ek 13:9; Lo 6:8; Nam 15:38-39 * ^{23:11:} Mt 20:26; Mk 9:35; Lk 22:25-27

¹¹ Yakamana akali andane wete atola oko bala yakamana piape akali atape-pene.*

¹² Wandakali mindimane bala tanena gene oko layu leando, Goteto balana gene oko mee gulaya olopeya tekeko, wandakali mindi bala gene nayene gulo ateando, Goteto balana gene oko andane gulaya olopeya. Jisasato wuane lea.*

Goteto Yakama Minu Koyolane, Waiwa Ando Atalapape Leane Oko

Maki 12:38-40; Luku 11:39-52; 20:45-47

¹³ Wuane lalu, Jisasato pii mindi tako pua loto, loo tupana mana andene akali tupapi, Patasai tupapi, yakamato ale alapape lea. Ati kenga ateya Gote okomane yakama moyo ando ateakale lo yakama tane ando konda na-piyaini. Wandakali waka minditupa-mane Gotena pangosa atamakale nembo talaini tekeko, Goteto utupane moyo ando ateakale lo yakamato ando konda na-piyaini. Jia. Yakamato utupane mana kopeta lamawuato, Goteto utupane moyo ando atolane asini oko tuma piyaini. Yakamato wuane piyaini okonena, Goteto yakama minu koyolane. Waiwa ando atalape.

¹⁴ [Loo tupana mana andene akali tupapi, Patasai tupapi, yakamato wanda yalo tupana anda tupa pake moyale utupane minakasa alaini. Yakamato utupane minakasa eyai-kola teke, wandakali waka tupamane yakama akali epene ateyai lo andapihai laka lo nembo toto, yakamato pote andane luu tupa lalaini. Tene okonena, Goteto kenda-perie andane wete mindi yakamanga gulupeya-ko. Balato yakama minu koyolane. Waiwa ando atalapape.]

¹⁵ Wandakali mindi bala yakamana disai polo guleakale nembo toto, yakamato ipa solewata angini andane tupa kalo piyu, yuu tepanda tupana palaini. Poto, yakama asini luu tupana epoko pua atoto, yame waka tupana wandakali mindiki yakamana disai polo gulaya alaini. Bala yakamana disai polo guleya-kola, yakamato bala mo lawa puato, wandakali koo wete mindi gulaya alaini. Loo tupana mana andene akali tupapi, Patasai tupapi, yakamato wandakali tupa minakasa wato, epene gulo atalaini. Tene okonena, yakama tane yuu koo wete okona pupe-pene tekeko, yakamana disai polo okomane yakama sia wete minuto, yuu koo wete okonena wamba kapoyale wete pupe-pene gulo atalane. Yakamato wandakali tupa wuane pua minu koyalaini okonena, Goteto yakama minu koyolane. Waiwa ando atalapape.

¹⁶⁻¹⁷ Minditaka golo-mane waa-pene mindi lotu anda andane okona yalane

yando, okone Gotena gulalane. Tene okonena, lotu anda andane okomane minditaka golo-mane waa-pene tupa sia minuto, angini wete eya. Gotena lotu anda andane oko angini wete eya tekeko, loo tupana mana andene akali tupapi, Patasai tupapi, yakama lee koo gulo atoto, kee wato, wandakali tupa mana lamai-yaini. Yakamato mana lamawuato, wandakali mindimane mangene mindi pukale loto, pii okone mo tai laya wakale nembo toto, balato lotu anda andane oko mawua leyo loto, nambato pii enene wete leyo lapulu, mangene okone napene konda yando, yakamato okone katu lalaini. Wuane tekeko, balato minditaka golo-mane waa-pene lotu anda andane okona yalane tupa mawua leyo loto, nambato pii enene wete leyo leando, wandakali okonemane mangene okone pipe-pene lalaini. Wuane loto, wandakali lee koo tupamane wandakali yangone tupa asini kopeta andawa lalaini pua teke, yakamato mana kopeta lamawuato, yangone tupa asini kopeta andawa lalaini okonena, Goteto yakama minu koyolane. Waiwa ando atalapape.*

¹⁸⁻¹⁹ Dee, wandakali-mane opa mindi Gotena alata toko okona yata yando, opa okone Gotena gulalane. Tene okonena, alata toko okomane opa okone sia minuto, angini wete eya. Alata toko oko angini wete yalane tekeko, loo tupana mana andene akali tupapi, Patasai tupapi, yakamato wandakali tupa mana lamawuato, wandakali mindimane mangene mindi pukale loto, balana pii okone mo tai laya wakale nembo toto, balato alata toko oko mawua leyo loto, nambato pii enene wete leyo leando, balato mangene okone pii napene konda yando, yakamato okone katu lalaini. Wuane tekeko, balato alata toko okonena opa yolane oko mawua leyo loto, nambato pii enene wete leyo leando, balato mangene okone pipe-pene. Yakamato wuane lalaini nembo toto, nambato yakama lee koo gulo ateyai leyo.

²⁰ Wandakali mindimane balana pii mo tai laya wakale nembo toto, alata toko oko mawua leyo loto, nambato pii enene wete leyo leando, alata toko okopi, pitaka taka alata toko okona tokonga yola tupapi, utupane pitaka mawua leyo loto, nambato pii enene wete leyo lola-kola pulupeya.

²¹ Dee, wandakali mindimane lotu anda andane oko mawua leyo loto, nambato pii enene wete leyo leando, balato lotu anda andane okola, anda okonena atalane Gote okola, okonelapo latapaka mawua leyo loto,

nambato pii enene wete leyo lola-kola pulupuya.

²² Ati kenga yuu iyu oko bala Gotena pitiyane toko mindi eya. Tene okonena, wandakali mindimane ati kenga yuu iyu oko mawua leyo loto, nambato pii enene wete leyo leando, balato Gotena pitiyane toko okola, toko okonena pitiyane Gote okola, okonelapo lapotaka mawua leyo loto, nambato enene wete leyo lola-kola pulupuya. *

²³⁻²⁴ Lee koo wandakali tupamane wandakali yangone tupa asia kopeta andawa lalaini pua teke, loo tupana mana andene akali tupapi, Patasai tupapi, yakamoto wandakali yangone tupa minakasa wato, asia kopeta andawa lalaini. Oyo anjako mindi yakamana ipa nolane kapo okona epo peteyakola, yakamoto okone angini mindi ya lo nembo toto, mo apialaini tekeko, yia kamele andane mindi yakamana ipa nolane kapo okona epo peteyakola, yakamoto okone angini mindi jia ya lo nembo toto, ipa towa mee goae lalaini. Anu peakale nambato wuane leyope. Yakamoto Gotena loo andane tupa mee ya lo nembo toto, wandakali yangone tupa ondo naene atoto, utupane wayumane yapa lo tale napiyaini. Yakamoto Gote lo bilipi leyama nayu na-lalaini teke. Yakamoto mana utupane wato mina napene, Gotena loo andane tupa awua tepa alaini tekeko, wandakali waka tupamane andolai-kola, yakamoto Gotena loo kuai lo wato minalaini ya lo andeakale nembo talaini. Wuane nembo toto, yakamana eenga tomo anjako wete yalane tupa yomo paizasanga tale pua yata wato, yakamoto yomo mindi Gote mayaini. Yakamoto wuane puato, Gotena loo andane tupa wato minapiae-yale, yakamana mana okone kuai lapia-yale tekeko, yakamoto wuane na-piyainiko. Goteto yakama minu koyolane. Yakamoto ando atalapape. *

²⁵⁻²⁶ Loo tupana mana andene akali tupapi, Patasai tupapi, yakama tane angu nembo toto, tomopi, ipa tende-penepi, kambua pake gulo moto, yakamana kapo pelesa tupana tumbi laya alaini. Yakamoto wuane piyaini tekeko, wandakali-mane yakamana mana andolai-kola, yakama akali epene ateyai lo andeakale nembo toto, yakamoto utupane andakasa oyale, kapo pelesapi, kengasa wayumane wasa-wasa peyalapape. Patasai yame yakama lee koo gulo atoto, yakamana mana okone koo ya lo anda na-piyaini. Loo tupana mana andene akalipi, Patasaipi, yakamoto wuane na-piyaini okonena, Goteto yakama minu koyolane. Waiwa ando atalapape. Yaka-

mana kapo tupa kengasa kalato ata napene guleakale nembo toto, utupanena anda-pangosa wamba ini wayumane wasa-wasa peyalapape. *

²⁷⁻²⁸ Wandakali omene mindina mali anda-pangosa balana umbaini tamenepi, kulinipi, minditaka kalato atene utupane pitaka tumbi latane yalane. Wuane tekeko, wandakali-mane yangone mindina mali kenga oko ake wete peakale lo pende ake-pene mindimane pende leyai-kola, wandakali waka tupamane mali okonena kengasa angu andoto, mali paiya wete ateya lo andalaini. Wuane pua teke, loo tupana mana andene akali tupapi, Patasai tupapi, yakamoto wandakali tupa minakasa eyai-kola, utupane-mane yakamana umbaini kenga angu andoto, yakama wandakali epene tika-pene ateyai nembo talaini. Utupane-mane wuane nembo talaini tekeko, yakamoto Gotena loo tupa ango alaini okonemane yakamana ini anda-pangosa mana koo tupa tumbi latane atalane-ko. Goteto yakama minu koyolane. Waiwa ando atalapape. *

²⁹⁻³⁰ Wandakali waka tupamane andolai-kola, yakama akali epene ateyai lo andeakale nembo toto, loo tupana mana andene akali tupapi, Patasai tupapi, yakamoto potopesa akali wamba omeaini tupana mali anda epene tupa piyaini. Dee, yakamoto wandakali epene tika-pene wamba omeaini tupana mali tupa yati pimai-yaini teke. Wuane puato, yakamoto wandakali tupa minakasa oyale, pii mindi loto, wamba nanimana yumbane tupa atea-angi, nanima utupane towa atu atema-yale, utupane-mane potopesa akali tupa peyo ome leakale lo, nanimato utupane moyo napema-yale lalaini okonena, Goteto yakama minu koyolane. Waiwa ando atalapape.

³¹ Yakamoto wuane lalaini okonemane yakama tane potopesa akali tupa peyo ome leaini akali utupanena mandiyene yame ateyama loto, mo pana alaini-ko. *

³² Yakamana yumbane tupamane koo pua ateaini pua teke, yakamatopi koo puato, utupanena piape koo tupa pikoyo piyapape.

³³⁻³⁶ Wamba bulupane tewa, yakamana yumbane mindimane akali epene tika-pene Epolo lene oko peyo ome leapi. Okone ang i tewa, yakamana yumbane tupamane akali epene tika-pene kambua peyo ome laka peainipia. Koyonga, akali Betekayana iwanane Sakataya bala lotu anda andane okola, Gotena alata toko okola, okone-lapona tombenenga atea-kola,

* ^{23:22:} Ais 66:1; Mt 5:34 * ^{23:23-24:} Pit 27:30; Mai 6:8

* ^{23:25-26:} Mk 7:1-4 * ^{23:27-28:} Lk 16:15; Ap 23:3

* ^{23:31:} Ap 7:52-53

24

*Lotu Anda Andane Oko Keao Lo Minu
Koyolo-peyai Leane Oko
Maki 13:1-2; Luku 21:5-6*

¹ Jisasa bala lotu anda andane ende okona kamaka poto, mindisa moyale pea-kola, balana disaipolo tupamanepo, lotu anda andane ateyai okona anda waka pua kimbu pitane ateyai tupa anda-kae leai.

² Wuane leai-kola, Jisasato utupane lamawuato, andipa yakamato anda epene wete ana-manepitane ateyai utupane pitaka andeyai tekeko, nambato pii enene mindi yakama langeyo. Matili akali minditupa epoto, anda utupana ana mindikipi mindi balana ana yangone tokonga yakale lo ando konda na-olopeyai. Jia wete. Utupanemanne ana utupane pitaka keao loto, yuunga tepa ayiakelaya olopeyai lea. *

Kenda-pene Kambua Epolopeya Leane Oko

Maki 13:3-13; Luku 21:7-19

³ Matili, Jisasa bala angu Olipi wangiane okona petea-kola, balana disaipolo tupa yakama angu bala peteanga epeai. Epoto, utupane-mane bala tipa puato, andoko angi akali minditupa-mane lotu anda andane oko minu koyolo-peyai leai. Mangene anu-pene mindi wamba ini bulupane pula-kola, nanimato andoto, nimba dee lapone epoyale pele lo andolo-peyamape. Dee, mangene anu-pene tupa pula-kola, nanimato andoto, andipa yuu oko koyo puyale peya lo andolo-peyamape. Nimbato nima langi leai.

⁴⁻⁵ Wuane leai-kola, Jisasato utupanena pii okone yano peyoto, matili akali kambua mindiki-mindiki lo yale-yale ipuku puato, namba Mesaya oko epeyo loto, wandakali kambua minakasa olopeyai-ko. Akali mindimane namba Mesaya oko epeyo loto, yakama minakasa olaini. Waiwa ando alatapape. *

⁶⁻⁷ Matili wandakali yame mindimane wandakali yame waka mindi yanda pimaulai-kola, tili-tula lo atola tupa yakamato ale olopeyai. Dee, yuu andane wete mindina tane wandakali tupamanepu yuu andane wete waka mindina tane wandakali tupa yanda pimaulai-kola, wandakali utupane-mane yanda andane mindi pua ateyai lene oko yakamato ale olopeyai. Wandakali utupane-mane wuane pipe-pene guleya tekeko, okone angi teke yuu oko wamba kapoyale koyo napulupeyako. Wandakali-mane yanda pua atolai-angi, yakamato okone ale wato, nembo kambua toto, yuku aa na-piyapape.

utupane-mane bala peyo ome leainipia. Yuu pitakana wandakali epene tika-pene tupa omeaini okona tene oko Juta yame akali andipa ateyai tupa yakamanga yakale nembo toto, nambato potopesa akalipi, akali wai-enepi, loo tupana mana andene akalipi, utupanena minditupa yakama atolaina epeakale lolo-peyawa. Utupane epolai-kola, yakamato utupanena minditupa ita malamanda okona peyo yuka alu, waka minditupa mee peyo ome lolopeyai. Dee, akali utupanena minditupa yakamana lotu anda tupana atolai-kola, yakamato utupane kunju-manepoyolo-peyai. Wandakali utupane tano waka tupana palaka polai-kola, yakamato utupane watama poto, kenda-pene andane tupa maiki pulupeyai. Mana koo utupane pitakana yole koo oko Goteto wandakali andipa ateyai tupa yakamanga gulupeyalo nambato pii enene oko yakama langeyo. Yakama puya koo tupana mandiyene tupa gulo ateyai okonena, Goteto yakama kosimi loto, yakama yuu koo wetete okona pulupa lo wata ainena lolopeya. Balato wuane pula-angi, yakamato kenda-pene okone peya wanju olane asia mindi nayolopeya. Jisasato wuane lea. *

*Jisasato Jutusaleme Tane Wandakali
Tupa Ondo Yane Oko*

Luku 13:34-35; 19:41-44

³⁷ Okone angi, Jisasato pii mindi tako pua loto, Jutusaleme tane wandakali yakamato potopesa akali tupa peyo ome lalainileaipia. Dee, Goteto balana piape akali minditupa yakama ateyaiangaepeakale laka peya-kola, yakamato utupane ana-manepoyeo ome lalaini. Eka angini mindimane balana andopane tupa papakane pangosa paleakale loto, mo amunguli piyane pua teke, ole kambuangna nambato Jutusaleme tane wandakali yakama namba atewanga mo amunguli piwa laka lo nembo tewa tekeko, yakamato embo yai.

³⁸ Tene okonena, nambato yakama tupa alu polowa-kola, yakamana anda oko mee ukuna atolopeya leyo okone yakamato ale alapape. *

³⁹ Andipa oko angi tewa, nambato yakama tupa alu polowa-kola, yakamato namba anda napene atama pulu, matili yakamato pii mindi loto, Goteto akali epeya oko bala epeakale loto, wayumane moyapia lolopeyai. Yakamato wuane lolai-angi, namba dee lapone andolopeyai. Jisasato wuane lea. *

* 23:33-36: Jen 4:8; 2Tem 24:20-21; Mt 3:7; 12:34; Lk 3:7 * 23:38: 1Ki 9:7-8; Jet 22:5 * 23:39: Sam 118:26 * 24:2:
Lk 19:42-44 * 24:4-5: Mt 24:23-24; 1Jo 2:18

Jia. Okone angi, yuu minditupana ulia nono andane tupa yolopeya. Dee, yuu minditupana yuu titiwalu tupa lolopeya teke.

⁸ Kenda-pene utupane pitaka wanda-mane andopane manduyale wamba ini masia peyalane okonepene gulolo-peya.

⁹ Okone angi, yakama nambana yame atolai mambéle, wandakali yame palu peyai tupa pitaka-mane yakama towa mini koo wete palu atoto, kenda-pene andane tupa yakama gulupeyai. Akali waka minditupa-mane yakama tandaka andane guato, yakama peyo ome leakale nembo toto, wandakali minditupa-mane yakama ene pitulu-peyai.*

¹⁰ Wuane pulai-kola, wandakali kambua-mane namba lo bilipi lalaini mana oko awua tepa alu, namba lo bilipi lene wandakali yangone tupa towa mini koo wete paluto, utupane ene pituto, utupane towa yanda-pene akali tupanga malupeyai.

¹¹ Owato potopesa akali kambua epoto, wandakali kambua minakasa olopeyai.*

¹² Wandakali kambua-mane Gotena loo tupa ango olai-kola, wandakali kambua-mane wandakali yangone towa epelewa yamapane yo atalaini mana okone awua tepa olopeyai.

¹³ Utupane-mane wuane pulupeyai tekeko, wandakali mindimane kenda-pene utupane awua atoto teke, namba lo bilipi lalaini mana oko awua tepa nayando, Goteto bala molo-peke lolopeya.*

¹⁴ Wandakali pitaka-mane Gotena pii epene okone ale yakale nembo toto, wandakali minditupa yuu eya tupa pitakana atoto, ati kenga ateya Gote okomane pitaka taka ando atalane lolopeya. Matili utupane-mane pii okone wandakali tupa pitaka lamai-koyo pulai-angi, yuu oko koyo pulupeyai. Jisasato wuane lea.*

*Kenda-pene Andane Wete Mindi Epolopeya Leane Oko
Maki 13:14-23; Luku 21:20-24*

¹⁵ Pii oko dii lo andolai wandakali yakamato pii nambato andipa pepa peleyo oko wayumane nembo tape-pene. Jisasato pii mindi wamba potopesa akali Daniyele okomane leane okonena taku puu loto, matili wandakali yame waka tupa manane owato gote mindi waa puato, Gotena lotu anda andane epene wete okona ate lolopeyai lea. Goteto andola-kola, owato gote okomane lotu anda andane epene wete okone balana wenonga mo kalato ataya ola-kola pulupeyai. Pepa oko dii lo andolai wandakali yakamato andolai-kola, minditaka

koo wete okone lotu anda andane okona atolanga andolopeyai.*

¹⁶ Yakamato okone andolai-angi, Jutiya disitiki okona atolai wandakali yakama yuu wangiane tupana palaka pupe-pene gulolo-peya.

¹⁷ Palaka pupe-pene gulola-angi, wandakali mindi balana anda okona takita ateando, balana minditaka andaka yolane tupa mokale nembo toto, anda-pango kolandaka nalene, mee palaka pupe-pene gulolo-peya.*

¹⁸ Dee, wandakali mindi bala eenga ateando, balana tona kenga piyane oko moyale, andaka peke nalene, mee palaka pupe-pene teke.

¹⁹ Okone angi, wanda andopane ininga piti-pata tupapi, wanda andopane andu no atene tupapi, utupane palaka pupe-pene pitete wato, ondo wete ape-pene gulo pitulu-peyai.

²⁰⁻²¹ Wamba wetete Goteto yuu ati-la yakale lea-angi tewa, kenda-pene wakawaka kambua yama ipulu, andipa ateyama oto okona giao leya tekeko, kenda-pene epola okonemane utupane pitaka sia minuto, andane wete mindi epolopeya. Kenda-pene andane okonepene mindi matili-matilipi lapone naepolo-peya. Upa wete puato, pipiya peleando, palaka pupe-pene pitete pulupeyai. Sambasa-angi, asia luu pupe-pene jia lene eya-ko. Pipiya peyola-kola yandopi, Sambasa oko epola-kola yandopi, kenda-pene andane okone epolane. Yakamato pote lo atalapape.*

²² Goteto kenda-pene utupane ee ana kambua tupana epeakale lo ando konda yando, wandakali pitaka omolo-peya tekeko, balana yame atekale lata atane wandakali tupa pitaka omolaini nembo toto, Goteto kenda-pene utupane ana ukupini mindilapo angu epeakale lo ando kondolo-peya.

*Akalina Iwanane Bala Panakame Epolopeya Leane Oko
Luku 17:20-25*

²³⁻²⁴ Matili owato Mesayapi, owato potopesa akalipi, utupanena minditupa-mane wandakali tupa minakasa amakale nembo toto, mindiki-mindiki lo yale-yale ipuku pulupeyai. Epoto, Mesaya oko namba epeyo leandopi, potopesa akali enene mindi namba epeyo leandopi, okone-lapona mindi epeyo lo andawa loyale, utupane-mane metekolo piape andane minditupa pulupeyai. Wuane puato, utupane-mane katuloi Gotena yame atekale lata atane wandakali tupapi

* 24:9: Mt 10:22 * 24:11: Mt 24:4-5,23-24; 1Jo 4:1-3 * 24:13: Mt 10:22 * 24:14: Mt 28:19 * 24:15: Dan 9:27;
11:31; 12:11 * 24:17: Lk 17:31-32 * 24:20-21: Dan 12:1

minakasa olopeyai pia-yale, utupane-mane wuane pulupeyai. Tene okonena, wandakali mindimane yakama languato, Mesaya oko bala onga ateya oko andalapa leandopi, dee bala amokusa ateya oko andalapa leandopi, akali okonemanene enene leya lo yakamoto nembo na-talapape. Jia. *

²⁵ Ale alapape. Matili wandakali minditupa-mane wuane pulupeyai lo nambato yakama wamba ini langeyo okoni.

²⁶⁻²⁷ Ati tapale oko nai epalanesa ato tewa, tii pima pulu, nai andaka palane ukusane puapo peya-kola, wandakali pitaka-mane katulo ati tapale okone andalaini pua teke, matili Akalina Iwanane oko panakame epola-kola, wandakali pitaka-mane katulo bala epola oko andolopeya. Tene okonena, wandakali-mane yakama languato, Akalina Iwanane oko bala wandakali napalene yuu okona epo ateya leaindo, yakamoto bala andamakale nembo toto, yuu okonena puu na-piyapape. Dee, utupane-mane bala anda mindina epo peteaya leaindo, utupane-mane enene leyai lo yakamoto nembo na-talapape. *

²⁸ Minditaka omene mindi yolanga, eka aiyawee tupa amunguli pulai-kola, yakamoto andolopeyai. Jisasato wuane lea. *

Akalina Iwanane Balana Wandakali Tupa Lamolo Epolopeya Leane Oko
Maki 13:24-27; Luku 21:25-28

²⁹ Wuane lalu, Jisasato pii mindi tako pua loto, kenda-pene andane utupane epo koyo pula-kola, Goteto iyu okona minditaka tai ateya tupa mo ema-ema piya ola-kola, nai, ana-la, lapotaka undupi lalu, atinga kaiyanda ateya tupa yuunga ondo tepa aka pulupeyai. *

³⁰ Wuane pula-angi, Akalina Iwanane oko epeyo lo andawa loyale ati kenga iyu okona minditaka mo pana ola-kola, yuu okona wandakali palu pula tupa pitaka-mane okone andoto, ai lolopeyai. Utupane-mane andolai-kola, Akalina Iwanane oko bala ati kenga tawe mole tupana tokonga atoto, balana tai-lene andane okopi, tii-pene andane okopi, okonelapo towa epolopeya. *

³¹ Okone angi, biakulu mindi taimane wete peyola-kola, Akalina Iwanane okomane balana enjole tupa lamawuato, yakamoto nambana yame ateakale lata atané wandakali tupa lamolo pulupa lolopeyai. Wuane lola-kola, enjole utupane-mane yuu tupa pitakana poto, Gotena

* **24:23-24:** Lo 13:1-3; 2Tes 2:8-10; Lap 13:13-14; Mt 24:4-5

* **24:29:** Ais 13:10; 34:4; Ese 32:7; Jol 2:10,31; 2Pi 3:10; Lap 6:12-13

1Ko 15:51-53; 1Tes 4:15-16 * **24:34:** Mt 16:28 * **24:35:** Mt 5:18

* **24:39:** Jen 7:21-23

wandakali utupane pitaka lamo atu epolopeyai. Jisasato wuane lea. *

Ita Piki Tupa Andoto, Mana Mialapape Leane Oko

Maki 13:28-31; Luku 21:29-33

³² Wuane lalu, Jisasato pii kokoli mindi loto, yakamoto ita piki tupa andoto, mana mialapape lea. Ita piki tupana kembonenga ipane epo peteaya-kola, yokone wenene tupa kome piyane. Yakamoto yokone utupane andoto, panyu puyale peya lo andalaini.

³³ Wuane pua teke, matili mangene minditupa wamba ini pulupeya leyo tupa pulangsi, yakamoto mangene utupane pitaka andoto, Akalina Iwanane oko bala mandaka epoto, asia lombanga atalua nembo talapape.

³⁴ Nambato pii enene mindi yakama langeyo. Wandakali yame andipa ateyai tupa pitaka oma yiake nalolai-kola, mangene utupane pitaka pulupeya. *

³⁵ Matili yuu ati-la alu pulupeya tekeko, matili-matilipi nambana pii oko alu napulu-peya. Jisasato wuane lea. *

Makande Pitawa Atalapape Leane Oko
Maki 13:32-37; Luku 17:26-30,34-36

³⁶ Wuane lalu, Jisasato pii mindi tako pua loto, mangene minditupa pulupeya lalo utupane oto andokona pulu-peyape, taeme andokona pulu-peyape lo wandakali mindikipi mindimane nembo nateya lea. Ati kenga enjole ateyai tupapi, Akalina Iwanane okopi, utupane-mane nembo nateyai teke. Jia. Ayiane okomane angu nembo teya. *

³⁷ Wamba akali Nowa atea-angi, Goteto mangene andane mindi peane pua teke, matili Akalina Iwanane oko epola-angi, Goteto mangene andane mindi pulupeyai. *

³⁸ Nowa ateane okone angi, ipa andane wetete oko wamba ika laa napenenga, wandakali-mane Gote masia mawua ateaninipia. Gote masia mawua atoto, akali-mane wanda kee laka, wanda-mane akali puku, wandakali-mane tomo ipapi naka, piki pua atama pulu, Nowa bala sipi andane wete okona kolandaka leane oto okona giao leainipia.

³⁹ Nowa bala sipi andane wete okona kolandaka leane-angi, Goteto mangene andane mindi pulupeya lo wandakali utupane-mane nembo nateaini tekeko, ipa andane wetete mindi yuungapi, atingapi, lapotakanga ika loto, utupane pitaka peyo pulu peapia. Wuane pua teke, matili

* **24:26-27:** Mt 24:37-39; Lk 17:23-24 * **24:28:** Lk 17:37

* **24:30:** Sak 12:10; Lap 1:7; Dan 7:13 * **24:31:**

1Ko 15:51-53; 1Tes 4:15-16 * **24:36:** Ap 1:7; 1Tes 5:1-2 * **24:37:** Jen 6:5-8

Goteto mangene andane mindi pulupeya nembo natene, wandakali-mane ole dindi lo mana minalaini tupa minu atolai-kola, Akalina Iwanane oko bala epolopeya. *

⁴⁰ Bala epola-angi, akali lapo eenga atolapi-kola, balana enjole tupamane mindi lamialu, mindoko atekale kondolopeya.

⁴¹ Dee, wanda lapo palawa waa puyale witi dini taki lo pitulapi-kola, balana enjole tupamane mindi lamialu, mindoko pe-tekale kondolo-peya.

⁴² Yakamana Akali Andane okone andoko angi epoto, wuane pulupeya lo yakamoto nembo nateyai-ko. Yakamoto lee too ando atalapape. *

⁴³ Anda anduane mindimane andolakola, pake nene akali mindi utulu oko angi epolopeya lo wamba ini andapia-yale, pake nene akali okonemane balana anda okone keao lolane lo bala tane andatawa atapia-yale lo yakamoto nembo talapape. *

⁴⁴ Wuane pua teke, yakamoto Akalina Iwanane oko naepolo-peya nembo tolai-angi, bala epolo-peyako. Bala epolopeya nembo toto, yakamoto makande pitawa atalapape. Jisasato wuane lea.

Piape Akali Koo, Epene-la Okone-lapona Pii Kokoli Oko

Luku 12:42-46

⁴⁵ Wuane lalu, Jisasato pii minditupa tako puu loto, piape akali mindimane wai-ene atoto, ole dindi lo piape kuai lo piyane yando, balana akali andane okomane bala lamawuato, nimbana piape akali yangone tupa ando atoto, ole dindi lo tomo nolane taeme oko epola-angi, utupanena tomo tale puu maipe lolopeya.

⁴⁶ Piape akali okonemane piape kuai lo puu ateando, matili balana akali andane oko peke loto, minditaka epene tupa bala maula-kola, piape akali okone bala epele wete olopeya.

⁴⁷ Akali andane okonemane piape akali epene okone lamawuato, nimbato nimbana minditaka eya tupa pitaka ando atape lolopeya lo nambato pii enene mindi yakama langeyo. *

⁴⁸ Wuane pulupeya tekeko, piape akali okone bala akali koo mindi ateando, balato akali andane oko wamba ini peke nalolopeya nembo tolopeya.

⁴⁹ Wuane nembo toto, balana piape akali yangone tupa minu peyaka puato, bia ipa tai no kewa atalaini akali tupa towa atu tomo ipa ima nolopeya.

⁵⁰⁻⁵¹ Oto mindina balana akali andane oko naepolo-peya nembo toto, piape akali

okonemane mandeke napene atolopeya. Okone angi teke, balana akali andane oko epoto, piape akali okone wete minu koyoto, minakasa alaini wandakali tupa towa atekale lolopeya. Wuane lola-kola, piape akali koo okone bala yuu koo okonema atoto, yamataka lo nene geleto laka pua atolopeya. Jisasato wuane lea.

25

Wana Mapokae Paiyasa Tupa

¹ Wuane lalu, Jisasato pii kokoli mindi tako pua loto, wana mapokae paiyasa-mane wanda kee lolane akali mindi asininga malanda olo makale nembo toto, yakamana lamu tupa kaiyu awua poto, bala epeakale lo maliyo peteainipia. Wuane pua teke, matili Akalina Iwanane okomane wandakali tupa moyo ando atokale nembo toto, bala dee lapone epolopeya oto oko wandakali minditupamane maliyo atolopeyai. *

²⁻⁴ Wana mapokae paiyasa utupanena yau yangisa tupa yakama wai-ene pituto, katasini minditupa pene mindina ambu pete loto, lamu tupa towa awua peainipia. Utupane-mane wuane peaini tekeko, wana mapokae yau yangisa tupa yakama wai naene pituto, katasini minditupa pene mindina ambu pete lo awua naepene, yakama lamu tupana angu peteakale loto, awua peainipia.

⁵ Wana mapokae paiyasa tupamane wanda kee lolane akali okone epeakale lo maliyo peteaini tekeko, bala ini naepeakola, utupane pitaka limu wato, palu ateainipia.

⁶ Limu palu ateai-kola, utulu tombe wete okona mindimane ee loto, wanda kee lolane akali oko bala epeya-ko. Yakama bala maula olo pulupa leaipia.

⁷ Wuane lea-kola, wana mapokae utupane pitaka ika loto, yakamana lamu tupa mo mandeke peainipia.

⁸ Yakamana lamu tupa mandeke puato, wana wai naene tupamane wana wai-ene tupa lamawuato, nanimana lamu tupana katasini koyo puyale peyako. Yakamoto katasini minditupa nanima giyapa leainipia.

⁹ Wuane leai-kola, wana wai-ene tupamane utupanena pii okone yano peyoto, katasini utupa-mane nanimana lamu tupa, yakamana lamu tupa, pitaka katulo tumbi nalolo-peya yako. Yakama tane sisoa anda tupana poto, katasini minditupa kambalapa leainipia.

¹⁰ Wuane leai-kola, wana wai naene utupane yakama katasini kambolo peainipia.

* 24:42: Mt 25:13 * 24:43: Lk 12:39-40; Lap 16:15-16

* 24:47: Mt 25:21,23 * 25:1: Lap 19:7-8; Lk 12:35-38

Peai-kola, wanda kee lolane akali okone bala epoto, wana mapokae yau yangisa makande pitawa peteaini utupane towa atu peainipia. Poto, wanda kee lolane tomo andane yango yaini anda okona anda-pango kolandaka leai-kola, wanda kee lolane akali okomane anda okonena asia pii leaipia.

¹¹ Matili wana mapokae yau wamba mandeke napene peteaini utupane epoto, wanda kee lolane akali okone lamawuato, akali andane, akali andane, nanima andaka ipumakale, nimbato asia lumba leainipia. *

¹² Utupane-mane wuane leaini tekeko, balato utupanena pii okone yano peyoto, nambato pii enene mindi yakama langeyo. Nambato yakama anda na-peyawane leaipia. *

¹³ Wuane pua teke, Akalina Iwanane oko bala dee lapone epolane oto okopi, taeme okopi, okonelapo yakamato nembo nateyai-ko. Bala epolopeya nembo toto, yakamato makande pitawa atalapape. Jisasato wuane lea. *

Muni Ando Ateakale Leane Okona Pii Kokoli Oko

Luku 19:11-27

¹⁴ Wuane lalu, Jisasato pii kokoli mindi tako puato, akali mindimane yuu tepanda mindisa pokale nembo toto, balana piape akali tupa epeakale leane leaipia. Balato utupane epeakale loto, utupane-mane balana minditaka yane tupana minditupa ando ateakale lo tale pua mayaepia. Wuane pua teke, Akalina Iwanane okomane wandalaki tupa moyo ando atokale nembo toto, utupane-mane balana minditaka yane tupa ando ateakale lo tale pua mayane.

¹⁵ Yuu tepanda mindisa moyale peane akali okonemane balana piape akali mindiki-mindiki lo katulo piape oko-tuma pulupeya nembo toto, piape akali mindi (5,000) paepe tausene kina maiyu, akali mindi (2,000) tu tausene kina maiyu, akali mindi (1,000) wane tausene kina maiyu, bala yuu tepanda okonena peaipia. *

¹⁶ Pea-kola, (5,000) paepe tausene kina meane akali okomane wamba kapoyale bisanisa piape puato, (5,000) paepe tausene kina teke tako pua meaipia.

¹⁷ Wuane pua teke, (2,000) tu tausene kina meane akali okomane bisanisa piape puato, (2,000) tu tausene kina teke tako pua meaipia.

¹⁸ Akali okonelapo-mane wuane peaiple tekeko, (1,000) wane tausene kina angu meane akali okonemane poto, yuli mindi tomboto, balana akali andane okona muni meane tupa mali peaipia.

¹⁹ Matili ana kambua pea-kola, piape akali utupanena akali andane oko bala peke loto, utupane mindiki-mindiki lo tipa puato, nimbato potopisa muni aki-tupi meepe leaipia.

²⁰ Wuane lea-kola, (5,000) paepe tausene kina meane akali okomane potopisa muni (5,000) paepe tausene kina teke tako pua meane oko awua epoto, akali andane, nimbato (5,000) paepe tausene kina namba gee okonemane nambato bisanisa piape puato, (5,000) paepe tausene kina teke tako pua mewane oko anda leaipia.

²¹ Wuane lea-kola, balana akali andane okomane bala lamawuato, nimba piape akali epene atoto, nambana piape kuai lo wete pingene ya leaipia. Nimbato nambana minditaka ajalapo tupa kuai lo ando atapini okonena, nimbato nambana minditaka kambua tupa ando atola lokale. Nimba namba towa atu epelewa atapakale ipu leaipia. *

²² Wuane pua teke, (2,000) tu tausene kina meane akali oko epoto, akali andane, nimbato (2,000) tu tausene kina namba gee okonemane nambato bisanisa piape puato, 2,000 kina teke tako pua mewane oko anda leaipia.

²³ Wuane lea-kola, balana akali andane okomane bala lamawuato, nimba piape akali epene atoto, nambana piape kuai lo wete pingene ya leaipia. Nimbato nambana minditaka ajalapo tupa kuai lo ando atapini okonena, nimbato nambana minditaka kambua tupa ando atola lokale. Nimba namba towa atu epelewa atapakale ipu leaipia.

²⁴ Wuane lea-kola, (1,000) wane tausene kina meane akali oko balapi epoto, bala lamawuato, akali andane, wandalaki waka tupamane ee mindi yandeyai-kola, nimbato utupanena tomo tikayu mandalini leaipia. Dee, wandalaki waka tupamane tomo waini papaka leyai-kola, nimbato utupanena tomo tikayu mandalini. Nimbato wuane pilini okonena, nimba tane angu nembo toto, nimbato kenda-pene tupa wandalaki waka tupa mailini lo nambato andeyawane.

²⁵ Tene okonena, namba yuku wato, nimbana muni tupa too puato, yuli mindi tombalu, mali pewa. Nimbana muni tupa oo eya oko anda leaipia.

²⁶ Wuane lea-kola, balana akali andane okomane balana pii okone yano peyoto, nimba piape akali koo kepa-ene ya leaipia. Wandalaki waka tupamane ee mindi yandeyai-kola, nimbato utupanena tomo tikayu mandiyane lo nimbato andalenepi.

Wandakali waka tupamane tomo waini papaka leyai-kola, nambato utupanena tomo tupa tikayu mandiyane lo nimbato andalenepa.

²⁷ Wuane yando, nimbato nambana muni tupa potopisa mandeakale loto, benje mindina yata ee-yale, namba peke loto, nambana muni utupana potopisa minditupa towa miauwa-yale leaipia.

²⁸⁻²⁹ Wuane lalu, akali andane okonemane balana piape akali waka tupa lamawuato, minditaka kambua nayene wandakali okona minditaka ajanlapo yolane tupa nambato molo-peke lokale tekeko, minditaka kambua yene wandakali tupanga nimbato minditupa konda pua maluwa-kola, utupanenga minditaka kambua wete yloopeya leaipia. Nambana piape akali koo okomane piape kuai lo napiapia-ko. (1,000) wane tausene meane balato awua ateya oko yakamato moto, (10,000) tene tausene kina awua ateya akali okonenga mayapa. *

³⁰ Maiyu, yakamato piape akali koo oko bala yuu koo undipi-lene okona awua aindaka lalapa. Bala yuu koo okonena atoto, yamataka lo nene geleto laka pua atolopeya. Akali andane okonemane wuane leane lo Jisasato lea. *

Wandakali Pitaka Yapa Lo Tale Pulupeya Leane Oko

³¹ Wuane lalu, Jisasato pii minditupa tako pua loto, matili Akalina Iwanane oko balana tai-lene oko towa epoto, bala akali andane kinji atolopeya lea. Balana enjole tupa pitaka towa atu epoto, bala kinji pitiyanе toko epene wete mindina pitulu-peya. *

³² Pitula-kola, balana enjole tupamane wandakali yame palu peyai tupa pitaka balana wenonga mo amunguli pulupeyai. Amunguli pulai-kola, sipisipi, meme-la, okonelapo lapotaka yatawa atalaini akali tupamane utupane yame lapo ateakale loto, utupane yapa lo tale piyaini pua teke, Akalina Iwanane okomane wandakali tupa pitaka yame lapo ateakale loto, yapa lo tale pulupeya. *

³³ Utupane yapa lo tale puato, balato sipsipi gulene wandakali epene tika-pene atolaini tupa balana kii tikasa-tole ateakale loto, meme gulene wandakali atolaini tupa balana kii koyasa-tole ateakale lolopeya.

³⁴⁻³⁶ Balato wandakali tupa pitaka yapa lo tale pikoyo pula-angi, kinji okomane balana kii tikasa-tole wandakali atolaini tupa lamawuato, namba tomo ipapi nonowa atewa-kola, yakamato tomo ipapi namba

geai lolopeya. Namba akali opene gulo epewa-kola, yakamato namba yatawa paleai. Namba tona jia yo atewa-kola, yakamato tona geai. Namba siki omewa-kola, yakamato namba moyai. Namba katapusa atewa-kola, yakamato namba andolo epeai. Yakamato wuane pulupeyai nembo toto, wamba nambana ayiane okomane yuu ati-la yakale lea-angi, ati kenga yuu epene wetete atolane panda mindi yakamana paluni yakale leane. Andipa yakamato yakamana paluni okone molo ipulupa. Kinji okonemane wuane lolopeya. *

³⁷ Wuane lola-kola, wandakali epene tika-pene tupamane balana pii okone yano peyoto, akali andane, andoko angimimba tomo ipapi nonowa atee-kola, nanimato andoto, tomo ipapi gemape lolopeyai.

³⁸ Andoko angimimba akali opene gulo epee-kola, nanimato andoto, nimba yatawa palemape. Andoko angimimba tomo jia yo atee-kola, nanimato tona gemape.

³⁹ Dee, andoko angimimba siki omekolapi, katapusa atee-kolapi, nanimato nimba andolo epemape lolopeyai.

⁴⁰ Wuane lolai-kola, kinji okonemane utupane lamawuato, nimbato pii enene mindi yakama langeyo. Wamba yakamato nambana wandakali yangone gene nayene wete utupanena mindi moyai okomane yakamato namba moyai-kola peai lolopeya. *

⁴¹⁻⁴³ Wuane lalu, kinji okomane balana kii koyasa atolaini wandakali utupane lamawuato, wamba namba tomo ipapi nonowa atewa-kola, yakamato tomo ipapi gii naapeai lolopeya. Namba akali opene gulo epewa-kola, yakamato namba yatawa napaleai. Namba tona jia yo atewa-kola, yakamato tona gii naapeai. Namba siki omewa-kola, yakamato namba moyai naapeai. Dee, namba katapusa atewa-kola, yakamato namba andolo naapeai. Wamba Goteto Satanepi, balana enjole koo tupapi, utupane ita too atapowa atene yuu koo okona peakale lo makande pua yata yane. Wandakali nambana kii koyasa ateyai tupa yakamato namba moyai naapeaini okonena, Goteto kenda-pene andane wete mindi yakamanga epeakale leya-ko. Yakama namba tepa alu, yuu koo wete okonena pulupa. Kinji okonemane wuane lolopeya. *

⁴⁴ Wuane lola-kola, utupane-mane balana pii okone yano peyoto, Akali andane, andoko angimimba opene gulo epee-kola, nanimato nimba yatawa pali napemape lolopeyai. Andoko angimimba tomo ipapi, tonapi, utupane jia yo atee-kola, nanimato

* **25:28-29:** Mt 13:11-12; Mk 4:24-25; Lk 8:18 * **25:30:** Mt 8:12; Lk 13:23-28 * **25:31:** Mt 16:27; 19:28 * **25:32:** Ese 34:17; Lap 20:11-13 * **25:34-36:** Ais 58:7 * **25:40:** Man 19:17; Mt 10:42; Mk 9:41 * **25:41-43:** Mt 7:23

gi napemape. Andoko angi nimba siki omee-kolapi, katapusa atee-kolapi, nanimato nimba andolo na-epemape lolopeyai.

⁴⁵ Wuane lolai-kola, kinji okonemanet utupane lamawuato, yakamato wandakali gene nayene wete tupa moya napeai okonemanet yakamato namba moya napeai-kola teke pea lo nambato pii enene mindi yakama langeyo lolopeya.

⁴⁶ Wuane lalu, Goteto wandakali utupane yole koo wetete mindi maula-kola, wandakali utupane yakama yuu koo okona poto, tandaka andane wete no atapowa atolopeyai tekeko, wandakali epene tika-pene tupa saka atapowa atolopeyai. Jisasato atu wuane lea. *

26

*Jisasa Peyo Ome Lamakale Leaini Oko
Maki 14:1-2; Luku 22:1-2; Jone 11:45-53*

¹⁻² Jisasato pii manapi utupane pitaka lamai koyo piyu, balana disaipolo tupa lamawuato, ole lapo angu pola-kola, Pasopa tomo nolane oto andane oko epolopeya lo yakamato nembo teyai. Ole okone angi, gapomane okomane Akalina Iwanane oko ita malamanda okona peyo yuka yakale loto, bala towa yanda-pene akali tupamane bala gapomane okona piape akali tupana kinining malupeya lea. *

³ Balato pii okone balana disaipolo tupa lamawua atea-angi, pitisa akali kawane tupapi, Juta yame ando atalaini akali tupapi, utupane yakama pitisa akali kawane Kayapasa lene okona andaka amunguli peainipia.

⁴ Amunguli piyu, utupane-mane pii mindi lo puta puato, nanimato langa-langa puato, Jisasa andi lalu, peyo ome lamakale leainipia.

⁵ Utupane-mane wuane lalu, pii mindi taku pua loto, Pasopa tomo nolane oto andane okona nanimato Jisasa andi loto, peyo ome lemando, wandakali tupamane andoto, nanimoto towa yataka wato, yanda pingulaini. Ole waka mindina, nanimato bala andi loto, peyo ome lamakale leainipia.

*Wanda Mindimane Wele Minditupa
Jisasana Kawanenga Gae Leane Oko
Maki 14:3-9; Jone 12:1-8*

⁶ Matili Jisasa bala Betani tano okona atoto, akali wamba tapa peane Saimone okona andaka petea.

⁷ Jisasa bala akali okonena andaka tomo no petea-kola, wanda mindimane wele tunduma-pene muni andane wete-mane kambalaini mindi awua epea. Wele okone botolo epene wete mindina piti-pata Jisasa

peteanga awua epoto, balato wele okone Jisasana kawanenga gae loto, aiya maya. *

⁸⁻⁹ Wuane pea-kola, Jisasana disaipolo tupamane andoto, yataka wato, wandakali mindimane wele okone kambapia-yale, wanda okonemanet muni kambua mipia-yale. Moto, balato katulo wandakali koo tipia tupa moyapia-yaleko. Anu peakale balato wele okone Jisasana kawanenga gae lo apeyage leai.

¹⁰⁻¹² Wuane leai-kola, Jisasato utupane lamawuato, wandakali tipia tupa ole dindi lo yakama towa atu atolopeyai tekeko, namba ole dindi lo yakama towa atu ata napulu-peyama. Matili wandakali-mane namba mali pulai-angi, wele nambana umbaininga gae loto, mali pulupeyai oko makande pua, wanda okomane mana epene wete oko nambanga miniya-ko. Anu peakale yakamato balanga kenda-pene mindi mayaipe. *

¹³ Matili-matilipi, wandakali minditupa yuu eya tupa pitakana atoto, Gotena pii layene epene oko lamawuato, wanda okona mana okone nembo tolo-peke loto, balato wuane peane lolopeyai lo nambato pii enene mindi yakama langeyo. Jisasato wuane lea.

*Jutasato Jisasa Ene Pitukale Leane Oko
Maki 14:10-11; Luku 22:3-6*

¹⁴ Okone angi, Jisasana disaipolo alesa akali tupana Jutasato Isaka-tiyote lene oko bala pitisa akali kawane tupa ateasinga peaiapia.

¹⁵ Poto, balato utupane tipa puato, nambato Jisasa ene petewando, yakamato aki minditaka namba gulu-peyaipe lea-kola, utupane-mane muni silipa-mane waa-pene paitaya tepo mayainipia. *

¹⁶ Mayai-kola, okone angi ato tewa, Jutasato Jisasa ene pituyale asini mindi aiya peaiapia.

*Pasopa Tomo Nolane Tupa Mandeke
Peapele Oko
Maki 14:16-21; Luku 22:7-13,21-23*

¹⁷ Betesanga yisa napalene nalaini oto bulupane oko epea-kola, disaipolo tupamane Jisasa ateanga epoto, nimba Pasopa tomo tupa nola nanimato aninga makande pipiai lakae lo nembo telepe leai. *

¹⁸ Wuane leai-kola, balato utupane lamawuato, yakamato Jutusaleme poto andolai-kola, akali mindi atolopeya. Yakamato akali okone lamawuato, nanimoto tisa okomane pii mindi loto, nambato mangene mindi pula nayuto, oto Goteto yata yane oko mandaka epeya-kola,

* 25:46: Dan 12:2; Jo 5:29 * 26:1-2: Ek 12:1-27; Mt 20:18

* 26:7: Lk 7:37-38 * 26:10-12: Lo 15:11 * 26:15:

Sak 11:12; Jo 11:56-57 * 26:17: Ek 12:14-20

nambato Pasopa tomo tupa nambana disaipolo tupa towa nimbana andaka namakale lala lo lamai-yapape lea.

¹⁹ Wuane lea-kola, balato leane pua puato, utupane-mane Pasopa tomo tupa makande peainipia.

Jisasato Yakamana Mindimane Namba Ene Pitulu-peya Leane Oko
Maki 14:17-21; Jone 13:21-30

²⁰ Matili nai andaka pea-kola, Jisasato balana disaipolo alesa tupa towa atu tomo no peteai.

²¹ Tomo no pituto, balato utupane lamawuato, nambato pii enene mindi yakama langeyo. Yakamana mindimane namba ene pitulu-peyai lea.

²² Wuane lea-kola, disaipolo tupa yakama yamapanne kenda wete wato, mindiki-mindiki lo Akali Andane, nimbatu namba andayo nalolo-pele yalua laka peai.

²³⁻²⁴ Wuane lea-kola, Jisasato utupanena pii okone yano peyoto, Gotena pii pepa pelene eya mindimane loto, Akalina Iwanane oko bala wua pua omolo-peya layene eya pua omolo-peya tekeko, ene pitula akali oko bala onto wete ape-pene. Angini-mane akali okone mandi napea-yale, katu lapia-yale layene eya. Namba towa disa mindiki okona betesa tanda puato, neyapa akali okomane namba ene pitulu-peyai lea.*

²⁵ Wuane lea-kola, bala ene peteane akali Jutasato bala lamawuato, tisa, nimbatu namba andayo nalolo-pele yalua lea. Wuane lea-kola, Jisasato balana pii okone yano peyoto, nambato nimba andayo leyo lea.

Betesa, Waene-la, Okonelapo Neakale Mayane Oko
Maki 14:22-26; Luku 22:15-20; 1 Kotini 11:23-25

²⁶ Jisasato balana disaipolo tupa towa atu tomo no pituto, betesa mindi moto, Gote wayu pele loto, betesa okone konde lea. Konde loto, balana disaipolo tupa mawuato, oko nambana umbaini oko. Yakamato mo nalapa lea.

²⁷⁻²⁸ Wuane lalu, balato kapo waene petene mindi moto, Gote wayu pele loto, balana disaipolo tupa mawuato, nambana tundupa gae lolowa okomane wandakali kambua tupana koo tupa apolopeya lo nambato pii wenene mindi lo yata eyo-ko lea. Yakama pitaka-mane mo nalapa lea.*

²⁹ Andipa ato tewa, nambato waene oko nanene atama pulu, matili nambana Ayiane okomane wandakali tupa pitaka moyo ando atola-angi, nambato yakama

towa atu waene waka mindi nolo-peyama lo nambato yakama langeyo lea.

³⁰ Wuane lalu, Jisasato utupane towa sojo mindi lalu, Jutusaleme tepa alu, Olipi wangiane okona peai.*

Pita Nimbato Namba Anda Na-peywane Lolopele Leane Oko
Maki 14:27-31; Luku 22:31-34; Jone 13:36-38

³¹ Okone ang, Jisasato balana disaipolo tupa lamawuato, wamba Goteto pii mindi loto, nambato sipisipi yatawa atalane akali oko peyo ome lolowa-kola, sipisipi tupa palaka puu toko lolopeyai lea. Potopesa akali mindimane pii okone pepa peleane pua teke, andipa utulu yakama pitaka-mane nambanga tungi peleyai oko awua tepa alu, palaka puu toko lolopeyai.*

³² Yakamato wuane pulupeyai tekeko, Goteto namba malinga ika laya olangi, namba wamba ini ingane Galili disitiki okona polowa-kola, yakama matili epolopeyai lea.*

³³ Wuane lea-kola, Pitato balana pii okone yano peyoto, akali waka tupa pitaka-mane nimbanga tungi peleyai oko awuu tepa alu, palaka peaindopi, matili-matilipi nambato wuane napulu-peyawa. Jia wete lea.

³⁴ Wuane lea-kola, Jisasato bala lamawuato, nambato pii enene mindi nimba langeyo. Andipa utulu oko ang teke eka pauli maipa mindimane pii wene loloka, ole tepoainga nimbatu wandakali minditupana wenonga atoto, Jisasa anda na-peywane lolopele lea.*

³⁵ Wuane lea-kola, Pitato balana pii okone yano peyoto, namba nimba towa atu omape-pene guleandopi, okone atu tekeko, nambato nimba anda na-peywane nalolo-peyawa. Jia wete lea. Wuane lea-kola, disaipolo waka tupa pitaka-mane wuane teke leai.

Jisasa Bala Gesemani Olipi Wangiane Okona Poto, Pote Leane Oko
Maki 14:32-34; Luku 22:39-46

³⁶ Okone ang, Jisasa balana disaipolo tupa towa atu yuu Gesemani lene okona peai. Pulu, balato utupane lamawuato, namba amonga pote lolo peyo-ko. Yakama onga pitiyapa lea.

³⁷ Wuane lalu, balato Pitapi, Sepiti iwanane lapo okolapopi, utupane bala atu aiyu amonga-yale peai. Pulu, okone ang ato tewa, bala yamapanne kenda andane wete wato, anu puape lo nembo kambua teaiipa.

* 26:23-24: Sam 41:9 * 26:27-28: Ek 24:8; Jet 31:31-34; Sak 9:11; 1Ko 10:14-18 * 26:30: Lk 22:39; Jo 18:1 * 26:31: Jo 16:32; Sak 13:7 * 26:32: Mt 28:7,16 * 26:34: Mt 26:69-75

³⁸ Nembo kambua toto, balato balana disaipolo tupa lamawuato, nambana yampane oko kenda andane wetete peya okomane namba omape-pene gulalua-ko. Anu pulu-peyape lo andamakalenga, yakama onga atalapa leaipia. *

³⁹ Wuane lalu, bala ambinga-yale poto, yuunga tombawua lo pote loto, nambana Ayiane Gote, kapo penenga petene gulo tandaka nambato nape-pene oko peya wanju olane asini mindi yando, nimbato asini okone lumbape. Nimbato wuane pula lo nambato nembo teyo tekeko, nambato nembo teyo pua napene, nimba tane nemblo tele pua pipe leaipia.

⁴⁰ Wuane lalu, bala peke loto andea-kola, balana disaipolo tepo akali utupane limu palu yainga andoto, balato Pita tipa puato, namba pote lo ateyo-kola, yakamoto katulo awa mindiki ando ata napeyaipe leaipia.

⁴¹ Enene, yakamoto ando ataima lakae lo nembo teyai tekeko, yakamana umbaini tai naleya-kola, yakamoto ando ata napene, limu paleyai. Sataneto yakama minu makande pula-kola, yakama yuunga peakolaini. Yakamoto pote lo atalapa leaipia.

⁴² Wuane lalu, balato dee lapone ambinga-yale poto, pote loto, nambana Ayiane, kapo penenga petene gulo tandaka nambato nape-pene oko peya wanju olane asini mindi nayola-kola, nambato tandaka okone nape-pene guleando, nimbato nembo tele pua pipe leaipia.

⁴³ Wuane lalu, Jisasa balana disaipolo tepo akali tupa ateaininga peke loto andea-kola, utupane yakama dee lapone limu wete wato, palu yainga andeaipia.

⁴⁴ Andoto, bala pai pua utupane tega alu poto, pote wamba leane wuane pua teke pote lolo-peke leaipia.

⁴⁵ Pote lokoyo piyu, balana disaipolo tupa ateaininga peke loto, balato utupane tipa puato, yakama mee oto mo limu teke palu ateyaipe leaipia. Akali mindimane Akalina Iwanane ene pitulane oto oko ipupia-kola, koo piyaini akali tupamane namba andi leakale loto, utupanena kininga malupeya.

⁴⁶ Namba ene pitipia akali oko bala wamba mandaka epeya oko andalapa. Nanimato bala malanda olo makale-ko. Ika lalapa leaipia. *

*Jutasato Jisasa Ene Peteane Oko
Maki 14:43-50; Luku 22:47-53; Jone 18:3-*

12

⁴⁷ Jisasato wuane lo atea-kola teke, balana disaipolo alesa tupana akali Jutasata lene oko bala akali kambua wete tupa towa epea. Pitisa akali kawane tupapi,

Juta yame ando atalaini akalipi, utupane-mane akali utupane epeakale leai-kola, utupane-mane kandepa luupi, mulipi, utupane awua epeai.

⁴⁸ Jisasa ene pitukale nembo toto, wamba Jutasato akali utupane lamawuato, nambato akali mindi nunu lolowa oko Jisasa yolopeya-ko. Yakamoto bala minalapape leaipia.

⁴⁹ Wuane lalu, Jutasata bala Jisasa ateanga wamba kapoyale epoto, tisa, utulu wete lalu, bala nunu lea.

⁵⁰ Balato Jisasa nunu leane tekeko, Jisatasato bala lamawuato, amene, nimbato mangene mindi pulu epele oko kapoyale pipe lea. Wuane lea-kola, Jutasata towa atu epeaini akali tupamane epoto, Jisasa minuto, andi leai.

⁵¹ Andi leai-kola, Jisasa towa atu ateaini akali utupanena mindimane balana kandepa luu mandeane oko kilau lo moto, pitisa akali kawane okona piape akali mindina alene yoko takalota tepe yaa. *

⁵² Wuane pea-kola, Jisasato bala laya loto, kandepa moto, yanda pulai akali tupa pitaka kandepa-mane teke omolo-peyalea. Nimbana kandepa okone paliyan andanenga pale lolo-peke laa. *

⁵³ Nimbato nambana ayiane oko lamawuato, enjole yame andane wetete alesa tupamane namba moyolo epeakale laa lauwa-yale, oko angti teke balato enjole utupanepi, dee waka minditupa wete tako puato, yakamoto Jisasa moyolo pulupa lapia-yale oko nimbato nembo natelepe.

⁵⁴ Gotena pii pepa pelene eya mindimane loto, akali utupa-mane mangene koo utupa nambanga pulupeyai layene eya tekeko, enjole kambua-mane namba moyolo epeaindo, Gotena pii okone anu puato, enene gulolo-peyape lea.

⁵⁵ Wuane lalu, Jisasato akali kambua epeaini tupa lamawuato, ole dindi lo nimbato lotu anda andane okona ende anda-pangosa pituto, wandakali tupa mana lamawua atauwa tekeko, okone angti, yakamoto namba andi na-lapai lea. Andipa nimbato minditaka pake neya nembo toto, yakamoto kandepa luupi, mulipi, utupane awua, namba andi lolo epeyaipe. *

⁵⁶ Yakamoto okonetaka awua naepene, mee ipupiai-yale, yakamoto katulo namba andi lapia-yale tekeko, wamba potopesa akali tupamane Gotena pii oko pepa peyoto, yakamoto wuane pulupeyai leanipia. Utupanena pii enene guleakale nembo toto, yakamoto mangene utupa pitaka piyapale lo Goteto ando kondeya lea. Akali epeaini

* 26:38: Jo 12:27 * 26:46: Jo 14:31 * 26:51: Jo 18:26

* 26:52: Jen 9:6; Lap 13:9-10 * 26:55: Lk 19:47; 21:37-38

tupamane Jisasa andi leai-kola, balana di-saipo tupu pitaka-mane bala awua tepe alu, palaka peai.

Juta Yamena Kanjole Okomane Jisasa Kosimi Leaini Oko
Maki 14:53-56; Luku 22:54-55,63-71;
Jone 8:13-14,19-24

⁵⁷ Loo tupana mana andene akali tupapi, Juta yame ando atalaini akali tupapi, utupane pitisa akali kawane Kayapasa okona andaka epo amunguli peai-kola, Jisasa andi leaini akali tupamane bala atu aiyu anda onokena peainipia.

⁵⁸ Utupane-mane Jisasa atu aiyu peai-kola, Pita bala amonga-yale ata iki lama watama peaipia. Akali utupane pitisa akali kawane okona anda ende pitane okona kolandaka leai-kola, akali utupane-mane Jisasanga anu pulu-peyaipe lo andokale nembo toto, Pita balapi kolandaka loto, piape wandakali minditupa towa atu petaipia.

⁵⁹ Pitisa akali kawane tupapi, Juta yame okona kanjole akali waka tupapi, utupane pitaka-mane Jisasa peyo ome lamakale nembo toto, owato wisanisa minditupa aiya peainipia.

⁶⁰⁻⁶¹ Ayia peai-kola, owato wisanisa kam-bua epoto, owato pii loto, Jisasa kosimi leaini tekeko, kanjole akali utupane-mane bala peyo ome lolane tene mindi ando mia napeainipia. Matili owato wisanisa lapo akali epoto, bala kosimi loto, wamba Jisasato pii mindi loto, nimbato katulo Gotena lotu anda andane ateya oko wamba ini lai lalu, ole tepo angu piape puato, pulu-peke lolo-peyawa leane leapilipia. *

⁶² Wuane leapi-kola, pitisa akali kawane oko bala ika loto, Jisasa tipa puato, akali okolapo-mane nimba kosimi loto, koo tene mindi nimbangga yata eyapi tekeko, nim-bato utupanena pii okone yano peyoyale, pii mindikipi mindi laa napele okonde leaipia.

⁶³ Balato wuane leane tekeko, Jisasato balana pii okone yano peyo, pii mindikipi mindi laa napea-kola, pitisa akali kawane okomane bala lamawuato, nimba Gotena Iwanane Mesaya oko atelepe lo nimbato nimba tipa peyo-ko. Nimbara weno min-tu, enene wete, Gote saka ateya okomane andeaya loto, nimbato nanimba langi leaipia.

⁶⁴ Wuane lea-kola, Jisasato bala lamawuato, nimbato wuane lele tekeko, matili yakamato andolai-kola, Akalina Iwanane oko bala Gote tai wetete okona kii tikasato-le pitiyu, ati kenga tawe mole tupana *

tokonga epolanga yakamato andolopeyailo nambato yakama langeyo leaipia. *

⁶⁵ Wuane lea-kola, pitisa akali kawane okomane yataka wato, bala tanena tona peane oko minu liti loto, Juta yamena kanjole akali tupu lamawuato, balato Gote lamba leya-kola, andipa yakamato ale eyai okoni leaipia. Anu peakale wandakali waka mindimane wisanisa atoto, bala tane Mesaya oko ateyo lalane lo nanima langeakale maliyo atamakalepe. *

⁶⁶ Balato Gote lamba leya-ko. Yakamato aki nembo teyaipe leaipia. Wuane lea-kola, Juta yamena akali kanjole tupamane balana pii okone yano peyoto, koo tene andane mindi balanga eya-ko. Bala omape-pene leainipia. *

Jisasa Ando Lamba Leaini Oko
Maki 14:65; Luku 22:63-65

⁶⁷ Wuane lalu, utupane-mane Jisasana lee-inganga apesango soo lo peyalu, kii momanga-mane peyalu, kii apene-mane bala peyalu teke, peainipia. *

⁶⁸ Wuane piyu, utupane-mane bala lamawuato, nimbato Gotena piape pula lo Goteto nimba Mesaya oko atola lata yane yando, nimbato potopesa pii mindi loto, akali okomane namba peleya lo nimbato nanimba langi leainipia.

Pitato Jisasa Anda Na-peyawane Leane Oko

Maki 14:66-72; Luku 22:56-62; Jone 18:15-18,25-27

⁶⁹ Pita bala takita atoto, anda ende pitane okona anda-pangosa petea-kola, piape wanda mindi Pita peteanga epoto, nimbapi Galili disitiki tane Jisasa oko towa atu atapele leaipia.

⁷⁰ Wanda okonemane wuane leane tekeko, wandakali organe peteaini tupa pitakana wenonga atoto, Pitato balana pii okone tanga loto, nimbato aki nembo toto, wuane lelepe lo nimbato nembo nateyo leaipia.

⁷¹ Wuane lalu, bala ende pitane asia lomba okona mandaka poto atea-kola, pi-ape wanda waka mindimane bala andoto, wandakali organe ateaini tupa lamawuato, akali oka bala Nasatesa tano okona tane Jisasa oko towa atu atapia leaipia.

⁷² Wuane lea-kola, Pitato balana pii okonepi tanga lapeke loto, balana weno minuto, nimbato akali okone anda na-peyawane leaipia.

⁷³ Aja matili yale akali organe ateaini tupamane epoto, Pita lamawuato, enene,

* **26:60-61:** Jo 2:19-21 * **26:63:** Ais 53:7; Mt 27:12 * **26:64:** Sam 110:1; Dan 7:13; Mt 24:30 * **26:65:** Mt 9:3; Jo 10:33 * **26:66:** Pit 24:16; Jo 19:7 * **26:67:** Ais 50:6; 53:5

nanimoto nimbana pii ale eyama-kola, nimbana pii okomane nimba Nasatesa tane Jisasana yame mindi atele lo pana alua leainipia.

⁷⁴ Wuane leai-kola, Pitato weno minuto, utupane lamawuato, enene wete, nambato akali okone anda na-peyawane. Goteto andeya. Pii leyo oko owato pii mindi lewae yando, balato namba minu koyakale leaipia. Wuane lea-kola, okone angi teke eka pauli maipa mindimane pii leaipia.

⁷⁵ Pauli okonemane pii lea-kola, wamba Jisasato pii mindi loto, matili eka pauli maipa mindimane pii wene loyale pulakola, ole tepoinga nimbato wandakali minditupana wenonga atoto, nambato Jisasa anda na-peyawane lolopele leane okone Pitato nembo tolo-peke loto, bala ende kamaka poto, ai lo yamataka leaipia.
*

27

Pailate Ateanga Jisasa Atu Aiyu Peaini Oko

Maki 15:1; Luku 23:1-2; Jone 18:28-32

¹ Yuu waa lea-kola, upa pitane wete pitisa akali kawane tupapi, Juta yame ando atalaini akali tupapi, utupane pitaka-mane Jisasa omeakale loto, pii lo puta peainipia.

² Pii okone lo puta piyu, utupane-mane bala eyaka-mane andi lo awua, Lomo gapomane akali andane Pailate oko ateanga atu aiyu poto, balanga mayainipia.

Jutasa Omeane Oko

Aposolo 1:15-19

³⁻⁴ Juta yame-mane Jisasa omeakale lea-kola, Jisasa ene peteane akali Jutasa okomane ale wato, mini kenda wete yaepia. Mini kenda wato, balato muni paiyasa tempo silipa-mane waa-pene wamba meane tupu mandu poto, pitisa akali kawane tupapi, Juta yame ando atalaini akali tupapi, utupane atevinga peaipia. Poto, balato utupane lamawuato, wamba Jisasato koo mindikipi mindi naapeane tekeko, nambato mana koo wete mindi minuto, bala ene pitiwa-kola, bala omolo-peya leaipia. Balato wuane leane tekeko, utupane-mane okone nanimoto piape jia. Okone nimbana piape leainipia.

⁵ Wuane leai-kola, Jutasato muni silipa-mane waa-pene tupu lotu anda andane okona anda-pangosa peya andaka lalu, akali utupane tepa alu poto, bala tane nongo nalu, omeaipia.*

⁶ Jutasa omea-kola, pitisa akali kawane tupamane muni silipa-mane waa-pene utupane moto, akali mindi peyo ome lamakale loto, nanimoto muni utupa

bala maima-ko leainipia. Nanimana loo okomane loto, muni okopene tupa lotu anda andane okona muni waka tupa towa mina mindiki lolaini leya leainipia.

⁷ Wuane lalu, akali utupane-mane wandakali opene omolai tupa mali pulane yuu mindi yakale nembo toto, pii mindi lo puta puato, sisopene yuu-mane waa piyane akali mindina yuu mindi muni utupane-mane kambeainipia.

⁸ Akali mindi peyo ome lamakale loto, muni mayaini okonemane yuu oko kambeaini okonena, utupane-mane yuu okonena gene tundupa yuu leai-kola, andipapi wandakali-mane yuu okonena gene mindiki okone teke leyai.

⁹⁻¹⁰ Wamba potopesa akali Jetemayato pii mindi loto, Isatale tane tupamane pii mindi lo puta puato, akali mindimane akali oko peyo ome leando, nanimoto muni paiyasa tempo silipa-mane waa-pene maimakale leainipia. Wuane lalu, Akali Andane okomane yuu mindi kambape lo namba langeane pua, matili utupane-mane muni utupane moto, yuu-mane sisopene waa piyane akali okona yuu oko kambeaini layene eya. Pitisa akali kawane tupamane muni silipa-mane waa-pene utupane moto, yuu mindi kambeaini okonemane pii wamba potopesa akali Jetemayato leane okone enene gulaya yaepia.*

Pailate Wenonga Juta Yame-mane Jisasa Kosimi Leaini Oko

Maki 15:2-5; Luku 23:3-5; Jone 18:33-38

¹¹ Jisasa bala Lomo gapomane akali andane Pailate okona wenonga atea-kola, Pailateto bala tipa puato, nimba Juta yamena kinji okope leaipia. Wuane lea-kola, Jisasato balana pii okone yano peyoto, nimba tane wuane lele okoni leaipia.

¹² Wuane lea-kola, pitisa akali kawane tupapi, Juta yame ando atalaini akali tupapi, utupane-mane bala kosimi loto, pii kambua leaini tekeko, balato utupanena pii utupane yano peyoyale, pii mindikipi mindi lapeke naleaipia.*

¹³ Lapeke nalea-kola, Pailateto bala tipa puato, utupane-mane nimba kosimi loto, pii kambua leyai utupane nimbato ale naelepe leaipia.

¹⁴ Balato wuane leane tekeko, Jisatasato balana pii okone yano peyoyale, pii mindikipi mindi nalea-kola, Pailateto moko wete loto, nembo kambua teaipia.

Pailateto Jisasa Ita Malamanda Okona Peyo Yuka Alapa Leane Oko

Maki 15:6-15; Luku 23:13-25; Jone 18:38-19:17

* 26:75: Mt 26:34

* 27:5: Ap 1:15-19; Mt 26:14-15

* 27:9-10: Sak 11:12-13

* 27:12: Ais 53:7

¹⁵ Mali dindi lo Pasopa tomo nalaini oto oko epeya-angi, Juta yame-mane akali katapusa atalaini tupana mindiki makimi loto, Pailate nimbato akali oko tita lo tepa ape leyai-kola, balato akali okone tita lo tepa alaepia.

¹⁶⁻¹⁹ Balato pai pua akali mindi tita lo tepa olane oto okone epea-angi, wandakali tupa bala ateanga amunguli peai-kola, Pailate bala kote alewa pitiyane sia toko okona peteapia. Petea-kola, balana wetene okomane pepa mindi peyo epe loto, kombeyamane nimbato akali tika-pene Jisasa oko andalo leaipia. Andipa nimbato bala ondo wato, mini kenda wete eyo-ko. Nimbato kenda-pene mindi bala mai napene, tita lo tepa ape leaipia. Dee, Pailateto andea-kola, pitisa akali kawanepi, Juta yame ando atalaini akali tupapi, utupane-mane Jisasa towa apiangu puato, bala mee kosimi leai. Tene okone-lapona, Pailateto Jisasa tita lo tepa wakale nembo teaipia. Mana koo wete minalane akali Batapasa lené mindi andilatane palea-kola, wandakali tupamane bala tita lo tepa ape nalolo-peyai nembo toto, Pailateto wandakali amunguli pua ateaini tupa tipa puato, nimbato Batapasa tita lo tepa wape. Pee, nimbato Jisasa gene mindi Kataisa lalaini oko tita lo tepa wape leaipia.
*

²⁰ Wuane lea-kola, pitisa akali kawane tupapi, Juta yame ando atalaini akali tupapi, utupane-mane wandakali amunguli pua ateaini utupanena nembo-tene mo lawa pimai-pulu, yakamoto Pailate lamawuato, nimbato Batapasa tita lo tepa alu, Jisasa peyo ome laa lalapa leainipia.

²¹ Wuane lea-kola, gapomane akali andane Pailateto utupane tipa puato, nimbato akali okolapona andoko tita lapia laka lo nembo teyaipe leaipia. Wuane lea-kola, utupane-mane balana pii okone yano peyoto, Batapasa tita lo tepa aa leainipia.

²² Wuane lea-kola, Pailateto utupane tipa puato, Batapasa tita lo tepa ewando, nimbato akali Jisasa gene mindi Kataisa lalaini okonga anu pipia laka lo nembo teyaipe leaipia. Wuane lea-kola, wandakali ateaini utupane pitaka-mane loto, nimbato bala ita malamanda okona peyo yuka aa leainipia.

²³ Wuane lea-kola, Pailateto utupane tipa puato, anu peakale nimbato bala ita malamanda okona peyo yuka wape. Balato mana koo wete andoko wato minapai-ape leaipia. Balato wuane leane tekeko, utupane-mane pii taimane wete loto, bala ita malamanda okona peyo yuka aa laka peainipia.

²⁴ Wuane laka puato, wandakali utupamane Pailatena pii ale naene, bala towa yanda puyale peyai-kola, balato disa ipa piti-pata mindi moto, wandakali utupanena wenonga atoto, bala tanena kini wasawasa pelea. Wasa-wasa peyoto, balato wandakali utupane lamawuato, akali oko omola-kola, koo tene oko nambanga nayolopeya. Yakamanga yolopeya leaipia.
*

²⁵ Wuane lea-kola, wandakali utupane pitaka-mane loto, andipa koo tene okone nanimanga yalu, matili nanimana andopane mandiyene tupangapi yalu, peakale teke leainipia.
*

²⁶ Wuane lea-kola, Pailateto Batapasa tita lo tepa amaiyu, ami yanda yene minditupamane Jisasa kunju-mane peyalu, ita malamanda okona peyo yuka alapa loto, bala utupanenga mayaepia.

*Ami Yanda Yene Tupamane Jisasa Ando Lamba Leaini Oko
Maki 15:16-20; Jone 19:2-3*

²⁷ Okone ang, gapomane akali kawane Pailate okona ami yanda yene minditupamane Jisasa atu aiyu gapomane anda mindina kolandaka loto, utupanena ami yanda yene yangone tupa ipulupa loto, pitaka Jisasanwa wenonga amunguli peainipia.

²⁸ Amunguli piyu, utupane-mane balana tona peane tupa yoko moto, tona kala pepolo kinji tupamane piyaini okonepene mindi balanga piya mayainipia.
*

²⁹ Piya maiyu, utupane-mane eyaka ani atene mindi mo umange pua kinji tupamane piyaini tangi gulene mindi waa puato, balana kawanenga tangi gulo aiya mayainipia. Ayia maiyu, kelewa kanda mindi balana kii tikasa aiyakale lo maiyu, utupane-mane aiki lewa wato, bala lamba loto, Juta yamenia kinji nimba wayu epeleya. Nimba kuai lo atape leainipia.

³⁰ Wuane loto, utupane-mane bala apesango soo lo peyoto, kelewa kanda balato aiyanie okone moto, balana kawanenga peleaini-pia.
*

³¹ Utupane-mane bala lamba lo koyo piyu, tona balanga piya mayaini okone yoko moto, balana tona piyane oko mo piya maiyu, bala ita malamanda okona peyo yuka oyale atu aiyu peainipia.

*Jisasa Bala Ita Malamanda Okona Peyo Yuka Yaini Oko
Maki 15:21-32; Luku 23:26-43; Jone 19:16-27*

³² Ami yanda yene tupamane Jisasa atu aiyu Jutusaleme tepe alu poto, Saitini tano

* ^{27:16-19:} Jo 11:47-48; 12:19

* ^{27:24:} Lo 21:6-9

* ^{27:25:} Ap 5:28

* ^{27:28:} Lk 23:11

* ^{27:30:} Ais 50:6

okona tane akali Saimone lene mindi andoto, balato Jisasana ita malamanda oko aiyakale lo mo aiya mayainipia.

³³ Aiya mayai-kola, aiyu utupane towa yuu Golokota lene mindina peakaiyu leai. Gene Golokota okonena tene oko kawane kulini wangiane.

³⁴ Golokota yuu okonena peakaiyu lalu, utupane-mane matasini kaa-pene wete mindi waene minditupa towa mina mindiki loto, Jisasa neakale mayaini tekeko, balato okone no makande piyu, naa napene, konda ya. *

³⁵ Ami yanda yene tupamane Jisasa ita malamanda okona peyo yuka alu, laki loto, wini leaini akali tupa mindiki-mindiki lo balana tona mindi miaka peai. *

³⁶⁻³⁷ Wamba Lomo gapomane okomane Jisasa kosimi loto, bala tane Juta yamena kinji oko ateyo leya leainipia. Wuane leaini oko nembo tolo-peke loto, ami yanda yene tupamane akali Jisasa oko bala Juta yamena kinji oko ateya lo pepa peyoto, pepa okone Jisasana ita malamanda okona kawanenga ate lalu, Jisasa andapeyo peteai.

³⁸ Okone angii, ami yanda yene waka minditupa-mane pake nene akali lapo atu aiyu epoto, akali okone-lapona mindi Jisasana kii tikasa-tole peyo yuka alu, mindoko balana kii koyasa-tole yuka yai. *

³⁹⁻⁴⁰ Jisasa peyo yuka atane ateane ongane mandaka epo peaini wandakali tupamane yakamana kawane taimane ema puato, bala lamba loto, nimbatu lotu anda andane oko keao loto, ole tepo angu piape puato, pulu-peke lolo-peyawa lalene piako. Nimba Gotena iwanane yando, nimba tane taputi pua, ita malamanda oko tepa alu, yuunga ipu leai. *

⁴¹⁻⁴² Wuane pua teke, pitisa akali kawane tupapi, loo tupana mana andene akali tupapi, Juta yame ando atalaini akali tupapi, utupane-mane Jisasa lamba loto, balato wandakali waka tupa moyalan tekeko, bala tane katulo moya napeya okonde leai. Epapu bala ita malanda oko tepa alu, yuunga epeando, nanimato bala Isatale tanena kinji oko ateya lo bilipi lolopeyama.

⁴³ Balato Gote bilipi loto, bala tane Gotena iwanane ateyo lalane-ko. Goteto bala epelewa yampapane yo ateando, andipa bala molo-peke lape-pene leai. *

⁴⁴ Utupane-mane wuane loto, Jisasa lamba leai-kola, ongane mandaka ita malamanda laponga peyo yuka atane

ateapili pake nene akali okolapo-mane bala lamba leapi teke.

*Jisasa Omeane Oko
Maki 15:33-41; Luku 23:44-49; Jone 19:28-30*

⁴⁵⁻⁵⁰ Otonga oto kulini okona yuu undupi lamangua atane angu atama pea-kola, ole-lene siti kilokopi mindi lea-angi, Jisasato pii taimane wete loto, Eli, Eli lama sapakatani lea. Pii okone nanimato mopeke loto, nambana Gote, nambana Gote, anu peakale nimbatu namba tepe elepe lea. Wuane lea-kola, wandakali ongane mandaka ateaini utupanena minditupa-mane ale wato, akali okomane potopesa akali Ilainja ee leya leai. Wandakali utupanena mindimane taimane poto, sapanjia mindi moto, waene kaa-pene pinika lene okona tanda pua pete loto, ita kai mindina tutuku puato, Jisasa bala duu lo neakale maulu peane tekeko, wandakali waka tupamane bala lamauwatu, Ilainjato bala moyolo epeyape lo andamakale. Mali yo ata leai. Okone angii, Jisasato lapone taimane wete kalae lalu, omoto, balana tandini oko peakale lo tepe ya wete, yuu tii pulu-peke lea. *

⁵¹ Okone angii teke, lotu anda andane okona lumu oko tombo peyoto, lapa-lapa andane yuka atane ateane oko kawanenga ato tewa, atutu kao lo lalo paeaipia. Dee, yuu titiyawi andane wete mindi lea-kola, ana andane tupa longo paeaipia. *

⁵² Yuu titiyawi andane okonemane wandakali mali pitane asini kambua lumbu tepe ya-kola, Goteto balana wandakali wamba omeaini tupana kambua malinga ika laya yaepia.

⁵³ Ika loto, utupane-mane yakamana mali tupa tepe alu peainipia. Matili Jisasa malinga ika lea-angi, wandakali utupane yakama Gotena tano Jutusaleme okona peai-kola, wandakali kambua-mane utupane andeaini-pia.

⁵⁴ Mindimane Jisasa umbaini oko pake mo awua polaini lo ando ateaini ami yanda yene tupapi, utupanena akali kawane okopi, utupane-mane yuu titiyawi leane okopi, mangene waka peane tupapi, utupane andeaini-pia. Andoto, yakama yuku wete wato, enene wete, akali oko Gotena Iwanane ya leainipia.

⁵⁵⁻⁵⁶ Wamba wanda kambua-mane Jisasa moyaa-makale nembo toto, Galili disitiki okona atalu, bala towa atu epeai. Wanda utupanena mindi Makatala tano okona tane Matiya okopi, mindi Jemesa, Josepe-la, okone-lapona angini Matiya okopi, mindi Sepiti iwanane okolapona angini okopi,

* 27:34: Sam 69:21 * 27:35: Sam 22:18 * 27:38: Ais 53:12 * 27:39-40: Sam 22:7; 109:25; Mt 26:60-61; Jo 2:19
* 27:43: Sam 22:8 * 27:45-50: Sam 22:1; 69:21 * 27:51: Ek 26:31-33; Ip 10:19-20 * 27:55-56: Lk 8:1-3

wanda tepo utupane yakama wanda waka tupa towa atu amonga-yale atoto, anu peyaipe lo andatawa peteaini-pia.*

*Josepeto Jisasa Mali Peane Oko
Maki 15:42-47; Luku 23:50-55; Jone
19:38-42*

⁵⁷⁻⁵⁸ Atimatiya tano okona tane akali amango Josepe lene oko balapi Jisasa bilipi lo atalaepia. Ole-lene akali okone bala Pailate ateanga poto, Jisasana umbaini oko namba gulape lo tee lea-kola, Pailateto ami yanda yene tupa lamawuato, Jisasana umbaini oko Josepenga maiyapa leaipia.*

⁵⁹ Wuane lea-kola, Josepeto Jisasana umbaini oko moto, lapa-lapa epene wete kalato naene mindimane yake pua ombo yaepia.

⁶⁰ Wamba Josepeto akali minditupa lamawuato, yakamato namba mali pulane panda mindi mandeke pingiyapape lea-kola, utupane-mane bala mali pulane panda mindi ana ati mindina kua pua mandeke pima-yainipia. Josepeto Jisasana umbaini oko awua poto, bala tanena mali pulane panda wenene okonena yata alu, ana pata andane mindi minu pendeke lo awua epoto, mali okonena asini tuma piyu, bala peaipia.*

⁶¹ Josepeto wuane pea-angi, Makatala tano okona tane Matiya okola, Matiya mindi okola, okonelapo liyamba Jisasana mali okonena mandaka peteapele-pia.

*Ami Yanda Yene Tupamane Jisasana
Mali Oko Andapeyo Ateaini Oko*

⁶² Sambasa pitimakale lo minditaka makande pulane oto oko koyo pea-kola, anate-lene pitisa akali kawane tupapi, Patasai yamepi, utupane Pailate peteanga epo amunguli peainipia.

⁶³ Amunguli piyu, utupane-mane Pailate lamawuato, akali andane, wamba wandakali minakasa alane akali Jisasa oko saka atea-angi, balato pii mindi loto, ole tepo pola-kola, namba malinga ika lolopeyawa leane oko nanimato nembo tolopeke lalama leainipia.*

⁶⁴ Andipa balana disaipolo tupamane bala pake mo too pipulu, wandakali tupa lamawuato, bala malinga ika lapia leainido, wandakali minakasa olai okonemane wamba balato wandakali tupa minakasa yane oko sia minulu-peyako. Balana disaipolo tupamane bala pake molaini. Akali minditupa-mane balana mali oko ole tepo tupana wayumane andapeyo angu atapowa ateakale lape leainipia.

⁶⁵ Wuane leai-kola, Pailateto utupane lamawuato, balana mali asia lomba oko lumbalu, balana umbaini pake molaini.

Yakamato mangene mindi piyu, ami yanda yene tupamane balana mali okone andapeyo ateakale lalapape leaipia.

⁶⁶ Wuane lea-kola, utupane-mane poto, wakaiya minditupa mali okonena asia lombanga pata mangua alu, ami yanda yene tupamane mali okone andapeyo ateakale leainipia.

28

Jisasa Bala Malinga Ika Leane Oko

Maki 16:1-11; Luku 24:1-10; Jone 20:1-18

¹ Sambasa oto oko koyo pea-kola, Sande angi upa pitane nai epoyale peangi, Makatala tano okona tane Matiya okola, Matiya mindoko-la, okonelapo liyamba Jisasana mali oko andoyale asini peapelepi.

² Asini peapi wete, yuu titiyawi andane mindi lea-kola, Gotena enjole mindi ati kenga atala epoto, Jisasana mali asia lomba tuma peane ana andane wete oko minu pendeke lo mo aiyangi loto, ana okonena tokonga peteapia.

³ Atti tapale piyane pua, balana lee-inga tii wetete pikoyo pea-kola, balana tona peane tupa ake wete peaipia.

⁴ Jisasana umbaini pake molaini ando ateaini ami yanda yene tupamane enjole okone andoto, yuku wete wato, putu-putu peyoto, omene gulo yainipia.

⁵ Ami yanda yene utupane-mane wuane peaini tekeko, enjole okonemane wanda okolapo lamawuato, liyamba yuku olapele leaipia. Ita malamanda okona peyo yuka apiai akali Jisasa okone liyambato aiya pulu epeyapi lo nambato andeyo.

⁶ Wamba balato malinga ika lolo-peyawa leane pua, bala malinga ika lalu, pala. Bala onga yaa napeya-ko. Liyambato bala yala panda oko andolo ipulupa.*

⁷ Andalu, liyambato wamba kapoyale poto, balana disaipolo tupa lamawuato, Jisasa bala malinga ika lalu, wamba ingane Galili disitiki okona pala. Yakamato yuu okonena poto, bala andolo-peyai. Liyambato pii okone balana disaipolo tupa lamaiyapape lo nambato liyamba langeyo okoni leaipia.

⁸ Wuane lea-kola, wanda okonelapo liyamba yuku yapele tekeko, pii okone ale wato, liyamba epele wete yapelepi. Epele wete wato, liyamba mali okone wamba kapoyale tepa alu taimane poto, balana disaipolo tupa lamaulu peapelepi.

⁹ Lamaulu peapi-kola, Jisasato okonelapo asininga malamanda wato, upa pitane wete leaipia. Wuane lea-kola, wanda okonelapo liyambato bala mandaka gulo poto, aiki

* 27:57-58: Lo 21:22-23 * 27:60: Ais 53:9 * 27:63: Mt 12:40; 16:21; Mk 9:30-31; 10:33-34; Lk 9:21-22; 18:31-33 Jo 2:19-21 * 28:6: Mt 12:40; 16:21

leka wato, balana kene minata wato, bala lo lotu leapelepia.

¹⁰ Bala lo lotu leapi-kola, balato okonelapo lamawuato, liyamba yuku naene, nambana disaipolo tupa atolainga poto, utupane Galili disitiki okona epeakale lamai-yapape. Namba yuu okonena poto atolowa-kola, matili utupane epoto, namba andolopeyai leaipia. *

Ami Yanda Yene Tupamane Pii Mindi Leaini Oko

¹¹ Wanda okonelapo asini peapi-kola, Jisasana mali oko andatawa ateaini ami yanda yene tupana minditunga-mane Jutusaleme tano okona poto, mangene peane utupane pitaka pitisa akali kawane tupa lamai-yainipia.

¹² Lamai-yaikola, pitisa akali kawane tupa yakamato Juta yame ando atalaini akali tupa towa amunguli puato, pii mindi lo puta piyu, muni kambua minditunga yanda yene utupane mayainipia.

¹³ Maiyu, utupane-mane yanda yene tupa lamawuato, yakamato loto, utulu nanima limu paliyama-kola, Jisasana disaipolo tupa epoto, balana umbaini oko mo awua palai yala lalapape.

¹⁴ Yakamato wuane lolai-kola, gapomane akali kawane okomane pii okone ale yando, nanimato bala towa pii loloma-kola, kendepene mindi yakamanga naepolo-peya leainipia.

¹⁵ Wuane leai-kola, ami yanda yene utupane-mane muni utupane mialu, Juta yamena akali kawane tupamane utupane lamai-yaini pua, owato pii mindi loto, utulu nanima limu paliyama-kola, Jisasana disaipolo tupa epoto, balana umbaini oko mo awua palai yala leainipia. Wuane leai-kola, Juta yame tupamane pii okone lo tawe yaini oko lo tawe yama teke ipulu, andipapi wuane teke laraini.

Jisasato Balana Disaipolo Tupa Piape Pulu Pulupape Leane Oko

Maki 16:14-18; Luku 24:36-49; Jone 20:19-23

¹⁶ Wamba Jisasato balana disaipolo masia tupa lamawuato, yakama Galili disitiki okona yuu wangiane mindina pulupape leane wangiane okonena peai. *

¹⁷ Pulu, utupane-mane Jisasa andoto, bala lo lotu leaini tekeko, minditunga-mane mini lapo paleai.

¹⁸ Mini lapo paleai-kola, Jisasato utupane ateaini mandaka ongane epoto, pii mindi utupane lamawuato, yuu ati-la, okolapona minditaka eya tupa pitaka ando atolane tai-lene tupa pitaka Goteto namba gipia lea. *

¹⁹ Tene okonena, yakama poto, wandakali palu pula tupa pitaka nambana disaipolo tupa ateakale lo piape pua atalapape. Piape okone pua atoto, Aiyane okopi, Ini okopi, Oli Sipitisa okopi, utupanena gene oko loto, wandakali ipa peya-maiyapape. *

²⁰ Peya-maiyu, pii manapi wato minu atalapape lo nambato yakama langewa tupa pitaka wandakali utupane-mane wato minu ateakale lo yakamato mana lamai-yapape. Yakamato wuane pua atolai-kola, namba yakama towa atu atama pulu, yuu koyo pula oto oko ando molopeyama nem-boto atalapape. Jisasato wuane lea.

MAKI

Gotena Pii Layene Epene

Makito Pepa Peleane Oko

*Ipa Peya-maiyane Akali Joneto Gotena
Pii Leane Oko*

*Matiyu 3:1-12; Luku 3:1-9,15-17; Jone
1:19-28*

¹ Gotena pii layene epene oko bala iwanane Jisasa Kataisa andayo layene eya. Nambato pii oko bulupane tewa yakama langeyo.

²⁻⁴ Wamba Goteto balana iwanane Jisasa Kataisanga pii mindi lamaiya-kola, potopesa akali Aisayato pii okone pepa peyoto, wua leaipia: Ale ape. Nambato nambana wai lo awua epeakale lolane akali oko wamba ingane ini epeakale lolowa-kola, balato nimbanas asini oko makande pua yata olopeya. Bala wandakali napalene yuu mindina atoto, pii taimane loto, yakamato Akali Andane oko epolane asini mindi mandeke pimawuato, bala epolane asini arjako tupa mo tika piyapape lolopeya layene eya. Wamba Aisayato pii okone pepa peleane pua teke, ipa peya-maiyane akali Jone oko bala wandakali napalene yuu okona epo atoto, Gotena pii oko wandakali tupa lamaiki peaipia. Lamaiki puato, Goteto yakamana koo piyaini tupa apia-geakalenga, yakamato yamapane peke loto, ipa mialapa lo lamaiki peaipia.*

⁵ Pii okone lamaiki pea-kola, Jutusaleme tano okona tanepi, Jutiya disitiki yuu tupa pitakanan tanepi, utupane pitaka bala ateanga poto, yakamana koo tupa lapana yai-kola, Joneto ipa Jotane okona atoto, utupane ipa peya-maiyaepia.

⁶ Balato yia kamele itini-mane waa-pene tona tupa piyu, bulumako umbaini-mane waa-pene matipu mindi pua atalaepia. One neme tupamane palawa dini tupana ipane moto, tomo gene ani lene mindi waa piyane oko moto, Joneto palai tupa towa naka pua ateipia.*

⁷ Balato Gotena pii oko wandakali tupa lamawuato, akali matili epolopeya okonena tai-lene okomane nambana tai-lene oko sia minulu-peya laka peaipia. Nambato aiki leka wato, sukee balana pula okona eyaka titi lolane namba akali epene mindi jia.*

⁸ Nambato ipa-mane yakama ipa peyaggeo tekeko, balato Oli Sipitisa okomane

yakama ipa peya-gulupeya. Joneto wuanelo pii lamaiki pua ateipia.

*Joneto Jisasa Ipa Peya-Maiyane Oko
Matiyu 3:13-17; Luku 3:18-22*

⁹ Alu mindi Jisasa bala Galili disitiki tano Nasatesa oko tepa alu epea-kola, Joneto ipa Jotane okona atoto, bala ipa peya-maiyaepia.

¹⁰ Okone ang iyi teke, pii mindi ati kenga atala epoto, Jisasa ando, nimba nambana iwanane yamapane yalawane oko. Nambato nimbanas mana tupa andoto, epele wetete eyo leaipia.*

*Sataneto Jisasa Minu Mandeke Peane
Oko*

Matiyu 4:1-11; Luku 4:1-13

¹² Okone ang iyi teke, Oli Sipitisa okomane Jisasa bala wandakali napalene yuu mindisa atu aiyu peaipia.

¹³ Jisasa bala wandakali napalene yuu okonena poto, ole paiyasa tukumindi piango anatope tupapi, yia kapua tupapi, utupane towa atu ateipia. Bala yuu okonena atea wete, Sataneto bala minu makande pea-kola, matili enjole tupamane bala moyaini-pia.*

*Jisasato Gotena Piape Bulupane Tewa
Peane Oko*

Matiyu 4:12-17; Luku 4:14-15

¹⁴ Matili Jone andi latane atea-kola, Jisasa bala Galili disitiki okona poto, Gotena pii layene epene oko lamaiki peaipia.*

¹⁵ Pii lamaiki pua atoto, oto Goteto yata yane oko ipupia-kola, balato pitaka taka ando atolane oto oko wamba mandaka epo eya-ko. Yakamato yamapane peke loto, Gotena pii layene epene oko bilipi lalapa leaipia.*

*Jisasato Disaipolo Minditupa Ipulupa
Leane Oko*

Matiyu 4:18-22; Luku 5:1-11

¹⁶ Saimone, balana amene Endutula, okonelapo pisa moto, bisanisa piape pua ateapele-pia. Alu mindi Jisasa bala Galili ipa angini okona matenenga epo poto andea-kola, akali okonelapo-mane pisa mialapele umbene nuu andane wete mindi ipa angini okona aindaka leapinga andeaipia.

* **1:2-4:** Mal 3:1; Ais 40:3; Ap 13:24; 19:4 * **1:6:** 2Ki 1:8; Mt 11:8 * **1:7:** Ap 13:25 * **1:11:** Sam 2:7; Ais 42:1; Mt 12:15-21; Mk 9:7 * **1:13:** Sam 91:11-13 * **1:14:** Mk 6:17-20 * **1:15:** Mt 3:1-4

¹⁷ Andoto, balato akali okonelapo lamawuato, liyambato wandakali mi-alapale, nambato mana langukalenga, liyamba namba watama ipulupa leaipia.

¹⁸ Wuane lea-kola, okone angi teke akali okonelapo-mane pisa mialapele umbene nuu tupa yakale tepa alu, bala watama peapelepia.

¹⁹ Watama peapi-kola, Jisasa bala amonga-yale poto andea wete, Sepiti iwanane Jemesa, bala amene Jone-la, okonelapo sipi mindina pitiyu, pisa mialapele umbene nuu tupa tambu lo peapinga andeaipia.

²⁰ Andoto, ipulupa lea-kola, okonelapo liyamba ayiane Sepiti oko balana piape akali tupa towa sipi okona peteakale tepa alu, Jisasa watama peapelepia.

Jisasato Sipitisa Koo Mindi Poyo Wateane Oko

Luku 4:31-37

²¹ Matili Jisasa balana disaipolo tupa towa Kapaneame tano okona peainipia. Sam-basa oko epea-angi, bala Juta yamena lotu anda okona kolandaka loto, pii manapi lamawua ateaiapia.

²² Loo tupana mana andene akali tu-pamane pii mana lamai-yaini pua, balato mana lamai naapeaiapia. Jia. Wamba Goteto bala ando, nimbato nambana pii mana lamawua atape lea-kola, balato mana kuai lo lamawua ateaiapia. Tene okonena, wandakali tupamane pii balato leane tupa ale wato, moko wete loto, nembo kambua teainipia.*

²³ Okone angi, sipitisa koo atene akali mindi yakamana lotu anda okonena peteane okomane pii taimane leaipia.

²⁴ Pii okone loto, balato Nasatesa tane Jisasa, nambato nimba andeyawane leaipia. Nimba Gotena akali epene tikapene wetete atele. Nimbato nanimanga anu pulu epelepe. Nimbato nanima minu koyolo epelepe leaipia.*

²⁵ Wuane lea-kola, Jisasato sipitisa koo okone laiya loto, nimbato pii nalene, kondalu, akali oko tepa alu puu leaipia.

²⁶ Wuane lea-kola, sipitisa koo okone-mane akali okone taimane mo malawai loto, kalae andane lalu, bala tepa alu, peaiapia.*

²⁷ Pea-kola, wandakali tupa pitaka-mane moko wete loto, yakama teke-teke pii laлава puato, anu puato, Jisasato wuane piyape leainipia. Oko mana wenene waka mindi ya. Sipitisa koo tupa bosa

lo ando atolane tai-lene oko balanga eya-kola, balato sipitisa koo tupa pulupa leyakola, utupane-mane balana pii okone wato minalaini ya leainipia.

²⁸ Wuane loto, wandakali utupane-mane Galili disitiki yuu tupa pitakana poto, pii okone lo tawe yainipia.*

Jisasato Saimonena Wanda Imane Oko Mo Atu Yane Oko

Matiyu 8:14-15; Luku 4:38-39

²⁹ Utupane yakama Juta yamena lotu anda oko tega alu, takita peai-angi, Jisasa bala Jemesa, Jone-la, okonelapo towa atu Saimone, Endutu-la, okone-lapona andaka peainipia.

³⁰ Peai-kola, Saimonena wanda imane oko siki omoto, umbuaini toto andane pea-kola, tokonga palu ya-kola, wandakali tupa-mane Jisasa kapoyale lamai-yainipia.

³¹ Lamai-yaikola, Jisasa poto, wanda okonena kininga minuto, mina ika laya ya-kola, balana umbuaini toto andane wete peane oko atu yaepia. Atu ya-kola, wanda okonemane akali utupanena tomo mandeke pima-yaepia.

Jisasato Wandakali Kambua Mo Atu Yane Oko

Matiyu 8:16-17; Luku 4:40-41

³²⁻³³ Nai andaka pea-kola, Kapaneame tano okona tane wandakali tupa pitaka-mane wandakali siki pelene tupapi, sipitisa koo atene tupapi, utupane pitaka atu aiyu epoto, anda Jisasa peteane okona asia lom-panga epo amunguli peainipia.

³⁴ Amunguli peai-kola, Jisasato siki wakawa pelene wandakali tupa mo atu yaepia. Balato sipitisa koo atene wandakali kambua tupana sipitisa koo ateaini tupa peyo watea-kola, sipitisa koo utupane-mane bala Gotena iwanane ateya lo andeaini-pia Andeai-kola, balato utupane lamawuato, namba Gotena iwanane ateya lo yakamato wandakali tupa lamauwakale leaipia.*

Jisasato Tano Minditupana Piape Pua Mangeane Oko

Luku 4:42-44

³⁵ Waa loyale pea-kola, Jisasa bala ika lalu, kamaka poto, wandakali napalene yuu mindina pote lo ateaiapia.*

³⁶⁻³⁷ Matili Saimonepi, akali bala towa ateaini tupapi, utupane-mane Jisasa aiya pima poto, andeaini-pia. Andoto, wandakali tupa pitaka-mane nimba aiya peyai lo lamai-yainipia.

³⁸ Lamai-yaikola, balato utupane lamawuato, namba tano waka mandaka eya tupana poto, Gotena pii lamauwakale

* **1:22:** Mt 7:28-29 * **1:24:** Mk 5:7-8 * **1:26:** Mk 9:26

* **1:28:** Mt 4:24 * **1:34:** Mk 3:9-12 * **1:35:** Mt 14:23;

nembo toto ipuwa-ko. Nanimato Kapanamee tano oko tepa alu, maa leaipia.

³⁹ Wuane lalu, balato Galili disitiki okona yuu tupa pitakana poto, Juta yamena lotu anda tupana kolandaka loto, Gotena pii oko wandakali tupa lamaiki puato, sipitisa koo tupa peyo wataka peaipia.*

Jisasato Akali Tapa-mane Koyene Mindi Mo Atu Yane Oko

Matiyu 8:1-4; Luku 5:12-16

⁴⁰ Akali tapa mindimane Jisasa ateanga epoto, aiki leka wato, nimbato namba mo atu yokale nembo teendo, nimbato katulo wuane pulupele leaipia.

⁴¹ Wuane lea-kola, Jisasato akali okone ondo wete wato, wuane pukale loto, balana kini oko balanga yata wato, nimba atu ya leaipia.

⁴² Wuane lea-kola, okone ang i teke akali okonena tapa peane oko atu ya-kola, Gotena wenonga bala kalato ata napene guleipia.

⁴³⁻⁴⁴ Wuane pea-kola, Jisasato pii keato mindi bala lamawuato, nimba Gotena pitisa piape piyane akali oko ateyanga kapoyale poto, nimbanan umbaini oko balanga andawa lape leaipia. Andawa lalu, Goteto nimbana tapa peane oko mo atu yapia lo wandakali tupamane andeakale nembo toto, Mosesato opa mindi maiyapape leane pua teke maipe. Nimbato wuane pipe-pene tekeko, nimbato nimba mo atu eyo oko wandakali mindikipi mindi lamaulene andape leaipia.*

⁴⁵ Jisasato wuane leane tekeko, akali okonemane poto, Jisasato bala mo atu yane oko lo tawe yaepia. Tene okonena, Jisasa bala tano mindina panakame pupe-pene guu nalea-kola, bala wandakali napalene yuu tupana atea-kola, yuu pitakana tane wandakali tupa bala ateanga epeainipia.

2

Jisasato Akali Kusuku Mindi Mo Atu Yane Oko

Matiyu 9:1-8; Luku 5:17-26

¹ Ole minditupa pea-kola, Jisasa bala Kapanamee tano okona peke leaipia. Peke lea-kola, wandakali-mane Jisasa bala andaka ateya lene oko ale yainipia.

² Ale wato, wandakali kambua wete epo amunguli peai-kola, anda okone tumbi wete leaipia. Takita atoto, anda asia lombanga mandaka gulo atolane panda mindi mee nayaepia. Wandakali utupane pitaka amunguli peai-kola, Jisasato Gotena pii layene epene oko utupanenga lamawua ateaipia.

³ Pii lamawua atea-kola, akali tukumindimane akali kusuku mindi awua epeainipia.

⁴ Wandakali kambua wete atea-kola, akali utupane-mane bala Jisasa ateanga awua epolane asia mindi nayaepia. Naya wete, akali utupane-mane akali kusuku okone awua poto, anda tokonga peakaiyu loto, anda yame peyatane ateanga minditupa lai lo yata yainipia. Wuane piyu, takea toko okona eyaka tukumindi andi lo tepa wato, akali okone takea tokonga pali-pata Jisasa ateanga tengamane tepe yainipia.

⁵ Jisasato andea-kola, akali utupane-mane bala lo bilipi loto, akali okone awua epeai lo andoto, akali kusuku okone lamawuato, iwana, nambato nimbanan koo pilini tupa apia-geyo leaipia.

⁶ Wuane lea-kola, loo tupana mana andene akali organe peteaini tupamane wua lo nembo teainipia:

⁷ Anu peakale Jisasato wuane leyape. Akali-mane katulo wandakali yangone tupana koo tupa apia-mai na-piyaini. Jia. Goteto angu katulo wuane piyane-ko. Nimbato nimbanan koo tupa apia-geyo loto, Jisasato Gote lamba leya. Loo tupana mana andene akali tupamane wuane nembo teainipia.

⁸ Wuane nembo teyai lo andoto, Jisasato utupane tipa puato, anu peakale yakamato wuane nembo teyaipe leaipia.

⁹ Nimbato akali kusuku oko lamawuato, nimbanan koo pilini tupa apia-geyo leyo oko piape pitete-pene mindi jia. Nimbato bala lamawuato, nimba ika lalu, nimbanan takea toko oko mo aiyu puu loto, balana siki oko mo atu yewando, piape okone pitete-pene.

¹⁰⁻¹¹ Wuane tekeko, Goteto yuunga wandakalina koo piyaini tupa apia-maulane tai-lene oko Akalina Iwanane okonga mayane oko yakamato andalapale nembo teyo leaipia. Wuane lalu, balato akali kusuku oko lamawuato, nimba ika lalu, nimbanan takea toko oko mo awua andaka puu leyo leaipia.

¹² Wuane lea-kola, wandakali peteaini tupa pitakana wenonga akali kusuku oko kapoyale ika lalu, balana takea toko oko mo awua pea-kola, wandakali utupane pitakame moko wete leainipia. Moko loto, utupane-mane Gotena gene oko laiyu loto, nanimato mana okonepene mindi wamba anda napemane leainipia.

Jisasato Matiyu Andoto, Namba Watama Ipu Leane Oko

Matiyu 9:9-13; Luku 5:27-32

¹³ Jisasa bala ipa angini okona matenenga lapone pea-kola, wandakali kambua bala

* 1:39: Mt 4:23; 9:35 * 1:43-44: Pit 14:1-32

ateanga epeainipia. Epeai-kola, balato utupane mana lamai-yaepia.

¹⁴ Mana lamaiyu, matili Jisasa poto andea-kola, Alipusa iwanane Lipai oko takisa muni mialaini anda okona peteanga andeaipia. Andoto, nimba namba watama ipu lea-kola, Lipai ika lalu, bala watama peapia.

¹⁵ Takisa mialaini akalipi, koo piyaini wandakali waka tupapi, utupanena kambua-mane Jisasa towa atu epoko pua atalainipia. Alu mindi wandakali utupanepi, Jisasana disaipolo tupapi, utupane Jisasa towa Lipai andaka tomo no peteaini-pia.

¹⁶ Tomo no peteai-kola, Patasai tupapi, loo tupana mana andene akali tupapi, utupane-mane andoto, Jisasana disaipolo tupa tipa puato, anu peakale Jisasa bala takisa muni mialaini akalipi, koo piyaini wandakali waka tupapi, utupane towa atu tomo no peteyaipe leainipia.*

¹⁷ Wuane leai-kola, Jisasato utupanena pii okone yano peyoto, dokosa-mane wandakali siki napelene tupa mo atu yolane tene mindi ata naopeya. Jia. Dokosa-mane wandakali siki pelene tupa mo atu yalane. Wuane pua teke, namba epewane oko wandakali epene tika-pene tupa ee lo molo naepewane. Jia. Koo piyaini wandakali tupa ee lo molo namba epewane leaipia.

Pote Kambua Loyale, Tomo Nanene Atalaini Mana Oko

Matiyu 9:14-17; Luku 5:33-39

¹⁸ Alu mindi Jonena disaipolo tupapi, Patasai tupapi, utupane-mane pote kambua loyale, ole ukupini mindilapo tomo nanene ateai-kola, wandakali minditupa epoto, Jisasa tipa puato, Jonena disaipolo tupapi, Patasai tupana disaipolo tupapi, utupane-mane pote kambua loyale, ole ukupini mindilapo tomo nanene atalaini-ko. Anu peakale nimbanan disaipolo tupamane wuane naipyainipe leainipia.

¹⁹ Wuane leai-kola, Jisasato utupane tipa puato, akali mindimane wanda mindi kee loto, balana yangone tupa towa atu atolai-kola, yangone utupane-mane pote kambua lamakale nembo toto, katulo ole ukupini mindilapo tomo nanene atolo-peyaipe. Jia. Akali okone balana yangone utupane towa atu atolai-angi, utupane-mane katulo wuane napulu-peyai.

²⁰ Wuane tekeko, matili akali minditupamane wanda kee lolane akali oko bala andi lo awua polai-kola, ole okone angi balana amene tupamane pote kambua

loyale, ole ukupini mindilapo tomo nanene atolopeyai.

²¹ Wandakali mindimane lapa-lapa palai-lene wenene mindi moto, tona wambane asia titi yene mindina ataenge lo tambu leando, balato tona okone wasa-wasa peyolangi, lapa-lapa palai-lene wenene okomane kingi tupi loto, tona wambane okone lapone lete laya ola-kola, asia titi wamba yolane okone andane gulolo-peyai. Tene okonena, wandakali mindikipi mindimane wuane na-piyaini. Jia.

²² Dee, wandakali mindimane ipa waene wenene tupa ipa pene wambane meme umbaini-mane waa-pene tupana pete leando, ipa waene wenene okonena popone okomane ipa pene wambane tupa tula laya ola-kola, ipa waene oko alu pulupeya. Tene okonena, wandakali mindikipi mindimane wuane na-piyaini. Jia. Wandakali-mane ipa waene wenene tupa ipa pene wenene tupana pete lalaini.

Sambasa Angi Piape Na-piyaini Mana Oko

Matiyu 12:1-8; Luku 6:1-5

²³ Sambasa mindina, Jisasa bala witi ee tupana tombenenga asini epo pea-kola, balana disaipolo tupamane bala watama epoto, witi dini minditupa yo miaka pima peainipia.

²⁴ Yo miaka pima peai-kola, Patasai tupamane Jisasa lamawuato, Gotena loo okomane loto, Sambasa angi wandakali-mane piape napipe-pene leya-ko. Anu peakale himbana disaipolo tupamane loo okone ango wato, witi dini tupa yo miaka pima peyaipe leainipia.*

²⁵⁻²⁶ Wuane leai-kola, Jisasato utupanena pii okone yano peyoto, Gotena loo okomane loto, Gote wenonga yata alaini betesa tupa pitisa akali tupamane angu napene layene eya leaipia. Wandakali waka mindikipi mindimane betesa utupane mo naa na-piyapape layene eya tekeko, wamba Apayata bala Gotena pitisa akali kawane atea-angi, Dapitipi, akali bala towa atu ateaini tupapi, utupane-mane ulia nono yainipia. Nono wato, Dapitito Gotena lotu anda okona kolandaka loto, betesa utupane halu, bala towa atu ateaini akali tupapi neakale maya lo pepa pelene eya. Yakamato pii okone alu mindikipi mindi wamba dii lo anda naapeaipe leaipia.*

²⁷ Wuane lalu, Jisasato utupane lamawuato, Akalina Iwanane nambato Sambasa oko moyokale nembo toto, wandakali waa napewa. Jia. Nambato wandakali tupa moyokale nembo toto, Sambasa oko yata ewa.*

²⁸ Tene okonena, namba tane Sambasa oko bosa lo ando atalawane teke leaipia.

3

*Sambasa Angi Jisasato Akali Kii Koo
Mindi Mo Atu Yane Oko*

Matiyu 12:9-14; Luku 6:6-11

¹ Alu mindi Jisasato bala Juta yamena lotu anda mindina kolandaka lea-kola, akali kii koo mindi peteai-pia.

² Petea-kola, akali minditupa-mane Jisasa kosimi lamakale nembo toto, Sambasa angi balato akali okone mo atu eyape lo andatawa peteaini-pia.

³ Andatawa peteai-kola, Jisasato akali kii koo oko lamawuato, nimba wandakali peteyai utupana wenonga ika lo ata leaipia.

⁴ Ika lo atea-kola, Jisasato wandakali tupa tipa puato, Gotena loo okomane aki leyape leaipia. Sambasa angi mana epene tupa minalapape leyape. Pee, Sambasa angi, mana koo tupa minalapape leyape. Sambasa angi yakamato wandakali tupa molo-peke lalapape leyape. Pee, Sambasa angi wandakali tupa peyo ome lalapape leyape leaipia. Jisasato wuane leane tekeko, wandakali utupane-mane balana pii utupane yano napeleaini-pia. *

⁵ Utupane-mane akali okone ondo naene atoto, balana pii okone yano napeleai-kola, Jisasa bala mini kenda yaepia. Balato utupane towa yataka wato, lee-mane anda peyoto, akali kii koo okone lamawuato, nimba kini yo laa leaipia. Akali okomane balana kini yo lea-kola, atu yaepia.

⁶ Sambasa angi Jisasato akali okonena kini mo atu ya-kola, Patasai tupamanne takita poto, okone angi teke kinji Etotena yame akali tupa towa pii lalawa puato, nanimoto anu puato, bala peyo ome lamakalepe leainipia. *

*Wandakali Kambua Wete Jisasa
Watama Peaini Oko*

Luku 6:17-19

⁷ Jisasa balana disaipolo tupa towa yuu okone tepa alu, ipa angini okona matenenga peai-kola, Galili disitiki okona tane wandakali kambua longo waka-mane bala watama peainipia.

⁸ Okone angi, wandakali minditupa-mane pii lo tawe yoto, Jisasato siki pelene wandakali kambua mo atu yalane lea-kola, Jutiya tanepi, Jutusaleme tanepi, Itumia tanepi, ipa Jotane amo-yangi tanepi, Taya tanepi, Saitone tanepi, yuu utupane pitakana tane wandakali kambua tupamanne ale wato, bala ateanga epeainipia.

⁹⁻¹⁰ Wamba Jisasato wandakali kambua mo atu yane oko nembo toto, wandakali siki pelene tupamanne bala wata oyale ato pitupitu peainipia. Wandakali kambua-mane mandaka gulo epeai-kola, balato balana disaipolo tupa lamawuato, wandakali utupane-mane namba ango oyale peyako. Namba sipi mindina peakaiyu loto atokalenga, sipi mindi namba ateyonga mandaka epoto, mali yo yakalenga, epeakale lalapa leaipia. *

¹¹ Sipitisa koo tupamanne Jisasa andoto, tombawua lo yoto, pii taimane loto, nimba Gote iwanane oko atele laka peainipia. *

¹² Wuane laka peai-kola, Jisasato utupane laiya loto, pii keato mindi utupane lamawuato, namba Gotena Iwanane ateya lo yakamato lapana olaini leaipia. *

*Aposolo Akali Alesa Tupa
Matiyu 10:1-4; Luku 6:12-16*

¹³ Akali minditupa balana disaipolo ateakale nembo toto, Jisasa bala yuu wangiane mindina iyu poto, utupane ipulupa lea-kola, utupane-mane bala ateanga epeainipia.

¹⁴⁻¹⁵ Alesa akali tupa bala towa atu atoto, sipitisa koo tupa peyo watolane tai-lene oko moto, Gotena pii layene oko wandakali tupa lamaulu peakale lokale nembo toto, balato utupane yapa lo meaipia.

¹⁶ Alesa akali utupane yapa lo mialu, balato akali Saimone lene oko gene mindi Pita leaipia. *

¹⁷ Balato Sepiti iwanane Jemesa, bala amene Jone-la, okone-lapona gene mindi Bonengesa leaipia. Gene okonena tene oko, ati kulu lalane pua, akali okonelapo-mane kapoyale yataka alapele. *

¹⁸⁻¹⁹ Endutupi, Pilipipi, Batolo-miyupi, Matiyupi, Tomasapi, Tatiyusapi, Alipusa iwanane Jemesapi, Lomo gapomane oko towa yanda piyaini Selote yame akali Saimone okopi, Jutas gene mindi Isaka-tyiote lene matili Jisasa ene peteane okopi, akali alesa utupane pitaka Jisasato balana disaipolo ateakale leaipia.

Belesa-pulu, Jisasa-la, Okonelapo

Matiyu 12:24-32; Luku 11:14-23; 12:8-10

²⁰ Jisasa bala anda mindina pea-kola, pai pua teke, wandakali kambua epo amunguli peai-kola, balapi, balana disaipolo tupapi, utupane-mane tomo nolane oto mindi nyaepia.

²¹ Bala tomo nanene, piape angu pua ateya-kola, balana yame tupamanne ale wato, bala keewa atalua loto, bala lamolo peainipia.

* ^{3:4:} Lk 14:3 * ^{3:6:} Mt 22:15-16 * ^{3:9-10:} Mt 14:36

* ^{3:11:} Lk 4:41 * ^{3:12:} Mk 1:34 * ^{3:16:} Jo 1:42

* ^{3:17:} Lk 9:54

²² Okone ang, loo tupana mana andene akali minditupa Jutusaleme atala epoto, pii mindi loto, sипитиса koo yame tupu ando atalane akali kawane Belesa-pulu bala Jisasanga ateya. Balato Jisasa minu tai laya eyakola, Jisasato sипитиса koo waka tupu peyo watale leainipia.*

²³ Wuane leai-kola, Jisasato akali utupane ipulupa loto, pii kokoli minditupa utupane lamawuato, Sataneto anu pua, bala tane katulo peyo watolo-peyape leaipia.

²⁴ Kanjiti mindina tane wandakali tupu yapu lo lapo puato, yakama teke-teke yanda peaindo, kanjiti okone katulo tai ata napulu-peya.

²⁵ Wandakali yame anda mindikina paliyaini tupu yapu lo lapo puato, yakama teke-teke yanda peaindo, yame okonelapo katulo tai ata napulu-peya.

²⁶ Dee, Satane yame oko yapu lo lapo puato, yakama teke-teke yanda peapindo, balana yame okone tai ata napene, koyo pulupuya.

²⁷ Wandakali mindikipi mindimane katulo akali tai mindina andaka kolandaka loto, akali okonena pinju tupu mee tikayo moto, awua napolo-peya. Wuane tekeko, balato akali tai okone wamba ini andi lata yando, balato katulo minditaka akali okonena andaka yolane tupu mee tikayo moto, awua polopeya. Wuane pua teke, nambato akali tai Satane oko sia minuto, wandakali balato andi lalane tupu titi lo mialawane.

²⁸ Nambato pii enene mindi yakama langeyo. Wandakali mindimane Ayiane Gote ando lamba leandopi, mana koo waka mindi mineandopi, Goteto balana mana koo utupane pitaka apia-maulupeya.

²⁹ Wuane tekeko, wandakali mindimane Oli Sipitisa oko lamba leando, andipapi, matilipi, Goteto balana koo okone apia-mai napulu-peya. Jia. Balana koo okone balanga yapowa yolopeya.

³⁰ Oli Sipitisa oko Jisasanga atea-kola teke, loo tupana mana andene akali tupamane akali koo yame tupu ando atalane akali kawane Belesa-pulu bala Jisasanga ateya loto, Oli Sipitisa oko lamba leyai nembo toto, Jisasato pii okone leaipia.

Jisasana Yame Enene Oko Matiyu 12:46-50; Luku 8:19-21

³¹ Jisasana angini amene ima takita epo atoto, bala epeakale lamaiyapa leainipia.*

³² Wuane leai-kola, wandakali kambua Jisasa ateanga pitu mapu peaini utupane mindimane bala lamawuato, nimbara angini, amene, imalini ima, utupane takita epo atoto, nimba ipu leyai leaipia.

³³ Wuane lea-kola, balato lapeke loto, nambana angini, amene ima, utupane apipe leaipia.

³⁴⁻³⁵ Wuane lalu, balato wandakali bala pitu mapu peaini tupu andamona-nena puato, Gotena nembo-tene oko wato minalaini wandakali yakama nambana angini, amene, imalini ima oo peteyai utupane andalapa leaipia.

4

Tomo Waini Papaka Leane Okona Pii Kokoli Oko

Matiyu 13:1-9; Luku 8:4-8

¹ Jisasa bala ipa angini okona matenenga atoto, pai pua teke pii mana lamaiya-kola, wandakali kambua moke-ene bala ateanga epo amunguli peainipia. Amunguli peakola, wandakali utupane pitaka ipa matene okona ateakale lalu, bala sipi mindina peakaiyu loto, peteaiapia.*

²⁻³ Pituto, balato pii kokoli minditupa loto, mana kambua utupane lamawuato, ale alapape leaipia. Akali mindimane tomo waini papaka lolo peaipia.*

⁴ Papaka lea-kola, tomo waini minditupa ambe asininga tepa ya-kola, eka minditupa epoto, utupane neainipia.

⁵ Tomo waini minditupa ambe ana tokonga yuu ajako yane okona tepa yaepia. Yuu ajako ya-kola, waini utupane kapoyale poka loto, ika leainipia.

⁶ Utupane kapoyale ika leaini tekeko, pini tupu ana tokonga poto, yuu pangosa wayumane puu napea-kola, matili ana utupane nai-mane toto pea-angi, waini utupane kapu tamangua yaepia.

⁷ Tomo waini minditupa ambe tani koo ani atene ika lalane yuu mindina tepa yaepia. Utupane poka loto, ika leaini tekeko, tani koo ani atene tupu anda yoto, utupane peyayo neai-kola, waini utupane mane dini lia napeainipia.

⁸ Tomo waini minditupa yuu epene mindina tepa wato, poka lo anda yoto, dini li-aepia. Waini utupanena minditupanga dini paiyasa tepo liaepia. Minditupanga dini paiyasa liaepia. Minditupanga dini andete mindiki liaepia.

⁹ Wuane lalu, Jisasato utupane lamawuato, ale asia yene wandakali yakamato pii okone pai lo ale wato, pii okonena tene oko wayumane nembo talapape leaipia.

*Pii Kokoli Leane Okona Tene Oko
Matiyu 13:10-23; Luku 8:9-15*

¹⁰ Matili Jisasana disaipolo alesa akali tupapi, bala towa atu atalaini wandakali waka tupapi, utupane yakama angu bala

* **3:22:** Mt 9:34; 10:24-25 * **3:31:** Mk 6:2-3; Jo 2:12; Ap 1:14 * **4:1:** Mk 3:7-10; Lk 5:1-3 * **4:2-3:** Mt 13:34-35; Mk 4:33-34

towa atu pituto, pii kokoli lale tupana tene oko akipe lo bala tipa peainipia.

¹¹⁻¹² Tipa peai-kola, balato utupanena pii okone yano peyoto, takita atalaini wandakali tupamane yamapane peke leaindo, Goteto utupanena koo tupa apolopeya leaipia. Tene okonena, utupane-mane yamapane peke naleakale nembo toto, nambato pii kokoli tupa angu utupane lamalu-wakola, ole kambuangga utupane-mane nambana pii okone ale wato teke, pii okonena tene tupa katulo nembo natolopeyai. Ole kambuangga utupane-mane nambana piape andoto teke, Goteto pitaka taka ando atalane lo katulo anda napulupeyai. Wuane tekeko, Goteto pitaka taka ando atalane lo pii wamba too pene yane oko nambana disaipolo tupa yakamanga lapana yane leaipia.*

¹³ Wuane lalu, Jisasato utupane lamawuato, yakamoto pii kokoli okonena tene oko nembo nateaindo, anu puato, yakamoto pii kokoli waka tupa pitakana tene tupa nembo tolopeyaipe leaipia.

¹⁴ Akali mindimane tomo waini papaka lalane pua teke, akali mindimane Gotena pii layene oko lalane.

¹⁵ Akali mindimane tomo waini papaka lea-kola, minditupa ambe asininga tepa ya-kola, eka minditupa epoto, utupane neaini. Wuane pua teke, akali mindimane Gotena pii oko leya-kola, wandakali minditupa-mane pii okone ale wato, bilipi lalaini tekeko, okone angi teke Satane epoto, Gotena pii utupanena nembo-tenenga eya okone mo alu piya alane.

¹⁶ Tomo waini minditupa ambe ana tokonga yuu anjako yane mindina tepa wato, poka loto, anda yane tekeko, ana tupa nai-mane tote pea-kola, waini utupane kapu tamangga yaepia. Wuane pua teke, wandakali minditupa-mane Gotena pii oko ale wato, wamba ini bulupane epele wato, bilipi lalaini.

¹⁷ Wuane tekeko, utupane-mane Gotena pii oko bilipi lo ateyai-kola, wandakali waka minditupa-mane kenda-pene andane tupa wandakali utupanenga maiki piyaini. Maiki peyai-kola, Gotena pii oko bilipi leyama nayu nalene wandakali utupane yakama pini wayumane peya napene gulo atoto, ole ukupini ajalapo angu bilipi lo atalu, Gote wamba ini kapoyale awua tepa alaini.

¹⁸⁻¹⁹ Tomo waini minditupa ambe tani koo ani atene tupa ika lalane yuu mindina tepa wato, poka lo ika leaini tekeko, tani koo ani atene tupa andayoto, utupane peyayo neaipia. Wuane pua teke,

wandakali minditupa-mane Gotena pii oko ale wato, wamba bulupane bilipi lalaini tekeko, matili kenda-pene minditupa utupanenga epeya-kola, utupane-mane anu pimape lo nembo kambua talaini. Minditaka kambua mo yatawa atalaini mana oko epele wete wato, utupane-mane munipi, waka minditakapi, utupane kambua miaima laka lo nembo talaini mana okone-mane Gotena pii oko ombo alane. Tene okonena, wandakali utupane-mane yuu okona minditaka eya tupa anu pua mia-makalepe lo nembo kambua teyai-kola, Gotena pii yakamanga eya okomane dini lia napiyane.*

²⁰ Tomo waini minditupa yuu epene mindinga tepa wato, dini kambua lialane pua teke, wandakali minditupa-mane Gotena pii oko ale wato, bilipi leyama nayu leyai-kola, utupanenga dini kambua lialane. Minditupanga dini paiyasa tepo lialane. Minditupanga dini paiyasa wataka lialane. Minditupanga dini andete mindiki lialane. Jisasato wuane leaipia.

Lamu Okona Pii Kokoli Oko Luku 8:16-18

²¹⁻²² Wuane lalu, Jisasato wandakali utupane tipa puato, sisopene mindimane lamu mindi ombo yakale nembo toto, wandakali-mane lamu okone kayuto, awua epalaepa leaipia. Pee, lamu okone yalane toko mindina pangosa yata wakale nembo toto, balato lamu awua epalaepa. Jia. Wandakali-mane lamu okone tepolo tokonga yata wakale nembo toto, kayu awua epalane. Wuane pua teke, andipa minditaka mindi too pitane yando, Goteto okone too pitane at-apowa ateakale lo ando kondola napulupeyai. Jia. Minditaka andipa too pua, ombo atane eya tupa pitaka matili panakame yolopeya-ko.*

²³ Wandakali ale asia yene tupa yakamoto pii okone wayumane ale alapape. Jisasato wuane leaipia.

²⁴⁻²⁵ Wuane lalu, balato utupane lamawuato, yakamoto wandakali yangone mindinga mana minulai pua teke, Goteto mana okone teke yakamanga wayumane wete minulu-peyai. Wandakali mindimane Gotena pii oko wayumane bilipi leando, Goteto balana bilipi oko minu tai laya olakola, wandakali okonemane Gotena pii oko bilipi leyo nayu lolopeya. Wuane tekeko, wandakali mindimane Gotena pii oko bilipi leyo nayu naleando, Sataneto wandakali okonena bilipi oko mo alu piya yakale lo Goteto ando kondolo-peyako. Yakamoto

* ^{4:11-12:} Ais 6:9-10; Ap 28:26-27 * ^{4:18-19:} Mt 19:23-24
Mt 7:1-2; 13:11-12; 25:28-29; Lk 19:26

* ^{4:21-22:} Mt 5:15; 10:26; Lk 11:33; 12:1-3 * ^{4:24-25:}

Gotena pii oko ale wato, wayumane nembo talapape. Jisasato wuane leaipia. *

Tomo Waini Andayalane Okona Pii Kokoli Oko

²⁶ Wuane lalu, Jisasato pii kokoli waka mindi utupane lamawuato, akali mindi-mane tomo waini papaka lalane pua teke, Goteto nanima ando atalane leaipia.

²⁷ Akali mindimane tomo waini papaka lalu, ole dindi lo bala utulu paliki, upa pitane ika laka, peya-kola, tomo waini utupa poka loto, anda yalane tekeko, anu puato, poka lo anda eyape lo akali okonemane anda napiyane.

²⁸ Bulupane yuu-mane dini tupa poka laya wato, anda eya-kola, papula peyalane. Papula peyalu, dini lialane.

²⁹ Dini nape yola-angi, tomo mandipe-pene guleya oko andoto, akali okonemane napia awua poto, wamba kapoyale yalane. Jisasato wuane leaipia. *

Maseta Waini Okona Pii Kokoli Oko

Matiyu 13:31-32; Luku 13:18-19

³⁰ Wuane lalu, Jisasato pii kokoli waka mindi utupane lamawuato, Goteto wandakali ando atalane piape oko aki mindi towa makande pimape leaipia. Nanimoto pii kokoli andoko loto, Goteto wua pua, wandakali tupa ando atalane lamape.

³¹ Maseta waini oko yuu okona tomo waini waka yalane tupa pitaka sia minuto, anjako wete eya-kola, wandakali-mane yandalaini.

³² Yandeyai-kola, maseta waini okone poka lo anda yoto, eenga tomo waka tupa pitaka sia minalane. Kembone tupa andane peleya-kola, eka tupa kembone tupana anda puato, tambosa pitiyaini. Wuane pua teke, ini bulupane Goteto wandakali anjalapo angu ando atoto, piape pua ateya-kola, matili balana yame tupa andane kambua wete atalaini pua atolopeya. Jisasato wuane leaipia.

Jisasato Pii Kokoli Tupa Angu Lamaiyane Oko

Matiyu 13:34-35

³³ Wandakali-mane pii kokoli okonepene tupa ale wato, katulo pii utupanena tene oko nembo tolopeyai nayuto, Jisasato pii kokoli okonepene kambua loto, Gotena pii layene oko utupane lamai-yaepia.

³⁴ Balato pii mindikipi mindi panakame nalene, pii kokoli angu lamaiki peane tekeko, matili balana disaipolo tupa bala towa angu ataka peai-angi, balato pii kokoli utupanena tene tupa lapana aka peaplia.

Jisasato Popo Andane Lo Awua Epeane Mindi Tepa Yakale Leane Oko

Matiyu 8:23-27; Luku 8:22-25

³⁵ Ole okone angi teke, nai andaka pea-kola, Jisasato balana disaipolo tupa lamawuato, nanima ipa angini okona amo yangi maa leaipia.

³⁶ Maa lea-kola, wandakali amunguli peaini tupa ateakale lalu, balana disaipolo tupa sipi bala peteane okona peakaiyu lalu, bala towa atu peai-kola, sipi waka mindi-tupa utupane towa atu teke peainipia.

³⁷ Ipa angini okona tombenenga peai-kola, popo andane wete mindi lo awua epeane okomane ipa andane wete mindi taimane mina ika laya yaepia. Ipa ika leane okonemane sipi oko ango mangua wato, ipa pangosa mo landa peyoyale peaplia.

³⁸ Okone angi, Jisasa bala sipi okona tipinisa kanda yane okona palea-kola, balana disaipolo tupamane bala peya ika loto, tisa, nanima omoyale peyama oko nimbato mee ya nembo telepe lo bala tipa peainipia.

³⁹ Tipa peai-kola, bala ika loto, popo leane oko laiya lalu, ipa okone lamawuato, ema napene, mee yaa leaipia. Wuane lea-kola, popo leane oko tepa ya-kola, ipa taimane ika leane oko tepa alu, ema anjakopi mindi naapeaplia.

⁴⁰ Wuane pea-kola, balato akali utupane tipa puato, anu peakale yakama yuku eyaipe. Yakamato Gote lo bilipi naleyaipe leaipia.

⁴¹ Wuane lea-kola, utupane-mane yuku wete wato, yakama teke-teke pii lalawa puato, popo andane lala okola, ipa taimane ika lala okola, okonelapo lapotaka-mane balana pii ale eyapi-ko. Akali oko api wete ateyape leainipia.

5

Jisasato Akali Mindina Sipitisa Koo Ateaini Tupa Poyo Wateane Oko

Matiyu 8:28-34; Luku 8:26-39

¹ Jisasa balana disaipolo tupa towa ipa angini Galili okona amo-yangi poto, Getasa tano okona tane wandakali tupana yuu okona peakaiyu leainipia.

²⁻⁵ Sipitisa koo mindi yuu okonena tane akali mindinga ateya-kola, balato wandakali mali tupana tombenga ataka piyaepia. Wamba ole kambuangka akali minditupa-mane anangapupi, sene endepi, utupane-mane akali okone andi leaini tekeko, balato sene tupa minu toae lo apiaka piyu, anangapu tupa minu koyoto, apiaka pikia piya ya-kola, wandakali-mane dee lapone sene ende-mane akali okone katulo andi nalape-pene guleaipia. Utulupi, otongapi, ole dindi lo bala wandakali

* **4:29:** Jol 3:13; Lap 14:15

mali tupana tombenga atoto yandopi, yuu wangiane tupana atoto yandopi, bala kalae loto, bala tane ana-mane katiki pua atalaepia. Jisasa bala sipi oko tepa alu, ipa matenenga epea-kola, sипитиса koo atene akali okonemane wandakali mali piyaini ama okone tepa alu, bala malanda olo epeaipia.

⁶ Bala amonga wete atoto, Jisasa andalu, taimane epoto, bala ateanga aiki leka yaepia.

⁷⁻⁸ Aiki leka ya-kola, Jisasato sипитиса koo mindi akali okonenga atene oko lamawuato, nimbato akali oko tepa alu, puu leaipia. Wuane lea-kola, sипитиса koo okonemane pii taimane wete loto, Gote andane wetete okona Iwanane Jisasa nimbato nambanga aki pulape. Nimbana weno minuto, nambato tandaka andane nimba gii napulupeyawa. Goteto andeya laa leaipia. *

⁹ Wuane lea-kola, Jisasato bala tipa puato, nimba gene apipe leaipia. Wuane lea-kola, akali okonemane balana pii okone yano peyoto, sипитиса koo kambua nambanga ateya-kola, nambana gene oko ami lalaini leaipia.

¹⁰ Akali okonemane Jisasa-o-o, sипитиса koo tupa yuu oko tepa yakale loto, nimbato utupane peyo watolene leaipia.

¹¹ Okone ang, yia yomo andane mindi amonga-yale atoto, yuu wangiane mindina tani no ateainipia.

¹² Ateai-kola, sипитиса koo utupane-mane Jisasa lamawuato, nanim yia utupanenga kolandaka lamakale nembo teyama-ko. Nimbato nanim utupanenga kolandaka lalapa laa leainipia.

¹³ Wuane lea-kola, utupane-mane wuane peakale lo balato ando konda yakkola, sипитиса koo utupane-mane akali okone tepa alu, yia utupanenga kolandaka leainipia. Kolandaka lea-kola, yia tausene lapo utupane pitaka wangiane okona taimane nena pulu, ipa angini peteane okona peakoto, ipa nalu, omeainipia.

¹⁴ Omeai-kola, yia yatawa atalaini akali tupamane tano okonapi, yuu waka tumanapi, utupanena taimane poto, mangene Jisasato peane tupa lo tawe yai-kola, anu piyape lo tatake wato, wandakali tupamane andolo epeainipia.

¹⁵ Utupane-mane Jisasa ateanga epoto andeai-kola, akali wamba sипитиса koo kambua wete atene ateane oko bala mini palu, tonu puato, peteanga andoto, utupane-mane yuku yainipia.

¹⁶ Yuku yai-kola, mangene wamba peane oko andeaini wandakali tupamane wandakali epeaini tupa lamawuato, Jisasato akali wamba sипитиса koo atene ateane oko

mo atu yala-kola, yia tupa ipasa poto, oma-lai lo lamai-yainipia.

¹⁷ lamaiya-kola, wandakali utupane-mane Jisasa taimane lamawuato, nimba nanimana yuu oko tepa alu puu leainipia.

¹⁸ Puu leai-kola, Jisasa bala sipi okona peakaiyu lea-kola, akali wamba sипитиса koo atene atu yane okomane Jisasa tee loto, namba nimba towa atu baape leaipia.

¹⁹ Baape lea-kola, Jisasato jia lalu, nimba andaka poto, Akali Andane okomane nimba ondo wato, nimba moyo wua piya lo nimbana yame tupa lamaiki pua atape leaipia.

²⁰ Wuane lea-kola, akali okone bala poto, Dekapilisa disitiki okona tane wandakali tupa lamawuato, Jisasato namba moyo wua piya lea-kola, wandakali pitaka-mane ale wato, epele wato, nembo kambua teainipia.

Jisasato Wanda Mindi Mo Atu Yalu, Wana Omene Mindi Mina Ika Leane Oko Matiyu 9:18-26; Luku 8:40-56

²¹ Jisasa bala sipi mindina pitiyu, lapone ipa angini okona amo-yangi poto, matenenga atea-kola, wandakali kambua wete epo amunguli peainipia.

²² Amunguli peai-kola, Juta yamena lotu anda oko ando atalane akali gene Jaitusa lene mindi epoto, Jisasa andoto, bala ateanga aiki lekawa tombawua leaipia.

²³ Tombawua loto, balato Jisasa taimane lamawuato, namba wanane oko omoyale peya-ko. Nimbato bala mo atu yole-kola, bala saka peteakalenga, nimba epoto, nimba kini balanga yata ola leaipia.

²⁴ Wuane lea-kola, Jisasa bala akali okone towa peapi-kola, wandakali kambua longo waka-mane bala atu tongope lama-lama atu peainipia.

²⁵ Peai-kola, ee ana alesa kii kalo teke pitiyane wanda mindi bala wandakali utupane atu peainipia.

²⁶ Wamba balato dokosa waka-waka kambua andolo puku puato, balana munipi, waka minditaka yane tupapi, utupane pitaka maya-kola, utupane-mane ole kambuangga tandaka andane bala mayaini tekeko, balana siki okone atu nayene, andane teke guleaipia.

²⁷⁻²⁸ Wandakali-mane bala lamawuato, Jisasato wandakali tupa mo atu yalane leai-kola, wanda okonemane ale wato, nimbato balana tonanga wata ewando, nimbana siki oko atu yolopeya nembo teapia. Wuane nembo toto, balato wandakali kambua asini peaini tupana tombenenga Jisasana masianenga epoto, balana tonanga wata yaepia.

* 5:7-8: Mk 1:24

²⁹ Wata ya-kola, okone angi teke wanda okonena siki oko atu ya-kola, balana umbaininga siki okone atu yala nembo teaipia.

³⁰ Jisasana tai-lene minditupa wanda okonenga pea-kola, balato wandakali kambua tupana tombenenga atoto, mopeke loto, apito nambana tonanga wata alape lo tipa peaipia.*

³¹ Tipa pea-kola, balana disaipolo tupamane balana pii okone yano peyoto, wandakali kambua-mane nimba ata tongope lama peyai oko nimbato andeleko. Anu peakale nimbato wandakali tupa tipa puato, apito namba wata alape lelepe leainipia.

³² Utupane-mane wuane leaini tekeko, apito bala wata alape lo andoyale, balato andamo nena pua ateipia.

³³ Jisasana tai-lene minditupa nambanga epala-kola, balato namba ani ateyape lo andamo nena pua ateya lo andoto, wanda okonemane yuku wato, putu-putu peyoto, Jisasa ateanga epeaipia. Epoto, aiki lekawa, tombawua loto, mangene enene peane tupa pitaka bala lamai-yaepia.

³⁴ lamaiya-kola, Jisasato bala lamauwato, wanane, nimbato nambanga tungi peyoto, bilipi lele okonena, nimbato nimbana siki oko mo atu yalo-ko. Nimba mini epene palu puu leaipia.*

³⁵ Balato pii okone lo atea-kola, akali minditupa-mane Jaitusa okona andaka atala epoto, bala lamauwato, nimba wanane oko omala-ko. Tisa oko nimba towa atu masia-pene epolane konda yakale leainipia.

³⁶ Wuane leai-kola, Jisasato Jaitusa nimbato nembo kambua natene, mee nambanga tungi peyoto, bilipi lo atape leaipia.

³⁷ Wuane lalu, balato Pitapi, Jemesapi, balana amene Jonepi, utupane angu makale ipulupa loto, wandakali waka mindikipi mindi bala watama epeakale lo ando konda nayaepia.

³⁸ Bala utupane towa atu Jaitusa okona andaka peakaiyu loto andeai-kola, wandakali tupamane yamataka lo ai taimane leainga andeapia.

³⁹ Andoto, bala anda-pango kolandaka loto, wandakali utupane lamauwato, andopane oko oma napene, mee limu paleyako. Anu peakale yakamato yamataka lo ai taimane leaipia.

⁴⁰ Wuane lea-kola, utupane-mane bala lamba loto, giwa yai-kola, balato utupane pitaka kamaka peakale lo peyo watalu, balana disaipolo tepo tupapi, wana okonena angini, ayianepi, utupane angu atu poto, wana omene yane lumu okona peainipia.

⁴¹ Jisasato wana okonena kininga minuto, talita kumi leaipia. Nanimana pii lo mopeke loto, wana nimba ika laa leyo leaipia.*

⁴² Wana okone bala mali ana alesa angu pene petea-kola, Jisasato wana lea. Ika laa lea-kola, okone angi teke wana okone bala ika loto, epoko pea-kola, balana angini, ayiane-la, liyamba moko andane wete leapelepia.

⁴³ Wana okone ika lea-kola, Jisasato balana angini, ayiane-la, okonelapo lamauwato, nimbato wana omene oko mina ika leyo oko liyambato wandakali mindikipi mindi lamaulapele. Jia wete leaipia. Wuane lalu, wana oko ulia neakale maiyapa leaipia.

6

Nasatesa Tane Tupamane Jisasa Masia Mayaini Oko

Matiyu 13:53-58; Luku 4:16-30

¹ Jisasa bala yuu okone tepa alu, balana yuu tene okona pea-kola, balana disaipolo tupamane bala watama peainipia.

²⁻³ Sambasa angi, balato Juta yamena lotu anda okona poto, pii mana lamaiya-kola, wandakali kambua-mane ale wato, moko wete loto, pii lalawa puato, akali oko bala kamanda pia oko andeyama leainipia. Bala Matiya iwanane. Bala Jemesapi, Josepepi, Jutasapi, Saimonepi, utupanena amene. Bala imalinu tupa nanimu towa wali atu pitiyamane. Pii mana balanga eya tupa waka mindi-pene yaluva-ko. Balato pii mana utupane ani tawe meae-yape. Balato anu puato, metekolo piape tupa piyanepi. Wuane loto, utupane-mane balana pii oko ale oyale embo yainipia.*

⁴ Balana pii ale oyale embo yai-kola, balato utupane lamauwato, potopesa akali mindimane pii leya-kola, balana yuu tene okona tane wandakali tupapi, balana anda okona atalaini wandakali tupapi, bala tanena yame tupapi, utupane-mane balana gene oko laiyu na-lalaini tekeko, yuu waka tupa pitakana tane wandakali tupamane balana gene oko laiyu lalaini leaipia.*

⁵⁻⁶ Balana yuu tene okona tane wandakali kambua-mane bala lo bilipi naleai-kola, bala moko loto, nembo kambua teaipia. Wandakali kambua-mane bala lo bilipi naleai-kola, balato balana kini oko wandakali siki pelene anjalapu minditupanga angu yata wato, mo atu yalu, metekolo piape waka mindi katulo napene, konda yaepia.

* 5:30: Lk 6:17-19

* 5:34: Mk 10:52; Lk 7:50; 17:19

* 5:41: Lk 7:14

* 6:2-3: Jo 7:15

* 6:4: Jo 4:43-44

*Jisasato Balana Disaipolo Tupa Piape
Pulu Pulupa Leane Oko
Matiyu 10:5-15; Luku 9:1-6*

^{6b} Jisasa balana yuu tene oko tepa alu, tano anjako waka tupana puku puato, Gotena pii mana lamaiki peaipia.

⁷ Wuane puato, balana disaipolo alesa tupa ipulupa loto, sипитса koo tupa peyo watolane tai-lene oko utupane maiyu, yakama lapo-lapo lo piape pulu pulupa leaipia.

⁸ Pulupa loto, balato utupane lamawuato, yakamato asia polai tupana ulia yandopi, nuu yandopi, muni yandopi, waka minditaka yandopi, utupane mandi napene, kalango angu aiyu pulupape leaipia. *

⁹ Yakamato sukee piyapale tekeko, singilisa lapo na-piyapape leaipia.

¹⁰ Wuane lalu, balato pii mindi tako pua loto, yakama yuu mindina polai-angi, anda anduanne mindimane yakama yatawa paleando, yakama anda waka mindina pali-pali napene, anda mindiki okonena angu palu atoto, yuu okonena epoko puato, piape pua atalapape leaipia. Yakama yuu okone tepa alu, polai-angi, anda okone tepa alu, pulupape.

¹¹ Yuu mindina tane wandakali tupa-manе Gotena pii yakamato lamaulai tupa ale naene, yakama yatawa pali naapeaindo, utupane yakama tane mana koo mineyama lo andeakalenga, yakamana kenenga yuu kangalamu atolane tupa tanda lo tepa alu, yuu okone tepa alu, pulupape. Jisasato wuane leaipia. *

¹² Wuane lea-kola, balana disaipolo alesa akali tupamanе poto, wandakali tupa lamawuato, yakama yamapane peke lalapa leainipia.

¹³ Wuane loto, utupane-manе sипитса koo kambua peyo wataka, olipi dini ipane tupa wandakali siki pelene kambua tupanga aiya amawuato, utupanena siki tupa mo atu yaka peainipia. *

*Etoteto Jone Maa Pai Leane Oko
Matiyu 14:1-12; Luku 3:18-22; 9:7-9*

¹⁴⁻¹⁶ Jisasato metekolo piape kambua piki pua atea-kola, wandakali kambua-manе balana gene oko laiyu leainipia. Yangi-manе akali okone bala llainja ateya leainipia. Yangi-manе bala potopesa akali wamba ateaini okonepene mindi ateya leainipia. Yangi-manе pii waka mindi loto, Goteto ipa peya-maiyane akali Jone malinga ika laya wato, bala minu tai laya eya-kola, balato katulo metekolo piape utupane pua atalua leainipia. Wuane lea-kola, kinji Etoteto ale wato, wamba nambato

Jone maa pai lewa oko bala malinga ika lapia yaluа leaipia. *

¹⁷⁻²⁰ Anu peakale Etoteto Jone maa pai leaipiape. Wamba Etoteto balana amene Pilipi okona wetene Etoti-yasa oko tondo moto, kee lea-kola, Joneto Etote lamawuato, nimbato wanda oko tondo moto, kee lalu atele okomane Gotena loo oko angowa atele okonde lo lamaiki peaipia. Wuane lo lamaiki pea-kola, Etoti-yasato Jone towa yataka wato, bala peyo ome lokale nembo teane tekeko, Etoteto Jone bala Gotena akali epene tika-pene mindi ya lo nembo teaipia. Wuane nembo toto, bala ando yukuwa atoto, balana pii ale wato, nembo kambua teane tekeko, balana pii epelewa ale aka peaipia. Tene okonena, Etoti-yasato Jone peyo ome lolane lo yuku wato, Etoteto ami yanda yene minditupa lamawuato, mindimane Jone peyo ome lolane. Yakamato bala katapusa pua aindaka loto, bala ando atalapape lea-kola, Etoti-yasato katulo Jone peyo ome naleaipia. *

²¹⁻²⁴ Matili Etote bala angini-manе mandeanе oto oko epea-kola, Etoteto tomo kambua yangalapa loto, gapomane piape akali gene yene tupapi, ami ando atalaini akali tupapi, Galili disitiki okona akali kawane tupapi, utupane bala towa atu tomo nolo epeakale leaipia. Utupane epoto, tomo no peteai-kola, Etoti-yasa wanane oko epoto, danisa lea-kola, Etotepi, bala towa atu tomo no peteaini tupapi, utupane-manе andoto, epele yainipia. Epele wato, kinji Etoteto balana weno minuto, wana okone lamawuato, nimbato minditaka mindi mokale gii leendo, enene wete, nambato okone gukale. Yuu nambato ando atalawane oko tombo peyoto, yangisa gii leendo, nambato yangisa gukale leaipia. Wuane lea-kola, wana okone bala takita poto, balana angini tipa puato, nambato aki mindi gii loape leaipia. Wuane lea-kola, Etoti-yasato Jone peyo ome lolane asia mindi eya ya lo andoto, nimbato ipa peya-maiyane akali Jone okona kawane gii lape leaipia.

²⁵ Wuane lea-kola, wana okonemanе kinji oko peteanga kapoyale peke loto, epapu oko angi teke, ipa peya-maiyane akali Jone okona kawane oko pelesa andane mindina yata wato, namba gula leaipia.

²⁶ Wuane lea-kola, kinji oko bala mini kenda wete yane tekeko, akali utupane pitaka towa pituto, weno minuto, nimbato minditaka mokale gii leendo, enene wete nambato okone gukale lalo oko nembo toto, wana okona pii tanga na-lokale nembo teaipia.

* ^{6:8:} Lk 10:4-11 * ^{6:11:} Ap 13:51 * ^{6:13:} Jem 5:14

* ^{6:14-16:} Mt 16:14-16; Mk 8:28; Lk 3:18-22 * ^{6:17-20:}

²⁷ Wuane nembo toto, okone angi teke, kinji okomane ami yanda yene mindi lamawuato, nimbato Jonena maa oko pai loto, balana kawane oko mo awua ipu leaipia. Wuane lea-kola, ami yanda yene okone bala katapusa andaka poto, Jonena maa pai leaipia.

²⁸ Pai loto, balana kawane oko pelesa mindina yata wato, awua epoto, wana oko maya-kola, wana okomane kawane oko balana angini oko mayaepia.

²⁹ Etoteto Jone peyo ome lea-kola, Jonena disaipolo tupamane ale wato, balana umbauini oko mo awua poto, mali peainipia.

Jisasato Akali Tausene Yau Tomo Neakale Mayane Oko

Matiyu 14:13-21; Luku 9:10-17; Jone 6:1-13

³⁰ Matili Jisasana aposolo akali alesa tupa peke loto, bala ateanga epo amunguli puato, utupane-mane piape waka-waka peaini tupapi, pii mana lamai-yaini tupapi, utupane pitaka bala lamai-yainipia. *

³¹ Okone angi, wandakali kambua wete Jisasa ateanga po ipu pua ateakola, Jisasapi, balana disaipolo tupapi, utupane yakama tomo nolane oto mindi yaa napeaipia. Yaa napea-kola, Jisasato balana disaipolo tupa lamawuato, nanima angu wandakali napalene yuu mindina poto, gii ukupini mindi oto mo atamakale ipulupa leaipia.

³² Ipulupa lea-kola, utupane angu sipi mindina pitiyu, wandakali napalene yuu mindina makale loto, peainipia.

³³ Utupane yakama angu sipi mindina pitiyu peaini tekeko, wandakali kambuamane Jisasapi, balana disaipolo tupapi, utupane ukusane moyale peyay lo andeaini-pia. Andoto, tano tupa pitakana tane wandakali kambua asini tai loto, Jisasa moyale peane yuu okonena yakama wamba ini ingane poto ateakola, Jisasapi, balana disaipolo tupapi, utupane matili epeainipia.

³⁴ Epoto, Jisasa bala sipi oko tepa alu, ipa matene okona poto andea-kola, wandakali kambua wete ateaini tupa sipisipi yatawa atalane akali mindi ata napene gulo ateaina andoto, balato utupane ondo wato, pii mana kambua lamai-yaepia. *

³⁵ Matili nai andaka moyale pea-kola, balana disaipolo tupamane bala ateanga poto, wua leainipia: Wandakali napalene yuu mindina ateyama-kola, andipa ole leya-ko. *

³⁶ Wandakali utupane tano ajako mindina yandopi, wandakali mindina eenga yan-dopi, okonelapo mindina poto, yakamana

ulia nolane tupa kambea-kalenga, nimbato utupane peakale laa leainipia.

³⁷ Wuane leai-kola, Jisasato utupanena pii okone yano peyoto, yakama tane wandakali utupane tomo neakale maiyapa leaipia. Wuane lea-kola, balana disaipolo tupamane akali angu tausene yaupi mindi organe ateaina andoto, nanimato mindisa poto, muni kambua wete-mane betesa kamboto, wandakali utupane pitakanane neakale maipe-penepe lo bala tipa peainipia.

³⁸ Tipa peai-kola, balato utupane lamawuato, yakamanga betesa aki-tupi eyape lo andolo pulupa leaipia. Wuane lea-kola, utupane-mane andolo poto, nanimanga betesa yau, pisa lapo eya leainipia.

³⁹ Wuane leai-kola, balato utupane lamawuato, wandakali tupa yomo waka-waka gulo tani kaka-ene okona peteakale lalapa leaipia.

⁴⁰ Wuane lea-kola, wandakali minditupa wane andete, wane andete lo yomowa peteaini-pia. Minditupa paiseyasa yau, paiseyasa yau lo yomowa peteaini-pia.

⁴¹ Petai-kola, balato betesa yau tupapi, pisa lapo okolapi, utupane moto, ati kenga andaiyu loto, Gote wayu pele lalu, betesa tupa konde leaipia. Konde loto, balana disaipolo tupa mawuato, betesa utupane tale puato, wandakali tupa neakale maiyapa leaipia. Wuane lalu, balato pisa okonelapo konde loto, balana disaipolo tupa mayaepia. Mawuato, balato utupane lamawuato, yakamato pisa okonelapo tale puato, wandakali tupa pitaka-mane neakale maiyapa leaipia.

⁴²⁻⁴⁴ Akali tupa angu dii loto, tausene yau tupa tomo neainipia. Wandakali utupane pitaka-mane tomo no embo yai-kola, balana disaipolo tupamane betesapi, pisapi, mee akenane yane tupa mo yomo wato, basaketa nuu andane alesa tumbi laya wato, yata yainipia.

Jisasa Bala Ipa Angini Okona Tokonga Kee Atama Peane Oko

Matiyu 14:22-33; Jone 6:16-21

⁴⁵ Okone angi, Jisasato balana disaipolo tupa lamawuato, nambato wandakali utupane peakale lokalenga, yakamato sipi okona pitiyu, ipa angini okona amo-yangi poto, Betesaita tano okona ingane pulupa leaipia.

⁴⁶ Pulupa lalu, bala yuu wangiane mindina pote lolo peaplia. *

⁴⁷ Nai andaka pea-kola, disaipolo tupa sipi okona pitiyu, ipa angini okona tombenenga peai-kola, Jisasa bala angu yuu wangiane okonena ateapia.

⁴⁸ Yuu wangiane okonena ato andea-kola, balana disaipolo tupa moyale peaini ukusane ato popo andane mindi lo awua epeakola, utupane-mane sipi okone pulu lama moyale pitete wete yainga andeaipia. Matil yuu waa loyale muna pea-kola, balato akali utupane peteaini sipi okona moyale, ipa tokonga kee atama poto, utupane peaini mandaka gulo poto, utupane wata ai-peke lokale nembo teapia.

⁴⁹⁻⁵⁰ Balana disaipolo tupa pitaka-mane andeai-kola, bala ipa angini okona tokonga kee atama epeanga andoto, yama mindi epeya nembo toto, yuku wete wato, kalaе leainipia. Kalae leai-kola, balato utupane kapoyale lamawuato, namba Jisasa epeyoko. Yakama yuku naene, yamapanne tuu pua pitiyapa leapia. *

⁵¹ Wuane lalu, bala sipi okona peakaiyu lalu, utupane towa atu peteai-kola, popo andane leane oko tepa yaepia. Tepa yako, balana disaipolo tupa moko wete loto, nembo kambua teainipia.

⁵² Wamba balato wandakali kambua wete tupa betesa mayane-angi, balana disaipolo tupamane bala Gotena Iwanane ya lo nembo natene, piape okone anu pua peyape lo tatake yainipia. Tene okonena, bala epea-kola, popo andane leane oko tepa ya-angi, utupane-mane moko wete loto, nembo kambua teainipia.

*Jisasato Genesa-leta Tane Tupana Siki
Tupa Mo Atu Yane Oko
Matiyu 14:34-36*

⁵³ Jisasapi, balana disaipolo tupapi, utupane sipi okona pitiyu, Genesa-leta yuu okona peai-kola, ipa okomane sipi okone mindisa awua polane nembo toto, utupane-mane sipi okone ende mindimane andi leainipia.

⁵⁴ Jisasa balana disaipolo utupane towa sipi okone tepa yai-kola, yuu okonena tane wandakali tupamane akali epeya oko bala Jisasa ya lo andeaini-pia.

⁵⁵⁻⁵⁶ Andalu, wandakali utupane yakama yuu tene tupana peke loto, Jisasa wali epoyale peya lo wandakali tupa lamaiki peainipia. Lamaiki peai-kola, matili Jisasa bala tano andane tupapi, tano anjako tupapi, yuu waka tupapi, utupanena puku peakola, wandakali-mane bala yuu mindina epo ateya laka peainipia. Wuane laka peakola, wandakali waka tupamane ale wato, wandakali siki pelene tupa takea tokonga

paleakale laka puato, awua epoto, yuu utupanena wandakali epo amunguli piyaini ama tupana yata aka peainipia. Yata alu, utupane-mane Jisasa lamawuato, wandakali siki pelene tupamane nimbana tona duninga wata yakale lo nimbato ando kondape leainipia. Jisasato atu yalua lea-kola, bala wata yaini wandakali tupa pitakana siki tupa atu yaka peainipia.

7

*Gotena Loo Tupamane Yumbanena
Mana Tupa Sia Minalane Leane Oko*

Matiyu 15:1-9

¹⁻⁴ Patasai tupapi, Juta yame wandakali waka tupapi, utupane pitaka-mane yakama yumbanena mana kambua tupa wato minalaini. Mana utupane wato minuto, utupanena kapopi, siso-penepi, pene aene botonja-mane waa-penepi, utupane Gotena wenonga kalato ata napeakale nembo toto, utupane pai lo wete wasa-wasa peyalaini. Dee, utupane-mane yakama yumbanena mana wato minuto, makesanga atalu, peke loto, Gotena wenonga utupanena kii kalato ata napeakale nembo toto, utupanena kii pai lo wete wasa-wasa peyoto, tomo nalaini. Yakamana kii pai lo wete wasa-wasa napele, tomo naa na-piyaini. Alu mindi loo tupana mana andene akali minditupa Jutusaleme atala epoto, Patasai minditupa towa Jisasa ateanga epeainipia. Epoto andeai-kola, balana disaipolo tupamane kii pai lo wete wasa-wasa peya napene, Gotena wenonga yakamana kii kalato ate peta atene gulo atoto teke, tomo no ateaina andeaini-pia. *

⁵ Andoto, utupane-mane Jisasa tipa puto, anu peakale nimbana disaipolo tupamane nanima yumbanena mana yata-ene tupa wato mina napene, Gotena wenonga yakamana kii kalato ate peta atoto teke, tomo nalainipe leainipia.

⁶⁻⁸ Wuane leai-kola, Jisasato utupane lamawuato, wamba potopesa akali Aisayato andakasa alaini wandakali yakama andayo pii enene wete mindi lo pepa peyoto, wandakali utupane-mane yakamana ambulini-mane nambana gene oko laiyu lalaini tekeko, utupanena mini, yamapanne-la, okonelapo nambanga yaa napene, amonga yakale atalaini leapia. Wamba utupanena yumbane-mane mana minditupa yata yai-kola, yakamato mana utupane wandakali waka tupa lamawuato, Gotena loo tupa mana langeyama lalaini. Tene okonena, utupane-mane namba lo lotu lalaini mana okomane dini angini mindi lia napiyane. Aisayato wuane lo pepa

* 6:49-50: Lk 24:37

* 6:51: Mk 4:39

* 7:1-4: Lk 11:38; Mt 23:25-26

* 7:6-8: Ais 29:13

okone peleane pua teke, yakamato Gotena loo tupu masia mawuato, yakamana yumbane tupana mana yata ene tupu wato minu atalaini.*

⁹ Yakamato mana epene tupu wato mineyama nembo toto, yakama yumbanena mana utupane wato minuyale, Gotena loo tupu masia maiyaini.

¹⁰ Wamba Mosesato Gotena loo utupanena mindi yata wato, nimbana angini, ayiane-la, okone-lapona pangosa atoto, okone-lapona pii ale amawua atape leaipia. Wandakali mindimane bala angini yandopi, ayiane yandopi, okone-lapona mindi andayo pii koo mindi leando, yakamato bala peyo ome lalapape leaipia.*

¹¹⁻¹² Goteto wuane leane tekeko, yakamato wuane na-lalaini. Jia. Yakamato loto, wandakali mindimane balana angini yandopi, ayiane yandopi, okone-lapona mindi moyo maulane minditaka yatawa ateaya-kola teke, balato okonelapo lamawuato, nambato liyamba moyo minditaka gipe-pene tupu Gote mauwakale lo mandeke pua yata auwa lape-pene. Wuane leando, balato balana angini, ayiane-la, okonelapo mee aŋakopi mindi moyo napeakale lalaini.

¹³ Yakamato yakamana yumbane tupana mana okone wandakali tupu lamai-yaini okomane Gotena pii layene oko mee gulaya alaini. Yakamato mana okonepene kambua wato minalaini. Jisasato wuane leaipia.

*Gotena Wenonga Minditaka-mane Wandakali Mo Kalato Ataya Alane Oko
Matiyu 15:10-20*

¹⁴ Wuane lalu, Jisasato wandakali tupu bala ateanga pai pua teke ipulupa loto, utupane andayo, yakama pitaka-mane nam-bana pii oko ale wato, pii okonena tene oko wayumane nembo talapape leaipia.

¹⁵ Wandakali-mane minditaka moto, yakamana nee asianga aindaka loto, nalaini okomane Gotena wenonga utupane mo kalato ataya aa napiyane. Jia. Minditaka wandakalina nee asianga ato kamaka epalane tupamane Gotena wenonga wandakali utupane mo kalato ataya alane.*

¹⁶ [Wandakali ale asia yene tupamane pii oko ale wato, wayumane nembo talapape.] Jisasato wuane leaipia.

¹⁷ Wuane lalu, Jisasa bala wandakali amunguli pua ateaini utupane tepa alu, anda mindina kolandaka lea-kola, balana disaipolo tupamane bala tipa puato, pii kokoli lale okonena tene oko akipe leainipia.

¹⁸⁻¹⁹ Wuane leai-kola, balato utupane tipa puato, yakamatopi pii kokoli okonena tene oko nembo nateyaipie leaipia. Wandakali-mane tomo neyai-kola, tomo okone utupanena yamapanne okona anda-pango napalane. Jia. Minditaka moto, utupanena nee asia okona aindaka leyai tupu pitaka utupanena ini anda-pangosa peyakola, ii too apialaini-ko. Wandakali-mane tomo mindi neya-kola, tomo okonemane Gotena wenonga utupane mo kalato ataya na-alane. Jisasato wuane leane okomane tomo yame tupu pitaka Gotena wenonga kalato ata napene teke-teke eya leaipia.

²⁰ Wuane lalu, Jisasato pii mindi tako pua loto, minditaka wandakalina anda-pangosa ato kamaka epalane tupamane Gotena wenonga utupane mo kalato ataya alane leaipia.

²¹ Wandakali-mane nembo koo toto, pamuku pimakale, minditaka pake namakale, wandakali mindi peyo ome lamakale, wandakali waka mindina wetene yandopi, akalini yandopi, bala towa pamuku pimakale nembo talaini.

²² Dee, wandakali minditupa-mane minditaka kambua wete tupu mia-makale nembo talaini. Minditupa-mane yangone tupu minu koyamakale nembo talaini. Minditupa-mane yangone tupu andakasa amakale nembo talaini. Minditupa-mane mana yala-pene tupu mina-makale nembo talaini. Minditupa-mane wandakali waka tupu towa apiangu piyaini. Minditupa-mane wandakali waka tupu sia mineyama nembo talaini. Minditupa-mane wandakali waka tupu layangoto, lamba lalaini. Minditupa-mane kee aka pua atamakale nembo talaini.

²³ Nembo-tene koo utupane pitaka wandakalina anda-pangosa paleya-kola, wandakali-mane mana koo utupane wato minalaini. Wato miniyai-kola, Gotena wenonga mana koo utupane-mane wandakali utupane mo kalato ataya alane. Jisasato wuane leaipia.

*Pinisia Tane Wanda Mindimane Jisasa Lo Bilipi Leane Oko
Matiyu 15:21-28*

²⁴ Jisasa bala yuu okone tepa alu, Taya tano okona peaipia. Wandakali-mane bala epo ateya lo anda napeakale nembo toto, bala anda mindina kolandaka leane tekeko, wandakali mindimane bala andeapia.

²⁵⁻²⁶ Andoto, Jisasa epo ateya lea-kola, wanda mindimane ale yaepia. Bala Pinisia yame wanda mindi pituto, Sitiya potopinja okona peteane tekeko, balato Gitiki yameni mana tupu wato minalaepia. Sipitisa koo mindi wanda okonena wanane okonga

* ^{7:10:} Ek 20:12; 21:17; Lo 5:16 * ^{7:15:} Ap 10:14-15

atea-kola, wanda okone bala Jisasa ateanga poto, aiki leka wato, namba wanane okonga sipitisa koo ateya oko nimbato peyo watola leaipia.

²⁷ Bala Juta yame wanda mindi jia ya lo andoto, Jisasato bala lamawuato, nambato andopane tupana tomo tupa moto, peango tupamane neakale lo peya-amo lewando, kuai nalolo-peyako. Andopane tupamane tomo wamba ini no embo yakale lo nimbato ando kondaa leaipia.

²⁸ Wuane lea-kola, wanda okonemane balana pii okone yano peyoto, Akali Andane, nimbato enene lele tekeko, andopane tupamane tomo no peteyai-kola, peango tupa toko pangosa atoto, tomo pulu-lene tepe olane tupa nalaini leaipia.

²⁹ Wuane lea-kola, Jisasato bala lamawuato, nimbato wuane lele okonena, nambato sипитиса koo nimbana wanane okonga ateya oko peyo wateyo-ko. Nimba andaka peke loka leaipia.

³⁰ Wuane lea-kola, wanda okone andaka peke loto andea-kola, sипитиса koo okomane bala wanane oko tepe alu pea-kola, wana oko atu yoto, toko okona palu yanga andeaipia.

Jisasato Akali Ale Tuma Mindi Mo Atu Yane Oko

³¹ Okone angi, Jisasa bala Taya yuu oko tepe alu, Saitone tano okona puapo wato, Dekapolisa disitiki okona tombenenga poto, Galili ipa angini okona peakaiyu leaipia.

³² Peakaiyu lea-kola, wandakali minditupa-mane akali ale tuma mindi atu epeainipia. Akali okone bala katulo pii kuai lo na-la-laepia. Bala atu epeaini wandakali tupamane Jisasa tee loto, nimbana kii oko akali okonga yata olape leainipia.

³³ Wuane leai-kola, amunguli pua ateaini wandakali tupa atekale tepe alu, Jisasato akali okone atu aiyu poto, liyamba angu amonga-yale peapelepia. Amongane atoto, Jisasato balana kii ondene oko akali okonena ale asia okolapona pee lalu, apesango soo loto, akali okonena ekenenga wata yaepia.

³⁴ Wata alu, Jisasato ati kenga andaiyu loto, angamai minuto, epata leaipia. Pii okonena tene oko ale lumba leaipia.

³⁵ Ale lumba lea-kola, akali okonena ale lumbea-kola, okone angi teke balana ambuli asia tuma pitane ateane oko lumbu tepe ya-kola, balato pii kuai lo leaipia.

³⁶ Wuane pea-kola, Jisasato wandakali tupa lamawuato, yakamato mangene nambato piyo oko wandakali mindikipi mindi lamai na-piyapape leane tekeko, utupane-mane wandakali minditupa

lamai-yainipia. Lamai-yaikola, balato jia wete leane tekeko, utupane-mane balana pii okone tanga loto, wandakali kambua lamai-yainipia.*

³⁷ Lamai-yaikola, pii okone ale yaini wandakali tupa moko wete loto, Jisasato wandakali ale tuma tupa pii ale yakale leya-kola, ale alaini. Balato wandakali pii nalalaini tupamane pii leakale leya-kola, pii ale alaini. Balato piape pitaka kuai lo piyane leainipia.*

8

Jisasato Akali Tausene Tukumindi Tupa Tomo Neakale Mayane Oko

Matiyu 15:32-39

¹⁻³ Okone angi, wandakali kambua wete pai pua teke epo amunguli peai-kola, utupane-mane tomo nolane mindi nayaepia. Naya-kola, Jisasato balana disaipolo tupa ipulupa loto, utupane lamawuato, wandakali utupa namba towa ole tepoai ataima leaipia. Utupa ulia nolane yaa napyea-ko. Wandakali yuu tepanda ato ipupiai tupa tomo nanene, andaka peakale lewando, utupane asininga ulia nono wato, lemowa lomba-pene yolaini. Nambato utupa ondo eyo leaipia.*

⁴ Wuane lea-kola, balana disaipolo tupamane bala tipa puato, wandakali napalene yuu okona atoto, akali mindimane betesa kambua wete ani tawe moto, wandakali utupa no embo yakale malupeyape leainipia.

⁵ Wuane leai-kola, balato utupane tipa puato, yakamanga betesa aki-tupi eyape leaipia. Wuane lea-kola, utupane-mane nanimanga betesa yanasa eya leainipia.

⁶ Wuane leai-kola, balato wandakali tupa lamawuato, yakama yuunga pitiyapa leaipia. Peteai-kola, balato betesa yanasa tupa moto, Gote wayu pele lalu, utupane konde leaipia. Konde loto, balana disaipolo tupa mawuato, utupa neakale maiyapa lea-kola, utupane-mane betesa tupa tale puato, wandakali tupa neakale mayainipia.

⁷ Balana disaipolo tupanga pisa arjako mindilapo ya-kola, Jisasato utupane moto, Gote wayu pele lalu, konde leaipia. Konde loto, balana disaipolo tupa mawuato, utupa neakale maiyapa lea-kola, utupane-mane betesa tupa tale puato, neakale mayainipia.

⁸⁻⁹ Mayai-kola, akali angu tausene tukumindipi mindi ateaini tupamane no embo yai-kola, balana disaipolo tupamane tomo akenane yane tupa mo yomo wato, basaketa nuu andane yanasa tumbi laya

* 7:36: Mk 1:43-45 * 7:37: Ais 35:5 * 8:1-3: Mk 6:34-44

yainipia. Wuane peai-kola, Jisasato wandakali tupa pulupa lo lamai-yaepia.

¹⁰ Pulupa lalu, Jisasa balana disaipolo tupa towa sipi mindina peakaiyu lo pitiyu, Dalamanusa disitiki okona peainipia.

*Metekolo Piape Mindi Pula Leaini Oko
Matiyu 16:1-4*

¹¹ Dalamanusa disitiki okona peai-kola, Patasai minditunga epoto, Jisasa towa pii yanda peainipia. Utupane-mane bala minu mandeke puato, Goteto nimba moyo ateyakola, nimbato piape pilini oko andawa loto, metekolo piape mindi pula leainipia.

¹² Wuane leai-kola, bala yamapanne kenda wato, utupane tipa puato, anu peakale wandakali andipa ateyai tupa yakamoto namba languato, Goteto nimba moyo ateyakola, nimbato piape pilini oko andawa loto, metekolo piape mindi pula lalainipe leaipia. Nambato pii enene mindi yakama langeyo. Goteto namba moyo ateyakola, nimbato piape piyawane tupa wandakali andipa ateyai tupa yakama andawa loto, nimbato metekolo piape mindi napulupeyawa leaipia.*

¹³ Wuane lalu, bala Patasai tupa tepa alu, pai pua teke sipi mindina peakaiyu lo pitiyu, ipa angini okona amo-yangi peaiapia.

*Waiwa Ando Atalapape Leane Oko
Matiyu 16:5-12*

¹⁴ Jisasana disaipolo tupamane betesa embesa wato, sipi okona peakaiyu leai-kola, betesa mindiki sipi okonena yaepia.

¹⁵ Okone ang, Jisasato balana disaipolo tupa taimane lamawuato, Patasai tupapi, Etotepi, utupanena palawa yangalaini pauta okomane yakama mo lawa pulane. Waiwa ando atalapape leaipia.*

¹⁶ Wuane lea-kola, balana disaipolo tupa yakama teke-teke pii lalawa puato, nanimanga betesa naeya-kola, balato wuane leya leainipia.

¹⁷ Wuane leyai nembo toto, balato utupane tipa puato, anu peakale yakama teke-teke pii lalawa puato, nanimanga betesa naeya leya leaipia. Yakamoto namba akali oko ateyakola, nembo natene, tatake eyaipia. Yakamoto kuai lo nembo nateyaipe.*

¹⁸ Yakama lee tene tupamane anda napeyaipe. Yakama ale asia yene tupamane ale naeyaipe. Yakama embesa eyaipia.

¹⁹ Wamba nimbato betesa yau tupa konde loto, akali tausene yau tupamane neakale maewa-angi, yakamoto akenane yane tupa mo yomo wato, basaketa nuu andane aki-tupi tumbi laya yaipe leaipia.

Wuane lea-kola, utupane-mane basaketa nuu alesa tumbi laya ema leainipia.*

²⁰ Wuane leai-kola, balato utupane tipa puato, wamba nambato betesa yanasa tupa konde loto, akali angu tausene tukumindi tupamane neakale maewa-angi, yakamoto akenane yane tupa mo yomo wato, basaketa nuu andane aki-tupi tumbi laya yaipe leaipia. Wuane lea-kola, utupane-mane basaketa nuu andane yanasa tumbi laya ema leainipia.

²¹ Wuane leai-kola, balato utupane tipa puato, nambato metekolo piape okonelapo pewe oko andoto teke, yakamoto namba Mesaya epolopeya leaini oko ateyakola, nembo nateyaipe leaipia.

*Jisasato Betesaita Tane Lee Koo Mindi
Lee Taya Yane Oko*

²² Jisasa balana disaipolo tupa towa Betesaita tano okona peai-kola, wandakali minditunga akali lee koo mindi Jisasa ateanga atu aiyu epoto, nimba kini-mane akali oko wata ape leainipia.

²³ Wuane leai-kola, Jisasato akali lee koo okone kii minu atu aiyu poto, tano oko tepa alu, amonga-yale peapelepi. Poto, Jisasato akali lee koo okona leenga apesango soo loto, balana kii lapotaka-mane akali okonena lenenga wata yaepia. Wuane piyu, balato akali okone tipa puato, nimbato minditaka mindi andelepe, anda napelepe leaipia.

²⁴ Wuane lea-kola, akali okomane balana pii okone yano peyoto, nambato akali minditunga andeyo tekeko, wayumane anda napeyokola, utupane ita gulene atoto, epoko peyai leaipia.

²⁵ Wuane lea-kola, Jisasato balana kii lapotaka-mane akali okona lee okolapo lapone teke wata ya-kola, akali okonemane kuai lo andeaipia. Balana lee kuai lo tea-kola, pitaka takai kuai lo andeaipia.

²⁶ Andea-kola, Jisasato bala lamawuato, nimba tano okona peke nalene, andaka puu leaipia.

*Pitato Nimba Mesaya Oko Atele Leane
Oko*

Matiyu 16:13-20; Luku 9:18-22

²⁷ Okone ang, Jisasapi, balana disaipolo tupapi, utupane Sisatiya Pilipai tano andane okona mandaka tano ajako yane tupa epoko peainipia. Asininga poto, balato utupane tipa puato, wandakali-mane namba andayo api ateyakola, lalainipe leaipia.

²⁸ Wuane lea-kola, utupane-mane bala lamawuato, wandakali minditunga-mane nimba ipa peya-maiyanne akali jone oko atele lalainipe leaipia. Minditunga-mane

* 8:12: Mt 12:39; Lk 11:29

* 8:15: Lk 12:1-3

* 8:17: Mk 6:52

* 8:19: Mk 6:41-44

* 8:28: Mk 6:14-16

nimba Ilainja atele lalaini. Minditupamane nimba akali potopisa wamba ateaini tupana waka mindi atele lalaini leainipia. *

²⁹ Wuane leai-kola, balato utupane lamawuato, utupane-mane wuane lalaini tekeko, yakamoto namba api ateya lalainipe leaipia. Wuane lea-kola, Pitato balana pii okone yano peyoto, nimba Mesaya oko atele leaipia. *

³⁰ Wuane lea-kola, Jisasato pii tai mindi utupane lamawuato, namba Mesaya oko ateya lo yakamoto wandakali mindikipi mindi lamai na-piyapape leaipia.

Akalina Iwanane Bala Omalu, Ika Lolopeya Leane Oko

Matiyu 16:21-28; Luku 9:21-27

³¹ Okone angi, Jisasato pii wenene mindi balana disaipolo tupa bulupane tewa lamawuato, Juta yame ando atalaini akali tupapi, pitisa akali kawane tupapi, loo tupana mana andene akali tupapi, utupane-mane Akalina Iwanane oko masia maulai-kola, bala tandaka kambua napepene guleya. Akali-mane bala peyo ome lolai-kola, ole teponena, bala malinga ika lolopeya leaipia.

³² Wuane pulupeya lo panakame lea-kola, Pitato bala atu aiyu amonga-yale poto, bala laiya loto, nimbato wuane nalape leaipia.

³³ Wuane lea-kola, Jisasa bala mopeke loto, balana disaipolo waka tupa andeaipia. Andoto, balato Pita laiya loto, nimbato Gotena nembo-tene oko wato mina napene, wuane lele leaipia. Nimbato wandakalinia nembo-tene oko wato minuto, Satane gulo wuane lele-ko. Nimba nambana masianesa puu leaipia.

³⁴⁻³⁸ Wuane lalu, balato balana disaipolo tupapi, wandakali waka amunguli peaini tupapi, utupane pitaka ipulupa loto, pii mindi utupane lamawuato, wandakali yame koo andipa ateyai tupamane Aiyane Gote angu lotu na-lalaini. Jia. Utupanemanne gote waka tupa lotu lalaini mana okomane pamuku pima epoko piyane yame gulo atoto, mana koo kambua tupa wato minu atalaini. Wuane pua ateyai oko andoto, wandakali waka minditupa-mane nambapi, nambana pii okopi, okonelapo bilipi leyama loyale yala wato, nanimia Jisasana yame ata naaneyama lolopeyai. Wuane lolai-kola, matili Ayiane Gotena tai-lene oko Akalina Iwanane okonga yola-kola, balana enjoie epene wete tupa towa epola-angi, balato wandakali utupane nambana yame ateyai loyale yala ola-kola, wandakali utupane katulo Gote towa saka atapowa ata napulu-peyai. Jia. Wandakali mindimane yuu okona minditaka eya tupa

pitaka mo yata wato teke, matili bala saka atapowa ata napeando, balana minditaka yola tupa pitaka-mane anu puato bala moyolo-peyape. Balato aki mindi mawuato, balana saka atapowa atolane oko katulo kambo molo-peke lolo-peyape. Wandakali mindi nambana yame atola-kola, namba yanda pingiyaini akali tupamane bala peyo ome lamakale lolopeyai. Wuane lolai-kola, wandakali mindi bala omolowane nembo toto, nambana yame ata napeando, Gote towa bala saka atapowa ata napulu-peyape. Wuane tekeko, wandakali mindi bala Gotena pii layene epene oko bilipi loto, nambana yame ateyai lo andoto, wandakali-mane bala peyo ome leindo, bala Gote towa saka atapowa atolopeya. Tene okonena, wandakali mindimane namba polowa okona epokale nembo teando, bala tane nembo natene, kenda-pene balanga epola tupa balana ita malamanda gulo aiyu, namba watama epeakale. Jisasato wuane leaipia. *

9

¹ Wuane lalu, Jisasato pii mindi tako pua loto, nambato pii enene mindi yakama langeyo. Wandakali oo ateya tupana minditupa wamba ini oma napene atoto andolai-kola, Goteto wandakali tupa taimane ando atolanga andolopeyai leaipia. *

*Jisasa Bala Waka Guleane Oko
Matiyu 17:1-13; Luku 9:28-36*

² Ole wataka pea-kola, Jisasato Pita, Jemesa, Jone ima utupane atu aiyu yuu wangiane kenga wete mindina iyu poto, yakama angu ateainipia. Okone angi, bala utupanena wenonga atoto, waka guleaipia. *

³ Balana tona peane tupa ake wete puto, tii pikoyo peaiapia. Yuunga wandakali mindimane lapa-lapa mindi ake okonepene katulo gulaya aa napiyane.

⁴ Jisasa waka gulea-kola, Ilainja, Mosesala, okonelapo epo pana wato, Jisasa towa pii lalawa pua ateainipia.

⁵⁻⁶ Wuane pea-kola, balana disaipolo tepo tupamane yuku-mane omeainipia. Yukumanne omoto, aki loape tatake wato, Pitato Jisasa lamawuato, tisa, nanimato yuu okona ateyama-kola, kuai leya-ko. Nanimia tepo akali tupamane anda aiyakame tepo pimakale. Mindi nimbana, mindi Mosesana, mindi Ilainjana, pingimakale leaipia.

⁷ Wuane lea-kola, mole mindimane epoto, utupane yame peyoto, ombo ya-kola, mole okonena ato pii mindi leane okomane loto, akali oo ateya oko bala

* 8:29: Jo 6:68-69; Mk 9:9 * 8:34-38: Mt 10:32-33,38-39; Lk 14:27 * 9:1: Mk 13:30 * 9:2: 2Pi 1:17-18; Ap 3:22

namba iwanane yamapane yene oko. Yakamoto balana pii ale amai-yapape leaipia.

⁸ Wuane lea-kola, okone angi teke, disaipolo tepo tupamane anda amo-nena peakola, akali waka mindi Jisasa towa atu ata napeaipia. Jia. Bala angu ateanga andeainipa.

⁹ Jisasato balana disaipolo tepo utupane towa atu yuu wangiane oko tepe alu, puu nena loto, pii tai mindi utupane lamawuato, yakamoto minditaka andalai oko wandakali mindikipi mindi lamai napene atama pulu, matili Akalina Iwanane oko malinga ika lola-angi, yakamoto wandakali tupa lamai-yapape leaipia.

¹⁰ Wuane lea-kola, disaipolo tepo tupamane ale wato, yakama teke-teke pii lauwatu, anu peakale balato Akalina Iwanane oko malinga ika lolopeya leyape leainipia.

¹¹ Wuane lalu, utupane-mane Jisasa tipa puato, Akalina Iwanane oko wamba ini epoto, omalu, malinga ika lolopeya yando, anu peakale loo tupana mana andene akali tupamane loto, potopesa akali Ilainja bala ini ingane yuunga peke lola-kola, matili Akalina Iwanane oko epolopeya lalainipe leainipia.

¹²⁻¹³ Wuane lea-kola, balato utupanena pii okone yano peyoto, enene, Gotena pii pepa pelene eya mindimane loto, Akalina Iwanane oko epeakale nembo toto, Ilainja bala ini ingane epoto, pitaka taka mo tika pulupeya layene eya tekeko, Ilainja bala epeane lo nambato yakama langeyo leaipia. Bala epea-kola, Gotena pii pepa pelene eya okomane layene eya pua, akali minditupa-mane balanga mana koo minamakale nembo teaini tupa pitaka mineainiko. Anu peakale Gotena pii pepa pelene eya mindimane loto, wandakali-mane Akalina Iwanane oko minu koyolai-kola, bala tandaka naape-pene layene eyape. Jisasato wuane leaipia.*

Jisasato Sipitisa Koo Atene Iwana Mindi Mo Atu Yane Oko

Matiyu 17:14-21; Luku 9:37-43

¹⁴ Jisasa, Pita, Jemesa, Jone ima utupane epoto andeai-kola, loo tupana mana andene akali tupamane Jisasana disaipolo waka tupa towa pii yanda pua ateai-kola, wandakali kambua longo waka-mane utupane ato mapu pua ateainipia.

¹⁵ Jisasa epea-kola, wandakali utupane-mane bala andalu, moko wete loto, bala ateanga taimane poto, nimba wayu epeleya leainipia.

¹⁶ Wuane leai-kola, balato utupane tipa puato, yakamoto aki loto, utupane towa pii yanda pua ateyaipe leaipia.

¹⁷ Wuane lea-kola, wandakali kambua wete ateaini tupana mindimane balana pii okone yano peyoto, tisa, namba iwanane okomane pii laa napeakale loto, sipitisa koo mindimane balana ambulini minu tambu leya-kola, nambato bala atu aiyu nimba atelenga epeyo leaipia.

¹⁸ Sipitisa koo okonemane bala minuto, mo lombeya-kola, apesango namba iwanane oko ambulininga epalane. Epeakola, balana nene tupa gititi gete loto, tiyongo latane yalane. Nambato nimbana disaipolo tupa lamawuato, sipitisa koo oko peyo wata alapa lalo tekeko, utupane-mane katulo bala peyo wata napiyai leaipia.

¹⁹ Wuane lea-kola, Jisasato wandakali tupa tipa puato, ole aki-tupinga namba lo bilipi nalene wandakali yakama towa namba atokale yape leaipia. Ole akitupinga nambato yakamana kenda-pene tupa awua atokale yape. Iwana okone bala atu aiyu namba ateyonga ipulupa leaipia.

²⁰ Utupane-mane iwana okone Jisasa ateanga atu aiyu epeai-kola, sipitisa koo okomane Jisasa andoto, iwana okone taimane mo lombea-kola, iwana okone bala peango-ngo pua ya-kola, apesango balana ambulininga epeaipe.

²¹ Wuane pea-kola, Jisasato iwana okona ayiane oko tipa puato, andoko angi bulupane tewa bala wuane peape leaipia. Wuane lea-kola, ayiane okomane balana pii okone yano peyoto, wamba bulupane bala iwana anjakonga ato, wuane peane leaipia.

²² Sipitisa koo okomane bala peyo ome loyale, ole kambuangga itanga peyo yanaga, ipanga peyo pee laka, piyane. Nimbato katulo bala moyeendo, nanima ondo wato, moyape leaipia.

²³ Wuane lea-kola, Jisasato bala tipa puato, anu peakale nimbato namba tee loto, nimbato katulo bala moyeendo, moyape lelepe. Wandakali mindimane namba lo bilipi leando, bala moyoyale nambato katulo pitaka taka piyawane leaipia.*

²⁴ Wuane lea-kola, iwana okona ayiane okomane pii taimane loto, nambato bilipi leyo tekeko, bilipi leyo nayu naley. Nimbato nambana bilipi oko minu tai laya wato, namba moyape leaipia.

²⁵ Wuane lea-kola, wandakali kambua taimane epo amunguli peainga andoto, Jisasato sipitisa koo oko laiya loto, sipitisa koo, nimbato iwana okona ale tuma pi maiyu, pii naleakale laya alene yako. Nimbato nimba langeyo nayu leyo-ko. Nim-

* **9:12-13:** Mt 11:14; Mal 4:5; Sam 22:1-18; Ais 53:3 * **9:23:** Mt 21:21; Mk 11:23

bato iwana oko tepa alu pulu, dee lapone balanga peke lolene leaipia.

²⁶ Wuane lea-kola, sипитиса koo okomane kalae loto, iwanaoko taimane mo malawai loto, bala tepa alu, peaipia. Pea-kola, iwanaoko omene gulene ya-kola, wandakali kambua-mane bala omala ya leainipia. *

²⁷ Utupane-mane wuane leaini tekeko, Jisasato iwana okonena kii minuto, bala mina ika lea-kola, iwana okone ika leaipia.

²⁸ Matili Jisasa bala anda mindina kolanda lea-kola, balana disaipolo tupa angu bala towa atu pituto, anu peakale nanimato katulo sипитиса koo okone peyo wata na-piyamape leainipia.

²⁹ Wuane lea-kola, balato utupanena pii okone yano peyot, wandakali-mane pote leyai-kola, sипитиса koo okonepene tupamane wandakali tupa tepa alu, palaini. Mangene waka mindi peyai-kola, na-palaini leaipia.

Akalina Iwanane Omalu, Ika Lolopeya Ole Lapone Leane Oko

Matiyu 17:22-23; Luku 9:43-45

³⁰⁻³¹ Okone angi, Jisasato balana disaipolo tupa angu mana lamauwakale nayuto, bala asia okona peya lo wandakali waka mindimane anda napeakale nembo teaiapia. Wuane nembo toto, balana disaipolo tupa towa anda okone tepa alu, Galili disitiki okona tombenga peainipia. Asini poto, balato utupane angu mana lamawuato, akali mindimane Akalina Iwanane oko ene pitula-kola, akali minditupa-mane bala peyo ome lolai-kola, ole teponera bala malinga ika lolopeya leaipia. *

³² Wuane lea-kola, utupane-mane ale wato, balato aki nembo toto, wuane leyape lo tatake yaini tekeko, utupane-mane bala tipa puyale yuku yainipia. *

Akali Gene Andane Wete Yene Api Ateyamape Leaini Oko

Matiyu 18:1-5; Luku 9:46-48

³³ Jisasa balana disaipolo tupa towa Kapaname tano okona poto, anda mindina kolandaka leainipia. Anda okonena atoto, balato utupane tipa puato, asini epalamangi, yakamoto aki loto, pii yanda pima epalaipe leaipia.

³⁴ Balato wuane leane tekeko, wamba utupane-mane nanimisa disaipolo ateyama tupana akali gene andane wete yene api ateyamape lo pii yanda pima epalama okona leya nembo toto, yala wato, yakama balana pii okone yano napeleaini-pia.

³⁵ Balana pii okone yano napeleai-kola, bala pituto, balana disaipolo alesa

tupa lamawuato, ipulupa leaipia. Epeakola, balato utupane lamawuato, akali mindimane gene andane wete yene atokale nembo teando, bala akali gene nayene gulo atoto, wandakali pitakana piape akali gulo atape-pene leaipia. *

³⁶⁻³⁷ Wuane lalu, balato andopane mindi kii minu atu aiyu epoto, balana disaipolo tupa tobenenga bala towa atu ateapelebia. Balato andopane okone ope loto, balana disaipolo tupa lamawuato, wandakali mindimane namba nembo toto, andopane okopene mindi moyando, balato namba moyola-kola teke pulupeya. Namba moyando, balato namba ati kenga atala yunga puu leane Gote oko moyola-kola teke pulupeya leaipia. *

Kenda-pene Gii Na-piyaini Wandakali Tupamane Nanima Moyalaini Leane Oko Luku 9:49-50

³⁸ Okone angi, Joneto Jisasa lamawuato, tisa, nanimato andalamakola, akali mindimane nimbanisa gene oko loto, sипитиса koo tupa peyo wato atala tekeko, bala nanimata watama na-epalane. Tene okonena, nanimato bala lamawuato, nimbato Jisasana gene loto, sипитиса koo tupa peyo watolene lamala leaipia.

³⁹⁻⁴⁰ Wuane lea-kola, Jisasa balana disaipolo tupa lamawuato, wandakali mindimane kenda-pene mindi nanimisa gii napene, nambana gene oko loto, metekolo piape mindi peando, balato namba andayo pii koo mindi wamba ini nalolo-peyako. Akali mindimane nambana gene oko loto, piape epene mindi pua ateando, yakamoto jia nalene, balato wuane peakale lo ando kondalapape. *

⁴¹ Nimbato pii enene mindi yakama langeyo. Yakama Kataisana yame ateyamape okonena, wandakali mindimane ipa ambuto, yakama nalapale geando, Goteto yole epene mindi wandakali okone maulupeya. Jisataso wuane leaipia. *

Koo Peakale Lo Mo Piya Alaini Mana Oko

Matiyu 18:6-9; Luku 17:1-2

⁴² Wuane lalu, Jisasa pii mindi tako pua loto, andopane namba lo bilipi leyai tupana mindimane koo mindi peakale loto, wandakali mindimane mo piya yando, Goteto kenda-pene andane wete mindi wandakali okonenga malupeya leaipia. Andopane mindimane koo peakale loto, wandakali mindimane bala mo piya oyale

* 9:26: Mk 1:26 * 9:30-31: Mk 8:31; 10:32-34; Jo 7:1 * 9:32: Lk 9:45 * 9:35: Lk 22:24; Mt 20:25-28; Mk 10:43-45
* 9:36-37: Mt 10:40 * 9:39-40: Mt 12:30; Lk 11:23 * 9:41: Mt 10:42

pula-kola, wandakali okonemane wuane napeakale loto, akali waka mindimane ana andane wete mindi wandakali okonena mane okona andi loto, ipa solewata andane okona awua aindaka leando, wandakali okone omolo-peya. Omalu, mana koo okone mina napula-kola, kenda-pene andane wete okone balanga naepolo-peya.

⁴³⁻⁴⁸ Goteto wandakali mindi yuu koo wetete okona awua aindaka leando, imi-mane wandakali okone no atapowa atolakola, ita too atapowa atene mindimane bala yango atapowa atolopeya tekeko, bala oma napene, tandaka andane wetete no atapowa atolopeya. Tene okonena, nimbania kini lapotaka ateakale kondole-kola, Goteto nimba yuu koo wetete ita too atapowa atene okonena awua aindaka leando, nimba koo wetete atolopele. Nimba kini mundu atene atoto, Gotena yuu epene okona saka atapowa ateendo, kuai lolopeya-ko. Nimbana kini-mane koo pula lo mo piya yando, kini okone kando lo apiape. Kene lapotaka ateakale kondole-kola, Goteto nimba yuu koo okona awua aindaka leando, nimba koo wetete atolopele. Nimba kene mundu atene atoto, Gotena yuu epene okona atapowa ateendo, kuai lolopeya-ko. Nimbana kene-mane koo pula lo mo piya yando, kene okone kando lo apiape. Lene lapotaka teakake kondole-kola, Goteto nimba yuu koo wetete okona awua aindaka leando, koo wetete atolopele. Nimba lene mindiki tene atoto, Gotena yuu epene okona saka atapowa ateendo, kuai lolopeya-ko. Nimbana lene-mane koo pula lo mo piya yando, lene okone luku apiape.*

⁴⁹ Juta yame-mane tomo mindi Gote opa mawua-yale atoto, Gotena wenonga koo tene mindi opa okonena nayakale nembo toto, sole minditupa tomo okonena ate loto, Gote lo opa maiyaini. Wuane pua teke, Gotena wenonga koo tene mindi wandakali tupanga nayakale nembo toto, ita tapeta gulene kenda-pene minditupa utupane pitakanga ipupe-pene.

Sole Kambua Yakamanga Atene Gulo Atalapape Leane Oko
Matiyu 5:13; Luku 14:34

⁵⁰ Sole-mane tomo mo tende piya alane tekeko, sole minditupa tende napene gule-ando, nanimoto anu puato, sole okone lapone mo tende piya olo-peyamape. Min-juni minditupa kapoyale tamualane nembo toto, wandakali-mane sole kambua min-juni okonena ate loto yata eyai-kola, min-juni okone kapoyale tamua napene, kuai lo

yalane. Wuane pua teke, sole kambua yakamanga atene gulo atoto, yakamato mindi akali towa yanda napene, kuai lo atalapape. Jisasato wuane leaipia.*

10

Wetene Peyo Wata Alaini Mana Oko

Matiyu 19:1-12; Luku 16:18

¹ Jisasa bala yuu okone tepa alu, Jutiya disitiki okona poto, ipa Jotane okona amo-yangi peapia. Pea-kola, wandakali kambua pui pua epo amunguli peai-kola, balato wandakali tupa mana lamaiyane pua teke utupane mana lamai-yaepia.

² Mana lamawua atea-kola, Patasai minditupa-mane bala minu mandeke pimakale nembo toto, bala ateanga epeainipia. Utupane-mane bala tipa puato, akali mindimane balana wetene oko mee puu leando, loo Goteto yata yane okomane akali okonena mana okone yapa lo tale puato, katu lolo-peyape leainipia.

³ Wuane leai-kola, balato utupane tipa puato, loo Mosesato yakama geane okomane aki leyape leaipia.

⁴ Wuane lea-kola, utupane-mane balana pii okone yano peyoto, Mosesato loto, akali mindimane wetene peyo watolane pepa mindi peyoto, bala maiyu, puu leainido, mana okone katu leane leainipia.*

⁵ Wuane leai wete, balato utupane lamawauato, yakamato tuu puato, balana pii tanga leainga andoto, Mosesato loo okone pepa peyoto, yakamanga geane leaipia.

⁶ Wuane tekeko, wamba wetete Goteto pitaka taka yakale loto, wanda, akali-la, okonelapo waa peapia.*

⁷⁻⁸ Wuaneko, akali mindi balana angini, ayiane-la, okonelapo tepa alu, balana wetene oko towa mina mindiki lalane. Wamba okonelapo waka-waka atalapele tekeko, mina mindiki leyapi-kola, liyamba umbuaini mindiki gulalane.*

⁹ Goteto wanda, akali-la, okonelapo mina mindiki leya okone wandakali-mane okonelapo mo toko laya napipe-pene layene eya. Jisasato wuane leaipia.

¹⁰ Wuane lea-kola, matili anda mindina pituto, balana disai polo tupamane Jisasa lamawauato, pii wamba lale okona pii minditupato tako pua laa leainipia.

¹¹ Wuane leai-kola, balato utupane lamawauato, akali mindimane wetene peyo watolane pepa mindi mo mawuato, puu lalu, wanda waka mindi kee leainido, balana wetene wambane oko kenda-bene mindi maiyu, wanda mindoko towa pamuku pula-kola pulupeya.*

* **9:43-48:** Mt 5:29-30; Ais 66:24 * **9:50:** Mt 5:13; Lk 14:34 * **10:4:** Lo 24:1-4; Mt 5:31 * **10:6:** Jen 1:27; 5:2
* **10:7-8:** Jen 2:24; Ep 5:31-33 * **10:11:** Mt 5:32

¹² Dee, wanda mindimane akalini tepa alu moyale pepa mindi moto, akalini oko maiyu, bala akali waka mindi peando, wanda okonemane akali mindoko towa pamuku pula-kola pulupeya leaipia.

Andopane Tupa Epeakale Lo Ando Kon-dalapa Leane Oko

Matiyu 19:13-15; Luku 18:15-17

¹³ Alu mindi Jisasato andopane tupanga kii yata yakale nembo toto, wandakali minditupa-mane andopane tupa atu aiyu bala ateanga epeaini tekeko, balana disai-polo tupamane wandakali utupane laiya loto, yakamato andopane tupa atu aiyu naepene, kondalapa leainipia.

¹⁴ Wuane leai-kola, Jisasato utupanena mana okone embo wato, utupane lamawuato, Goteto andopane okopene gulene wandakali tupa ando atalane leaipia. Yakamato andopane utupa minandi nalene, namba ateyonga epeakale lo ando kondalapa.

¹⁵ Nambato pii enene mindi yakama langeyo. Goteto utupane ando ateakale lo andopane-mane ando konda alaini pua teke, Goteto bala ando ateakale lo wandakali mindimane ando konda yaindo, Goteto bala moyo ando atolopeya. Wuane tekeko, Goteto bala ando ateakale lo wandakali mindimane ando konda nayando, Goteto bala moyo ando atalane lo wandakali okonemane anda napulu-peya. Jia wete leaipia.*

¹⁶ Wuane lalu, balato andopane tupa mindiki-mindiki ope lo miaka puato, balana kini utupanenga yata wato, Goteto nimba moyo ateakale loto, belesini maiki peaipia.

Jisasato Akali Amango Mindina Pii Yano Peleane Oko

Matiyu 19:16-30; Luku 18:18-30

¹⁷ Matili Jisasa bala yuu waka mindina moyale asini pea-kola, akali mindi taimane epoto, Jisasa ateanga aiki leka wato, tisa epene, namba saka atapowa atokalenga, nambato anu puape lo tipa peaipia.

¹⁸ Tipa pea-kola, Jisasato bala lamawuato, wandakali epene mindikipi mindi ata napeya leaipia. Gote bala angu epene ateya-ko. Anu peakale nimbato namba andayo, tisa epene lelepe leaipia.

¹⁹ Nimbato Goteno loo tupa andelene pia okoni. Nimbato wandakali peyo ome nalape. Wanda, akali-la, liyambato pamuku na-piyapape. Nimbato pake namiaepe. Nimbato wandakali yangone mindi kosimi loto, owato pii nalape. Nimbato

owato pii loto, minditaka namiape. Nimbato nimbanza angini, ayiane-la, okone-lapona pangosa atoto, okone-lapona pii lapi tupa wato minu atape leaipia.*

²⁰ Wuane lea-kola, akali okonemane bala lamawuato, tisa, wamba namba anjakonga atoto, Goteno loo utupane pitaka wato minu atama ipulu, andipa gian lo minu teke atawane leaipia.

²¹ Wuane lea-kola, Jisasato bala andatawa atoto, bala towa epelewa yamapano yoto, nimbato mana epene mindiki angu mina napene atele leaipia. Nimba poto, wandakali waka tupamane nimbanza minditaka eya tupa pitaka kambeakale lape. Kambolai-kola, nimbato muni mole tupa wandakali tipia tupa maipe. Wuane peendo, nimbanza minditaka epene wetete tupa ati kenga yolopeya-ko. Nimba namba watama ipupe leaipia.

²² Wuane lea-kola, akali okonemane balana minditaka kambua wetete yane tupa awua tepe na-wakale nembo toto, bala mini kenda wato, wenongo yalu, Jisasa tepe alu, peaipia.

²³ Pea-kola, Jisasato balana disai-polo tupa anda amo-nena puato, Goteto utupane ando ateakale lo wandakali amango tupamane ando kondape-pene oko pitete alaini leaipia.

²⁴ Wuane leane oko ale wato, balana disai-polo tupamane moko wete leaini tekeko, Jisasa pii okone lolo-peke loto, iwana yame, Goteto utupane ando ateakale lo wandakali-mane ando kondape-pene oko pitete alaini.

²⁵ Yia kamele mindimane yana asia titi mindina kolandaka loyale makande pipia-yale, bala pitete apia-yale tekeko, Goteto utupane moyo ando ateakale lo akali amango tupamane ando kondape-pene oko pitete wete alaini leaipia.

²⁶ Wuane lea-kola, balana disai-polo tupamane moko wetete loto, yakama teke-teke pii lalawa puato, wuane yando, api katulo saka atapowa atolo-peyape leainipia.

²⁷ Wuane leai-kola, Jisasa utupane andatawa yoto, wandakali yakama tane katulo saka atapowa atamakale lo saka ataya na-olopeyai tekeko, Goteto katulo pitaka taka piyane. Tene okonena, wandakali mindimane Gotenga tungi peyo nayu bilipi leando, Goteto katulo bala saka atapowa ateakale lo ataya olopeya leaipia.

²⁸ Wuane lea-kola, Pitato bala tipa puato, nanimana minditaka yalamane tupa pitaka awua tepe alu, nanimato nimba watama epeyama okoni leaipia.

²⁹ Wuane lea-kola, Jisasato balana disai-polo tupa lamawuato, nambato pii enene

* **10:15:** Mt 18:3-4 * **10:19:** Ek 20:12-17; Lo 5:16-20

mindi yakama langeyo leaipia. Wandakali minditupa-mane Gotena pii layene epene oko nembo toto, nambana piape oko puyale utupanena anda yandopi, amene, imalin yandopi, angini, ayiane yandopi, andopane yandopi, ee yandopi, utupanena mindi tepe alaini.

³⁰ Wuane piyaini wandakali tupa yuu okona atolai-kola, matili Goteto andapi, amene, imalinipi, anginipi, andopanepi, eepi, utupane andete lo wandakali utupane pitakanga maluveya. Wandakali minditupa-mane kenda-pene andane minditupa wandakali utupane maiki puluveyai tekeko, matili Goteto balana yame wandakali utupane saka atapowa ateakale lo ataya olopeya.

³¹ Okone angi, wandakali andipa gene andane wetete yene ateyai utupana kambua gene nayene wetete atolopeyai. Dee, wandakali andipa gene nayene wetete ateyai utupana kambua gene andane wetete yene atolopeyai. Jisasato wuane leaipia. *

Akalina Iwanane Bala Omalu, Ika Lolopeya, Ole Tepone Leane Oko

Matiyu 20:17-19; Luku 18:31-34

³²⁻³³ Matili Jisasapi, balana disaipolo tupapi, wandakali waka minditupapi, utupane Jutusaleme moyale asini peaipipia. Jutusaleme poloma-kola, kenda-pene minditupa yakamanga epolane nembo toto, balana disaipolo tupamanne yuku wato, asini peaipai tekeko, Jisasa bala yuku naene atoto, ini ingane peaipia. Bala ini ingane pea-kola, utupane-mane moko wete loto, yukuwa nembo kambua teakola, Jisasato wandakali waka tupa tepe alu, balana disaipolo tupa angu atu aiyu amonga-yale peaipia. Poto, kenda-pene minditupa balanga epolopeya loto, balato utupane lamawuato, ale alapa, andipa nanima Jutusaleme moyale asini peyama leaipia. Poloma-kola, akali mindimane Akalina Iwanane oko ene pituto, pitisa akali kawane tupapi, loo tupana mana andene akali tupapi, utupanena kinina maulakola, utupane-mane namba kosimi loto, omeakale lalu, akali yame waka tupana kinina maluveyai. *

³⁴ Maulai-kola, akali utupane-mane namba lamba loto, apesango nambanga soo lo peyalu, kunju-mane peyalu, peyo ome lolai-kola, ole teponena namba malinga ika lolo-peyawa. Jisasato wuane leaipia.

Disaipolo Lapo-mane Akali Gene Yene Atapakale Leapele Oko

Matiyu 20:20-28

³⁵ Jisasato wuane lea-kola, matili Sepiti iwanane Jemesa, Jone-la, okonelapo epoto, tisa, nimbato nalipa moyo, mangene mindi pula lo tee leyapa oko nimbato pipi lakae lo nembo teyapa leapelebia.

³⁶ Wuane leapi-kola, balato okonelapo tipa puato, nambato liyamba moyoyale, aki mindi pipi lakae lo nembo teyapipe leaipia.

³⁷ Wuane lea-kola, okonelapo-mane bala lamawuato, matili nimba kinji tai wetete atole-angi, nalipana mindi nimbana kii tikasa piti lalu, mindoko nimbana kii koyasa piti lapi lakae lo nembo teyapa leapelebia.

³⁸ Wuane leapi-kola, balato okonelapo lamawuato, matili mangene anu-pene tupa pulu-peyape lo liyambato nembo natene, mee nambato wuane pipia lakae lo nembo toto, tee leyapi leaipia. Minditaka mindi kapo penenga petene gulola oko nambato nolo-peyawa oko liyambato katulo nolo-peyapipe. Ipa nambato molowa oko liyambato katulo molo-peyapipe leaipia. *

³⁹ Wuane lea-kola, okonelapo-mane balana pii okone yano peyoto, nalipato katulo wuane pulu-peyape leapelebia. Wuane leapi-kola, balato okonelapo lamawuato, enene, minditaka mindi kapo penenga petene gulola oko nambato nolo-wa-kola, liyambatopi okone nolo-peyapi. Nambato ipa mindi molowa-kola, liyambatopi ipa okone molo-peyapi teke.

⁴⁰ Liyambato wuane pulu-peyapi tekeko, nambana kii tikasa yandopi, nambana kii koyasa yandopi, akali mindi bala peteakale lolane piape oko nambana jia. Toko okone-lapona namba ayiane okomane akali lapo peteakale lata yane leaipia.

⁴¹ Jemesa, Jone-la, okonelapo-mane akali gene yene atapakale leapi-kola, matili Jisasa disaipolo waka tupamanne pii temane okone ale wato, disaipolo okonelapo towa yataka yainipia.

⁴² Yataka yai-kola, Jisasato balana disaipolo tupa pitaka ipulupa loto, wandakali yame waka tupa ando atalane akali tupamanne wandakali utupanena lipinga ateyama nembo toto, utupane taimane bosa lo ando atalaini lo yakamoto nembo teyai okoni leaipia. Dee, wandakali utupane-mane yakamana pii wato mineakale loto, wandakali yame waka tupana akali kawane tupamanne utupane taimane lamawuato, yakamoto wua piyapa lalaini lo yakamoto nembo teyai teke.

⁴³⁻⁴⁵ Utupane-mane wuane piyaini tekeko, yakamoto mana okone wato mina na-piyapape. Jia. Akalina Iwanane epeane oko balana wandakali-mane piape

* **10:31:** Mt 20:16; Lk 13:29-30 * **10:32-33:** Mk 8:31; 9:30-31 * **10:38:** Mk 14:36; Lk 12:50 * **10:39:** Ap 12:2; Lap

1:9 * **10:42:** Lk 22:25-27

pingeakale nembo toto na-epeane. Jia. Balato wandakali kambua tupa moyo, utupanena piape pimawuato, utupane kambo molo-peke loyale, omolo epeane-ko. Disaipolo yakamana mindimane akali gene yene atauwa laka lo nembo teando, bala yakamana piape akali gulo atape-pene. Yakamana mindimane akali gene andane wetete yene atauwa laka lo nembo teando, bala yole mia napene, wandakali tupa pitaka mee moyo, utupanena piape tupa pimawua atape-pene. Jisasato wuane leaipia.*

*Jisasato Akali Lee Koo Mindi Lee Taya
Yane Oko*

Matiyu 20:29-34; Luku 18:35-43

⁴⁶Jisasa balana disaipolo tupa towa Jetiko tano okona peainipia. Matili utupane-mané wandakali kambua towa atu Jetiko tepa alu peai-kola, Timisa iwanane Batimiasa bala asia ayatenenga peteapipa. Bala akali lee koo mindi pituto, wandakali tupa tee loto, muni giyapa laka piki pua piti-yaepia.

⁴⁷Wandakali mindimane Nasatesa tane Jisasa oko epeya lea-kola, Batimiasato ale wato, pii taimane loto, Dapiti yame Jisasa nimbato namba ondo aa laka peaipia.

⁴⁸Wuane laka pea-kola, wandakali kambua-mané bala laiya loto, pii nalene, kondaa leaini tekeko, balato ole kambuanga pii taimane wete laka puato, Dapiti yame akali nimbato namba ondo aa leaipia.

⁴⁹Wuane laka pea-kola, Jisasa bala asini puu apo naene, organe atoto, akali lee koo okone bala namba ateyonga epeakale lalapa leaipia. Wuane lea-kola, wandakali tupamane akali lee koo oko lamawuato, balato nimba ee leya-ko. Mini epene palu, ika laa leainipia.

⁵⁰Wuane leai-kola, balana sakesa piyane oko yoko tepa alu, bala taimane ika lalu, Jisasa ateanga epeaipia.

⁵¹Epea-kola, Jisasato bala tipa puato, nimbato nimba moyo, anu pipi laka lo nembo telepe leaipia. Wuane lea-kola, akali lee koo okomane bala lamawuato, tisa, nimbato nambana lene tee laya api laka lo nembo teyo leaipia.

⁵²Wuane lea-kola, Jisasato bala lamawuato, nimbato namba lo bilipi lele okonena, nimbato nimbana lee mo tee laya eyoko. Nimba puu leaipia. Wuane lea-kola, okone angi teke, akali okone lee toto, Jisasa watama peaipia.*

11

*Kinji Tupamane Palaini Pua, Jisasa Bala
Jutusaleme Peane Oko*

Matiyu 21:1-11; Luku 19:28-40; Jone

12:12-19

¹⁻² Jisasapi, balana disaipolo tupapi, utupane yakama Jutusaleme moyale Olipi wangiane okona pulu, Betani tano ajako okona peakaiyu leainipia. Betepasi tano ajako oko mandaka ya-kola, Jisasato balana disaipolo lapa akali wamba ingane pulupa loto, wua leaipia: Liyambato tano ajako amo eya okona peakaiyu loto andolapikola, yia dongi talua wandakali mindi masianenga napetene mindi andi latane atolanga liyambato kapoyale andolopeyapi. Andalu, liyambato okone tita loto, atu ipulupape.

³ Wandakali mindimane liyamba tipa puato, anu peakale liyambato dongi oko tita leyapipe leaindo, liyambato bala lamawuato, Akali Andane okomane dongi mindina masianenga pituto, mangene mindi pukale nembo teya tekeko, nanimanga dongi mindi ata napeya-kola, balato dongi oko molo pulupa lala-kola, nalipato dongi oko tita lo meyapa. Balato mangene okone pikoyo pula-angi, balato nalipa languato, dongi oko nimba atelenga atu kapoyale peke lalapa lolopeya lo lamai-yapape. Jisasato wuane leaipia.

⁴ Wuane lea-kola, okonelapo-mané tano okonena asininga poto andeapi-kola, dongi talua mindi anda mindina asia lomba okona mandaka gulo andi latane ateanga andoto, tita leapelepia.

⁵ Tita leapi-kola, wandakali ongane ateaini minditupa-mané okonelapo tipa puato, anu peakale liyambato dongi talua okone tita leyapipe leainipia.

⁶ Wuane leai-kola, okonelapo-mané Jisasa lalapape leane pua teke lamaiyapi-kola, wandakali utupane-mané atu yalua-ko. Atu pulupa leainipia.

⁷ Wuane leai-kola, akali okonelapo-mané dongi okone Jisasa ateanga atu peke loto, liyambana tona luu kenga peapili okolapo yokoto, dongi talua okonena masianenga yata yapi-kola, Jisasa bala dongi okonena masianenga pitiyu, Jutusaleme moyale, asini peaipia.

⁸ Asini pea-kola, wandakali kambua-mané yakamana tona luu kenga peaini tupa yokoto, bala moyale peane asininga panda pima peainipia. Dee, wandakali minditupa-mané wayu epeleya loto, ita kembone ajako yokone kambua atene tupa yando awua epoto, asininga panda pua yatama peainipia.

⁹ Bala moyale peane asini okona ingane peaini wandakali tupapi, bala masianenga watama epeaini wandakali tupapi, utupane-mané pii taimane lama poto, Akali

* 10:43-45: Mt 23:11; Mk 9:35 * 10:52: Mk 5:34

Andane Goteto akali oko epeakale leyakola, bala epeya leanipia. Goteto bala moyo ateakale. Balana gene oko laiyu lalapa.*

¹⁰ Wamba nanimana yumbane Dapitito nanimana yame oko moyo ando ateane pua teke, andipa Jisasato nanimana moyo ando atolopeya. Gote ati kenga wetete ateya okomane bala moyo ateakale. Balana gene oko laiyu lalapa lama peainipia.

¹¹ Wuane lama poto, utupane yakama Jisasa towa atu Jutusaleme peakaiyu leanipia. Peakaiyu lalu, bala Juta yamena lotu anda andane okona ende andapangosa kolandaka loto, minditaka yane tupa pitaka andamo-nena pua andeane tekeko, nai andaka poyale pea-kola, Jisasapi, balana disaipolo alesa tupapi, utupane Jutusaleme tepa alu, Betani tano okona peke leanipia.

Jisasato Ita Piki Mindi Dini Lia Na-peakale Leane Oko
Matiyu 21:18-19

¹² Anate-lene Jisasapi, balana disaipolo tupapi, utupane Betani tano oko tepa alu, asininga peainipia. Poto, Jisasa bala ulia nono yaepia.

¹³ Nono wato, balato ita piki mindi amonga-yale ateanga andeapia. Ita okonena yokone kambua ateanga andoto, dini liyape lo andolo peaipia. Ita piki tupana dini lia napiyane oto okone ang, balato ita okone andolo pea-kola, yokone angu ateanga andeaipia.*

¹⁴ Dini nalianga andoto, balato ita piki okone lamawuato, matili-matilipi, nimbanga dini lia napule-kola, wandakali mindikipi mindimane nimbanu dini tupa nanolo-peyai. Jia wete lea-kola, balana disaipolo tupamanale yainipia.

Jisasa Bala Lotu Anda Andane Okona Peane Oko
Matiyu 21:12-17; Luku 19:45-48; Jone 2:13-22

¹⁵ Matili Jisasapi, balana disaipolo tupapi, utupane Jutusaleme peakaiyu leanipia. Peakaiyu lalu, Jisasa bala lotu anda andane okona ende anda-pangosa kolandaka loto, andea-kola, wandakali minditupa-mane sipisipi tupapi, bulamakao tupapi, eka uya tupapi, okonetaka tupa yatawa, makesa yo ateaiinga andeaipia. Makesa yo ateai-kola, balato wandakali utupanepi, wandakali minditaka kambo ateaini tupapi, utupane pitaka lotu anda okona ende kamaka peakale lo peyo wateaipia. Peyo watalu, balato muni lawa pua peteaini akali tupana tepolo toko tupapi, uya makesa yo ateaini

wandakali tupana pitiyaini toko tupapi, utupane minu kulembo leaipia.

¹⁶ Wuane piyu, lotu anda andane okona ende anda-pango okona wandakali-mane minditaka awua epo peakale lo balato ando konda nayaepia. Jia.

¹⁷ Balato utupane mana lamawuato, Gotena pii pepa pelene eya mindimane loto, nambana anda oko wandakali yame pitaka-mane pote lo pitulane anda mindi atolopeya layene eya tekeko, yakamoto nambana anda oko pake nene epo pitiyaini anda mindi gulaya eyai leaipia.*

¹⁸ Wuane lea-kola, pitisa akali kawane tupapi, loo tupana mana andene akali tupapi, utupane-mane bala minu koyolane asia mindi aiya peaini tekeko, wandakali waka tupa pitaka-mane balana pii ale wato, balato kuai lo wete leya nembo teainipia. Tene okonena, pitisa akali kawane tupapi, loo tupana mana andene akali tupapi, utupane-mane Jisasa ando yuku wato, bala peyo ome lamakale nembo teainipia.*

¹⁹ Matili nai andaka pea-kola, Jisasapi, balana disaipolo tupapi, utupane Jutusaleme tepa alu, peainipia.

Yakamoto Pote Lolai Pua, Goteto Pulu-peya Leane Oko
Matiyu 21:20-22

²⁰ Anate-lene upanda wete Jisasapi, balana disaipolo tupapi, utupane-mane Jutusaleme poyale asia poto andeai-kola, ita piki okona yokonepi, pinipi, pitaka kuu loto, kapu teanga andeaini-pia.

²¹ Tuni Jisasato ita okone koyakale lapia oko nembo tolo-peke loto, Pitato bala lamawuato, tisa, tuni nimbato ita piki oko dini lia napeakale lapi-ko. Andipa kuu loto, kapu teya oko anda leaipia.

²² Wuane lea-kola, Jisasato balana disaipolo tupa lamawuato, yakamoto Gote lo bilipi lalapape leaipia.

²³ Nambato pii enene mindi yakama langeyo. Wandakali minditupa-mane nembo lapo pali napene, utupane-mane pote lolai pua teke Goteto pulupeya nembo tatawa atalaini. Wandakali utupanena mindimane yuu wangiane oo peleya oko lamawuato, nimba lopalu, ipa solewata andane okona peaka nena laa leaindo, Goteto yuu wangiane oko lopoto, ipa sole wata andane okona aindaka lolopeya.*

²⁴ Yakamatopi pote lolai pua, Goteto pulupeya nembo toto, Gote nimbato mangene minditupa pula lo pote laka peaindo, balato mangene utupane pitaka piki pulupeya lo nambato yakama langeyo-ko. Yakamoto

* 11:9: Sam 118:25-26

* 11:13: Lk 13:6

* 11:17: Ais 56:7; Jet 7:11

* 11:18: Mk 14:1-2

* 11:23: Mt 17:20

* 11:24: Mt 7:8

pote lolai pua teke balato pulupeya nembo tatawa atalapape. *

²⁵⁻²⁶ Yakamoto pote lolai-angi, nembo tolo-peke loto, wamba wandakali mindi-mane mana koo mindi yakamanga minalae yando, yakamana Ayiane Gote ati kenga ateya okomane yakama tanena koo tupa apia-geakale nembo toto, yakamoto wandakali okonena koo okone apia-miayapape. Jisasato wuane leaipia. *

Piape Utupa Pipe Lo Apito Nimba Langeape Lo Tipa Peaini Oko
Matiyu 21:23-27; Luku 20:1-8

²⁷ Jisasa balana disaipolo tupa towa pai pua teke Jutusaleme peakaiyu leainipia. Peakaiyu loto, bala lotu anda andane okona ende anda-pangosa epo pea-kola, pitisa akali kawane tupapi, loo tupana mana andene akali tupapi, Juta yame ando atalaini akali waka tupapi, utupane bala ateanga epeainipia.

²⁸ Epoto, utupane-mane bala tipa puato, nimbato apina pii wato minuto, wandakali utupa mana lamawuato atelege. Apito nimba piape utupa pipe langipia-kola, nimbato piape utupa pua atelege leainipia.

²⁹ Wuane leai-kola, balato utupane lamawuato, nimbato pii mindiki yakama tipa peyo leaipia. Yakamoto nambana pii okone kuai lo yano peleaindo, nimbato yakama languato, piape utupane pipe lo namba langeane akali okona gene oko yakama languake.

³⁰ Wamba Goteto Jone lamawuato, nimbato wandakali tupa ipa peya-maipe lea-kola, balato wandakali tupa ipa peya-maiyape. Pee, wandakali-mane bala lamawuato, nimbato wandakali tupa ipa peya-maipe leai-kola, balato wuane peaiapipe. Yakamoto namba langiyapa leaipia.

³¹⁻³² Wandakali tupa pitaka-mane Jone bala potopesa akali enene mindi ateane lo nemboto minu ateai-kola, Juta yamena akali kawane tupa yakama yuku wato, yakama teke-teke pii lalawa peainipia. Nanimato Jisasana pii okone yano peyoto, wandakali-mane Jone lamawuato, nimbato wandakali tupa ipa peya-maipe lea-kola, balato wuane peane lemando, wandakali tupamane nanima ana-mane peyo ome lolopeyai. Nanimato balana pii okone yano peyoto, Goteto Jone lamawuato, nimbato wandakali tupa ipa peya-maipe lea-kola, balato wuane peane lemando, balato nanima tipa puato, wuane yando, anu peakale yakamoto Jonena pii oko bilipi naleaipie lolopeya leainipia.

³³ Wuane lalu, utupane-mane Jisasana pii okone yano peyoto, nanima nembo nateyama leainipia. Wuane leai-kola, balato utupane lamawuato, wuane yando, piape utupa pipe lo langeane akali okona gene oko nambato yakama langi napukale teke leaipia.

12

Getepe Ee Ando Ateaini Akali Koo Tupana Pii Kokoli Oko

Matiyu 21:33-46; Luku 20:9-19

¹ Wuane lalu, Jisasato pii kokoli mindi Juta yamena akali kawane tupa lamawuato, akali mindimane getepe ee mindi yandoto, ende pua wata aindaka leaipia. Wuane piyu, matili dini tupana ipane penge lo mokale nembo toto, balato ana andane mindi kua peaipia. Kua piyu, wandakali-mane epoto, getepe dini minditupa pake yolaini nembo toto, akali mindimane anda luu kenga mindina atoto, ee okone ando ateakale loto, balato anda luu mindi pita yaepia. Piyu, balato akali minditupa lamawuato, yakamoto nambana ee oko ando ata-giyapape. Matili dini lula-angi, yakamoto minditupa yoto, namba giyu, akenane yolane tupa yakama tane mialapale leaipia. Wuane lalu, bala yuu tepanda mindina atama peaipia. *

² Pea-kola, matili getepe dini mandulane oto oko epea-angi, balana ee okone ando ateaini akali tupamane getepe dini minditupa yoo geakale nembo toto, ee anduane okomane balana piape akali mindi lamawuato, nimbato getepe dini minditupa molo puu leaipia.

³ Wuane lea-kola, piape akali okone-mane dini minditupa molo peane tekeko, ee okone ando ateaini akali tupamane dini minditupa yoo mai napene, bala minu peyalu, mee peke leakale leainipia.

⁴ Peke lea-kola, ee anduane okomane piape akali waka mindi lamawuato, dini minditupa molo puu lea-kola, ee okone ando ateaini akali tupamane piape akali okone peyo ome leainipia. Wuane peai-kola, ee anduane okomane piape akali mindiki-mindiki lo kambua peakale laka peane tekeko, ee okone ando ateaini akali tupamane minditupa minu peyalu, minditupa peyo ome leainipia.

⁵ Wuane peai-kola, ee anduane okomane piape akali waka mindi teke lamawuato, dini minditupa molo puu lea-kola, ee okone ando ateaini akali tupamane piape akali okone peyo ome leainipia. Wuane peai-kola, ee anduane okomane piape akali mindiki-mindiki lo kambua peakale laka peane tekeko, ee okone ando ateaini akali tupamane minditupa minu peyalu, minditupa peyo ome leainipia.

⁶ Wuane peai-kola, matili akali mindiki angu ee anduane oko towa ateapele-pia.

Akali okone balana iwanane yamapane yene oko. Bala atea-kola, ee anduane okomane loto, nambana ee okone ando ateyai akali tupamane namba iwanane okona pii ale wato, dini minditupa yoo malupeyai leaipia. Wuane loto, koyonga bala peakale leaipia.

⁷ Balana iwanane okonemane dini minditupa molo peane tekeko, ee okone ando ateaini akali tupa yakama teke-teke pii lalawa puato, akali epeya okomane bala ayiane okona minditaka eya tupa pitaka paluni molopeya-ko. Nanimato bala peyo ome loloma-kola, ee oko nanimana yolopeya leainipia.

⁸ Wuane lalu, utupane-mane bala minuto, peyo ome lalu, bala awua poto, ee okonena takita apeainipia. *

⁹ Utupane-mane wuane peai-kola, ee anduane okonemane utupane towa anu pulupeyape. Bala epoto, balana ee okone ando ateaini akali utupane peyo ome lalu, akali waka minditupa-mane balana getepe ee oyo ando atekale lo malupeya.

¹⁰⁻¹¹ Gotena pii pepa pelene eya mindimane loto, anda piyaini akali tupamane ita posa mindi andoto, oko koo ya loto, mo apeaini oko Goteto moto, anda pingina oko ate laya yane. Nanimato andeyama-kola, Gotena mana okone kuai-lene wete eya andeyama layene eya. Yakamoto Gotena pii okone wamba alu mindikipi mindi dii lo anda napeaipe. Jisasato wuane leaipia. *

¹² Wuane lea-kola, Juta yamena akali kawane tupamane ale wato, balato nanima andayo pii kokoli okone leya nembo teainipia. Tene okonena, utupane-mane bala andi laima lakae lo nembo teaini tekeko, nanimato bala andi lemando, wandakali kambua ateyai tupamane kenda-pene mindi nanima gulupeyai nembo teainipia. Wuane nembo toto, Juta yamena akali kawane tupamane bala andi loyale yuku wato, bala tepa alu, peainipia.

Takisa Muni Maipe-penepe Lo Jisasa Tipa Peaini Oko

Matiyu 22:15-22; Luku 20:20-26

¹³ Matili Juta yamena akali kawane tupamane pii lalawa puato, nanimato langa-langa puato, pii mindi Jisasanga tipa pimakale. Tipa puluma-kola, balato nanimana pii okone yano peyoto, Juta yame wandakali nanimato Lomo tane gapomane akali kawane Sisa oko takisa muni mai napipe-pene lola-kola, bala tanena pii lolane okomane teke nanimato bala kosimi lamakale leainipia. Wuane loto, utupane-mane kinji Etote yame akali tupapi,

Patasai tupapi, utupanena minditupa Jisasa ateanga peakale leainipia. *

¹⁴ Akali utupane epoto, Jisasa lamawuato, tisa, wandakali mindi bala gene yene yandopi, gene nayene yandopi, okone tene mindi ata nepeya nembo toto, nimbato pii enene oko angu lalene. Nanimato wua pipiai lakae lo Goteto nembo talane tupa nimbato mana kuai lo langilini nembo teyama. Wuane nembo toto, andipa nanimato nimba tipa puato, Gotena loo okomane aki leyape leyama leainipia. Juta yame wandakali nanimato Lomo tane gapomane akali kawane Sisa oko takisa muni maipe-penepe, mai napipe-penepe. Mana andoko tika-penepe leainipia.

¹⁵ Utupane-mane langa-langa puato, pii okone tipa peyai nembo toto, Jisasato utupane tipa puato, anu peakale yakamato namba minu mandeke peyaipe. Nambato muni ondene mindi andokalenga, mindi awua ipulupa leaipia.

¹⁶ Muni ondene mindi awua epeai-kola, balato utupane tipa puato, apina lee-inga waa pitane okola, gene peyatane okola, okonelapo muni okona ateyape leaipia. Wuane lea-kola, utupane-mane balana pii okone yano peyoto, Lomo tane gapomane akali kawane Sisa okona lee-inga waa pitane okola, gene peyatane okola, okonelapo muni okona eya leainipia.

¹⁷ Wuane lea-kola, balato utupane lamawuato, wuane yando, yakamato Sisana minditaka yolai tupa bala maiyu, Gotena minditaka yolai tupa Gote maiyape leaipia. Wuane lea-kola, utupane-mane balana pii okone ale wato, moko loto, nembo kambua teainipia. *

Wandakali Omene Tupa Malinga Ika Lolopeyai Leane Oko

Matiyu 22:23-33; Luku 20:27-40

¹⁸⁻²⁰ Okone angi, Satusi minditupa Jisasa ateanga epeainipia. Satusi yame-mane wandakali omene tupa katulo malinga ika nalolo-peyai lalainipia. Utupane-mane bala lamawuato, tisa, amene yanasa ateai-kola, amene bulupane okomane wanda mindi kee lalu, andopane mandi napene omeane leainipia. Wamba Mosesato nanima pepa mindi peyoto, mana mindi yata wato, akali mindimane wanda mindi kee loto, andopane mandi napene omeando, balana amene mindimane wanda yalo oko kee loto, amene omeane okonena andopane mindi mandi maiyakale leaipia. *

²¹ Wamba Mosesato wuane leane oko nembo toto, akali omeane okonena amene

* **12:8:** Ip 13:12 * **12:10-11:** Sam 118:22-23 * **12:13:** Mk 3:6 * **12:17:** Lom 13:7 * **12:18-20:** Ap 23:6-8; Lo

okomane wanda yalo okone kee leane tekeko, balatopi andopane mindi mandi napene teke omeaipia. Omea-kola, amene tepone okomane wuane teke peaipia.

²² Amene yanasa utupane pitaka-mane wuane teke pima pulu, wanda mindiki okone teke kee lalu, andopane mindi mandi napene oma yiakte leaninipia. Matili wanda yalo okone balapi omeaipia.

²³ Amene yanasa utupane pitaka-mane wanda mindiki okone teke kee leai-ko. Matili wandakali omene tupa malinga ika lolai-angi, wanda okone bala amene yanasa utupane andokona wetene pitulu-peyape leaninipia.

²⁴ Wuane leai-kola, Jisasato utupanena pii okone yano peyoto, yakamato Gotena pii pepa pelene eya okola, balana tai-lene okola, okonelapo nembo natene, kopeta nembo toto, namba tipa peyai leaipia.

²⁵ Matili wandakali omene tupa malinga ika lolai-angi, wanda-mane akali napolo-peyai. Akali-mane wanda kee nalolo-peyai teke. Jia. Utupane ati kenga enjole tupa atalaini pua teke atolopeyai.

²⁶⁻²⁷ Gote bala wandakali omene tupana Gote jia. Bala wandakali saka atene tupana Gote ateya. Tene okonena, Apatakame, Aisake, Jekopo ima wamba omeai-kola teke, matili ita saka anjako mindi ita lungu-mane teane okone angi, Goteto Mosesa lamawuato, namba Apatakame, Aisake, Jekopo ima utupanena Gote ateyo leaipia. Mosesato Gotena pii okone pepa pelea-kola, yakamato pii okone wamba alu mindikipi mindi dii lo anda naapeaipe. Akali tepo utupane saka ata naapeai-yale, Goteto namba utupanena Gote ateyo nalene, namba akali utupanena Gote atewa lea-yaleko. Goteto bala akali utupanena Gote ateyo leane okomane wandakali omene tupa malinga ika lalaini lo andawa leya. Tene okonena, yakamato wandakali omene tupa malinga ika nalolo-peyai lalaini oko kopeta wete lalaini. Jisasato wuane leaipia.*

Gotena Loo Andoko Lipinga Wetete Eyape Lo Tipa Peaini Oko

Matiyu 22:34-40; Luku 10:25-28

²⁸ Satusi utupane-mane Jisasato towa pii yanda pua ateai-kola, loo tupana mana andene akali mindi epoto, ale yaepia. Jisasato Satusi utupanena pii tika pua yano pelea-kola, loo tupana mana andene akali okone-mane bala tipa puato, Gotena loo tupana andoko-mane waka tupa pitaka sia minuto, lipinga wetete eyape leaipia.*

²⁹ Wuane lea-kola, Jisasato balana pii okone yano peyoto, Gotena loo bulupane okomane Isatale tane wandakali yakamato

ale alapape leya leaipia. Akali Andane oko bala angu nanimana Gote enene oko ateya.*

³⁰ Nimbana Akali Andane Gote okone towa wayumane wetete epelewa yamapanepi, tandinipi, nembo-tenepi, tai-lenepi, utupane pitaka bala angu mawua atape leya.

³¹ Gotena loo lapone okomane loto, nimbato nimba tane epelewa yamapanepi yo atalene wuane pua teke, nimbana wandakali yangone tupa towa epelewa yamapanepi yo atape leya. Balana loo eya tupa pitakana waka mindimane loo okonelapo sia minuto, lipinga naeya. Jisasato wuane leaipia.*

³² Wuane lea-kola, loo tupana mana andene akali okomane bala lamawuato, tisa, nimbato kuai lo lele leaipia. Enene, nanimana Akali Andane Gote oko bala angu Gote enene oko ateya. Gote waka mindi ata napeya.

³³ Nanimato bala towa wayumane wetete epelewa yamapanepi, nanimana yamapanepi, nembo-tenepi, tai-lenepi, utupane pitaka bala mawua atoto, nanimana tane epelewa yamapanepi yo atalamane pua teke, nanimana wandakali yangone tupa towa epelewa yamapanepi yo atape-pene. Gote wayu pele lo sipisipi maputane yangalamanne mana tupapi, Gote wayu pele lo waka minditaka maiyamane mana tupapi, mana okonepene tupa pitaka napinga-yale eyakola, Gotepi, wandakalipi, utupane towa epelewa yamapanepi yo atalamane mana oko lipinga wetete eya. Loo tupana mana andene akali okomane wuane leaipia.*

³⁴ Wuane lea-kola, akali okonemane pii okone kuai lo leanga andoto, Jisasato bala lamawuato, Goteto nimba moyo ando ateakale lo nimbato ando kondra oyale pele oko nambato andeyo leaipia. Jisasato akali utupane pitakana pii kuai lo yano pelea-kola, wandakali pitaka-mane pii waka mindi balanga tipa puyale yainipia.

Mesaya Oko Bala Dapiti Yamena Mandiyene Angu Jia Leane Oko

Matiyu 22:41-46; Luku 20:41-44

³⁵ Jisasa bala lotu anda andane okona ende anda-pangosa atoto, pii mana lamawuato, anu peakale loo tupana mana andene akali tupamane Mesaya oko bala kinji Dapitina mandiyene oko ateya lalainipe leaipia.

³⁶ Wamba Oli Sipitisa okomane Dapitina nembo-tene mina ika laya ya-kola, balato pii mindi leaipia. Loto, Akali Andane Gote okomane nambana Akali Andane Mesaya

* **12:26-27:** Ek 3:2,6 * **12:28:** Lk 10:25-28 * **12:29:** Lo 6:4-5 * **12:31:** Pit 19:18 * **12:33:** Lo 4:35; 1Sa 15:22;

oko lamawuato, matili nambato nimba towa yanda pingulaini wandakali tupa nimbana kee pangosa peteakale lokalenga, nimba nambana kii tikasa-tole pituto, maliyo atape leaipia. *

³⁷ Dapitito Mesaya oko andayo, bala nambana Akali Andane ateya leaipia-ko. Anu pua, Mesaya oko bala Dapiti yamena mandiyene ateyape. Jisasato wuane lea-kola, wandakali kambua wete amunguli pua ateaini tupamane balana pii okone ale wato, epele yainipia.

*Yakamoto Mana Koo Utupa Mana Wato
Mina-Na-piyapape Leane Oko*

Matiyu 23:1-36; Luku 11:37-54; 20:45-47

³⁸⁻⁴⁰ Jisasato wandakali tupa mana lamawuato, loo tupana mana andene akali tupamane tonu epene kii kee puyoko lene tupa piyu, epoko puyale epele wete alaini leaipia. Wandakali waka tupamane utupane andoto, akali andane, nimba anu pelepe lapiae lakae lo nembo toto, loo tupana mana andene akali tupa wandakali kambua amunguli piyaini ama tupana palaini. Utupane yakama Juta yamena lotu anda tupana poto, toko bulupane tupana pitima lakae lo nembo talaini. Dee, wandakali kambua-mane tomo andane mindi no peteyai-angipi, utupane yakama akali kawane pitiyaini toku tupana pitima lakae lo nembo talaini. Wandakali waka tupamane utupanena mana utupane andoto, yakama akali epene ateyai nembo teakale loto, akali utupane-mane pote luu tupa lalaini tekeko, utupane-mane wanda yalo tupa andakasa wato, utupanena anda tupa mee mialaini. Tene okonena, matili Goteto wandakali tupa kosimi lolangi, balato akali utupanenga kendapene andane wete mindi yata olopeyako. Yakamoto loo tupana mana andene akali utupanena mana koo tupa wato minulaini. Tika ando atalapape. Jisasato wuane leaipia.

*Wanda Yalo Mindimane Gote Wayu Pele
Lo Muni Mayane Oko*

Luku 21:1-4

⁴¹ Wandakali kambua lotu anda andane okona ipuku puato, Gote wayu pele lo muni ajalapo minditupa aindaka laka peai-kola, Jisasa bala ongane mandaka anda peyo peteapie. Anda peyo atea-kola, akali amango kambua-mane muni kambua teke aindaka leainipia.

⁴² Utupane-mane wuane peaini tekeko, Jisasato andea-kola, wanda yalo tipia wete mindi epoto, muni anjako wete one-pene lopo angu aindaka leaipia andeaipia.

⁴³⁻⁴⁴ Jisasato okone andoto, balana disaipolo tupa ipulupa loto, utupane lamawuato, nambato pii enene mindi yakama langeyo leaipia. Akali amango tupa pitaka-mane muni kambua wete yakama tanenga yakale loto, minditupa angu aindaka larai tekeko, wanda yalo okonga bala tane tomo kambo nolane muni mindi nayala-kola teke, muni anjako one-pene lapo angu balanga yapiane okonelapo lapotaka aindaka lala. Wuane piya okomane balato wandakali waka tupa pitaka sia minuto, muni kambua wetete aindaka lala. Jisasato wuane leaipia. *

13

*Lotu Anda Andane Oko Keao Lo Minu
Koyolo-peyai Leane Oko*

Matiyu 24:1-2; Luku 21:5-6

¹ Jisasa bala lotu anda andane okona ende kamaka pulu, mindisa moyale pea-kola, balana disaipolo tupana mindimane bala lamawuato, tisa, akali minditupa-mane ana andane wete tupa moto, anda epene wete utupua peaini oko anda leaipia.

² Wuane lea-kola, Jisasato bala lamawuato, andipa nimbato anda andane wete utupua andele tekeko, matili akali minditupa-mane anda utupanena ana mindikipi mindi balana ana yangone mindi tokonga yakale lo ando konda napulupeyai. Jia Wete. Utupane-mane ana utupua pitaka keao loto, yuunga tepa ayiake laya olopeya leaipia. *

*Kenda-pene Kambua Epolopeya Leane
Oko*

Matiyu 24:3-14; Luku 21:7-19

³⁻⁴ Matili Jisasa bala lotu anda andane oko tepa alu, Olipi wangiane okona iyu poto petea-kola, Pita, Jemesa, Jone, Endutu ima utupane angu bala peteanga peainipia. Poto, utupane-mane bala tipa puato, andoko angkali minditupa-mane lotu anda andane oko minu koyolai-kola, mangene waka minditupa pulu-peyaipe leainipia. Nanimato mangene anu-pene mindi wamba ini bulupane andoto, andipa mangene waka tupa pitaka puyale peya lo andolo-peyamape. Nimbato nanimu langi leainipia.

⁵⁻⁶ Wuane lea-kola, balato utupane lamawuato, akali kambua yale-yale ipuku puato, namba Mesaya oko epeyo loto, wandakali kambua minakasa olopeyai-ko. Wandakali mindimane Mesaya oko namba epeyo loto, yakama minakasa olaini. Waiwa ando atalapape leaipia.

⁷⁻⁸ Matili wandakali yame minditupa-mane wandakali yame waka minditupa

yanda pimaulai-kola, tili-tula lo atola tupa yakamato ale olopeyai. Kanjiti mindina tane wandakali tupamane kanjiti waka mindina tane tupa yanda andane pimawua ateyai lene pii popone oko yakamato ale olopeyai teke. Wandakali-mane mangene utupane wamba ini pulupeyai tekeko, okone angi teke yuu oko koyo napulupayako. Wandakali-mane yanda pua atolai-angi, yakamato ale wato, andipa yuu oko koyo peya nembo toto, yakama yuku olaini. Jia. Yuu minditupana yuu yundukumi tupa minulu-peya. Yuu waka minditupana ulia nono andane tupa yolopeya. Kenda-pene utupane pitaka wanda-mane andopane manduyale peya-kola, wamba ini masia peyalane okonepene gulolo-peya.

9-10 Akali minditupa-mane wamba ini poto, Gotena pii layene epene oko wandakali yame palu peya tupa pitaka lamaipene guleya tekeko, yakama nambana yame ateyai okonena, Juta yame-mane yakama andi lo awua polopeyai. Utupane-mane yakamana kanjole tupana wenonga yakama kosimi loto, yakamana lotu anda tupana atalapa loto, yakama kunju-mane peyolo-peyai. Utupane-mane wuane pulaini. Waiwa ando atalapape. Yakamato nambana pii layene epene oko gapomane akali kawane tupapi, kinjipi, utupanenga lamai-yapale nembo toto, alu minditupa Goteto ando konda ola-kola, wandakali minditupa-mane yakama andi lo awua poto, gapomane akali kawane utupanena wenonga yakama kosimi lolopeyai.*

11 Wandakali tupamane yakama andi lo awua poto, yakama kosimi loyale pulai-angi, yakamato aki lamakalepe lo nembo kambua tolaini. Jia. Yakama tane wua lamakale nembo toto, pii nalolo-peyai. Jia. Oli Sipitisa okomane yakamana nembotene tupa mina ika loto, wua lalapa lolakola, yakamato pii lolopeyaiko. Wandakali utupane-mane yakama kosimi lolai-angi, Oli Sipitisa okomane pii yakama langula tupa lalapape.*

12 Okone angi, akali mindi nambana yame atola-kola, balana amene okomane bala kosimi loto, gapomane okomane bala peyo ome leakale lo malupeya. Andopane mindi nambana yame atola-kola, balana ayiane okomane andopane okone kosimi loto, wuane teke pulupeya. Andopane minditupana angini, ayiane-la, okonelapo nambana yame atolapi-kola, liyambana andopane utupane-mane okonelapo yanda pimawua, kosimi loto, gapomane okomane

okonelapo peyo ome leakale lolopeyai teke.
*

13 Yakama nambana yame atolai oko andoto, wandakali kambua-mane yakama ando yamapane koo wete palu atolopeyai tekeko, wandakali mindimane namba awua tepa naene, kenda-pene epola tupa awua atoto, bala omolane oto okona gäu leando, matili bala saka atapowa atolopeya. Jisasato wuane leaipia.*

Kenda-pene Andane Wete Mindi Epolopeya Leane Oko

Matiyu 24:15-28; Luku 21:20-24

14 Pepa oko ando dii lolai wandakali yakamato pii nambato andipa pepa peleyo oko wayumane nembo talapape. Wamba Jisasato pii mindi tako pua loto, wandakali yame waka tupamane owato gote mindi waa puato, Gotena lotu anda andane okona ate lolopeyai leaipia. Wuane napipe-pene tekoko, matili utupane-mane wuane pulupeyai. Goteto andola-kola, balana wenonga owato gote okonemane balana lotu anda epene wete okone mo kalato ataya ola-kola pulupeya. Yakamato andolai-kola, minditaka koo wetete okone lotu anda okona atolanga andolai-angi, Jutiya disitiki okona atolaini wandakali tupa yuu wangiane tupa palaka pupe-pene gulolo-peya.*

15 Palaka pupe-pene gulola-angi, wandakali mindi balana anda takita okona ateando, balana minditaka andaka yolane tupa mokale nembo toto, anda-pangosa kolandaka nalene, mee palaka pupe-pene gulolo-peya.*

16 Dee, wandakali mindi bala eenga ateando, balana tona kenga piyane oko molo-peke nalene, mee palaka pupe-pene gulolo-peya teke.

17 Okone angi, wanda andopane ininga pitipata pitulai tupapi, wanda andopane andu no atene pitulai tupapi, utupane-mane palaka pupe-pene pitete olai-kola, onto wete ape-pene gulolo-peya.*

18 Upa wete puato, pipiya peleando, yakama palaka pupe-pene pitete olopeyai-ko. Pipiya peyola-kola, kenda-pene okone yakamanga epolane lo loma yo atalapape.

19 Wamba wetete Goteto yuu ati-la, okonelapo yakale leane okone angi ato tewa, kenda-pene waka-waka kambua yama ipulu, andipa ateyama oto okona gäu leya tekeko, kenda-pene epola okonemane utupane pitaka sia minu andane mindi epolopeya. Kenda-pene andane wetete okonepene mindi matili-matilipi lapone naepolo-peya.*

* 13:9-10: Mt 10:17-20 * 13:11: Lk 12:11-12 * 13:12: Mt 10:21 * 13:13: Mt 10:22; Jo 15:21 * 13:14: Dan 9:27; 11:31; 12:11 * 13:15: Lk 17:31-32 * 13:17: Lk 23:28-31 * 13:19: Dan 12:1; Lp 7:14

²⁰ Akali Andane Goteto kenda-pene utupane ee ana kambua tupana epeakale lo ando konda yando, wandakali pitaka omolo-peyai tekeko, balana wandakali atekale lata yane tupa pitaka oma yiake lolaini nembo toto, balato kenda-pene utupane ee ana anjalapo angu epeakale lo ando kondolo-peya.

²¹⁻²² Matili owato Mesayapi, owato potopesa akalipi, utupanena minditupame wandakali tupa minakasa amakale nembo toto, mindiki-mindiki lo yale-yale ipuku pulupeyai. Epoto, namba Mesaya oko epeyo leandopi, namba potopesa akali enene mindi epeyo leandopi, okone-lapona mindi epeyo lo andawa loyale, utupane-mane metekolo piape minditupa pulupeyai. Wuane puato, utupanemanne katulo Gotena wandakali atekale lata yane tupa minakasa olane asini mindi yando, utupane-mane wuane pulupeyai. Wandakali mindimane yakama languato, Mesaya oko bala onga ateyai oko andolo ipulupa leandopi, bala amokusa ateyai oko andolo pulupa leandopi, akali okonemane enene leya lo yakamato nembo na-talapape.*

²³ Matili wandakali minditupa-mane wuane pulupeyai lo nambato yakama wamba bulupane langeyo-ko. Utupanemanne yakama minakasa olaini. Waiwa ando atalapape. Jisasato wuane leaipia.

Akalina Iwanane Okomane Balana Wandaki Tupa Lamolo Epolopeya Leane Oko
Matiyu 24:29-31; Luku 21:25-28

²⁴⁻²⁵ Wuane lalu, Jisasato pii mindi tako pua loto, kenda-pene andane utupane koyo pula-angi, Goteto minditaka tai ati kenga okona ateyai tupa mo ema-ema piya olakola, nai, ana-la, okolapo lapotaka undupi lalu, atinga kaiyanda ateyai tupa yuunga onto tepa aka pulupeyai leaipia.*

²⁶ Okone angi, wandakali-mane andolai-ka, Akalina Iwanane oko mole tupana tokonga atoto, balana tai-lene andane okola, tii-pene andane okola, okonelapo towa atu epolanga andolopeyai.*

²⁷ Epoto, balato balana enjole tupa lamawuato, yakamato nambana wandakali atekale lata yane tupa lamolo pulupa lola-kola, utupane-mane yuu yoo peyai tupa pitakana poto, balana wandakali utupane lamo atu epolopeyai. Jisasato wuane leaipia.*

Ita Piki Tupa Andoto, Mana Mialapape Leane Oko
Matiyu 24:32-35; Luku 21:29-33

²⁸ Wuane lalu, Jisasato pii kokoli mindi loto, yakamato ita piki tupa andoto, mana mialapape leaipia. Ita piki tupana kembonenga ipane epo peteya-kola, yokone wenene tupa kome piyane. Yakamato yokone utupane andoto, panyu puyale peya lo andalaini.

²⁹ Wuane pua teke, matili mangene minditupa wamba ini pulupeyai leyo tupa pulangsi, yakamato utupane pitaka andoto, Akalina Iwanane oko bala mandaka epoto, asia lombanga atalua nembo talapape.

³⁰ Nambato pii enene mindi yakama langeyo. Wandakali yame andipa ateyai tupa oma yiake nalolai-kola, mangene utupane pitaka pulupeyai.

³¹ Matili yuu ati-la, okonelapo alu pulupeyai tekeko, matili-matilipi nambana pii oko alu napulu-peya. Jisasato wuane leaipia.

Mandeke Pitawa Atalapape Leane Oko
Matiyu 24:36-44

³² Wuane lalu, Jisasato pii mindi tako pua loto, mangene minditupa pulupeyai leyo tupa oto andokona pulu-peyape, taeme andokona pulu-peyape lo, wandakali mindikipi mindimane nembo nateya leaipia. Enjole ati kenga ateyai tupapi, Gote iwanane nambapi, nanimoto nembo nateyama teke. Jia. Ayiane Gote balato angu nembo teya.

³³ Goteto mangene utupane andoko angi pulu-peyape lo yakamato nembo nateyako. Yakamato lee too ando atalapape.

³⁴ Anda anduane mindimane yuu waka mindina moyale atoto, balana piape tale puato, balana piape akali tupa mindiki-mindiki lo lamawuato, nimbato piape oko ando atape lo lamaiki peaipia. Wuane puato, balato balana anda asia lomba ando atalane akali oko lamawuato, nimbato nambana anda asia lomba oko pai lo ando atape lalu peaipia.

³⁵⁻³⁶ Pea-kola, bala andoko angi peke lolopeyape lo, balana piape akali tupamane nembo nateainipia. Wuane pua teke, anda anduane okonemane balana piape tale puato, minditupa yakama mindiki-mindiki lo giyane. Matili bala peke lolopeyai tekeko, nai andaka pola-kola yandopi, utilu tombe yandopi, muna pulu-kola yandopi, upanda yandopi, andoko angi bala epolo-peyape lo yakamato nembo nateyai. Yakama limu palu yolai-kola, bala kapoyale epoto andolane. Yakamato pai lo ando atalapape.*

³⁷ Wandakali pitaka-mane pii oko ale yakale nembo toto, nambato pii oko yakama langeyo-ko. Yakamato ando atalapape. Jisasato wuane leaipia.

* 13:21-22: Lap 13:13 * 13:24-25: Ais 13:10; Jol 2:10,31; 3:15; Lap 6:12-13 * 13:26: Lap 1:7 * 13:27: Mt 13:40-41;
Mk 13:32 * 13:35-36: Lk 12:35-38

14

*Jisasa Peyo Ome Lamakale Leaini Oko
Matiyu 26:1-5; Luku 22:1-2; Jone 11:45*

53

¹⁻² Okone angi, pitisa akali kawane tupapi, loo tupana mana andene akali tupapi, utupane-mane Jisasa langa-langa puato, bala minuto, peyo ome lolane asini mindi aiya peainipia. Oto lapo angu pola-kola, Pasopa tomo nolane oto oko epola-kola, nanimato yisa napalene betesa nolo-peyama nembo toto, utupane-mane pii mindi loto, Pasopa oto okona nanimato Jisasa minu peyo ome lemando, wandakali tupamane nanima towa yataka wato, yanda pingulaini. Ole waka mindi angi, nanimato bala andi lalu, peyo ome lamakale leainipia.

*Wanda Mindimane Wele Minditupa
Jisasana Kawanenga Gae Leane Oko
Matiyu 26:6-13; Jone 12:1-8*

³ Matili Jisasa bala Betani tano okona atoto, akali Saimone wamba tapa peane akali okona andaka tomo no peteaiapia. Petea-kola, wanda mindimane wele tunduma-pene muni andane-mane wete kambalaini mindi awua epeaiapia. Wandakali-mane nata pini tupana ipane penge lo moto, wele tunduma-pene okonepene tupa waa piyainipia. Wele okone botolo pene epene wete mindina pitipata yane. Botolo okone lumbolane asia tuma ata napene ya-kola, wanda okomane botolo okonena ene luu oko minu kundu loto, wele okone Jisasana kawanenga gae lo aiya mayaepia.*

⁴⁻⁵ Wuane pea-kola, wandakali ongane peteaini minditupa-mane yataka wato, yakama teke-teke pii laawa puato, wandakali waka tupamane wele okone kambeakale loto, wanda okomane yole kambua wete moto, nanima gipia-yale, nanimato katulo muni okone wandakali tipia tupa moyo tale pua maima-yaleko. Anu peakale wanda okomane wele oko mee mo ole peyape leainipia. Wuane loto, utupane-mane wanda okone laiya leainipia.

⁶⁻⁸ Laiya leai-kola, Jisasato utupane lamawuato, wandakali tipia tupa ole dindi lo yakama towa atolopeyai leaiapia. Matili yakamato utupane moyo-makale nembo toto, katulo moyolo-peyai. Namba yakama towa ole dindi lo yuu okona ata napulu-peyama. Wanda okomane namba moyo, mana epene wete mindi nambanga mineya-ko. Anu peakale yakamato bala mini mo kenda piya eyaipe. Matili akali minditupa-mane namba mali pulupeyai nembo toto, andipa balato nambanga

umbuaini oko mandeke puato, wele oko nambanga gae loto, aiya eya. Balato katulo wuane pukale nembo toto, peya oko peakale lo yakamato ando kondalapa.*

⁹ Nambato pii enene mindi yakama langeyo. Gotena pii layene epene oko yuu pitakana lo tawe yolai-angi, wanda okomane mangene oko peae-ya nembo tolo-peke loto, wandakali-mane pii temane oko lo tawe yolopeyai. Jisasato wuane leaiapia.

*Jutasato Jisasa Ene Pitukale Leane Oko
Matiyu 26:14-16; Luku 22:3-6*

¹⁰ Okone angi, disaipolo alesa akali tupa-mana mindi Jutasato Isaka-tyote lene okomane Jisasa ene pitukale nembo toto, pitisa akali kawane tupa ateatinga peaiapia.

¹¹ Poto, Jisasa ene pitukale lea-kola, utupane-mane balana pii okone ale wato, epele wete wato, nimbato Jisasa ene pleteendo, nanimato muni minditupa gulupeyama leainipia. Wuane leai-kola, balato Jisasa ene pituyale asia mindi aiya peaiapia.

*Pasopa Tomo Nolane Tupa Mandeke
Peapele Oko
Matiyu 26:17-20; Luku 22:7-13; Jone
13:21-30*

¹² Yisa napalene betesa nalaini oto bulupane oko epeya-kola, Juta yame-mane Pasopa tomo tupa namakale nembo toto, sipisipi andopane mindi peyo yangoto, nalainipia. Oto okone epea-kola, Jisasana disaipolo tupamane bala tipa puato, nimbato Pasopa tomo tupa nola loto, nanimato aninga mandeke pipiai lakae lo nembo telepe leainipia.*

¹³ Wuane leai-kola, balato balana disaipolo tupana lapo akali lamawuato, liyamba Jutusaleme pulupape leaiapia. Polapi-kola, akali mindimane ipa pene andane mindina ipa piti-pata awua epoto, liyamba malanda olopeya. Liyambato bala watama pulupape.

¹⁴ Bala anda mindina kolandaka lola-kola, liyambato anda okonena anduane oko lamawuato, tisa okomane pii mindi loto, nambana disaipolo tupa towa Pasopa tomo tupa nolane lumu oko aninga eyape lala lalapape.

¹⁵ Wuane lolapi-kola, balato liyamba atu poto, dapolo anda kenga lumu andane mindi liyamba andawa lolopeya. Lumu okonena tepolo tokopi, pitulane tokopi, okonetaka tupa mandeke pitane yolopeyako. Liyambato Pasopa tomo nolane tupa mandeke piyapape.

* 14:3: Lk 7:37-38

* 14:6-8: Lo 15:11; Jo 19:40

* 14:12: Ek 12:6

¹⁶ Wuane lea-kola, balana disaipolo okonelapo-mane Jutusaleme poto, andeapikola, Jisasato minditaka yolopeya leane tupa pitaka ya-kola, akali okonelapo-mane Pasopa tomo nolane tupa mandeke piyu, peke leapelopia.

*Jisasato Yakamana Mindimane Namba Ene Pitulu-peya Leane Oko
Matiyu 26:20-25*

¹⁷ Matili nai andaka pea-kola, Jisasa balana disaipolo alesa akali tupa towa anda okonena peakaiyu leaninipia.

¹⁸ Peakaiyu lalu, utupane-mane tomo no peteaini-pia. Tomo no pituto, balato utupane lamawuato, nambato pii enene mindi yakama langeyo. Namba towa atu tomo no peteyama akali yakamana mindimane namba towa yanda pene akali tupanga namba malupeya leaipia.*

¹⁹ Wuane lea-kola, utupane-mane yamapanne kenda wato, mindiki-mindiki lo bala lamawuato, nimbato namba andayo nalolo-pele yalua laka peainipia.

²⁰⁻²¹ Wuane laka peai-kola, balato utupanena pii okone yano peyoto, Gotena pii pepa pelene eya mindimane loto, Akalina Iwanane okomane wua pua omolo-peya layene eya pua bala omolo-peya tekeko, ene pitulane akali oko bala ondo wete ape-pene leaipia. Angini-mane bala mandi naapeayale, katulapia-yale. Akali okone bala alesa akali yakamana mindi. Namba towa disa mindiki okona betesa tanda peyapa akali okomane nambana yanda pene tupanga malupeya. Jisasato wuane leaipia.

Betesa, Waene-la, Okonelapo Neakale Mayane Oko

Matiyu 26:26-30; Luku 22:15-20; 1 Kotini 11:23-25

²² Jisasa balana disaipolo tupa towa tomo no pituto, betesa mindi moto, Gote wayu pele lalu, betesa okone konde leaipia. Konde loto, balana disaipolo tupa mawuato, oko nambana umbuaini oko. Yakamato mo nalapa leaipia.

²³⁻²⁴ Wuane lalu, balato kapo waene petene mindi moto, Gote wayu pele loto, balana disaipolo tupa mai-yaepia. Mawuato, nambato pii wenene mindi lo yata wato, nambana tundupa oko gae lolowa okomane wandakali kambua moyolo-peyawa leaipia. Wuane lea-kola, utupane pitakanne waene okone neainipia.*

²⁵ Neai-kola, balato utupane lamawuato, nambato pii enene mindi yakama langeyo leaipia. Andipa ato tewa, nambato waene

nanene atama pulu, matili Goteto wandakali pitaka moyo ando atola-angi, nambato waene waka mindi nolo-peyawa.

²⁶ Wuane lalu, balato utupane towa sonjo mindi lalu, Jutusaleme tepa alu, Olipi wangiane okona peainipia.

*Pita Nimbato Namba Anda Napeyawane Lolepele Leane Oko
Matiyu 26:31-35; Luku 22:31-34; Jone 13:36-38*

²⁷ Okone angi, Jisasato balana disaipolo tupa lamawuato, Gotena pii pepa pelene eya mindimane loto, nambato sipisipi ando atalane akali oko peyo ome lolowa-kola, sipisipi tupa palaka puu toko lolopeyai layene eya leaipia. Pii okonemane wuane leya okonena, yakama pitaka-mane nambanga tunji peleyai oko awua tepa alu, yakama palaka puu toko lolopeyai nembo teyo.

²⁸ Yakamato wuane pulupeyai tekeko, matili Goteto namba malinga ika laya olangi, namba wamba ini ingane Galili disitiki okona polowa-kola, matili yakama epolopeyai leaipia.*

²⁹ Wuane lea-kola, Pitato bala lamawuato, akali waka tupa pitaka-mane nimba tunji peleyai oko awua tepa yaindopi, nambato wuane napulu-peyawa leaipia.

³⁰ Wuane lea-kola, Jisasato bala lamawuato, nambato pii enene mindi nimba langeyo. Andipa utulu, eka pauli maipa mindimane pii lapone gulo wene loyale pula-kola, ole tepoainga nimbato wandakali minditupa lamawuato, nambato Jisasa anda na-peyawane lolopele leaipia.

³¹ Wuane lea-kola, Pitato bala lamawuato, namba nimba towa atu omape-pene guleando, okone katu. Nambato nimba anda na-peyawane nalolo-peyawa. Jia wete leaipia. Wuane lea-kola, disaipolo waka tupa pitaka-mane wuane teke leanipia.*

Jisasa Bala Gesemani Olipi Wangiane Okona Poto, Pote Leane Oko

Matiyu 26:36-46; Luku 22:39-46

³² Okone angi, Jisasapi, balana disaipolo tupapi, utupane yuu Gesemani lene okona peainipia. Pulu, balato utupane lamawuato, namba pote lolo peyo-ko. Yakama onga pitiyapa leaipia.*

³³ Wuane lalu, balato Pita, Jemesa, Jone ima utupane atu aiyu amonga-yale poto, yamapanne kenda wetete wato, anu puape lo nembo kambua teaipia.

³⁴ Nembo kambua toto, balato utupane lamawuato, nambana yamapanne kenda wetete peya okonena, namba omape-pene gulalua-ko. Anu peyape lo andoyale,

* **14:18:** Sam 41:9 * **14:23-24:** Ek 24:8; Sak 9:11; Jet 31:31-34; 1Ko 10:14-18; Ip 9:19-20 * **14:28:** Mt 28:16; Mk 16:7

* **14:31:** Jo 11:16 * **14:32:** Jo 18:1 * **14:34:** Jo 12:27

yakamato onga atoto, ando atalapa leaipia.
*

³⁵ Wuane lalu, bala ambinga-yale peapipia. Bala tandaka nape-pene oko peyo wanju olane asini mindi yando, asini okonena pokale nembo toto, balato yuunga tombawua loto, pote leaipia.

³⁶ Pote loto, Ayiane Gote, nimbato katulo pitaka taka pilini-ko. Tandaka nambato nape-pene oko peyo wanju olane asini mindi yando, nimbato asini okone lum-bape. Nimbato wuane pula lo nambato nembo teyo tekeko, nambato nembo teyo pua napene, nimba tane nembo tele pua pipe. Jisasato wuane leaipia.*

³⁷ Wuane lalu, bala peke loto andea-kola, balana disaipolo tepo akali utupane limu palu yainga andoto, balato Pita tipa puato, Saimone, nimbato katulo awa mindiki angu ando ata napene, wamba kapoyale pang-elepe leaipia.

³⁸ Enene, yakamato ando ataima lakae lo nembo teyai tekeko, yakamana umbaini tai naleya-kola, yakamato ando ata napene, limu paleyai. Sataneto yakama minu mandeke pula-kola, yakama yuunga peakolaini. Pote lo ando atalapa leaipia.

³⁹ Wuane lalu, bala lapone ambinga-yale poto, pote bulupane leane mindiki okone teke lolo-peke leaipia.

⁴⁰ Pote lalu, bala peke loto andea-kola, utupane limu wete wato, lapone limu palu yainga andeaipia. Andoto, balato utupane peya ika leane tekeko, utupane-mane aki lamape lo nembo nateainipia.

⁴¹ Nembo nateai-kola, balato ole tepone gulo pote lolo pulu, peke loto, utupane tipa puato, yakama mee oto mo limu teke palu ateyaipe leaipia. Yakamato wuane pua ateyai oko kondalapa. Akali mindimane Akalina Iwanane namba yanda pene tupa-nga maulane oto oko epeya-kola, namba ene pitipia akali okomane koo piyaini akali tupamane namba andi leakale loyale peya.

⁴² Namba ene pitipia akali oko bala wamba mandaka epeya oko andalapa. Nanimato bala malanda olo makale. Ika lalapa leaipia.

*Jutasato Jisasa Ene Peteane Oko
Matiyu 26:47-56; Luku 22:47-53; Jone 18:3-12*

⁴³ Jisasato pii okone lo atea-kola teke, balana disaipolo alesa tupana akali Jutasato bala akali kambua tupa towa atu epeainipia. Wamba pitisa akali kawane tupapi, loo tupana mana andene akali tupapi, Juta yame ando atalaini akali tupapi, utupane-mane akali utupane lamawuato, yakamato Jisasa andi lolo pulupa leai-kola,

utupane-mane kandepa luipi, mulipi, utu-pane awua epeainipia.

⁴⁴ Jutasato utupane lamawuato, nam-bato akali mindi nunu lolowa oko Jisasa yolopeya-ko. Bala palaka polane. Yakamato bala duli lo minuto, atu aiyu pulupape leaipia. Wuane lalu, bala utupane towa Jisasa andi lolo moyale peainipia.

⁴⁵ Jutasato Jisasa ateanga epoto, bala ando, tisa loto, bala nunu leaipia.

⁴⁶ Nunu lea-kola, akali utupane-mane Jisasa taimane minuto, andi leainipia.

⁴⁷ Andi leai-kola, Jisasa ateanga mandaka ateaini akali tupana mindimane kandepa luu mendeane oko kilau lo moto, pitisa akali kawane okona piape akali okona alene mindi yoko taka lo tepa yaepia.

⁴⁸ Akali utupane-mane Jisasa andi leai-kola, balato akali epeaini utupane tipa puato, yakamato kandepa luipi, mulipi, utu-pane awua poto, pake nene akali mindi andi lalaini pua, namba andi lolo epeyaipe leaipia.

⁴⁹ Ole dindi lo lotu anda andane okona ende anda-pangosa namba yakama towa atu atoto, wandakali tupa mana lamawuata atalawane tekeko, okone angii yakamato namba minu andi na-lapai. Wuane tekeko, bala tanena pii pepa pelene eya mindi enene guleakale nembo toto, Goteto ando kondeya-kola, yakamato mangene utupa payai. Jisasato wuane leaipia.*

⁵⁰ Akali utupane-mane Jisasa andi leai-kola, balana disaipolo tupa pitaka bala awua tepa alu, palaka peainipia.

⁵¹ Okone angii, akali mindimane iwana patane Jisasa towa atu ateane mindi andi lokale nembo toto, iwana okonena tona peane oko minata yaepia.

⁵² Minata ya-kola, iwana okonemane balana tona peane okone yoko tepa alu, bala papata palaka peainipia.

Juta Yamena Kanjole Okomane Jisasa Kosimi Leaini Oko

Matiyu 26:57-68; Luku 22:66-71; Jone 18:13-14,19-24

⁵³ Akali utupane-mane Jisasa andi loto, pitisa akali kawane oko ateanga atu aiyu peai-kola, pitisa akali kawane tupapi, Juta yame ando atalaini akali tupapi, loo tupana mana andene akali tupapi, utupane pitaka elo amunguli peainipia.

⁵⁴ Pita bala amonga-yale ati iki lama Jisasa watama poto, pitisa akali kawane okona anda ende pitane atene okona kolanda leaipia. Piape akali minditupa-mane organe ita yango peteai-kola, bala utupane towa endo yo peteaiapia.

* **14:36:** Mk 10:38; Jo 6:37-40

* **14:49:** Lk 19:47; 21:37-38; Jo 18:20

⁵⁵⁻⁵⁶ Pitisa akali kawane tupapi, kanjole waka tupapi, utupane pitaka-mane Jisasa peyo ome lolane tene mindi aiya peainipia. Owato wisanisa kambua epoto, owato pii loto, Jisasa kosimi leaini tekeko, utupane-mane pii mindiki okone teke nalene, pii waka-waka leai-kola, Juta yamena kanjole tupamane bala peyo ome lolane tene mindi ale nayainipia.

⁵⁷⁻⁵⁸ Matili akali minditupa-mane ika loto, Jisasa andayo owato pii mindi loto, wamba nanimato ale ema-kola, akali okomane pii mindi loto, nambato Gotena lotu anda andane wandakali-mane pene oko keao lalu, ole tepo angu piape puato, Gotena lotu anda andane waka wandakali-mane napene mindi pulu-peyawawa leane leainipia.*

⁵⁹ Utupane-mane wuane leaini tekeko, akali utupane pitaka-mane pii mindiki okone teke naleai-kola, kanjole tupamane Jisasa peyo ome lolane tene mindi anda napeainipia.

⁶⁰ Okone angi, pitisa akali kawane okomane akali peteaini tupana wenonga ika loto, Jisasa tipa puato, akali utupame-nime nimba kosimi loto, koo tene mindi nimba-yata eyai tekeko, nimbato utupanena pii okone yano peyoyale, pii mindikipi mindi laa napele okonde leaipia.

⁶¹ Balato wuane leane tekeko, Jisasato pii mindikipi mindi lapeke naleai-pia. Balana pii okone yano napelea-kola, pitisa akali kawane okomane bala tipa puato, nimba Gote nanimato laiyu lalamane okona iwanane Mesaya oko atelepe leaipia.

⁶² Wuane lea-kola, Jisasato balana pii okone yano peyoto, uli. Matili yakamoto andolai-kola, Akalina Iwanane namba Gote tai wetete okona kii tikasa-tole pitiyu, atinga kenga tawe mole tupana tokonga epolowanga yakamoto andolopeyaleaipia.

⁶³⁻⁶⁴ Wuane lea-kola, pitisa akali kawane okomane yataka wato, bala tanena tonapeane oko minu liti loto, Juta yamena kanjole akali tupa lamawuato, balato Gote lamba leya-kola, yakama tane ale eyai oko yako. Anu peakale wandakali waka mindimane wisanisa atoto, bala tane Mesaya oko ateyo larlane lo nanima langeakale maliyo atamakalepe. Balato Gote lamba leya-kola. Yakamoto aki nembo teyaipe leaipia. Wuane lea-kola, akali kanjole tupa pitakamane balana pii okone yano peyoto, koo tene andane balanga eya-ko. Bala omape-pene leainipia.*

*Jisasa Ando Lamba Leaini Oko
Matiyu 26:67-68*

⁶⁵ Wuane leai-kola, akali minditupa-mane Jisasa apesango soo lo peleaini-pia. Akali mindimane Jisasana lee-inga yake pua ombo ya-kola, akali waka tupamane bala kii momanga-mane peyalu, nimba potopesa akali mindi gulo atoto, akali nimba peleya okona gene laa leainipia. Wuane lalu, ami yanda yene tupamane bala minu peleaini-pia.

*Pitato Jisasa Anda Na-peyawane Leane
Oko*

Matiyu 26:69-75; Luku 22:56-62; Jone 18:15-18,25-27

⁶⁶ Jisasa bala pitisa akali kawane okona dapolo anda kenga lumu mindina ateakola, Pita bala nappinga anda okonena ende anda-pangosa ateaiapia. Atea-kola, pitisa akali kawane okona piape wanda tupana mindi epeaiapia.

⁶⁷ Epoto, balato Pita endo yo peteanga andeaipia. Balato Pita pai lo andoto, bala lamawuato, nimbapi, Nasatesa tane Jisasa oko towa atu atapiapi leaipia.

⁶⁸ Wuane lea-kola, Pitato balana pii okone tanga loto, nambato akali okone anda na-peyawane. Nimbato aki nembo toto, wuane lelepe lo namba tatake eyo leaipia. Wuane lalu, bala ende pitane okona asia lomba okona mandaka poto ateakola, eka pauli maipa mindimane pii leaipia.

⁶⁹ Pita ongoing ateakola, piape wanda okonemane bala lapone teke andoto, wandakali mandaka ongoing ateaini tupa lamawuato, akali oko bala Jisasana disaipo tupana mindi ateya leaipia.

⁷⁰ Wuane lea-kola, Pitato balana pii okone tanga loto, lapone teke nambato Jisasa anda na-peyawane leaipia. Anja matili yale, wandakali ongoing ateaini tupamane Pita lamawuato, nimba Galilli disitiki tane mindi ya lo andeyama. Enene wete, nimba Jisasa disaipo tupana mindi atele leainipia.

⁷¹ Wuane leai-kola, Pitato balana weno minuto, pii taimane loto, enene wete, yakamoto akali mindi andayo pii leyai okone nambato anda na-peyawane leaipia. Goteto andeya. Nambato pii leyo oko owato pii lewando, balato namba minu koyakale leaipia.

⁷² Pitato wuane lea wete, okone angi teke eka pauli maipa mindimane lapone teke pii lea-angi, Pitato pii Jisasato wamba leane oko nembo tolo-peke leaipia. Wamba Jisasato eka pauli maipa mindimane pii lapone gulo wene loyale pula-kola, ole tepoinga nimbato namba anda na-peyawane lolopele leane okone enene guleya nembo toto, Pita bala ai leaipia.

* **14:57-58:** Jo 2:19-21 * **14:63-64:** Pit 24:16; Jo 19:7

15

*Pailate Wenonga Juta Yame-mane Jisasa
Kosimi Leaini Oko*

Matiyu 27:1-2,11-14; Luku 23:1-5; Jone 18:28-38

¹ Upanda wete pitisa akali kawane tupapi, Juta yame ando atalaini akali tupapi, loo tupana mana andene akali tupapi, kanjole waka tupapi, utupane pitaka-mane pii mindiki lo yake puato, Jisasana kini eyakanane andi loto, bala atu aiyu poto, Pailate mayainipia.*

² Mayai-kola, Pailateto Jisasa tipa puato, nimba Juta yamena kinji okope leaipia. Wuane lea-kola, Jisasato balana pii okone yano peyoto, nimba tane wuane lele okoni leaipia.

³ Wuane lea-kola, pitisa akali kawane tupamanne koo tene kambua balanga yata yainipia.

⁴ Yata yai-kola, Pailateto bala lapone tipa puato, akali utupane-mane koo tene kambua nimbanga yata eya oko nimba tane ale ele okoni. Nimbato utupanena pii okone yano peyoto, pii mindikipi mindi nalolape leaipia.

⁵ Balato wuane leane tekeko, Jisasato balana pii okone yano peyoto, pii mindikipi mindi nalea-kola, Pailate moko wete leaipia.*

*Pailateto Jisasa Ita Malamanda Okona
Peyo Yuka Alapa Leane Oko*

Matiyu 27:15-26; Luku 23:13-15; Jone 18:38-19:16

⁶ Ee ana dindi lo Juta yame wandakali tupamane Pasopa tomo nalaini oto oko epeyanganji, utupane-mane akali katapusa atalaini tupana mindi makimi loto, Pailate nimbato akali okone tita lo tepa ape leai-kola, balato utupane moyoto, akali okone tita lo tepa alaepia.

⁷⁻¹⁰ Tene okonena, wandakali kambua epo amunguli puato, mee kosimi leainga andoto, wandakali utupane tipa puato, nimbato Juta yamena kinji oko tita lo tepa apia laka lo nembo teyaipe leaipia. Balato wuane leane tekeko, wamba akali minditupa-mane Lomo gapomane oko yanda pimawuato, wandakali minditupa peyo ome leai-kola, gapomane okomane akali utupane pitaka andi loto, katapusa anda okona aindaka leainipia. Akali utupanena mindi gene Batapasa lenepia.

¹¹ Bala katapusa atea-kola, pitisa akali kawane tupamane wandakali tupana nembo-tene mina ika laya wato, yakamoto

Pailate lamawuato, nimbato Batapasa tita lo tepa aa lalapa leainipia.*

¹² Wandakali tupamane Batapasa tita lo tepa aa leai-kola, Pailateto utupane lamawuato, yakamoto Jisasa bala Juta yamena kinji oko ateya lalaini-ko. Nimbato Batapasa tita lo tepa ewando, nimbato Jisasanga anu pipia laka lo nembo teyaipe leaipia.

¹³ Wuane lea-kola, utupane-mane pii taimane loto, bala ita malamanda okona peyo yuka aa leainipia.

¹⁴ Wuane lea-kola, Pailateto utupane tipa puato, anu peakale nimbato bala ita malamanda peyo yuka ape-penepe. Balato mana koo wete andoko minapiape leane tekeko, utupane-mane balana pii okone yano peya napene, mee pii taimane wete loto, bala ita malamanda okona peyo yuka aa laka peainipia.

¹⁵ Wuane laka peai-kola, Pailateto utupane mo epele aya wakale nembo toto, Batapasa tita lo tepa amaiya. Wuane piyu, balato ami yanda yene minditupa lamawuato, yakamoto Jisasa kunju-mane peyalu, ita malamanda okona peyo yuka alapa loto, utupanenga mayaepia.

*Ami Yanda Yene Tupamane Jisasa Ando
Lamba Leaini Oko*

Matiyu 27:27-31; Jone 19:2-3

¹⁶ Ami yanda yene utupane-mane Jisasa atu aiyu gapomane anda okona ende andapangosa poto, utupanena ami yanda yene yangone tupa pitaka epeakale leainipia.

¹⁷ Epeai-kola, tona kinji tupamane kala pepolo piyaini okonetaka nembo toto, utupane-mane tona okonepene mindi balanga piya mayainipia. Piya maiyu, utupane-mane eyaka ani atene mindi mo umange pua, kinina tangi gulene mindi waa puato, balana kawanenga tangi gulo anda aiya mayainipia.

¹⁸ Wuane piyu, utupane-mane bala lamba loto, Juta yamena kinji nimba wayu epeleya. Nimba kuai lo atape leainipia.

¹⁹ Wuane lalu, utupane-mane kelewa kanda mindimane balana kawanenga peyaka, apesango soo lo peyaka peainipia. Wuane piyu, utupane-mane mee owato balana gene oko laiyu lele pua, aikini leka aka peainipia.

²⁰ Utupane-mane bala lamba lo koyo piyu, tona pepolo balanga piya mayaini oko yoko moto, bala tanena tona piyane tupa piya maiyu, bala ita malamanda okona peyo yuka oyale atu aiyu peainipia.

* 15:1: Lk 22:66

* 15:5: Ais 53:7 Mk 14:61

* 15:11: Ap 3:13-14

*Jisasa Bala Ita Malamanda Okona Peyo
Yuka Yaini Oko*

*Matiyu 27:32-44; Luku 23:26-43; Jone
19:16-27*

²¹ Okone ang, Saitini tano okona tane Saimone lene mindi bala Jutusaleme moyale asini epeaipia. Bala Aleke-sanda, Lupasala, okone-lapona ayiane pia. Bala epeakola, balato Jisasana ita malamanda oko aiyakale loto, ami yanda yene tupamane okone balanga mo aiya mayainipia. *

²² Saimoneto Jisasana ita malamanda oko awuato, bala towa atu pea-kola, ami yanda yene tupamane okonelapo atu aiyu poto, Golokota yuu okona peakaiyu leainipia. Gene Golokota okona tene oko kawane kulini wangiane oko eya.

²³ Golokota wangiane okonena peakaiyu lalu, utupane-mane ipa waene minditupa moto, matasini towa mina mindiki loto, Jisasa neakale mayaini tekeko, balato naa napeaipia.

²⁴⁻²⁶ Upanda taeme naini kiloko lea-kola, ami yanda yene tupamane Jisasa ita malamanda okona peyo yuka yainipia. Wamba pitisa akali tupamane Jisasa kosimi loto, Pailate lamawuato, Jisasato bala Juta yameni kinji ateyo lalane leainipia. Wuane leaini oko nembo toto, ami yanda yene tupamane akali oko bala Juta yameni kinji oko ateyo lo pepa peyoto, pepa okone Jisasana ita malamanda okona kawanenga ate leainipia. Ate lalu, utupane-mane bala ita malamanda okona peyo yuka alu, tasu peyoto, wini leane akali tupamane mindiki-mindiki lo balana tona mindi miaka peainipia. *

²⁷ Wuane piyu, utupane-mane pake nene akali lapona mindi ita malamanda Jisasana kii tikasa-tole ateane mindina peyo yuka alu, mindoko ita malamanda Jisasana kii koyasa-tole ateane mindina peyo yuka yainipia.

²⁸ [Wuane peai-kola, Gotena pii pepa pelene eya mindi enene guleaipia. Pepa okonemane loto, wandakali-mane andeakola, bala koo piyane akali mindi gulo ateyo lo andeaini layene eya.] *

²⁹ Jisasa bala ita malamanda okona peyo yuka atane ateane organe mandaka epo peaini wandakali tupamane yakamana kawane taimane ema puato, bala lamba loto, nimbato lotu anda andane oko keao lalu, ole tepo angu piape puato, pulu-peke lolo-peyawa lalene akali piako. *

³⁰ Nimba tane moyoto, ita malamanda oko tepa alu, yuunga ipu leainipia.

³¹ Wuane pua teke, pitisa akali kawane tupapi, loo tupana mana andene akali tu-papi, utupane-mane pii lalawa puato, Jisasa lamba loto, balato wandakali waka tupa moyane tekeko, bala tane katulo moya napeya.

³² Bala ita malamanda oko andipa tepa alu, yuunga epeando, nanimato okone andoto, bala Isatale tanena kinji atoto, Mesaya oko ateya lo bilipi lolopeyamako. Bala yuunga epeakale leainipia. Wuane loto, bala lamba leai-kola, bala peyo yuka atane ateane organe mandaka gulo ita malamanda-danga lapo akali peyo yuka atane ateapili akali okonelapo-manepi bala lamba leapele tekepia.

*Jisasa Omeane Oko
Matiyu 27:45-56; Luku 23:44-49; Jone
19:28-30*

³³⁻³⁷ Otonga oto kulini okona ato tewa, yuu tupa pitaka undupi latane angu ateakola, matili ole lene taeme siti kilokopi mindi lea-kola, Jisasato pii taimane wete loto, Eli, Eli, lama sapa-katani leaipia. Pii okone nanimato mopeke loto, nambana Gote, nambana Gote, anu peakale nimbato namba tepa elepe leaipia. Wuane lea-kola, wandakali organe ateaini tupana minditupa-mane ale wato, balato llainja ee lalua-ko. Ale alapa leainipia. Okona ang, akali mindi taimane poto, sapanija mindi moto, waene kaa-pene pinika lene okona tanda pua moto, ita kai mindina tutuktu puato, Jisasa bala duu lo neakale mayaepia. Maiyu, balato wandakali waka tupa lamawuato, pii kondalapa. Ilainjato bala ondo molo epeyape lo andamakalenga, maliyo atalapa leaipia. Balato wuane leane tekeko, Jisasa bala taimane wete kalae lalu, omeaipia. Okone ang, ole-lene taeme siti kiloko lea-kola, yuu waa lolo-peke leaipia. *

³⁸⁻³⁹ Jisasato pii minditupa lalu, omeangi, ami yanda yene ando atalane akali oko bala Jisasana ita malamanda okona wenonga ateapia. Organe atoto andeakola, enene wete, akali oko bala Gote Iwanane yala leaipia. Okone ang teke, lotu anda andane okona asia lomba gulene lalapa andane yuka atane ateane oko iyunga ato tewa, atutu lete lo lalo peapia.

⁴⁰⁻⁴¹ Wamba Jisasa bala Galili disitiki okona piape pua epoko pua atea-angi, wanda minditupa-mane bala watama poto, bala moyolaini-pia. Bala Jutusaleme tano okona peane-angi, wanda utupanena mindi bala Jose, balana amene anjako Jemesa-la, okone-lapona angini Matiya okopi, mindi Makatala tano okona tane Matiya okopi, mindi Salomepi, wanda tepo

* 15:21: Lom 16:13 * 15:24-26: Sam 22:18 * 15:28: Ais 53:12 * 15:29: Sam 22:7; 109:25; Mk 14:58 * 15:33-37:

utupane yakama wanda waka kambua tupa towa atu Jisasa watama Jutusaleme peainipia. Wanda utupane pitaka amongayale andapeyo atoto, bala wua pua omeya ya lo andeaini-pia. *

*Josepeto Jisasa Mali Peane Oko
Matiyu 27:57-61; Luku 23:50-55; Jone 19:38-42*

⁴²⁻⁴³ Atimatiya tano okona tane Josepe oko bala Juta yamena kanjole akali gene yene mindi ateapia. Bala Gote lo bilipi loto, matili balato pitaka taka taimane wete ando atolopeya nayuto, maliyo ateapia. Ole lea-kola, anate-lene Sambasa atokale lo mandeke pipe-pene nembo toto, bala yuku naene, Pailate ateanga poto, nambato Jisasa ana umbaini oko ondo mokalenga, nimbato ando kondape leaipia.

⁴⁴ Wuane lea-kola, Jisasa wamba kapoyale omeane oko nembo natene, Pailateto tatake wato, ami yanda yene kawane oko epeakale loto, bala tipa puato, Jisasa wamba omalape leaipia.

⁴⁵ Wuane lea-kola, ami yanda yene kawane okomane balana pii okone yano peyoto, enene, Jisasa wamba omala leaipia. Wuane lea-kola, Pailateto Josepe lamawuato, nimbato balana umbaini ondo miape leaipia.

⁴⁶ Wuane lea-kola, Josepeto lapa-lapa epene wete ake-pene mindi kambalu, Jisasa ondo moto, yunga awua epoto, lapa-lapa okonemane yake pua ombo yaepia. Wamba akali minditupa-mane wandakali mali pulane panda mindi ana ati mindina kua pua yainipia. Josepeto Jisasa ana umbaini oko mali okonena yata yaepia. Yata alu, balato ana andane wete mindi minu pendeke lo awua epoto, mali okonena asia lomba oko tuma peapipa.

⁴⁷ Josepeto Jisasa mali pea-angi, Jose angini Matiya okola, Makatala tano okona tane Matiya okola, okonelapo-mane balana mali okone andeapele-pia.

16

*Jisasa Bala Malinga Ika Leane Oko
Matiyu 28:1-8; Luku 24:1-12; Jone 20:1-10*

¹ Sambasa oto oko koyo pea-kola, Salomepi, Jemesa angini Matiya okopi, Makatala tano okona tane Matiya okopi, utupane-mane wele tunduma-pene minditupa Jisasa ana umbuaini okona aiya oyale minditupa kambeainipia.

²⁻⁴ Sande angi upa pitane wete, nai peakata ya-kola, wanda utupane Jisasa ana mali okona royale asini peainipia. Ana andane wete mindimane mali okona asia

lomba oko tuma pitiyaini oko nembo toto, utupane yakama teke-teke pii lalawa puato, apito nanima moyo, ana andane okone minu pendeke loto, mo aiyangi lolo-peyape leainipia. Utupane-mane wuane leaini tekeko, mali okona peakaiyu loto andeai-kola, mali okona asia lomba tuma pua ana andane wete yane oko minu pendeke lo aiyangi layene yanga andeaini-pia.

⁵ Andalu, utupane-mane ana anda mali okona kolandaka loto andeai-kola, iwana patane tona luu ake-pene mindi kii tikasatole peteanga andoto, moko wete loto, yuku yainipia.

⁶ Moko wete leai-kola, iwana okonemane utupane lamawuato, yakama moko loto, yuku olaini leaipia. Nasatesa tane Jisasa bala ita malamanda okona peyo yuka apiai oko yakamoto aiya pima epalai ya tekoko, Goteto bala malinga ika laya ala-kola, bala pala-ko. Bala onga naeyia. Bala yata apiapi panda oko andalapa.

⁷ Yakamoto Pitapi, disaipolo waka tuppapi, utupane ateyainga poto, Jisasa bala Galili disitiki okona wamba ingane palako. Balato lapia pua teke, yakamoto yuu okonena poto, bala andolopeyai lo lamaiyapape leaipia. *

⁸ Iwana patane okomane wuane lea-kola, anu piyape lo tatake wato, wanda utupane yakama putu-putu peyoto, mali oko tepa alu, palaka peainipia. Yuku wato, utupane-mane minditaka andeani tupa wandakali mindikipi mindi lamai naapeainipia.

[Makatala Tano Okona Tane Matiyato Jisasa Andeane Oko]

Matiyu 28:9-10; Jone 20:11-18

⁹ [Wamba Makatala tano okona tane Matiyato balanga sипитса кoo yanasa ateakola, Jisaso utupane peyo wateaipia. Sande angi wamba upa pitane Jisasa bala malinga ika lalu, wanda okonemane bala wamba ini andeakale lo panakame ateaipia.

¹⁰⁻¹¹ Jisasa ana disaipolo tupamane yampane kenda wato, ai lo ateai-kola, wanda okone poto, utupane lamawuato, Jisasa bala saka ateyanga andalo leane tekeko, utupane-mane balana pii okone ale wato, bilipi naleainipia.]

[Lapo Akali-mane Jisasa Asininga Andeapele Oko]

¹² [Matili Jisasa bala waka gulo epea-kola, balana disaipolo lapo akali Jutusaleme tepa alu poto, bala asininga andeapele-pia.

¹³ Andalu, okonelapo-mane poto, balana disaipolo waka tupa lamaiyapi-kola, utupane-mane akali okone-lapona pii okone bilipi naleainipia.]

* 15:40-41: Lk 8:1-3 * 16:7: Mt 26:32; Mk 14:28

*[Jisasato Balana Disaipolo Tupa Piape
Pulu Pulupape Leane Oko]
Matiyu 24:16-21; Luku 24:36-49; Jone
20:19-23*

¹⁴ [Wamba Jisasa bala malinga ika leangi, wandakali minditupa-mane bala andoto, Jisasana disaipolo masia tupa lamai-yaini tekeko, utupane-mane wandakali utupanena pii okone bilipi naleainipia. Matili balana disaipolo utupane tomo no peteai-kola, bala epoto, utupane laiya loto, anu peakale yakama tuu puato, wandakali utupanena pii okone bilipi na-lapiaipe leapia.] *

¹⁵ Yakamato yuu yoo peya tupa pitakana poto, Gotena pii layene epene oko wandakali tupa pitaka lamai-yapape leapia.] *

¹⁶ Wandakali mindimane pii okone bilipi loto, ipa meando, Goteto bala molo-peke lolopeya tekeko, wandakali mindimane bilipi naleando, Goteto bala kosimi lalu, yuu koo okona puu lolopeya.] *

¹⁷⁻¹⁸ [Namba lo bilipi lolai wandakali tupamane nambana gene oko loto, sиптisa koo tupa peyo watolo-peyai. Utupane-mane katulo wandakali yame waka tupana pii lalaini tupa mo lolopeyai. Utupane-mane etulu gepo mindi kini-mane mini-aindopi, wandakali omaya alane ipa koo mindi neaindopi, okonetaka tupamane utupane minu koya napulu-peya. Utupane-mane yakamana kini tupa wandakali siki pelene tupanga yata olai-kola, siki utupane atu yolopeyai. Wandakali-mane andolai-kola, wandakali mindimane mangene utupanena mindi peando, wandakali okone-mane Gote lo bilipi loto, mangene okone pula-kola pulupeyai.] *

[Jisasa Bala Ati Kenga Peane Oko]

Luku 24:50-53; Aposolo 1:9-11

¹⁹ [Akali Andane Jisasato pii utupane balana disaipolo tupa lamai koyo pea-angi, Goteto bala ati kenga iyu okona epeakale lea-kola, bala poto, Gotena kii tikasa petaipia.] *

²⁰ Balana disaipolo tupa yuu tupa pitakana poto, Gotena pii layene epene oko wandakali tupa lamaiki peai-kola, Jisasa bala Gotena kii tikasa pituto, balana disaipolo tupa moyoto, metekolo piape pulane tai-lene oko utupane maiki peapipia. Maiki pea-kola, utupane-mane metekolo piape tupa piki peaini mana okomane pii utupane-mane leaini tupa enene ya lo andawa leainipia.] *

* **16:14:** 1Ko 15:5 * **16:15:** Ap 1:8 * **16:16:** Ap 2:38-39 * **16:17-18:** Ap 2:4; 8:6-7; 28:3-6; Lk 10:18-19 * **16:19:**
Ap 1:9-11; 2:33-35 * **16:20:** Ap 14:3; Ip 2:3-4

LUKU

Gotena Pii Layene Epene Lukuto Pepa Peleane Oko

Gotena Pii Layene Epene Lukuto Pepa Peleane Oko

¹⁻² Tiapolesa, andipa nambato pii pepa peleyo tupa nimbato dii lo andoto, nembo tape. Wamba nanima tombenenga Goteto piape kambua mina ika lo peaipia. Piape bulupane peane tupapi, matili peane tupapi, utupane pitaka wandakali minditupa-mane lee-mane andeaini-pia. Andoto, akali utupanera minditupa-mane pii akali atoto, Goteto wua peane lo nanima langeai. Akali kambua-mane pii temane utupane ale wato, pepa peleaini-pia.*

³⁻⁴ Wamba Goteto piape peane utupane pitaka anu pua peape lo nambato wayumane nembo tokale loto, balana piape lee-mane andeani wandakali tupa tipa pikpu atewa. Akali minditupa-mane piape Goteto peane tupa nimba langeai-kola, Goteto piape utupane anu pua peape lo Tiapolesa nimbato wayumane nembo tola loto, andipa nambato nimbana pepa oko tika pua peyo epe leyo.

Elisambesato Jone Mandulu-peya Leane Oko

⁵ Wamba Etote bala Jutiya disitiki okona kinji ateane okone ang, Gotena piape piyane pitisa akali Sakataya lene mindi ateaiapia. Bala pitisa piape piyane Apaisa yame okona mindi ateaiapia. Bala wetene Elisambesa oko bala Etone yame peteaiapia.

⁶ Elisambesa, Sakataya-la, okonelapomane Goteta loo tupapi, pii layene tupapi, utupane pitaka tika pua minu peteapele-pia. Liyambanga koo tene mindi naya-kola, Goteto okonelapo wandakali tikapene peteayi leaipia.

⁷ Wanda Elisambesa oko ini tai lea-kola, bala akalini okola, liyambato andopane mindi mandi napene pitiyu mini yapelepia.

⁸ Alumindi Sakataya bala akali minditupa towa pitisa piape piyaini oto oko epea-kola, Gote lo tama pua, pitisa piape puyale epo ateainipia.

⁹ Ateai-kola, pitisa akali tupamane piape puyale tale piyaini pua tale puato, Sakataya, nimbato Goteta lotu anda andane okona kolandaka loto, Gote tama pua, ita dini tunduma-pene tupa yango atape leainipia. Wuane leai-kola, Sakataya bala Goteta lotu anda okona kolandaka leaipia.*

¹⁰ Okone ang, wandakali kambua wete epo amunguli puato, takita pote lo ateainipa.

¹¹ Sakatayato Gotena pitisa piape oko pua atea-kola, enjole mindi epoto, ita dini tunduma-pene yangalaini alata toko okona kii tikasa-tole epo ateaiapia.

¹² Atea-kola, Sakatayato enjole okone andalu, moko loto, yuku yaepia.

¹³ Yuku ya-kola, enjole okonemane bala lamawuato, Sakataya, nimba yuku naene kondaa leaipia. Nimbato tee lo pote lapi oko Goteto ale apia. Tene okonena, nimba wetene Elisambesato nimbana iwana mindi mandulu-peyako. Nimbato iwana okonena gene Jone lape leaipia.

¹⁴⁻¹⁷ Jone bala angini okona iningi pitulakola, Oli Sipitisa oko balanga epo tumbi lolopeya. Wamba Oli Sipitisa okomane Ilainja minu tai laya yane pua teke, balato Jonepi minu tai laya ollopeya. Tai laya olakola, wamba Ilainjato piape taimane peane pua teke, Jone balatopi piape taimane pulupeya. Balato ipa taipi, waenepi, utupane nanene wete ateakale. Akali Andane okomane Gotena piape puyale atolangi, Joneto piape minditupa wamba ini pulupeya. Akali Andane oko epolopeya nembo toto, wandakali-mane mandeke pua ateakale loto, Joneto Gotena piape puato, Gotena mana wato mina na-piyaini wandakali tupa mana lamaulu-peyako. Mana lamawuato, Gotena mana tika pua wato minalaini wandakali tupamane nembo talaini pua teke nembo talapa lolopeya. Balato ayianepi, iwananepi, waka gulo atlaini tupa lamawuato, yakama yamapanre mindiki palu atalapa lolopeya. Wuane loto, balato Isatale tane wandakali kambua utupane yamapanre mina ika laya olakola, utupane-mane yakamana Akali Andane Gote oko lo bilipi lolopeyai. Bilipi lolai-kola, Akali Andane okomane Jonena gene oko layu lolopeya. Joneto Gotena piape kuai lo pula-kola, Sakataya nimbato bala mandeene nembo toto, wandakali-mane epele ollopeyai. Nimbato balana piape utupane pitaka andoto, bala mandewa lo epele-mane omolopele leaipia.*

¹⁸ Enjole okomane wuane lea-kola, Sakatayato namba mini eyo leaipia. Namba weteneepi, mini-yene teke peteayako. Nimbato andopane mindi mandulu-peyapi lele okone anu pua nambato enene ya lo andokalepe leaipia.

¹⁹ Wuane lea-kola, enjole okomane Sakatayana pii leane okone yano peyoto, namba Gapatele leaipia. Namba Gotena wenonga atalawane. Goteto pii okone

* 1:1-2: Ap 1:1 * 1:9: Ek 30:7 * 1:14-17: Nam 6:3; Mal 3:1; 4:5-6; Mt 17:11-13 * 1:19: Dan 8:16; 9:21

Gapatele nimbato Sakataya lamaulu puu lala-kola, nambato pii leyo tupa langulu epeyo.*

²⁰ Andipa nambato pii leyo tupa nimbato enene ya lo bilipi nalele okonena, nimbana nee asia tuma pula-kola, nimbato pii katulo nalolo-pele. Pii leyo utupa enene gulolangi, matili nimbato pii katulo lolo-peke lolopele. Enjole okonemane wuane leaipia.

²¹ Sakataya ini takita naepea-kola, wandakali takita pote lo ateaini tupamane nembo kambua toto, lotu anda andane okona aki mindimane bala minandi leyape lo maliyo ateainipia.

²² Balana nee asia tuma pitane atea-kola, bala takita epoto, pii mindi katulo laa napaeipia. Balato mee kii-mane mandeke piki pea-kola, lotu anda anda-pango okona mangene mindi andalaya lo andeaini-pia.

²³ Andeai-kola, Sakatayato balana pitisa piape pikoyo piyu, bala andaka peke leaipia.

²⁴⁻²⁵ Sakataya bala wetene Elisambesa towa paleapi-kola, ininga andopane peteaipia. Petea-kola, Elisambesato pii mindi loto, wamba namba andopane mindi mandi napene pituto, wandakali wenonga yalawa pitiyawane-ko. Andipa namba yalawa teke pituluwane loto, Akali Andane okomane namba ondo wato, andopane mindi geya leaipia. Wuane lalu, Elisambesa bala takita puu napene, ana yau andaka peteaipia.

Enjole Mindimane Pii Mindi Matiya Lamaiyane Oko

²⁶⁻²⁷ Wana mapokae Matiya lene mindi bala Galili disitiki okona tano anjako Nasatesa lene okona peteaipia. Bala akali Josepena bakale lene peteaipia. Josepe bala kinji Dapiti yame mindi ateapia. Elisambesa bala andopane tongotaka ana wataka petea-kola, Goteto enjole Gapatele andayo, nimbato pii mindi Matiya lamalu puu leaipia.*

²⁸ Lamalu puu lea-kola, enjole okone-mane Matiya peteanga poto, Akali Andane oko nimba towa atu atoto, mini epene pale laya eya leaipia.

²⁹ Wuane lea-kola, Matiya bala moko loto, balato pii anu-pene mindi namba langeyape lo nembo kambua teaipia.

³⁰ Nembo kambua tea-kola, enjole okomane bala lamawuato, Matiya, Goteto nimba towa mini epene paleya-ko. Nimba yuku olene.

³¹ Nimbana ininga andopane mindi pitula-kola, nimbato iwana mindi mandulu-pele. Mandule-angi, balana gene oko Jisasa lape.*

³² Balana gene oko andane wete yolopeya. Wandakali tupamane bala Gote Ati Kenga Ateya okona iwanane lolopeyai. Wamba Goteto iwana okona yumbane Dapiti bala kinji ateakale leane pua teke, Goteto nimbana iwanane okone bala kinji ateakale lolopeya.*

³³ Bala kinji atoto, matili-matilipi Jekopo yame tupa ando atapowa atolopeya leaipia.

³⁴ Wuane lea-kola, Matiyato enjole okone lamawuato, namba akali mindi towa piti napeyo-ko. Nambato anu puato, iwana okone mandulu-peyawape leaipia.

³⁵⁻³⁷ Wuane lea-kola, enjole okomane balana pii okone yano peyoto, Goteto pi-ape mindikipi mindi puyale pitete naene piyane leaipia. Nimba aini Elisambesa bala andopane mindi mandi napene mee ki-nambuli petea-kola, wandakali tupamane Elisambesa bala andopane mindi mandi napulu-peya lalaini tekeko, andipa bala mini-yene angı, iwana mindi manduyale tongotaka peteya-kola, ana wataka peya. Nimbatopi iwana mindi mandula loto, Oli Sipitisa oko nimbanga epola-kola, Gote ati kenga wete ateya okona tai-lene okomane nimba ando atolopeya. Goteto iwana epene wete okone nimbana ininga pete lola-kola, wandakali tupamane bala Gote iwanane ateya lolopeyai leaipia.*

³⁸ Enjole okonemane wuane lea-kola, Matiyato bala lamawuato, namba Akali Andane okona piape wanda pitiyawane-ko. Nimbato pii lele okone atu yalua leaipia. Wuane lea-kola, enjole okone bala Matiya tepa alu peapia.

Matiyatо Elisambesa Andolo Peane Oko

³⁹ Okone angı, Matiya bala Galili disitiki oko tepa alu, Jutiya disitiki okona yuu wangiane tano yene mindina wamba ini peapia.

⁴⁰ Poto, bala Sakatayana andaka kolanda loto, Elisambesa andayo, nimba kuai lo petelepe leaipia.

⁴¹ Elisambesato pii okone ale ya-kola, iwana balana ininga peteane okomane ema taimane peapia. Okone angı, Oli Sipitisa oko Elisambesa balanga epo tumbi leaipia.

⁴²⁻⁴⁴ Tumbi lea-kola, Elisambesato epelewa pii taimane loto, nimbato namba ando pii lele oko ale eyo-angi, andopane nambana ininga peteya okomane epele wato, ema peya. Namba wanda epene andoko peteyonga nambana Akali Andane okona angini nimbato namba andolo epelepe. Goteto nimba moyola-kola, nimbato Gotena iwanane mandule okomane wanda waka tupa pitaka sia minulu-pele.

Andopane nimbana ininga peteya okone Goteto wayumane moyo ateya.

⁴⁵ Akali Andane okomane pii nimba langipia tupa matili enene gulolo-peya lo bilipi lele okonena, nimba epelewa petele okoni leaipia.

⁴⁶⁻⁵⁰ Elisambesato wuane lea-kola, Matiyato pii mindi loto, namba gene nayene mee balana piape wanda pitawa-kola, Gote tai wetete ateya okomane namba moyo pi-ape andane minditupa peya leaipia. Pi-ape peya utupane wandakali pitaka-mane nembo toto, Goteto wanda okone moyaepia lolopeyai. Goteto namba molo-peke leane nembo toto, nambato bala epele wete wato, Akali Andane okona gene oko laiyu leyo. Bala ando yukuwa atalaini wandakali tupa pitaka balato ondo wato, moyalane. Balana gene epene wete eya.*

⁵¹ Balana kini-mane piape taimane piyane. Wai-ene gulo, luawa atalaini wandakali tupa pitaka balato peyo wata alane.*

⁵² Balato kinji tai tupa mo tepe wato, wandakali gene nayene tupa minu tai laya alane.*

⁵³ Tomo nonowa atalaini wandakali tupa pitaka balato minditaka kambua maiyu, minditaka kambua yene wandakali tupa mee peakale lalane.*

⁵⁴⁻⁵⁵ Wamba balato nanimana yumbane Apatakamenga pii mindi lamawuato, nambato nimbapi, nimbana mandiyene tupapi, moyo atapowa ando atokale leane pua teke, balana piape wandakali Isatale tane tupa ondo wato moyo ando ateya leaipia.*

⁵⁶ Wuane lalu, Matiya bala Elisambesa towa atu ana tepopi mindi pitiyu, bala andaka peke leaipia.

Elisambesato Jone Mandeane Oko

⁵⁷ Elisambesa bala andopane mandulane ana oko epea-kola, balato iwana mindi mandeaipia.

⁵⁸ Mandea-kola, Elisambesana yamepi, wandakali mandaka atalaini tupapi, utupane-mane ale wato, Akali Andane okomane bala ondo apia ya lo, bala towa atu epele yainipia.

⁵⁹ Ole kitupasa pea-kola, wandakali utupane-mane iwana okonena yala-pene umbaini katulu epeainipia. Epoto, utupane-mane bala ayianena gene Sakataya lalaini pua teke lamakale leainipia.*

⁶⁰ Wuane leai-kola, iwana okona angini okomane wandakali utupane lamawuato, jia, balana gene Jone lamakale leaipia.

⁶¹ Wuane lea-kola, utupane-mane bala lamawuato, nimba yame akali gene Jone lene mindi ata naepea okonde leainipia.

⁶² Wuane loto, utupane-mane Sakataya ando kii-mane mandeke puato, iwana okona gene api lolape lo tipa peainipia.

⁶³ Tipa peai-kola, balato kii-mane mandeke puato, pepa peyalaini selesa mindi mo giyapa leaipia. Selesa okone mo mayai-kola, balato iwana okona gene Jone lo pepa peleaiapia. Pelea-kola, wandakali utupane-mane gene peleane oko andoto, nembo kambua teainipia.

⁶⁴ Okone angi teke, Sakatayana ambulini lumbea-kola, balato Gote epelewa tama peaipia.

⁶⁵ Wuane pea-kola, wandakali yuu organe ateaini tupamane mangene okone andoto, yuku yainipia. Jutija disitiki wangiane tupana wandakali atalaini tupa pitaka-mane pii okone ale wato, lo tawe yainipia.

⁶⁶ Pii okone ale yaini wandakali pitaka-mane nembo kambua toto, Akali Andane okomane iwana okone moyo atola-kola, matili iwana okonemane anu pulu-peyape leainipia.

Sakatayato Potopisa Pii Mindi Leane Oko

⁶⁷ Oli Sipitisa oko iwana okonena ayiane Sakatayanga epo tumbi lea-kola, balato potopesa pii mindi wua leaipia:

⁶⁸⁻⁷² Wamba Gotena potopesa akali tupa-mane balana potomisa pii mindi nanimana yumbane tupa lamawuato, wandakali-mane yakama towa yamapanne koo wete palu atoto, yakama towa yanda-pene gulo atolai-kola, nambato yakama molo-peke lolopeyo leane leainipia. Wamba Goteto wuane leane pua teke, andipa balato potomisa pii leane okone nembo tolopeke loto, nanimana yumbane tupa ondo wato moyokale nembo teya-ko. Balato kinji Dapiti yame okona akali tai wete mindimane nanima molo-peke leakale lapia. Akali okonemane balana wandakali andolo epoto, nanima kambo molo-peke lolo ipupia. Balato wuane pipia okonena, nanimato Isatale tane wandakali tupana Akali Andane Gote oko lo tama pimakale.*

⁷³⁻⁷⁵ Nanimo yuku naene atoto, ole dindi lo balana mana epene tika-pene tupa wato minuto, balana piape tupa pimawua atape-pene. Nanimato wuane pua atape-pene nembo toto, wamba Goteto nanimana yumbane Apatakame lamawuato, enene wetete nambato yakama towa yanda pua atalaini

* **1:46-50:** 1Sa 2:1-10; Sam 103:13,17 * **1:51:** 2Sa 22:28

* **1:52:** Jop 12:19; 5:11; Sam 147:6 * **1:53:** Sam 34:10

* **1:54-55:** Mai 7:20; Jen 17:7; Sam 98:3

* **1:59:** Jen 17:12; Pit 12:3; Lk 2:21 * **1:68-72:** Sam 18:2; 72:18; 105:8-9;

wandakali tupa peyo watalu, yakama molo-peke lokale. Wamba Goteto wuanane leane loto, Sakatayato pii okone leaipia.*

⁷⁶⁻⁷⁹ Wuane lalu, Sakatayato bala iwanane Jone andayo, pii mindi loto, yuunga wandakali naniman undupi pangosa atoto, omolomane lo yukuwa atalamane leaipia. Yukuwa atolomane nembo toto, Goteto naniman ondo wato, ati kenga tawee tii-pene okomane asia epene oko naniman andawa lolo epeakale lolopeya. Goteto naniman ondo wato, nanimana koo tupa apialane. Gotena wandakali tupamane balana mana okone andeakale loto, iwananra Jone nimbato wandakali tupa mana lamawua atolopele. Akali Andane oko bala epeakale loto, asini mandeke puyale, nimba ingane ini poto, piape okone pulupele. Tene okonena, wandakali tupamane loto, nimba Gote ati kenga ateya okona potopesa akali atele lolopeyai. Sakatayato bala iwanane Jone andayo wuanne leaipia.*

⁸⁰ Matili iwanane okone anda ya-kola, balana nembo-tene tai leaipia. Isatale tane wandakali tupana wenonga balato piape pulane oto oko naepea-kola, bala wandakali napalene yuu tupana poto ateapnia.

2

Matiyato Jisasa Mandeane Oko

Matiyu 1:18-25

¹⁻³ Sisa Okasatasasa bala Lomo tane gapomane akali kawane ateane-angi, balato mana mindi yata wato, yuu pitakanata alaini wandakali tupa yakamana yuu tene tupana poto, gene yalapape leaipia. Akali Saitiniasa lene oko bala Sitiya potopinja okona gapomane akali kawane ateane okone angi bulupane tewa, wandakali pitaka yakamana gene yoyale, yakamana yuu tene tupana puku peainipia.

⁴⁻⁵ Josepe bala kinji Dapiti yamena mandiyene mindi ateapnia. Jutiya disitiki tano Beselekeme Dapitina yuu tene oko yaepia. Tene okonena, Josepe bala bakale lene wana mapokae Matiya towa atu Galili disitiki tano Nasatesa oko tepa alu, liyambana gene Beselekeme tano okona yolo peapelebia. Matiya bala andopane mandipe-pene petea-kola, liyamba peapelebia.

⁶⁻⁷ Peapi-kola, wandakali opene epo paliyaini anda tupa pitaka tumbi lea-kola, liyamba bulumako anda mindina poto, peteapele-pia. Anda okonena peteapi-kola, Matiya bala andopane mandulane gii oko epea-kola, balana iwana bulupane oko mandeaipia. Manduto, Matiyato andopane

okone lapalapa-mane kau puato, bulumako tomo nalaini bokisa mindina yata yaepia.

Enjole Mindimane Akali Minditupa Pii Lamaiyane Oko

⁸ Yuu ongane teke utulu okona yia sipisipi yatawa atalaini akali minditupa-mane yakamana yia sipisipi tupa yuu maliwa mindina yatawa ando ateainipia.

⁹ Ateai-kola, Gotena enjole mindi akali utupane ateasinga epea-angi, Gotena tii-pene okomane akali utupanenga tii pikoyo bea-kola, akali utupane-mane okone andoto, yuku andane wete yainipia.

¹⁰⁻¹¹ Yuku yai-kola, enjole okomane utupane lamawuato, yakama yuku naene kondalapa leaipia. Andipa Dapitina tano okona pituto, wanda mindimane yakama molo-peke lolane iwana oko mandiya. Iwana okonena gene oko Kataisa. Bala nanimana Akali Andane. Nambato pii epene oko yakama langulu epeyo okomane wandakali pitaka mo epele aya ollopeya.

¹² Yakamato iwana okone ayia pima poto andolai-kola, bulumako tomo nalaini bokisa mindina bala lapalapa-mane kau pitane pangulanga andolopeyai. Iwana okone andolai-angi, pii nambato leyo okone enene ya lo yakamato nembo tolopeyai leaipia.

¹³ Enjole okomane pii okone lo koyo pea wete, enjole kambua wete ati kenga atala, kapoyale epoto, bala towa atu atoto, Gotena gene oko laiyu lo, tama peainipia.

¹⁴ Tama puato, Gote ati kenga ateya okomane wandakali balana yame atekale lo lata yane tupa towa epele wato, yakamana yamapano mo epene pale leya-ko. Balana gene oko laiyu lo atalapape leainipia.*

Sipisipi Yatawa Atalaini Akali Tupamane Jisasa Andolo Peaini Oko

¹⁵ Enjole utupane ati kenga peke lea-kola, sipisipi yatawa atalaini akali tupamane yakama teke-teke pii lalawa puato, mangene mindi piya lo, Goteto naniman lanapanawa langiya oko nanimato Beselekeme tano okona andolo maa leainipia.

¹⁶ Wuane lalu, akali utupane taimane poto andeai-kola, Josepe Matiya-lamane iwananra oko bulumako tomo nalaini bokisa okona paleakale peteapinga andeaini-pia.

¹⁷ Andoto, enjole okomane matili iwananra okomane wua pulupeya lo pii leane oko sipisipi yatawa atalaini akali tupamane lapana yainipia.

¹⁸ Lapana yai-kola, pii okone ale yaini wandakali tupa pitaka-mane nembo kambua teainipia.

* 1:73-75: Jen 22:16-17; Tai 2:11-14

* 1:76-79: Ais 40:3; 60:1-2; Jet 31:34

* 2:14: Lk 19:38

* 2:19: Lk 2:51

¹⁹ Matiyato pii utupane pitaka ale wato, balana yamapanenga mo yata wato, nembo to peteapia. *

²⁰ Sipisipi yatawa atalaini akali tupamanne minditaka lee-mane andeaini tupapi, pii ale yaimi tupapi, utupane pitaka nembo toto, Gotena gene oko laiyu loto, tama pima yakama peke leainipia.

Jisasa Mandiyu, Lotu Andaka Peapele Oko

²¹ Matiyato Jisasa mandu yatawa peteakola, ole kitupasa peapipia. Ole kitupanena iwananra oko bala Juta yame guleakale loto, balana yala-pene umbainai katu apolane oto oko epeapipia. Epea-kola, wamba Jisasa bala Matiya ininga piti napea-kola, enjole okomane iwananra okona gene lalapape leane pua teke, balana gene Jisasa leainipia. *

²²⁻²⁴ Gotena loo pepa pelene eya okomane pii mindi loto, wanda-mane andopane mindi mandula-angi, Gotena wenonga okonelapo kalato atalapele layene eya. Okone-lapona kalato kunu apolane oto oko epola-angi, pitisa akali okomane liyambana kalato atolane tupa kunu apia-geakale lo eka itapuluma lapo yandopi, uya andopane lapo yandopi, mindi opa Gote maiyapape layene eya. Gotena loo pepa pelene eya waka mindimane loto, iwana bulupane mandulai oko manduto, Gote maipene-pene layene eya. Wuane layene eya pua, iwanane angini-lana kalato kunu apolane oto oko epea-kola, Matiya Josepe-lamane Gotena mana Mosesato pepa peleane oko wato minuto, Jisasa bala Gotena lapakale loto, bala mandiyu, Jutusaleme peapelepia. *

²⁵⁻²⁶ Okone angi, akali Simiyone lene mindi Jutusaleme fano okona ateaipia. Oli Sipitisa oko balanga atea-kola, Simiyone bala akali epene tika-pene mindi atoto, Gote lo pote lalaepia. Wamba Oli Sipitisa okomane Simiyone lamawuato, nimba ini oma napulupele. Gotena iwanane Kataisa oko andalu, omolopele leaipia. Wuane lea-kola, Isatale tane wandakali mini kendawa ateyai tupa Kataisato moyolo epolopeya lo, Simiyone bala maliyo ateaipia.

²⁷ Maliyo ateaneko, alu mindi Oli Sipitisa okomane akali Simiyone balana nembotene oko mina ika laya ya-kola, bala lotu anda andane okona kolandaka leaipia. Okone angi, Gotena loo okomane layene yene pua pipakale nembo toto, Jisasana angini ayiane-lamane bala awua, lotu anda andane okona kolandaka leapelepia.

²⁸ Kolandaka leapi-kola, Simiyonetu Jisasa ope lo moto, Gote lo tama peapipia.

²⁹⁻³¹ Tama puato, Ayiane Gote, wamba nimbatu molo-peke lolane akali mindi epeakale lokale lee leaipia. Andipa nimbatu akali okone wandakali pitakana wenonga epeakale lele oko namba nimbania piape akali okomane lee-mane andalu, mini epene paleyo-ko. Andipa namba ome-wando, okone katu. *

³² Ale mindi awua peyama-kola, ale tii peya okomane asia andawa lalane. Wuane pua teke, Jisasato nimbania asia epene oko wandakali yame waka tupanga andawa yolopeya. Bala Isatale tane ateya okonena, Isatale tane wandakali tupana gene andane yolopeya leaipia. *

³³ Simiyonetu Jisasa andayo pii utupane lea-kola, Matiya Josepe-lamane nembo kambua teapelepia.

³⁴⁻³⁵ Nembo kambua teapi-kola, Simiyonetu pote loto, Gote nimbatu wandakali okolapo moyape leaipia. Wuane lalu, balato Jisasa angini Matiya lamawuato, matili iwananra oko anda yoto, Gotena piape pua atolopeya leaipia. Gotena piape pua atolakola, Isatale tane wandakali kambua-mane bala akali koo mindi ya lolai-kola, utupanena nembo-tene koo tupa panakame yolopeya. Panakame yola-kola, nimbania yamapanenga yandate atene gulo tandaka pulupeya. Matili Jisasato Gotena piape pua atoto, nembo-tene koo palene wandakali utupane yuunga peakeakale laya wato, Isatale tane wandakali kambua minditupa ika laya olopeya. Wuane peakale nembo toto, Goteto bala epeakale lapia. Simiyonetu wuane leaipia. *

³⁶ Okone angi potopisa wanda gene Ana lene mindi lotu anda okonena peteapia. Bala Asa yame Panule lene okona wanane peteapia. Wamba bala mapokae pitiu, akali poto, mali yanasa angu akalini towa peteapi wete, balana akalini oko omeapipia.

³⁷ Omea-kola, bala wanda yalo pituto, utulu otongapi, Gotena piape tupa pimawua pitii-yaepia. Ole minditupa balato tomo nanene pitiki puato, ole dindi lo lotu anda andane okona poto, pote lo pitii-yaepia. Mali paiyasa kitupasanga tukumindi pea-kola, wanda okone bala mini-yene wete peteapia.

³⁸ Ee ana kambua wete Lomo tane gapomane okomane Jutusaleme tane wandakali tupa taimane bosa lo ando atea-kola, Jutusaleme tane wandakali tupamanne utupane embo wato, Mesaya okomane yakama moyolo epeakale lo mali yo ateaipia. Jisasana angini ayiane-lamane bala awua

* ^{2:21:} Lk 1:31 * ^{2:22-24:} Pit 12:1-8; Ek 13:2,12 * ^{2:29-31:} Ais 52:10; Lk 3:3-6; Tai 2:11-14 * ^{2:32:} Ais 42:6;
49:6; 52:10 * ^{2:34-35:} Ais 8:14; Mt 21:42; 1Pi 2:8

epeapele-angi, potopesa wanda Ana okomane bala andoto, Gote ando wayu pele leaipia. Wayu pele lalu, potopesa pii mindi Mesaya oko maliyo ateaini wandakali tupa lamawuato, matili iwanaŋa oko anda yola-angi, balato yakama molo-peke lolopeya leaipia.

³⁹ Matiya, Josepe-lamane Gotena loo okomane piyapape layene tupa pitaka pikoyo piyu, Galili disitiki okona poto, liyambana Nasatesa tano okona peke loto peteapele-pia. *

⁴⁰ Peteapi-kola, Goteto iwananja okone epelewa moyo ando atea-kola, bala anda yoto, mana kambua mialu, iwana wai-ene tai mindi ateapie.

Jisasa Bala Lotu Anda Andane Okona Ateane Oko

⁴¹ Wamba Isatale tane wandakali tupa-mane Pasopa tomo oko no ateai-kola, enjole okomane Isipi tane wandakali tupana iwanane bulupane tupa peyo ome loto, Isatale tane wandakali tupana iwana bulupane tupa peyo ome nalene konda yaepia. Wamba Goteto wuane peane nembo toto, mali dindi lo Pasopa tomo nalaini oto okone epea-kola, Jisasana angini, ayiane-lamane at Jutusaleme puku piyapele-pia. *

⁴² Matili Jisasa mali alesa penenga, Pasopa tomo nalaini oto okona mana yene okone wato minuto, Jisasa bala angini, ayiane-la towa Jutusaleme peainipia.

⁴³⁻⁴⁴ Pasopa tomo nalaini gii koyo pea-angi, Jisasa angini ayiane-lamane liyambana amenepi, yamepi, wandakali kambua utupane towa Jutusaleme tepa alu, ole mindiki asini peainipia. Okonelapo-mane Jisasa atu andaka peyama nembo teaini tekeko, bala wandakali utupane towa atu asini puu napene, Jutusaleme tano okona ateapie. Atea-kola, matili ole lene balana angini, ayiane-lamane bala liyambana yamepi, amenepi, utupane towa atu epalaipe lo ayia peapeleapia.

⁴⁵ Jisasa bala liyamba yame tupa towa atu ata naapea-kola, angini ayiane-lamane Jutusaleme tano okona ayia pulu-peke leapeleapia.

⁴⁶ Bala ayia pua ateapi-kola, ole lapo peapipa. Ole teponena angini, ayiane-lamane Jutusaleme lotu anda andane okona kolandaka loto andeapi-kola, Jisasa bala mana lalaini akali tisa tupana tombenenga petaeanga andeapele-pia.

⁴⁷ Andeapi-kola, balato akali utupanena pii leaini tupa ale wato, pii minditunga tipa pita piki pua peteapie. Bala mana andene akali gulo atoto, pii kuai lo wete lea-kola,

wandakali balana pii ale yaini tupa pitakanane moko loto, nembo kambua teainipia.

⁴⁸ Jisasa bala mana lamayaini tisa tupa towa pii lo ateanga andoto, angini ayiane-lamane moko andane teke leapeleapia. Moko loto, Jisasana angini-mane bala lamawuato, iwana, nimba ayiane nalipa yamapanane kendawa, nimba ayia pua ataipa-ko. Tene anu pipia-kola, nimba nalipa towa andaka atu makale ipu napene, wali mee atapipe leaipia.

⁴⁹ Wuane lea-kola, Jisasato okonelapo lamawuato, anu peakale liyambato namba ayia pua atapiapipe. Namba ayiane okona andaka namba atolopeya nembo natiapiapipe leaipia.

⁵⁰ Wuane lea-kola, bala angini ayiane-lamane pii balato leane okonena tene oko nembo nateapele-pia.

⁵¹ Okone ang, Jisasa bala angini, ayiane-la towa Nasatesa yuu okona peke loto, okonelapo-mane pii leapele tupa wato minu atea-kola, Matiyato Jisasana pii leane tupapi, mana mineane tupapi, utupane pitaka balana yamapanenga yakale lo, nembo tatawa peteapie. *

⁵² Jisasa bala anda yama-yama, mana mima-mima pea-kola, Gotepi, wandakali tupapi, utupane pitaka-mane bala epele wete yainipia. *

3

Ipa Peya-maiyane Akali Joneto Gotena Pii Leane Oko

Matiyu 3:1-12; Maki 1:2-8; Jone 1:19-28

¹⁻² Wamba Pondiasa Pailateto Jutiya disitiki oko ando ateane okone ang, Laisanisa balato Apilini disitiki oko ando ateapie. Etoteto Galili disitiki oko ando atea-kola, balana amene Pilipito Tekonaitasa, Itulia, disitiki okonelapo ando ateapie. Anasa, Kayapasa-la, okonelapo liyamba Gotena pitisa akali kawane ateapele-pia. Sisa Taipitiasa bala ee ana paivasanga yau Lomo tane gapomane akali kawane oko atea wete, Sakataya iwanane Jone bala wandakali napalene yuu tupana atea-kola, Goteto bala lamawuato, nimbato nambana pii oko wandakali tupa lamawua atape leaipia.

³⁻⁶ Wamba potopesa akali Aisayato Gotena pii mindi pepa peyoto, matili akali mindi wandakali napalene yuu okona atoto, pii taimane lolopeya leaipia. Pii okone loto, yakamoto Akali Andane oko epolane asini mindi mandeke pua yata mawuato, bala epolane asini anjako tupa peya tika piyapa. Yuu wangiane anjakopi, andanepi, utupane ayoto, yuu yuli-yene tupa pulu pua, momowa piape piyapape.

* 2:39: Mt 2:23 * 2:41: Ek 12:24-27; 23:14-17; Lo 16:1-8

* 2:51: Lk 2:19 * 2:52: Isa 2:26; Man 3:4

Asini liki leka-ene tupa pitaka peya tika piyapape. Asini kikua-pene tupa pitaka waa piyapape. Yakamato wuane pulai-kola, Goteto wandakali tupa molo-peke loyale piape pula oko wandakali pitaka-mane andolopeyai leaipia. Aisayato wuane leane pua teke, matili ipa peya-maiyane akali Joneto ipa Jotane matenenga yuu yane tupa pitakana poto, wandakali tupa lamawuato, Goteto yakamana koo piyaini tupa apia-geakaleko. Yakama mini peke loto, ipa mialapa lo lamaiki peaipia.*

⁷ Ipa mialapa lea-kola, wandakali kambua-mane nanima ipa peya-gii lama epeainipia. Wandakali utupanena minditupa-mane yamapanne peke nalene, mee ipa peya-gii lama epeai-kola, Joneto utupane laiye loto, yakama etelu gepomane mandiyene yame ateyai leaipia. Goteto yakama towa yataka wato, kendapene minditupa yakama gulupeya. Apito pii okone yakama langipia-kola, Goteto kenda-pene okone yakamanga epeakale lolane lo yuku wato, yakama palaka epoto, ipa mia-makale leyaipie.*

⁸⁻⁹ Goteto ana oo eya utupa Apatakame yame gulanapa leando, ana utupa-mane katulo Apatakame yame gulolo-peyai. Tene okonena, yakama teke-teke piii lalawa puato, nanima Apatakame yame ateyama-ko. Goteto nanima towa yataka wato, kendapene mindi gii napulu-peya lolaini andalapape. Goteto yataka wato, ita koo tupa yokowa apoyale, uu mindi ita tenenga yata yane eya. Ita dini epene lia napene tupa pitaka balato yoko wato, itanga yangolopeyako. Ita epene tupamanne dini epene lialaini pua, yakama mini peke loto, mana epene tupa wato minalapape leaipia.*

¹⁰ Joneto wuane lea-kola, wandakali kambua epo amunguli peaini tupamane Jone tipa puato, wuane yando, nanimato mana epene andoko wato minamape leainipia.

¹¹ Wuane leai-kola, Joneto utupanena pii leaini okone yano peyoto, singilisa lapo yolane wandakali okomane singilisa nayene atolane wandakali okone tale pua maipe-pene. Tomo no atolane wandakali okomane balana tomo tale puato, minditupa tomo nanene nonowa atola wandakali oko maipe-pene leaipia.

¹² Wuane lea-kola, takisa muni mialane akali ipa molo epeaini tupamane Jone tipa puato, tisa, nanima anu pimape leainipia.*

¹³ Wuane leai-kola, balato utupane lamawuato, gapomane okomane takisa muni oko tuma mialapape lola pua,

yakamato moto, minditupa konda pua molaini leaipia.

¹⁴ Wuane lea-kola, ami yanda yene minditupa-mane bala tipa puato, nanima anu pimape leainipia. Wuane leai-kola, balato utupane lamawuato, yakamato wandakali tupa peyoyale puato yandopi, owato kote loto yandopi, utupanena minditaka tupa pake gulo mia na-piyapape. Yakamana piape pulai okona yole gulai tupa moto, okone atu ya nembo talapape leaipia.

¹⁵ Joneto wuane lea-kola, wandakali pitaka-mane akali oko bala Kataisa epolopeya lo maliyo ataima okope, wakape, lo nembo kambua teainipia.

¹⁶ Wuane nembo teai-kola, Joneto utupane pitaka lamawuato, akali mindi epolopeya okonena tai-lene okomane nambana tai-lene oko sia minulu-peya leaipia. Balana sukee pula okona eyaka tinga lolane namba akali epene mindi jia. Nambato ipamane yakama ipa peya-geyo tekeko, akali matili epolopeya okonemane Oli Sipitisa okola, ita kaiyapiane okola, okonelapomane yakama ipa peya-gulupeya.*

¹⁷ Balato witi dini epene tupa balana andaka yatawakale nembo toto, witi imbuни tupa aki pua apoyale, sapolu mindi awua epeya. Balato witi dini epene tupa balana andaka yata wato, witi imbuни tupa ita too koyo napiyane mindina yangolo-peya. Joneto wuane leaipia.

*Joneto Jisasa Ipa Peya-Maiyane Oko
Matiyu 3:13-17; Maki 1:9-11*

¹⁸⁻²² Wandakali tupa pitaka ipa meai-kola, Jisasaipi ipa mialu, pote lo atea wete, ati iyu oko yapu lo toko lea-kola, Oli Sipitisa oko eka uya gulo, balanga epo tepe yaepia. Epo tepe ya-kola, piii layene mindi ati kenga atala epeane okomane loto, nimba nambana iwanane yamapanne yene oko atele. Nambato nimbanda mana tupa andoto, epele wetete eyo leaipia. Matili, ipa peya-maiyane akali Joneto Gotena piii layene epene oko wandakali tupa lamawuato, piii mana kambua lamawua ateaiapia. Okone ang, Gapomane akali andane Etote okomane bala amene okona wetene Etoti-yasa oko tondo moto, kee lalu, mana koo waka-waka kambua minea-kola, Joneto Etote lamawuato, nimbanda mana koo kambua minele tupa kondaa leaipia. Wuane lea-kola, Etoteto mana koo mindi tako pua minuto, Jone andi leaipia.*

*Jisasa Yumbane Yamena Gene Tupa
Matiyu 1:1-17*

* ^{3:3-6:} Ap 13:24; Ais 40:3-5 * ^{3:7:} Mt 12:34-35; 23:33-36 * ^{3:8-9:} Jo 8:33,39; Mt 7:15-20 * ^{3:12:} Lk 7:29
* ^{3:16:} Ap 13:25 * ^{3:18-22:} Mt 14:3-5; Mk 6:17-20; Jo 1:32-33

23-38 Wamba yuu ati-la ungi leane-angi, Goteto Atame waa peapipia. Waa pea-kola, Atameto Sete mandaipia. Seteto Inosa mandaipia. Inosato Kenana mandaipia. Kenanato Mala-lili mandaipia. Malalilito Jateta mandaipia. Jatetato Inoko mandaipia. Inokoto Metusala mandaipia. Metusalat Lameke mandaipia. Lameketo Nowa mandaipia. Nowato Sema mandaipia. Semato Apasata mandaipia. Apasatato Kenana mandaipia. Kenanato Sela mandaipia. Selato Epa mandaipia. Epato Peleke mandaipia. Peleketo Leyu mandaipia. Leyuto Setuku mandaipia. Setukuto Neto mandaipia. Netoto Teta mandaipia. Tetato Apatakame mandaipia.

Apatakameto Aisake mandaipia. Aisaketo Jekopo mandaipia. Jekopoto Juta mandaipia. Jutato Petesa mandaipia. Petesato Esotone mandaipia. Esotoneto Ani mandaipia. Anito Atamina mandaipia. Ataminato Aminatape mandaipia. Amintapeto Nasone mandaipia. Nasoneto Salamone mandaipia. Salamoneto Boasa mandaipia. Boasato Opeta mandaipia. Opetato Jesi mandaipia. Jesito Dapiti mandaipia.

Dapitito Netane mandaipia. Netaneto Matata mandaipia. Matatato Mena mandaipia. Menato Melea mandaipia. Meleato Elaya-kimi mandaipia. Elayakimoto Joname mandaipia. Jonameto Josepe mandaipia. Josepeto Juta mandaipia. Jutato Simiyone mandaipia. Simiyonetu Lipai mandaipia. Lipaito Matate mandaipia. Matateto Jotimi mandaipia. Jotimeto Eliyesa mandaipia. Eliyesato Jasua mandaipia. Jasuato Eta mandaipia. Etato Elema-tame mandaipia. Elema-tameto Kosame mandaipia. Kosameto Atai mandaipia. Ataito Melekai mandaipia. Melekaito Netai mandaipia. Netaito Siatele mandaipia. Siateleto Setapa-pele mandaipia. Setapapele Lesa mandaipia.

Lesato Jonane mandaipia. Jonaneto Jota mandaipia. Jotato Joseke mandaipia. Joseketo Semene mandaipia. Semeneto Mata-tayasa mandaipia. Mata-tayasato Meata mandaipia. Meatato Nakai mandaipia. Nakaito Esili mandaipia. Esilito Neame mandaipia. Neameto Emosa mandaipia. Emosato Mata-tayasa mandaipia. Mata-tayasato Josepe mandaipia. Josepeto Janai mandaipia. Janaito Melekai mandaipia. Melekaito Lipai mandaipia. Lipaito Matate mandaipia. Matateto Eli mandaipia. Elito

Josepe mandaipia. Wandakali minditungamane Jisasa bala Josepe iwanane ateya ya lo nembo teainipia. Jisasa bala mali paipayasa tepo atoto, piape bulupane tewa peapipia. *

4

Sataneto Jisasa Minu Mandeke Peane Oko

Matiyu 4:1-11; Maki 1:12-13

¹ Oli Sipitisa oko Jisasanga epo tumbi lea-kola, bala ipa Jotane oko tepa alu, peke leaipia. Peke lea-kola, Oli Sipitisa okomane bala atu aiyu, wandakali napalene yuu mindina peapipia.

²⁻³ Poto, ole paipayasa tukumindi Oli Sipitisa oko bala towa atu epoko pua atea-kola, Jisasa bala ulia nanene atoto, nono wetete yaepia. Ulia nono wetete ya-kola, Sataneto bala minu mandeke puato, nimba Gote iwanane ateendo, ana oo eya oko betesa guleakale laa leaipia.

⁴ Wuane lea-kola, Jisasato balana pii okone yano peyoto, tomo-mane angu wandakali mindi saka atekale lo ataya naalane lo pepa pelene eya leaipia.

⁵ Wuane lea-kola, Sataneto Jisasa atu aiyu ati andane iyu kenga wete mindina poto, okone angi teke yuu andane yane tupa pitaka balanga andawa leaipia.

⁶ Andawa loto, balato Jisasa lamawuato, wamba Goteto yuu eya tupa pitaka namba giyu atoto, nimbato yuu utupa wandakali mindi mauwakale nembo tole pua maipe leane-ko.

⁷ Andipa nimbato namba lo lotu leendo, nambato yuu eya utupane pitaka nimba gukale. Guluwa-kola, yuu utupa nimbana yola-kola, nimbato utupane ando atolopele leaipia.

⁸ Wuane lea-kola, Jisasato balana pii okone yano peyoto, nimbato nimbana Akali Andane Gote oko angu lotu lo atoto, balana piape pimawua atape lo, pepa pelene eya leaipia. *

⁹⁻¹¹ Jisasatu wuane lea-kola, Sataneto bala atu aiyu Jutusaleme poto, lotu anda andane okona kenga wete ate leaipia. Ate lalu, balato Jisasa lamawuato, Gotena pii pepa pelene eya mindimane loto, ana-mane nimbana kee nolane nembo toto, Goteto balana enjole tupa lamawuato, yakama kii wanga latawa atalapa lolopeya layene eyako. Enene, nimba Gotena Iwanane ateendo, anda kenga wete okona atoto, peaka nena laa leaipia. *

¹² Wuane lea-kola, Jisasato Satanena pii okone yano peyoto, nimbato nimbana Akali

* 3:23-38: Jen 4:25-26; 11:10-26; Lk 4:22; Jo 6:42 * 4:4: Lo 8:3 * 4:8: Lo 6:13-14 * 4:9-11: Sam 91:11-12 * 4:12: Lo 6:16; 1Ko 10:6-10

Andane Gote oko minu mandeke napipe layene eya leaipia.*

¹³ Wuane lea-kola, Sataneto Jisasa minu mandeke pikoyo piyu, bala tepa alu poto, alu mindi bala lapone mandeke pukale lo maliyo ateaplia.*

Jisasato Gotena Piape Bulupane Tewa Peane Oko

Matiyu 4:12-17; Maki 1:14-15

¹⁴⁻¹⁵ Oli Sipitisa okomane Jisasa minu tai laya ya-kola, bala Galili disitiki okona peke loto, Juta yamena lotu anda tupana poto, pii mana lamawua ateaplia. Pii mana lamawua ateakola, balana pii ale yaini wandakali tupa pitaka-mane balana gene oko laiyu loto, Jisasato wua lapia leai-kola, Galili disitiki okona wandakali ateaini tupa pitaka-mane ale yainipia.

Nasatesa Tane Wandakali Tupamane Jisasa Masia Mayaini Oko

Matiyu 13:53-58; Maki 6:1-6

¹⁶ Matili Jisasa bala yuu okone tepa alu, Nasatesa peke leaipia. Wamba Jisasa bala anjakonga tano okonena atoto, anda yaepia. Sambasa dindi lo bala Juta yamena lotu anda okona palane pua poto, alu mindi balato Gotena pii mindi dii loyale ika leaipia.

¹⁷ Ika lea-kola, lotu anda ando atalane akali okomane potopesa akali Aisayato pepe peleane buku yane oko bala mo mayaepia. Maya-kola, Jisasato buku okone opimi loto, pii mindi ayia pua andoto, wandakali tupamane ale yakale dii loto, wua leaipia:*

¹⁸⁻¹⁹ Wamba Akali Andane Gote okomane namba languato, Akali Andane okomane balana wandakali tupa moyokale nembo toto, oto mindi wamba yata yane oko andipa epeya loto, nimbato wandakali tupa pitaka lamalu puu leaipia. Nimbato nambara pii layene epene oko wandakali tipia tupa lamawua atape. Nimbato wandakali lee koo tupa lamawuato, Goteto yakamana lee epene talapa leya lape. Nimbato wandakali andi latane paleyai tupa lamawuato, Goteto yakama tinga lo molo-peke leya loto, wandakali utupane tinga lo molo-peke lape. Goteto wuane lape lea-kola, balana Sipitisa oko nambanga eya.

²⁰ Jisasato pii okone dii loto, buku okone leka wato, ando atalane akali okonga malupeke leaipia. Malu-peke lalu, balato pii dii leane okona dini tupa lamauwakale lo peteakola, lotu anda okona wandakali peteaini tupa pitaka-mane bala angu andatawa peteaini-pia.

²¹ Andatawa peteai-kola, balato utupane lamawuato, Gotena pii layene, nimbato dii

lalo oko andipa enene guleya lalu, pii okonena tene oko utupane lamai-yaepia.

²² Pii okonena tene oko kuai lo lamaiyakola, wandakali peteaini tupamane moko andane loto, balana gene oko laiyu leaini tekeko, akali mindimane loto, akali oko bala Josepe iwanane piako. Balato pii epene utupa anu pua leyape leaipia.*

²³ Wuane lea-kola, Jisasato utupane lamawuato, matili yakamato namba ando pii kokoli mindi lolopeyai leaipia. Kokoli okone loto, yakamato nimba dokosa atalene piako lolopeyai. Nimba tanena siki oko mo atu yaa. Wamba nimba Kapaneame tano okona atoto, piape andane peene tupa nanimoto ale aima. Andipa nimbato yuu tene okona atele-angi, nimbato piape andane peene utupane lapone pulu-peke laa lolopeyai.

²⁴ Nimbato pii enene mindi yakama langeyo. Potopesa akali mindimane balana yuu tene okona atoto, Gotena pii lamaiyakola, wandakali utupane-mane balana pii ale wato, akali oko bala potopisa akali ya lo anda na-piyaini.*

²⁵⁻²⁶ Wamba potopesa akali Ilainjato Isatale yuu okona piape pua ateane-angi, mali teponga ana wataka kingi naepene, panyu angu pea-kola, ulia nono andane mindi yaepia. Okone angi, Isatale yuu okona wanda yalo kambua peteaini tekeko, wanda yalo utupanena mindi peteanga Goteto Ilainja bala peakale naleaipia. Jia. Wanda yalo mindi Saitone yuu okona tano ajako Satepata lene okona peteakola, Goteto Ilainja bala wanda yalo okone peteanga peakale leane lo nambato yakama enene langeyo.*

²⁷ Wuane pua teke, potopesa akali Ilaisato piape pua ateane-angi, Isatale tane wandakali tapa-pene kambua ateaini tekeko, Goteto Isatale tane wandakali tapa-pene utupanena mindi mo kuai nalene kondoto, Sitiya tane akali tapa-pene gene Nemane lene oko angu mo kuai leane leaipia.*

²⁸ Jisasato wuane lea-kola, lotu anda okona wandakali peteaini tupa pitaka-mane balana pii leane tupa ale wato, bala towa yataka andane wete yainipia.

²⁹⁻³⁰ Yataka wete wato, wandakali utupane-mane ika loto, Jisasa nimba Nasatesa tano okona ata napene puu lo wata takita leainipia. Tano oko yuu wangiane mindina ya-kola, wandakali utupane-mane Jisasa ati okonena minu pende lamakale nembo toto, bala atu aiyu peaini tekeko, bala utupanena tombenenga langatete piyu peaplia.

* 4:13: Ip 2:18; 4:15 * 4:17: Ais 61:1-2 * 4:22: Lk 3:23-38; Jo 6:42 * 4:24: Jo 4:43-44 * 4:25-26: 1Ki 17:1,7,8-16
* 4:27: 2Ki 5:1-14

Jisasato Sipitisa Koo Mindi Poyo Wa-teane Oko
Maki 1:21-28

³¹ Okone angi, Jisasa bala Galili disitiki tano Kapaneame okona puu nena leaipia. Sambasa-angi, balato Juta yamena lotu anda okona kolandaka loto, Gotena pii mana tupa lamawua ateaiapia.

³² Wamba Goteto bala lamawuato, nimbato nambana pii mana lamawua atape leane pua teke, balato mana kuai lo lamawua ateai-kola, wandakali tupamanne moko wete loto, nembo kambua teainipia.
 *

³³⁻³⁴ Okone angi, akali sipitisa koo atene mindi lotu anda okonena peteane oko-mane pii taimane wete loto, ae, Nasatesa tane Jisasa nimba Gotena akali epene tikapene wete atelenga nambato andeyawane leaipia. Nimbato naninanga anu puyale epelepe. Nimbato namima minu koyolo epelepe leaipia.

³⁵ Wuane lea-kola, Jisasato bala laiya loto, nimbato pii nalene, akali oko tepa alu puu leaipia. Wuane lea-kola, sipitisa koo oko-mane akali okone minu koya napene, mee mo patawu yatalu, bala tepa alu, peaiapia.

³⁶ Pea-kola, wandakali tupa pitaka-mane moko wete loto, yakama teke-teke pii lalawa puato, Jisasa bala akali tai mindi atoto, sipitisa koo tupa pulupa leya-kola, palaini yako. Anu pua, balato wuane piyape leainipia.

³⁷ Wuane loto, utupane-mane Kapaneame tano okona mandaka-yale yuu yane tupa pitakana poto, pii okone lo tawe yainipia.

Jisasato Wandakali Kambua Mo Atu Yane Oko
Matiyu 8:14-17; Maki 1:29-34

³⁸ Jisasa bala Juta yamena lotu anda oko tepa alu, Saimone andaka peaipia. Saimonena wanda imane oko siki omoto, umbaini toto andane wete pea-kola, wandakali tupamanne Jisasa tipa puato, nimbato wanda oko moyolape leainipia.

³⁹ Wuane leai-kola, Jisasato wanda okone mandaka poto, balana umbaini toto andane peane oko laiya lea-kola, umbaini toto andane peane okone atu yaepia. Atu yako, okone angi teke wanda okone bala ika loto, utupanena tomo yanya mayaepia.

⁴⁰ Ole lene nai andaka moyale pea-kola, wandakali minditupa-mane yakamana yangone siki waka-waka pelene tupa Jisasa bala ateanga atu aiyu epeainipia.

Wandakali siki pelene tupa mindiki-mindiki lo Jisasa ateanga atu aiyu epeai-kola, balato balana kini utupanenga yata wato, utupane mo atu yaka peaipia.

⁴¹ Wandakali kambua tupanga sipitisa koo ateaini tupamanne Jisasa bala Mesaya oko ateya lo andeai-kola, Jisasato sipitisa koo utupane peyo wateapia. Wato peleai-kola, utupane-mane wandakali utupane tepa wato, pii taimane loto, nimba Gotena iwanane atele leainipia. Wuane leai-kola, utupane-mane bala Mesaya oko ateya lo la-pana olaini nembo toto, Jisasato sipitisa koo utupane laiya loto, yakamato pii kondalapa leaipia. *

Jisasato Tano Minditupana Piape Pua Mangeane Oko
Maki 1:35-39

⁴² Upa pitane nai peakata ya-kola, Jisasa bala Kapaneame tano oko tepa alu, wandakali ata napene yuu mindina pea-kola, wandakali minditupa-mane bala ayia pua andoto, bala ateanga peainipia. Poto, Jisasato utupane tepa alu, yuu waka mindina polane loto, utupane-mane bala minandi leainipia.

⁴³ Minandi leai-kola, Jisasato utupane lamawuato, Goteto namba languato, nimba tano waka tupana poto, Goteto pitaka taka ando atalane oko wandakali tupa lamaipe lo namba langea-kola, nambato tano waka tupana poto, Gotena pii oko lamauwakale leaipia.

⁴⁴ Wuane lalu, Jisasa bala Jutiya disitiki okona poto, Juta yamena lotu anda wakawaka tupana kolandaka laka puato, Gotena pii lamaiki peaipia. *

5

Jisasato Disaipolo Minditupa Ipulupa Leane Oko

Matiyu 4:18-22; Maki 1:16-20

¹⁻³ Alumindi pisa mialaini akali minditupa-mane yakamana sipi okonelapo ipa angini Genesa-leta lene okona matenenga yakale tepa alu, yakamana pisa mialaini umbene nuu tupana kangalamu pata yane tupa tanda lo mo apo ateainipia. Okone angi, Jisasa bala ipa matene ongane atoto, Gotena pii lamawua ateai-kola, wandakali kambua tupamanne balana pii ale amakale lo, bala ateanga eposeyale, mindi minu pitu-pitu pima epeainipia. Epeai-kola, pisa mialaini akali tupana sipi okonelapo ipa matene okona yanga andoto, Jisasa bala Saimonena sipi yane okona peakaiyu loto, Saimone, nimbato sipi oko aja ipa tombeka-yale pele pii leaipia. Saimoneto Jisasana pii ale wato, wuane

pea-kola, Jisasa bala sipi okonena pituto, wandakali tupa pii mana lamai-yaepia. *

⁴ Matili pii mana lamai koyo piyu, Jisasato Saimone lamawuato, yakamoto pisa mialapale. Sipi okona pitiyu, ipa tombeka poto, umbene nuu tupa ipa okona tepa alapa leaipia.

⁵ Wuane lea-kola, Saimoneto balana pii okone yano peyoto, Akali Andane, andipa utulu nanima limu pali napene, ayiawa wete, pisa angu ayia pua atalama tekeko, nanimato pisa mindikipi mindi mia napiyama leaipia. Pisa mia piyama tekeko, nambato nimbania pii oko wato minuto, umbene nuu tupa tepa olo peyo leaipia. *

⁶ Jisasato leane pua Pitapi, bala towa atu peape peaini akali tupapi, utupane-mane umbene nuu tupa ipanga tepa yai wete, pisa kambua wete umbene nuu tupana epo paleai-kola, umbene nuu tupa tumbi loto, lete loyale peaipia.

⁷ Wuane pea-kola, piape piyaini akali sipi mindokona peteaini tupamane yakama moyolo epeakale loto, utupane-mane kii pundi peainipia. Kii pundi peai-kola, akali utupane epoto, sipi okonelapo lapotakania pisa mo mandeai-kola, sipi okonelapo ipa pangosa landa peyoyale peaipia.

⁸⁻¹⁰ Okone angi, akali Sepiti iwanane Jemesa, Jone-la, okonelapo Saimone Pita towa atu piape pua ateainipia. Saimonepi, bala towa atu ateaini akali tupapi, utupane pitaka-mane pisa kambua meaini tupa andoto, moko leanipia. Moko loto, Saimone bala Jisasa ateanga mandaka poto, aiki lekawa tombawua loto, Akali Andane, namba akali koo wete ateyo-ko. Nimbato namba tepa alu puu leaipia. Wuane lea-kola, Jisasato Saimone lamawuato, andipa ato tewa, nimbato wandakali tupa saka at-apowa ateakale lo mo amunguli pula-ko. Nimba yuku olene leaipia.

¹¹ Wuane lea-kola, utupane-mane sipi okonelapo kilau lo moto, ipa matenenga yata ali, minditaka yakamana yaini tupa pitaka ongane yakale leanipia. Yakale lalu, Saimone, Jemesa, Jone ima, Jisasa watama peainipia. *

Jisasato Akali Tapa-mane Koyene Mindi Mo Atu Yane Oko

Matiyu 8:1-4; Maki 1:40-45

¹² Jisasa bala tano mindina ateakola, akali tapa-mane koyene mindimane bala andoto, aiki leka wato, tombawua leaipia. Wuane puato, balato Akali Andane, nimbato namba mo atu yokale nembo teendo, nimbato katulo wuane pulupele leaipia.

¹³ Wuane lea-kola, Jisasato balana kini akali okonenga yata wato, nambato wuane

poyo-ko. Nimba atu yaa lea-kola, akali okonena tapa peane oko atu yaepia.

¹⁴ Atu ya-kola, Jisasato akali okone lamawuato, nimbato Gotena pitisa piape piyane akali oko ateyanga poto, nimbania umbaini oko balanga andawa leaipia. Andawa lalu, Goteto nimbania tapa peane oko mo atu yapia lo wandakali tupamane andeakale nembo toto, opa maipe lo Mosesato leane pua maipe. Nambato nimba mo atu eyo oko nimbato wandakali mindikipi mindi lamai napipe. Jisasato wuane leaipia. *

¹⁵ Balato wuane leane tekeko, akali okonemane balana pii tanga loto, Jisasato bala mo atu yane lo pii lo tawe yaepia. Lo tawe ya-kola, Jisasato yakamana siki tupa mo atu yakale nembo toto, ole dindi lo wandakali kambua wetete balana pii ale olo ipuku peainipia.

¹⁶ Utupane ipuku peaini tekeko, ole kambuanga balato wandakali napalene yuu tupana pote lolo puku peaipia.

Jisasato Akali Kusuku Mindi Mo Atu Yane Oko

Matiyu 9:1-8; Maki 2:1-12

¹⁷ Alumindi Jisasato wandakali tupa mana lamawua atea-kola, akali Patasai tupapi, loo tupana mana andene akali tupapi, utupanena minditupa Jutusaleme tepa alu epoto, Jisasa piii alewa peteainipia. Dee, minditupa Galili, Jutiya-la, disitiki okone-lapona tano tupa pitaka tepa alu epoto, Jisasa piii alewa peteaini tekepia. Alewa peteai-kola, Goteto Jisasa minu tai laya ya-kola, balato wandakali siki pelene tupa mo atu yaka pua ateaiapia.

¹⁸ Jisasato utupane mo atu yaka pua atea-kola, akali minditupa-mane akali kusuku mindi takeanga awua epoto, Jisasa ateanga anda-pango awua epoyale makande peainipia.

¹⁹ Makande peai-kola, wandakali kambua wete peteai-kola, akali okone andapango awua epolane asia mindi naya-kola, akali utupane-mane akali kusuku oko awua anda tokonga peakaiyu loto, anda yame pelene minditupa keao lo yata yainipia. Wuane piyu, takea okona eyaka atawa tepa wato, wandakali kambua ateaini tupa tombenenga bala takea okona yapata Jisasa ateanga tepa yainipia.

²⁰ Jisasato andea-kola, akali utupane-mane balanga tungi peyoto, wuane peyai lo andeaipia. Andoto, balato akali okone lamawuato, amene, nambato nimbania koo tupa apeyo leaipia. *

* 5:5: Jo 21:1-8 * 5:11: Mt 19:27 * 5:14: Pit 14:1-32

* 5:20: Lk 7:48; Ais 43:25

²¹ Jisasato wuane lea-kola, loo tupana mana andene akalipi, Patasaipi, utupanemanne wua nembo teainipia: Goteto angu wandakali tupana koo piyaini tupa apialane-ko. Akali oko apito Gote ando lamba leyape nembo teainipia.

²² Wuane nembo teyai lo andoto, Jisasato utupane tipa puato, anu peakale yakamato wuane nembo teyaipe leaipia.

²³ Nambato akali kusuku oko lamawuato, nimba koo pilini tupa apeyo leyo oko piapse pitete-pene mindi jia. Nambato bala lamawuato, nimba ika lalu, andaka puu loto, balana siki oko mo atu yewando, piapse okone pitete-pene yolopeya.

²⁴ Wuane tekeko, Akalina Iwanane namba yuu okona atoto, wandakalina koo piyaini tupa katulo apialawane-ko. Yakamato okone andalapale nembo teyo leaipia. Wuane lalu, balato akali kusuku okone lamawuato, nimba ika lalu, nimba takea toko mo awua andaka puu leyo leaipia.*

²⁵ Wuane lea-kola, okone angi teke, wandakali petaeaini tupana wenonga akali okone ika lalu, balana panda mo aiyu, Gotena gene oko laiyu lama, bala andaka peapipia.

²⁶ Wuane pea oko andoto, wandakali pitaka-mane moko wete loto, Gotena gene oko laiyu loto, andipa nanimato mana epene waka wete mindi andeyama leainipia.

Jisasato Matiyu Andoto, Namba Watama Ipu Leane Oko
Matiyu 9:9-13; Maki 2:13-17

²⁷ Jisasa bala anda okone tepa alu poto andea-kola, takisa muni mialane akali Lipai lene oko bala takesa muni mialaini anda okone petaeanga andoto, namba watama ipu leaipia.

²⁸ Wuane lea-kola, Lipai ika lalu, balana minditaka yane tupa pitaka yakale lalu, Jisasa watama peapipia.

²⁹ Lipai bala andaka poto, Jisasana tomo andane mindi yanga maya-kola, takisa muni mialaini akali kambuapi, wandakali wakapi, utupanemanne Jisasa towa atu tomo no petaeaini-pia.

³⁰ Jisasapi, balana disaipolo tupapi, utupanemanne wandakali koo tupa towa atu tomo no petaeai-kola, akali Patasaipi, loo tupana mana andene akalipi, utupanemanne mini koo paluto, Jisasana disaipolo tupa tipa puato, anu peakale yakamato takisa muni mialaini akalipi, koo piyaini akalipi, utupane towa atu tomo ipapi, no peteyaipe leainipia.*

³¹ Wuane leai-kola, Jisasato utupanena pii okone yano peyoto, dokosa-mane wandakali siki napalene tupa mo atu yolane tene mindi ata naopeya. Jia. Dokosa-mane wandakali siki pelene tupa angu mo atu yalaini leaipia.

³² Wuane pua teke, wandakali epene tika-pene tupa yamapanne peke leakale lo namba na-epewane. Jia. Koo piyaini wandakali tupa yamapanne peke leakale lo namba epe-wane leaipia.

Pote Kambua Loyale, Tomo Nanene Atalaini Mana Oko
Matiyu 9:14-17; Maki 2:18-22

³³ Jisasato wuane lea-kola, Patasaipi, loo tupana mana andene akalipi, utupanemanne bala lamawuato, ole kambuangga Joneena disaipolo tupapi, Patasai tupana disaipolo tupapi, utupanemanne pote kambua loyale, ole ukupini mindi tomo nanene atalaini tekeko, nimba disaipolo tupamanne tomo ipapi naa teke-teke piyaini okonde leainipia.

³⁴⁻³⁵ Wuane leai-kola, Jisasato utupane tipa puato, akali mindimane wanda mindi kee loto, balana amene tupamanne bala towa atu atolopeyai. Atolai-kola, yakamato katulo balana amene utupane lamawuato, yakama pote kambua loyale, ole ukupini mindilapo tomo nanene atalapa lolopeyaipe leaipia. Okone angi, yakamato katulo wuane nalolo-peyai tekeko, matili akali minditupa-mane wanda kee lolane akali okone andi lo awua polopeyai. Okone angi, balana amene tupamanne pote kambua loyale, ole ukupini mindilapo tomo nanene atolopeyaipe leaipia.*

³⁶ Wuane lalu, Jisasato pii kokoli mindi akali utupane lamawuato, wandakali mindina tona wambane okona asia titi mindi yola-kola, balato okone tambu lokale nembo toto, balana singilisa wenene okona ajako mindi lete lo meando, balato tona wenene okone minu koyolo-peya. Dee, balato tona wenene okona ajako mindi lete lo molane okone balana tona wambane asia titi yolane okone ataenye lo tambu leando, tona wenene lete lo ajako mindi molane okone-la, tona wambane okone-la, okonelapo mindiki okonepene teke guu nalolo-peya. Jia. Tene okonena, wandakali mindikipi mindimane balana tona wenene lete lo ajako mindi moto, balana tona wambane asia titi yene okonena ataenye lo tambu laa napiyane.

³⁷ Dee, wandakali mindimane ipa waene wenene tupa ipa pene wambane meme umbaini-mane waa-pene tupana ambu petae leando, ipa waene wenene okonena

* 5:24: Jo 5:8 * 5:30: Lk 15:1-2 * 5:34-35: Jo 3:29

popone-mane anda yoto, pene wambane okone tula lola-kola, ipa waene oko alu pulupeya. Wuane pulane nembo toto, wandakali mindikipi mindimane wuane napiyane. Jia.

³⁸ Wandakali-mane ipa waene wenene tupa ipa pene wenene tupana ambu pete lape-pene.

³⁹ Ipa waene wambane nalaini wandakali tupamane waene wambane oko epene nembo toto, waene wenene oko naima lakae lo nembo natalaini leaipia.

6

Sambasa Angi Piape Na-piyaini Mana Oko

Matiyu 12:1-8; Maki 2:23-28

¹ Sambasa mindina, Jisasa bala witi ee tupana tombenenga epo peai-kola, balana disaipolo tupamane bala watama epoto, witi dini minditupa yo moto, imbuни kini-mane kokope lo apoto, angini tupa naka pima peainipia.*

² Wuane peai-kola, Patasai minditungamane andoto, Gotena loo okomane loto, Sambasa angi wandakali-mane piape napipe-pene leya-ko. Anu peakale yakamato loo okone ango wato, witi dini tupa moto, imbuни kini-mane kokope lo apeaipe leainipia.*

³⁻⁴ Wuane leai-kola, Jisasato utupanena pii okone yano peyoto, Gotena loo okomane loto, Gotena lotu anda okona betesa Gote maiyene yalaini tupa pitisa akali tupamane angu nape-pene layene eya leaipia. Wandakali waka mindimane betesa utupane naa na-piyapape layene eya tekeko, wamba Dapitipi, bala towa atu ateaini akali tupapi, utupane yakama ulia nono yai-kola, balato Gotena lotu anda okona kolandaka loto, betesa utupane mo noto, bala towa atu ateaini akali tupapi neakale mayane layene eya. Yakamato pii okone wamba dii lo anda napeaipe leaipia.*

⁵ Wuane lalu, Jisasato utupane lamawuato, Akalina Iwanane nambato Sambasa oko bosa lo ando atalawane leaipia.

Sambasa Angi Jisasato Akali Kii Koo Mindi Mo Atu Yane Oko

Matiyu 12:9-14; Maki 3:1-6

⁶ Sambasa waka mindina, Jisasa bala Juta yamena lotu anda mindina kolandaka loto, wandakali tupa mana lamawua ateaiapia. Okone angi akali kii tikasa-tole koo kaputene mindi lotu anda okonena peteaiapia.

⁷ Petea-kola, loo tupana mana andene akali tupapi, Patasai tupapi, utupane-mane

Jisasa kosimi lamakale nembo toto, Sambasa angi balato akali okone mo atu eyape lo andatawa peteaini-pia.

⁸ Utupane-mane bala kosimi lamakale nembo teyai lo andoto, Jisasato akali kii koo okone lamawuato, nimba wandakali peteyai tupana tombenenga ika lo atu lea-kola, akali okone ika lo ateaiapia.

⁹ Ika lo ateai-kola, Jisasato wandakali peteaini tupa tipa puato, Gotena loo okomane aki leyape. Sambasa angi yakamato mana epene minalapape leyape. Pee, Sambasa angi yakamato mana koo minalapape leyape. Sambasa angi yakamato wandakali moyalapape leyape. Pee, Sambasa angi yakamato wandakali mindi minu koyalapape leyape lo nambato yakama tipa peyo leaipia.

¹⁰ Wuane lalu, Jisasato wandakali peteaini tupa pitaka lee-mane anda amo nena piyu, akali okone lamawuato, nimbanda kii oko yaa laa leaipia. Akali okonemane Jisasato leane pua pea-kola, balana kii oko atu wete yaepia.

¹¹ Sambasa angi, Jisasato akali okone mo atu ya-kola, loo tupana mana andene akali tupapi, Patasai tupapi, utupane-mane yataka-mane omoto, yakama teke-teke mindi lamai-lamai puato, nanimato bala towa anu pimape leainipia.

Aposolo Akali Alesa Tupa

Matiyu 10:1-4; Maki 3:13-19

¹² Ole mindina Jisasa bala yuu wangiane mindina pote lolo peaipia. Poto, utulu bala limu pali napene, pote angu lo ateai-kola, waa leaipia.

¹³⁻¹⁶ Waa lea-kola, balana atu atene tupa epeakale loto, balato akali alesa yapa lo meaipia. Balato akali Saimone oko gene mindi Pita leaipia. Jemesapi, Jonepi, Pilipipi, Batolo-miyupi, Matiyupi, Tomasapi, Saimone amene Endutu okopi, Alipusa iwanane Jemesa okopi, Jemesa waka mindina iwanane Jutaso okopi, Selote yamena akali Saimone okopi, Jutaso Isakatiyote lene matili Jisasa ene peteane okopi, akali alesa utupane pitaka Jisasato yapa lo moto, gene aposolo akali leaipia.

Jisasato Wandakali Kambua Mo Atu Yane Oko

Matiyu 4:24-25; Maki 3:7-12

¹⁷⁻¹⁹ Jisasa balana disaipolo tupa towa yuu wangiane okone tepa alu, puu nena loto, yuu lama tika-pene mindina ateaiapia. Atea-kola, solewata matenenga Taya, Saitone-la, tano okone-lapona tanepi, Jutusaleme tanepi, Jutiya disitiki pitakana tanepi, bala towa atu atalaini wandakali kambua wete balana pii ale olo epeainipia.

* 6:1: Lo 23:25 * 6:2: Jo 5:10 * 6:3-4: 1Sa 21:1-6; Pit 24:5-9

Wandakali siki palene tupamane Jisasa wata yai-kola, Gotena tai-lene andane balanga paleane okomane utupanena siki tupa mo atu yaka peaiapia. Wamba sipitisa koo tupamane wandakali minditupa minu koyaini tekeko, wandakali utupane-mane Jisasa wata yai-kola, sipitisa koo utupane-mane wandakali utupane tepa alu peai-kola, utupane atu yainipia. Tene okonena, utupanena siki tupa atu yakale nembo toto, wandakali siki pelene tupa pitaka-mane balanga wata aka puyale epeainipia.

Epele Olane, Mini Kendawa Olane, Okone-lapona Pii Leane Oko

Matiyu 5:1-2

²⁰ Wandakali kambua epo ateai-kola, Jisasato balana disaipolo tupa lamawuato, Goteto wandakali tipia yakama moyo ando ateyai-ko. Yakama epelewa atape-pene lecipia.

²¹ Ulia nonowa ateyai wandakali yakama matili ulia no embowa atolo-peyaiko. Yakama epelewa atape-pene. Ai lo ateyai wandakali yakama matili epelewa giwawa atolo-peyaiko. Yakama epelewa atape-pene.*

²² Yakamato Akalina Iwanane oko bilipi lo atolai-kola, wandakali minditupa-mane yakama towa yataka andane wete wato, yakama ando meke pua, yakamana gene minu koyolo-peyai. Wuane puato, utupane-mane yakama nanima towa atu atu napi-makale lo peyo watolo-peyai.*

²³ Wamba wandakali utupanena yumbane tupamane potopesa akali tupa minu koyainipia. Wuane pua teke andipa wandakali utupane-mane yakamapi minu koyaindo, yakama epelewa atape-pene. Yakamato Akalina Iwanane oko bilipi lo atolai-kola, wandakali-mane yakama minu koyaindo, matili yakama ati kenga yuu epene okona polai-angi, Goteto yole andane mindi yakama gulupeya nembo toto, yakama epelewa atalapape.

²⁴ Yakama epelewa atolopeyai tekeko, minditaka kambua yatawa ateyai wandakali yakama matili minditaka mindi mia napulu-peyama nembo toto, yakama mini kendawa atape-pene. Tomo kambua ak-enane yo peakale lo no ateyai wandakali yakama matili ulia nonowa atolo-peyama nembo toto, yakama mini kendawa atape-pene.

²⁵ Epelewa, giwawa ateyai wandakali yakama matili mini kenda wato, ai lo atolo-peyama nembo toto, yakama mini kendawa atape-pene.

²⁶ Wamba wandakali pitaka-mane owato potopisa tupana gene tupa laiyu lo ateaini

pua, andipa wandakali pitaka-mane yakamana gene tupa laiyu lo ateaindo, yakamapi owato potopesa akali ateyama lo mini kendawa atape-pene. Jisasato wuane lecipia.

Yanda-pene Akali Tupa Towa Epelewa Yamapane Yo Atene Mana Oko

Matiyu 5:38-48

²⁷ Wuane lalu, Jisasato balana pii alewa ateaini wandakali tupa lamawuato, yakamana yanda-pene tupa towa epelewa, yamapane yo atalapape lecipia. Wandakali mindimane yakama towa yamapane koo paleando, yakamato mana epene mindi wato minu, bala moyo atalapape.

²⁸ Wandakali-mane yakama ando pii koo mindi leando, yakamato utupane moyo pote lapapape. Wandakali-mane poto loto, Goteto yakama minu koyakale leaindo, Goteto utupane moyakale lo yakamato pote lapapape.

²⁹ Akali mindimane nimbana wakenanenga peleando, yangisa wetete peleakale lo, nimbato mopeke lape. Akali mindimane nimbana sakesa oko meando, nimbana singilisa oko wetete meakale lo ando kondape.

³⁰ Wandakali mindimane minditaka mindi nimbanga gii lo tee leando, nimbato okone maipe. Wandakali mindimane nimbana minditaka mindi meando, nimbato ole kambuanga yano peyo gii laa apo naene kondape.

³¹ Wandakali tupamane yakamanga mana epene mineakale nembo tolai pua, yakamatopi utupanenga mana epene teke minu atalapape.*

³²⁻³³ Wandakali mindimane koo piyaini wandakali tupa towa epelewa yamapane yo ateando, koo piyaini wandakali utupane-mane bala towa epelewa yamapane yo atalaini teke. Wuane pua teke, wandakali yakama towa epelewa yamapane yo atalaini tupa towa angu yakamato epelewa yamapane yo ateaindo, apito yakama ando, kuai lo peyai lolopeyape. Wandakali mindimane koo piyaini wandakali tupa moyoyale, mana epene mindi mineando, koo piyaini wandakali utupane-mane balapi moyo, mana epene teke minalaini. Wuane pua teke, yakamato wandakali yakama towa mana epene minalaini tupa angu moyoyale, mana epene mineando, apito yakama ando, kuai lo peyai lolopeyape.

³⁴ Koo piyaini wandakali tupanena yangone tupamane minditaka mindi matili yakama geakale nembo toto, utupane-mane yangone utupanenga yano maiyaini.

* 6:21: Lap 7:16-17; Sam 126:5-6; Ais 61:3

* 6:22: Jo 15:18-19; 16:1-4; 1Pi 4:14

* 6:31: Mt 7:12

Wuane pua teke, yakamana yangone tupamane minditaka mindi matili yakama geakale nembo toto, yakamato yangone utupanenga yano mai-yaindo, apito yakama languato, yakamato kuai lo peyai lolo-peyaipe.

35-36 Gote ati kenga ateya okomane bala lo bilipi leyama nayu na-lalaini wandakali tupapi, koo piyaini wandakali tupapi, utupane pitaka ondo wato moyalan. Yakamana ayiane ati kenga ateya okomane wandakali tupa ondo alane pua teke, yakamato wandakali yangone tupa ondo wato moyo atalapape. Wuane puato, yakama towa yanda-pene wandakali tupa towa epelewa yamapane yo atoto, utupanenga mana epene tupa minalapape. Dee, matili wandakali mindimane yano peya-geakale nembo toto, minditaka mai napene, mee moyo maiyapape. Yakamato Goteno ondo ene mana okone wato mineaindo, yakama balana andopane gulo atoto, matili yakamato yole andane wete mindi molopeyai. Jisasato wuane leaipia.

Wandakali Waka Tupa Yapa Lo Tale Na-piyapape Leane Oko

Matiyu 7:1-5

37-38 Wuane lalu, Jisasato pii mindi tako pua loto, yakamato wandakali yangone mindinga mana minulai pua teke, Goteto mana okone teke yakamanga minulupuya leaipia. Yakamato minditaka epene tupa nuu andane mindina tumbi laya wato, wandakali mindi mayaindo, Goteto minditaka epene tupa nuu okonepene teke mindina tumbi laya wetete wato, yakama gulupuya-ko. Yakamato minditaka epene kambua wandakali yangone tupa maiyapape. Yakamato kenda-pene mindi wandakali waka tupanga yata nayaindo, Goteto kenda-pene mindi yakamanga yata naolo-peyako. Wandakali yangone tupamane mana koo mindi yakamanga minulai-kola, paini yakamato kendapene mindi utupanenga yata na-alapape. Yakamato wandakali yangone tupana koo tupa apia-maiyaindo, Goteto yakamana koo tupa apia-gulupeyako. Yakamato utupana koo tupa apia-maiyapape. Yakamato wandakali yangone tupa koo ya lo yapa lo tale naapeaindo, Goteto yakamapi koo ya lo yapa lo tale napulu-peyako. Yakamato utupane koo ya lo yapa lo tale na-piyapape. Jisasato wuane leaipia.*

39-40 Wuane lalu, Jisasato pii kokoli mindi wandakali utupane lamawuato, mana kambua tisa tupanga eya-kola, mana anjako teke sukulu-pai tupanga yalane leaipia. Wuane tekeko, matili sukulu pai

mindimane mana kuai lo mia koyo puato, bala tisa yale teke atolopeya. Wandakali lee koo mindimane lee koo yangone mindi asia andawa lokale nembo toto, atu peapindo, balato katulo asia okone kuai lo andawa lolo-peyape. Jia. Wandakali okonelapo lapotaka kundu mindina ayia peyolopeyapi.*

41 Nimba amene mindina lenenga lee kunu ajako mindi eya-kola, nimbato okone andoto, mo apokale lalene tekeko, nimba tanena lenenga ita palanja andane mindi eya-kola, nimbato okone mo apokale nembo natalene. Anu peakale nimbato wuane pilinipe.

42 Nimbana lenenga ita palanja andane eya-kola teke, anu peakale nimbato ita palanja okone anda napene atoto, nimbana amene oko lamawuato, amene, nimbana leenga lee kunu eya oko nambato mo apia-gua lalenepe. Wandakali-mane nimbana pii okone ale wato, nimbanga koo mindi naeya nembo teakale nayuto, nimbato wuane lele. Nimbana lenenga ita patepane andane mindi eya oko nimba tane wamba ini mo apiape. Apialu, nimba lee epene atoto, nimba amene okona lee kunu yola oko katulo mo apolopele. Jisasato wuane leaipia.

Wandakali Epene, Koo-la, Okolapo Ando Pii Leane Oko

Matiyu 7:15-20; 12:33-35

43-44 Wuane lalu, Jisasato pii mindi tako pua loto, ita gulu ani atene mindina yomboto dini mindi lia napiyane leaipia. Eyaka ikilimbu mindina butusa dini mindi lia napiyane teke. Wandakali-mane ita dini lula tupa andoto, ita oko epene ya, ita oko koo ya lo yapa lalaini. Ita epene mindinga dini koo mindi liya napiyane. Wuane pua teke, ita koo mindinga dini epene mindi liya napiyane. Wandakali mindimane minditaka mindi nembo tatawa atolane okone teke pii kambua lalane.

45 Wandakali epene tupana nembo-tene epene kambua paleya-kola, utupane-mane pii epene teke kambua lalaini. Wandakali koo tupana nembo-tene koo kambua paleya-kola, utupane-mane pii koo kambua teke lalaini. Jisasato wuane leaipia.

Anda Pulane Mana Lapo Okona Pii Kokoli Oko

Matiyu 7:24-27

46-49 Wuane lalu, Jisasato pii mindi tako pua loto, akali mindimane namba ateyonga epoto, nambana pii oko alewa, wato minalane wandakali okone bala wua pene atalane loto, nambato pii kokoli mindi yakama langeyo-ko. Yakamato ale alapa

* 6:37-38: Mt 6:14; Mk 4:24-25 * 6:39-40: Mt 10:24-25; 15:14

leipia. Akali mindimane balana anda puyale ato, anda pingina tai ateakale loto, yuli tombama nenanga peaipia. Tombama poto, anda pingina okone duli lo ate loto, anda okone pikoyo peaipia. Matili ipa lii andane mindi lua awua epoto, anda okone peyo keao loyale peane tekeko, anda pingina tai ateane okonemane anda okone duli lo minea-kola, ipa lii epeane okomane anda okone katulo lai naleipia. Akali waka mindimane balana anda puyale anda pingina mindi ate laa napene, balana anda oko mee peaipia. Matili ipa lii andane mindi lua awua epoto, pingina ata napene anda okone pelea-kola, anda okone kapoyale lai leipia. Anda okone koyane pua teke, nambana pii oko ale wato, wato mina na-piyaini wandakali tupa koyolo-peyaiko. Anu peakale yakamato mee pii-mane angu, namba ando Akali Andane, Akali Andane lo atoto, nambana pii leylo tupa wato mina na-piyaini. Jisasato wuane leipia.*

7

*Jisasato Ami Opisa Mindina Piape Akali
Mo Atu Yane Oko*

Matiyu 8:5-13

¹ Pii utupane wandakali tupa lamai koyo piyu, Jisasa bala Kapaneame tano okona peaipia.

² Tano okonena ami opisa mindimane akali andete mindiki ando ateaiapia. Balana piape akali yamapane yalane mindi siki moto, omoyale peaipia.

³ Omoyale pea-kola, wandakali minditupa-mane Jisasa bala Kapaneame tano okona epo ateya leainipia. Wuane leai-kola, ami opisa okomane pii okone ale wato, Juta yame akali kawane minditupa lamawuato, Jisasato nambana piape akali oko mo atu yolo epeakale, yakamato bala lamalu pulupa leipia.

⁴⁻⁵ Wuane lea-kola, akali utupane-mane Jisasa ateanga poto, ami opisa okonemane Juta yame wandakali nanima towa yamapane yo atoto, balato nanimana lotu anda mindi pingipiame leainipia. Bala akali epene wete mindi. Tene okonena, nimbato balana pii okone ale wato, balana piape akali oko mo atu yeendo, nanima epele olopeyama leainipia.

⁶⁻⁸ Wuane lalu, akali utupane-mane Jisasa atu ami opisa okona andaka payole amonga-yale epeai wete, ami opisa okomane balana yamapane yene akali minditupa lamawuato, yakamato Jisasa malanda olo poto, pii mindi bala lamai-yapape leipia. Ami opisa okomane pii mindi nimba languato, Akali Andane, namba akali koo okomane nimba andolo

epewando, okone kuai nalolo-peya lala lo lamai-yapape. Nimba akali epene wete oko namba andaka epeendo, okone kuai nalolo-peya teke lala. Akali mindimane namba ando atalane. Wuane pua teke nambato ami yanda yene minditupa ando atalawane. Nambato ami yanda yene mindi ando, puu leyo-kola, bala palane. Nambato ami yanda yene mindi epeakale leyo-kola, bala epalane. Nambana piape akali okomane piape mindi peakale leyo-kola, balato piape okone piyane. Wuane pua teke, nimbato nambana piape akali oko mee pii-mane atu yakale lole-kola, bala atu yolopeya-ko. Nimba masia-pene namba andaka epolene. Ami opisa nambato wuane lala lo, yakamato Jisasa lamalu pulupa lea-kola, bala towa yamapane yene akali tupamane poto, Jisasa lamai-yainipia.

⁹ Lamai-yaikola, Jisasato nembo kambua toto, wandakali kambua bala watama epeaini tupa anda-peke loto, ami opisa okone bala Isatale tane mindi jia tekeko, balato namba bilipi leya pua, Isatale tane wandakali mindimane namba bilipi leainga nambato wamba anda napewane lo nambato yakama langeyo leipia.

¹⁰ Wuane lea-kola, Jisasa malanda olo epeaini akali tupa ami opisa okona andaka peke loto andeai-kola, balana piape akali omoyale peane okone saka peteaiapia.

*Jisasato Naini Tane Iwana Patane
Omene Mindi Ika Laya Yane Oko*

¹¹ Anate-lene Jisasapi, balana disaipolo tupapi, wandakali kambua minditupa towa tano Naini lene okona peainipia.

¹² Bala tano okonena lome andane asini kolandaka lalaini geta okona peakaiyu lea-angi, wandakali minditupa-mane iwana patane omene mindi mali malyale awua epeainipia. Wamba iwana okonena angini okomane iwana mindiki okone angu mandu ya-kola, balana akalini oko omeaipia. Omea-kola, bala wanda yalo piti-yaepia. Iwana patane omeane okone mali puyale, tano okonena tane wandakali kambua wete iwana okonena angini oko towa epeainipia.

¹³ Epeai-kola, Akali Andane okomane wanda yalo okone ondo wato, nimba ai halene kondaa leipia.

¹⁴ Wuane lalu, Jisasa bala iwana omene takeanga awua epeaini organe mandaka poto, takea oko minea-kola, akali awua epeaini utupane-mane iwana omene oko mee aitawa ateainipia. Aitawa ateai-kola, Jisasato loto, iwana patane, nimba ika laa leyo leipia.

¹⁵ Wuane lea-kola, iwana patane omeane okone ika lo peteaiapia. Ika lo pituto, pii

lea-kola, Jisasato iwana okone lamawuato, nimba angini towa puu leaipia. *

¹⁶ Jisasato iwana patane omene okone ika laya ya oko andoto, wandakali pitakamane yuku yainipia. Yuku wato, utupanemanne Gotena gene oko laiyu loto, Goteto balana wandakali tupa ondo wato, moyolo epeakale lapia-kola, potopesa akali andane mindi nanimana tombenenga epo ateya leainipia. *

¹⁷ Wandakali-mane pii okone lo tawe yoto, Jisasato iwana omene okone ika laya ala leai-kola, Jutiya disitiki tanepi, yuu waka tanepi, wandakali utupane pitakamane pii okone ale yainipia.

Jonena Disaipolo Lapo Akali Jisasa Ateanga Epeapele Oko

Matiyu 11:2-19

¹⁸ Jisasato piape utupane pua ateya-kola, wandakali mindimane ipa peya-maiyane akali Jonena disaipolo tupa lamai-yainipia. Jonena disaipolo tupamanne bala lamai-yaikola, balato balana disaipolo lapo akali ipulupa leaipia.

¹⁹ Akali okonelapo bala ateanga peapi-kola, balato okonelapo lamawuato, liyamba Jisasa ateyanga poto, nimba akali mindi epolopeya layene pia okope. Pee, matili akali waka mindi epolopeya nembo toto, nanimato maliyo atamakalepe lo tipa piyapape leaipia. *

²⁰ Wuane lea-kola, akali okonelapomane Jisasa ateanga poto, bala tipa puato, nimba akali mindi epolopeya layene yene pia okope. Pee, matili akali waka mindi epolopeya nembo toto, nanimato maliyo atamakalepe. Ipa peya-maiyane akali Jone pii okonelapo nimba tipa pulu pulupa lala-kola, nalipato nimba tipa pulu epeyapa leapelepi.

²¹ Wuane leapi-kola, okone angi teke Jisasato akali okone-lapona pii leapele okone yano peya napene, wandakali sипитиса koo atene tupana sипитиса koo tupa peyo watalu, wandakali lee koo kambua tupana lee teakale lalu, wandakali siki waka-waka palene tupa mo atu yaka piyu, peaipia.

²²⁻²³ Wuane piyu, Jisasato Jonena disaipolo okonelapo lamawuato, nambato piape pua ateyo-kola, wandakali lee koo tupa manne kuai lo andeyai. Wandakali kee koo tupa asini peyai. Wandakali tapa-pene tupa umbaini epene ateyai. Wandakali ale tuma tupamanne pii ale eyai. Wandakali omene tupa ika loto, saka ateyai. Wandakali koo tipia tupamanne Gotena pii layene oko ale eyai. Wandakali mindimane

nembo lapo pali napene, namba Mesaya oko ateya lo bilipi leaindo, matili bala epele wetete olopeya. Nambato Gotena piape peyo-kola, liyambato lee-mane andeyapi. Nambato Gotena pii ley-o-kola, liyambato ale-mane ale eyapi. Liyamba Jone ateyanga peke loto, lee-mane andeyapi tupapi, ale-mane ale eyapi tupapi, utupane pitaka Jone lamai-yapape. Jisasato wuane leaipia. *

Jisasato Jone Bala Potopisa Akali Andane Wete Mindi Ateya Leane Oko

²⁴ Jonena disaipolo okonelapo-mane bala ateanga peke leapi-kola, Jisasato wandakali kambua ateaini tupa tipa puato, wamba Jone bala wandakali napalene yuu okona atea-angi, bala akali anu-pene mindi ateakola, yakamato bala andolo peape leaipia. Popo leya-kola, kambe tundupalina dini tupa puu amo nena piyane pua, Jone bala akali mini lapo palu atea-kola, yakamato bala andolo peape. Jia. Bala nembo mindiki palu atoto, piape pua ateaiapia.

²⁵ Balato tona epene wete minditupa pua atea-kola, yakamato bala andolo peape. Jia. Tona epene paiya wete piyaini akali tupamanne minditaka kambua wetete yatawa atoto, kinji tupana andaka pitiyaini.

²⁶⁻²⁸ Jone bala potopesa akali mindi atea-kola, yakamato bala andolo peape. Enene. Joneto potopisa piape pulupeya nembo toto, Gotena pii pepa pelene eya mindimane loto, ale alapape. Nambana pii wai lolane akali oko ingane epeakale lolowa-kola, balato nimbana asini oko makande pua yata olopeya layene eya. Joneto potopesa piape okone puato, piape waka mindi tako pua pea. Joneto yuu okona wandakali pitaka sia minu ateya tekeko, Goteto wandakali gene nayene wetete mindi moyo ando atola-kola, wandakali okonemane Jone sia minuto, kuai lo wetete atolopeya lo nambato yakama langeyo. *

²⁹ Takisa mialaini akali tupapi, wandakali waka tupapi, utupane pitaka-mane Jonena pii ale wato, Gotena mana oko tika-pene ya lo nembo toto, ipa meainipia. *

³⁰ Wuane tekeko, loo tupana mana andene akali tupapi, Patasai tupapi, utupanemanne Gotena pii tanga loto, Joneto yakama ipa peya-gii nalene, konda yainipia. *

³¹ Wandakali yame andipa ateyai tupamanne wuane peyai okonena, utupane yakama wandakali anu-pene ateyaipe. Nambato utupane aki mindi towa makande puape.

³²⁻³⁴ Nambato utupane andopane yame towa makande peyo. Andopane tupamanne

* 7:16: Lk 1:68-72 * 7:19: Sam 40:7; Mal 3:1; Lk 1:8
1:76-79; Mal 3:1 * 7:29: Lk 3:12 * 7:30: Mt 21:31-32

* 7:22-23: Ais 35:5-6; 61:1; Lk 4:18-19 * 7:26-28: Lk

makesa ama tupana pituto, andopane yangone tupu lamawuato, yakamato nanima towa kindi pua lialapale loto, nanimato yakama mina kindi pua tina pene peyo gili galo lo mali lialama tekeko, yakamato nanima towa kindi pua mali liama na-lalai. Nanimato kindi puato, wankakali mali puyale wee lalaini mindi mandeke pua lalama tekeko, yakamato nanima towa kindi pua ai lama na-lalai lalaini. Wuane pua teke, wamba ipa peya-maiyane akali Jone bala epo atoto, ipa waenepi, uliazi, utupane nanene atea-angi, yakamato bala lamba loto, sipitisa koo mindi balanga ateya-kola, balato ipa waenepi, uliazi, utupane nanene kondyea leainipia. Andipa Akalina Iwanane oko epo atoto, ipa waenepi, uliazi, utupane no ateya-kola, yakamato balapi lamba loto, akali okomane ipa waenepi, uliazi, utupane kambua wete no atoto, takisa muni mialaini akali tutupapi, koo piyaini wankakali tutupapi, utupane towa yandeke ando atalane leyai. Andopane tupamane yakamana yangone tupu yataka amauwato, lalaini pua, yakamato Jonepi, Akalina Iwanane okopi, okonelapo yataka amauwato, wuane lalaini mana okonemane yakama andopane gulo ateyai.

*

³⁵ Wandakali wai-ene tupu pitaka-mane Gotena pii layene oko tika-pene ya lo nembo toto, Goteto leya pua piyaini. Jisasato wuane leaipia.

Wanda Mindimane Wele Minditupa Jisasana Kawanenga Gae Leane Oko

³⁶ Patasai mindimane Jisasa lamawuato, nimba namba towa tomo napakale ipu lea-kola, Jisasa bala Patasai okona andaka kolandaka loto, tomo no peteapipia.

³⁷ Okone ang, mana koo kambua minalane wanda mindimane Jisasa bala Patasai okonena andaka tomo no peteyai nembo toto, wele tunduma-pene minditupa botolo epene wete mindina piti-pata mindi awua epeaipia.*

³⁸ Epoto, Jisasana kee yanenga pituto, wanda okonemane bala tanena mana koo minalane tupu nembo toto, ai lea-kola, balana lee maiya epeane oko Jisasana kenenga dopo lo tepa yaepia. Dopo lo tepa ya-kola, wanda okonemane balana kawa itini luu wete atene okomane Jisasana kenenga lee maiya dopo lo tepa yane tupu kunu apia-maiyaepia. Apia maiyu, balato Jisasa tama puato, ole kambuangga balana kene oko nunu lalu, balana kenenga wele tunduma-pene awua epeane oko gae lo ayia mayaepia.

* ^{7:32-34:} Lk 15:2 * ^{7:37:} Mt 26:7; Mk 14:3; Jo 12:3

³⁹ Wanda okonemane wuane pua peteakola, Patasai Saimone lene Jisasa tomo napakale ipu leane okomane wua lo nembo teaipia: Jisasa bala potopesa akali enene mindi pia-yale, wanda okonemane mana koo tupu minalane nembo tapia-yale. Wuane nembo toto, balato wanda nimbato namba minulene lapia-yale nembo teaipia.

⁴⁰ Wuane nembo tea-kola, Jisasato Saimone lamawuato, nimbato pii mindi nimba langukale leaipia. Wuane lea-kola, Saimoneto tisa, nimbato pii okone namba langi leaipia.

⁴¹ Wuane lea-kola, Jisasato pii kokoli mindi bala lamawuato, akali lapo-mane akali mindikinga yano gii lo meapele leaipia. Akali mindimane kina (50) pailaya yau gii lo meaipia. Akali mindoko-mane (10) tene kina angu gii lo meaipia.

⁴² Akali okonelapo-mane balana yano peyolane liyambanga minditaka nayapi oko andoto, matili yano anduane okomane akali okonelapo lamawuato, liyambato nimbana yano gewa oko yano peya napene kondalapape leaipia. Wuane lea-kola, akali okone-lapona andoko-mane bala towa epelewa yamapanne wete yane yaluape lo tipa peapipia.

⁴³ Tipe pea-kola, Saimoneto Jisasana pii okone yano peyoto, akali yano andane meane okomane bala towa epelewa yamapanne wete yane yaluua nembo teyo leaipia. Wuane lea-kola, Jisasato bala lamawuato, nimbato kuai lo nembo toto, lele leaipia.

⁴⁴ Wuane lalu, Jisasa bala wanda okone peteanga mopeke loto, Saimone lamawuato, wanda okomane piape mindi peya oko nimbato andele, anda napelepe leaipia. Namba nimba andaka kolandaka lalo-angi, nimbana kee wasa-wasa peyola loto, nimbato namba ipa ambua gii napele tekeko, wanda oko balana lee maiya ipane okomane nimbana keenga wasa-wasa peyoto, balana kawa itini okomane nimbana keenga ipati atala oko endo peakale lo kunu eya-kola, nimbato andele okoni.

⁴⁵ Namba nimbana andaka kolandaka lalo-angi, wayu epeleya lo, nimbato namba nunu nalene kondele tekeko, wanda okomane namba tama puato, ole kambuangga nimbana kee oko nunu lo peteyanga nimbato andele okoni.

⁴⁶ Nimbato wele mee mindi nimbana kawanenga gae na-lale tekeko, wanda okomane namba epele wato, wele tundumapene oko nimbana kenenga gae loto, aiyagaya andele okoni leaipia.

⁴⁷ Wandakali minditupa-mane mana koo ajalapo angu minalamane nembo talaini. Nimbato wandakali okonepene mindina

koo piyane tupu apia-maiyokola, balato namba towa mee teke epele alane. Wanda okonemane mana koo ole kambuangia minalawane nembo teya. Tene okonena, nambato balana mana koo utupane pitaka apia-maiyokola, balato namba towa epelewa yamapane wete eya leaipia.

⁴⁸ Wuane lalu, Jisasato wanda okone lamawuato, nimbana koo pilini tupu pitaka apia-geyo leaipia.

⁴⁹ Wuane lea-kola, akali bala towa atu tomo no peteaini tupamane yakama teke-teke mindi lamai-lamai puato, akali oko apito nimbana koo tupu apia-geyo leya andeyamape leaninipia.

⁵⁰ Wuane lea-kola, Jisasato wanda oko lamawuato, nimbato namba lo bilipi lele okomane nimba mo atu eya-ko. Nimba mini epene paliyu pupe leaipia. *

8

Wanda Minditupa-mane Jisasa Moyaini Oko

¹⁻³ Wamba akali Kusa lene mindimane Etotenda anda ando atalaepia. Balana wetene Jowana bala siki pelea-kola, Jisasato bala mo atu yaepia. Wanda Matiyu yuu Makatala tano okona tane balanga sипитиса koo yanasa ateai-kola, Jisasato sипитиса koo utupane peyo wateaipia. Wuane pua teke, Jisasato wanda waka minditupanga sипитиса koo ateane tupu peyo watalu, siki pelene wanda kambua mo atu yalu, Goteto pitaka taka ando atalane leaipia. Wuane loto, balato Gotena pii layene epene oko wandakali tupa lamaima, epoko puato, balana disaipolo alesa akali tupa towa atu tano anjakopi, andanepi, yuu pitakana peainipia. Peai-kola, wanda Jowana, Matiya, Susana ima, wanda kambua akali utupane towa atu poto, utupane moyo, munipi, tomopi, okonetaka tupa maiki peainipia. *

Tomo Waini Papaka Leane Okona Pii Kokoli Oko

Matiyu 13:1-9; Maki 4:1-9

⁴ Wandakali kambua tano pitakana atoto, Jisasa ateanga epo amunguli peai-kola, Jisasato pii kokoli mindi utupane lamaiyaepia.

⁵ Pii kokoli okone loto, akali mindimane tomo waini mindi papaka lolo peane leaipia. Papaka lea-kola, tomo waini minditupa ambe asininga tepa ya-kola, wandakali-mane asini okonena epo poto, kee-mane ango yai-kola, eka minditupa epoto, waini utupane neainipia.

⁶ Tomo waini minditupa ambe ana tokonga yuu anjako yane mindina tepa wato,

poka lo ika leaini tekeko, ana tokonga yuu anjako yane okona ipa napetene ya-kola, tomo waini utupane kapu teipia.

⁷ Tomo waini minditupa ambe tani koo ani atene tupu ika lalane yuu mindina tepa wato, poka lo ika leaini tekeko, tani koo ani atene tupu kapoyale andayoto, tomo waini utupane peyao neaipia.

⁸ Tomo waini minditupa yuu epene mindinga tepa wato, poka lo andayoto, dini (100) wane andete liaepia. Jisasato pii kokoli okone lalu, ale asia yene wandakali yakamato pii okone pailo ale wato, pii okonena tene oko nembo talapane leaipia.

*Pii Kokoli Leane Okona Tene Oko
Matiyu 13:10-23; Maki 4:10-20*

⁹ Jisasato pii kokoli okone lea-kola, balana disaipolo tupamane bala tipa puato, nimbato pii kokoli lale okonena tene oko akipe leaninipia.

¹⁰ Wuane lea-kola, Jisasato utupane lamawuato, Goteto pitaka taka ando atalane loto, nambato balana pii mana wamba too-pene yane tupu yakamanga andawa lalawane tekeko, wandakali waka tupamane nimbana piape lee-mane angu andoto, Goteto pitaka taka ando atalane lo anda napeakale. Dee, utupane-mane nimbana pii oko ale-mane angu ale wato, Goteto anu puato, pitaka taka ando atalane nembo nateakale nayuto, nimbato pii kokoli tupa angu lalawane. *

¹¹ Tene okonena, andipa nimbato pii kokoli lalo okona tene tupu yakama langeyo. Tomo waini papaka leane oko Gotena pii layene epene oko eya.

¹² Akali mindimane tomo waini papaka lea-kola, minditupa ambe asingina tepa ya-kola, eka minditupa epoto, utupane neainipia. Wuane pua teke, akali mindimane Gotena pii oko wandakali tupa lamaula-kola, utupane-mane pii okone bilipi lolai-kola, Goteto utupane molo-peke lolane nembo toto, Satane epoto, yakamana nembo-tenenga Gotena pii okone mo alu piya alane.

¹³ Tomo waini minditupa ambe ana tokonga yuu anjako yane mindina tepa wato, poka lo ika leane tekeko, ana toto peane okomane pini tupa kapu teipia. Wuane pua teke, wandakali minditupa-mane Gotena pii oko wamba ini epelewa ale wato, bilipi lalaini tekeko, matili kenda-pene minditupa utupanenga epeya-kola, Gotena pii bilipi leyama nayu nalene wandakali utupane yakama pini wayumane peya napene gulo atoto, ole ukupini angu bilipi lalu, Gote wamba kapoyale awua tepa alaini.

* 7:50: Lk 8:48; 18:42

* 8:1-3: Mt 27:55-56; Mk 15:40-41; Lk 23:49

* 8:10: Ais 6:9-10

¹⁴ Tomo waini minditupa ambe tani koo ani atene tupa ika lalane yuu mindina tepe wato, poka lo ika leane tekeko, tani koo ani atene tupa kapoyale anda yoto, utupane peyayo neainipia. Wuane pua teke, wandakali minditupa-mane Gotena pii ale wato, bilipi lalaini tekeko, matili utupane-mane epoko pua atoto, umbainina epele-ene tupa pitaka pimakale nayuto, munipi, waka minditaka tupapi, kambua wete anu pua, mia-makale nembo kambua talaini. Mana okonemane wandakali tupa minakasa wato, Gotena pii oko oke eyakola, Gotena pii yakamanga eya okomane dini lia napiyaine.

¹⁵ Tomo waini minditupa yuu epenenga tepe wato, poka lo andayo atoto, dini (100) wane andete liaepia. Wuane pua teke, Gotena pii oko ale wato, mini epene palu, bilipi leyama nayu lalaini wandakali tupa panga dini kambua lialane.

*Lamu Okona Pii Kokoli Oko
Maki 4:21-25*

¹⁶ Wandakali mindikipi mindimane lamu mindi kayuto, pene mindimane lamu okone ombowa too na-piyaini. Dee, wandakali mindikipi mindimane lamu mindi kayuto, pangiyane toko mindina pangosa yata aa napiyane teke. Jia. Lamu mindimane tii pula-kola, wandakali andaka kolandaka lolai tupamanne kuai lo andeakale nembo toto, wandakali-mane lamu okone kayuto, tokonga yata alaini.*

¹⁷ Anu peakale nambato wuane leyope. Minditaka andipa too pitane ateya tupa pitaka matili Goteto mo pana olopeya. Minditaka andipa ombo atane eya tupa pitaka matili Goteto mo pana ola-kola, wandakali pitaka-mane andolopeyai.*

¹⁸ Wandakali mindimane Gotena pii oko wayumane bilipi leando, Goteto wandakali okonena bilipi oko minu tai laya ola-kola, wandakali okonemane Gotena pii okone bilipi leyo nayu lolopeya. Wandakali mindimane Gotena pii oko bilipi leyo nayu nalene, mee owato bilipi lene gulo ateando, Sataneto akali okonena bilipi oko mo alu piya olopeya-ko. Yakamatot Gotena pii oko anu pua ale eyamape nembo toto, wayumane ale eyo nayu alewa atalapape. Jisasato wuane leaipia.*

*Jisasana Yame Enene Oko
Matiyu 12:46-50; Maki 3:31-35*

¹⁹ Jisasa bala anda mindina petekola, wandakali kambua epo amunguli peainipia. Okone anggi, balana angini, amene ima, bala andolo epeaini tekeko,

wandakali kambua anda-pango petekola, anda-pangosa epolane panda nayakola, Jisasana yame epeaini tupa kamaka ateainipia.

²⁰ Kamaka ateai-kola, wandakali mindimane Jisasa lamawuato, nimban angini amene ima utupane-mane nimba andamakale nembo toto, kamaka maliyo ateyai leaipia.

²¹ Wuane lea-kola, Jisasato balana pii okone yano peyoto, Gotena pii layene okomane leya pua piyaini wandakali tupa nambana angini, amene ima ateyai leaipia.

*Jisasato Popo Andane Lo Awua Epeane
Mindi Tepa Yakale Leane Oko*

Matiyu 8:23-27; Maki 4:35-41

²² Ole mindi Jisasato balana disaipolo tupa lamawuato, nanima ipa angini okona amo yangi maa leaipia. Wuane lalu, Jisasapi, balana disaipolo tupapi, utupane sipi mindina peakaiyu lo pitiyu, peainipia.

²³ Ipa angini okona tombenga peai-kola, Jisasa bala sipi okonena limu palea wete, popo andane wete mindi lo awua epeane okomane ipa andane wete mindi taimane ika leaipia. Ipa ika leane okonemane sipi okone ipa pangosa mo landa peyoyale pea-kola, akali utupane omape-pene guleainipia.

²⁴ Omape-pene gulo atoto, Jisasana disaipolo tupamanne bala paleanga poto, bala peya ika loto, Ando Atalene Akali, nanima moyoyale peyama leainipia. Wuane lea-kola, Jisasa ika loto, popo andane leane okola, ipa taimane ika leane okola, lapotaka laya loto, tepa alapa lea-kola, lapotaka tepa wato, ema napeapele-pia.

²⁵ Wuane pea-kola, Jisasato akali utupane lamawuato, anu peakale yakamatot Gote lo bilipi leyama nayu naleyaipe leaipia. Wuane lea-kola, akali utupane-mane yuku wato, nembo kambua toto, yakama teke-teke pii mindi lamai-lamai puato, akali okomane tepa alapa leya-kola, popo andane lala okola, ipa taimane ika lala okola, lapotaka-mane balana pii oko ale eyapi-ko. Akali oko bala api ateyape leainipia.

*Jisasato Akali Mindina Sipitisa Koo
Ateaini Tupa Peyo Wateane Oko*

Matiyu 8:28-34; Maki 5:1-20

²⁶ Jisasapi, balana disaipolo tupapi, utupane sipi okonena pitiyu, ipa angini Galili okona amo yangi poto, Getasa yamena yuu okona peakaiyu leainipia.

²⁷⁻²⁹ Wamba sipitisa koo mindimane yuu okonena akali mindi mo kee ya-kola, ole kambuangka akali waka tupamanne balana kini kene lapotaka anangapu peyo, sene ende-mane andi loto, bala wasa lo ando

* **8:16:** Mt 5:15; Lk 11:33 * **8:17:** Mt 10:26; Lk 12:1-3

* **8:18:** Mt 25:28-29; Lk 19:26

ateainipia. Utupane-mane wuane peaini tekeko, balato anangapupi, sene endepi, utupane pai lo apiaka piyu, tano oko tepa alu, wandakali napalene yuu tupana puku peaipia. Pulu, bala anda mindina ata napene, wandakali mali tupana atoto, umbaininga tona mindi napene, papata mee atalaepia. Jisasa bala sipi oko tepa alu, ipa okona matenenga epea-kola, sипитиса koo atene akali okonemane Jisasa andoto, bala ateanga epeaipia. Epea-kola, Jisasato sипитиса koo akali okonenga ateane oko lamawuato, nimba akali oko tepa alu, puu lea-kola, akali okonemane Jisasa ateanga aiki leka wato, tombawua leaipia. Tombawua lea-kola, sипитиса koo okomane pii taimane loto, Jisasa nimba Gote ati kenga wete ateya okona Iwanane oko atele leaipia. Nimbato nambanga aki pulape. Nimbato tandaka andane namba gii napene konda ola lo nambato nimba langeyo leaipia.

³⁰ Wuane lea-kola, Jisasato akali okone tipa puato, nimbanan gene apipe leaipia. Sипитиса koo kambua akali okonenga paleai-kola, akali okonemane Jisasana pii okone yano peyoto, nambanga gene oko ami leaipia.

³¹⁻³² Okone ang, yuu wangiane mindina yia kambua minditupa-mane tani no ateai-kola, sипитиса koo utupane-mane Jisasa taimane lamawuato, nimbato nanima yuu koo okona wato ainena lolene. Nanima yia ateya utupana ini anda-pangosa makale lo nimbato ando kondaa leainipia. Wuane leai-kola, Jisasato sипитиса koo utupane-mane wuane peakale lo ando konda yaepia.

³³ Wuane peakale lo ando konda ya-kola, sипитиса koo utupane-mane akali okone tepa alu, yia utupane ini anda-pangosa kolandaka leai-kola, yia utupane pitaka yuu wangiane okonena ato, taimane puu nena loto, ipa angini okona peakoto, ipa nalu, omeainipia.

³⁴ Wuane peai oko andoto, yia yatawa atalaini akali tupamane tano tupanapi, yuu waka tupanapi, utupanena taimane poto, wandakali tupa lamawuato, Jisasato wuane piya lo pii lo tawe yainipia.

³⁵ Pii lo tawe yai-kola, wandakali tupamane Jisasa ateanga poto andeaini-pia. Andeai-kola, sипитиса koo tupamane akali okone tepa alu peai-kola, bala mini paliyu, tona puato, Jisasa ateanga mandaka petainga andoto, wandakali utupane-mane yuku yainipia.

³⁶ Yuku yai-kola, lee-mane andeaini akali utupane-mane wandakali utupane lamawuato, Jisasato sипитиса koo tupa pulupa loto, akali okone mo atu yala-kola, yia tupa ipa angini okona peakoto, ipa nalu, omalai leainipia.

³⁷⁻³⁹ Wuane leai-kola, Getasa tane wandakali tupa pitaka-mane yuku-mane omoto, Jisasa nimba nanima tepa alu, puu leainipia. Wuane leai-kola, Jisasa bala sipi okona peakaiyu lo pitiyu, moyale pe-a-kola, akali wamba sипитиса koo atene ateane okomane Jisasa tee loto, namba towa baape leaipia. Baape lea-kola, Jisasato bala lamawuato, nimba peke loto, Goteto nimba moyo mangene piya tupa lo tawe yaape leaipia. Wuane lalu, Jisasa bala sipi okona pitiyu pe-a-kola, akali okone bala tano okona peke loto, Jisasato bala moyo mangene peane tupa wandakali tupa pitaka lamai yiake leaipia.

*Jisasato Wanda Mindi Mo Atu Yalu,
Wana Omene Mindi Mina Ika Leane Oko
Matiyu 9:18-26; Maki 5:21-43*

⁴⁰ Jisasa bala Galili ipa angini okona amo yangi ato epolepoya nembo toto, wandakali kambua-mane bala maliyo ateai-kola, bala peke lea-angi, wandakali utupane pitaka-mane bala wayu epeleya leainipia.

⁴¹⁻⁴² Okone ang, Juta yamenya lotu anda ando atalane akali Jaitusa lene mindina wanane mindiki oko angu ee ana alesa pene oko omoyale peaiapia. Omoyale pe-a-kola, Jaitusa epoto, Jisasa ateanga aiki lekawa tombawua loto, Jisasa-o-o, nimba namba andaka bakale ipu leaipia. Bakale ipu lea-kola, Jisasa bala Jaitusana andaka moyale pe-a-kola, wandakali kambua-mane bala wata awua poto, bala wata tombe pua tongatete leainipia.

⁴³ Ee ana alesa pitakana ole dindi lo kii kalo teke pitiyanie wanda mindi tano okonena peteane tekeko, wandakali mindikipi mindimane katulo balana siki oko mo atu nayainipia.

⁴⁴ Jisasa epo pe-a-kola, wanda okone-mane Jisasana masianga epoto, balana tona okona duninga wata ya-kola, okone ang teke, bala kii kalo pitiyanie alu peaiapia.

⁴⁵ Atu ya-kola, Jisasato wandakali tupa tipa puato, apito nambanga wata alape leaipia. Wuane lea-kola, wandakali bala watama epeaini tupa pitaka-mane namba jia laka peainipia. Jia laka peai-kola, Pitato Jisasa tipa puato, Ando Atalene Akali, wandakali kambua-mane nimba wata tombe pua, tongatete leyai-ko. Anu peakale nimbato wandakali tupa tipa puato, apito nambanga wata alape lelepe leaipia.

⁴⁶ Wuane lea-kola, Jisasato Pitana pii okone yano peyoto, wandakali mindimane nambanga wata ala-kola, nambanga tai-lene minditupa balanga pala-kola, wandakali mindimane nambanga singilisanga wata ala nembo teyo leaipia.

⁴⁷ Wuane lea-kola, wanda okonemane katulo mindinga piti too napulu-peyawa

9

*Jisasato Balana Disaipolo Alesa Tupa Pi-
ape Pulu Pulupa Leane Oko*

Matiyu 10:5-15; Maki 6:7-13

¹ Jisasato balana disaipolo alesa tupa ipulupa lea-kola, utupane epo amunguli peainipia. Amunguli peai-kola, Jisasato wandakali siki pelene tupa mo atu yolane tai-lene okola, sipitisa koo tupa peyo wata olane tai-lene okola, tai-lene okonelapo utupanenga mayaepia.

² Maiyu, utupane-mane wandakali siki pelene tupa mo atu yoto, Goteto pitaka taka ando atalane leakale nembo toto, balato utupane pulupa leaipia.

³ Pulupa loto, balato utupane lamawuato, yakamoto nuupi, munipi, tomopi, okone-taka mindi mandi napene, kalango mindi ai napene, singilisa mindiki angu piyu, pulupape leaipia. *

⁴ Yakamoto tano mindina polai-angi, wandakali mindimane yakama yatawa paleaindo, yakamoto anda mindina pali-pali napene, anda mindiki okonena angu palu atoto, epoko puato, piape pua atalapae.

⁵ Yakamoto tano mindina polai-kola, wandakali tupamane yakamana pii lolai tupa ale naene, yakama yatawa pali na-peaindo, yuu okonena atalaini wandakali yakama tane koo mindi piyama ya lo nembo teakalenga, yakamana sukeenga yuu kangalamu atolane tupa tanda lo tepa alu, yakama yuu waka mindina pulupape.

⁶ Jisasato wuane lea-kola, alesa akali utupane-mane tano tupa pitakana puku puato, Goteno pii layene epene oko wandakali tupa lamaita, wandakali siki pelene tupa mo atu yaka pua ateainipia.

Etoteto Nembo Kambua Teane Oko

Matiyu 14:1-2; Maki 6:14-16

⁷⁻⁹ Jisasato metekolo piape tupa pua atea-kola, wandakali minditupa-mane andoto, potopesa akali Ilainja bala ati kenga atala, yuunga peke loto, piape pua atalua leainipia. Wandakali minditupa-mane Jisasa bala potopesa akali wamba ateaini tupana waka mindi malinga ika loto, piape pua atalua leainipia. Wandakali minditupa-mane ipa peya-maiyane akali Jone bala malinga ika loto, metekolo piape tupa pua atalua leainipia. Wuane leai-kola, Galili disitiki oko ando atalane akali Etoteto pii utupane ale wato, nembo kambua toto, wamba nambato Jonena maa pai lewa-ko. Andipa apito metekolo piape utupane pua ateya-kola, nambato pii temane utupane ale eyope leaipia. Wuane lalu, balato Jisasa andokale nembo teaipia. *

nembo toto, putiti peyoto, Jisasa ateanga epoto, aiki lekawa tombawua leaipia. Wuane piyu, wandakali pitaka-mane alewa atea-kola, wanda okonemane Jisasa lamawuato, siki mindi nambanga paliyakola, nambato nimbana tonanga wata alo okone angi teke, nambana siki okone atu yala leaipia.

⁴⁸ Wuane lea-kola, Jisasato bala lamawuato, wana, nimbato nambanga tungi peyoto, bilipi lele okonena, nambato nimba mo atu eyo-ko. Nimba mini epene palu puu leaipia. *

⁴⁹ Jisasato wuane lo atea-kola teke, akali mindi Jaitusana andaka atala epoto, bala lamawuato, nimba wanane wamba omalako. Tisa oko masia-pene epolane. Peke leakale kondaa.

⁵⁰ Wuane lea-kola, Jisasato balana pii okone ale wato, nimbato nimbana wanane oko dee lapone saka atolo-peke laya olo-peyawako. Nimbato nembo kambua natene, nambanga tungi peyo bilipi lo atape.

⁵¹ Wuane lalu, Jisasa bala wandakali utupane towa atu poto, Jaitusana andaka peakaiyu leainipia. Peakaiyu loto, Pitapi, Jonepi, Jemesapi, wana omeane okona angini ayianepi, utupane angu Jisasa towa atu anda-pango kolandaka loto, Jisasato wandakali waka tupa yakama pitaka kamaka atalapa leaipia.

⁵² Anda pango kolandaka leai-kola, wandakali peteaini tupa pitaka-mane wana omene okone ondowa ai lo yaya peyo yamataka lo peteaini-pia. Wuane peai-kola, Jisasato wandakali utupane lamawuato, wana oko bala oma napene, mee limu paleya-ko. Yakamoto ai nalene kondalapa leaipia.

⁵³ Wana okone omea oko andalu, wandakali peteaini tupamane Jisasana pii okone ale wato, balato kopeta leya nayuto, bala andayo giwa yainipia.

⁵⁴ Giwa yai-kola, Jisasato wana oko kinzinga minuto, wana nimba ika laa lo pii taimane leaipia.

⁵⁵ Ika laa lea-kola, wana omene oko bala lee talu, wamba ini ika lea-kola, Jisasato wandakali peteaini tupa lamawuato, bala ulia neakale maiyapa leaipia.

⁵⁶ Jisasato wana omene okone mina ika lea-kola, wana okona angini, ayiane-lamane andoto, moko andane wete leapi. Moko wete leapi-kola, Jisasato okonelapo lamawuato, nambato wana omene yala oko mina ika leyo oko liyambato wandakali mindikipi mindi lamai na-piyapape leaipia.

*Jisasato Akali Tausene Yau Tupa Tomo
Neakale Mayane Oko*

Matiyu 14:13-21; Maki 6:30-44; Jone 6:1-

13

¹⁰ Matili aposolo akali alesa tupa epo peke loto, utupane-mane piape waka-waka peaini tupa pitaka Jisasa lamai-yainipia. Lamai-yaikola, Jisasato wandakali waka tupa atekale lalu, balana disaipolo tupa angu bala towa atu tano Betesaita lene okona peainipia.

¹¹ Utupane angu peaini tekeko, matili wandakali tupamane Jisasa bala Betesaita tano okona ateya lene ale wato, bala watama epeainipia. Epeai-kola, Jisasato utupane ando wayu epelaiya lalu, Goteto wua puato, pitaka taka ando atalane lo wandakali tupa mana lamaiyu, wandakali siki pelene tupa mo atu yaepia.

¹² Ole lea-kola, disaipolo alesa akali tupa Jisasa ateanga epoto, bala lamawuato, wandakali napalene yuu mindina ateyama-ko. Wandakali utupa tano anjako mindina yandopi, wandakali mindina andaka yandopi, utupanena poto, yakama ulia nolanepi, anda pangulanepi utupane ayia peakalenga, nimbato utupane peakale laa leainipia.

¹³⁻¹⁴ Wuane leai-kola, Jisasato balana disaipolo tupa lamawuato, yakamoto wandakali utupa tomo neakale maiyapa leaipia. Wuane lea-kola, akali angu (5,000) tausene yaupi mindi ateai oko andoto, balana disaipolo tupamane Jisasa lamawuato, nanimanga betesa yau, pisa lapo angu eyama-ko. Wandakali utupa pitaka-mane tomo neakale, nanimato mindisa poto, tomo kamboto, wandakali utupane pitakamane neakale maipe-penepe leainipia. Wuane leai-kola, Jisasato balana disaipolo tupa lamawuato, yakamoto wandakali utupane paiyasa yau-yau lo, amunguli pua peteakale lamaiyapa leaipia.

¹⁵ Balato leane pua, balana disaipolo tupamane wandakali tupa lamai-yaikola, wandakali tupa pitaka yuunga peteaini-pia.

¹⁶ Peteai-kola, Jisasato betesa yau tupapi, pisa lapo okolapopi, utupane moto, ati kenga andaiyu loto, Gote wayu pele loto, tomo utupane konde leaipia. Konde loto, betesa pisa ima utupane wandakali tupa maiyapa loto, balana disaipolo tupanga mayaepia.

¹⁷ Balana disaipolo tupamane tomo utupane wandakali peteaini tupa tale pua mayai-kola, wandakali pitaka-mane no embo yainipia. No embo yai-kola, balana disaipolo tupamane akenane yane tupa moto, basaketa nuu alesa tumbi laya yainipia.

*Pitato Nimba Mesaya Oko Atele Leane
Oko*

Matiyu 16:13-19; Maki 8:27-29

¹⁸ Alu mindi, Jisasa balana disaipolo tupa towa atu atoto, bala angu pote lo ateapia. Pote lo koyo piyu, balato utupane tipa puato, wandakali-mane namba andayo api ateya larainipe leaipia.

¹⁹ Wuane lea-kola, utupane-mane balana pii okone yano peyoto, wandakali minditupa-mane nimba ipa peya-maiyane akali Jone atele laraini leainipia. Wandakali minditupa-mane nimba potopesa akali laraini peke loto atele laraini. Minditupa-mane nimba potopesa akali wamba ateaini utupana waka malinga ika lene mindi atele laraini leainipia. *

²⁰ Wuane leai-kola, Jisasato balana disaipolo tupa lamawuato, utupane-mane wuane laraini tekeko, yakamoto namba api ateya larainipe leaipia. Wuane lea-kola, Pitato balana pii okone yano peyoto, nimba Mesaya Goteto epeakale leane oko atele okoni leaipia. *

*Akalina Iwanane Bala Omalu, Ika
Lolopeya Leane Oko*

Matiyu 16:21-28; Maki 8:31-9:1

²¹⁻²² Wuane lea-kola, Jisasato balana disaipolo tupa lamawuato, matili, ando atalane akali tupapi, pitisa akali kawane tupapi, loo tupana mana andene akali tupapi, utupane pitaka-mane Akalina Iwanane oko bala masia maulai-kola, bala tandaka andane nape-pene guleya leaipia. Akali-mane bala peyo ome lolai-kola, ole tepo penenga Goteto bala malinga ika laya ololopeya-ko. Namba Gotena Mesaya oko ateya lo yakamoto wandakali mindikipi mindi lamaulaini. Jia wete. Jisasato wuane leaipia. *

²³⁻²⁶ Wuane lalu, Jisasato wandakali ateaini tupa pitaka lamawuato, wandakali tupana wenonga atoto, wandakali minditupa-mane nambapi, nambana pii tupapi, utupane bilipi leyo lape-pene yala wato, namba Jisasana yame ata napeyo lolopeyai. Mindimane wuane lola-kola, matili Ayiane Gote okopi, balana enjole epene wete tupapi, utupanena tai-lene oko Akalina Iwanane okonga yola-kola, Akalina Iwanane oko bala epolopeya. Okone angi, balato wandakali okone balana yame ateya lape-pene yala ola-kola, wandakali okone bala katulo Gote towa saka atapowa ata napulu-peyako. Wandakali mindimane yuu okona minditaka eya tupa pitaka mialu, saka atapowa ata napeando, matili balana minditaka utupane pitaka-mane anu puato, bala moyolo-peyape. Wandakali mindi bala nambana yame ateando, namba

* 9:19: Lk 9:7-9 * 9:20: Jo 6:68-69 * 9:21-22: Lk 9:44; 18:31-33

towa yanda piyaini akali tupamane katulo bala peyo ome lolopeyai. Wandakali mindi bala omolowane nembo toto, nambana yame ata napeando, bala epene saka atapowa ata napulu-peya tekeko, wandakali mindi bala nambana yame ateya nembo toto, wandakali-mane bala peyo ome leando, wandakali okone bala saka atapowa atolopeya. Tene okonena, wandakali mindimane namba polowa okona epokale nembo teando, bala tane nembo natene, ole dindi lo kenda-pene balanga epola tupa balana ita malamanda gulo aiyu, namba watama ipupe-pene. *

²⁷ Nambato pii enene mindi yakama langeyo. Wandakali andipa ateyai tupana minditupa wamba ini oma napene andolakola, Goteto pitaka taka moyo ando atolanga andolopeyai leyo leaipia.

*Jisasa Bala Waka Guleane Oko
Matiyu 17:1-13; Maki 9:2-13*

²⁸⁻³² Jisasato pii utupane lo koyo pea-kola, ole kitupasapi mindi peaipia. Pea-kola, matili balato Pita, Jemesa, Jone ima utupane atu aiyu yuu wangiane mindina pote lolo peaipia. Balato pote lo atea-kola, akali tepo utupane yakama limu palu ateainipia. Limu palu atea-kola, Jisasana lee-ingapi tii wete pea-kola, balana tona peane tupa ake wete pea-kola, bala waka guleaipia. Waka gulea wete, Mosesa, Ilainja-la okonelapo ati kenga tii-pene oko towa atu epoto, Jisasa towa atu pii lalawa puato, matili Jisasa bala Jutusaleme poto, omalu, ika lalu, ati kenga polane okona pii lo ateainipia. Pii lalawa pua atea-kola, Pita, Jemesa, Jone ima utupane yakama lee toto andeai-kola, Jisasana tii-pene okopi, lapo akali bala towa atu ateapele okolapopi, utupane andeainipia. *

³³ Akali okonelapo liyamba Jisasa tepa alu, moyale ateapi wete, matili anu pulupeya nembo natene, Pitato Jisasa lamawuato, Ando Atalene Akali, nanima yuu okona ateyama-kola, kuai leya-ko. Nanima tepo akali tupamane aiyakame mindi nimba, mindi Mosesana, mindi Ilainjana, aiyakame tepo pingimakale leaipia.

³⁴ Pitato pii okone lo atea-kola, mole mindi epoto, akali utupane yame peyoto, ombo ya-kola, Pita, Jemesa, Jone ima utupane-mane yukuwa ateainipia.

³⁵ Yukuwa atea-kola, mole okonena tombenesa ato pii mindi leane okomane loto, akali oo ateya oko bala nambana iwanane oko leaipia. Balato nambana piape pingeakale loto, nambato bala ata

lewaneko. Yakamoto balana pii oko ale alapape leaipia. *

³⁶ Wuane lea-kola, Pita, Jemesa, Jone ima utupane-mane Jisasa bala angu ateanga andeaini-pia. Utupane-mane mangene utupane pitaka andeaini tekeko, okone angi teke utupane-mane minditaka lee-mane andeaini tupa wandakali mindikipi mindi lamai napeainipia.

*Jisasato Sipitisa Koo Atene Iwana Mindi
Mo Atu Yane Oko*

Matiyu 17:14-21; Maki 9:14-29

³⁷ Anate-lene Jisasa, Pita, Jemesa, Jone ima, utupane yuu wangiane okone tepa alu, puu nena leai-kola, wandakali kambua amunguli peaini tupamane Jisasa malanda yainipia.

³⁸ Malanda wato, wandakali utupane towa atu ateane akali mindimane pii taimane loto, tisa, nimbato nambana iwanane oko andola leaipia. Bala nambana andopane mindiki oko angu ateya.

³⁹ Sipitisa koo mindimane bala mina duli leya-kola, bala kalae lo apupu teke mandu atalane. Sipitisa koo okonemane iwana oko in tepa naene, balana umbaini minu koyal palane.

⁴⁰ Balato wuane piyane okonena, nambato nimbanda disaipolo tupamane sipitisa koo okone peyo wata alapale lo tee lalo tekeko, utupane-mane sipitisa koo okone katulo peyo wata napiyai leaipia.

⁴¹ Wuane lea-kola, Jisasato utupane lamawuato, wandakali yame koo andipa ateyai tupa yakamoto kuai lo nembo natene, mana koo tupa minuto, Gote lo bilipi leyama nayu na-lalaini lea. Ole aki-tupi namba yakama towa atokale yape. Dee, ole aki-tupinga namba yakama towa atu atoto, yakamana kenda-pene tupa awua ata gukale yape leaipia. Wuane lalu, balato akali okone lamawuato, nimba iwanane oko atu aiyu ipu leaipia.

⁴² Iwana okone epoyale epea-kola, sipitisa koo okomane bala taimane mo malawai loto, yuunga mo lomba tepa ya-kola, bala peango-ngo peya-yene yaepia. Wuane pea-kola, Jisasato sipitisa koo okone laya loto, nimba iwanane oko tepa alu, puu leaipia. Sipitisa koo okone pea-kola, Jisasato iwanane okone mo atu yoto, nimba aiyane towa pulupa leaipia.

^{43a} Jisasato iwanane okone mo atu ya-kola, wandakali pitaka-mane Gotena tai-lene andane oko andoto, moko wete leainipia.

*Akalina Iwanane Bala Omalu, Ika
Lolopeya Lo, Ole Lapone Leane Oko*

Matiyu 17:22-23; Maki 9:30-32

* 9:23-26: Mt 10:32-33,38-39; Lk 12:8-10; 14:27; 17:33; Jo 12:25

* 9:28-32: Lk 9:21-22; 2Pi 1:16-18 * 9:35: Lk 3:18-22

^{43b-44} Jisasato piape kambua andane pea-kola, wandakali pitaka-mane nembo kambua teainipia. Nembo kambua teai-kola, Jisasato balana disaipolo tupa lamawuato, pii nambato leyo utupa yakamato pailo ale wato, wayumane nembo tatawa atalapape. Matili akali mindimane Akalina Iwanane oko ene pituto, akali waka tupana kiinga maluuya leaipia. *

⁴⁵ Jisasato wuane leane tekeko, pii okonena tene oko too pene guleaipia. Tene okonena, utupane-mane tatake wato, balato aki nembo toto, wuane leyape nembo nateaini tekeko, utupane-mane bala tipa puyale yuku yainipia. *

Akali Gene Andane Wete Yene Api Ateyamape Leaini Oko
Matiyu 18:1-5; Maki 9:33-37

⁴⁶ Alu mindi Jisasana disaipolo tupamane nanima disaipolo ateyama tupana akali gene andane wete yene api ateyamape loto, yakama teke-teke pii yanda pua ateainipia. *

⁴⁷ Pii yanda pua ateai-kola, Jisasato utupanera nembo-tene okone andoto, andopane mindi kii minu atu epoto, bala towa atu ateapele-pia.

⁴⁸ Atu atoto, Jisasato balana disaipolo tupa lamawuato, akali mindi bala yakama pitakana pangosa ateando, bala yakamana akali andane wete oko atolopeya leaipia. Wandakali mindimane namba lo nembo toto, andopane okopene mindi moyando, balato namba moyola-kola teke pulupeya. Wandakali mindimane namba moyando, balato namba puu leane Gote oko moyola-kola teke pulupeya leaipia. *

Yakama Towa Yanda Na-piyaini Tupa Yakamana Amene Atolopeya Leane Oko

Maki 9:38-40

⁴⁹ Okone ang, Joneto Jisasa lamawuato, Ando Atalene Akali, nanimato andalamaka, akali mindimane nimbana gene oko loto, sипитиса koo tupa peyo wato atala tekeko, bala nanima towa atu ata na-piyamane. Tene okonena, nanimato bala lamawuato, nimbato Jisasana gene oko loto, sипитиса koo tupa peyo watolene lalama leaipia.

⁵⁰ Joneto wuane lea-kola, Jisasato bala lamawuato, akali mindimane yakama towa yanda pua atu napeando, balato yakama moyalaneko. Akali mindimane piape epene mindi pua ateando, yakamato jia nalene, balato wuane peakale lo ando kondalapa leaipia. *

Jisasa Yatawa Pali Napimakale Leaini Oko

⁵¹⁻⁵² Jisasa bala ati kenga peke lolane oto oko mandaka epea-kola, bala nembo mindiki paliyu, Jutusaleme moyale ato, akali minditupa-mane bala epeya lo lamai-yakale ingane pulupa leaipia. Wuane lea-kola, akali utupane-mane Jisasana tomo nolanepi, anda pangulanepi, utupane mandeke puyale, Samatiya yame tupana tano mindina ingane peainipia.

⁵³ Wuane tekeko, Jisasa balana disaipolo tupa towa tano okonena peakaiyu leai-angi, Samatiya yame wandakali utupane-mane Jisasa bala Jutusaleme moyale epeya nembo toto, bala yatawa pali napimakale leainipia.

⁵⁴ Wuane leai-kola, Jemesa, Jone-la okonelapo Jisasa ateanga poto, bala tipa puato, Akali Andane, wandakali utupane ita-mane teakalenga, nalipto ita tapeta mindi ati kenga ato epeakale lapape leapeleapia. *

⁵⁵ Wuane leapi-kola, Jisasa okonelapo anda-peke lo laiya loto, liyambato wuane lolapele leaipia.

⁵⁶ Wuane lalu, Jisasa balana disaipolo tupa towa yuu okone tepa alu, tano waka mindina peainipia.

Jisasa Wato Minulane Mana Oko
Matiyu 8:19-22

⁵⁷ Jisasa balana disaipolo tupa towa asini peai-kola, akali mindimane bala lamawuato, namba nimbana disaipolo atoto, yuu nimba pole tupa pitakana namba atu bakale leaipia.

⁵⁸ Atu bakale lea-kola, Jisasato bala lamawuato, peango anatope tupana pangulane yuli tomba-yene yalane. Eka tupa paliyaini anda atalane tekeko, Akalina Iwanane oko oto mo, kawa yolane panda mindi naeya leaipia.

⁵⁹ Wuane lalu, Jisasato akali waka mindi lamawuato, nimba namba watama ipu lea-kola, akali okonemane lapeke loto, Akali Andane, nimbana ayiane oko wamba ini bulupane mali piyu, matili namba nimba watama epokale leaipia.

⁶⁰ Wuane lea-kola, Jisasato akali okone lamawuato, wandakali omene gulo atalaini tupamane yakamana yangone omene tupa mali peakale lo ando kondalu, Goteto pitaka taka ato andalane loto, nimbato pii okone lo tawe yolo puu leaipia.

⁶¹ Okone ang teke, akali waka mindimane Jisasa lamawuato, Akali Andane, matili nambato nimba pele okona watama epokale tekeko, wamba ini nimbana yame tupa atalapape lolo pokale dee leaipia. *

* ^{9:43b-44:} Lk 9:21-22 * ^{9:45:} Lk 18:34 * ^{9:46:} Lk 22:24 * ^{9:48:} Mt 10:40 * ^{9:50:} Mt 12:30; Lk 11:23
* ^{9:54:} 2Ki 1:9-16 * ^{9:61:} 1Ki 19:20

⁶² Wuane lea-kola, Jisasato bala lamawuato, wandakali mindimane Gotena piape oko puape, kondowape lo, mini lapo palu ateando, balato Gotena piape oko kuai lo napulu-peya leaipia.

10

Jisasato Paiyasa Yanasanga Lapo Akali Piape Pulu Pulupa Leane Oko

¹ Jisasa bala yuu waka minditupana moyale atoto, yuu utupanena akali lapo-lapo lo wamba ini piape pulu pulupa lokale nembo toto, akali paiyasa yanasanga lapo yapa lo meaipia. *

² Moto, balato utupane lamawuato, eenga tomo kambua mandipe-pene eya tekeko, tomo mandulane wandakali ajanlapo angu ateyai-ko. Ee anduane okomane balana eenga tomo mandulane wandakali minditupa mo tako peakale loto, yakamato bala lo pote lalapape. *

³ Sipisipi andopane gulene piape akali yame yakama poto, peango anatope gulene wandakali tupana tombenenga atoto, piape pua atalapape leyo. *

⁴ Yakamato piape pulu polai-angi, wandakali asininga malanda olai tupamane pii mindi loto, yakama minandi leakale lo yakamato ando konda na-piyapape. Yakamato munipi, nuupi, sukeepi, mindi mandi napene, mee pulupape. *

⁵ Yakamato anda mindina kolandaka lolai-angi, anda okonena paliyaini wandakali tupa lamawuato, yakamato nanimana towu embo olaini. Yakama mini epene palu atalapa lalapape.

⁶⁻⁷ Anda okonena paliyaini wandakali tupamane yakamana pii lolai okone ale wato, mini epene pali napeaindo, mini epene palene pii okone wandakali utupanenga nayene, yakama tanenga peke lolopeya. Wuane tekeko, anda okonena paliyaini wandakali tupamane yakamana pii lolai okone ale wato, mini epene paleaindo, mini epene palene pii okone wandakali utupanenga yolopeya. Yola-kola, yakamato anda mindina pali-pali napene, anda okonena teke paluto, epoko pua piape piyapape. Piape akali mindimane piape puato, katulo balana yole mialane-ko. Wandakali utupane-mane tomo ipapi yakama gulai tupa yakamato nalapape. *

⁸⁻⁹ Yakama tano mindina polai-kola, tano okonena tane wandakali tupamane yakama ipulupa leaindo, yakamato tano okonena wandakali siki pelene tupa mo atu yalapape. Mo atu yalu, yakamato

wandakali utupane lamawuato, Goteto yakama moyolo ipupia lalapape. Yakamato Gotena piape utupane pua atolai-kola, tano okonena tane wandakali tupamane tomo ipapi yakama gulai tupa nalapape. *

¹⁰ Tano mindina tane wandakali tupamane yakama yatawa pali napimakale leaindo, yakamato tano okonena asini tupana atoto, wua lalapape:

¹¹ Goteto yakama moyo ando atolane oto oko ipupia-kola, wamba balato nanimana languato, nambana pii oko wandakali utubanga lamalu pulupa lapia nembo talapape. Yakamato wuane nembo tape-pene tekeko, yakamato Gotena pii oko ale aa napimakale nembo toto, nanimana yatawa pali naheyai. Tene okonena, koo tene mindi yakamanga eya lo andalapale loto, tano okona yuu kangalamu nanimana kenenga ateya tupa nanimato tanda lo tepa alu, nanimana yuu waka mindina peyama lo wandakali utupane lamai-yapape. *

¹² Matili Goteto wandakali tale pulu epola-angi, balato Sotomo tano okona tane wandakali tupa malinga ika laya wato, kenda-pene mindi utupanenga malupeya tekeko, andipa yakama disaipolo tupamane pii mindi lolai-kola, tano mindina wandakali tupamane yakamana pii okone ale naene, yakama yatawa pali napeaindo, Goteto kenda-pene andane wete mindi utupanenga malupeya leyo. *

Yamapane Peke Nalene Wandakali Tupa Koyolo-peyai Leane Oko

Matiyu 11:20-24

¹³⁻¹⁶ Wandakali mindimane yakamana pii oko ale yando, balato nambana pii oko ale ola-kola teke pulupeya. Wandakali mindimane yakama masia geando, namba masia gula-kola teke pulupeya. Wandakali mindimane namba masia geando, namba puu leane Gote oko masia maula-kola teke pulupeya. Jisasato akali paliyasa lapo tupa lamawuato, wuane leaipia. Wuane lalu, balato pii mindi loto, wamba namba Kotasini, Betesaita-la, tano okone-lapona atoto, metekolo piape minditupa pewakola, tano okone-lapona tane wandakali yakama yamapane peke naleaini leaipia. Akali mindimane Taya, Saitone-la, tano okone-lapona atoto, metekolo piape nambato yakamana tano okone-lapona pewa okonepene mindi pea-yale, tano okone-lapona tane wandakali tupamane koo pemaeya nembo teai-yale. Yakamato wuane nembo teai-yale, wamba wete mini kenda wato, yamapane peke leyama lo

* **10:1:** Mk 6:7 * **10:2:** Mt 9:37-38; Jo 4:35-38 * **10:3:** Mt 10:16 * **10:4:** Mt 10:7-14; Mk 6:8-11; Lk 9:3-5 * **10:6-7:**

1Ko 9:4-14; 1Ti 5:17-18 * **10:8-9:** 1Ko 10:27 * **10:11:** Ap 13:51; 18:6 * **10:12:** Jen 19:24-25; Mt 10:15; 11:24

andawa loyale, yakamato tona waka mindipene piyaini tupu puato, pete tenenga pitipiai-yaleko. Yakamato yamapane peke nalene ateyai okonena, yakama koyolopeyai ya lo nembo toto, nambato yakama ondo eyo. Enene, Goteto wandakali tale pula-angi, balato Taya, Saitone-la, tano okone-lapona tane wandakali tupu malinga ika laya wato, kenda-pene mindi utupane maulupeya tekeko, balato kenda-pene andane wete mindi Kotasini, Betesaitala, tano okone-lapona tane wandakali yakamanga gulupeya. Okone angii, Goteto Kapaneame tane yakamana gene oko ati kenga laiyu lolopeyape. Jia. Yakamato namba lo bilipi naleyai lo andoto, balato yakama yuu koo wetete okona awua aindaka lolopeya. Jisasato wuane leaipia.
*

Paiyasa Yanasanga Lapo Akali Peke Leaini Oko

17 Akali paiyasa yanäsanga lapo tupamane poto, Jisasato piape piyapape leane tupu piyu, epele wato, Jisasa ateanga peke leainipia. Peke loto, utupane-mane bala lamawuato, Akali Andane, nanimato nimbanne gene oko loto, sипитиса koo tupamane wataima-kola, sипитиса koo tupamane nanimana pii ale wato, wandakali tupu tepa alu pupiai-leainipia.

18-19 Wuane leai-kola, balato utupane lamawuato, nambato yakama minu tai laya ewa-kola, yakamato etelu gepopi, analika-likapi, okonetaka tupu ango olai-kola, okonetaka mindimane yakama kattulo minu koya napulu-peyai. Yakamato yakama yanda pingiyaini yame tupana tai-lene pitaka sia minulu-peyai. Sипитиса koo tupamane yakamana pii oko ale wato, wandakali tupu awua tepa alu pupiai-angi, yuu tapale kapoyale piyane pua, Satanena tai-lene oko kapoyale koyo pipianga nambato andauwa.
*

20 Sипитиса koo tupamane yakamana pii oko ale apiai nembo toto, yakamato epelewa ateyai tekeko, Goteto yakama ati kenga ipulupale loto, yakamana gene tupu balana bukunga peyoto, yatawa ateyai nembo toto, yakamato epele andane wete alapape. Jisasato wuane leaipia.
*

Jisasato Ayiane Gote Ando Wayu Pele Leane Oko

Matyu 11:25-27; 13:16-17

21 Okone angii, Oli Sипитиса okomane Jisasana yamapane mo epele piya ya-kola, Jisasato pote loto, Ayiane, nimba yuu atila lapotakana Akali Andane atele leaipia.

Wandakali wai-enepi, mana kambua andenepi, utupane-mane nimbanne pii mana epene utupane anda napeakale nembo toto, wamba nimbatu utupane mo too peene. Andipa andopane anjako gulo ateyai wandakali tupamane nimbanne pii mana epene tupu andeakale nembo toto, nimbatu wandakali utupanenga andawa lele. Enene, nimbatu wuane pele okonena, nambato nimba ando wayu pele leyo leaipia.

22 Pote lo koyo piyu, Jisasato akali ateaini tupu lamawuato, minditaka eya tupu pitaka nambato ando atola loto, namba ayiane-mane utupane pitaka nambanga geane leaipia. Wandakali mindi bala tanena tai-lene mindimane Gotena Iwanane oko bala okopene nembo natalane. Jia. Ayiane Gote angu-mane balana iwanane okopene ateya nembo talane. Wandakali mindina tai-lene mindimane Ayiane oko bala okopene nembo natalane. Iwanane okomane angu ayiane oko wandakali mindinga andawa leya-kola, wandakali okonemane ayiane oko bala okopene nembo talane leaipia.
*

23-24 Wuane lalu, Jisasa bala anda-peke loto, balana disaipolo tupu lamawuato, wamba potopesa akalipi, kinjipi, kambua-mane pii andipa yakamato ale eyai tupu ale aimaa laka lo nembo teaini tekeko, utupane-mane ale nayainipia. Utupane-mane minditaka yakamato lee-mane andeyai tupu andaima laka lo nembo teaini tekeko, utupane-mane okonetaka tupu anda naapeaini lo nambato yakama langeyo-ko. Yakamato minditaka lee-mane andeyai oko andoto, epele ape-pene leaipia.

Samatiya Tane Mindimane Juta Tane Mindi Moyane Oko

25 Alu mindi Jisasato mana lamawua atea-kola, loo tupana mana kambua andene akali loya mindi ika loto, Jisasa minu mandeke puato, tisa, namba saka atapowa atokalenga, nambato anu puape leaipia.
*

26 Wuane lea-kola, Jisasato bala tipa puato, Mosesot Gotena loo tupu pepa peyoto, aki leaipiape. Nimbato loo utupane dii lo andoto, aki lalenepe leaipia.

27 Jisasato wuane lea-kola, akali okomane Jisasana pii okone yano peyoto, nimbatu nimbanne Akali Andane Gote oko wayu-mane wetete epelewa yamapane yoto, nimbanne yamapanepi, tandinipi, nembotenepi, tai-lenepi, utupane pitaka bala angu mawua atape. Wuane puato, nimba tane epelewa yamapane yo atalene pua teke, nimbatu nimbanne wandakali yangone tupu

* **10:13-16:** Mt 10:40; Lk 9:48; Jo 5:19-23 * **10:18-19:** Sam 91:13; Mk 16:17-18; Jo 12:31; Lap 12:8-9 * **10:20:** Pl 4:3;
Lap 3:5 * **10:22:** Jo 3:33-35; 10:14-15 * **10:25:** Mt 22:35-40; Lk 18:18 * **10:27:** Lo 6:5; Pit 19:18

epelewa yamapane yo atape layene eya leaipia.*

²⁸ Wuane lea-kola, Jisasato bala lamawuato, nimbato nambana pii lalo tupa tika pua yano pelele. Nimbato mana okone wato minu ateendo, nimba saka atapowa atolopele leaipia.*

²⁹ Wandakali peteaini tupamane loo tupana mana andene akali oko bala akali tikapene mindi ateya nembo teakale nembo toto, balato Jisasa tipa puato, nambana wandakali yangone oko apipe leaipia.

³⁰ Wuane lea-kola, Jisasato balana pii okone yano peyoto, alumindi Juta yame akali mindi Jutusaleme tepa alu, Jetiko tano okona moyale puu nena leaipia. Puu nena lea-kola, pake nene akali minditupana-mane bala minu peyulu, balana tonapi, minditaka awua peane tupa pitaka pake mialu, bala peya-yene yakale lalu, peai-kola, bala asininga omoyale yaepia.

³¹ Omoyale ya-kola, Gotena pitisa piape piyane akali mindi asia okonena epoto, bala andoto, asia peya wanjalu, peai-pia.

³² Pea-kola, akali Lipai yame mindi epoto, bala andoto, wuane pua teke, asia peya wanjalu, peai-pia.

³³ Juta yame akali okonelapo-mane wuane peapi-kola, matili Samatiya yame akali mindi asia okonena epoto, Juta yame akali peyapijane yane okone andoto, ondo yaepia.

³⁴ Ondo wato, akali peyapijane yane organe mandaka poto, balana umbaini pai leaini tupana tundupa epeane tupa kunu apoto, welepi, waenepi, minditupa matasini gulo ayia mawuato, tongo pima-yaepia. Wuane piyu, balato akali okone minaiyu loto, balana yia dongi okona masianenga yakale mandiyu poto, pasindia anda mindina yatawa paleaipia.

³⁵ Anate-lene Samatiya yame akali okomane pasindia anda ando atalane akali oko muni silipa-mane waa-pene lapo mawuato, nimbato akali oko pailo ando yatawa atape leaipia. Muni nimbato nimba geyo oko koyo pula-kola, nimbana muni minditupana-mane akali oko moyeendo, matili namba peke lolowa-angi, nimbana muni utupane yano peyokale leaipia.

³⁶ Pii kokoli okone lo koyo piyu, Jisasato loo tupana mana andene akali oko tipa puato, pake nene akali tupamane akali peleaini okone asini okonena peya-yene yakola, akali tepo asininga epeaini utupanena akali andoko-mane balana amene gulea yalua nembo telepe leaipia.

³⁷ Wuane lea-kola, loo tupana mana andene akali okomane Jisasana pii okone yano peyoto, ondo wato, moyane akali

okone bala akali peya-yene yane okonena yangone gulea yalua leaipia. Wuane lea-kola, Jisasato bala lamawuato, nimbatopi mana okone teke wato minuto, wandakali waka tupana amene guloto, ondowa moyo atape leaipia.

Jisasato Wanda Matiya, Mata-la, Okonelapo Andolo Peane Oko

³⁸ Jisasapi, balana disaipolo tupapi, tano ajako mindina peai-kola, wanda Matato Jisasa lamawuato, nimba namba andaka tomo nolo bakale ipu leaipia. Ipu lea-kola, Jisasa bala Matana andaka poto, peteaipia.

³⁹ Petea-kola, Mata akini Matiya lene okomane Jisasa peteanga mandaka epo peteaipia. Petea-kola, Jisasato Gotena pii minditupa bala lamawua ateaipia.*

⁴⁰ Matiyato Gotena pii Jisasato leane tupa alewa petea-kola, Mata bala angu-mane tomo tupa yango mandeke puato, pii Jisasato leane tupa ale nayaepia. Jia. Piape kambua pulane ya-kola, bala angu-mane anu puato piape utupa pitaka puape lo, nembo kambua teaipia. Wuane nembo toto, balato Jisasa peteanga poto, Akali Andane, namba akini okomane namba moyo naapeya-kola, namba angu-mane piape utupa pitaka peyo oko nimbato anda naapele. Matiyato namba moyakale, nimbato bala lamai leaipia.

⁴¹ Wuane lea-kola, Akali Andane okomane Matana pii leane okone yano peyoto, Mata, Mata, nimbato mangene waka-waka kambua piwa lakae lo nayuto, nembo kambua talene leaipia.

⁴² Matiyato nambana pii alewa peteaya oko mangene epene wete mindi peya-ko. Balato mangene peya okone kondaa lo nimbato lamai napukale. Jia. Nimbatopi mangene epene mindiki okone angu piwa lakae lo petepe-pene guleya.*

11

Yakamoto Pote Lalapape Lo Mana Lamaiyane Oko

Matiyu 6:9-15; 7:7-11

¹ Alumindi Jisasa bala yuu mindinga poto, pote lo ateaipia. Pote lo koyo pea-kola, balana disaipolo mindimane bala lamawuato, Akali Andane, wamba ipa peya-maiyane akali Joneto balana disaipolo tupa mana lamawuato, yakamoto wua loto, pote lalapape leaipia. Andipa nimbato wuane teke puato, pote lolane mana oko nanimu langi leaipia.

² Wuane lea-kola, Jisasato utupane lamawuato, yakamoto pote lolai-angi, wua lalapape: Ayiane, nimbana gene oko tika

pua yakale. Nimbato nanima moyo ando atape.

³Ole dindi lo nanima tomo namakale gi-pe.

⁴Nanimato wandakali waka tupa pitakana koo piyaini tupa apialamane. Wuane pua teke, nimbato nanimana koo piyamanne tupa apia-gipe. Koo tupamane nanima minu makande pulu epolanee, nimbato ando atape. Wuane loto, pote lalapape leaipia.

⁵⁻⁶Wuane lalu, Jisasato utupane lamawuato, nimbanan amene mindi yuu waka mindinga atalu, utulu tombe nimba andaka peakaiyu loto, tomo nokale gii leando, nimbato anu pulu-pelepe leaipia. Nimbanan andaka tomo mindi nayando, nimbato amene waka mindina andaka poto, bala andayo, amene, nambana amene waka mindi tomo nanene, utulu namba andaka epala-kola, tomo neakale maulane mindi namba andaka naeya-ko. Matili nambato nimba yano peyo gukalenga, nimbato betesa tepo namba gii lolopele.

⁷Nimbato wuane lole-kola, balato nimba languato, nambato asia wamba loko peyalu, nambana andopane tupa towa limu paleyama. Namba katulo ika loto, betesa utupane nimba gii napukale-ko. Nimbato namba peya ika halene konda nalolo-peya. Jia. Balana amene okomane tee leya nembo toto, bala ika loto, betesa utupane nimba katulo gulupeya.

⁸Balana amene okomane tee leya nembo toto, balato betesa utupane nimba gii napene konda yando, nimbato betesa gii lo atole-kola teke, matili bala kepa wato, ika lalu, minditaka gii lo atole tupa pitaka nimba katulo gulupeya lo nambato yakama langeyo.

⁹⁻¹⁰Wandakali-mane pote loto, Gote nimbato mangene mindi pipe leyai-kola, Goteto mangene okone piyane. Yakamoto pote loto, Gote nimbato mangene mindi pipe leaindo, Goteto mangene okone pulupeya-ko. Gote nimbato mangene mindi pipe lo pote lalapape. Minditaka ayia pua atalaini wandakali tupa pitakamane minditaka ando moloypeyai-ko. Yakamoto minditaka ayia pua atalapape. Wandakali-mane anda asia lomba peya geao-geao lo atalaini tupa pitakana asia Goteto lumba maiyane. Yakamoto asia lomba peya geao-geao lo ateaindo, Goteto asia lumbulu-peyako. Yakamoto asia lomba peya geao-geao lo atalapape.

¹¹Andopane mindimane balana ayiane lamawuato, pisa mindi nokale gii leando,

ayiane okonemane etelu koo mindi andopane okone malupeyape. Jia, balato etelu koo mindi andopane okone mai napulu-peya.

¹²Andopane mindimane eka apane mindi nokale gii leando, bala ayiane okomane ana lika-likia mindi malupeyape. Jia. Balato ana lika-likia mindi andopane okone mai napulu-peya.

¹³Andopane tupamane minditaka epene mindi gii leaindo, yuu okona ayiane koo tupa yakamato minditaka epene gii lolai okone maiyaini. Wuane pua teke, wandakali mindimane Oli Sipitisa gii leaindo, ayiane ati kenga ateya okomane yuu okona ayiane tupa sia minuto, Oli Sipitisa okone epelewa malupeyape. Jisasato wuane leaipia.

*Belesa-pulu, Jisasa-la, Okonelapo
Matiyu 12:22-30; Maki 3:20-27*

¹⁴Sipitisa koo mindi akali mindinga ateakola, akali okonemane katulo pii naleaipia. Jisasato sipitisa koo okone peyo wateakola, akali okonemane pii leaipia. Jisasato akali okone moy-a-kola, wandakali kambua amunguli pua ateaini tupamane moko wete leainipia.

¹⁵Kambua-mane moko wete leaini tekeko, wandakali yangi-mane pii mindi loto, sipitisa koo tupana akali kawane Belesa-pulu balato Jisasa minu tai laya eya-kola, balato sipitisa koo waka tupa peyo wata alane leainipia. *

¹⁶Wandakali yangi-mane Jisasa minu mandeke puato, Goteto nimba moyo ateya-kola, nimbato piape pilini oko andawa loyale, nimbato ati kenga tawe metekolo piape mindi pula leainipia. *

¹⁷Wuane leai-kola, Jisasato utupane lamawuato, kinji mindikina yame oko yapu lo lapo puato, yakama teke-teke yanda peapindo, utupane koyolo-peya. Dee, wandakali yame anda mindikina paliyaini tupa yapu lo lapo puato, yakama teke-teke yanda peapindo, wandakali yame okone tai ata napulu-peya.

¹⁸Yakamoto pii mindi loto, sipitisa koo tupana akali kawane Belesa-pulu balato namba minu tai laya eya-kola, nambato sipitisa koo tupa peyo watauwa-yale, Satane yame oko yapu lo lapo puato, yakama teke-teke yanda pua atene gulapia-yale. Wuane pipia-yale, anu pua, balana yame tai atapia-yalepe.

¹⁹Belesa-pulu balato namba minu tai laya apia-kola, nambato sipitisa koo tupa peyo watauwa-yale, balato yakamana disaipolo tupa minu tai laya apia-kola, utupane-mane

* **11:15:** Mt 9:34; 10:24-25 * **11:16:** Mt 12:38

sipitisa koo tupa peyo watapia-yale. Yakanama disaipolo utupane-mane jasa gulo atoto, yakamoto pii namba ando lalai tupa kopeta lalai lolopeyai.

²² Akali tai mindimane balana yanda, yandatepi, awua atoto, balana anda oko tane ando ateya-kola, balana minditaka yola tupa pitaka epene yalane. Balana yanda, yandate tupamane bala moyolopeya nembo talane tekeko, matili akali tai wetete mindi epola-angi, balato akali tai okone sia minuto, balana yanda yandatela okonelapo mialu, balana minditaka yola tupa pitaka moto, wandakali waka tupanga tale pua malupeya. Wuane pua teke, Gote tai wetete okomane namba minu tai laya eya-kola, nambato sipitisa tai tupa peyo wata alawane-ko. Goteto yakama moyo ando atolo ipupia nembo talapape. *

²³ Nambana yame ata na-piyaini wandakali tupamane namba yanda pingiyaini. Dee, nambana sipisipi tupa mo amunguli napiyane wandakali tupamane nambana sipisipi tupa mo toko laya alaini. Jisasato wuane leaipia. *

*Sipitisa Koo Mindi Pulu, Peke Leane Oko
Matiyu 12:43-45*

²⁴ Wuane lalu, Jisasato pii mindi tako puu loto, sipitisa koo mindi akali mindinga ateando, akali okone bala kopeta atalane leaipia. Sipitisa koo okonemane akali okone tepa alu poto, oto mo atolane panda mindi ayia puato, wandakali napalene yuu tupana epoko piyane. Ayia pua atoto, oto mo atolane panda mindi ando mia napeando, balato pii mindi loto, anda wamba nambato tepa alu epewa okonena namba lapone peke loto atokale lalane.

²⁵ Wuane lalu, bala anda okonena peke loto andeya-kola, akali okonemane anda okonena kangalamu tupa aki pua apoto, yati pitane epene ateyai yang andalane.

²⁶ Andoto, balato sipitisa koo wetete yanasa lamialu, utupane towa anda okonena peke loto, atalaini. Sipitisa koo kitupasa utupane pitaka akali okonenga ateyai-kola, akali okone bala kopeta wetete atalane. Jisasato wuane leaipia.

Epele Wete Olane Tene Oko

²⁷ Jisasato pii okone lo atea-kola, wandakali kambua epo amunguli peaini utupanena wanda mindimane pii taimane loto, nimba mandu yoto, andu geane wanda okone bala epele ape-pene leaipia. *

²⁸ Wuane lea-kola, Jisasato wanda okonena pii leane okone yano peyoto, enene, namba mandu yane wanda okone bala epelewa peteya tekeko, Gotena pii oko ale

wato, balana mana wato minalaini wandakali tupa epele wetete ape-pene leaipia.

*Metekolo Piape Mindi Pula Leaini Oko
Matiyu 12:38-42; Maki 8:12*

²⁹ Wandakali kambua Jisasa ateanga mandaka wete epeai-kola, balato utupane lamawuato, wandakali yame koo andipa ateyai tupamane namba languato, Goteto nimba moyo ateya-kola, nimbato piape pilini oko andawa loyale, metekolo piape mindi pula lalaini tekeko, nambato metekolo piape mindi andipa napukale. Jia. Wamba Goteto potopesa akali Jona balanga metekolo piape mindi peane okonepene mindiki angu nambato matili pukale. *

³⁰ Wamba Jona balato Gotena pii oko Ninipa tane wandakali tupa lamawua ateakola, utupane-mane balana pii okone ale wato, Goteto pii mindi nanima langeya lo andeaini-pia. Wuane pua teke, Akalina Iwanane okomane Gotena pii oko wandakali andipa ateyai tupa lamaiya-kola, utupane-mane balana pii okone ale wato, Goteto pii mindi nanima langeya lo andape-pene.

³¹⁻³² Wamba Jona bala Gotena pii oko Ninipa tane wandakali tupa lamawua ateakola, utupane-mane ale wato, yamapanne peke leainipia. Andipa Jona sia minene akali mindi epoto, Gotena pii lamawua ateya tekeko, wandakali andipa ateyai tupamane ale wato, yamapanne peke naleyai. Tene okonena, matili Goteto wandakali tale pulu epola-angi, balato Ninipa tane wandakali tupapi, wandakali andipa ateyai tupapi, pitaka malinga ika laya ola-kola, Ninipa tane wandakali tupamane pii kenda-pene minditupa wandakali andipa ateyai tupanga yata olopeyai. Wamba kuwini wanda mindimane Simba yuu oko ando peteane-angi, wandakali-mane kinji Solomone bala mana andene akali mindi ateya leainipia. Wuane leai-kola, kuwini wanda okonemane balana pii ale wakale nembo toto, Simba yuu oko tepa alu, asia luu wete mindina pea-kola, kinji Solomoneto Gotena pii oko bala lamaiyaepia. Andipa kinji Solomone sia minene akali mindi epo ateya tekeko, wandakali andipa ateyai tupamane balana pii oko ale aa na-piyaini. Tene okonena, matili Goteto wandakali tupa pitaka malinga ika laya wato, utupane yapa lo tale pulangai, kuwini wanda okonemane koo tene minditupa wandakali andipa ateyai tupanga yata olopeya. Jisasato wuane leaipia. *

* 11:20-22: Kol 2:15 * 11:23: Lk 9:50 * 11:27: Lk 1:28,42-44,46-50 * 11:29: Mt 16:4 * 11:31-32: Jon 3:5-10;

*Nimba Undupi Pangosa Atolene, Tika
Ando Atape Leane Oko
Matyu 5:15; 6:22-23*

³³ Wuane lalu, Jisasato pii mindi tako pua loto, wandakali mindikipi mindimane lamu mindi kayuto, sisopene mindimane lamu okone ombo wato, too na-piyaini leaipia. Dee, wandakali mindikipi mindimane lamu mindi kayuto, waka mindisa too na-piyaini teke. Jia. Lamu okone tii pula-kola, andaka kolandaka lolai wandakali tupamane kuai lo andeakale nembo toto, wandakali-mane lamu mindi kayuto, tokonga yata alaini.*

³⁴ Nimbana lee oko nimbana umbaini okona lamu gulo tii piyane. Nimbana lee koo guleando, nimbato minditaka mindi kuai lo anda napulupele. Wuane tekeko, nimbana lee kuai lo wete teando, nimbato minditaka mindi kuai lo wete andolopele.

³⁵⁻³⁶ Lamu mindimane kuai lo wete teyakola, nimbato kuai lo andelene pua teke, nimbana lee kuai lo wete teando, nimbato minditaka mindi kuai lo wete andolopeleko. Tii pene Goteto nimba giyane oko nimbato kuai lo anda napeendo, nimba undupi pangosa atene gulo atolene. Tika ando atape. Jisasato wuane leaipia.

*Yakamoto Mana Koo Utupa Wato Mina
Na-piyapape Leane Oko*

*Matyu 23:1-36; Maki 12:38-40; Luku
20:45-47*

³⁷ Jisasato pii lo koyo pea-kola, Patasai mindimane Jisasa bala tomo nolo bakale ipu leaipia. Ipu lea-kola, Jisasa bala Patasai okonena andaka kolandaka loto, tomo noyale, toko mindina peteaipia.

³⁸ Jisasato tomo noyale balana kii wasa-wasa peya napene petea-kola, Patasai okonemane andoto, nembo kambua teaipia.

³⁹ Nembo kambua tea-kola, Akali Andane okomane Patasai okone lamawuato, kapo pelesapi, pangosa kalato atene eya-kola, Patasai yame yakamato kenga angu wasa-wasa peyalaini leaipia. Pake maima laka lo nembo talaini mana okopi, mana koo minaima laka lo nembo talaini mana okopi, utupane yakamana ini anda-pangosa eya-kola, yakamato yamapane peke nalene atoto, umbaini kenga angu wasa-wasa peyalaini.

⁴⁰ Yakamato wuane piyaini mana okonemane, yakama tane akali kee ene gulo ateyai. Goteto yakamana umbaini kenga angu waa piyu, yakamana yamapane pangosa waa napene, konda yape. Jia.

⁴¹ Yakama tanena umbaini kenga angu wasa-wasa peya napene, yakamato wandakali jia yo ateyai tupa ondowa moyoto,

tomo pelesa tupanga yalane tupa neakale maiyapape. Maulai-kola, yakamana umbaini, yamapane-la, okonelapo lapotaka kalato nayene atolopeyai.

⁴² Patasai yame yakamato takaepi, palenapi, okonetaka tupa yomo paitasanga tale pua yata wato, yomo mindi Gote opa maiyaini tekeko, yakamato Gote wayumane epele aa na-piyaini. Dee, yakamato wandakali yangone tupa towa mana tika-pene tupa wato mina na-piyaini teke. Yakamato mana epene utupane pitaka wato minapiae-yale, yakamana mana okone katulapia-yale. Wuane tekeko, yakamato mana epene utupane pitaka wato mina na-piyaini okonemane yakama tane koyolo-peyama ya lo nembo talapape.

⁴³ Patasai yame yakama lotu andaka poto, toko bulupane tupana pituyale epele wete alaini. Dee, yakamato wandakali kambua amunguli piyaini ama tupana ateyai-angi, wandakali waka tupamane yakama andoto, akali andane, nimba ani pele lapihai laka lo nembo talaini. Yakama tane angu nembo talaini okonemane yakama tane koyolo-peyama ya lo nembo talapape.

⁴⁴ Wandakali mali wambane mindi yuu-mane ombo atane eya oko anda napene, yuu epenenga peyama nembo toto, wandakali tupamane mee ambe mali okone ango alu, palaini. Wuane pua teke, mana koo minauwa laka lo nembo talaini mana oko Patasai yame yakamana ini anda-pangosa too pitane eya-kola, wandakali tupamane yakamana mana koo utupane anda na-piyaini. Yakamana nembo-tene koo yame tupa mo too peyai okonemane, yakama tane koyolo-peyama ya lo nembo talapape. Jisasato wuane leaipia.

⁴⁵ Wuane lea-kola, loo tupana mana andene akali mindimane balana pii okone yano peyoto, tisa, Patasai tupamane mana koo miniyai lo nimbato pii lamaele-ko. Nanimatopi mana utupane minalamane okonena, nimbato pii lele okone nanima ando lene guleya leaipia.

⁴⁶ Wuane lea-kola, Jisasato loo tupana mana andene akali tupa lamawuato, yakamato wandakali tupa mana lamawuato, loo kambua wetete wayumane wato minalapape lalaini. Wuane loto, yakamato kenda-pene andane minditupa utupanena paitanenga yata maiyai-kola, utupane-mane kenda-pene utupane auwa-yale pitete alaini. Wuane tekeko, yakama tane kenda-pene okonepene tupana aŋako wetepi mindi aimakale lo makande na-piyaini. Mana okomane yakama tane koyolo-peyama ya lo nembo talapape.

* 11:33: Mk 4:21-22; Lk 8:16

⁴⁷⁻⁵¹ Wamba wete wandakali ungi lo ateaini okone angi, Keneto bala amene Epolo oko peyo ome leaipia. Okone angi tewa, loo tupana mana andene akali yakamana yumbane tupamane potopesa akali kambua peyo ome laka peainipia. Matili potopesa akali Sakataya bala lotu anda okona alata toko yane organe mandaka atea-kola, loo tupana mana andene akali yakamana yumbane tupamane balapi peyo ome leainipia. Utupane-mane potopesa akali utupane wayu peyo ome leaini ya lo nembo toto, loo tupana mana andene akali andipa ateyai tupa yakamato potopesa akali utupanena mali tupa yati pimai-yaini. Tene okonena, Goteto yakama languato, yakamana yumbane tupamane potopesa akali kambua peyo ome leaini okonena, tene koo tupa wandakali andipa ateyai tupanga peakale nembo teyo leaipia. Tene koo utupane yakamanga peakale nembo toto, nambato potopesa akalipi, aposolo akalipi, utupanena minditupa wandakali andipa ateya utupanenga peakale lokale. Peakale lolowa-kola, wandakali andipa ateyai utupane-mane potopesa akalipi, aposolo akalipi, utupanena minditupanga kenda-pene andane tupa maiki piyu, minditupu peyo ome lolopeyai. Tene okonena, wandakali andipa ateya tupamane potopesa akali peyo ome leyai okona tene okopi, yakamana yumbane-mane potopesa akali wamba peyo ome leaini okona tene okopi, utupane pitakana tene koo oko wandakali andipa ateyai tupa yakamanga epolopeya lo nambato yakama langyeyo-ko. Yakama tane koyolo-peyama ya lo nembo talapape.

⁵² Loo tupana mana andene akali yame yakama tane mana ini mia napene ato, wandakali waka tupamane mana mia na-peakale teke nembo talaini. Wuane nembo toto, yakamato utupanena mana molane asini oko pai lamai-yalko. Yakama tane koyolo-peyama ya lo nembo talapape.

⁵³⁻⁵⁴ Wuane lalu, Jisasa bala anda okone tepa alu, kamaka pea-kola, loo tupana mana andene akalipi, Patasaiapi, utupane-mane Jisasa towa yataka wete wato, bala kosimi lamakale nembo teainipia. Wuane nembo toto, Jisasa kosimi lolane tene mindi ando moyale, utupane-mane pii kambua balanga tipa peainipia.

12

Waiwa Ando Atalapape Leane Oko

Matiyu 10:26-27

¹⁻³ Wandakali tausene kambua wete amunguli pua atea-kola, wandakali yangone mindi angowa apiape-pene

guleaipia. Angowa apiape-pene gulea-kola, Jisasato balana disaipolo tupa angu wamba ini bulupane lamawuato, wandakali-mane mana andipa too pua miniyai tupa pitaka matili panakame yolopeya leaipia. Pii andipa too pene eya tupa pitaka matili wandakali-mane ale wato, nembo tolopeyai. Wamba yakamato undupi pangosa pii minditupa leaini tekeko, matili nai tola-angi, wandakali-mane pii utupane panakame ale olopeyai. Wamba yakama lumu anda-pangosa wete okona atoto, pii minditupa akatete-mane leaini tekeko, matili wandakali pitaka-mane pii okone ale yakale nembo toto, wandakali mindimane anda tokonga atoto, pii okone taimane lolopeya. Patasai tupamane mana koo minditupa too pua minu atoto teke, owato yakama akali epene gulo atalaini. Palawa yangalaini pauta yisa okomane betesa mo andayalane pua, akali utupanena mana koo okoneman yakama mo lawa pulakola, yakamato utupanena mana koo okone wato minulaini. Tika ando atalapape. Jisasato wuane leaipia. *

Yakamato Gote Angu Yukuwa Atalapape Leane Oko

Matiyu 10:28-31

⁴⁻⁷ Wuane lalu, Jisasato balana disaipolo tupa lamawuato, muni ana lapomane wandakali-mane eka pilipimbi yau kambalaini tekeko, Goteto eka anjako utupanena mindikipi mindi embesa aa napiyane leaipia. Wandakali yakama eka pilipimbi kambua wete sia minuto, lipinga-yale ateyai-kola, Goteto yakamana kawa itini ateya tupa dii lo andalane-ko. Yakama yuku aa na-piyapape. Amene yame, wandakali-mane katulo yakamana umbaini peyo ome lolopeyai tekeko, wuane piyu, utupane-mane katulo mangene waka mindi yakamanga napulu-peyai. Tene okonena, wandakali-mane yakama peyo omolaini nembo toto, yakamato yuku olaini lo nambato yakama langyeyo. Yakamato Goteto angu ando yuku ape-pene tene oko nambato yakama langukale. Balato yakamana umbaini oko peyo ome lalu, katulo yakama yuu koo wetete okona awua aindaka lolopeya-ko. Yakamato bala angu yukuwa atalapape lo nambato yakama langyeyo. *

⁸⁻¹⁰ Wandakali mindimane Akalina Iwanane oko laya-geando, Goteto balana koo okone apia-malupeya tekeko, wandakali mindimane Oli Sipitisa oko laya-geando, Goteto balana koo okone apia-mai napulu-peyai. Wandakali tupana wenonga atoto, wandakali mindimane

* 12:1-3: Lk 8:17 * 12:4-7: Lk 12:23-24; Ap 27:34

namba Jisasana yame ata nepeyo leando, matili Gotena enjoje tupana wenonga atoto, Akalina Iwanane nambato akali oko bala nambana yame ata nepeya lolo-peyawa. Wandakali tupana wenonga atoto, wandakali mindimane namba Jisasa yame ateyoleando, matili enjoje tupana wenonga atoto, Akalina Iwanane nambato akali oko bala nambana yame ateya lolo-peyawa.

¹¹⁻¹² Yakama nambana yame ateyai nembo toto, Juta yame-mane yakama kosimi loyale, yakama andi lo awua poto, utupanena lotu andaka polopeyai. Alumindi tupana utupane-mane yakama andi lo awua poto, gapomane akali andanepi, kinjipi, utupanena wenonga kosimi lolopeyai. Utupane-mane yakama kosimi lolai-angi, Oli Sipitisa okomane yakama mana languato, wua lalapa lolopeya-ko. Utupane-mane yakama kosimi lolai-angi, nanimoto aki loto, utupanena pii okone yano peya-makalepe lo yakamato nembo kambua tolaini. Jisasato wuane leaipia.*

*Mini Napalene Akali Amango Oko Ando
Pii Kokoli Leane Oko*

¹³ Okone angi, wandakali mindimane Jisasa lamawuato, tisa, nambana amene okomane nalipa ayianena paluni tupa tale puato, minditupa namba geakale, nimbato bala lamai leaipia.

¹⁴ Wuane lea-kola, Jisasato bala lamawuato, minditaka liyambana tupa tale piya wakale, apito namba jasa gulo ata leape leaipia.

¹⁵ Wuane lalu, balato wandakali waka tupa lamawuato, wandakali mindimane minditaka kambua yatawa ateando, balana minditaka kambua yolane utupane-mane saka atapowa atene tene oko balanga mai napulu-peyako. Yakamato minditaka kambua miaima laka lo nembo tolaini leaipia.*

¹⁶ Wuane lalu, Jisasato pii kokoli mindi utupane lamawuato, wamba akali amango mindina eenga tomo kambua andayo ateane leaipia.

¹⁷ Tomo kambua andayo atea-kola, balato pii mindi loto, nambana tomo mandu yata olane anda tupa ajako guleya-kola, nambana tomo tupa anu pukalepe leaipia.

¹⁸ Nambana tomo yata alawane anda ajako tupa anguto, anda andane minditupa pukale.

¹⁹ Anda andane tupa piyu, nambana witipi, minditaka epene tupa pitaka anda utupanena mo yata wakale. Nambana minditaka epene utupane mali kambua katulo sia minu yola-kola, namba tane mee oto

atoto, tomo, ipapi, utupane no, mini epene palu atokale leaipia.

²⁰ Akali amango okone bala kuai-lene atokale nembo teane tekeko, Goteto bala lamawuato, andipa utulu nimba omolekola, minditaka kambua nimbato mo yomowa atele tupa apina yolopeyape lo nimbato nembo natene, keewa atele leaipia.

²¹ Wuane pua teke, wandakali mindimane Gotena pii oko ale wato, nemboto mina napene, yuu okona eya tupa angu kambua mo yomowa ateando, bala akali kee ene gulo atolopeya. Jisasato wuane leaipia.*

*Nembo Kambua Tolaini Leane Oko
Matiyu 6:25-34*

²²⁻²⁴ Wuane lalu, Jisasato balana disai polo tupa lamawuato, yakamato eka tupa nembo talapape leaipia. Utupane-mane ee mindi puato, tomo mandu naa na-piayaini. Eka tupana tomo mandu yalaini anda mindi ata napiyane tekeko, Goteto eka utupane tomo neakale maiyane. Wandakali yakamato eka tupa sia minuto, lipinga yale ateyai okonena, Goteto yakamapi tomo nalapale gulupeyaya teke. Goteto yakamana umbaini oko waa puato, saka atekale leane. Balato piape pitete-pene okone wamba ini piyu, andipa tomopi, umbaininga tona pulanepi, utupane pitete naene, yakama giyane-ko. Yakama tane kuai lo atamakale nembo toto, tomo nolanepi, umbaininga tona pulanepi, utupane anu pua mia-makale lo nembo kambua tolaini.

²⁵ Goteto wandakali mindi bala ee ana oko tuma atekale lea-kola, wandakali mindi bala tane oto mindikipi mindi kimbu pua atokale loto, katulo oto mindikipi mindi mo kimbu napulu-peyaya.

²⁶ Yakama tane oto mindikipi mindi katulo mo kimbu napulu-peyai yando, anu peakale yakamato anu puato, tomopi, tonapi, minditaka tupa mia-makale yape lo nembo kambua teyaipe.

²⁷⁻²⁸ Gote lo bilipi leyama nayu na-lalaini wandakali yakamato palawa dini epene yati-pene ateya tupa nembo talapape. Palawa dini tupa andipa angu epene atalane. Anate-lene kapu teya-kola, wandakali-mane palawa utupane yokowa apoto, yangalaini. Utupane angini mindi jia. Palawa dini epene utupane yakama tane yati epene tupa waa na-piayaini. Wuane tekeko, Goteto utupane yati-pene liyakale leya-kola, palawa dini utupanena yati tupamane kinji Solomonena tona epene yati-pene pua ateane tupa sia minalane lo

* **12:11-12:** Mk 13:11; Lk 21:12-15

* **12:15:** 1Ti 6:9-10

* **12:21:** Mt 6:19-21

nambato yakama langeyo. Goteto palawa dini utupanena yati wayumane pimai-yane pua, balato yakamana yati tupa gulupeya.

²⁹⁻³¹ Gotena pii ale naene aitene wandakali tupa pitaka-mane anu puato, tomo ipapi, utupane mia-makale yape lo nembo kambua talaini tekeko, yakamana ayiane ati kenga ateya okomane tomo ipapi yakama nalapale nembo toto gulupeya-ko. Yakamato tomo ipapi, ani tawe namakalepe lo nembo kambua natene, Goteto yakama ando ateakale nembo talapape. Yakamato wuane nembo tolai-kola, Goteto okonetaka tupa pitaka yakama gulupeya. Jisasato wuane leaipia.

Wandakali Tipia Tupa Moyalapape Leane Oko

Matiyu 6:19-21

³²⁻³⁴ Wuane lalu, Jisasato balana disai polo tupa lamawuato, nambana sipisipi yame ajako tupa, yakamana ayiane ati kenga ateya okomane yakama epelewa moyo ando atokale leane leaipia. Wuane leaneko, yakamato yuu okona minditaka eya tupa yamapanne mawua ata napene, yakamana minditaka yolai tupa muni moto, wandakali tipia tupa moyo maiyapape. Yakamato wuane peaindo, ati kenga minditaka epene wete yakamana yolai tupa paua koya napiyane mindina muni yalane pua yolopeya. Minditaka ati kenga yola tupa wandakali-mane katulo pake mia napulu-peyai. Puyapuya-manepi katulo utupane nanolo-peyako. Yakama tane minditaka jia yolane lo yuku naene, yakamana minditaka epene yolane tupa muni moto, wandakali tipia tupa moyo maiyapape. Jisasato wuane leaipia. *

Mandeke Pitawa Atalapape Leane Oko

Matiyu 24:42-44

³⁵⁻³⁸ Wuane lalu, Jisasato pii kokoli mindi loto, akali amango mindi yuu tepanda mindisa wanda waitapu mindi andolo peane leaipia. Matili bala peke loto, asia lombanga peya geao-geao lola-angi, balana piape akali tupamanne asia lumbamakale lo maliyo atalaini. Utulu tombe yandopi, waa loyale pula-kola yandopi, bala peke loto andola-kola, balana piape akali tupa limu pali napene, lamu kayu yatawa, balana piape pimauiwayale mandeke pitawa maliyo ateaini yando, balato akali utupane towa epele olopeya. Epele wato, balato utupanena tomo mandeke puato, nalapa lo maula-kola, piape akali utupane-mane epele wete olopeyai. Wuane pua teke, Akali Andane oko bala epolopeya nembo toto, yakamato mandeke pitawa atalapape. *

³⁹ Anda anduane mindimane andola-kola, pake nalane akali mindi oko angi epolopeya lo andapia-yale, pake nalane akali okonemane balana anda okone keao leakale lo balato ando konda napiopia-yale lo yakamato nembo talapape. *

⁴⁰ Wuane pua teke, yakamato Akalina Iwanane oko naepolo-peya nembo tolai-angi, bala epolo-peyako. Bala epolopeya nembo toto, yakamato mandeke pitawa atalapape. Jisasato wuane leaipia.

Piape Akali Koo, Epene-la, Okone-lapona Pii Kokoli Leane Oko

Matiyu 24:45-51

⁴¹ Jisasato wuane lea-kola, Pitato bala lamawuato, Akali Andane, wandakali pitaka-mane pii kokoli nimbato lele okone ale yakale nembo toto, lelepe. Pee, nanima angu langelepe leaipia.

⁴² Wuane lea-kola, Akali Andane okomane bala lamawuato, akali andane mindi bala yuu tepanda mindinga moyale atoto, balana piape akali mindi lamawuato, nimbato piape akali yangone tupa ando atoto, utupane tomo neakale tale pua maiki pipe lolopeya leaipia.

⁴³⁻⁴⁴ Nimbato pii enene mindi yakama langeyo. Piape ando atalane akali okonemane akali andane okona pii lolane oko ale wato, piape okone kuai lo pua ateando, matili akali andane oko bala peke loto, piape okone andolopeya. Andoto, balato balana piape akali okone lamawuato, nimbato nambana minditaka tupa pitaka ando atola lolopeya. Wuane lola-kola, piape akali epene okone bala epele wete olopeya. *

⁴⁵⁻⁴⁶ Wuane tekeko, piape ando atalane akali okonemane balana akali andane oko ini peke nalolo-peya nembo toto, tomo ipapi, kambua noto, kee aka pua atoto, piape akalipi, piape wandapi, utupane minu peyako pua ateando, okone angi teke balana akali andane oko epolopeya. Akali andane oko epoto, piape akali koo okone peyo watoto, pii tanga lalaini wandakali tupa towa atolo peakale lolopeya.

⁴⁷⁻⁴⁸ Wandakali mindimane minditaka kambua wandakali waka mindi yano maiyando, yano maulane akali okomane matili minditaka kambua wete yano peyo gii lolopeya. Goteto minditaka kambua wandakali mindi maiyando, minditaka kambua molane wandakali okonemane minditaka kambua teke yano peyo Gote maipe-pene. Akali andane mindimane piape mindi pipe-pene eya nembo teyakola, balana piape akali okomane piape oko pulane eya nembo natene, konda yando, akali andane okomane balana

piape akali okone kunju-mane mee teke peyolo-peya. Wuane tekeko, akali andane okomane piape akali mindi lamawuato, nimbato piape oko pii lola-kola, piape akali okonemane piape okone pulane eya nembo toto teke konda yando, akali andane okomane piape akali okone kunju-mane ole kambuangga peyolo-peya. Jisasato wuane leaipia. *

*Jisasato Wandakali Tupa Mo Toko Lolo
Epewane Leane Oko
Matiyu 10:34-36*

⁴⁹ Wuane lalu, Jisasato pii mindi tako pua loto, yuu oko teakale nembo toto, nambato ita lengane peyo tega olo epewane leaipia. Ita okonemane ungi lo yuu oko wamba ini tapia lakae lo nembo teyo-kola, ini taa naapeya.

⁵⁰ Nambato ipa mindi molowa-kola, ita okone katulo tolopeya nembo teyo tekeko, nambato ipa okone wamba ini mia napene atoto, yamapane kenda wete eyo. *

⁵¹ Yuu okona wandakali-mane yanda pua ateyai tupa nambato minu koyo piya oyale epeane lo yakamato nembo teyaipe. Jia. Wandakali yame tupa mo toko laya olo epewane lo nambato yakama langeyo.

⁵²⁻⁵³ Andipapi, matilipi, anda mindikina wandakali yau paliyaini tupana minditupa-mane namba lo bilipi lolai-kola, minditupa-mane namba lo bilipi nalolopeyai. Wandakali utupane yame lapo gulo atoto, namba lo bilipi nalolai wandakali tupamane namba lo bilipi lolai wandakali tupa yanda pimalu-peyai. Iwanane okomane namba lo bilipi lola-kola, ayiane okomane iwanane okone yanda pimalupeya. Ayiane okomane namba lo bilipi lola-kola, iwanane okomane ayiane okone yanda pimalu-peyai. Wuane pua teke, wanane angini-la mindi peya-peya piyu, toko laka pulu-peyapi. Akali mindina wetene okomane akali okonena angini oko towa peya-peya piyu, toko laka pulu-peyapi. Jisasato wuane leaipia. *

*Anu Peakale Yakamato Mangene Goteto
Peya Tupa Nembo Nateyaipe Leane Oko
Matiyu 16:2-3*

⁵⁴ Wandakali kambua amunguli pua atekai-kola, Jisasato utupane lamawuato, nai andaka palanesa-tole mole yoto, yuu undupi lele peya-kola, yakamato kingi epolopeya ya leyai-kola, kingi epalane.

⁵⁵ Ati tundupa pua yapiakoko eya-kola, yakamato andipa panyu pulupeya ya leyai-kola, panyu piyane.

⁵⁶ Yuu okona mangene mindi peya-kolapi, atinga mangene mindi peya-kolapi,

yakamato mangene utupane andoto, wua pulupeya lalaini. Wuane tekeko, andipa Goteto mangene minditupa pua ateya-kola, anu peakale yakamato mangene utupane andoto, anu pulu-peyape lo nanimato nembo nateyama leaipia.

*Wandakali Waka Tupa Towa Pii Lo Tika
Piyapape Leane Oko
Matiyu 5:25-26*

⁵⁷⁻⁵⁹ Yano mindi nimbanga yola-kola, nimbato yano okone peya napene konda eendo, yano anduanie okomane nimba atu jasa atolanga poto, nimba kosimi lola-kola, jasa okomane nimba andi lolopeya. Andi lola-kola, yanda yene tupamane nimba katapusa anda okona andi lo aindaka lolopeyai. Andi latane atoto, nimbanga yano yolane tupa pitaka peyo koyo piyu, matili nimba katapusa anda oko tega alu, polopele. Tene okonena, akali andane mindimane nimba kosimi loyale pula-kola, liyamba lapotaka jasa andolo moyale polapi-angi, balato nimba andi lolane. Bala towa wamba ini pii lo tika piyapape. Wandakali mindimane yakama kosimi loyale peando, balato yakama kosimi lo andi lolane nembo toto, yakamato bala towa wamba ini pii lo tika piyaini. Andipa Goteto yakama kosimi loyale peya-ko. Anu peakale yakamato mana tika-pene tupa wato mina napene, konda yaipe. Jisasato wuane leaipia.

13

*Yamapane Peke Nalolai Wandakali Tupa
Omo-lo-peyai Leane Oko*

¹ Okone angi, wandakali ateaini tupana minditupa-mane pii temane mindi Jisasa lamawuato, wamba Galili disitiki tane wandakali minditupa-mane Gote lo tama puato, sipisipi maputane yango ateaini leainipia. Yango ateai-kola, gapomane akali kawane Pailateto balana ami yanda yene minditupa-mane wandakali utupane peyo ome leakale leaipia. Wuane lea-kola, ami yanda yene utupane-mane wandakali utupane peyo ome lalu, utupanena tundupa oko sipisipi maputane wandakali utupana tundupa towa mina mindiki leai leainipia.

² Wandakali ateaini tupamane pii temane okone Jisasa lamai-yaikola, balato utupane tipa puato, yakamato aki nembo teyaipe leaipia. Galili disitiki tane waka tupa pitaka sia minuto, Galili disitiki tane utupanemanne mana koo wete mindi mineaini oko Goteto andoto, kenda-pene andane okone utupanenga epeakale leane nembo teyaipe. *

* 12:47-48: Jem 4:17 * 12:50: Mk 10:38-39 * 12:52-53: Mai 7:6 * 13:2: Jo 9:2

³ Jia. Goteto wuane napeane tekeko, yakama pitaka yamapane peke naleaindo, yakamapi wuane pua teke omolo-peyai lo nambato yakama langeyo.

⁴ Wamba Silomo okona anda luu kenga wete mindi pili toto, wandakali paiyasanga kitupasa peyo ome leaipia. Wandakali utupane-mane Jutusaleme tane waka tupa pitaka sia minuto, mana koo wete mindi mineaininga andoto, Goteto utupane peyo ome leane lo yakamato nembo teyaipe.

⁵ Jia. Goteto wuane napeane tekeko, yakama pitaka-mane yamapane peke naleaindo, yakamapi wuane pua teke omolo-peyai lo nambato yakama langeyo. Jisasato wuane leaipia.

Ita Dini Lia Napiyane Okona Pii Kokoli Leane Oko

⁶ Wuane lalu, Jisasato pii kokoli mindi loto, akali mindimane balana getepe ee okona poto, ita piki mindi yandeane leaipia. Yandoto, mali dindi lo ita okonena dini liyape lo andolo ipuku pea-kola, ita okonenga dini mindi lia napeaipia.

⁷ Matili mali tepo pea-kola, balato ee ando atalane akali oko lamawuato, akatupi, mali tepo utupanena ita piki okonga dini liyape lo, nambato andolo ipuku pewa-kola, dini mindikipi mindi lia napiyae yako. Anu peakale ita okomane nambana getepe ee oko mo oke yo ateyape. Nimbato ita oko yokowa apia leaipia.*

⁸ Wuane lea-kola, ee ando atalane akali okomane ee anduanne okona pii okone yano peyoto, akali andane, ee ana mindiki oko angu ita oko atekale lo ando kondaa leaipia. Ateakale lo ando kondole-kola, nambato ita okone yuu koyo oma pua, bulmako ii mauwakale.*

⁹ Wuane puluwa-kola, matili ita okona dini katulo liyando, atekale lo ando kondamakale. Dini lia napeando, nimbato ita oko yokowa apola leaipia.

Sambasa Angi Jisasato Wanda Mindi Mo Atu Yane Oko

¹⁰ Sambasa angi Jisasato Juta yamena lotu anda mindina poto, wandakali peteaini tupa pii mana lamawua ateaiapia.

¹¹ Okone angi, sипитса кoo atene wanda mindi lotu anda okonena peteaiapia. Wamba sипитса кoo okonemane wanda okona masiane minuaku pea-kola, bala katulo tika pua atape nayaepia. Siki okone pali-pata petea wete, mali paiyasanga kitupasa peaiapia.

¹² Jisasato wanda okone andoto, ipu lea-kola, wanda okone epeaiapia. Epea-kola,

Jisasato bala lamawuato, wanda, nambato nimbanasiki oko mo atu eyo leaipia.

¹³ Wuane lalu, balana kini wanda okonenga yata ya-kola, wanda okone kapoyale ika lo tika pua atoto, Gote lo tama peaiapia.

¹⁴ Sambasa angi Jisasato wanda okone mo atu yane oko andoto, lotu anda ando atalane akali okomane yataka wato, wandakali tupa lamawuato, ole wataka angu piapipe pua atoto, Sambasa angi mee atapebeneko. Akali mindimane yakamana siki mindi mo atu yakale nembo teaindo, Sambasa angi yakama ipu napene kondalu, piapipe piyamane oto wataka eya tupana mindi ipulupape leaipia.*

¹⁵⁻¹⁶ Wuane lea-kola, Akali Andane okomane balana pii okone yano peyoto, Sambasa angi yakama pitaka-mane yakamana bulumako anda tupana poto, bulumako tupapi, dongi tupapi, utupane ipa neakale tinga loto, yakamato atu na-palainipe leaipia. Wanda oko bala Apatakame yame okona mandiyene tekeko, Sataneto wanda okona masiane minuaku pea-kola, wanda okone bala siki okonemane andi latane gulo peteakale, mali paiyasanga kitupasa peane-ko. Sambasa angi nambato wanda siki oko mo atu naene, bala siki okonemane andi latane gulo peteakale lo ando kondapepe lo yakamato nembo teyaipe. Yakama wandakali koo atoto teke, yangone tupa minakasa oyale, owato yakama wandakali epene gulo ateyai leaipia.*

¹⁷ Wuane lea-kola, bala towa yanda-pene wandakali tupamane balana pii okone ale wato, yala yaini tekeko, wandakali waka tupamane Jisasana piapipe epene tupa pitaka nembo toto, epele wete yainipia.

*Maseta Waini Okona Pii Kokoli Oko
Matiyu 13:31-32; Maki 4:30-32*

¹⁸ Wandakali tupamane epele yai-kola, Jisasato pii kokoli mindi wandakali utupane lamawuato, Goteto wandakali ando atalane piapipe oko anu-pene eyape leaipia. Nimbato piapipe okone aki mindi towa makande puape.

¹⁹ Gotena piapipe okone maseta waini ika lo andyalane okone towa makande pene eya. Wamba akali mindimane maseta waini tupa moto, balana eenga papaka leaipia. Papaka lea-kola, waini utupane poka lo anda yoto, andane ita yale gulo ateyai-kola, eka tupa maseta kembone tupana anda piyaini. Wuane pua teke, Goteto wamba ini bulupane wandakali ajjalapo minditupa angu ando atoto, piapipe pua ateyai-kola, matili balana yame tupa andane wete gu-lalaini. Jisasato wuane leaipia.

* 13:7: Lk 3:8-9

* 13:8: 2Pi 3:8-9,15

* 13:14: Ek 20:9-10; Lo 5:13-14

* 13:15-16: Lk 14:5

Palawa Yangalaini Pauta Okona Pii Kokoli Oko

Matiyu 13:33

²⁰ Wuane lalu, Jisasato pii kokoli waka mindi loto, Goteto wandakali ando atalane piape oko aki mindi towa mandeke puape leaipia.

²¹ Gotena piape okone palawa yangalaini pauta oko towa makande pene eya. Wamba wanda mindimane palawa yangoyale, palawa kapo tepo disa andane mindina tepa wato, palawa yangalaini pauta anjalapo mindi palawa okone towa mina mindiki leaipia. Mina mindiki lea-kola, pauta anjalapo okonemane palawa okone mo andayaepia.

Anda Asia Lomba Ajako Okona Kolan-daka Lalapape Leane Oko

Matiyu 7:13-14,21-23

²² Jisasa bala Jutusaleme moyale ato, tano anjakopi, andanepi, utupanena wandakali tupa mana lamaikí pima peapipia.

²³⁻²⁸ Mana lamaikí pea-kola, Juta yamena akali mindimane bala tipa puato, Akali Andane, matili Goteto wandakali tale pulu epola-angi, balato wandakali anjalapo angu molo-peke lolopeyape leaipia. Wuane lea-kola, Jisasato utupane lamawuato, matili anda anduane okomane ika loto, balana anda okona asia pili lola-kola, wandakali kambua takita atolopeyai leaipia. Yakamato takita atoto, anda asia lomba peya geao-geao loto, bala lamawuato, Akali Andane, nanima andaka ipumakale. Nimbato asia lumba-kae lolopeyai. Yakamoto wuane lolai-kola, anda anduane okomane yakamana pii lolai okone yano peyoto, nambato yakama anda na-peyawane. Yakama ani tanepi. Koo piyaini wandakali yakama pitaka namba ateyonga naepene, pulupa lolopeyai. Wuane lola-kola, yakama balana anda okonena katulo kolandaka nalolopeyai. Okone angi, Apatakamepi, Aisakepi, Jekopopi, potopesa akali tupapi, utupane pitaka Gotena yuu epene okona atolai-kola, yakama takita atoto, utupane andolopeyai. Andoto, yakama utupane towa atu ataima laka lo nembo toto, mini kenda wato, yamatata loto, yakamana ambulini pai lo nolopeyai. Wandakali kambua Gotena yuu epene okona asia lomba anjako okona kolandaka lamakale lo mandeke

pulupeyai tekeko, Goteto jia lola-kola, utupane takita atolopeyai. Kenda-pene okone yakamanga epolane nemboto, Gotena yuu epene okona asia lomba anjako okonena wamba ini kolandaka loyale taimane mandeke pua atalapape leyo. *

²⁹⁻³⁰ Andipa akali minditupa gene yene gulo ateyai-kola, yuu waka tane wandakali tupa gene nayene gulo ateyai tekeko, matili wandakali minditupa yuu waka-waka tupa pitakana atoto, Gotena yuu epene okona epoto, tomo no pitulu-peyai. Okone angi, utupane gene yene atolai-kola, wandakali andipa gene yene gulo ateyai tupana minditupa gene nayene atolopeyai. Jisasato wuane leaipia. *

Jisasato Jutusaleme Tane Wandakali Tupa Ondo Yane Oko

Matiyu 23:37-39

³¹ Ole okone angi teke, akali Patasai minditupa Jisasa ateanga epoto, akali Etoteto nimba peyo ome loyale peya-ko. Nimba yuu oko tepa alu, yuu waka mindisa puu leainipia.

³²⁻³³ Wuane leai-kola, Jisasato utupane lamawuato, yakama poto, langa-langa piyane peango anatope gulene akali okone lamawuato, wua lalapape: Wamba potopisa akali tupa yuu waka tupana ataka peai-kola, wandakali-mane utupane peyo ome laka napeainipia. Jia. Jutusaleme tano okona ataka peai-kola, wandakali-mane utupane peyo ome laka peainipia. Tene okonena, namba Jutusaleme atolowa-kola, utupane-mane namba peleakale nembo toto, andipapi, anatipi, namba Jutusaleme epoyele epeyo. Sipitisa koo tupa peyo wataka, wandakali siki pelene tupa mo atu yaka pima pulu, ole teponena namba Jutusaleme ipapowa epoto, nambana piape oko pikoyo pukale lala lo yakamoto Etote lamai-yapape leaipia.

³⁴ Wuane lalu, Jisasato pii waka mindi loto, akatupi, Goteto pii akali minditupa Jutusaleme yuu okona epeakale lea-kola, Jutusaleme tane wandakali yakamoto akali utupane ana-mane peya, potopesa akali tupa peyo ome laa, peaini leaipia. Eka angini-mane balana andopane tupa papakane pangosa yapu lo ombo alane pua, nambato ole kambuang Jutusaleme tane wandakali yakama mo amunguli puato, ando atokale nembo tewa tekeko, yakamoto jia leai.

³⁵ Tene okonena, andipa ato tewa yakama tane yakamana anda öko ando atalapale loto, nambato yakama tepa alu pokale. Polowa-kola, yakamoto namba anda napene atolopeyai lo nambato yakama

* **13:23-28:** Mt 8:11-12; 25:10-12; Sam 6:8

* **13:29-30:** Sam 107:3; Mt 19:30

langeyo. Matili yakamato pii mindi loto, Goteto akali epeya oko moyo atekale lolai-angi, yakamato namba dee lapone andolopeyai. Jisasato wuane leaipia.

14

Jisasato Akali Mindina Umbaini Mo Atu Yane Oko

¹ Sambasa angi Jisasa bala Patasai akali kawane mindina andaka tomo nolo peakola, Patasai minditupa anda okonena atoto, Jisasato aki peyape lo andatawa peteaini-pia.

² Ole okone angi, akali umbaini andayo koyene mindi Jisasa peteane mandaka ongane peteaiapia.

³ Petea-kola, Jisasato loo tupana mana andene akali tupapi, Patasai tupapi, utupane tipa puato, Gotena loo okomane aki leyape. Sambasa angi mindimane wandakali siki pelene mindi mo atu yando, okone katupe, jiape leaipia. *

⁴ Wuane lea-kola, utupane-mane balana pii okone yano peyoto, pii mindi lapeke naleainipia. Lapeke naleai-kola, Jisasato akali okone mo atu yalu, nimba puu leaipia.

⁵ Akali okone mo atu yalu, Jisasato Patasai tupa tipa puato, Sambasa angi yakamana iwanane yandopi, yia bulamakao yandopi, mindi ipa yuli tomba-yene mindina ayia peyola-kola, yakamato bala omeakale lo ando kondolo-peyaipe. Pee, yakamato bala wamba ini molo-peyaipe leaipia. *

⁶ Wuane lea-kola, akali utupane-mane Sambasa angi yakama tane piape minditupa piyaini nembo toto, pii mindikipi mindi katulo yano peya naapeainipia.

Yakama Gene Yene Atamakale Nembo Tolaini Leane Oko

⁷ Patasai akali kawane mindina andaka nolo epeaini wandakali tupamane akali andane gene yene pitiyaini toko epene tupana pitima lakae lo nembo tealinga andoto, Jisasato pii mindi utupane lamai-yaepia.

⁸⁻¹¹ Balato pii okone utupane lamawuato, wandakali mindimane bala tanena gene oko layu leando, Goteto bala napinga yale ateakale laya olopeya leaipia. Akali mindi bala gene nayene gulo ateando, Goteto bala lipinga yale ateakale laya olopeya. Akali mindimane tomo andane mindi yangoto, nimba tomo nolo ipu lola-angi, nimba poto, akali andane pitiyaini toko okona peteendo, akali andane gene yene nimba sia minene mindi tomo nolo epolopeya. Epola-kola, akali tomo yangolane anduanie okomane nimba languato, nimba petele toko okonena akali oko peteakale mai lola-kola,

nimba yala andane mindi wato, masianenga wete poto, pitulu-pele. Akali mindimane nimba tomo namakale ipupe lolangi, nimbanan gene andane yakale nayuto, akali andane pitiyaini toko mindina piti napene, toko masianenga yolane mindina pitipe. Pitule-kola, akali nimba ipu lola okomane nimba languato, amene, nimba towa mandaka onga piti lola-kola, nimba towa tomo no pitulaini wandakali tupa pitakana wenonga nimbanan gene andane yolopeya. Jisasato wuane leaipia. *

Wandakali Tipia Tupa Tomo Namakale Iipulupa Lalapape Leane Oko

¹² Wuane lalu, Jisasato akali bala tomo namakale ipu leane oko lamawuato, wua leaipia: Nimbato tomo mindi yangole-angi, nimbanan yamepi, amenepi, tee akalipi, nimba towa epelewa atalaini akali amangopi, utupane tomo namakale ipulupa leendo, matili utupane-mane tomo yango paini nimba gulaini tupa nimbanan yole gulo yolopeya.

¹³⁻¹⁴ Nimbato tomo andane mindi yangoto, wandakali koo tipiapi, kee koopi, lee koopi, utupane tomo namakale ipulupa leendo, utupane-mane nimbanan tomo yango maulene tupa katulo paini yango gii napulu-peyai. Gii napulai-kola, matili Goteto wandakali epene tika-pene tupa malinga ika laya ola-angi, nimbanan tomo yango maulene tupa paini yano peyoto, nimba mo epele aya olopeya-ko. Nimbato tomo andane mindi yangole-angi, wandakali koo tipiapi, kee koopi, lee koopi, utupane lamawuato, tomo namakale ipulupa lape. Jisasato wuane leaipia. *

Tomo Andane Yangeane Okona Pii Kokoli Oko

Matiyu 22:1-10

¹⁵ Tomo no peteaini akali utupanena mindimane pii Jisasato leane okone ale wato, bala andayo, Gotena yuu epene okona atoto, tomo no atolai wandakali tupa mini epene palu atolopeyai leaipia. *

¹⁶ Wuane lea-kola, Jisasato pii kokoli mindi loto, alumindi akali mindimane tomo andane mindi yangokale leane leaipia. Wamba ini akali okonemane tomo nolane wandakali kambua minditupa lamawuato, matili nambato yakama ee lolowa-angi, yakamato tomo nolo ipulupape leaipia.

¹⁷ Matili tomo nolane oto okone epea-angi, balato balana piape akali mindi lamawuato, nimba poto, wandakali utupane lamawuato, tomo tupa pitaka

* **14:3:** Lk 6:9 * **14:5:** Mt 12:11; Lk 13:15-16 * **14:8-11:** Man 25:6-7; Mt 23:12; Lk 18:14 * **14:13-14:** Jo 5:29

* **14:15:** Lk 13:29-30

yango mandeke pitane eya-ko. Yakamato nolo ipulupa lape leaipia.

¹⁸ Tomo yangeane akali okomane leanne pua, balana piape akali okonemane poto, wandakali utupane-mane tomo nolo ipulupa lo lamaiki peaipia. Lاماiki pea-kola, akali mindimane piape akali okone lamawuato, nambato yuu mindi kambauwane oka andolo pupe-pene guleya leaipia. Nambato katulo nimbanan tomo nolo na-epeyoko. Yataka olene lala lape leaipia.

¹⁹ Akali lapone okomane piape akali okone lamawuato, nambato yia bulumako paiyasa kambauwane tupamane nambana piape mindi pingakale mandeke pulu pokale leaipia. Nambato nimbanan tomo nolo na-epeyoko. Yataka olene lala lape leaipia.

²⁰ Akali tepone okomane piape akali okone lamawuato, nambato wanda mindi kee lauwa-ko. Nambato katulo nimbanan tomo nolo naepeyo leaipia.*

²¹⁻²⁴ Akali utupane pitaka-mane wuane leai-kola, piape akali okone peke loto, wandakali utupane pitaka-mane tomo nolo naipumakale lalai loto, balana akali andane oko lamai-yaepia. Lamaiya-kola, anda anduanne okomane yataka wato, balana piape akali okone lamawuato, wandakali wamba ipulupape lewa utupane matilipi nambana tomo oko nanolo-peyai lo nambato nimba langeyo leaipia. Nimba taimane poto, tano okona asini anjakopi, andanepi, utupanena poto, wandakali tipiapi, lee koopi, kee koopi, utupane lamo atu namba andaka ipupe leaipia. Akali Andane okomane wuane lea-kola, piape akali okonemane wandakali utupane lamolo peaipia. Lamo atu epoto, balato anda anduanne okone lamawuato, Akali Andane, nimbato lale pua teke piyo-kola, nimbana anda okona tomo no pitulane panda minditupa mee anana eya leaipia. Piape akali okonemane wuane lea-kola, akali andane okomane bala lamawuato, nambana anda oko tumbi leakalenga, nimbato tano oko tepa alu, asini andane tupapi, ee asini anjako tupapi, utupanena poto, wandakali minditupa ayia puato, lamo atu ipupe leaipia.

Matili Anu Pulu-peyape Lo Nembo Tape-pene Leane Oko

Matiyu 10:37-38

²⁵⁻²⁶ Jisasa bala asia pea-kola, wandakali yame kambua bala pea okona watama epeainipia. Watama epeai-kola, Jisasato anda-peke loto, utupane lamawuato, wandakali mindimane nambana disaipolo atokale nembo teando, matili anu pulu-peyape lo wamba ini wayumane nembo

tape-pene leaipia. Bala nambana disaipolo atola mambele, balana angini ayianepi, wetene andopanepi, amene imalinipi, utupane-mane bala towa pii yanda pulakola, balato namba awua tepa yando, bala katulo nambana disaipolo ata napulu-peya. Dee, bala nambana disaipolo atola mambele, akali mindimane bala peyo ome loyale pula-kola, bala oma napukale nembo toto, namba awua tepa yando, bala katulo nambana disaipolo ata napulu-peya.*

²⁷ Wuane pua teke, wandakali mindimane nambana yame atola mambele, kenda-pene minditupa balanga epoto, balana ita malamanda gulo yola-kola, balato kenda-pene utupane awua, namba watama na-epeando, bala katulo nambana disaipolo ata napulu-peya.

²⁸⁻³⁰ Yakamana mindimane anda andane mindi pukale nembo teando, balato anda okone pikoyo pulane muni oko katulo eyope lo wayumane ini nembo natene, piape okone ika lo pulu-peyape. Jia. Balato wuane napulu-peya. Anda okone pikoyo pulane muni nayando, balato anda kumu ini minalu, anda okone pua apialu, kondolo-peyape. Wuane peando, wandakali waka tupamane akali okone ando lamba loto, akali okonemane anda oko puyale pipia tekeko, katulo pikoyo napeya okonde lolopeyai. Wandakali-mane wuane lolaini nembo toto, nimbato anda mindi pukale nembo teendo, anda okone pikoyo pulane muni oko katulo eya lo wamba ini andoto, piape okone pipe-pene.

³¹⁻³² Dee, ami yanda yene (20,000) tausene paiyasa lapo yatawa atalane kinji mindimane kinji waka mindi yanda pimauwakale loto, asininga epo atokola, kinji mindoko-mane ami yanda yene (10,000) tausene paiyasa mindiki angu yatawa ateando, balato wamba wua lo nembo tape-pene: Nambana ami yanda yene (10,000) tausene paiyasa mindiki okomane ami yanda yene (20,000) tausene paiyasa lapo yatawa atalane kinji oko katulo sia minulu-peyope, sia mina napulu-peyope nembo tape-pene. Balato katulo sia mina napulu-peyo nembo teando, kinji mindoko-mane mandaka gulo naepola-kola teke, ami yanda yene (10,000) tausene paiyasa mindiki yatawa atalane kinji okomane yanda kondapa loto, akali minditupa kinji mindoko towa pii ini lo tika pulu peakale lape-pene. Akali utupane-mane kinji mindoko lamawuato, nanimato aki takai mindi guluma-kola, nimbato nanima towa yanda pi-gii napene kondolape lolopeyai.

* **14:20:** 1Ko 7:29-34 * **14:25-26:** Lk 9:23-26

³³ Wuane pua teke, yakamato yakama minditaka tupa pitaka masia mai napeaindo, yakama katulo nambana disaipolo ata napulu-peyai. Jisasato wuane leaipia.

*Sole Koo Okona Pii Kokoli Oko
Matiyu 5:13; Maki 9:50*

³⁴ Wuane lalu, Jisasato pii mindi tako pua loto, sole-mane tomo mo tende piya alane tekeko, sole minditupa tende napene gule-ando, anu pua, nanimoto sole okone dee lapone mo tende piya olo-peyamape.

³⁵ Sole koo okonepene tupa yuu kanganalamu towa mina mindiki loto, eenga gae lemando, eenga tomo kuai lo ika nalolopeya. Wuane nembo toto, wandakalimane sole koo okonepene tupa mee apialaini. Wandakali ale asia yene tupamane pii okone ale wato, nembo talalape. Jisasato wuane leaipia.

15

*Sipisipi Mindiki Alu Peane Okona Pii Kokoli Oko
Matiyu 18:12-14*

¹ Alu mindi koo piyaini wandakali tupapi, takisa muni malainali akali tupapi, utupane pitaka-mane Jisasato aki leyape lo ale oyale, bala ateanga epeainipia.

² Epeai-kola, loo tupana mana andene akali tupapi, Patasai tupapi, utupane-mane mulu-mulu loto, koo piyaini wandakali tupa epeyai-kola, Jisasato utupane lamawuato, yakama wayu epeyai loto, utupane towa tomo no pitiyane leanipia.*

³⁻⁴ Wuane leai-kola, Jisasato pii kokoli mindi akali utupane lamawuato, yakama mindimane sipisipi (100) wane andete yatawa atola-kola, utupanena mindiki angu alu peando, balato anu pulupeyape leaipia. Balato sipisipi (99) paiyasa pilisanga pilisa tupa yuu mindinga tani no atekale lalu, sipisipi mindiki alu pulane okone ayia pulupeyape.*

⁵⁻⁶ Matili balato sipisipi okone ando moto, mini epene paliyu, sipisipi okone balana paiyangaa ayiu, andaka peke lolopeya. Peke loto, balana yamepi, yuu okonena atalaini wandakali tupapi, utupane pitaka epo amunguli piyapa lolopeya. Epo amunguli pulai-kola, akali okonemane wandakali utupane lamawuato, nambana sipisipi alu pipia oko ayia pua ando moto, awua epeyo-ko. Nanimo pitaka-mane epele ama lolopeya.

⁷ Wuane pua teke, wandakali (99) pailayasa pilisanga pilisa epene tika-pene atalaini utupane mini peke nalape-pene gulo ateyai

lo andoto, enjole ati kenga atalaini tupamane epele alaini tekeko, koo piyane wandalakali mindi bala yamapane peke leyakola, enjole ati kenga atalaini tupamane epele andane wetete alaini lo, nambato yakama langeyo. Jisasato wuane leaipia.

Muni Alu Peane Okona Pii Kokoli Oko

⁸ Wuane lalu, Jisasato pii kokoli waka mindi loto, wanda mindimane muni silipamane waa-pene paiyasa yatawa pitulakola, muni utupanena mindiki alu peando, wanda okonemane anu pulu-peyape leaipia. Balato lamu mindi kayuto, andabangosa kangalamu tupa aki puato, muni okone ayia pua andoto, molopeya.

⁹ Ando moto, balana yamepi, yuu okonema atalaini wandakali tupapi, utupane pitaka epo amunguli piyapa lolopeya. Epo amunguli pulai-kola, wanda okonemane wandakali utupane lamawuato, nambana muni alu pipia oko ayia pua andoto, mialo-ko. Nanimo pitaka-mane epele ama lolopeya.

¹⁰ Wuane pua teke, koo piyane wandalakali mindimane yamapane peke leyakola, enjole ati kenga atalaini tupamane epele alaini lo nambato yakama langeyo leaipia.

Iwana Patane Alu Peane Okona Pii Kokoli Oko

¹¹ Wuane lalu, Jisasato loo tupana mana andene akali tupapi, Patasai tupapi, utupane towa pii kokoli mindi loto, akali mindimane iwana lapo mandeane leaipia.

¹² Matili iwana lapone okomane bala ayiane lamawuato, ayiane, nimbato paluni matili tale puato, namba gukale nembo tele tupa andipa namba tale pua gii leaipia. Wuane lea-kola, ayiane okomane minditaka balana yane tupa iwanane okonelapo tale pua mayaepia.

¹³ Tale pua maya-kola, iwana lapone oko bala ole mindilapo angu yuu okonena atalu, balana minditaka utupane pitaka muni milau, yuu tepanda mindisa poto ateaipia. Yuu okonena atoto, balato mana koo kamibia minaka puato, balana muni tupa pitaka apia koyo peaipia.

¹⁴ Balana muni koyo pea-kola, yuu bala ateane okonena ulia nono andane mindi yaepia. Ulia nono ya-kola, ulia tomo nolanepi, tonu umbaininga pulanepi, utupane balanga jia yaepia.

¹⁵ Jia ya oko andoto, balato yuu okonena tane akali mindina piape pimalu peaipia. Pea-kola, piape anduane okomane iwana okone lamawuato, nimbato nambana yia tupa yuu maliwa mindina tomo mawua yatawa atolo puu leaipia.

* 15:2: Lk 5:30 * 15:3-4: Ese 34:11,16; Lk 19:9-10

¹⁶ Wuane lea-kola, iwana okonemane tupsia imbuni tupa yia tupa neakale mawua ateaipia. Yia tupamane tupsia imbuni tupa no atea-kola, iwana okonemane ulia nono wato, tupsia imbuni utupanena minditupa nokale nembo teane tekeko, wandakali mindimane tupsia imbuni mindi bala neakale mai naapeainipia.

¹⁷ Mai naapeai-kola, balato tika pua nembo toto, namba ayianena piape akali tupa pitaka-mane ulia kambua yatawa no ateyai-kola, namba yuu okona atoto, nonomane omeyo leaipia.

¹⁸ Andipa nambato ika lalu, namba ayiane ateyanga peke loto, bala lamawuato, ayiane, nimbangapi, Gotengapi, nambato mana koo minditupa minauwa lokale.*

¹⁹ Nambato wuane pewa okonena, andipa namba nimbanwa iwanane nalola. Namba nimbanwa piape akali atokale lo nimbando ando kondaa lokale leaipia.

²⁰ Wuane lalu, iwana okone ika loto, bala ayiane ateanga moyale peane tekeko, bala asininga wene amonga-yale epea-kola, balana ayiane okomane balana iwanane oko epeanga andeaipia. Andoto, ayiane okonemane ondo wete wato, taimane poto, iwanane okone bulu ope loto, nunu leaipia.

²¹ Wuane pea-kola, iwana okonemane balana ayiane oko lamawuato, ayiane, nimbangapi, Gotengapi, nambato mana koo minditupa minauwa-ko. Nimbanwa namba nimbanwa iwanane nalola leaipia.

²²⁻²⁴ Balato wuane leane tekeko, ayiane okonemane balana piape akali tupa lamawuato, wamba nambana iwanane oko omala taka alu peane tekeko, andipa bala saka atolo-peke leya-kola, nanimato bala andeyama. Tene okonena, yakama taimane poto, tona luu epene wete mindi yolopeya oko mo awua epoto, balanga pimaiyu, balana kiinga linji mindi pete lamaiyu, balana keenga sukee piya maiyu, piyapa. Bala peke leya okonena, nanimato epele wato, tomo no piti-makalenga, akali mindilapo-mane poto, yia bulumako andopane andane-yale mindi atapia oko atu epoto, peyo yangalapa leaipia. Wuane lea-kola, utupane-mane tomo yango no, epelewa peteaini-pia.*

²⁵ Utupane-mane epelewa peteai-kola, akali okonena iwanane bulupane oko bala eenga atalu, anda okona mandaka epoto ale ya-kola, wandakali kambua-mane musiki peyo, danisa lo ateaiko ale yaepia.

²⁶ Ale wato, balato piape akali mindi ipu loto, wandakali utupane-mane aki pua ateyaipe lo tipa peaipia.

²⁷ Tipa pea-kola, piape akali okonemane bala lamawuato, nimbanwa amene piako

sikipi mindi mia napene, peke lala-kola, nimba ayiane-mane epele wato, yia bulumako andopane andane-yale mindi atapia oko peyo yawala leaipia.

²⁸ Wuane lea-kola, iwana bulupane okomane yataka andane wetete wato, anda okonena kolandaka na-lokale nembo toto, bala kamaka ateaipia. Kamaka atea-kola, balana ayiane okomane kamaka poto, bala mo epele oyale, iwana nimba andaka ipu leaipia.

²⁹ Wuane lea-kola, iwana bulupane okomane lapeke loto, mali ana kambua namba nimbanwa piape akali gulo atoto, ole mindikipi mindi nambato nimbanwa pii tanga nalewa leaipia. Nambato nimbanwa pii tanga nalewa tekeko, namba towa epelewa atalamane akali tupa towa epelewa tomo no pitiyapa lo, nimbanwa meme andopane mindi namba gii naapee.

³⁰ Wuane tekeko, nimbanwa iwanane lapone okomane nimbanwa minditaka tupa pitaka pasindia wanda tupanga koyo piyu, peke lala-kola, nimbanwa bulumako andopane andane-yale mindi atapia oko peyo yawa-maili ya okonde leaipia.

³¹ Wuane lea-kola, ayiane okomane bala lamawuato, iwana, nimba namba towa ole dindi lo atu ataya leaipia. Nimbana minditaka eya tupa pitaka nimbanwa angu eya-ko.

³² Nimbana amene oko bala omala taka alu peane tekeko, andipa bala saka atolo-peke leya-kola, nanimato bala andeyama. Wuane, nanimato epelewa, tomo no pitipelewa leane lo Jisasato pii kokoli okone leaipia.

16

Minditaka Yatawa Ando Atolane Okona Pii Kokoli Oko

¹ Wuane lalu, Jisasato pii kokoli mindi balana disaipolo tupa lamawuato, wamba akali pusapai mindimane amango mindina minditaka yane tupa yatawa ando ateani leaipia. Yatawa ando atea-kola, akali minditupa epoto, amango oko lamawuato, nimbanwa piape akali okomane nimbanwa minditaka yatawa ando atapia tupa mo ole pima epoko peya leainipia.

² Wuane lea-kola, amango okomane balana pusapai oko epeakale loto, nimbanwa nimbanwa minditaka tupa mo ole pima epoko pua atele leya-kola, nambato ale eyo okonde leaipia. Nimbanwa wuane pipini okonena, nimbanwa nambana minditaka tupa yatawa ando atu gii napula-ko. Andipa nimba poto, nambana minditaka nimbanwa yatawa ando atapi tupa dii loto, oko tuma eya lo, pepa mindina peyo yatape leaipia.

* 15:18: Sam 51:4 * 15:22-24: Ep 2:1,5-7

³ Wuane lea-kola, minditaka ando atalane akali pusapai okomane wua lo nembo teaipia: Nambato balana minditaka tupa yatawa ando ata napula loto, nambana akali amango okomane namba peyo wateya. Nambato sapolo awuato, piape mindi katulo napulu-peyo yako. Andipa nambato anu pukale yape. Nambato mindi akalinga tomopi, munipi, minditaka mee giyapa lo tee lewando, yala pulupeya yako.

⁴ Matili amango okomane namba languato, piape kondalu puu lola-angi, wandakali minditupa-mane namba yakama andaika ipu leakalenga, andipa nambato utupane moyo, mangene mindi pukale nembo teaipia.

⁵ Wuane nembo toto, balato amango okona yano atene akali tupa pitaka mindiki-mindiki lo epeakale leaipia. Akali mindi ini epea-kola, balato akali okone tipa puato, nambana amango okona yano akitu nimbinga eyape leaipia.

⁶ Wuane lea-kola, akali okonemane loto, wele piti-pata jatamu pene (100) wane andete yano nambanga eya leaipia. Wuane lea-kola, minditaka yatawa ando atalane akali okomane yano meane akali oko lamawuato, andipa nimbinga yano pepa oko wamba ini moto, toko mindina pituto, wele piti-pata jatamu (50) paiyasa yau angu nambanga yano eya lo yano pepa okona peyo yata aa leaipia.

⁷ Yano atene akali lapone oko epea-kola, minditaka ando atalane akali pusapai okomane bala tipa puato, nambana amango okona nimbinga yano aki-tupi eyape leaipia. Wuane lea-kola, akali okonemane tomo witi beke (100) wane andete nambanga yano eya leaipia. Wuane lea-kola, minditaka yatawa ando atalane akali okomane yano meane akali oko lamawuato, andipa nimbinga yano pepa oko moto, tomo witi beke (80) paiyasa kitupasa angu nambanga yano eya lo yano pepa okona peyo yata aa leaipia.

⁸ Wuane pua teke, aitene wandakali tupamane wai-ene gulo atoto, Gotena mana epene tii-pene wato minalaini wandakali tupa sia minuto, aitene wandakali yan-gone tupa langa-langga pimai-yaini. Minditaka ando atalane akali pusapai okomane wai ene gulo, wuane peane oko andoto, amango okomane akali okonena gene oko laiyu loto, nimbatu mangene mindi pele okonena, nimba akali wai-ene wetete atele oko andeyo leaipia.

⁹⁻¹³ Wandakali mindimane minditaka anjako yola tupa kuai lo ando yatawa ateando, balato minditaka andane yola tupa kuai lo ando yatawa atolopeya

teke. Wandakali mindimane minditaka anjako yola tupa kuai lo ando yatawa ata napeando, balato minditaka andane yola tupa kuai lo ando yatawa ata napulu-peye teke. Yakamoto wandakali waka mindina minditaka mindi kuai lo ando yatawa ata napeaindo, apito yakama tanena minditaka yolai tupa ando yatawa atalapa lo yakama gulupeyape. Yakamoto yuu okona tawe muni koo tupa kuai lo ando yatawa ata napeaindo, apito minditaka angini oko yakamoto ando yatawa atalapale lo gulupeyape. Wandakali mindimane akali andane lapona piape peando, balato akali andane mindi epelewa yamapanne yalu, akali andane mindoko towa embo wato, masia malu-peyako. Akali mindimane akali andane lapona piape akali katulo ata napipe-pene. Yakamoto mini lapo palu atoto, Gote muni-la, okonelapo lapotaka yamapanne yoto, piape peaindo, mana okone katu nalolo-peye. Matili yakama omolai-angi, muni ando yatawa atalaini piape okone koyo pulupeya. Okone angi, ati kenga atalane Gote okomane nimba balana yuu epene okona ipu leakale nembo teaindo, andipa yakamoto wandakali yangone tupa epele yakale loto, yuu okona tawe muni tupa tale pua mawua atalapale lo nambato yakama langeyo. Jisasato wuane leaipia. *

Yakamoto Mana Koo Tupa Wato Minalaini Leane Oko

¹⁴ Jisasato wuane lea-kola, Patasai tupamane ale yainipia. Muni angu wayumane epelewa yamapa yoto, utupane-mane Jisasa ando lamba leainipia.

¹⁵ Lamba leai-kola, balato utupane lamawuato, wandakali tupamane yakama akali epene ateyai nembo teakale loto, yakamoto mana minditupa wato minalaini leaipia. Wandakali tupamane yakamana mana utupane epene wete nembo talaini tekeko, Goteto andeya-kola, yakamana ini anda-pangosa mana koo wete tupa tumbi latane ateyia lo andalane. *

¹⁶ Wamba potopesa akali tupa pitakapi, Mosesapi, utupane-mane pii minditupa pepa peleai-kola, akali minditupa-mane pii utupane wandakali tupa lamawua atama ipulu, ipa peye-maiyane akali Jone oko bala epeane gii okona giau leainipia. Jone epoto, Goteto pitaka taka ando atalane lo pii lamawua ateane okone angi tewa atoto, wandakali pitaka-mane balana pii okone ale wato, Goteto utupane ando ateakale lo taimane atete pima ipulu, oto andipa ateyama okona giau leyai. *

¹⁷ Yuu ati-la lapotaka katulo koyo pulupeya tekeko, Gotena loo utupanena mindikipi mindi koyo napulu-peya.*

*Wetene Peyo Wata Alaini Mana Oko
Matiyu 5:31-32; 19:9; Maki 10:11-12*

¹⁸ Wuane lalu, Jisasato pii mindi tako pua loto, akali mindimane balana wetene wambane oko peyo watoto, wanda waka mindi kee leando, balato wanda lapone kee lolane oko towa pamuku pula-kola pulupeya. Wanda peyo watene mindi pitulakola, akali waka mindimane bala kee leando, balato wanda okone towa pamuku pula-kola pulupeya. Jisasato wuane leaipia.

*Akali Amango Okola, Lasatosa-la,
Okone-lapona Pii Temane Oko*

¹⁹ Wuane lalu, Jisasato pii mindi tako pua loto, wamba akali amango mindi ateane leaipia. Akali okone bala ole dindi lo tona epene muni andane-mane kambene tupa pua atoto, tomo epene tupa naka pua ateaiapia.

²⁰⁻²¹ Tomo popolo-pene minditupa balana toko pangosa tepa aka pea-kola, akali tipia Lasatosa lene mindimane utupane nokale nembo toto, akali amango okona anda asia lomba okona mandaka pitiki peaipia. Pitiki pea-kola, peango tupamane balana tete tupa tande piki peainipia.

²² Matili akali tipia okone omea-kola, enjole tupamane bala auwa ati kenga poto, Apatakame towa atu ateakale leainipia. Amango oko balapi omea-kola, wandakali tupamane bala mali peainipia.

²³ Mali peai-kola, bala yuu koo wetete okona poto, tandaka andane wetete no atoto, andaiyu lea-kola, Lasatosa bala Apatakame towa atu ati kenga ateapinga andeaipia.

²⁴ Andoto, amango okomane pii taimane loto, ayiane Apatakame, nambana ita too atene yuu koo okona atoto, tandaka andane neyo-ko. Nimbato namba ondo wato, Lasatosa balana kii ondenenga ipa tanda puato, nambana ekene angu mo tambo lolo epeakale lamai leaipia.

²⁵ Akali amango okonemane wuane leane tekeko, Apatakameto amango okona pii leane okone yano peyot, iwana, wamba nimba yuu okona atee-angi, nimbato minditaka epene tupa pitaka yatawa atee leaipia. Nimbato utupane pitaka yatawa atee tekeko, Lasatosa bala koo tipia wetete atea oko nembo tolo-peke laa. Andipa Lasatosa bala ati kenga yuu okona ateyakola, Goteto balana mini epene pale laya eya tekeko, nimba tandaka andane wetete no atele-ko.

²⁶ Wandakali minditupa onga atoto, yakama moyolo epolaini nembo toto, Goteto kana andane mindi nanima-la,

yakama-la, tombenenga yakale leane oko eya-kola, nanimato katulo yakama moyolo naepolo-peyama. Dee, yakama katulo nanima ateyama okona naepolo-peyai teke. Apatakameto wuane leaipia.

²⁷⁻²⁸ Wuane lea-kola, amango okomane bala lamawuato, ayiane Apatakame, pii nimbato lele okone enene yando, nambana amene yau atapia tupa matili yuu koo namba tandaka no ateyo okona naepeakalenga, Lasatosa bala wisanisa mindi atoto, nimbana pii oko namba amene utupane lamai-yakalenga, nimbato bala namba ayiane andaka peakale lolape leaipia.

²⁹ Wuane lea-kola, Apatakameto amango oko lamawuato, wamba potopesa akali tuppapi, Mosesapi, utupane-mane Gotena pii leainipia. Nimbana amene tupamane akali utupanena pii ale wato, mini peke lape-pene leaipia.

³⁰ Apatakameto wuane leane tekeko, amango okonemane bala lamawuato, jia, nambana amene tupamane akali utupanena pii leaini tupa ale wato mini peke nalene, mee ateaini ateyai. Wuane tekeko, akali omene mindi malinga ika lalu, utupane atolainga poto, pii lamai-yando, utupane-mane balana pii oko ale wato, mini peke lolopeyai leaipia.

³¹ Wuane lea-kola, Apatakameto bala lamawuato, Mosesapi, potopesa akali tuppapi, utupane-mane pii leai-kola, nimbana amene tupamane akali utupanena pii ale wato teke, bilipi naleai-ko. Akali omene mindi malinga ika loto, Gotena pii oko akali utupane lamaindo, utupane-mane balana pii oko bilipi nalolo-peyai teke. Jisasato wuane leaipia.

17

*Koo Peakale Lo Mo Piya Alaini Mana
Oko*

Matiyu 18:6-7,21-22; Maki 9:42

¹ Wuane lalu, Jisasato balana disaipolo tupa lamawuato, wandakali yangone tupamane mana koo tupa peakale lo mo piya alaini wandakali utupane-mane yole koo wete mindi molopeyai-ko. Utupane ondo wetete ape-pene.

² Tene okonena, andopane oo ateyai utupana mindimane koo mindi peakale loto, wandakali mindimane bala mo piya oyale peando, wandakali minditupa-mane ana andane mindi wandakali okonena manenga andi loto, ipa solewata angini tombenga wete okona awua aindaka lape-pene. Wuane peaindo, wandakali okone bala omoto, andopane okone mo piya

naola-kola, Goteto yole koo wetete yuku-pene mindi wandakali okone mai napulu-peyako.

³ Wandakali waka mindimane koo peakale lo yakamoto bala mo piya olaini, tika ando atalapape. Wandakali yangone mindimane koo mindi peando, nimbato bala laiya loto, wuane napene, kondaa lape. Laiya lole-kola, balato mini peke leando, nimbato balana koo tupa apia-maipe.*

⁴ Oto mindikina, ole yanasanga balato mana koo nimbanga minalu, ole yanasanga teke balato mini peke leando, nimbato ole yanasanga teke balana koo pulane tupa apia-maipe. Jisasato wuane leaipia.

Bilipi Lene Wandakali Okomane Piape Andane Pulupeya Leane Oko

⁵ Akali Andane okomane wuane lea-kola, aposolo akali tupamane bala lamawuato, nimbato namima bilipi oko mo tai laya ape leainipia.

⁶ Wuane leai-kola, Akali Andane okomane utupane lamawuato, yakamana bilipi oko ajako mee komba dini okonepene angu yando, okone katu teke. Yakamoto Gote ajako mee teke bilipi lolai-kola teke, ita oo ateya oko lamawuato, nimba pini towa lopalu poto, solewata tombenenga yandatane ata lapiai-yale, ita okonemane lopalu poto, solewata tombenenga katulo yandatane atapia-yale leaipia.*

Piape Akali Tupana Mana Oko

⁷ Wuane lalu, Jisasato pii mindi tako pua loto, akali mindina piape akali mindimane ee piape peandopi, sipisipi yatawa ateandopi, piape okonetaka pua atalu, matili bala andaka epola-angi, piape anduanne okomane bala lamawuato, nimba epo pituto, tomo yangalo oko wamba ini naa lolopeyape. Jia.

⁸ Piape anduanne okonemane wuane nalolo-peyape. Balato piape akali oko lamawuato, nimba tomo ipapi, matili nolanga, namba ini nokale. Nimbato lapalapa epene mindi mo piyu, tomo ipapi, namba nolane tupa ini mandeke puato, gii lolopeya.

⁹ Piape anduanne okomane lola pua, piape akali okomane pula-kola, piape anduanne okomane bala ando wayu pele lolopeyape. Jia. Balato wayu pele nalolo-peyape.

¹⁰ Wuane pua teke, Goteto yakama langula pua, yakamoto balana piape tupa pitaka pulai-kola, Goteto yakama wayu peyai leakale nembo na-lalapape. Jia. Yakamoto piape pipe-pene yapia tupa angu nanimato pima oko lalapape. Jisasato wuane leaipia.

Jisasato Akali Tapa Paiyasa Tupa Mo Atu Yane Oko

¹¹ Jisasa bala Galili disitiki okona atoto, Jutusaleme moyale, Samatiya disitiki okona asini peaipia.

¹² Poto, bala tano ajako mindina kolanda lea-kola, akali tapa paiyasa-mane bala asini epeanga andoto, amonga-yale ateainipia.

¹³ Amonga atoto, utupane-mane pii taimane loto, Ando Atalene Akali Jisasa, nimbato nanima ondo ape leainipia.*

¹⁴ Ondo ape leai-kola, Jisasato akali tapa utupane lamawuato, pitisa akali tupamane yakamana umbaini tupa andeakale pulupa leaipia. Wuane lea-kola, akali tapa paiyasa utupane pitisa akali tupa ateangga moyale, asini peai-kola, yakama pitakana umbaini tapa peane tupa atu yaepia.*

¹⁵ Atu ya-kola, akali mindiki-mane balana umbaini oko kuai lea oko andoto, bala angu Gotena gene taimane wetete laiyu lama, Jisasa ateanga peke leaipia.

¹⁶ Akali peke leane oko bala Samatiya yame mindi pia. Peke lalu, bala Jisasa ateanga tombawua loto, Jisasa nimbato wayu pili leaipia.

¹⁷⁻¹⁸ Wuane lea-kola, Jisasato wandakali waka ateaini tupa lamawuato, nimbato akali paiyasa tupa pitaka mo atu yalo tekeko, Samatiya yame akali oko bala angu Gotena gene oko laiyu lokale nembo toto, peke lala yako. Juta yame pilisa akali nambato mo atu yalo tupa anu piyaipe leaipia.

¹⁹ Wuane lalu, Jisasato Samatiya yame akali okone lamawuato, nimbato Gote lo bilipi lele nembo toto, Goteto nimba mo atu eya-ko. Nimba ika lalu, puu leaipia.

Akalina Iwanane Bala Panakame Epolopeya Leane Oko

Matiyu 24:23-28,37-41

²⁰⁻²¹ Alumindi Patasai tupamane Jisasa tipa puato, andoko angi Goteto wandakali tupa ando atolo epolo-peyape leainipia. Wuane leai-kola, Jisasato utupanena pii okone yano peyoto, Gote bala yakamana ini anda-pangosa epo atoto, yakama ando ateya-kola, wandakali-mane katulo bala lee-mane anda na-piayainiko. Mindimane Akalina Iwanane bala onga ateya oko andolo ipulupa nalape-pene. Dee bala ambinga ateya oko andolo ipulupa nalape-pene teke leaipia.

²² Wuane lalu, Jisasa balana disaipolo tupa lamawuato, matili yakamoto Akalina Iwanane oko andamakalenga, bali ini ipu-pia laka lo nembo tolopeyai tekeko, bala ini naepolo-peyape leaipia. Ini naepola-kola,

yakamato bala wamba ini anda napulupeyai.

²³⁻²⁴ Yakamoto bala ini andamakale nembo tolai-kola, wandakali minditupamanane yakama languato, Akalina Iwanane oko onga ateya oko andolo maa lolopeyai. Wandakali waka minditupa-mane bala ambinga ateya oko andolo maa lolopeyai tekeko, utupane-mane enene leyai lo yakamoto nembo na-talapape. Jia. Ati tapale oko nai epalanesa ato tewa, tii pima pulu, nai andaka palane ukusane pitaka tii piyoko peya-kola, wandakali pitaka-mane katulo ati tapale okone andalaini. Wuane pua teke, matili Akalina Iwanane oko panakame epola-kola, wandakali pitaka-mane katulo bala epola oko panakame andolopeyai. Tene okonena, wandakali-mane bala onga ateya oko andolo maa leaindopi, bala amokusa ateya oko andolo maa leaindopi, yakamoto utupane watama polaini. Jia.*

²⁵ Wandakali andipa ateyai tupamane wamba ini bala masia maulai-kola, bala tandaka andane nolopeya.

²⁶⁻²⁷ Wamba akali Nowa ateane-angi, wandakali tupamane Gote masia mawuato, akali-mane wanda kee laka, wanda-mane akali puku, wandakali-mane tomo ipapi naka pua atama pulu, Nowa bala sipi andane wete okona kolandaka leane oto okona gian leainipia. Balato sipi okonena kolandaka lea-angi, Goteto ipa andane wetete mindi yuunga atinga lapotakanga ika laya wato, wandakali utupane pitaka peyo peakale peaiapia. Wamba Nowa ateane-angi, Goteto mangene andane okone peane pua teke, matili Akalina Iwanane oko epola-angi, Goteto mangene andane mindi pulupeyai.

²⁸ Wuane pua teke, wamba akali Lote ateane-angi, wandakali-mane Gote masia mawua atoto, ee piki, anda piki, tomo ipapi naka, bisanisa piape piki pua ateainipia.*

²⁹ Utupane-mane wuane piki pua ateaini tekeko, Lote bala Sotomo tano oko tepa alu, peane okone angi, ati kenga ato kingi epalane pua, ita tapeta towa-towa ana itamane too nembeyawewe-pene tupa epo tepa wato, Sotomo tano okonena ateaini wandakali tupa pitaka peyo ome leaipia.

³⁰ Wuane pua teke, matili wandakali tupamane mangene ole dindi lo piki piyaini tupa pua atolai-kola, Akalina Iwanane oko panakame epola-angi, Goteto kenda-pene andane wetete mindi bala lo bilipi nalene wandakali utupanenga yata olopeyai.

³¹⁻³² Yakamoto Lotena wetene oko nembo tolo-peke lalapape. Balato Gotena pii tanga

loto, Sotomo tano okona minditaka yane tupa molo-peke lauwa lakae lo nembo toto, anda-peke leane okonena, bala omeapia. Tene okonena, Akalina Iwanane oko lapone epola-angi, wandakali mindi balana anda okona takita ateando, kenda-pene Lotena wetene okonena epeane oko nembo tolo-peke lape-pene. Okone nembo tolo-peke loto, balana minditaka andaka yolane tupa mokale nembo toto, anda-pangosa kolandaka nalene, mee palaka pupe-pene gulolopeya. Dee, wandakali mindi bala eenga ateando, balana minditaka yolane tupa molo-peke nalene, mee palaka pupe-pene teke.*

³³ Wandakali mindi bala nambana yame ateando, namba towa yanda piyaini akali tupamane katulo bala peyo ome lolopeyai. Wandakali mindi bala omolowane nembo toto, nambana yame ata napeando, bala epene saka atapowa ata napulu-peya. Wandakali mindi bala nambana yame atola mambele, wandakali mindimane bala peyo ome leando, wandakali okone bala epene saka atapowa atolopeya.*

³⁴ Akalina Iwanane oko utulu epeando, akali lapo toko mindikina pangulapi-kola, balato balana yame akali oko lamialu, mindoko paleakale tepa alu polopeya.

³⁵⁻³⁶ Wanda lapo palawa waa puyale witi dini tupa taki lo pitulapi-kola, balato balana yame wanda oko lamialu, mindoko peteakale tepa alu polopeya. [Lapo akali ee piape pua atolapi-kola, balato balana yame akali oko lamialu, mindoko ateakale polopeya.]

³⁷ Jisasato wuane lea-kola, balana disai polo tupamane bala tipa puato, Akali Andane, aninga ato wuane pulu-peyape leainipia. Wuane lea-kola, Jisasato pii kokoli mindi loto, minditaka omene yuu yolanga, eka ayiawе tupa amunguli pulai-kola, yakamoto andolopeyai leaipia.

18

*Wanda Yalo-la, Jasa Koo-la, Okolapona
Pii Kokoli Oko*

¹ Balana disai polo tupamane kepa naene, ole dindi lo pote leakale nembo toto, Jisasato pii kokoli mindi utupane lamai-yaepia.*

² Pii kokoli okone utupane lamawuato, balato jasa mindi tano mindina ateane leaipia. Jasa okonemanne wandakali yangone tupa moyokale lopi, Gote yuku amawuapi, napiyane akali mindi ateaiapia.

³ Ole kambuangga tano okonena wanda yalo mindi akali jasa okone ateanga puku

* 17:23-24: Mk 13:21-22; Lk 21:8

* 17:28: Jen 18:20; 19:25

* 17:31-32: Mt 24:17-18

* 17:33: Lk 9:23-26

* 18:1: Kol 4:2-4; 1Tes 5:17

puato, bala lamawuato, wandakali mindimane kenda-pene mindi namba geya-ko. Nimbato namba moyo, kenda-pene okone lo tika pingula laka peaipia.

⁴ Wuane laka pea-kola, akali jasa okonemane wanda okonena kenda-pene oko wamba ini lo tika napene, konda yane tekeko, matili jasa okomane wua lo nembo teaipia: Nimbato Gote yuku amawuapi, wandakali moyokale lopi, nembo natalawane.

⁵ Wuane tekeko, ole kambuanga wanda yalo okomane namba ateyonga epoto, kenda-pene namba giki piyane-ko. Balato namba mo kepa piya wetete olane. Nimbato balana kenda-pene okone lo tika pimauwakale nembo teaipia. Jasa okonemane wuane leane lo, Jisasato pii kokoli okone leaipia.

⁶ Akali Andane okomane pii kokoli okone lo koyo piyu, balato pii mindi konda puato, ole kambuanga wanda yalo okonemane namba moyape laka pea-kola, akali jasa koo okonemane wanda yalo okona kenda-pene oko lo tika pukale leane okone yakamato nembo talapape leaipia.

⁷ Ole dindi lo wanda yalo okonemane namba moyape laka peteane pua teke, Gotena yapa lo mene wandakali tupamane utulu otongapi, Gote tipa puato, pote laka pulai-kola, balato utupane moyo napene, ole kambua mee maliyo atolo-peyape. Jia.

⁸ Balato wandakali utupane wamba ini moyolo-peya tekeko, matili Akalina Iwanane oko epoto andola-kola, yuu okona wandakali mindimane bala bilipi lo atolopeyape. Pee, utupane-mane bala bilipi lo atapulu-peyape. Jisasato wuane leaipia.

Takisa Muni Mialane Akali-la, Patasaila, Okone-lapona Pii Kokoli Oko

⁹ Wandakali minditupa-mane yakama tane epene tika-pene ateyama nembo toto, wandakali waka tupa pitaka koo ya lo anda napi leai-kola, Jisasato pii kokoli mindi utupane lamayaepia.

¹⁰ Pii kokoli okone loto, lapo akali lotu anda andane okona pote lolo peapele leaipia. Akali okone-lapona mindimane takisa muni mialaepia. Akali mindoko bala Patasai mindi ateaipia.

¹¹ Patasai okonemane lotu anda okona atoto, nembo-mane pote loto, takisa muni mialane akali okomane mana koo minalane leaipia. Wandakali minditupa-mane minditaka pake nalaini. Minditupa-mane minditaka eya tupana kambua miauwa lakae lo nembo talaini. Minditupa-mane Gotena loo waka tupa ango alaini. Wandakali utupane pitaka-mane mana koo

minalaini pua nambato mina na-piyawane okonena, nambato Gote nimba ando wayu pele leyo.

¹² Satete dindi lo ole kambuanga nambato nimba nembo toto, tomo nanene kondalu, pote angu lo atalawane. Nimbato muni yandopi, waka minditaka yandopi, paiyasa mewando, utupane tale puato, pilisa namba tane mialu, paiyane oko nimba giyawane lo pote leaipia. *

¹³ Patasai okonemane wuane lo pote leane tekeko, takisa muni mialane akali okone bala aja amonga-yale atoto, mini kenda wato, andaiyu nalene, pote loto, nimbato mana koo minalawane-ko. Gote nimbato namba ondo ape leaipia.

¹⁴ Jisasato pii kokoli okone lo koyo piyu, pii mindi tako pua loto, wandakali mindimane bala tanena gene oko laiyu leando, Goteto wandakali okone nappinga yale ateakale laya alane leaipia. Patasai okomane mana koo mindi mina na-piyawane lo pote lea-kola, Gotena wenonga, Patasai okone bala akali tika-pene mindi ata neape. Wandakali mindi bala nappinga yale ateando, Goteto akali okone bala lipinga yale ateakale lalane. Takisa mialane akali okomane mana koo minalawane lo pote lea-kola, Gotena wenonga akali okone bala akali tika-pene mindi atoto, andaka pea. Jisasato wuane leaipia. *

Andopane Tupa Epeakale Lo Ando Kondalapa Leane Oko

Matiyu 19:13-15; Maki 10:13-16

¹⁵ Alumindi Jisasato andopane tupanga kii yata yakale nembo toto, wandakali-mane andopane kambolo tupa awua epeakola, balana disaipolo tupamane andoto, wandakali utupane laiya loto, andopane kambolo tupa atu aiyu naepene, kondalapa leainipia.

¹⁶⁻¹⁷ Wuane leai-kola, Jisasato andopane tupa epeakale loto, balana disaipolo tupa lamawuato, Goteto andopane oo ateyai okopene gulene wandakali tupa moyo ando atalane-ko leaipia. Yakamato andopane utupa minandi nalene, namba ateyonga epeakale lo ando kondalapa. Goteto utupane moyo ando ateakale nembo toto, andopane tupamane bala wuane peakale lo ando konda alaini. Nimbato pii enene mindi yakama langeyo. Goteto utupane ando ateakale lo andopane tupamane ando kondalaini pua teke, wandakali mindimane bala wuane peakale lo ando konda nayando, bala katulo Gotena yuu epene okona napolo-peya. Jia wete. Jisasato wuane leaipia. *

*Jisasato Akali Amango Mindina Pii
Mindi Yano Peleane Oko
Matiyu 19:16-30; Maki 10:17-31*

¹⁸ Alumindi ando atalane akali amango mindimane Jisasa tipa puato, tisa epene, namba saka atapowa atokalenga, nambato anu puape leaipia.*

¹⁹ Wuane lea-kola, Jisasato bala lamawuato, wandakali mindikipi mindi epene ata naopeya leaipia. Gote bala angu epene ateya-ko. Anu peakale nimbato namba tisa epene lelepe.

²⁰ Nimba tane Gotena loo tupa andele okoni. Wanda akali-la liyambato pake namialapape. Nimbato wandakali yangone mindi peyo ome nalape. Nimbato pake mia napipe. Nimbato wandakali yangone mindi kosimi loto, owato pii nalape. Nimbana angini, ayiane-la okone-lapona pangosa ato, nimbato okone-lapona pii lolapi tupa wato minu atape leaipia.*

²¹ Wuane lea-kola, ando atalane akali okomane bala lamawuato, wamba namba iwana ajakonga atoto, loo utupane pitaka wato minu atama ipulu, andipa ateyama okona giao leyo leaipia.

²² Pii leane okone ale wato, Jisasato bala lamawuato, mana epene mindiki angu nimbato wato mina napilini leaipia. Wandakali waka tupamane nimbana minditaka eya tupa pitaka kambeakale lape. Kambolai-kola, nimbato muni mole tupa wandakali tipia tupa maipe. Wuane peendo, matili nimbanan minditaka epene wetete tupa ati kenga yola-ko. Andipa nimba namba watama ipu leaipia.

²³ Wuane lea-kola, ando atalane akali amango okomane balana pii okone ale alu, balana minditaka kambua wete yane tupa pitaka awua tepa na-wakale nembo toto, bala mini kenda wetete yaepia.

²⁴ Akali okone bala mini kenda wetete eya lo andoto, Jisasato pii mindi loto, Goteto utupane moyo ando ateakale lo minditaka kambua wetete yene wandakali tupamane ando kondape-pene oko pitete wetete alaini.

²⁵ Ya kamele mindi yana asia titi ajako mindina kolandaka loyale makande pipia-yale, pitete apia-yale tekeko, Goteto utupane moyo ando ateakale lo ando kondape-pene oko minditaka kambua yene wandakali tupamane pitete wetete alaini leaipia.

²⁶ Wuane lea-kola, wandakali balana pii ale yaini tupamane bala tipa puato, wuane yando, api katulo saka atapowa atolo-peyape leainipia.

²⁷ Wuane leai-kola, Jisasato utupanena pii okone yano peyoto, mangene wandakali-mane katulo napipe-pene tupa Goteto katulo piyane leaipia.

²⁸ Wuane lea-kola, Pitato bala lamawuato, nanimato nanimana minditaka yemane tupa pitaka awua tepa alu, nimba watama epeyama oko nimbato andee-ko. Matili nanimato aki mindi molo-peyamape leaipia.

²⁹⁻³⁰ Wuane lea-kola, Jisasato balana disaipolo tupa lamawuato, nambato pii enene mindi yakama langyeo leaipia. Goteto wandakali tupa moyo ando ateakale nembo toto, wandakali mindimane balana anda yandopi, wetene andopane yandopi, amene imalini yandopi, angini ayiane yandopi, utupanena mindi tepe alu, Gotena piapte pua ateando, bala yuu okona atolakola, Goteto okonetaka kambua longo bala maulupeya. Dee, matili wandakali okone omola-angi, Goteto bala saka atapowa ateakale lo ataya olopeya. Jisasato wuane leaipia.

*Akalina Iwanane Bala Omalu, Ika
Lolopeya Ole Tepone Leane Oko
Matiyu 20:17-19; Maki 10:32-34*

³¹⁻³³ Jisasa balana disaipolo alesa akali tupa towa atu amonga-yale poto, andipa nanimat Jutusaleme moyale asini peyama leaipia. Poloma-kola, akali mindimane Akalina Iwanane oko ene pitula-kola, wandakali waka tupamane bala lamba loto, mana koo minditupa balanga minulu-peyai. Utupane-mane apesango balanga soo lo peyoto, kunju-mane peyalu, peyo ome lolopeyai. Wuane pulai-kola, ole teponena bala malinga ika lolopeya. Wuane pula okomane pii wamba potopesa akali tupamane bala andayo pepa peleaini tupa pitaka enene gulolo-peya leaipia.*

³⁴ Jisasato wuane leane tekeko, balana disaipolo tupamane balana pii okone ale wato, balato aki nembo toto, wuane leyape nembo natene, tatake yainipia.*

*Jisasato Akali Lee Koo Mindi Lee Taya
Yane Oko
Matiyu 20:29-34; Maki 10:46-52*

³⁵ Matili Jisasa bala yuu Jetiko okona mandaka gulo pea-kola, akali lee koo mindi asia ayatenenga pituto, wandakali epo peaini tupa tee loto, muni giyapa laka pua peteaipia.

³⁶ Balato wandakali kambua wetete epo peainga ale wato, wandakali tupa tipa puato, anu peakale wandakali kambua epo peyaipe leaipia.

* **18:18:** Lk 10:25

* **18:20:** Ek 20:12-16; Lo 5:17-20

* **18:31-33:** Lk 9:21-22,44; 24:44

* **18:34:** Mk 9:32

³⁷ Wuane lea-kola, wandakali mindimane bala lamawuato, Nasatesa tane Jisasa bala epo peya-kola, wandakali kambua bala towa atu epo peyai leaipia.

³⁸ Wuane lea-kola, akali lee koo okomane taimane ee loto, Dapiti yame Jisasa, nimbato namba onto ape leaipia.

³⁹ Wuane lea-kola, wandakali wamba ingane epeaini tupamane bala laiyai loto, nimbapii nalene kondaa leaini tekeko, balato utupanera pii tanga loto, Dapiti yame Jisasa, nimbato namba onto ape lo taimane wete laka peaiapia.

⁴⁰⁻⁴¹ Wuane laka pea-kola, Jisasato ongane atoto, wandakali tupa lamawuato, yakamato akali lee koo okone lamo atu namba ateyonga ipulupa leaipia. Wuane lea-kola, utupane-mane akali okone lamo atu mandaka epeai-kola, Jisasato bala tipa puato, nimbato nimbmo moyo anu pipilakae lo nembo telepe leaipia. Wuane lea-kola, akali lee koo okomane bala lamawuato, Akali Andane, nimbato nambana lee mo tee laya api lakae lo nembo teyo leaipia.

⁴² Wuane lea-kola, Jisasato bala lamawuato, nimbato namba lo bilipi lele oko andoto, nimbato nimbana lee oko tee laya eyo-ko. Nimbmo lee taa leaipia.

⁴³ Wuane lea-kola, okone angti teke akali okone bala lee toto, minditaka yane tupa pitaka andeaipia. Andoto, balato Gote lo tama puato, Jisasa watama peaiapia. Jisasato akali okonena lene mo tee laya ya-kola, wandakali tupamane andoto, Gotena gene oko layu leainipia.

19

Takisa Mialane Akali Sakiasa Bala Yamapane Peke Leane Oki

¹⁻² Jetiko tano okona takisa muni mialane akali Sakiasa lene mindi bala takisa muni mialaini akali waka tupana kawane atoto, akali amango mindi ateaiapia. Bala tano okonena atea-kola, Jisasa bala peakaiyu lalu, yuu waka mindina moyale asini epeaiapia.

³ Asini epeai-kola, Sakiasato Jisasa bala akali anu-pene mindi ateyape lo andokale nembo teane tekeko, wandakali kambuamane Jisasa ato kulia puato, bala towa atu asini epeai-kola, Sakiasa bala akali topaki okomane Jisasa andape nayaepia.

⁴ Andape naya-kola, Sakiasato Jisasa moyale asini peane okona ingane taimane poto, bala andoyale ita piki yame sikamo lene mindi ateane okona keyoto, peteaiapia.

⁵ Peteai-kola, Jisasa epoto, Sakiasa ita okonena peteanga andaiyu loto, andipa

namba nimbana andaka poto, atapakaleko. Nimba wamba ini kili loto, yuunga ipu leaipia.

⁶ Wuane lea-kola, Sakiasa epele wato, wamba ini kili lalu, Jisasa nimba wayu epeleya leaipia.

⁷ Jisasa bala Sakiasana andaka pea-kola, wandakali minditupa-mane mini koo palu mulu-mulu loto, Jisasa bala koo piyane akali mindina andaka pangulu pala leainipia. *

⁸ Utupane-mane wuane leaini tekeko, Sakiasato Akali Andane Jisasa oko lamawuato, wamba nimbato owato pii loto, wandakali mindinga takisa muni minditupa konda pua mialawae yando, andipa nimbato paini ole tukumindinga yano peyo mauwakale leaipia. Wuane piyu, nimbana minditaka eya tupa pitaka atutu lo tale puato, minditupa wandakali tipia tupa mauwakale leaipia. *

⁹⁻¹⁰ Wuane lea-kola, Jisasa bala lamawuato, Akalina Iwanane okomane wandakali alu-pene tupa ayia pua molo-peke loyale epeane-ko. Andipa nimbapii peke lele-kola, Goteto nimbapii Apatakame yame enene ataya wato, nimbana anda okona paliyaini yame tupa molo-peke leya leaipia. *

Acaki Mindi Bala Kinji Guleane Okona Pii Kokoli Oki

Matiyu 25:14-30

¹¹ Jisasa bala Jutusaleme mandaka yale epeai-kola, wandakali tupamane nembo toto, bala Jutusaleme peakaiyu lola-angi, nanimato andoloma-kola, Goteto pitaka taka panakame ando atolanga andolopeyama nembo teainipia. Utupane-mane wuane nembo toto, balana pii leane tupa alewa peteai-kola, Jisasato pii kokoli mindi konda pua leaipia.

¹²⁻¹³ Pii kokoli okone loto, wamba akali gene yene mindimane balana piape akali paiyasa tupa ipulupa leane leaipia. Ipulupa loto, balato kina (20) paiyasa lapo, paiyasa lapo lo tale puato, piape akali utupane maiki piyu, andipa nimbmo yuu tepanda mindina peyo leaipia. Nimbmo yuu okonena atolowa-angi, yakamato muni nimbato yakama geyo tupa awua atoto, bisanisa piape pua atalapape. Matili nimbmo yakamana kinji gulo atama peke lokale leaipia. Wuane lalu, akali gene yene okone bala yuu tepanda okonena peaiapia.

¹⁴ Pea-kola, balana yame tupamane bala towa embo wetete wato, akali okone bala kinji gulalu, nanima ando ata napeakale nembo teainipia. Wuane nembo toto, akali minditupa-mane kinji ate lalane akali oko

lamai-yakale loto, utupane-mane akali utupane akali gene yene oko peane okonena peakale leainipia.

¹⁵ Wuane leai-kola, akali utupane-mane akali gene yene oko watama poto, yuu tepanda okonena peainipia. Poto, utupane-mane kinji ate lalane akali oko lamawuato, akali andane gene yene oko bala nanimana kinji ata napeakale leaini tekeko, kinji ate lalane akali okomane utupanena pii tanga loto, akali gene yene okone bala utupanena kinji ate leaipia. Ate lea-kola, akali gene yene oko bala kinji gulalu, balana yuu okona epo peke leaipia. Peke loto, balana piape akali mindiki-mindiki lo muni tale pua mayane utupane-mane bisanisa piape puato, potopisa muni aki-tupi meaini yape andoyale, balana piape akali utupane epeakale leaipia.

¹⁶ Epeai-kola, akali bulupane epeane okomane loto, Akali Andane, nimbato kina (20) paiyasa lapo namba gee-kola, nambato bisanisa piape puato, (200) tu andete kina potopisa miauwa leaipia.

¹⁷ Wuane lea-kola, kinji okonemane bala lamawuato, nimbato minditaka ajako wetete tupa wayumane ando atoto, piape kuai lo pipini yako. Nimba piape akali epene atele-ko. Nimbato tano paiyasa ando atola leaipia.*

¹⁸ Piape akali lapone epeane okomane loto, Akali Andane, nimbato kina (20) paiyasa lapo namba gee-kola, nambato bisanisa piape puato, (100) wane andete kina potopisa miauwa leaipia.

¹⁹ Wuane lea-kola, kinji okomane nimbato tano yau ando atola leaipia.

²⁰⁻²¹ Piape akali tepone epeane okomane loto, Akali Andane, akali waka mindimane minditaka yatawa ateya oko nimbato tikayu mialene leaipia. Akali waka mindimane tomo yandeya okone nimbato tikayu mandilini. Nimba akali makonga ene mindi pianga, nambato nimba ando yuku wato, nimbana kina (20) paitasa lapo namba gee oko angasupi-mane tongo puato, yatawa atewane oo eya oko anda leaipia.

²²⁻²³ Wuane lea-kola, kinji okomane bala tipa puato, akali waka mindimane minditaka yatawa ateya tupa nambato tikayu meyo-kola, nimbato andalenepe leaipia. Akali waka mindimane tomo yandeya tupa nambato tikayu mandiki peyonga nimbato andalenepe. Namba akali makonga ene mindi atoto, wuaneyiawae yando, anu peakale nimbato nimbana kina (20) paitasa lapo potopisa mandeakale benje mindina yata-gii napene, mee yakale konda eepe. Nimbato muni

okone benzengya yata ee-yale, namba peke leyo-angi, potopisa muni minditupa miauwa-yaleko. Nimbato namba ando pii koo lale utupane ale wato, nambato nimba yapa lo tale puato, nimba piape akali koo wetete atele leyo leaipia.

²⁴ Wuane lalu, kinji okomane akali ongane mandaka ateaini akali waka tupa lamawuato, yakamato kina (20) paitasa lapo nambato akali oko maewa okone lopo moto, (200) tu andete kina yatawa ateya piape akali okone balanga konda pua maiyapa leaipia.

²⁵ Wuane lea-kola, utupane-mane kinji oko lamawuato, Akali Andane, nimbato muni maiyapa lele akali okone bala (200) tu andete kina yatawa ateya okonde leainipia.

²⁶ Wuane lea-kola, kinji okomane utupane lamawuato, wandakali mindimane minditaka balanga yola tupa kuai lo ando yatawa ateando, Goteto minditaka konda pua bala malupeya leaipia. Wuane tekeko, wandakali mindimane minditaka balanga yola tupa kuai lo ando ata napeando, minditaka ajako balanga yola tupa Goteto lopo molopeya.*

²⁷ Wamba namba towa yanda-pene wandakali minditupa-mane namba towa embo wato, nambato utupanena kinji atoto, utupane ando ata napeakale nembo teainipia. Andipa yakamato wandakali utupane namba wenonga atu epoto, peyo ome lalapa. Kinji okonemane wuaneyiawae loto, Jisasato pii kokoli okone leaipia.

*Kinji Tupamane Palaini Pua, Jisasa Bala Jutusaleme Peane Oko
Matiyu 21:1-11; Maki 11:1-11; Jone 12:12-19*

²⁸ Jisasato pii utupane lo koyo piyu, Jutusaleme moyale ingane pea-kola, balana disai polo tupa bala atu peainipia.

²⁹⁻³¹ Poto, utupane yakamato Olipi wangiye okona peakaiyu leai-kola, Betepasi, Betani-la, tano okonelapo ongane mandaka yaepia. Mandaka ya-kola, Jisasato balana disai polo akali lamawuato, liyamba tano ajako amo eya okona peakaiyu loto andolapi-kola, dongi talua wamba akali mindimane masianenga napetene mindi andi latane atolanga andolo-peyapi leaipia. Liyambato dongi okone tinga loto, atu ipulupape. Liyambato dongi okone tinga lolapi-angi, wandakali mindimane liyamba tipa puato, anu peakale liyambato dongi oko tinga leyapipe leaindo, liyambato bala lamawuato, Akali Andane okomane dongi mindina pitiyu, mangene mindi pukale nembo teya. Wuane nembo toto, balato mindi molo pulupa leanga nalipato oko meyapa lalapape leaipia. Jisasato wuaneyiawae.

* ^{19:17:} Lk 16:9-13 * ^{19:26:} Mt 13:11-12; Lk 8:18

lalu, balana disaipolo okonelapo ingane pulupa leaipia.

³² Wuane lea-kola, akali okonelapo-mane poto, balato leane tupa pitaka andeapele-pia.

³³ Andoto, akali okonelapo-mane dongi okone tinga leapi-kola, dongi anduane tupamane akali okonelapo tipa puato, anu peakale liyambato dongi talua oko tinga leyapie leaninipia.

³⁴ Wuane leai-kola, akali okonelapo-mane dongi anduane tupa lumauwato, Akali Andane okomane yia dongi mindina pitiyu, mangene mindi pukale nembo teya. Wuane nembo toto, balato mindi molo pulupa leanga nalipato oko meyapa leapeleapia.

³⁵ Wuane lalu, liyambato dongi okone atu Jisasa ateanga epoto, liyambana tonu luu kenga peapili okolapo yokoto, dongi okonena masianenga yata yapelepi. Yata wato, pitulane panda mindi puato, Jisasa bala dongi okona masianenga peteakale lo bala moyapele-pia.

³⁶ Bala dongi okonena masianenga pitiyu pea-kola, wandakali-mane yakamana tonu luu kenga peapili tupa yokoto, bala moyale epeane asini okona panda pima peainipia.

³⁷ Wamba Jisasato metekolo piape kambua pea-kola, wandakali kambuamane metekolo piape utupane andoto, bala lo bilipi lene yame oko ateeainipia. Bala Olipi wangiane okona puu nena loto, Jutusaleme moyale mandaka yale pea wete, wandakali utupane pitaka-mane metekolo piape balato wamba peane tupa pitaka nembo tolo-peke loto, epele wato, Gotena gene oko laiyu leyama nayu laka pima peainipia.

³⁸ Utupane-mane balana gene oko laiyu loto, Akali Andane Goteto kinji oko epeakale leya-kola, bala epeya leaninipia. Goteto bala moyo ateaakale. Gote ati kenga wetete ateya okomane yakama towa yamapanne epene paleya-kola, yakamato balana gene oko laiyu larlapa lama peainipia. *

³⁹ Wuane lama peai-kola, utupane towa atu epoko pua ateeaini Patasai minditupamane Jisasa lamawuato, tisa, wandakali nimba watama epalaini tupamane pii leyai okone konda yakale lo nimbato utupane laiya laa leaninipia.

⁴⁰ Wuane leai-kola, Jisasato utupanena pii okone yano peyoto, wandakali utupamane pii laa napene konda yaindo, ana tupamane Gotena gene oko taimane laiyu lolopeyai lo nimbato yakama langeyo leaipia.

Jisasato Jutusaleme Tane Tupa Ondo Wato, Ai Leane Oko

⁴¹ Wuane lalu, Jisasa bala Jutusaleme mandaka-yale poto, tano okone andoto, ai leaipia.

⁴²⁻⁴⁴ Ai loto, balato wua leaipia: Wamba Goteto Jutusaleme tane wandakali yakama moyolo epea-kola, Goteto nanima moyoyale epeya lo yakamoto anda naapeainipia. Tene okonena, alumindi yakama tawa yanda-pene tupa epoto, yakamana tano okona yangisa, yangisa-la ato mapu puato, yakama yanda pingulu-peyai. Utupane-mane yakama yanda pingulangi, Jutusaleme tane wandakali yakamoto utupane peyo ome lolaini loto, utupane-mane ende mindi pulai-kola, ende okone-mane utupanena sia umbi gulo atolopeya. Utupane-mane yakamana tano okona endepi, andapi, ana-mane waa pitane ateya utupanena ana mindikipi mindi ana yangone tupana tokonga yakale lo ando konda naene, yakamana tano oko wetete minu koyolo-peyai. Wuane piyu, utupane-mane yakamana tano okona paleyai wandakalipi, andopanepi, yakama pitaka peyo ome lolopeyai. Andipa yakama Gote tawa atu mini epene palu atolane mana oko nembo tapiai-yale, matili kendapene andane okone yakamanga katulo haipupia-yale. Wuane tekeko, andipa Gote tawa atu mini epene palu atamakale loto, mana yakamoto wato minape-pene tupa too pitane eya-kola, yakamoto mana utupane nembo nateyai. Jisasa wuane loto, Jutusaleme tane wandakali tupa ondo wato, ai leaipia. *

Jisasa Bala Lotu Anda Andane Okona Peane Oko

Matiyu 21:12-17; Maki 11:15-19; Jone 2:13-22

⁴⁵⁻⁴⁶ Jisasa bala lotu anda andane okona ende anda-pangosa kolandaka loto andeakola, wandakali minditupa-mane bisanisa piape pua ateeainipia. Bisanisa pua ateaakola, balato utupane lamawuato, Gotena pii pepa pelene eya mindimane loto, nambana lotu anda oko pote lo pitulane anda mindi atolopeya layene eya tekeko, yakamoto nambana anda oko pake nene wandakali epo pitiyaini anda mindi gulaya yaini leaipia. Wuane lalu, Jisasa wandakali utupane takita pulupa lo peyo wateaipia.

⁴⁷ Wandakali utupane peyo watalu, ole dindi lo Jisasa bala lotu anda andane okonena epoto, wandakali tupa pii mana lamawua ateaipia. Pii mana lamawua ateaakola, pitisa akali kawane tupapi, loo tupana

mana andene akali tupapi, wandakali tupana akali kawane waka tupapi, utupane pitaka-mane Jisasa peyo ome lolane asia mindi ayia peainipia.*

⁴⁸ Utupane-mane wuane peaini tekeko, wandakali pitaka-mane balana pii epelewa ale yai-kola, okone angi akali utupane-mane Jisasa peyo ome lolane asia mindi ando mia napeainipia.

20

*Piape Utupa Pipe Lo Apito Nimba Langeape Tipa Peaini Oko
Matiyu 21:23-27; Maki 11:27-33*

¹ Ole alumindi Jisasa bala lotu anda andane okona ende anda-pangosa atoto, Gotena pii layene epene oko lamawuato, wandakali peteaini tupa mana lamawua ateaipia. Balato wuane pua atea-kola, pitisa akali kawane tupapi, loo tupana mana andene akali tupapi, Juta yame tupana akali kawane waka tupapi, utupane yakama Jisasa ateanga epeainipia.

² Epoto, utupane-mane bala tipa puato, nimbato apina pii wato minuto, wandakali utupa mana lamawua atelepe. Apito nimba languato, piape utupa pipe lo nimba langipia-kola, nimbato piape utupa pua atelepe. Nimbato nanima langi leainipia.

³⁻⁴ Wuane leai-kola, balato utupane lamawuato, nambatopi pii mindi yakama tipey leaipia. Goteto Jone lamawuato, nimbato wandakali tupa ipa peya-maipe lea-kola, balato wuane peapepe. Pee, wandakali-mane bala lamawuato, nimbato wandakali tupa ipa peya-maipe leai-kola, balato wuane peape. Yakamato namba langiyapa leaipia.

⁵⁻⁶ Wuane lea-kola, akali utupane yakama teke-teke pii lalawa puato, wandakali tupa pitaka-mane Jone bala potopesa akali enene mindi ateane nemboto atalaini leainipia. Wuaneko, nanimato Jisasana pii oko yano peyto, wandakali-mane Jone lamawuato, nimbato wandakali tupa ipa peya-maipe leai-kola, balato wuane peane lemando, wandakali tupamanne nanima ana-mane peyo ome lolopeyai. Wuane tekeko, nanimato balana pii okone yano peyto, Goteto ipa peya-maipe lea-kola, Joneto wuane peane lemando, Jisasa nanimata tipa puato, wuane yando, anu peakale yakamoto Jonena pii bilipi naleaippe lolopeya leainipia.

⁷ Utupane yakama teke-teke wuane lalu, Jisasa lamawuato, Joneto ipa peya-maiyane okone apito peya-maipe lea-kola, balato wuane peape lo nanimato nembo nateyama leainipia.

⁸ Wuane leai-kola, Jisasato utupane lamawuato, yakamoto nambana pii oko kuai lo yano peya napeleai-ko. Piape utupa pipe lo namba langeane akali okona gene oko nambato yakama langi napukale teke leaipia.

*Getepe Ee Ando Ateaini Akali Koo Utupa Pii Kokoli Oko
Matiyu 21:33-46; Maki 12:1-12*

⁹ Wuane lalu, Jisasato pii kokoli mindi wandakali tupa lamawuato, akali mindi-mane getepe ee mindi yandeane leaipia. Yandoto, balato piape akali minditupa lamawuato, yakamoto nambana ee oko ando ateaindo, matili dini lula-angi, yakamoto minditupa yoo gulai-kola, yakama tane akenane tupa mialapale lalu, bala yuu tepanda mindina pea-kola, ana kambua peaipia.*

¹⁰ Ana kambua pea-kola, matili getepe dini mandulane oto oko epea-angi, ee ando atalaini akali tupamanne getepe dini minditupa yo geakale nembo toto, ee anduane okomane balana piape akali mindi lamawuato, akali utupane-mane getepe dini minditupa yo geakale, nimbato molo puu leaipia. Wuane lea-kola, piape akali okonemane dini minditupa molo peane tekeko, ee ando atalaini akali tupamanne getepe dini minditupa yoo mai napene, piape akali okone minu peyalu, mee peke leakale leainipia.

¹¹ Akali okone peke lea-kola, ee anduane okomane balana piape akali waka mindi-mane dini minditupa molo peakale leane tekeko, ee ando atalaini akali utupane-mane getepe dini minditupa yoo mai napene, bala minu peyalu, mana koo yalapene minditupa balanga minalu, bala mee peke leakale leainipia.

¹² Peke lea-kola, ee anduane okomane balana piape akali waka mindimane teke dini minditupa molo peakale lea-kola, ee ando atalaini akali tupamanne bala minu koyo wete wato, ee okonena ende kamaka awua apeainipia.

¹³ Akali utupane-mane wuane peai-kola, ee anduane okomane tatake wato, nambato anu puape leaipia. Nambana iwanane yamapane yalawane okone peakale lolokola, akali utupane-mane balana pii lola tupa ale olopeyai yalua leaipia.

¹⁴ Wuane loto, balana iwanane okomane dindi minditupa molo peane tekeko, ee ando atalaini akali tupamanne balana iwanane oko epeaanga andoto, yakama teke-teke pii lalawa puato, matili iwana epeya okomane bala ayianena paluni tupa pitaka tane molopeya-ko. Ee okona paluni oko

* 20:9: Ais 5:1

nanimia tane mia-makalenga, nanimato bala peyo ome lamakale leainipia.

¹⁵ Wuane lalu, akali utupane-mane bala ee okonena ende kamaka atu aiyu poto, peyo ome leainipia. Utupane-mane wuane peaini okonena, ee anduane okomane akali utupane towa anu pulupeya nembo teyaipe.

¹⁶ Bala tane epoto, akali utupane peyo ome lalu, akali waka minditupa-mane balana getepe ee okone ando ateakale lo malupuya. Jisasato wuane lea-kola, balana pii alewa peteaini wandakali tupamane loto, matili-matilipi kenda-pene okone nanimanga na-epeakale leainipia.

¹⁷ Wuane leai-kola, Jisasato utupane andapeyo yoto, Gotena pii pepa pelene eya mindimane loto, anda piyaini akali minditupa-mane anda mindi puato, ita mindi andoto, oko koo ya lo apeaini mindiki okone teke Goteto moto, anda okonena pingina gulaya yane layene eya leaipia. Pii kokoli nambato lalo okone angini guu nalolo-peya yando, Gotena pii layene lalo okonena tene oko andoko paleyape.

¹⁸ Ita okonena tokonga wandakali ayia peyolai tupa pitakana kulini tupa kundu lolopeyai tekeko, anda pingina okone tepa wato, wandakali mindi peyo tele lola-kola, bala yuu kangalamu gulolo-peyai leaipia. *

¹⁹ Jisasato wuane lea-kola, loo tupana mana andene akali tutapi, pitisa akali kawane tupapi, utupane-mane ale wato, balato nanimia andayo pii kokoli oko leya nembo teainipia. Tene okonena, okone angi teke, utupane-mane Jisasa andi lamakale nembo teaini tekeko, wandakali kambuamane bala potopesa akali mindi ateya nembo teai-kola, Juta yamena akali kawane utupane-mane bala andi loyale yuku wato, konda yainipia.

Takisa Muni Maipe-penepe Lo Tipa Peaini Oko

Matiyu 22:15-22; Maki 12:13-17

²⁰ Matili Juta yamena akali kawane tupamane pii mindi loto, gapomane akali kawane okomane Jisasa andi loto, peyo ome leakale leainipia. Nanimato Jisasa langa-langa pimaluma-kola, balato gapomane oko andayo pii koo mindi lola-kola, bala tanena pii lolane okonemane teke nanimato bala kosimi lamakale leainipia. Bala kosimi lamakale nembo toto, utupane-mane akali minditupa lamawuato, Jisasato aki leyape lo pii moyale, yakama akali tika-pene gulo atoto, bala kambo andolo pulupa leainipia. *

²¹ Wuane leai-kola, akali utupane-mane poto, tisa, wandakali mindi bala akali gene

yene yandopi, gene naene yandopi, okone tene mindi ata naapeya nembo toto, nimbato pii tika pua lalene leainipia. Nanimato wua pipiai lakae lo Goteto nembo talane tupa nimbato nanimia mana kuai lo languato, pii enene tupa angu lalene nembo teyama.

²² Tene okonena, nanimato nimba tipa puato, Juta yame wandakali nanimato Lomo tane gapomane akali kawane Sisa oko takisa muni maipe-penepe, mai napipe-penepe leyama leainipia.

²³⁻²⁴ Wuane leai-kola, akali utupane-mane langa-langa puato, pii okone tipa peyai lo andoto, Jisasato utupane lamawuato, yakamoto muni ondene mindi namba andawa lalapa leaipia. Andawa leai-kola, balato utupane tipa puato, apina lee-inga waa pitane okola, gene peyatane okola, okonelapo muni okona ateyape leaipia. Wuane lea-kola, utupane-mane bala lamawuato, Lomo tane gapomane akali kawane Sisa lee-inga waa pitane okola, gene peyatane okola, okonelapo muni okona ateyea leainipia.

²⁵ Wuane leai-kola, balato utupane lamawuato, wuane yando, yakamoto Sisa minditaka yolai tupa Sisa bala maiyu, Gotena minditaka yolai tupa Gote bala maiyu piyapape leaipia.

²⁶ Wandakali tupana wenonga Jisasato utupanena pii okone kuai lo yano peyoto, gapomane oko andayo pii koo mindi nialeipia. Tene okonena, utupane-mane bala kosimi lolane tene mindi ata naapeakola, utupane-mane katulo bala langalanga napulu-peyama lo moko loto, pii waka mindi laa napene konda yainipia.

Wandakali Omene Tupa Malinga Ika Lolopeyai Leane Oko

Matiyu 22:23-33; Maki 12:18-27

²⁷⁻²⁹ Satusi yame-mane wandakali omene tupa malinga ika nalolo-peyai lalainipia. Akali utupanena minditupa-mane Jisasa ateanga epoto, bala lamawuato, tisa, amene yanasa atea-kola, amene bulupane okomane wanda mindi kee lalu, andopane mindi mandi napene omeaipia. Wamba Mosesato nanimana pepa mindi peyoto, akali mindimane wanda mindi kee lalu, andopane mandi napene omeando, balana amene mindimane wanda yalo oko kee loto, amene omolane okona andopane mindi mandi maiyakale. Wamba Mosesato pii okone pepa peleipia.

³⁰ Pii okone nembo toto, akali omeane okona amene mindimane wanda yalo oko kee leane tekeko, balatopi andopane mindi mandi napene omeaipia.

³¹ Omea-kola, amene tepone okomane wuane teke peaipia. Wuane teke pima pulu,

iwana yanasa tupa pitaka-mane wanda mindiki okone teke kee lama pulu, ome yiake leainipia.

³² Ome yiake leai-kola, matili wanda yalo okone balapi omeaipia.

³³ Amene yanasa utupane pitaka-mane wanda mindiki okone teke kee leai-ko. Matili wandakali omene tupa malinga ika lolai-angi, wanda okone bala amene yanasa utupanena mindi andokona wetene pitulupeyape leainipia.

³⁴ Wuane leai-kola, Jisasato utupane lamawuato, andipa nanimato yuu okona ateyama-angi, wanda-mane akali pulu, akali-mane wanda kee lalu, piyaini leaipia.

³⁵⁻³⁶ Utupane-mane wuane piyaini tekeko, matili Goteto wandakali omene tupa pitaka malinga ika laya wato, minditupa bala towa atu saka atapowa ateakale lolopeya. Wuane lola-kola, wandakali utupane Gotena andopane yame atoto, enjole tupa oma na-piyaini pua, wandakali utupane katulo lapone oma napulu-peyai. Okone angi wanda-mane akali napolopeyai. Akali-mane wanda kee nalolo-peyai teke.

³⁷⁻³⁸ Goteto andeya-kola, wandakali wamba omeaini tupana tandini tupa saka ateyai-ko. Gote bala wandakali omene tupana Gote ateya nalape-pene. Jia. Bala wandakali saka ateyai tupana Gote oko ateya. Tene okonena, Apatakame, Aisake, Jekopo ima wamba omeai-kola teke, matili ita saka aŋako mindi iti lungumane teane okone angi, Mosesato pii mindi loto, Akali Andane oko bala Apatakame, Aisake, Jekopo ima utupanena Gote ateyo leaipia. Akali tepo omeaini utupanena tandini tupa saka ata napeai-yale, Mosesato Akali Andane oko andayo, bala akali utupanena Gote ateyo nalea-yale. Jia. Bala akali utupanena Gote atewa lea-yaleko. Mosesato Akali Andane oko bala akali utupanena Gote ateyo leane okomane wandakali pitaka malinga ika lolo-peyama lo andawa leane leaipia.

³⁹⁻⁴⁰ Jisasato wuane lea-kola, Satusi yame tupamane pii waka mindi balanga tipa puyale yuku wato, konda yainipia. Konda yai-kola, loo tupana mana andene akali ateaini tupamane Jisasa lamawuato, tisa, nimbatu Satusi utupanena pii lalai tupa kuai lo wetete yano peyale leainipia.

Mesaya Oko Bala Dapiti Yamena Mandiyene Angu Jia Leane Oko
Matiyu 22:41-46; Maki 12:35-37

⁴¹ Loo tupana mana andene akali tupamane wuane leai-kola, Jisasato utupane

lamawuato, anu peakale akali minditupamane Mesaya oko bala mee Dapitina mandiyene ateya lalainipe leaipia.

⁴²⁻⁴³ Wamba Dapitito Gotena pii mindi buku Sama okona pepa peyoto, Akali Andane Gote okomane nambana Akali Andane Mesaya oko lamawuato, nambato nimba towa yanda-pene wandakali tupa nimbanza kee pangosa ateakale lokalenga, nimba nambana kii tikasa-tole pitipe leaipia.*

⁴⁴ Wamba Dapitito Mesaya oko andayo, bala nambana Akali Andane ateya leaipia-ko. Anu pua, Mesaya oko bala katulo Dapitina mandiyene ateyape. Jisasato wuane leaipia.

Yakamato Mana Koo Utupa Wato Mina Na-piyapape Leane Oko
Matiyu 23:1-36; Maki 12:38-40; Luku 11:37-54

⁴⁵⁻⁴⁷ Jisasato pii okone loo tupana mana andene akali tupa lamaiya-kola, wandakali pitaka-mane ale yainipia. Ale yai-kola, okone angi teke Jisasato balana disaipolo tupa lamawuato, loo tupana mana andene akali tupa yakama tane gene yene ateyama nembo toto, tona epene wete kii kee puyoko lene tupa puato, epoko puyale, epele wete alaini leaipia. Utupane-mane wandakali kambua amunguli piyaini ama tupana ateyai-angi, wandakali waka tupamane utupane andoto, akali andane, nimba ani pelepe lapiat laakae lo nembo talaini. Utupane-mane Juta yamena lotu anda tupana poto, toko bulupane tupana pituyale, epele wete alaini. Dee, wandakali kambua-mane tomo andane mindi no peteyai-angipi, utupane-mane akali kawane pitiyaini toko tupana pitima lakae lo nembo talaini. Wandakali waka tupamane utupane akali epene ya lo andeakale nembo toto, akali utupanemanne pote luu wetete tupa lalaini. Wuane tekeko, akali utupane-mane langa-langa puato, wanda yalo tupana eepi, andapi, utupane mialaini. Tene okonena, matili Goteto kenda-pene andane wetete mindi loo tupana mana andene akali utupanenga maulu-peyako. Yakamato akali utupanena mana koo tupa wato minulaini. Tika ando atalapape. Jisasato wuane leaipia.

21

Wanda Yalo Mindimane Gote Wayu Pele Lo Muni Mayane Oko
Maki 12:41-44

¹ Akali amango tupamane lotu anda andane okona epo pitiki puato, Gote wayu pele lo muni kambua aindaka lolo ipuku

* **20:42-43:** Sam 110:1

peai-kola, muni aki-tupi aindaka leyaipe lo Jisasato anda peyo peteaipia.

² Utupane-mane wuane peaini tekeko, Jisasato andea-kola, wanda yalo tipia wete mindi epoto, Gote wayu pele lo muni ajako one-pene lapo angu aindaka leanga andeapia.

³⁻⁴ Andoto, Jisasato balana disaipolo tupa lamawuato, nambato pii enene mindi yakama langyeo leaipia. Akali amango tupa pitaka-mane muni kambua yakama tanenga yakale loto, minditupa aindaka lalai tekeko, wanda yalo okonga bala tane tomo kambo nolane muni naya-kola, muni ajako one-pene lapo angu balanga yala. Balato okonelapo lapotaka aindaka lala okomane wandakali waka tupa pitaka sia minuto, muni kambua wetete aindaka lala. Jisasato wuane leaipia. *

Lotu Anda Andane Oko Keao Lo Minu Koyolo-peyai Leane Oko
Matiyu 24:1-2; Maki 13:1-2

⁵⁻⁶ Okone angi, Jisasana disaipolo tupamane lotu anda andane oko andoto, akali minditupa-mane ana epene wetete tupa moto, lotu anda andane oko peainipia. Wuane peai-kola, wandakali waka minditupa-mane Gote wayu pele lo minditaka epene wetete tupa moto, lotu anda oko kuai lo yati peaini ya leainipia. Wuane leai-kola, Jisasato utupane lamawuato, matili oto mindi epola-angi, akali minditupa epoto, anda utupanena ana mindikipi mindi ana yangone mindina tokonga yakale lo ando konda naene, utupa pitaka keao loto, yuunga tepa ayiake lolopeyai leaipia. *

Kenda-pene Kambua Epolopeya Leane Oko

Matiyu 24:3-14; Maki 13:3-13

⁷ Wuane lea-kola, Jisasana disaipolo tupa pamane bala tipa puato, tisa, andoko angi akali minditupa-mane lotu anda andane oko minu koyolo-peyaipe. Mangene anupene mindi wamba ini bulupane pula-kola, nanimato andoto, andipa yuu oko koyo puyale peya lo andolo-peyamape leainipia.

⁸ Wuane leai-kola, Jisasato utupane lamawuato, matili akali kambua yale-yale ipuku puato, Mesaya oko namba epeyo. Andipa yuu koyo pulane oto oko wamba mandaka epeya lo yakama langulu-peyaike leaipia. Akali mindimane Mesaya oko namba epeyo loto, yakama andakasa olaini. Waiwi ando atalapape. Yakamoto akali utupane mindina disaipolo ata na piyapape.

⁹⁻¹⁰ Matili wandakali yame andane mindimane wandakali yame andane waka mindi yanda pimaulu-peya. Akali kinji mindina yame-mane kinji mindokona yame oko yanda pimaulu-peya. Akali minditupa-mane gapomane oko yanda pimaulu-peya teke. Wandakali-mane mangene utupane wamba ini pipe-pene tekeko, okone angi teke yuu oko wamba kapoyale koyo napulu-beyako. Wandakali-mane yanda andane mindi pua atolai-kola, yakamoto ale wato, andipa yuu oko koyo peya nayuto, yakama yuku aa na-piyapape.

¹¹ Yuu minditupana yuu titiiali andane tupa lolopeya. Yuu minditupana ulia nono andane tupa yolopeya. Yuu minditupana siki koo andane tupa peyolo-peya. Ati kenga tawe mangene andane mindipene-mindipene pulai tupa kokoli gulola-kola, wandakali-mane yuku-mane omolo-peyai.

¹² Kenda-pene utupane pitaka wene epoye pula-kola, yakama nambana yame ateyai lo andoto, wandakali minditupa-mane kenda-pene andane minditupa yakama giki pulupeyai. Utupane-mane yakama andi lo awua poto, Juta yamena lotu anda mindina yandopi, katapusa anda mindina yandopi, okone-laponia mindina polopeyai. Wuane pulai-kola, akali waka minditupa-mane yakama kosimi loyale, andi lo awua poto, gapomane akali andanepi, kinjipi, utupanena wenonga ataya olopeyai.

¹³ Yakama akali utupanena wenonga atolai-angi, yakamoto nambana wai pii layene epene oko akali utupanena lamaulane asini oko lumbu ene yolopeya.

¹⁴⁻¹⁵ Wuane, akali utupane-mane yakama kosimi lolai-angi, namba tane yakama mo wai aya wato, yakamoto utupanena pii okone yano peyoto, wua lalapale loto, nambato yakamana nembo-tene tupa mina ika lokale. Nambato yakama mo waiene gulaya wato, wua lalapale lo yakama langulu-wakola, yakamoto pii nambato yakama languluwa okone lolopeyai. Yakamoto pii okone lolai-angi, yakama towa pii yanda pulai wandakali tupa manane anu pua yakamana pii okone yano peyamakalepe lo tatake wato, yakama sia mina napulu-peyai. Tene okonena, wandakali minditupa-mane yakama kosimi loyale atolai-angi, nanimato aki loto, utupanena pii okone yano peya-makalepe nembo toto, yakamoto pii lolane mindi ini mandeke na-piyapape. *

¹⁶ Yakama nambana yame ateyai mambele, yakama tanena angini ayanepi, amenepi, yamepi, utupane-mane yakama

ene pitulai-kola, yakama towa yanda pulai akali utupane-mane yakamana minditupa peyo ome lolopeyai.*

¹⁷ Wandakali waka kambua-mane yakama towa embo wetete ollopeyai.

¹⁸ Wuane tekeko, yakamato Kataisa bilipi leyama nayu lo atolai okonena, yakamana kawa itini ateya tupana mindikipi mindi alu napulu-peya.

¹⁹ Yakamato nambanga tungi peyo bilipi lo atoto, kenda-pene utupane awua ateaindo, matili yakama saka atapowa atolopeyai. Jisasato wuane leaipia.

*Jutusaleme Tano Oko Minu Koyolo-peyai
Leane Oko*

Matiyu 24:15-21; Maki 13:14-19

²⁰⁻²² Wuane lalu, Jisasato pii mindi tako pua loto, Gotena pii pepa pelene eya oko enene guleakale loto, Goteto koo piyaini wandakali tupa yole koo maulupeya leaipia. Yole koo mindi malupeya okonena, matili yakamato andolai-kola, Jutusaleme tane wandakali tupa towa yanda-pene akali tupana ami tupa epoto, Jutusaleme tano oko ato mapu pulupeyai. Wuane pulai oko andoto, yakamato Jutusaleme tano koyolane oto oko mandaka epeya nembo talapape. Wuane nembo toto, Jutusaleme tano okona takita atolaini wandakali yakama tano okonena kolandaka lolaini. Jutusaleme tano okona anda-pangosa atolaini wandakali yakamato tano okone tepa alu, palaka pulupape. Jutiya disitiki okona atolaini wandakali yakama ata too pua atamakale nembo toto, yuu wangiane tupana palaka pulupape.*

²³⁻²⁴ Okone ang, andopane ininga pitipa pitulai wanda tupapi, andopane andu no atene pitulai wanda tupapi, utupane palaka pupe-pene pitete wato, ondo wete ape-pene gulo pitulu-peyai. Goteto Jutusaleme tane wandakali tupa towa yataka wato, yole koo mindi utupane mawuato, kenda-pene andane wetete minditupa wandakali utupane maulupeya. Okone ang, utupanena yanda-pene tupamanne wandakali minditupa kandepa-mane yokowa ome lalu, minditupa andi lo awua yuu waka-waka tupana puku pulupeyai. Ee ana kambua wetete, wandakali yame waka tupamanne Jutusaleme tano oko angowa tambaiyuto atolai-kola, matili yuu koyo pulane oto oko epola-angi, utupane-mane kondolo-peyai. Jisasato wuane leaipia.*

*Akalina Iwanane Okomane Balana Wandakali Tupa Lamolo Epolopeya Leane Oko
Matiyu 24:29-31; Maki 13:24-27*

²⁵⁻²⁶ Wuane lalu, Jisasato pii mindi tako pua loto, okone angi Akalina Iwanane oko epoyale peya lo andawa loyale, nai, ana, kaiyanda ima-mane mangene minditupa pulupeyai. Goteto ati iyu okona minditaka tai ateya tupa mo ema-ema piya ola-kola, wandakali-mane andoto, yuu okona anu pulu-peyape lo yuku-mane omoto, lee lemowa atolopeyai. Yuu okona ipa angini andane solewata peteya tupamanne taimane wete ika loto, lekawa tepea ola-kola, tulalene puku pula-kola, wandakali-mane ale wato, anu peyape lo tatake wato, nembo kambua tolopeyai.*

²⁷ Okone ang, wandakali-mane andolai-kola, Akalina Iwanane oko bala mole mindina tokonga atoto, balana tai-lene andane okopi, tii-pene andane okopi, okonelapo towa atu epolopeya.*

²⁸ Mangene utupane tewa pula-angi, Goteto yakama molo-peke lolo epolane oto oko wamba mandaka epeya lo andoto, yakama ika loto, ati kenga iyu oko andaiyu lo malioy atalapape. Jisasato wuane leaipia.

*Ita Piki Tupa Andoto, Mana Mialapape
Leane Oko*

Matiyu 24:32-35; Maki 13:28-31

²⁹ Wuane lalu, Jisasato pii kokoli mindi wandakali utupane lamawuato, yakamato ita pikipi, ita waka tupapi, utupane pitaka andalapape leaipia.

³⁰ Ita utupanena yokone tupa kome peyakola, yakamato yokone utupane andoto, pa nyu puyale peya lo andalaini.

³¹ Wuane pua teke, matili mangene minditupa pulupeya leyo tupa pulai-angi, yakamato mangene utupane andoto, Goteto yakama ando atolane oto oko mandaka ipulua lo andalapape.

³² Nambato pii enene mindi yakama langeyo. Wandakali yame andipa ateyai tupa pitaka oma yiake nalolai-kola, mangene utupane pitaka pulupeyai.

³³ Matili yuu ati-la alu pulupeya tekeko, matili-matilipi nambana pii oko alu napulu-peya. Jisasato wuane leaipia.

Ole Dindi Lo Yakamato Tika Ando Atalapape Leane Oko

³⁴⁻³⁵ Wuane lalu, Jisasato pii mindi tako pua loto, Akalina Iwanane oko epola-angi, balato yuu okona wandakali tupa pitaka yapa lo tale pulupeya leaipia. Poloko pandu mindi yola oko anda napene, poloko mindi ambe epeando, pandu okonemane bala peleya-kola, omalane. Wuane pua teke, wandakali minditupa-mane Akalina Iwanane oko epolopeya nembo natene, nanimato anu puato, minditaka eya tupa

* **21:20-22:** Jet 5:29; 46:10; Ose 9:7 * **21:23-24:** Sam 79:1; Lap 11:2 * **21:25-26:** Ais 13:10; Ese 32:7; Jol 2:31; Lap 6:12-13 * **21:27:** Dan 7:13; Mt 26:64; Lap 1:7

mia-makale nembo kambua tolopeya. Wuane nembo toto, utupane-mane ipa tai kambua no sipaki loto, mana koo waka tupa minu atolopeyai. Yakamoto wuane pua ateaindo, matili Akalina Iwanane oko bala kapoyale ini epoto, yakama yapa lo tale pulupeya.

³⁶ Tene okonena, yakamoto Akalina Iwanane okona wenonga tika pua atanakale nembo toto, yakama tane mana koo utupane minulaini. Tika ando atalapape. Ole dindi lo yakama tane ando atoto, yakamanga kenda-pene epola tupa peyo wanjalapale. Goteto asini mindi yatageakale lo pote lalapape.

³⁷⁻³⁸ Utulu dindi lo Jisasa bala Jutusaleme tepe alu, Olipi wangiane okona poto, paliki peapipia. Paliyu, ole dindi lo bala Jutusaleme peke loto, lotu anda andane okona atoto, pii mana lamawua ateakola, wandakali pitaka-mane balana pii ale oyale, lotu anda okonena ipuku peainipia.

22

*Jutasato Jisasa Ene Pitukale Leane Oko
Matiyu 26:1-5,14-16; Maki 14:1-2,10-11;
Jone 11:45-53*

¹⁻² Betesanga yisa napalene nalaini oto gene Pasopa lene oko mandaka epeane-angi, loo tupana mana andene akali tupapi, pitisa akali kawane tupapi, utupane-mane Jisasa peyo ome lolane asia mindi ayia pua ateainipia. Wuane tekeko, Jisasa andi loto, peyo ome loloma-kola, wandakali kambua epo amunguli peyai tupamanenamima towa yataka olopeyai nembo toto, utupanena wenonga bala andi loyale yuku yainipia.

³ Jisasa peyo ome lolane asia mindi ayia pua ateai-kola, Satane bala disaipolo alesatupana akali Jutaso Isaka-tiyote lene oko balanga kolandaka leaipia.*

⁴ Kolandaka lea-kola, Jutaso bala poto, pitisa akali kawane tupapi, lotu anda andane okona sukutiti akali kawane tupapi, utupane towa pii lalawa puato, nambato wua puato, Jisasa ene pitukale leaipia.

⁵ Wuane lea-kola, akali utupane-mane bala towa epele wato, Jutaso nimbato wuane peendo, nanimato muni minditupanimba gulupeyama leainipia.

⁶ Wuane leai-kola, Jutasato atu yalua leaipia. Matili wandakali kambua Jisasa towa atu ata napulai-angi, nambato bala ene pitukale lalu, Jutaso maliyo ateaiapia.

*Pasopa Tomo Nolane Tupa Mandeke
Pulu Peapele Oko
Matiyu 26:17-20; Maki 14:12-16*

⁷ Betesanga yisa napalene nalaini oto epeya-kola, Juta yame-mane Pasopa tomo tupa namakale nembo toto, sipisipi andopane mindi peyo nalainipia.*

⁸ Oto okone epea-kola, Jisasato Jone, Pita-la, okonelapo lamawuato, Pasopa tomo tupa namakalenga, liyambato mandeke pulu pulupa leaipia.

⁹ Wuane lea-kola, akali okonelapo-mane bala tipa puato, naliipato aninga poto, Pasopa tomo tupa mandeke pipiapi lakae lo nembo telepeleplia.

¹⁰ Wuane leapi-kola, Jisasato akali okonelapo lamawuato, liyambato Jutusaleme tano okona polapi-kola, akali mindimane ipa pene andane mindina ipa ambu awua epoto, liyamba malanda olopeya leaipia. Liyambato akali okone watama poto, anda bala kolandaka lola okona teke liyambapi kolandaka lalapape.

¹¹ Kolandaka loto, liyambato anda andane oko lamawuato, tisa okomane nimba tipa puato, nambana disaipolo tupa towa Pasopa tomo tupa nolane lumu oko aninga eyape lala lalapape.

¹² Wuane lolapi-kola, balato liyamba atu aiyu poto, dapolo anda kenga okona lumu andane mindi liyamba andawa ollopeya. Lumu andane okonena tepolo tokopi, pitulane tokopi, okonetaka tupa pitaka yotopeya. Lumu okonena, liyambato Pasopa tomo nolane tupa mandeke piyapape leaipia.

¹³ Wuane lea-kola, Jone, Pita-la, liyamba poto andeapi-kola, Jisasato minditaka yotopeya leane tupa pitaka ya-kola, okonelapo-mane Pasopa tomo nolane tupa mandeke peapeleplia.

Betesa, Waene-la Okonelapo Neakale Mayane Oko

Matiyu 26:26-30; Maki 14:22-26; 1 Kotini 11:23-25

¹⁴ Pasopa tomo nolane gii oko epea-kola, Jisasapi, balana disaipolo tupapi, utupane-mane tomo moyo Royale tokonga peteaini-pia.

¹⁵⁻¹⁶ Peteai-kola, balato utupane lamawuato, andipa Pasopa tomo noloma oko nalu, nambato Pasopa tomo oko dee lapone nanene atama pulu, Goteto yuu oko moyo ando atolo epola oto okona giao lolo-peyawa lo nambato yakama langeyo leaipia. Tene okonena, andipa nambato Pasopa tomo oko yakama towa atu naima lakae lo nembo teyo. Nalu, matili namba tandaka andane nolo-peyawa leaipia.

¹⁷⁻¹⁸ Wuane lalu, balato waene petene kapo mindi moto, Gote ando wayu pele loto, balana disaipolo tupa lamawuato, andipa nambato towa waene neyama oko nalu, nambato waene oko dee lapone nanene atama

* 22:3: Jo 13:1-3,27 * 22:7: Ek 12:1-27

pulu, Goteto yuu oko moyo ando atolo epola oto okona giao lolopeyawa lo nambato yakama langeyo-ko. Yakamato waene oko tale pua nalapa leaipia.

¹⁹ Wuane lalu, balato betesa mindi moto, Gote wayu pele lalu, betesa okone konde lea. Konde loto, balana disaipolo tupa mawuato, oko nambana umbaini oko. [Nambato yakama moyo geyo oko. Matilipi yakamato namba nembo tolo-peke loyale, betesa oko nalapape leaipia.

²⁰ Tomo no koyo peai-kola, wuane pua teke, Jisasato waene petene kapo mindi meaipia. Moto, balato utupane lamawuato, nambato pii wenene mindi yakama towa lo yata wato, yakama moyoyale, nambana tundupa ita malamanda okona gae lolowa okomane wandakali tupa pitakan koo tupa apia-maulupeyelo leyo.]

²¹⁻²² Enene, wamba Goteto Akalina Iwanane okonga asia mindi andawa leakola, Akalina Iwanane okomane asia okone wato minuto omolo-peya tekeko, bala ene pitula akali oko ondo wete ape-pene. Namba ene pitulane akali okone bala namba towa atu tomo moyoyale peteyama oko andalapa leaipia.*

²³ Jisasato wuane lea-kola, balana disaipolo tupa yakama teke-teke pii lalawa puato, namima peteyama tupana apito mana koo okone minuyale peteyape leanipia.

Akali Kawane Api Ateyape Lo Pii Yanda Peaini Oko

²⁴ Wuane lalu, Jisasana disaipolo tupa yakama teke-teke pii yanda puato, namima ateyama tupana akali kawane api ateyape leanipia.*

²⁵⁻²⁷ Wuane leai-kola, Jisasato utupane tipa puato, tepolo tokonga tomo no pitiyane akali oko bala akali andane lipinga-yale atalaeppe. Pee, tomo yanga-maiyane piape akali okomane tomo no pitiyane akali okone sia minuto, lipinga-yale atalaeppe. Tomo no pitiyane akali oko bala lipinga-yale atalane tekeko, namba tomo yanga-maiyawane piape akali okonetaka gulo atoto, yakama towa atu ateyama. Enene, wandakali yame waka tupana kinji tupa yakama tane akali andane gene yene ateyama nembo toto, wandakali waka tupamanen gene tupa laiyu loto, yakamato namima moyalaini leakale lalaini. Utupane-mane wuane piyaini tekeko, nambana disaipolo tupa yakamato wuane na-piyapape. Jia. Yakamana akali kawane wetete oko bala wandakali waka tupa pitakan napining wete gulo atoto, utupanena piape akali gulo atape-pene.*

²⁸⁻³⁰ Wamba nambana ayiane okomane namba kinji atape leane. Nambato kinji piape pua ateypo-angi, kenda-pene koo kam-bua tupa nambanga epeya-kola, yakamato namba tupa naene, namba towa atu atalaeni. Tene okonena, matili yakama nambana yuu epene okona poto, tomo ipapi, no pitiyapale nembo toto, nambato yakama kinji tupa atalapale lokale. Wuane lolowakola, yakama kinji pitiyaini toko tupana pituto, Isatale tane wandakali yame alesa tupana pii lolai tupa lo tika pulupeyai. Jisasato wuane leaipia.*

Saimone Pita Nimbato Namba Anda Napewawane Loloape Leane Oko

Matiyu 26:31-35; Maki 14:27-31; Jone 13:36-38

³¹ Okone angi, Jisasato Pita lamawuato, Saimone, Saimone, wandakali tupamanen witi dinipi, imbunipi, utupane yapa lalaini pua, Sataneto disaipolo yakama pitaka yapa lo mandeke pukale nembo teya leaipia.

³² Sataneto wuane nembo teya tekeko, nimbanan bilipi oko wetete koyolane loto, nambato Gote lo pote lauwa-ko. Matili nimba yamapanre peke lole-angi, nimbanan amene tupa minu tai laya ape leaipia.*

³³ Wuane lea-kola, Pitato Jisasa lamawuato, Akali Andane, namba nimba towa atu katapusa andaka pupe-pene guleandopi, omape-pene guleandopi, nambato katulo wuane pukale lo mandeke pitawa ateyape leaipia.

³⁴ Wuane lea-kola, Jisasato bala lamawuato, andipa eka pauli maipa mindimane pii nalola-kola, ole tepoainga nimbanan wandakali minditupa lamawuato, nambato Jisasa anda na-peyawane loloape lo nambato nimba langeyo leaipia.

Mandeke Pitawa Atalapape Leane Oko

³⁵ Wuane lalu, Jisasato balana disaipolo tupa tipa puato, wamba nambato yakama nuupi, munipi, sukepi, mindi mandi napene, mee pulupa lewa-angi, yakamanga minditaka mindi jia ya-kola ateaippe leaipia. Wuane lea-kola, utupane-mane minditaka mindi nanimanga jia naya-kola, atema leanipia.*

³⁶⁻³⁷ Wuane leai-kola, balato utupane lamawuato, wamba nambato yakama mee pulupa lewa tekeko, andipa Gotena pii pepa pelene eya mindi nambanga enene guloyale peya. Pii okonemane loto, wandakali tupamanen akali oko bala mana koo tupa minalane loto, koo pua atalaeni akali tupa towa mina mindiki

* **22:21-22:** Sam 41:9; Jo 13:18-22 * **22:24:** Lk 9:46 * **22:25-27:** Mt 20:25-28; 23:11; Mk 9:35; 10:42-45; Jo 13:12-16
* **22:28-30:** Mt 19:28 * **22:32:** Jo 17:15 * **22:35:** Lk 9:3; 10:4

leaini layene eya. Akali minditupa-mane nambanga wuane pulai-kola, pii layene okone nambanga enene gulolo-peya. Tene okonena, andipa yakamato mindisa polai-angi, nuu, muni-la, yaindo, okonelapo mandiyu pupe-pene guleya. Akali mindi bala kandepa luu ai napene ateaindo, balana tonasakesa pulane oko akali waka mindimane kambo meakale salimi loto, muni molane okonemane kandepa luu mindi kambape-pene guleya leaipia.*

³⁸ Jisasato wuane lea-kola, balana disaipolo tupamane bala lamawuato, Akali Andane, nanimato kandepa luu lapo yatawa ateyama leainipia. Wuane leaikola, Jisasato atu yaluua leaipia.

Jisasato Bala Gesemani Olipi Wangiane Okona Poto, Pote Leane Oko

Matiyu 26:36-46; Maki 14:32-42

³⁹ Wuane lalu, Jisasa bala Jutusaleme tepa alu, Olipi wangiane okona ole dindi palane pua teke pea-kola, balana disaipolo tupa atu peainipia.

⁴⁰ Wangiane okonena peakaiyu lea-kola, Jisasato balana disaipolo tupa lamawuato, Sataneto yakama minu mandeke pula-kola, yakama yuunga peakolaini. Pote lo atalapa leaipia.

⁴¹⁻⁴² Wuane lalu, Jisasa bala ambingayale akali-mane yandate peyo lopape-pene mindi gulo poto, aiki lekawa pote loto, nambana Ayiane Gote, nambato tandaka nape-pene oko peya wanju olane asini mindi yando, nimbato asini okone lumbape. Nimbato wuane pula lo nambato nembo teyo tekeko, nambato nembo teyo pua napene, nimba tane nembo tele pua pipe leaipia.

⁴³⁻⁴⁴ [Jisasato wuane lo pote lea-kola, enjole mindi ati kenga atala epoto, Jisasa minu tai laya ya-kola, Jisasato lapone teke pote leaipia. Okone ang i bala yamapane kenda andane wato, pote taimane lea-kola, weno pundu balanga kili leane okomane tundupa gulo yuunga dopo lo tepa yaepia.]

⁴⁵ Jisasa bala pote lo koyo piyu, ika lalu poto, balana disaipolo tupa andea-kola, utupane-mane yamapane kendawa, limu palu ateaininga andeaipia.

⁴⁶ Andoto, Jisasato utupane lamawuato, anu peakale yakamato limu palu ateyaipe. Sataneto yakama minu mandeke pula-kola, yakama yuunga peakolaini. Ika loto, pote lo atalapa leaipia.

Jutasato Jisasa Ene Peteane Oko

Matiyu 26:47-56; Maki 14:43-50; Jone 18:3-11

⁴⁷ Jisasato wuane lo atea-kola teke, balana disaipolo alesa tupana akali Jutaso lene oko bala akali kambua towa atu epeaipia.

Jutasa bala Jisasa nunu loyale, wamba ini ingane bala ateanga mandaka epeaipia.

⁴⁸ Epea-kola, Jisasato bala lamawuato, Jutasa, nimbato Akalina Iwanane oko nunu lele okomane ene petelepe leaipia.

⁴⁹ Wuane lea-kola, balana disaipolo tupamane andeai-kola, akali epeaini tupamane Jisasa andi lolo epalaiya lo andeainipia. Andoto, utupane-mane Jisasa tipa puato, Akali Andane, nanimato akali utupa kandepa-mane yoko amape leainipia.

⁵⁰ Wuane lalu, Jisasana disaipolo mindimane pitisa akali kawane okona piape akali mindina alene tikasa-tole kandepa-mane yoko taka lo tepa yaepia.

⁵¹ Wuane pea-kola, Jisasato kondalapa lalu, akali okonena alenenga kii yata wato, mo atu yaepia.

⁵² Juta yamena akali kawanepi, pitisa akali kawanepi, lotu anda andane okona sukututi akali kawanepi, utupane-mane Jisasa andi lolo epeai-kola, balato utupane tipa puato, nambato gapomane oko yanda pimawuato, minditaka pake nalane nembototo, yakamato kandepa luupi, mulipi, utupane awuato, namba andi lolo epeyaipe leaipia.

⁵³ Ole dindi namba yakama towa atu lotu anda andane okona ende anda-pangosa ataima. Okone ang i, yakamato namba andi halapia tekeko, undupi-lene okona tai-lene okomane piape taimane peya-kola, yakamato katulo namba andi lolopeyai. Jisasato wuane leaipia.

Pitato Jisasa Anda Na-peyawane Leane Oko

Matiyu 26:57-58,69-75; Maki 14:66-72; Jone 18:15-18,25-27

⁵⁴ Jisasato wuane lea-kola, akali utupane-mane bala andi lo auwa peai-angi, Pita bala amonga-yale ata iki lama watama peapria. Utupane-mane Jisasa andi lo auwa poto, pitisa akali kawane okona andaka kolandaka leai-kola, Pita bala kamaka ateapria.*

⁵⁵ Okone ang i, akali minditupa anda okonena ende anda-pangosa ita yango, upa endo yo peteai-kola, Pita bala poto, utupane towa atu peteapria.

⁵⁶ Petea-kola, piape wanda mindimane bala andapeyo yoto, akali oo peteya oko balapi Jisasa towa atu atalapele leaipia.

⁵⁷ Balato wuane leane tekeko, Pitato wanda okona pii okone tanga loto, wanda, nambato Jisasa anda na-peyawane leaipia.

⁵⁸ Ara matili yale akali mindimane Pita andoto, nimbapi Jisasana disaipolo mindi atele lea-kola, Pitato akali okonena pii okone yano peyoto, akali, nambato bala anda na-peyawane leaipia.

* 22:36-37: Ais 53:12 * 22:54: Sam 31:11

⁵⁹ Wuane lea-kola, matili awa mindikipi mindi pea-kola, akali waka mindimane pii leyo nayu loto, akali oko bala Galili disitiki tane yako. Enene wetete, bala Jisasa towa atalapele ya leaipia.

⁶⁰ Wuane lea-kola, Pitato akali okone lamawuato, akali, nimbato aki nembo toto, wuane lelepe. Nambato akali okone nembo nateyo. Balato wuane lata ya wete, eka pauli maipa mindimane pii leaipia.

⁶¹ Eka pauli okonemane pii lea-angi, Akali Andane oko bala anda peke loto, Pita andatawu ya-kola, wamba Akali Andane okomane namba languato, andipa eka pauli maipa mindimane pii wene loyale pula-kola, ole tepoaina nimbato wandakali minditupana wenonga atoto, nambato Jisasa anda na-peyawane lolopele lo namba langiya oko enene ya lo nembo teaipia.

⁶² Wuane nembo toto, Pita bala ende kamaka poto, ai lo yamataka leaipia.

Akali Minditupa-mane Jisasa Ando Lamba Leaini Oko

Matiyu 26:67-68; Maki 14:65

⁶³⁻⁶⁴ Okone ang, Jisasa kote leakale lo minatawu ateaini akali tupamane bala lamba leainipia. Lamba loto, utupane-mane Jisasa ana lene lapalapa-mane yake pua ombo wato, bala peyalu, nimba potopesa akali gulo, akali okomane namba peleya lo naima langi leainipia.

⁶⁵ Wuane lalu, akali utupane-mane Jisasa lamba loto, pii koo waka-waka kambua kimbu pua leainipia.

Juta Yamena Kanjole Okomane Jisasa Kosimi Leaini Oko

Matiyu 26:59-66; Maki 14:55-64; Jone 18:19-24

⁶⁶ Loo tupana mana andene akalipi, pitisa akali kawanepi, akali utupanena minditupa Juta yamena kanjole okona ateainipia. Waa lea-kola, akali utupane-mane Jisasa kosimi lamakale lo epo amunguli peikola, akali minditupa-mane Jisasa utupanena wenonga andi lo awua epeainipia.

⁶⁷ Epeai-kola, Juta yamena kanjole akali kawane utupane-mane bala lamawuato, nimba Mesaya oko ateendo, nimbato naima langi leainipia. Wuane leai-kola, Jisasa atupane lamawuato, nambato yakamana pii okone yano pelewando, yakamato nambana pii okone bilipi nalolo-peyai leaipia.*

⁶⁸ Nambato pii mindi yakamanga tipa pe-wando, yakamato nambana pii okone yano peya napulu-peyai.

⁶⁹ Wuane teko, andipapi, matilimatilipi, Akalina Iwanane oko bala Gote tai

wetete okona kii tikasa pitulu-peya leaipia.
*

⁷⁰ Wuane lea-kola, Juta yamena kanjole tupu pitaka-mane bala tipa puato, nimba tane Gotena Iwanane ateyo nembo toto, wuane lelepe leainipia. Wuane leai-kola, Jisasa atupane lamawuato, yakamato namba Gotena Iwanane ateya leyai okoni leaipia.

⁷¹ Wuane lea-kola, utupane-mane loto, bala tane pii okone leya-kola, nanimato ale eyama-ko. Anu peakale akali waka mindimane wisana isatoto, bala tane Mesaya oko ateyo lalane lo nanima langeakale maliyo atamakale leainipia.

23

Pailate Wenonga Juta Yame-mane Jisasa Kosimi Leaini Oko

Matiyu 27:1-2,11-14; Maki 15:1-5; Jone 18:28-38

¹ Wuane lalu, Juta yamena kanjole tupu pitaka ika loto, Jisasa bala Pailate peteanga andi lo awua peainipia.

² Pulu, Pailate wenonga akali utupane-mane Jisasa kosimi loto, nanimato ale aimakola, akali okomane pii mindi loto, namba yakamana kinji Mesaya lene oko ateyo-ko. Yakamato takisa muni tupu Lomo tane gapomane akali kawane Sisa oko maulaini lanane. Balato Juta yame nanimana mana epene tupu minu koyalane teke leainipia.

³ Wuane leai-kola, Pailateto Jisasa tipa puato, nimba Juta yamena kinji okope leaipia. Wuane lea-kola, Jisasa atupane lamawuato, nimba tane lele okoni leaipia.

⁴ Wuane lea-kola, Pailateto wandakali kambua amunguli pua ateaini tupapi, pitisa akali kawane tupapi, utupane lamawuato, nambato akali oko kosimi lolane tene mindi ando mia naopeyo leaipia.

⁵ Wuane lea-kola, wandakali utupane-mane pii taimane wete loto, wamba akali okomane Galili disitiki okona ato tewa mana lamaiyane leainipia. Balato mana lamawuato atoto, wandakali tupanga nembotene koo minditupa mina ika layawa epoko pua atalu, matili bala Jutiya disitiki okona epeane. Andipa wali epo atoto, balato wuane pua teke ateya leainipia.

⁶ Wuane leai-kola, Pailateto utupane tipa puato, akali oko bala Galili disitiki tanep leaipia. Wuane lea-kola, wandakali mindimane Pailatena pii okone yano peyot, enene, bala Galili tane mindi ateya leaipia.

⁷ Wuane lea-kola, Pailateto Galili disitiki ando atalane akali kawane Etote okomane Jisasa ana kote oko ale ape-pene nembo teaipia. Pasopa ang, Etote balapi Jutusaleme tano okona epo atolopeya nembo

toto, Pailateto yanda yene minditupa lamawuato, yakamato Jisasa andi lo awua poto, Etote ateyanga pulupa leaipia. *

Etote Wenonga Jisasa Kosimi Leaini Oko

⁸ Jisasato metekolo piape tai minditupa pua ateya lene oko Etoteto wamba ale yaepia. Ale wato, matili Jisasato metekolo piape tai mindi pula-kola, lee-mane andokale nembo tatawa atoto, Etoteto ee ana kambua maliyo ateane okonena, balato Jisasa epeanga andoto, epele wete yaepia.

⁹ Epele wato, balato pii kambua Jisasang tipa pea-kola, Jisasato balana pii leane utupanena mindikipi mindi yano napeleai-pia.

¹⁰ Yano napelea-kola, loo tupana mana andene akalipi, pitisa akali kawanepi, utupane-mane Jisasa taimane kosimi leainipia.

¹¹ Kosimi leai-kola, Etotepi, balana ami yanda yene ateaini tupapi, utupane-mane Jisasa anda napi loto, lamba leainipia. Lamba loto, utupane-mane tono epene wetete kinji-mane piyaini okonetaka mindi balanga piya maiyu, ami yanda yene minditupa lamawuato, yakamato Jisasa andi lo awua poto, Pailate ateyanga peke lalapa leaipia.

¹² Wamba Etote, Pailate-la, okonelapo yanda-pene atalapele tekeko, Okone ang, okonelapo liyamba amene gulo atoto, epelewa ateapele-pia.

Pailateto Jisasa Ita Malamanda Okona Poyo Yuka Alapa Leane Oko

Matiyu 27:15-26; Maki 15:6-15; Jone 18:38-19:16

¹³ Jisasa bala Pailate ateanga andi lo awua peai-kola, Pailateto pitisa akali kawanepi, Juta yamena akali kawane tupapi, wandakali ongane ateaini tupapi, utupane pitaka epo amunguli piyapa leaipia.

¹⁴ Epo amunguli peai-kola, Pailateto utupane lamawuato, wamba yakamato akali oko andi lo awua namba atalo okona ipupia leaipia. Yakama epoto, akali okomane Juta yame wandakali nanimana mana epene tupa minu koyalane lo namba langiyai. Tene okonena, yakamana wenonga nambato pii kambua balanga tipa piyo tekeko, akali oko kosimi lolane tene mindikipi mindi ando mia napiyo oko yakamato andalai okoni.

¹⁵ Etotetopi, Jisasa kosimi lolane tene mindi ayia pitete wato, bala naniman ateyamanga peke leakale lala ya oko nanimato andeyama okoni. Akali oko balato koo mindikipi mindi napiipyi yako. Tene andokona, nanimato bala peyo ome lamakalepe.

¹⁶ Tene koo mindi balanga ya napeya-ko. Ami yanda yene mindimane bala kunjumane pelekale lokale. Peyola-kola, nambato bala tita lo tepa wakale leaipia.

¹⁷⁻¹⁹ Wamba akali Batapasa lene mindimane Jutusaleme gapomane oko yanda pimawuato, akali mindi peyo ome lea-kola, gapomane okomane bala andi leaipia. Wuane tekeko, Pailateto Jisasa tita lo tepa wakale lea-kola, wandakali amunguli pua ateaini tupa pitaka-mane pii taimane loto, Batapasa tita lo tepa alu, Jisasa andi lo awua poto, ita malamanda okona peyo yuka aa leainipia.

²⁰ Utupane-mane wuane leaini tekeko, Pailateto Jisasa tita lo tepa wakale nembo toto, pii wamba leane okone teke dee lapone lolo-peke leaipia.

²¹ Wuane lea-kola, wandakali ateaini tu-pamanne pii taimane latawa yapo wato, Jisasa ita malamanda okona peyo yuka aa laka peainipia.

²² Wuane laka peai-kola, ole tepone gulo Pailateto wandakali utupane lamawuato, balato mana koo andoko minapria-kola, nambato bala ita malamanda okona peyo yuka wakalepe leaipia. Akali oko peyo ome lolane tene mindi nambato ayia pitete wato kondalo. Anu peakale nambato bala peyo ome lokalepe. Ami yanda yene mindimane bala pelekale lokale. Peyola-kola, nambato bala tita lo tepa wakale leaipia.

²³ Pailateto wuane lea-kola, wandakali utupane-mane pii taimane wete loto, Jisasa ita malanda okona peyo yuka aa leaini okonemane Pailatena pii leane okone ango yaepia.

²⁴⁻²⁵ Ango yai-kola, Pailateto utupanena pii okone wato minukale nembo teapia. Wamba Batapasato gapomane oko yanda pimawuato, akali mindi peyo ome leane tekeko, Pailateto Juta yamena pii wato minuto, akali okone tita lo tepa yaepia. Wuane piyu, Pailateto Juta yamena pii wato minuto, Jisasa ita malamanda okona peya yuka alapa loto, ami yanda yene tupanga mayaepia.

Jisasa Bala Ita Malamanda Okona Poyo Yuka Yaini Oko

Matiyu 27:32-44; Maki 15:21-32; Jone 19:16-27

²⁶ Ami yanda yene tupamane Jisasa bala ita malamanda okona peyo yuka oyale, bala atu Jutusaleme tepa alu, peainipia. Peai-kola, Saitini tano okona tane akali Saimone lene mindi Jutusaleme epoyale epea-kola, asininga malanda yainipia. Malanda wato, ita malamanda Jisasato awua epeane okone

Saimoneto aiyakale lo, ami yanda yene tupamane Saimonena paianenga mo ayia yainipia. Mo ayia yai-kola, Saimoneto ita malamanda okone aiyu, Jisasa pea okona masianenga watama peaipia.

²⁷ Wandakali kambua Jisasana masianenga watama peaini utupanena wanda kambua-mane ondo wato, ai andane lo yamataka lama peainipia.

²⁸⁻³¹ Wanda utupane-mane ai andane lo yamataka lama watama epeai-kola, Jisasa anda-peke loto, wanda utupane lamawuato, namba dini epene lialane ita saka gulo ateyo-kola, kenda-pene andane okone nambanga epeyea leaipia. Jutusaleme tane wandakali yakama dini liya napiyane ita kapu gulo ateyai-kola, kenda-pene anu-pene mindi yakamanga epolopeya yape. Matili yanda-pene akali tupamane Jutusaleme tano oko minu koyolo epola-angi, kenda-pene andane wete mindi yakamanga epolopeya. Okone ang, wandakali-mane pii mindi loto, andopanemanne andu nanola-kola, wanda pitulai tupapi, wanda andopane mandi napene pitulai tupapi, wanda kinambuli pitulai tupapi, utupane palaka pupe-pene pite te naolo-peyama nembo toto, epele ape-pene lolopeyai. Kenda-pene andane okone epola-angi, Jutusaleme tane wandakali tupamane ati peleya tupa lamawuato, yakamato lopayia epoto, nanima peyo pulu piyapa lolopeyai. Utupane-mane wangiane peleya tupa lamawuato, inyu epoto, nanima peyo ombo alapa lolo-peyai. Jutusaleme tane wanda yame yakamato namba ondo wato, ai na-lalapape. Yakama tanepi, yakamana andopanepi, utupane ondo wato, ai lalapa. Jisasato wuane leaipia.*

³² Okone ang, koo piyapele akali lapo Jisasa mandaka ita malamanda laponga peyo yuka oyale, ami yanda yene tupamane akali okonelapo andi lo awua peainipia.

³³ Utupane-mane yuu kawane kulini lene okona peakaiyu loto, Jisasa bala ita malamanda mindina peyo yuka yainipia. Wuane piyu, utupane-mane koo piyapele akali okone-lapona mindi Jisasana kii tikasa ita malamanda mindina peyo yuka alu, mindoko balana kii koyasa ita malamanda mindina peyo yuka alu peainipia.

³⁴ Utupane-mane Jisasa ita malamanda okona peyo yuka yai-kola, balato pote loto, wandakali utupa-mane namba api ateyape nembo natene ato, namba peyo yuka eyai okonena, Ayiane Gote nimbato

wandakali utupana mana koo oko apia maipe leaipia. Okone ang, ami yanda yene tupamane Jisasana tona mindiki-mindiki lo mia-makale loto, laki leainipia.*

³⁵ Okone ang, wandakali ongane ateaini tupamane andatawa ateai-kola, Juta yamen a kawane tupamane Jisasa lamba loto, balato wandakali waka tupa moyala piako. Goteto bala Mesaya oko ateakale lea yando, bala tane katulo taputi pua meakale leainipia.*

³⁶⁻³⁸ Wamba Jisasa bala peyo yuka yaini okone ang, akali mindimane akali oko bala Juta yamen a kinji oko ateya lo pepa peyalu, Jisasana ita malamanda okona kawanenga yuka yaepia. Matili ami yanda yene tupamane mandaka epoto, pepa okone dii lo andoto, Jisasa lamba loto, nimba Juta yamen a kinji ateedo, nimbato nimba tane molo peke lape leainipia. Wuane lalu, utupanemanne bala tipa puato, nimbato ipa waene kaa-pene pinika lene oko nolape leainipia.*

³⁹ Koo piyapele akali lapo peyo yuka atanate ateapele okone-lapona mindimane Jisasa lamba loto, nimba Mesaya oko ateedo, nimba tane taputi pua mialu, nalipapi taputi pua miape leaipia.

⁴⁰⁻⁴¹ Wuane lea-kola, koo piyapele akali mindoko-mane bala laiya loto, nimbato Gote yuku naene, wuane lelepe leaipia. Nalipato mana koo minalapele tupana yole koo meyapa oko miape-pene teke meyapako. Akali okomane koo mindikipi mindi napiopia-kola, Goteto kenda-pene nalipa geya okopene teke balanga mee maiya leaipia.

⁴² Wuane lalu, balato Jisasa lamawuato, Jisasa, nimba kinji gule-angi, nimbato namba nembo tolo-peke lape leaipia.

⁴³ Wuane lea-kola, Jisasato bala lamawuato, nimbato pii enene wete mindi nimba langeyo. Andipa teke nimba namba towa atu Patandaisa yuu epene okona atolopeyapa leaipia.

Jisasa Omeane Oko
Matiyu 27:45-56; Maki 15:33-41; Jone 19:28-30

⁴⁴⁻⁴⁶ Otonga oto kulini okona nai oko undupiloto, yuu tupa pitaka undupilamangua atane angu atama peaipia. Matili ole-lene siti kiloko lea wete, Jisasato pii taimane loto, Ayiane Gote, nambana tandini oko nimbania kii tokonga yata eyo lalu, omeaipia. Omea-kola, lotu anda andane okona lapa-lapa andane yuka atane ateane oko kawanenga ato tewa, atutu kao lo lapo pea-kola, yuu oko tii pulu-peke leaipia.*

* ^{23:28-31:} Lk 21:23-24; Ose 10:8; Lap 6:16-17 * ^{23:34:} Ais 53:12; Sam 22:18 * ^{23:35:} Sam 22:7-8 * ^{23:36-38:} Sam 69:21 * ^{23:44-46:} Lk 8:1-3

⁴⁷ Mangene andane peane utupane pitaka andoto, ami yanda yene ando atalane akali okomane Gotena gene oko laiyu loto, enene wete, akali oko bala akali tika-pene epene wetete mindi atalaeya leaipia.

⁴⁸ Wamba ami yanda yene tupamane Jisasa peyo yuka olo peaini okone angi, wandakali kambua-mane andolo peainipia.

⁴⁹ Okone angi, Jisasa towa epelewa atene wandakali tupapi, Galili disitiki okona atalu, Jisasa watama epeaini wanda tupapi, utupane pitaka amonga-yale atoto, mangene utupane andatawe ateainipia.

*Josepeto Jisasa Mali Peane Oko
Matiyu 27:57-61; Maki 15:42-47; Jone 19:38-42*

⁵⁰⁻⁵¹ Wamba Jutiya disitiki tano Atimatiya okona tane Josepe lene mindi balana yuu tene okone tepa alu epoto, Jutusaleme tano okona ateaiapia. Balato mana epene tikapene tupa minu atoto, Goteto wandakali tupa ando atoto epeakale lo maliyo ateaiapia. Bala Juta yamena kanjole okona ateane tekeko, kanjole okonena akali waka tupamane Jisasa omeakale leai-kola, balato utupanena pii leaini tupapi, mana mineaini tupapi, utupane atu yaluva naleaipia.

⁵²⁻⁵⁴ Juta yame wandakali tupamane anate-lene Sambasa oto oko andamakale nembo toto, pitaka taka wamba ini mandeke piyaini oto oko epea-kola, Jisasa omeaipia. Sambasa oko wamba mandaka epea-kola, Josepe bala Pailate ateanga poto, Jisasa umbaini oko namba gulape lo tee lea-kola, Pailateto atu yaluva leaipia. Wuane lea-kola, Josepeto Jisasa umbaini oko ondo yuunga tepa wato, lapa-lapa epene wete mindimane yake pua ombo wato, awua peaiapia. Wamba akali minditupa-mane wandakali mali pulane panda wenene mindi ana ati mindina kua peaini tekeko, okonena wamba wandakali mindi mali naapeainipia. Josepeto Jisasa umbaini oko awua poto, mali okonena yata yaepia.

⁵⁵ Wamba wanda minditupa Galili disitiki okona atoto, Jisasa watama epoto, Jutusaleme epeainipia. Matili Josepeto Jisasa mali pulu pe-aangi, wanda utupane-mane watama poto, Jisasa umbaini oko wua pua yata ya lo andeaini-pia.

⁵⁶ Andalu, wanda utupane yakama Jutusaleme peke loto, matili wele tundumpene tupa Jisasa umbaininga ayia olo makale nembo toto, wele utupane mo mandeke peainipia. Mandeke piyu, loo oko wato minuto, Sambasa angi utupane yakama mee oto mo peteaini-pia.*

24

*Jisasa Bala Malinga Ika Leane Oko
Matiyu 28:1-10; Maki 16:1-8; Jone 20:1-*

¹ Sande angi upa pitane wete wanda utupane yakama ika loto, wele tundumpene tupa mandeke pua yata yaini tupa mo mandiyu, Jisasa mali pitane ateane okona peainipia.

² Poto andeai-kola, Jisasana mali asia lomba tuma peane ana pata andane wete oko minu pendeke layene yaepia.

³ Pendeke layene ya-kola, wanda utupane-mane mali ana anda okonena kolandaka loto, andeai wete, Jisasana umbaini oko mali okonena nayanga andeaini-pia.

⁴ Naya-kola, balana umbainioko aninga eyape lo nembo kambua toto, andeai wete, wamba kapoyale akali lapo utupane ateaiinga mandaka ateapele-pia. Akali okonelapo liyambana tona peapele tupa tii wetete piyoko pene ateapi-kola, wanda utupane-mane akali okonelapo andoto, yuku-mane omeainipia.

⁵⁻⁷ Yuku-mane omoto, wanda utupane yakama anda yuunga lo ateai-kola, akali okonelapo-mane wanda utupane lamawu-ato, wamba Jisasa bala yakama towa atu Galili disitiki okona ateai-angi, balato yakama languato, matili akali mindimane Akalina Iwanane oko ene pitulu-peya leaipia. Ene pitulu-kola, koo piyaini akali minditupa-mane bala ita malamanda okona peyo yuka olopeyai. Peyo yuka olai-kola, baia omalu, ole teponena malinga ika lolopeya lo balato yakama langea oko yakamato nembo tolo-peke lalapa. Wamba balato wuane leane pua teke, andipa bala malinga ika lalu pala. Bala mali okona ya naopeya-ko. Anu peakale yakamato akali saka ateya okone wandakali omene yalane mali okona ayia peyaipe leapelelia.*

⁸⁻¹⁰ Enjole okonelapo-mane wuane leapi-kola, Makatala tane wanda Matiya okopi, Jemesa angini Matiya okopi, wanda Jowanapi, wanda waka utupane towa atu epeaini tupapi, utupane pitaka-mane enjole okone-lapona pii leapele tupa ale wato, pii Jisasato wamba leane utupane nembo tolo-peke leainipia. Nembo tolo-peke lalu, wanda utupane-mane Jisasa mali okone tepa alu peke loto, Jisasa mali okona minditaka lee-mane andeaini tupapi, pii ale yaini tupapi, utupane pitaka aposolo akali masia tupapi, Jisasa lo bilipi lene wandakali waka tupapi, utupane pitaka lamai-yainipia.

¹¹ Lamai-yaikola, wandakali utupane-mane pii utupane ale wato, wanda

utupane-mane keeene gulo pii okone leyai nembo toto, pii leaini tupa bilipi naleainipia.

¹² Wandakali utupane-mane wuanembo teaini tekeko, Pita bala ika loto, Jisasana mali okona taimane poto, tombawua loto, andandaka lea wete, Jisasamali okonena ya napeanga andeaopia. Jisasa bala mali peaini-angi, lapa-lapa mindimane bala puta puu ombo yaini okone angu tinga layene mali pango okona yanga andeaipia. Andoto, anu piya yape lo Pita bala nembo kambua tama peke leaipia.

*Lapo Akali-mane Jisasa Asininga Andeapele Oko
Maki 16:12-13*

¹³ Ole okone angi teke, Jisasa lo bilipi lene lapo akali Jutusaleme tepa alu, tano anako Emeasa lene okona moyale asia peapelepia. Tano okone Jutusaleme mandaka-yale kilomita masiapi mindi moyale asia peapelepia.

¹⁴ Tano okonena moyale, akali okonelapomane asininga poto, mangene peane tupa temane lo pii lalawa pima peapelepia.

¹⁵ Pii lama peapi wete, Jisasa bala akali okonelapo wato minalu, akali okonelapo towa mina mindiki loto, atu peainipia.

¹⁶ Atu peaini tekeko, minditaka mindimane akali okone-lapona lene oko mo ombo ya-kola, akali okonelapo-mane Jisasa atu peyama lo anda napene peapelepia.

¹⁷ Akali okonelapo-mane pii lalawa pima peapi-kola, Jisasato okonelapo tipa puato, asininga liyambato aki pii mindi lalawa puu lama peyapipe leaipia. Wuane lea-kola, akali okonelapo-mane mini kenda wato, asia puu napene, mee ongane atoto, weno omo ateapele-pia.

¹⁸ Atoto, akali okone-lapona mindigene Kilopasa lene okomane Jisasana pii leane okone yano peyoto, satete ateyama okona mangene kambua wete pipia leaipia. Mangene kambua wete pipia-kola, Jutusaleme yuu okona wandakali ataimata tupa pitaka-mane alewa nemboto ateyama-ko. Nimba angu ale naene, opene mindisa atalu epelepe leaipia.

¹⁹ Wuane lea-kola, Jisasato akali okonelapo tipa puato, mangene aki mindi pipiape leaipia. Wuane lea-kola, akali okonelapo-mane balana pii okone yano peyoto, wandakali pitakana wenongapi, Gotena wenongapi, Nasatesa tane Jisasa bala potopesa akali enene wete mindi atoto, metekolo piape tai-lene tupa piki puato, Gotena pii taimane lamaiki peane leaipia.

²⁰⁻²¹ Balato Gotena piape okonelapo piki puu atea-kola, bala potopesa akali epolopeya layene okone epo atoto, naniman

Isatale tane tupa moyo ateya nembo tema. Wuane tekeko, pitisa akali kawane tupapi, nanimana akali kawane tupapi, utupane-mane bala kosimi loto, gapomane okomane bala peyo ome leakale lo maipiai-kola, ami yanda yene tupamanne bala ita malamanda okona peyo yuka apiai-ko. Bala mali pitane ateya-kola, andipa ole tepone guleya. *

²²⁻²³ Andipa upa pitane wetete nanimayame wanda minditupa-mane Jisasana mali okona poto andalai-kola, balana umbaini oko mali okonena ya napiya yala. Ya napiya-kola, wanda utupane-mane peke loto, nanimayame wanda minditupa-mane Jisasana mali okona poto andalai-kola, enjole lapo atalapi yala lalai. Enjole okonelapomane Jisasa bala saka ateya lalapi loto, wanda utupane-mane nanimayame langiyai-kola, nanimato pii utupane pitaka ale wato, moko andane lalama.

²⁴ Moko loto, nanimayame minditupamanne Jisasana mali andolo palai-kola, pitaka taka wanda utupane-mane lalai tupa enene lalai ya lo andalai yala tekeko, akali utupane-mane Jisasa bala angini andanapiyai yala leapeleplia. *

²⁵⁻²⁶ Wuane leapi-kola, Jisasato akali okonelapo tipa puato, Kataisa balato tandaka andane wamba ini nalu, matili bala gene andane miape-pene oko liyambato nembo nateyapipe. Wamba potopesa akali tupamanne loto, Kataisato kenda-pene kambua awua atalu, matili bala omalu, ika loto, ati kenga polopeya leainipia. Anu peakale liyamba akali mini napalene gulo atoto, potopesa akali tupamanne pii leaini utupane pitaka kapoyale bilipi naleyapipe leaipia. *

²⁷ Wuane lalu, Jisasato pii wamba Mosesapi, potopesa akali waka tupa, utupane-mane bala ando pepa peleaini tupa pitakana tene tupa lo pana wato, akali okonelapo lamai-yaepia. *

²⁸ Jisasato akali okonelapo pii mana lamaima poto, Emeasa tano okona mandaka yale pulu, yuu waka mindisa moyale peapipla.

²⁹ Moyale pea-kola, akali okonelapomane Jisasa lamauwato, ole loyale, nai baa andaka peya-ko. Nalipa towa palimakalenga, nimba puu napene, kondaa leapeleplia. Wuane leapi-kola, Jisasa bala akali okonelapo towa palimakale lalu, andaka poto, peteaini-pia.

³⁰ Andaka pituto, matili akali okonelapo towa tomo noyale, Jisasato betesa mindi moto, Gote wayu pele lo pote lalu, betesa okone konde loto, akali okonelapo neakale maiyapia.

* ^{24:20-21:} Lk 19:11; Ap 1:6 * ^{24:24:} Jo 20:3-10 * ^{24:25-26:} Lk 9:21-22 * ^{24:27:} Sam 22:1-21; Ais 53

³¹ Jisasato betesa maya wete, akali okone-lapona lene tii pea-kola, akali okonelapo-mane bala Jisasa ya lo andeapele-pia. Andeapi-kola, akali okone-lapona wenonga okone ang i teke Jisasa bala kapoyale latako peapipia.

³² Latako pea-kola, akali okonelapo liyambato pii lalawa puato, wamba nanima asini epalama-angi, balato Gotena pii pepa pelene eya minditupana tene tupa nalipa langiya okomane nalipana yamapanne mina ika laya ala okoni leapelepia.

³³ Wuane lalu, okone ang i teke liyamba ika lalu, Jutusaleme peke loto, Jisasana disaipolo alesa akali tupapi, wandakali waka minditupapi, utupane pitaka amunguli pua ateainga andeapili-pia.

³⁴ Andeai-kola, wandakali amunguli pua peteaini tupamane akali okonelapo lamawuato, enene wete, bala malinga ika lala-kola, Saimoneto andala yala leainipia.*

³⁵ Wuane leai-kola, akali okonelapo-mane wandakali utupane lamawuato, nalipa Emeasa yuu okona moyale palapakola, asininga Jisasato pii minditupa nalipa langiyu, balato betesa konde loto, nalipa giyu piya-kola, nalipato bala Jisasa ya lo andalapa leapelepia.

Jisasato Balana Disaipolo Tupa Piape Pulu Pulupape Leane Oko
Matiyu 28:16-20; Maki 16:14-18; Jone 20:19-23

³⁶ Akali okonelapo-mane pii utupane lamawuwa ateapi wete, Jisasa bala wandakali utupanena tombenenga epo ateaipia.

³⁷ Epo panawa atea-kola, wandakali peteaini utupane-mane bala andoto, balana tandini epo ateya nembo toto, yuku-manomeainipia.*

³⁸⁻³⁹ Yuku yai-kola, Jisasato utupane lamawuato, anu peakale yakamoto namba tandini angu epeya lo nembo kambua toto, yukuwa ateyaipe. Nambana tandini oko angu ipupia-yale, umbaini kulinipi nambana ateya okopene ata napiapia-yaleko. Yakamana kii-mane namba mina andalapa. Namba Jisasa ateyo. Nambana kini kenengapi, nili peyapiapi matikini oo eya utupa yakamoto andalapa.

⁴⁰ [Wuane lalu, Jisasato balana kini kenengapi matikini yane tupa wandakali peteaini utupanenga andawa leaipia.]

⁴¹ Wandakali peteaini utupane-mane balana kini keneipi nili peleaini matikini yane utupane andoto, epele yaini tekeko, Jisasa bala anu pua ika lalu, nanima peteyamanga epo ateyape lo tatake wato, akali epo ateya

oko bala Jisasa ya lo bilipi naleainipia. Utupane-mane Jisasa bala enene wete epo ateya lo bilipi naleai-kola, Jisasato utupane tipa puato, tomo nolane mindi eyape leaipia.

⁴² Wuane lea-kola, utupane-mane pisa yangene mindi yaini oko bala mo mayainipia.

⁴³ Mayai-kola, balato pisa okone mo neakola, utupane-mane andeaini-pia.

⁴⁴ Andeai-kola, balato wandakali utupane lamawuato, wamba Mosesapi, potopesa akali waka tupapi, utupane-mane namba andayo pii kambua pepa peyo yata yaini leaipia. Akali waka minditupa-manepi pii okonepene teke kambua minditupa buku Sama okona pepa peyo yata yainipia. Wamba namba yakama towa atu atema-angi, namba andayo pii pepa peyo yata yaini utupane pitaka matili nambanga enene gulolo-peya lo nambato yakama langewa-ko. Andipa utupane nambanga enene guleya leaipia.*

⁴⁵ Wuane lalu, utupane-mane Gotena pii pepa pelene eya utupanena tene tupa nembo teakale loto, Jisasato utupane moyaeopia.

⁴⁶ Utupane moyoto, balato utupane lamawuato, Gotena pii pepa pelene eya mindimane loto, Mesaya bala tandaka andane noto, omalu, ole teponena malinga bala ika lape-pene.

⁴⁷ Malinga ika lola-kola, Jutusaleme ato tewa, akali minditupa-mane Mesaya okona gene oko loto, wandakali yame palu pula tupa pitaka lamawuato, Goteto yakamana mana koo tupa apia-geakalenga, yakama yamapanne peke lalapape lape-pene layene eya.

⁴⁸ Gotena pii layene eya pua, namba omalu, malinga ika lalu, saka ateyo oko yakamoto lee-mane andeyai-ko. Yakamoto piape okone pua atalapape.*

⁴⁹ Yakamoto pii okone wandakali pitaka lamai-yapale nembo toto, wamba nambana ayiane okomane potomisa pii mindi yakama languato, matili nambato Oli Sipitisa oko yakama gukale lea okoni. Nambato Oli Sipitisa okone yakamanga epeakale lolowa-kola, bala atti kenga atala epoto, yakama minu tai laya olopeya-ko. Oli Sipitisa okone yakamanga epeakale loto, yakama Jutusaleme tano okona maliyo atalapape. Oli Sipitisa oko epola-kola, yakamoto nambana pii oko wandakali pitaka lamalu pulupape. Jisasato wuane leaipia.*

Jisasa Bala Ati Kenga Peane Oko
Maki 16:19-20; Aposolo 1:9-12

* 24:34: 1Ko 15:4-5 * 24:37: Mt 14:26 * 24:44: Lk 9:21-22 * 24:48: Jo 15:27; Ap 1:8 * 24:49: Jo 14:16; 15:26;

⁵⁰ Matili Jisasato balana disaipolo tupa lamialu, Jutusaleme tepa alu, Betani tano okona mandaka yale peainipia. Yuu okonena atoto, Jisasato balana kini okolapo ya loto, balana disaipolo tupa belesini mindi mayaepia.

⁵¹ Belesini mawua atea-kola, Goteto Jisasa bala ati kenga epeakale loto mea-kola, bala ati kenga iyu okona peaipia.

⁵² Pea-kola, utupane-mane bala lo lotu lalu, epele wete wato, Jutusaleme peke leainipia.

⁵³ Peke lalu, ole dindi lo utupane-mane lotu anda andane okona atoto, Gotena gene oko laiyu lo ateainipia.

JONE

Gotena Pii Layene Epene Joneto Pepa Peleane Oko

*Saka Atapowa Ataya Alane Pii Oko Akali
Guleane Oko*

¹ Wamba wetete yuu ati-la naya-kola, Gotena pii oko ateapia. Pii oko bala tane Gote atoto, bala Ayiane Gote oko towa atu ateapele-pia.*

² Yuu ati-la ungi lea-angi, pii oko bala Ayiane Gote towa atu ateapele-pia.

³ Goteto minditaka eya tupa pitaka pii okomane angu yakale lea-kola, pitaka taka yaepia. Minditaka eya tupa pitakana mindikipi mindi asini waka mindina nayaepia. Jia.*

⁴ Balanga saka atapowa atene oko yene. Balanga saka atapowa atene okonemane wandakali tupa mo tii piya yaepia.*

⁵ Tii-pene oko bala yuu undupi-lene okona atoto, tii pua ateya tekeko, undupi-lene okonemane tii-pene oko sia mina napiyane. Jia.*

⁶ Goteto akali mindi epeakale lea-kola, bala epo ateapia. Akali okonena gene oko Jone.*

⁷ Wandakali pitaka-mane balana pii ale wato, tii-pene oko lo bilipi leakale nembo toto, Joneto tii-pene oko bala akali oko lo wandakali tupa lamalu epea.

⁸ Jone bala tii-pene oko jia. Bala wisanisa mindi atoto, tii-pene oko bala akali oo eya oko loto, wandakali tupa lamalu epea.

⁹ Gotena pii oko bala tii-pene enene oko ati kenga atala yuunga epo atoto, wandakali pitaka mo tii piyawa atalane.*

¹⁰ Balato yuu ati-la yakale lea-kola, yuu ati-la okolapo yaepia. Bala yuu okona ateane tekeko, yuunga wandakali tupamanne bala andoto, akali oko bala Mesaya oko ateya nembo nateai.

¹¹ Akali okone balana yuu tene okona pea-kola, bala yame wandakali tupana kambua-mane bala Mesaya oko epeya lo lamia napeai.

¹² Wuane tekeko, wandakali minditupamanne bala lo bilipi loto, bala utupanena Akali Andane oko ateya leai-kola, Goteto utupane balana andopane tupa gulaya yane.

¹³ Ayiane angini-lamane andopane mindi liyambana tundupa paini mandipakale nembo toto, mindi mandiyapele tekeko,

Goteto wandakali tupa balana andopane tupa guleakale nembo toto, mana okone wato mina napeaipia. Jia. Bala tane-mane wandakali utupane balana andopane tupa gulaya alane.*

¹⁴ Gotena pii oko bala akali mindi gulo atoto, nanima aposolo akali tupana tombe-nenga epo atea. Nanimato andema-kola, bala Ayiane Gotena iwanane mindiki atoto, tai-lene wete atea. Goteto bala epeakale lea-kola, balato wandakali tupa ondo wete wato, wayumane moyo ateanga, nanimato andemane. Gotena pii enene oko balanga tumbi latane atea.

¹⁵⁻¹⁸ Enene, wandakali mindikipi mindi-mane Ayiane Gote oko alu mindikipi mindi lee-mane anda napeaini tekeko, balana Iwanane mindiki oko bala Ayiane Gote towa atu atlane okonemane Gote bala okopene lo nanima andawa leane. Wamba Goteto balana loo tupa Mosesanga maiyakola, Mosesato Gotena loo utupane Juta yame wandakali nanima geane tekeko, Jisasa Kataisato nanima ondo wete wato, nanima mee moyoto, Gotena pii enene oko nanima langea. Gotena ondo ene oko balanga tumbi latane atea-kola, balato nanima pitaka ondo wete wato, mee moyaka pua atea. Ipa peya-maiyane akali Joneto Jisasa epeanga andoto, wandakali tupa pii taimane lamawuato, wamba nambato akali mindi matili epolopeya lo yakama langewa okoni leaipia. Angini-mane namba mandi napenenga, akali okone bala wamba ini bulupane ateapia. Wuane nembo toto, nambato akali okone bala nambana Akali Andane oko atolopeya lo yakama langewa okoni. Akali okone bala andipa amo epeya oko andalapa. Joneto wuane leaipia.*

*Ipia Peya-maiyane Akali Joneto Gotena
Pii Leane Oko*

Matiyu 3:1-12; Maki 1:7-8; Luku 3:15-17

¹⁹ Alu mindi, Jutusaleme tane Juta yame wandakali tupamanne pitisa akalipi, Lipai yame akalipi, utupanena minditupa lamawuato, ipa peya-maiyane akali Jone oko bala ateyanga poto, yakamato nimba apipe lo bala tipa piyapa leainipia. Wuane leai-kola, akali utupane-mane poto, bala tipa peai-kola, balato wisanisa mindi atoto, utupanena pii okone yano peleaiapia.

²⁰ Utupane-mane bala lamawuato, nimba Mesaya oko jia yalua leai-kola, balato utupanena pii okone tanga nalene, pii tika pua loto, enene, namba Mesaya oko jia leaipia.

* 1:1: Jo 17:5; 1Jo 1:1-2; 1Lap 19:13 * 1:3: 1Ko 8:6; Kol 1:15-17; 1P 1:2 * 1:4: Jo 5:25-27 * 1:5: Jo 3:19-21 * 1:6: Mt 3:1-4; Lk 1:13-17,76-79 * 1:9: Jo 8:12 * 1:13: Jo 3:3-6; Pl 2:7; Jo 2:11; 1Pl 1:22-25 * 1:15-18: Ek 33:20; 34:28; Lom 6:14; Jo 6:44-46; 1Ti 6:13-16

²¹ Jia lea-kola, utupane-mane bala tipa puato, nimba Mesaya oko jia yando, nimba potopesa akali Ilainja okope leai-kola, balato namba akali okone jia leaipia. Utupane-mane bala tipa puato, nimba akali potopisa mindi epolopeya layene okope leai-kola, balato jia leaipia.*

²² Jia laka pea-kola, utupane-mane bala lamawuato, nimba api atelepe lo nimba tipa pulu pulupa lo nanima langiyai akali utupane lamai-makaleko. Nimba apipe. Nimbato wua piyawane lo nimba tane nanima langi leai.

²³ Wuane leai-kola, balato utupane lamawuato, wamba potopisa akali Aisayato pii mindi loto, akali mindimane wandakali napalene yuu mindina atoto, yakamato Akali Andane okona asini oko mo tika piyapa lo atolopeya layene eya. Nimbato pii okone lo atalawane lea.*

²⁴ Wamba Patasai tupamane akali utupane Jone ateanga peakale leai-kola, balato pii okone utupane lamaiya.

²⁵ Lamaiya-kola, utupane-mane bala tipa puato, nimba Mesaya oko yandopi, Ilainja yandopi, potopisa akali epolopeya oko yan-dopi, utupanena mindi ata napeendo, anu peakale nimbato wandakali tupa ipa peyamawua atelepe leai.

²⁶⁻²⁷ Wuane leai-kola, Joneto utupanena pii okone yano peyoto, nimbato ipa-mane angu wandakali tupa ipa peya-maiyawane lea. Akali mindi matili epolopeya lewa oko balato namba sia minulu-peya. Namba akali gene nayene okomane balana suu kee pula okona eyaka oko tita lolane namba akali epene mindi jia. Bala yakama tombenga epo ateya tekeko, yakamato bala akali oko ya lo anda napeyai lea.*

²⁸ Jone bala Betani yuu okona atoto, pii utupane lea. Betani yuu okone ipa Jotane okona amo yangi yene okonena mandaka Joneto wandakali tupa ipa peya-mawua atea.

Joneto Jisasa Bala Gotena Iwanane Ateya Leane Oko

²⁹ Anate-lene ipa peya-maiyane akali Joneto Jisasa epeanga andoto, wandakali ongane ateaini tupa lamawuato, Gotena sipisipi andopane epeya oko andalapa lea. Balato yuu okona wandakali tupana koo tupa apia-malu epeya.*

³⁰ Wamba nimbato yakama languato, namba angini-mane namba mandi nape-nenga, akali matili epolopeya oko bala wamba ini bulupane ateane mambele,

bala nambana lipinga gulo atolopeya lewa okoni. Akali epeya oko bala akali okone.*

³¹ Wamba nimbato akali okone bala Gotena Iwanane ateya lo anda napewane tekeko, Isatale tane wandakali tupamane bala akali oko ya lo andeakale nembo toto, nimbato utupane ipa peya-malu epewane lea.

³²⁻³³ Wuane lalu, Jone bala wisana mindi atoto, wamba nimbato akali okone bala Gotena iwanane ateya lo anda napewane tekeko, Goteto namba languato, nimbato ipa-mane wandakali tupa ipa peya-malu puu lea. Ipa peya-mawua atole-kola, matili Oli Sipitisa oko bala akali mindinga epo pitulanga nimbato andolopele. Akali okonemane piape puato, wandakali tupa Oli Sipitisa okomane ipa peya-malupeya lea. Goteto wuane lea-kola, nimbato Jisasa ipa peya-maewa okone angi, Oli Sipitisa oko eka uya gulo, ati kenga atala yuunga epoto, balanga epo peteanga andewa.*

³⁴ Andoto, namba wisana mindi atoto, akali okone bala Gotena Iwanane ateya lewa. Joneto wuane lea.*

Jisasato Disaipolo Tepo Bulupane Tewa Meane Oko

³⁵ Anate-lene Jone balana disaipolo lapo akali towa atu dee lapone yuu okonena ataei.

³⁶ Joneto Jisasa asia epo peanga andoto, Gotena sipisipi andopane oko bala amo epo peya oko andalapa lea.*

³⁷ Balato wuane lea oko ale wato, Jonena disaipolo okonelapo-mane Jisasa watama peapi.

³⁸ Watama peapi-kola, Jisasato anda-peke loto, okonelapo bala watama epeapinga andoto, liyambato aki mindi aiya pima epeyapipe lea. Wuane lea-kola, okonelapo-mane bala tipa puato, Lapai, nimba aninga pangilinipe leapi. Iputu pii loto, gene Lapai okone mopeke loto, tisa lalaiani.

³⁹ Aninga pangilinipe lo tipa peapi-kola, balato andolo ipulupa lea. Wuane lea-kola, okonelapo-mane bala towa atu poto, bala paleane anda oko andeapi. Okone angi, ole-lene taeme poo kilokopi mindi lea-kola, utulu okonena okonelapo bala towa anda okonena atu paleai.

⁴⁰ Wamba ipa peya-maiyane akali Joneto Jisasa andayo Gotena sipisipi andopane oko bala amo epo peya oko andalapa lea-angi, lapo akali-mane balana pii okone ale alu, Jisasa watama peapele. Akali okone-lapona

* **1:21:** Lo 18:15,18; Mt 11:14 * **1:23:** Ais 40:3 * **1:26-27:** Jo 1:15-18 * **1:29:** Ais 53:6-7; 1Pi 1:18-19 * **1:30:** Jo 1:15-18 * **1:32-33:** Mt 3:16 * **1:34:** Mt 3:17 * **1:36:** Jo 1:29 * **1:40:** Mt 4:18-20

mindoko bala Saimone Pita amene Endutu oko.*

⁴¹ Anate-lene balato balana amene Saimone okone wamba ini bulupane aiya pua andoto, nalipato Mesaya oko andaipa leaipia. Gene Mesaya oko mopeke loto, Gitiki pii lo Kataisa lalaini.

⁴² Nalipato Mesaya oko andaipa lalu, Endutu balato Saimone lamo atu Jisasa ateanga pea-kola, Jisasato bala andatawa yoto, nimba Jone iwanane Saimone atele tekeko, matili wandakali-mane nimbana gene oko Sipasa lolopeyai lea. Gene Sipasa okone Gitiki pii mopeke loto, Pita lalaini. Gene okone-lapona tene oko ana.*

Jisasato Pilipi, Nataniale-la, Okonelapo Ee Lo Meane Oko

⁴³ Anate-lene Jisasa bala Galili disitiki okona pokale nembo toto, Pilipi aiya pua andoto, nimba namba watama ipu lea.

⁴⁴ Pilipi bala Endutu, Pita-la, okonelapo towa Betesaita tano okona tane ateai.

⁴⁵ Jisasato nimba namba watama ipu lea-kola, Pilipito Nataniale aiya pua andoto, bala lamawuato, loo yata yane buku okona wamba Mosesato pii mindi pepa peyoto, matili akali mindi epolopeya leaipia. Dee, Potopisa akali tupamane pii minditupa pepa peyoto, wuane teke leainipia. Andipa nanimato akali okone andalama. Bala Nasatesa tano okona tane Josepe iwanane Jisasa oko leaipia.*

⁴⁶ Wuane lea-kola, Natanialeto Pilipi tipa puato, Nasatesa tano okona tane akali mindi katulo gene yene atolo-peyape leaipia. Wuane lea-kola, Pilipito bala lamawuato, nimbato andolanga, bakale ipu leaipia.

⁴⁷ Wuane lea-kola, Nataniale bala Jisasa ateanga moyale pea-kola, Jisasato bala epeanga andea. Andoto, balato Nataniale andayo, wandakali minakasawa owato pii na-lalane Isatale tane akali enene mindi epeya oko andalapa lea.

⁴⁸ Wuane lea-kola, Natanialeto bala tipa puato, nimbato anu puato, nambana mana tupa andelenene lea. Wuane lea-kola, Jisasato bala lamawuato, wamba Pilipito nimba ipu nalala-kola, nimba ita piki tene okona atale okone angi, nimbato nimba andalo lea.

⁴⁹ Wuane lea-kola, Natanialeto balana pii okone yano peyoto, tisa, nimba Gotena iwanane atoto, Isatale tanena kinji oko atele lea.*

⁵⁰ Wuane lea-kola, Jisasato bala lamawuato, nimba ita piki tene okona atale okone angi, nimbato nimba andalo leyo-ko. Tene

mindiki okonena angu nimbato namba lo bilipi lelepe. Matili nambato piape okone sia minuto, piape andane wete tupa puluwa-kola, nimbato andolopele lea.

⁵¹ Wuane lalu, Jisasato bala lamawuato, nambato pii enene wete mindi yakama langeyo lea. Matili yakamato andolai-kola, ati iyu oko yamu lapo pula-kola, Akalina Iwanane okonga enjole tupa iyu puu, nena ipu pua atolainga yakamato andolopeyai lea.*

2

Jisasato Ipa Enene Minditupa Waene Gu-laya Yane Oko

¹ Jisasato Nataniale Pilipi-la, okonelapo ipulupa lenenga, ole lapo pea. Okone angi, Galili disitiki okona tano Kena tane akali mindimane wanda mindi kee lea-kola, Jisasana angini okomane andolo pea.

² Wanda kee leane akali okonemane Jisasapi, balana disaipolo tupapi, utupane yakama andolo ipulupa lea-kola, utupanepi andolo peai.

³ Akali okonemane wanda kee lea-kola, andolo epeaini wandakali tupa pitakamane tomo no ateai. Tomo no ateai-angi, ipa waene oko koyo pea-kola, Jisasa angini okomane bala iwanane lamawuato, waene koyo piya lea.

⁴ Wuane lea-kola, Jisasato bala lamawuato, ama, nimbato kenda-pene okone motika pulane gii oko na-epayako. Nimbato namba languato, wua pii nalape-pene lea.*

⁵ Wuane lea-kola, balana angini okomane piape akali tupa lamawuato, balato mangene mindi piyapa leando, balato lola pua piyapape lea.

⁶ Gotena wenonga kalato atene atolome nemblo toto, Juta yame wandakali tupamane ole kambuangga wasa-wasa peyoyale, jatamu andane minditupana ipa ambu pete loto, yata alainipia. Ipa jatamu andane ana-mane waa-pene wataka ongane mee yane utupanena mindiki-mindiki lo wandakali-mane katulo ipa pene andetepi mindi gae lo pete lape-pene.

⁷ Ipa jatamu andane utupane ongane yai-kola, matili Jisasato piape akali tupa lamawuato, yakamato ipa ambuto, jatamu utupa tumbi lalapa lea-kola, utupane-mane ipa ambuto, jatamu andane utupane tumbi wete laya yai.

⁸ Tumbi laya yai-kola, Jisasato utupane lamawuato, andipa ipa okonena minditupa ambuto, tomo tale pua mawua ando ateya akali oko malu pulupa lea-kola, utupanemane ipa okonena minditupa ambu awua poto, bala maiyai.

* ^{1:42:} Mt 16:18 * ^{1:45:} Lc 18:18; Ais 7:14; 9:6; Jet 23:5; Eze 34:23 * ^{1:49:} Mt 14:33; 16:16; Mk 3:11 * ^{1:51:} Jen 28:12 * ^{2:4:} Jo 7:30; 8:20

⁹ Piape akali utupane-mane mee ipa enene ambuto, bala maiyama nembo teaini tekeko, utupane-mane ipa okone ani tawe mialaipe lo tomo tale pua mawua ando ateane akali okonemane nembo natea. Nembo natene atoto, balato ipa okone no makande pea-kola, waene gulea. Waene gulea-kola, balato wanda kee leane akali oko epeakale lea.

¹⁰ Akali okone epea-kola, tomo tale pua mawua ando ateane akali okomane bala lamawuato, wandakali pitaka-mane waene epene oko wamba ini tale pua maiyaini. Wandakali-mane waene epene okonena kambua wamba ini no koyo peyai-kola, matili waene koo yale tupa tale pua maiyaini tekeko, nimbato waene koo yale tupa wamba ini tale pua maiyu, waene epene oko epapu mo awua epele lea.

¹¹ Jisasa bala Galili disitiki okona tano Kena okona atoto, metekolo piape bulupane okone puato, balana tai-lene andane oko mo pana ya-kola, balana disaipolo tupamane bala lo bilipi leai.

¹² Bilipi leai-kola, Jisasapi, balana angini okopi, amene tupapi, balana disaipolo tupapi, utupane yakama Kapaneame tano okona puu nena lalu, ole minditupa okonena atea. *

Jisasa Bala Lotu Anda Andane Okona Peane Oko

Matiyu 21:12-13; Maki 11:15-17; Luku 19:45-46

¹³ Juta yame wandakali tupa Pasopa tomo nalaini oto oko epyale pea-kola, Jisasa balana disaipolo tupa towa atu Jutusaleme peai. *

¹⁴ Balato lotu anda andane okona ende anda-pangosa kolandaka loto andea-kola, wandakali-mane yia bulumakopi, sipisipipi, eka uyapi, utupane Gote lo opa maiyakale nembo toto, wandakali minditupa-mane okonetaka tupa makesa yo atea. Akali minditupa-mane muni lawa pua peteaini teke.

¹⁵ Jisasato utupane andoto, eyaka minditupa mo tongo pua mina mindiki loto, kunju mindi gulo waa puato, yia bulumakopi, sipisipipi, minditaka makesa yo ateaини wandakali tupapi, utupane pitaka peyo wata kamaka lalu, muni lawa pua peteaini akali tupana muni yaini tupa minu gae loto, utupanena tepolo toko tupa kulembo lea.

¹⁶ Wuane piyu, balato wandakali eka uya makesa yo ateaини tupa lamawuato, yakamato namba Ayianena anda oko mo lawa

puato, makesa anda mindi gulaya naene kondalapa. Eka uya utupa awua pulupa lea.

¹⁷ Balato wuane peanga andoto, balana disaipolo tupamane Gotena pii pepa pelene eya mindi nembo tolo-peke loto, nimbanza anda oko kuai lo atekale loto, nimbato piape taimane pua atolowa-kola, akali minditupa-mane namba minu koyolopeyai layene eya lo nembo teai. *

¹⁸ Jisasato minditaka makesa yo peteaini wandakali tupa peyo wateanga andoto, Juta yamena akali kawane tupamane bala tipa puato, Goteto nimba languato, piape oko pipe lea-kola, nimbato wuane pua ateyo lo nanima andawa loyale, nimbato metekolo piape andoko pulape leai.

¹⁹ Wuane lea-kola, Jisasato pii kokoli mindi utupane lamawuato, yakamato lotu anda oko lai lo apolai-kola, ole tepo angu pola-kola, nimbato anda oko pulu-peke lolo-peyawa lea. *

²⁰ Wuane lea-kola, Juta yamena akali kawane tupamane bala andayo lamba loto, nanimana yumbane tupamane lotu anda andane oko pua angu atea-kola, mali paiyasa tukumindinga wataka peane tekeko, nimbato ole tepo angu tupana anda oko katulo pulu-peke lolo-peyawa lelepe leai.

²¹ Utupane-mane wuane leaini tekeko, Juta yame-mane bala peyo ome lolai-kola, ole tepo angu pola-kola, malinga ika lokale nembo toto, Jisasato pii kokoli mindi utupane lamawuato, yakamato lotu anda oko lai lo apolai-kola, ole tepo angu pola-kola, nimbato anda oko pulu-peke lolo-peyawa lea. *

²² Matili Goteto Jisasa malinga ika laya yane okone angi, balana disaipolo tupamane balana pii okone nembo tolo-peke loto, pii Jisasato wamba leane okonepi, Gotena pii pepa pelene eya tupapi, utupane bilipi leai. *

Jisasato Wandakali Minditupanga Tungi Peyo Ata Napeane Oko

²³ Juta yame wandakali tupa Pasopa tomo nalaini oto oko epeane okone angi, Jisasa bala Jutusaleme atoto, metekolo piape minditupa pua atea-kola, wandakali kambuamane andoto, bala lo bilipi leai. *

²⁴⁻²⁵ Wuane tekeko, Jisasato wandakali tupa pitakana nembo-tene oko andalane. Tene okonena, wandakali utupa-mane nimbanza metekolo piape tupa angu andoto, nimba lo bilipi leyai lo lamaulane tene

* 2:12: Mt 4:13 * 2:13: Ek 12:1-27 * 2:17: Sam 69:9

* 2:19: Mt 26:60-61; 27:39-40

* 2:21: 1Ko 6:19-20

* 2:22: Lk 24:6-10; Jo 12:16 * 2:23: Jo 7:31

mindi ata napeya. Jia. Bala tane-mane wandakali pitakana mana tupa andoto, wandakali utupane-mane bala lo bilipi leyama nayu naleai nembo toto, utupanenga tungi peyo ata napea.

3

Jisasato Neketomasa Towa Pii Leane Oko

¹ Patasai yamena akali Neketomasa lene mindi bala Juta yamena akali kawane mindi ateapia. *

² Utulu akali okone bala Jisasa peteanga epoto, tisa, Gote bala wandakali mindi towa ata napeando, wandakali okonemane metekolo piape nimbato pilini okonepene tupa katulo napulu-peya. Tene okonena, nanimato andeyama-kola, Goteto nimba tisa piape pulu puu leane ya lo nembo tayama leaipia.

³ Wuane lea-kola, Jisasato balana pii okone yano peyoto, nambato pii enene wete mindi nimba langeyo. Wandakali mindi bala mandulu-peke lene gulo at aapeando, Goteto bala moyo ando ateaya lo balato katulo anda napulu-peya leaipia. *

⁴ Wuane lea-kola, Neketomasato bala tipa puato, anu puato, wandakali miniyene mindi bala katulo anginina ini andapangosa pitulu-peke lola-kola, angini-mane bala dee lapone mandulu-peke lolo-peyape leaipia.

⁵⁻⁶ Wuane lea-kola, Jisasato balana pii okone yano peyoto, wandakali-mane andopane mindi mandeya-kola, andopane okone bala wandakali atalane leaipia. Oli Sipitisa okomane wandakali mindi mandulu-peke leya-kola, wandakali okone bala Gotena yame ateaya nembo toto, nambato pii enene wete mindi nimba langeyo. Goteto wandakali mindi ipa okola, Oli Sipitisa okola, okonelapo-mane mandulu-peke naleando, wandakali okone bala katulo Gotena yame ata napulu-peya. *

⁷ Nambato nimba mandulu-peke lene gulo atape-pene leyo okonena, nimba moko nalape.

⁸ Popo lalane oko bala tane popo lo awua pokale nembo tolane pua popo lo awua mindisa puku piyane. Popo leya-kola, nimbato ale alene tekeko, ukusa ato lo awua epeyape, dee, popo lo awua poto, aninga koyo pulu-peyape lo nimbato nembo natelene. Wuane pua teke, Oli Sipitisa okomane wandakali mindi mandulu-peke lokale nembo toto, okone mandulu-peke

leya-kola, wandakali okone mandulu-peke lene gulo atalane tekeko, Oli Sipitisa okomane anu puato wandakali mindi mandulu-peke leyape lo nimbato nembo natalene leaipia.

⁹ Wuane lea-kola, Neketomasato bala tipa puato, anu puato, mangene nimbato lele utupane katulo wuane pulu-peyape leaipia.

¹⁰ Wuane lea-kola, Jisasato balana pii okone yano peyoto, nimba Isatale tanena tisa ateale-ko. Anu peakale nimbato pii okone katulo yano peya napelepe.

¹¹ Nambato pii enene wete mindi nimba langeyo. Nanimato minditaka lee-mane andeman tupa wayumane nembo toto, yakama Patasai tupa langeyama tekeko, yakamato nanimana pii okone ale wato, enene pii leyai nembo taa na-piyaini.

¹²⁻¹³ Yuunga wandakali mindikipi mindi ati kenga pulu, yuunga peke nalea. Jia. Ati kenga atala yuunga epewane Akalina Iwanane nambato angu ati kenga mangene piyane tupa katulo yakama langiyawane. Wuane tekeko, yuu okona mangene piyaini tupa nambato yakama langiwa-kola, yakamato nambana pii okone ale wato, enene leya nembo natapiai-ko. Gote bala ati kenga atoto, mangene minditupa wua peya loto, nambato yakama langewando, nambato enene leya lo yakamato anu puato nembo tolopeyaipe.

¹⁴⁻¹⁵ Wamba Isatale tane wandakali tupa oma napeakale nembo toto, Mosesa bala utupane towa atu wandakali napalene yuu okona atoto, etelu gulene mindi batasamane waa peaipia. Waa piyu, balato ita mindi yokowa peyata wato, etulu okone ita okonena peyo yuka yaepia. Wuane pua teke, Akalina Iwanane oko lo bilipi lolai wandakali tupa pitaka saka atapowa ateakale nembo toto, Goteto Akalina Iwanane oko ita malamanda okona peyo yuka wato, minaiyu lape-pene leaipia. *

¹⁶⁻¹⁷ Wamba Gotena iwanane okone ati kenga ateakola, Goteto bala yuunga epeakale loto, wandakali tupa yapa lo tale peakale naleaipia. Jia. Balana iwanane okonemane wandakali tupa molo-peke leakale loto, Goteto bala yuunga epeakale leaipia-ko. Goteto wandakali tupa pitaka epelewa yamapane yo atoto, balana iwanane okone lo bilipi lolai wandakali tupa alu napene, pitaka saka atapowa ateakale nembo toto, balana iwanane mindiki oko angu epeakale leane. *

¹⁸ Balana iwanane okone lo bilipi lene wandakali tupanga Goteto koo tene mindi

* **3:1:** Jo 7:50; 19:39 * **3:3:** Mt 18:3-4; 1Pi 1:22-25 * **3:5-6:** Ese 36:25-27; Jo 1:13 * **3:14-15:** Nam 21:9; Jo 8:28-29; 12:32; 20:31 * **3:16-17:** Lk 19:9-10; Jo 3:36; 10:28-30; Lom 5:6-8; 8:32; 1Jo 4:9-10 * **3:18:** Jo 5:24

yata na-alane tekeko, wandakali waka tupa mane balana iwanane mindiki angu oko lo bilipi na-lalaini mambele, Goteto utupane yapa lo tale puato, koo tene tupa utupanenga yata alane. *

¹⁹⁻²¹ Goteto balana pii enene oko wato minalaini wandakali tupa minu tai laya eya-kola, utupane-mane balana piape piyaini. Wandakali waka tupamane okone andeakale nembo toto, Gotena wandakali utupane tii-pene okona epoto, piape piyaini tekeko, wandakali waka minditupa-mane mana koo tupa minu ateyai-kola, tii-pene okonemane utupanena mana koo tupa mo pana alane. Mo pana olane nembo toto, wandakali utupane pitaka-mane tii-pene okone embo wete wato, tii-pene okonena na-epalaini. Jia. Gotena tii-pene okone ati kenga atala yuunga epea-kola, utupane-mane tii-pene okone epele naene, undupilene oko epele wete alaini nembo toto, Goteto utupane yapa lo tale puato, koo tene mindi utupanenga yata alane. *

Joneto Jisasa Bala Ati Kenga Atala Epeane Lo Lapana Yane Oko

²² Matili Jisasapi, balana disaipolo tupapi, utupane Jutiya disitiki okona po atoto, wandakali tupa ipa peya-maiki pua ateai. *

²³⁻²⁴ Okone angi, Etoteto Jone andi laa napenenga, Jonetopi wandakali tupa ipa mia-maiki pua ateaiapia. Salima yuu mandaka gulo Ainone yuu okona ipa kambua epo palane nembo toto, bala yuu okonena atoto, wandakali ipuku peaini tupa ipa peya-maiki pua ateaiapia.

²⁵ Ipa peya-maiki pua atea-kola, Jonena disaipolo tupamane Juta yame akali mindi towa pii yanda puato, Gotena wenonga kalato ata napene atamakale nembo toto, wandakali-mane anu puato, wasa-wasa peyape-pepele leainipia.

²⁶ Wuane lalu, utupane-mane Jone ateanya poto, bala lamawuato, tisa, wamba akali mindi nimba towa atu ipa Jotane amo yangi ateapi-angi, nimbato bala ati kenga atala yuunga epeane lee okoni. Andipa balato wandakali ipa peya-mawua ateyakola, wandakali tupa pitaka nimba tepa alu, bala ateyanga peyai okonde leainipia.

²⁷⁻²⁸ Wuane leai-kola, Joneto utupanena pii okone yano peyoto, wamba namba Mesaya oko jia lewa. Wuane tekeko, Goteto namba languato, Mesaya oko bala epoyale peya loto, nimbato wandakali tupa wamba ini lamalu puu leane lewa okone yakamato ale yai okoni leaipia. Ati kenga ateya Gote okomane minditaka mindi wandakali mindinga mai naapeando, wandakali

okonemane minditaka okone katulo mia napulu-peya. Wuane pua teke, Goteto wandakali utupane Jisasa ateyanga peakale nalapia-yale, utupane-mane bala ateyaina napupiai-yale. Jia. *

²⁹ Akali mindimane wanda mindi kee leya-kola, wanda okone balana wetene gulo pitiyane. Akali okonemane wanda okone kee leyo nembo toto, pii leya-kola, akali okonena amene okomane balana pii okone ale wato, epele alane. Wuane pua teke, sosa oko Jisasaana wetene gulo pitiyane. Bala lo bilipi lene wandakali tupa balana yame gulo peteyai nembo toto, balato pii leya-kola, nimbato balana pii okone ale wato, epele wete eyo.

³⁰ Akali okone bala lipinga wete atola-kola, namba balana pangosa atape-pene.

³¹ Yuu okona akali mindimane yuu okona mangene piyaini tupa nembo toto, pii lalane. Ati kenga atala yuunga epeane akali oko bala yuu okona wandakali tupa pitaka sia minuto, utupanena lipinga wete ateya. *

³² Wamba bala ati kenga atoto, minditaka andeane tupapi, pii ale yane tupapi, utupane wandakali tupa lamaiyane tekeko, wandakali-mane balana pii okone ale wato, bilipi na-lalaini. *

³³⁻³⁵ Ayiane Gote okomane balana iwanane oko towa epelewa yamapane yo atoto, wandakalipi, waka minditaka eya tupapi, utupane pitaka balana kininga yata yaepia. Dee, Goteto balana Oli Sipitisa oko yapu loto, yangisa angu wandakali mindi mai naapeapia. Goteto Oli Sipitisa oko Jisasanga tumbi laya wato, yuunga puu lea-kola, Jisasato Gotena pii oko wandakali tupa lamaiki piyane. Wandakali-mane balana pii okone ale wato, bilipi lalaini mana okomane Goteto enene pii lalane lo andawa lalaini. *

³⁶ Gotena Iwanane oko lo bilipi lene wandakali tupa saka atapowa atolopeyai tekeko, balana pii oko wato mina na-piyaini wandakali tupa saka atapowa ata napulupeyai. Jia. Gotena yataka ene oko wandakali utupanenga yapowa yolopeya. Ipa peya-maiyane akali Joneto wuane leaipia. *

4

Jisasato Samatiya Tane Wanda Mindi Towa Pii Leane Oko

¹⁻³ Jisasa bala tane-mane wandakali tupa ipa peya-mai naapeapia. Jia. Balana disaipolo tupamane wandakali tupa ipa peya-mawua ateaini tekeko, wandakali-mane loto, Jisasato Jone sia minuto, wandakali

* ^{3:19-21:} Jo 1:5,9; 8:12 * ^{3:22:} Jo 4:1-3 * ^{3:27-28:} Jo 1:20; Mt 11:9-10 * ^{3:31:} Jo 8:23-24 * ^{3:32:} Jo 3:11
* ^{3:33-35:} Mt 11:25-27; Jo 5:19-23 * ^{3:36:} Jo 3:16-18; 1Jo 5:10-12

kambua ipa peya-mawua ateya-kola, utupane balana disaipolo tupa ateyai leainipia. Wandakali-mane wuane leaini okone Patasai tupamane ale apiai nembo toto, Jisasa bala Jutiya disitiki oko tepa alu, Galili disitiki okona peke loyale pea. *

⁴Galili disitiki okona peke loyale asini oko Samatiya disitiki okona tombenenga yene.

⁵ Jisasa bala asini okone watama poto, Samatiya disitiki tano Saika lene okona peakaiyu lea. Tano okone bala yuu mindi wamba Jekopoto balana iwanane Josepe mayane okona mandaka gulo ya. *

⁶ Wamba Jekopoto yuu okonena atoto, ipa ambuyale, ipa yuli mindi tombo yaepia. Tualo kilokopi mindi lea-kola, Jisasa bala asini epeane okomane balana umbaini oko tai nalea-kola, ipa yuli tomba-yene petene ongane mandaka petea.

⁷⁻⁸Balana disaipolo tupa tomo kamboyale tanonga peai-kola, Samatiya disitiki okona tane wanda mindi ipa ambulu epeaipia. Epea-kola, Jisasato bala lamawuato, ipa nokale. Ambu gii leaipia.

⁹ Jisasato wuane leane tekeko, Juta yame wandakali tupamane Samatiya yame wandakali tupa towa atu mangene mindikipi mindi na-piyainipia. Tene okonena, Samatiya yame wanda okonemanne Jisasana pii okone yano peyoto, anu peakale Juta yame akali nimbato Samatiya yame wanda namba andoto teke, ipa nokale, ambu gii lelepe leaipia. *

¹⁰ Wuane lea-kola, Jisasato balana pii okone yano peyoto, Goteto minditaka epene mindi mee giyane oko nimbato andapi-yale, ipa nokale ambu gii leylo akali oko api ateyape lo nimbato nembo tapi-yale. Okone nembo toto, nimbato wandakali saka atapowa ateakale lo ataya alane ipa oko gii lo tee lapi-yale, nimbato okone nimba giwa-yale leaipia. *

¹¹ Wuane lea-kola, wanda okonemane bala lamawuato, Akali Andane, ipa yuli oko nenanga wete tomba-yene eya leaipia. Yuli okonena ipa ambuyale pene mindi nimbato ai napele-ko. Wandakali saka atapowa ateakale lo ataya alane ipa okone aninga ambulape.

¹² Wamba nanimana yumbane Jekopoto ipa kundu oko tomboto, bala tane ipa ambu naka puato, balana bulumako tupapi, sipisipi tupapi, iwanane tupapi, utupanemanne ipa oko neakale lo ambu maiki peapipia. Balato ipa kundu oko nanimana geane-ko. Nimbato bala sia minuto, wandakali saka atapowa ateakale lo ataya

alane ipa okone katulo namba gulape leaipia. *

¹³ Wuane lea-kola, Jisasato balana pii okone yano peyoto, ipa kundu okona nolai wandakali tupa pitaka lapone ipa nono olopeyai leaipia.

¹⁴ Wuane tekeko, nambato ipa mindi wandakali maluwa tupanga ipa lai yunganle pua epoto, wandakali utupane saka atapowa ateakale lo ataya olopeya leaipia. Utupane-mane ipa okone nalu, matilimatiilipi dee lapone ipa nono na-loopeyai. Jia. *

¹⁵ Wuane lea-kola, wanda okonemane bala lamawuato, Akali Andane, namba dee lapone ipa nono wato, ipa ambulu-peke nolokalenga, nimbato ipa okone namba gii leaipia.

¹⁶ Wuane lea-kola, Jisasato bala lamawuato, nimbana akalini oko epeakalenga, nimbato bala lamaulu pulu, bala towa atu onga peke lalapape leaipia.

¹⁷⁻¹⁸ Wuane lea-kola, wanda okonemane bala lamawuato, nimbana akalini mindi ata napene leaipia. Wuane lea-kola, Jisasato bala lamawuato, nimbato eneme pii lele leaipia. Wamba nimba akali yau tupana puku piyu, utupane pitaka tepe aka piki pee okoni. Andipa akali nimba towa atu pteyapi okone nimbana akalini jia-ko. Nimbana akalini mindi ata napuya lele okone enene pii lele leaipia.

¹⁹ Wuane lea-kola, wanda okonemane bala lamawuato, Akali Andane, nambato nimba potopisa akali mindi atele lo andeyo leaipia.

²⁰ Samatiya yame wandakali nanimana yumbane tupamane yuu wangiane okona epo amunguli puato, Gote lo lotu laka peaini tekeko, Juta yame wandakali yakamoto loto, wandakali pitaka-mane Jutusaleme okona angu amunguli puato, Gote lo lotu lape-pene lalaini leaipia. *

²¹ Wuane lea-kola, Jisasato bala lamawuato, nimbato pii nimba langeyo oko enene leya lo wanda nimbato nembo tape leaipia. Matili Samatiya yame wandakali yakamoto yuu wangiane okonapi, Jutusaleme tano okonapi, yuu okone-lapona angu atoto, Ayiane Gote oko lo lotu nalolo-peyai. Jia. Yamakato yuu waka tupanapi atoto, bala lo lotu lolopeyai.

²²Juta yame nanimana akali mindimane wandakali tupa molo-peke lolopeya. Tene okonena, nanimato Gotena pii pepa pelene eya tupa pitaka dii lo andoto, mangene Goteto wamba peane tupapi, matili pulupuya tupapi, utupane nembo toto, bala lo

* ^{4:1-3:} Jo 3:22 * ^{4:5:} Jen 33:19; Jas 24:32 * ^{4:9:} Esa 4:1-5 * ^{4:10:} Jo 7:37-38; Lap 21:5-6 * ^{4:12:} Jo 8:53

* ^{4:14:} Jo 6:35 * ^{4:20:} Lo 12:5-14; Sam 122:1-5 * ^{4:22:} 2Ki 17:29-41; Ais 2:3; Lom 9:1-5

lotu lalamane. Samatiya yame wandakali yakamoto okonetaka tupa nembo natene, bala lo lotu lalaini.*

²³⁻²⁴ Wuane tekeko, Gote bala sипитса mindi ateya okonena, balana Oli Sипитса okomane wandakali minu tai laya ola-kola, utupane-mane Gotena pii enene oko wato minuto, bala lo lotu lape-pene. Wandakali okonepene tupamane bala lo lotu lapiak lakaе lo Ayiane Gote okomane nembo talane. Tene okonena, oto mindi epola-angi, Oli Sипитса okomane lotu enene lalaini wandakali tupa minu tai laya ola-kola, utupane-mane Gotena pii enene oko wato minuto, bala lo lotu lolopeyai. Oto okone andipa epo eya leaipia.*

²⁵ Wuane lea-kola, wanda okonemane bala lamawuato, nambato Mesaya, balana gene okone Gitiki pii mopeke loto, Kataisa lalaini oko epolopeya nembo teyo. Bala epola-angi, balato pitaka taka nanim langulu-peya leaipia.

²⁶ Wuane lea-kola, Jisasato bala lamawuato, nimba towa pii leyapa akali namba Mesaya okone ateyo leaipia.*

²⁷ Wuane lea-kola, balana disaipolo tupa epoto, bala wanda okone towa pii lo petapele yanga andoto, moko wete loto, nembo kambua teai. Minditupa-mane anu peakale balato wanda oko towa pii lo pitiyape nembo teai. Minditupa-mane aki mindi mokale nembo toto, bala wanda oko towa pii lo pitiyape nembo teaini tekeko, disaipolo utupanena mindikipi mindimane bala tipa puato, anu peakale nimbato Samatiya wanda oko towa pii lelepe lopi, nimbato aki mokale nembo toto, bala towa pii lelepe lopi, naleai. Jia.

²⁸ Jisasato namba Mesaya oko ateyo leane okonena, wanda okonemane balana ipa pene oko ongane yakale lalu, tano okona peke loto, wandakali tupa lamai-yaepia.

²⁹ Balato utupane lamawuato, akali mindimane mangene nambato wamba pewane tupa pitaka langi yiake lala leaipia. Bala Mesaya oko ateyape. Yakamoto bala andolo ipulupa leaipia.

³⁰ Wuane lea-kola, wandakali utupane tano okone tepa alu, Jisasa ateanga eployale epeainipia.

³¹ Wandakali utupane Jisasa ateanga epo ata nayai-kola, balana disaipolo tupamane bala lamawuato, tisa, nimba tomo naa-kae laka peai.

³² Wuane laka peai-kola, Jisasato utupane lamawuato, namba tomo nolane eya tupa yakamoto anda napeyai lea.

³³ Wuane lea-kola, balana disaipolo tupamane yakama teke-teke pii mindi tipa piki

puato, wandakali mindimane tomo mindi awua epoto, bala maiyape leai.

³⁴ Wuane leai-kola, Jisasato utupane lamawuato, nambato piape mindi pula nembo toto, Goteto namba puu leane lea. Balato nembo teya pua, nambato piape okone pikoyo pipe-pene okone nambana tomo nolane oko guleya.*

³⁵⁻³⁸ Wandakali-mane pii kokoli mindi loto, akali mindimane eenga tomo waini yandeya-kola, akali waka mindimane tomo mandiyane lalaini. Wuane pua teke, wamba wandakali waka minditupamane eenga tomo waini tupa yandea-kola, nambato yakama ee okonena tomo mandulu pulupla lewa. Wuane lewa-kola, yakamoto ee okonena poto, tomo yakamat yanda napeai tupa mandeai okonemane pii kokoli layene okone enene gulea. Tomo waini yandalane wandakali okola, tomo mandiyane wandakali okola, okonelapo lapotaka epele yakale nembo toto, andipa tomo mandiyane akali okomane wandakali saka atapowa ateakale lo ataya olane tomo oko manduto, yole meya. Yakamoto pii waka mindi lalaini oko loto, wandakali mindimane ee mindi yandola-angi, ana tukumindi pola-kola, tomo tupa mandipe-pene yolopeya lalaini tekeko, ee tupana tomo mandipe-pene eya oko andalapa lo nambato yakama langeyo lea.*

³⁹⁻⁴⁰ Balato wuane lea-angi, utupane-mane andeai-kola, Samatiya disitiki okona tane wandakali kambua bala atea okona epeainga andeai. Wamba Samatiya yame wanda oko bala Saika tano okona poto, akali mindimane mangene nambato wamba pewane tupa pitaka langi yiake lea-kola, Samatiya yame wandakali kambua utupane-mane Jisasa lo bilipi leai. Bilipi loto, bala ateanga epoto, bala yakama towa atu atamakale lo tee leai-kola, bala ole lapo yuu okonena atea.

⁴¹ Yuu okonena atoto, balato pii minditupa utupane lamaiya-kola, Samatiya yame wandakali waka kambua minditupa-mane balana pii utupane ale wato, bala lo bilipi leai.

⁴² Bilipi loto, utupane-mane wanda oko lamawuato, wamba nanimato nimbana pii oko ale wato, bala lo bilipi lalama tekeko, andipa nanim tane balana pii oko ale wato, enene bala yuu okona wandakali tupa molo-peke lolane akali oko ateya lo andeyama leai.*

Jisasato Gapomane Akali Okona
Iwanane Mo Atu Yane Oko

* ^{4:23-24:} 2Ko 3:17; Lom 12:1; Pl 3:2-3 * ^{4:26:} Mk 14:61-62 * ^{4:34:} Jo 6:37-40 * ^{4:35-38:} Lk 10:2 * ^{4:42:}

⁴³⁻⁴⁴ Wamba Jisasa bala tane pii mindi loto, potopisa akali mindi balana yuu tene okona ateando, balana yuu tene okona atalaini wandakali tupamane balana gene oko laiyu na-lalaini leaipia. Pii okone nembo toto, Jisasa bala Galili disitiki okona pea. *

⁴⁵ Wamba Juta yame wandakali tupamane Pasopa tomo neaini okone angi, Jisasa bala Jutusaleme atoto, metekolo piape minditunga pea. Okone angi, Galili disitiki tane wandakali minditunga-mane Pasopa tomo okone nolo poto, metekolo piape utupane pitaka andeai. Tene okonena, Jisasa bala Galili disitiki okona peakaiyu lea-angi, Galili tane wandakali utupane-mane bala wayu epeleya lo lameai. *

⁴⁶ Lameai-kola, bala Galili disitiki tano Kena okona lapone pea. Wamba bala tano okonena atoto, ipa enene oko mo waene gulaya yane. Jisasa bala Kena tano okonena lapone peane okone angi, gapomane akali kawane mindina iwanane oko Kapaneame tano okona siki oma-yene ya. *

⁴⁷ Balana iwanane okone omoyale pea wete, akali okonemane ale ya-kola, Jisasa bala Jutiya disitiki oko tepa alu, Galili disitiki okona epeya lene oko ale yaepia. Ale wato, bala Jisasa ateanga poto, nambana iwanane oko mo atu yolanga, nimba Kapaneame tano okona puu nena lamape lo tee lea. *

⁴⁸ Wuane lea-kola, Jisasato bala lamawuato, wandakali yakamoto nambana metekolo piapepi, kokoli piapepi, utupane anda naapeaindo, yakamoto namba lo bilipi nalolo-peyai lea. *

⁴⁹ Wuane lea-kola, gapomane akali okonemane bala lamawuato, Akali Andane, nambana iwanane oko omolane. Nimba wamba ini puu nena laa lea.

⁵⁰ Wuane lea-kola, Jisasato bala lamawuato, nimbana iwanane okone saka pitulupeyako. Nimba puu lea. Wuane lea-kola, Jisasato pii enene leya lo bilipi loto, akali okone bala andaka peke lea. *

⁵¹ Bala peke loto, Kapaneame tano okona peakaiyu lata naeya-kola, balana piape akali tupamane bala asininga malanda wato, nimbana iwanane oko atu yoto, saka peteya leainipia.

⁵² Wuane lea-kola, balato utupane tipa puato, taeme aki-tupi lapia-kola, bala atu yoto, saka pupiape leaipia. Wuane lea-kola, utupane-mane bala lamawuato, tuni otonga taeme wane kiloko lapia-kola, balana umbaininga toto pipiane oko atu yapia leainipia.

⁵³ Wuane leai-kola, ayiane okonemane nembo tolo-peke loto, tuni otonga taeme mindiki okonena teke lapia-kola, Jisasato nimbana iwanane oko saka pitulu-peya lapia nembo teaipia. Wuane nembo toto, akali okonepi, balana andaka atalaini yamepi, utupane pitaka-mane Jisasa lo bilipi leainipia.

⁵⁴ Jisasa bala Jutiya disitiki oko tepa alu, Galili disitiki okona epo atoto, metekolo piape lapone okone pea. *

5

Sambasa Angi Jisasato Akali Siki Pelene Mindi Mo Atu Yane Oko

¹ Matili Juta yame wandakali tupamane lotu andane mindi lalaini oto oko epoyale pea-kola, Jisasa balana disaipolo tupa towa atu Jutusaleme peai.

² Jutusaleme tano okona ende ana-mane pitane atene mindina asia lomba andane oko Sipisipi Asia Lomba lalaini. Asia lomba andane okonena mandaka ipa angini anjako mindi pitiyane. Iputu pii loto, ipa angini okonena gene oko Betesata lalaini. Ipa angini okonena matenenga anda aiyakame yau pitane atalane.

³ Anda aiyakame yau utupane organe ateyai-kola, wandakali lee koopi, kee koopi, papaka tambupi, siki pelene wandakali kambua tupa anda utupanena yalanai.

⁴ [Eyai-kola, ole minditunga Akali Andane okona enjole mindi ipuku puato, ipa angini okone mo ema piya yaka piyaepia. Wuane pikie angin, wandakali siki pelene utupanena mindi bala wamba ini ingane ipa angini okonena poto peteya-kola, wandakali okonena siki tupa atu yaka piyaepia. Tene okonena, wandakali siki pelene tupa anda aiyakame yau utupanena pituto, enjole okonemane ipa angini okone mo ema piya yakale lo maliyo pitiyaini-pia.]

⁵ Akali maliyo ateaini utupanena mindi bala mali paipayasa teponga dee kitupasa siki angu omo yaepia.

⁶ Jisasato andea-kola, akali okone bala wamba wete siki omo yene yane ya lo andoto, bala tipa puato, nimbana siki oko atu yapia laka lo nembo telepe lea.

⁷ Wuane lea-kola, akali siki oma yene yane okomane balana pii okone yano peyoto, Akali Andane, ipa oko mo ema piki piyan tekeko, namba mo awua ipa okona polane akali mindi atu naopeya. Tene okonena, namba tane ipa okona moyale tengamane peyot-kola, wandakali waka tupamane namba wata peke lalu, yakama wamba ini ingane ipa angini okona palaini lea.

* ^{4:43-44:} Mt 13:57 * ^{4:45:} Jo 2:23 * ^{4:46:} Jo 2:1-11
Mt 8:13 * ^{4:54:} Jo 2:11

* ^{4:47:} Mt 8:5-6 * ^{4:48:} Jo 2:18; 1Ko 1:22-23 * ^{4:50:}

⁸ Wuane lea-kola, Jisasato bala lamawuato, nimba ika lalu, nimbana pangilini toko oko mo awua puu lea. *

⁹ Wuane lea-kola, wamba ini kapoyale okone angi teke, akali okonena siki oko atu ya-kola, bala paliyane toko okone mo awua pea. Sambasa mindina balato wuane pea.

¹⁰ Wuane pea-kola, Juta yame akali minditupa-mane akali wamba siki yane okone lamawuato, andipa Sambasa angi, nimba pangilini toko oko mo awua napupele leainipia. *

¹¹ Wuane leai-kola, akali okonemane utupanena pii okone yano peyoto, nambana siki mo atu yala akali okomane namba languato, nimba pangilini toko oko mo awua puu lala-kola, awua peyo leaipia.

¹² Wuane lea-kola, utupane-mane bala tipa puato, akali andoko-mane nimba languato, nimbana pangilini toko oko mo awua puu lalapele leainipia.

¹³ Utupane-mane wuane leaini tekeko, wandakali kambua epo amunguli peai-kola, Jisasa bala tengamane too pua pea. Bala too pua pea-kola, akali wamba siki oma yene yane okonemane balana siki oko mo atu yapiane akali oko nembo nateaipia.

¹⁴ Matili akali okone bala lotu anda andane okona ende anda-pangosa atea-kola, Jisasato bala aiya pua andoto, nimbana siki oko atu yapia lo andele leaipia. Nimbato mana koo tupa minu ateendo, nimbanga kenda-pene andane wete mindi epolane. Nimbato mana koo tupa dee lapone mina napene kondape lea.

¹⁵ Wuane lea-kola, akali okone bala Juta yame akali tupa ateainga poto, utupane lamawuato, nambana siki mo atu yapiane akali okone bala Jisasa leaipia.

¹⁶ Wuane lea-kola, Sambasa angi Jisasato akali okone mo atu yane nembo toto, Juta yame akali utupane-mane kenda-pene andane minditupa bala maiki peainipia.

¹⁷ Wuane piki pua atea-kola, Jisasato utupane lamawuato, namba Ayiane okomane ole dindi lo piape piyane okonena, nambatopi ole dindi lo piape piyawane leaipia.

¹⁸ Wuane lea-kola, Juta yame akali utupane-mane ale wato, Jisasato Gote balana Ayiane wetete ateya leya okonemane bala tane Gote ateya okonepene teke ateyo leya nembo teainipia. Dee, Sambasa angi Jisasato akali okone mo atu yane okomane Sambasa okona loo oko kalo peya lo andeaini tekepia. Tene okone-lapona, Juta yame wandakali tupamane Jisasa peyo ome laima lakae lo nembo teainipia. *

Gote Iwananenga Balana Piape Pulane Tai-lene Yane Oko

¹⁹⁻²³ Juta yame akali tupamane Jisasa peyo ome laima lakae lo nembo teakola, Jisasato utupane lamawuato, Gote Iwanane okona gene oko laiyu na-lalaini wandakali tupamane bala epeakale leane Ayiane okona gene oko laiyu naleya-kola teke, piyane leaipia. Ayiane Gote okomane wandakali mindi yapa lo tale napiyane. Jia. Wandakali-mane Ayiane okona gene oko laiyu lalaini pua teke, utupane pitakamane balana Iwanane okona gene oko laiyu leakale nembo toto, Ayiane Goteto wandakali yapa lo tale pulane piape okone pitaka bala iwanane okonga mayane. Maya-kola, Ayiane okomane wandakali omene tupa malinga ika laya wato, saka atapowa atekale lo ataya alane pua teke, balana Iwanane okomane wandakali minditupa saka atapowa atekale lo ataya wakale nayuto, utupane saka atapowa atekale lo ataya alane. Ayiane okomane balana Iwanane oko epelewa yamapano yo atoto, balato piape piyane tupa pitaka balanga andawa lalane. Yakamoto moko loto, nembo kambua talapale nayuto, Goteto balana piape utupane pitaka sia minene piape andane wete tupa balana iwanane okonga andawa lolopeya. Andawa leya-kola, Ayiane okomane piape piyane utupane balana iwanane okomane piyane teke. Nambato pii enene wete mindi yakama langeyo. Iwanane okomane bala tanena nembo-tene oko wato minuto, mangene mindi katulo napiyane. Jia. Balana Ayiane okomane mangene piyane tupa iwanane okomane andoto, wuane teke piyane. *

²⁴ Nambato pii enene wete mindi yakama langeyo. Wandakali mindimane nambana pii oko ale wato, namba ati kenga atala yunga puu leane Ayiane Gote oko lo bilipi leaindo, Goteto wandakali okone yapa lo tale napulu-peya. Jia. Wandakali okone bala omene gugalane mana oko tepa alu, saka atene tene mialu, matilipi saka atapowa atolopeya. *

²⁵⁻²⁷ Nambato pii enene wete mindi yakama langeyo. Ayiane Gote okomane balana iwanane oko Akalina Iwanane ateya nembo toto, wandakali yapa lo tale pulane tai-lene oko balanga mayaepia. Dee, wandakali saka atapowa atekale lo ataya alane tai-lene oko Ayiane Gote bala tanenga yalane pua teke, Ayiane okomane wandakali saka atapowa atekale lo ataya alane tai-lene oko balana iwananenga mayaepia. Tene okonena, namba lo bilipi

* ^{5:8:} Mt 9:6 * ^{5:10:} Nia 13:19; Jet 17:21 * ^{5:18:} Mt 26:4; Jo 7:1; 10:28-30 * ^{5:19-23:} Jo 5:25-27,30; Ap 10:42; Pl 2:9-11; 1Jo 2:20-23 * ^{5:24:} Jo 3:14-18

nalene wandakali omene gulo atalaini tupamane Gote Iwanane okona pii oko ale olane oto oko andipa epo eya. Pii okone bilipi lolai wandakali tupa, saka atapowa atolopeyai leyo.

²⁸ Nambato wuane leyo okonena, yakamoto moko loto, nembo kambua na-talapape. Jia. Matili oto mindi epola-angi, Gote Iwanane okomane wandakali omene malinga paleyai tupa lamawuato, ika lalapa lola-kola, utupane pitaka-mane balana pii okone ale olopeyai.

²⁹ Ale wato, utupane yakamana mali tupa tepe alu, ika loto, takita epolopeyai. Mana epene tupa minu atalu, omolaini wandakali tupa ika loto, saka atapowa atolopeyai. Koo pua atalu, omolaini wandakali tupa malinga ika lolai-kola, nambato utupane yapa lo tale puato, koyakale lolo-peyawa. *

³⁰ Namba tane-mane nembo teyo pua pukale nembo natalawane. Jia. Namba ati kenga atala yuunga puu leane Ayiane okomane piape pula nembo teya pua nambato pukale nembo talawane. Wuaneko, namba tane wua pukale nembo toto, mangene mindi na-piyawane. Jia. Nambana Ayiane okomane wandakali tupa yapa lo tale pipe leya pua, nambato wandakali tupa tika pua yapa lo tale piyawane. *

Jisasa Bala Gote Iwanane Ateya Lo Bilipi Naleaini Oko

³¹ Namba tane Gote Iwanane ateyo lewando, wandakali-mane nambana pii angu ale wato, nambato enene pii leyape, otowo pii leyape lo tatake olopeyai.

³²⁻³⁵ Wuane tekeko, wamba yakamoto akali minditupa ipa peya-maiyane akali Jone oko bala ateanga peakale leai-kola, Jone bala lamu kaiyapiane mindi gulo atoto, yakamana nembo-tene tupa tii piya yaepia. Balato enene pii oko loto, namba andayo, bala Gote Iwanane ateya lo yakama langea-kola, ole ukupini mindilapo angu yakamato balana pii oko ale wato, epelewa ateainipia. Yuunga akali mindimane namba Gote Iwanane ateya leandopi, naleandopi, okone angini mindi jia tekeko, Goteto yakama molo-peke lapia lakae lo nembo toto, nambato pii utupane leyo. Ayiane Gote okomane namba balana Iwanane atele leya-kola, nambato balana pii okone enene ya lo nembo teyo.

³⁶ Joneto namba Gote Iwanane ateya leane tekeko, Ayiane Goteto piape minditupa namba guato, utupane pikoyo pipe leane. Wuane lea-kola, nambato piape utupane pua ateyo okonemane Jonena pii sia

minuto, Goteto namba languato, piape utupane pulu puu leane lo andawa leya. *

³⁷⁻³⁸ Alu mindikipi mindi yakamato Gote lee-mane anda napene ato, balana pii oko ale-mane ale naya. Jia. Namba piape pulu puu leane Ayiane Goteto namba balana Iwanane ateya leane tekeko, yakamato namba balana Iwanane ateya lo bilipi naleai-kola, Gotena pii oko yakamanga yaa neapeya. *

³⁹ Gotena pii pepa pelene eya okomane wandakali saka atapowa atolane asini oko yakamanga andawa lolopeya nembo toto, yakamato Gotena pii utupane dii lo andoto, aki leyape lo andalaini. Gotena pii utupane-mane namba Gote Iwanane ateya lo langiyaini. *

⁴⁰ Wuane tekeko, yakamato nambanga saka atapowa atene yalane oko molo ipumakale nembo natalaini.

⁴¹ Wandakali-mane nambana gene oko laiyu leakale loto, namba na-epewane. Jia.

⁴²⁻⁴³ Ayiane Goteto namba languato, nambana pii oko wandakali tupa lamaulu puu lea-kola, nambato balana pii yakama langulu epewane. Nambato balana pii tupa yakama langiyawane tekeko, yakamato pii okone enene ya lo bilipi na-lalaini. Wuaneko, nambato yakamana mana okone andoto, yakamato Gote epelewa yamapano yo ata na-piyaini ya lo andeyo. Wandakali waka mindi bala tanena pii oko yakama langulu epeando, yakamato balana pii lola tupa ale wato, balana pii okone enene ya lo bilipi nalolo-peyai.

⁴⁴ Wandakali yangone tupamane yakama gene tupa laiyulapiai laka elo yakamoto nembo talaini tekeko, Gote mindiki angu okomane yakamana gene tupa laiyuleakale lo yakamato nembo natalaini-ko. Anu puato, yakamato katulo namba Gote Iwanane ateya lo bilipi lolo-peyaipe.

⁴⁵ Yakamato namba Gote Iwanane ateya lo bilipi nalolai okonena, nambato Ayiane Gote okona wenonga atoto, yakama kosimi lolopeya nembo na-talapape. Jia. Mosesato yakama moyolo-peya lo yakamato nembo teyai tekeko, Gotena wenonga atoto, Mosesato yakama kosimi loyale ateya.

⁴⁶ Wamba balato nambana piapepi, manapi, utupane yakama languato, Gotena pii layene tupa pepa peleane tekeko, yakamato balana pii utupane bilipi naleai-kola, balato yakama kosimi loyale ateya. Yakamato Gotena pii layene balato pepa peleane utupane bilipi leai-yale, yakamato namba lo bilipi lapiai-yale. *

* 5:29: Dan 12:2; Mt 16:27; Ap 24:15 * 5:30: Jo 5:19-23; 6:37-40 * 5:36: Jo 3:2; 14:11 * 5:37-38: Mt 3:17; Jo 5:32-35; 8:18 * 5:39: Lk 24:27 * 5:46: Ap 3:22

⁴⁷ Wuane tekeko, Mosesato pii pepa peleane utupane yakamato bilipi naleyai-ko. Anu puato, yakamato nambana pii tupa bilipi lolo-peyaipe. Jisasato wuane lea.

6

*Jisasato Akali Tausene Yau Tupa Tomo
Neakale Mayane Oko
Matiyu 14:13-21; Maki 6:30-44; Luku
9:10-17*

¹⁻² Wamba Jisasato metekolo piape tupa piki puato, wandakali siki pelene tupa mo atu yaka pua atea-kola, wandakali wete kambua-mane andeai. Andalu, matili Jisasa bala Galili ipa angini gene mindi Taipi-tiisa lene okona amo yangi pea-angi, wandakali kambua wetete bala watama epeai.

³ Watama epeai-kola, balana disaipolo tupa towa atu bala yuu wangiane mindina puu iyu lalu, peteai.

⁴ Okone angi, Juta yame-mane Pasopa tomo nalaini oto oko mandaka gulea.

⁵ Jisasa bala wangiane okonena pituto, wandakali kambua wetete bala peteanga epeyai oko andea. Andoto, balato Pilipi tipa puato, wandakali utupane tomo neakale nanimato betesa aninga kambamape lea.

⁶ Jisasato metekolo piape mindi puato, wandakali utupane tomo neakale mauwakale nembo toto teke, mee Pilipito bala lo bilipi leyape lo andoyale, bala minu makande puato, pii okone lea.

⁷ Pii okone lea-kola, Pilipito balana pii okone yano peyoto, nanimato (200) tu andete kina-mane betesa kambemando, wandakali utupa mindiki-mindiki lo tomo ajako wetete nolai-kola, katu nalolo-peya lea.

⁸ Wuane lea-kola, Jisasana disaipolo Saimone Pita amene Endutu balato Jisasa lamawuato, wua leaipia:

⁹ Iwana oo ateya okonga pisa lapo, bali-mane waa-pene betesa yau, utupane mandiya ya tekeko, tomo ajako wete utupane-mane wandakali kambua wetete utupane wayumane moya napulu-peya lea.

¹⁰ Yuu wangiane organe tani kambua atea-kola, Jisasato balana disaipolo tupa lamawuato, yakamato wandakali tupa peteakale lalapa lea. Pitiyapa leai-kola, wandakali tupamane taninga peteai. Akali tupa angu dii loto, (5,000) tausene yaupi mindi peteai.

¹¹ Peteai-kola, Jisasato betesa utupane moto, Gote ando wayu pele loto, wandakali peteaini utupane neakale lo tale pua maya. Wuane pua teke, balato pisa okolapo moto, wandakali peteaini utupane neakale lo tale pua maiya-kola, wandakali utupane mindiki-mindiki lo betesa okola, pisa okola,

okonelapo lapotaka yakama tane okotuma nokale nembo teaini pua moto, neai.

¹² Wandakali utupane pitaka-mane no embo yai-kola, Jisasato balana disaipolo tupa lamawuato, tomo akanane tupa mee yoto, tamulane. Yakamato utupane mo yomo alapa lea.

¹³ Wuane lea-kola, wandakali utupane-mane tomo no embo yai-kola, Jisasana disaipolo tupamane bali dini-mane waa-pene betesa yau tupana akenane yane tupa mo amunguli puato, basaketa nuu alesa tumbi laya yai.

¹⁴ Jisasato metekolo piape okone pea-kola, wandakali tupamane andoto, emene wete, akali oko bala potopesa akali ati kenga atala Goteto yuunga epeakale lokale leane oko ya leai.

¹⁵ Wuane lalu, bala utupanena kinji atekale nembo toto, utupane-mane bala minuyale epeaini tekeko, Jisasato okone andoto, utupane awua tepa alu, bala angu yuu wangiane okonena peke lea. *

Jisasa Bala Ipa Angini Okona Tokonga Kee Atama Epeane Oko

Matiyu 14:22-23; Maki 6:45-52

¹⁶ Ole lene nai andaka pea-kola, Jisasana disaipolo tupa ipa angini matene okona puu nena leai.

¹⁷ Puu nena lalu, sipi mindina peakaiyu lo pitiyu, utupane yakama ipa angini okonena amo yangi Kapaneame tano okona moyale peai. Peai-kola, yuu wamba undupi leane tekeko, Jisasa bala yakama ateasinga wamba kapoyale na-epea.

¹⁸ Undupi lea-angi, popo andane mindi lo awua epeane mindimane ipa oko taimane mina ika laya ya.

¹⁹ Jisasana disaipolo tupamane sipi okonena pitiyu, pulu lama-lama poto, kilomita yaupi, watakapi, mindi gulo peai wete, Jisasa bala ipa okona tokonga kee atama epoto, sipi okonena mandaka gulo epea. Balana disaipolo tupamane bala andoto, yama mindi ipa okona tokonga kee atama epeya nembo toto, yuku-mane omeai.

²⁰ Yuku-mane omeai-kola, Jisasato utupane lamawuato, akali mindi ipa okona tokonga kee atama epeyanga yakamato andeyai oko namba Jisasa epeyo-ko. Yakama yuku naene kondalape lea.

²¹ Wuane lea-kola, utupane-mane bala sipi okona ipupia laka lo nembo teaini tekeko, okone angi teke utupane yakama sipinga pitiyu moyale peaini yuu okonena peakaiyu leai.

*Wandakali Saka Atapowa Ataya Alane
Betaso Ateyo Leane Oko*

²²⁻²⁴ Wamba Akali Andane Jisasato ipa angini Galili okona amo yangi atoto, Gote ando wayu pele lalu, wandakali tupa betesa neakale maiya-kola, wandakali tupamanne betesa utupane neai. Nalu, wandakali utupane yakama ipa angini matene okona atoto andeai-kola, Jisasa bala sipi mindiki yane okona peakayiu nalea-kola, balana disaipolo tupa yakama angu sipi okonena pitiyu, peai. Sipi waka mindi organe nayanga andeaini tekeko, anate-lene wandakali utupane-mane andeai-kola, Jisasapi, balana disaipolo tupapi, utupane yuu okonena ata naapeainipia. Okone angi, sipi minditupa Taipi-tiasa tano oko tepa alu epoto, yuu organe mandaka peakayiu leai-kola, wandakali utupane sipi utupanena peakayiu lo pitiyu, Jisasa aiya pima poto, Kapaneame tano okona peakayiu leainipia.

²⁵ Wandakali utupane yakama sipi utupanena pitiyu, ipa angini okonena amo yangi poto, Jisasa aiya pua andoto, tisa, andoko angi nimba wali ipupipe lo bala tipa peai.

²⁶ Wuane leai-kola, Jisasato utupane lamawuato, nambato pii enene wete mindi yakama langeyo lea. Yakamoto namba aiya pima epeyai tekeko, namba Mesaya oko ateyo lo yakama andawa loyale, nambato metekolo piape andane minditupa piwa tupa nembo toto, yakamoto namba aiya pima naepeyei. Jia. Nambato betesa kambua yakama mee giwa-kola, yakamoto no embo apiai pua, dee lapone namakale nembo toto, yakamoto namba aiya pima epeyai.

²⁷ Yuu okona tomo tupa tamuto, koyalane-ko. Yakamoto tomo okonepene tupa mia-makale nembo toto, piape pua ata na-piyapa. Jia. Akalina Iwanane okomane piape peakale loto, Ayiane Goteto bala ata lata yako. Akalina Iwanane okonemane yakama saka atapowa ataya olane tomo oko yakama geakale nembo toto, yakamoto piape pua atalapa lea. *

²⁸ Wuane lea-kola, utupane-mane bala tipa puato, nanimoto Gotena piape tupa pua atamakale nembo toto, piape anu-pene tupa pua atamakalepe leai.

²⁹ Wuane leai-kola, balato utupanena pii okone yano peyoto, yakamoto akali Goteto epeakale leane oko bilipi lo ateaindo, yakamoto Gotena piape pua atolai-kola pulupeya lea. *

³⁰⁻³¹ Wuane lea-kola, utupane-mane bala lamawuato, Gotena pii pepa pelene eya mindimane loto, balato ati kenga tawe betesa oko wandakali tupa neakale maiyane layene eya leai. Gotena pii layene eya okonemane leya pua teke, nanimana

yumbane tupa wandakali napalene yuu okona ateaokone angi, Mosesato utupane betesa mana lene oko neakale maiki pea-kola, utupane-mane betesa okone naka peainipia-ko. Goteto nimba ati kenga atala yuunga puu leane lo nanimoto andalapale nembo toto, nimbato metekolo piape anu-pene mindi pulape leai. *

³² Wuane leai-kola, Jisasato utupane lamawuato, nambato pii enene wete mindi yakama langeyo lea. Mosesato ati kenga tawe betesa okone yakamana yumbane tupanga mai naapeaipia. Jia. Nambana Ayiane okomane betesa ati kenga tawe okone yakamana yumbane tupanga mayaepia. Wuane pua teke, balato betesa ati kenga tawe enene oko yakama geya.

³³ Ati kenga atalu, yuunga epeane betesa okonemane yuu okona wandakali tupa saka atapowa ateakale lo ataya alane lea.

³⁴ Wuane lea-kola, utupane-mane bala lamawuato, Akali Andane, nimbato betesa okone ole dindi lo nanimula gula leai.

³⁵ Wuane leai-kola, balato utupane lamawuato, namba wandakali saka atapowa ateakale lo ataya alane betesa okone ateyo lea. Wandakali mindi bala nambanga epola okone bala anjakopi mindi tomo nono na-olopeya. Dee, namba lo bilipi lolane wandakali okone bala matilipi ipa nono na-olopeya teke. Jia wete. *

³⁶ Nambato metekolo piape mindi piwakola, yakamoto utupane andapai lo nambato yakama langiyo tekeko, yakamoto namba lo bilipi naleyai.

³⁷⁻⁴⁰ Namba tane nembo tolowa pua pukale lo na-epewane. Jia. Namba ati kenga atala yuunga puu leane Ayiane okonemane nembo tola pua pukale nembo toto, namba ati kenga atalu, yuunga epewane. Wandakali minditupa-mane Gotena Iwanane oko andoto, bala lo bilipi lolai-kola, namba Ayiane okomane utupane pitaka saka atapowa atapai lakae lo nembo teya. Namba yakama ateyainga puu leane Ayiane okonemane wandakali utupane namba lo bilipi leakale nembo toto, namba gea. Gea-kola, nambato utupanena mindikipi mindi alu peakale lo ando kondaa naene, yuu koyo pula-angi, utupane pitaka malinga ika laya apiai lakae lo nembo teyo. Tene okonena, namba Ayiane okonemane wandakali namba gula tupa pitaka nambanga epolai-kola, nambato utupane peyo wata napulu-peyo. Jia wete. Yuu oko koyo pula okone ang, nambato utupane malinga ika laya olopeyo. Jisasato wuane lea. *

* 6:27: Jo 6:47-58 * 6:29: 1Jo 3:23 * 6:30-31: Mt 16:1; Jo 2:18; Ek 16:14-15; Nam 11:7-9; Sam 78:24 * 6:35: Jo 4:14 * 6:37-40: Jo 10:28-30; 17:11-12

⁴¹ Jisasato ati kenga atalu, yuunga epeane betesa oko namba lea-kola, Juta yame wandakali utupane-mane mulu-mulu leai.

⁴² Mulu-mulu loto, utupane-mane akali oko bala Josepe iwanane Jisasa jiape leai. Nanimoto balana angini, ayiane-la, okonelapo andeyamae piako. Anu puato, bala ati kenga atalu, yuunga epewane katulo leyape leai. *

⁴³ Wuane leai-kola, Jisasato utupane lamawuato, yakama teke-teke mulu-mulu lo ateyai oko kondalapa lea.

⁴⁴⁻⁴⁶ Wamba namba Ayiane Gote oko towa atu atoto, bala andalu, yuunga epewane. Yuu okona wandakali waka mindikipi mindimane bala anda napeai. Jia. Wandakali mindikipi mindi bala tane katulo namba ateyonga na-epalaini tekeko, potopisa akali tupamane Gotena pii layene mindi pepa peyoto, Goteto wandakali tupa pitaka mana lamaulu-peya leai. Ayiane okona pii okone ale wato, mana molai wandakali tupa pitaka nambanga epolopeyai. Namba ati kenga atala yuunga puu leane Ayiane okona pii okonemane wandakali utupane kilau lo mola-kola, utupane nambanga epolopeyai. Epolai-kola, matili yuu koyo pula-angi, nambato wandakali utupane malinga ika laya olopeyawa. *

⁴⁷⁻⁴⁸ Nambato pii enene wete mindi yakama langeyo. Wandakali saka atapowa ateakale lo ataya alane betesa oko namba ateyo-kola, namba lo bilipi lola wandakali tupa saka atapowa atolopeyai. *

⁴⁹ Wamba yakamana yumbane tupa wandakali napalene yuu okona atoto, betesa gene mana lene oko neaini tekeko, matili utupane pitaka omeainipia.

⁵⁰⁻⁵¹ Ati kenga atalu, yuunga epeane betesa saka atene oko namba. Wandakalimanane betesa oko no atoto, oma napeakale nembo toto, betesa oko ati kenga atalu, yuunga epeane. Wandakali mindimane betesa oko neando, bala saka atapowa atolopeya. Yuu okona wandakali tupa saka atapowa ateakale nembo toto, betesa nambato utupane mauwakale oko nambana umbaini oko, Jisasato wuane lea.

⁵² Wuane lea-kola, Juta yame wandakali yakama teke-teke pii yanda puato, nanimoto balana umbaini oko nalapa loto, akali okomane anu pua katulo gulupeyape leai.

⁵³⁻⁵⁶ Wuane leai-kola, Jisasato utupane lamawuato, nambana umbaini oko tomo enene eya lea. Dee, nambana tundupa oko ipa nolane enene eya. Nambana umbaini tundupa-la, okonelapo nolai wandakali tupa nambanga atolai-kola, namba

utupanenga atolo-peyawa. Yuu oko koyo pula-angi, nambato utupane malinga ika laya olowa-kola, utupane saka atapowa atolopeyai. Wuane tekeko, nambato pii enene wete yakama langeyo. Yakamoto Akalina Iwanane okona umbaini tundupa-la, okonelapo nanene kondeaindo, yakama saka atapowa ata napulu-peyai.

⁵⁷⁻⁵⁸ Wamba betesa gene mana lene oko ati kenga ato yuunga epea-kola, yakamana yumbane tupamane betesa okone neaini tekeko, matili utupane yakama omeainipia. Nambana umbaini oko betesa okonepene jia. Namba ati kenga atalu, yuunga epewane-ko. Nambana umbaini nolai wandakali tupa saka atapowa atolopeyai. Ayiane saka atene okomane namba ati kenga atala yuunga puu lea-kola, namba epewane. Bala mambele namba saka ateyo. Wuane pua teke, namba nolai wandakali tupa namba mambele saka atapowa atolopeyai. *

⁵⁹ Jisasa bala Juta yamena lotu anda Kapaname tanonga ateane okona atoto, wandakali tupa mana lamawuato, pii utupane lea.

Jisasana Disaipolo Kambua-mane Bala Awua Tepa Yaini Oko

⁶⁰ Jisasato wuane lea-kola, bala towa atu epoko pua ateaini wandakali kambuamane balana pii okone ale wato, pii lalawa puato, pii mana Jisasato langeya okona tene oko nembo tape-pene pitete-pene guleyako. Apito balana pii okone ale wato, balato tika pua leya lolopeyape leai.

⁶¹ Wuane lo mulu-mulu leyai nembo toto, Jisasato utupane lamawuato, nambato pii leyo utupane yakamoto ale wato, namba lo bilipi leyai oko awua tepa eyaipe lea.

⁶² Wuane yando, Akalina Iwanane wamba ati kenga yuu ateane okona peke lola-angi, yakamoto mangene okone andeaindo, yakamoto anu pulu-peyaipe.

⁶³ Nanimana umbaini-mane katulo naima saka atapowa ateakale lo ataya nolopeya. Jia. Oli Sipitisa okomane wandakali tupa saka atapowa ateakale lo ataya alane. Nambato Gotena pii oko wandakali tupa lamai-yokola, Oli Sipitisa oko epoto, utupane saka atapowa ateakale lo ataya alane lea.

⁶⁴ Wamba Jisasato bulupane tewa balana piape pua atea-angi, akali bala ene pitulopeya okopi, wandakali bala lo bilipi nololopeyai tupapi, utupane nembo teapia. Utupane andayo, balato pii mindi tako pua loto, Oli Sipitisa okomane wandakali tupa saka atapowa ateakale lo ataya alane tekeko,

* ^{642:} Mt 13:54-56 * ^{6:44-46:} Jo 1:15-18; 6:65; Ais 54:13

* ^{6:47-48:} Jo 3:14-17; 6:32,57-58 * ^{6:57-58:} 1Jo 3:24

* ^{6:64:} Jo 13:11

yakamana minditupa-mane namba lo bilipi naleyai. *

⁶⁵ Tene okonena, nambato yakama languato, namba Ayiane okomane namba lo bilipi lolane tai-lene oko wandakali mindinga mai napeando, wandakali okonemane namba atolowanga katulo naepolo-peya lewane lea. *

⁶⁶ Wuane lea-kola, okone angi tewa, wandakali bala towa atu epoko pua atoto, mana meaini tupana kambua minditupa-mane bala towa atu epoko pua ata napene, bala awua tepa alu, peke leai.

⁶⁷ Bala awua tepa alu, peke leai-kola, Jisasato balana disaipolo alesa akali tupa tipa puato, yakamatopi namba awua tepa ala lakaes lo nembo teyaipe lea.

⁶⁸⁻⁶⁹ Wuane lea-kola, Saimone Pitato balana pii okone yano peyoto, Akali Andane, nimbato wandakali saka atapowa ateakale lo ataya alane pii tupa lalene. Nanimato andeyama-kola, Goteto nimba balana akali epene tika-pene wete oko atola lata yane lo andoto, nanimato nimba lo bilipi leyama. Nanimato nimba tepa wato, akali waka mindi pemando, okone kuai nalolo-peya lea. *

⁷⁰ Wuane lea-kola, Jisasato balana disaipolo tupa lamawuato, nambato alesa akali yakama nambana disaipolo tupa atlapele loto, yapa lo mewane tekeko, yakama akali mindi bala sipitisa koo Satane yale ateya lea.

⁷¹ Saimone Isaka-tiyote iwanane Jutaso bala Jisasana disaipolo alesa akali tupana mindi ateane tekeko, matili Jutasato bala ene pitulu-peya nembo toto, Jisasato yakama akali mindi bala sipitisa koo Satane yale ateya lea.

7

Jisasato Gotena Pii Oko Wandakali Tupa Mana Lamaiyane Oko

¹ Jutiya disitiki okona Juta yame akali minditupa-mane Jisasa peyo ome laima lakaes lo nembo toto, bala aiya pua ateakola, bala Jutiya disitiki okona epoko pua ata napukale nembo toto, Galili disitiki okona angu epoko pua ateai. *

² Wuane pua atea-kola, Juta yame wandakali tupa Jutusaleme poto, anda aiyakame tupana palu atoto, lotu andane mindi lalu, tomo andane mindi nalaini oto oko mandaka epea. *

³⁻⁵ Okone angi, Jisasana amene tupamane bala lo bilipi naleai. Tene okonena, utupane-mane bala lamba loto, akali mindimane bala gene yene atokale nembo

teando, bala too pua atoto, piape mindikipi mindi na-piyaini leai. Nimbatu metekolo piape tupa pilini yando, wandakali pitaka-mane nimbana metekolo piape utupane andeakale. Nimba lo bilipi lene Jutiya disitiki tane wandakali tupamane nimbana metekolo piape tupa andeakale teke. Nimba Galili disitiki oko tepa alu, Jutiya disitiki okona poto, metekolo piape utupane panakame pipe leai. *

⁶⁻⁷ Wuane leai-kola, Jisasato utupane lamawuato, nambato yuu okona wandakali tupana mana miniyai tupa andoto, utupane koo ya lalawane. Wuane leyo-kola, wandakali utupane-mane namba towa embo wete alaini okonena, namba Jutusaleme polane oto oko ipu ata naeya. Wuane tekeko, yuu okona wandakali tupamane katulo yakama towa embo wete naeyai-kola, yakama Jutusaleme polane oto oko ole dindi lo epalane.

⁸ Yakama Jutusaleme lotu andane oko lolo pulupa. Namba Jutusaleme polane oto oko ipu ata naeya-kola, andipa oko angi namba lotu andane oko lolo napeyo lea.

⁹ Wuane lalu, bala Galili disitiki okona atea.

¹⁰ Bala Galili disitiki okona gii ukupini mindi ateane tekeko, balana amene tupa Jutusaleme wamba ini peai-kola, aja matili yale, balapi pea. Bala panakame puu napene, tengamane too pua pea.

¹¹ Bala tengamane too pua peane okonena, Juta yame wandakali tupamane bala akali kawane tupamane bala kapoyale anda na-peainipia. Wuaneko, lotu andane lolane oto oko epea-angi, utupane-mane bala aiya pima epoko puato, akali oko bala aninga ateyape lo tipa piki pua ateai.

¹²⁻¹³ Tipa piki pua ateai-kola, wandakali amunguli pua ateaini tupamane bala andayo mulu-mulu loto, pii kambua leainipia. Wandakali minditupa-mane mulu-mulu loto, Jisasato wandakali tupa minakasa alane leai. Wandakali minditupa-mane bala akali epene mindi ateya leaini tekeko, Juta yamena akali kawane tupamane kenda-pene mindi yakama gulaini lo yuku wato, utupane-mane pii okone panakame naleai. Jia.

¹⁴ Ole minditupa pea-kola, lotu lo ateaini oto tupana tombenenga, Jisasa bala lotu anda andane okona ende anda-pangosa kolandaka loto, Gotena pii mana tupa lamauwa ateai.

¹⁵ Mana lamauwa atea-kola, Juta yamena akali kawane tupamane moko loto, nembo kambua toto, akali oko bala ee ana kambua

* ^{6:65:} Jo 6:44-46 * ^{6:68-69:} Mt 16:16 * ^{7:1:} Jo 5:18

* ^{7:2:} Pit 23:34 * ^{7:3-5:} Ap 1:14 * ^{7:15:} Mt 13:54-56;

sukulu nalea-ko. Balato Gotena pii mana tupa aninga tawe mana meape leai. *

¹⁶⁻¹⁸ Wuane leai-kola, Jisasato utupane lamawuato, Goteto wandakali minditupa lamawuato, yakamato nambana pii oko wandakali tupa lamalu pulupa leya-kola, wandakali utupanena minditupa-mane yakama tanena gene tupa laiyu lamakale nayuto, yakama tanena pii oko wandakali tupa lamai-yaini. Wuane tekeko, pii nambato lalawane tupa namba tanena pii jia. Namba Ayiane okomane balana pii oko wandakali tupa lamalu puu leane pua, nambato balana pii utupane lalawane. Tene okonena, wandakali mindimane nambana pii oko ale wato, Gotena nembotene wato minukale nembo teando, nambana pii okone yapa lo tale puato, nambato namba tanena pii mindi naleya. Jia. Gotena pii oko leya lo andolopeyai. Nambato Gotena gene oko laiyu lokale nembo toto, balana pii oko wandakali tupa lamai-yawane okomane namba akali tika-pene atoto, owato pii na-lalae ya lo yakamato andape-pene. *

¹⁹ Mosesato Gotena loo tupa yakama geane tekeko, yakamana mindikipi mindimane loo utupane wato mina na-piyaini. Jia. Nambato Gotena gene oko laiyu lauwa lakae lo nembo toto, balana enene pii oko lalawane-ko. Anu peakale yakamato namba peyo ome laima lakae lo nembo teyaipe. Jisasato wuane lea. *

²⁰ Wuane lea-kola, wandakali epo amunguli pua ateaini tupamane bala tipa puato, apito nimba peyo ome laima lakae lo nembo teyape. Nimbanga sipitisa koo mindi ateya-kola, nimbato wuane lele leai. *

²¹⁻²³ Wuane leai-kola, Jisasato utupane lamawuato, wamba Mosesato loo mindi yata wato, yakamato iwana mindi mandulai-angi, ole kitupasa pola-kola, balana yala-pene umbaini oko katu apia-maiyapape leaipia. Mosesato mana okone wamba bulupane yata nayaepia. Jia. Yakamana yumbane Apatakameto mana okone wamba bulupane yata ya-kola, Mosesato mana okone minu tai laya yaepia. Yakamato mana okone wato minuto, iwana mindi mandulai-angi, ole kitupasa pola-kola, balana yala-pene umbaini oko katiyaini. Iwanaja okona yala-pene umbaini kateakale lene ole kitupane lola okone Sambasa mindi yando, yakamato Sambasa loo oko kalo peyama nembo toto teke, iwana okonena yala-pene umbaini katu apia-maiyaini. Sambasa tupana

yakamato iwana tupana yala-pene umbaini katuto, piape piyaini pua teke, Sambasa mindina nambato metekolo piape mindiki piwa-kola, anu peakale yakamato moko lapiapie. *

²⁴ Yakamato nambana mana tupa lee-mane angu andoto, namba yapa lo tale peyai mana oko kondalu, yakamato mana epene tika-pene oko wato minuto, nambana mana tupa kuai lo yapa lo tale piyapa lea.

Wandakali Kambua-mane Jisasa Lo Bilipi Leaini Oko

²⁵ Jisasato wuane lea-kola, Jutusaleme tane wandakali minditupa-mane pii lalawa puato, Juta yamena akali kawane tupamane akali mindi peyo ome lamakale nembo toto, aiya pua ateyai akali oko bala jiape leai.

²⁶ Balato wandakali tupa pitakana wenonga panakame atoto, pii lo ateya tekeko, Juta yamena akali kawane tupamane pii kondaa lo bala lamai napeyai oko andalapa. Utupane-mane bala Mesaya oko ateya nembo tolaini.

²⁷ Nanimoto akali okona yuu tene oko nembo teyama tekeko, Mesaya oko epolangi, wandakali mindikipi mindimane balana yuu tene oko nembo natolo-peyai. Bala Mesaya oko jia leai. *

²⁸ Wuane leai-kola, Jisasa bala lotu anda andane okona ende anda-pangosa atoto, wandakali tupa mana lamawua ateapia. Balato pii taimane loto, enene, yakamato namba andoto, nambana yuu tene oko nembo teyai tekeko, namba epewane oko namba tane epokale nembo toto na-epewane. Jia. Gote enene okomane namba ati kenga atala yuunga puu lea-kola, namba yuunga epeane lo yakamato anda na-epayai. *

²⁹ Namba bala towa atu atapale okonena, nambato bala andeyawane. Namba ati kenga atewa-kola, balato namba yuunga puu leane. Jisasato wuane lo mana lamawua atea.

³⁰ Balato wuane lo mana lamawua ateakola, utupane-mane bala andi laima lakae lo nembo teaini tekeko, bala andi lolane oto oko ipu ata naya-kola, wandakali mindikipi mindimane bala mina napene, kondaya. *

³¹ Amunguli pua ateaini wandakali tupana kambua-mane Mesaya oko epolangi, balato akali oko sia minuto, metekolo piape kambua wete napulu-peyai yalua loto, bala Mesaya okone ya lo bilipi leai.

* **7:16-18:** Jo 8:49-50; 12:48-50; 14:10 * **7:19:** Ap 7:52-53; Lom 2:21-24 * **7:20:** Jo 8:48; 10:20 * **7:21-23:** Pit 12:3;

Jen 17:9-13; Jo 5:8-10,16 * **7:27:** Jo 7:41-42; 9:28-29 * **7:28:** Mt 11:25-27; Jo 8:54-55 * **7:30:** Jo 7:44

³² Amunguli pua ateaini wandakali tupamanne akatete lamo nena puato, Jisasa bala Mesaya oko ya leai-kola, Patasai tupamane pii okone ale yai. Ale wato, pitisa akali kawane tupa towa pii mindi lo puta puato, utupane-mane yakamana yanda yene minditupa lamawuato, yakamato Jisasa andi lolo pulupa leainipia.

³³ Akali utupane-mane Jisasa andi lolo peai-kola, Jisasato Juta yame wandakali tupa lamawuato, namba ana anjalapo minditupa angu tako pua yakama towa atu atalu, namba ati kenga atala yuunga puu leane Ayiane oko ateyanga peke lolo-peyawa lea.

³⁴ Namba Ayianena yuu okona atolowakola, yakama katulo yuu okonena naepolopeyai. Jia. Yakamato namba aiya pulupeyai tekeko, yakamato namba ando mia napulupeyai lea. *

³⁵⁻³⁶ Wuane lea-kola, Juta yamena akali kawane tupa yakama teke-teke pii mindi lamai-lamai puato, Jisasato yakama katulo namba atolowa okona naepolo-peyai leya. Yakamato namba aiyu pulupeyai tekeko, yakamato namba ando mia napulu-peyai leya-ko. Balato mangene anu-pene mindi pukale nembo toto, wuane leyape. Bala aninga pola-kola, nanimato bala katulo aiya pua anda napulu-peyamape. Wamba Juta yame wandakali minditupa nanimana yuu oko tepa alu, Gitiki yamena yuu okona poto, ateyai. Bala yuu okonena poto, Juta yame wandakali utupanena tombe-nenga atoto, wandakali yame waka tupa mana lamauwa atokale nembo toto, wuane leyape leai.

Wandakali Tupamane Jisasa Nembo Toto, Yapu Lo Lapo Peaini Oko

³⁷⁻³⁸ Juta yame wandakali tupamane lotu lalaini oto kitupane koyo puyale lotu andane mindi leai-angi, Jisasa bala ika lo atoto, pii mindi wandakali tupa taimane lamawuato, Gotena pii pepa pelene eya mindimane leya pua, wandakali mindimane namba lo bilipi leaindo, ipa saka balana yamapanenga lai yungu epolopeyai layene eya. Tene okonena, wandakali mindi ipa nono yando, bala nambanga ipa nolo epeakale lea. *

³⁹ Okone angi, Jisasa bala gene andane mindi mia napea-kola, Goteto balana Oli Sipitisa oko wandakali tupanga mai na-epea tekeko, matili bala lo bilipi lolai wandakali tupamane Oli Sipitisa oko molopeyai nembo toto, Jisasato pii okone wandakali utupane lamaiya. *

⁴⁰ Lamaiya-kola, wandakali amunguli pua ateaini tupana minditupa-mane

balana pii okone ale wato, enene, akali oko bala potopisa akali ati kenga atala Goteto yuunga epeakale lokale leane oko ateya leai. *

⁴¹⁻⁴² Wandakali waka minditupa-mane akali oko bala Mesaya oko ateya leai. Wuane tekeko, wandakali minditupa-mane Gotena pii pepa pelene eya mindimane loto, kinji Dapiti yame okomane balana yuu tene Beselekeeme tano okona atoto, Mesaya oko mandulu-peyai layene eya-ko. Mesaya oko bala Galili disitiki okona tane mindi ata napulu-peyai nembo teyama leai. *

⁴³ Wuane leai-kola, wandakali amunguli pua ateaini tupamane Jisasa bala Mesaya oko ateyape lo pii yanda puato, yapu lo lapo peai.

⁴⁴ Akali yangi-mane bala andi laima lakae lo nembo teaini tekeko, utupanena mindikipi mindimane bala minata nayai.

Juta Yamena Akali Kawane Tupamane Jisasa Lo Bilipti Naleaini Oko

⁴⁵ Yanda yene tupamane Jisasa andi nälene, pitisa akali kawane tupapi, Patasai tupapi, utupane ateainga peke leai-kola, Juta yamena akali kawane utupane-mane yanda yene tupa tipa puato, anu peakale yakamato Jisasa andi lo awua na-epeyaipe leainipia.

⁴⁶ Wuane leai-kola, yanda yene tupamane utupanena pii okone yano peyoto, Jisasato pii tene andane palene tupa lala pua wamba akali mindikipi mindimane naleane okonena, nanimato bala andi lo awua naeepene kondalamia leainipia. *

⁴⁷ Wuane leai-kola, Patasai tupamane utupane tipa puato, Jisasato yakamapi makasra ala-kola, yakamatopi bala lo bilipi lalaipe leainipia.

⁴⁸⁻⁴⁹ Wandakali amunguli pua ateyai tupamane Mosesana loo oko wayumane nembo natene ato, Jisasa bala Mesaya oko ateyai lo bilipi leyi-kola, Goteto kenda-pene andane wete mindi utupane malupeyai. Wuane tekeko, Patasai tupapi, Juta yamena akali kawane tupapi, nanimana mindikipi mindimane bala Mesaya oko ateyai lo bilipi naleyama leainipia. *

⁵⁰ Patasai utupane mindina gene oko Neketomasa lene. Wamba bala Jisasa peteanga poto, bala towa pii lalawa peaipia. Akali okonemane Juta yamena akali kawane utupane lamawuato, wua leaipia. *

⁵¹ Nanimana loo okomane mana mindi yata wato, nanimato akali mindi mee kosimi loto, balanga koo tene minditupa

* 7:34: Jo 8:21; 13:36 * 7:37-38: Pit 23:36; Ais 55:1; 58:11; Jo 4:14 * 7:39: Jo 16:7; 20:22; Ap 2:4 * 7:40: Jo 6:14

* 7:41-42: Sam 89:3-4; Mai 5:2; Jo 1:46 * 7:46: Mk 1:22 * 7:48-49: Jo 12:42-43 * 7:50: Jo 3:1-2

yata ape-pene naleya. Jia. Nanimato balana pii wamba ini ale wato, balana mana tupa nembo toto, bala yapa lo tale pipe-pene leya leaipia.

⁵² Wuane lea-kola, Juta yamena akali kawane tupamane balana pii okone yano peyoto, nimba Galili disitiki okona tane mindi ata napele-ko. Anu peakale nimbato Galili tane Jisasa oko moyoyale wuane lelepe. Nimbato Gotena pii pepa pelene eya tupa wayumane wete dii lo andoto, Galili tane mindi bala potopisa akali mindi atolopeya layene naeya oko andape leanipia.*

⁵³ [Wuane lalu, akali utupane mindiki-mindiki lo yakama andaka epeainipia.]

8

Juta Yame Tupamane Pamuku Wanda Mindi Atu Epeaini Oko]

¹ [Jisasa bala Olipi wangiane okona pea.

² Anate-lene upa pitane nai peakaiyu leangi, bala lotu anda andane okona ende anda-pangosa dee lapone teke peakaiyu lea. Wandakali pitaka bala ateanga epeakola, bala pituto, utupane mana lamauwa petea.

³ Akali mindina wetene okomane pamuku pua palea-kola, mindimane andoto, loo tupana mana andene akali tupapi, Patasai tupapi, utupane lamai-yainipia. Lamai-yaikola, utupane-mane wanda okone atu Jisasa mana lamauwa peteanga epoto, wandakali tupana wenonga ateakale leai.

⁴ Ateakale lalu, utupane-mane Jisasa lamauwato, tisa, wanda okomane pamuku pua paliya-kola, mindimane andala yala leai.

⁵ Wamba Mosesato loo mindi nanimanga yata wato, wanda okonepene tupa anamane peyo ome lalapape leane-ko. Nimbato aki lelepe leai.*

⁶ Jisasato utupanena pii okone yano peyola-kola, utupane-mane bala kosimi lamakale nembo toto, bala minu mandeke puato, wuane leaini tekeko, Jisasato utupanena pii okone yano peya napene, mee tombawua loto, balana kii ondene okomane yuunga pepa mindi pelea.

⁷ Jisasato utupanena pii okone yano napelea-kola, utupane-mane bala tipa pitawa yapo yai. Wuane pea-kola, bala ika loto, utupane lamauwato, koo napilini akali mindimane wanda oko ana-mane wamba ini peya lea.*

⁸ Wuane lalu, Jisasa bala lapone tombawua loto, yuunga pepa mindi pelea.

⁹ Jisasato wuane lea-kola, loo tupana mana andene akali tupapi, Patasai tupapi, utupane-mane balana pii okone ale alu, mindiki-mindiki lo puku peai. Akali miniyene tupa wamba ini peai-kola, patane yale tupa matili peai. Akali utupane pitaka peai-kola, wanda okone angu Jisasana wenonga atea.

¹⁰ Atea-kola, Jisasa ika lo atoto, bala tipa puato, wanda, akali andalamu tupa aninga palaipe. Akali utupanena mindiki mindimane nimba kosimi loyale ata napeyaipe lea.

¹¹ Wuane lea-kola, wanda okonemane bala lamauwato, Akali Andane, akali mindikipi mindimane namba kosimi loyale ata napeyai lea. Wuane lea-kola, Jisasato bala lamauwato, nambatopi nimba kosimi naleyo-ko. Andipa ateyama gii okona atoto tewa, nimbato koo mindi dee lapone napipe. Nimba puu lea.] *

Namba Ayiane Nalipato Enene Pii Leyapa Leane Oko

¹² Wandakali kambua lotu anda andane okonena ende anda-pangosa amunguli pua atea-kola, Jisasato utupane lapone mana lamauwato, nambato yuu okona atoto, tii pua atalawane lea. Namba watama epolai wandakali tupanga saka atapowa ateakale lo ataya alane tii-pene okone yola-kola, utupane undupi pangosa epoko pua ata napulu-peyai. Jia wete lea.*

¹³ Wuane lea-kola, Patasai tupamane bala lamauwato, nimba tane angu wuane lele okonena, wandakali waka tupamane nimbania pii okone bilipi lolane tene mindi napaley leai.

¹⁴ Wuane leai-kola, Jisasato utupanena pii okone yano peyoto, yuu namba atalu epewane okopi, yuu namba polopeyawaya okopi, okonelapo yakamoto nembo nateyai tekeko, yuu namba atalu epewane okopi, yuu namba polopeyawaya okopi, okonelapo nambato nembo teyo lea. Nambato wuane nembo toto, mana okopene tupa minuto, piapte piyawane lewando, wandakali waka tupamane nambana pii okone bilipi lape-pene.*

¹⁵ Yakamoto yuunga wandakali tupana pii mana wato minuto, namba yapa lo tale peyai. Yuunga wandakali tupana pii mana wato minuto, nambato wandakali mindikipi mindi yapa lo tale na-piyawane.*

¹⁶⁻¹⁷ Wuane tekeko, yakamana loo okomane pii mindi loto, wandakali lapo wisanisa atoto, pii mindiki okone teke leapindo, okone-lapona pii okone enene

* 7:52: Jo 7:41-42 * 8:5: Pit 20:10; Lo 22:22-24 * 8:7: Lo 17:7 * 8:11: Jo 5:14 * 8:12: Ais 49:6; Jo 1:4-9; 9:4-5;
12:46 * 8:14: Jo 5:31-35; 7:28-29 * 8:15: Jo 12:47

yolopeya layene eya. Namba angu ata napeyo. Jia. Namba ati kenga atala yuunga puu leane Ayiane oko namba towa atu ateyapa. Wuaneko, nambato wandakali mindi yapa lo tale pewando, namba Ayiane okomane pii mindiki okone teke lola-kola, nalipana pii okone enene yolopeya. *

¹⁸ Namba tane mana okopene tupa minuto, piape piyawane leyo. Namba ati kenga atala yuunga puu leane Ayiane okomane namba andayo pii mindiki okone teke leyakola, nalipana pii okone enene wete eya lea. *

¹⁹ Wuane lea-kola, Patasai tupamane bala tipa puato, nimbana Ayiane okone aninga ateyape leai. Wuane lea-kola, Jisasato utupanena pii okone yano peyoto, yakamoto namba andapai-yle, nambana Ayiane okopi andapai-yle tekeko, yakamoto namba Ayiane nalipa lapotaka anda napeyai lea.

²⁰ Wayu pele muni aindaka lalaini pene tupa yaini ongane mandaka pituto, Jisasato wandakali tupa mana lamawuato, pii utupane leane tekeko, wandakali-mane bala andi lolane oto oko ipu ata naya-kola, wandakali mindikipi mindimane bala andi loyale mina napeai. *

Wandakali Kambua-mane Jisasa Lo Bilipi Leaini Oko

²¹ Okone angi, Jisasato dee lapone teke wandakali tupa mana lamawuato, namba polowa-kola, yakamoto namba aiya pulupeyai tekeko, yakamoto katulo namba anda napulu-peyai. Yakamana koo piyaini tupa yakamanga mee yapowa yola-kola, yakama omolai-angi, yuu namba polowa okona yakama katulo naepolo-peyai lea. *

²² Wuane lea-kola, Juta yamena akali kawane tupa yakama teke-teke pii lalawa puato, balato yuu namba polowa okona yakama katulo naepolo-peyai leya-ko. Bala tane peyo ome lokale nembo toto, wuane leyape leai.

²³⁻²⁴ Wuane lea-kola, Jisasato utupane lamawuato, yuunga yuu oko yakamana yuu tene oko eya-kola, yakamoto yuunga wandakalina mana tupa wato minu atalaini. Tene okonena, yakama omolai-angi, yakamoto koo piyaini utupanena koo tene tupa yakama tanenga mee yapowa yolopeya lo nambato yakama langeyo. Wuane tekeko, ati kenga oko nambana yuu tene oko eya-kola, nambato yuu okona wandakalina mana tupa wato mina napiyawane. Yakamoto namba Mesaya oko ateya lo bilipi naleaindo, matili yakama omolai-angi, yakamoto mana koo mineaini

tupa yakamanga mee yapowa yolopeya lea. *

²⁵ Wuane lea-kola, utupane-mane bala tipa puato, nimba apipe leai. Wuane lea-kola, balato utupane lamawuato, namba Mesaya oko ateyo lo nambato yakama wamba langewa okoni.

²⁶ Nambato yakama yapa lo tale puato, katulo pii kambua lauwa-yale tekeko, namba ati kenga atewa-kola, mindimane namba yuunga puu leane. Balato enene pii tupa lalane. Nambato balana pii enene utupane ale wato, yuu okona wandakali tupa lamai-yawane lea.

²⁷ Jisasato wuane leane tekeko, wandakali tupamane balana pii okone ale wato, bala ati kenga atea-kola, Aiyane Goteto bala yuunga puu leane nembo nateai. Jia.

²⁸⁻²⁹ Nembo nateai-kola, Jisasato utupane lamawuato, ole dindi lo nambato mana epene tupa angu minalawane okonena, namba ati kenga atala yuunga puu leane Ayiane okomane namba towa epele alane. Wuaneko, namba angu atola loto, balato namba awua tepa naya. Jia. Bala namba towa atu atalapale. Matili yakamoto Akalina Iwanane oko ita malamanda okona minaiyu lolai-angi, namba tanena nembotene oko wato minuto, nambato mangene mindikipi mindi na-piyaeya lo yakamoto andolopeyai. Okone angi, yakamoto andolai-kola, namba Ayiane okomane wua lape lo namba mana langeya-kola, namba Mesaya oko atoto, balana pii oko wandakali tupa lamai-yaeya lo yakamoto andolopeyai lea. *

³⁰ Wuane lea-kola, wandakali kambua-mane balana pii oko ale wato, bala lo bilipi leai.

Anu Peakale Yakamato Namba Lo Bilipi Naleyaipe Leane Oko

³¹ Juta yame wandakali minditupa-mane Jisasana pii leane tupa ale wato, balato enene pii leya lo bilipi leai-kola, balato utupane lamawuato, yakamoto nambana pii tupa wayumane wato minu ateaindo, yakama nambana disaipolo enene tupa atolopeyai lea.

³² Yakama nambana disaipolo enene tupa atoto, enene pii oko nembo tolai-kola, enene pii okomane yakama tinga lo molopeya lea.

³³ Wuane lea-kola, utupane-mane bala lamawuato, nanima Apatakame yamena mandiyene tupa ateyama. Alu mindikipi mindi nanimato yole mia napene, wandakali waka mindina katapusa piape mindi

* ^{8:16-17:} Lo 19:15; Jo 5:30; 8:28-29 * ^{8:18:} 1Jo 5:6-9
3:31 * ^{8:28-29:} Jo 3:14-15 * ^{8:33:} Mt 3:8-10

* ^{8:20:} Jo 7:30 * ^{8:21:} Jo 7:34; 13:33 * ^{8:23-24:} Jo

pimai napema-ko. Anu peakale, nimbatu naimana languato, enene pii okomane yakama tinga lo molopeya lelepe leai. *

³⁴ Wuane leai-kola, balato utupanena pii okone yano peyoto, nambato pii enene wete mindi yakama langeyo lea. Mana koo wato minalaini wandakali tupamane mana koo utupanena katapusa piape pua atalaini. *

³⁵ Katapusa piape piyane wandakali mindi bala piape anduane okona yame tupa towa ole dindi lo atapowa ata napiyane. Jia. Piape anduane okona iwanane oko bala ayianena yame tupa towa atu ole dindi lo atapowa atalane.

³⁶ Tene okonena, Iwanane okomane katapusa piape pua atalaini wandakali yakama tinga lo meando, yakama tinga lo mene wete atolopeyai.

³⁷⁻³⁸ Nambato yakama Apatakame yamena mandiyene tupa ateyai nembo teyto tekeko, namba Ayiane oko towa atu atewa-angi, minditaka andewane tupa nambato yakama langeyo-kola, yakamoto nambana pii okone wato mina-makale nembo nateyai. Tene okonena, yakamanayiane waka okomane wua piyapape leyekola, yakamoto balana pii oko ale wato, namba peyo ome laima lakae lo nembo teyai.

³⁹ Wuane lea-kola, Juta yame akali utupane-mane balana pii okone yano peyoto, nanimana ayiane oko Apatakame leai. Wuane leai-kola, Jisasato utupane lamawuato, yakama Apatakamena mandiyene yame atapia-yale, Apatakameto mana epene minu ateane pua teke yakamoto mana epene minu atapiai-yale lea. *

⁴⁰ Goteto enene pii oko namba langekola, nambato balana pii enene okone ale wato, yakama langewa tekeko, andipa yakamoto namba peyo ome laima lakae lo nembo teyai. Apatakameto pii enene lalaini akali tupa peyo ome naleaipia.

⁴¹ Yakamoto yakama ayiane waka okona mana koo tupa wato minu ateyai lea. Wuane lea-kola, utupane-mane balana pii okone yano peyoto, nanimana angini-mane pamuku pima epoko puato, naimana mandi napea. Jia. Nanimana Ayiane mindiki angu ateyai oko bala Gote leai. *

⁴² Wuane leai-kola, Jisasato utupane lamawuato, namba tane epokale nembo toto na-epewane lea. Namba ati kenga atewa-kola, Goteto namba yuunga puu lea-kola, namba epewane-ko. Gote bala yakamana ayiane atapia-yale, yakamoto namba towa epelewa yamapane yo atapiai-yale.

⁴³⁻⁴⁴ Yakamana ayiane oko Satane ateyakola, balato nembo teya pua yakamoto pima lakae lo nembo toto, yakamoto katulo nambana pii oko kuai lo ale aa na-piayaini. Jia. Yakamoto nambana pii tupa ale wato teke, pii utupanena tene tupa wayumane nembo nateyai. Wamba bulupane tewa Satane bala wandakali tupa peyo ome lalane sипитса koo mindi ateane. Enene pii oko balanga naeja-kola, balato enene pii oko wato mina napiyane. Bala owato pii tupa pitakana tene oko atoto, owato pii tupa lolangai, bala tanena pii tupa lola-kola pulupuya. *

⁴⁵ Nambato pii enene oko leyo-kola, yakamoto nambana pii okone enene ya lo bilipi na-lalaini.

⁴⁶ Nambato koo piyane lo yakamana mindimane katulo andawa nalolo-peyape. Nambato enene pii oko leyo-ko. Anu peakale yakamoto nambana pii okone enene ya lo bilipi naleyaipe. *

⁴⁷ Gotena yame wandakali tupamane balana pii oko ale alaini tekeko, yakama balana yame wandakali tupa at napeyai okonena, yakamoto balana pii oko ale aa na-piayaini. Jisasato wuane lea.

Jisasa Bala Wamba Wetete Atewane Leane Oko

⁴⁸ Jisasato wuane lea-kola, Juta yame akali utupane-mane balana pii okone yano peyoto, nimba Samatiya yame mindi atelekola, sипитса koo mindi nimbanga ateyalayama okone enene jiape leai. *

⁴⁹⁻⁵⁰ Wuane leai-kola, balato utupanena pii okone yano peyoto, nambato nambana Ayiane okona gene oko laiyu lalawane okonena, sипитса koo mindi nimbanga ata napeya lo yakamoto andeyai. Wandakalmene nambana gene oko laiyu lapiat lajkae lo nembo nateyai tekeko, yakamoto nambana gene oko laiyu lalapale lo namba Ayiane okomane nembo teya. Wuaneko, yakamoto nambana gene oko mo ainapi leyai okonena, balato yakama yapa lo tale peya.

⁵¹ Wuane tekeko, nambato pii enene wete mindi yakama langeyo. Wandakali mindimane nambana pii oko wato minu ateando, bala saka atapowa atolopeya lea. *

⁵² Wuane lea-kola, Juta yame akali utupane-mane bala lamawuato, Apatakamepi, potopisa akali tupapi, utupane pitaka omeaini tekeko, nimbatu naimana languato, wandakali mindimane nimbanga pii oko wato minu ateaindo, bala saka atapowa atolopeya lele leai. Nimbatu wuane

* **8:34:** Lom 6:16,20 * **8:39:** Mt 3:8-10 * **8:41:** Ais 63:16

* **8:43-44:** 1Jo 3:7-8 * **8:46:** 2Ko 5:20-21; 1Pi 2:21-23

* **8:47:** 1Jo 4:6 * **8:48:** Mk 3:21-22 * **8:51:** Jo 5:24

lele okonena, andipa nanimato andeyamakola, sипитса koo mindi nimbanga ateya.

⁵³ Potopisa akali tupapi, nanimana yumbane Apatakamepi, utupane pitaka omeainipia. Nimbato akali utupane pitaka sia minuto, akali gene andane wetete yene mindi ateyo nembo toto, wandakali mindimane nimbana pii oko wato minu ateaindo, bala saka atapowa atolopeya lelepe. Nimba api ateyo nembo toto, wuane lelepe leai.

⁵⁴⁻⁵⁵ Wuane leai-kola, balato utupane lamawuato, namba tanena gene oko laiyu lewando, nambana gene nayolopeya tekeko, namba Ayiane okomane nambana gene oko laiyu lalane lea. Yakamoto nambana Ayiane oko nembo nateyai tekeko, yakamoto owato pii loto, bala yakamana Gote oko ateya lalaini. Nimbato bala andoto, balana pii oko wato minu atalawane. Tene okonena, nambato bala anda na-peyawane lewando, namba owato pii lene akali yakama yale gulo atolopeyawa.

⁵⁶ Wamba yakamana yumbane Apatakameto namba epolane oto oko andokale nembo toto, bala epelewa ateaipia. Matili balato oto okone andoto, epele wete yaepia lea.

⁵⁷ Wuane lea-kola, Juta yame akali utupane-mane bala lamawuato, nimba ee ana paiyasa yau pene ata napelle-ko. Nimbato Apatakame anda nappee. Jia wete leai.

⁵⁸ Wuane leai-kola, balato utupane lamawuato, nambato pii enene wete mindi yakama langeyo. Wamba Apatakame angini-mane bala mandi nappee-angi, namba saka atewane oko mee atapowa ateyo lea.*

⁵⁹ Wuane lea-kola, Juta yame akali utupane-mane bala ana-mane peyo ome lamakale nembo toto, ana minditupa meaini tekeko, Jisasa bala tengamane too pua poto, lotu anda andane ende okona kamaka pea.

9

Jisasato Akali Lee Koo Mindi Lee Taya Yane Oko

¹ Jisasa balana disaipolo tupa towa asini poto andeai-kola, angini-mane lene koo mandu yane akali mindi atea.

² Atea-kola, utupane-mane bala tipa puto, tisa, apito wamba koo pea-kola, angini-mane akali oko lene koo mandeape leai. Balana angini, ayiane-la, okonelapo-mane wamba koo peapelepe. Pee, bala tane-mane wamba koo peapelepe leai.*

³ Wuane leai-kola, Jisasato utupanena pii okone yano peyoto, akali okone bala tane yandopi, balana angini, ayiane-la, okonelapo yandopi, utupanena mindimane wamba koo peane mambele angini-mane akali oko lene koo mandi neapea. Jia. Nimbato Gotena piape puluwa oko wandakali-mane pakaname andeakale nembo toto, angini-mane akali oko lene koo mandeakale lo Goteto ando konda yane. *

⁴⁻⁵ Namba yuu okona ateyo-angi, yuu okona wandakali tupamane Gotena piape tupa andeakale nembo toto, namba tii pua ateyo. Matili yuu undupi lola-angi, wandakali mindikipi mindimane katulu piape napulu-peyai. Andipa yuu tii peya oko angi, namba ati kenga atala yuunga puu leane Ayiane okona piape tupa pimawua atape-pene lea.*

⁶ Wuane lalu, balato yuu okona apesango soo lo tepa wato, apesango okone yuu towa minu mandau puato, akali lene koo okonena lenenga yuu yanga-maiya.*

⁷ Yuu yanga-maiyu, Jisasato akali okone lamawuato, nimba ipa angini anako gene Silomo lene okona wasa-wasa peyolo puu lea-kola, akali okone bala wasa-wasa peyolo pea. Gene Silomo okone mo peke loto, peakale latane lalaini. Akali okone ipa angini Silomo okona poto, ipa okonena wasa-wasa peyalu, andaka peke lea-angi, balana lene okolapo tea-kola, balato pitaka taka kuai lo andeapia.

⁸ Wamba akali okonemane wandakali tupa tee loto, minditaka giyapa lo peteakola, wandakali kambua-mane bala akali lene koo ya lo andeaini-pia. Balana lene tea-kola, wandakali utupanepi, wandakali bala towa yuu mindikinga atalaini tupapi, utupane yakama teke-teke mindi akali tipa pikti puato, akali oko wamba lene koo atoto, wandakali-mane minditaka giyapa lo tee lalane pia okone jiape leainipia.

⁹ Wuane leai-kola, wandakali minditupamane utupanena pii okone yano peyoto, enene, bala akali okone leaini tekeko, wandakali minditupa-mane utupanena pii okone yano peyoto, jia, bala akali waka mindi tekeko, bala mee akali mindiki okonepene teke gulo ateya leainipia. Wuane leai-kola, akali okone bala tane namba akali lee koo pia okone teke leaipia.

¹⁰ Wuane lea-kola, utupane-mane bala tipa puato, nimbana lene okolapo anu puato, tapiape leainipia.

¹¹ Wuane leai-kola, balato utupanena pii okone yano peyoto, akali Jisasa lene okoneme yuu minditupa minu mandau puato, nambana lenenga yuu yanga mawuato,

* 8:58: Jo 1:1 * 9:2: Ese 18:20; Lk 13:2,4 * 9:3: Jo 11:4 * 9:4-5: Mt 5:14; Jo 8:12 * 9:6: Mk 8:23

namba ipa angini anjako Silomo lene okona wasa-wasa peyolo puu lapia. Wuane lapiakola, namba poto, ipa okonena wasa-wasa peyauwa-kola, namba lee tauwa leaipia.

¹² Wuane lea-kola, utupane-mane bala tipa puato, akali okone bala aninga ateyape leainipia. Wuane leai-kola, balato namba nembo nateyo leaipia.

¹³⁻¹⁴ Sambasa angi Jisasato yuu minditunga minu tala puato, akali lee koo okonena lenenga yuu yanga mawuato, balana lee taya apiya nembo toto, wandalaki utupane-mane akali wamba lene koo ateane okone bala atu Patasai tupa ateatinga peainipia.

¹⁵ Peai-kola, Patasai tupamanepi bala tipa puato, nimbana lene oko anu puato tapiape leainipia. Wuane leai-kola, balato utupanena pii okone yano peyoto, akali mindimane mandau minditunga nambana lenenga yangapia-kola, nambato wasa-wasa peyo apiauwa. Andipa namba lee too ateyo leaipia.

¹⁶ Wuane lea-kola, Patasai yangi-mane loto, Jisasato akali okonena lee taya api-anne okonemane Sambasa loo oko wato mina napipia yako. Bala Gote towa atu atalu, na-epea ya leainipia. Utupane-mane wuane leaini tekeko, Patasai yangi-mane pii mindi loto, akali okone bala koo piyane akali mindi atapia-yale, balato metekolo piape okonepene tupa katulo napipia-yale leainipia. Wuane loto, Patasai utupane-mane pii waka-waka loto, yame lapo gulo ateainipia.

¹⁷ Tene okonena, utupane-mane akali wamba lene koo ateane okone dee lapone pii mindi tipa puato, nimbana lene taya api-anne akali okone bala akali anu-pene mindi ateya lelepe leainipia. Wuane leai-kola, akali wamba lee koo ateane okomane akali okone bala potopisa akali mindi ateya leaipia.*

¹⁸ Wuane lea-kola, Juta yame akali utupane-mane balana pii okone ale wato, balato owato leya nembo toto, utupane-mane balana angini, ayiane-la, okonelapo epeakale leainipia.

¹⁹⁻²⁰ Balana angini, ayiane-la, okonelapo epeapi-kola, Juta yame akali utupane-mane okonelapo tipa puato, akali oko liyambana iwanane okope leainipia. Wuane leai-kola, okonelapo-mane utupanena pii okone yano peyoto, enene, bala naliyana iwanane leapilipia. Wuane leapi-kola, utupane-mane okonelapo tipa puato, liyambato bala wamba lene koo mandeapipe leainipia. Wuane leai-kola, okonelapo-mane utupanena pii okone yano peyoto, enene, naliyato bala wamba lene koo mandeapipe leainipia.

leapilipia. Wuane leapi-kola, utupane-mane okonelapo tipa puato, wuane yando, andipa bala anu puato, lee teyape leainipia.

²¹ Wuane leai-kola, okonelapo-mane utupanena pii okone yano peyoto, balana lene okolapo anu puato tapiape lo naliyato nembo nateyapa leapilipia. Dee, apito balana lene okolapo taya apiape lo naliyato nembo nateyapa teke. Bala akali mini-yene mindi ateya-ko. Bala tane-mane yakama langeakalenga, yakamato bala tipa piyapa leapelepia.

²²⁻²³ Wamba Juta yame akali utupane-mane pii mindi lo yake puato, wandalaki mindimane Jisasa bala Mesaya oko ateya leainido, bala nanima towa atu lotu lo ata napeakale. Nanimato bala peyo wata-makale leainipia. Tene okonena, akali okonena angini, ayiane-la, okonelapo-mane Juta yame akali utupane yuku wato, naliyana iwanane oko bala akali mini-yene mindi ateya-ko. Yakamato bala tipa piyapa leapelepia.

²⁴ Wuane leapi-kola, Juta yame akali utupane-mane akali wamba lene koo ateane okone bala lapone epeakale leainipia. Bala epea-kola, utupane-mane bala lamawuato, nanimato akali Jisasa okone bala koo piyane nembo teyama-ko. Nimbato balana gene oko laiyu nalene, Gotena gene oko laiyu lape. Nimbana weno minuto, Gotena gene oko loto, enene pii lolopeyawa laa leainipia.

²⁵ Wuane leai-kola, balato utupanena pii okone yano peyoto, akali okone balato koo piyaepe, na-piyaepe lo namba nembo nateyo leaipia. Nambato minditaka mindiki angu nembo teyo. Wamba namba lee koo atewa tekeko, andipa lee teyo leaipia.

²⁶ Wuane lea-kola, utupane-mane bala tipa puato, balato nimbanga anu puato, nimbana lene oko taya apiape leainipia.

²⁷ Wuane leai-kola, balato utupane lamawuato, wamba nambato yakama langiyo tekeko, yakamato nambana pii okone bilipi na-lalai leaipia-ko. Anu peakale yakamato nambana pii mindiki okone teke dee lapone ale amakale nembo teyaipe. Yakamapi balana disaipolo tupa gulaima laka lo nembo toto, namba dee lapone teke tipa peyaipe leaipia.

²⁸⁻²⁹ Wuane lea-kola, Patasai utupane-mane bala lamba loto, Goteto balana pii tipa Mosesa lamaiya-kola, Mosesato pii utupane nanima langeane nembo toto, nanima Mosesana disaipolo tupa ateyama. Nimbakali Jisasa okonena disaipolo mindi atele tekeko, bala aninga atoto epeape lo nanimato nembo nateyama leainipia.

* 9:17: Jo 4:19

³⁰⁻³³ Wuane leai-kola, akali okonemane utupanena pii okone yano peyoto, wandakali mindimane koo pua ateaindo, Goteto wandakali okonena pii ale naene kondalane nembo teyama leaipia. Wuane tekeko, wandakali mindimane Gotena nembo-tene oko wato minu, bala lo lotu loto, balana mana epene tupa wato mineando, Goteto wandakali okonena pii ale alane nembo teyama. Wamba wetete tewa ipapo wato, andipa ateyama oto okona giao loto, angini-mane akali lene koo mindi manda-kola, matili wandakali mindimane balana lee oko taya yane lo nanimato alu mindikipi mindi ale naema. Andipa akali Jisasa oko balato nambana lene oko mo taya ala. Goteto akali okone epeakale nalea-yale, balato katulo mangene okonepene mindi napiapia-yale tekeko, yakamato bala aninga atoto epeape nembo nateyama leyai-kola, namba moko loto, nembo kambua teyo leaipia.*

³⁴ Wuane lea-kola, utupane-mane balana pii okone yano peyoto, nimba angini-mane nimbanga mana koo yapeta manda-kola teke, nimbato nanimana mana langiwa lakae lo nembo telepe leainipia. Wuane loto, utupane-mane bala utupane towa atu lotu naleakale nembo toto, Juta yamena lotu anda okona takita peyo wateainipia.*

Bilipi Nalene Wandakali Tupa Lene Koo Gulo Ateyai Leane Oko

³⁵ Patasai tupamane akali wamba lene koo ateane okone bala Juta yamena lotu anda okona ata napeakale lo peyo wata alai lene ale wato, Jisasato bala aiya pima poto, andea. Andoto, utupane-mane Jisasa tipa puato, nimbato Akalina Iwanane oko lo bilipi lelepe lea.

³⁶ Wuane lea-kola, akali okonemane bala tipa puato, Akali Andane, nambato bala lo bilipi lokalenga, bala apipe lea.

³⁷ Wuane lea-kola, Jisasato bala lamawuato, nimbato bala wamba andapi. Nimba towa pii lo ateyapa akali namba Akalina Iwanane oko ateyo lea.

³⁸ Wuane lea-kola, akali okonemane bala lamawuato, Akali Andane, nambato nimba lo bilipi leyo loto, bala lo lotu lea.

³⁹ Okone angii, Jisasato pii mindi loto, nambato wandakali tupa yapa lo tale pulu, ati kenga atala yuunga epewane. Lee koo wandakali tupa lee teakale nembo toto, namba epewa tekeko, lee teyama nembo talaini wandakali yakama lee koo guleakale nembo toto, namba epewa teke lea.

⁴⁰ Wuane lea-kola, Patasai ongane mandaka gulo ateaini tupamane bala tipa puato,

nimbato wuane lele okone nanimapi lene koo teke ateyai lelepe leai.*

⁴¹ Wuane leai-kola, Jisasato utupane lamawuato, yakama lene koo pia-yale, yakamanga koo tene mindi nayapi-yale tekeko, andipa yakamato katulo andeyama leyai-kola, yakamato mana koo minalaini tupana koo tene oko yakamanga mee eya lea.

10

Sipisipi Kuai Lo Yatawa Atalane Akali Oko

¹⁻³ Jisasato pii mindi tako pua loto, nambato pii enene wete mindi yakama langeyo lea. Sipisipi banisa okona asia lomba ando atalane akali okomane asia lomba okone lumbeya-kola, sipisipi yatawa atalaini akali tupa yakama sipisipi banisa okonena anda-pangosa kolandaka lalaini. Wandakali mindimane asia okonena kolandaka nane, waka mindisa banisa okone keyalu, sipisipi banisa okona kolandaka leando, bala pake nalane akali mindi atolopeya. Sipisipi yatawa atalaini akali tupamane sipisipi banisa okona kolandaka loto, yakama mindiki-mindiki lo yakama tanena sipisipi tupa ee lalaini. Sipisipi yatawa atalane akali mindimane balana sipisipi mindiki-mindiki lo ee loto, gene laka piyane. Gene laka peya-kola, sipisipi utupane-mane balana pii okone ale wato epeyai-kola, balato utupane towa atu sipisipi banisa okone tepa alu, atu kamaka palane.

⁴ Bala tanena sipisipi utupane pitaka banisa okona kamaka atu ipulu, bala wamba ini ingane peya-kola, balana sipisipi tupamane balana pii ale wato, bala watama palaini.

⁵ Wuane tekeko, wandakali waka mindimane sipisipi utupane ee leando, utupane-mane bala watama napolo-peyai. Jia wete. Utupane-mane balana pii ale wato, bala akali opene mindi ya lo nembo toto, palaka polopeyai lea.

⁶ Jisasato pii kokoli okone akali utupane lamaiya tekeko, balato aki nembo toto, wuane leyape lo utupane-mane nembo nateai.

⁷ Nembo nateai-kola, Jisasato pii minditupa tako pua loto, nambato pii enene wete mindi yakama langeyo lea. Namba tane sipisipi banisa okona asia lomba oko ateyo.

⁸⁻⁹ Sipisipi banisa okona asia lomba oko namba. Wandakali mindi bala nambanga epoto, Gotena sipisipi banisa okonena anda-pangosa kolandaka leando, Goteto bala molo-peke lolopeya. Utulu bala banisa okonena anda-pangosa kuai lo paliyu, upa pitane takita poto, tomo no atolopeya.

Nalu, ole lene bala banisa okonena anda-pangosa peke lolopeya. Wamba namba epo ata napenenga, akali waka minditupa wamba ini epo ateai. Utupane pitaka pake nalaini akali ateyai tekeko, nambana sipisipi tupamane akali utupanena pii oko ale naeyai Jia.*

¹⁰ Pake nalaini akali tupamane sipisipi tupa pake mialu, minu koyoto, peyo ome lamakale nembo toto epalaini. Utupane-mane mangene waka mindi pulu na-epalaini. Wuane tekeko, sipisipi utupane kuai lo wete atoto, saka atapowa ateakale nembo toto, namba epewane.

¹¹⁻¹³ Akali minditupa sipisipi tupana anduane ata napene, mee yole moyale piape puato, sipisipi tupa yatawa atalaini. Akali utupane yakamato sipisipi tupa kuai lo yatawa ata na-piyaini. Jia. Sipisipi tupa koyolaini nembo natene, utupane-mane yole moyale sipisipi tupa mee yatawa atalaini. Tene okonena, peango anatope mindi epeando, utupane-mane peango epola okone andoto, sipisipi tupa awua tepa alu, palaka palaini. Palaka polai-kola, peango anatope okonemane sipisipi mindi peyo nola-kola, sipisipi waka tupa mindisa puu toko lolopeyai. Wuane tekeko, peango anatope mindimane sipisipi tupa minu koyolane nembo toto, sipisipi kuai lo yatawa atalane akali mindimane sipisipi tupa moyoyale omape-pene guleando, omolo-peya. Sipisipi kuai lo yatawa atalane akali okone namba.*

¹⁴⁻¹⁵ Nambana ayiane okomane namba andeya-kola, nambato bala andalawane. Wuane pua teke, nambato nambana sipisipi tupa andeyo-kola, nambana sipisipi tupamane namba andalaini. Tene okonena, namba sipisipi kuai lo yatawa atene akali oko atoto, sipisipi tupa moyoyale omolopeyawa.*

¹⁶ Nambana sipisipi waka minditupa ateyai tekeko, andipa utupane nambana banisa okona anda-pangosa ata naheyai. Nambato sipisipi utupane nambana banisa okonena anda-pangosa atu ipupe-pene. Wuane ko, nambato utupane ee lolowakola, utupane-mane nambana pii ale wato, nambana banisa okonena anda-pangosa epolai-angi, nambana sipisipi yame okonelapo sipisipi yame mindiki gulo atolopeyai. Yame mindiki atolai-kola, namba sipisipi utupane pitaka yatawa atalawane akali mindiki atolo-peyawa.*

¹⁷⁻¹⁸ Wandakali mindimane namba sia minuto, namba peyo ome nailolo-peya. Jia. Namba tane nambana tandini oko peakale

tepa alu, namba omolopeyo. Dee, namba tane teke nambana tandini oko molo-peke loto, katulo saka atolo-peke lolopeyo. Nambana Ayiane okomane wuane pipe leane okonena, mangene okonelapo pulane tai-lene oko nambanga eya. Nambato balana pii okone ale wato, saka atolo-peke lokale nembo toto, sipisipi tupa moyoyale omolopeyo okonena, nambana Ayiane okomane namba towa epelewa yamapane yo ateya. Jisasato wuane lea.*

¹⁹ Wuane lea-kola, Juta yame akali utupane-mane balana pii utupane ale wato, dee lapone yakama yame lapo gulo ateai.

²⁰ Akali utupanena kambua-mane akali waka tupa lamawuato, balanga sипитса koo mindi ateya-kola, bala kee ene gulo atoto, wuane leya-ko. Anu peakale yakamato balana pii okone ale eyaipe leai.

²¹ Wuane leai-kola, Juta yame akali yangi-mane akali utupane lamawuato, sипитса koo mindimane katulo wandakali lee koo tupa lee taya na-alaini. Dee, Jisasato pii leyutu sипитса koo atene wandakali tu-pamane na-lalaini teke leai.

Juta Yame-mane Jisasa Peyo Ome Lamakale Nembo Teaini Oko

²² Upa andane wete piyane ana oko epea-kola, Juta yame-mane Jutusaleme lotu anda andane okona asia wamba ini bulupane lumbeaini oto oko lo nembo tolo-peke loto, mali dindi epele alaini oto oko epea.

²³ Okone angi, Jisasa bala lotu anda andane okonena ende anda-pangosa anda pimia atane atene Solomonena lalaini okona epoko pua atea.

²⁴ Epoko pua atea-kola, Juta yamena akali kawane minditupa-mane bala ato mapu puato, nimba Mesaya oko ateendo, andoko angi nimbato nanima langulape. Nimba akali okone ateendo, nanima panakame langi-kae leai.

²⁵⁻²⁶ Wuane leai-kola, Jisasato utupanena pii okone yano peyoto, namba Ayianena pii wato minuto, nambato piape piyawane tupamane namba Mesaya oko ateya lo yakama andawa leya tekeko, yakamato namba lo bilipi naleyai. Wamba nambato Gotena pii oko yakama langewa tekeko, yakama nambana sipisipi yame ata nepeai. Tene okonena, yakamato nambana pii oko bilipi naleyai.

²⁷ Nambato nambana sipisipi tupa andeyo-kola, utupane-mane nambana pii ale wato, namba watama epalaini.

²⁸⁻³⁰ Nambato utupane saka atapowa ateakale lo ataya olowa-kola, matilili-tilipi utupane alu napulu-peyai. Jia

* ^{10:8-9:} Jet 23:1-2; Eze 34:2-3 * ^{10:11-13:} Sam 23:1; Lap 7:16-17; Ap 20:28-29 * ^{10:14-15:} Mt 11:25-27; 1Jo 3:16
* ^{10:16:} Ais 56:8; Eze 34:23 * ^{10:17-18:} Pl 2:8-11

wete. Nambana Ayiane okomane wandakali utupane nambana yame atekale lo namba geane. Balato minditaka eya tupa pitaka sia minuto, tai wetete ateya okonena, wandakali mindikipi mindimane namba Ayiane okona yame atolaini wandakali utupanena mindikipi mindi pii-mane lo tambo-tambo loto, katulo namolo-peyay. Jia. Namba Ayiane nalipa mindiki ateyapa. Tene okonena, wandakali mindikipi mindimane sipisipi nambana kini tokonga atolai utupane katulo tikayu namolo-peyay. Jia. Jisasato wuane lea. *

³¹ Balato namba Ayiane nalipa mindiki ateyapa lea-kola, Juta yame akali utupane-mane bala peyo ome loyale ana minditupa meai.

³² Ana minditupa meai-kola, balato utupane lamawuato, nambana Ayiane okomane namba languato, nimbato piape epene minditupa pipe lea-kola, nimbato piape epene kambua pewa. Yakamoto nambana piape epene utupanena andoko embo wato, namba ana-mane peyo ome loyale peyaipe lea.

³³ Wuane lea-kola, Juta yame akali utupane-mane balana pii okone yano peyoto, nanimato nimbana piape epene mindi nembo toto, nimba ana-mane peyo ome loyale napeyama. Jia. Nimba mee yuunga akali mindi atele tekeko, nimbato Gote lamba loto, nimba tane Gote ateyo lele okonena, nanimato nimba ana-mane peyo ome loyale peyama leai. *

³⁴ Wuane leai-kola, balato utupanena pii okone yano peyoto, Gotena pii pepa pelene eya mindimane loto, nimbato yakama Gote tupa ateyai lewa layene eya lea. *

³⁵ Wamba Goteto Isatale tane wandakali tupa lamawuato, yakama Gote tupa ateyai lea-kola, mindimane pii okone pepa peleakola, wandakali mindikipi mindimane katulo Gotena pii pepa pelene eya okone mo lawa napulu-peyay.

³⁶ Ayiane Goteto namba ati kenga atala yuunga puu lalu, namba balana Iwanane ateya lea-kola, nimbato yakama languato, namba Gotena Iwanane ateyo lewa-ko. Anu peakale yakamoto nambana pii okone ale wato, nimbato Gote lamba lele leyaipae.

³⁷ Nimbato namba Ayiane okona piape pua ata napewando, yakamoto namba balana Iwanane oko ateya lo bilipi nalalapape.

³⁸ Nimbato wuane leyo tekeko, namba Ayiane okona piape pua atalawenko. Yakamoto nambana pii oko bilipi naleaindo, Ayiane Gote oko nambanga

ateya-kola, namba balanga ateya lo yakamoto andamakale nembo toto, nimbato balana piape pimai-yawane tupa andoto, namba balana Iwanane ateya lo bilipi lalapape. Jisasato wuane lea. *

³⁹ Wuane lea-kola, Juta yame akali utupane-mane dee lapone bala andi loyale makande peaini tekeko, balato utupane asia peyo wanjalu pea.

⁴⁰ Jutusaleme tepa alu, bala ipa Jotane oko kalo piyu, amo maita Joneto wamba ini bulupane wandakali tupa ipa peya-mauwa ateane yuu okona poto, atea. *

⁴¹ Yuu okonena atea-kola, wandakali kambua bala ateanga epeai. Utupane-mane pii mindi loto, enene, wamba Joneto bala tanena pii lea tupa mo tai laya wato, metekolo piape mindi napeane tekeko, Jisasato wua pulupeya lo Joneto pii leane tupa pitaka enene pii lea ya leai.

⁴² Yuu okonena tane wandakali kambua-mane wuane loto, Jisasa lo bilipi leai.

11

Lasatosa Omeane Oko

¹ Betani tano okona tane akali Lasatosa lene mindi bala siki oma-yene yaepia. Betani tano okone bala wanda Matiya, balana akini Mata-la, okone-lapona yuu tene oko yane. *

²⁻³ Matili Matiya okonemane wele tunduma-pene mindi Akali Andane okona kenenga gae loto, balana kawa itini-mane kunu apia-maiya. Matiya, Mata-la, okone-lapona imalini Lasatosa oko bala siki oma-yene ya-kola, balana imalini okonelapome pii mindi Jisasa ateanga wai lo aimo loto, Akali Andane, akali nimba towa epelewa yamapano yo atalene pia okone bala siki oma-yene eya leapelelia. *

⁴ Wuane leapele okone ale wato, Jisasato pii mindi loto, Goteto Lasatosa bala mee omeakale nembo toto, siki okone balanga epeakale lo ando konda nayane. Jia. Wandakali-mane Gote Iwanane okona gene oko laiyu leakale nembo toto, Goteto balana tai-lene oko andawa loyale, siki okone Lasatosa balanga epeakale lo ando konda yane lea. *

⁵⁻⁶ Gotena tai-lene oko wandakali tupa-panga andawa lokale nembo toto, Jisasato Lasatosa siki oma-yene eya lene ale wato teke, bala wamba kapoyale andolo puu napene, ole lapoai bala yuu ateane okonena mee maliyo atea. Jisasato Mata, balana akini Matiyapi, okone-lapona imalini Lasatosapi, utupane towa epelewa yamapano yo atalaepia.

* **10:28-30:** Jo 3:16-17; 6:37-40 * **10:33:** Pit 24:16 * **10:34:** Sam 82:6 * **10:38:** Jo 14:10-11 * **10:40:** Jo 1:28
* **11:1:** Lk 10:38-39 * **11:2-3:** Jo 12:3 * **11:4:** Jo 9:3

⁷ Wuaneko, ole okonelapo pea-angi, balato balana disaipolo tupa lamawuato, nanimma Jutiya disitiki okona peke lamakale lea.

⁸ Wuane lea-kola, balana disaipolo tupamane bala lamawuato, tisa, Juta yame akali tupamane nimba ana-mane peyo ome loyale pipiai-ko. Nimbato yuu okonena dee lapone polape leai.

⁹ Wuane leai-kola, Jisasato utupanena pii okone yano peyoto, upa pitane nai oko epoto, tama pulu, ole-lene andaka palane lea. Nai tola-kola, wandakali mindi bala epoko pua ateando, balato asini oko kuai lo andoto, ayia peya napulu-peya.

¹⁰ Wandakali okone ayia peya napulu-peya tekeko, wandakali mindi bala utulu epoko pua ateando, yuu oko undupi lolakola, balato asini kuai lo anda napene, ayia peyolo-peya lea.

¹¹ Wuane lalu, balato pii mindi tako pua loto, nanimma towa epelewa atalane akali Lasatosa oko bala limu palia ondo apia-ko. Nimbato bala peya ika lolo pokale lea.

¹²⁻¹³ Lasatosa manda tapia nembo toto, Jisasato bala limu palia ondo apia-ko leane tekeko, balana disaipolo tupamane Lasatosa mee limu palipia-kola, wuane leya nembo teainipia. Wuane nembo toto, utupane-mane bala lamawuato, Akali Andane, Lasatosa limu paleando, balana siki oko atu yolopeya yalua leai.

¹⁴ Wuane leai-kola, balato utupane panakame lamawuato, Lasatosa wamba manda tapia lea.

¹⁵ Yakamoto namba lo bilipi leyama nayu bilipi lalapale nembo toto, namba bala towa atu ata napiwa-kola, bala wamba manda tapia. Wuane tekeko, nimbato bala malinga ika laya olowa-kola, yakamoto namba lo bilipi leyama nayu bilipi lolopeyai nembo toto, namba epele wete eyo. Andipa bala manda-tene eya okona nanimma maa lea.

¹⁶ Wuane lea-kola, akali Tomasa gene mindi Ditimasa lene okomane disaipolo waka tupa lamawuato, nanimma bala towa atu omolo maa lea. *

Matato Nimba Gote Iwanane Atele Leane Oko

¹⁷⁻¹⁹ Betani tano oko Jutusaleme mandaka gulo kilomita tepopi mindi angu yakola, Juta yame wandakali kambua-mane Lasatosa manda tapia lene oko ale yainipia. Ale wato, utupane-mane Matiya, Mataala, okone-lapona yamapanne mo epene pale lamakale nembo toto, Jutusaleme tepa alu, okonelapo peteapi okona poto, ateainipia. Matili Jisasa bala peakaiyu leangangi, wandakali-mane bala lamawuato,

Lasatosa mali pima-kola, ole tukumindi pupia leai.

²⁰ Matato Jisasa epeya lene ale wato, asininga poto, Jisasa malanda ya. Matiya bala mee andaka petea.

²¹ Matato Jisasa malanda ya-angi, bala lamawuato, Akali Andane, nimba wali atapi-yale, nambana imalini oko oma napiapia-yale.

²² Andipapi nimbato Gote lo pote loto, balato nimba moyoyale mangene mindi peakale leendo, balato ale wato, nimbato lole pua pulupeya lo nambato nembo teyo lea.

²³ Wuane lea-kola, Jisasato bala lamawuato, nimbanan imalini oko malinga ika lolopeya lea.

²⁴ Wuane lea-kola, Matato bala lamawuato, matili yuu koyo puyale pula-kola, wandakali omene tupa malinga ika lolai okone angi, nambana imalini okone bala malinga ika lolopeya nembo teyo lea. *

²⁵ Wuane lea-kola, Jisasato bala lamawuato, nimbato wandakali omene tupa malinga ika laya wato, saka atapowa ateakale lo ataya alawane-ko. Namba lo bilipi lene wandakali mindi omoto teke, malinga ika lalu, saka atapowa atolopeya lea.

²⁶ Namba lo bilipi loto, saka atapowa atolai wandakali utupane yakama katulo dee lapone oma napulu-peyai. Nimbato wuane lo bilipi lelepe lea.

²⁷ Wuane lea-kola, Matato balana pii okone yano peyoto, enene, Akali Andane nimba Gote Iwanane oko atele lo bilipi leyo. Nimba Mesaya wamba Goteto yuunga epeakale lolo-peyawa leane oko atele lea. *

Jisasa Bala Ai Leane Oko

²⁸ Matato wuane lalu, andaka peke loto, balana akini Matiya tengamane lamawuato, tisa oko mandaka epo atoto, nimba ipu leya leaipia.

²⁹ Wuane lea-kola, Matiyato pii okone ale wato, kapoyale ika lalu, Jisasa malanda olo peapipa.

³⁰⁻³¹ Matiya bala kapoyale ika lalu, kamaka pea-kola, Juta yame wandakali bala yamapanne mo epene pale lamakale loto, bala towa atu andaka peteaini tupamane bala malinga ai lolo peya nembo toto, bala watama peainipia. Jisasa bala Betani tano okona naepene, Mata asininga malanda yane ongane mee maliyo atea.

³² Maliyo atea-kola, Matiya epoto, Jisasa andoto, balana kee yane ongane aiki lekawa, tombawua loto, Akali Andane, nimba wali atapi-yale, nambana imalini oko oma napiapia-yale lea.

* ^{11:16:} Mk 14:31 * ^{11:24:} Jo 6:37-40 * ^{11:27:} Jo 6:68-69

³³ Wuane lalu, Matiyato ai lo yamataka lea-kola, Juta yame wandakali bala towa atu epeaini tupamanepi ai lo yamataka teke leai. Utupane-mane ai lo yamataka leai oko andoto, Jisasato utupane ondo wato, yamapane kenda wete ya.

³⁴⁻³⁷ Yamapane kenda wete wato, bala ai lea. Ai lea-kola, Juta yame wandakali tupa yakama teke-teke pii lalawa puato, balato Lasatosa towa epelewa yamapane wete yalaeya oko andalapa leai. Utupane-mane wuane leaini tekeko, yangi-mane pii mindi loto, balato akali lee koo mindi lee taya yako. Balato Lasatosa towa epelewa yamapane wete yapia-yale, bala oma napakeale nembo toto, katulo bala moyapia-yale jiape leai. Wuane leai-kola, balato utupane tipa puato, yakamato bala aninga mali pipiaipe lea-kola, utupane-mane bala lamawuato, Akali Andane nimbato andolo ipu leai.*

Jisasato Lasatosa Malinga Ika Laya Yane Oko

³⁸ Nimbato andolo ipu leai-kola, Jisasa bala dee lapone yamapane kenda wete wato, Lasatosa mali pitane yanenga pea. Wamba Lasatosa yame tupamane bala ana anda mindina mali puato, ana andane mindimane mali okona asia tuma peainipia.

³⁹ Mali okona asia oko ana andane mindimane tuma pitane atea-kola, Jisasato akali minditupa lamawuato, yakamato ana oko minu pendeke lo apialapa lea. Wuane lea-kola, akali omeane okona imalini Matato Jisasa lamawuato, Akali Andane, nambana imalini oko mali pitane atapia-kola, ole tukumindi pupia-ko. Andipa bala tamuto, guu koo pulupeya lea.

⁴⁰ Wuane lea-kola, Jisasato bala lamawuato, nimbato namba lo bilipi leendo, Gotena tai-lene andane oko andolopele lo nambato nimba wamba langiyo okoni lea.

⁴¹ Wuane lea-kola, utupane-mane ana okone minu pendeke lo apeai. Apeai-kola, Jisasa bala ati kenga andaiyu loto, nambato loma eyo-kola, Ayiane Gote nimbato ale alene okonena, nambato nimba wayu pele leyo lea.

⁴² Ole dindi lo nambato loma eyo-kola, nimbato ale alene lo nambato nembo teyo tekeko, wandakali onga ateyai tupamane mangene mindi nambato puluwa okone andoto, nimbato namba ati kenga atala yunga puu lee-kola, namba epea ya lo bilipi teakale nembo toto, nambato loma oko eyo lea.

⁴³ Wuane lalu, Jisasato pii taimane loto, Lasatosa, nimba takita ipu lea.

⁴⁴ Takita ipu lea-kola, wamba manda teane akali Lasatosa bala saka atolo-peke lalu, mali okona takita epea. Wamba bala manda tea-angi, wandakali tupamane bala mali puyale, balana kinipi, kenepi, kawanepi, utupane lapa-lapa minditupamane ombo wato, tongo peainipia. Bala malinga ika lea-angi, Jisasato wandakali tupa lamawuato, bala katulo epoko peakalenga, yakamato lapa-lapa tupa tita lo tepa alapa lea.

Jisasa Peyo Ome Lamakale Leaini Oko

⁴⁵ Jisasato Lasatosa malinga ika laya yane okone ang, Matiya towa atu Juta yame wandakali epeaini utupanena kambuamane metekolo piape Jisasato peane okone andoto, bala lo bilipi leai.*

⁴⁶ Wuane tekeko, wandakali utupanena minditupa-mane Patasai tupa ateainainga poto, wamba Jisasato metekolo minditupa piyu, andipa Lasatosa malinga ika laya ala lo lamai-yainipia.*

⁴⁷⁻⁴⁸ Lamai-yaikola, Patasai tupapi, pitisa akali kawane tupapi, utupane-mane akali kanjole tupa epeakale lo mo amunguli puato, akali okonemane metekolo piape kambua piyane leainipia. Balato metekolo piape kambua pua atekale loto, nanimato ando kondemando, wandakali tupa pitakamane bala lo bilipi lolai-kola, Lomo tane gapomane ami tupa epoto, Juta yame wandakali nanima minu koyalu, nanimana lotu anda andane oko keao lo apolopeyai. Wuane pulaini nembo toto, nanimato anu piampape leainipia.

⁴⁹ Akali utupanena mindi gene Kayapasa lene okone bala ee ana okonena pitisa akali kawane oko ateaipia. Balato akali waka utupane lamawuato, kenda-pene nanimanga eya oko mo tika pulane asini oko yakamato aŋakopi mindi nembo nateyai lea.

⁵⁰ Lomo tane ami tupa epoto, nanima minu koyaindo, Juta yame wandakali nanima pitaka alu pulumane. Akali mindikimane nanimana panda moto omeando, bala omola okonemane nanima moyolopeya lo yakamato nembo nateyai leaipia.

⁵¹ Pii leane okone Kayapasa bala tane angu nembo toto naleaipia. Jia. Ee ana okonena bala pitisa akali kawane atoto, potopisa pii mindi loto, Jisasato Juta yame wandakali tupa moyoyale omolo-peya leaipia.

⁵² Jisasato Juta yame wandakali tupa angu moyoyale omolo-peya naleaipia. Jia. Jisasato Gotena andopane yuu waka-waka

tupa puu toko lene tupa mo amunguli puato, yame mindiki gulaya oyale, bala omolopeya loto, pitisa akali kawane okonemane pii okone leaipia.*

⁵³ Kayapasato pii okone lea-kola, ole okone anggi ato tewa, Patasai tupapi, pitisa akali kawane tupapi, utupane-mane Jisasa peyo ome lamakale loto, pii mindi lo puta peainipia.*

⁵⁴ Utupane-mane pii okone lo puta peai-kola, okone anggi tewa, Jisasa bala Juta yame wandakali tupana tombenenga panakame epoko pua ata napea. Jia. Balana disaipolo tupa towa atu bala Betani tano oko tepa alu, tano Epotame lene okona poto ateai. Tano okone wandakali napalene yuu yane mindina mandaka ongane ya.

⁵⁵ Okone anggi, Juta yame wandakali tupamanne Pasopa tomo nalaini oto oko mandaka gulea-kola, wandakali kambua-mane Gotena wenonga yakamanga koo tene mindi nayapia lakae lo nembo toto, wamba ini Jutusaleme peainipia.

⁵⁶⁻⁵⁷ Wandakali utupane lotu anda andane okona banisa anda-pangosa kolandaka loto, Jisasa ayia pua ateai-kola, pitisa akali kawane tupapi, Patasai tupapi, utupane-mane wandakali utupane lamawuato, nanimato Jisasa andi lamakale-ko. Mindimane bala mindinga ateya nembo teaindo, nanima langi-yapape leainipia. Wuane leai-kola, wandakali utupane yakama teke-teke pii lalawa puato, Juta yamenka akali kawane tupamane bala peyo ome lolane lo yuku wato, Jisasa bala Pasopa tomo oko nolo naepolo-peya. Jia wete. Nanimato wuane nembo teyama. Yakamoto aki nembo teyaipe leainipia.

12

*Matiyato Wele Tunduma-pene Mindi Jisasana Kenenga Gae Leane Oko
Matiyu 26:6-13; Maki 14:3-9*

¹ Ole wataka angu pola-kola, Juta yame wandakali tupamane Pasopa tomo nalaini oto oko epolopeya nembo toto, Jisasa bala Betani tano okona pea. Tano okone akali Lasatosa wamba Jisasato malinga ika laya yane okonena yuu tene oko ya.*

² Jisasa bala epea-kola, wandakali minditupa-mane balana tomo yanggmaiayi. Lasatosapi, wandakali waka minditupapi, utupane Jisasa towa atu peteai-kola, wanda Matato tomo tupa tale pua maya.*

³ Jisasa bala tomo no petea-kola, Matiyato wele tunduma-pene kapo lapo petene pene mindina awua epoto, Jisasana

kenenga gae lo ayia maya. Wuane puato, Jisasana kenenga ipati peane oko Matiyato balana kawane itini-mane kunu apia maya-kola, wele okonena tunduma epene peane okomane anda okonena tawe ya. Wandakali minditupa-mane ita nata lene okona pini tupana ipane penge lo moto, wele tunduma-pene okonepene tupa waa peyai-kola, wandakali waka tupamane wele okonepene tupa muni kambua-mane kambalaini.*

⁴ Jutaso Isaka-tiyote bala Jisasana disaipolo tupana mindi atoto teke, matili bala ene petea. Matiyato wele tunduma-pene okone Jisasana kenenga gae lo ayia mayangi, Jutasato wandakali waka tupa tipa puato,

⁵ anu peakale wanda okomane wuane peyape. Balato wele oko nanima gipia-yale, nanimoto wele okone salimi loto, muni kina andete tepo moto, katulo wandakali tipia tupa moyo maima-yale lea.

⁶ Balato pii leane okone wandakali tipia tupa nembo toto, nalea. Jia. Balato disaipolo tupana muni tupa ando atoto, minditupa pake miaka pua atalaepia. Tene okonena, balato wele okone nanima gipia-yale, nambato okone salimi loto, muni mialu, minditupa katulo pake miawa-yale nembo toto, wuane lea.

⁷⁻⁸ Wuane lea-kola, Jisasato bala lamawuato, ole dindi lo wandakali tipia tupa yakama towa atu atolopeyai tekeko, namba yakama towa ole dindi lo ata napulupeyama. Wandakali-mane namba mali pulai-angi, wanda okomane wele okone nambana umbaininga gae lokale nembo toto, wele okone yatawa pitipia-ko. Andipa balato wele okone gae leya oko gae leakale lo nimbato ando kondaa lea.*

Akali Lasatosa Oko Poyo Ome Lamakale Leaini Oko

⁹ Juta yame wandakali kambua-mane Jisasa bala Betani tano okona ateya lene oko ale wato, wamba balato Lasatosa malinga ika laya yane nembo toto, Jisasa, Lasatosa-la, okonelapo lapotaka andolo epeai.

¹⁰⁻¹¹ Wamba Jisasato Lasatosa malinga ika laya yane nembo toto, Juta yame wandakali kambua-mane pitisa akali kawane tupa masia maiyu, Jisasa lo bilipi leai. Tene okonena, pitisa akali kawane utupane-mane Jisasa, Lasatosa-la, okonelapo lapotaka peyo ome lamakale nembo toto, pii lo yake peainipia.*

* 11:53: Jo 5:18 * 12:1: Jo 11:1,43 * 12:2: Lk 10:40
Jo 11:45

* 12:3: Lk 7:37-38 * 12:7-8: Lk 15:11 * 12:10-11:

Kipi Tupamane Palaini Pua, Jisasa Bala Jutusaleme Peane Oko

Matiyu 21:1-11; Maki 11:1-11; Luku 19:28-40

¹²⁻¹⁵ Gotena pii pepa pelene eya mindimane loto, Sayone tano okona tane wandakali yakarna yuku aa napiyapape. Yakamana kinji oko bala yia dongi andopane mindina masianenga pitiyu epeya oko andalapa layene eya. Gotena pii pepa pelene eya okonemane wuane layene yane pua teke, anate-lene Jisasa bala yia dongi andopane mindi ayia pua moto, okonena pitiyu, Jutusaleme moyale, asini pea. Asini pea-kola, Pasopa tomo noyale Jutusaleme peaini wandakali kambua-mane Jisasa epeya lene oko ale wato, utupane-mane ita pama kembone tupa yando moto, Jisasa asinnga malanda olo epeai. Epoto, utupane-mane pii taimane loto, akali epeya oko bala Isatale tanena kinji oko ateya leai. Akali Andane Goteto bala epeakale leya-kola, bala epeya. Goteto bala moyo atekale. Nanimato Gotena gene oko laiyu lamakale leai.*

¹⁶ Wandakali utupane-mane wuane leangi, Jisasana disaipolo tupamane Gotena pii pepa pelene eya okone nembo tolopeke naleai. Wuane tekeko, matil Goteto gene andane mindi Jisasa maya-angi, balana disaipolo tupamane mangene balato peane okola, pii wandakali utupane-mane leaini okola, okonelapo nembo tolo-peke loto, Gotena pii pepa pelene eya okone Jisasa andayo layene yane nembo teai. *

¹⁷ Wamba Jisasato Lasatosa malinga ika laya wato, mali okona kamaka epeakale lea-angi, wandakali kambua bala towa atu atoto, andeai. Andoto, utupane-mane Jisasa balato wuane peane okone pii lo tawe yai.

¹⁸ Lo tawe yai-kola, Jisasato metekolo pi ape okone peane lene oko ale wato, wandakali kambua-mane Jutusaleme tepa alu, bala malanda olo peai.

¹⁹ Bala malanda yai-kola, Patasai tupamane yakama teke-teke mindi lamaikai puato, wandakali tupa pitaka-mane bala watama peyai oko andalapa. Wandakalimanane bala watama napeakale lo nanimato mangene peyama tupa katu naleya leainipia.

Gitiki Yame Wandakali Minditupa-mane Jisasa Andamakale Leaini Oko

²⁰ Juta yame wandakali tupamane Pasopa tomo nalaini oto oko epea-kola, wandakali kambua Gote lo lotu loyale Jutusaleme peai. Wandakali utupanena minditupa Gi-tiki yame wandakali atea.

²¹ Gitiki yame wandakali utupane-mane Galili disitiki tano Betesaita tane Pilipi ateanga epoto, akali andane, nanimato Jisasa andaima lakae lo nembo teyama leainipia.

²² Wuane leai-kola, Pilipi epoto, Endutu lamaiyapi-kola, Pilipi, Endutu-la, okonelapo-mane poto, Jisasa lamai-yapili.

²³ Lamaiyapi-kola, Jisasato okone-laponia pii okone yano peyoto, Akalina Iwanane oko gene andane miape-pene oto oko wamba mandaka epeya lea.*

²⁴ Nambato pii enene wete mindi yakama langeyo. Witi dini mindi bala oma napene, mee andaka yando, dini lia napene, bala angu yalane tekeko, bala yuunga tepa wato, omeando, bala poka loto, dini kambua lialane.*

²⁵ Wandakali mindimane namba masia mawuato, yuu okona mangene piyamane tupa epelewa yamapano yo ateando, balato mangene utupane pua atapowa ateakale lo Goteto ando konda napulu-peya tekeko, wandakali mindimane yuu okona mangene piyamane tupa masia mawuato, namba epelewa yamapano yo ateando, matili bala saka atapowa atolopeya.*

²⁶ Wandakali mindimane nambana piape pua ateaindo, namba watama epeakale. Yakamoto namba watama epeaindo, nambana Ayiane okomane gene andane mindi yakama gula-kola, namba atolowa yuu okonena yakama namba towa atu atolo-peyama. Jisasato wuane lea.

Jisasato Yakama Tii-pene Oko Lo Bilipi Lalapane Leane Oko

²⁷ Wuane lalu, Jisasato pii minditupa tako pua loto, andipa kenda-pene andane mindi nambanga epoyale peya okonena, namba mini kenda wato, nembo kambua teyo lea. Nembo kambua toto, nambato aki loape. Ayiane, kenda-pene okone nambanga epolane nembo toto, nimbato asia pai laa loape. Jia. Nambato wuane na-lokale. Kenda-pene okone awuakale nembo toto, namba epewane.*

²⁸ Ayiane, nimbana gene oko andane eya lo andawa lape lea. Wuane lea-kola, pii layene mindi ati kenga atala epeane okomane loto, wamba nambato nambana gene oko andane eya lo andawa lewa. Matilipi, nambana gene oko andane eya lo dee lapone andawa lolopeyo lea.

²⁹ Goteto wuane lea-kola, ongane mandaka gulo ateaini wandakali minditupa-mane pii okone kuai lo ale naene, ati kulu leya leainipia. Dee, minditupa-mane pii

* **12:12-15:** Sam 118:25-26; Jo 1:49; Sak 9:9 * **12:16:** Jo 2:22 * **12:23:** Jo 13:31-32; 17:1-3 * **12:24:** 1Ko 15:36

* **12:25:** Mt 16:24-26 * **12:27:** Sam 6:3; 42:5; Mt 26:38

okone apito leyape lo nembo natene, enjole mindimane pii mindi Jisasa lamaeya leai.

³⁰ Wuane leai-kola, Jisasato utupane lamawuato, Goteto pii lala okone nambato ale ola nalala lea. Jia. Yakamoto ale alapale nembo toto, balato pii okone lala.

³¹ Andipa balato yuu okona wandakali tupa yapa lo tale puyale puato, yuu okona ando atalane sipitisa koo Satane oko peyo watoyale peya.

³² Matili akali minditupa-mane namba auwa aiyu lolai-angi, wandakali pitaka nambanga epeakale nembo toto, nambato utupane yoo lo molo-peyawa lea. *

³³ Akali minditupa-mane bala ita malamanda okona peyo yuka wato, bala auwa aiyu lolopeyai nembo toto, Jisasato wandakali tupa lamawuato, akali minditupa-mane namba awua aiyu lolopeyai lea. *

³⁴ Wuane lea-kola, wandakali amunguli peaini tupamane balana pii okone yano peyoto, akali mindimane Gotena pii pepa pelene eya tupa dii lea-kola, Mesaya oko bala matili-matilipi atapowa atolopey়া oko ale ema leai. Bala atapowa atolopey়া yando, anu peakale nimbalu namima languato, akali minditupa-mane Akalina Iwanane oko awua aiyu lape-pene eya lelepe. Akalina Iwanane okone bala apipe leai. *

³⁵ Wuane leai-kola, Jisasato utupane lamawuato, wandakali mindi bala undupi pangosa epoko pua ateando, bala onga peya lo anda napulu-peya lea. Tii-pene oko ole mindilapo angu yakama towa atu atolo-peyako. Matili undupi-lene okomane yakamanga yame peyolane nembo toto, tii-pene okomane mee tii pua ateya okone angi, yakama epoko pua atalapape. *

³⁶ Andipa tii-pene oko yakama towa atu ateya-angi, yakamoto tii-pene okona andopane tupa atamakale nembo toto, bala lo bilipi lalapa lea. Jisasato pii okone lalu, wandakali amunguli peaini utupane tepa alu, bala yuu mindisa ata too pulu pea. *

Wandakali Kambua-mane Jisasa Lo Bilipi Naleaini Oko

³⁷⁻⁴¹ Wamba wete potopesa akali Aisayato Mesaya oko bala tai wete atolopey়া nembo toto, Gotena pii minditupa pepa peleapipia. Balato pepa okone peyoto, wandakali-mane nambana piape tupa lee-mane andoto, nambana pii okona tene tupa kuai lo nembo toto, yamapane peke leaindo, nambato utupane mo atu yolo-peyawa leapia. Wuane tekeko, wandakali utupane-mane yamapane peke napeakale

nembo toto, Goteto utupanena lene minu undupi laya alu, utupane-mane balana pii okona tene nembo nateakale laya alu, piyane lo layene eya. Balana pii okone layene eya pua Goteto pea-kola, wandakali utupane-mane katulo Jisasa lo bilipi naleainipia. Wamba Aisayato Gotena pii waka mindi loto, Akali Andane okomane metekolo piape minditupa peane tekeko, apito bala tai wete ateya lo andeape. Nanimato wandakali tupa lamawuato, balato metekolo piape utupane piyane lema tekeko, apito nanimana pii utupane bilipi leape lo layene eya. Gotena pii layene okone enene guleakale nembo toto, Jisasato bala tane Mesaya oko ateya lo wandakali tupa andawa loyale metekolo piape kambua peane tekeko, wandakali kambua-mane balana metekolo piape utupane andoto teke, bala lo bilipi naleai. *

⁴²⁻⁴³ Enene, Juta yamena akali kawane kambua-mane Jisasa lo bilipi leaini tekeko, Goteto yakamana gene tupa laiyu lapia lakae lo utupane-mane nembo nateai. Jia. Wandakali yangone-mane yakamana gene tupa laiyu lapiai lakae lo nembo teainipia. Tene okonena, Patasai tupamane akali utupane Juta yame wandakali waka tupa towa lotu napeakale lolaini lo yuku wato, Juta yamena akali kawane utupane-mane Jisasa lo bilipi leyama lo pana naene konda yai. *

Nambana Pii Okomane Wandakali Tupa Yapa Lo Tale Pulupeya Leane Oko

⁴⁴ Okone angi, Jisasato pii taimane loto, namba lo bilipi lolai wandakali tupamane namba angu lo bilipi nalolo-peyai lea. Utupane-mane namba ati kenga atala yuunga puu leane Ayiane oko lo bilipi lolai-kola teke pulupeya.

⁴⁵ Dee, namba andolai wandakali tupamane namba ati kenga atala yuunga puu leane Ayiane oko andolai-kola teke pulupeya. *

⁴⁶ Namba lo bilipi lolai wandakali mindikipi mindi undupi pangosa ata napeakale nembo toto, namba ale tii-pene mindi gulo atoto, yuu okona epewane.

⁴⁷ Namba yuu okona epewane oko yuu okona wandakali tupa yapa lo tale pulu napewane. Jia. Nambato utupane molo-peke lolo epewane. Wuane ko, wandakali-mane nambana pii oko ale wato, wato mina napeando, nambato bala yapa lo tale puato, koo tene mindi balanga yata na-olopeyo. Jia. *

⁴⁸⁻⁵⁰ Namba tane wua lokale nembo toto, pii na-lalawane. Jia. Namba ati kenga

* **12:32:** Jo 3:14-15 * **12:33:** Jo 19:6 * **12:34:** Sam 110:4; Ais 9:7; Dan 7:14 * **12:35:** Jo 8:12 * **12:36:** Ep 5:8
* **12:37-41:** Ais 6:1; 53:1 * **12:42-43:** Jo 5:44; 9:22-23 * **12:45:** Jo 14:9 * **12:47:** Jo 3:16-17

atala yuunga puu leane Ayiane okomane pii utupa lape leya-kola, nambato pii utupane lalawane. Namba Ayiane okona pii okomane wandakali tupa saka atapowa atekale lo ataya alane nembo toto, nambato balana pii okone ale wato, pii balato namba langeane tupa lalawane. Tene okonena, wandakali mindimane namba masia guato, nambana pii tupa mia naapeaindo, yuu koyo pula-angi, nambana pii okomane wandakali okone yapa lo tale puato, koo tene mindi balanga yata olopeya. Jisasato wuane lea.

13

Jisasato Balana Disaipolo Tupana Kene Wasa-wasa Peya-maiyane Oko

¹⁻³ Sataneto Saimone iwanane Jutasa Isaka-tiyote okona nembo-tene oko mina ika laya wato, nimbato Jisasa ene pitula leaipia. Wuane lea-kola, anate-lene Pasopa tomo nolane oto oko epolopeya nembo toto, ole-lene wete Jisasa balana disaipolo tupa towa atu tomo no peteai. Wamba Jisasa bala Gote towa atu atalu, yuu okona epeakola, Goteto pitaka taka balana kinina yata yane nayuto, Jisasa bala yuunga atoto, bala tanena disaipolo tupa towa wayumane wete epelewa yamapanne yane tekeko, bala yuu oko tepa alu, balana Ayiane Gote ateyanga peke lolane oto oko wamba mandaka guleya nembo tea. *

⁴⁻⁵ Wuane nembo toto, Jisasato tomo nokoyo piyu, ika loto, balana tona luu peane oko yoko yata wato, tauwali mindi mea. Mialu, balato disa andane mindina ipa gae lo pete loto, balana disaipolo tupana kene wasa-wasa peya-maiki pima poto, utupanena kenenera ipati peane oko tauwali okonemane kuna-maiki pima pea.

⁶ Wuane pima pulu, Saimone Pita peteanga pea-kola, Pitato bala tipa puato, Akali Andane, nimbato nambana kene wasa-wasa peyoyale pelepe lea.

⁷ Wuane lea-kola, Jisasato balana pii okone yano peyoto, nambato mangene peyo okona tene oko nimbato andipa nembo natele tekeko, matili nimbato nembo tolopele lea.

⁸ Wuane lea-kola, Pitato bala lamauatu, andipapi, matili-matilipi, nimbato nambana kene wasa-wasa peya napulua. Jia wete lea. Wuane lea-kola, Jisasato balana pii okone yano peyoto, nambato nimba wasa-wasa peya napewando, nimba katulo namba towa atu atu napulupele lea.

⁹ Wuane lea-kola, Saimone Pitato bala lamauatu, wuane yando, Akali Andane nimbato nambana kene angu wasa-wasa

peya napene, nambana kinipi, kawanepi, utupane pitaka wasa-wasa peya-gii lea.

¹⁰ Wuane lea-kola, Jisasato bala lamauatu, wandakali mindi balana umbaini pitaka wasa-wasa peyalyu, okone angi teke balana umbaini pitaka wasa-wasa peyolo-peke lolane tene mindi ata naopeya lea. Balana kene angu wamba ini kalato atola-kola, balato okonelapo wasa-wasa peleando, balana umbaini pitaka kalato ata napene atolopeya. Andipa yakama kalato ata napene ateyai tekeko, yakama pitaka kalato ata napene ateyai naleyo. Jia lea. *

¹¹ Ene pitulu-peya akali oko bala kalato atene ateyai nembo toto, Jisasato yakama pitaka kalato ata napene ateyai naleyo lea.

¹² Jisasato utupanena kene wasa-wasa peya-maiyu, balana tona luu oko mo puato, dee lapone pitulu-peke lea. Pituto, balato utupane tipa puato, nambato mangene mindi yakamanga peyo okonena tene oko yakamato nembo teyaipe lea.

¹³ Namba yakamana tisa atoto, yakamana Akali Andane oko ateyo teke. Wuaneko, yakamato namba andayo pii tika puu loto, alumindi tisa laka, alumindi Akali Andane laka piyaini.

¹⁴⁻¹⁶ Nambato pii enene wetete mindi yakama langeyo. Piape akali mindimane balana piape ando atalane akali okona lipinga yale ata napiyane. Dee, wai pii awua palane akali mindimane wai pii okone awua peakale lalane akali okona lipinga yale ata napiyane teke. Jia. Namba yakamana tisa okomane mangene mindi peyo, wuane puu teke yakamatopi mangene okone piyapale nembo toto, nambato mana mindi yakamanga andawa leyo. Namba yakamana Akali Andane okomane yakamana kene wasa-wasa peleyo-ko. Yakama teke-teke mindina kene wasa-wasa peya maiki pipe-pene. *

¹⁷ Yakamato mana oko nembo toto, wato mineaindo, yakama epelewa atolopeyai. Jisasato wuane lea.

Jisasato Yakamana Mindimane Namba Ene Pitulu-peya Leane Oko Matiyu 26:20-25; Maki 14:17-21; Luku 22:21-23

¹⁸⁻²⁰ Wuane lalu, Jisasato pii mindi tako puu loto, nambato pii enene wete mindi yakama langeyo lea. Nambato wandakali mindi bala nambana piape pulu peakale lolowa-kola, wandakali waka mindimane bala wayu epeleya lo lameando, balato namba wayu epeleya lo lameando, balato namba wayu epeleya lo lameando, balato

* **13:1-3:** Lk 22:3; Jo 3:33-35; 13:27; 16:26-28
22:25-27; Pl 2:5; Kol 3:13; 1Pi 2:21-23

* **13:10:** Jo 6:64,70-71; 15:3

* **13:14-16:** Mt 10:24-25; 20:27-28; Lk

namba ati kenga atala yuunga puu leane Ayiane Gote okopi lamola-kola teke pulupeya. Wuane tekeko, Goteto balana pii pepa pelene eya mindi enene guleakale nembo toto, namba towa atu betesa neyapa akali okomane namba ene peteakale lo ando kondolo-peya. Nambato yakama pitaka-mane wuane pulupeyai naleyo. Jia. Nambato yapa lo mewa akali tupa yakama mana tupa andeyawane. Matili akali mindimane namba ene pitula-angi, yakamato namba Mesaya oko ateya lo bilipi lalapale nembo toto, andipa balato namba ene piti napene ateya-angi, nambato pii oko yakama wamba ini langeyo lea. *

²¹ Pii okone lalu, Jisasato bala nembo kam-bua toto, yamapane kenda wete wato, nambato pii enene wete mindi yakama langeyo. Yakamana mindimane namba ene pitulu-peyai lea.

²² Wuane lea-kola, nanimana apito wuane pulupeya leyape lo tatake wato, balana disaipolo tupa yakama teke-teke mindi andaka piki peai.

²³ Okone angi, disaipolo mindi Jisasato wayumane epelewa yamapane yo ateane oko bala peteanga mandaka wete gulo pe-tea.

²⁴ Mandaka petea-kola, Saimone Pitato disaipolo okone ando wenone titi loto, bala lamauwato, nimbato bala tipa puato, nanimana apito wuane pulu-peyape laa lea.

²⁵ Pitato wuane lea-kola, disaipolo okone bala Jisasana kangaluane yanenga kawa aimo loto, Akali Andane, apito wuane pulu-peya lelepe lea.

²⁶ Wuane lea-kola, Jisasato balana pii okone yano peyoto, nambato betesa kondelene mindi disanga tanda puato, akali mindi malupeyo. Akali okonemane namba ene pitulu-peya lea. Wuane lalu, Jisasato betesa kondelene mindi disanga tanda puato, Saimone Isaka-tiyote iwanane Jutaso oko maya.

²⁷ Jutasato betesa okone mea-angi, Satane balana ini anda-pangosa kolandaka lea-kola, Jisasato bala lamauwato, nimbato mangene mindi pukale nembo tele oko wamba ini pii lea. *

²⁸⁻²⁹ Wuane lea-kola, tomo no peteaini akali tupamane pii okone ale yaini tekeko, anu peakale balato wuane leyape nembo nateai. Jutasato disaipolo yamena muni tupa ando ata-maiyane okonena, minditupa-mane Jisasana pii okone ale wato, Jutasato muni minditupa wandakali tipa tupa wamba ini maiyakale nembo toto, wuane leya nembo teai. Dee, yangimane Jisasana pii okone ale wato, Jutasato

Pasopa tomo nolane tupa wamba ini kambolo peakale nembo toto, wuane leya nembo teai. Tene okonena, utupane-mane Jisasana pii okone ale wato teke, Jutasato bala wamba ini ene pitulu peakale nembo toto, wuane leya nembo nateai.

³⁰ Jisasato Jutaso lamauwato, nimbato mangene mindi pukale nembo tele oko wamba ini pii lea-angi, Jutasato betesa okone mialu, wamba kapoyale kamaka pea. Bala kamaka pea-angi, yuu oko undupi lamangua ya.

*Jisasato Loo Wenene Mindi Yata Yane
Oko*

³¹ Jutaso bala kamaka pea-kola, Jisasato balana disaipolo waka tupa lamauwato, andipa Akalina Iwanane oko bala gene andane mindi meya-kola, Goteto gene andane mindi Akalina Iwananenga meya lea. *

³² Goteto Akalina Iwanane okonga gene andane mindi mialu, wamba kapoyale gene andane mindi bala malupeya. *

³³⁻³⁵ Yakamato mindi akali towa epelewa yamapane yaka pua ateaindo, wandakali pitaka-mane yakamana mana okone andoto, yakama nambana disaipolo tupa ateyai lo andolo-peyaiko. Yakama nambana disaipolo tupa ateyai lo andeakale nembo toto, nambato loo wenene mindi yakama geyo. Nambato yakama towa epelewa yamapane yo atalawane pua teke, yakamatopi mindi akali towa epelewa yamapane yaka pua atalapape. Nambana andopane yame, ole anjalapo angu namba yakama towa atu atalu, nambato yakama tepa alu polowa-kola, yakamato namba aiya pulupeyai tekeko, wamba nambato pii mindi Juta yame wandakali tupa lamaewane okone teke andipa nambato yakama langeyo. Yuu namba polowa okonena yakama katulo naepolo-peyai. Jisasato wuane lea. *

Pita Nimbato Namba Anda Na-peywane Loloape Leane Oko

Matiyu 26:31-35; Maki 14:27-31; Luku 22:31-34

³⁶ Jisasato wuane lea-kola, Saimone Pitato bala tipa puato, Akali Andane, nimba aninga polape lea. Wuane lea-kola, Jisasato balana pii okone yano peyoto, yuu namba polowa okonena andipa nimbato katulo watama naepolo-pele tekeko, matili nimbato namba watama epolopele lea.

³⁷ Wuane lea-kola, Pitato bala lamauwato, Akali Andane, nambato nimba moyoyale, namba omape-pene guleando, okone katu-ko. Anu peakale nambato nimba katulo andipa watama naepolo-peyope lea.

* ^{13:18-20:} Sam 41:9; Jo 14:29; 16:4; Mt 10:40

* ^{13:27:} Jo 13:1-3

* ^{13:31:} Jo 12:23

* ^{13:32:} Jo 17:4-5

* ^{13:33-35:} Jo 7:33-34; 15:12-15,17; 1Jo 3:23; 2Jo 5

³⁸ Wuane lea-kola, Jisasato balana pii okone yano peyoto, nimbato namba moyoyale, nimba omape-pene guleando, okone katu lele tekeko, nambato pii enene wete mindi nimba langeyo. Eka pauli maipa mindimane pii lata naola-kola, ole tepoainga nimbato namba anda na-peyawane lolopele lea.

14

Ayiane Gote Ateyanga Polane Asini Oko Namba Leane Oko

¹⁻² Wuane lalu, Jisasato pii mindi balana disaipolo tupa lamawuato, namba Ayianena andaka wandakali atolane lumu kambua atene lea. Lumu kambua ata napiapia-yale, lumu kambua ata naapeya lo nimbato yakama langiwa-yale. Lumu utupanena yakama atalapale lo nimbato makande pingulu peyo-ko. Yakamato nembo kambua toto, yamapanne kendawa ata na-piyapape. Jia. Yakamato Ayiane Gote lo bilipi leyai pua, namba lo bilipi lalapape.

³ Namba bala ateyanga poto, yakama atalapale panda oko makande pikoyo piyu, namba atolowa yuu okonena yakama towa atu atamakale loto, nimbato yakama lamolo-peke lokale. *

⁴ Yuu namba polopeyawa okonena asini oko yakamato nembo teyai lea.

⁵ Wuane lea-kola, Tomasato bala lamawuato, Akali Andane, nimba aninga polape lo nanimato nembo nateyama-ko. Anu puato, yuu nimba polopele asini oko nanimato katulo nembo tolo-peyampe lea.

⁶ Wuane lea-kola, Jisasato bala lamawuato, enene pii oko namba lea. Wandakali saka atapowa atolane tene okopi namba teke. Wuaneko, Ayiane Gote ateyanga polane asini oko namba angu ateyo. Wandakali mindi bala asini waka mindina peando, Ayiane Gote ateyanga peakaiyu nalolo-peya. Jia. *

⁷ Wamba yakamato namba wayumane nembo tapiai-yale, yakamato nambana Ayiane oko nembo tapiai-yale teke. Andipa yakamato nambana Ayiane oko andoto, bala okopene ateya nembo teyai lea. *

⁸ Wuane lea-kola, Pilipito bala lamawuato, Akali Andane, nimbato Ayiane oko nanimma andawa leendo, okone katu yolopeya nembo teyama-ko. Nimbato Ayiane oko nanimma andawa laa lea.

⁹ Wuane lea-kola, Jisasato bala lamawuato, namba yakama towa atu ataima-kola, ee ana kambua pupia-ko lea. Pilipi nimbato

namba api ateyape nembo natelepe. Wandakali mindimane namba andeando, balato nambana Ayiane oko andeya-kola teke piyane-ko. Anu peakale nimbato namba languato, nimbato Ayiane oko nanima andawa laa lelepe. *

¹⁰ Ayiane oko nambanga ateya-kola, namba balanga atalawane oko nimbato bilipi nalelepe. Pii nimbato yakama langiyawane tupa namba tane nembo toto, yakama langi na-piyawane. Jia. Namba Ayiane nambanga ateya okomane pii utupane namba langeya-kola, nimbato pii utupane yakama langiyawane. Dee, metekolo piape nimbato piyawane tupa namba tane na-piyawane. Jia. Namba Ayiane oko nambanga atoto, balana metekolo piape utupane piyane. *

¹¹ Ayianeoko bala nambanga ateya-kola, namba balanga atalane lo bilipi lalapape. Yakamato nambana pii tupa ale wato teke, nimbato enene leya lo bilipi naleaindo, yakamato nambana metekolo piape tupa nembo toto, Ayiane Gote oko nambanga atoto, utupane piyane lo bilipi lalapape. *

¹²⁻¹⁴ Nimbato pii enene wete mindi yakama langeyo. Namba lo bilipi lolai wandakali tupamane piape nimbato piyawane tupa sia minuto, piape andane wete tupa pulupeyai. Yakamato nambana gene oko loto, mangene mindi pingula lo tee leaindo, namba Ayiane okomane balana Iwanane okonga gene andane mindi meakale nembo toto, nimbato mangene yakamato tee lolai okone pukale. Jisasato wuane lea. *

Jisasato Oli Sipitisa Oko Epeakale Lolopeyo Leane Oko

¹⁵ Wuane lalu, Jisasato pii mindi tako pua loto, yakamato namba towa epelewa yamapanne yo ateaindo, yakamato nambana pii wato minu atolopeyai lea. *

¹⁶ Yakamato nambana pii wato minu atolai-kola, Oli Sipitisa okomane nambana panda moto, yakama moyo atapowa ateakale loto, nimbato Ayiane Gote oko tee lolowa-kola, balato Oli Sipitisa okone yakama gulupeya. *

¹⁷ Oli Sipitisa okonemane enene pii oko lanane. Gote lo bilipi nalene wandakali tupamane Oli Sipitisa oko bala ateya nembo natene atoto, balato mangene minditupa

* **14:3:** Jo 12:26 * **14:6:** Jo 11:25; Lom 5:1-2 * **14:7:** Jo 8:19 * **14:9:** Jo 12:45; Kol 1:15-16; Ip 1:3 * **14:10:** Jo

12:48-50 * **14:11:** Jo 10:38 * **14:12-14:** Mk 16:19-20; Mt 7:7-8; Jo 15:16 * **14:15:** Jo 15:9-10; 1Jo 5:1-5 * **14:16:**

Jo 14:26; 15:26; 16:7

piyane lo anda napeyai-kola, utupanemanne katulo bala mia na-piyiani. Wuane tekeko, nambana disaipolo tupa yakamato andeyai-kola, bala yakama towa atu atoto, yakamana anda-pangosa atolopeya ya lo andoto, bala nembo teyai. *

¹⁸⁻¹⁹ Ole ukupini mindi pola-kola, Gote lo bilipi nalene wandakali tupamane namba dee lapone anda napulu-peyai tekeko, nambana disaipolo yakama manyani gulo atalapale lo nambato ando kondza napulu-peyawa. Jia. Nambato yakama atolainga epolowa-kola, yakamato namba andolopeyai. Namba saka atapowa atolowa-kola, matili yakamapi saka atapowa atolopeyai.

²⁰ Oli Sipitisa oko yakamanga epola-angi, yakamato andolai-kola, namba Ayianenga atalaeya lo andoto, yakama nambanga atolai-kola, namba yakamanga atolowa oko andolopeyai. *

²¹ Nambato leyo pua piyaini wandakali tupamane namba towa epelewa yamapanne yo atolai-kola pulupeyai. Utupane-mane namba towa epelewa yamapanne yo atolai-kola, nambana Ayiane okomane utupane towa epelewa yamapanne yo teke atolopeya. Nambatopi utupane towa epelewa yamapanne yo atoto, namba tane utupanenga andawa lolo-peyawa. Jisasato wuane lea.

²² Wuane lea-kola, Jutasato pii mindi bala tipa pea. Jutaso okone bala Jutaso Isakatiyote jia. Jutaso waka mindimane Jisasa tipa puato, Akali Andane, anu peakale nimba tane nanimanga angu andawa lolopepe. Anu peakale Gote lo bilipi nalene wandakali tupamane nimba andeakale nembo toto, nimba tane utupanenga andawa nalolape lea.

²³⁻²⁴ Wuane lea-kola, Jisasato balana pii okone yano peyoto, pii nambato yakama langeyo utupa namba tanena pii tupa jia lea. Namba ati kenga atala yuunga puu leane Ayiane okomane pii utupane namba langeya-kola, nambato pii utupane yakama langeyo. Namba towa epelewa yamapanne yo ata napene wandakali tupamane nambana pii wato mina na-piyaini okonena, namba tane utupanenga andawa nalolopeyo. Wandakali mindimane namba towa epelewa yamapanne yo ateaindo, balato nambana pii wato minu atola-kola, nambana Ayiane okomane bala towa epelewa yamapanne yo atolopeya. Namba Ayiane nalipa wandakali okonenga epoto, bala towa atu atolo-peyapa. *

²⁵ Namba yakama towa atu atoto, pii utupane pitaka yakama langeyo.

²⁶ Wuane tekeko, Oli Sipitisa oko nambana panda moto, yakama moyo ateakale nembo toto, namba Ayiane okomane bala epeakale lolopeya. Yakamato nambana pii tupa pitaka nembo tolo-peke lalapale nayuto, balato yakamana nembo-tene tupa mina ika loto, Gotena mana tupa pitaka yakama langulu-peyai.

²⁷ Nambato yakamana yamapanne mo tambo laya wato, yakama tepa alu pokale. Gote lo bilipi nalene wandakali tupamane yangone mindina yamapanne mo tambo laya alaini pua teke, nambato yakamana yamapanne mo tambo laya naeyo. Jia. Nambato utupane sia minuto, yakamana yamapanne mo tambo wete laya eyo-ko. Namba yakama tepa alu, polowa-angi, yakamato anu pulu-peyamape lo nembo kambua toto, yuku aa na-piyapape.

²⁸ Namba Ayiane oko ateyanga pulu, matili yakama atolainga peke lokale lauwa. Namba Ayiane balato namba sia minuto, lipinga yale ateya. Wuaneko, yakamato namba towa epelewa yamapanne yo atapiai-yale, namba Ayiane oko ateyanga polopeyai leyo okone ale wato, yakamato epele apiai-yale. *

²⁹ Matili namba Ayiane ateyanga polowa-angi, yakamato namba lo bilipi lalapale nembo toto, andipa namba Ayiane ateyanga po ata napene ato, yakama wamba ini langeyo. *

³⁰ Yuu okona wandakali kambua tupa ando atalane akali koo Satane okona pi-ape akali oko epeya okonena, nambato yakama towa pii kambua lo ata napulu-peyama. Enene, bala tanena tai-lene okomane namba sia minuto, katulo mangene mindikipi mindi nambanga napulu-peyai.

³¹ Wuane tekeko, namba Ayiane oko towa epelewa yamapanne yoto, nambato balana pii tupa wato minu atalaeya lo Gote bilipi nalene wandakali tupamane andapiao laka lo nembo teyo-ko. Nanima ika lalu maa. Jisasato wuane lea.

15

Jisasa Bala Getepe Eyaka Okona Itane Enene Oko

¹ Wuane lalu, Jisasato pii mindi tako pua loto, getepe eyaka okona itane enene oko namba ateyolea. Nambana Ayiane oko bala getepe ee okona anduane atoto, getepe ee okone ando atalane.

² Namba Ayiane okomane ee okone ando atoto, dini lia na-piyaini kembone tupa pitaka yando apialane. Dini lialane kembone epene tupa pitaka-mane dini minditupa tako pua liakale nembo toto, balato

* ^{14:17:} Jo 16:13 * ^{14:20:} Jo 17:21-23 * ^{14:23-24:} Jo 7:16-18 * ^{14:28:} Jo 20:17 * ^{14:29:} Jo 13:18-20 * ^{15:2:}

kembone utupane waa puato, utupanena yokone koo tupa pitaka onde lo apialane. *

³ Nambato Gotena pii oko yakama langeyo okomane yakama waa peya-kola, yakama kalato ata napene ateyai.

⁴⁻⁶ Getepe eyaka kembone mindi bala tane kapu toto, tepa yando, kembone okonenga dini mindi katulo lia napulu-peya. Jia. Kembone okone kapu tola-kola, getepe ee ando atalane akali okomane kembone okone balana ee okona kamaka apolopeya. Apola-kola, matili wandakalimane kembone kapu-tene tupa pitaka mo yomo wato, ita too atene okona yangolopeyai. Okone taka gulo teke, namba getepe eyaka okona itane ateyo-kola, yakama nambana kembone tupa ateyai. Yakama nambanga ata napene, awua tepa yaindo, yakamanga dini epene mindikipi mindi katulo lia napulu-peya. Jia. Yakama kapu-tene gulo atolai-kola, namba Ayiane okomane yakama mo yomo wato, ita too atene okona yangolo-peya. Wuane tekeko, wandakali mindi nambanga ateando, balanga dini epene kambua lulupeya-ko. Namba yakamanga atolowa-kola, yakama nambanga atalapape. *

⁷⁻⁸ Yakama nambana disaipolo tupa atoto, yakamanga dini kambua lua ateaindo, yakamana mana epene okomane namba Ayiane okona gene oko laiyu lola-kola pulupeya. Kenda-pene mindi yola-kola, nambana Ayiane okomane mangene mindi pipia lakae lo nembo teaindo, yakama namba towa mindiki gulo atoto, nambana pii tupa wato minuto, bala tee loto, mangene mindi pingipe lalapape. Yakamato wuane peaindo, balato mangene okone pingulu-peya. *

⁹⁻¹⁰ Nambato namba Ayiane okona pii wato minu ateyo-kola, balato namba epelewa yamapane yo atalane. Wuane pua teke, yakamato nambana pii oko wato minu ateaindo, nambato yakama epelewa yamapane yo atolopeyo. Ayiane okomane namba towa epelewa yamapane yo atalane pua teke, nambato yakama towa epelewa yamapane yo ateyo. Nambato yakama towa epelewa yamapane yo atapiak lakae lo nembo toto, yakamato nambana pii oko wato minu atalapape. *

¹¹ Nambato epelewa atalawane pua teke, yakamatopi epelewa atapiak lakae lo nembo toto, nambato pii utupa yakama langeyo.

¹²⁻¹⁵ Piape anduane mindi bala waka mindinga atoto, balana piape tupa pua ateyo-kola, piape anduane okonemane aki

peyape lo balana piape akali okomane nembo natalane tekeko, nambana Ayiane okomane pii minditupa namba langeakola, nambato ale ewane tupa pitaka yakama langewa. Tene okonena, nambato yakama nambana piape akali tupa ateyai nalene, yakama nambana yamapane yene yame ateyai leyo. Yakamato mangene mindi pua atalapa lolowa-kola, yakamato mangene okone pua ateaindo, yakama nambana yamapane yene tupa atolopeyai. Wandakali mindimane balana yamapane yene yame moyoyale omeando, balana mana okonemane wandakali yangone epelewa yamapane yo atalaini mana waka tupa pitaka sia minulu-peya. Namba yakama towa epelewa yamapane yo atalawane wuane pua teke yakamato mindi akali towa epelewa yamapane yaka pua atalapale leyo. *

¹⁶ Namba yakama towa atu atamakale nembo toto, yakamato namba yapa lo mia napeai. Jia. Yakama nambana yame atalapale nembo toto, nambato yakama yapa lo mewa. Yakamato nambana gene oko loto, namba Ayiane okomane mangene mindi pingeakale lo pote leaindo, balato yakama moyo, mangene okone pingeakale nembo tewa. Wuane nembo toto, yakamanga dini tamu napene, yapowa yalane okonepene tupa lialapale nayuto, yakamato Gotena piape pulu pulupape lo nambato yakama langewa okoni.

¹⁷ Yakama teke-teke mindi akali epele aka puato, yamapane yaka pua atalapale nembo toto, nambato pii utupa yakama langeyo. Jisasato wuane lea. *

Bilipi Nalene Wandakali-mane Yakama Embo Wete Olopeyai Leane Oko

¹⁸⁻¹⁹ Wuane lalu, Jisasato pii minditupa tako pua loto, yakamato namba lo bilipi nalapai-yle, namba lo bilipi nalene wandakali tupamanekama towa epelewa yamapane yo atapiak-yle tekeko, yakama wandakali yame okonepene gulo ata napeyai lea. Nambato yakama yapa lo mewa-angi, yakama yame okone tepa alu, nambana yame guleai-kola, utupane-mane yakama towa embo wete yai okoni. Yakama nambana yame ata napeai okone angi, utupane-mane wamba ini namba embo wete yaini oko yakamato embesa olaini. Utupane-mane namba wamba ini embo wete alu, andipa yakamapi embo wete eyai. *

²⁰ Piape akali mindimane balana piape anduane okona lipinga yale ata napiyane lo nambato yakama langewa oko nembo

* **15:4-6:** Mt 7:15-20; 13:42 * **15:7-8:** Mt 5:16 * **15:9-10:** Jo 14:15; 1Jo 2:3-6 * **15:12-15:** Jo 10:11-13; 13:33-35;
1Jo 3:16; Mt 12:49-50 * **15:17:** Jo 13:33-35 * **15:18-19:** Jo 17:14

tatawa atalapape. Nambana pii wato mina na-piyaini wandakali tupamane yakamana pii oko wato mina napulu-peyai teke. Namba kenda-pene andane giyaini wandakali tupamane kenda-pene andane tupa yakama gulupeyai teke.*

²¹ Namba lo bilipi nalene wandakali tupamane namba ati kenga atala yuunga puu leane Ayiane Gote oko nembo nateyai okonena, yakama nambana disaipolo tupa ateyai nembo toto, utupane-mane mana koo utupane pitaka yakamanga minulupeyai.

²²⁻²⁵ Wamba wete Juta yame akali mindimane Gotena pii layene mindi pepa peyoto, nambanga koo tene mindi naya-kola teke, wandakali minditupamane namba towa embo wete yai leaipia. Gotena pii pepa pelene eya okone enene guleakale nembo toto, namba wandakali utupanena tombenenga epo atoto, Gotena pii utupanenga lamawuato, metekolo piape kambua pewe. Wamba wandakali waka mindikipi mindimane metekolo piape andane okonepene tupa napeai. Jia. Nambato utupanena tombenenga atoto, metekolo piape andane utupane napewa-yale, utupane-mane namba lo bilipi lolane tene mindi nayapia-yale. Wuane tekeko, utupane-mane nambana metekolo piape andane utupane andoto teke, namba lo bilipi nalene, namba towa embo wete yai. Namba embo wete alaini wandakali utupane-mane nambana Ayiane okopi embo wete eyai-kola, piyaini. Utupane-mane namba Ayiane nalipa lapotaka towa embo wete eyai okonena, utupanenga koo tene mindi eya.*

²⁶ Oli Sipitisa oko bala Ayiane Gote oko towa atu atoto, enene pii oko lalane. Nambato bala yakama moyolo epeakale lolowa-kola, bala yakamanga epolopeya. Bala epola-angi, balato wandakali tupa lamawuato, namba Gote Iwanane oko ateya lolopeya.*

²⁷ Wamba nambato Gotena piape oko bulupane tewa pewa okone angi, yakama namba towa atu atema. Yakama namba towa atu atama ipulu, andipa ateyama oto oko angi giau leyai okonena, yakamatopi namba Gote Iwanane ateya lo wandakali tupa lamaipe-pene. Jisasato wuane lea.

16

1-4a Wandakali minditupa-mane namba Ayiane nalipa wayumane nembo nateyai okonena, yakama utupane towa atu

lotu lolo epolaini jia loto, utupane-mane yakama peyo watolo-peyai. Dee, matili oto mindi epola-angi, utupane-mane Gotena piape epene mindi peyama nembo toto, yakama peyo ome lolopeyai. Matili utupane-mane kenda-pene andane utupane yakama gulai-angi, utupane-mane wuane pulupeyai lo nambato yakama wamba langea lo yakamoto nembo tolopeke lapihai laka lo nembo teyo. Yakamoto pii utupa nembo tolo-peke loto, namba lo bilipi lalaini mana oko awua tepa naene, bilipi leyama nayu lo atalapale nembo toto, andipa nambato pii utupa yakama langeyo. Jisasato wuane lea.*

Oli Sipitisa Okomane Gotena Piape Wua Pulupeyai Leane Oko

^{4b} Wuane lalu, Jisasato pii mindi tako pua loto, wamba bulupane tewa namba yakama towa atu atema-angi, nambato pii utupane yakama langulane tene mindi ata napea-kola, nambato pii utupane yakama langi napewa lea.

⁵⁻⁶ Andipa namba ati kenga atala yuunga puu leane Ayiane oko ateyanga peke Royale ato, nambato pii utupane yakama langeyo okonena, yakama mini kenda wete eyai tekeko, yakamana mindimane namba tipa puato, nimba aninga pelepe naleyai.

⁷ Nambato pii enene wete mindi yakama langeyo. Nambato yakama tepa naewando, Oli Sipitisa okomane yakama moyolo naepolo-peya tekeko, nambato yakama tepa alu pewando, nambato bala yakamanga epeakale lokale. Wuaneko, namba yakama tepa alu, namba Ayiane oko ateyanga polowa okomane yakama moyolo-peya leyo.*

⁸⁻¹¹ Wandakali minditupa-mane namba lo bilipi naleyai okonena, Oli Sipitisa oko epoto, utupanena mana okone mana koo mindi eya lo utupanenga andawa lolopeya. Namba Ayiane ateyanga polowa-kola, yakamoto namba dee lapone anda napulupeyai okonena, Oli Sipitisa okomane namba akali epene tika-pene mindi ateya lo wandakali utupanenga andawa lolopeya. Dee, Goteto yuu oko ando atalane akali koo Satane oko yapa lo tale puato, koo tene mindi balanga yata yane oko Oli Sipitisa okomane wandakali utupanenga andawa lolopeya. Balato mana tepo utupane namba lo bilipi nalene wandakali tupanga andawa lola-kola, utupane-mane mana utupane kuai lo nembo natene, wamba mana koo tupa minu atemaeya lo andolopeyai.*

¹² Nambato pii kambua tako pua loto, yakama langualane eya tekeko, andipa

* **15:20:** Jo 13:14-16 * **15:22-25:** Lk 10:13-16; Sam 35:19; 69:4 * **15:26:** Jo 14:26 * **16:1-4a:** Mt 24:9; Lk 6:22; Jo 9:22-23; 15:21 * **16:7:** Jo 14:16 * **16:8-11:** Jo 12:31 * **16:12:** 1Ko 3:1-4

yakamato katulo pii utupane kuai lo nembo natolo-peyai. *

¹³ Wuane tekeko, matili enene pii lalane Sipitisa oko epola-angi, bala tane pii mindi nembo toto, yakama langi napulu-peya. Jia. Nambato pii minditupa bala lamalu-wakola, balato ale wato, pii utupane yakama languato, mangene matili pulupeya tupa yakama langulopeya. Pii utupane yakama languato, balato yakamana nembo-tene tupa mo tika pulakola, yakamato enene pii tupa pitaka nembo tolopeyai.

¹⁴ Oli Sipitisa okomane nambana pii utupane ale wato, yakama langula okonemane nambana gene oko laiyu lolopeya.

¹⁵ Ayiane okona minditaka yalane tupa pitaka nambana eya-kola, Oli Sipitisa okomane nambana pii tupa ale wato, yakama langulu-peya leyo. Jisasato wuane leapia.

Nambana Gene Oko Loto, Loma Yala-pape Leane Oko

¹⁶ Wuane lalu, Jisasato pii mindi tako pua loto, ole ukupini mindi pola-kola, yakamato namba anda napulu-peyai. Dee, ole ukupini mindilapo pola-kola, yakamato namba dee lapone andolopeyai leyo-oko. Balato aki nembo toto, wuane leyape.

¹⁷ Wuane lea-kola, balana disaipolo tupana minditupa-mane yakama teke-teke mindi tipa piki puato, Jisasato nanima languato, ole ukupini mindi pola-kola, namba Ayiane ateyanga polopeyo okonena, yakamato namba anda napulu-peyai leyo. Dee, ole ukupini mindilapo pola-kola, yakamato namba dee lapone andolopeyai leyo-oko. Balato aki nembo toto, wuane leyape.

¹⁸ Oto aki-tipi polopeyape. Balato oto

ukupini mindilapo polopeyape leyo okone

nanimato nembo nateyama leai.

¹⁹ Utupane-mane pii okone Jisasa tipa pimakale nembo teai-kola, Jisasato okone andoto, utupane tipa puato, nambato yakama languato, ole ukupini mindi pola-kola, yakamato namba anda napulu-peyai. Dee, ole ukupini mindilapo pola-kola, yakamato namba lapone andolopeyai leyo okonena, yakama teke-teke mindi tipa piki peyaipe lea.

²⁰ Nambato pii enene wete mindi yakama langeyo. Nambato yakama tepa alu polowa-kola, namba lo bilipi nalene wandakali tupamane epelewa atolopeyai tekeko, wamba ini nambana disaipolo tupa yakama ai lo yamataka lalu, matili yakama epele wete olopeyai.

²¹ Wanda-mane andopane mandulane oto oko epola-kola, balana masiane peyola-kola, tandaka andane wete nolopeyao

nembo toto, bala yamapane kendawa pityaini. Wuane tekeko, andopane kamaka epola-kola, tandaka nolane oko nembo tolo-peke nalolo-peya. Jia. Andopane okone mandiyo nembo toto, wanda oko bala epele wete olopeyai.

²² Wuane pua teke, andipa yakamato yamapane kenda eyai tekeko, namba dee lapone epoto, yakama andolowa-angi, yakama epele wete olai-kola, wandakali mindikipi mindimane yakamana epele ene okone katulo mo apia napulu-peya.

²³⁻²⁴ Oto okone epola-angi, yakamato pii mindikipi mindi namba tipa napulu-peyai. Jia. Wamba ato tewa andipa ateyama oto okona giau loto, yakamato nambana gene oko loto, Goteto mangene mindi pingeakale lo loma yaa napeai tekeko, andipa nambato pii enene wete mindi yakama langeyo. Goteto mangene mindi pingeakale lo yakamato loma yaindo, yakama epele wete alapale nembo toto, balato nambana gene oko nembo toto, mangene okone pingulopeyako. Yakamato nambana gene oko loto, Ayiane Goteto mangene mindi pingeakale lo loma yalapape. Jisasato wuane lea. *

Yamapane Yanguli Pua Atalapape Leane Oko

²⁵ Wuane lalu, Jisasato pii mindi tako pua loto, andipa nambato pii kokoli tupa loto, pii utupane yakama langeyo tekeko, matili oto mindi epola-angi, nambato pii kokoli tupa yakama langi napulu-peyao lea. Okone angi, namba Ayiane okomane wua pulupeyao lo nambato yakama panakame langulu-peyo.

²⁶⁻²⁸ Wamba namba Ayiane oko towa atu atalu, bala tepa alu, yuunga epewane. Andipa namba yuu oko tepa alu, namba Ayiane ateyanga polopeyo. Namba Ayiane oko towa atu atalu, yuunga epeane oko bilipi loto, yakamato namba epelewa yamapane yo ateyai okonena, namba Ayiane okomane yakama epelewa yamapane yo ateya. Tene okonena, namba yuu oko tepa alu, bala ateyanga polowa-angi, balato yakama moyakale loto, nambato bala tee nalolopeyo. Jia. Yakama tane nambana gene oko loto, balato yakama moyakale lo tee lolakola, balato yakama moyolo-peya. Jisasato wuane lea. *

²⁹ Wuane lea-kola, balana disaipolo tupa-mane bala lamawuato, ae, andipa nimbato pii kokoli nalene, pii panakame lele leai.

³⁰ Wandakali mindimane pii mindi nimba tipa napeya-kola teke, nimbato wandakali okone bala wua lo tipa puyale peya nembo toto, balana pii tipa pulane okone yano peyalene. Nimbato okonetaka

tupa pitaka nembo talene okonena, nimba Ayiane Gote towa atu atalu, yuunga epeene ya lo bilipi leyama leai.

³¹ Wuane leai-kola, Jisasato utupanena pii okone yano peyoto, andipa yakamoto namba lo bilipi leyama leyai tekeko, yakamoto namba lo bilipi leyama nayu leyaipe lea.

³² Ale alapape. Kenda-pene andane mindi nambanga epola-kola, yakama pitakamane namba awua tepe alu, palaka puu toko loto, yakamana yuu tene tupana yale-yale polopeyai. Wuane pulane oto oko andipa wamba mandaka epo eya tekeko, namba angu ata napulu-peyo. Jia. Nambana Ayiane oko namba towa atu atolo-peyapa. *

³³ Yakama yuu okona ateyai-kola, kenda-pene tupa yakamanga epalane tekeko, nambato yuu okona kenda-pene tupa sia minalawane-ko. Yakama yuku naene, yamapanne keato yo yanguli pua atalapape. Yakama namba towa mindiki gulo atoto, mini epene palu atalapale nembo toto, nambato pii utupane yakama langeyo. Jisasato wuane lea. *

17

Jisasato Balana Disaipolo Tupa Moyo Pote Leane Oko

¹⁻³ Jisasato pii utupane lokoyo piyu, ati kenga andaiyu latawa atoto, Ayiane nimba Gote enene mindiki oko angu atoto, namba Mesaya oko atola lo ati kenga atala yuunga puu lee okoni lea. Wandakali-mane wuane lo bilipi leaindo, utupane katulo saka atapowa atolopeyai. Nambato wandakali minditupa saka atapowa ateakale lo ataya ola nembo toto, nimba nambato wandakali utupane namba giyu, yuu okona wandakali tupa pitaka ando atolane tai-lene oko namba gee okoni. Tene okonena, andipa nambato nimba gene oko laiyulolane oto oko wamba mandaka epeyea nembo teyo-ko. Nambato nimba gene laiyu lola loto, nimba nambana gene oko laiyu lape. *

⁴⁻⁵ Ayiane, wamba yuu oko nayenenga, namba nimba towa atu atepa-kola, nambana gene andane ya okoni. Okone angi, nimba piape minditupa namba guato, piape utupa pula lee. Wuane lee-kola, nambaa yuu okona atoto, piape utupane pikoyo piwa okomane nimba tai-lene okola, gene andane okola, okonelapo wandakali tupa andawa lauwa. Andipa namba nimba towa atu atolo-peke lolowa-kola, nimba gene andane mindiki okone teke namba gi-peke lape. *

* 16:32: Mt 26:31,56 * 16:33: Jo 14:27; Lom 5:1; 1Jo 5:1-5
Jo 6:37-40; 13:18-20

⁶⁻⁸ Wamba nimba yuu okona wandakali minditupa yapa lo mee-kola, utupane nimba yame ateakale lo nimba wandakali utupane namba gee. Gee-kola, nambato nimba mana oko utupanenga andawa lewa. Nambato pii nimba namba langee tupa wandakali utupane lamaewa-kola, utupane-mane ale yai. Ale wato, wamba namba nimba towa atu atewa-kola, nimba namba ati kenga atala yuunga puu leene lo utupane-mane bilipi leai. Andipa utupane-mane andeya-kola, pii mana nambanga eya tupa pitaka nimba namba langeene ya lo andalaini. Nambato nimba pii oko wandakali utupane lamaewa-kola, utupane-mane nimba pii okone wato minalaini.

⁹⁻¹⁰ Namba lo bilipi nalene wandakali tupa nimba moyola lo nambato pote naley. Jia. Nimba wandakali namba gee tupa nambana yame atoto, nambana gene oko andane eya lo wandakali waka tupanga andawa lalaini. Nambana wandakali utupane nimba yame ateyai nembo toto, nambato pote loto, nimba nambato wandakali utupane moyola leyo.

¹¹⁻¹² Ayiane nimba akali minditupa namba gee-kola, nambato utupane towa atu atoto, nimba tai-lene okomane utupane moyo ando atauwa. Nimba pii pepa pelene eya mindimane loto, nambana disaipolo tupa alu pulane akali mindiki-mane angu namba awua tepe alu, alu pulupeya layene eya. Pii okone enene guleakale nembo toto, nambato akali okone angu namba tepe alu, bala alu peakale lo ando kondalo. Nambana disaipolo waka tupana mindikipi mindi alu napea. Jia. Namba yuu okona atu napene, nimba atelenga epolopeyai tekeko, akali utupa yuu okona atolopeyai. Ayiane epene wete nimba yale mindi atu napeyako. Nalipa mindiki ateyapa pua teke, akali nimba namba gee utupa yame mindiki ateakalenga, nimba tai-lene okomane nimba utupane moyo ando atape. *

¹³ Nambato nimba atelenga eployale peyo tekeko, andipa namba yuu okona atoto, nambana epele ene oko wandakali utupanenga tumbi leakale nembo toto, pii utupane leyo.

¹⁴ Nambato yuunga wandakalina mana koo tupa wato mina na-piyawane. Jia. Nambato nimba pii tupa nambana disaipolo tupa lamaewa-kola, utupane-mane yuunga wandakalina mana koo tupa wato mina napeyai-kola, yuunga wandakali tumpame utupane towa embo wete eyai.

* 17:1-3: 1Jo 5:20 * 17:4-5: Jo 1:1; 4:34 * 17:11-12:

¹⁵ Akali utupane yuu okona ata naapeakale nembo toto, nimbato utupane mola lo nimbato nimba tee lo loma naeyo. Jia. Sataneto utupane minu koyolane. Nimbato utupane wayumane moyo ando atola loto, nimbato nimba tee lo loma eyo. *

¹⁶ Namba yuunga wandakalina mana koo tupa wato mina na-piyawane pua, nimbana disaipolo tupamane yuunga wandakalina mana koo tupa wato minu ata na-piyaini teke.

¹⁷⁻¹⁹ Wuaneko, wamba nimbato namba lo bilipi nalene wandakali tupana tombe-nenga nimbana piape oko pulu puu leene pua, nimbana disaipolo tupamane namba lo bilipi nalene wandakali tupana tombe-nenga nimbana piape oko pulu peakale lewa. Utupane-mane nimbana piape oko wayumane peakale nembo toto, nimbato utupane moyoyale, nimbato nimbana piape oko wayumane pukale leyo. Nimbana pii oko enene wetete eya. Nimbana enene pii okonemane akali utupane nimbana piape akali epene wete tupa gulaya ape. *

²⁰ Nimbana disaipolo utupa angu moy-ape lo nimbato pote naleyo. Jia. Matili wandakali minditupa-mane disaipolo utupanera pii oko ale wato, namba lo bilipi lolopeyai nembo teyo. Nimbato wandakali utupane moyape lo nimbato pote leyo teke.

²¹ Namba lo bilipi nalene wandakali tupamane nimbana pii oko ale wato, nimbato namba ati kenga atala yuunga puu leene lo bilipi lapiat laxae lo nembo teyo. Wuane nembo toto, Ayiane nimba nambanga atele-kola, namba nimbanga atalawane, wuane pua teke namba lo bilipi lolai wandakali tupa pitaka nalipanga atoto, yame mindiki atamatkale lo pote leyo.

²² Nalipa mindiki ateyapa, wuane pua teke nalipa lo bilipi lolai wandakali tupa yame mindiki atekale nembo toto, tii-pene nimbato namba gee oko nimbato utupane maewa. *

²³ Nimbato namba towa epelewa yama-pane yo atalene, wuane pua teke nimbato namba lo bilipi lolai wandakali tupa towa epelewa yamapane yo atoto, namba ati kenga atala yuunga puu lee okoni. Namba lo bilipi nalene wandakali tupamane wuane nembo teakale loto, nimbana yame oko yame mindiki wetete atekale nembo toto, namba utupanenga ateyo-kola, nimba nambanga atele.

²⁴ Ayiane, wamba nimbato yuu ati-la yakale nalene atee-angi, nimbato namba epelewa yamapane yo atoto, nimbana tii-pene oko namba gee okoni. Wandakali

nimbato namba gee utupane-mane nambana tii-pene okone andeakale nembo toto, yuu namba atolowa okonena wandakali utupane namba towa atu ataima lakae lo nembo teyo.

²⁵⁻²⁶ Ayiane epene tika-pene wete, namba lo bilipi nalene wandakali tupamane nimbana mana tupa nembo nateyai tekeko, nimbato nimba nembo toto, nimbana mana tupa nimbana disaipolo tupanga lapana ewa-kola, utupane-mane nimbana pii okone ale wato, nimbato namba ati kenga atala yuunga puu leene nembo teyai. Dee, nimbato namba towa epelewa yamapane yo atalene wuane pua teke, utupane-mane yakamana yangone tupa towa epelewa yamapane yo atapiat lakae lo nembo toto, namba utupanenga atoto, nimbana mana tupa utupanenga lapanawa atolopeyao. Jisasato wuane lea.

18

*Jutasato Jisasa Ene Peteane Oko
Matiyu 26:47-56; Maki 14:43-50; Luku
22:47-53*

¹ Jisasato pii utupane lo koyo piyu, balana disaipolo tupa towa ipa epo palane Kitone lene oko kalo piyu, ee mindina peakaiyu leai.

² Wamba ole kambuang Jisasa balana disaipolo tupa towa ee okonena epo amunguli pikli piyaini oko nembo toto, bala ene peteane disaipolo Jutasa okomane Jisasa bala ee okonena poto atolopeya nembo tea.

³ Wuane nembo toto, Jutasato pitisa akali kawane tupapi, Patasai tupapi, utupanera yanda yene minditupa lamialu, ami yanda yene minditupa lamea-kola, utupane-mane lamupi, kaiyapi, kandepa luupi, yandatepi, okonetaka tupa awua ee okonena epeai.

⁴⁻⁵ Jisasa ene peteane akali Jutasa bala akali utupane towa atu epo atea. Akali utupane epo atekale-kola, kenda-pene balanga epolopeyai tupa pitaka nembo toto teke, Jisasato akali utupane mandaka poto, yakamato api ayia peyaipe lo tipa pea. Tipa pea-kola, utupane-mane balana pii okone yano peyoto, nanimato Nasatesa tane Jisasa oko ayia peyama leai.

⁶ Wuane leai-kola, balato akali okone namba lea. Wuane lea wete, utupane yakama moko andane loto, aja peke lele puato, ayia peyo, yuunga lomba-pene yai.

⁷ Utupane-mane wuane peai-angi, Jisasato utupane dee lapone teke tipa puato, yakama api ayia peyaipe lea-kola, utupane-mane balana pii okone yano peyoto, nanimato Nasatesa tane Jisasa oko ayia peyama leai.

⁸⁻⁹ Wamba Jisasato pii mindi Ayiane Gote oko lamawuato, nimbato akali namba gee utupanena mindikipi mindi alu napulupuya lea. Pii okone enene guleakale nembo toto, balato yanda yene utupane lamawuato, namba Nasatesa tane Jisasa oko ateyoko. Yakamoto namba ayia peaindo, namba disaipolo utupa mee peakale lo ando kondalapape lea.*

¹⁰ Okone ang, Saimone Pitato kandepa luu mindi mandeane okone kilau lo moto, pitisa akali kawane okona piape akali mindina alene tikasa yoko taka lo tepa ya. Piape akali okonena gene oko Malakusa lene.

¹¹ Pitato wuanee pea-kola, Jisasato bala lamawuato, namba Ayiane-mane namba tandaka naope-pene leane okonena, nambato tandaka naope-pene jiape. Nimbana kandepa luu oko paliyane andanenga pale lolo-peke laa lea.*

¹² Wuane lea-kola, ami yanda yene tupapi, utupanena akali kawane okopi, Juta yamena yanda yene tupapi, utupane-mane Jisasa minata wato, eyaka-mane andi leai.

¹³⁻¹⁴ Wamba Kayapasato Juta yamena kanjole tupu lamawuato, akali mindiki angu Juta yame wandakali waka tupana panda moto omeando, mana okonemanee nanima moyolo-peya leaipia. Ee ana okonena Kayapasa bala pitisa akali kawane ateakola, akali utupane-mane Jisasa andi lo awua poto, Kayapasana imane Anasa ateanga wamba ini peainipia.*

Pitato Namba Jisasana Disaipolo Mindi Jia Leane Oko

Matiyu 26:69-70; Maki 14:66-68; Luku 22:55-57

¹⁵ Saimone Pita-la, disaipolo waka mindila, okonelapo liyamba Jisasa watama peapi. Pitisa akali kawane okomane disaipolo waka okone bala andeyane. Tene okonena, disaipolo okone bala Jisasa watama poto, katulo pitisa akali kawane okona banisa anda-pango kolandaka lea.

¹⁶ Wuane tekeko, Pita bala katulo banisa anda-pango kolandaka nalea. Jia. Bala mee kamaka ateakola, disaipolo mindoko bala kamaka epoto, banisa okona geta ando pitiyane piape wanda oko pii mindi lamaiyu, Pita lamo atu banisa okonena dee lapone anda-pangosa kolandaka lea.

¹⁷ Pita bala banisa okonena kolandaka lea-angi, ende okona geta ando pitiyane piape wanda okonemane bala lamawuato, nimbapi Jisasana disaipolo tupana mindi atele ya lea. Wuane lea-kola, Pitato bala lamawuato, namba balana disaipolo mindi jia lea.

¹⁸ Upa pea-kola, pitisa akali kawane okona piape akali tupapi, yanda yene tupapi, utupane yakama ita yangoto, upa endo yo atea-kola, Pita bala poto, akali utupane towa atu upa endo yo atea.

Pitisa Akali Kawane Okomane Pii Mindi-tupa Jisasa Tipa Peane Oko
Matiyu 26:59-66; Maki 14:55-64; Luku 22:66-71

¹⁹ Okone ang, pitisa akali kawane okomane Jisasa tipa puato, nimbana disaipolo tupu apipe. Nimbato wandakali tupu mana lamawuato, aki lalemepe leaipia.

²⁰ Wuane lea-kola, Jisasato bala lamawuato, namba too pua atoto, pii mana mindikipi mindi lamai na-piyawane leaipia. Ole dindi lo namba lotu anda andane okona banisa anda-pango yandopi, Juta yamena lotu anda waka mindina yandopi, Juta yame wandakali tupu pitaka amunguli piyaini panda utupanena mindi atoto, nambato pii panakame lamauwa atalawane.

²¹ Nimbato pii lamauwa atewa-kola, wandakali utupane-mane ale wato, nambato aki leape nemboto ateyai-ko. Anu peakale nimbato namba tipa pelepe. Nimbato utupane tipa pii leaipia.

²² Wuane lea-kola, yanda yene mindi bala mandaka ateane okomane bala tipa puato, Pitisa akali kawane okona pii okone yano peyoto, anu peakale nimbato wuanee lelepe lotu, balana kii apene-mane Jisasa peleipia.

²³ Peleka-kola, Jisasato balana pii okone yano peyoto, nimbato nambana pii ale wato, nambato pii koo mindi leya nembo teendo, nimbato pii koo wua lele lo nimbato nanima langi. Nimbato pii kuai lo leya nembo teendo, anu peakale nimbato namba pelelepe leaipia.

²⁴ Wuane lea-kola, Anasato yanda yene tupu lamawuato, yakamoto Jisasa andi lo awua, pitisa akali kawane Kayapasa oko ateyanga pulupa leaipia.

Pitato Namba Jisasana Disaipolo Mindi Jia Dee Lapone Leane Oko

Matiyu 26:71-75; Maki 14:69-72; Luku 22:58-62

²⁵ Saimone Pita bala upa endo yo atea-kola, akali minditupa-mane bala tipa puato, nimbapi Jisasana disaipolo mindi atelepe lea-kola, balato utupanena pii okone yano peyoto, namba balana disaipolo mindi jia lea.

²⁶ Pitato akali mindina alene yoko taka leane akali okonena yame akali mindi bala api pitisa akali kawane okona piape akali atea. Balato Pita tipa puato, nimbapi Jisasa

* **18:8-9:** Jo 17:11-12

* **18:11:** Mt 26:39

* **18:13-14:** Jo 11:49-51

towa atu ee okona atale-kola, nambato nimba andalo oko jiape lea.

²⁷ Wuane lea-kola, ole tepone gulo Pitato jia lea. Balato jia lea okone angi teke eka pauli maipa mindimane pii lea. *

Juta Yame-mane Pailate Wenonga Jisasa Kosimi Leaini Oko

Matiyu 27:1-2,11-14; Maki 15:1-5; Luku 23:1-5

²⁸ Wamba upa pitane wete, Juta yamena akali minditupa-mane Jisasa andi lo awua poto, Kayapasana anda oko tepa alu, gapomane anda okona peainipia. Juta yamena loo mindimane loto, Juta yame akali mindimane akali yame waka mindina andaka kolandaka leando, Gotena wenonga Juta yame akali okone bala kalato atene gulo atoto, Pasopa tomo oko katulo naa napulupuya layene yene. Tene okonena, Juta yame akali utupane-mane Pasopa tomo okone namakale nembo toto, Lomo tane gapana Pailate okona andaka kolandaka nalene, kamaka mee maliyo ateainipia.

²⁹ Kamaka maliyo ateai-kola, Lomo tane gapana Pailate bala kamaka epoto, Juta yame akali utupane tipa puato, yakamato aki loto, akali oko kosimi leyaipe leaipia.

³⁰ Wuane lea-kola, utupane-mane balana pii okone yano peyoto, akali okomane koo napiye pia-yale, nanimato bala nimba atelenga atu aiyu naipuma-yale leainipia.

³¹⁻³² Wuane leai-kola, Pailateto utupane lamawuato, yakamato bala atu aiyu poto, yakama tanena loo tupa wato minuto, bala kosimi lalapa leaipiā. Wamba Jisasato balana disaipolo tupa lamawuato, akali minditupa-mane namba ita malamanda okona peyo yuka olai-kola, namba omolopeyo leaipia. Goteto pii Jisasato leane okone enene guleakale nembo teakola, Juta yame akali utupane-mane Pailate lamawuato, Lomo tane tupa yakamato loo mindi yata wato, nanima Juta yame akali tupamane wandakali mindi kosimi loto, bala omeakale nalape-pene lalaini leainipia.*

³³ Wuane leai-kola, Pailate bala gapomane anda okonena andaka kolandaka lolo-peke loto, Jisasa epeakale leaipia. Jisasa epea-kola, Pailateto bala tipa puato, nimba Juta yamena kinji oko atelepe leaipia.

³⁴ Wuane lea-kola, Jisasato balana pii okone yano peyoto, nimba tane nembo toto, pii okone namba tipa pelepe. Pee, wandakali waka mindimane namba Juta yamena kinji ateya lo nimba langeya-kola, nimbatlo namba tipa pelepe leaipia.

³⁵ Wuane lea-kola, Pailateto balana pii okone yano peyoto, namba Juta yame akali

mindi ata napeyo-ko. Nimbato anu pipikola, nimbanba Juta yame akali yangone tupapi, pitisa akali kawane tupapi, utupanemanne nimba andi lo awua namba ateyonga epeyaipe leaipia. *

³⁶ Wuane lea-kola, Jisasato balana pii okone yano peyoto, yuu okona wandakalimane namba utupanena kinji atola naleai leaipia. Utupane-mane namba makimi lapiai-yale, Juta yame akali tupamane namba andi lo awua na-epeakale nembo toto, utupane-mane Juta akali utupa towa yanda pua atapiayale tekeko, namba kinji okonepene mindi ata napeyo. Jia leaipia.

³⁷ Wuane lea-kola, Pailateto bala lamawuato, nimba kinji mindi-pene mindi atele jiape leaipia. Wuane lea-kola, Jisasato bala lamawuato, nimba tane namba kinji mindi-pene mindi ateya lele okoni. Anginimane namba mandea-kola, nambato enene pii oko wandakali tupa lamauyale namba ati kenga atala yuunga epewane. Enene pii okone wato minu atalaini wandakali tupa pitaka-mane nambana pii oko ale alaini leaipia.

^{38a} Wuane lea-kola, Pailateto bala tipa puato, pii andoko enene eyape leaipia.

Pailateto Jisasa Ita Malamanda Okona Peyo Yuka Alapa Leane Oko
Matiyu 27:15-31; Maki 15:6-20; Luku 23:13-25

^{38b} Pailateto wuane lalu, dee lapone kamaka poto, Juta yame tupa lamawuato, nambato balanga koo tene mindikipi mindi ando mia napeyo leaipia.

³⁹ Ee ana dindi lo Pasopa tomo nalaini oto oko epeya-kola, yakamato wandakali katapusa atolane mindi makimi leyai-kola, nambato wandakali okone tita lo tepa alawane-ko. Nambato Juta yame wandakali yakamana kinji oko tita lo tepa apia laka lo nembo teyaipe leaipia.

⁴⁰ Wuane lea-kola, Juta yame wandakali utupane-mane pii taimane loto, akali okone tita lo tepa olene. Nimbato Batapasa tita lo tepa aa leainipia. Wamba Batapasa bala pake nene akali mindi atoto, gapomane oko yanda pimawua ateaiapia.

19

¹ Okone angi, Pailateto ami yanda yene minditupa lamawuato, yakamato Jisasa kunju-mane peyalapa lea-kola, utupanemanne bala atu aiyu poto, ole kambuangka kunju-mane peleaini-pia.

² Peyalu, utupane-mane eyaka ani atene minditupa mo umange pua, kinjina tangi gulene mindi waa puato, Jisasana kawanenga aiya maiyaini-pia. Aiya maiyu,

kinji tupamane tona tundupa-pene piyaini okonepene mindi balanga piya mayainipia.
*

³ Wuane piyu, utupane-mane mindiki-mindiki lo Jisasa ateanga mandaka poto, Juta yamena kinji nimba wayu epeleya lalu, bala kii-mane peyaka peainipia.

⁴ Wuane peai-kola, Pailateto dee lapone kamaka poto, wandakali tupa lamawuato, nambato balanga koo tene mindikipi mindi anda napeyo oko yakamoto andalapa pale nembo toto, bala atu aiyu yakama ateyasinga epeyo oko andalapa leaipia.

⁵ Wuane lea-kola, ani atene eyaka-mane tangi waa peaini okola, tona tundupa-pene okola, okonelapo piyu, Jisasa kamaka epeang, Pailateto wandakali utupane lamawuato, akali oko andalapa leaipia.

⁶ Pitisa akali kawane tupapi, yanda yene tupapi, utupane-mane Jisasa andoto, pii taimane loto, bala ita malamanda okona peyo yuka aa, laka peainipia. Wuane laka peai-kola, Pailateto utupane lamawuato, nambato balanga koo tene mindikipi mindi anda napeyo-ko. Yakama tane bala atu aiyu poto, ita malamanda okona peyo yuka alapa leaipia.

⁷ Wuane lea-kola, Juta yame wandakali tupamane balana pii okone yano peyoto, nanima loo mindi eya. Akali okomane bala tane Gotena Iwanane oko ateyo lalane okonema, nanima loo okonemane nanima languato, bala omape-pene leya leainipia.

⁸ Wuane leai-kola, Pailateto pii okone ale wato, yuku wete yaepia.

⁹ Yuku wete wato, bala dee lapone gapomane anda okona kolandaka loto, Jisasa tipa puato, wamba nimba anि atalu, epeepe leane tekeko, Jisasato balana pii okone yano napeleai-pia. *

¹⁰ Yano napelea-kola, Pailateto bala tipa puato, anu peakale nimbato nambana pii oko yano peya napelepe leaipia. Nimba tinga lo tepa olane tai-lene okola, nimba ita malamanda okona peyo yuka olane tai-lene okola, okonelapo lapotaka nambanga eya oko nimbato nembo natelepe leaipia.

¹¹ Wuane lea-kola, Jisasato balana pii okone yano peyoto, Gote ati kenga ateya okomane tai-lene okone nimba gii napiapia-yale, namba minu koyolane tai-lene mindikipi mindi nimbanga nayapiyale. Wuaneko, nimbato koo mindi pua atele tekeko, Kayapasato namba nimbara kinina yata giya okomane koo wete mindi piya leaipia. *

¹² Wuane lea-kola, okone ang i tewa, Pailateto Jisasa titi lo tepa olane asini mindi

ayia peane tekeko, Juta yame wandakali tupamane pii taimane loto, namba tane kinji mindi ateyo lalane akali oko bala Lomo tane gapomane akali kawane Sisa oko towa yanda pua atalane akali mindi ateya. Wuaneko, nimbato akali oko titi lo tepa eendo, nimbato gapomane akali kawane okone tawa epelewa atalene akali mindi ata napule-kola pulupeya leainipia. *

¹³ Wuane leai-kola, Pailateto Jisasa atu aiyu, gapomane anda okone kamaka poto, Jisasa kote okone yapa lo tale pukale nembo toto, bala toko mindina peteapia. Bala peteane yuu okonena gene oko anamane waa-pene ama oko lene. Iputu pii loto, yuu okonena gene oko Gapata lene.

¹⁴ Oto okone ang i, Juta yame wandakali tupamane Pasopa tomo oko anate-lene noyale makande pimakale nemboto ateinipia. Otonga tualo kilokopi mindi lea-kola, Pailateto Juta yame wandakali tupa lamawuato, yakamana kinji oko andalapa leaipia.

¹⁵ Wuane lea-kola, utupane-mane pii taimane laka puato, bala atu aiyu poto, ita malamanda okona peyo yuka aa leainipia. Wuane leai-kola, Pailateto utupane tipa puato, nambato yakamana kinji oko ita malamanda okona peyo yuka wape leaipia. Wuane lea-kola, Pitisa akali kawane tupamane balana pii okone yano peyoto, Lomo tane gapomane akali kawane Sisa oko bala angu nanimana kinji ateya. Nanimana kinji waka mindi ata napeya leainipia.

^{16a} Wuane leai-kola, utupane-mane Jisasa ita malamanda okona peyo yuka yakele lo balato ando kondoto, utupanenga mayaepia.

*Jisasa Bala Ita Malamanda Okona Peyo
Yuka Yaini Oko*

Matiyu 27:32-44; Maki 15:21-23; Luku 23:26-43

^{16b-17} Pailateto Jisasa utupanenga maiyakola, ami yanda yene tupamane bala atu aiyu poto, yuu gene kawane kulini lene okona peai. Iputu pii loto, yuu okonena gene oko Golokota lalaini, Jisasa bala tane ita malamanda oko awua pea.

¹⁸ Ami yanda yene tupamane Jisasa ita malamanda okonena peyo yuka alu, akali mindi balana kii tikasa-tole ita malamanda mindina peyo yuka wato, akali mindi balana kii koyasa-tole peyo yuka yai-kola, Jisasa bala akali okone-lapona tombenenga yuka atane atea.

¹⁹⁻²⁰ Wamba Pailateto Jisasa kote ale wato, bala yapa lo tale peane-angi, balato pii mindi pepa peyoto, Nasatesa

* 19:9: Mt 27:12 * 19:11: Jo 10:17-18; Ap 2:23; Lom 13:1-2

* 19:12: Lk 23:2; Ap 17:7

tane Jisasa oko bala Juta yamena kinji oko ateya lea. Balato pii okone Iputu pii lo peyalu, Lomo tane tupana pii lo peyalu, Gitiki pii lo peyalu, pii tepo utupane pepa pelea. Ami yanda yene tupamane Jisasa ita malamanda okona peyo yuka yai-angi, utupane-mane pepa okone Jisasana ita malamanda okona ate lea. Jisasa bala ita malamanda okona peyo yuka atane ateane yuu okone Jutusaleme mandaka gulo yakola, Juta yame wandakali kambua-mane epoto, pepa okone dii lo andeai.

²¹ Dii lo andeai-kola, pitisa akali kawane tupamane Pailate lamawuato, nimbato Nasatesa tane Jisasa oko bala Juta yamena kinji oko lo pepa peyale oko mo apoto, akali oko bala tane namba Juta yamena kinji ateyo lalane lo pepa peyo ate laa leainipia.

²² Wuane leai-kola, Pailateto utupanena pii okone yano peyoto, pii nambato pepa peyalo okone peyatane ateakale lo ando kondeyo leaipia.

²³⁻²⁴ Gotena pii pepa pelene eya mindimane loto, akali utupane-mane nambana tona tupa tale pua moto, nambana tona luu oko apito meyape andoyale tasu peleai layene eya. Pii okone enene guleakale nembo toto, Goteto ami yanda yene tukumindi tupana nembo-tene oko mina ika leakola, utupane-mane Jisasa bala ita malamanda okona peyo yuka yai-angi, balana tona tupa yomo tukumindinga tale puato, yakama mindiki-mindiki lo yomo mindi meai. Utupane-mane wuane peaini tekeko, balana tona luu piyane okone tambu latane ata napene, mee lapa-lapa mindiki angumane luu puyoko latane ateanga andeai. Andoto, ami yanda yene utupane-mane yakama teke-teke pii larawa puato, nanimato tona luu oko minu lete nalene, apito meyape andoyale, nanimato tasu peyamakale lalu, utupane-mane tasu peleai. *

²⁵ Jisasana angini okopi, bala angini okona akini okopi, akali Kolopasa okona wetene Matiya okopi, Makatala tano okona tane Matiya okopi, utupane yakama Jisasana ita malamanda ateane ongane mandaka gulo ateai. *

²⁶ Mandaka gulo ateai-kola, Jisasato balana angini oko andea. Disaipolo Jisasato epelewa yamapane yo ateane oko bala mandaka ateanga andoto, Jisasato balana angini oko lamawuato, wanda, andipa akali oko nimbana iwanane gulo ateya lea. *

²⁷ Wuane lalu, balato disaipolo okone lamawuato, andipa wanda oko nimbana angini gulo peteya lea. Wuane lea-kola, okone angi tewa, disaipolo okonemane

Jisasana angini oko atu andaka poto, bala moyo ateaiapia.

Jisasa Omeane Oko
Matiyu 27:45-50; Maki 15:33-41; Luku 23:44-49

²⁸⁻³⁰ Matili Jisasato piape Goteto bala mayane tupa pitaka pikoyo peyo lo andoto, pii pepa pelene eya mindi enene guleakale nembo toto, namba ipa nono piyua lea. Ipa nono piyua lea-kola, akali mindimane sapanjia mindi waene kaa-pene mindi ongane peteane okonena tanda pua meakola, waene kaa-pene okone sapanjia okonena pitu tumbi lea. Tumbi lea-kola, balato ita isopo kembone mindina moto, sapanjia oko kembone okonena tutuku puato, Jisasa ambulinga yata yaepia. Yata ya-kola, Jisasato waene kaa-pene okone nalu, piape Goteto bala geane tupa pitaka andipa koyo peya lo andeaiapia. Andoto, balato koyo peya lalu, balana mane tuki lalu, balana tandini oko peakale lo tepa ya. *

³¹ Anate-lene Sambasa oto andane wete mindi epolopeya nembo toto, Juta yame wandakali tupamane pitaka taka makande puu atoto, Sambasa angii akali omene tupa ita malamanda tupana mee yuka atane ata naapeakale nembo teai. Wuane nembo toto, utupane-mane Pailate lamawuato, akali mindimane ita malamanda okona yuka atane ateyai akali tupana kene tupa peyo kundu leando, utupane wamba ini kapoyale omolai-kola, akali minditupamane utupane ondoto, yuunga mo tepe olopeya-ko. Ami yanda yene minditupamane utupanena kene tupa peyo kundu leakalenga, nimbato utupane lamai leainipia. *

³² Wuane leai-kola, ami yanda yene minditupa epoto, akali mindi wamba ini bulupane Jisasa peyo yuka yaini ongane mandaka gulo ita malamanda waka mindina peyo yuka yaini okonena kene peyo kundu lalu, akali mindokona kene peyo kundu leai.

³³ Wuane piyu, utupane-mane Jisasa yuka atane ateanga epoto andeai-kola, bala wamba manda teanenga andoto, balana kene peyo kundu naleai.

³⁴ Utupane-mane balana kene peyo kundu naleaini tekeko, ami yanda yene mindimane Jisasana patilininga yandate-mane peyo lutuku apeya-kola, okone angi teke, tundupa ipa towa balau lea.

³⁵⁻³⁷ Gotena pii pepa pelene eya mindimane loto, utupane-mane balana kulini mindikipi mindi peyo kundu nalolo-peyai layene eya. Dee, Gotena pii pepa pelene eya waka mindimane loto, akali mindimane

* 19:23-24: Sam 22:18

* 19:25: Mt 27:55-56

* 19:26: Jo 13:23

* 19:28-30: Sam 22:15; 69:21

* 19:31: Lo

bala yandate-mane peyo lutuku pula-kola, wandakali-mane bala andatawa atolopeyai layene eya. Goteto balana pii layene okonelapo enene guleakale nembo toto, akali utupane-mane mangene okonelapo peakale lo piya ya. Nambato mangene okonelapo lee-mane andewane. Yakamatok Jisasa lo bilipi lapiai lakae lo nembo toto, nambato pii enene oko yakama langeyo. *

Josepe, Neketomasa-lamane Jisasa Mali Peapili Oko

Matiyu 27:57-61; Maki 15:42-47; Luku 23:50-56

³⁸ Atimatiya tano okona tane Josepe oko bala Jisasa bilipi lo ateane tekeko, balato Jisasa bilipi leyo lo lapana ewando, Juta yame akali tupamane kenda-pene mindi bala gulaini lo yuku wato, tengamane too pua bilipi lo ateaiapia. Wuane tekeko, matili Jisasa omea-angi, Josepeto Pailate tee loto, Jisasana umbaini oko mali pulu pokale, gulape leaiapia. Wuane lea-kola, Pailateko balana pii okone yano peyoto, atu yahuako. Nimbato balana umbaini oko mia lea-kola, Josepe epoto, Jisasana umbaini oko meaiapia.

³⁹ Akali Neketomasa lene mindi wamba Jisasa peteanga utulu epeane oko balapi epeaiapia. Wamba wandakali minditupamane ita yame lapona ipane tundumapene tupa moto, mina mindiki loto, salimi leai-kola, Neketomasato ita ipane tundumapene okonena kilo paiyasa tepo kamboto, awua epeaiapia. *

⁴⁰ Juta yame-mane wandakali omene mindi mali piyaini pua teke, Josepe, Neketomasa-la, okonelapo-mane Jisasana umbaini oko moto, ita ipane tundumapene okone bala towa lapalapa-mane yake peapilipia.

⁴¹ Ami yanda yene tupamane Jisasa peyo yuku yaini yuu organe mandaka gulo ee mindi yaepia. Ati mindi ee okonena yaka-kola, wamba akali minditupamane ana anda mali wenene mindi atti okonena kua peaini tekeko, utupane-mane wandakali mindi mali okonena mali naapeainipia.

⁴² Juta yame wandakali tupamane anate-lene Sambasa oto epolopeya nembo toto, pitaka taka wamba ini makande pulane gii oko koyo puyale pea-kola, Neketomas, Josepe-la, okonelapo-mane ana anda mali okone mandaka eya nembo toto, Jisasa awua poto, mali okonena mali peapilipia.

20

Jisasa Bala Malinga Ika Leane Oko

Matiyu 28:1-8; Maki 16:1-8; Luku 24:1-12

* **19:35-37:** Jo 21:24; Ek 12:46; Nam 9:12; Sam 34:20; Sak 12:10; Lap 1:7 * **19:39:** Jo 3:1-2 * **20:8-9:** Ap 2:24-32; 1Ko 15:4

¹ Sande ang, wamba upa pitane wete waa nalene, mee undupi latane atea-kola, Makatala tane Matiya bala Jisasa mali pitane ateanenga peaiapia. Poto andea-kola, ana anda mali okonena asia lomba tuma pua ana andane wete yane oko minu pen-deke layene yanga andeaipia.

² Andalu, bala taimane poto, Pita-la, disaipolo waka mindi Jisataso epelewa yamapano yo ateane okola, okonelapo lamawatu, akali minditupamane Akali Andane oko mali lopoto, mindisa awua palai ya. Utupane-mane bala aninga yata alaipe lo nanimoto nembo nateyama lea.

³ Wuane lea-kola, Pita-la, disaipolo mindoko-la, liyamba Jisasa mali pitane ateanenga moyale asini peapi.

⁴ Akali okonelapo liyamba lapotaka asia tai leaiapia tekeko, disaipolo mindoko-mane Pita wata ai-peke lalu, wamba ini ingane Jisasana mali okona peakayiu lea.

⁵ Peakayiu lalu, bala tombawua loto, mali anda-pangosa andandaka lo andea-kola, Jisasa mali puyale lapa-lapa mindimane bala puta pua ombo yaini tupa mee yanga andea tekeko, disaipolo okone bala ana anda mali kua-pene okona anda-pangosa kolandaka nalea. Jia.

⁶ Saimone Pita bala disaipolo mindokona masianesa watama epoto, ana anda mali okona anda-pangosa kolandaka loto andea-kola, lapa-lapa utupane organe mee yanga andea.

⁷ Lapa-lapa ajako mindi Jisasana kawenenga yake peaini oko lapa-lapa waka tupa towa atu nayene, bala angu waka mindinga leka yene ya.

⁸⁻⁹ Gotena pii pepa pelene eya mindimane loto, akali mindi bala malinga ika lolopeya leya tekeko, okone ang, balana disaipolo okonelapo-mane pii okone Jisasa andayo layene eya nembo nateapili. Wuane tekeko, disaipolo mindi malinga wamba ini ingane peakayiu leane okone balapi mali okona anda-pangosa kolandaka loto, Jisasa bala malinga yaa naapea oko andoto, bala malinga ika lala lo bilipi lea. *

¹⁰ Wuane piyu, disaipolo okonelapo liyamba andaka peapi.

Makatala Tano Okona Tane Matiyato Jisasa Andeane Oko

Matiyu 28:9-10; Maki 16:9-11

¹¹ Disaipolo okonelapo liyamba peke leapi tekeko, Matiya bala Jisasana mali okona mandaka gulo atoto, ai lo ateaiapia. Ai lo atoto, bala tombawua loto, ana anda mali okona andandaka leaiapia.

¹² Andea-kola, enjole lapo tona ake-pene mindi pua wamba Jisasana umbaini yane

ongane peteapinga andeaipia. Enjole mindi Jisasana kawane wamba yane ongane petea-kola, mindoko balana kene wamba yane ongane peteaipia.

¹³ Enjole okonelapo-mane Matiya tipa puato, wanda, anu peakale nimba ai lo atelepe leapi-kola, balato okone-lapona pii okone yano peyoto, akali minditupa-mane nambana Akali Andane oko mali lopoto, mindisa awua palai yako. Bala aninga yata alaipo lo nambato nembo nateyo okonena, ai lo ateyo leaipia.

¹⁴ Wuane lalu, balato mopeke loto andea-kola, akali mindi ongane ateanga andeane tekeko, akali okone bala Jisasa ateya nembo nateaipia. *

¹⁵ Ai lo petea-kola, Jisasato bala tipa puato, wanda, anu peakale nimba ai lo petelepe. Nimba api ayia pelepe leaipia. Wuane lea-kola, Matiyato bala ee ando atlante akali mindi ya lo nembo toto, nimbato Jisasa mo awua poto, mindinga yata ale yando, nambato bala mo awua pokalenga, nimbato bala onga yata alo lo namba langi leaipia.

¹⁶ Wuane lea-kola, Jisasato Matiya leaipia. Balato wuane leane-angi, Matiya mopeke loto, Iputu pii loto, Laponai leaipia. Pii Laponai okone mopeke loto, nanimana pii loto, tisa lalamane.

¹⁷ Matiyato Laponai lea-kola, Jisasato bala lamawuato, namba Ayiane atti kenga ateanya puata naeyo-ko leaipia. Nimbato namba minatawa ata napene, nambana disaipolo tupa ateayainga puu. Pulu, nimbato utupane lamawuato, Jisasato pii mindi loto, yakamana Ayiane Gote oko bala nambana Ayiane Gote oko ateya-kola, namba atti kenga bala ateanya peyo lala lape leaipia. *

¹⁸ Wuane lea-kola, Makatala tane Matiya oko bala poto, Jisasana disaipolo tupa lamawuato, nambato Akali Andane oko andalo lalu, pii Jisasato bala lamaiyane tupa utupane lamaiya.

Jisasato Balana Disaipolo Tupa Piape Pulu Pulupape Leane Oko

Matiyu 28:16-20; Maki 16:14-18; Luku 24:36-49

¹⁹ Sande angi, Jisasana disaipolo tupa yakama Juta yame wandakali tupa yuku wato, anda yakama peteaini okona asia loko peyatawa peteai. Asia oko loko peyatane ateane tekeko, matili nai andaka peanggi, Jisasa bala utupane tombenenga epo atoto, yakama mini epene palu pitiyapa lea.

²⁰ Wuane lalu, balana kinipi, patalinipi, utupanenga matikini yane tupa balana disaipolo utupanenga andawa lea-kola,

utupane-mane bala yakamana Akali Andane oko ya lo andoto, epele wete yai. *

²¹ Okone angi, Jisasato utupane dee lapone lamawuato, yakama mini epene palu atalapa. Namba ayiane-mane namba languato, nimbato nambana piape pulu puu leane, wuane pua teke nambato yakama balana piape pulu pulupa leyo lea.

²² Wuane lalu, balato utupanengah poo loto, yakamato Oli Sipitisa oko mialapa lea.

²³ Yakamato wandakali mindina koo tupa apia-mayiendo, balana koo utupane alu pulupeyai. Yakamato wandakali mindina koo tupa apia-mai naapeaindo, balana koo tupa balanga yapowa yolopeya lea. *

Tomasato Jisasa Andeane Oko

²⁴ Jisasa bala malinga ika lalu, balana disaipolo tupa ateaina epa okone angi, alesa akali utupanena mindi Tomasa gene mindi Ditimasa lene oko bala angu utupane towa atu ata naapea.

²⁵ Tene okonena, disaipolo waka tupa-mane bala lamawuato, nanimato Akali Andane oko andalamia leai-angi, balato utupane lamawuato, nambato balana kininga matikini okonelapo andoto, nambana kii ondene oko matikini okone-lapona mina andokale lea. Dee, balana patalinininga yandate yaini matikini oko nambana kii okomane mina andokale. Nambato katulo bala mina napewando, bala malinga ika lala lo nambato bilipi nalolo-peyo. Jia wete lea.

²⁶ Satete mindi pea-kola, Jisasana disaipolo tupa yakama dee lapone anda okonena amunguli pua peteai. Okone angi, Tomasa balapi utupane towa atu peteai. Utupane-mane anda asia loko peyatawa beteai tekeko, Jisasa bala utupane tombe-nenga epo atoto, yakama mini epene palu atlapanape lea.

²⁷ Wuane lalu, balato Tomasa lamawuato, nimbana kii ondene oko epe loto, nili matikini nambana kininga ateya okolapo mina anda lea. Nimbana kini oko epe loto, nambana patalinininga yandate-mane peyo lutuku apaene matikini eya oko mina anda. Mina andoto, nimbato nembo lopo pali napene, namba malinga ika lapi ya lo bilipi laa-kae lea.

²⁸ Wuane lea-kola, Tomasato balana pii okone yano peyoto, nimba nambana Akali Andane Gote oko atele lea.

²⁹ Wuane lea-kola, Jisasato bala lamawuato, nimbato namba andoto, namba lo bilipi lele. Namba anda napene, bilipi lolai wandakali tupa epele wete oloopeyai lea. *

Joneto Gotena Pii Pepa Peleane Okona Tene Oko

* 20:14: Lk 24:16; Jo 21:1-4

* 20:17: Lom 8:28-30; Ip 2:11-12

* 20:20: Jo 16:22; 1Jo 1:1-2

* 20:23: Mt 16:19

* 20:29: 1Pi 1:8-9

³⁰ Jisasato metekolo piape waka kambua wete balana disaipolo tupana wenonga peane tupa nambato pepa okona napelewa. Jia.

³¹ Wuane tekeko, yakamato Jisasa bala Gotena Iwanane atoto, Mesaya oko ateya lo bilipi leaindo, balana gene oko yakamanga yola-kola, yakama saka atapowa atalapale nembo toto, nambato pii utupa pepa okona peleyo. *

21

Disaipolo Yanasa Tupamane Jisasa Andeaini Oko

¹⁴ Matili Saimone Pitapi, Tomasa gene mindi Ditimasa lene okopi, Galili disitiki okona tano Kena tane Natanialepi, Sepiti iwanane lapo okolapopi, Jisasana disaipolo waka utupanena lapopi, utupane yakama ipa angini Galili gene mindi Taipi-tiasa oko mandaka gulo atea. Ipa angini okone mandaka ya-kola, Saimone Pitato disaipolo waka tupa lamawuato, namba pisa molo peyo lea. Wuane lea-kola, utupane-mane bala lamawuato, nanimapi nimba towa atu pisa molo maa leai. Maa lalu, utupane yakama sipi mindina peakaiyu loto, pisa molo peaini tekeko, utulu okonena, utupane-mane pisa mindikipi mindi mia napeai. Yuu waa lea-kola, balana disaipolo utupane-mane bala dee lapone andeakale nembo toto, Jisasa bala ipa angini okonena matenenga epo ateane tekeko, balana disaipolo tupamane akali ipa matenenga ateya oko bala Jisasa ateya nembo nateai. *

⁵ Utupane yakama sipinga pitiyu, tepanda-yale atea-kola, balato pii taimane loto, utupane tipa puato, iwana yame, yakamato pisa minditupa mialaipé lea-kola, utupane-mane balana pii okone yano peyoto, jia leai.

⁶ Jia lea-kola, balato utupane lamawuato, yakamato pisa mialaini umbene nuu oko sipi okona kii tikasa-tole ipanga aindaka leaindo, yakamato pisa minditupa molopeyai leaipia. Wuane lea-kola, utupane-mane umbene nuu okone sipinga kii tikasa-tole ipa okona aindaka leai-angi, pisa kambua wete umbene nuu okona epo tumbi lea-kola, utupane-mane katulo umbene nuu okone sipi okona anda-pangosa kilau lo mia napeai.

⁷ Pisa kambua wete meai-kola, disaipolo mindi Jisasato epelewa yamapane yalané okomane Pita lamawuato, akali ipa matenenga ateya oko bala Akali Andane oko ya lea. Wamba Pitato piape pukale nembo toto, balana tona mindi yoko yata yane tekeko, balato disaipolo mindokona pii

leane okone ale wato, tona okone mo piyu, ipa angini okona peaka nena lalu, ipa supimi lo awua matenenga pea. *

⁸ Sipi oko ipa matene okona moyale, tepanda yale mita andete mindikipi mindi pupe-pene gulo ya-kola, disaipolo waka tupa sipi okonena pituto, pisa pali-pata umbene nuu okone kilau lo awua ipa matenenga peai.

⁹ Utupane-mane ipa matenenga peakaiyu lo andeai-kola, Jisasato betesa minditupa ongane yata alu, pisa mindiki yangatane ateanga andeai.

¹⁰ Pisa mindiki yangatane atea-kola, Jisasato utupane lamawuato, yakamato pisa epapu mialai tupana minditupa mo awua ipulupa lea.

¹¹ Wuane lea-kola, Saimone Pita bala sipi okona peakaiyu loto, pisa pali-pata umbene nuu oko kilau lo awua epea-kola, ipa matenenga ya. Pisa andane andete mindikinga paiyasa yaunga tepo umbene nuu okonena paleaini tekeko, umbene nuu okone liti nalea. *

¹² Metekolo piape okone andoto, disaipolo utupane yakamato Jisasa bala Akali Andane oko ateya nembo toto, utupanena akali mindikipi mindimane nimba apipe lo bala tipa napeai. Okone angi, Jisasato utupane lamawuato, yakama tomo nolo ipulupa lea.

¹³ Tomo nolo epeai-kola, Jisasa bala ita teane okona mandaka gulo epoto, betesa oko moto, utupane maiyu, pisa okopi moto, utupane maya.

¹⁴ Wamba bala malinga ika lalu, balana disaipolo tupamane bala andeakale nembo toto, ole lapoai balato utupane ateinga panakame epea. Bala ipa angini Galili okona matenenga panakame epeangi, balana disaipolo tupamane ole tepone gulo bala andeai. *

Nimbato Gotena Piape Pua Atape Leane Oko

¹⁵ Utupane yakama tomo nokoyo peangi, Jisasato Saimone Pita tipa puato, Jone iwanane Saimone, nimbato akali utupa sia minuto, namba wayumane epelewa yamapane yo atelepe lea. Wuane lea-kola, Pitato balana pii okone yano peyoto, enene, nimbato nimba towa epele eyo oko Akali Andane nimbato nembo tele okoni lea. Wuane lea-kola, Jisasato bala lamawuato, nimbato nambana sipisipi andopane tupa tomo maiki pua atape lea.

¹⁶ Wuane lalu, ole lapone gulo balato Pita tipa puato, Jone iwanane Saimone, nimbato namba wayumane epelewa yamapane yo

* 20:31: Jo 3:14-15; Lom 1:16-17; 1Jo 5:13 * 21:1-4: Lk 5:4-7 * 21:7: Jo 13:23; Mt 14:29 * 21:11: Lk 5:6 * 21:14: Jo 20:19,26

atelepe lea. Wuane lea-kola, Pitato balana pii okone yano peyoto, enene, nambato nimba towa epele eyo oko Akali Andane nimbato nembo tele okoni lea. Wuane lea-kola, Jisasato bala lamawuato, nimbato nambana sipisipi tupu yatawa ando atape lea.*

¹⁷ Wuane lalu, ole tepone gulo balato Pita tipa puato, Jone iwanane Saimone, nimbato namba towa epele elepe lea. Ole tepone gulo balato wuane lea-kola, Pita bala yamapanne kenda wato, Jisasana pii okone yano peyoto, Akali Andane nimbato pitaka taka nembo talene. Nambato nimba epele eyo oko nimbato nembo tele okoni lea. Wuane lea-kola, Jisasato bala lamawuato, nimbato nambana sipisipi tupu tomo maiki pua atape lea.

¹⁸ Nambato pii enene wete mindi nimba langeyo. Wamba nimba iwana patane ateangangi, nimbana tona tupa tane mo piyu, nimba mindisa pokale nembo tee pua teke epoko piki pua atee. Wuane tekeko, matili nimba akali mini-yene gulo atole-angi, nimbato nimbana kini okolapo minaiyu lolekola, akali waka mindimane nimbana tona mo piya alu, nimba napokale nembo tolene yuu mindina andi lo awua polopeya lea.

¹⁹ Akali mindimane wuane pula-kola, akali minditupa-mane Pita peyo ome lolai-kola, bala omola okomane gene andane mindi Gote malupeya nembo toto, Jisasato pii okone lea. Wuane lalu, balato Pita lamawuato, nimbato namba watama ipu lea.*

Disaipolo Tupamane Jone Oma Napulu-peya Lo Nembo Teaini Oko

²⁰ Wamba Jisasapi, balana disaipolo tuppapi, utupane anda kenga lumu okona pituto, tomo no peteai okone angi, disaipolo mindi Jisasato epelewa yamapanne yo ateane okomane Jisasana kangaluane yanenga kawa aimo loto, Akali Andane, apito nimba ene pitulu-peyape lea. Matili Jisasato Pita nimbato namba watama ipu lea-angi, Pitato bala watama poto, masianesa anda-peke lo andea-kola, disaipolo okone-mane liyamba watama epeanga andea.*

²¹ Balato disaipolo okone andoto, Jisasa tipa puato, Akali Andane, akali oko anu pulu-peyape lea.

²² Wuane lea-kola, Jisasato bala tipa puato, nimbato bala oma napene, mee saka atama pulu, namba dee lapone epolowa oto oko andapia lakae lo nembo tewando, okone nimbana piapepe. Nimbato namba watama ipu lea.

²³ Wuane lea-kola, Jisasana disaipolo tu-pamane pii okone ale wato, balato disaipolo okone oma napulu-peya leya nembo toto, pii okone bala lo bilipi lene wandakali tu-panga lo tawe yaini tekeko, Jisasato disaipolo okone bala oma napulu-peya nalea. Jia. Balato Pita tipa puato, nimbato akali okone bala oma napene, mee saka atama pulu, namba dee lapone epolowa oto oko andapia lakae lo nembo tewando, okone nimbana piapepe lea.

²⁴ Jisasato mangene utupa peane loto, disaipolo Jisasato epelewa yamapanne yo ateane okomane pepa oko peleya. Nanimato balana pii utupa enene eya oko nembo teyama.*

²⁵ Jisasato mangene waka kambua wetete peane tupa pitaka mindiki-mindiki lo wua beane loto, wandakali-mane pepa peyapaiayale, buku andane kambua wetete yapiaiayale. Buku utupane pitaka yapiai-yale, buku utupane pitaka yata olane panda mindi yuunga yuu okona nayapia-yale yalua.*

* **21:16:** Ap 20:28-29 * **21:19:** Mt 16:24-26; 2Pi 1:13-14 * **21:20:** Jo 13:23-25 * **21:24:** Jo 19:35-37 * **21:25:** Jo 20:30

APOSOLO

Aposolo Akali Tupamane

Piape Peaini Tupa

¹ Amene Tiapolesa, nambato nimbanan pepa mindi wamba bulupane pelewa-angi, piape Jisasato bulupane tewa peane tupapi, mana lamawua ateane tupapi, utupane pitakana temane tupa pepa pelewa.*

²⁻³ Wamba Jisasa bala tandaka noto, omalu, malinga ika lalu, ole kambuangga balana aposolo akali tupa ateaininga epeaipia. Epoto, balato mangene wakawaka kambua peane tupamane, bala enene wete saka ateyo lo wayumane andawa leakola, aposolo akali tupamane bala andaka piki pua ateainipia. Andaka piki pua ateakola, balato utupane mana lamaiki puato, Goteto wua pua wandakali tupa moyo ando atalane lo mana lamaiki pea-kola, ole paiyasa tukumindi peaipia. Pea-kola, Oli Sipitisa okomane bala moyakola, Jisasato balana aposolo akali wamba yapa lo meane tupa lamawuato, yakamoto Gotena piape mindipene-mindipene tupa wua pua piyapape lo lamai-yaepia. Nambato Jisasana pii temane utupane pepa peyama ipapo wato, Goteto bala ati kenga epeakale loto, meane oto okonena pepa peyo gian lewa.*

⁴⁻⁵ Balato aposolo akali utupane atu amunguli puato, wamba nambato potomisa pii mindi yakama languato, matili Ayiane Goteto balana Oli Sipitisa oko yakama gulupeya lewa leaipia. Joneto wandakali tupa ipa-mane ipa peyamaiyane tekeko, ole kambua napolakola, Goteto balana Oli Sipitisa okomane yakama ipa peya gulupeya-ko. Yakamoto Jutusaleme kapoyale tepa naene, maliyo atalapape leaipia.*

Jisasa Bala Ati Kenga Peane Oko

⁶ Jisasato wuane lea-kola, aposolo akali bala towa amunguli pua ateaini tupamane bala tipa puato, Akali Andane, andipa oko angi, nimbato Isatale tane mindi nanimana kinji gulaya alu, nanima Isatale tane wandakali tupa minu tai laya olo-peke lolape leainipia.*

⁷ Wuane lea-kola, Jisasa utupane lamawuato, wamba Ayiane Gote bala tane nembo toto, gii oko tuma pola-kola, oto okone angi mangene mindi wua peakale lo yata yaepia. Mangene okone andoko angi

pulupeya lo yakamoto andalapale lo balato ando konda naopeya. Jia.*

⁸ Wuane tekeko, matili Oli Sipitisa oko yakamanga epoto, yakama minu tai laya ola-kola, yakamoto Jutusaleme tano okopi, Jutiya disitiki okopi, Samatiya disitiki okopi, yuu eya tupa pitakana poto, nambana pii layene epene oko katulo lamaulu-peyai leaipia.*

⁹ Wuane lea-kola, utupane-mane bala andatawa ateai-kola, Goteto bala ati kenga epeakale loto, meaipia. Jisasa bala ati kenga pea-angi, mole mindimane bala mo ombo ya-kola, utupane-mane katulo bala anda naapeainipia.

¹⁰ Utupane-mane bala ati kenga peane okonena mee andaiyu lo andatawa ateakola, tona ake-pene akali lapo kapoyale epoto, utupane towa atu ateainipia.

¹¹ Atu atoto, akali okonelapo-mane utupane tipa puato, Galili disitiki tane akali yakamoto anu peakale ati kenga mee andaiyu latawa ateyaipe leapilipia. Yakamoto andatawa atalai-kola, Goteto akali Jisasa oko ati kenga epeakale lo miala okoni. Wuane pua teke, matili Jisasa mindiki okone teke ati kenga atoto, yuu okona peke lolopeya leapilipia.*

Akali Mindi Jutasana Panda Meakale Leaini Oko

¹² Okone angi, aposolo akali tupa Olipi wangiane oko tepa alu, Jutusaleme peke leainipia. Olipi wangiane okone Jutusaleme mandaka gulo eya-kola, wandakali-mane kilomita mindiki palainipia.*

¹³ Pitapi, Jonepi, Jemesapi, Endutipi, Pilipipi, Tomasapi, Batolo-miyupi, Matiyupi, Alipusa iwanane Jemesa okopi, Saimone Selote lene okopi, Jemesa iwanane Jutaso okopi, utupane yakama Jutusaleme peke loto, anda lumu kenga yakama pitiyaini okona poto peteaini-pia.*

¹⁴ Akali utupanepi, Jisasa angini Matiya okopi, wanda waka minditupapi, Jisasa amene tupapi, utupane pitaka anda okonena pituto, yamapanne mindiki palu atoto, pote lo ateainipia.

¹⁵⁻¹⁹ Wamba Jutasato Jisasa ene peteane okona yole oko Juta yame oko mai-peke lea-kola, utupane-mane muni okone moto, yuu mindi kambeainipia. Jutaso bala tane nongo noto, yuka atane atalu, balana tombene tula loto, ini tupa pitaka lukuli laiya kamaka epeaipia. Wuane peane lene ale wato, Jutusaleme ateaini wandakali tupa pitaka-mane yakamana

* **1:1:** Lk 1:3-4 * **1:2-3:** Mk 16:19; Lk 24:36-51; Ap 10:41

Lk 24:20-21 * **1:7:** Mk 13:32 * **1:8:** Mt 28:19; Lk 24:48

Mt 10:1-4

* **1:4-5:** Lk 24:49; Jo 14:16-17; Ap 2:33-35; Mt 3:11 * **1:6:**

* **1:11:** Mt 26:64; Lk 21:27 * **1:12:** Lk 24:50-53 * **1:13:**

pii lalaini pua loto, yuu okonena gene oko Akeletama leainipia. Gene Akeletama leaini okonena tene oko yuu tundupa yene. Alu mindi, Jisasa lo bilipi lene wandakali andete mindikinga paiyasa lapopi mindi amunguli pua peteai-kola, Pitato utupanera tombenenga ika loto, wua leaipa: Amene imalini ima, akali Jutasana oko bala wamba nanima aposolo akali tupana mindi atoto, piape mindiki nanimato piyamane tupa balato pua ateane tekeko, akali minditupa-mane Jisasa andi lamakale nembo teai-kola, balato asini oko utupane andawa lea okoni. Balato wuane pulupeya loto, wamba Oli Sipitisa okomane akali Dapitinga ata lungu pea-kola, Dapitito pii okone pepa peleaipa. Gotena pii pepa pelene eya okone enene gulape-pene eya-kola, andipa enene guleya.*

²⁰ Wamba akali mindimane Gotena pii mindi buku Sama okona pepa peyoto, akali mindi balana yuu okona ata napulakola, balana anda oko mee ukuna ateakale leaipa. Dee, Gotena pii layene waka mindi buku okonena pepa pelene eya mindimane loto, piape balato pua ateane okone akali waka mindimane moto, peakale layene eya teke.*

²¹⁻²² Gotena pii oko wuane layene eya okonena, akali mindi Jutasana panda moto, nanima aposolo akali tupamanne piape puluma pua puato, balato Jisasa malinga ika leane lo lapanawa atape-pene guleya. Wamba Joneto Jisasa ipa peyamaiyane okone angi tewa, Goteto bala ati kenga lameane oto okona gian lo, Jisasa bala nanima aposolo akali tupa towa atu epoko pua atea-kola, akali waka minditupa nanima towa atu epoko pua ateaini teke. Akali utupanera mindimane Jutasana panda meakale lo nanimato makimi lape-pene. Pitato wuane leaipa.*

²³ Pitato wuane lea-kola, wandakali ateaini tupamanne akali lapona gene yata yainipia. Akali mindina gene Josepe Basapasa lenepia. Balana gene mindi Jasatasa lenepia. Akali mindoko balana gene oko Matayasa lenepia.

²⁴⁻²⁵ Wandakali ateaini tupamanne akali okone-lapona mindiki makimi lamakale nembo toto, pote loto, Akali Andane, Jutasana bala tane aposolo piape oko tepa alu, bala atolane yuu okona pea leainipia. Nimbato wandakali pitakana nembo-tene andalene. Andoto, nimba tane akali okolapona mindimane Jutasana panda moto, aposolo piape peakale lo makimi lale okone nanimanga andawa lape leainipia.

²⁶ Wuane lalu, apito Jutasana panda moto, aposolo piape peakale leyape andoyale, utupane-mane ana arjako lapo moto, makande peai-kola, Matayasana ana oko wamba ini pana yaepia. Pana ya-kola, utupane-mane bala aposolo akali masia wamba ateaini tupa towa mo tako peainipia.

2

Oli Sipitisa Epeane Oko

¹ Pendokosa oto oko epea-kola, Jisasa lo bilipi lene wandakali pitaka anda mindikina amunguli pua peteaini-pia.*

² Anda okonena pituto ale yai-kola, popo andane mindi oo kulu lo epalane okonepene gulo mindi ati kenga atalu, oo kulu lama epoto, wandakali utupane peteaini anda okonena tumbi leaipa.

³ Tumbi lea-kola, wandakali utupane-mane andeai-kola, utupanera mindiki-mindiki lo kawane tokonga ita lungu yale minditupa tala-tala epea-kola, andeaini-pia.*

⁴ Andeai-kola, okone angi tewa, Oli Sipitisa oko bala wandakali utupane pitakanga tumbi loto, utupane-mane wandakali yame waka tupana pii lalaini tupa mo laya yaepia.*

⁵ Wamba Gote lo lotu lene Juta yame wandakali minditupa yakama mindiki-mindiki lo yuu waka-waka yo peya tupa pitakana ateainipia. Matili utupanera minditupane yakamana yuu tene tupa tega aka piyu, Jutusaleme tano okona epo ateainipia.

⁶ Popo mindi oo kulu lo epalane pua, Oli Sipitisa oko oo kulu lo epea-kola, Juta yame wandakali utupane-mane ale wato, anu peyape lo andolo epo amunguli peainipia. Epo amunguli puato, utupane-mane ale yai-kola, Jisasa lo bilipi lene wandakali tupamanne Juta yame yuu waka-waka tane tupana pii waka-waka lalamaini tupa laka peinga ale yainipia. Ale wato, utupane-mane moko loto, okone anu peyape loto, yakama nembo kambua teainipia.

⁷ Nembo kambua toto, utupane-mane pii mindi tipa puato, pii lo ateyai wandakali utupane pitaka Galili disitiki tane angu ji-ape leainipia.

⁸ Utupane Galili tane angu ateaindo, utupane-mane anu puato, nanimana pii waka-waka lalamane pua leyai-kola, nanimato ale eyamape.

⁹ Nanimo Patiya tanepi, Mitiya tanepi, Ilama tanepi, Mesopotemia tanepi, Jutiya tanepi, Kapatosia tanepi, Pondasa tanepi,

* **1:15-19:** Sam 41:9; Mt 27:3-8 * **1:20:** Sam 69:25; 109:8
Lo 16:9-11 * **2:3:** Mt 3:11 * **2:4:** Ap 4:31; 10:44-46; 19:6; Mk 16:17-18

* **1:21-22:** Mt 16:19; Mk 1:9; Jo 15:27 * **2:1:** Pit 23:15-21;

Esia tanepi, yuu utupanena tane tupapitaka epo ateyama.

¹⁰⁻¹¹ Nanimana minditupa Pitinjia tanepi, Pambilia tanepi, Isipi tanepi, Saitini tano okona mandaka gulo yene Lipiya tanepi, yuu utupanena tane tupapi, pitaka epo ateyama teke. Dee, nanimana minditupa Lomo tane wandakali opene gulo Jutusaleme tano okona epoto ateyama. Dee, nanimana minditupa Kitita tanepi, Atepiya tanepi, nanima Juta yame enene tupapi, Juta yame gulo atalamane wandakali tupapi, nanima pitaka epo ateyama. Epo atoto, ale eyama-kola, nanima pitaka-mane pii waka-waka lalamane pua wandakali utupane-mane loto, Goteto piape andane peane tupana pii lauui-kola, nanimato ale eyama leainipia.

¹² Wuane lalu, utupane yakama pitaka tatakewa nembo kambua toto, yakama tane teke-teke mindi lamai-lamai puato, mangene oo peya okone aki peyape leainipia.

¹³ Wandakali minditupa-mane wuane leaini tekeko, minditupa-mane meke puato, wandakali utupane yakama waene wenene kambua no sipaki lo atoto, pii waka-waka utupa leyai leainipia.

Pendokosa Oto Okone Angi Pitato Pii Leane Oko

¹⁴ Wandakali utupane-mane wuane leaikola, Pita bala aposolo akali masia tupa towa atu atoto, pii taimane loto, Jutusaleme tanepi, Juta yame wandakali Jutusaleme tano okona epo ateyai tupapi, yakama pitaka-mane pii nambato leyo oko ale wato, mangene oo peya okona tene oko wayumane nembo talapape leaipia.

¹⁵ Akali utupa-mane waene kambua noto, sapake lo pii waka-waka utupa leyai lo yakamato nembo teyai tekeko, andipa upa pitane naini kiloko angu leya-angi, nanima Juta yame-mane waene naa na-piyamane. Jia wete.

¹⁶ Andipa wandakali utupanenga mangene mindi oo peya oko pulupeya nembo toto, wamba potopesa akali Joeleto pii mindi leaipia.

¹⁷ Balato pii okone loto, yuu oko koyo puyale pula-angi, nambato nambana Oli Sipitisa oko wandakali yakama pitakanga gae lokale leaipia. Gae lolowa-angi, yakamana iwananepi, wananepi, utupane-mane potopesa wandakali gulo atoto, nambana pii layene oko lo pana olopeyai. Okone angi, yakamana iwana patane ateyai tupamane minditaka kombeya-mane andene gulo andolopeya. Dee, yakamana akali mini-yene tupamane kombeya pulupeyai.*

¹⁸ Okone angi, nambato nambana Oli Sipitisa oko nambana piape wandakali utupanenga gae lolowa-kola, utupane-mane potopesa wandakali gulo atoto, nambana pii layene oko lo pana olopeyai.

¹⁹ Yuungapi, ati kengapi, okone-lapona nambato metekolo piape andane tupa puluwa-kola, tundupa epola okopi, ita lungu tola okopi, ita tua andane tupa pula okopi, utupane pitaka kokoli yale gulo yolopeya.

²⁰ Wuane pula-angi, nai oko undupi lolakola, ana iyu teya oko tundupa pene gulola-kola, Akali Andane okona oto epene wete oko epolopeya. Okone angi, Akali Andane okomane balana tai-lene andane okola, tii-pene andane okola, okonelapo andawa lolopeya.

²¹ Akali Andane okomane wuane pulangi, wandakali minditupa-mane bala tee lamawuato, nimbato nanima moyape lolopeyai. Wuane lolai-kola, balato utupane pitaka molo-peke lola-kola, utupane kuai lo atolopeyai. Wamba potopesa akali Joeleto wuane lo pepa peyo yata yaepia.

²² Isatale tane wandakali yakamato nambana pii oko ale alapape. Goteto Nasatesa tane Jisasa oko epeakale leane ya lo yakamato andalapale nembo toto, Jisasana kini okomane metekolo piape mindi-pene tupapi, kokoli mindi-pene tupapi, utupane peaipia. Jisasa bala yakama tombenenga atoto, piape utupane pea-kola, yakamato andeai okoni.

²³ Wamba wete Goteto akali Jisasa okone yakamana kininga gukale nembo toto, geaipia. Gea-kola, yakamato bala Gotena loo tangga lalaini akali tupana kininga maiyu, bala ita malamanda okona peyo yuka wato, ome leai.

²⁴⁻²⁸ Yakamato wuane peaikola, Jisasa bala tandaka andane nalu omeane tekeko, matili Goteto bala malinga ika laya olopeya nembo toto, wamba Dapitito pii mindi leane oko loto, minditaka mindimane namba mo yuku olane loto, Gote bala nambana kii tikasa mandaka atalane leaipia. Ole dindi lo bala namba mandaka ateyakola, nambato bala andalawane. Gote namba nimbana akali epene wetete ateyo-kola, nimbato nambana umbaini oko malinga paluto, tameakale lo ando konda napulupele. Dee, nambana tandini oko wandakali omene tupa atalaini yuu okona atapowa atekale lo nimbato ando konda napulu-peleko. Namba yamapanne epene wete palu, epele wete wato, pii lalawane. Nimbato namba moyolo-pele nembo toto, namba maliyo ateyo. Nimbato namba saka wete atapowa atolane asini oko namba

* 2:17: Jol 2:28-32

andawa lee. Nimba namba towa atapowa atole okomane, nimbato namba mo epele wete piya olopele. Wamba Dapitito wuane lea-kola, wandakali omalaini mana okomane Jisasa katulo mina duli lo mina napeaipia. Tene okonena, Goteto bala malinga ika laya yaepia. *

²⁹ Amene imalini ima, nanimana yumbane Dapitito wuane leane tekeko, matili bala omea-kola, wandakali-mane bala mali peaini lo nambato yakama tika pua langeyo. Wamba bala mali peaini oto okona ato, oto andipa ateyama okona gäu loto, balana mali oko yuu nanima atalamane okona mee eya. *

³⁰⁻³¹ Tene okonena, Dapitito bala tane nembo toto, pii okone naleane nembo teyama. Bala potopesa akali mindi gulo atoto, matili Goteto Kataisa bala malinga ika laya olopeya nembo toto, Goteto Kataisana umbaini oko mali okona paluto, tameakale lo ando konda napulpeya leaipia. Goteto balana tandini oko wandakali omene tupa paliyaini panda okona ateakale lo ando konda napulpeya loto, balato pii okone wamba leaipia. Wamba Goteto potomisa pii mindi Dapiti lamawuato, enene wete, matili nambato nimbanan mandiyene mindina mandiyene mindi bala nimba kinji atele okonepene teke ateakale lokale leaipia. Goteto potomisa pii leane okone Dapitito nembo toto, bala potopesa akali mindi gulo atoto, pii okone leaipia. *

³² Goteto akali Jisasa okone malinga ika laya ya-kola, aposolo akali nanimana pitakamane bala andema. Andalu, nanimato minditaka andeman tupa wandakali tupanga lapanawa lamai-yamane.

³³⁻³⁵ Wamba Dapitito pii mindi leane oko loto, Akali Andane Goteto nambana Akali Andane oko pii mindi lamawuato, nambato nimbanan yanda-pene tupa nimbanan pangosa ateakale lokalenga, nimbato nambana kii tikasa epo atape leaipia. Balato wuane leane tekeko, Jisasa bala ati kenga peane wuane pua, Dapiti bala ati kenga napeaipia. Jia. Goteto Jisasana gene oko layu loto, bala ati kenga epeakale lo moto, balana kii tikasa ateakale leaipia. Wuane lalu, wamba Ayiane Gote okomane potomisa pii mindi loto, Oli Sipitisa oko mauwakale leane okone balato Jisasanga mayaepia. Mayakola, andipa Jisasato Oli Sipitisa okone wandakali utupanenga gae lala-kola, utupanemanee pii waka-waka leyai-kola, yakamato ale wato, andeyai okoni. *

³⁶ Tene okonena, Isatale tane wandakali yakama pitaka-mane wayumane wete wua lo nembo talapape: Yakamoto ita malamanda okona peyo yuka yaini akali Jisasa okone Goteto bala Akali Andane Mesaya oko ateakale leane nembo talapape. Pitato wuane leaipia. *

Wandakali Kambua-mane Yamapane Peke Loto, Ipa Meaini Oko

³⁷ Pitato pii leane okonemane wandakali utupanena yamapanenga wayumane andaka pea-kola, wandakali utupane-mane balapi, aposolo akali waka tupapi, utupane tipa puato, amene yame, nanimana anu pimape leainipia.

³⁸⁻³⁹ Wuane lea-kola, Pitato utupane lamawuato, wamba nanimana Akali Andane Gote okomane yakamapi, yakamana andopane tupapi, yuu tepanda atalaini wandakali tupapi, wandakali balato ee lo mola utupane pitaka balana Oli Sipitisa oko gukale loto, potomisa pii mindi lo yata yaepia. Tene okonena, Goteto yakamana koo tupa apeakale loto, yakama wandakali mindiki-mindiki lo yamapanen peke lalu, Jisasa Kataisana gene okona ipa mialapa. Ipa molai-kola, Goteto balana Oli Sipitisa oko yakama gukale leane okone yakamanga gulupeya leaipia. *

⁴⁰ Wuane lalu, Pitato pii waka kam-bua minditupa tako pua utupane lamawuato, Goteto andipa yuu okona mana koo minu atalaini wandakali tupanga yole koo mindi maula-angi, balato yakamapi wandakali utupane towa yole koo mindi gulane. Waiwa ando atalapape leaipia.

⁴¹ Pitato wuane lea-kola, balana pii epelewa ale yaini wandakali tupamanen ipa meainipia. Okone angi wandakali tausene tepopi mindi ipa moto, Jisasa lo bilipi lene wandakali ateaini tupa towa epo tako peainipia. *

Kitisene Tupamane Mana Epene Tupa Minu Ateaini Oko

⁴² Kitisene wandakali utupane-mane kepawa kondna naene, aposolo akali tupana pii ale wato, mindi moyaka pua ateainipia. Ole kambuangga wandakali utupane-mane ulia tomo tupa atu nalu, Jisasana tomo noto, pote leainipia. *

⁴³ Wuane pua ateai-kola, Goteto aposolo akali tupana kinina metekolo piapipi, kokoli piapipi, kambua pea-kola, wandakali pitaka-mane andoto, yukuwa ateainipia.

⁴⁴ Okone angi, Jisasa lo bilipi lene wandakali utupane yakama pitaka yamapanen

* 2:24-28: Sam 16:8-11 * 2:29: 1Ki 2:10 * 2:30-31: 2Sa 7:12; Sam 16:10; 89:3-4; 132:11 * 2:33-35: Ap 5:32; 7:55-56; Sam 110:1 * 2:36: Ap 5:30-31 * 2:38-39: Ais 57:19 * 2:41: Ap 2:47; 4:4 * 2:42: Ap 20:7 * 2:44: Ap 4:32-35

mindiki palu atoto, yakamana minditaka yatawa ateaini tupa pitaka yakama pitakana gulo yatawa ateainipia.*

⁴⁵ Utupane-mane yakamana yuupi, minditaka yaini tupa tale piyu, wandakalimane minditupa kambeakale lo muni meainipia. Muni moto, yakamato wandakali minditaka jia yo ateaini tupa moyo, minditupa tale pua maiki peainipia.

⁴⁶ Ole dindi lo utupane yakama nembo mindiki palu atoto, lotu anda andane okona epo amunguli puato, lotu leainipia. Lotu lalu, yakama mindina andaka puku puato, ulia atu nalu, Jisasana tomo noto, gene yene eyama nembo natene, epelewa ateainipia.

⁴⁷ Ole dindi lo utupane-mane Gotena gene oko laiyu loto, lotu lo ateainipia. Wandakali pitaka-mane utupane towa yamapanne epene paleai-kola, ole dindi lo Akali Andane okonemane utupanena minditupa molo-peke loto, Jisasa lo bilipi lene wandakali ateaini tupa towa mo tako piki peainipia.*

3

Pita, Jone-lamane Akali Kee Koo Mindi Mo Kuai Leapili Oko

¹ Alu mindi ole-lene pote lalaini gii okona taeme siti kiloko lea-kola, Pita, Jone-la, liyamba lotu anda andane okona peapilipia.

² Peapi-kola, akali minditupa-mane akali kee koo mindi awua epeainipia. Wamba bala angini-mane akali okone mandea-angi, bala kee koo mandu yaepia. Ole dindi lo akali kee koo okonemane lotu anda andane okona anda-pango moyale epolai wandakali tupanga munipi, minditaka tupa giyapa lo tee leakale nembo toto, akali minditupa-mane bala lotu anda andane okona ende asia lomba yati-pene wete lalaini ongane peteakale lo bala awua ipuku piyainipia.

³ Utupane-mane akali okone awua epoto, pete leai-kola, balato Pita, Jone-la, liyamba lotu anda andane okona kolandaka loyale peapi oko andoto, okonelapo lamawuato, liyambato minditaka mindi namba giyapa lo tee leaipia.

⁴ Tee lea-kola, Pita, Jone-lamane akali okone andapeyo yapelepia. Pitato akali okone andapeyo yoto, nimbato nalipa anda leaipia.*

⁵ Wuane lea-kola, akali okonelapo-mane minditaka mindi bala guyale leyapi nembo toto, akali okonemane akali okonelapo andapeyo yaepia.

⁶ Andapeyo ya-kola, Pitato bala lamawuato, nambanga munipi, minditaka mindi

yaa naopeya tekeko, minditaka nambanga eya oko nimba gukale. Nasatesa tane Jisasa Kataisa okona gene oko loto, nambato nimba ika lalu, asini puu leyo leaipia.*

⁷ Pitato wuane lalu, akali okonena kii tikasa-tole minuto, bala mina ika lea-kola, wamba kapoyale okone angi teke akali okone balana kenepi, kee lenepi, utupane tai guleaipia.

⁸ Tai gulea-kola, bala taimane ika loto, peakaiyu nena pua asini epoko pua peainipia. Epoko piyu, bala Pita, Jone-la, okonelapo towa atu lotu anda andane okona kolandaka lalu, Gotena gene oko laiyu loto, peakaiyu nena pua asini peainipia.

⁹ Akali okonemane Gotena gene oko laiyu lo asini pea-kola, wandakali pitaka-mane bala andeaini-pia.

¹⁰ Andoto, utupane-mane akali okone bala lotu anda andane okona asia lomba yati-pene wete lalaini ongane pituto, munipi, minditaka tupa giyapa lo tee lo pitiyanie akali okone ya lo nembo teainipia. Akali okonena kene atu ya-kola, asini epoko pua ateanga andoto, wandakali utupane-mane moko loto, nembo kambua teainipia.

Pitato Lotu Anda Andane Okona Andapangosa Atoto, Pii Leane Oko

¹¹ Pita, Jone-la, liyamba lotu anda andane oko tepa alu, anda pimia atane atene Solomonena lalaini okona peapili-angi, akali wamba kee koo ateane okone bala okonelapo towa atu pulu, okonelapo miniaepla. Balana kene atu ya-kola, wandakali pitaka-mane bala asini epoko peane oko andoto, moko wete loto, taimane epoto, ongane amunguli peainipia.

¹² Epo amunguli peaini okone andoto, Pitato utupane tipa puato, Isatale tane wandakali yakamato akali okona kee atu yala oko andoto, anu peakale yakama moko loto, Jone nalipa andapeyo eyaipie leaipia. Gotena wenonga nalipa akali epene tika-pene wete atoto, nalipa tanena tai-lene okonemane akali oko mo atu yalu, asini peakale lalapi ya lo nembo toto, yakamato nalipa andapeyo eyaipie.

¹³ Yakamato wuane nembo natene, wua lo nembo talapape. Wamba nanimana yumbane Apatakamepi, Aisakepi, Jekopopi, utupanena Gote okonemane balana piape akali Jisasa oko gene andane wete mindi mayane tekeko, yakamato akali okone balana yanda-pene tupanga maiyai. Mayai-kola, gapomane akali andane Pailateto bala tepa wakale nembo teane tekeko, yakamato

* 2:47: Ap 6:7; 11:21

* 3:4: Ap 14:9

* 3:6: Ap 4:10; 16:18

* 3:13: Ek 3:6,15; Lk 23:13-25; Ap 2:23

Pailate wenonga atoto, Jisasa masia mawuato, Pailateto akali okone tepa nayakale leai. *

¹⁴ Wuane leaini okomane yakamato akali epene tika-pene wete Jisasa masia maiyu, akali yangone peyo ome lalane akali Bata-pasa oko Pailateto tita lo tepa yakale leai.

¹⁵ Jisasa bala wandakali saka atapowa atekale lo ataya alane akali oko atea-kola teke, yakamato bala peyo ome leaini tekeko, Goteto bala malinga ika laya ya. Balato wuane peane nalipato lee-mane andepale tupa lapanawa ateyaya.

¹⁶ Wamba Jisasa bala tane nalipana bilipi oko mina ika laya gea-kola, nalipato bala lo bilipi lepa. Andipa nalipato bala lo bilipi loto, balana gene oko lalapa-kola, akali yakamato wamba andalaini pia oko bala atu yala. Jisatasok akali okone mo atu yolopeya lo bilipi lalapa-kola, balato akali oko mo atu yala okone andipa yakamato andeyai okoni.

¹⁷ Amene imalini yame yakamatopi, yakamana akali kawane tupamanepi, Jisasa bala Mesaya oko ateya lo bilipi nalene atoto, mana koo tupa balanga miniaiin lo nambato nembo teyo. *

¹⁸ Wuane tekeko, wamba wete Goteto potopesa akali tupa pitakana ambulininga pii laa kakita loto, Mesaya oko bala tandaka nolopeya laka peainipia. Andipa yakamato mana koo tupa Jisasanga miniyai okonemane potopesa akali utupane-mane pii leaini tupa enene wete guleya.

¹⁹⁻²⁰ Wamba Goteto Jisasa bala yakama molo-peke lolane akali Mesaya oko atekale lata yaepia. Andipa Goteto Jisasa Kataisa bala yakamanga epeakale lola-kola, Akali Andane okonemane tai-lene wenene mindi yakama gulupeya nembo talapape. Tai-lene okone geakale nembo toto, Goteto yakamana koo tupa apia-geakale loto, yakamato yakamana nembo-tene koo oko lawa puato, mini peke lalapape. *

²¹ Wamba wete Goteto balana potopesa akali epene tupana ambulininga pii laa kakita loto, Goteto minditaka pitaka taka mo wenene gulaya olane gii okone epeakale loto, Jisasa bala ati kenga yuu epene okona atoto, maliyo atape-pene leaipia.

²² Wamba Gotena potopesa akali Moseses pii mindi leane oko loto, yakamana Akali Andane Gote okomane yakamana amene mindi makimi loto, bala potopesa akali namba ateyo okopene teke atekale lolopeya leaipia. Akali okone bala potopesa akali mindi gulo atoto, Gotena pii

yakama langula-kola, yakamato balana pii utupane pitaka wato minu atalapape. *

²³ Potopesa akali okonena pii ale na-olai wandakali tupa pitaka Gotena yame ata napeakale loto, Goteto utupane peyo ome lolopeya. Wamba Mosesato wuane leaipia.

²⁴ Wuane pua teke, potopesa akali Samualepi, potopesa akali matili Gotena pii lo ateaini tupapi, utupane pitaka-mane gii andipa ateyama oko epolopeya laka peainipia.

²⁵ Wamba Goteto potomisa pii mindi Apatakame lamawuato, matili nimbanda yame okona mandiyene mindimane yuu okona wandakali yame palu pula tupa pitaka moyolo-peya leaipia. Goteto potomisa pii okone yakamana yumbane tupa towa lo yata ya-kola, andipa yakamato potopesa akali tupana andopane yame gulo ateyai-kola, balato katulo yakamapi moyolopeya. *

²⁶ Andipa yakama pitaka mindiki-mindiki lo yakamana mana koo minalaini tupa kondalapale nembo toto, Goteto balana piape akali okonemane yakama wamba ini moyolo epeakale leane. Pitato wuane leaipia. *

4

Pita, Jone-la, Andi Leaini Oko

¹ Pita, Jone-lamane wandakali tupa pii lamawua ateapi-kola, pitisa akali tupapi, Satusi tupapi, lotu anda andane okona yanda yene tupana akali kawane okopi, utupane epeanipia.

² Epoto, utupane-mane ale yai-kola, akali okonelapo-mane wandakali tupa mana lamawuato, Jisasa bala malinga ika leane okonena, wandakali omene tupa pitaka malinga ika lolopeyai leapinga ale yainipia. Ale wato, utupane-mane Pita, Jone-la, towa yataka andane wete yainipia.

³ Yataka wato, utupane-mane akali okonelapo kosimi lamakale lo mineaini tekeko, nai oko andaka moyale pea-kola, anate-lene kote ale amakale nembo toto, utupane-mane akali okonelapo katapusia anda okona andi lo aindaka leainipia.

⁴ Andi lo aindaka leaini tekeko, wandakali kambua-mane akali okone-lapona pii leapili oko ale wato, Jisasa lo bilipi leaikola, Jisasa lo bilipi lene wandakali tupa tausene yaupi mindi guleaipia. *

Kanjole Tupana Wenonga Pita, Jone-lamane Pii Leapili Oko

⁵ Anate-lene Juta yamena akali andane tupapi, ando atene akali tupapi, loo tupana mana andene akali tupapi, utupane

* 3:17: Lk 23:34; 1Ti 1:12-14

* 3:19-20: Ap 2:38-39

13:46 * 4:4: Ap 2:41

* 3:22: Lo 18:15,18-19

* 3:25: Jen 22:18

* 3:26: Ap

Jutusaleme tano okona epo amunguli peainipia.

⁶ Pitisa akali kawane Anasapi, Kaya-pasapi, Jonepi, Aleke-sandapi, pitisa akali kawane yame waka ateaini tupapi, utupane towa atu amunguli peainipia.

⁷ Epo amunguli puato, utupane-mane Pita, Jone-la, yakamana wenonga mo ate loto, liyambato tai-lene anu-pene mindi moto, akali kee koo oko mo atu yapiapipe. Liyambato apina gene oko loto, piape oko pipiapipe lo tipa peainipia.

⁸ Tipa peai-kola, Oli Sipitisa oko Pita balanga epo tumbi lea-kola, balato utupane lamawuato, Isatale tane akali andane tupapi, ando atene akali tupapi, yakamato ale alapa leaipia.

⁹ Wamba nalipato akali kee koo mindi moyipa-kola, andipa yakamato nalipa tipa puato, aki mindimane akali kee koo oko mo atu yapiapipe lo tipa peayi okoni.

¹⁰ Nalipato Nasatesa tane Jisasa Kataisana gene oko laipa-kola, balana tai-lene okomane akali kee koo oko mo atu ya-kola, andipa akali oko bala atu yoto, yakamana wenonga epo ateya oko Isatale tane wandakali yakama pitaka-mane nembo talapape. Wamba yakamato Jisasa Kataisa bala ita malamanda okona peyo yuka yaini tekeko, Goteto bala malinga ika laya yane.*

¹¹ Wamba yakama anda piyaini akali kamanda gulo atoto, Jisasa bala ita koo yale ateya ya loto, bala jia leaini tekeko, andipa bala Gotena anda okona pingina gulo ateya.*

¹² Goteto wandakali waka mindina gene oko loto, okonemane nanimolo-peke lolopeya naleaipia. Tene okonena, akali waka mindimane katulo nanimolo-peke nalolo-peya. Jia, Jisasato angu katulo nanimolo-peke lolopeya. Pitato wuane leaipia.*

¹³ Pita, Jone-la, liyamba sukulu mindi na-lene, gene nayene ateapele tekeko, liyambato yuku naene, pii leapi oko ale wato, akali utupane yakamato nembo kambua meainipia. Utupane-mane akali okonelapo wamba Jisasa towa atu ateaini ya lo nembo teainipia.

¹⁴ Utupane-mane wuane nembo teamini tekeko, kee koo mo atu yapiili akali okone bala akali okonelapo towa atu ateai oko andoto, Juta yamena akali andane tupamane Pita, Jone-la, liyambana pii leapili okone yano peyo, pii mindi nalape-pene guleaipia.

¹⁵ Tene okonena, akali andane utupane-mane Pita, Jone-la, liyamba kanjole yamena

anda oko tepe alu peakale loto, yakama teke-teke pii lalawa peainipia.

¹⁶ Pii lalawa puato, utupane-mane loto, akali okonelapo-mane metekolo piape andane mindi pipiapi-kola, Jutusaleme yuu okona ateyai wandakali tupa pitakamane andapiai. Tene okonena, liyambato metekolo piape okone napipiapi lo nanimato nalape-pene guleya-ko. Nanimato akali okone-laponga anu pimape.

¹⁷ Akali okonelapo-mane metekolo piape oko napipiapi nanimato nalape-pene guleya tekeko, okonelapo-mane Jisasana gene oko lo tawe yolapele. Nanimato okonelapo lamawuato, liyambato Jisasa balato wua peane lo wandakali mindikipi mindi pii lamai napene kondalapa. Liyambato Jisasa lo pii mindi wandakali tupa lamai-yapindo, nanimato kenda-pene andane mindi liyambanga gulu-peyama lo lamai-makale leainipia.

¹⁸ Wuane lalu, utupane-mane Pita, Jone-la, okonelapo epeakale loto, liyambato Jisasa gene oko loto, pii anjako wetepi mindi wandakali tupa mana lamai napiyapape leainipia.*

¹⁹⁻²⁰ Utupane-mane wuane leaini tekeko, Pita, Jone-lamane utupanena pii leaini okone yano peyoto, Goteto nalipa languato, liyambato minditaka andeapi tupapi, minditaka ale yapi tupapi, wandakali tupa lamai-yapape lea-kola, nalipato piape okone katulo konda napulu-peyapa leaipilipia. Nalipato yakamana pii oko wato minuto, Gotena pii oko tanga loto, balana piape okone kondepando, Gotena wenonga nalipana mana okone tika-pene yolo-peyape lo yakama tane-mane nembo toto, yapa lo tale piyapape leapilipia.*

²¹⁻²² Akali kee koo okona angini-mane bala mandea-kola, mali paiyasa tukumindinga dee mali minditupa pea-kola, Pita, Jone-lamane balana kene oko mo atu yapilipia. Akali okonelapo-mane Gotena tai-lene okomane bala mo atu yane okone andoto, wandakali pitaka-mane Gotena gene oko laiyu leainipia. Wandakali pitaka-mane wuane peaini okonena, Juta yamena akali andane tupamane Pita, Jone-la, liyambanga kenda-pene maulane tene mindi ando mia naapeainipia. Tene okonena, utupane-mane akali okonelapo lamawuato, liyambato nanimana pii tanga leapindo, nanimato kenda-pene andane minditupa liyambanga gulu-peyama leainipia. Wuane lalu, akali utupane yakamato akali okonelapo peakale tepe yainipia.

* **4:10:** Ap 3:6,13-16 * **4:11:** Sam 118:22 * **4:12:** Mt 1:21 * **4:18:** Ap 5:28 * **4:19-20:** Ap 5:29

*Yuku Naene, Gotena Pii Oko Lamawua
Atamakale Lo Pote Leaini Oko*

²³ Juta yamena akali andane tupamane Pita, Jone-la, liyamba peakale tepe yai-kola, akali okonelapo liyambana yame tupa ateainga peapilipia. Poto, pitisa akali kawane tupapi, ando atene akali tupapi, utupane-mane pii leaini tupa akali okonelapo-mane liyambana yame tupa lamai-yapelepi.

²⁴ Lamaiyapi-kola, liyambana yame tupa pitaka-mane ale wato, yamapane mindiki palu, Gote lo pote loto, wua leainipia. Akali Andane nimbato yuupi, atipi, ipa angini tupa, dee utupanena minditaka yalane tupa pitaka yakale leene.*

²⁵ Wamba nimbana Oli Sipitisa okomane nimbana piape akali nanimana yumbane Dapitina nembo-tene mina ika lea-kola, Dapitito wua leaipia: Anu peakale Isatale tane wandakali tupamane pii mindi lo yake puato, nanimato wua pimakale leaini piape. Utupane-mane katulo wuane peapi. Anu peakale wandakali yame waka tupamane yataka wete yainipe.*

²⁶ Yataka wato, yuu okona kinji tupa epoto, akali andane tupa towa amunguli puato, Akali Andane Gote okola, balana Mesaya okola, okonelapo minu koyoyale peaini. Wamba Dapitito wuane leaipia.

²⁷ Dapitito wamba wuane leane pua teke, enene wete nimbato Jisasa yapa lo mee-kola, bala nimbana piape akali epene wete atean tekeko, yuu okona kinji Etotepi, Juta yamena akali andane Pondiasa Pailatepi, Isatale tane tupapi, wandakali yame waka tupapi, utupane-mane bala minu koyamakale loto, tano okona epo amunguli peainipia.*

²⁸ Utupane-mane wuane peakale nembo toto, wamba nimbana tai-lene okomane nimbato pii mindi lo yake pua yata ee-kola, matili utupane-mane wuane teke peainipia.*

²⁹ Andipa akali utupane-mane nanima mo yuku oyale, kenda-pene minditupa gimakale lo pii leyai utupane Akali Andane nimbato nembo tape. Utupane-mane wuane leyai okone nembo toto teke, nimbana piape akali yame nanimato yuku naene atoto, nimbana pii oko wandakali tupa lamawua atalapale loto, nimbato nanima moyo atape.*

³⁰ Nanimo moyo atoto, nimbana kini oko wandakali siki pelene tupanga yata wato, nimbana piape akali epene wete Jisasa gene okomane wandakali utupane mo

atu yalu, metekolo piape waka mindi-pene tupa pua atape.

³¹ Wuane loto, pote lo koyo peai-kola, anda yakama amunguli pua peteaini oko ema-ema peapia. Ema-ema pea-kola, Oli Sipitisa oko wandakali utupane pitakanga epo tumbi lea-kola, utupane-mane yuku naene atoto, Gotena pii oko wandakali tupa lamawua ateainipia.

Kitisene Wandakali Tupamane Mindi Moyaka Pua Ateaini Oko

³² Jisasa lo bilipi lene wandakali pitaka yakama yamapane mindiki palu atoto, nembo-tene mindiki teke palu ateainipia. Wuane pua atoto, wandakali mindikipi mindimane balana minditaka yane tupa balana angu nembo nateaipia. Jia. Utupane pitaka-mane minditaka yaini utupane pitakanga eyama lo yatawa ateainipia.*

³³ Wuane pua ateai-kola, aposolo akali tupamane Gotena piape tailo wete puato, Akali Andane Jisasa bala malinga ika leane lo pii lamawua ateainipia. Okone ang, Goteto Jisasa lo bilipi lene wandakali pitaka ondo wete wato, wayumane moyo ateaiapia.

³⁴⁻³⁵ Moyo ateai-kola, wandakali mindi balanga minditaka mindi jia yo ateai-ang, yuu yandopi, anda yandopi, okonetaka yene wandakali mindimane balana minditaka yane tupana minditupa salimi leaipia. Salimi loto, balato muni okone moto, mo awua poto, aposolo akali tupana kene yane organe yata yai-kola, aposolo akali tupamane muni okone moto, minditupa wandakali minditaka jia yo ateaini tupa tale pua maiki peainipia. Jisasa lo bilipi lene wandakali tupa pitaka-mane wuane piki pua ateai-kola, wandakali utupanena mindikipi mindi balanga minditaka mindi jia nayaepia.*

³⁶ Okone ang, yuu Saipatasa tane Lipai yame okona akali Josepe lene mindi ateaiapia. Aposolo akali tupamane bala gene waka Banapasa leainipia. Gene Banapasa leaini okonena tene oko, wandakali tupana yamapane minu tai laya alane akali leainipia.

³⁷ Akali okonemane balana yuu mindi yane oko wandakali waka tupamane kambeakale lalu, muni moto, aposolo akali tupa, panga mayaepia.

5

Anana-yasa, Sapaita-la

¹ Okone ang, akali Anana-yasa lene mindi-la, balana wetene Sapaita-la, liyambana yuu mindi akali mindinga salimi loto, muni meapilli-pia.

* 4:24: Ek 20:11; Nia 9:6; Sam 146:6 * 4:25: Sam 2:1-2
* 4:29: Ep 6:19-20 * 4:32: Ap 2:44 * 4:34-35: Ap 2:45

* 4:27: Mt 27:1-2; Lk 23:7-11; Ap 3:13 * 4:28: Ap 2:23

² Moto, Anana-yasato muni utupane tale puato, pakisa angu awua aposolo akali tupa ateatinga pea-kola, balana wetene okomane andeaipia. Akali okonemane muni pakisa angu awua poto, muni mialo tupa pitaka geyo loto, aposolo akali tupanga mayaepia.
*

³⁻⁴ Maya-kola, Pitato bala lamawuato, Anana-yasa, wamba akali mindimane nimbana yuu oko kamba napea-kola, yuu okone nimbana ya okoni, jiape. Andipa nimbana yuu salimi loto, muni miale oko nimbana teke. Nimbato muni miale tupa tale puato, minditupa tane miale mana okone katu lapia-yale tekeko, nimbato muni pakisa angu awua epoto, muni mialo tupa pitaka geyo lele okoni. Wuane loto, nimbato yuu okona akali nanima angu owato pii langeyo nembo tele tekeko, nimbato Gote owato pii lamaele-kola teke peya. Anu peakale nimbato Satane bala nimbana ini anda-pangosa tumbi leakale lo ando kondalu, Oli Sipitisa oko owato pii okone lamaelepe. Anu peakale nimbato mana koo okone minukale nembo talepe leaipia.*

⁵ Pitato wuane lea-kola, Anana-yasato pii okone ale alu, wamba kapoyale yuunga lomba-pene yoto, omeaipia. Omea-kola, bala omala lo ale yaini wandakali tupa pitaka-mane yuku-mane omeainipia.

⁶ Anana-yasa omea-kola, iwana patane minditupa epoto, balana umbaini oko lapalapa-mane yake piyu, bala mo awua tano okona kamaka poto, mali peainipia.

⁷ Matili awa tepopi mindi pea-kola, balana akalini omea oko anda napene, Sapaita bala anda-pango kolandaka leaipia.

⁸ Kolandaka lea-kola, Pitato bala tipa puato, liyambana yuu okonena muni utupa angu miapiapipe. Nimbato namba langi leaipia. Wuane lea-kola, wanda okone-mane loto, enene, muni utupa angu miaipa leaipia.

⁹ Wuane lea-kola, Pitato bala tipa puato, anu peakale liyambato wua lapakale lo pii lo yake puato, Akali Andane okona Oli Sipitisa oko minu makande piyapipe. Iwana patane minditupa-mane nimbana akalini oko awua poto, mali piyu, epapu epo peke loto, asia lombanga atalui. Utupane-mane nimbapi awua poto, mali pulupeyai teke leaipia.

¹⁰ Pitato wuane lea-kola, okone angi teke wanda okone bala Pita ateane ongane lomba-pene yoto, omeaipia. Omea-kola, iwana patane utupane anda-pango epoto, bala oma-yene yanga andeaini-pia. Andoto, utupane-mane bala mo awua tano okonena

kamaka poto, balana akalini mali peaini ongane mandaka gulo mali peainipia.

¹¹ Wandakali okonelapo wuane piyu, omeapi-kola, sosa okona wandakali ateaini tupapi, wuane piya lene ale yaini wandakali waka tupapi, utupane pitakamane yuku andane wete yainipia.

Aposolo Akali Tupamane Metekolo Pi-ape Kambua Peaini Oko

¹² Okone angı, wandakali tupana tombe-nenga Goteto aposolo akali tupana kinina metekolo piape waka mindi-pene kambua pua ateapia. Wuane pua ate-a-kola, Jisasa lo bilipi lene wandakali pitaka yamapanne mindiki palu atoto, lotu anda andane okona anda pimia atane atene Solomonena lalaini yane ongane ole dindi lo epo amunguli pua atalainipia.*

¹³ Ongane amunguli pua ateai-kola, wandakali waka tupa yuku wato, utupanena mindikipi mindimane epoto, Jisasa lo bilipi lene wandakali utupane towa atu amunguli napeaini tekeko, utupane-mane Jisasa lo bilipi lene wandakali yakama wandakali epene wete ateyai loto, utupanena gene tupa layu leainipia.

¹⁴ Laiyu leai-kola, wandakali kambua wete-mane Akali Andane oko lo bilipi loto, balana yame ateaini okona epo tako peainipia.

¹⁵ Wandakali minditupa-mane metekolo piape kambua aposolo akali tupamane peaini tupa andoto, wua lo nembo teainipia: Pita bala epo pola-angi, nai okomane balanga tape yola-kola, balana tandini okomane wandakali siki pelene tupa kalo peando, utupane atu yolopeyai nembo teainipia. Wuane peakale nembo toto, wandakali utupane-mane Pita bala asini epo moyale peane tupana ayatenenga masatesapi, lapalapapi, utupane panda puato, wandakali siki pelene tupa awua kamaka epoto, utupanenga yata yainipia.

¹⁶ Wuane pua teke, Jutusaleme tano okona mandaka gulo tano waka tupana tane wandakali tupamane yakamana yangone siki pelenepi, sipitisa koo atenepi, utupane aposolo akali tupa ateatinga awua ipuku peainipia. Awua ipuku peai-kola, aposolo akali tupamane wandakali utupane pitaka mo atu yaka peainipia.

Juta Yame-mane Aposolo Akali Tupanga Kenda-pene Tupa Mayaini Oko

¹⁷ Aposolo akali tupamane wandakali siki peleaini tupa pitaka mo atu yaini okone andoto, pitisa akali kawane okopi, bala towa potomane lo atalaini akali Satusi yame tupapi, utupane yakama mini koo wete paleainipia.

* 5:2: Ap 4:34-35 * 5:3-4: Jo 13:1-3 * 5:12: Ap 2:43; 14:3

¹⁸ Mini koo wete paluto, utupane-mane aposolo akali tupa andi lo awua poto, wandakali koo tupa towa atu katapusa anda okona paleakale leainipia.

¹⁹ Katapusa anda okona andi lo pale leaini tekeko, utulu pango okona, Akali Andane okona enjoje mindi epoto, katapusa anda okonena asia lumbu tepa yaepia. Lumbu tepa alu, utupane atu kamaka epoto, balato pii mindi utupane lamai-yaepia. *

²⁰ Balato pii okone utupa lamawuato, yakama poto, lotu anda andane okona ende anda-pangosa kolandaka loto, wandakali tupa pitaka mana lamawuato, Gotena pii manapi, utupane pitaka lamai-yapape leaipia.

²¹ Wuane leane okone ale wato, aposolo akali tupa yakama wamba upa pitane lotu anda andane okona ende anda-pangosa kolandaka loto, pii manapi, utupane lamawuata ateainipia. Utupane-mane wuane pua ateyai nembo natene atoto, pitisa akali kawane okopi, bala towa potomane lo atalaini tupa, utupane-mane Isatale tanena ando atene akali tupa, akali kanjole tupa, utupane pitaka epo amunguli peakale leainipia. Amunguli peai-kola, utupane-mane yanda yene minditupa lamawuato, yakamato katapusa anda okona poto, aposolo akali tupa lamo atu ipulupa leainipia.

²² Wuane leai-kola, yanda yene tupame katapusa anda okona poto andeai-kola, aposolo akali tupa piti napeainipia. Piti napeainga andoto, utupane yakama peke loto, Juta yamenya akali andane tupa lamawuato,

²³ nanimato katapusa anda okona poto andalamka, yanda yene tupamane asia lomba tupa pitakana ando atalai. Asia lomba tupa pitaka duli lo wete loko peyatanne atala yala tekeko, nanimato asia lomba tupa lumboto andalamka, aposolo akali utupanena mindikipi mindi katapusa anda okona piti napiyai yala leainipia.

²⁴ Pii okone ale wato, lotu anda andane oko ando atalane akali kawane okopi, pitisa akali kawane tupa, utupane yakama nembo kambua toto, akali utupane anu puato, alu piyai yaluape leainipia.

²⁵ Wuane leai-kola, akali mindi epoto, utupane lamawuato, yakamato akali minditupa katapusa anda okona andi lo aindaka lapiai utupane lotu anda andane okona epo atoto, wandakali tupa pii mana tupa lamawuata ateyai leaipia.

²⁶ Wuane lea-kola, lotu anda andane okona ando atalane akali okopi, yanda yene tupa, utupane-mane aposolo akali utupane lamolo peaini tekeko, wuane peyai oko andoto, wandakali tupamane yataka wato, utupane ana-mane peyolaini lo yuku yai. Yuku wato, akali utupane-mane aposolo akali tupa andi lo awua puu napene, mee tenga-mane tambo lo atu epeainipia.

Aposolo Tupamane Yuku Naene, Kanjole Tupa Pii Lamai-yaini Oko

²⁷ Yanda yene tupamane aposolo akali tupa lamo atu epoto, kanjole yamenya wenonga mo ate leai-kola, pitisa akali kawane okomane wua leaipia:

²⁸ Yakamato akali Jisasa okonena gene oko loto, wandakali tupa pii manapi lamaulaini, jia wete loto, wamba nanimato keato gulo, yakama langema okoni. Nanimato wuane lo yakama langema tekeko, akali okonena tundupa oko nanimanga yakale nembo toto, yakamato pii mana wandakali tupa lamawua atapai-kola, Jutusaleme yuu okona wandakali pitakamane yakamana pii okone ale ayiake lapiai leaipia. *

²⁹ Pitisa akali kawane okomane wuane lea-kola, Pitapi, aposolo akali waka tupa, utupane-mane pii okone yano peyoto, nanimato wandakalina pii oko wato minu napene, Gotena pii oko angu wato minu atape-pene leainipia. *

³⁰ Yakamato Jisasa ita malamanda okona peyo yuka wato, ome leaini tekeko, nanimana yumbane tupana Gote okomane bala malinga ika laya yane.

³¹ Wuane piyu, balato nanimana koo tupa apokale nembo toto, Isatale tane wandakali nanimato yamapanne peke lalapale nembo teaiapia. Wuane nembo toto, Goteto Jisasa bala nanimana ando atoto, nanimana molo-peke lolane akali oko atekale leaipia. Jisasato piapae onkelapo pua atekale nembo toto, Goteto Jisasa ati kenga balana kii tikasa atekale leaipia. *

³² Goteto balana Oli Sipitisa oko balana pii wato minu atalaini wandakali tupanga maiyane. Balato Oli Sipitisa oko nanimana gea-kola, balato mangene utupane pitaka peane lo nanimato wandakali tupa lamai-yamane. Pitato wuane leaipia.

Gamalialeto Kanjole Yakama Tambo Lo Atalapape Leane Oko

³³ Pitato wuane lea-kola, kanjole yame utupane yakamato pii okone ale wato, yataka andane wete wato, aposolo akali tupa peyo ome lamakale nembo teainipia.

³⁴ Utupane-mane wuane pimakale nembo teaini tekeko, akali Patasai gene Gamaliale lene mindimane pii mindi lokale nembo toto, ika lo ateaipia. Balato Gotena loo okona mana tupa kuai lo lamawua atalane oko nembo toto, wandakali pitakamane balana gene oko laiyu lalainipia. Balato kanjole yame angu pii mindi lamauwakale nembo toto, yanda yene tupa lamawuato, yakamato aposolo akali tupa atu kamaka poto, ongane aja maliyo atalapa leaipia.

³⁵ Utupane kamaka peai-kola, Gamaliale balato akali kanjole waka tupa lamawuato, Isatale tane akali yame yakamato aposolo akali utupanenga mangene mindi pimakale nembo teyai okone wamba ini wayumane nembo talapape leaipia.

³⁶ Anu peakale nambato wuane leyope. Wamba akali Teyutasa bala tane akali andane gene yene ateyo loto, Lomo gapomane oko yanda pimawakale lea-kola, akali andete tukumindi bala towa tako pua ateaini tekeko, gapomane okomane bala peyo ome leaipia. Bala omea-kola, bala towa tako pua ateaini akali utupane pitaka yale-yale toko laka peai-kola, mangene balato pukale nembo teane okonena dini mindi lia napene, alu peaipia. *

³⁷ Wuane pua teke, matili gapomane okomane wandakali tupana gene miama epea-angi, Galili disitiki tane akali Jutasale lene mindimane Lomo gapomane oko peyo watamakale lo yanda pimawua atea-kola, wandakali minditupa bala wato ateaini tekeko, bala omeaipia. Omea-kola, wandakali balana pii wato minuto, bala towa tako pua ateaini utupane pitaka yale-yale toko laka peaipia.

³⁸⁻³⁹ Wuane pua teke, andipa akali utupana yakama tanena nembo-tene angu wato minuto, piape okone pimakale nembo toto, pua atalaini yando, utupanena piape okonena dini mindi lia napene koyolopeya. Wuane pulupeya tekeko, wamba Goteto akali utupane-mane piape okone peakale lea-kola, utupane-mane piape okone piyaini yando, yakamato katulo piape okone minu koya napulu-peyai. Tene okonena, yakamato Gote yanda pimaulaini. Yakamato akali utupanga minditaka mindi pimakale nembo teyai okone kondalu, utupane mee atekale kondalapa leaipia. Wuane lea-kola, akali kanjole utupane-mane ale wato, balana pii okone wato mineaini-pia.

⁴⁰ Utupane-mane aposolo akali tupa epeakale loto, kunju-mane peyalu, utupane lamawuato, yakamato Jisasana gene oko loto, pii manapi mindi lamaulaini. Jia wete

leinipia. Wuane lalu, utupane peakale tepa yainipia. *

⁴¹ Wuane pea-kola, aposolo akali tupamanne wua lo nembo teainipia: Nanimato Jisasana piape pimai-yamane okonena, akali kanjole tupamane nanima yala alapale nembo toto, minu peyalai. Nanimato kenda-pene okone katulo mee awua atolopeyama lo Goteto nembo tala okonemane nanimana gene tupa laiyu lala nembo teainipia. Wuane nembo toto, aposolo akali tupa yakama epele wato, akali kanjole tupa atekale tepa alu, kamaka peainipia. *

⁴² Poto, utupane-mane Gotena piape oko kondalu, mee ata naapeainipia. Jia. Ole dindi lo utupane-mane lotu anda andane okonapi, wandakalina anda tupanapi, utupanena poto, wandakali tupa mana lamawua ateanipia. Mana lamawua atoto, utupane-mane Gotena pii layene oko lamawuato, Goteto Jisasa bala Mesaya oko at aea-kola, ateanie lo lamawua ateanipia.

6

Akali Yanasa-mane Wanda Yalo Tupa Moyo Ateakale Leaini Oko

¹ Jisasa lo bilipi lene yame oko andane gulama lama peai-kola, ole dindilo Iputu pii lalaini Kitisene wandakali tupamane Iputu pii lalaini wanda yalo tupa moyoto, tomopi, waka minditakapi, utupanena minditupa maiyaini tekeko, utupane-mane Gitiki pii lalaini wanda yalo tupa kuai lo moyo naapeainipia. Wuane peainga andoto, Gitiki pii lalaini Kitisene wandakali tupamane Atamaiki pii lalaini Kitisene tupa towa yataka wato, mulu-mulu lo ateanipia. *

² Mulu-mulu lo atea-kola, aposolo akali alesa tupamane Kitisene wandakali tupa pitaka epeakale lo mo amunguli puato, utupane lamawuato, nanimato Gotena pii oko wandakali tupa lamai napene kondalu, tomopi, minditaka tupa angu wandakali tupa mawua atemando, okone kuai nalolo-peya leainipia.

³ Wuane nembo toto, amene yame, yakamato yakamana tombenenga akali gene epene yenepi, nembo-tene epene palenepi, Oli Sipitisa oko utupanenga tumbi latane atenepi, akali okonepene yanasa aiya pua mialapape. Molai-kola, akali utupane-mane piape oko ando atekale lamakale.

⁴ Utupane-mane wuane peakale lalu, ole dindi lo nanima tane loma yoto, Gotena pii oko wandakali tupa lamawua atamakale leainipia.

⁵ Wuane leai-kola, Kitisene wandakali tupa pitaka-mane pii okone ale wato,

* 5:36: Ap 21:38 * 5:40: Ap 4:18 * 5:41: Mt 5:10-12; 1Pi 4:13 * 6:1: Ap 4:34-35

epele yainipia. Epele wato, utupane-mane andeai-kola, Oli Sipitisa oko akali Sipene oko balanga tumbi latane atea-kola, balato Gote lo bilipi leyo nayu leanga andeainipia. Andoto, utupane-mane Sipene yapa lo moto, balato piape okone peakale leainipia. Wuane pua teke, utupane-mane akali Pilipi ima, Potokotasa ima, Nikano ima, Timone ima, Pamenasa ima, Nikolasa ima, akali utupane yapa lo moto, piape okone peakale leainipia. Nikolasa bala Andiyoko tano okona tane mindi atoto, wamba bala Juta yame gulalu, utupane towa lotu leaipia.

⁶ Jisasa lo bilipi lene yame okomane akali yanasa utupane yapa lo moto, aposolo akali tupana wenongatatu epeainipia. Epeakola, akali yanasa utupane-mane piape okone peakale loto, aposolo akali tupamane akali utupanena kawanenga kii yata wato, pote leainipia.

⁷ Wuane piyu, utupane-mane Gotena pii oko lo tawe yo atea-kola, Jutusaleme tane wandakali kambua wete Kitisene guleainipia. Pitisa akali kambua-mane Gotena pii oko alewa bilipi loto, wato mineaini tekepia.*

Juta Yame-mane Sipene Kosimi Leaini Oko

⁸ Goteto Sipene wayumane moyoto, taine andane maiya-kola, balato wandakali tupana tombenenga metekolo piape andane mindipene-mindipene tupa pua ateaipia.

⁹ Balato wuane pua atea-kola, akali minditupa-mane bala towa pii yanda peainipia. Akali utupane yakama Saitini tanepi, Aleke-sandiya tanepi, Silisia tanepi, Esia potopinjia tanepi, yuu utupanena tane atoto, yakama Juta yamena lotu anda mindi Tita Lo Mene Yame Tupana Lotu Anda laalaini okona lotu lo atalainipia.

¹⁰ Akali utupane-mane Sipene towa pii yanda peaini tekeko, Oli Sipitisa okomane nembo-tene epene mindi Sipenenga maiya-kola, utupane-mane pii balato leane tupa katulo ita naminape-pene guleaipia.*

¹¹ Wuane pea-kola, akali utupane-mane akali waka minditupa teng-a-mane too pua pii mindi lamawuato, yakamoto Sipene andayo owato pii mindi loto, nanimato ale aim-a-kola, Sipeneto Mosesa, Gote-la, okonelapo andayo pii koo minditupa lapi-analalapape leainipia.

¹² Akali utupane-mane wuane leaini okomane ando atene akali tupapi, loo tupana mana andene akali tupapi, wandakali waka tupapi, utupane mo yataka yai-kola, utupane-mane epoto, Sipene minu

awua Juta yamena kanjole tupa peteaina ga peainipia.

¹³⁻¹⁴ Peai-kola, Sipene andayo owato pii minditupa lamai-yakale leaini akali tupa-mane wua leainipia: Nanimato ale aim-a-kola, akali Sipene okomane loto, Nasatesa tane Jisasa okomane Gotena lotu anda andane oko lai loto, mana Mosesato yata wato, nanim geane tupa mo lawa pulupeya lapi-an. Ole dindi lo balato wuane loto, Gotena lotu anda andane okopi, balana loo tupapi, utupane ando pii koo lalane leainipia.

¹⁵ Wuane leai-kola, Sipene okona lee-ingapi enjole mindina lee-inga gulea-kola, kanjole yame akali peteaini tupa pitakanane bala andapeyo ateaini-pia.

7

Sipeneto Pii Leane Oko

¹ Okone ang, pitisa akali kawane okomane Sipene tipa puato, akali utupane-mane nimba andayo pii leyai okone enene leyaipe leaipia.

² Wuane lea-kola, Sipeneto balana pii okone yano peyoto, amene yamepi, ayiane yamepi, yakamoto ale alapape leaipia. Wamba nanimana yumbane Apatakame bala Atane tano okona puu napene, Mesopotemia yuu okona ateane-angi, Gote tai-lene wete oko balanga epeaipia.*

³ Epoto, balato Apatakame lamawuato, nimbato nimbanaya yamepi, yuupi, utupane tepa alu, yuu mindi nambato nimba andawa lokale okona pola leaipia.

⁴ Goteto wuane lea-kola, Apatakame balana yuu tene Kalatiya lene oko tepa alu, Atane tano okona poto ateaipia. Atea-kola, matili balana ayiane oko omeane-angi, Goteto Apatakame bala yuu yakama andipa ateyai okona epeakale leaipia.*

⁵ Apatakame bala yuu okonena wamba bulupane epeane-angi, Goteto bala yuu ajako kee mindiki atolanepi mindi mai na-peaipia. Okone ang, Apatakame bala andopane mindi mandi napene, mee ateane tekeko, Goteto potomisa pii mindi bala lamawuato, matili Apatakamepi, balana mandiyene tupapi, utupane yuu okonena ateakale loto, yuu okone utupanena yakale mauwakale leaipia.*

⁶ Wuane lalu, Goteto Apatakame lamawuato, nimbanaya mandiyene tupa wandakali opene gulo atoto, wandakali yame waka mindina yuu okona atolopeyai leaipia. Atolai-kola, wandakali yame waka utupane-mane nimbanaya mandiyene tupa minu koyoto, katapusa piape pingeakale

* 6:7: Ap 2:41; 16:5 * 6:10: Lk 21:14-15 * 7:2: Jen 11:31; 12:1 * 7:4: Jen 11:31-12:5 * 7:5: Jen 12:7; 15:18;
17:8 * 7:6: Jen 15:13-14; Ek 12:40

lolopeyai. Katapusa piape pua atolai-kola, mali andete tukumindi polopeya. *

⁷ Pola-kola, nambato yuu okona anduane tupa kosimi loto, utupanenga kenda-pene andane minditupa malu-peyawa. Maluwa-kola, nimbana mandiyene tupamane yuu waka okone tepa alu, yuu okona epo atoto, namba lotu lo atolopeyai leaipia. *

⁸ Wuane lalu, matili Goteto Apatakame lamawuato, nambato pii mindi yakama towa lo puta pua yatawa leyo oko yakamato wato minuto, iwanaja tupana yala-pene umbaini oko katu apia-maiyapape leaipia. Wuane lea-kola, matili Apatakameto Aisake mandu yatawa petea-kola, ole kitupasa penenga, Apatakameto Gotena pii okone wato minuto, Aisakena yala-pene umbaini oko katu apia-maiyaepia. Wuane pua teke, matili Aisaketo Jekopo manduto, balana yala-pene umbaini oko katu apia-maiyaepia. Dee, Jekopoto nanimana yumbane alesa tupa manduto, wuane teke peapipia. *

⁹ Nanimana yumbane utupane-mané yakamana amene Josepe oko towa apiangu puato, balato yole mia napene, akali waka tupana piape mee pua atapowa ateakale nembo teainipia. Utupane-mané wuane nembo toto, Isipi tane minditupa-mané bala kambo awua peakale leaini tekeko, Gote bala Josepe towa atu ateapipia. *

¹⁰ Josepe bala Isipi yuu okonena ateane-angi, kenda-pene kambua balanga epeakola, Goteto bala moyo atoto, balana kendapene utupane pitaka mee gulaya yaepia. Goteto Josepe bala mana andene akali gulaya ya-kola, Isipi tane kinji Peto balato pii Josepeto leane tupa ale wato, bala towa epelewa ateapipia. Bala towa epelewa atoto, kinji okonemane Josepe bala Isipi yuu okona gapomane akali andane atoto, balana andapi, minditaka yane tupa pitaka ando ateakale leaipia. *

¹¹ Josepe bala Isipi yuu okone ando ateane-angi, Isipi yuu okola, Kenane yuu okola, yuu okone-lapona ulia nono andane wete mindi ya-kola, nanimana yumbane tupanga tomo nolane mindi nayaepia. *

¹² Kenane yuu okona tomo mindi nayan tekeko, Isipi yuu okona tomo eya lene ale wato, Jekopoto nanimana yumbane tupamane bulupane gulo tomo kambolo peakale leaipia.

¹³ Matili utupane ole lapone gulo tomo kambolo peai-kola, Josepeto balana amene utupane lamawuato, namba Josepe leaipia.

Wuane lea-kola, kinji Peto okomane akali utupane Josepe yame ateya lo andeaipia. *

¹⁴ Andea-kola, Josepeto wai loto, balana ayiane Jekopo okopi, bala ayanena yame wandakali paiyasa yanasa yau tupa pitaka epeakale leaipia. *

¹⁵ Epeakale lea-kola, Jekopopi, balana yame ateaini tupapi, utupane pitaka Isipi yuu okona poto ateainipia. Yuu okonena atoto, matili Jekopo bala omeaipia. Matili nanimana yumbane waka tupapi omaka peainipia. *

¹⁶ Akali utupane Isipi yuu okona atoto, omaka peai-kola, utupanena yame wandakali tupamane akali omene utupane Sekeme yuu okona awua poto, mali piki peainipia. Wamba Apatakame bala Sekeme yuu okonena peane-angi, balato muni minditupa akali Emo iwanane tupanga mawuato, wandakali mali pulane yuu okone kambeapipia. *

¹⁷ Wamba Goteto Apatakame towa potomisa pii leane okone enene guloyale peangi, Isatale tane wandakali Isipi yuu okona ateaini utupane yame andane wete mindi guleapipia. *

¹⁸ Yame andane wete mindi gulea-kola, matili akali waka mindi bala Isipi yuu okonena kinji guleapipia. Kinji okonemane wamba Josepe balato Isipi yuu oko moyo piape peane nembo nateapipia.

¹⁹ Kinji okonemane Josepe nembo natene atoto, nanimana yumbane tupa minakasa wato, utupanena andopane kambolo tupa omeakale nembo toto, mandu apialapape leaipia. *

²⁰ Kinji okonemane wuane lea wete, wanda mindimane Mosesa mandea-kola, Goteto Mosesa bala iwana epene wete mindi ateanga andeaipia. Andea-kola, Mosesana Ayiane angini-lamane bala liyambana andaka yatawa peteapi-kola, ana tepo peaipia. *

²¹ Ana tepo penenga, matili okonelapome Mosesa kamaka yata yapi-kola, kinji Peto wanane okomane bala moto, balana andopane gulo mondo peaipia. *

²² Mondo pea-kola, Isipi tane tupamane mana yakamanga yane tupa pitaka Mosesa lamai-yainipia. Lamai-yaikola, Mosesato mana utupane pitaka moto, bala akali tai-lene mindi atoto, pii leyos nayu loto, piape tailo pua ateapipia.

²³ Matili bala mali paiyasa tukumindi penenga, balato balana amene Isatale tane

* **7:7:** Ek 3:12 * **7:8:** Jen 17:9-14; 21:4 * **7:9:** Jen 28:1-3; 37:11; 39:1-3,21-23 * **7:10:** Jen 41:37-44 * **7:11:** Jen 41:54; 42:1-2 * **7:13:** Jen 45:1-4,16 * **7:14:** Jen 45:9-11; 46:27 * **7:15:** Jen 46:1-7; 49:33 * **7:16:** Jen 23:2-20; 33:19; Jas 24:32 * **7:17:** Ek 1:7 * **7:19:** Ek 1:11-22 * **7:20:** Ek 2:2 * **7:21:** Ek 2:3-10

wandakali tupa andolo pokale nembo toto, utupane andolo peaiapia.

²⁴ Poto andea-kola, Isipi tane mindimane Isatale tane akali mindi minu koyanga andeaipia. Andoto, Mosesato Isatale tane akali okone moyoto, Isipi tane okonemane mana koo mineane okone paini yano peyoto, bala peyo ome leaipia.*

²⁵ Okone angii, Mosesato wua lo nembo teaiapia: Isatale tane tupamane andolakola, nambato piapi puluwa okomane, Goteto balana Isatale tane wandakali tupa moyolo-peya oko andolopeyai nembo teane tekeko, utupane-mane wuane lo anda na-peainipia.

²⁶ Anate-lene Mosesato Isatale tane wandakali tupa dee lapone andolo poto, lapo akali peya-peya pua ateapinga andeaipia. Andoto, balato akali okone-lapona yamapanne mo tambo lokale nembo toto, liyamba amene lapo-lapo yako. Anu peakale liyambato mindi akali minu koyaka pua ateyapipe leaipia.

²⁷ Wuane lea-kola, akali balana amene minu koyo ateane okomane Mosesata minu pende loto, apito nimba nalipana ando atene akali ata lapia-kola, nimbato nali-pana jasa gulo atelepe leaipia.

²⁸ Tuni nimbato Isipi tane akali mindi peyo ome lapi. Wuane pua teke, andipa namba peyo ome lokale nembo telepe leaipia.

²⁹ Wuane lea-kola, Mosesato pii okone ale wato, bala palaka poto, Mitiyane yuu okona ateaiapia. Yuu okonena atoto, balato wanda mindi kee loto, iwana lapo mandeaipia.*

³⁰ Mali paiyasa tukumindi pea-kola, Mosesata bala ati Sainai ongane mandaka gulo wandakali napalene yuu mindina peaiapia. Poto andea-kola, ita anjako ani atata-pene mindina ita lungu teaipia. Tea-kola, ita lungu teane okonena tombenenga enjole mindi ateanga andeaipia.*

³¹ Ita lungu teane okone andoto, Mosesato nembo kambua toto, anu peyape lo wayumeane andoyale, mandaka peaiapia. Mandaka pea-kola, Akali Andane okomane bala lamawuato,

³² namba Apatakamepi, Aisakepi, Jekopopi, nimbana yumbane utupanena Gote oko ateyo leaipia. Wuane lea-kola, Mosesata bala putiti peyoto, anu peyape lo andoyale yuku yaepia.

³³ Yuku ya-kola, Akali Andane okomane bala lamawuato, yuu nimba atele okone yuu nambana leaipia. Nimbana kenenga sukee pele okonelapo yoko yata.

³⁴ Nimbato andauwa-kola, Isipi tane tupamane nambana wandakali Isipi yuu

okona atalaini tupa minu koyaka pua atapiai. Isipi tane tupamane wuane pua atapiai-kola, nambana wandakali tupamane tandaka no ai lo atapiai okone nambato ale awua. Ale wato, nambato utupane molo-peke lokale loto, yuu okona ipuwa. Epoto, andipa nambato nimba Isipi yuu okona puu lokale. Nimbato nambana wandakali utupane moyolo pola ipu. Akali Andane okomane wuane leane lo Sipeneto leaipia.

³⁵ Wuane lalu, Sipeneto pii minditupa tako pua Isatale tanena akali kawane tupa lamawuato, wamba Isatale tane wandakali tupamane Mosesata balato nanima ando ata napeakale nembo teaini leaipia. Wuane nembo toto, utupane-mane Mosesata tipa puato, apito nimba nanimana jasa gulola lapiapi. Apito nimba makimi loto, nimbato nanima ando atape lapiape leainipia. Utupane-mane wuane leaini tekeko, matili Goteto Mosesata bala teke wandakali utupanena ando atene akali gulaya wato, balato utupane molo-peke leakale leaipia. Ita anjako lungu teane okonena tombenenga enjole ateane okomane Gotena pii okone Mosesata lamaiyu, bala Isipi yuu okona peakale leaipia.

³⁶ Peakale lea-kola, Mosesata bala Isipi yuu okona pulu, Isatale tane wandakali utupane towa atu Isipi yuu oko teta alu, peaiapia. Poto, ipa solewata Letesi lene oko kalo piyu, wandakali napalene yuu okona mali paiyasa tukumindi epoko pua ateainipia. Utupane-mane wuane pua ateaini-angi, balato metekolo piapi mindipene-mindipene tupa piki pua ateaiapia.*

³⁷ Akali Mosesata mindiki okonemane teke Isatale tane wandakali tupa lamawuato, matili Goteto yakamana yame okona akali mindi bala potopesa akali namba ateyo okopene teke gulo atekale lolopeya leaipia.

³⁸ Matili nanima Isatale tanena yumbane tupa wandakali napalene yuu okona pulu, amunguli pua ateaini-angi, akali Mosesata mindiki okone teke utupane towa atu ateainipia. Atalu, bala ati Sainai okona peakaiyu lea-kola, Akali Andane okona enjole okomane Gotena pii oko bala lamaiya-yaepia. Lamaiya-kola, Mosesato Gotena pii saka atene oko nanima guyale meaipia.*

³⁹ Mosesato wuane peane tekeko, nanimana yumbane tupamane pii Mosesato leane tupa wato mina-makale nembo nateainipia. Jia. Utupane-mane balana pii tanga lalu, Isipi yuu okona peke laima lakae lo nembo teainipia.

* 7:24: Ek 2:11-15 * 7:29: Ek 2:21-22; 18:3-4 * 7:30: Ek 3:1-4 * 7:36: Ek 7:3; 14:21; Nam 14:33 * 7:38: Ek

⁴⁰ Wuane nembo toto, utupane-mane Etone lamawuato, nanima atu Isipi yuu oko tepa alu epeane akali Mosesa balanga aki pipiape lo nanimato nembo nateyama. Tene okonena, gote minditupa-mane ingane poto, nanimana asini andawa leakalenga, nimbato nanimana gote tupa waa puato gii leainipia.*

⁴¹ Wuane lalu, utupane-mane bulumako andopane gulene mindi waa puato, yakama tanena kini-mane waa peaini owato gote okone epelewa laiyu loto, opa mawua ateainipia.*

⁴² Utupane-mane nai okopi, ana okopi, kaiyanda tupapi, ati kenga atalane okonetaka tupa lotu lo ateai-kola, Goteto utupane masia mawuato, utupane-mane wuane pua ateakale lo ando konda yaepia. Wandakali utupane-mane wuane pua ateaini loto, wamba potopesa akali tupamane pepa peleaini okomane wua layene eya: Wamba Isatale tane wandakali yakamoto wandakali napalene yuu okona ee ana paiyasa tukumindi epoko pua ateangi, yakamoto bulumakaopi, sиписипи, utupane peyoto, opa mawua ateaini tekeko, yakamoto opa utupane namba gii napeai. Jia wete.*

⁴³ Dee, sele anda andane yakamoto awua epoko pua atalaini okone nambana jia. Sele anda okone owato gote Moleke lene oko balana sele anda guleya. Dee, yakamoto owato gote Lepane lene okona kaiyanda oko makande pua pikisa mindi waa puato, awua epoko pua atalaini. Yakamoto owato gote okonelapo lotu lamakale loto, okone-lapona pikisa okolapo waa peai. Yakamoto wuane peai okonena, nambato yakama Bapilone tano okona amo yangi atalapale loto, yakamana yuu tene oko tepa alu pulupa lo wato apokale. Goteto wuane leya loto, wamba potopesa akali tupamane wuane lo pepa peleaini-pia.

⁴⁴ Nanimana yumbane tupa wandakali napalene yuu okona ateaini-angi, Goteto Mosesa lamawuato, nimbato nambana sele anda oko wua pua pipe lo lamai-yaepia. Lamaiya-kola, Mosesato nanimana yumbane tupa lamawuato, yakamoto Gotena sele anda oko wua pua piyapape leaipia. Wuane lea-kola, nanimana yumbane tupamane Mosesana pii okone wato minuto, Gotena sele anda okone peainipia. Nanimana yumbane tupamane Gotena sele anda awua epoko pua ateaini okomane, Gote bala tane utupane towa atu epoko pua ateyama lo andawa leaipia.

⁴⁵ Matili nanimana yumbane tupana andopane tupamane sele anda okone yaka-

mana Ayiane tupanga mialu, awua epoto, Jasua towa atu wandakali yame waka tupana yuu okona epeainipia. Epeai-kola, Goteto yuu okonena anduane minditupa peyo wato apiaka pea-kola, utupane-mane yuu okone miama teke poto, sele anda okone awua epoto, Kenane yuu okona ate leainipia. Ate leai-kola, matili Dapiti bala yuu okonena kinji atea-angi, Gotena sele anda okone yuu okonena ateaiapia.*

⁴⁶ Goteto Dapiti epele ya-kola, Dapitito balana yumbane Jekopo yamena Gote okona lotu anda mindi pimawakale lo pote leaipia.*

⁴⁷ Dapitito wuane pukale lo pote leane tekeko, Goteto jia lea-kola, matili Solomon-eto Gotena lotu anda okone pima-yaepia.*

⁴⁸ Balato Gotena lotu anda okone pima-yane tekeko, Gote kenga wetete oko bala wandakali kini-mane pene anda ateya tupana at napiyane. Goteto anda mindina ata napiyane nembo toto, wamba potopesa akali mindimane Akali Andane okona pii mindi pepa peleaiapia.

⁴⁹⁻⁵⁰ Pii okonemane leane oko loto, ati kenga oko nambato pitaka taka ando pitiyawane toko gulo eya-kola, yuu oko pitaka nambana kene yata alawane toko gulo eya leaipia. Nambato minditaka eya tupa pitaka nambana yakale lewa. Tene okonena, yuunga wandakali tupa yakamoto katulo nambana anda anupene mindi pingulu-peyaipe. Yakamoto nambana oto mo atolane anda aninga pulu-peyaipe. Gotena pii pepa pelene eya mindimane wuane leya. Sipeneto wuane leaipia.

⁵¹ Wuane lalu, balato pii minditupa tako pua Juta yamena kanjole tupa lamawuato, aitene wandakali tupamane Gotena pii ale wato teke, tanga loto, nembo-tene koo palyaini pua, yakamatopi tuu puato, Gotena pii oko ale wato teke, wato mina na-piyaini leaipia. Wamba yakamana yumbane tupamane Oli Sipitisa okona pii tangalo ateaini pua, andipa yakamatopi wuane pua teke ateyai.*

⁵²⁻⁵³ Wamba yakamana yumbane tupamane kenda-pene andane tupa potopesa akali tupa pitakanga maiki peainipia. Potopesa akali utupanena minditupa-mane loto, matili akali tika-pene wete mindi epolopeya leaini tekeko, yakamana yumbane tupamane potopesa akali utupane peyo ome leainipia. Gotena enjole tupamane balana loo tupa Juta yame wandakali yakama geaini tekeko, yakamoto Gotena loo utupane wato mina na-piyaini.

* ^{7:40:} Ek 32:1 * ^{7:41:} Ek 32:2-6 * ^{7:42:} Emo 5:25-27
6:1-38 * ^{7:51:} Ais 63:10

* ^{7:45:} Jas 3:14-17 * ^{7:46:} 2Sa 7:1-16 * ^{7:47:} 1Ki

Jia. Wamba potopesa akali tupamane akali tika-pene wete mindi epolopeya leaini okone bala epo atea-kola, yakamoto Gotena loo utupane wato mina napene atoto, bala ene pituto, peyo ome leai. Sipeneto wuane leaipia. *

Sipene Ana-mane Peyo Ome Leaini Oko

⁵⁴ Sipeneto pii leane okone ale wato, Juta yamena kanjole tupamane bala towa yataka wete wato, yakamana nene gitigete leainipia.

⁵⁵ Utupane-mane wuane peaini tekeko, Oli Sipitisa oko Sipene balanga tumbi lea-kola, balato ati kenga andaiyu loto andea-kola, Gotena tii-pene okola, Jisasa bala Gotena kii tikasa ateane okola, okonelapo andeaipia. *

⁵⁶ Andoto, Sipeneto Juta yamena kanjole tupa lamawuato, ale alapape. Ati kenga okona asia lumba-yene eya-kola, nambato Akalina Iwanane oko Gotena kii tikasa ateyanga andeyo leaipia. *

⁵⁷ Wuane lea-kola, utupane-mane balana pii okone ale aa napimakale nembo toto, yakamana alene asia tuma puato, pii taimane wete leainipia. Wuane lalu, yakama pitaka nembo mindiki paliyu, taimane poto, Sipene miniaini-pia.

⁵⁸ Minuto, utupane-mane bala tano okona kamaka wato kamaka leainipia. Wuane piyu, Sipene kosimi leaini akali utupane-mane yakamana tonu luu peaini tupa yokoto, iwana patane gene Solo lene mindina kene yane ongane yata alu, Sipene ana-mane peleaini-pia.

⁵⁹ Peleai-kola, balato pote loto, Akali Andane Jisasa, nimbato nambana tandini oko miapse leaipia.

⁶⁰ Wuane lalu, bala aiki leka wato, pii taimane loto, Akali Andane, nimbato akali utupa-mane koo peyai okona yano peyamai napipe leaipia. Wuane lalu, bala omeaipia. *

8

Soloto Sosa Tupa Minu Koyo Ateane Oko

¹⁻³ Akali utupane-mane Sipene peyo ome leai-angi, Soloto utupanena mana okone katu ya lo nembo teaipia. Sipene omeakola, Gotena mana epene tupa kuai lo wato minu atalaini akali minditupa-mane bala mo awua poto, mali peainipia. Mali piyu, utupane-mane bala nembo toto, ai andane leainipia. Sipene ana-mane peyo ome leaini okone anggi atoto tewa, Soloto kendapene andane tupa sosa okona wandakali peteaini tupa maiki pua ateaiapia. Balato Kitisene wandakali mindiki-mindikina

anda tupana kolandaka laka puato, Kitisene wandapi, akalipi, utupane minu kilau lo awua poto, katapusa anda okona andaka laka peapipa. Solopi, akali waka minditupapi, utupane-mane kenda-pene andane tupa Jutusaleme sosa okona Kitisene wandakali peteaini tupa maiki pua ateai-kola, Jutusaleme sosa okona wandakali peteaini tupa pitaka palaka puu toko loto, Jutiya, Samatiya-la, disitiki okone-lapona yuu waka-waka yane tupana puku peainipia. Aposolo akali tupa yakama angu puu toko nalene, Jutusaleme tano okona ateainipia. *

Gotena Pii Layene Epene Oko Samatiya Tane Tupa Lamai-yaini Oko

⁴ Kitisene wandakali palaka puku peaini utupane yakama yuu waka peaini tupana atoto, Gotena pii oko lamawua ateainipia.

⁵ Pilipi bala Jutusaleme tepa alu, Samatiya disitiki okona tano mindina poto, Kataisato wua peane loto, Samatiya yame tupa lamawua ateaiapia.

⁶⁻⁷ Pilipito piape okone pua atoto, wandakali kambua tupanga sipitisa koo atene tupa peyo watea-kola, sipitisa koo utupane-manealo taimane lalu, wandakali utupane tepa alu, puku peainipia. Balato wandakali kusukupi, kee koopi, siki okonepene kambua tupa mo atu yaka pua ateaiapia. Pilipito metekolo piape utupane pua ateane okone andoto, wandakali kambua-mane nembo mindiki paluto, pii balato lamaiyane tupa wayumane ale amawua ateainipia.

⁸ Pii balato leane tupa ale wato, tano okonena wandakali tupamane epele andane yainipia.

Saimoneto Mana Koo Mindi Mineane Oko

⁹ Tano okonena, akali Saimone lene mindi ateaiapia. Balato bala tanena gene oko laiyu loto, namba akali gene yene ateyo lo atalaepia. Wuane loto, balato kamo piki, posini piki pua ateakola, Samatiya yame wandakali tupamane andoto, moko loto, nembo kambua talainipia.

¹⁰⁻¹¹ Ole kambuangga Saimoneto posini piki pea-kola, wandakali gene yenepi, nayenepi, utupane pitaka-mane moko loto, balana pii oko wayumane ale amawua atoto, Gotena tai-lene andane balanga yene lalainipia.

¹² Utupane-mane wuane leaini tekeko, Pilipito Jisasa Kataisana gene oko laiyu loto, Goteto pitaka ando atalane lea-kola, wandapi, akalipi, lapotaka-mane pii Pilipito leane okone ale wato, bilipi loto, ipa meanipia.

¹³ Okone anggi Saimone balapi Jisasa lo bilipi loto, ipa mialu, Pilipi towa atu epoko

peaipia. Pilipito metekolo piape andane mindipene-mindipene tupa pea-kola, Saimoneto utupane andoto, moko loto, nembo kambua teapia.

¹⁴ Okone ang, wandakali mindi Jutusaleme tano okona poto, Samatiya yame tupamane Gotena pii oko ale wato, bilipi leyai lea-kola, aposolo akali Jutusaleme ateaini tupamane ale yainipia. Ale wato, utupane-mane Pita, Jone-la, okonelapo yuu okonena peakale leainipia.

¹⁵⁻¹⁶ Peakale leai-kola, akali okonelapo Samatiya yuu okona peapeleopia. Wamba Pilipito Akali Andane Jisasana gene loto, Samatiya wandakali utupane ipa mia-maiyane tekeko, Oli Sipitisa oko wandakali utupanenga na-epeaipia. Tene okonena, Pita, Jone-lamane Gote nimbana Oli Sipitisa oko Samatiya wandakali utupanenga mai lo pote leapilipia.

¹⁷ Pote lalu, utupanena kawanenga kini yata yapi-kola, Oli Sipitisa oko utupanenga epeaipia.*

¹⁸⁻¹⁹ Aposolo akali okonelapo-mane wandakali utupanena kawanenga kii yata yapi-kola, Oli Sipitisa oko utupanenga epeane okone andoto, Saimoneto okonelapo lamawuato, nambatopi wandakali mindina kawanenga kini yata olowa-kola, Oli Sipitisa oko wandakali okonenga epeakale nembo teyo-ko. Tailene okone namba geapindo, nambato muni minditupa liyamba gukalenga, liyambato tai-lene okone namba giyapa leaipia.

²⁰ Saimoneto wuane leane tekeko, Pitatoto bala lamawuato, Goteto minditaka mee giyane okone nimbato muni-mane kam-bokale nembo tele okonena, nimbana muni okone nimbata towu yuu koo okona peakale leaipia.

²¹ Gotena wenonga nimbana yamapane oko tika napene atele. Tene okonena, Gotena piape nanimato peyama oko nim-bato katulo napulupele. Jia wete.

²²⁻²³ Nambato andeyo-kola, Goteto minditaka mee giyane okone nimbato miauwa lakae lo nembo tele okonemane matasini koo mindi guloto, nimbana nembo-tene oko minu koyoto, nimba mana koo tupana anda-pangosa andi latane atalene ya lo andeyo-ko. Nimba mini peke loto, nimbana mana koo okone masia maipe. Maiyu, nimbato koo piwa lakae lo nembo tele okona tene koo oko Akali Andane okomane apia-geakale lo pote lape leaipia.

²⁴ Wuane lea-kola, Saimoneto balana pii okone yano peyoto, kenda-pene minditupa nambanga epolopeya leyapi utupanena mindikipi mindi nambanga na-epeakalenga, liyambato namba moyo,

Akali Andane oko ando pote lalapape leaipia.

²⁵ Pita, Jone-la, okonelapo-mane mangene Akali Andane Jisasato peane tupapi, pii balato leane tupapi, utupane wandakali tupa lamai-yapilipia. Lamaiyu, matili liyamba Jutusaleme peke loyale peapilangi, okonelapo-mane Samatiya yame utupana tano ajako kambua yane tupanepoto, pii layene epene oko wandakali tupa lamaima teke peapilipia.

Pilipito Itiyopia Tane Akali Mindinga Gotena Pii Lamaiyane Oko

²⁶ Jutusaleme atoto, Gasa tano okona puu nena lolane asini palaini okonena wandakali napalene yuu mindi yaepia. Akali Andane okona enjole mindimane Pilipi lamawuato, nimba ika lalu, asini okonena puu nena lape leaipia.

²⁷ Wuane lea-kola, Pilipi bala ika lalu, asini okonena puu nena loto, Itiyopia tane gapomane akali andane mindi asini peanga andeaipia. Itiyopia tane akali okone bala wangali tolo apene mindi atoto, Itiyopia tane kuwini wanda Kandesilene okona munipi, okonetaka tupa ando ata-maiyaepla. Wamba bala Jutusaleme poto, lotu leaipia.

²⁸ Lotu lalu, bala Jutusaleme atalu, Itiyopia yuu okona peke loyale asini peapipia. Akali okonemane balana katesa okona pitiyu poto, pii wamba potopesa akali Aisayato pepa peleane mindi dii lama peapipia.

²⁹ Pepa okone dii lama pea-kola, Oli Sipitisa okomane Pilipi lamawuato, nimba katesa peya ongane mandaka puu leaipia.

³⁰ Wuane lea-kola, Pilipi bala katesa peane okonena taimane watama poto, ale ya-kola, Itiyopia tane akali okonemane pii wamba potopesa akali Aisayato pepa peleane okone dii leane oko ale yaepia. Ale wato, balato akali okone tipa puato, nimbato pii dii lele okonena tene oko nembo telepe leaipia.

³¹ Wuane lea-kola, Itiyopia tane akali okonemane balana pii okone yano peyoto, akali mindimane pii okona tene oko namba langi napeando, nambato anu puato, nembo tokalepe leaipia. Wuane lalu, balato Pilipi lamawuato, nimba namba towu atu katesa okona pitiyu bakale, peakaiyu laa leaipia.

³² Pepa balato dii leane okonemane loto, wandakali mindimane sipisipi mindi peyoyale atu peya-kola, sipisipi okone tai nalene, mee tambo lo palane leaipia. Wuane pua teke, akali minditupa-mane akali mindi peyoyale atu peai-kola, bala tai nalene, mee tambo lo atu peapipia. Akali mindimane sipisipi andopane mindina itini

9

kateya-kola, nja na-lalane pua teke, akali okonemane pii mindi naleaipia *

³³ Wandakali-mane bala akali gene nayene gulaya wato, balana kote oko tika pua lamai napeainipia. Jia. Utupane-mane bala peyo ome leainipia. Balato andopane mindi mandi napea-kola, mindimane balana mandiyene yame oko-tuma ateyai loto, temane laa napulu-peya. Wuane loto, Itiyopia tane okonemane pii wamba Aisayato pepa peleane okone dii lama peaipia.

³⁴ Pepa okone dii lokoyo piyu, Itiyopia tane akali okonemane Pilipi tipa puato, potopesa akali okonemane pii leane okone api andayo leape leaipia. Bala tane andayo leape. Pee, akali waka mindi andayo leape leaipia.

³⁵ Wuane lea-kola, Pilipito pii Itiyopia tane akali okonemane wamba ini bulupane pepa dii leane okonena tene tupa bala lamaiyu, Jisasato piape wua peane lo pii waka minditupa tako pua bala lamaiyaepia.

³⁶ Lamaiyu, akali okonelapo katesa okona pitiyu, asini poto, ipa angini mindina matenenga peakaiyu leapilipia. Peakaiyu leapikola, Itiyopia tane akali okomane Pilipi lamawuato, ipa peteya oko anda. Namba ipa mokale. Minditaka mindimane nambana asia pai leyape, naleyape lo tipa peaipia. *

³⁷ [Tipa pea-kola, Pilipito balana pii okone yano peyoto, nimbato Jisasa lo bilipi leendo, nimba ipa miap-e-pene guleya leaipia. Wuane lea-kola, akali okonemane Pilipi lamawuato, nambato Jisasa Kataisa bala Gotena iwanane oko lo bilipi leyo leaipia].

³⁸ Wuane lalu, akali okonemane balana katesa okone organe yakale lalu, ipa angini peteane okonena puu nena lea-kola, Pilipito bala ipa peya-mayaepia.

³⁹ Ipa peya-maiyu, liyamba ipa oko tepa alu matenenga epeapi-kola, Akali Andane okona Sipitisa okomane Pilipi kapoyale mo awua peaipia. Mo awua pea-kola, Itiyopia tane okone bala epele wato, asini wamba bala moyale peane okonena pulu, Pilipi lapone anda napeaipia.

⁴⁰ Oli Sipitisa okomane Pilipi bala Asatote tano okona mo awua pea-kola, Pilipito tano okonena epolo ya lo andeaipia. Andalu, bala Sisatiya tano okona moyale asini poto, tano waka asininga yane tupa pitakana poto, Gotena pii layene epene oko lamaima pulu, matili bala Sisatiya tano okona peakaiyu leaipia. *

Solo Bala Yamapane Peke Leane Oko

¹ Soloto Akali Andane lo bilipi lene wandakali tupa minu koyoto, peyo ome lokale loto, pitisa akali kawane oko ateanga peaipia. *

² Poto, balato pitisa akali kawane oko lamawuato, Jisasana pii manapi, wato minu atalaini wandakali minditupa Damasakasa tano okona atolaini leaipia. Nambato andolo pokale. Poto andolowakola, minditupa ateaindo, nambato utupane andi lo awua Jutusaleme epokale. Damasakasa tane Juta yamena lotu anda tuvana akali kawane ateyai tupamane namba moyakale lo nimbato pepa minditupa peyo gii leaipia.

³ Wuane lea-kola, Pitisa akali kawane okonemane pepa utupane peyo Solo mayaepia. Maya-kola, Solo bala Jutusaleme tepa alu, Damasakasa tano okona mandaka asini peane-angi, ati kenga ato tii-pene mindi kapoyale epoto, balanga tii pikoyo peaipia.

⁴ Tii pikoyo pea-kola, Solo bala yuunga lomba-pene yoto, ale ya-kola, pii mindi leane okomane loto, Solo, Solo, anu peakale nimbato kenda-pene andane tupa namba giki pilinipe leaipia.

⁵ Wuane lea-kola, Soloto Akali Andane, nimba apipe lo tipa peaipia. Tipa pea-kola, pii leane okonemane loto, namba Jisasa, akali nimbato kenda-pene andane tupa giki pilini oko.

⁶ Wamba nimbato wuane pua atalene tekeko, andipa nimba ika lalu, Damasakasa tano okona puu. Pole-kola, nimbato wua pipe loto, akali mindimane nimba langulu-peya leaipia.

⁷ Jisasato wuane lea-kola, Solo towa atu asini peaini akali tupamane Jisasa anda na-peaini tekeko, pii balato leane okone ale wato, utupane-mane moko loto, pii mindi katulo naleainipia.

⁸ Solo bala lee toto, ika leane tekeko, balana lene undupi latane atea-kola, balato minditaka tupa katulo anda napipe-pene gulea-kola, akali utupane-mane bala kii minu atu aiyu, Damasakasa tano okona peainipia.

⁹ Pulu, ole tepoai Solo balana lene undupi latane atea-kola, bala ulia ipapi, naa na-peaipia.

¹⁰ Okone angi, Jisasa bilipi lo atalane akali Anana-yasa lene mindi tano okonena ateaipia. Balato kombeya pene gulo ale ya-kola, Akali Andane okomane Anana-yasa-oo lo ee leaipia. Wuane lea-kola,

* 8:36: Ap 10:47 * 8:40: Ap 21:8 * 9:1: Ap 8:1-3

Anana-yasato kombeya-mane lene gulo yaa, namba ateyo oko leaipia.

¹¹⁻¹² Wuane lea-kola, Akali Andane okomane bala lamawuato, Tasasa tano okona tane akali Solo lene oko bala Jutasana andaka peteya. Balato kombeya pene gulo andala-kola, akali Anana-yasa lene mindimane anda okona kolandaka loto, Solona lene oko mo atu yokale nembo toto, balana kii oko Solona lene okona yata ala. Andipa Solo bala pote lo peteya. Balato nimba andala-ko. Nimba ika lalu, asini tika-pene lalaini oko wato minuto, Jutasana andaka poto, Solo bala peteyape lo tipa pipe leaipia.

¹³ Wuane lea-kola, Anana-yasato bala lamawuato, Akali Andane, akali okonemane nimbana wandakali Jutusaleme ateyo tupanga mana koo kambua minalane lo, wandakali kambua-mane lapiaina nambato ale auwa.

¹⁴ Andipa akali okonemane pitisa akali kawane tupanga pepa minditupa mialu, nimbana gene oko lo loma yoto, lotu lalaini wandakali tupa pitaka andi loyale Damasakasa yuu okona epala okonde leaipia.

¹⁵⁻¹⁶ Anana-yasato wuane lea-kola, Akali Andane okomane bala lamawuato, andipa akali okone bala nambana piape akali atoto, Isatale tane tupapi, wandakali yame waka tupapi, kinji tupapi, utupanenga balato nambana gene oko lo panawa ateakale loto, nambato bala yapa lo miauwa leaipia. Balato nambana piape oko puyale tandaka andane nolopeya tupa nambato bala andawa lokale-ko. Nimbato bala andolo puu leaipia.*

¹⁷ Wuane lea-kola, Anana-yasa poto, Solo paleane anda okonena kolandaka lalu, balana kini oko Solonga yata wato, amene Solo, nimba asini ipupi-angi, Akali Andane Jisasa nimbana ipupia leaipia. Andipa nimbana lene oko tolo-peke lalu, Oli Sipitisa oko nimbanga epo tumbi leakale nembo toto, Jisasto namba nimba atele okona puu lala-kola, epeyo leaipia.

¹⁸ Wuane lea-kola, Solona lenenga pisa one yale yane tupa okone angi teke laka lo yuunga tepa ya-kola, balana lee tolo-peke leaipia. Lee tolo-peke loto, Solo bala ika lo atea-kola, Anana-yasato bala ipa miaiayaepia.

¹⁹ Ipa mialu, Solo bala tomo tupa nalu, tai gulo atolo-peke lalu, ole minditupa bala Damasakasa tane Kitisene wandakali tupa towa atu ateaipia.

Soloto Damasakasa Yuu Okona Atoto, Pii Lamaiyane Oko

* ^{9:15-16:} Ap 25:13; 27:24; Lom 1:5; 2Ko 11:23-28

* ^{9:26:} Ga 1:17-19 * ^{9:27:} 1Ko 9:1-3

²⁰ Solo bala Damasakasa tane Juta yamenya lotu anda tupana kapoyale poto, Jisasa bala Gotena iwanane oko ateya lo pii lamai-yaepia.

²¹ Lamaiya-kola, balana pii leane okone ale yaini wandakali pitaka-mane moko andane loto, wua leainipia: Wamba akali okonemane Jutusaleme atoto, Jisasana gene oko loto, pote lo lotu lalaini wandakali tupa minu koyo atalane. Balato wali Damasakasa ateyai Kitisene wandakali tupa andi lo awua pitisa akali kawane tupa ateyinga pokale loto, Damasakasa ipupia okonde leainipia.*

²² Utupane-mane wuane leaini tekeko, Goteto Solo minu tai wete laya ya-kola, balato Gotena pii oko tika pua wete loto, Jisasa bala Mesaya oko ateya lo andawa leaipia. Soloto pii tika pua wete lea-kola, Damasakasa tano okona ateaini Juta yame wandakali tupamane balana pii utupane katulo yano napelleaini-pia.*

Solo Bala Palaka Peane Oko

²³ Ole kambua pea-kola, Juta yame-mane Solo bala peyo ome lamakale lo pii lo yake peainipia.

²⁴ Utupane-mane bala peyo ome lamakale loto, Damasakasa tano okona ende andane pitane atene okona asia lomba yane tupana bala epo peyape lo utulu otongapi andapeyo ateainipia. Juta yame-mane wuane pua ateaini tekeko, Soloto akali utupane-mane wuane pua ateyai nembo teaipia.

²⁵ Okone nembo toto, utulu mindina Solona pii alewa atalaini wandakali tupamane eyaka luu mindi basaketa nuu andane mindina andi lalu, bala basaketa okonena Bala peteakale lalu, utupane-mane bala tano okonena banisa andane kenga pitane ateane okona kamakasa peakale lo teng-a-mane tepa yainipia.*

Solo Bala Jutusaleme Peke Leane Oko

²⁶ Solo bala Jutusaleme poto, Jisasana disai polo tupa towa atu atokale nembo teane tekeko, utupane-mane bala Jisasana disai polo ateyo lo bilipi naleainipia. Tene okonena, utupane-mane bala towa atu atoyale yukuwa ateainipia.*

²⁷ Utupane-mane yukuwa ateaini tekeko, Banapaso Solo lamo atu, aposolo akali tupa ateainga peaiapia. Atu poto, Banapaso utupane lamawuato, Soloto Akali Andane oko asininga andeane leaipia. Andea-kola, Akali Andane okomane pii minditupa bala lamaiya-kola, Solo bala Damasakasa tano okona poto, yuku naene

* ^{9:21:} Ap 8:1-3

* ^{9:22:} Ap 18:27-28

* ^{9:25:} 2Ko 11:30-33

atoto, Jisasana gene oko loto, Gotena pii oko wandakali tupa lamawua ateane leaipia. *

²⁸ Banapasato wuane leai-kola, Solo bala aposolo akali tupa towa atu Jutusaleme tano okona epoko pua ateainipia. Epoko pua atoto, bala yuku naene, Akali Andane okona gene oko loto, Gotena pii oko wandakali tupa lamawua ateapnia.

²⁹ Balato Gitiki pii Lalaini Juta yame wandakali tupa towa pii lawala puato, pii yanda pua ateai-kola, utupane-mane bala peyo ome lamakale lo asini aiya pua ateainipia.

³⁰ Juta yame-mane Solo peyo ome loyale asini aiya peai okone andoto, balana Kitisene yangone tupamane bala towa atu Sisatiya tano okona kili loto, bala Tasasa tano okona peakale lo puu leainipia.

³¹ Okone angi, wandakali waka mindi-mane Jutiyapi, Galilipi, Samatiyapi, yuu utupanosa sosa tupanga kenda-pene mindi mai napeai-kola, sosa utupane kuai lo ateainipia. Oli Sipitisa okomane sosa utupane minu tai layawa ateai-kola, sosana wandakali tupamane Akali Andane oko yuku amawua ateainipia. Wandakali kambua sosa okona epo tako peai-kola, sosa utupane andane tai guleainipia.

Pitato Ainiasa Mo Kuai Leane Oko

³² Okone angi, Pita bala Juta yamena yuu tupa pitakana epoko puato, Lita tano okona kili lalu, Gotena wandakali yuu okonena ateaini tupa towa ateapnia.

³³ Yuu okonena atoto, balato akali Ainiasa lene mindi andeaipia. Akali okone bala papaka tambu ee ana kitupasa mee tokonga angu palu yalaepia.

³⁴ Pitato akali okone andoto, bala lamawuato, Ainiasa, Jisasa Kataisato nimba mo kuai laya eya-ko. Nimba ika loto, nimbanza pangalini panda oko mo tika pii leaipia. Wuane leai-kola, okone angi teke Ainiasa baini ika leaipia.

³⁵ Ika lalu, epoko pua ateai-kola, Lita tanepi, Setone tanepi, utupane pitaka-mane bala andeaini-pia. Jisasa bala mo kuai laya yane oko andoto, utupane yakama yamapanpe kele loto, Akali Andane oko lo bilipi leainipia.

Pitato Wanda Tapita Ika Laya Yane Oko

³⁶ Jisasa lo bilipi lene wanda Tapita lene mindi Jopa tano okona peteaipia. Gitiki pii loto, wandakali-mane balana gene Dokasa lalainipia. Ole dindi lo wanda okonemanene mana epene tupa angu wato minuto, wandakali minditaka jia yo ateaini tupa moyo minditaka tupa tale pua maiki pua pitii-yaepia.

³⁷ Pita bala Lita tano okona ateai-angi, wanda okone bala siki mialu, omeaipia.

Omea-kola, wanda okonena yame tupamane bala wasa-wasa peyoto, anda lumu kenga mindina awua poto, yata yainipia.

³⁸ Lita tano oko Jopa tano okone towa mandaka gulo ya-kola, Kitisene wandakali tupamane Pita bala Lita tano okona ateya lene oko ale yainipia. Ale wato, utupane-mane Pita bala Lita tano okona maliyo ata napene, wamba ini yakama moyolo epeakale loto, akali lapo-mane bala lamaulu peakale leainipia.

³⁹ Akali okonelapo poto, Pita nimba wamba ini ipu lo lamaiyapi-kola, bala ika lalu, akali okonelapo towa atu Jopa tano okona peainipia. Poto, bala yuu okonena peakaiyu lea-kola, wandakali minditupa-mane bala atu anda lumu kenga okona peainipia. Peai-kola, lumu okonena peteaini wanda yalo tupa pitaka-mane Pita ateane ongane mandaka gulo atoto, Tapita ondo wato, ai lo ateainipia. Ai lo atoto, utupane-mane lapalapapi, kolosapi, toni kambua Pita andawa loto, wamba Tapita bala nanima towa atu petea-angi, balato toni utupa pitaka waa puato, nanima geane leainipia.

⁴⁰ Wuane leai-kola, Pitato wandakali utupane pitaka kamaka peakale lalu, aiki leka wato, pote leaipia. Pote lalu, bala mopeke loto, wanda omene yane oko lamawuato, Tapita, nimba ika laa leaipia. Wuane leai-kola, wanda okone bala lee talu, Pita andoto, ika lo peteaipia.

⁴¹ Petea-kola, Pitato wanda okonena kininga minuto, bala mina ika lalu, wanda yalo tupapi, Gotena wandakali waka tupapi, utupane pitaka epeakale leaipia. Epeai-kola, Pitato wanda omene yane oko saka peteyaloo utupane andawa leaipia.

⁴² Wandakali utupane-mane Pitato wuane piya lo pii lo tawe yai-kola, Jopa tane wandakali pitaka-mane ale yainipia. Ale wato, wandakali kambua-mane Akali Andane oko lo bilipi leainipia.

⁴³ Okone angi, Pita bala ole kambua Jopa tano okona atoto, akali Saimone lene mindi towa ateapnia. Saimone balato bulumakaopi, sipisipipi, okonetaka tupana umbaini taka-lene tupa tamulane nembototo, kapu teakale lo piape pua atalaepia.

10

Koniliasa-la, Enjole Mindi-lamane Pii Leapele Oko

¹ Akali Koniliasa lene mindi Sisatiya tano okona atoto, ami yame gene Itali tane lalaini okona akali andete mindiki ando atalaepia.

² Akali okonepi, bala towa anda mindikina palu atalaaini wandakali tupapi,

utupane pitaka-mane Gote yuku amawuato, mana balato epele alane tupa wato minalaini-pia. Balato mana utupane wato minuto, Juta yame wandakali minditaka jia yo atalaini tupa moyo minditaka kambua tale pua maiki piyaepia. Ole dindi lo bala Gote lo pote lalaepia.

³ Alu mindi ole lene taeme siti kilokopi mindi lea-kola, Koniliasa bala pote loto, kombeya-mane andene gulo andea-kola, Gotena enjole mindi Koniliasa pteane anda okonena panakame kolandaka loto, Koniliasa leaipia.

⁴ Wuane lea-kola, Koniliasato enjole okone andoto, yuku wete wato, Akali Andane, nimbato aki mindi loyale nam-bana gene oko lelepe lo tipa peaiapia. Wuane lea-kola, enjole okonemane bala lamawuato, nimbato wandakali minditaka jia yo atalaini tupa moyo minditaka tupa tale pua maiki puato, pote larlene. Goteto nimbana mana epene okonelapo andoto, nembo tatawa ateya-ko.

⁵ Andipa akali minditupa akali Saimone gene mindi Pita lene oko aiya pua ando moto, lamo atu epeakale loto, nimbato utupane Jopa tano okona peakale lape.

⁶ Saimone Pita balana gene yango Saimone teke lene mindi towa atu atolopeyapi. Saimone okonena anda oko sole-wata matenenga atolopeya. Balato bulumakaopi, sipisipi, okone takatupana umbaini taka-lene tupa tamulaini nembo toto, kapu teakale lo piape piyane leaipia.

⁷ Enjole okonemane wuane lalu pea-kola, Koniliasato balana andaka piape piyapele akali lapoppi, ami yanda yene mindipi, utupane ipulupa leaipia. Ami yanda yene okonemane mana Goteto epele alane tupa wato minu atoto, ole dindi lo Koniliasa towa atu atalaepia.

⁸ Akali tepo utupane ipulupa lalu, Koniliasato pii enjole okomane bala lamaiyane utupane pitaka akali tepo utupane lamaiyaeppia. Lamaiyu, balato utupane Jopa yuu okona pulupa leaipia.

Pitato Minditaka Kombeya-mane Andene Gulo Andeane Oko

⁹ Koniliasato akali tepo utupane peakale lea-kola, utupane poto, asininga paleainipia. Paliyu, anate-lene otombe okona akali utupane Jopa tano okona mandaka gulo peainipia. Okone angi teke, Pita bala pote loyale, anda kenga pitiyaini panda okona peakaiyu leaipia.

¹⁰ Peakaiyu loto, Pita bala pote lo pituto, tomo nono wato, nauwa lakae lo nembo tea-kola, tomo yangalaini wandakali tupa-mane balana tomo yango makande pua

ateainipia. Makande pua atea-kola, balato kombeya-mane andene gulo andeaipia.

¹¹ Andea-kola, ati kenga iyu oko yapu lo lapo puato, asini lumba-yene yaepia. Lumba-yene ya-kola, mindimane lapalapa andane wete gulene mindina duni tukumindi tupana minatawa atoto, yuunga tepa ama-ama pua tepa yaepia.

¹² Lapalapa andane gulene okonena minditaka ema-pene kene tukumindi atene yame tupa pitakapi, etelu yame tupapi, eka yame tupapi, yame utupane pitaka palipata tepa ya-kola, Pitato andeaipia.

¹³ Andea-kola, pii mindi leane okomane loto, Pita nimba ika lalu, utupane peyo ome lalu, naa leaipia.

¹⁴ Pii okonemane wuane leane tekeko, Pitato pii mindi loto, Akali Andane, tomo nolaini jia lene yame tupa nimbanan leenga kalato atene gulene eya okone takatupala ali mindikipi mindi nambato naa napewane. Andipapi, nambato tomo okonepene tupa naa napukale. Jia leaipia. *

¹⁵ Wuane lea-kola, pii mindi leane okone-mane dee lapone loto, Goteto minditaka mo epene gulaya yane tupa ando, nimbato utupane kalato atene gulo eya lolene leaipia. *

¹⁶ Ole tepoainga wuane teke lea-kola, mindimane lapalapa andane okone ati kenga kilau lo molo-peke leaipia.

¹⁷ Molo-peke lea-kola, Pitato kombeya-mane andene gulo andeane okona tene oko aki mindi paleyape nemboto peteaiapia. Wuane nemboto petea-kola, akali tepo Koniliasato epeakale leane utupane-mane akali Saimonena anda andokope lo tipa piki pua epoto, andipa anda okonena asia lombanga epo ateainipia.

¹⁸ Epo atoto, utupane-mane akali Saimone balana gene mindi Pita lene okone bala anda okona peteyape lo tipa peainipia.

¹⁹ Okone angi, Pita bala kombeya-mane andene gulo andeane okone mee nembo tatawa petea-kola, Oli Sipitisa okomane bala lamawuato, akali tepo-mane nimba aiya pima epeyai leaipia.

²⁰ Nambato akali utupane epeakale lauwa-kola, epeyai-ko. Nimba mini lapo pali napene, ika lalu, yuunga kili loto, akali utupane towa atu pulupale puu leaipia.

²¹ Oli Sipitisa okomane wuane lea-kola, Pita bala yuunga kili loto, akali tepo utupane lamawuato, yakamato akali aiya peyai okone namba oo ateyo oko. Tene anu peakale yakamato namba aiya pima epalaipe leaipia.

²² Pitato wuane lea-kola, utupane-mane bala lamawuato, ami yanda yene andete mindiki ando atalane akali Koniliasa lene oko bala akali tika-pene mindi ateya

* **10:14:** Pit 11:1-47; Ese 4:14 * **10:15:** Mk 7:15,18-19

leinipia. Balato Gote yuku amawua lotu lalane. Juta yame wandakali pitakamane bala akali epene mindi ateya lalaini. Gotena enjole mindimane bala lamauwato, Koniliasa nimbato Pita nimbanwa andaka epeakale lape lapia. Bala nimbanwa andaka epola-angi, pii balato lola tupa nimbato ale ape lapia-kola, nanimato nimba lamolo epeyama leainipia.

²³ Wuane leai-kola, Pitato akali utupane andaka ipulupa loto, utulu okone angi, balato utupane yatawa paleaipia. Paliyu, anate-lene ika lalu, Pita bala akali tepo utupane towa peai-kola, Jopa tane Kitisene amene minditupapi akali utupane towa peainipia.

Pita Bala Koniliiasana Andaka Peane Oko

²⁴ Pitapi, akali utupanepi, yakama asininga paliyu, anate-lene Sisatiya tano okona peakaiyu leainipia. Akali utupane epolopeyai nembo toto, Koniliasato balana yame mindiki wete tupapi, wandakali bala towa epelewa atalaini tupapi, utupane amunguli puato, andaka peteakale loto, bala tane poto, Pita epeakale lo asinping mali yo peteaipia.

²⁵ Mali yo petea-kola, Pita bala Sisaliya tano okona peakaiyu lea-angi, Koniliasato bala malanda wato, balana kene yane ongane aiki lekawa tombawua loto, bala lo tama peaiapia.

²⁶ Koniliasato wuane peane tekeko, Pitato bala mina ika loto, nambapi mee akali mindi teke. Nimba ika laa leaipia. *

²⁷ Wuane lalu, Pita bala Koniliasa towa pii lama-lama poto, anda-pango kolandaka loto, wandakali kambua amunguli pua peteinai tupa andeaiapia.

²⁸ Andoto, balato utupane lamauwato, Juta yame nanimato loto, Gotena wenonga wandakali yame waka tupa yakama kalato atene gulo ateyai lalamane leaipia. Nanimato wuane loto, yakama ateyaina mandaka naepene, yakama towa amunguli pua piti na-piyamane. Yame waka wandakali yakamato Juta yame wandakali nanimana mana utupane nembo talaini tekeko, andipa nambato wandakali bala tupa ando utupane kalato atene gulo ateyai lolene lo Goteto namba andawa lapia.

²⁹ Goteto mana okone namba andawa lapia-kola, yakamato namba ipu lapiai okone ale alu, nambato pii okone tanga nalene epeyo-ko. Anu peakale yakamato namba ipu lapiapie. Pitato wuane leaipia.

³⁰ Pitato wuane lea-kola, Koniliasato bala lamauwato, okolumane ole-lene andipa nanimato peteyama taeme siti kiloko leya

pua teke lapia-kola, namba andaka pote lo pitiwa. Pote lo pitiwa-kola, tona tii wete pene akali mindi kapoyale epoto, nambana wenonga atapia.

³¹ Epo atoto, akali okonemane namba languato, Koniliasa, wandakali minditaka jia yene tupa moyo nimbato minditaka mailini tupa Goteto nembo tatawa ateya. Nimbato pote lalene tupa balato ale apia.

³² Tene okonena, nimbato akali minditupa lamauwato, yakama Jopa tano okona poto, akali Saimone gene mindi Pita lene oko lamialapa lape leaipia. Akali okone bala akali Saimone lene teke mindi towa atu ateyapi. Saimone okonena anda oko solewata matenenga ateyane. Balato bulumakaopi, sipisipipi, okonetaka tupana umbainai taka-lene tupa tamulaini nembo toto, kapu teakale lo piape piyane lapia.

³³ Wuane lapia-kola, okone angi teke nambato nimba epola loto, akali minditupa-mane nimba lamolo epeakale lauwa-ko. Nimba wayu epeleya. Nimbato pii lola lo Goteto nimba langeane tupa andipa nimbato nanimana langula loto, nanimana pitaka Gotena wenonga ale olo epo peteyama. Koniliasato wuane leaipia.

Pitato Pii Leane Oko

³⁴ Koniliasato wuane lea-kola, Pitato pii mindi loto, enene wete, andipa nambato andeyo-kola, Goteto Juta yame wandakali tupa angu balana yame atekale nembo ateyata. Jia. *

³⁵ Wandakali yame palu pula tupa pitakana minditupa-mane Gote ando yuku amauwato, mana epene tupa minu ateyai-kola, Goteto wandakali utupane balana yame atolopeyai lalae-ya lo nambato andeyo.

³⁶ Wamba Goteto balana pii layene epene oko Isatale tane wandakali nanimanga languato, Jisasa Kataisato wandakali tupa Gote towa yamapanne mindiki mo paliya alane leaipia. Jisasa okone bala wandakali yame pitakana Akali Andane oko ateya.

³⁷⁻³⁸ Wamba Joneto wandakali yakama ipa mialapa lo pii lamauwato, Jisasa ipa peya maiya-kola, Goteto Oli Sipitisa oko Jisasa maiyu, balana tai-lene oko balanga mayaepia. Maiyu, Nasatesa tane Jisasa okonemane balana piape peakale loto, Goteto bala towa atu atapele-pia. Jisasa Galili disitiki okona atoto, balana piape tewa piyu, matili balato Jutiya disitiki okona yuu tupa pitakana poto, piape peaipia. Balato mana epene tupa wandakali tupanga minu epoko puato, wandakali Sataneto minu koyane tupa pitaka mo kuai laka peaipia. Yakamato

temane utupane pitaka wamba ale yai okoni.*

³⁹ Jisasa bala Jutusalemepi, Juta yamena yuu waka tupanapi, utupanena atoto, piape pea-kola, nanimato balana piape utupane pitaka andoto, lo panawa ateyama. Jisasato piape epene utupane pea-kola teke, wandakali-mane bala ita malamanda okona peyo yuka wato, omaya yaini.

⁴⁰ Utupane-mane bala omaya yaini tekeko, ole teponena Goteto bala malinga ika laya wato, wandakali-mane bala andeakale lo mo pana yane.

⁴¹ Goteto wuane peane tekeko, balato Jisasa bala Juta yame wandakali pitakana wenonga mo pana nayane. Jia. Nanimato balana pii oko lamai-yapale loto, Goteto nanimato makimi lea-kola, matili Jisasa malinga ika lea-angi, nanimato bala towa atu tomo ipapi nemane.*

⁴² Balato nanimma languato, yakamoto pii layene epene oko wandakali tupa lamawuato, wua lalapape: Wamba Goteto Jisasa makimi loto, matili balato wandakali omenepi, sakapi, utupane pitaka yapa lo tale piyane jasa oko ateakale leane lo lalapape leane.*

⁴³ Wamba potopesa akali tupa pitakamanne Jisasana wisanisa atoto, Goteto Jisasana piape pulane tupa nembo toto, bala lo bilipi lene wandakali pitakana mana koo minalaini tupa apia-malupeya leainipia. Pitato wuane leaipia.*

Wandakali Yame Waka Tupamane Oli Sipitisa Meaini Oko

⁴⁴ Pitato Goteno pii lamawua atea-angi teke, balana pii okone alewa peteaini wandakali tupa pitakanga Oli Sipitisa oko epeaipia.*

⁴⁵⁻⁴⁶ Oli Sipitisa oko wandakali utupanenga epea-kola, utupane-mane yame waka minditupana pii lalaini tupa mo loto, Goteto gene oko laiyu lo ateainipia. Goteto balana Oli Sipitisa oko wandakali yame waka utupanenga maiya-kola, utupane-mane yame waka wandakali tupana pii leyainga andoto, Juta yame Kitisenewandakali Pita towa atu epeaini tupamane moko leainipia. Moko leai-kola, Pitato pii mindi utupane lamai-yaepia.*

⁴⁷ Pii okone wandakali utupane lamawuato, wandakali yame waka utupa Oli Sipitisa nanimma mema pua teke meyai-kola, apito wandakali utupane katulo ipa mia-mai napipe-pene lo jia lolopeyape leaipia.

⁴⁸ Wuane lalu, Pitato wandakali yame waka utupane lamawuato, yakamoto Jisasa

Katasana gene oko loto, ipa mialapa leaipia. Wuane lea-kola, utupane-mane Pita lamawuato, nimba nanima towa ole minditupa atu atamakale leainipia.*

11

Pita Bala Jutusaleme Poto, Pii Temane Lamaiyane Oko

¹ Aposolo akali tupapi, Jutiya disitiki okona yuu tupa pitakana Juta yame Kitisenewandakali ateaini tupapi, utupane-mane ale yai-kola, wandakali yame waka minditupa-mane Goteno pii layene epene obo bilipi lo ateyai lene oko ale yainipia.

² Akali tupana yala-pene umbaini kati-makale lo tai gulalaini wandakali tupa-mane pii okone ale wato, Pita towa yataka yainipia. Yataka yai-kola, Pita bala Jutusaleme peakaiyu leane-angi, utupane-mane bala laiya leainipia.

³ Laiya loto, anu peakale nimbato yala-pene umbaini kati napene akali tupana andaka kolandaka loto, utupane towa atu tomo no pitipipe leainipia.*

⁴ Wuane leai-kola, Pitato minditaka wamba peane tupa lo panawa pii temane loto, wua leaipia:

⁵ Wamba nambato Jopa tano okona pote lo pituto, kombeya-mane andene gulo andewa wete, mindimane ati kenga atoto, minditaka lapalapa andane wete gulene mindina duni tukumindi utupana minatawa atoto, yuunga tepa ama-ama pua namba atewa ongane tega ya.*

⁶ Tepa ya-kola, lapalapa andane gulene okonena anda-pangosa aki mindi paleyape lo wayumane andewa. Andewa-kola, yia kapuapi, koa yamepi, yuu okona minditaka ema-pene kene tukumindi atene yame okonepene tupa pitakapi, eka yamepi, puya yamepi, yame utupane pitaka paleanga andewane.

⁷ Nambato utupane andewa-kola, pii mindi namba andayo leane okomane Pita, nimba ika loto, utupane peyo ome loto, naa lea.

⁸ Akali Andane okomane wuane leane tekeko, nambato balana pii okone yano peyoto, Akali Andane, alu mindikipi mindi nambato minditaka nimbana wenonga kalato atene nalaini jia lene yame utupanena mindi nanewa. Jia. Andipapi, nambato utupane naa napukale. Jia lewa.

⁹ Nambato wuane lewa-kola, ole lapone gulo ati kenga atoto pii mindi leane okomane minditaka Goteto mo epene gulaya yane utupane andayo, nimbato utupane kalato atene ya lolene lea.

* **10:41:** Ap 1:8; Lk 24:42-43 * **10:42:** Ap 17:30-31; 1Pi 4:5 * **10:43:** Ais 53:5-6; Jet 31:34 * **10:44:** Ap 11:15; 15:8-9 * **10:45-46:** Ap 2:4; 19:6 * **10:48:** Ap 2:38-39 * **11:3:** Ap 10:28; Ga 2:11-13 * **11:5:** Ap 10:9-48

¹⁰ Ole tepoainga wuane teke lalu, Goteto lapalapa andane gulene okone ati kenga kilau lo molo-peke lea.

¹¹ Kilau lo molo-peke lea-kola, okone ang i teke akali tepo anda namba petewane okone na teke epo peakaiyu leai. Wamba akali mindi bala Sisatiya tano okona atoto, akali tepo utupane epeakale lea-kola, epeai.

¹² Epeai-kola, Oli Sipitisa okomane nimba mini lapo pali napene, akali utupane atu puu lea. Wuane lea-kola, Juta yame Kitisene wandakali wataka utupa towa namba atu poto, akali Koniliasa okona andaka kolandaka lema.

¹³ Kolandaka loto petema-kola, balato pii temane mindi nanima langea. Wamba enjoje mindi balana andaka epo ateanga andea-kola, enjoje okonemane bala lamawuato, Koniliasa nimbato akali Saimone balana gene mindi Pita lene oko epeakale loto, akali minditupa-mane bala lamolo Jopa tano okona peakale lape lea.

¹⁴ Wuane pule-kola, bala nimba andaka epoto, pii mindi nimba langulu-peya. Pii langula okonemane Goteto nimbapi, nimbania andaka atalaini wandakali tupapi, yakama pitaka molo-peke lolopeya. Enjole okonemane wuane leaipia.*

¹⁵ Namba ipuue leane akali Koniliasa okomane pii utupane lokoyo pea-kola, nambato Gotena pii oko wandakali utupanenga lamawua atewa-kola, Oli Sipitisa oko wamba nanimanga epea pua teke, utupanenga epea.*

¹⁶ Oli Sipitisa oko wandakali utupanenga epeane oko andoto, nambato pii wamba Akali Andane okomane leane mindi nembo tolo-peke lewa. Wamba balato loto, Joneto wandakali tupa ipa-mane ipa peyamaiyane tekeko, matili Goteto balana Oli Sipitisa okomane yakama ipa peyagulupeya leane pii okone nambato nembo tolo-peke lewa.*

¹⁷ Pii okone nembo tolo-peke loto, nambato wua lo nembo tewa: Wamba nanimato Akali Andane Jisasa Kataisa lo bilipi lemako, Goteto balana Oli Sipitisa oko nanima Juta yame Kitisene tupanga gea. Andipa wuane pua teke, wandakali yame waka tupamane Akali Andane Jisasa Kataisa lo bilipi lapihai-kola, Goteto balana Oli Sipitisa oko wandakali utupanenga maipia teke. Goteto wuane pipia-kola, namba apito balana piape okone katulo jia lolo-peyawape. Pitato wuane leaipia.

¹⁸ Wuane lea-kola, akali tupana yala-pene umbaini katimakale lo tai gulalaini wandakali tupamane balana pii leane okone ale wato, Pita ando luya leaini okone

konda yainipia. Kondalu, utupane-mane Gotena gene oko laiyu loto, andipa Goteto wandakali yame waka tupa ondo wato, utupane-mane yamapane peke loto, saka atapowa atolane oko meakale leya nembo teyama leainipia.*

Andiyoko Tane Wandakali Tupa Kitisene Guleaini Oko

¹⁹ Wamba Juta yame okomane Sipene peyo ome lalu, kenda-pene andane tupa Kitisene wandakali waka tupa maiki pua ateai-kola, wandakali utupanena kambua yale-yale palaka puu toko laka peainipia. Wuane piki puato, minditupa Pinisia disitiki okona pulu, minditupa yuu ailene Saipatasa lene okona pulu, minditupa Andiyoko tano okona pulu, peainipia. Poto, utupane-mane Gotena pii layene epene oko Juta yame wandakali tupa angu lamawua atoto, wandakali yame waka tupa lamai napene konda yainipia.*

²⁰ Utupane-mane Gotena pii layene epene oko wandakali yame waka tupanga lamai napeaini tekeko, akali palaka peaini utupanena minditupa Saipatasa tanepi, Saitini tanepi, yuu okone-lapona tane ateainipia. Akali utupanena minditupamane Andiyoko palaka poto, Jisasa bala Akali Andane oko ateyai lo Gotena pii layene epene oko Gitiki yame wandakali tupa lamawua ateaini tekepia.

²¹ Gotena pii lamawua ateai-kola, Akali Andane okona tai-lene oko akali utupanenga yaepia. Ya-kola, wandakali kambua wete bilipi lalu, yamapane peke loto, Akali Andane oko wato minu ateainipia.

²² Andiyoko tane wandakali kambuanane wuane pua ateyai lene oko Jutusaleme sosa okona wandakali peteaini tupamane ale wato, utupane-mane akali Banapasa bala yuu okonena peakale leainipia.*

²³⁻²⁴ Oli Sipitisa oko Banapasa balanga tumbi latane atea-kola, balato bilipi leyo nayu loto, akali epene mindi ateainipia. Jutusaleme sosa okona wandakali tupamane Banapasa bala akali okonepene ateyai lo andoto, bala Andiyoko tano okona peakale leai-kola, balato yuu okonena peakaiyu loto, anu peyape lo andeaipia. Andea-kola, Goteto wandakali yame waka tupa ondo wato moyo ateane okone andoto, bala epele yaepia. Epele wato, wandakali utupane pitaka-mane Akali Andane oko ole dindi lo tailo wato minu atekale loto, Gotena pii lamawua atea-kola, yame waka wandakali kambua Akali Andanena yame okona tako peainipia.

* **11:14:** Ap 16:31 * **11:15:** Ap 2:4 * **11:16:** Ap 1:4-5 * **11:18:** Ap 13:48; 14:27 * **11:19:** Ap 8:1-4 * **11:22:**

²⁵ Andiyoko tane wandakali kambuamane Jisasa lo bilipi leai-kola, Soloto bala moyolo epeakale nembo toto, Banapasa bala Tasasa tano okona poto, bala aiya peaipia.*

²⁶ Balato Solo aiya pua andalu, bala towa atu Andiyoko tano okona peke leapilipia. Peke lalu, mali mindi pitaka liyamba Andiyoko sosa okona wandakali tupa towa atoto, Kataisato wua peane loto, pii layene epene oko wandakali kambua tupa lamawua ateapili-pia. Lamawua ateapili-kola, Andiyoko tane wandakali tupamanne Kataisa lo bilipi lene wandakali utupane andayo gene Kitisene oko bulupane tewa leainipia.

²⁷ Okone angi, potopesa akali minditupa Jutusaleme yuu okona atalu, Andiyoko nena epeainipia.

²⁸ Potopesa akali epeaini utupanena mindi Akapasa lene okomane ika loto, Oli Sipitisa okona tai-lene okomane pii mindi lo pana wato, ulia nono andane mindi yuu yo peya tupa pitakana yolopeya leaipia. Matili Kolotiyasa bala Lomo tane gapomane akali kawane atea-angi, pii wamba Akapasato leane okone enene guleaipia.*

²⁹ Ulia nono andane okone Jutiya disiti okona ya-kola, Andiyoko tane Kitisene wandakali tupamanne pii mindi lo yake puato, nanimato Jutiya disitiki okona ateyai Kitisene wandakali utupane moyo, nanimana mindiki-mindiki lo muni nanimanga eya tupa tale puato, minditupa utupanenga pee lamakale leainipia.

³⁰ Wuane lalu, Andiyoko tane Kitisene utupane-mane muni minditupa mo amunguli piyu, Banapasa, Solo-la, okonelapo-mane muni utupane mandiyu, Jutusaleme Sosa okona akali kawane tupanga malu peakale leainipia.*

12

Etoteto Jemesa Peyo Ome Lalu, Pita Andi Leane Oko

¹ Okone angi, Kinji Etoteto sosa okona wandakali minditupa minu koyawakale nembo toto, kenda-pene andane minditupa utupanenga mayaepia.

² Balato ami yanda yene mindi lamawuato, nimbato Jone amene Jemesa oko peyo ome laa lea-kola, akali okonemane Jemesa okone kandepa luu mindimane yokowa ome leaipia.

³ Ome lea-kola, Juta yame-mane balana mana okone epele yaini oko Etoteto andoto, betesa yisa napalene nalaini oto oko epeane-angi, balato mana koo mindi tako pua minuto, Pita andi leaipia.

⁴ Juta yame-mane Pasopa tomo nalaini oto oko epo koyo pula-angi, Etoteto Pita bala wandakali tupana wenonga kosimi lokale nembo teaipia. Wuane nembo toto, balato Pita andi loto, utulu otongapi, ami yanda yene tukumindi-tukumindi lo lawa piki puato, Pita ando ateakale leaipia.

⁵ Wuane lea-kola, katapusa anda okona ami yanda yene tupamanne Pita wasa lo ando ateaini tekeko, Goteto Pita moyakale loto, sosa okona wandakali peteaini tupamanne pote tailo leainipia.

Goteto Pita Tita Lo Meane Oko

⁶ Etoteto Pita bala anate-lene kote lolo epeakale lea-kola, utulu okone ang, Pita bala ami yanda yene lapo tombenenga sene ende lapo-mane andi latane paleaipia. Palea-kola, ami yanda yene minditupamanne katapusa anda asia lomba oko andatawa ateainipia.

⁷ Andatawa ateai wete, Akali Andane okona enjoje mindi kapoyale epea-kola, katapusa anda okonena anda-pango tii pikoye peaipia. Enjole okonemane Pitana pataliningga peyo ika laya wato, nimba ini kapoyale ika laa leaipia. Wuane lea-kola, Pitana kinina sene ende lapo ateane okonelapo tita lo yuunga tepa yaepia.

⁸ Tepa ya-kola, enjoje okonemane nimbanan matipu mo piyu, suu kee mo piyu, pii leaipia. Pitato enjoje okomane leane pua pea-kola, enjoje okonemane Pita lamawuato, nimbanan tona luu kenga pilini oko mo piyu, namba peyo okona bakale. Watama ipu leaipia.

⁹ Wuane lea-kola, Pita bala katapusa anda okona lumu bala paleane okone tepa alu, enjoje okone watama peaipia. Watama poto, enjoje okonemane bala enene tita loto, atu peya nembo natene, balato mee kombeya andaka kamaka peyo nembo teaipia.

¹⁰ Wuane nembo toto, Pita bala enjoje okone towa atu poto, katapusa anda andapangosa asia lombanga ando ateapili ami yanda yene lapo mo masia maiyapelepia. Mo masia maiyu, liyamba poto, katapusa anda oko tepa alu, katapusa anda okona ende okona geta aine-mane waa pitane atene okona peakaiyu leapelepia. Geta okone loko peyatane ateane tekeko, liyamba peakaiyu leapili-angi, geta okone lumbea-kola, liyamba kamaka peapelepia. Liyamba tano okona asia kembo mindinga peapi-kola, enjoje okonemane Pita wamba kapoyale awua tepa alu, peaipia.*

¹¹ Enjole okonemane Pita awua tepa alu pea-kola, Pitana nembo kuai lea. Kuai lea-kola, balato pii mindi loto, Etoteto

* 11:25: Ap 9:30 * 11:28: Ap 21:10 * 11:30: Ap 12:25

* 12:10: Ap 5:19

namba peyo ome lolopeya nembo toto, Juta yame-mane maliyo ateyai tekeko, andipa Akali Andane okomane balana enjole oko epeakale loto, Juta yamepi, Etotepi, utupane pitakana kininga namba molo-peke laraya lo wayumane nembo teyo leaipia.

¹² Wuane nembo toto, bala akali Jone balana gene mindi Maki lene okona angini Matiya okona andaka peainipia. Peakola, wandakali kambua anda okonena amunguli puato, pote lo peteaini-pia.

¹³ Pote lo peteai wete, Pita bala epo kama atoto, asia lomba oko peyo giao-giao lea-kola, piape wanda Lota lene okomane asia lumbulu epeainipia.

¹⁴ Balato asia lumbulu epeane tekeko, Pitana pii leane oko ale wato, okone Pita yalua nembo toto, wanda okone bala epele wete yaepia. Epele wete wato, balato asia lumba napene, wandakali amunguli pua pote lo peteaina taimane peke loto, Pita epoto, asia lombanga ateya leaipia.

¹⁵ Wanda okonemane wuane lea-kola, wandakali peteaini utupane-mane nimba kee wato lele leanipia. Wuane leai-kola, wanda okonemane enene pii leylo nayu loto, enene wete, Pita bala epo ateya leane tekeko, utupane-mane Pita moyo atalane enjole oko epo atalua leanipia.

¹⁶ Utupane-mane wuane leaini tekeko, Pitato asia lomba oko peyo giao-giao latawa atapo ya-kola, utupane-mane asia lumbaini-pia. Asia lumbuto andeai-kola, Pita bala asia lombanga epo atea oko andoto, yakama moko andane mindi leanipia.

¹⁷ Moko leai-kola, Pitato utupane yakama pii lolaini loto, kini momonga piyu, wua leaipia: Namba katapusa anda okona paliyo-kola, Akali Andane okomane namba tinga lo moto, kamaka atu epala. Wuane piya lo, yakamato Jamesapi, Kitisene wandakali tupapi, utupane pitaka lamai-yapape leaipia. Wuane lalu, bala utupane tepa alu, yuu waka mindina peainipia.

¹⁸ Pea-kola, anate-lene upa pitane ami yanda yene tupamane andeai-kola, Pita bala katapusa anda okona napaleaipia. Napalea-kola, yakama moko andane wete loto, yakama teke-teke mindi tipa piki puato, Pita anu piya yape leanipia. *

¹⁹ Etoteto ami yanda yene minditupa lamawuato, yakamato Pita aiya pulu pulupa leane tekeko, utupane-mane Pita bala mindinga anda naapeainipia. Pita anda naapeai-kola, Etoteto ami yanda yene Pita ando ateaini utupane kosimi loto, akali mindimane utupane peyo ome leakale leaipia. Wuane lalu, Etote bala Jutija

disitiki oko tepa alu, Sisatiya tano okona poto ateaiapia.

Etote Bala Omeane Oko

²⁰ Wamba Taya tanepi, Saitone tanepi, utupane-mane yuu Etoteto ando ateane okona tawe tomo mo ateaini tekeko, matili Etoteto utupane towa yataka andane wete wato, tomo nameakale, jia leaipia. Wuane lea-kola, utupane pitaka-mane lapone tomo mia-makale nembo toto, amunguli piyu, yuu Etote ateane okona peainipia. Poto, utupane-mane Etotena anda ando ateane akali Balasatusa lene oko towa pii ini loto, yakama nanima towa yanda napene, tomo mialapa lalapape leanipia. Wuane leai-kola, bala tane katu lalu, kiñi oko lamauwakale leaipia.

²¹ Wuane lea-kola, Etoteto wandakali utupane epo amunguli peakale loto, oto mindi yata wato, kiñi-mane yati piyaini tupa piyu, kiñi pitiyaini toko okona pituto, pii kambua utupane lamawua ateaiapia.

²² Pii utupane lamawua ate-kola, ole kambuangka utupane-mane gitisa pii mindi taimane laka puato, Etote bala mee yuu okona akali mindi ata napene, bala gote mindi gulo atoto, pii okone leya laka peainipia.

²³ Pii wuane laka peai okone ale wato, Etoteto namba gote mindi jia, yakamato Gotena gene oko laiyu lalapa lape-pene tekeko, balato wuane naleaipia. Tene okonena, okone angi teke, Akali Andane okona enjole mindimane gole kambua wete Etote balana ininga tumbi laya ya-kola, gole utupane-mane bala no ome laya yainipia. *

²⁴ Etote bala omea-kola, Gotena piape akali tupa yuu kambuangka poto, balana pii layene epene oko taimane lo tawe yo ateainipia. *

²⁵ Lo tawe yo ateai-kola, Banapasa, Solo-lamane Jutusaleme ato piape pulane tupa pikoyo piyu, liyamba akali Jone gene mindi Maki lene oko towa atu Andiyoko tano okona peke leanipia. *

13

Banapasa, Solo-la, Okonelapo Peakale Leaini Oko

¹ Wamba gapomane ando atalane akali Etote okona angini, ayiane-la, okonelapomane Manaini bala liyambana andopane gulo mo mondo peapele akali okone bala Etotena amene gulo ateaiapia. Akali Manaini okonepi, Simiyone gene mindi Nikete lene okopi, Saitini tano okona tane Lusiasapi, Banapasapi, Solopi, akali utupane potespa akali yandopi, tisa yandopi, mindi

atoto, Andiyoko tano okona sosa oko moyo ateanipia.

² Alu mindi Andiyoko sosa okona wandakali peteaini tupamane oto mindi tomo nanene atamakale lalu, Akali Andane oko lotu lo ateanipia. Lotu lo ateaikola, Oli Sipitisa okomane utupane lamawuato, Banapasa, Solo-la, okonelapomane nambana piape oho pingekale loto, nambato akali okonelapo ee lo mewane-ko. Akali okonelapo-mane nambana piape okone peakale lalapa leaipia. *

³ Wuane lea-kola, oto mindi utupanemanne tomo nanene atalu, pote loto, akali okone-lapona kawanenga kini yata wato, Gotena piape okone pulu peakale leainipia. *

Banapasa, Solo-la, Okonelapo Saipatasa Yuu Okona Peapele Oko

⁴ Oli Sipitisa okomane Banapasa, Solo-la, liyamba peakale lea-kola, liyamba poto, Selusia tano okona kili leapilipia. Kili lalu, liyamba sipi mindina pitiyu, ipa tombenenga yuu ailene Saipatasa okona peapilipia.

⁵ Sipi okone yuu ailene Saipatasa okona tano Salamisa okona peakaiyu lea-kola, akali okonelapo-mane Juta yamena lotu anda ateanie tupana poto, Gotena pii oko lamawua ateapili-pia. Pii lamawua ateapikola, Jone Makito akali okonelapo moyo piape pua ateaipia. *

⁶ Akali utupane ailene Saipatasa okonena epoko pua atoto, Paposa tano okona peakaiyu loto andeai-kola, Juta yame akali Banjisasa lene mindi tano okonena ateaipia. Akali okone bala owato potopesa akali mindi atoto, posini pua atalaepia.

⁷ Bala ailene Saipatasa okona gapomane akali kawane Senjiasi Palusa oko towa atu atalaepia. Senjiasi Palusa bala mana andene akali mindi ateaipia. Balato Gotena pii oko ale wakale nembo toto, Banapasa, Solo-la, okonelapo epeakale leaipia.

⁸ Balato wuane leane tekeko, gapomane akali kawane Senjiasi Palusa oko bala Gotena pii oko ale wato, Jisasa lo bilipi lolane nembo toto, posini piyane akali Banjisatas Banapasa, Solo-la, okonelapo-mane Gotena pii oko Senjiasi Palusa lamai na-peakale, jia leaipia. Akali Banjisasa okonena gene mindi Gitiki pii loto, Elimasa lalainipia.

⁹ Elimasato jia leane tekeko, Oli Sipitisa oko akali Solo gene mindi Polo lene okonenga epo tumbi lea-kola, balato Elimasa andapeyo yoto, pii mindi bala lamai-yaepia.

¹⁰ Pii okone bala lamawuato, mana koo yame pitaka nimbanga tumbi latane eyakola, nimbato owato pii loto, wandakali yangone tupa minakasa alene leaipia. Nimbato mana tika-pene tupa pitaka towa yanda pimawuato, Akali Andane okona asini tika-pene tupa minu koyalene. Nimbato mana koo utupane tepa wakale nembo natene, mee wato minu atalene okonemane nimba Satanena andopane gulo atele.

¹¹ Tene okonena, andipa Akali Andane okona kii tai-lene okomane nimba minu koyola-kola, nimba lee koo gulo atoto, oto kambua minditupa nai oko anda napulupele leaipia. Poloto wuane lea-kola, okone angi teke, mole yale mindimane Elimasana lene oko ombo ya-kola, undupi lamangua yaepia. Wuane pea-kola, bala lee mumu atoto, kii-mane mina anda-anda pua epoko puato, wandakali mindimane bala kii minuto, asia andawa leakale loto, aiya pua ateaipia. *

¹² Akali Andane okomane Elimasa balanga wuane pea-kola, gapomane akali kawane okomane mana okone andoto, Akali Andane okona pii leapili oko ale wato, enene wete ya lo bilipi leaipia.

Polo, Banapasa-la, Okonelapo Andiyoko Tano Okona Peapili Oko

¹³ Okone angi, Polopi, bala towa atu epoko pua ateaipai akali tupapi, utupane sipi mindina pitiyu, Paposa tano oko tepa alu, peainipia. Poto, utupane Pambilia potopin-jia okona tano Peka okona peakaiyu leaikola, Jone Maki bala akali utupane awua tepa alu, Jutusaleme peke leaipia. *

¹⁴ Peke lea-kola, Polopi, akali waka tupa bala towa atu Peka tano tepa alu poto, Pisitiya disitiki okona tano Andiyoko okona peakaiyu leainipia. Tano okonena atoto, Sambasa-angi utupane yakama Juta yamena lotu anda okona kolandaka loto peteaini-pia.

¹⁵ Lotu lo peteai-kola, akali mindimane Gotena pii wamba Mosesapi, potopesa akali tupapi, utupane-mane pepa peyo yaini tupana minditupa dili leaipia. Pii utupane dili lokoyo pea-kola, lotu anda oko ando atalaipai akali tupana mindimane Polopi, bala towa atu peteaini akali tupapi, utupane ateaininga poto, amene yame, yakamana mindimane wandakali peteyai tupana bilipi mo tai layawa, pii mindi lamauwakale nembo teando, lamai-yapape leaipia.

¹⁶ Wuane lea-kola, Polo bala ika loto, wandakali peteaini tupamane pii nalene, mee alewa atekale loto, balato kini-mane

* 13:2: Ap 9:15-16 * 13:3: Ap 6:6 * 13:5: Ap 12:12; 15:39 * 13:11: Ap 9:8 * 13:13: Ap 15:38

makande puato, Isatale tane wandakali, Gote yuku amawua lotu lo atalaini wandakali yame waka tupapi, yakamoto ale ala-pape leaipia.

¹⁷ Wamba Isatale tane wandakali tupana Gote okomane nanimana yumbane tupa balana yame ateakale leaipia. Matili utupane Isipi yuu okona atea-angi, balato wandakali utupane yame andane mindi gulaya alu, balana tai-lene okomane utupane Isipi yuu oko tepa yakale lalu, atu epeaipia. *

¹⁸ Epoto, mali paiyasa tukumindi tupa wandakali napalene yuu okona atoto, wandakali utupane-mane atapene tene mo ateaini tekeko, balato kenda-pene okone awua atoto, utupane moyo ateaiapia. *

¹⁹ Balato utupane moyo atoto, Kenane yuu okona wandakali yame yanasa paleaini tupa peyo watoto, yuu okone Isatale tanena yuu tene gulo yakale lo, yakama mayaepia. *

²⁰ Wamba Isatale tane wandakali tupa Isipi yuu okona peaini oto okona atoto, mali andete tukumindinga paiyasa yau tupa pea-kola, Goteto jasa mindimane Isatale tane tupa ando ateakale lo makimi laka peaipia. Makimi laka pea-kola, utupane yakama mindiki-mindiki lo Isatale tane wandakali tupa ando atama pulu, potopesa akali Samuale ateane gii okona gäu leansipia. *

²¹ Okone ang, Isatale yame wandakali utupane-mane kinji mindi gii loto, Gote lo tee leai-kola, Goteto Benjamene yame okona akali Kisá iwanane Solo lene oko utupanena kinji ateakale lea. Bala ateakale lea-kola, Solo bala mali paiyasa tukumindi kinji atoto, Isatale tane wandakali tupa ando ateaiapia. *

²² Atea-kola, matili Solo bala kinji ata na-peakale nembo toto, Goteto wandakali tupa lamawuato, nambato piape pipe lolowa tupa pitaka pulupeya akali mindi aiya pua atauwa-ko. Jesi iwanane Dapitito wuane pulupeya lo andoto, nambato bala epele eyo leaipia. Wuane lalu, Goteto Dapiti bala Isatale tane wandakali tupa kinji ateakale leaipia. *

²³ Bala kinji ateakale loto, Goteto potomisa pii mindi lo yata wato, nambato akali Dapiti yame okona mandiyene tupana mandiyene mindimane yakama molo-peke lolo epeakale lokale leaipia. Wuane lalu, matili balato potomisa pii leane pua puato, wandakali molo-peke lolane akali

Jisasa bala Isatale tane wandakali tupanga epeakale leaipia. *

²⁴ Jisasato balana piape oko bulupane tewa pita naenenga, ipa peya-maiyane akali Joneto Isatale tane wandakali tupa lamawuato, yakama pitaka yamapane peke loto, ipa mialapa lo pii lamawua ateaiapia. *

²⁵ Matili Joneto balana piape okone pikoyo puyale atoto, pii mindi wandakali tupa tipa puato, yakamoto namba akali api ya lo nembo teyaipe leaipia. Namba yakama molo-peke lolane akali oko jia. Bala matili epolopeya. Bala akali epene wete mindi ateya. Tene okonena, namba akali gene nayene okomane balana suu kee okona eyaka tita nalape-pene leaipia. *

²⁶ Apatakame yamena mandiyene tupapi, Gote yuku amawua lotu lo atalaini yame wandakali waka tupapi, yakama pitaka nalipana amene imalini yame ateyai. Jisasato wandakali tupa molo-peke lolo epolopeya loto, wamba Goteto potopesa akali minditupa-mane nanimangulu epeakale leaipia.

²⁷ Sambasa dindi lo Gotena piape akali tupamane potopesa akali utupanena pii pepa peleaini tupa dii leai-kola, wandakali Jutusaleme atalaini tupapi, utupanena akali kawane tupapi, utupane-mane pii utupane ale wato teke, pii utupanena tene tupa tatake yainipia. Utupane-mane tatake wato, Jisasato wandakali molo-peke lolo epeane nembo natene, bala kosimi loto, bala omeakale leansipia. Bala omeakale leansipia okonemane potopesa akali tupamane pii wamba pepa peleaini okone enene gulaya yainipia.

²⁸ Utupane-mane bala kosimi loto, peyo ome lolane tene mindi balanga ata naopey lo andeaini tekeko, utupane-mane Pailate lamawuato, Jisasa peyo ome laa leansipia. *

²⁹ Wuane lalu, wamba potopesa akali tupamane pii pepa peyoto, wandakali utupane-mane Jisasa balanga wua pulupeyai lo pepa peleaini tupa pitaka piyialeaipia. Piyiale leai-kola, matili bala ita malamandanga yukatane ateane oko yuunga mo tepa wato, akali lapo-mane bala mali peapilipia. *

³⁰ Mali peapili tekeko, Goteto Jisasa malinga ika laya yaepia.

³¹ Goteto bala malinga ika laya ya-kola, wandakali wamba bala towa atu Galili disitiki oko tepa alu Jutusaleme peaini tupa-mane bala andeakale loto, ole kambuangga Jisasato bala tane wandakali utupanenga mo pana aka peaipia. Wuane pea-kola,

* **13:17:** Ek 1:7; 6:6; 12:51 * **13:18:** Nam 14:34; Lo 1:31 * **13:19:** Lo 7:1; Jas 14:1 * **13:20:** Akal 2:16; 1Sa 3:20

* **13:21:** 1Sa 8:5,19; 10:20-24 * **13:22:** 1Sa 13:14; 16:12; Sam 89:20 * **13:23:** 2Sa 7:12-16 * **13:24:** Mt 3:1-4

* **13:25:** Jo 1:20,26-27 * **13:28:** Mt 27:22-23 * **13:29:** Mt 27:59-60

ole kambuanga utupane-mane bala andoto, andipa wandakali utupane-mane Juta yame wandakali tupa lamawuato, wamba Jisasa bala wua peane lalaini. *

³²⁻³³ Buku Sama okona sonjo lapone okomane loto, andipa namba nimbana Ayiane ateyo-kola, nimba nimbana iwanane atele layene eya. Ayiane Goteto Jisasa lamawuato, wuane lolopeya loto, wamba Goteto nanimana yumbane tupanga potomisa pii okone lamai-yaepia. Andipa Goteto Jisasa malinga ika laya yane okonemane potomisa pii okone enene gulaya yane oko andoto, nanimato Gotena pii layene epene oko yakama langeyema. *

³⁴⁻³⁵ Dee, akali mindimane pii mindi Gote lamaiyane oko Olo Tesamene buku Sama okona wua layene eya teke: Akali epene wete okomane nimbana piape pingeakale lo makimi lalu, nimbato bala yo tameakale lo ando konda napulupele layene eya. Dee, Gotena pii layene Olo Tesamene okona pepa pelene eya mindina Goteto wua leya: Nam-bato wamba kinji Dapiti towa potomisa pii mindi loto, minditaka epene wete tupa bala mauwakale lewane tupa andipa yakama gukale layene eya. Wuane layene eya pua teke, Goteto Jisasa malinga ika laya ya-kola, bala malinga peke loto, tamua napulu-peya. *

³⁶ Anu peakale nambato wuane leyope. Wamba Dapitito Gotena nembo-tene oko wato minu atoto, balana yame tupa moyo piape pua atalu, omeaipia. Omea-kola, balana yumbane tupa mali pitane atene yuu okona wandakali-mane bala mali peakola, balana umbaini oko tameaipia.

³⁷ Dapitina umbaini oko tameane tekeko, Goteto Jisasa malinga ika laya ya-kola, bala tamua naapeaipia.

³⁸⁻³⁹ Amene imalini yame, yakamato pii okone wayumane nembo talapale loto, nambato pii mindi yakama langeyo. Nanimana mana koo tupa pitaka-mane nanima andi latane atema-kola, Goteto loo Mosesanga mayane tupamane katulo nanima tita lo moto, wandakali nanimataika-pene gulaya nayane. Jia. Wuane tekeko, akali Jisasa okomane bala lo bilipi lene wandakali pitakana koo tene tupa apoto, yakama tita lo moto, wandakali tika-pene ateyai lalane lo yakamato nembo talapape. *

⁴⁰⁻⁴¹ Tene okonena, wamba Potopesa akali tupamane wua leainipia: Goteto pii mindi leane oko loto, nambato piape waka mindi-pene mindi yakama tombe-nenga pua ateyo layene eya. Wandakali

mindimane Gotena pii okone bilipi loto, Goteto piape okone peya lo lamba lalaini wandakali yakama langeando, yakamato balana pii okone bilipi nalolo-peyaiko. Bilipi na-lolaini wandakali yakamato Goteto piape pua ateya okone andoto, moko loto, omalapape. Wamba potopesa akali tupamane wuane leaini okonena, andipa ateyai wandakali yakamato bilipi nalene atolai-kola, kenda-pene okone yakamanga epolane. Waiwa ando atalapape. Poloto wuane leainipia. *

⁴² Poloto pii utupane lokoyo piyu, Banapasa towa atu kamaka moyale peapi-kola, balana pii alewa peteaini wandakali tupamane akali okonelapo lamawuato, Sam-basa mindi epola okona, liyambato pii okonena minditupa wetete tako pua langulu ipulupape leainipia.

⁴³ Wuane lalu, lotu lokoyo piyu, wandakali peteaini tupa lotu anda oko tepa wato, kamaka peainipia. Poto, Juta yame wandakalipi, yame waka wandakali minditupa Juta yamenya mana tupa pitaka wato minuto, lotu lo atalaini wandakali tupapi, utupanera kambua minditupa Polo, Banapasa-la, okonelapo peapili okona watama peainipia. Watama peai-kola, okonelapo-mane wandakali utupane mana lamawuato, Goteto yakama ondo wato, mee moyo atalane nembo tatawa atalapape leailipilia.

⁴⁴ Sambasa mindoko epea-kola, Poloto Gotena pii oko langeakale loto, tano okonena tane wandakali tupa pitaka epo amunguli peainipia.

⁴⁵ Wandakali kambua epo amunguli peaini utupane andoto, Juta yame wandakali tupamane Polo towa apiangtu puato, balato pii kopeta leya loto, bala ando lamba leainipia.

⁴⁶ Lamba leai-kola, Polo, Banapasa-la, liyambato yuku naene, wua leapilipia: Nalipato Gotena pii oko Juta yame wandakali yakama ini bulupane langipe-pene gulea-kola, langepa tekeko, yakamato koo piyaini mambele, yakama tane saka atapowa ata napene, yuu koo okona pupe-pene gulo atoto, Gotena pii okone ale naene, masia maiyaini. Tene okonena, nalipato Gotena pii oko Juta yame wandakali yakama dee lapone langi napene, wandakali yame waka tupa lamaipakale. *

⁴⁷ Gotena pii pepa pelene eya mindi-mane loto, nambato yuu eya tupa pitakana wandakali palu pula tupa molo-peke lokale nembo teyo. Tene okonena, nimbato nimbana pii layene epene oko lamaula nembo toto, nambato nimbana wandakali tupana ale

* ^{13:31:} Ap 1:2-3,8 * ^{13:32-33:} Sam 2:7 * ^{13:34-35:} Ais 55:3; Sam 16:10 * ^{13:38-39:} Lom 10:1-4 * ^{13:40-41:}

tii-pene gulo atola loto, nimba ate laya ewa. Wamba Akali Andane okomane wuane lea-kola, nalipato balana pii okone nembo toto, Gotena pii oko wandakali yame waka tupa lamaipakale. Polo, Banapasa-lamane wuane leapilipia. *

⁴⁸ Wuane leapi-kola, wandakali yame waka ateaini tupamane pii okone ale alu, wandakali wamba Goteto saka atapowa ateakale leane tupamane Akali Andane oko lo bilipi leainipia. Bilipi loto, epele wete wato, balana pii okone epene wete eya lo laiyu leainipia.

⁴⁹ Akali Andane oko lo bilipi lalu, wandakali utupane yakama potopinjia okona yuu ajako tupa pitakana puu toko loto, Akali Andane okona pii oko lo tawe yainipia.

⁵⁰ Utupane-mane wuane peaini tekeko, Juta yamena akali kawane tupamane yakamana lotu lo pityaini wanda gene yene tupapi, tano okona akali kawane tupapi, utupane lamawuato, yakamato kenda-pene andane tupa Polo, Banapasa-la, okone-laponga maiki piyapa leainipia. Wuane leai-kola, wandakali utupane-mane kenda-pene andane tupa Polo, Banapasa-la, okone-laponga maiki puato, akali okonelapo yakamana tano okonena ata naapeakale lo peyo wateainipia.

⁵¹ Peyo wateai-kola, koo tene yakamanga yane tupa andeakale loto, Polo Banapasa-la, okonelapo-mane kokoli mindi puato, liyambana kenenga kangalamu ateane tupa tanda lo tepa maiyu, liyamba Andiyoko tano oko tepa wato, Aikoniame tano okona peapilipia. *

⁵² Liyamba Andiyoko tepa alu peapili tekeko, Oli Sipitisa oko Jisasa lo bilipi lene wandakali tupanga epo tumbi latane ateakola, utupane-mane epelewa ateainipia.

14

Aikoniame Tano Okona Atoto, Piape Peapili Oko

¹ Polo, Banapasa-lamane wamba Andiyoko tano okona atoto, Gotena piape peapili pua teke puato, liyamba Aikoniame tano okona atoto, Juta yamena lotu anda okona kolandaka loto, Gotena pii oko lamai-yapilipia. Pii kuai lo wete lamaiyapi-kola, Juta yamepi, Gitiki yamepi, yame okone-lapona wandakali kambua-mane Jisasa lo bilipi leainipia.

² Kambua-mane bilipi leaini tekeko, Jisasa lo bilipi naleaini Juta yame wandakali tupamane wandakali yame waka tupana nembo-tene koo mindi mina ika

leai-kola, utupane-mane Jisasa lo bilipi lene wandakali tupa towa embowa ateainipia.

³ Utupane-mane embowa ateaini tekeko, Polo, Banapasa-la, liyamba yuku naene, satete kambuanga Aikoniame tano okona atoto, Akali Andane okomane wandakali tupa ondo wato, mee moyalanlo lo wandakali tupa pii lamawua ateapili-pia. Pii lamawua ateapele okone enene lo andawa loto, Akali Andane okomane akali okone-lapona kininga metekolo piape waka mindi-pene tupa peainipia. *

⁴ Akali okonemane wuane peane tekeko, Aikoniame tano okonena wandakali tupa yapu lo lapo peainipia. Minditupa-mane aposolo akali okonelapo epele yai-kola, minditupa-mane Juta yame oko epele wato, akali okonelapo embo yainipia.

⁵ Matili Juta yamepi, wandakali yame waka tupapi, utupanena akali kawane tupapi, utupane-mane Polo, Banapasa-la minuto, ana-mane peyo ome lamakale leainipia. *

⁶ Wuane leai-kola, akali okonelapo-mane pii okone ale wato, Laikonia disitiki okona balaka poto, ateapili-pia. Okonelapo-mane disitiki okonena atoto, Depi tano okopi, Lisata tano okopi, dee tano okone-lapona yuu mandaka gulo yane tupapi, utupanena epoko pua ateapili-pia.

⁷ Yuu utupanena epoko pua atoto, okonelapo-mane Gotena pii layene epene oko wandakali tupa lamawua ateapili-pia.

Lisata Tano Okona Atoto, Piape Peapili Oko

⁸ Lisata tano okona akali kee koo mindi peteaipia. Akali okone bala angini-mane mandeane-angi kee koyene mandea-kola, alu mindikpi mindi bala asini epoko napinyaepia.

⁹ Alu mindi Poloto Gotena pii oko wandakali tupanga lamawua ateakola, akali kee koo okonemane balana pii okone aleva peteaipia. Alewa petea-kola, Poloto bala andatawa yoto, akali okonemane Jisasa lo bilipi leya okomane balana kene koo oko katulo mo kuai laya olopeya lo andeaiapia.

¹⁰ Andoto, Poloto pii taimane loto, nimba ika loto, nimbana kene okolapo tika pua ata leaipia. Wuane lea-kola, akali okone bala taimane ika lo atoto, asini epoko peainipia.

¹¹ Epoko pea-kola, wandakali kambua amunguli pua ateaini tupamane piape tai-lene Poloto peane okone andeainipia. Andoto, Laikonia pii loto, nanimana gote Emesa, Susa-la, okonelapo ati kenga atalu, wandakali enene guloto, nanima ateyamanga epeyapi lo pii taimane leainipia. *

¹² Wuane lalu, wandakali utupane-mane andeai-kola, Polo bala akali kawane oko atoto, pii kambua lalae-ya lo andeaini-pia. Andoto, utupane-mane bala gote Emesa lene oko ateya lalu, Banapasa bala gote Susa lene oko ateya leainipia.

¹³ Tano okonena lome asia lomba kamaka ongane owato gote Susa lene okona lotu anda mindi atalaepia. Owato gote Susa lene okonena pitisa akali okopi, wandakali ateaini tupapi, utupane-mane Polo, Banapasa-la, liyamba nanimana gote okonelapo ateyapi loto, opa mindi maimakale nembo teainipia. Wuane nembo toto, pitisa akali okonemane lome asia lomba ongane yia bulumako maipa minditupa atu epoto, ita dini yati-pene minditupa awua epeaipia.

¹⁴ Utupane-mane Polo, Banapasa-la, okonelapo opa mauyale epeaini tekeko, wuane peyai lene oko ale wato, akali okonelapo liyamba mini kenda wato, liyambana singilisa peapili okolapo minu liti leapilipia. Wuane piyu, liyamba wandakali kambua epo amunguli peaini tupana tombenbenia tailo epo atoto, pii taimane wua leapilipia.

¹⁵ Amene yame, nalipa akali enene yakama ateyai okonepene teke ateyapa-ko. Anu peakale yakamato nalipa opa guyale yia bulumako utupane atu epeyaipe. Gote saka ateya okomane yuupi, ati kengapi, ipa solewatapi, utupanena eya tupa pitaka yakale lea-kola, yainipia. Balato wuane peane okonena, yakamato owato gote tupa opa maiyaini mana oko angini mindi jia. Yakamato mana okone awua tepa alu, yamapano peke loto, Gote saka ateya oko lo bilipi lalapape. *

¹⁶ Enene, wamba yumbane tupa ateaini-angi, wandakali yame ateaini tupamanne yakama tanena mana tupa wato minu ateai-kola, Goteto andoto, utupane-mane wuane peakale lo ando konda yaepia. *

¹⁷ Wamba Goteto wuane peane tekeko, bala ata too puu ata naapeaipia. Jia. Ole dindi lo Gote bala ateyo lo mo pana wato, balato yakama towa mana epene tupa minu atalane. Balato kingi ati kenga ato epeakale lalane okomane tomo epene kambua tupa ee tupana ika laya alone. Tomo kambua giyu, balato yakamana mini yamapa-la mo epele piya alone leapilipia. *

¹⁸ Aposolo akali okonelapo-mane wuane leapili tekeko, utupane-mane liyamba lo opa mauyale peaini okone konda yakale loto, aiya wete wato, jia leapilipia.

¹⁹ Polo, Banapasa-lamane wuane leapili kola, matili Juta yame wandakali minditupa Andiyoko, Aikoniame-la, tano okone-lapona atoto, Lisata tano okona epeainipia. Epoto, utupane-mane wandakali kambua tupana nembo-tene mina ika leai-kola, Polo ana-mane peleaini-pia. Peyalu, bala oma-laya nembo toto, balana umbaini oko kilau lo awua poto, tano okonena kamaka yata alu peainipia. *

²⁰ Utupane-mane wuane peaini tekeko, Jisasa lo bilipi lene wandakali tupa Polo peya-yene yane ongane epoto, bala ato mapu peai-kola, Polo bala lee toto, ika lalu, tano okonena peke leaiipia. Peke lalu, anate-lene Polo, Banapasa-la, liyamba Lisata tano oko tepa alu, Depi tano okona peapilipia.

*Polo, Banapasa-la, Liyamba Andiyoko
Tano Okona Peke Leapili Oko*

²¹ Depi tano okona poto, liyambato Gotena pii layene epene oko tano okonena tane wandakali tupa lamaiyapi-kola, wandakali kambua-mane Jisasa lo bilipi leainipia. Bilipi leai-kola, matili liyamba Lisatapi, Aikoniamepi, Andiyokopi, tano utupanena peke leainipia.

²² Tano utupanena peke loto, liyambato Jisasa lo bilipi lene wandakali ateaini tupa lamawuato, nanimato wamba ini kendapene kambua awua atalu, matili namina Gotena yuu epene okona katulo polopeyama leapilipia. Wuane lalu, okonelapo-mane wandakali utupanena bilipi oko minu tai laya wato, utupane-mane Jisasa bilipi leyama nayu leakale leapilipia. *

²³ Wuane lalu, okonelapo-mane Gote lo nembo toto, tomo nanene atalu, akali esamane minditupa-mane sosa ateaini tupana mindiki-mindiki lo ando ateakale lo makimi leainipia. Makimi lalu, liyambato pote loto, Akali Andane okomane bala lo bilipi lene wandakali tupa moyo ando ateakale loto, utupane balana kininga tepa yapilipia.

²⁴ Wuane piyu, Polo, Banapasa-la, liyamba Pisitiya disitiki okona asini poto, Pambilia potopinjia okona peakaiyu leapilipia.

²⁵ Potopinjia okonena tano Peka lene okona poto, liyambato Gotena pii oko wandakali ateaini tupa lamaiyu, matili Atalia tano okona kili leapilipia.

²⁶ Tano okonena kili lalu, liyamba sipi mindina pitiyu, Andiyoko tano okona peapilipia. Wamba Polo, Banapasa-la, liyamba Andiyoko tano okonena ateapi-kola, Kitisene wandakali tupamanne pote loto, Gote nimbato akali okolapo ondo

* ^{14:15:} Ap 10:26; Sam 146:6 * ^{14:16:} Ap 17:30-31 * ^{14:17:} Jet 5:24 * ^{14:19:} Ap 17:13; 2Ko 11:25-26 * ^{14:22:} Ap 15:32; 1Tes 3:1-4

wato, moyo atape leainipia. Wuane lalu, wandakali utupane-mane akali okonelapo Gotena kininga yata wato, okonelapo-mane Gotena piape pulu peakale leainipia. Andipa akali okonelapo-mane Gotena piape minditupa piyu, Andiyoko tano okonena peke leapilipia. *

²⁷ Peke lalu, Polo, Banapasa-lamane Andiyoko sosa okona wandakali tupa epo amunguli peakale lalu, liyambato wandakali utupane lamawuato, Goteto wandakali yame waka tupamane Jisasa lo bilipi leakale loto, asini lumbu tepa yakola, utupane-mane bilipi leaini leapilipia. Wuane loto, Goteto liyamba towa atu atoto, piape wua peane lo lamai-yapilipia. *

²⁸ Liyambato pii utupane wandakali tupa lamaiyu, Andiyoko tane Kitisene tupa towa atu ana kambua ateapili-pia.

15

Jutusaleme Sosa Okona Amunguli Peaini Oko

¹ Polo, Banapasa-la, liyamba Andiyoko tano okona ateapi-kola, akali minditupa Jutiya disitiki okona ato epeainipia. Epoto, utupane-mane Andiyoko tane Kitisene tupa mana lamawuato, wamba Mosesato mana mindi yata wato, yakama akali tupamane yakamana yala-pene umbaini oko katu apialapape leaipia. Mosesato mana okone yata yaneko. Andipa yakamato mana okone wato mina napeainido, Goteto yakama molo-peke nalolo-peya leainipia. *

² Wuane leai-kola, Polo, Banapasa-la, liyamba yatka wato, utupane towa pii yanda andane mindi pimawua ateapele-pia. Pii yanda pua ateapi-kola, Kitisene wandakali tupamane yakamana akali minditupa yapa lo moto, yakama Polo, Banapasa-la towa Jutusaleme yuu okona pulupape leainipia. Poto, Jutusaleme sosa okona akali kawanepi, aposolo akalipi, utupane towa amunguli puato, Jutiya tane tupa towa pii yanda pua ateyama okone lo tika piyapape leainipia. *

³ Pii okone lo tika pulu peakale leai-kola, akali utupane yakama Jutusaleme moyole, Pinisia, Samatiya-la, disitiki okolapona asini peainipia. Poto, utupane-mane disitiki okone-lapona Kitisene wandakali tupa lamawuato, Goteto wandakali yame waka tupana yamapano mo lawa pipiane lo lamaima teke peainipia. Wuane lo lamaima peai-kola, disitiki okone-lapona Kitisene wandakali ateaini tupamane pii okone ale wato, epele wete yainipia.

⁴ Andiyoko tano okona ato akali epeaini utupane yakama Jutusaleme peakaiyu leai-kola, Jutusaleme sosa okona Kitisene wandakali tupapi, sosa okonena akali kawane tupapi, aposolo akali tupapi, utupane pitaka-mane akali epeaini utupane yakama wayu wete epalaiyà lo lameainipia. Lameai-kola, Polo, Banapasa-la, liyambato Gote bala nalipa towa atu atoto, piape wua peane lo lamai-yapilipia. *

⁵ Wuane lo lamai-yapili tekeko, Patasai yame okona Kitisene akali minditupamane pii okone ale wato, ika loto, wandakali yame waka utupane yakama nanimana sosa okona tako pulu ipumakale nembo teaindo, yakamato akali utupane yala-pene umbaini oko katu apoto, Mosesato loo yata yane tupa wato minu ateakale lo lamaipe-pene leainipia.

⁶ Wuane leai-kola, aposolo akali tupapi, sosa okona akali kawane tupapi, utupane-mane pii okone lo tika puyale amunguli peainipia.

⁷ Amunguli puato, utupane-mane pii kambua loto, pii yanda pua peteai-kola, Pita bala ika lo atoto, pii mindi leane oko loto, amene yame, wandakali yame waka tupamane Gotena pii layene epene oko ale wato, bilipi leakale nembo toto, wamba Goteto balana piape pulane tupa tale puato, nambato balana pii okone wandakali utupane lamawua atola loto, balato namba yapa lo meane okone yakamato nembo teyai okoni leaipia. *

⁸⁻⁹ Goteto nanima Juta yame wandakali tupanga mana mindi wato minalu, wandakali yame waka tupanga mana waka mindi wato minalu, napiyane. Jia. Balato Oli Sipitisa oko nanima Juta yame wandakali tupanga geane, wuane pua teke wandakali yame waka tupapi mayane. Wandakali pitakana nembotene oko andalane Gote okomane wuane peane okonemane balato wandakali yame waka tupa molo-peke lokale lo andawa leane. Wandakali yame waka utupane-mane Jisasa lo bilipi leyai oko andoto, balato utupanena koo tupa apoto, balana wenonga utupane kalato nayene ateakale laya yane. *

¹⁰⁻¹¹ Goteto mana okone wato minuto, wandakali yame waka utupane molo-peke leane. Wuane pua teke nanima Juta yame yumbane ateaini tupamanepi, naniyatopi, mana Mosesato yata yane tupa katulo tika pua wato mina napema-kola, Akali Andane Jisasa Kataisato nanima ondowa moyoto, molo-peke leane lo bilipi leyama.

* 14:26: Ap 13:1-2 * 14:27: Ap 15:4,12 * 15:1: Ga 5:2-6 * 15:2: Ga 2:1-3 * 15:4: Ap 14:27 * 15:7: Ap 10:1-43 * 15:8-9: Ap 10:44; 11:15

Okone bilipi loto teke, anu peakale yakamato andipa kenda-pene mindi wandalaki yame waka tupanga yata wato, utupanemanane mana Mosesato yata yane tupa kuai lo wato mineakale leyai okonemane Gote minu mandeke peyape. *

¹² Pitato wuane lea-kola, wandalaki kam-bua amunguli pua peteaini utupane-mane pii mindi naleainipia. Pii mindi naleakola, Polo, Banapasa-la, okonelapo-mane wandalaki yame waka tupana tombenga nalipana kininga Goteto metekolo piape andane tupa wua peane lo pii temane minditupa lamai-yapilipia.

¹³ Polo, Banapasa-la, okonelapo-mane pii okone lokoyo peapi-kola, Jemesato wua leaipia: Amene yame, nambato pii mindi leyo oko yakamato ale alapape. *

¹⁴ Wandakali yame waka ateyai tupana wandalaki minditupa Gotena yame guleakale loto, Goteto wandalaki utupane wamba ini lamolo epeane lo, Saimone Pitato yakama langiya.

¹⁵ Wamba potopesa akali tupamane pii okonepene teke mindi pepa peleaini-pia.

¹⁶⁻¹⁸ Pepa okonemane Akali Andane Gotena pii mindi loto, Dapiti yame oko sele anda mindi lai loto, pataka peyatane atalane okonepene gulo ateya leaipia. Dapiti yame okonepene gulo ateya-kola, wandalaki yame waka tupa nambana yame wandalaki ateakale lata ewane tupa pitakanane Akali Andane oko aiya peakale nembo teyo. Wuane nembo toto, matili namba epo peke loto, Dapiti yame okona anda okone waa pulu-peke loto, sele anda okonena minditaka koyene tupa nambato dee lapone waa pulu-peke lokale teke. Wamba wete Akali Andane okomane matili wuane pukale leane lo pepa pelene eya. *

¹⁹ Tene okonena, Gote lo bilipi loto, yamapanne peke leaini wandalaki yame waka utupanenga nanimato kenda-pene andane mai napimakale. Jia.

²⁰⁻²¹ Wamba wete atama ipulu, oto andipa ateyama okona giau loto, Sambasa dindi lo tano eyai tupa pitakana Juta yamemanane Mosesana pii pepa pelene eya oko dii lalaini. Dii lalu, balana pii layene oko wandalaki tupa lamawuato, mana minditupa mina napiyapape lalaini nembo toto, nanimato wandalaki yame waka tupana pepa peyoto, wua lamakale: Wandakalimanane owato gote tupa lo opa maiyene tomo tupa Gotena leenga kalato atene guleya okonena, yakamato tomo utupane naa napiyapape. Pamuku napiyape. Tundupa naa na-piyapape. Dee, koa ekapi, ema-pene yame wakapi, utupane nongonga omene

tupana tundupa piti-pata okonepene tupa naa na-piyapape. Mana utupane wato mina na-piyapape loto, nanimato wandalaki yame waka tupana pepa peyo pee lamakale. Jemesato wuane leaipia. *

Wandakali Yame Waka Tupana Pepa Poyo Pee Leaini Oko

²² Jemesato wuane lea-kola, aposolo akali tupapi, sosa okona akali kawane tupapi, sosa okona wandalaki amunguli peteaini tupapi, utupane pitaka-mane loto, nanimato akali lapo yapa lo moto, Polo, Banapasa-la, okonelapo towa atu Andiyoko tano okona peakale lamakale leainipia. Wuane loto, utupane-mane andeaikola, Jutasala balana gene mindi Basapasa lene okola, Sailasa-la, okonelapo Kitisene wandalaki ateaini utupanena akali kawane gulo ateapi oko andeaini-pia. Andoto, utupane-mane akali okonelapo Polo, Banapasa-la towa Andiyoko yuu okona peakale leainipia.

²³ Akali utupane peakale loto, utupanemanane pepa mindi peyoto, Sailasa, Jutasala, akali okonelapo-mane pepa okone awua peakale leainipia. Pepa okone peyoto, utupane-mane wua leainipia: Nanimaposolo akalipi, akali kawanepi, yakamana amene tupa ateyama. Andiyoko tano okopi, Sitiya potopinjia okopi, Silisia potopinjia okopi, utupanena wandalaki yame waka Kitisene tupa yakama nanimana amene tupa ateyai-kola, nanimato yakamana pepa oko peyo epe loto, yakama pitaka kuai lo atalapape leyama.

²⁴ Wamba nanimana akali minditupamanane pii minditupa yakama languato, yakamana nembo-tene tupa minu kee yaini okonena, yakama anu pimape lo tatake aka pua ateyai lene oko nanimato ale ema. Akali utupane-mane wuane peaini tekeko, nanimato akali utupane yakama wuane piyapape nailema. Jia.

²⁵⁻²⁷ Akali utupane-mane wuane peaini lene oko ale wato, andipa nanimato yamapanne mindiki paluto, Jutasala, Sailasa-la, okonelapo yapa lo moto, yakama ateyaina epeakale leyama. Liyamba epoto, pii nanimato leyama tupa yakama langulu-peyapi. Polo, Banapasa-la, okonelapo-mane nanimana Akali Andane Jisasa Kataisana gene oko lo panawa ateyapi-kola, akali minditupa-mane akali okonelapo ome lamakale nembo teyai tekeko, akali okonelapo-mane omolopale lo yuku naene, Gotena piape okone pua atalapili. Nanimatowa yamapanne yo epelewa atalamane

* ^{15:10-11:} Mt 11:29-30; Ga 2:14-16; 3:10-12; Ep 2:5-10

* ^{15:13:} Ga 2:7-10 * ^{15:16-18:} Emo 9:11-12 * ^{15:20-21:}

akali okonelapo towa atu Jutasa, Sailasala, yakama ateyainga epeakale lemando, kuai lolopeya leyama.

²⁸ Oli Sipitisa oko nanima towa atu ateakola, nanimato kenda-pene kambua yakamanga yata aa napimakale nembo toto, pii mindi lo yake puato, wua leyama: *

²⁹ Wandakali-mane owato gote tupa lo opa maiyene tomo tupa naa na-piyapape. Yakamoto pamuku na-piyapape. Tundupa naa na-piyapape. Dee, koa ekapi, ema-pene yame wakapi, utupane nongonga omene tupana tundupa piti-pata okonepene tupa naa na-piyapape. Yakamoto mana utupane peya wanju atape-pene leyama. Yakamoto wuane peaindo, yakamana mana okone kuai-lene yolopeya. Yakama kuai lo atalapape. Jutusaleme sosa okona wandakali tupamane pepa okone peyoto, wuane leainipia.

³⁰ Wandakali utupane-mane pepa okone peyoto, awua peakale leai-kola, akali utupane-mane pepa okone mo awua, Andiyoko tano okona kili leainipia. Kili lalu, utupane-mane Andiyoko tane Kitisene wandakali ateaini tupa epo amunguli peakale loto, pepa okone wandakali utupane mayainipia.

³¹ Mayai-kola, Andiyoko tane Kitisene wandakali tupamane pii epene pepanga pelenye yane tupa dii lo andeaini-pia. Dii lo andoto, pii utupane-mane yakama mo tai laya olopeya nembo toto, wandakali utupane-mane epele yainipia.

³² Andiyoko tane Kitisene wandakali tupamane epelewa ateai-kola, Banapasa, Sailasa-la, liyamba potopesa akali atoto, pii epene kambua Kitisene wandakali utupane lamawuato, utupane minu tai laya yapilipia.

³³ Akali okonelapo-mane piape okone pua atoto, ole minditupa Andiyoko tano okona ateapi-kola, Andiyoko tane Kitisene wandakali tupamane okonelapo lamawuato, liyamba mini epene palu, liyamba epeakale leaini wandakali tupa ateaiinga peke lalapape leainipia.

³⁴ [Utupane-mane wuane leaini tekeko, Sailasa bala Andiyoko atokale nemboto ateaiapia.]

³⁵ Okone ang, Polo, Banapasa-la, liyamba Andiyoko yuu okona atoto, akali minditupa towa atu Gotena piape oko puato, Akali Andane okona pii layene epene oko wandakali utupane mana lamawua ateainipia.

*Polo, Banapasa-la, Okonelapo Puu Toko
Leapili Oko*

³⁶ Ole minditupa pea-kola, Poloto Bana-pasa lamawuato, wamba nalipa tano kam-bua tupana epoko puato, Akali Andane okona pii oko wandakali tupa lamawua atepa okoni. Andipa nalipa tano utupane pitakana peke loto, Kitisene wandakali ateyai utupane anu pua ateyaipe lo ando epoko pipakale leaiapia.

³⁷ Wuane lea-kola, Banapasato Jone gene mindi Maki lene oko liyamba towa atu makale leaiapia. *

³⁸ Banapasato wuane leane tekeko, Poloto bala lamawuato, wamba nanima Pambilia potopinjia okona atema-angi, akali okone bala nalipa towa piape pua atama nalene, nalipa awua tepa alu, peke lea-ko. Andipa bala nalipa towa atu puu napeakale, jia leaiapia. *

³⁹ Poloto wuane lea-kola, liyamba yataka aka puato, pii yanda piyu, mina mindiki lo piape pua ata napipakale loto, waka-waka puu toko leapilipia. Pua toko lalu, Banapasato akali Maki okone bakale ipu loto, sipi mindina pitiyu, Saipatasu yuu okona peapilipia.

⁴⁰ Peapi-kola, Poloto Sailasa bakale ipu loto, liyamba moyale peapi-kola, Kitisene wandakali tupamane akali okonelapo lamawuato, Akali Andane okomane liyamba onto wato moyakale. Liyamba pulupape leainipia.

⁴¹ Wuane leai-kola, Polo bala Sailasa towa atu Sitiya disitiki okola, Silisia potopinjia okola, okone-lapona poto, yuu okone-lapona sosa ateaini tupana Kitisene wandakali peteaini tupa mo tai layawa epoko pua ateapili-pia.

16

*Timoti Bala Polo, Sailasa-la, Okonelapo
Towa Atu Peaini Oko*

¹ Polo bala Depi tano okona pulu, Lisata tano okona poto, andea-kola, Kitisene akali Timoti lene mindi tano okonena ateaiapia. Timoti balana angini oko Jisasa lo bilipilene Juta yame wanda mindi peteane tekeko, balana Ayiane oko bala Gitiki yame mindi pia. *

² Aikoniamie, Lisata-la, tano okone-lapona Kitisene wandakali tupamane Timoti bala akali epene mindi ateya leainipia. *

³ Wuane leai-kola, Poloto Timoti bala towa atu bakale nembo teane tekeko, tano okonena Juta yame wandakali ateaini tupamane Timotina Ayiane oko bala Gitiki yame nembo toto, Timotina yala-pene umbaini oko kati napene ateya nembo teaini

* 15:28: Mt 23:3-4 * 15:37: Ap 12:12,25 * 15:38: Ap 13:13; Kol 4:10 * 16:1: Ap 14:6; 2Ti 1:5 * 16:2: Pl

tekepia. Wuane nembo teai-kola, Poloto Timotina yala-pene umbaini oko katu apia-maiyaepia.

⁴ Wamba aposolo akalipi, akali kawanepi, utupane-mane Jutusaleme atoto, pii minditupa lo yake puato, yata yai-kola, Polopi, Sailsapi, Timotipi, utupane tano minditupana poto, pii utupane wato minalapape lo Kitisene wandakali tupa lamai-yainipia. *

⁵ Lamai-yaikola, sosa tupana wandakali peteaini tupana bilipi oko tai gulea-kola, ole dindi lo wandakali waka minditupa sosa tupana epo tako piki peainipia.

Poloto Kombeya-mane Masetonia Tane Akali Mindi Andane Oko

⁶ Matili Polopi, Sailsapi, Timotipi, utupane Esia potopinjia okona moyale peai-kola, Oli Sipitisa okomane akali utupane-mane Gotena pii oko Esia potopinjia okonena lamalu polaini, jia leaipia. Wuane lea-kola, akali utupane yakama Pitinjia, Galesia-la, potopinjia okone-lapona asini peainipia. *

⁷ Poto, akali utupane yakama Misia disitiki okona peakaiyu lalu, Bitinia potopinjia okona moyale peai-kola, Jisasana sipitisa okomane akali utupane lamawuato, yakama Bitinia potopinjia okonena napulupape leaipia.

⁸ Jia lea-kola, akali utupane yakama Misia disitiki okonena asini poto, Totasa tano okona kili leainipia.

⁹ Kili lalu, utupane yakama tano okonena paleainipia. Paluto, Poloto kombeya-mane andene gulo andea-kola, Masetonia tane akali mindimane ika lo atoto, Polo ee loto, nimbato ipa solewata kalo piyu, Masetonia potopinjia okona epoto, nanima moyolo ipu leanga andeaipia.

¹⁰ Poloto okone andoto, nanima langea-kola, nanimato Gotena pii oko Masetonia tane wandakali tupa lamalu pulupale lo balato nanima ee lala nembo tema. Wuane nembo toto, wamba kapoyale nanima Masetonia potopinjia okona makale loto, polane asini aiya pema.

Wanda Litiya Lene Mindi Bala Kitisene Guleane Oko

¹¹ Masetonia potopinjia okona moyale asini mindi aiya pua andalu, nanima Totasa tano okona atoto, sipi mindina pitiyu, yuu ailene Samotesa okona tika pua pema. Pulu, anate-lene nanima sipi okonena teke pitiyu, Niapolisa tano okona pema.

¹² Niapolisa tano okonena pulu, nanima sipi okone tepa alu, Pilipai tano okona pulu, ole minditupa atema. Lomo tane tupamane tanu okone ando ateai-kola, tano okone

Masetonia potopinjia okona tano kawane yane.

¹³ Tano okonena kamakasa-tole ipa mindi epo pea-kola, ipa okonena matenenga Juta yame-mane pote lalaini panda mindi yolopeya nembo tema. Wuane nembo toto, Sambasa oto okona nanima tano okonena ende asia lomba okona kamaka poto, ipa matene ongane pema. Poto petema-kola, wanda minditupa ipa matene ongane epo amunguli pua peteai. Wanda utupane amunguli pua peteai oko andoto, nanima utupane towa pii lo petema.

¹⁴ Pii lo petema-kola, Gote lo lotu lalane wanda Litiya lene mindimane pii nanimato lemane tupa alewa petea. Tayataita tano wanda okonemanemane lapalapa tundupanepa tupa salimi loto, bisanisa pua pitiyaepia. Akali Andane okomane wanda okonena yamapane mopeke laya ya-kola, wanda okonemanemane pii Poloto leane tupa wayumane ale ya.

¹⁵ Ale ya-kola, nanimato wanda okonepi, bala towa atu anda mindikina paliyaini tupapi, utupane ipa mia-maema. Wuane pema-kola, wanda okonemanemane nanima languato, nambato Akali Andane oko lo bilipi leyo nayu lele nembo teaindo, yakama nambana andaka pitimakale ipulupape lea. Balato wuane loto, nanima ipulupa lo ayia ya-kola, nanimato balana pii okone ale alu, balana andaka pema.

Polo, Sailasa-la, Okonelapo Pilipai Tano Okona Katapusa Andaka Paleapili Oko

¹⁶ Matili ole mindi nanima Juta yame-mane pote lalaini panda okonena moyale pema-kola, katapusa piape pua pitiyanne wana mindi asininga malanda ema. Wana okone balanga sipitisa koo mindi ateyakola, balato katulu minditaka matili pulane tupa wua pulupeya lolapanalaepia. Wana okonemanemane piape okone pua peteaya-kola, bala ando atalaini akali tupamane muni kambua mialaini-pia.

¹⁷ Wana okonemanemane Polopi, nanimapi, pemane okona wata awua epoto, pii taimane lama epoto, akali utupa ati kenga wete atene Gote okona piape akali tupa atoto, Goteto wua puato, yakama mopeke lolopeya lo utupane-mane yakama langu ateyai okoni lea. *

¹⁸ Ole kambuangga wana okonemanemane Polo watama epoko puato, pii mindiki okone angu lama pea-kola, matili Poloto pii okone ale apene embo wete ya. Embo wete wato, bala anda-peke loto, wana okonenga sipitisa koo ateyane oko lamawuato, nambato Jisasa Kataisana gene oko loto, wana oko

* 16:4: Ap 15:23-29 * 16:6: Ap 18:23 * 16:17: Mk 1:24

tepa alu, nimba puu leyo lea. Wuane lea-kola, wamba kapoyale okone angi teke, sipi-tisa koo okonemane wana okone tepa alu pea.

¹⁹ Pea-kola, wana okone ando atalaini akali tupamane yakamana muni kambua mialaini asini oko Poloto kando leya nembo teainipia. Wuane nembo toto, utupaneman Polo, Sailasa-la, okonelapo minu kilau lo awua wandakali amunguli piyaini ama okona poto, tano okona akali kawane tupa ateatinga peai.

²⁰⁻²¹ Utupane-mane Polo, Sailasa-la jasa tupana wenonga ate loto, utupane lamawuato, Lomo gapomane okomane mana jia lene tupa Juta yame akali okolapomane nanima mana languato, yakamato mana utupane wato minalapa leyapi. Wuane loto, okonelapo-mane nanimana tano okona wandakali tupana nembo-tene waka mindi mo paliya aka puato, kendape mindi mina ika leyapi leai. *

²² Wuane leai-kola, wandakali kambua epo amunguli peaini tupamanepi, akali okone-laponga koo tene minditupa aimo lo pii leai-kola, jasa tupamane akali okonelapona tona peapili tupa taimane minu litlo apoto, akali minditupa-mane kelewa kanda-mane peleakale leai. *

²³ Peleakale leai-kola, utupane-mane akali okonelapo ole kambuang kelewa kanda-mane taimane peyalu, katapusa anda okona aindaka leai. Aindaka loto, utupane-mane katapusa ando atalane akali onda oko lamawuato, nimbato akali okolapo wayumane wete ando atape leai.

²⁴ Wuane leai okone ale wato, katapusa ando atalane akali okonemane akali okonelapo katapusa anda okona lumu anda-pango wete ateane mindina andi lo aindaka leaipia. Aindaka loto, balato akali okone-lapona kene okolapo ita palaja lapo kee polane asia tombe layene mindina tombenenga paleakale loto, ita palaja okonelapo mina mindiki loto, loko peleapia.

²⁵ Wuane pea-kola, utulu tombe okona Polo, Sailasa-lamane Gote lo pote loto, sojo lo peteapi-kola, katapusa anda okonena andi latane paleaini wandakali waka tupa-mane alewa peteaini-pia.

²⁶ Alewa peteai-kola, yuu titiyawi andane mindi leane okomane katapusa anda okonena pingina ateane tupa minu ema-ema puato, katapusa anda okonena asia lomba tupa pitaka lumbuto, wandakali andi latane ateaini tupa pitakana sene ende tupa mee titi leaipia.

²⁷ Wuane pea-kola, katapusa anda ando atalane akali oko bala paliyu, lee toto andea-kola, katapusa anda okona asia lomba tupa pitaka lumba-yene yoo pea oko andeaipia. Andoto, wandakali katapusa paleaini tupa pitaka palaka palaiya nembo toto, balana kandepa luu mandeane oko kilau lo moto, bala tane peyo ome loyale peaipia. *

²⁸ Bala tane peyo ome loyale peane tekeko, Poloto pii taimane loto, nanima pitaka katapusa anda okona peteyamako. Nimbato nimba tane minu koyolene leaipia.

²⁹ Wuane lea-kola, katapusa anda ando atalane akali okomane akali mindi lamawuato, nimbato ale mindi kayu awua ipu leaipia. Ale okone moto, bala tailo poto, anda lumu Polo, Sailasa-la, okonelapo paleapi okona kolandaka leaipia. Kolandaka loto, bala yukuwa putiti peyoto, Polo, Sailasa-lana kene yapili organe tombawua leaipia.

³⁰ Tombawua lalu, bala ika loto, akali okonelapo atu kamaka peaipia. Poto, balato akali okonelapo tipa puato, akali andane lapo, Goteto namba molo-peke leakalenga, nambato anu puape leaipia. *

³¹ Wuane lo tipa pea-kola, akali okonelapo-mane bala lamawuato, nimbato Akali Andane Jisasa lo bilipi lape. Bala lo bilipi lole-kola, Goteto nimbapi, nimbana andaka atu paliyaini wandakali tupapi, yakama pitaka molo-peke lolopeya leapilipia.

³² Wuane lalu, Polo, Sailasa-la, okonelapo-mane Akali Andane okona pii oko akali okonepi, balana andaka atu paliyaini tupapi, utupane pitaka lamai-yapilipia.

³³ Wuane lo lamaiyapi-kola, utulu okone angi teke katapusa anda ando atalane akali okonemane akali okonelapo atu poto, liyambana tete peane tupa wasa-wasa peya-maiyaepia. Wuane pea-kola, Polo, Sailasa-la, okonelapo-mane balapi, balana andaka paliyaini tupapi, utupane pitaka ipa mia maiyapili-pia.

³⁴ Wuane peapi-kola, balapi, balana andaka paliyaini tupapi, utupane pitaka-mane Gote lo bilipi loto, epele andane wete yainipia. Epele wato, katapusa anda ando atalane akali okonemane akali okonelapo atu bala paliyane anda kenga okona poto, tomo neakale mayaepia.

³⁵ Anate-lene upa pitane katapusa ando atalane akali okonemane akali okonelapo tita lo tepa yakale loto, jasa tupamane

yanda yene minditupa-mane bala lamalu peakale leainipia.

³⁶ Yanda yene utupane-mane poto, wuane lo lamai-yaikola, balato Polo lamawuato, jasa tupamane wai loto, liyamba tita lape-pene lalai-ko. Liyamba mini epene palu pulupape leaipia.

³⁷ Katapusa anda ando atalane akali okonemane wuane leane tekeko, Poloto yanda yene utupane lamawuato, nalipa Lomo tane ateyapa tekeko, jasa tupamane nalipana kote mindi ale naene, wandakali tupana wenonga nalipa kelewa kandamane peyalu, katapusa anda okona mee andi lo aindaka lapiapia leaipia. Wuane piyu, utupane-mane andipa too pua nalipa tita loto, pulupape lalaipe. Utupanena mana okone katu naleya. Jia wete. Utupane-mane teke nalipa tita loto, nalipa towa atu kamaka epeakale lo lamaipe leaipia.

³⁸ Wuane lea-kola, yanda yene tupamane poto, pii Poloto leane okone jasa tupa lamai-yaikola, jasa tupamane akali okonelapo Lomo tane ateyapi lene okone ale wato, yuku yainipia.

³⁹ Yuku wato, jasa utupane katapusa anda okona poto, akali okonelapo lamawuato, liyamba Lomo tane atapiapi oko anda napene, nanimato mana koo liyambanga minaima oko lo ondo eyama leainipia. Wuane lalu, jasa utupane-mane akali okonelapo atu kamaka epoto, akali okonelapo lamawuato, liyamba tano oko tepa alu pulupa-kae leainipia.

⁴⁰ Wuane leai-kola, akali okonelapo liyamba katapusa anda oko tepa alu, wanda Litiya lene okona andaka peapilipia. Poto, Kitisene wandakali peteaini tupa andoto, utupanena bilipi oko mo tai layawa, pii minditupa lamai-yapilipia. Lamaiyu, matili liyamba tano okone tepa alu, peapilipia.

17

Tesalonaika Tane Tupamane Polo, Sailasa-la, Peyoyale Peaini Oko

¹ Polo, Sailasa-la, liyamba Amipolisa tano okona pulu, Apolonia tano okona peapilipia. Tano okone tepa alu poto, liyamba Tesalonaika tano okona peakaiyu leapilipia. Tano okonena Juta yamena lotu anda mindi ateaiapia.

² Sambasa dindi lo Poloto Juta yamena lotu anda tupana kolandaka loto, pii lamaiayane pua teke, Sambasa tepona Poloto lotu anda okonena kolandaka loto, Gotena pii pepa pelene eya mindimane wua leya loto, wandakali tupa pii lamai-yaepia.

³ Balato utupane lamawuato, Gotena pii pepa pelene eya mindimane loto, Mesaya oko bala tandaka noto omalu, malinga

ika lolopeya layene yene pua, Jisasa bala tandaka noto omalu, malinga ika leaipia. Tene okonena, bala Mesaya oko ateya leyo leaipia.

⁴ Poloto wuane lea-kola, Juta yame wandakali minditupapi, Gote lo lotu lalaini Gitiki yame wandakali kambua wete minditupapi, tano okonena wanda gene yene kambuapi, utupane-mane Jisasa bala Kataisa oko ateya lo bilipi loto, Polo, Sailasa-la, okonelapo towa tako peainipia.

⁵ Tako peai-kola, Juta yame-mane akali okonelapo towa apiangu puato, wandakali amunguli piyaini ama okona poto, akali koo kambua mo amunguli puato, utupanena nembo-tene koo mindi mina ika lamaiyainipia. Polo, Sailasa-la, liyamba Jesone andaka pitulu-peyapi nembo toto, Juta yame-mane akali koo utupane towa atu Jesone andaka peainipia. Utupane-mane Polo, Sailasa-la, okonelapo minu awua kamaka poto, akali koo tupana kininga maimakale nembo toto, anda asia lomba oko peyo keao loto, kolandaka leainipia.

⁶ Utupane-mane kolandaka leaini tekeko, Polo, Sailasa-la, okonelapo piti napeapi-kola, utupane-mane Jesonepi, Kitisene wandakali waka minditupapi, utupane minu kilau lo awua tano okonena ando atalaini akali tupa ateainga peainipia. Poto, utupane-mane pii taimane loto, yuu eya tupa pitaka minu koyalaini lapo akali andipa wali epo ateyapi leainipia.

⁷ Epo ateyapi-kola, Jesoneto akali okonelapo atu bala andaka poto, yatawa palipia. Yatawa palipia-kola, akali utupane pitaka-mane kinji waka Jisasa lene mindi ateya loto, Lomo tane gapomane akali kawane Sisato loo mindi yata yane oko kalo peyapi leainipia. *

⁸ Wuane leai-kola, tano okonena ando atalaini akali tupa, wandakali kambua amunguli pua ateaini tupa, utupane-mane pii okone ale wato, mini koo paleainipia.

⁹ Mini koo paluto, tano okonena ando atalaini akali tupamane Jesonepi, Kitisene wandakali waka tupa, utupane yakama kote kambeakale leainipia. Wuane lalu, yakamoto lapone wuane teke peainido, nanimato yakamana muni oko wetete molopeyama lamaiyu, peakale tepa yainipia.

Polo, Sailasa-la, Okonelapo Betiya Tano Okona Poto, Piape Peapili Oko

¹⁰ Matili undupi lea-angi, Kitisene wandakali tupamane Polo, Sailasa-la, okonelapo Betiya tano okona wamba ini peakale leai-kola, liyamba Betiya tano

* 17:7: Lk 23:2; Jo 19:12

okona peakaiyu loto, Juta yamena lotu anda okona kolandaka leapilipia.

¹¹ Juta yame wandakali Betiya tano okonena ateaini utupane-mane Juta yame wandakali Tesalonaika tano okona ateaini tupa ita minuto, mana epene wete mindi mineaini-pia. Mana epene okone minuto, utupane-mane pii Poloto leane tupa epelewa ale wato, enene leyape lo yapa lo tale puyale, Gotena pii pepa pelene eya tupa ole dindi lo wayumane dii lo ando ateainipia.

¹² Wuane pua atoto, Juta yame wandakali kambuapi, Gitiki yame wandakali gene yene kambuapi, utupane-mane Jisasa lo bilipi leainipia.

¹³ Utupane-mane bilipi leaini tekeko, matili Tesalonaika tano okona Juta yame wandakali ateaini tupamane Poloto Gotena pii oko Betiya tano okona lamawua ateya lene ale yainipia. Ale alu, utupane Betiya tano okona epoto, Betiya tane wandakali kambua minu kee wato, utupanena nembotene koo mindi mo paliya yainipia.

¹⁴ Wuane peai-kola, Kitisene wandakali tupamane Polo bala akali minditupa towa atu ipa solewata matenenga wamba ini peakale leaini tekeko, Sailasa, Timoti-la, liyamba Betiya tano okona mee ateapele-pia.

¹⁵ Ateapi-kola, Polo atu peaini akali utupane bala Atenesa tano okona ape yalu, Betiya tano okona peke loyale peainipia. Peke loyale peai-kola, Poloto utupane lamawuato, yakamoto Sailasa, Timoti-la, lamawuato, Poloto liyamba namba ateyo okona wamba ini ipulupape lala lo lamai-yapape leapia. Wuane lea-kola, akali utupane Atenesa tano oko tepa alu, Betiya tano okona peke leainipia.

Poloto Atenesa Tano Okona Atoto, Gotena Pii Lamaiyane Oko

¹⁶ Poloto Sailasa, Timoti-la, okonelapo epeakale lo maliyo atoto, bala Atenesa tano okonena epoko puato andea-kola, owato gote wandakali kii-mane wape-pene kambua wete tano okonena tumbi latane ateanga andoto, bala mini koo wete paleapia.

¹⁷ Tene okonena, balato Juta yamena lotu anda okona poto, Juta yamepi, Gote lo lotu lalaini wandakali yame waka tupapi, utupanenga Gotena pii oko lamai-yaepia. Ole dindi lo makesa yalaini ama okona bala poto, wandakali ongane epo amunguli piyaini tupa pii lamaiki piki peaipia.*

¹⁸ Poloto Jisasa bala malinga ika leane okona lo pii lamawua atea-kola, Epektiania yame okona mana andene akalipi, So-

toki yame okona mana andene akalipi, utupanena minditupa-mane loto, mana anda napene akali oko bala pii lo awua epoko puato, pii anu-pene mindi lokale lo leyape leainipia. Utupane-mane wuane leaini tekeko, minditupa-mane loto, balato yuu waka tane tupana Gote tupamane wua peaini lo pii lolane anu puape leainipia. Wuane leai-kola, Poloto akali utupane towa pii yanda pimawua ateaiapia.

¹⁹⁻²¹ Ole dindi lo Atenesa tano okona tane tupapi, yuu waka tane Atenesa epo atalaini tupapi, utupane pitaka-mane pii wenene mindi ale aimaa lakae lo atalainipia. Pii wenene mindi ale alu, utupane-mane pii okonena tene tupana pii lalawa pua atalainipia. Tene okonena, utupane-mane Polo lamawuato, nanimato nimbana pii oko ale aimaa-kola, pii okone waka mindipene gulapia okonena, nanimato nimbana pii okonena tene tupa ale aimaa lakae lo nembo teyama-ko. Nimbato pii wenene mindi wandakali lamailini pia okone nanimaa langulape leainipia. Wuane leai-kola, Polo katu yalua leapia. Wuane lea-kola, utupane-mane Polo minu atu poto, kanjole yame amunguli piyaini yuu wangiane Atiyo-pakusa lene okona peainipia.

²²⁻²³ Poto, Poloto akali kanjole utupanena tombenenga ika loto, yuu wangiane Atiyo-pakusa okona atoto, wua leapia: Atenesa tane akali tupa, wamba namba epoko puato, minditaka yakamoto lotu lalaini yapia tupa andalo-kola, yakamoto yakama-gote tupa lo wayumane wete lotu lalaini lo andalo. Nambato andalo-kola, alata toko mindina pii mindi pepa peyatane atala oko wua lo peyatane atala okomane alata toko oko gote nanimaa anda naopeyamane okona alata toko eya lo pepa peyatane atala. Yakamoto Gote okone anda napene, mee lotu lalaini oko bala Gote okopene lo andipa nambato yakama langukale.

²⁴ Yuu okopi, minditaka yuu okona eya tupapi, utupane pitaka yakale leane Gote oko bala yuu okola, ati kenga okola, okone-lapona akali andane oko atoto, wandakalina kini-mane lotu anda pitane ateyai tupana ata napiyane. Jia.*

²⁵ Balanga minditaka jia yo ata napiyane. Jia. Bala tane-mane nanimaa wandakali pitakana nembo-tene poo lo pange loto, saka ataya wato, minditaka nanimanga eya tupa pitaka taka giyane-ko. Wandakali-mane bala moyo atolane tene mindi naeya.*

²⁶⁻²⁷ Gote bala nanimaa wandakali mindiki-mindiki towa amonga waka gulo ata napiyane. Jia. Wandakali-mane bala gote okopene mindi ateyia lo mana meakale

nembo toto, balato nanimana yumbane mindiki Atameto angu wandakali yame tupa pitaka mandeakale leaipia. Mandeakola, Goteto yuu yoo peya tupa pitaka tombo peyoto, wandakali yame mindiki-mindiki lo tombo mindi maiki piyu, balato utupane ee ana oko-tuma ateakale lata yaepia.*

²⁸⁻²⁹ Akali minditupa-mane Gote bala okopene ya nembo toto, golo yandopi, silipa yandopi, ana yandopi, okonetaka mindi moto, gote mindi kii-mane waa piyaini tekeko, Goteto nanimana saka ataya wato, minu tai laya eya-kola, nanimana asia epoko pua ateyama. Wamba Atenesa tane wandakali yakamana mana andene akali minditupa-mane loto, nanimapi Gotena andopane tupa ateyama leanipia. Nanimana balana andopane ateyama okonena, nanimato bala gote kii-mane waa-pene okonepene ateya nembo natape-pene. Jia.*

³⁰⁻³¹ Wamba wandakali ateaini tupamane mana koo mineyama nembo natene atoto, koo pua atea-kola, Goteto utupanena mana koo okone andoto teke, anda napene gulo ateaplia. Balato wuanne peane tekeko, matili balato yuu okona wandakali tupa pitaka yapa lo tale puato, mana tika-pene oko wato minuto, kosimi lokale lo gii mindi yata yaepia. Tene okonena, andipa balato yuu yoo peya tupa pitakana wandakali ateyai tupa pitaka lamawuato, yakama yamapane peke lalapa leya. Wandakali pitakana kote ale yakale loto, Goteto akali mindi yapa lo meaipia. Akali okonemane piape okone pulupeya lo wandakali pitakanga andawa loyale, Goteto bala malinga ika laya yaepia. Poloto wuanne leaipia.*

³² Poloto akali omene mindi malinga ika leane lea-kola, wandakali minditupamane ale wato, Pii nimbato lale okone alu mindi nanimato lapone ale amakale, leaini tekeko, minditupa-mane bala lamba leanipia.

³³ Lamba leai-kola, Poloto wandakali utupane tepa alu, bala peaipia.

³⁴ Bala peane tekeko, yuu wangiane Atiyo-pakasa lene okona amunguli piyaini kanjole akali gene Dayoni-siasa lene mindipi, wanda gene Damatisa lene mindipi, dee wandakali waka minditupapi, utupane-mane Jisasa lo bilipi leanipia.

18

*Poloto Kotini Tano Okona Piape Peane
Oko*

* **17:26-27:** Sam 145:18; Jet 23:23 * **17:28-29:** Ais 40:18-20; 44:10-17; Ap 19:25-27 * **17:30-31:** Sam 96:13 * **18:2:**
Lom 16:3-4 * **18:3:** Ap 20:34 * **18:5:** Ap 17:14-15

¹ Matili Polo bala Atenesa tano oko tepa alu, Kotini tano okona peaipia.

² Pulu, balato Juta yame okona Kitisene akali gene Akuwila lene mindi malanda yaepia. Akuwila bala Pondasa potopinjia tane mindi ateane tekeko, wamba bala Itali kanditi okona tano Lomo okona poto ateaplia. Matili Lomo tane tupana gapomane akali kawane Kolotiyasa balato Juta yame wandakali tupa pitaka Lomo tano oko tepa wato, peakale leaipia. Peakale lea-kola, Akuwila balana wetene Pitisila, okonelapo liyamba Itali kanditi oko wamba yale tepa alu, Kotini tano okona poto peteapili-pia. Peteapi-kola, Polo bala okonelapo andolo peaipia.*

³ Poto andea-kola, wandakali okonelapo-mane yole miapakale nembo toto, anda yame peyalaini sele tupa tambu lo piape pua ateapili-pia. Polotopi piape mindiki okone tekepiyane okonena, bala okonelapo towa atu atoto, piape okone pua ateainipia.*

⁴ Piape okone pua atoto teke, Sambasa dindi lo Polo bala Juta yamena lotu anda okona peaipia. Poto, Juta yame wandakalipi, Gitiki yame wandakalipi, utupane-mane Jisasa lo bilipi leakale loto, wandakali utupanena yamapane mina ika lamawuato, utupane towa pii lalawa pua ateaplia.

⁵ Poloto piape okone pua atea-kola, matili Sailasa, Timoti-la, liyamba Masetonia potopinjia oko tepa alu, Kotini tano okona epeapili-pia. Akali okonelapo epeapili okone angi, Poloto sele anda piape pua ateane oko kondalu, Gotena pii lamaulane piape oko angu tai gulo pua atoto, Jisasa bala Mesaya oko ateya lo Juta yame wandakali tupa lamawua ateaplia.*

⁶ Poloto Gotena pii oko Juta yame wandakali tupa lamawua ateane tekeko, utupane-mane balana pii okone ale oyale embo wato, bala ando pii koo leanipia. Pii koo leai-kola, Poloto balana tonanga kangalamu ateane tupa tau lo tepa wato, utupane lamawuato, yakama Gote towa atu atu napene ala peaindo, nambanga koo tene mindi nayolopeya leaipia. Yakamoto Gotena pii oko ale naeyai okonena, koo tene oko yakama tanenga yolopeya. Andipa ateyama oto oko angi atoto, namba yakama tepe alu poto, Gotena pii oko wandakali yame waka ateyai tupa lamawua atokale leaipia.*

⁷ Wuane lalu, Polo bala Juta yamena lotu anda okone tepa yaepia. Wandakali yame waka ateyai tupana akali Titiasa Jasatasa

* **18:6:** Ap 13:46,51; 20:25-27

lene mindina anda oko Juta yamena lotu anda atalane organe mandaka gulo atalaepia. Titiasa bala Gote lo lotu lea-kola, Poloto balana andaka puku puato, Gotena pii oko wandakali yame waka tupa lamaiki peapipa.

⁸ Gotena pii oko lamaiki pea-kola, Juta yamena lotu anda ando atalane akali gene Kitisapasa lene okopi, wandakali balana andaka paleaini tupapi, utupane pitaka-mane pii okone ale wato, Akali Andane oko lo bilipi leainipia. Bilipi leai-kola, Kotini tane wandakali kambua-mane Gotena pii okone ale wato, bilipi loto, ipa meainipia.

⁹⁻¹⁰ Alu mindi utulu pango Poloto kombeya-mane andene gulo andea-kola, Akali Andane okomane bala lamawuato, nambana wandakali kambua tano okona ateyai leaipia. Kambua ateyai-kola, wandakali mindimane nimba minu koya napulu-peya. Namba nimba towa atu ateyapa-ko. Nimba yuku wato, ambulini tuma pua ata napene, Gotena pii oko lamawuata atape leaipia.*

¹¹ Wuane lea-kola, mali mindikinga ana wataka Polo bala Kotini tano okonena atoto, Gotena pii oko wandakali tupa mana lamawua ateipia.

¹² Matili akali Galiyo lene mindi bala Akaya potopinjia okona gapomane akali kawane gulea-angi, bala Juta yame wandakali tupa towa nembo-tene mindiki okone teke palu atoto, Polo yanda pi-mawuato, bala kosimi loyale andi lo awua peainipia.

¹³ Utupane-mane bala kosimi loto, gapomane akali kawane Galiyo oko lamawuato, akali okomane wandakali tupa mana lamawuato, utupane-mane nanimana loo tupa awua tepa wato, mana waka mindi wato minuto, Gote lo lotu leakale lalane leainipia.

¹⁴ Wuane leai-kola, Poloto pii okone yano peyoyale peane tekeko, Galiyotu wandakali utupane lamawuato, akali okomane gapomane okona loo mindi kalo puato, mana koo wete mindi minapia-yale, nambato Juta yame wandakali yakamaa pii okone katulo ale auwa-yale leaipia.

¹⁵ Ale auwa-yale tekeko, yakama tanena loo wato minulaini tupapi, mana wato minulaini tupapi, gene mialaini tupapi, utupanena loto, yakamato akali oko kosimi leyai okonena, nambato pii okonetaka tupana kote ale nao-lo-peyawa. Yakama tane pii okone lo tika piyapa leaipia.

¹⁶ Wuane lalu, balato Juta yame wandakali utupane kote anda oko tepa alu pulupa lo peyo wateaipia.

¹⁷ Peyo watea-kola, Kotini tane tupa pitaka-mane yataka wato, Juta yamena lotu anda ando atalane akali gene Sosetenesa lene oko minuto, kote ale alaini wenonga bala peleaini tekeko, utupane-mane wuane peakale lo Galiyoto ando konda yaepia.

Polo Bala Andiyoko Tano Okona Peke Leane Oko

¹⁸ Oto kambua Polo bala Kotini tano okona Kitisene wandakali tupa towa atalu, matili utupane atalapape lalu, Sitiya potopinjia okona payale, Senekotiya tano okona wamba ini peapipa. Pulu, wamba balato piape mindi wua pukale lo Gote towa potomisa pii mindi leane oko andipa pikoyo piyo nembo toto, balana kawane itini oko kateaipia. Katiyu, Pitisila, Akuwilala, wandakali okonelapo towa atu sipi mindina pitiyu, Epesasa tano okona payale peainipia.*

¹⁹ Poto, utupane yakama Epesasa tano okona peakaiyu lalu, Poloto wandakali okonelapo organe atekale tepa wato, bala tane Juta yamena lotu anda okona kolandaka loto, utupane towa pii lalawa peapipa.

²⁰ Pii lalawa pea-kola, utupane-mane bala lamawuato, nimba ole kambua minditupa nanima towa atu atamakale leaini tekeko, Poloto jia leaipia.

²¹ Jia lalu, balato utupane lamawuato, Goteto yuu yakama ateyai okona namba peke lola nembo teando, nambato peke lokale leaipia. Wuane lalu, balato utupane atalapape loto, sipi mindina pitiyu, Epesasa tano oko tepa alu, peapipa.

²² Sipi okone Sisatiya tano okona peakaiyu lea-kola, Polo bala sipi okone tepa alu, Jutusaleme poto, sosa okona wandakali peteaini tupa towa sikane leaipia. Sikane lalu, balato Andiyoko tano okona peapipa.

²³ Andiyoko tano okonena satete minditupa atalu, bala yuu okone tepa alu, Galesia, Pitinjia-la, potopinjia okone-lapona yuu waka-waka yane tupana peapipa. Poto, balato Jisasa lo bilipi lene wandakali peteaini tupa pitakana bilipi oko minu tai layawa ateipia.

Apolosato Gotena Piape Peane Oko

²⁴⁻²⁵ Juta yame okona Kitisene akali gene Apolosa lene mindi bala Aleke-sandiya tano okona tane mindi ateane tekeko, bala Epesasa tano okona epeaipia. Balato Gotena pii pepa pelene eya tupa wayumane nembo toto, Gotena pii kuai lo lalaepia. Wamba wandakali minditupa-mane bala mana lamawuato, piape Akali Andane okomane peane tupapi, pii balato leane tupapi, utupanena minditupa loto, bala

* **18:9-10:** Jas 1:9; Ais 41:10 * **18:18:** Nam 6:18; Ap 21:24

mana lamai-yainipia. Mana utupane bala lamai-yai-kola, balato piape tailo wete puato, wamba Jisasato piape wua pua ateane lo pii tika pua loto, mana kuai lo lamawua ateapnia. Balato wuanne peane tekeko, apoloso akali tupamanne wua loto, wandakali ipa peya-maiyaini nembu natene, Apolosato ipa peya-maiyaini akali Joneto wua loto, wandakali tupa ipa peya-maiyane angu nembu teaipia.

²⁶ Balato wandakali tupa ando yuku naene atoto, Juta yamena lotu anda okona poto, Gotena pii lamawua ateakola, Pitisila, Akuwila-la, okonelapo-mane pii balato leane okone ale yapelepi. Ale wato, okonelapo-mane bala atu liyambana andaka poto, Gotena pii manapi minditupa tako pua, kuai lo wete mana lamai-yapilipia.

²⁷⁻²⁸ Wamba Goteto Akaya potopinjia tane wandakali tupa ondo wato moyo-kola, minditupa-mane Jisasa lo bilipi leainipia. Apolosato utupanena bilipi oko minu tai laya olo pokale nembu tea-kola, Epesasa tano okona Kitisene tupamanne bala peakale loto, Akaya tane Kitisene tupana pepa peyoto, yakamoto akali oko wayu epeleya lo lamialapape leainipia. Apolosa bala poto, Akaya potopinjia okona peakaiyu lea-angi, Juta yame-mane Jisasa bala Mesaya oko ata naapeane leai-kola, wandakali pitakanwa wenonga, Apolosato utupane towa pii yanda peainipia. Pii yanda puato, balato Gotena pii pepa pelene eya minditupa dii loto, Jisasa bala Mesaya ateane oko ateya layene eya lo andawa loto, Akaya tane Kitisene wandakali tupana bilipi oko wayumane wete minu tai laya yaepia.*

19

Poloto Epesasa Tano Okona Poto, Piape Peane Oko

¹ Apolosa bala Kotini tano okona ateangi, Polo bala wangiane tupana asini epoto, Epesasa tano okona peakaiyu loto, Kitisene wandakali minditupa ongane ateainga andeaipia.*

² Andoto, balato Kitisene utupane tipa puato, yakama wamba bulupane Jisasa lo bilipi leai-angi, yakamoto Oli Sipitisa oko meaipe, nameaipe lea-kola, utupane-mane bala lamawuato, jia. Nanimato Oli Sipitisa mindi ateya lene oko ale naema leainipia.*

³ Wuane leai-kola, Poloto utupane tipa puato, wuanne yando, yakamoto ipa anupene mindi meaipe lea-kola, utupane-mane bala lamawuato, nanimato Jonena ipa oko memane leainipia.

⁴ Wuane leai-kola, Poloto pii mindi loto, wamba ipa peya-maiyane akali Joneto wandakali tupa lamawuato, yakama yamapanne peke loto, ipa mialapape. Moto, akali mindi matili namba watama epolopeya oko lo bilipi lapapape leaipia. Matili akali mindi epolopeya leane okone Jisasa andayo leaipia.*

⁵ Poloto wuanne lea-kola, akali utupanemanne ale wato ipa mia-makale leainipia. Wuane leai-kola, Poloto Akali Andane Jisasa gene oko loto, akali utupane ipa peya-maiyaepla.

⁶ Ipa peya maiyu, Poloto akali utupanena kawanenga kini yata ya-kola, Oli Sipitisa oko utupanena epeaipia. Epea-kola, utupanena minditupa-mane Gotena pii oko leainipia. Minditupa-mane yame waka tupana pii lalaini tupa mo leaini tekepia.*

⁷ Alesa akalipi mindimane wuanne peainipia.

⁸ Okone ang, Polo bala yuku naene atoto, Juta yamena lotu anda okona kolandaka laka puato, utupane towa pii lalawa pua ateapnia. Ana tepo balato wuanne pua atoto, Goteto wua puato, pitaka taka ando atalane loto, wandakali tupana nembu-tene mina ika lamawua ateapnia.

⁹ Poloto wuanne peane tekeko, wandakali minditupana nembu-tene oko ana yale gulea-kola, bilipi laa naapeainipia. Utupanemanne wandakali waka tupana wenongwa atoto, Akali Andane okona pii manapi, utupane ando pii koo leai-kola, Polo bala Jisasa lo bilipi lene wandakali tupa towa atu Juta yamena lotu anda oko tepa alu peainipia. Pulu, ole dindi lo bala utupane towa akali Titanasa lene mindina sukulu anda okona poto, pii mana lamawua ateapnia.

¹⁰ Mali lapo Poloto wuanne pua teke ateakola, Juta yamepi, wandakali yame wakapi, Esia potopinjia okona wandakali ateaini tupa pitaka-mane Akali Andane okona pii oko ale yainipia.

Akali Sipa Lene Okona Iwanane Tupa

¹¹⁻¹² Poloto muni mokale nembu toto, sele anda tupa pua ateane-angi, balana tona epene peane tupa kalato atalane nembu toto, tona epene peane utupane ombowa, lapalapa mindi kenga piki pua atalaepia. Ole dindi lo piape pikoyu piyu, balato lapalapa kenga piyane okone yoka yata aka piki peainipia. Alu mindi tupana, wandakalimanne balana lapalapa okone yandopi, balana angasipi mindi yandopi, okonetaka mindi mo awua poto, sipitisa koo atene wandakalipi, siki pelene wandakalipi, utupanena umbaininga yata aka piki peai-kola,

* 18:27-28: Ap 9:22 * 19:1: 1Ko 3:6 * 19:2: Ap 8:15-16 * 19:4: Mt 3:11 * 19:6: Ap 8:17; 10:44-46

Goteto metekolo piape tai-lene waka mindi-tupa puato, utupanenga sipitisa koo ateaini tupa peyo wata alu, utupanena siki yane tupa mo atu yaka piki peapipa. *

¹³ Okone angi, Juta yamena akali mindi-tupa epoko puato, Akali Andane Jisasana gene oko loto, sipitisa koo wandakali tupanga ateaini tupa peyo watamakale lo makande pua ateainipia. Akali utupanena mindiki-mindiki lo sipitisa koo tupa lamawuato, Poloto Gotena piape pua atoto, Jisasana gene lalane. Andipa nambato Jisasa okonena gene oko loto, yakamato wandakali utupa tepa alu puu leyo leainipia.

¹⁴ Alu mindi Juta yamena pitisa akali kawane Sekepa lene okona iwanane yanasa tupamane pii okone sipitisa koo mindi lamai-yaepia.

¹⁵ Lamai-yaikola, sipitisa koo okonemane iwanane utupane lamawuato, nambato Jisasa okone wayumane andeyawane. Dee, Polopi andeyawane tekeko, yakama api tutape leaipia.

¹⁶ Wuane lalu, sipitisa koo atene akali okonemane akali utupane pitaka sia minuto, utupane taimane peyoto, minu koy-aepia. Wuane puato, balato utupanena tona peaini tupa liti lo yoko apea-kola, akali utupane yakama tona napene, papata atoto, anda okone tepa alu, palaka peainipia.

¹⁷ Wuane piya lene oko ale wato, Juta yamepi, yame waka tupapi, wandakali Epesasa tano okona ateaini tupa pitaka-mane yuku wato, Akali Andane Jisasana gene oko laiyu leainipia. *

¹⁸ Wuane puato, wandakali wamba Kitisene guleaini tupana kambua ipuku puato, yakamana mana koo wamba minalaini tupa wandakali yangone tupana wenonga lapana aka peainipia.

¹⁹ Kitisene wandakali utupanena kambua-mane wamba kamo pua ateaini tekeko, utupane-mane yakamana kamo piyaini buku tupa mo amunguli puato, wandakali pitakana wenonga awua yangeaini-pia. Yangalu, buku yangeaini utupanena yole aki-tupi peape lo dii leai-kola, Lomo tane wandakali tupana muni silipa-mane waa-pene andane kambua longo (50,000) tausene paiyasa yau guleipia.

²⁰ Mangene okonepene tupa peai-kola, Akali Andane okona pii okomane Kitisene wandakali tupa minu tai laya ya-kola, utupane-mane balana pii oko lo tawe yama peainipia.

Epesasa Tano Okona Kenda-pene Ika Leane Oko

²¹⁻²² Wandakali tupamane mangene utupane pitaka peai-kola, Poloto bala moyo piape piyapili akali Timoti, Etasatusa-la, okonelapo lamawuato, matili namba Jutusaleme pulu, Lomo tano okona pupe-pene tekeko, namba Masetonia, Akaya-la, potopinjia okone-lapona wamba ini pokaleko. Liyamba Masetonia potopinjia okona wamba ingane pulupa leaipia. Wuane lalu, Polo bala ole minditunga tako pua, Esia potopinjia okona ateainipia. *

²³⁻²⁴ Esia potopinjia okona atoto, Poloto Kataisana pii manapi wandakali tupa lamawua atea-kola, akali Dimiti-yasa lene mindimane yataka wato, kenda-pene andane mindi mina ika leaipia. Balapi, bala towa atu piape piyaini akali tupapi, utupane-mane owato gote Atemisa lene okona lotu anda ajako wete tupa silipamane waa pua yaka piyainipia. Wuane peyai-kola, owato gote Atemisa lo lotu leaini wandakali tupamane bala nembo toyale, anda utupane muni andane-mane kamboto, yatawa ateainipia. *

²⁵⁻²⁷ Alu mindi, Dimiti-yasato Polona pii ale alu, balana piape akali yangone tupapi, piape okonepene piyaini akali waka tupapi, utupane amunguli peakale leaipia. Amunguli peai-kola, balato utupane lamawuato, amene yame, wamba yuu yoo peya tupa pitakana wandakali tupamane gote wanda Atemisa oko lotu leaini leaipia. Wamba utupane-mane wuane peaini tekeko, andipa akali Polo lene okomane epoko puato, wandakalina kinimane waa-pene gote tupa gote enene ata naipayi loto, wandakali kambua tupana nembo-tene mo lawa pimai-yane. Balato piape okone Epesasa tano okona angu napiyane. Jia. Balato Esia potopinjia yuu eya tupa pitakana epoko puato, piape okone piyane. Yakamato balana pii okone ale wato, balana mana okone lee-mane andapai. Nanimato Atemisa okona lotu anda ajako wete tupa silipa-mane waa buato, muni kambua mialamae pia oko yakamato nembo teyai. Poloto Atemisa okona gene andane oko minu koyando, wandakali tupamane Atemisa okona lotu anda oko mee ya nembo toto, balana lotu anda ajako wete nanimato waa piyamane tupa kamba napulu-peyai leaipia.

²⁸ Dimiti-yasato wuane lea-kola, wandakali epo amunguli peaini tupamane pii okone ale alu, yataka wete wato, Epesasa tane tupana gote Atemisa oko bala gote

andane wete mindi lo pii taimane laka peainipia.

²⁹ Wuane laka puato, utupane-mane Epesasa tano okona wandakali ateaini tupana nembo-tene minu kee amai-yaikola, utupane pitaka-mane pii laiyu nena pua ateainipia. Wuane pua atoto, wandakali utupane pitaka nembo mindiki paluto, Polo towa atu epoko pua atalapili Masetonia tane lapo akali Gayasa, Atitakusa-la, okonelapo minu kilau lo awua poto, wandakali amunguli pua pitiyaini panda okona taimane peainipia.*

³⁰ Wuane peai-kola, Poloto pii mindi wandakali amunguli pua ateaini utupane lamauwakale nembo toto, utupanena tombenenga pokale leane tekeko, Kitisene wandakali tupamane bala naapeakale lo, jia leainipia.

³¹ Dee, Esia potopinjia okona akali kawane minditunga Polo towa yamapanne yaini tupamane pii mindi wai loto, wandakali utupane amunguli pua peteyai panda ongane Polo nimba polene lo pii leyama nayu lo lamai-yainipia.

³² Wandakali amunguli pua ateaini utupanena kambua-mane tene anu peakale amunguli pua ateyamape lo wayumane nembo natene atoto, tatakewa ateainipia. Tatakewa atoto, wandakali utupanena minditunga-mane pii mindi taimane leai-kola, wandakali minditunga-mane pii waka mindi loto, pii taimane leainipia.

³³ Pii taimane leai-kola, Juta yame-mane akali Aleke-sanda lene oko balato wandakali utupane pii mindi lamai-yakale nembo toto, bala wandakali utupanena wenonga atekale lo minu pitu pima-pima peainipia. Wuane peainga andoto, wandakali waka minditunga-mane loto, balato kenda-pene okone mina ika lala ya leainipia. Wuane leai-kola, balato utupanena pii yano peyokale nembo toto, utupane-mane pii nalene mee alewa peteakale loto, kii momonga peaipia.

³⁴ Aleke-sando wuane peane tekeko, wandakali waka tupamane akali okone bala Juta yame akali mindi ya lo andoto, utupane pitaka-mane pii mindiki taimane loto, Epesasa tane tupana gote Atemisa bala gote andane wete mindi laka peainipia. Pii mindiki okone teke taimane atutu lolopeke laka pua ateai-kola, awa lapopi mindi peaipia.

³⁵ Awa lapopi mindi pea-kola, matili Epesasa tano okona gapomane akali kawane mindimane yakama pii nalene kondalapa lea-kola, utupane-mane pii nalene konda yainipia. Konda yai-kola, balato utupane tipa puato, ati kenga tawe ana kepele

kulini gote wanda Atemisa yale mindi yunga tepa yane okola, gote okonena lotu anda okola, okonelapo nanima Epesasa tane tupamane ando atalamane lo wandakali pitaka-mane andalaini jiape leaipia.

³⁶⁻³⁷ Wandakali mindikipi mindimane katulo nanimato owato pii leyama nalolopeyako, yakama pii nalene kondalapa. Akali lapo yakamoto minu kilau lo awua epalai okonelapo-mane nanimana gote wanda Atemisa oko ando pii koo mindi na-lapiapi. Dee, okonelapo-mane lotu anda mindina minditaka mindi pake mia napipiapi teke. Tene okonena, yakamoto wamba ini wayumane nembo natene atoto, akali okone-laponga kenda-pene mindi kapoyale mai na-piyapape.

³⁸ Kote ale olane akali tupa atalu, kote ale olane gii tupa yalu peya-ko. Dimitiyasapi, bala towa atu piape piyaini akali tupapi, utupane-mane kote loto, akali mindinga koo tene mindi yata amakale nembo teaindo, utupane-mane bala kote loto peakale kondalapa.

³⁹⁻⁴⁰ Andipa tene mindi ata napiyakola, nanima mee epo amunguli puato, pii taimane laiyu nena pua atalama. Wuane piyai lo Lomo tane gapomane akali andane tupamane ale yaindo, utupane-mane katulo nanima tipa puato, tene anu peakale yakama epo amunguli puato, pii taimane laiyu nena pua atalaipe lolopeya. Utupane-mane wuane leaindo, nanimato katulo pii mindi yano peya napuluma-kola, utupane-mane loto, yakamoto nanima towa yanda mina ika loyale wuane piyai lo nanima kosimi lolopeyai. Tene okonena, yakamoto pii waka mindi lo tika pimakale nembo teaindo, matili kanjole tupamane gapomane okona loo oko wato minuto, epo amunguli pulai-angi, utupane-mane yakamania pii okone lo tika peakale kondalapa leaipia.

⁴¹ Wuane lalu, Epesasa tane gapomane akali kawane okomane wandakali amunguli pua ateaini tupa pitaka lamawatu, yakama puu toko lalap leaipia.

20

*Polo Bala Masetonia, Gitiki-la Potopinjia
Okone-lapona Peane Oko*

¹ Epesasa tano okona tane tupamane pii taimane loto, kili kalae lo ateaini okone lokoyo piyu, andaka peai-kola, Poloto Kitisene wandakali tupa epo amunguli peakale leaipia. Amunguli peai-kola, balato utupane minu tai laya wato, pii minditunga utupane lamai-yaepia. Lamaiyu, balato yakama atalapape lalu, Masetonia potopinjia okona peaipia.

* 19:29: Ap 20:4; 27:2; Kol 4:10; Pm 24

² Bala Masetonia potopinjia okona yuu waka-waka yane tupana epoko pua atoto, Kitisene wandakali tupa minu tai laya wato, pii kambua lamaima pulu, matili bala Gitiki kanditi okona peaipia.

³ Gitiki kanditi okona ana tepo atalu, matili bala sipinga pitiyu, Sitiya potopinjia okona pokale nembo teane tekeko, balato ale ya-kola, Juta yame wandakali minditupa-mane bala atu sipinga pitiyu, bala peyo ome lamakale lo pii lo puta piyai lene oko ale yaepia. Ale wato, balana nembo-tene oko lawa puato, Masetonia potopinjia okona asini peke lokale nembo teaipia.

⁴ Polo bala Masetonia potopinjia okona peke lea-angi, Timotipi, Betiya tano okona tane akali Pitusa iwanane Sopata lene okopi, Tesalonaika tano okona tane lapo akali Atitakusa, Sekundusa-la, okone-lapopi, Depi tano okona tane Gayasa lene okopi, Esia potopinjia tane lapo akali Tikikasa, Topimasa-la, okone-lapopi, utupane bala towa atu peainipia.

⁵ Polo bala akali utupane towa atu Pilipai tano okona peakaiyu leai-angi, utupane Totasa tano okona wamba ingane poto, nanimma ipulupale lo maliyo ateainipia.

⁶ Nanimma Pilipai tano okona atema-kola, betesanga yisa napalene nalamanne gii oko epea. Gii okone epo koyo pea-kola, nanimma sipi mindina pitiyu, Totasa tano moyale pema. Ole yau pea-kola, nanimma Totasa tano okona peakaiyu lalu, akali nanimma maliyo ateaini utupane malanda alu, nanimma pitaka ole yanasa tano okonena atema.

Iwana Yutikasa Omea-kola, Poloto Bala Mina Ika Laya Yane Oko

⁷ Sande angi, nanimma Totasa tano okona tane Kitisene tupa towa tomo namakale lo amunguli pema-kola, Poloto utupane pii lamaiya. Bala anate-lene pokale nembo toto, pii lamawua teke atea-kola, utulu tombe gulea.

⁸ Anda lumu kenga nanimma amunguli pua petemane okona lamu kambua kaya-pene ya.

⁹ Poloto pii kambua lea-kola, iwana Yutikasa lene mindimane balana pii oko alewa petea. Bala anda lumu kenga wete nanimma pii alewa petemane okona windowa mindina pituto, limu mo loto, matili limu pali ondo wato, windowa kamaka aiya pelea. Aiya pelea-kola, wandakali minditupa-mane kili loto, bala molo peai-kola, bala wamba manda tene yaepia.

¹⁰ Manda tene ya-kola, Polo bala anda lumu kenga wete ateane okonena atoto, yunga kili loto, iwana manda tene yane okonena tokonga paluto, bala minea. Minalu, balato wandakali tupa lamawuato, iwana oko aka ateaya-ko. Yakamato anu pimape lo yuku-mane omolaini lea.

¹¹⁻¹² Wuane lea-kola, wandakali utupane-manne iwana okone bala lene tala ya lo andoto, yamapanne epene wete paluto, balana yame tupamane iwana okone atu andaka peai. Peai-kola, Polo bala wandakali waka tupa towa atu anda lumu kenga okona peke lalu, utupane towa tomo nalu, utupane towa pii lalawa pua peteai. Matili, waa lea-kola, bala pea.

Totasa Tano Tepa Alu, Mailitasa Tano Okona Peaini Oko

¹³ Polo bala angu asini poto, Asosa tano okona peakaiyu lokale nembo toto, nanimma andayo, yakama sipinga pitiyu, wamba ini ingane pulupape lea. Wuane lea-kola, nanimato bala lamolo makale nembo toto, sipinga pitiyu, Asosa tano okonena wamba ingane poto, bala asini epeakale lo maliyo atema.

¹⁴ Maliyo Atema-kola, bala Asosa tano okona peakaiyu loto, nanimma malanda ya. Nanimato bala lamialu, sipinga pitiyu, Mitilini tano okona atu pema.

¹⁵⁻¹⁶ Pulu, nanimma sipinga pitiyu, Mitilini tano tepe alu poto, anate-lene nanimma yuu ailene Kayosa okona mandaka gulo pema. Pema-kola, Poloto wamba ini kapoyale Jutusaleme poto, Pendokosa oto oko ando mokale nembo toto, Esia potopinjia okona ole kambua ata napukale nembo teaipia. Wuane nembo tea-kola, anate-lene nanimma sipinga pitiyu, Kayosa yuu oko tepe alu pema-angi, nanimma Epesasa tano okona puu napene kondalu, Samosa tano okona pema. Pulu, anate-lene nanimma sipinga pitiyu poto, Mailitasa tano okona peakaiyu lema.

Poloto Epesasa Tane Akali Esamane Tupa Mana Lamaiyane Oko

¹⁷ Nanimma Mailitasa tano okonena peakaiyu lema-angi, Poloto Epesasa tane sosa okona akali esamane tupa bala andolo epeakale loto, akali mindimane utupane lamaulu peakale lea. *

¹⁸ Akali utupane epeai-kola, Poloto utupane lamawuato, wamba bulupane tewa hamba Esia potopinjia okona epewa-angi, yakamato nambana mana andeai leaipia. Namba Epesasa tano okona atewa-angi, ole dindi lo yakamato nambana mana andeai teke. *

¹⁹ Okone angi, Juta yame-mane namba minu koyoyale pii lo puta puato, kenda-pene kambua namba geaini tekeko, namba akali gene nayene koo gulo atoto, Akali Andane okona piape oko ayawa teke pua atewa. Wuane pua atoto, ole kambuangka nambato yakama ondo wato, ai lewa.

²⁰⁻²¹ Nambato yakamana amunguli piyaini ama tupanapi, yakamana anda tupanapi, utupanena epoto, Gotena pii oko yakama langu atewa. Wuane pua atoto, nambato Juta yame okopi, wandakali yame waka tupapi, yakama pitaka languato, yakamato Gote lo nembo toto, mini peke loto, mana koo yame tupa pitaka masia mawuato, nanimana Akali Andane Jisasa lo bilipi lalapape lewa. Nambato yakama moyolane pii epene okonepene tupana mindikipi mindi wamo napene, pitaka yakama langu atewa. Yakamato nambana mana utupane pitaka nembo teyai okoni.

²²⁻²³ Wamba namba tano kambua tupana epo paliki pua atauwa-kola, Oli Sipitisa okomane tano utupane pitakana atoto, namba langiki puato, nimba Jutusaleme pole-angi, wandakali-mane nimba andi lolai-kola, kenda-pene kambua nimbanga epolopeya lo namba langiki peane nembo teyo. Oli Sipitisa okomane wuane angulo namba langiki peya-kola, namba Jutusaleme peakaiyu lolowa-angi, wandakali tupamane anu pulai-kola, kenda-pene utupane nambanga epolo-peyape lo nambato wayumane nembo nateyo tekeko, andipa Oli Sipitisa okomane namba languato, nimba konda naene, Jutusaleme puu lo langipia-kola, namba Jutusaleme payole peyo.*

²⁴ Kenda-pene utupane nambanga epolopeya tekeko, wamba Akali Andane Jisasa Kataisato namba languato, Goteto wandakali ondo wato moyolane loto, nimbato balana pii layene epene oko wandakali tupa lamawua atape leane. Balato wuane loto, piape okone namba geakola, nambato piape okone pikoyo pukale. Piape okone pua atoto, namba omewando, okone katu lolopeya nembo teyo.*

²⁵⁻²⁷ Wamba namba yakama tombenenga epoko pua atoto, Goteto nanima ando atalaene loto, nambato balana pii layene epene oko yakama langu atewa. Langu atoto, nambato Gotena pii layene minditupa wamo napene, Goteto wua lo nembo talane lo balana pii tupa pitaka yakama langu atewa. Langu atewa-kola teke, yakamana mindimane Gotena pii utupane ale naene, alu peaindo, yakama alu pulaini okonena

tene oko nambanga nayolopeya loto, andipa nambato yakama enene langyeyo. Andipa namba yakama tepa alu polowakola, yakamana mindikipi mindimane namba dee lapone anda napulu-peyay nembo teyo.

²⁸⁻²⁹ Goteto balana sosa oko balana iwanane okona tundupa okomane kambo meane okonena, yakama Kitisene wandakali tupa balana sipisipi gulo ateyai. Namba yakama tepa alu polowa-angi, wandakali minditupa peango anatope koo gulo atoto, Gotena sipisipi yame tupa tombenenga epoto, utupane minu koyolopeyai nembo teyo. Wandakali koo utupanemanne wuane pulaini loto, wamba Oli Sipitisa okomane yakama balana sipisipi yatawa atalaini akali tupa gulo atalapale lo yapa lo meane. Balato piape okone yakama geane okonena, yakamato yakama tane tika ando atoto, Gotena sipisipi tupa pailo ando atalapape.*

³⁰ Matili yakamana Kitisene akali minditupa-mane wandakali tupa kilau lo moyale, Gotena pii oko mo lawa puato, pii minditupa utupane lalamu-peyai.

³¹ Yakamato akali utupane wato minulaini nembo toto, wamba nambato ai loto, yakama mindiki-mindiki lo languato, wandakali mindimane wuane pulane. Waiwa ando atalapape laka pua atewa. Wuane pua atoto, mali tepo utulu otongapi, namba kepa naene, yakama pitaka mindiki-mindiki lo Gotena pii langu atea lo yakamato nembo tatawa atalapape. Yakamato wuane lo nembo tatawa atoto, wandakali mindimane Kitisene wandakali minditupa kilau lo mo awua puyangi lolane. Waiwa ando atalapape.*

³² Gotena pii layene epene okomane pii mindi loto, matili balato balana wandakali ateakale lata ene tupa pitaka ondowa moyoto, paluni epene minditupa utupane maiyane layene eya. Wuane pua teke, balato yakama minu tai laya wato, paluni epene minditupa yakama geakale nembo toto, andipa nambato yakama balana kinina tega eyo.

³³ Wamba namba yakama towa atu atoto, wandakali yangone mindikipi mindina muni yandopi, tona yandopi, okonetaka mindi miauwa lakae lo nembo natewa. Jia.*

³⁴ Nambapi, wandakali namba towa atu atemane tupapi, nanimanga minditaka jia yo atema-angi, namba tanena kini-mane piape puato, nambato minditaka jia yane

* ^{20:22-23:} Ap 9:15-16; 21:11 * ^{20:24:} Ap 21:13; 2Ti 4:7 * ^{20:28-29:} 1Ti 4:16; 1Pi 5:2-4; Mt 7:15-20; Jo 10:11-13

* ^{20:31:} 1Tes 2:11-12 * ^{20:33:} 1Ko 9:11-12 * ^{20:34:} Ap 18:3; 1Tes 2:8-9

tupa miaka pua atewa lo yakamato nembo teyai okoni.*

³⁵ Wamba Akali Andane Jisasato pii mindi leane oko loto, wandakali mindimane minditaka mindi mialu atoto, epele ape-pene tekeko, wandakali mindimane minditaka mindi wandakali waka mindi maiyu atoto, epele wete ape-pene leaipia. Yakamato Jisasana pii okone nembo toto, wandakali tai nalene tupa moyo piapale lo yakama andawa lokale nembo tewa. Nambato wuane nembo toto, namba tanena kini-mane piape puato, nambato minditaka jia yene wandakali tupa moyo, minditaka maiki pewa leaipia.

³⁶ Poloto pii utupane lokoyo piyu, akali esamane tupa towa aiki leka wato, pote lea.

³⁷⁻³⁸ Pote lokoyo pea-kola, utupane-mane Polona pii nembo tolo-peke leai. Wamba balato yakamana mindikipi mindimane namba dee lapone anda napulu-peyai leane nembo tolo-peke loto, utupane pitakame bala epelewa bulu ope loto, ai andane kambua leai. Wuane piyu, utupane-mane bala sikane lalu, bala ape yolo, sipi yane ongane atu peai.

21

Polo Bala Jutusaleme Peane Oko

¹ Epesasa sosa okona esamane tupamane nanima atu poto, sipi yane ongane ape yai-kola, nanimato yakama atalapape lema. Atalapape lalu, nanima sipinga pitiyu, yuu ailene Kosa lene okona tika pua pema. Anate-lene nanima sipinga pitiyu, yuu ailene Lotesa lene okona wamba ini pulu, Patata tano okona pema.

² Patata tano okonena atoto, sipi waka mindi Pinisia disitiki okona moyale peanga andoto, nanima sipi okonena peakaiyu lo pitiyu pema.

³ Poto, yuu ailene Saipatasa lene oko andoto, yuu okone kii koyasa-tole yakale lalu, nanima Sitiya potopinjia okona tano Taya okona pema. Sipi okonena anduanne tupamane sipinga pinju mandeaini tupa tano okonena tangu tepa amakale leai-kola, nanima sipi okone tepa ema.

⁴ Sipi okone tepa alu, nanimato Kitisene wandakali minditupa aiya pua andalu, utupane towa ole yanasa atema. Atema-kola, Oli Sipitisa okomane utupanenga epo tumbi lea-kola, utupane-mane Polo lamawuato, nimba Jutusaleme polene leai.*

⁵ Utupane-mane wuane leaini tekeko, sipi oko Taya tano oko tepa oyale pea-kola, nanima Jutusaleme makale loto, tano oko tepa alu, sipi yane ongane moyale pema.

Pema-kola, Kitisene wandapi, akalipi, andopanepi, utupane pitaka nanima towa atu poto, tano okona kamaka ape yai. Ape yai-kola, nanima pitaka solewata matenenga poto, aiki leka wato, pote lema.

⁶ Pote lalu, utupane-mane nanima pulupape leai-kola, nanimato utupane atalapape lalu, sipi okona peakaiyu lo pitiyu pema-kola, utupane andaka peke leai.

⁷ Nanima sipinga pitiyu, Taya tano okone tepa alu, Tolemesa tano okona peakaiyu lema. Peakaiyu loto, nanimato Kitisene wandakali tano okonena ateaini tupa towa sikane lalu, ole mindiki utupane towa atu atema.

⁸ Atalu, anate-lene nanima Tolemesa tano oko tepa alu poto, Sisatiya tano okona peakaiyu lema. Peakaiyu lalu, Gotena pii lamaiyane akali Pilipi okona andaka poto, nanima bala towa atu atema. Pilipi okone bala wanda yalo tupa moyo, tomopi, waka minditakapi, utupanena minditupa maiyaini akali yanasa tupana mindi pia.*

⁹ Balana wanane mapokae tukumindi akali puu napene, Gotena potopesa wanda gulo pituto, balana pii oko lapanawa pitiyaini-pia.

¹⁰ Ole minditupa nanima Sisaliya tano okonena atema-kola, potopesa akali Akapasa lene mindi bala Jutiya disitiki okona atalu, epea.*

¹¹ Akali okone bala nanima atemanga epoto, Polona matipu peane oko yoko moto, matipu okonemanee bala tanena kini kene tupa tongo pea. Tongo puato, Oli Sipitisa okomane loto, Juta yame akali Jutusaleme ateyai tupamane matipu okona anduanne oko wua pua andi loto, wandakali yame waka tupanga malupeyai leya lea.*

¹² Akali okonemanee pii wuane leane okone ale wato, Sisaliya tano okonena Kitisene wandakali ateaini tupapi, akali sipinga pitiyu epemane tupapi, nanima pitaka-mane pii taimane loto, Polo nimba Jutusaleme polene lema.

¹³ Nanimato wuane lema tekeko, Poloto nanimanee pii okone yano peyoto, namba Jutusaleme poto, Akali Andane Jisasana piape puluwa okonena, Juta yame-mane namba andi leaindopi, peyo ome leaindopi, okone katu teke nembo toto, makande pitane ateyo-ko. Tene anu peakale yakamato ai loto, nambana yamapane mo kenda piya eyaipe lea.*

¹⁴ Wuane lea-kola, nanimato balana nembo-tene oko katulo mo lawa napulupeyama ya lo andoto, Akali Andane okomane nembo tola pua peakale lo ando kondama lema.

Polo Bala Jutusaleme Peane Oko

¹⁵ Ole minditupa pea-kola, nanimana pinju tupa makande piyu, nanima Jutusaleme pema.

¹⁶ Okone angi yuu ailene Saipatasane akali Nasone lene mindi bala Jutusaleme ateaipia. Wamba wete balato Jisasa bilipi lo atama ipulu, wuane pua teke mee bilipi lo ateaipia. Nanima Jutusaleme pema-angi, Jisasa lo bilipi lene Sisatiya tane minditupa nanima towa atu pema. Nanimato Nasone okona andaka paliyapale loto, akali utupane-mane nanima ape yai-kola, balana andaka pema.

¹⁷ Nanima Jutusaleme peakaiyu lemanggi, Kitisene wandakali tupamane nanima towa epele wato, wayu epalaiya lo lameai.

¹⁸ Anate-lene Polo bala nanima towa atu Jemesa andolo pema-kola, Jutusaleme sosa okona akali esamane tupa pitaka epoto, nanima towa atu amunguli pema.

¹⁹ Okone angi, Poloto akali utupane kii sikane lalu, balato piape peane tupa pitaka utupane lamawuato, Goteto nambana pi-ape okomane wandakali yame waka tupa moyo wua peane lo pii temane kambua lamaiya.*

²⁰ Lamaiya-kola, akali utupane-mane ale wato, Goteno gene oko laiyu lalu, Polo lamawuato, amene Polo, Juta yame wandakali tausene kambua Jisasa lo bilipi lo ateyai okone nimbato andele leainipia. Utupane pitaka-mane loo Mosesato yata yane tupa wayu wete-mane wato minu atamakale nembo talaini.*

²¹ Wamba wandakali minditupa epoto, utupane lamawuato, Poloto wandakali yame waka ateyai tupana tombenenga Juta yame wandakali ateyai tupa mana lamaiyane. Mana lamawuato, yakamoto loo Mosesato yata yane tupa awua tepa wato, yakamana iwanane tupana yalapene umbaini kati napene, Juta yamena mana wambane tupa wato mina na-piyapape lalane leai.

²² Wamba wandakali minditupa-mane wuane leai-kola, Mosesato loo yata yane tupa wayumane wato minu atamakale nembo talaini Juta yame Kitisene tupamane nimba towa embowa ateyai. Andipa utupane-mane nimba Jutusaleme ipupi lene oko ale olai-angi, yataka olaini lo yuku wato, nanimato anu pimape nembo teyama.

²³ Utupane-mane yataka olaini. Nanimato nimba languluma pua pipe. Wamba nanimana akali tukumindi-mane mangene

mindi pimakale loto, Gote towa potomisa pii mindi leai. *

²⁴ Nimba akali tukumindi utupane towa atu poto, Goteno wenonga koo tene mindi yakamanga nayakale loto, utupane-mane mangene pulai tupa nimbatopi pipe. Akali utupane-mane Gote lo opa mindi maiyakale loto, nimbato utupane moyo muni minditupa maipe. Utupane-mane Gote lo opa okone mawuato, mangene mindi pimakale lo Gote towa potomisa pii lema oko pikoyo peyama loto, yakamana kawa itini katulu-peyai. Wandakali pitaka-mane yakamana itini katulaini tupa andoto, loo Mosesato yata yane tupa nimbato wato minu atalene ya lo andolopeyai. Dee, nimbato wuane napilini leaini akali utupane-mane owato pii loto, wuane leaini ya lo andolopeyai teke.

²⁵ Juta yame Kitisene nanimato mana utupane minalamane tekeko, wamba nanimato pii mindi lo puta pua yata wato, wandakali yame waka Jisasa lo bilipi lo ateyai tupana pepa peyo pee loto, wandakali-mane owato gote mindi lo opa mawuato, tomo maiyene tupapi, yakamoto naa na-piyapape lema. Tundupa naa na-piyapape. Koa ekapi, ema-pene yame wakapi, utupane nongonga omene tupana tundupa piti-pata okonepene tupa naa na-piyapape. Dee, pamuku na-piyapape. Wuane loto, nanimato wandakali yame waka Kitisene utupanena pepa peyo pee lema leai. *

²⁶ Wuane leai-kola, anate-lene Poloto akali tukumindi utupane lamo atu poto, Goteno wenonga koo tene mindi yakamanga nayakale lo mangene pulane tupa utupane towa peainipia. Piyu, balato lotu anda andane okona poto, pitisa akali tupa lamawuato, ole wataka pola-kola, Goteno wenonga koo tene mindi nanimanga nayolopeya. Okone angi, nanima mindiki-mindiki lo Gote opa malu ipumakale leaipia.*

Juta Yame Akali Tupamane Polo Mineaini Oko

²⁷⁻²⁹ Matili ole yanasa utupane koyo tuyale pe-a-angi, Juta yame wandakali Esia potopinjia atalu epeaini tupamane Polo bala lotu anda andane okona anda-pangosa ateanga andeai. Wamba utupane-mane Epesasa tano okona tane akali Topimasa lene oko Polo towa atu Jutusaleme ateaipinga andoto, Poloto akali okone towa lotu anda andane okona atu epala ya lo nembo teai. Wuane nemboto toto, utupane-mane bala minuto, wandakali amunguli pua ateaini tupa

* 21:19: Ap 15:12

* 21:20: Ap 15:1,5

* 21:23: Nam 6:1-20; Ap 18:18

* 21:25: Ap 15:29

* 21:26: 1Ko 9:20

pitakana nembo-tene oko mina ika laya wato, pii taimane loto, akali okomane yuu yo peya tupa pitakana poto, wandakali pitaka mana lamawuato, utupane-mané Juta yame nanimapi, nanimana lotu anda andane okopi, Mosesato loo yata yane tupapi, utupane anda napi leakale lo mana lamaiyane leai. Andipa balato mana koo mindi tako pua minuto, Gitiki yame akali minditupa towa Gotena lotu anda okona epala. Akali yame waka utupane lotu anda okona epalai okonemane anda epene wete okone Gotena wenonga minu kalato ataya eya. Tene okonena, Isatale tane wandakali tupa yakamato nanimá moyolo ipulupa leai. *

³⁰ Wuane leai-kola, Jutusaleme tane wandakali tupa pitaka-mané mini koo paluto, taimane epoto, Polo kilau lo awua kamaka peai-kola, akali minditupa-mané lotu anda andane okona asia lomba tupa pii leai.

Lomo Tane Ami Yanda Yene Tupamane Polo Andi Leaini Oko

³¹ Wuane piyu, Juta yame wandakali tupamane Polo peyo ome loyale peai-kola, Lomo tane ami akali kawane okomane ale ya-kola, Jutusaleme tane wandakali tupa pitaka-mané yataka wato, kee aka pua ateyai lene oko ale yaepia.

³² Ale wato, balato ami yanda yene ando atalane akali minditupapi, ami yanda yene minditupapi, utupane wamba kapoyale lamialu, utupane towa atu Juta yame wandakali utupane ateaiinga taimane epeai-kola, Juta yame akali tupamane utupane epeaiinga andoto, Polo peya napene konda yainipia.

³³ Konda yai-kola, ami yanda yene ando atalane akali okomane Polo ateanga poto, bala taimane minata wato, ami yanda yene tupamane sene ende lapo-mané Polo andi leakale lea. Wuane lalu, balato Juta yame wandakali ongane ateaini tupa tipa puato, akali oko apiye. Balato mana koo andoko minalape lea.

³⁴ Wuane lea-kola, wandakali kambua ateaini tupamane pii mindipene-mindipene kambua tupa loto, pii taimane laka peai-kola, ami akali kawane okonemane pii wandakali utupane-mané leaini tupa katulo wayumane ale naya. Ale naya-kola, balato ami yanda yene tupa lamawuato, Polo atu yakama ami yamena anda andane okona pulupa lea.

³⁵⁻³⁶ Wuane lea-kola, ami yanda yene tupamane Polo atu yakamana andaka payole peai-kola, wandakali kambua-mané watama epoto, pii taimane loto, bala peyo ome lamakale leainipia. Wuane leai-kola,

Polo bala ami yanda yene tupana anda andane kenga palaini toko pitane atene okona peakaiyu lea-angi, akali utupanemané bala peyo ome lolane nembo toto, ami yanda yene tupamane Polo minaiyu loto, yakamana kii tokonga yakale loto, bala awua yakamana anda andane kenga okona peainipia. *

Polo Pii Mindi Lokale Leane Oko

³⁷ Ami yanda yene tupamane Polo bala atu yakamana andaka kolandaka loyale peai-kola, balato Gitiki pii loto, ami akali kawane oko tipa puato, nambato pii mindi katulo nimba languape leaipia. Wuane lea-kola, ami akali kawane okomane bala tipa puato, nimbalo Gitiki pii lalenepe.

³⁸ Aña wamba yale Isipi tane mindimane gapomane towa yanda puyale akali (4,000) tausene tukumindi mo amunguli puato, utupane towa atu wandakali napalene yuu okona pea. Nimba Isipi tane okone ya lo nembo talo leaipia. *

³⁹ Wuane lea-kola, Poloto bala lamawuato, namba Silisia potopinjia okona tano gene yene Tasasa tane leaipia. Namba Juta yame akali mindi ateyo. Nambato wandakali utupa pii mindi lamaewando, okone katu lolo-peyape lo nambato nimba tipa peyo leaipia.

⁴⁰ Wuane lea-kola, ami yanda yene ando atalane akali okomane, katu yalua leaipia. Wuane lea-kola, Polo bala lata toko kenga okona atoto, kini momonga puato, wandakali ateaini tupamane pii nalene, kondalapa leaipia. Wuane pea-kola, utupanemané pii anjakopi mindi nalene, wayumane alewa ateai-kola, Poloto Iputu pii loto, pii mindi utupane lamai-yaepia.

22

¹ Juta yame-mané wayumane alewa ateyai-kola, Poloto utupane lamawuato, amenepi, ayianepi, nambato mana koo mindi mina napewa loto, andipa yakama langkale ale alapape leaipia.

² Poloto Iputu pii loto, wuane lea okone ale wato, wandakali ateaini tupamane pii anjako wetepi mindi nalene, balana pii oko kuai lo alewa ateainipia.

³ Alewa ateai-kola, Poloto wua leaipia: Namba Juta yame akali mindi ateyo leaipia. Nambana angini oko bala Silisia potopinjia okona tano Tasasa okona pituto, namba mandeane tekeko, namba Jutusaleme tano oo ateyama okona atoto, anda yewane. Akali Gamalialeto Juta yame nanimana mana tupa wayumane wete namba mana langea-kola, mana mewane. Mana mialu,

andipa yakamato Juta yamena mana utupane wayumane wato minu ataima lakae lo nembo teyai pua teke, wamba nambatopi mana utupane wayumane wato minu atauwa lakae lo nembo tewa. *

⁴ Wuane nembo toto, nambato kendapene andane tupa Jisasana pii manapi wato minu ateaini wandakali kambua maiki puato, andi lo awua poto, katapusu anda okona aindaka laka puato, minditupa omeakale lewane. *

⁵ Wuane pewa-kola, pitisa akali kawane okopi, Juta yamena kanjole akali tupapi, utupane pitaka-mane nambana mana okone andeaini. Andoto, utupane-mane namba Poloto wamba wuane peane lo katulo temane yakama langulu-peyai. Wamba nambato Kitisene wandakali Damasakasa tano okona ateani tupa tandaka mauwakale nembo tewa. Wuane nembo tewa-kola, Juta yamena akali kawane utupane-mane pepa minditupa peyoto, Damasakasa tano okona atalaini Juta yame wandakali tupamane namba moyakale loto, pepa utupane namba geai. Geai-kola, nambato pepa utupane mo awua poto, Kitisene wandakali utupane Jutusaleme tano okona andi lo awua epokale loto, Damasakasa tano okona moyale pwane.

Polo Bala Kitisene Guleane Okona Pii Temeane Leane Oko

⁶ Namba Damasakasa tano okona moyale mandaka gulo pewa-kola, otonga taeme tualo kilokopi mindi lea-kola, tii-pene andane wete mindi ati kenga atoto, wamba kapoyale epoto, nambanga tii pikoyo pea.

⁷ Tii pikoyo pea-kola, namba yuunga lomba-pene yoto ale ewa-kola, pii mindi leane okomane loto, Solo, Solo, anu peakale nimbato kenda-pene andane tupa namba giki pilinipe lea.

⁸ Wuane lea-kola, nambato bala tipa puato, Akali Andane, nimba apipe lewa-kola, balato namba languato, namba Jissasa Nasatesa tane nimbato kenda-pene andane tupa giki pilimi okone lea.

⁹⁻¹⁰ Wuane lea-kola, nambato bala tipa puato, Akali Andane, nambato anu puape lewa. Wuane lewa-kola, Akali Andane okomane namba languato, nimba ika lalu, Damasakasa tano okona puu. Tano okonena pole-kola, nimbato piape pula lo nambato nembo teyo utupane pitaka akali mindimane nimba langulu-peyai lea. Akali namba towa atu pemane utupane-mane tii-pene epeane okone andeaini tekeko, pii mindi namba langeane okone utupane-mane ale nayai.

¹¹ Nambanga tii pikoyo peane okone-mane nambana lene au ya-kola, nambato minditaka mindi katulo anda napewa. Anda napewa-kola, akali namba towa atu pemane utupane-mane namba kii minu awua Damasakasa tano okona atu peai.

¹² Damasakasa tano okonena pema-kola, akali Anana-yasa lene mindi ateapia. Bala Gotena pangosa atoto, Juta yamena loo tupa kuai lo wato minu atey-a-kola, Juta yame wandakali Damasakasa tano okona atalaini tupa pitaka-mane bala akali epene lalainipia.

¹³ Bala namba atewanga mandaka epoto, balato namba languato, amene Solo, nimba lee taa lea-kola, okone ang i teke namba lee toto, bala andewa.

¹⁴⁻¹⁵ Andewa-kola, balato namba languato, Goteto wua nembo teya lo nimbato ale ola nembo toto, akali tika-pene Jisasa bala epoto, pii minditupa nimba langipia-kola, nimbato bala lee-mane andapi leapia. Nimbato minditaka andapi tupapi, balana pii ale api tupapi, utupane wandakali tupa pitaka lamawua atola nembo toto, wamba nanima Juta yamena yumbane tupana Gote okomane nimba atola lapia-ko.

¹⁶ Andipa anu peakale nimbato mee malioy atelepe. Goteto nimbana koo tupa apia-geakale loto, nimba ika loto, ipa mia. Anana-yasato wuane lea.

Jisasato Polo Bala Wandakali Yame Waka Tupa Atealinga Peakale Leane Oko

¹⁷ Wuane lea-kola, matili nambato Jutusaleme tano okona peke lalu, lotu anda andane okona pote lo atoto, Akali Andane oko kombeya-mane andene gulo andewa.

¹⁸ Nambato bala andewa-kola, balato namba languato, nimbato nambana pii oko Jutusaleme tane wandakali tupa lamaendo, utupane-mane ale na-olopeyai. Tene okonena, nimba Jutusaleme wamba kapoyale tepa alu puu lea. *

¹⁹ Wuane lea-kola, nambato bala lamawuato, Akali Andane, wamba nambato Juta yamena lotu anda tupa pitakana poto, nimba lo bilipi lene wandakali tupa kunju-mane peyoto, andi lo awua puku pua atewa lewa. Nambato wuane pua atewa-kola, Jutusaleme tane wandakali tupamane nambana mana okone andeai. *

²⁰ Dee, Juta yame akali minditupa-mane yataka wato, nimbana pii lapanawa atalane akali Sipene lene oko peyai ome leai-angi, namba organe mandaka atoto, utupane-mane wayu peyai nembo toto, yakamana tonu luu yoko yata yaini tupa yatawa atewa. Jutusaleme tane wandakali tupamane nambana pii temane okone ale wato,

* 22:3: Ap 5:34

* 22:4: Ap 8:1-3

* 22:18: Ap 9:29-30

* 22:19: Ap 8:1-3; 26:9-11

* 22:20: Ap 8:1-3

nambana mana okone nembo teyai lewa.
*

²¹ Nambato wuane lewa tekeko, Akali Andane okomane namba languato, matili nambato nimba yuu tepanda tane wandakali yame waka tupa ateyainga pola lokalenga, andipa nimba Jutusaleme tepa alu puu lea. Poloto balana pii temane okone Juta yame wandakali ateaini utupane lamawuato, wuane leaipia. *

Poloto Namba Lomo Tane Akali Ateyo Leane Oko

²² Poloto wuane lea-kola, Juta yame wandakali utupane-mane ale wato, pii taimane loto, akali okopene tupa saka ata napeakalenga, peyo ome lalapa leainipia.

²³ Wuane loto, utupane-mane yakamana tona luu peaini tupa yoko apoto, yuu kanganalamu yane tupa kenga utu peya aiyu laka puato, pii taimane laka pua ateainipia.

²⁴ Juta yame wandakali tupamane wuane pua ateai-kola, ami yanda yene ando atalane akali kawane okomane utupanena mana okone andoto, ami yanda yene tupa lamawuato, yakamato bala lamo atu andapangosa ipulupa leaipia. Wuane lea-kola, utupane-mane bala atu anda-pangosa epeai-angi, ami yanda yene akali kawane okomane ami yanda yene tupa lamawuato, Poloto mana koo andoko minapia-kola, Juta yame wandakali tupamane bala omeakale leyai loto, bala tane nanima langeakalenga, yakamato bala kunju-mane peyalapa leaipia.

²⁵ Wuane lea-kola, ami yanda yene tupamane Polo kunju-mane peyoyale ende-mane andi leainipia. Andi leai-angi, Poloto ami yanda yene andete mindiki ando atalane akali ongane ateane mindi tipa puato, yakamana loo okomane loto, yakamato Lomo tane mindina kote ale naene, mee kunju-mane peleaindo, okone katu lolopeya layene eyape leaipia. *

²⁶ Wuane lea-kola, ami yanda yene andete mindiki ando atalane akali okone-mane balana pii okone ale wato, ami akali kawane oko ateanga poto, bala lamawuato, Polo bala Lomo tane mindi yako. Nimbato anu pulape leaipia.

²⁷ Wuane lea-kola, ami akali kawane oko bala Polo ateanga epoto, bala tipa puato, nimba Lomo tanepo. Namba langi leaipia. Wuane lea-kola, Poloto enene, namba Lomo tane leaipia.

²⁸ Poloto wuane lea-kola, ami akali kawane okomane loto, nambato muni kambua wete Lomo tane gapomane oko maewa-kola, gapomane okomane namba Lomo tane mindi gulaya yane leaipia.

Wuane lea-kola, Poloto bala lamawuato, namba wuane nepe. Nambana ayiane bala Lomo tane mindi ateya okonena, nambapi Lomo tane mindi ateyo leaipia.

²⁹ Poloto wuane lea-kola, bala kunjumane peyoyale peaini ami yanda yene utupane-mane yuku wato, bala peya hapene, konda yainipia. Dee, ami akali kawane okomane Polo bala Lomo tane mindi atala-kola, nambato bala andi lalo ya lo nembo toto, yuku ya tekepia. *

Juta Yame Kanjole Tupana Wenonga Poloto Pii Leane Oko

³⁰ Anate-lene ami akali kawane okomane tatake wato, Juta yame wandakali tupamane koo tene anu-pene mindi Polonga yata alaipo lo wayumane andokale nembo teaipia. Wuane nembo toto, balato pitisa akali kawane tupapi, Juta yamena kanjole tupapi, utupane pitaka epo amunguli beakale lo wai leaipia. Utupane epo amunguli peai-kola, ami akali kawane okomane Polo andi leaini sene ende tupa tita lalu, bala atu epoto, akali utupanena wenonga atekale leaipia.

23

¹ Wuane pea-kola, Poloto Juta yamena kanjole amunguli peaini utupane lee-mane andapeyo yoto, amene yame, Gotena leenga nambato balana mana epene tikabene tupa minu atalawane nembo teyo. Andipapi, nambato wuane pua teke ateyo leaipia.

² Wuane lea-kola, pitisa akali kawane Anana-yasa lene okomane akali minditupa Polo ateane ongane ateaini tupa lamawuato, Polona ambulini peyo pai lalapa leaipia. *

³ Wuane lea-kola, Poloto bala lamawuato, wandakali mindina anda okona ende pitane atene oko koo tamene ateya-kola, wandakali waka tupamane ende okone epene ya lo nembo teakale loto, akali mindimane ende okone pende ake pene-mane pende leaipia. Ende okonepene gulo atoto, nimbato Polo bala Gotena loo tupa kalo piyane loto, namba kosimi lokale nembo toto, epo petele tekeko, nimba fane-mane Gotena loo tupa kalo puato, akali utupa-mane namba beyalapa lale. Nimbato wuane lale okonena, Goteto nimba peyolo-peya leaipia. *

⁴ Wuane lea-kola, akali bala ateane ongane mandaka ateaini tupamane bala lamawuato, nimbato Gotena pitisa akali kawane oko andayo pii koo lele okonde leainipia.

⁵ Wuane leai-kola, Poloto utupane lamawuato, amene yame, Gotena pii pepa

pelene eya mindimane loto, nimbato nimbanaya okona akali kawane mindi andayo pii koo lolene layene eya tekeko, nimbato akali okone bala pitisa akali kawane ateya nembo natene, pii koo okone bala andayo lalo leaipia. *

⁶⁻⁸ Juta yamena Kanjole ateaini utupanena akali minditupa Satusi yamepi, minditupa Patasai yamepi, utupane peteaini-pia. Satusi yame okomane enjolepi, sипитисапи, okonetaka tupa ata napeya lalaini tekeko, Patasai yame okomane enjolepi, sипитисапи, okonetaka tupa ateyai lalainipia. Dee, Satusi yame-mane wandakali omene tupa malinga ika nalolo-peyai lalaini tekeko, Patasai yame-mane wandakali omene tupa malinga ika lolopeyai lalainipia. Akali yame okonelapo-mane pii waka-waka wuane lalaini nembo toto, Poloto utupane taimane lamawuato, amene yame, namba akali Patasai mindina iwanane atoto, Patasai yame ateyo. Nimbato wandakali omene tupa malinga ika lolopeyai lo bilipi lo maliyo atalawane okonena, yakamoto namba kosimi leyai leaipia. Poloto wuane lea-angi, Patasai yame-mane Satusi yame tupa towa pii yanda peai-kola, Juta yamena kanjole tupa yame lapo gulo ateainipia. *

⁹ Yame lapo gulo atoto, Juta yamena kanjole tupamane pii taimane loto, pii yanda andane mindi pua ateainipia. Wuane pua ateai-kola, loo tupana mana andene akali Patasai minditupa ika loto, pii taimane Satusi yame oko lamawuato, sипитиса mindimane yandopi, enjole mindimane yandopi, okone-lapona mindimane pii okone bala lamaiya-kola, balato pii okone leya-ko. Koo tene mindi balanga naeya lo andeyama leainipia.

¹⁰ Wuane leai-kola, Satusi yame-mane pii yanda andane wete mindi Patasai yame towa puato, Polo peyo ome lape-pene guleaipia. Tene okonena, ami akali kawane oko bala yuku wato, ami yanda yene tupa lamawuato, yakamoto Juta yamena kanjole tupana tombenenga poto, Polo lamialu, bala atu yakamana andaka pulupa leaipia.

¹¹ Wuane leai-kola, ami yanda yene tupa bala atu yakamana andaka peainipia. Peai-kola, anate-lene utulu pango Akali Andane oko bala Polo limu paleane organe mandaka gulo epo atoto, bala lamawuato, wamba nimbato Jutusaleme atoto, nambana pii oko taimane lamawua atee pua teke, matili nimbpa Lomo tano okona po atoto, nambana pii oko taimane lamawua atape-peneke. Nimbpa yuku naene, tai gulo atape leaipia. *

Juta Yame-mane Polo Peyer Ome Lamakale Leaini Oko

¹²⁻¹³ Waa lea-kola, Juta yame akali paiyasa tukumindinga uniane minditupa epo amunguli piyu, pii mindi lo yake puato, potomisa pii mindi loto, enene wete, Gote ati kenga ateya okomane andeya. Nanima tomo ipapi nanene angu atama pulu, Polo peyo ome loloma gii okonena giau lamakale leainipia.

¹⁴ Wuane lalu, akali utupane-mane pitisa akali kawane tupapi, Juta yamena ando atene akali tupapi, utupane ateasinga poto, nanimato potomisa pii mindi loto, enene wete, Gote ati kenga ateya okomane andeya leainipia. Nanimato tomo ipapi nanene angu atama pulu, Polo peyo ome loloma gii okonena giau lamakale lalamu.

¹⁵ Tene okonena, ami akali kawane okomane Polo atu yakama Juta yamena kanjole tupa pitulai okona epeakale. Wuane peakale nembo toto, yakamoto bala langalanga puato, Poloto aki leyape loto, nanimato balana pii tupa lapone wayumane ale amakale nembo teyama lo lamai-yapape. Wuane lolai-kola, Polo bala yakama pitulai okona peakaiyu lata naola-kola, nanimato asininga makande pitawa atoto, bala peyo ome lolopeyama leainipia. *

¹⁶ Utupane-mane wuane leaini tekeko, Poloto imalini okona iwanane okomane pii okone ale wato, bala ami yamena andaka kolandaka loto, Polo lamai-yaepia.

¹⁷ Lamaiya-kola, Poloto ami yanda yene andete mindiki ando atalane akali mindi epeakale loto, iwana patane okomane ami akali kawane oko pii mindi lamai-yakale, nimbato iwana oko atu puu leaipia.

¹⁸ Wuane lea-kola, ami yanda yene andete mindiki ando atalane akali okomane iwana patane okone atu, ami akali kawane oko peteanga peaiapia. Poto, bala lamawuato, andi latane akali Polo lene okomane namba ipu loto, iwana patane okomane pii mindi nimba langeakale, atu puu lala-kola, bala atu epeyo leaipia.

¹⁹ Wuane lea-kola, ami akali kawane okomane iwana patane okone kii minu awua amonga yale poto, liyamba angu atoto, nimbato pii aki mindi langulape lo tipa peaiapia.

²⁰⁻²¹ Wuane lo tipa peai-kola, iwana patane okonemane bala lamawuato, Juta yame akali paiyasa tukumindinga uniane minditupa-mane potomisa pii mindi lalai leaipia. Utupane-mane potomisa pii okone loto, enene wete, Gote ati kenga ateya okomane andeya. Nanima tomo ipapi nanene angu atama pulu, Polo peyo ome loloma oto okonena giau lamakale lalai.

* 23:5: Ek 22:28

* 23:6-8: Ap 26:4-5; Mt 22:23-25

* 23:11: Ap 27:24; 28:16,23

* 23:15: Ap 25:2-3

Wuane loto, utupane-mane Polo peyo ome loyale makande pitawa ateyai. Akali utupane-mane Polo peyo ome leakale nembo toto, Juta yamena kanjole tupamane nimba minakasa amakale loto, pii mindi lo yake pipiai. Langa-langa puato, utupane-mane nimba tee loto, anati nanimato Polo ando pii minditupa tako pua tipa pimakalenga, nimbato bala nanimana kanjole anda okona epeakale lola lolopeyai. Nimbato Polo epeakale leendo, bala epolangi, akali utupane-mane bala peyo ome lolopeyako. Nimbato kanjole okona pii okone ale olene leaipia.

²² Wuane lea-kola, ami akali kawane okomane iwana patane okone lamawuato, nimbatu pii namba langele utupane wandakali mindi lamaulene lalu, bala peakale leaipia.

Polo Bala Sisaliya Tano Okona Peakale Leane Oko

²³ Okone ang, ami akali kawane okomane ami yanda yene andete mindiki ando atalapili akali lapo epeakale loto, okonelapo lamawuato, liyambato yia osa masianenga pitiyu palaini ami yanda yene (70) paiyasa yanasapi, kee atoto asia palaini ami yanda yene (200) andete lapopi, yandate aiyaini ami yanda yene (200) andete lapopi, utupane mialapape leaipia. Mialu, utulu taeme naini kiloko lola-kola, utupane Polo towa atu Sisatiya tano okona peakale lo makande piyapape.

²⁴ Kenda-pene mindi Polo balanga epolane. Bala yia osa mindina pitiyu, gapomane akali kawane Pilikisa ateya okona peakale loto, liyambato osa minditupa mandeke piyapape leaipia.

²⁵ Wuane lalu, gapomane akali kawane okomane pepa mindi peyoto, wua leaipia:

²⁶ Namba Kolotiyasa Lisiasato gapomane akali kawane epene wete Pilikisa nimbanapa opeko peyo epe loto, nimba kuai lo atapeleyo.

²⁷ Juta yame wandakali tupamane akali Polo oko minata wato, bala peyo ome loyale pipiai tekeko, nimbato bala Lomo tane mindi ateya lene oko ale auwa. Ale wato, nambapi, ami yanda yene tupapi, nanima poto, bala Juta yame wandakali tupana kinina molo-peke laima. *

²⁸ Wuane piyu, utupane-mane koo tene anu-pene mindi akali okonga yata apiaipe lo ale wakale loto, nimbato bala towa atu Juta yamena kanjole tupa amunguli pua pitipiai organe puwa. *

²⁹ Poto, nambato ale auwa-kola, Poloto Juta yame okona loo minditupa kalo pipia-kola, utupane-mane balanga koo tene minditupa yata apiai. Nambato koo tene utupane ale auwa-kola, bala peyo ome lolane yandopi, andi lolane yandopi, tene mindi ata napipia.

³⁰ Matili mindimane namba languato, Juta yame akali minditupa-mane too pua pii lo puta puato, Polo peyo ome lamakale lapiai lo namba langipia. Langipia-kola, nimbato Polo bala nimba atelenga epeakale leyo. Akali oko kosimi lapiai akali utupane nimba wenonga epo atoto, bala kosimi leakale. *

³¹ Ami yame akali kawane okonemane wuane lo pepa peyoto, ami yanda yene utupane maiya-kola, utupane-mane balana pii wato minuto, utulu pango Polo atu Andipatisa tano okona peainipia.

³² Pulu, anate-lene ami yanda yene yia osanga peteaini tupa Polo towa atu Sisatiya tano okona peai-kola, ami yanda yene kee ato asini peaini tupa yakama Jutusaleme peke lalu, yakama andaka peainipia.

³³ Andaka peai-kola, ami yanda yene yia osanga pitiyu peaini tupa yakama Sisatiya tano okona peakaiyu lalu, pepa mandu epeaini okone gapomane akali kawane oko mawuato, Polo balana kinina tepsa yainipia.

³⁴ Okone ang, gapomane akali kawane okomane pepa okone dii lo andalu, Polo tipa puato, nimbanapa potopinjia andokope lea-kola, Poloto namba Silisia potopinjia tane mindi ateyo leaipia.

³⁵ Wuane lea-kola, gapomane akali kawane okomane Polo lamawuato, akali nimba kosimi lolaini tupa peakaiyu lolai-angi, nimbato nimbanapa pii ale wakale leaipia. Wuane lalu, balato ami yanda yene minditupa lamawuato, yakama Polo towa atu gapomane anda wamba Etoteto peane okona poto, bala ando atalapape leaipia.

24

Juta Yamena Akali Kawane Tupamane Polo Kosimi Leaini Oko

¹ Matili ole yau pea-kola, pitisa akali kawane Anana-yasa oko bala Juta yame okona ando atene akali minditupa towa atu Sisaliya tano okona epeainipia. Akali utupane Lomo tane wandakali tupana loo tupana mana andene akali Tetulusa lene mindi towa atu epoto, Polo kosimi lape-pene tene tupa Lomo tane gapomane akali kawane Pilikisa oko lamai-yainipia.

²⁻³ Lamai-yaikola, gapomane akali kawane okomane Polo epeakale leaipia.

Polo bala epea-angi, akali Tetulusa okone-mane bala kosimi loyale atoto, wamba ini bulupane Lomo tane gapomane akali kawane oko lamawuato, wamba nanimana yuu tupa pitakana minditaka kambua kuai lo ya neape tekeko, akali andane Pilikisa nimbatu kuai lo nembo toto, utupane pitaka mo tika piki pua atalene leaipia. Nimbato nanima moyo atee-kola, mali kambua nanima yanda anjakopi mindi napene, kuai lo wete ataima. Tene okonena, nanima pitaka-mane mini epene palu atoto, nimba ando wayu wete pele leyama.

⁴ Pii utupane enene tekeko, nambato nimba minandi lolowane. Nimba kepa naene, nanima ondo wato, nanima Juta yamena pii ukupini mindi nambato nimba langukale-ko. Nimbato ale ola leyo.

⁵ Nanimato akali oko andaima-kola, balato kenda-pene kambua mina ika lalane akali mindi pia. Nasatesa tane Jisasa oko lo bilipi lene yame ateyai okona akali kawane atoto, balato yuu yoo peya tupa pitakana Juta yame wandakali atalaini tupa pitaka mo yataka aya wato, yanda kambua mina ika lo atalane. *

⁶⁻⁸ Balato nanimana lotu anda andane oko Gotena wenonga kalato atene gulaya oyale makande peane tekeko, nanimato bala minaima. [Bala minalu, nanima Juta yamena loo tupa wato minuto, bala kosimi laima lakaes lo nembo tema tekeko, ami akali kawane Lisisasa okomane epoto, nanima minu pende lo apialu, Polo minia. Balato nanima languato, yakamato akali oko kosimi lamakale nembo teafindo, gapomane akali kawane ateyanga pulu, bala kosimi lalapape leane.] Tene okonena, nimba tane katulo akali oko tipa pule-kola, nanimato bala kosimi leyama tupana tene tupa bala tane nimba langulu-peya leaipia. *

⁹ Tetulu-sato wuane lea-kola, Juta yame akali tupamane balana pii leane oko mo tai laya wato, pii utupane enene wete leainipia.

Poloto Juta Yamena Pii Yano Peyo Leane Oko

¹⁰Juta yame wandakali tupamane wuane leai-kola, gapomane akali kawane Pilikisa okomane weno titi loto, Poloto pii laa leaipia. Pii laa lea-kola, Poloto Juta yamena pii leaini okone yano peyoto, wua leaipia: Nimbato mali kambua tupana Juta yame nanimana kote lalamane tupa tika pua lee-kola, nambato andeyawane. Tene okonena, namba mini epene paluto, utupanena pii tupa yano peyoto, nimba langukale.

¹¹ Wamba nambato Gote lo lotu lolo pokale loto, Jutusaleme pewa. Okone angi

tewa andipa giao loto, ole paitasanga lapo angu pupia. Nimbato Jutusaleme wandakali minditupa tipa peendo, utupane-mane nimbania pii okone yano peyoto, Poloto pii enene leya lolai-kola, nimbato katulo ale olopele.

¹² Lotu anda andane okona ende andangosa namba akali mindikipi mindi towa pii yanda napewane. Dee, Juta yamena lotu anda tupana yandopi, tano okonena yuu waka mindina yandopi, nambato wandakali minditupa mo amunguli pua ata napewane teke. Tene okonena, Juta yame wandakali tupamane namba wuane pwanga anda napeai-ko.

¹³ Akali utupane-mane namba kosimi loyale pii leyai utupane enene leyama lo nimbania katulo andawa nalolo-peyai.

¹⁴ Andawa nalolo-peyai tekeko, utupane-mane namba kosimi loto, Poloto Nasatesa tane Jisasa lo bilipi loto, balana yame ateya lahai okone enene pii lahai lo nambato nimba langeyo. Potopesa akali tupamane Gotena pii pepa peleaini tupapi, balana loo tupapi, utupane bilipi loto, nambato nanimba Juta yamena yumbane tupana Gote oko lo lotu loto, Jisasa lo bilipi loto, balana yame ateyo.

¹⁵ Matili Goteto wandakali epene tipa-pene tupapi, mana koo minu atalaini tupapi, utupane pitaka malinga ika laya olopeya nembo toto, Juta yame akali utupane-mane maliyo ateyai. Wuane pua teke, nambatopi, Goteto wuane pulupeya nembo toto, maliyo ateyo.

¹⁶ Goteto wuane pulupeya nembo toto, Gotena wenongapi, wandakali tupana wenongapi, koo tene mindi nambanga nayakale loto, ole dindi lo nambato piapayawa pua atalawane.

¹⁷ Wamba namba mali minditupa yuu waka tupana atalu, matili nambato Juta yame wandakali minditaka jia yene ateaini tupa moyokale nembo toto, Jutusaleme pewa. Pulu, nambato munipi minditaka wandakali utupane maiyu, minditaka Gote lo opa maipe-pene tupa maewa.

¹⁸⁻¹⁹ Maiyu, Gotena wenonga namba kalato ata napene atokale nembo toto, Juta yame wandakali nanimato mana wato minalamane tupa wato minewa. Mana utupane minu koyo piyu, namba Juta yamena lotu anda andane okona atewa-kola, Esia potopinjia okona atalaini Juta yame akali minditupa epoto, namba andeai. Andeai-kola, nambato wandakali kambua mo amunguli puapi, wandakali mindi towa pii yanda puapi, mindi napewa tekeko, utupane-mane epoto, namba

* 24:5: Ap 17:6 * 24:6-8: Ap 21:27-30 * 24:15: Jo 5:28-29

miniai. Nambanga koo tene mindi yapia-yale, akali utupane-mane nimba wenonga epo atoto, namba kosimi lape-pene gulapial-yale. *

²⁰ Wuane jia yando, Juta yame akali ongane epo ateyai utupane-mane yakamana kanjole tupana wenonga namba wamba kosimi leai-angi, nambanga koo tene mindi andeaini yando, koo tene okopene mindi andema lo nimba langeakale.

²¹ Wamba akali utupane-mane namba kosimi leai-angi, namba utupanena tombe-nenga atoto, pii taimane loto, Goteto wandakali omene tupa malinga ika laya olopeya lo nambato bilipi lo ateyo. Tene okonena angu, akali utupane-mane yakama wenonga namba kosimi leyai lewa. *

²² Poloto wuane lea-kola, akali Pilikisato Jisasana mana tupa wato minalaini wandakali tupana bilipi oko wayumane nembo teaipia. Nembo toto, balato akali Polo kosimi lolo epeaini utupane lamawuato, ami akali kawane Lisisasa epola-angi, nambato yakamana kote lo tika pukale leaipia. *

²³ Wuane lalu, balato ami yanda yene andete mindiki ando atalane akali mindi lamawuato, nimbato Polo wayumane andi nalene, mee palaka polane. Waiwa ando atape. Balana yame wandakali mindimane bala moyolo epola-angi, nimbato jia lolene leaipia.

Polo Bala Mali Lapo Andi Latane Ateane Oko

²⁴⁻²⁵ Ole minditupa pea-kola, Pilikisa balana wetene Juta yame wanda Dutusila lene oko towa atu mindisa atalu, epo peakaiyu loto, Polo epeakale leaipia. Epeakale lea-kola, Polo epoto, Kitisene wandakali tupa-mane yakama tane kuai lo ando atoto, mana epene tika-pene tupa wato minu atape-pene loto, Jisasa Kataisa lo bilipi lene mana okopene eya leaipia. Dee, Poloto pii mindi loto, matili Goteto wandakali tupa yapa lolo epolopeya lea-kola, Pilikisato pii okone ale wato, yuku yaepia. Yuku wato, balato Polo lamawuato, matili alu mindi, nambato nimba lapone ipu lokale tekeko, andipa nimba puu leaipia.

²⁶ Pilikisato bala tinga lo tepa yakale loto, matili Poloto bala gitisimi loyale muni minditupa gulupeya nembo teaipia. Wuane nembo toto, ole kambuangga Pilikisato Polo epeakale laka puato, bala towa pii laka pua ateipia.

²⁷ Juta yame-mane bala towa epele yakale nembo toto, Pilikisato Polo bala mee kampusa atekale lea-kola, mali lapo peaipia.

Mali lapo pea-kola, akali Posiasa Pesatasa lene mindimane Pilikisana panda meaipia.

25

Sisato Nambana Kote Ale Yakale Leane Oko

¹ Pesatasa bala Sisatiya tano okona epoto, Jutiya disitiki okona gapomane akali kawane ateipia. Ole tepoai angu tano okonena atalu, bala Jutusaleme peaipia.

²⁻³ Bala Jutusaleme pea-kola, pitisa akali kawane tupapi, Juta yamena akali andane tupapi, utupane-mane nembo toto, Polo bala Jutusaleme epo pola-kola, akali minditupa-mane asininga anga pua atoto, bala peyo ome leakale nembo teainipia. Wuane nembo toto, akali utupane-mane Pesatasa ateanga poto, koo tene minditupa Polonga yata yainipia. Yata alu, utupane-mane Pesatasa lamawuato, nimbato nanima moyoto, Polo bala Jutusaleme epeakale lape leainipia. *

⁴ Wuane leai-kola, Pesatasato utupanena pii okone yano peyoto, Polo bala Sisatiya tano okona andi latane ateya leaipia. Namba ole ajalapo minditupa angu wali atalu, Sisatiya tano okona peke lokale lo ateyo.

⁵ Namba polowa-angi, yakamana akali kawane tupa namba towa atu makale. Poto andoloma-kola, akali okonemane mana koo mindi minia yando, utupane-mane bala kosimi leakale leaipia.

⁶ Wuane lalu, Pesatasa bala Jutusaleme wandakali tupa towa atu ole kitupasa yan-dopi, paiyasa yandopi, mindi atalu, Sisatiya tano okona peke leaipia. Peke loto, anate-lene bala kote ale alaini anda okona pituto, Polo lamolo pulupa leaipia.

⁷⁻⁸ Polo bala epea-kola, Jutusaleme atalu epeaini Juta yame akali tupamane bala ato mapu puato, pii kenda-pene kambua balanga yata yaini tekeko, Poloto utupanena pii okone yano peyoto, Juta yamena loo tupa yandopi, Juta yamena lotu anda andane okona yandopi, dee Lomo tane gapomane akali kawane Sisa oko towa yan-dopi, utupane towa nambato mana koo mindi mina napewane, jia leaipia. Wuane lea-kola, Juta yame akali utupane-mane Polonga pii kenda-pene kambua yata wato, balato wua peane leaini tekeko, utupane-mane enene leyama lo katulo Pesatasa andawa naleinipia. *

⁹ Wuane tekeko, Pesatasa balato Juta yame wandakali tupa mo epele piya wakale nembo toto, Polo tipa puato, nambato nim-bana kote okone Jutusaleme ale wakale. Nimba polape leaipia.

* 24:18-19: Ap 21:12-29

* 24:21: Ap 23:6-8

* 24:22: Ap 23:26

* 25:2-3: Ap 23:15; 24:1

* 25:7-8: Ap 24:5-8

10-11 Pesatasato wuane lo tipa pea-kola, Poloto balana pii okone yano peyoto, jia leaipia. Juta yame wandakali tupanga nambato mana koo mindi mina napewa oko nimbatu wayumane nembo tele okoni. Utupane-mane namba kosimi loyale pii leyai utupane enene pii mindi naleyai okonena, akali mindimane namba Juta yame wandakali utupanena kinina katulo mai napulu-peya. Wuane tekeko, nambato mana koo waka mindi minewa yando, Lomo tane gapomane akali kawane Sisana kote anda ateyama okona atoto, nambana kote oko ale ape-pene. Akali okonemane namba kosimi loto, namba omape-pene leando, namba omape-pene. Lomo tane gapomane akali kawane Sisa bala tanemane nambana kote okone ale yakale leyo leaipia.

12 Poloto wuane lea-kola, Pesatasato balana kanjole yame tupa towa wamba ini pii lo tika piyu, Polo lamawuato, nimbatu Lomo tane gapomane akali kawane Sisato nimbania koteoko ale yakale lele okonena, akali okonemane nimbania koteoko ale yakale pola leaipia.

Pesatasato Kinji Akitipa Towa Pii Leapili Oko

13 Ole minditupa pea-kola, Kinji Akitipa-la, bala imalini Benisa-la, okonelapo-mane Pesataso nimba wayu epeleya lapakale nembo toto, Sisatiya tano okona epeapilia.

14 Epoto, liyamba Sisaliya tano okona ole kambua peteapi-kola, Pesatasato Polona pii temane oko kinji Akitipa oko lamawuato, wamba Pilikisato akali mindi andi lea-kola, andipa bala mee katapusa ateya leaipia. *

15 Namba Jutusaleme atewa-kola, pitisa akali kawane tupapi, Juta yamena ando atene akali tupapi, utupane-mane Polonga koo tene minditupa yata wato, akali okonemane mana koo mindi mineane okonena, nimbatu bala omeakale lape leaini.

16 Utupane-mane wuane leaini tekeko, nambato utupanena pii okone yano peyoto, Lomo tane nanimato kenda-pene mindi wandakali tupa mee mai na-piyamane. Jia. Wandakali okonemane bala kosimi lolai wandakali utupanena pii lolai tupa yano peleakale lo mali yalamane lewa.

17 Wuane lewa-kola, akali utupane namba towa atu wali epeai. Ipu, anate-lene nambato mali nayene, kote anda okona pituto, akali okone lamo atu epeakale lewa.

18 Bala atu epeai-angi, bala kosimi leaini akali tupamane ika loto, balato mana koo wete minditupa wua pua mineane lo bala kosimi lolopeyai nembo tewa tekeko,

utupane-mane pii okonepene tupa naleai. Jia.

19 Utupane-mane mee yakama tanena Gote lo bilipi lene mana tupana pii kambua leai. Poloto akali Jisasa lene mindi wamba omeane okone bala saka atolo-peke leane lea-kola, Juta yame akali tupamane jia loto, Polo towa pii yanda pua ateai.

20 Utupane-mane pii okonepene tupana pii yanda pua ateai-kola, nambato utupanena kote anu pua lo tika puape lo tatake wato, Polo tipa puato, nimba Jutusaleme pole-kola, mindimane nimbania koteoko ale yakale, nimba polape lewa.

21 Wuane lo tipa pewa-kola, Poloto namba languato, Lomo tane gapomane akali kawane Sisa okomane nambana koteoko ale yakale-ko. Namba mee katapusa anda okona atokale lea. Wuane lea andala, nambato bala Sisa ateyanya polane asini aiya pukale loto, bala katapusa anda okona mee ateakale lewa.

22 Pesatasato wuane lo kinji Akitipa lamaiya-kola, Akitipato bala lamawuato, namba tane-mane akali okonena piioko ale wakale leaipia. Wuane lea-kola, Pesatasato bala lamawuato, anati nimbatu balana piioko ale ola leaipia.

Polo Bala Kinji Akitipa Peteane Okona Epeane Oko

23 Pesatasato wuane lea-kola, anate-lene kinji Akitipa-la, bala imalini Benisa-la, liyambana yati epene kambua tupa piyu, kinji tupa epalaini pua epeapelepia. Epoto, liyambapi, ami akali kawane tupapi, tano okone ando atalaini akali kawane tupapi, utupane towa atu wandakali amunguli piyaini panda okona kolandaka leai-kola, Pesatasato akali minditupa lamawuato, Polo epeakale, yakamato bala lamolo pulupa leaipia.

24 Polo atu epeai-kola, Pesatasato wua leaipia: Kinji Akitipapi, nanima towa amunguli pua peteyama akali tupapi, yakama pitaka-mane akalioko andeyai okoni. Jutusaleme tano okonapi, walipi, Juta yame wandakali tupa pitaka-mane pii taimane namba languato, akalioko bala Sisa ateyanya peakale leai.

25 Utupane-mane wuane leaini tekeko, nambato andewa-kola, bala peyo ome lolane tene mindi balanga ata naapea. Wuane tekeko, bala tane-mane loto, gapomane akali kawane Sisato balana koteoko ale yakale lea andala, nambato bala Sisa ateyanya peakale lewa.

26-27 Akali okona kote lape-pene tene angini tupa pepa peyoto, pepa okone gapomane akali kawane Sisa balanga pee lape-pene guleya tekeko, nambato pii aki

* 25:14: Ap 24:27

mindi loto, pepa peyo pee loape lo tatake eyo. Nambato katapusa akali okona kote lape-pene tene tupa pepa peya napene, bala kote ale alane akali mindinga mee kote lolo peakale lewando, nambana mana okone kee ene mana mindi gulolo-peya nembo teyo. Tene okonena, nanimato bala kuai lo tipa puato, balana pii oko wayumane ale amakale. Ale oloma-kola, nambato balana kote lolane tene tupa aiya pua moto, pepa peyoto, gapomane akali kawane Sisa balanga pee lokale. Wuane pukale nembo toto, nambato kinji Akitipa nimbaipi, akali peteyai tupapi, yakama pitaka ipulupa lo amunguli puato, Polo bala yakamana wenonga atolo epeakale lalo. Pesatasato wuane leaipia.

26

*Poloto Kiji Akitipana Wenonga Atoto,
Pii Leane Oko*

¹ Pesatasato wuane lea-kola, kinji Akitipato Polo lamawuato, wamba Juta yame-mane nimbaipi pii kenda-pene yata yaini tupa andipa nimba tane-mane yano peyo lola leaipia. Wuane lea-kola, Poloto balana kini aiyu loto, wua leaipia:

²⁻³ Kinji Akitipa nimbaipi nanima Juta yamenan manapi, pii yanda piyamanepi, utupane pitaka wayumane wete andelene pia okoni. Tene okonena, namba nimba wenonga atoto, pii kenda-pene Juta yame-mane nimbaipi yata apia tupa pitaka yano peyo lokale lo epele eyo. Nambato utupanena pii yano peyo pii lolowa-kola, nimbaipi wamba ini kepa naene, pii lolowa tupa ale a gula leyo.

⁴⁻⁵ Wamba namba iwana patanenga, nambato Patasai yamenan mana tupa wato minu atewa-kola, Juta yame-mane nimbaipi minalawane tupa andeai. Patasai yame nanimato Gotena loo tupa kuai lo wete wato minu atoto, Juta yame wandakali waka tupa pitaka sia minalawane. Wamba nambana yuu tene okona atewa-angipi, matili namba Jutusaleme poto atewa-angipi, nambato Patasai yame okona mana epene utupane minu atewane okone Juta yame wandakali pitaka-mane nembo teyai. Tene okonena, utupane-mane nimba wenonga mana epene utupane nimba langimakale nembo teaindo, utupane-mane katulo langulu-peyai. *

⁶⁻⁷ Wamba Goteto Juta yame alesa nanimana yumbane tupa ando potomisa pii mindi lamawuato, matili nambato wandakali omene tupa ika laya wakale leaipia. Wuane lea-kola, utilu otongapi, Juta yame wandakali utupane-mane Gote lo lotu loto,

balato wandakali omene tupa ika laya yakale lo maliyo atalaiani. Andipa nambatopi Goteto wandakali omene tupa ika laya yakale lo maliyo ateyo okonena, Juta yame wandakali utupane-mane nambanga pii kenda-pene yata wato, kosimi leyai. *

⁸ Goteto wandakali omene tupa ika laya wakale lea-kola, anu peakale yakamana minditupa-mane pii okone bilipi nalape-pene nembo teyaipe.

⁹ Wamba nambato Nasatesa tane Jisasa okona gene oko minu koyoyale, mangene kambua pukale nembo tewa. *

¹⁰ Wuane nembo tewa-kola, Poloto Kitisene wandakali tupa andi leakale leyama loto, pitisa akali kawane tupamane pepa mindi peyoto, namba geai. Geai-kola, nambato Kitisene kambua andi loto, katapusa andaka aindaka laka pua atewa. Dee, Pitisa akali kawane utupane-mane Kitisene wandakali utupane omeakale leai-angi, nambatopi enene utupane omeakale lewane teke. Nambato Jutusaleme atoto, mana utupane minu atewa.

¹¹ Ole kambuangga namba Juta yamena lotu anda tupa pitakana kolandaka laka puato, kenda-pene andane tupa Kitisene wandakali peteaini tupanga maiki pewane. Nambato utupane lamawuato, yakamato Jisasa masia mawuato, bala ando pii koo lalapa lewane. Nambato Kitisene wandakali tupa ando yataka andane wete wato, tano amonga wete yane tupana poto, kenda-pene andane tupa utupane maiki pua, epoko pua atewane.

*Polo Bala Kitisene Gulewane Lo Temane
Leane Oko*

¹² Wuane lalu, Poloto pii minditupa tako pua kinji Akitipa lamawuato, wamba Pitisa akali kawane tupamane pepa mindi namba gipulu, Kitisene wandakali tupanga kenda-pene andane tupa malu puu leai-kola, namba Damasakasa tano okona moyale asini pewa leaipia.

¹³ Kinji nimbaipi nambana pii oko wayumane ale ape. Namba asini pewa-kola, otonga taeme tualo kilokopi mindi lea-angi, nambato andewa-kola, tii-pene andane wete nai ita minene mindi ati kenga ato epoto, nimbapi, akali namba towa atu pemane tupapi, nanimanga tii pikoye pea.

¹⁴ Tii pikoye pea-kola, nanima pitaka yuunga lomba-pene yo atema. Namba lomba-pene yoto ale ewa-kola, pii mindi leane okomane Iputu pii loto, Solo, Solo, nimba wenongan masianesa minditaka mindi ateyakola, nimbato okone wato apokale nembo toto, nimba wenongan masianesa

piande-piande peya aiyu lele. Wuane pelekola, yandate nembo atene mindimane nimbanan kene yandate eya-kola, nimba tane tandaka nele-ko. Anu peakale nimbato kenda-pene andane tupa namba giki pilinipe lea.

¹⁵ Wuane lea-kola, nambato Akali Andane, nimba apipe lewa. Wuane lewa-kola, Akali Andane okomane namba akali Jissasa nimbato kenda-pene andane tupa giki pua atele okone lea.

¹⁶ Wamba nimbato kenda-pene andane tupa namba giki pilini tekeko, andipa nimba nambana piape akali atola lolo epeyo-ko. Nimba ika lo ata. Nimbato minditaka andipa peyo-kola, andeles tupa, nambato minditaka matili nimba andawa lolowa-kola, andolopele tupa, utupane pitaka nimbato wandakali tupa lamawua atola lolo epeyo.

¹⁷⁻¹⁸ Nimbato nambana pii oko utupane lamaule-kola, utupane-mane namba lo bilipi lolopeyai nembo teyo. Bilipi lolai-kola, nambato utupanena mana koo minalaini tupa apia-mawuato, utupane nambato wamba mo kuai laya ewane wandakali tupa towa atu nambana yame ateakale lolo-peyawa. Nimbato wuane pukale nembo toto, wandakali undupi pangosa ateyai utupane-mane Satanena tai-lene oko tepa alu, Gotena tii-pene okona epoto, bala wato miniakale loto, nimbato utupanena lene tupa mo tii piya olo puu leyo. Nimbato piape okone pua atole-kola, Juta yame wandakali tupa, wandakali yame waka tupa, utupane-mane nimba minu koyoyale pulai-angi, utupanena kinina nimbato nimba molo-peke lolopeyawa. Akali Andane okomane wuane loto, namba langea. Poloto wuane leaipia.
*

Poloto Piape Peane Tupa Akitipa Lamaiyane Oko

¹⁹ Wuane lalu, Poloto pii minditupa tako pua loto, kinji Akitipa nimbato wayumane ale ape leaipia. Tii pene wetete mindi ati kenga atoto, nanimanga tii pikoye peane okone andoto, pii mindi leane okone ale wato, nimbato tangga nalewane. Jia.

²⁰ Tanga nalene, wamba ini bulupane nimbato Gotena pii oko Damasakasa tane wandakali tupa lamalu pewa. Poto, yakamato yamapane peke loto, Gote bilipi loto, mana epene minulai tupamane yakamana yamapane peke laima lo andawa lalapape lewa. Wuane lalu, matili namba Jutusalemeipi, Jutiya disitiki yuu waka tupa, utupane pitakana poto, Juta yamepi, wan-

dakali yame waka tupa, utupane pitaka pii mindiki okone teke lamaewa.

²¹ Nimbato pii okonepene tupa lamaima epoko pua atalawane okonena, Juta yame akali tupamane yataka wato, lotu anda andane okona epoto, namba minuto, peyo ome loyale peai.

²²⁻²³ Utupane-mane wuane peaini tekeko, wamba Mosesapi, potopesa akali tupa, utupane-mane wandakali tupa lamawuato, matili Mesaya oko bala tandaka nalu, omalu, wamba ini bulupane malinga ika lolopeya. Ika lalu, balato Gotena pii oko Juta yamepi, wandakali yame waka tupa, utupane lamawuato, Goteto yakamana nembotene tupa mo tii piya eya lolopeya leainipia. Wuane lea-kola, Goteto namba moyama teke ipulu, andipa ateyama gii okona gaua leya. Tene okonena, andipa namba balana wisanisa atoto, pii waka mindi nalene, pii wamba potopesa akali tupamane leaini okone teke wandakali gene yenepi, nayenepi, yakama pitaka langeyo leaipia.*

²⁴ Poloto wuane lo pii yano peyo ateakola, Pesatasato pii taimane wete loto, Polo, nimba mana kambua wete meene okonemanie nimba minu kee eya okonena, nimbato kee wato pii okone lele leaipia.

²⁵ Wuane lea-kola, Poloto bala lamawuato, akali andane Pesatasato, namba akali kee ene, jia leaipia. Namba mini paluto, enene pii utupane leyo.

²⁶ Kataisa bala mindisa too pua ata napene, ama tombenenga atoto, nimbato leyo pua peane. Wandakali-mane Kataisa balato wuane peane lea-kola, Kinji Akitipato pii okone wamba ale ya okoni. Tene okonena, nimbato yuku naene, Kataisa balato wuane peane lo bala lamaiyo.

²⁷ Wamba potopesa akali tupamane loto, matili Mesaya okomane wuane pulupeya leainipia. Kinji Akitipato nimbato potopesa akali utupanena pii okone enene ya lo bilipi lelele. Potopesa akali utupane-mane pii leaini okone enene ya lo nimbato bilipi lele lo nimbato nembo teyo leaipia.

²⁸ Poloto wuane lea-kola, Kinji Akitipato bala tipa puato, gii ukupini oko angkangte yandopi, gii luu mindi polakola yandopi, nimbapi, wandakali nimba tupa atu nambana pii leyo tupa alewa peteyai tupa, yakama pitaka Kitisene namba ateyo okopene teke gulalapale loto, nimbato Gote lo pote leyo. Wuane tekeko, sene ende nambanga eya tupa yakamanga yakale lo nimbato pote naleyo leaipia.

* ^{26:17-18:} Ais 42:16; Ep 2:2; Kol 1:12-14

* ^{26:22-23:} Lk 24:44-47; 1Ko 15:20

³⁰ Poloto wuane lea-kola, kinji Akitipa okopi, bala imalini Benisa okopi, gapomane akali kawane Pesatasa okopi, dee wandakali utupane towa atu peteaini tupapi, utupane pitaka ika lalu, kamaka peainipia.

³¹ Kamaka pulu, utupane-mane yakama tane teke-teke pii lalawa piki puato, akali okomane mana koo mindi mina napeakola, nanimato bala katapusa pale lapepenepi, peyo ome lape-penepi, tene mindi ata nepeya leainipia.

³² Wuane loto, wandakali utupane-mane Kinji Akitipato Pesatasa lamawuato, akali okonemane Lomo tane gapomane akali kawane Sisato balana kote oko ale yakale nalapia-yale, nimbato katulo bala peakale tepe api-yale leainipia.

27

Polo Bala Lomo Tano Okona Poyale Peane Oko

¹ Kote ale yaini akali tupamane pii mindi lo yake puato, nanimi sipi mindina pitiyu, Itali kanditi okona pupe-pene leainipia. Wuane lalu, utupane-mane Lomo gapomane akali kawane Sisa okona ami yanda yene andete mindiki ando atalane akali Juliasa lene mindi lamawuato, nimbato Polopi, andi latane wandakali waka minditupapi, utupane andi lo awua pupe leaipia.

² Atamituma tano okona tane tupana sipi mindi Esia potopinjia okona ipa solewata matenenga tano yane tupana poyale pea-kola, nanimi sipi okonena peakaiyu lo ptema. Masetonia potopinjia okona tano Tesalonaika tane Atitakusa bala nanimi towa atu sipi okonena pitiyu pema.*

³ Poto, anate-lene nanimi Saitone tano okona peakaiyu lema-kola, Juliasa bala mana epene mindi minuto, Polo towa yamapano yo atalaini wandakali tupamane bala moyakale loto, utupane ateaininga bala peakale lo tepe ya.

⁴ Matili nanimi sipinga pitiyu, Saitone yuu okone tepe alu pema tekeko, asini nanimi poyale pemane ukusane-tole atoto, popo andane mindi lo awua epea. Epea-kola, ipa solewata tombenenga yuu yene mindi Saipatasai ailene lene okona masianesa-tole pema.

⁵ Pulu, nanimi sipinga pitiyu, Silisia, Pambilia-la, potopinjia okone-lapona ipa solewata matene mandaka asini poto, matili Lisia potopinjia okona tano gene Maita lene okona peakaiyu lema.

⁶ Peakaiyu lalu, ami yanda yene andete mindiki ando atalane akali okomane andea-kola, Aleke-sandiya tane tupana sipi mindi Itali kanditi okona poyale pea.

Poyale pea-kola, balato nanima atu sipi okonena peakaiyu lea.

⁷ Peakaiyu loto, nanima sipi okonena pitiyu pema tekeko, asini nanimi poyale pemane okonena atoto, popo andane tai mindi lo awua epea wete, sipi okone tengamane pea-kola, ole kambua pea. Nanimi ayiwa wete poto, Nitusa tano okona mandaka gulo pema tekeko, popo andane lo awua epeane okonemane polane asini okone kando lea-kola, nanimi yuu ailene Kitita lene okona masianesa-tole poyale, ipa matene yuu Salamone lene okona mandaka gulo pema.

⁸ Pulu, nanimi sipinga pitiyu, yuu ailene Kitita okona solewata matenenga mandaka asini poto, Lasea tano okona mandaka gulo pema. Ayawa wete poto, nanimi yuu ailene Kitita okona Sipi Epo Yalane Panda Epene lalaini okona peakaiyu lema.

⁹ Ole kambua wete peane tekeko, nanimi sipinga pitiyu, tenga-mane epema okonena, yuu nanimi poyale pema okona kapoyale peakaiyu nalema. Juta yame-mane tomo nanene, kondalaini oto oko epo pea-kola, popo andane wete ole dindi lo lalane gii oko epea. Gii okone epea-kola, popo andane lo awua epalane okonemane sipi tupa katulo minu koyape-pene gulea andala, Poloto wandakali bala towa atu sipinga pitiyu epeaini tupa pii mindi lamai-yaepia.

¹⁰ Pii okone wandakali utupane lamawuato, akali yame, nambato andeyo-kola, andipa nanimi sipinga pitiyu pemando, popo andane lo awua epola okomane sipi oko minu koyola-kola, pinju kambua mandu peyama tupa alu pulupeya ya leaipia. Sipi oko koyola-kola, sipinga peteyama akali nanimana kambua ipasa poto, omolo-peyama ya lo nembo teyo-ko. Nanimi wali atamakale leaipia.

¹¹⁻¹² Poloto wuane leane tekeko, popo andane wete mindi lo awua epola okomane sipi oko koyolane loto, sipi epo kuai lo yalane panda epene mindi ongane nayaepia. Nai andaka palane ukusane-tole Pinikisa tano oko yuu ailene Kitita okona yalane. Sipi epo kuai lo yalane panda epene mindi ongane yalane nembo toto, sipi okonena peteaini wandakali kambuamanie pii mindi lo yake puato, nanimi sipinga pitiyu, katulo pupe-pene guleando, nanimi wamba kapoyale Pinikisa tano okona poto, popo andane ole dindi lo epalane gii oko koyo peakake lo ongane maliyo atamakale leainipia. Sipi ingane minalane akali okola, sipi anduane okola, okonelapo-mane wuane teke leapi-kola, ami yanda yene andete mindiki ando

atalane akali okomane akali okonelapomane pii leapili okone ale wato, enene leyapi nembo toto, pii Poloto leane okone ale naya.

Popo Andane Wete Mindi Leane Oko

¹³ Matili popo mindi tenga-mane lea-kola, utupane-mane wamba Pinikisa tano okona makale leaini pua andipa katulo polo-peyama nembo teai. Wuane nembo toto, utupane-mane sipi oko polane lo aene kenda-pene wete yuunga yane oko kilau lo meai-kola, nanima yuu ailene Kitita okona solewata matenene mandaka gulo pema.

¹⁴ Pema-kola, aja matili yale popo andane tai wete mindi yuu ailene Kitita okona amo maitasa-tole atoto, lo awua epea. Wandakali-mane popo organe ato epalane okonena gene oko loto, nai epalanesa-tole atoto, epalane popo oko lalainipia.

¹⁵ Popo andane tai-lene wete okone lo awua epea-kola, sipi ingane minalane akali okonemane yuku wato, sipi epo yalane panda nanima wamba poto yema okonena peke lamakale nembo tea. Balato wuane nembo teane tekeko, balato sipi okone mopeke loyale makande pea-kola, katu nalea andala, popo-mane sipi awua peakake lo ando kondea-kola, nanima sipi okona piti-pata mee pema.

¹⁶ Poto, sipi andane okonena masianesa-tole sipi anjako mindi eyaka-mane kilau lo mo atu palane okone alu pulane lo yukuwa atema. Popo andane okonemane nanima sipi okona piti-pata awua pea-kola, yuu ailene anjako Kauta lene mindi ipa solewata tombenga yene mindina kii koyasatole pema. Popo andane lo awua epeane okone ailene okonemane ipi lea-kola, nanimato ayia wete wato, sipi anjako okone kilau lo moto, sipi andane okona tokonga yata ema.

¹⁷ Sipi anjako okone yata ema-kola, popo andane lo awua epeane okonemane sipi andane okone minu koyolane nembo toto, sipi okona piape akali tupamane sipi andane okone eyaka andane minditupa-mane minu tai layawa yake peai. Dee, Apitika yuu okona mandaka gulo solewata pangosa ipa mau peyalane okona sipi okone peyamangua olane lo yuku wato, utupane-mane sipi okona sele andane oko titi lo mo tepa yai-kola, popo-mane sipi oko nanima piti-pata mee awua pea.

¹⁸ Anate-lene popo andane wete yukupene lo awua epeane okomane sipi okone minu malawai lea-kola, sipi okone kenda wato, ipa pangosa polane nembo toto, utupane-mane sipinga pinju mandu peaini tupana minditupa ipanga awua tepa yai.

¹⁹ Ole teponena, popo andane okone mee lo awua epea andala, sipi okona piape piyaini akali tupamane yuku wato, sipi okone kenda wato, ipa pangosa polane nembo teai. Wuane nembo toto, utupane-mane sipi okona selepi, eyakapi, okonetaka tupana minditupa yakama tanena kinimane moto, ipanga awua tepa yai.

²⁰ Mole kambua yapowa ya-kola, ole kambua nanimato naipi, anapi, kayandapi, utupane anda napema. Ole dindi lo popo andane tai leane okonemane nanima mee awua pea-kola, matili nanima yuu mindina poto, kuai lo atolo-peyama nembo natema. Jia. Nanima ipasa poto, omolo-peyama ya lo nembo tema.

²¹ Sipi okonena peteaini wandakali tupa ole kambuanga tomo mindi nanene peteai-kola, matili Polo bala utupanena tombenenga ika lo atoto, utupane lamawuato, akali yame, wamba nambato pii mindi yakama langiwa oko yakamato ale apiai-yale, nanima yuu ailene Kitita okona ataima-yale. Ataima-yale, popo andane lo awua epeya okomane yakamana minditaka mindi minu koya napiapia-yale. Dee, pii nambato langiwa oko yakamato ale apiai-yale, yakamana minditaka tupa alu napiapia-yale teke.

²² Andipa sipi oko koyolo-peya tekeko, sipi okona peteyama akali nanimana mindikipi mindi oma napulu-peyama leyo. Tene okonena, yakama omolomane lo yuku naene, yamapanne keato gulo pitiyapape.

²³ Anu peakale nambato wuane leyo. Namba Gotena piape akali mindi atoto, bala lo lotu lalawane okonena, andipa utulu balana enjole mindi nambanga mandaka epala.

²⁴ Epoto, balato namba languato, Polo, nimba Lomo tane gapomane akali kawane Sisa okona wenonga poto atape-pene okonena, Goteto nimbana pote lale oko ale wato, balato nimbapi, akali nimba towa atu sipinga peteyai tupapi, yakama omolaini lo ando atolopeya okonena, nimba yuku olene lala. *

²⁵ Enjole okonemane namba langiya pua teke, Goteto enene wuane pulupeya lo nambato bilipi leyo. Tene okonena, yakama omolomane lo yuku naene, keato gulo pitiyapape.

²⁶ Popo andane okomane sipi oko awua pola-kola, sipi oko ipa solewata tombenenga yuu ailene yene mindina peya-mangua ola-kola, nanima yuu ailene okonena poto, kuai lo atolo-peyama leaipia. *

Sipi Koyane Oko

* 27:24: Ap 23:11 * 27:26: Ap 28:1

²⁷ Popo andane okonemane sipi okone nanima piti-pata ipa solewata Metete-niane lene okona awua epoko pua pea-kola, satete lapo pea. Pea-kola, utulu tombe, sipi okonema piape piyaini akali tupamane ipa matene mindina mandaka gulo epalama ya lo nembo teai.

²⁸ Wuane nembo toto, utupane-mane ipa lundu anu pua peteyape lo andoyale, ende mindina minditaka kenda-pene mindi andi latane atalane oko ipanga tepe wato, makande pua andeai-kola, ipa lundu yane oko mita pайаса tukumindi gulea. Matili sipi oko aja amonga yale pea-kola, utupane-mane lapone makande pua andeai-kola, ipa lundu yane oko mita pайаса tepe gulea.

²⁹ Mita pайаса tepe angu gulea-kola, sipi okone ana koo ipa pangosa yalane tupana poto, koyolane lo yuku yai. Yuku wato, popo-mane sipi okone polane loto, sipi okonema piape akali tupamane aene kenda-pene tukumindi-mane yuunga mineakale nembo toto, eyaka-mane sipi towa andi latane ateaini tupa sipi okonena masianesa-tole ipanga tepe yai. Tepa alu, yuu waa wamba ini leakale loto, utupane-mane pote lo peteai.

³⁰ Pote lo koyo piyu, utupane-mane sipi oko tepe wato, palaka makale nembo toto, nanima sipi ajako okona pitiyu, sipi andane okona inganesa aene kenda-pene minditupa ipanga tepe olo peyama lalu, utupane-mane sipi ajako okone ipa okona tepe yai.

³¹ Tepa yai-kola, Poloto ami yanda yene andete mindiki ando atalane akali okopi, ami yanda yene tupapi, utupane lamawuato, sipi okona piape piyaini akali utupa sipi okona piti napene, palaka peaindo, sipi andane oko koyola-kola, ami yame yakama katulo omolo-peyai lea.

³² Wuane lea-kola, ami yanda yene tupamane sipi ajako oko andi latane ateane eyaka tupa pai leai. Pai leai-kola, popo andane lo awua epeane okomane sipi ajako okone awua pea.

³³ Matili yuu wene waa loyale pea-kola, sipinga peteaini wandakali tupamane tomo neakale nembo toto, Poloto utupane lamawuato, satete lapo yakamoto omolome lo yuku wato, tomo nanene mee pitipiai leaipia.

³⁴ Wamba yakama omolomane lo yukuwa pitipiai tekeko, andipa nam-bato andeyo-kola, yakamana kawa itini mindikipi mindi alu napulu-peyako. Andipa yakamana umbaini tai leakale. Tomo minditupa nalapa leyo lea.

³⁵ Wuane lalu, Polo balato betesa moto, utupane pitakana wenonga Gote ando wayu pele lalu, betesa okone konde loto, nea.

³⁶ Nea-kola, akali sipinga peteaini utupane yakama pitaka mini epene paluto, tomo neai teke.

³⁷ Sipi okonena petemane akali nanima pitaka mina mindiki loto, andete laponga pайаса yanasa-dee uniane wataka akali petema.

³⁸ Utupane yakama pitaka-mane tomo no embo alu, sipi oko yambo-yambo guleakale nembo toto, sipinga witi mandaaini tupa ipa solewatanga awua tepe yai.

³⁹ Matili waa lea-kola, sipi okona piape piyaini akali tupamane ipa matene mindi andeaini tekeko, yuu andokona ipa matene oko andeyama nembo nateai. Ipa mau epene ipa matene okona ya-kola, utupane-mane loto, sipi oko katulo ipa matene okona giau lo pupe-pene guleando, popo andane lo awua epeya okomane sipi oko awua pola-kola, sipi oko ipa matene okona peya mangua yakalenga, nanimato sipi okona ingane minu, ipa matene okona maa leai.

⁴⁰ Wuane lalu, wamba popo andane epeane okomane sipi oko awua polane loto, aene kenda-pene tupamane yuunga mineakale loto, ipanga tepe yaini tupana eyaka tupa kando loto, ipa pangosa yakale konda yai. Wuane piyu, utupane-mane sipi okona ingane minalane ita andane lapo wamba ende-mane andi leaini okonelapo tata leai. Okonelapo tata lalu, popo-mane sipi okone ipa matenenga awua peakale nembo toto, utupane-mane sipi okona inganenga sele yane oko iyunga kilau lo moto, sipi okona ingane minuto, ipa matene okona moyale peai.

⁴¹ Utupane-mane wuane peaini tekeko, sipi oko taimane poto, ipa pangosa ipa mau wangiane minaiyu latane ateane mindina peya mangua ya-kola, ipa mau okonemane sipi okona ingane duli lo minea. Mineakola, popo andane okomane ipa solewata oko taimane poo lo awua epeane okonemane sipi okona masianesa-tole taimane peyaka puato, sipi okonena masianesa-tole ita yane tupa peyo kundu lapo piki pea.

⁴² Ipa solewata okomane wuane pua ateakola, ami yanda yene tupamane wua lo nembo teai: Katapusa peteyai akali tupana mindi sipi oko tepe alu, ipa supimi loto, palaka polaini. Nanimato utupane pitaka peyo ome lamakale nembo teai.

⁴³ Utupane-mane wuane nembo teaini tekeko, ami yanda yene andete mindiki ando atalane akali okomane Polo moyokale nembo toto, yakamoto katapusa akali utupane peyo ome na-lalapape lea. Wuane lalu, balato sipi okonena peteaini wandakali tupa pitaka lamawuato, ipa supimi lalaini wandakali yakamoto wamba ini bulupane ipanga peaka nena loto, supimi lo awua ipa matenenga pulupape.

⁴⁴ Ipa supimi na-lalaini wandakali yakamato sipi okona ita palaja keao lene mindi yandopi, waka minditaka ita-mane waa-pene mindi yandopi, mindi minuto, ipa matenenga pulupape lea. Wuane lea-kola, nanimana mindikipi mindi oma napema. Jia. Nanimana pitaka-mane balato leane pua puato, ipa matenenga pema.

28

Polo Bala Yuu Ailene Malata Lene Okona Ateane Oko

¹ Nanimana oma napene, yuu ailene okona ipa matenenga poto, yuu okonena tane minditupa tipa pema-kola, nanimato yuu okona gene oko Malata lalamane leai.

² Nanimana yuu okonena peakaiyu lema-angi, kingi epea-kola, upa ema. Upa ema-kola, yuu okonena tane wandakali tupame mane wandakali waka tupa sia minuto, nanimana moyo, ita yangoto, nanimana upa endo yolo ipulupa loto, atu peai. *

³ Poloto ita kembone yangolane minditupa mo amunguli puato, ita teane okonena yangea-kola, ita kembone utupanena tombenenga puya posini paleane mindi ita toto wato, kamaka epea. Epoto, puya okonena nene okomane Polona kini okona no doo loto, panga mangua ya.

⁴ Puya okone Polona kini okona panga mangua yane okone andoto, yuu okonena tane wandakali tupamane yakama teke-teke mindi lamaiki puato, akali okone bala ipa solewata okona omape-pene oko katulo epala tekko, mana koo minalaini wandakali tupana yole koo maiyane Gote okomane bala saka ata naapekale nembo toto, peyo ome leya-kola, nanimato akali okone bala wandakali peyo ome lalane akali mindi ateaya ya lo andeyama leai.

⁵⁻⁶ Utupane-mane wuane leai-kola, Poloto puya okone peyo tanda loto, itanga yangea. Wuane pea-kola, wandakali utupane-mane Polona umbaini oko anda yola-kola, bala wamba kapoyale yuunga tepa alu, omolopeya nembo toto, maliyo ateaini tekko, bala oma napene, kuai lo atea. Matili gii kambua pea-kola, Polo bala omopi mindi napene, kuai lo ateane okone andoto, wandakali utupane yakamana nembo-tene lawa puato, akali oko bala gote mindi ya leai. *

⁷ Ipa tombenenga yuu yene ailene okonena ando atalane akali okona gene oko Papiliasa lalainipia. Balana yuu mindi ipa matene nanimana atemane ongane mandaka gulo yenepia. Akali okonemane nanimana atu balana andaka poto, ole tepo kuai lo yatawa palea.

⁸ Balana Ayiane oko umbaini toto pea-kola, ininga poto, tundupa mandu siki oma-yene ya-kola, Poloto akali siki oma-yene okone yane ongane poto, balana kini oko akali okonenga yata wato, pote loto, bala mo atu yane.

⁹ Poloto bala mo atu yane oko andoto, yuu ailene okonena tane siki yaini wandakali waka tupa Polo ateanga epeai-kola, balato utupanena siki tupa mo atu yane.

¹⁰ Poloto wuane pea-kola, wandakali utupane-mane nanimana gene tupa laiyu loto, minditaka kambua nanimana giki peai. Dee, matili nanimana yuu okone tepa oyale pema-angi, utupane-mane minditaka nanimanga jia yane tupa awua epoto, sipi nanimana payale pemane okona yata wato, mee geai.

Polo Bala Lomo Tano Okona Peakaiyu Leane Oko

¹¹ Wamba Aleke-sandiya tano okona tane minditupa sipinga pitiyu, yuu Ailene Malata okonena epoto, popo andane ole dindi lo po lo awua epalane gii oko koyo peakale loto, maliyo ateainipia. Sipi okonena inganesa-tole owato gote Susa lene okona iwanane lapo pawa mandene okonelapo makande pua pikisa waa pitane atene ya. Nanimana ana tepo yuu ailene okonena atalu, matili nanimana Aleke-sandiya tane utupanena sipi okona peakaiyu lo pitiyu pema.

¹² Sipi okonena pitiyu poto, nanimana Sitakusa tano okona peakaiyu lalu, ole tepoai tano okonena atema.

¹³ Atalu, matili nanimana tano okone tepa alu, sipinga pitiyu poto, Lenjiame tano okona peakaiyu lalu, tano okonena ole mindiki atema. Atema-kola, popo epene mindi asia nanimana makale lo maliyo atema okona poo lo awua pea-kola, anate-lene nanimana sipinga pitiyu pulu, Puteyoli tano okona peakaiyu lema.

¹⁴ Peakaiyu loto, nanimana sipi okone tepa alu poto, Kitisene wandakali minditupa malanda ema-kola, utupane-mane nanimana languato, ole yanasa yakama nanimana towa atu atamakale ipulupa leai. Ipulupa leai-kola, nanimana poto, utupane towa atalu, matili nanimana utupane tepa alu, Lomo tano okona payale asini pema.

¹⁵ Nanimana Lomo tano payale asini pemakola, Lomo tane Kitisene tupamane nanimana asini epeyai lene oko ale wato, nanimana malanda olo epeai. Minditupa Lomo tano oko wamba bulupane tepa alu, Apiasa okona makesanga epeai-kola, nanimana malanda ema. Minditupa Lomo tano oko matili tepa alu, wandakali epo paliyaini anda tepo atalane yuu okona epoto, nanimana malanda

* 28:2: 2Ko 11:27 * 28:5-6: Mk 16:17-18; Ap 14:11

yai. Kitisene wandakali utupane pitaka malanda wato, Poloto Gote ando wayu pele loto, balana nembo-tene tai gulea.

¹⁶ Kitisene wandakali utupane malanda alu, nanima utupane towa atu poto, Lomo tano okona peakaiyu lema. Peakaiyu lemakola, Lomo tane gapomane okomane Polo bala anda mindina palu ateakale loto, ami yanda yene mindimane bala ando ateakale lea.

Poloto Lomo Tano Okona Atoto, Gotena Pii Epene Oko Lamawua Ateane Oko

¹⁷ Polo bala Lomo tano okona atea-kola, ole tepo pea. Pea-kola, balato Juta yamenya akali kawane tupa epeakale leaipia. Utupane epo amunguli peai-kola, balato utupane lamawuato, amene yame, nambato nanimana yumbane tupana mana yane tupa kalo puato, mo apia napewa lea. Dee, nambato Juta yame wandakali tupa minu koyoyale, utupane towa mana koo mindikipi mindi mina napewa tekeko, namba Jutusaleme atewa-angi, Juta yame akali kawane tupamane namba andi loto, Lomo tane gapomane akali ateaini tupana kininga maiyai.

¹⁸ Mayai-kola, Pesatasato nambana kote oko ale wato, namba peyo ome lolane tene mindi ata napea-kola, namba pola loto, tingi lo tepsa wakale nembo tea.*

¹⁹ Balato wuane nembo teane tekeko, Juta yamenya akali kawane tupamane bala lamawuato, nimbato Polo tingi lo tepsa olene leai. Utupane-mane wuane naleai-yale, balato namba tingi lo tepsa ya-yale tekeko, nambato Juta yame akali kawane utupanenga koo tene mindi yatawa kosimi lokale nembo nateyo. Utupane-mane Polo tingi lo tepsa olene leai-kola, Pesatasato namba tingi lo tepsa ape-pene guu naleakola, nambato bala lamawuato, Lomo tane gapomane akali kawane Sisa balato nambana kote oko ale yakale lewa. *

²⁰ Isatale tane tupamane Goteto wandakali malinga ika laya olopeya lo bilipi loto, maliyo ateyama. Nambato wuane teke bilipi lo ateyo okona, namba sene endemane andi latane ateyo. Kenda-pene utupane pitaka nambanga epea-kola, nambato Juta yame akali kawane yame yakama andokale nembo talo. Andoto, pii leyo utupane yakama langukale nemboto, ipulupa lalo leaipia.*

²¹ Poloto wuane lea-kola, Juta yame akali kawane tupamane bala lamawuato, Ju-tiya disitiki okona ateyai wandakali tupamane nimba andayo pepa mindi peyo nanimaga epe naleai leainipia. Dee, utupan-

nena mindimane epoto, nimba andayo pii koo mindi nanima langi napea teke.

²² Mindimane wuane napea tekeko, nanimato ale aimakola, yuu tupa pitakana wandakali-mane Kitisene mana wenene tupa wato minalaini wandakali tupa andayo pii koo lalaini. Tene okonena, nimba tane-mane wua lo nembo teyo lo nanima langule-kola, nanimato ale amakale nembo teyama leainipia.*

²³ Wuane lalu, Juta yame akali kawane utupane-mane Polo towa pii lalawa puto, oko anggi lapone epo amunguli pi makale lo oto mindi yata yai. Matili oto okone epea-kola, Juta yame akali kawane utupane towa akali kambua epoto, Polo bala peteane anda okona epo amunguli peainipia. Amunguli peai-kola, Poloto upa pitane ato tewa wandakali utupane Gotena pii oko mee lamawua atea-kola teke, undupi leaipia. Balana pii alewa petaeinai akali utupane-mane Jisasa lo bilipi leakale nembo toto, Poloto pii minditupa Mosesato leane tupapi, pii minditupa potopesa akali tupamane leaini tupapi, utupane Juta yame akali utupane lamawuato, Goteto wua puto, minditaka pitaka taka ando atalane loto, balato Gotena pii oko wandakali utupane lamaiyo nayu lamawua ateaipia.

²⁴ Poloto Gotena pii oko utupane lamawua atea-kola, akali minditupa-mane ale wato, balana pii bilipi leaini tekeko, minditupa-mane balana pii okone bilipi la napeainipia.

²⁵ Tene okonena, Juta yame akali utupane yakama tane teke-teke pii yanda pilki pua atea-kola, akali utupanena mindimane yakama pitaka andaka pulupa leaipia. Wuane lea-kola, Poloto pii mindi Juta yame akali utupane lamawuato, wamba Oli Sipitisa okomane yakamana yumbane tupa lamawuato, potopesa akali Aisayana ambulini okomane pii enene wete mindi leane leaipia.

²⁶⁻²⁷ Pii enene balato leane oko loto, Juta yame wandakali tupana lene tupamane nambana piape andoto, utupanena alene okomane nambana pii oko ale wato, utupanena nembo-tene okomane pii okonena tene oko nembo toto, yamapane peke lapiayale, nambato utupane mo atu yolo-peke lauwahale leaipia. Nambato wuane piwahale tekeko, utupane-mane yamapane peke na-lamakale nembo toto, nembo-tene mo lawa napimakale nembo tapiai. Wuane nembo toto, utupane-mane nambana pii ale oyale kepa wato, piape nambato piyawane utupane anda napimakale loto, utupane-mane lene mungu latawa atalaini. Tene okonena,

nimbato wandakali utupa ateyai okona poto, utupane lamawuato, yakamoto wuane pua atalaini okonena, matili ole kambuangya yakamoto Gotena pii oko ale olopeyai tekeko, yakamoto pii okonena tene oko anjakopi mindi nembo natolopeyai. Dee, ole kambuangya Goteto piape minditupa pula-kola, yakamoto balana piape pula utupane andolopeya tekeko, Goteto piape utupane peya lo yakamoto anda napulu-peyai lape. Potopesa akali Aisayato wuane leane lo Poloto leaipia.

²⁸Potopesa akali Aisayato wamba wuane leane loto, Poloto Juta yame wandakali utupane lamawuato, Juta yame yakamoto Gotena pii okone ale aa na-piyaini. Tene okonena, Goteto wandakali yame waka tupa molo-peke lokale nembo toto, nanimato balana pii okone wandakali yame waka utupane lamalu pulupape lo nanim Langeane lo yakamoto nembo talapape. Goteto wuane lea-kola, wandakali yame waka utupane-mane balana pii okone ale olopeyai lea.

²⁹[Poloto wuane lea-kola, Juta yame wandakali utupane yakama balana anda okone tepa alu poto, yakama teke-teke pii yanda andane mindi peainipia].

³⁰Mali lapo Polo bala anda mindina palu atoto, anda anduane oko muni maiki pea. Bala anda okonena atea-angi, wandakali-mane bala andolo ipuku peai-kola, balato utupane pitaka wayu epalaiya leaipia.

³¹Wandakali utupane balana andaka ipuku peai-kola, bala yuku naene atoto, utupane lamawuato, Goteto wua puato, pitaka taka ando atalane lo pii lamaiki pea. Wuane puato, Poloto wandakali tupa mana lamawuato, Akali Andane Jisasa Kataisa balato wua peane lo mana lamaiki pua atea-kola, wandakali mindikipi mindimane bala lamawuato, nimbato piape okone napipe lo, jia naleai.

LOMO

Poloto Lomo Tane Tupana Pepa Poyo Pee Leane Oko

¹Namba Polo. Nambato Gotena pii layene epene oko wandakali tupa lamauwae atola loto, balato namba aposolo akali mindi atape lea-kola, namba Jisasa Kataisana piape akali ateyo.*

²Wamba Goteto balana pii layene epene oko potopisa akali tupanga lapana ya-kola, utupane-mane balana pii epene wete okone pepanga peyo yata yainipia.*

³Pii layene epene okone Gotena iwanane oko andayo layene eya. Gotena iwanane okone bala kinji Dapiti yame okona mandiyene mindi atoto, akali mindi guleaipia.

⁴Matili Goteto nanimana Akali Andane Jisasa Kataisa bala malinga ika laya yaepia. Mangene tai-lene peane okonemane Jisasa bala Gotena iwanane ateya loto, Oli Sipitisa okomane nanimanga wayumane andawa lea.

⁵Jisasa bala ita malamanda okona omeane mambele, Goteto nanimma ondo wato moyaepla. Wandakali yame palu peya tupa pitaka-mane bala lo bilipi loto, balana gene oko laiyu loto, balana pii oko wato minu atekale nembo toto, balato aposolo piape oko nanimma geane.*

⁶Yakamapi Jisasa lo bilipi loto, bala wato minu atalapale loto, Goteto yakama ee lo mea-kola, yakamapi Jisasa Kataisana yame ateyai.

⁷Goteto Lomo tane wandakali yakama yamapano yo atoto, yakama balana yame atalapale ee lo meane okonena, nambato yakama pitakan pepa oko peyo epe leyo. Nanimana Ayiane Gote-la, Akali Andane Jisasa Kataisa-lamane yakama towa yamapano epene palu atoto, yakamana nembotene mo tambo laya yakale lo pote leyo.*

Poloto Lomo Tane Kitisene Tupa Andolo Epokale Leane Oko

⁸Yuu pitakano wandakali minditupamanе loto, Jisasa Kataisa bala ita malamanda okona omeane mambele, Lomo tane wandakali yakamato Jisasa lo bilipi leyama nayulalaini leyai. Yakamato wuaneyai okonena, nambato wamba ini nambana Gote oko ando wayu pele leyo.

⁹Nambato Gotena piape oko taimane puto, balana iwanane okomane wua peane loto, balana pii layene epene oko wandakali

tupa lamauwae atalawane. Nambato balana piape okone pua atoto, ole dindi lo yakama nembo toto, pote lalawane okone bala tane andeya.

¹⁰⁻¹²Yakamana bilipi oko tai guleakale nembo toto, nambato Oli Sipitisa okona petesene namba giyane tupa tale pua yakama gukale loto, maliyo atapo naene, yakama ateyainga wamba ini kapoyale ipuwa lakaе lo nembo teyo. Namba yakama towa atu atoloma-angi, nambana bilipi okomane yakama wayumane mo tai laya ola-kola, yakamana bilipi okomane namba minu tai laya olopeya. Wuane peakale nembo toto, ole dindi lo nambato pote loto, Goteto namba yakama ateyainga epola nembo teando, balato namba epolane asini mindi waa pua geakale lo pote lalawane.*

¹³Amene imalini yame, nambana piape okomane wandakali yame waka tuvana tombenga dini lialane pua yakamana tombenenga dini liakale lo nambato nembo talawane. Wuane nembo toto, wamba ole kambuangna namba yakama ateyainga epokale nembo tewa tekeko, kenda-pene minditupamanе namba epolane asini oko pao lama ipulu, andipa giao leya lo yakamato nembo tapiai lakaе lo nembo teyo.*

¹⁴Nambato Gitiki yame wandakalipi, wandakali yame waka tupapi, mana kambua andene wandakalipi, mana kambua anda napene wandakalipi, utupane pitaka moyo, balana pii layene epene oko lamaula loto, Goteto piape oko namba geane.

¹⁵Tene okonena, nambato Lomo tane wandakali yakamapi Gotena pii layene epene oko langiwa lakaе lo nembo teyo.

Pii Layene Epene Oko Gotena Tai-lene Oko Eya Leane Oko

¹⁶⁻¹⁷Gotena pii pepa pelene eya mindimane loto, wandakali mindimane Jisasa lo bilipi leando, Goteto bala tika-pene ateya lola-kola, wandakali okone bala saka atapowa atolopeya layene eya. Gotena pii layene epene okonemane wuaneyai okonena, wandakali-mane Jisasa lo bilipi leyai-kola, Goteto utupane tika-pene ateyai lalane lo pana alane. Wandakali mindimane Jisasa lo bilipi naleando, Goteto bala tika-pene ateya nalolo-peya. Gotena pii layene epene oko tai-lene wetete eya. Balana pii okonemane Jisasa lo bilipi lene Juta yame wandakali tupa wamba ini molo-peke loto, wandakali yame waka tupapi molo-peke lalane teke. Gotena pii layene epene okonemane bala lo bilipi lene wandakali utupane pitaka molo-peke lalane okonena, nambato balana pii layene

* **1:1:** Ap 9:15-16 * **1:2:** Lom 16:25-26 * **1:5:** Ap 26:16-18; Ga 2:7-10 * **1:7:** Nam 6:25-26 * **1:10-12:** Ap 19:21-22; Lom 15:22-23 * **1:13:** Ap 19:21-22 * **1:16-17:** Lom 3:21-23; Ip 2:4; Mk 8:34-38; 1Ko 1:18-25; Ap 13:46

epene oko wandakali tupa lamauyale yala naeyo.*

Goteto Bala Masia Maiyaini Wandakali Tupa Towa Yataka Alane Leane Oko

¹⁸⁻²⁰ Enene, wandakali-mane katulo Gote lee-mane anda na-piyamane tekeko, wamba Goteto yuu ati-la yakale leane gii okonena atoto, ipapo wato, andipa ateyama okona giau loto, wandakali-mane katulo minditaka Goteto yakale leane tupa pitaka andalaini. Andoto, utupane-mane katulo Gote bala tai-lene atapowa atalane nembo talaini. Goteto minditaka eya tupa pitaka yakale leane okonemane balana tai-lene yapowa yalane oko wandakali tupanga andawa leane okonena, wandakali-mane Gote bala okonepene ateya lo katulo nembo talaini. Wuane nembo toto, wandakali mindimane Gote tai-lene atapowa atalane nembo natene ato, nambato mana koo mindi minewa nalape-pene. Jia. Wandakali-mane Gote masia mawuato, mana koo tupa minalaini mana okonemane Gotena pii enene oko ombo alane. Gote ati kenga atalane oko balato mana koo utupane pitaka andoto, yataka alane lo nanima andawa lanane.*

²¹ Koo peaini wandakali utupane-mane Gote ateya lo nembo teaini tekeko, utupane-mane bala Gote enene wete ateya lo balana gene oko laiyu loto, wayu pele naleainipia. Jia. Wandakali utupanena nembo-tene undupi latane gulo atea-kola, yakama mana anda napene wandakali gulo ateinipia.*

²² Mana anda napene gulo atoto, utupane-mane atapene tene moto, nani-manga mana kambua eya leaini tekeko, utupane yakama kee ene wete gulo ateinipia.*

²³ Utupane yakama kee ene gulo atoto, atapowa atene Gote okona tai-lene oko masia mawuato, bala lo lotu naleainipia. Jia. Wandakali waka minditupa-mane itapi, anapi, okonetaka tupa moto, ekapi, yi-api, puyapi, wandakali omalamane takapi, okonetaka tupa waa pea-kola, wandakali utupane-mane okonetaka tupa yakamana gote lo lotu leainipia.*

²⁴⁻²⁵ Minditaka eya tupa pitaka yakale leane Gote okona gene oko matili-matilipi laiyu lo atape-pene. Okone enene tekeko, koo pua ateaini wandakali tupamanen Gotena pii enene oko auwa tepa wato, owato pii mindi wato minu ateinipia. Wuane puato, utupane-mane Gote enene

okone masia mawuato, minditaka balato waa peane utupane lo lotu loto, utupanena piape pimawua ateainipia. Utupane-mane wuane pua ateaini okonena, Goteto yakamana umbaini tupa minu koyakale nembo toto, utupane auwa tepa wato, utupane-mane mana koo yala-pene minamakale nembo teaini tupa mineakale lo ando konda yaepia.

²⁶⁻²⁷ Gote masia maiyaini wanda tupa-mane akali towa paliyaini mana tika-pene oko wato mina napene, wanda yangone tupa towa paluto, mana koo yala-pene tupa wato minu ateinipia. Dee, akali tupa-manepi wanda towa paliyaini mana tika-pene oko wato mina napene, akali yangone towa mana koo tupa minauwa lakae lo nembo toto, utupane towa paluto, mana koo yala-pene tupa wato minu ateinipia. Wandakali utupane-mane wuane pua ateai okone andoto, utupane-mane mee wuane pua ateakale lo Goteto ando konda yakola, wandakali utupane-mane yakamana mana koo minu ateaini okona yole koo oko meanipia.*

²⁸ Wamba wandakali utupane-mane Gotena mana wayumane nembo teaini tekeko, balana mana epene utupane wato mina napimakale nembo teai-kola, Goteto utupane auwa tepa yaepia. Auwa tepa ya-kola, utupane-mane yakama tanena nembo-tene koo tupa wato minuto, mana tika napene mindipene-mindipene tupa wato minu ateinipia.

²⁹ Wandakali utupane-mane mana koo mindipene-mindipene tupa pitaka wato miniaini-pia. Minditupa-mane minditaka kambua miauwa lakae lo nembo toto, wandakali minditaka kambua yene tupa towa apiangu pua ateainipia. Minditupa-mane owato pii loto, wandakali yangone tupa minakasa yainipia. Minditupa-mane wandakali yangone tupa ando nembo-tene koo palu atoto, pii yanda puato, utupane peyo ome leainipia. Minditupa-mane pii tipu-tipu leainipia. Minditupa-mane mana koo wete tupa wato miniaini-pia. Wandakali utupane-mane mana koo utupane ole kambuangka wato miniaini-pia.

³⁰ Wandakali minditupa-mane wandakali yangone tupa ando owato pii loto, utupanena gene minu koyainipia. Minditupa-mane Gote towa yatakawa ateainipia. Minditupa-mane atapene tene moto, yakama tane lipinga yale ateyama nembo toto, yakama tanena gene tupa laiyu lo ateinipia. Minditupa-mane yakamana angini ayiane tupana pii tanga

* **1:18-20:** Ap 14:15-17; 17:24-29; Jop 12:7-9; Sam 19:1 * **1:21:** Ep 4:17-18 * **1:22:** Jet 10:14; 1Ko 1:18-21 * **1:23:** Lo 4:15-19; Sam 106:20 * **1:26-27:** Pit 18:22; 20:13; 1Ko 6:9-11

lo atainipia. Minditupa-mane mana koo wenene minditupa mina ika leainipia.

³¹ Minditupa-mane nembo napalene yia piango gulo atainipia. Minditupa-mane mana epene mindi mina-makale lalaini tekeko, utupane-mane wuane napene konda yainipia. Minditupa-mane yakama tundupa mindiki tupa towa epelewa yamapane yo ata naapeainipia. Dee, minditupa-mane wandakali waka tupa ondo naene konda yaini tekepia.

³² Wamba Goteto loo tika-pene minditupa yata wato, wandakali mindimane mana koo utupane wato mineando, bala omapenepene leaipia. Gote masia mauwa atalaini wandakali utupane-mane Gotena loo utupane nembo talaini tekeko, utupane-mane balana loo utupane tanga loto, mana koo utupane wato minu atainipia. Wandakali waka tupamane mana koo utupane wato minu ateyai-kola, Gote masia mauwa ataini wandakali utupane-mane wandakali waka utupanena gene tupa laiyu loto, utupane-mane wayu peyai leainipia.

2

Goteto Kote Tika Pua Wete Lolopeya Leane Oko

¹ Yakamana minditupa-mane yangone tupa yapa lo tale puato, utupanenga koo tene eya lalaini tekeko, nimbato wuane lalaini wandakali yakama pitaka mindiki-mindiki lo pii mindi langeyo. Wandakali waka utupane-mane mana koo minditupa wato minalaini wuane pua teke, nimbatopi mana koo utupane wato minalene leyo. Tene okonena, nimbato wandakali yangone mindi yapa lo tale puato, balanga koo tene eya lole okonemanee nimbato nimba tanenga koo tene okone eya lole-kola pulupeyako. Nimbato nimba tanenga koo tene mindi naeya katulo nalolo-pele.*

² Mana koo okonepene minalaini wandakali tupa Goteto yapa lo tale puato, yole koo mindi maiyane. Nanimato balana mana okone tika-pene wete eya lo nembo teyama.

³ Nimba tane-mane mana koo okonepene tupa minu atoto teke, wandakali waka tupa yapa lo tale puato, utupane-mane mana koo utupane minu ateyai loto, utupanenga koo tene tupa yata alene. Nimbato wuane pua atole-kola, Goteto nimba koo tene mindi yata na-loopeya nembo telepe.

⁴ Nimba yamapane peke lola nembo toto, Goteto nimba moyo, mana epene mindi minuto, yole koo mindi nimba wamba kapoyale gii napene, mee maliyo ateyia.

Nimbato okone nembo natene, balana mana epene okone mee ya lo nembo telepe. *

⁵ Andipa nimba yamapane peke nalene, mee tuu puato, mana koo tupa wato minu teke atele okonemane nimbato Gote mo yataka wato, nimbana yole koo kambua mo yomowa atele. Wuane pua atele okonena, matili Goteto balana kote oko tika pua lolangani, nimbato yole koo utupane molopele.

⁶ Okone angi, wandakali mindiki-mindiki lo wua pua ateaini nembo toto, Goteto utupanena yole oko malupeya. *

⁷ Wandakali minditupa-mane Gote towa atu ati kenga yuu epene okona saka atapowa atamakale nembo talaini. Goteto utupanena gene tupa laiyu loto, ati kenga tii-pene okone geekale nembo toto, wandakali utupane-mane mana epene tupa tailo wato minu atalaini. Matili Goteto yole epene mindi utupanenga mawuato, saka atapowa ateakale lolopeya.

⁸ Goteto wuane pulupeya tekeko, wandakali minditupa-mane yakama tane angu nembo toto, balana pii enene oko masia mawuato, mana koo tupa wato minu atalaini. Wandakali utupane towa Goteto yataka wete wato, yole koo mindi malupeya. *

⁹⁻¹¹ Goteto wandakali mindi bala wandakali yame andokope lo ando yapa nallane. Jia. Balato mana mindiki okone teke wato minuto, wandakali pitaka yapa lo tale puato, yakama yole tupa malupeya. Juta yamepi, wandakali yame waka waka tupa, utupanena minditupa-mane mana koo tupa wato minu atolai-kola, Goteto kendapene andane minditupa utupane pitakanga epeakale lolopeya. Kenda-pene utupane epola-kola, utupane pitaka tandaka andane no atolopeyai. Juta yamepi, wandakali yame waka tupa, utupanena minditupa-mane mana epene tupa wato minu atolai-kola, Goteto utupane pitakana gene tupa laiyu loto, utupanena yamapane mo tambo laya wato, utupane ati kenga yuu epene tii-pene oko ando meakale lolopeya.

¹²⁻¹³ Wandakali mindimane Gotena loo tupa pitaka wayumane wete wato mineando, Goteto bala tika-pene ateyia lolopeya tekeko, wandakali mindimane Gotena loo utupane mee alene-mane angu ale wato, wato mina napeando, Goteto wandakali okone bala tika-pene ateyia nalolo-peya. Jia. Wandakali mindimane Gotena loo tupa nembo toto teke, loo utupane wato mina napeainido, Goteto balana loo utupane wato minuto, wandakali okone yapa lo tale puato, yole koo mindi utupane malupeya.

* **2:1:** Mt 7:1-2; Jo 8:7 * **2:4:** Ep 1:7-10; 2Pi 3:15 * **2:6:** Sam 62:12; Man 24:12; Mt 16:27; 2Ko 5:9-10 * **2:8:** 2Tes 1:8-10

Gotena loo tupa ale naene atoto, mana koo wato minalaini wandakali tupa yuu koo okona polopeyai.

¹⁴⁻¹⁵ Wandakali yame waka tupamane Gotena loo tupa ale-mane ale naene ateyai tekeko, utupanena minditupa-mane mana koo mindi miniyai-kola, yakamana nembo-tene tupamane yakamato kopeta peyai lo lamaiyane. Utupane-mane mana epene mindi miniyai-kola, yakamana nembo-tene tupamane yakamato mana epene mindi miniyai lo lamaiyane teke. Utupanena nembo-tene tupamane wuane piyane okonemane Gotena loo tupa wandakali utupanena nembo-tenenga eya lo mo pana alane. Wandakali utupane-mane Gotena loo tupa ale-mane ale naene atoto teke, Gotena loo tupamane leya pua teke piyaini. Utupane-mane wuane peyai-angi, Gotena loo utupane wandakali utupanena nembo-tenenga eya okomane wandakali utupane mana lamaiya-kola, utupane-mane wuane piyaini.*

¹⁶ Andipa wandakali-mane mana minditupa too pua tenga-mane wato minu atalaini tekeko, matili Goteto Jisasa Kataisa lamawuato, nimbato wandakali pitaka yapa lo tale pipe lola-kola, Jisaso wuane pulupeya. Nimbato Gotena pii layene epene oko wandakali tupa lamawuato, wuane lalawane.

Juta Yame-mane Gotena Loo Kalo Piyaini Leane Oko

¹⁷⁻¹⁸ Andipa nambato Juta yame wandakali yakama ando pii mindileyo. Yakama tanena gene tupa laiyu loto, yakamato naniima Gotena yame ateyama lalaini. Wamba mindimane Gotena loo tupa yakama mana langeai-kola, wandakali-mane wua pipiai lakae lo Goteto nembo talane tupa yakamato andoto, mana tika-pene tupa epene ya lalaini. Tene okonena, matili Goteto yakama kote lalapa lola-angi, balana loo okomane yakama moyolo-peyea nembo talaini.

¹⁹⁻²⁰ Yakamato Gotena loo tupa andeyama nayuto, wandakali undupi pangosa ateyai tupa asia andawa loyale, yakama lamu gulo tii pua atalamane nembo talaini. Yakamato katulo wandakali lee koo tupa asini andawa lolo-peyama nembo talaini. Yakamato Gotena loo tupa andoto, tisa atoto, Gotena loo anda napene wandakali andopane ajako gulene ateyai tupa katulo mana lamaulu-peyama nembo talaini teke.*

²¹ Yakamato wandakali waka tupa mana lamawua ateyai-ko. Anu peakale yakama tane mana mia na-piyainipe. Yakamato

wandakali waka tupa lamawuato, yakamato pake mia na-piyapape loto teke, anu peakale yakama tane pake mialainipe.*

²² Dee, yakamato wandakali waka tupa mana lamawuato, pamuku na-piyapape loto teke, anu peakale yakama tane pamuku piyainipe. Yakamato owato gote tupa koo wete eyai nembo toto teke, anu peakale yakamato owato gote tupana lotu anda tupa poto, minditaka eya tupa pake mialainipe.

²³⁻²⁴ Yakama tanena gene tupa laiyu loto, nanimato Gotena loo tupa nembo teyama lalaini tekeko, Gotena pii pepa pelene eya mindimane loto, yakamato mana koo tupa minalaini okonena, wandakali yame waka tupamane Gote ando pii koo loto, balana gene minu koyalaini layene eya. Pii okonemane wuane leya pua teke, yakamato Gotena loo tupa kalo piyaini mana okomane balana gene oko minu koyalaini.*

²⁵ Yakamato Gotena loo tupa pitaka kuai lo wete wato minu atalaini yaindo, yakamana yala-pene umbaini katene mana okomane katulo yakama moyolo-peyea tekeko, yakamato Gotena loo tupa kalo pua ateindo, Goteto andola-kola, yakamana yala-pene umbaini katene okone kati napene gulo atola-kola pulupeya.

²⁶ Wuane pua teke, yala-pene umbaini kati napene akali mindimane Gotena loo tupa pitaka kuai lo wete wato minu atalae yando, Goteto andola-kola, akali okonena yala-pene umbaini katene gulo atola-kola pulupeya.*

²⁷ Enene, wamba mindimane Juta yame akali yakamana yala-pene umbaini kateaipia. Yakamato Gotena loo pepa pelene eya tupa dii lo andalaini tekeko, yakamato balana loo utupane kalo piyaini. Tene okonena, Gotena loo wato minu atalane akali mindina yala-pene umbaini oko kati napene atola-kola teke, balato yakama Juta yame wandakali tupa yapa lo tale puato, yakamanga koo tene mindi yata olopeya.

²⁸⁻²⁹ Anu peakale nambato wuane leyope. Mindimane Gotena loo pepa pelene eya oko wato minuto, akali mindina yala-pene umbaini oko katulai-kola, akali okone bala mee umbaini kenga angu Juta yame gulo ateando, bala Juta yame enene jia. Gotena Oli Sipitisa okomane wandakali mindina nembo-tenenga piape pula-kola, wandakali okone bala yamapanre peke loto, balana nembo-tenenga Juta yame gulo ateando, bala Juta yame enene mindi atolopeya. Wandakali-mane balana gene oko laiyu

* 2:14-15: Ap 10:35 * 2:19-20: 2Ti 3:5 * 2:21: Mt 23:3-4 * 2:23-24: Ais 52:5 * 2:26: Ga 5:2-6 * 2:28-29:

nalolo-peyai tekeko, Goteto balana gene oko laiyu lolopeya.*

3

*Goteto Mana Tika-pene Tupa Angu Wato
Minalane Leane Oko*

¹ Mindimane akali mindina yala-pene umbainai kateaindo, mana okonemane akali okone anu pua moyolo-peyape. Wandakali mindi bala Juta yame ateando, bala Juta yame atola okonemane bala anu puato moyolo-peyape.

² Enene, bala Juta yame atola okonemane bala wayumane moyolo-peyape. Bulupane gulo, Goteto balana pii layene epene oko Juta yame wandakali tupa mawuato, utupane-mane pii okone yatawa atoto, ando ateakale leaipia. Wuane puato, Goteto Juta yame wandakali tupa wayumane moyoyale, asini kambua yata yaepia.

³ Okone enene tekeko, Juta yame wandakali minditupa-mane Gotena pii tupa wato mina napene kondalaini. Wuane pua teke, Goteto bala tanera pii tupa wato mina napene, minditaka pukale leane tupa napene, kondolo-peyape.

⁴ Jia wete. Goteto wuane napulu-peyape. Gotena pii pepa pelene eya mindimane loto, Gote nimbato enene pii angu lalene. Tene okonena, wandakali-mane nimba kosimi loto, Goteto owato pii leya leaindo, wandakali waka tupamane Goteto pii enene leya lolai-kola, nimbato kote okone sia minulu-pele layene eya. Wandakali pitaka-mane owato pii lalaini tekeko, Goteto owato pii na-alane. Jia. Balato minditaka pukale lolane tupa enene piyane.*

⁵ Okone enene tekeko, andipa wandakali-mane nembo talaini pua nembo toto, nambato wua leyo: Nanimato mana koo tupa mineyama-kola, Goteto balana mana tika-pene oko wato minuto, yole koo mindi nanimi giyane okonemane Goteto mana tika-pene minalane tupa andawa lalane. Tene okonena, nanimato aki lamape. Goteto yole koo mindi nanimi geando, balato mana tika napene mindi wato minalane lamape.

⁶ Jia wete. Wuane nalape-pene. Ole dindi lo Gote bala tane mana tika-pene tupa angu wato mina napeando, balato anu puato wandakali pitakana mana tupa yapa lo tale puato-peyape.

⁷ Dee, mindimane pii mindi loto, nambato owato pii lalawane mana okomane Gotena enene pii oko lapana ola-kola, wandakali-mane balana gene oko laiyu leaindo, anu peakale Goteto namba yapa lo tale puato, nambato mana koo minalene leyape lolopeya.

⁸ Dee, mindimane pii mindi loto, mana epene tupa ika leakale nembo toto, nanimato mana koo tupa minamakale lolopeya. Wandakali minditupamanne nanimana gene tupa minu koyoto, nanimato wuane lalamane leyai. Matili Goteto wandakali utupanena mana koo utupane yapa lo tale puato, yole koo mindi utupanenga malupeya.

*Wandakali Epene Tika-pene Mindikipi
Mindi Ata Napeya Leane Oko*

⁹ Juta yame-mane wandakali nanimato yame waka tupa pitaka sia minuto, nanimi wandakali epene wete ateyamape. Jia wete. Wamba nanimato loto, mana koo wato mialamane mana okomane Juta yame nanimapi, wandakali yame wakapi, nanimi pitaka andi lea-kola, nanimi mana koo wato minalamane mana okonena pangosa andi latane ateyama.*

¹⁰ Andi latane atoto, nanimi pitaka-mane mana koo tupa minalamane loto, Gotena pii pepa pelene eya mindimane loto, wandakali mindiki mindi epene tika-pene ata napeya. Jia wete.

¹¹ Wandakali mindikipi mindimane Gotena mana epene tupa wayumane anda na-piyaini. Dee, wandakali mindikipi mindimane Gote aiya na-piyaini. Jia.

¹² Wandakali pitaka-mane asini epene tika-pene oko auwa tepa wato, puu yangi leai. Wandakali mindiki mindimane dini epene lia na-piyaini. Wandakali mindikipi mindimane mana epene tupa wato mina na-piyaini. Jia wete.

¹³⁻¹⁴ Wandakali mali keao lo apene eya-kola, mali okonena guu koo wete mindi kamaka epalane. Wuane pua teke, wandakali-mane mini koo palu atoto, wandakali yangone tupa minu koyamakale loto, utupane andayo pii koo tupa lalaini. Wandakali peyo ome lalane etulu gepo okona posini gulene pii koo tupa wandakali utupanena ambulini okona anda-pangosa palyiane. Utupane-mane yakamana yangone tupa minakasa oyale, owato pii lalaini.*

¹⁵⁻¹⁸ Utupane-mane Gote ando anjakopi mindi yuku amai napene, wandakali yangone tupa towa tambo lo atene mana oko nembo natalaini. Tene okonena, utupane-mane asini epoko pua atoto, minditaka minu koyoto, wandakali yangone tupa kenda-pene kambua maiyu, utupane kapoyale peyo ome lalaini. Gotena pii pepa pelene eya mindimane wuane layene eya.*

* 3:4: Sam 51:4 * 3:9: Lom 1:18-2:24; 3:21-23

* 3:10: Sam 14:1-3; 53:1-3

* 3:13-14: Sam 5:9; 10:7; 140:3

* 3:15-18: Ais 59:7-8; Sam 36:1

19-20 Gotena loo tupamane nanimana mana koo minalamane tupa mo pana alane. Wuane, Goteto wandakali mindikipi mindina mana oko andoto, wandakali okomane nambana loo tupa kuai lo wato minalamane okonena, nambana wenonga bala epene tika-pene ateyai nalolo-peya. Jia. Tene okonena, wandakali mindikipi mindimane namba epene tika-pene wete ateyai katulo nalola-kola, Goteto yuu okona wandakali palu peya tupa pitaka katulo yapa lo tale pulupeya. Wamba Goteto wuane pukale nembo toto, balana loo pangosa atolaini wandakali tupa balana loo tupa pitaka lamaiyane lo nanimato nembo teyama. *

Bilipi Lene Wandakali Tupa Tika-pene Ateyai Leane Oko

21-23 Gote bala tane epene wete ateyai teke, nanimapi epene wete atape-pene tekeko, nanimana pitaka-mane mana koo minalamane okonena, nanimana Gote yale ata na-piyamane. Wuane, Juta yamepi, wandakali yame waka tupapi, nanimana pitaka-mane mana koo minalamane okonena, wandakali mindikipi mindi bala tika-pene wete ata na-piyamane. Tene okonena, andipa Goteto nanimana wandakali tika-pene ateyai lolane asini waka mindi mo pana yaepia. Andipa wandakalimane Gotena loo tupa pitaka kuai lo wato mina napene, mee Jisasa Kataisa lo bilipi lolai-kola, balato utupane pitaka tika-pene ateyai lolopeya. Wamba Mosesapi, potopisa akali tupapi, utupane-mane matili Goteto wuane lolopeya loto, pepa peleaini-pia. *

24-26 Wamba wandakali tupamane mana koo minu ateaini tekeko, Goteto yole koo mindi utupanenga kapoyale mai napene, mee maliyo ateapia. Maliyo atalu, Gote bala tane tika-pene ateyai lo wandakali tupa andawa lokale nembo toto, wandakali minditupa-mane Jisasa lo bilipi lolai-kola, nambato utupane tika-pene ateyai lokale leaipia. Matili bala tane tika-pene ateyai lo andawa lokale nembo toto, Jisasa tundupa okomane bala lo bilipi lolai wandakali tupa pitakana koo tupa apokale leaipia. Wuane lalu, Goteto Jisasa bala opa mindi gulo omeakale lata yane okonena, Jisasa Kataisa bala omeane okomane nanimana kambo molo-peke leaipia. Tene okonena, Goteto Jisasa lo bilipi lene wandakali utupane mee ondowa moyoto, wandakali tika-pene ateyai lolane. *

27-28 Wuane, nanimato Gotena loo tupa wato minulumka-kola, Goteto nanimana

mana okone andoto, nanimana tika-pene ateyai nalolo-peya. Jia. Nanimato Jisasa Kataisa lo bilipi lalamane okonena, Goteto nanimana wandakali tika-pene ateyai lolopeya nembo teyama-ko. Nanimato aki nembo toto, nanimana tanena gene tupa laiyu lamape. Nanimato Gotena loo tupa wato minalamane nembo toto, nanimana tanena gene tupa laiyu lamakalepe. Jia. Nanimato Jisasa lo bilipi loloma-kola, Goteto nanimana tika-pene ateyai lolopeya. Tene okonena, nanimana tanena gene tupa laiyu lolane tene mindi naeya lo andeyama.

29-30 Akali yala-pene umbaini katenepi, kati napenepi, yame okonelapo lapotakana minditupa-mane Jisasa lo bilipi lolai-kola, Gote mindiki angu ateyai okomane utupane pitaka tika-pene ateyai lolopeya. Pee, Gote bala wandakali yame waka tupana Gote oko ata napene, Juta yamena Gote angu ateyai nembo toto, Juta yame wandakali yakamato yakama tanena gene tupa laiyu lape-penepe. Jia. Gote bala Juta yamena Gote angu ata naapeya. Bala wandakali yame waka tupana Gote ateyai teke. *

31 Nanimato Jisasa lo bilipi leyama-kola, Goteto nanimana tika-pene ateyai lolane okonena, nanimato Gotena loo tupa mee gu-laya alamanape. Jia wete. Goteto nanimana moyo wuane piyane okonena, nanimato balana loo utupane mo tai gulaya wato, utupane wato minu atamakale nembo talaman. *

4

Goteto Apatakame Bala Akali Tika-pene Ateyai Leane Oko

1 Nanimato Apatakame nembo toto, aki lamape. Balato nanimana yumbane tupa mandeane nembo toto, bala mee nanimana yumbane angu ateane lamape. Jia wete.

2-3 Apatakameto mana epene tupa angu wato minu atea-yale, Goteto balana mana epene utupane andoto, bala akali tika-pene ateyai lea-yale. Goteto wuane lea-yale, Apatakameto bala tanena gene oko katulo laiyu lea-yale tekeko, Goteto pii pepa pelene eya mindimane loto, Apatakameto pii Goteto leane tupa enene lea ya lo bilipi leane okonena, Goteto bala akali tika-pene ateyai leane lo pepa pelene eya. Tene okonena, Goteno wenonga Apatakameto bala tane gene oko laiyu lolane tene mindi ata naapeapia. *

4 Dee, wandakali mindimane piapuato yole meando, balato yole okone mee pete-sene gulo meya lo nanimato nembo natala-

* 3:19-20: Sam 143:2; Lom 7:7-8; Ga 2:14-16 * 3:21-23: Ga 2:14-16 * 3:24-26: Lom 5:1 * 3:29-30: Lom 10:11-12;
Lo 6:4; Ga 3:20 * 3:31: Mt 5:17 * 4:2-3: Jen 15:6; Ga 3:6-9

mane. Jia. Balato piape pipia okonena paini yole miap-e-pene meya nembo talamane.

⁵ Wuane tekeko, mindimane mana epene tupa wato mineando, Goteto balana mana epene utupane andoto, bala tika-pene ateya nalolo-peya. Jia. Wandakali mindimane mana koo mindi minalu, Jisasato piape peane mambele, Goteto koo okone apoto, bala tika-pene ateya lolopeya lo bilipi leando, Goteto wandakali okone bala tika-pene ateya lolopeya.

⁶⁻⁷ Wandakali mindimane mana epene mindi wato mina napene ato, Jisasato lo bilipi leya-kola, Goteto wandakali okone bala tika-pene ateya leando, wandakali okone bala epelewa atalane. Wamba Dapitito mana okone nembo toto, Goteto wandakali mindina mana koo tupa apoto, koo utupane nembo tolo-peke naleando, wandakali okone bala epelewa atolopeya leaipia.*

⁸ Dee, mindimane mana koo mindi minula-kola teke, Akali Andane okomane wandakali okone bala kosimi nalene kondeando, wandakali okone bala epelewa atolopeya. Dapitito wuanekoa leaipia.

⁹ Yala-pene umbaini katene akali tupa angu epelewa atolopeyai nembo toto, Dapitito wuanekoa leaipia. Jia. Akali yala-pene umbaini katene tupapi, kati napene tupapi, utupane pitaka-mane epelewa atolopeyai nembo toto, balato wuanekoa leaipia. Anu peakale nambato wuanekoa leyope. Goteto Apatakame bilipi oko nembo toto, bala akali tika-pene ateya leane nembo toto, nani-mato wuanekoa leyama.

¹⁰ Apatakame balana yala-pene umbaini wamba katenenga Goteto bala akali tika-pene ateya leaipia. Jia. Apatakame bala yala-pene umbaini kati napene atea-kola teke, Goteto bala akali tika-pene mindi ateya leaipia.

¹¹ Akali yame waka minditupapi yala-pene umbaini kati napene ato, Gote lo bilipi lolai-kola, Goteto utupanepi tika-pene ateyai lokale nembo teaiapia. Apatakame bala akali utupanena yumbane gulo atekale nembo toto, balana yala-pene umbaini kati napene atea-kola teke, Goteto bala akali tika-pene mindi ateya leaipia. Balana yala-pene umbaini kati napene atoto, Apatakame bala akali tika-pene mindi ateane lo andawa loyale, matili Goteto kokoli mindi bala pimawuato, balana yala-pene umbaini oko kateakale leaipia.*

¹² Apatakameto balana yala-pene umbaini oko wamba ini kati napenenga, Gote lo bilipi leaipia. Akali waka minditupapi-mane yakamana yala-pene umbaini

wamba ini katiyu, matili nanimana yumbane Apatakame mana okone wato minuto, Gote lo bilipi leaini tekepia. Goteto Apatakame bala akali utupanena yumbane gulo atekale nembo toto, Apatakameto balana yala-pene umbaini oko kateakale leaipia.

Bilipi Lene Wandakali Tupa Pitaka Tika-pene Ateyai Leane Oko

¹³⁻¹⁵ Gotena loo tupa nayapia-yale, wandakali-mane balana loo utupane katulo kalo napiapia-yale tekeko, wandakali-mane Gotena loo tupa kalo pua ateyai okonena, Goteto wandakali utupane towa yatakawa atalane. Wuaneko, Goteto mangene epene mindi pukale lo potomisa pii leane okomane balana loo tupa kuai lo wato minu atalaini wandakali tupa angu moyapia-yale, wandakali mindikipi mindimane Gotena loo utupane kuai lo wato mina napiapia-kola, Gotena potomisa pii okone mee gulapia yale. Balana potomisa okone mee gulapia-yale, wandakali-mane Jisasa lo bilipi lene mana okopi mee gulapia-yale teke. Apatakameto Gotena loo tupa pitaka katulo wato mina napeane tekeko, balato Gote lo bilipi leane okonena, Goteto bala akali tika-pene ateya leaipia. Wuanekoa lalu, balato potomisa pii mindi Apatakamepi, balana mandiyene yame tupapi, utupane lamawuato, yuu tupa pitaka yakamato paluni gulo molopeyai leaipia.*

¹⁶⁻¹⁷ Goteto balana potomisa pii leane okone balana loo tupana pangosa atalaini Juta yame wandakali tupa angu lamai napeaipia. Jia. Wamba Apatakameto Gote lo bilipi leane wuanekoa pua teke bilipi lene wandakali yame waka tupa Goteto balana potomisa pii okone lamai teke peaipia. Goteto balana potomisa pii leane okone enene wete guleakale nembo toto, Apatakame mandiyene yame utupane pitaka-mane Jisasa lo bilipi lolai-kola, nambato utupane ondowa moyoto, utupane pitaka wandakali tika-pene ateyai lokale lo potomisa pii mindi leaipia. Gotena pii pepa pelene eya mindimane Apatakame lamawuato, nambato nimba wandakali yame kambua tupana yumbane gulo atola leyo leaipia. Goteto wuanekoa leane okonena, Gotena wenonga, Apatakame bala nani-mato bilipi lene wandakali tupa pitakana yumbane gulo ateya. Bala nanimana yumbane gulo atoto, Goteto minditaka nayane tupa yakale lalu, wandakali omene tupa mo saka ataya alane lo bilipi leaipia.*

* **4:6-7:** Sam 32:1-2 * **4:11:** Jen 17:10-11 * **4:13-15:** Jen 17:4-6; 22:17-18; Ga 3:15-18,29; Lom 3:19-20; 5:12-13

* **4:16-17:** Ga 3:6-9; Jen 17:5

18-21 Apatakameto wuane lo bilipi lea-kola, Goteto potomisa pii mindi bala lamawuato, ati kenga kaiyanda kambua wete ateyai okone tuma teke nimbana mandiyene tupana mandiyene yame kambua okone tuma pangulu-peyai leaipia. Goteto wuane lea-angi, Apatakame bala mali andete mindikipi mindi pea-kola, balana umbainai tai nalene, omene guleya nembo teaipia. Dee, balana wetene Sata okona umbainai omene gulea-kola, balato andopane mindi katulo mandi napipe-pene guleya nembo tea tekepia. Wuane nembo toto, balato Gotena potomisa pii okone enene jia lo nembo tea-yale tekeko, Apatakameto mini lapo paluto, balana bilipi oko auwa tepa wapi, kayiki yopi, mindi naapeaipia. Jia. Gote lo bilipi lalane mana okonemane bala minu tai laya ya-kola, Goteto andopane mindi gukale leane okone katulo gulupeya lo bilipi loto, Apatakameto Gotena gene oko laiyu lo ateaipia. Tene okonena, Goteto andopane mindi bala maiya-kola, Apatakame bala wandakali yame kambua tupana yumbane guleaipia. *

22 Apatakameto Gote lo bilipi leane okonena, Goteto bala akali tika-pene mindi ateya leaipia. *

23 Goteto bala tika-pene ateya leane lo pii pepa pelene eya okone Apatakame angu andayo naleaipia. Jia.

24-25 Nanimana Akali Andane Jisasa malinga ika laya yane Gote oko lo matili bilipi lolaini wandakali nanimana tika-pene ateyai lokale nembo toto, balato pii okone pepa pelene yakale leane tekepia. Anu peakale nambato wuane leyope. Nanimana mana koo tupa wato minu atolopeyai nembo toto, wamba Goteto nanimana mana koo utupane apokale nembo teaipia. Wuane nembo toto, balato Jisasa omolo epeakale leaipia. Jisasa omea-kola, Goteto nanimana wandakali tika-pene ateyai lokale nembo toto, bala malinga ika laya yaepia. *

5

Goteto Nanimana Wandakali Tika-Pene Ateyai Leane Oko

¹ Nanimato nanimana Akali Andane Jisasa Kataisa lo bilipi lema-kola, Goteto nanimana wandakali tika-pene ateyai lea. Tene okonena, andipa nanimato Gote towa yanda-pene gulo ata napene, tambo lo ateyama.

² Nanimato Jisasa lo bilipi lema-kola, balato nanimana Gote towa kuai lo atolane asini mindi wapi-geaipia. Tene okonena, andipa

Goteto nanimana onto wato, moyo ateya-kola, matili nanimato Gotena yuu epene okona poto, balana tii-pene minditupa molopeyama lo epelewa maliyo ateyama.

³⁻⁴ Kenda-pene minditupa nanimanga epeya-kola, nanimato kenda-pene auwa atolane mana oko moto, wamba kapoyale kepa naene, tai gulalamane. Tai guloto, makande pene nanimanga epalane tupa nanimato katulo sia minalamane. Makande pene nanimanga epalane utupane sia minuto, nanimana mini lapo pali napene, Goteto nanimana moyolo-peya lo bilipi loto, maliyo atoto, nanimana epelewa atalamane. *

⁵ Goteto balana Oli Sipitisa oko nanimana gea-kola, balato nanimana wayumane epelewa yamapane yo atalane lo Oli Sipitisa okomane nanimana wayumane andawa lea. Goteto nanimana wayumane epelewa yamapane yo atalane nembo toto, nanimato kepa naene, balato nanimana moyakale lo maliyo atalamane. Balato nanimana moyo ateya-kola, nanimana mini kendawa ata napiyamane. Jia.

⁶⁻⁸ Goteto anu puato, nanimana towa epelewa yamapane yo atalane oko andawa leaipiape. Wandakali tika-pene mindi omape-pene guleando, wandakali mindimane bala moyoyale omokale nembo natalane. Jia. Wandakali epene wetete mindi omape-pene guleando, wandakali mindimane wandakali okone taputi pua moyoyale omokale nembo tolo-peyape, natolo-peyape lo nambato nembo nateyo. Wuane tekeko, wamba nanimato Gote masia mauwa atoto, mana koo tupa minu atema-angi, Kataisato nanimana moyoyale omeaipia. Okone angi, nanimana tane moyolane tai-lene mindi nanimanga nayane tekeko, Kataisato nanimana moyo omolane oto Goteto yata yane oko epeakale, Kataisato nanimana moyoyale omeakale leane okonemane Goteto nanimana wayumane epelewa yamapane yo atalane lo nanimanga andawa leaipia. *

⁹⁻¹⁰ Wamba nanimana Gote towa yandapene gulo atema-kola, matili balana iwanane omeane okonemane nanimana Gote towa yamapane yene yame gulaya yaepia. Balana tundupa okomane nanimana koo tupa apea-kola, Goteto nanimana wandakali tika-pene ateyai leaipia. Tene okonena, andipa balana iwanane oko saka atapowa atoto, nanimana wayumane wete moyo atolopeya nembo teyama. Wuane nembo toto, matili Goteto yataka wato, koo pua atalaini wandakali tupa yole koo mindi

* 4:18-21: Jen 15:5; 17:17 * 4:22: Jen 15:6 * 4:24-25: Ais 53:4-5 * 5:3-4: Jem 1:2-3; 1Pi 1:5-7 * 5:6-8: Jo 3:16-17; 1Jo 4:9-10

maula-angi, balato nanima towa yataka na-olopeya. Jia. Tene okonena, balato yole koo okonepene mindi nanima gii napulu-peya lo wayumane nembo teyama.*

¹¹ Okone angu jia. Nanimana Akali Andane Jisasa Kataisato nanima Gote towa yamapane yene yame gulaya yane nembo toto, andipa nanimato Gotena gene oko laiyu loto, epelewa ateyama teke.

Goteto Nanima Saka Atapowa Atalapale Leane Oko

¹²⁻¹³ Wamba Goteto balana loo tupa Mosesanga mai napene angi, akali mindiki Atame balato Gotena pii tanga loto, mana koo mindi mineaipia. Atameto mana koo okone mineane okonemanee yuu okona wandakali-mane mana koo wato minalaini mana oko mina ika loto, wandakali omalaini mana okopi mina ika lea tekepia. Nanima pitaka-mane mana koo tupa minalamane okonena, matili nanima pitaka omalamane. Mosesato Gotena loo tupa wandakali tupa mai napenenga, wandakali mindimane mana koo mindi minea-angi, Goteto balana loo tupana mindi nembo toto, wandakali okonemanee loo okone kalo peya naleaipia. Jia.*

¹⁴ Wamba Atameto Gotena pii mindi tanga leane pua, matili wandakali minditupa-mane Gotena pii mindi tanga naleainipia. Wuane tekeko, wamba Atame yuu okona ateane-angi, wandakali pitaka-mane mana koo minditupa minu ateainipia. Matili wuane pua teke, wandakali pitaka-mane mana koo tupa wato minu atama ipulu, Mosesa ateane gi okonena giau loto, utupane pitaka omaka teke peainipia. Akali Atame oko bala Jisasa matili epolopeya okonena mandeke gulo ateapia.

¹⁵ Wuane tekeko, Atameto mana koo mineane okola, Jisasato nanima ondo wato mee moyane mana okola, mana okonelapo mindiki okonepene teke jia. Akali mindiki Atame balato mana koo mindi mineane okonena, wandakali pitaka-mane mana koo tupa wato minuto, omalamane. Nanima omalamane tekeko, akali mindiki Jisasa Kataisato nanima ondo wato, mee moyane okonena, Goteto wandakali kambua ondo wato moyalan. Tene okonena, Jisasato mana epene mineane okomane Atamena mana koo mineane okone sia minuto, epene wete eya lo andeyo.

¹⁶⁻¹⁷ Dee, akali mindiki Atame balato mana koo mineane okola, Goteto petesene

mindi nanima mee geane okola, okone-lapona dini mindiki okonepene lapo-lapo lia naapeaipia. Jia. Akali mindiki Atameto mana koo mindiki minea-kola, wandakali pitaka-mane mana koo tupa minalamane okonena, Goteto wandakali nanima pitaka lamawuato, yakama omape-pene lea-kola, wandakali nanima pitaka omalamane. Okone enene tekeko, wandakali pitaka-mane mana koo kambua minu atalamane okonena, akali mindiki Jisasa Kataisato piape peane mambele, Goteto Jisasa lo pilipi lene wandakali nanima ondowa moyoto, nanima tika-pene ateyai lalane. Tene okonena, nanima saka atapowa atoto, Kataisa towa atu kinji gulo atolopeyama. Balana mana okonemanee mana koo Atameto mineane okone sia minuto, petesene epene wete mindi gulo eya.

¹⁸⁻¹⁹ Akali mindiki Atameto Gotena pii tanga loto, mana koo mindiki mineane okomane wandakali pitaka-mane mana koo minalaini wandakali gulaya ya-kola, Goteto nanima pitaka yuu koo okona pupe-pene leaipia. Wuane pua teke, akali mindiki Kataisato Gotena pii wato minuto, mana tika-pene mindiki mineane okomane wandakali kambua tika-pene gulaya ya-kola, Goteto utupane pitaka wandakali tika-pene ateyai loto, saka atapowa ateakale leaipia.*

²⁰⁻²¹ Wandakali-mane mana koo kambua minalaini tupa yakama tane andalapae nembo toto, Goteto balana loo tupa wandakali tupanga mayaepia. Koo pua atalaini mana okomane wandakali tupa bosa lo ando atea-kola, utupane omaka peainipia. Wuane peane pua teke, nanimana Akali Andane Jisasa Kataisato piape peane mambele, Goteto nanimato saka atapowa atalapale nembo toto, nanimato mana koo kambua minu atema-angi, balato ondo wete wato, nanimato wayumane wete moyaepia.*

6

Mana Koo Tupa Wato Minu Atolaini Leane Oko

¹ Wuaneko, nanimato aki lamape. Goteto nanima ondo wete wato, wayumane wete moyakalenga, nanimato mana koo kambua mee minu teke atamakale lamape.

²⁻³ Jia wete. Jisasa Kataisa towa yame mindiki atamakale loto, ipa mema wandakali nanima pitaka-mane Jisasa towa atu omene gulema oko yakamato nembo nateyaipe. Nanima bala towa omene gulema-angi, nanimato koo piyamane

* 5:9-10: Lom 1:18-20; 2:5 * 5:12-13: Jen 3:6; Lom 4:13-15; 6:21-23 * 5:18-19: 1Ko 15:21-22; Ais 53:11 * 5:20-21:

Lom 6:21-23 * 6:2-3: Ga 3:26-28

mana tupa auwa tepa ema. Tene okonena, anu peakale nanimato mana koo utupane mee minu teke atamakalepe. *

⁴⁻⁷ Wandakali mindi omeya-kola, koo piyane mana okomane bala katulo bosa lo ando ata napiyane. Tene okonena, nanimato mana koo tupana katapusa piape pua atu na-piyapale loto, Goteto nanimana umbaini-mane mana koo minaima laka lo nembo talamane okona tai-lene oko koyo peakale nembo teapia. Wuane nembo toto, Goteto nanimana nembo-tene wambane oko Kataisa towa atu ita malamanda okona peyo yuka wato, peyo omaya yane nembo teyama. Goteto wuane peane okomane nanimata Kataisa towa atu yame mindiki gulaya ya-kola, nanima bala towa atu omene gulema. Nanima Kataisa towa yame mindiki gulema okonena, wamba bala malinga ika leane wuane pua teke matili nanimapi malinga ika lolo-peyamako. Aiyane Gote okona tai-lene okomane Kataisa bala malinga ika laya yane wuane pua teke, nanimapi malinga ika lene gulo atoto, Gotena mana wenene tupa wato minu atape-pene. Nanimato wuane pua atalapale nembo toto, nanima ipa mema okomane Goteto nanimata Kataisa towa yame mindiki gulaya wato, nanima bala towa atu mali peane. *

⁸Nanima Kataisa towa atu omene gulema okonena, nanima bala towa atu saka atapowa atolo-peyama lo bilipi leyama.

⁹⁻¹⁰ Koo piyamane mana okona tai-lene oko minu koyoyale, Kataisa bala alu mindiki omea-kola, yuu okona wandakali omalamane mana okomane bala bosa lo ando ata napiyane. Jia. Goteto bala malinga ika laya ya-kola, bala lapone oma napulupuya nembo teyama. Andipa Kataisa bala saka atapowa atoto, Gotena piape pimawua ateyama.

¹¹ Wuane pua teke, yakamato Jissasa Kataisa towa yame mindiki atoto, Gotena piape pimawua atoyale saka ateyama nembo talapape. Yakama Kataisa towa omeai-kola, koo piyaini mana okonemane yakama bosa lo ando ata napeya nembo talapape. *

¹²Yakamana umbaini oko katulo omolopeya. Tene okonena, yakamana umbaini okonemane mana koo tupa minauwa laka lo nembo tola-angi, koo piyaini mana okonemane yakamana umbaini okone bosa lo ando ateakale lo yakamato ando konda na-piyapape. *

¹³Dee, yakamato mana koo mindi minamakale nembo toto, koo piyaini mana

okonemane yakamana kinipi, ambulinipi, okonetaka tupa bosa lo ando ateakale lo yakamato ando konda na-piyapape. Jia. Wamba koo piyaini mana okomane yakama bosa lo ando ateakale lo yakamato ando konda na-piyapape. Gotena pangosa ata napeai. Okone ang, Goteto andea-kola, yakama omene gulo ateaini tekeko, andipa yakama malinga ika lene gulo ateyai. Tene okonena, andipa yakama saka atoto, mana epene tika-pene tupa wato mina-makale nembo toto, yakama tane Gote maiyapape. Maiyu, Goteto yakamana kinipi, ambulinipi, okonetaka tupa pitaka bosa lo ando ateakale lalapape. *

¹⁴ Andipa loo okomane yakama bosa lo ando ata napiyane. Jia. Goteto yakama ondo wato, moyo atalane-ko. Koo piyaini mana okomane yakama bosa lo ando ateakale lo ando konda na-piyapape. *

Yakamato Mana Tika-pene Tupa Minu Atalapape Leane Oko

¹⁵ Andipa Goteto nanimata ondo wato moyo ateya-kola, loo okomane nanimata bosa lo ando ata napiyane-ko. Nanimato mana koo tupa mee minu teke atemando, nanimata mana okone katulolopeyape. Jia wete.

¹⁶ Yakamato yole mia napene, akali mindina katapusa piape pimakale loto, akali okonemane pii lola tupa wato minu ateaindo, yakama balana piape wandakali gulo atolopeyai oko nembo nateyaipe. Yakamato mana koo tupa wato mina-makale loto, yakamana nembo-tene wambane okomane lola pua mana koo tupa wato minu ateaindo, mana koo utupanemanne yakama peyo ome lolopeya. Wuane tekeko, yakamato mana epene tika-pene tupa wato mina-makale loto, Gotena pii okomane lola pua mana epene tupa wato minu ateaindo, Goteto yakama wandakali tika-pene ateyai lolopeya. *

¹⁷ Wamba yakamato koo piyaini mana okona katapusa piape pimawua ateaini tekeko, matili Goteto balana pii oko yakama giyu, pii okone wato minu atalapape leaipia. Wuane lea-kola, yakamato balana pii okone wayumane wete wato minu atalaini nembo toto, nanimato Gote wayu pele lamakale.

¹⁸ Wamba koo piyaini mana okomane yakama andi lea-kola, Goteto yakama tinga lo moto, mana epene tika-pene wato minalaini wandakalina mana tupa nembo

¹⁹Yakamato pii nambato yakama langeyo okone wayumane nembo nateyai okonena, nambato wandakalina mana tupa nembo

* **6:4-7:** Kol 2:11-12; Ga 5:24 * **6:11:** 2Ko 5:14-17; Ga 2:18-20 * **6:12:** Jen 4:7 * **6:13:** Lom 12:1 * **6:14:** 1Jo 3:4-6 * **6:16:** Jo 8:34; 2Pi 2:17-19

toto, wua leyo: Wamba yakamato mana koo tupa minu atamakale nembo toto, Gotena loo tupa kalo puato, yakamana kinipi, ambulinipi, okonetaka tupa pitakanane mana koo kalato atene tupana katapusa piape pimawua atecainipia. Wuane pua teke, andipa yakamato Gotena mana epene wete tupa minu atamakale nembo toto, yakamana kinipi, ambulinipi, okonetaka tupa pitakanane mana tika-pene tupana piape pua atalapape.

²⁰ Anu peakale nambato yakamato wuaneyiyapale leyope. Wamba yakamato koo piyaini mana okona katapusa piape pua atea-angi, yakamato mana tika-pene okona piape pua ata naapeai.

²¹⁻²³ Wuane tekeko, andipa yakamato nembo tolo-peke loto, mana koo utupane wamba minu atema nembo toto, yala alaini. Wamba yakamato mana koo utupane minu atea-angi, yakamato yole epene andoko meaipe. Wandakali-mane mana koo tupa minu atalaini okonena, Goteto yole koo mindi utupane mawuato, omeakale leya-kola, utupane omalaini. Wamba yakamato mana koo tupana katapusa piape pua atecaini tekeko, Goteto yakama tinga lo moto, yakama bala tanema piape wandakali gulaya yaepia. Nanimana Akali Andane Jisasa Kataisato piape peane mambele, Goteto bala lo bilipi lene wandakali tupa petesene mindi mawuato, utupane saka atapowa atekale lalane. Tene okonena, balato yakama epene tika-pene wete gulaya wato, yakama saka atapowa atalapa lolopeya. *

7

Nanima Loo Okona Pangosa Andi Latane Ata Napeyama Leane Oko

¹ Amene imalini yame, wandakali mindi saka ateya-angi, balato loo okona pangosa atalane tekeko, omalu, bala loo okonena pangosa ata napiyane. Yakamato loo okona mana minditupa andalaini okonena, pii nambato leyo okone enene ya lo yakamato nembo teyai.

²⁻³ Wanda mindina akalini oko oma napene, mee saka ateya-kola, loo okomane wanda okone bala akalini oko towa mina mindiki lalane. Akalini oko bala mee saka atola-kola teke, balana wetene okonemane akali waka mindi towa paleando, wandakali-mane wanda okone bala pamuku wanda lalaini. Wuane tekeko, balana akalini oko omeando, loo okomane wanda okone bala akalini okone towa mina mindiki na-lalane. Jia. Loo okomane bala tinga leya-kola, bala mee anana pitiyane.

Wanda okone akali waka mindina peando, balato pamuku mana oko mina napula-kola pulupeya.

⁴⁻⁵ Amene imalini yame, wamba nanimato nembo-tene koo tupa wato minu atema-angi, loo okomane nanimato nembo-tene mina ika lea-kola, nanimana umbaini tupamane mana koo tupa minaima laka lo nembo tema. Tene okonena, nanimanga dini koo kambua lia-kola, nanimana omape-pene gulo atema. Okone angi, loo oko yakamana akalini bulupane gulo ateane tekeko, dini Goteto epele alane tupa yakamanga liakale nembo toto, Goteto Kataisa bala yakamana akalini wenene gulo ateakale nembo teapia. Wuane nembo toto, balato yakama Kataisa towa mina mindiki lea-kola, yakama Kataisa towa atu omene gulo atea okonena, andipa yakama loo okona pangosa ata naapeyai. Jia. Goteto Kataisa malinga ika laya ya-kola, yakama balana pangosa ateyai. *

⁶ Enene, wamba nanimana loo pepa pelene eya tupana pangosa andi latane gulo atoto, utupane angu wato minuto, Gotena piape pua atema tekeko, andipa nanimato mana wambane okone wato mina na-piyamane. Jia. Nanimana Kataisa towa omema okonena, Goteto nanimana tinga lea-kola, nanimato mana wenene Oli Sipitisa okomane nanimana andawa lalane tupa wato minuto, Gotena piape pua atalamane. *

Gotena Loo Tupa Epene Tika-pene Wete Eya Leane Oko

⁷⁻⁸ Gotena loo tupa naya-yale, koo piyamane mana oko omene gulea-yale tekeko, Gotena loo okomane nimbato wandakali yangone mindina minditaka mindi miawa laka lo nembo natape lea. Wuane lea-kola, nambato koo piyawane mana okomane nambana nembo-tene oko mina ika lea-kola, nambato minditaka kambua miauwa laka lo nembo tewa-ko. Nanimato Gotena loo tupa ale wato, mana koo kambua wato minaima laka lo nembo talamanne okonena, nanimato aki lamape. Nanimato Gotena loo utupane koo ya lamape. Jia wete. Gotena loo okomane nimbato wandakali yangone mindina minditaka mindi miawa laka lo nembo natape nialea-yale, nambato mana okone koo ya lo nembo natewa-yale. *

⁹⁻¹¹ Wamba nambato Gotena loo tupa nembo natene atewa-angi, namba saka atewa tekeko, matili nambato Gotena loo tupa ale ewa-angi, koo piyawane mana oso saka gulo atoto, namba peyo omo lolane asini mindi ayia pua ando mea. Gotena loo tupamane mana koo utupa mina

* **6:21-23:** Lom 5:12-13,15

* **7:4-5:** Lom 6:2-3,11

* **7:6:** Lom 8:1-4; 6:4-7

* **7:7-8:** Ek 20:17; Lo 5:21

napipe lea-kola, koo piyawane mana okomane namba minakasa ya-kola, nambato mana koo utupane minewa. Nambato mana koo utupane minewa-kola, Gotena loo tupamane namba omape-pene lea. Koo piyawane mana okomane asini okone wato minuto, namba peyo ome lea-kola, namba omene gulo atewa. Wuane, wamba Goteto wandakali tupa kuai lo saka atalapale nembo toto, balana loo tupa yata yane tekeko, loo utupane-mane namba peyo ome lolane asini mindi gulo ya-kola, nambato andewa-ko.*

12-13 Gotena loo epene, tika-pene wetete tupamane namba peyo ome leape. Jia wete. Nambato koo piyawane mana oko koo guu-pene wetete ya lo panakame wete yakale nembo toto, Gotena loo epene, tika-pene wetete eya okomane namba omape-pene lea-kola, koo piyawane mana okomane namba peyo ome leaipia.*

AKALI ANDANE OKOMANE NAMBA MOLOPEKE LOLOPEYA LEANE OKO

14-15 Goteto balana loo tupa nanim geane nembo teyama. Wuane nembo toto, nambato balana mana epene tupa wato minauwa laka lo nembo talawane tekeko, nambato mana epene utupane kuai lo wato mina na-piyawane. Jia. Nambato mana koo tupa embo wete wato, utupane wato mina napukale nembo talawane tekeko, nambato mana koo utupane wato minalawane. Anu peakale nambato wuane piyawaepe nambato nembo nateyo. Koo piyawane mana okomane namba andi lea-kola, nambana nembo-tene wambane koo tupa wato minuto, nambato mana koo utupanen katapusa piape pimawua talawane ya.*

16 Nambato mana koo utupane minalawane tekeko, nambato mana koo utupane mina napukale nembo talawane okonemane Gotena loo tupa epene eya nembo talawane oko andawa leya.

17 Namba tane-mane mana koo utupane minauwa laka lo nembo toto, mina na-piyawane. Jia. Nambanga mana koo paleya okonemane nambana nembo-tene oko mina ika leya-kola, nambato mana koo utupane minalawane.

18-19 Nambato mana koo mina napukale nembo talawane tupa minuto, mana epene minukale nembo talawane tupa mina na-piyawane. Enene, nambato mana epene utupane minauwa laka lo nembo talawane tekeko, nambato mana epene utupane katulo mina na-piyawane ya lo andeyo. Andoto, nambana nembo-tene

wamba tawe okonenga minditaka epene mindikipi mindi napaleya ya lo andeyo.

20 Nambato mana koo mina napukale nembo talawane utupane minalawane okonena, namba tane-mane mana koo utupane minauwa laka lo nembo toto, mina na-piyawane. Jia. Nambanga nembo-tene wambane koo paleya okonemane mana koo utupane minauwa laka lo nembo-tene oko mina ika lea-kola, nambato mana koo utupane minalawane.

21-23 Nambana nembo-tene wenene okomane nambato Gotena loo tupa epele wete alawane tekeko, nambana nembo-tene wambane koo okomane nambana nembo-tene wenene oko towa yanda pimawua atalane. Yanda pimawua atoto, nambana nembo-tene wambane koo okomane koo piyane mana okona piape pimawuato, nambana umbaini oko andi loto, nambana kinipi, ambulinipi, okonetaka tupa pitaka bosa lo ando atalane. Tene okonena, nambato mana epene mindi minukale nembo teyo-angi, nambanga mana koo paleya okomane jia loto, nambana asia pai leya lo nambato andalawane.*

24-25 Nambana nembo-tene wenene okomane Gotena loo tupa wato minalane tekeko, nambana nembo-tene wambane koo okomane koo piyane mana oko wato minalane. Tene okonena, namba akali koo wete mindi atoto, omape-pene gulo ateyoko. Apito namba molo-peke lolopeyape. Nanimana Akali Andane Jisasa Kataisato namba molo-peke lolopeya nembo toto, nambato Gote wayu pele leyo.*

8

Oli Sipitisa Okona Mana Epene Tupa Wato Minu Atape-pene Leane Oko

1-4 Andipa nanimato nembo-tene wambane okona mana koo tupa wato mina na-piyamane. Jia. Nanimato Oli Sipitisa okona mana epene tupa wato minalamane. Nanimana nembo-tene wambane koo okomane Gotena loo tupa wato minulane tai-lene mindi yaa napiyane tekeko, nanimato balana loo tupa wato minalapale nembo toto, Goteto balana iwanane Jisasa Kataisa epeakale lea-kola, bala ati kenga atala yuunga epeaipia. Epoto, balana umbaini oko nanimana mana koo minalamane wandakali tupana umbaini ateyama okonepene teke guleapnia. Gotena loo okomane loto, wandakali mindimane koo mindi peando, bala omape-pene leya. Wuane, Jisasa Kataisa bala koo piyamane wandakali nanimana panda mea-kola, nanimana koo tene tupa pitaka

* 7:9-11: Jen 3:13 * 7:12-13: 1Ti 1:8-9 * 7:14-15: Ga 5:16-18 * 7:21-23: Ga 5:16-18; 1Pi 2:11 * 7:24-25: 1Ko
15:57

balanga yaepia. Tene okonena, Goteto bala kosimi loto, omeakale leaipia. Balato nanimana koo tupa apoyale omea-kola, nanimma loo okona pangosa andi latane atoto, omolaini nembo toto, wandakali saka atapowa atayalane Oli Sipitisa okomane nanimma tinga lo meaipia. Tinga lo mea-kola, nanimma Jisasa Kataisanga ateyama okonena, andipa Goteto nanimma kosimi loto, nanimma omape-pene nalolo-peya. Jia.*

⁵⁻⁸ Nembo-tene wambane koo wato minu talaini wandakali tupamane Gotena loo tupana pangosa ata napimakale nembo toto, loo utupane katulo wato mina napiyane. Tene okonena, nembo-tene wambane koo oko wato minu atalaini wandakali tupamane katulo Gote mo epele aa na-piyaini. Jia. Utupane-mane bala towa yanda-pene wandakali gulalaini. Nembo-tene wambane koo okona mana koo tupa wato minu atalaini wandakali tupamane yakamana nembo-tene wambane koo okomane piyapa leya pua piyaini. Wandakali mindimane balana nembo-tene wambane koo oko angu wato minu ateando, wandakali okone bala omape-pene tekeko, Oli Sipitisa okomane piyapa leya pua piyaini wandakali tupamane Oli Sipitisa okona mana epene tupa wato minu atalaini. Wandakali mindimane mana epene utupane wato minu ateando, bala yamapanne tambo lo atoto, matili saka atapowa atolopeya.

⁹⁻¹⁰ Enene, yakamato mana koo minalaini okonena, yakamana umbaini tupa omolopeyai tekeko, Kataisa bala yakamanga ateando, Goteto yakama wandakali tika-pene ateyai lola-kola, yakamana tandini tupa saka atapowa atolopeyai. Kataisana Sipitisa oko wandakali mindinga ata napeando, wandakali okone bala Kataisana yame ata napulu-peya tekeko, Gotena Oli Sipitisa oko yakamanga ateya okonena, yakamato nembo-tene wambane koo okomane piyapa leya pua na-piyaini. Jia. Yakamato Oli Sipitisa okomane leya pua piyaini.*

¹¹ Jisasa Kataisa malinga ika laya yane Gote okona Oli Sipitisa oko yakamanga ateando, balana Sipitisa okomane yakamanga piape pula-kola, matili balato yakamana umbaini omene tupa mo saka ataya olopeya teke.

¹²⁻¹³ Amene imalini yame, yakamato nembo-tene wambane okona mana koo tupa wato minu ateaindo, yakama omolopeyai tekeko, Oli Sipitisa okomane yakama minu tai laya ola-kola, yakamato yakamana umbaini tupana mana koo tupa peyo ome

leaindo, yakama katulo saka atapowa atolopeyai. Nanimato nembo-tene wambane okona mana koo tupa wato epoko pua ata napepe-pene. Jia. Nanimato Oli Sipitisa okona mana epene tupa wato epoko pua atape-pene.*

¹⁴⁻¹⁶ Anu peakale nanimato wuane pua atamakalepe. Wamba Goteto balana Oli Sipitisa oko nanimma gea-angi, nanimma lapone yukuwa atapowa atalapale lo balato nembo nateaipia. Jia. Oli Sipitisa okomane nanimma Gotena andopane tupa gulaya wato, nanimma Gotena andopane yame ateyai lo langiyane. Langeya-kola, nanimma tane Gotena andopane tupa ateyama loto, nanimato Gote ando apa-oo, ayiane-oo, lalamane. Wuane leya-makola, Oli Sipitisa okona pii wato minu atalamane wandakali nanimma pitaka Gotena andopane yame ateyama lo andalamane.*

¹⁷ Wamba Goteto paluni epene wete mindi balana iwanane Jisasa Kataisanga mayaepia. Nanimma Kataisa towa atu Gotena yuu epene okona kuai lo wete atamakale nembo toto, Kataisato tandaka neane pua teke nanimato tandaka nemando, nanimapi Gotena andopane yame ateyama okonena, Goteto paluni epene okone nanimma gulupeya teke.

Oli Sipitisa Okomane Nanimma Moyalane Leane Oko

¹⁸⁻²² Goteto minditaka eya tupa pitaka yakale lea-kola, utupane yakama tane koyamakale nembo nateainipia. Jia. Goteto utupane atalu koyakale leane pua, utupane atalu, koyalaini. Minditaka eya tupa pitaka koyalaini mana okona andapangosa andi latane gulo atalaini. Wambane andopane manduyale masia peleyakola, tandaka noto, ai lalaini. Wuane pua teke, minditaka Goteto yakale leane tupa pitaka-mane tandaka noto, ai lo atama ipulu, andipa nanimma ateyama okona giau leya oko nembo teyama. Nanimato wuane nembo teyama tekeko, matili Goteto balana andopane tupa tinga lo moto, gene andanepi, minditaka epene mauwakale leane tupapi, utupane pitaka balana andopane utupanenga maulüpeya. Goteto balana andopane tupa tinga lo mola pua teke, balato minditaka yakale leane tupa pitaka wuane pua teke tinga leakale nembo toto, utupane-mane maliyo ateakale loto, andipa Goteto utupane pitaka koyakale lo ando kondalane. Tene okonena, matili Goteto balana andopane tupa ama tombenenga mo pana olopeya nembo toto, minditaka Goteto yakale leane tupa

* **8:1-4:** Ga 5:16-18,25 * **8:9-10:** 1Ko 3:16; 12:3; Ga 2:18-20 * **8:12-13:** Ga 6:7-8; Kol 3:5-6 * **8:14-16:** 2Ti 1:6-7;
Mk 14:36; 2Ko 1:21-22; Ga 4:4-7; Lap 21:7

pitaka-mane utupane andaima lakae lo maliyo ateyai. Matili Goteto nanima balana andopane yame ateyai lo mo pana wato, minditaka epene nanima gulupuya tupa nanimanga andawa lola-angi, minditaka epene utupane-mane tandaka andipa neyama tupa mee gulaya wato, epene wete yolopeya nembo teyo. *

²³⁻²⁵ Waka minditaka Goteto yakale leane tupamane tandaka noto, ai lalaini tekeko, utupane-mane angu. Jia. Nanimatopi tandaka noto, ai lalamane. Goteto nanima molo-peke lolopeya nembo tema-kola, balato nanima molo-peke loto, balana Oli Sipitisa oko wamba ini bulupane nanima mee geane. Matili balato nanimana umbaini tupa mo lawa puato, nanima balana andopane yame ateyai lo lapana olopeya. Wandakali mindimane minditaka mindi wamba ini meae yando, balato okone mokale lo mee maliyo ata napiyane. Wuane pua teke, Goteto nanimana umbaini tupa mo lawa puato, nanima balana andopane yame ateyai lo lapana apia-yale, balato wuane peakale lo nanimato maliyo ata napima-yale. Wuane tekeko, balato nanima balana andopane yame ateyai lo lapana olopeya lo nanimato bilipi leyama. Tene okonena, balato wuane pipia lakae lo nembo toto, nanima kepa naene, mee maliyo atalamane. *

²⁶ Alu minditupa nanimanga tai-lene naeya-kola, nanimato pote loto, aki lamape lo tatake wato, pii mindi Gote lamai napene, mee nembo-mane ai lo ateyama-kola, Oli Sipitisa okomane pii nalene, mee nembo-mane ai loto, nanima moyo pote lalane.

²⁷ Oli Sipitisa okomane Gotena nembo-tene oko wato minuto, balana wandakali tupa moyo pote lalane. Tene okonena, wandakalina nembo-tene andalane Gote okomane Oli Sipitisa okona nembo-tene oko andoto, nanima moyalan. *

Goteto Nanima Epelewa Yamapane Yo Atalane Leane Oko

²⁸⁻³⁰ Wandakali kambua-mane balana iwanane oko lo bilipi lolopeyai nembo toto, Goteto balana iwanane oko utupanena amene bulupane oko apeakale lalu, utupane balana iwanane ateya okonepene teke apeakale nembo toto, ee lo meapia. Balato utupane ee lo moto, tika-pene ateyai loto, gene andane mindi utupane mayaepia. Maiyu, balato utupane bala towa Gotena yuu epene tii-pene okona apeakale lea-kola, utupane-mane bala epelewa yamapane yo atalaini. Goteto wandakali utupane balana iwanane ateya okonepene teke apeakale

nembo toto, ee lo moto, utupane moyoyale, mangene utupane pitaka peane. Tene okonena, wandakali utupane moyoyale, balato mangene waka tupa pitaka piyane lo nanimato nembo teyama. *

³¹ Goteto nanima moyo piape utupane pitaka piyane nembo toto, nanimato aki lamakalepe. Balato nanima moyo atolakola, apito nanima yanda pinguato, katulo sia minulu-peyape. *

³² Wamba Goteto balana iwanane oko saka apeakale konda wakale lape-pene tekeko, nanima pitaka moyoyale, Goteto bala omolo epeakale leaipia. Goteto wuane peane okonena, balato pitaka taka nanima mee gulupuya nembo teyama.

³³ Gote bala tane nanima balana yame atalapa loto, nanima wandakali tika-pene ateyai leane-ko. Apito nanima kosimi loto, katulo sia minulu-peyape. *

³⁴ Wamba Jisasa Kataisa bala omeakola, Goteto bala malinga ika laya yaepia. Andipa Jisasa bala Gotena kii tikasa pituto, nanima moyo, Goteto nanimana koo tupa apeakale lo pote lalane. Tene okonena, mindimane nanima mana koo okona yole oko miape-pene leando, Goteto balana pii okone ale na-olopeya.

³⁵⁻³⁶ Gotena pii pepa pelene eya mindimane loto, wandakali minditupa-mane andeyai-kola, Gotena wandakali nanima sipisipi peyo ome lape-pene gulene ateyai lo andalaini. Andoto, ole dindi lo utupane-mane nanima peyo ome loyale mandeke pitawa atalaini layene eya. Gotena pii okonemaney leya pua teke, wandakali minditupa-mane kenda-pene andane tupa nanima giki pua ateyai-kola, nanima minditaka jia yo atoto, ulia nono andane wato, umbaininga tona pulane jia yo atalamane. Kenda-pene utupane auwa atoto, nanima omape-pene gulo atoto, anu pimape lo nembo kambua talaman. Kenda-pene utupane nanimanga epeya-kola, Kataisato nanima towa epelewa yamapane yo ata naopeya nembo tamakalepe. Jia wete. *

³⁷ Kenda-pene utupane pitaka nanimanga epalane tekeko, Kataisato nanima epelewa yamapane yo atoto, moyo ateyakola, nanimato kenda-pene utupane wayumane sia minalamane.

³⁸⁻³⁹ Nanimana Akali Andane Jisasa Kataisato nanima moyo piape peane okomane Goteto nanima epelewa yamapane yo atalane lo nanima andawa leya. Tene okonena, nanima saka atemandopi, omemandopi, minditaka ati kenga atalane yandopi, minditaka yuu pangosa yalane

* 8:18-22: Jen 3:17-19 * 8:23-25: 2Ko 5:2-4 * 8:27: Sam 139:1 * 8:28-30: Ep 1:11-12; Kol 1:18-20; Ip 1:6 * 8:31:

Sam 118:6 * 8:33: Ais 50:8-9 * 8:35-36: Sam 44:22

yandopi, enjoje tupa yandopi, sипитиса tai-lene tupa yandopi, waka minditaka tai-lene yandopi, waka minditaka Goteto yakale leane yandopi, utupane-mane andipa yandopi, matili yandopi, Goteto nanima epelewa yamapane yo ata naapeya lo katulo nanima andawa nalolo-peya lo nambato bilipi leyo nayu leyo.

9

Bilipi Lene Wandakali Tupa Gotena Yame Enene Ateyai Leane Oko

1-5 Wamba Goteto Isatale tane wandakali tupa bala tanena yame atea kale leakola, utupane-mane balana tii-pene okola, tai-lene okola, okonelapo andeaini-pia. Andeai-kola, yakamoto wua piyapape lo Goteto pii minditupa lo yata wato, balana loo tupa utupanenga mayaepia. Maiyu, balato utupane mana lamawuato, yakamoto namba lo lotu loto, wua piyapape leaipia. Wuane lalu, balato utupane moyo wua pukale loto, potomisa pii minditupa lo yata yaepia. Apatakamepi, Aisakepi, Jekopopi, utupane Isatale tane tupana yumbane tupa atoto, Kataisa mandaekola, bala akali enene mindi ateyaipia. Bala Gote atoto, yuupi, atipi, utupane pitaka ando atalane. Tene okonena, ole dindi lo nanimato balana gene oko laiyu lo atamakale. Pii utupane enene tekeko, Isatale tane wandakali kambuamane Kataisa lo bilipi na-lalaini okonena, matili utupane yuu koo okona atapowa atolai-kola, Kataisa towa atu ata napulopeyai. Wuaneko, Goteto Isatale tane tupa nambana panda moto, Kataisa towa atu atapowa atea kale loto, namba utupanena panda moto, Kataisa tepa alu, yuu koo okona puu lapia-yale, namba katu lalu, puwa-yale. Wuane tekeko, namba utupane towa panda lawa pulane asini mindi naeyakola, ole dindi lo nambato utupane ondo wete wato, mini kenda andane wetete wato, nembo kambua talawane. Goteto nambana Isatale tane wandakali yangone utupane molo-peke lapia lakae lo nembo teyo. Namba Kataisana piape akali okomane owato pii naleyo. Jia. Oli Sipitisa oko bala nambana wisanisa atoto, nambana nembotene oko minu tai laya wato, pii leyo okone enene lele lo namba langeya.*

6-9 Enene, andipa Isatale tane wandakali kambua-mane Jisasa lo bilipi nalene atoto, Goteto andopane yame ata naapeyai tekeko, Goteto Isatale tane wandakali tupa balana yame gulaya wakale lo potomisa pii

leane utupane dini lia naapeane lo nambato naleyo. Jia. Anu peakale nambato wuane naleyope. Wamba Goteto potomisa pii mindi Apatakame lamawuato, oto mindi nambato yata eyo okona namba peke lolowa-kola, nimbanda wetene Sata balato iwana mindi mandulu-peya leaipia. Nimbanda iwanane Aisake okonena mandiyene tupa angu nimbana yame enene pangulu-peyai leaipia. Goteto wuane leane okonena, wandakali-mane andopane mandiyaini pua Apatakameto andopane waka mindi mandeane oko bala Gotena andopane enene ata naapeane-ko. Apatakamena mandiyene yame palu peyai tupa pitaka Gotena yame enene wete ateyai halape-pene. Jia. Isatale tanena mandiyene yame palu peyai tupa pitaka Isatale tane enene wete ateyai halape-pene teke. Jia. Goteto iwana mindi gukale lo potomisa pii mindi Apatakame lamaiya-kola, Apatakameto Gotena pii okone bilipi loto, Aisake mandaipia. Wuane pua teke, wandakali mindimane wandakali mindimane potomisa pii Goteto leane tupa nembo toto, Goteto leane pua enene pulupeya lo bilipi leando, Goteto wandakali okone balana yame enene ateya lolopeya.*

10-13 Wandakali mindimane piape epene tupa pua ateya-kola, Goteto balana mana okone andoto, wandakali okone ee lo mia napiyane. Jia. Gote bala tane nembo talane pua wandakali mindi ee lo mialane. Wuaneko, Gotena pii pepa pelene eya mindimane loto, nambato Jekopo epelewa yamapane yewane tekeko, Iso towa embo wete ewane layene eya. Tene okonena, wamba wanda Lepekato nanimana yumbane Aisakena iwanane okonelapo mandi napene, mee manduyale peteane-angi, iwana okonelapo-mane mana epene yandopi, koo yandopi, mindi mina naapeapi-kola teke, Goteto wanda Lepeka lamawuato, iwana bulupane mandule Iso bala iwana lapone mandule Jekopona piape akali gulo atolopeya leaipia.*

Bilipi Lene Wandakali Tupa Tika-pene Ateyai Leane Oko

14 Wuaneko, Goteto mana tika napene tupa minalane lamakalepe. Jia wete. Nanimato wuane nalape-pene.

15 Wamba Goteto Mosesa lamawuato, nambato wandakali mindi ondo wakale nembo tewando, okone ondo alawane. Nambato wandakali mindi moyokale nembo tewando, okone moyalawane leaipia.*

* 9:1-5: Ek 9:4; 32:32 * 9:6-9: Jen 18:14; 21:12; Ga 4:23

* 9:10-13: Jen 25:23; Mal 1:2-3 * 9:15: Ek 33:19

¹⁶ Goteto wandakali mindina piape epene tupu andoto, wandakali okone balana yame atekale lo ee na-lalane. Jia. Wandakali mindimane Gotena yame atokale nembo toto, Goteto bala lapia laka lo nembo teyakola, Goteto wandakali okone balana yame atekale lo ee na-lalane teke. Goteto wandakali mindi mee ondowa moyoto, balana yame atekale lo ee lalane. *

¹⁷ Tene okonena, Gotena pii pepa pelene eya mindimane leya pua, wamba Goteto Isipi tane kinji Peto pii mindi lamawuato, wandakali-mane nambana gene andane oko yuu eya tupu pitakana lo tawe yakale. Nambana tai-lene andane oko andawa loyale, nambato nimba kinji ata lewakola, nimba atele leaipia.

¹⁸ Goteto wuane leane okonena, nanimato andeyama-kola, balato wandakali mindi ondowa moyokale nembo teando, balato okone ondowa moyalane. Dee, Goteto wandakali mindi bala mee tuu pua atekale nembo teando, balato wandakali okone mee tuu pua atekale lo ataya alane.

¹⁹ Goteto wuane piyane okonena, nimbato namba tipa puato, Goteto wandakali mindi bala mee tuu pua atekale lo ataya ola-kola, wandakali okone bala mee tuu pua atendo, balato mee Gotena nembotene oko wato minuto, tuu pua atola-kola pulupeya. Mindimane Gotena nembo-tene wato minuto, wuane peando, anu peakale Goteto wandakali okonemane mana koo mindi miniya lalaepo lolopele.

²⁰ Nimbato wuane leendo, nambato nimba tipa puato, amene, nimba akali apito Gote yataka amauwato, balato mana koo mindi miniya lelepe lokale. Sisopene yuu-mane waa-pene mindimane bala waa peane akali oko tipa puato, anu peakale nimbato namba waa-pene eyo pua waa pepee lolopeyape. *

²¹ Sisopene waa piyane akali mindimane yuu momonga piyene mindiki mo tale puato, balato katulo sisopene lapo waa pulupeya. Balato piape epene wete mindi pukale nembo toto, sisopene epene wete mindi waa piyu, piape mee mindi pukale nembo toto, sisopene mee mindi waa peando, okone balana piape jiape. *

²²⁻²³ Wuane pua teke, wandakali-mane balana tii-pene oko ando mialapale nembo toto, Goteto utupane waa peane tekeko, wandakali minditupa-mane balana pii tanga loto, sisopene minu koyape-pene guleainipia. Wandakali utupane koo gulo atekale-kola, balato utupane towa yataka yaepia. Wandakali pitaka-mane balana

yataka ene okone andeakale nembo toto, balana tai-lene andawa loyale, balato utupane minu koyawakale nembo teapipa. Okone enene tekeko, wandakali pitaka-mane balana tai-lene andane wete oko andeakale nembo toto, balato wandakali utupane ondowa moyoto, wamba ini minu koya napene, mee maliyo ateaipia.

²⁴⁻²⁶ Goteto wua leane loto, wamba potopisa akali Oseato pii mindi pepa peyoto, wamba wandakali minditupa nambana yame ata napeai-kola, nambato utupane yamapano yo ata napewa tekeko, matili nambato utupane nambana yamapano yene yame ateyai lolopeyawa leaipia. Dee, balato pii waka mindi pepa peyoto, wamba nambato yuu waka mindina tane wandakali tupa lamawuato, yakama nambana yame ata napeyai lewa tekeko, matili wandakali minditupamanne loto, wandakali utupane Gote saka atapowa atene okona andopane yame ateyai lolopeyai leaipia. Gotena pii okonemane leya pua, matili Goteto Juta yame wandakali tupa angu balana yame epene wete atekale lo ee lo mia napeaipia. Jia. Balato wandakali yame waka tupapi balana yame epene wete atekale lo ee lo meane tekepia. *

²⁷⁻²⁹ Wuane tekeko, wamba potopisa akali Aisayato pii mindi leane oko loto, Akali Andane tai-lene wetete okomane nanimana mandiyene minditupa atekale lo ando konda napea-yale, Sotomo, Gomota-la, tano okone-lapona wandakali tupa pitaka oma yiake leaini pua teke, nanimapi oma yiake lema-yale leaipia. Wuane nembo toto, Aisayato Isatale tane wandakali tupa andayo, Akali Andane okomane yuu okona wandakali tupa wamba kapoyale kosimi loto, yole koo mindi utupane malupeya leaipia. Balato yole koo okone wandakali utupanenga maulangi, Isatale tane wandakali kambua wete ipa solewata mau eya oko tuma atolopeyai tekeko, Akali Andane okomane wandakali utupanena ajalapo minditupa angu molopeke lolopeya leaipia. *

³⁰⁻³¹ Wuane pulupeya nembo toto, nanimato aki lamakalepe. Wandakali yame waka tupamane wandakali tika-pene atamakale nembo nateaini tekeko, utupane-mane Jisasa lo bilipi leai-kola, Goteto utupane wandakali tika-pene ateyai leaipia. Isatale tane tupamane wandakali tika-pene atamakale nembo toto, Mosesana loo tupa wato minuyale, piape ayiawa pua atenai tekeko, Goteto utupane wandakali tika-pene ateyai naleaipia.

* 9:16: Ep 2:8-10 * 9:17: Ek 9:16 * 9:20: Ais 29:16; 45:9 * 9:21: Jet 18:6 * 9:24-26: Ose 1:10; 2:23 * 9:27-29:

32-33 Anu peakale Goteto Isatale tane wandakali utupane tika-pene ateyai na-leapiapia. Goteto wua leya loto, akali mindimane balana pii okone pepa peyoto, ale alapape leaipia. Nambato ana mindi Sayone tano okona ate leyo. Wandakali utupanena kene ana okonena peyo tau leya-kola, utupane aiya peyalaini tekeko, ana okone lo bilipi lolaini wandakali tupa yala na-olopeyai leaipia. Gotena pii wuanne lo pepa pelene eya pua, Isatale tane tupamane wandakali tika-pene atamakale nembo toto, Jisasa lo bilipi naleainipia. Jia. Yakama tane Mosesana loo tupa wato minuyale, piape ayiawa pua atoloma-kola, Goteto nanima wandakali tika-pene ateyai lolopeya nembo teaini okomane utupane yakamana kene ana okonena peyo tau loto, aiya peyalaini.*

10

1-4 Amene imalini yame, Kataisato Gotena loo tupa pitaka kuai lo wete wato mina yiake leane okonena, Goteto Kataisa lo bilipi lene wandakali tupa pitaka tika-pene ateyai lalane. Tene okonena, andipa Gotena loo tupamane katulo Kataisa lo bilipi lene wandakali utupane yuu koo okona pulupa nalolo-peya. Wuane tekeko, Goteto Kataisa lo bilipi lene wandakali tupa pitaka tika-pene ateyai lalane nembo natene ato, Isatale tane tupamane balana mana okonena pangosa ata na-piyaini. Jia. Yakama tanena tai-lene okomane Gotena loo tupa wato minulumka-kola, Goteto yakama wandakali tika-pene ateyai lolopeya nembo talaini. Wuane nembo toto, utupane-mane Gotena loo tupa kuai lo wato minu ataima lakae lo nembo talaini lo namba utupanena wisanisa atoto, yakama langeyo. Wuane tekeko, Goteto aki nembo toto, wandakali tupa tika-pene ateyai lalane lo utupane-mane nembo natalaini. Tene okonena, Goteto utupane molo-peke lapia lakae lo nembo toto, ole dindi lo nambato bala lo pote larawane.

5 Wandakali-mane Gotena wenonga tika-pene atamakale nembo toto, Gotena loo tupa wato minalaini mana oko lapana wato, wamba Mosesato pii mindi pepanga peyoto, wandakali mindimane Gotena loo tupa pitaka kuai lo wete wato mineando, bala saka atapowa atolopeya leaipia.*

6 Balato wuanne leane tekeko, wandakali mindimane Kataisa lo bilipi leando, Goteto bala tika-pene ateya lolopeya-ko. Apito ati kenga poto, Kataisa atu yuunga epolo-peyeye lo nimbato tipa napipe.*

7 Dee, apito Kataisa bala malinga ika laya oyale, yuu pangosa wandakali omene atalaini yuu okona polo-peyape lo nimbato tipa napipe. Jia.

8 Gotena pii pepa pelene eya mindimane loto, Gotena pii layene epene okone nimba-nembo-tene okola, ambulini okola, okone-laponga yoto, nimba mandaka eya lo pepa pelene eya.

9-10 Wandakali-mane Jisasa Kataisa lo bilipi leyai-kola, Goteto wandakali utupane tika-pene ateyai lalane. Dee, wandakali-mane Jisasa bala Akali Andane oko ateya lo lapana eyai-kola, Goteto utupane molo-peke lalane. Tene okonena, Goteto Jisasa malinga ika laya yane loto, nimbato Jisasa bala Akali Andane oko ateya lo lapana eendo, Goteto nimba molo-peke lolopeya.

11-12 Akali Andane okomane andeya-kola, Juta yamepi, Gitiki yamepi, wandakali yame pitaka mindiki okonepene teke ateyai lo andalane. Wandakali utupanena minditunga-mane bala ee lo tipa puato, nimbato nanima moyape lo pote leaindo, Akali Andane oko bala utupane pitakana Akali Andane oko atoto, wandakali yame utupane towa mana waka-waka wato mina napiyane. Jia. Balato mana mindiki angu wato minuto, utupane pitaka wayumane wete moyalan. Tene okona, Gotena pii pepa pelene eya mindimane loto, bala lo bilipi lolaini wandakali utupanena mindikipi mindi yala na-olopeyai layene eya.*

13 Dee, Gotena pii pepa pelene eya waka mindimane loto, wandakali-mane Akali Andane oko lo pote loto, nanima molo-peke lape lolai-kola, balato utupane pitaka molo-peke lolopeya layene eya.*

14-15 Gotena pii okomane wuanne leya tekeko, wandakali mindimane akali yangone mindi bala Gotena pii oko wandakali tupa lamalu peakale naleando, anu puato akali okone poto, Gotena pii oko wandakali tupa lamalu-peyape. Akali mindimane Gotena pii oko wandakali tupa lamai napeando, anu puato utupane-mane Gotena pii oko ale olo-peyaipe. Wandakali utupane-mane Gotena pii oko ale nayaindo, anu puato utupane-mane Akali Andane oko lo bilipi lolopeyaipe. Dee, wandakali utupane-mane bala lo bilipi naleaindo, anu puato utupane-mane pote loto, Akali Andane, nimbato nanima molo-peke lape lolopeyaipe. Wuane tekeko, akali minditunga-mane Gotena pii oko wandakali tupa lamalu palaini loto, balana pii pepa pelene eya mindimane loto, akali mindimane Gotena pii layene

* 9:32-33: Ais 8:14; 28:16; 1Pi 2:6 * 10:5: Pit 18:5 * 10:6: Lo 30:12-14 * 10:11-12: Ais 28:16; Ap 15:9 * 10:13: Jol 2:32 * 10:14-15: Ais 52:7

epene oko wandakali tupa lamalu epeyakola, utupane-mane bala andoto, epele wete alaini layene eya.*

16-17 Akali mindimane Kataisato wua peane lo wandakali tupa lamaiya-kola, wandakali tupamane balana pii okone ale wato, Kataisa lo bilipi lalaini. Wuane tekeko, wamba potopisa akali Aisayato pii mindi leane oko loto, Akali Andane, nanimato nimbana pii oko wandakali tupa lamaema-kola, apito pii okone ale wato, bilipi leape leaipia. Aisayato wuane leane okone ale wato, nanimato nembo teyama-kola, Isatale tane wandakali minditupamane Gotena pii layene epene okone ale wato teke, Kataisa lo bilipi naleaini nembo teyama.*

18 Utupane-mane Kataisa lo bilipi naleaini nembo teyama tekeko, Gotena pii layene epene okone ale nayaini mambele, utupane-mane bilipi naleaipe lo nambato tipa napeyo. Jia. Gotena pii pepa pelene eya mindimane loto, akali minditupamane Gotena pii lo tawe yai-kola, wandakali palu peyai tupa pitaka-mane pii okone ale ayiake leaini layene eya. Pii okonemane wuane leya okonena, wandakali utupane pitakamane Gotena pii layene epene okone ale ayiake loto teke, Kataisa lo bilipi naleaini nembo teyama.*

19 Dee, nambato pii waka mindi tipa puato, wua leyo: Isatale tane tupamane Gotena pii layene epene okona tene oko nembo nateaini mambele, utupane-mane Kataisa lo bilipi naleaipe. Jia. Wamba bulupane Mosesato pii Goteto Isatale tane wandakali tupa lamaiyane oko pepa peyoto, wandakali yame waka tupamane nambana mana anda napene atoto, gene nayene ateyai. Nambato utupane molo-peke lolowa-kola, Isatale tane tupamane utupane towa apiangu puato, nambato yakama molo-peke lapia lakae lo nembo tolopeyai leaipia.*

20 Dee, potopisa akali Aisayato yuku naene atoto, pii mindi Goteto leane oko pepa peyoto, wandakali minditupamane namba apipe lo wandakali waka tupa tipa napeaini. Utupane-mane wuane lo tipa napeaini tekeko, utupane-mane namba ando meakale lo namba tane utupanenga mo pana ewa-kola, wandakali namba aiya napeaini utupane-mane namba ando meai leaipia.*

21 Aisayato wandakali utupane andayo wuane leane tekeko, balato pii mindi Goteto Isatale tane wandakali tupa andayo leane

oko pepa peyoto, ole dindi lo utulu oton-gapi, nambato Isatale tane tupa molo-peke lokale nembo toto, kii pundi pua moto, maliyo atewane tekeko, utupane yakama tuu pua atoto, nambana pii tanga lo ateaini leaipia.*

11

Goteto Isatale Wandakali Minditupa Ondowa Moyane Oko

¹ Wuaneko, Goteto balana Isatale tane wandakali tupa masia maeyape. Jia wete. Anu peakale nambato jia leyope. Namba Apatakame okona yumbane Benjamene yamenya mandiyene atoto, Isatale tane akali mindi ateyo-kola, Goteto namba masia gii nape.*

²⁻⁴ Wamba potopisa akali Ilainjato Isatale tane wandakali tupa kosimi loto, Gote lo pote loto, Akali Andane, Isatale tane wandakali tupamane nimbana alata toko tupa keao lo apoto, nimbana potopisa akali tupa peyo ome leyai-kola, namba angu saka ateyo. Andipa utupane-mane namba peyo ome lamakale nembo teyai okonde leaipia. Wuane lea-kola, Goteto balana pii okone yano peyoto, akali (7,000) tausene yanasa nambana yame atekale lewane tupamane owato gote Bele lotu loyal, aiki leka nayai leaipia. Ilainjana pii temane okone pepa pelene eya oko yakamato nembo nateyaipe. Nanimato pii temane okone nembo teyama-kola, Goteto wandakali balana yame atekale leane tupa masia mai napeane ya lo andeyama.*

⁵ Wamba Goteto wandakali anjalapo minditupa ondowa moyoto, balana yame atekale leane pua teke, andipa oko angipi, Goteto wandakali anjalapo minditupa ondowa moyoto, balana yame atekale lata eya-kola, utupare balana yame ateyai.

⁶ Goteto utupanera piape epene tupa andoto, utupane balana yame atekale lapia-yale, balato utupane mee ondowa moyoto, ate leane lo nanimato katulo nalaima-yale. Wuane tekeko, wandakali utupane-mane piape epene mindi napeai-kola, Goteto utupane mee ondowa moyoto, balana wankakali atekale lata yane-ko.*

⁷⁻¹⁰ Nanimato aki lamakalepe. Wamba Dapitito pii mindi leane oko loto, umbene nuu mindimane pisa mindi meando, pisa okone omalane leaipia. Koa mindi nongonga liando, koa okone omalane. Dee, wandakali mindi balana kee ananga tau leando, bala aiya peyalane. Wuane pua teke, namba yanda pingiyaini wandakali tupamane tomo andane mindi noyale

* **10:16-17:** Ais 53:1 * **10:18:** Sam 19:4 * **10:19:** Lo 32:21 * **10:20:** Ais 65:1 * **10:21:** Ais 65:2 * **11:1:**

1Sa 12:22; Sam 94:14; Pl 3:5 * **11:2-4:** 2Ki 19:10,14; 1Ki 19:18 * **11:6:** Ga 3:15-18

amunguli pua pitulai-angi, minditaka mindimane utupane minu koyoto, utupanena yole koo guleakale nembo teyo. Utupane-mane minditaka mindi anda napeakale loto, nimbato utupanena lene tupa minu undupi laya ape. Ole dindi lo wandakali utupane masia lekawa atekale loto, nimbato kenda-pene andane minditupa utupanenga yatape. Wamba Dapitito wuane leaipia. Dee, Gotena pii pepa pelene eya waka mindimane loto, Goteto wandakali utupanena lene tupa minu undupi laya alu, utupanena alene tupa minu tuma piya alu, utupanena nembo-tene tupa minu limu paliya alu, peane pua teke, andipapi wandakali utupane mee wuane pitane teke ateyai layene eya. Gotena pii okone pepa pelene eya pua, Isatale tane wandakali kambua yakamato wandakali epene tika-pene atamakale nembo toto, Gotena mana epene tupa wato mina-makale lo makande peaini tekeko, Gotena wenonga wandakali utupane tika-pene ata napeainipia. Goteto balana yame atekale lata yane Isatale tane wandakali tupa angu balana wenonga epene tika-pene ateainipia. Isatale tane wandakali waka tupa yakamana nembo-tene oko ana yale gulene ateainipia. *

Yakama Tanena Gene Laiyu Lolaini Leane Oko

¹¹ Wuaneko, nambato yakama tipa puato, Isatale tane wandakali tupamane Gote masia maiyaini mana okomane yakama yunga peak-a-ene gulo atea-kola, utupanemanee mee wuane teke peakale lo Goteto ando konda yaepiape. Jia wete. Wamba Isatale tane wandakali tupamane mana koo mindi minuto, Gote masia maiyu, yuunga peak-e-ene gulo atea-kola, Goteto wua lo nembo teaipia: Nambato wandakali yame waka tupa molo-peke lolowa-kola, Isatale tane tupamane utupane towa apiangu pua atoto, nambato Isatale tane molo-peke lapia lakae lo nembo tolopeyai lo nembo teaipia. *

¹² Isatale tane wandakali tupamane mana koo mindi minuto, Gote masia maiyaini mambele, balato yuu pitakana wandakali yame waka tupa wayumane moyoto, molo-peke leaipia. Tene okonena, Isatale tane wandakali balana yame atekale lo lata yane tupa pitakana-mane Kataisa lo bilipi lolai-angi, mana okonemane yuu pitakana wandakali tupa wayumane wete moyolo-peya.

¹³⁻¹⁵ Goteto Isatale tane wandakali tupa masia mayane mambele, yuu pitakana wandakali yame waka tupa balana yame

gulaya yaepia. Okone epene tekeko, wamba balato Isatale tane wandakali tupa masia maya-angi, balato andea-kola, utupane omene gulo ateainipia. Tene okonena, balato Isatale tane wandakali balana yame atekale lata yane tupa molo-peke lola-angi, utupane malinga ika lene gulo atolai-kola pulupeya. Okone epene wete yolopeya. Tene okonena, nambato yame waka wandakali yakama pii mindi langeyo. Wamba Goteto namba languato, nimba wandakali yame waka tupana aposolo akali atoto, Gotena pii oko utupane lamauwa atape leane. Wuane lea-kola, nambato piape okone epene wete eya nembo toto, taimane pua atalawane. Nambato piape okone pua atolowa-kola, Goteto yame waka wandakali yakamana minditupa molo-peke lolopeya. Molo-peke lola-kola, Isatale tane wandakali tupamane Gotena mana okone andoto, balato utupane molo-peke lapia lakae lo nembo tolopeyai. Wuane nembo tolai-kola, Goteto Isatale tane minditupa tako pua molo-peke lolopeya nembo toto, nambato wandakali yame waka yakamana tombenenga Gotena piape oko epelewa pua ateyo.

¹⁶ Mindimane betesa kambua waa piyu, mindiki wamba ini Gote lo opa maiyando, betesa utupane pitaka Gotena gulaya olakola pulupeya. Dee, ita mindina pini tupa Gotena yando, ita okonena kembone tupa pitaka balana teke yolopeya.

¹⁷ Isatale tane wandakali tupa Gotena eenga ita olipi yandatane mindi gulo atea-kola, balato ita okonena kembone minditupa yando apea. Yame waka wandakali yakama ita olipi tapulusa atene tupa gulo atea-kola, balato yakamana kembone minditupa yando moto, ita olipi balana eenga yandatane atene okona kimbu pua ate lea. Balato yakama ate lea-kola, andipa yame waka wandakali yakama Gotena ita olipi yandatane atene okona kembone tupa gulo atoto, ita okonena ipane epene oko no ateyai. *

¹⁸ Ita olipi kembone wamba tapulusa atene wandakali yakama Gotena ita olipi yandatane okona kembone wenene tupa gulo ateyai. Kembone ateyai tupa yakamato ita okonena pini tupa ipane mai na-piyaini. Jia. Ita okonena pini tupamane ita kembone yakamanga ipane giyanie. Wuane nembo toto, yakamato ita okonena kembone wambane tupa sia mineyama loto, yakama tanena gene tupa laiyu nalalapape. Jia.

¹⁹ Nambato wuane leyo-kola, yame waka wandakali yakamana mindimane loto, ita

olipi wamba tapulusa atene tupana kembone nanima balana eenga ita olipi yandatane atene okona kembone wambane tupana kimbu peakale loto, Goteto kembone wambane tupa yando apeane lolopeya.

²⁰⁻²¹ Enene, Isatale tane wandakali minditupa-mane Jisasa lo bilipi naleaini okonena, balato utupane yando apea. Yame waka wandakali yakamato Jisasa lo bilipi lo ateyai okonena, yakama balana ita olipi yandatane atene okona kembone tupa atoto, kuai lo ateyai. Wuane tekeko, wamba Isatale tane wandakali minditupa Gotena ita olipi yandatane okona kembone enene tupa atoto teke, utupane-mane Jisasa lo bilipi naleaini okonena, Goteto utupane ateakale lo ando konda naene, yando apeaipia. Wuane tekeko, yame waka wandakali yakama Jisasa lo bilipi nalene konda yaindo, Goteto yakamapi balana ita olipi yandatane okona kembone tupa atalapale lo ando konda napulu-peyako. Yakama tanena gene tupa laiyu nalene, Gote ando yukuwa atalapape.

²² Goteto yakama ondowa moyo ateakale nemboto toto, yakamato Jisasa lo bilipi leaindo, Goteto yakama ondo wato, moyo atolopeya. Wuane tekeko, yakamato Jisasa lo bilipi nalene, konda yaindo, Goteto yakama towa yataka wato, kenda-pene mindi yakama guato, yando apolopeya. Wamba Isatale tane tupamane Jisasa lo bilipi nalene, aiya pelene gulo ateai-kola, Goteto utupane towa yataka wato, kenda-pene andane wete mindi utupane maiyakola, utupane kembone yando apene gulo ateaini-ko. Goteto wandakali ondo wato moyalane mana okola, wandakali towa yataka wato kenda-pene maiyane mana okola, mana okonelapo yakamato wayumane nemboto atalapape. *

²³⁻²⁴ Ita olipi tapulusa atene tupana kembone tupa ita olipi eenga yandatane tupana kembone ata na-piyaini. Wuane tekeko, Goteto ita olipi tapulusa atene tupana kembone gulene yame waka wandakali yakama yando moto, balana olipi ita yandatane atene okona ate lea. Wuane tekeko, balato olipi ita yandatane atene okona kembone wamba yando apeane utupane molo-peke loto, ita yandatane atene okonena katulo mo ate lolo-peke lolopeya teke. Tene okonena, matili Isatale tane wandakali minditupa Jisasa lo bilipi leaindo, Goteto utupane molo-peke loto, balana olipi ita yandatane okonena ate lolo-peke lolopeya.

Goteto Wandakali Pitaka Ondowa Moyokale Leane Oko

²⁵ Amene imalini yame, yakama tane wai ene ateyama nembo tolaini lo, nambato Gotena pii wamba too pitane yane mindi yakama langeyo. Wamba Isatale tane wandakali minditupana nembo-tene ana gulene atama pulu, Goteto wandakali yame waka oko-tuma balana wandakali guleakale lata yane tupa pitaka balana yame okona mo tako pula oto okona giau lolopeyai leyo.

²⁶⁻²⁷ Oto okone epola-angi, Isatale tane wandakali tupamane andolai-kola, wandakali yame waka kambua Gotena yame ateyai lo andolopeyai. Andoto, yakama tane Gotena yame ataima lakae lo nembo tolai-kola, Goteto Isatale tane enene tupa pitaka molo-peke lolopeya. Matili Goteto utupane molo-peke lolopeya loto, Gotena pii pepa pelene eya mindimane loto, nambato pii mindi lo yata wato, utupanena mana koo tupa apia-mauwakale leyo layene eya. Dee, Gotena pii pepa pelene eya waka mindimane loto, Jekopona mandiyene yame Isatale tane wandakali tupamane Gote masia mawuato, mana koo tupa minu atolai-kola, utupane molo-peke lolane akali oko Sayone tano okona ato epoto, utupanena mana koo tupa apia-malupeya layene eya. *

²⁸⁻³² Wamba Goteto wandakali pitaka ondowa moyokale nemboto toto, utupane pitaka-mane balana pii tanga loto, andi latane gulo ateakale lo balato ando konda yaepia. Goteto wuane pea-kola, wamba yame waka wandakali yakamato balana pii tanga lo ateainipia. Wuane tekeko, andipa Isatale tane wandakali tupamane Gotena pii tanga lo ateyai-kola, Goteto yame waka wandakali yakama ondo wato moyo ateya. Wuane pua teke, Goteto Isatale tane wandakali tupa ondowa moyokale nemboto toto, balana pii tanga leakale lo ando konda ya-kola, utupane-mane balana pii tanga leanipia. Tanga leai-kola, balato yame waka wandakali yakama ondo wato moyo ateya. Tene okonena, Isatale tane wandakali tupamane Gotena mana epene okone andoto, Goteto Isatale tane wandakali tupapi ondo wato moyakale nemboto lolopeyai. Goteto yame waka wandakali yakama ondowa moyokale nemboto toto, Isatale tane wandakali tupamane balana pii layene epene oko bilipi naleakale lo balato ando konda ya-kola, utupane-mane bala towa yanda-pene gulo ateyai. Wuane tekeko, Goteto wandakali mindi balana yame ateakale lo ee lo moto, balana minditaka epene tupa wandakali okone maiyando, matili Goteto balana nembotene oko lawa puato, wandakali okone

* 11:22: Jo 15:2,4-6 * 11:26-27: Ais 59:20-21; Jet 31:33-34

balana yame ata napeakale na-lalane. Tene okonena, Isatale tane wandakali tupana yumbane tupa balana yame ateakale lata yane mambele, andipapi balato Isatale tane wandakali tupa towa mee yamapane yo ateya.

Nanimato Gotena Gene Laiyu Lo Atamakale Leane Oko

³³⁻³⁴ Gotena pii pepa pelene eya mindimane loto, apito Akali Andane okona nembo-tene oko anda yiake lalaepo. Apito Akali Andane oko mana lamawuato, nimbato wua pipe lalaepo layene eya. Mindimane katulo wuanekyo napiyane. Ipa solewata angini oko nenanga wete ato pitima keyoto andane wetete eya wuanekyo teke, Gotena manapi, nembo-teneipi, okonelapo andane wetete waka. Tene okonena, Goteto aki nembo toto, mangene mindi peape lo nanimato katulo aiya pua anda na-piyamane. Jia.*

³⁵ Gotena pii pepa pelene eya waka mindimane loto, apito minditaka mindi wamba ini Gote maeya-kola, matil Goteto balana yano okone peyoto, minditaka paini maipe-penepe layene eya. Mindimane minditaka mindi wamba ini Gote mai nape. Jia.*

³⁶ Minditaka eya tupa pitaka-mane balana gene oko laiyu leakale nembo toto, Goteto utupane pitaka yakale leaipia. Bala utupane pitakana tene wetete oko ateyakola, minditaka eya utupane pitaka balana angu eya-ko. Andipapi, matilipi, ole dindi lo nanimato balana gene oko laiyu lo atamakale. Enene.*

12

Yakama Tane Gote Lo Opa Maiyapape Leane Oko

¹ Amene imalini yame, Goteto nanima ondo wato, wayumane wete moyalane-ko. Yakama mindiki-mindiki lo saka atoto, yakama tane Gote lo opa maitawa atalapape lo nambato yakama langeyo nayu leyo. Yakamato balana wandakali epene wete tupa atoto, mana balato epele alane tupa wato minu atalapape. Yakamato wuanekyo pua ateaindo, yakamato Gote lo lotu tika pua lo atolai-kola pulupeya.

² Yakamato wandakali waka tupana mana koo tupa wato mina na-piyapape. Jia. Goteto mana anu-pene tupa epele wete wato, utupane epene tika-pene wete lalaepo lo yakamato andamakale nembo toto, Goteto yakamana nembo-tene tupa mo wenene gulaya yakale atalapape.

³⁻⁵ Anu peakale nambato wuanekyo. Wamba Goteto namba ondowa moyoto,

namba balana aposolo akali atoto, piape oko pula lo namba tepe leane. Tene okonena, nambato yakama wandakali mindiki-mindiki lo pitaka pii minditupa languato, wua leyo: Nanimana umbaini mindiki okona kinipi, kenepi, lenepi, alenepi, okonetaka kambua tupapi, utupane pitaka-mane piape waka-waka piyaini. Wuane pua teke, Kataisa lo bilipi lalamane wandakali nanima kambua ateyama tekeko, nanima pitaka Kataisana yame mindiki ateyama. Wuaneko, nanima pitaka yame mindiki angu atoto, nanima mindiki-mindiki lo Kataisa lo bilipi lene wandakali waka tupa pitakana yangone ateyamako. Yakama mindiki-mindiki lo wandakali yangone tupa sia minu, lipinga yale ateyo nembo na-talapape. Jia. Wuane nembo natene, Goteto yakama mindiki-mindiki lo bilipi guyane pua teke, kuai lo nembo toto, nimba tane katulo wua pulupeyo nembo tape.

⁶ Wamba Goteto nanima ondowa moyoto, balana piape waka-waka pulane mana mindipene-mindipene tupa tale puato, mana minditupa nanima mindiki-mindiki lo mee geane nembo toto, nanimato balana piape utupane pua atape-pene. Mindimane Gotena pii oko wandakali tupa lamaauwa ateakale nembo toto, Goteto balana piape pulane mana tupa wandakali okone maiyae yando, wandakali okonemane bilipi lola pua Gotena pii oko wandakali tupa lamaauwa atape-pene.

⁷ Mindimane balana yangone tupa moyakale nembo toto, Goteto balana piape pulane okonena mana tupa wandakali okone maiyae yando, wandakali okonemane balana yangone tupa moyo atape-pene. Mindimane tisa piape pua ateakale nembo toto, Goteto balana piape okone pulane mana tupa wandakali okone maiyae yando, wandakali okonemane tisa piape pua atape-pene.

⁸ Mindimane wandakali tupana nembo-tene tupa mina ika loto, utupane minu tai layawa ateakale nembo toto, Goteto balana piape okone pulane mana tupa akali okone maiyae yando, wandakali okone-mane piape okone pua atape-pene. Mindimane wandakali yangone minditaka jia yo atalaini tupa moyo minditaka mayakale nembo toto, Gote balana piape okone pulane mana tupa wandakali mindi maiyae yando, wandakali okonemane minditaka kambua wandakali utupane mauwa atape-pene. Mindimane balana wandakali yangone tupa bosa lo ando ateakale nembo toto, Goteto balana piape oko pulane mana wandakali mindi maiyane yando, wan-

dakali okonemane balana wandakali yangone tupu kuai lo ando atape-pene. Dee, mindimane wandakali yangone tupu ondowa moyakale nembo toto, Goteto balana piape okone pulane mana tupu wandakali okone maiyae yando, wandakali okone-mane epele wato, yangone utupane ondowa moyape-pene.

*Mindi Akali Moyaka Pua Atalapape
Leane Oko*

⁹ Yakamato mana koo tupu masia mawuato, mana epene tupu duli lo wato minu atoto, wandakali yangone tupu mee owato epele naene, wayumane wete epelewa yamapane yo atalapape.

¹⁰ Yakama tanena amene imalini enene tupu wayumane epelewa yamapane yo atlalaini pua teke, yakamana Kitisene amene imalini tupu wayumane epelewa yamapane yo atoto, mindina gene oko laiyu laka pua atalapape.

¹¹ Yakama kepa wato, mee ata na-piyapape. Jia. Yakamato akali Andane okona piape wayumane wete epele wato, taimane pimawua atalapape.

¹² Kenda-pene mindi yakamanga epolangi, Goteto yakama moyakale lo maliyo atoto, yakamato kepa nalapape. Ole dindi lo Gote pote loto, balato yakama katulo moyolo-peya nembo toto, epelewa atalapape.

¹³ Gotena wandakali tupu minditaka jia yo ateaindo, yakamato utupane moyalapape. Wandakali mindi yuu waka mindinga atalu, yakama atolainga epeando, yakamato bala moyo yatawa paliyapape.

¹⁴ Wandakali minditupa-mane kendapene andane tupu yakama giki peaindo, yakamato pote loto, Gote, nimbato utupane minu koyakale lo pote na-lalapape. Jia. Balato utupane moyakale lo pote loto, wandakali utupanena koo tene tupu apiape lalapape.

¹⁵ Epelewa atolai wandakali tupu towa yakamapi epelewa atalapape. Ai lolai wandakali tupu towa yakamapi ai lalapape.

¹⁶ Dee, yakama tane mana andene ateyama nembo na-talapape. Jia. Yakama tane gene yene ateyama nembo natene, wandakali gene nayene tupu towa atu atalapape. Wuane pua atoto, yakamato Kitisene waka tupu pitaka towa kuai lo potomane lo atalapape.

¹⁷⁻¹⁸ Yakamato wandakali waka tupu towa pii yanda napene, utupane pitaka towa tambo lo atolane asini mindi yando, yakamato asini okone wato minuto, utupane pitakana wenonga mana epene tupu angu wato minu atalapape. Mindimane

yakamanga mana koo mindi mineando, yakamato paini balanga mana koo mindi mina na-piyapape.

¹⁹ Nambana yamapane yene amene imalini yame, Gotena pii pepa pelene eya mindimane loto, Akali Andane okomane pii mindi loto, yole koo maulane piape okone nambana. Mindimane mana koo mindi nimbanga mineando, nambato balana mana koo okona paini yole koo mindi malupewaya leaipia layene eya-ko. Wandakali mindimane yakamanga mana koo mindi mineando, yakamato paini balanga mana koo mindi mina na-piyape. Jia. Goteto bala towa yataka wato, balana mana koo okonena paini yole koo mindi maiyakale lo ando kondalapape.

²⁰⁻²¹ Kondalu, yakamato paini mana koo mindi wandakali okonenga mina napene, balanga mana epene tupu minalapape. Wuane piyu, wandakali waka okonena mana koo minalane tupamane yakama sia miniakale lo ando konda naene, yakamato mana epene minulaini utupane-mane wandakali okonena mana koo utupane sia minalapape. Yakamato sia minalapale loto, Gotena pii pepa pelene eya mindimane wua leya: Nimba towa yanda-pene wandakali mindi ulia nono yando, ulia neakale maipe layene eya. Bala ipa nono yando, ipa neakale maipe. Nimbatu wuane peendo, bala yala wete wato, mana koo minalane tupu kondolo-peya layene eya.

13

*Nanima Gapomane Pangosa Atape-pene
Leane Oko*

¹⁻² Gapomane mindikipi mindi bala tane mee ika lo ata napiyane. Jia. Goteto gapomane ateyai tupu pitaka atekale lea-kola, ateyai. Tene okonena, mindimane gapomane okona pangosa ata napukale leando, balato Gotena pangosa ata napukale lola-kola pulupeya. Wuane pulai wandakali tupamane yakamana mana koo okonena yole koo oko molo-peyaiko. Wandakali pitakamane gapomane tupana pangosa atape-pene. *

³⁻⁴ Anu peakale nambato wuane leyope. Gapomane oko bala Gotena piape akali atoto, nimba kuai lo atola loto, piape pua atalane. Gapomane okomane wandakali mana epene minulaini tupu yuku yakale lo piape na-piyaini. Jia. Koo piyaini wandakali tupu yuku yakale lo piape piyaneko. Nimbatu gapomane oko ando yuku nawakale nembo teendo, mana epene tupu angu wato minu atape. Wuane peendo, gapomane okomane nimbana gene oko laiyu lolopeya tekeko, nimbato mana koo

* 13:1-2: Tai 3:1-2; Man 8:15

tupa minu atalene yando, yukuwa atape. Gapomane okomane kandepa luu oko mee awua ata napiyane. Jia. Gapomane oko bala Gotena piape akali atoto, koo pulaini wandakali tupanga yole koo mindi mauwakale nembo toto, kandepa luu oko auwa atalane-ko.*

⁵ Gapomane okomane yataka wato, yole koo mindi yakama gulane lo yuku wato, yakama utupanena pangosa atape-pene. Dee, gapomane pangosa atolane mana okone epene nembo toto, yakamato gapomane okona pangosa atape-pene.

⁶ Gapomane oko Gotena piape akali atoto, ole dindi lo piape pua atalane. Tene okonena, gapomane okomane piape okone pua atekale nembo toto, yakamato gapomane takisa maiyaini.*

⁷ Yakamato minditaka gapomane piape akali tupa maipe-pene tupa maiyapape. Yakamato takisa mindipene-mindipene tupa takisa muni mialaini akali tupa maiyapape. Dee, gapomane piape akali mindimane pii mindi lola-angi, yakamato balana pii wayumane ale amauwato, balana gene oko laiyu lalapape.

Yangone Tupa Epelewa Yamapane Yo Atalapape Leane Oko

⁸⁻¹⁰ Mindimane wandakali yangone mindi epelewa yamapane yo ateando, balato wandakali okonenga mana koo tupa mina napiyane. Jia. Wuane, wandakali yangone epelewa yamapane yo atalane wandakali okonemane Gotena loo tupa wato minu atalane. Gotena loo mindimane loto, nimbato wandakali mindi peyo ome na-lalapape leya. Mindimane loto, nimbato pake namiupe. Nimbato wandakali mindina minditaka eya tupa miauwa lakae lo nembo natape. Nimbato pamuku napipe leya. Gotena loo andane wete mindiki okomane loo utupanepi, balana loo waka tupapi, utupane pitaka mina mindiki loto, nimbato nimba tane epelewa yamapane yo atalene pua teke, wandakali yangone tupa epelewa yamapane yo atape leya. Wandakali mindimane wuane pua ateando, balato Gotena loo tupa pitaka wato minu atola-kola pulupeyako. Yakamato wandakali yangone tupa epelewa yamapane yo atolane mana oko angu yakamanga yano gulo yapowa eya nembo talapape. Wuane nembo toto, yakamato wandakali yangone mindina yano waka mindi yakamanga yapowa yakale lo ando konda na-piyapape.*

Jisasa Kataisa Minatawa Atalapape Leane Oko

¹¹⁻¹² Anu peakale nambato yakama languato, mana utupane wato minu atalapape leyope. Wamba bulupane tewa nanimato Kataisa lo bilipi lema-angi, Goteto nanima lamolo-peke lolopeya oto oko amonga wete yane tekeko, andipa oto okone mandaka guleya. Yuu undupi latane atapia oko koyo pima-pima peya-kola, yuu waa loyale peyako. Yakama mee limu palu atapowa ata napepe-pene. Jia. Andipa yakama ika lape-pene nembo teyai-ko. Nanimato undupilene okona mana koo tupa auwa tepa alu, Akali Andane tii-pene atalane okona mana epene tupa nanimana sia umbi guleakale nemboto, mana epene utupane wato minu atamatakale.*

¹³ Nanimato bia ipa tai no sapake lo kewa ata napimakale. Nanimato mana koo kalato atene tupa wato minuto, pamuku napimakale teke. Dee, nanimato wandakali yangone tupa towa apiangu puato, utupane towa pii yanda pua ata napimakale. Jia. Nai teya-kola, wandakali tupa epoko pua atalaini pua teke, nanimato asini tika-pene oko wato minu atamatakale.*

¹⁴ Yakamato mana koo mindi minauwa lakae lo nembo tolai-angi, wua puato, mana koo okone wato mina-makale nembo natapape. Jia. Wuane nembo natene, Akali Andane Jisasa Kataisa oko bala yakamana sia umbi guleakale nembo toto, yakamato bala minatawa atalapape.*

14

Wandakali Yangone Tupa Yapa Lo Tale Na-piyapape Leane Oko

¹⁻⁴ Wandakali minditupa-mane tomo yame tupa pitaka nape-pene lo bilipilalaini. Wuane tekeko, wandakali minditupana bilipi oko tai nalene eya-kola, minjuni nanalaini. Tomo yame pitaka nape-pene lo bilipi lene wandakali yakamato minjuni naa na-piyaini wandakali utupane anda napi loto, utupane Kitisene enene nanima yale ata napeyai nembo na-talapape. Jia. Yakamato utupane Kitisene enene ateyai loto, yakamana sosa okona mo konda piyapape. Mo konda piyu, yakamato wandakali utupanena bilipi oko mo lawa pimakale loto, utupane towa pii yanda pua ata na-piyapape. Dee, Goteto tomo yame tupa pitaka nape-pene lo bilipi lene piape wandakali tupapi balana yame atekale leane-ko. Wandakali utupane-mane mana epene tupa minu ateyai yandopi, mana koo minu ateyai yandopi, Akali Andane

* **13:3-4:** 1Pi 2:13-15 * **13:6:** Mt 22:21 * **13:8-10:** Mt 22:39-40; Jem 2:8; Ek 20:13-15,17; Lo 5:17-19,21; 1Ko 13:4-7

* **13:11-12:** Ep 5:11-14; 1Tes 5:5-7; 1Jo 2:8 * **13:13:** Lk 21:34-35; Ep 5:18 * **13:14:** Ep 5:11-14

okomane utupanena mana tupa yapa lo tale puato, wuane peyai lape-pene. Balato katulo utupane minu tai laya ola-kola, utupane-mane mana epene tupa tailo minu atolo-peyai. Minjuni naa na-piyaini wandakali yakama apito Akali Andane okona piape wandakali waka tupa yapa lo tale puato, utupane-mane mana koo mindi mineyai leyaipe. Yakamato wandakali utupane yapa lo tale puato, utupane-mane minjuni nalaini mana okone mana koo mindi miniyai na-lalapape. Jia. *

⁵⁻⁶ Tomo tupa pitaka nalaini wandakali tupamane Akali Andane okona gene oko laiyu loyale, tomo tupa pitaka noto, Gote wayu pele lalaini. Minjuni naa na-piyaini wandakali tupamane Akali Andane okona gene oko laiyu loyale, minjuni nanalaini. Utupane-mane, tomo waka tupa angu noto, Gote wayu pele lalaini. Wuane pua teke, wandakali minditupa-mane oto eya tupa pitaka mindiki okonepene teke-teke eya nembo talaini tekeko, wandakali minditupa-mane Akali Andane okona gene oko laiyu lamakale nembo toto, oto mindiki-mane oto waka tupa pitaka sia minalane nembo talaini-ko. Wandakali mindiki-mindiki lo okonetaka tupa kuai lo bilipi leyope lo wayumane nembo toto, balana bilipi okone wato minape-pene. *

⁷⁻⁹ Kataisa bala wandakali saka ateyai tupapi, omene tupapi, utupane pitakana Akali Andane oko atokale nembo toto, omalu, saka atolo-peke leapia. Wuaneko, Kitisene wandakali nanimana saka atemando, wandakali-mane nanimana gene tupa laiyu leakale nembo toto, nanimana saka ata na-piyamane. Jia. Utupane-mane Akali Andane okona gene oko laiyu leakale nembo toto, nanimana saka atalamane. Dee, nanimana omemandopi, wandakali-mane nanimana gene oko laiyu leakale nembo toto, nanimana oma na-piyamane. Jia. Utupane-mane Akali Andane okona gene oko laiyu leakale nembo toto, nanimana omalamane. Tere okonena, nanimana saka atemandopi, omemandopi, nanimana Akali Andane okona yame ateyama. *

¹⁰⁻¹² Gotena pii pepa pelene eya mindimane loto, namba saka atapowa atalawane Akali Andane okomane pii enene wete mindi loto, wandakali pitakamane nambana wenonga aiki leka wato, wua pema loto, lapana olopeyai leyo layene eya. Wuaneko, nanimana mindiki-mindiki lo nanimana mana tupa pitaka Gote lamawuato, tene okopene mindi yakkola, nambato wuane pewa lolopeyama

nembo teyama. Tene okonena, nanimana pitaka Gotena wenosa-tole atoloma-kola, balato nanimana yapa lo tale pulupeya nembo teyama-ko. Anu peakale yakama wandakali ateyai tupana minditupa-mane yakamana amene imalini tupa yapa lo tale puato, utupane-mane mana koo mindi miniyai lalainipe. Anu peakale yakama wandakali ateyai tupana minditupa-mane yakamana amene imalini tupa anda napi loto, utupane koo ya lalainipe. *

Mindimane Koo Peakale Lo Mo Piya Olaini Andalapape Leane Oko

¹³ Goteto nanimana pitaka yapa lo tale pulupeya nembo toto, matili nanimato mindi akali yapa lo tale piki pua ata napene, kondamakale. Kondalu, Kitisene yangone mindimane koo mindi peakale lo nanimato bala mo piya aa napimakale lo pii lo yake pimakale.

¹⁴ Enene, wamba Akali Andane Jisasa Kataisato namba mana languato, andipa Gotena wenonga tomo yame tupana mindikipi mindi kalato naeya lo namba langeane. Wuane tekeko, wandakali mindimane nembo toto, Goteto tomo mindi nolaini leane lo bilipi leando, wandakali okonemane tomo okone nanene kondape-pene. *

¹⁵ Nimbana Kitisene yangone mindimane tomo mindi Gotena wenonga kalato atene eya nemboto atola-kola teke, nimbato tomo okone neendo, nimbato wandakali yangone epelewa yamapane yo atalamane mana oko awua tepa alu, balana nembotene oko minu koyole-kola pulupeya. Kataisato wandakali okone molo-peke loyale omeane-ko. Nimbato tomo nole okonemane wandakali yangone okone minu koya napipe. *

¹⁶⁻¹⁷ Yakamato tomo yame tupa pitaka nalaini mana oko epene ya lo nembo toto, minjuni no ateaindo, wandakali minditupa-mane yakamana mana okone andoto, yakamato mana koo mindi mineyai lolopeyai. Goteto bala ando ateakale nembo toto, wandakali mindimane tomo yame minditupa naneando, Gotena wenonga mana okonemane wandakali okone moya napulu-peya. Jia. Oli Sipitisa okomane wandakali mindina mana mo tika puato, bala mo epele piya ola-kola, wandakali okonemane wandakali waka tupa towa pii yanda napene, kuai lo ateando, Goteto bala moyo ando atola-kola pulupeya.

¹⁸ Mindimane mana tika-pene tupa wato minu atoto, pii yanda napene, epele wato,

* **14:1-4:** Lom 15:7-12; Jen 9:3-4; Kol 2:16-17; Mt 7:1-2; Jem 4:11-12 * **14:5-6:** Ga 4:9-11 * **14:7-9:** Ga 2:18-20
* **14:10-12:** 2Ko 5:9-10; Ais 45:23; Pl 2:9-11 * **14:14:** Ap 10:15; Tai 1:15 * **14:15:** 1Ko 8:9-13

Kataisana piape pua ateando, Goteto bala epele alane. Mindimane wandakali okonena mana epene utupane andoto, balana gene oko laiyu lolopeyai-ko.

¹⁹ Nanimato pii yanda pua ata napene, mindi akali minu tai laya aka pua atamakale nembo toto, mana epene tupa minu atamakale.*

²⁰ Enene, andipa Gotena wenonga tomo yame mindikipi mindi kalato atene naeya tekeko, nimbato minjuni nole okomane wandakali mindi yuunga peakeakale laya yeendo, nimbato mana koo minule-kola pulupeya. Nimbato minjuni nole okonemane Gotena piape okone minu koya napipe.*

²¹ Nimbato minjunipi, ipa waenepi, okonetaka tupa neendo, nimbato katulo wandakali yangone mindi yuunga peakale lo wato tepa olowane nembo tape. Wuane nembo toto, nimbato okonetaka tupa naneendo, nimbato mana epene mindi minule-kola pulupeya.

²²⁻²³ Mana mindi koo ya lo nembo toto teke, wandakali mindimane mana okone wato mineando, balana bilipi okone kalo pula-kola, wandakali okonemane mana koo mindi miniya loto, Goteto bala yapa lo tale pulupeya. Wuaneko, wandakali mindimane loto, minjuni newando, mana okone katupe, nakatupe nembo lapo palu atoto teke, minjuni neando, Goteto wandakali okonemane mana koo mindi miniya lo yapa lo tale pulupeya. Wuane tekeko, wandakali mindimane mana mindi wato minuto, mana koo mindi mina napeyo nembo toto, bala tane yapa lo tale napeando, wandakali okone bala epele ape-pene tekeko, balato wandakali waka tupana nembo-tene mo lawa pukale loto, utupane towa pii yanda napipe-pene. Jia. Balato Gote angu lamawuato, wua lo nembo teyo lape-pene.

15

Yakamato Kataisana Mana Tupa Wato Minu Atalapale Leane Oko

¹⁻⁴ Gotena pii okomane nanimana bilipi oko mo tai laya ola-kola, balato nanimoyolo-peya. Moyola-kola, balana potomisa pii tupa angini guleakale loto, nanimaka kepa naene, maliyo atalapale nembo toto, wamba akali minditupa-mane nanimana mana languyale Gotena pii pepa peleainipia. Gotena pii utupanena mindimane pii mindi nanimana mana languato, wandakalimane nimba andayo pii koo leaini utupane namba andayo leai-kola, pea layene

eya. Kataisa bala tane epele oyale mangene mindi napeane tekeko, Gotena pii okonemane leya pua, kenda-pene minditupa balanga epeai-piako. Bilipi leyama nayu lalamane wandakali nanimaka epele amakale nembo natape-pene. Jia. Bilipi leyo nayu lalamane wandakali nanimindiki-mindikilo wandakali yangone tupa mo epele piyamakale nembo toto, utupane moyo minu tai laya oyale, wua pimakale nembo tape-pene. Wuane nembo toto, bilipi leyama nayu na-lalaiani wandakali tupa moyo, nanimato utupanena kenda-pene tupa awua atamakale.*

⁵⁻⁶ Yakama pitaka-mane pii mindiki okone teke loto, nanimana Akali Andane Jisasa Kataisana Aiyane Gote okona gene oko laiyu lo atalapale nembo toto, nambato wua lo pote leyo: Goteto yakama moyakale lo maliyo atoto, yakamato kepa olaini nembo toto, balato yakamana bilipi oko minu tai laya yakale. Wuane pula-kola, yakama pitaka-mane Jisasa Kataisana mana oko wato minu atoto, nembo mindiki paluto, yame mindiki gulalapale loto, nambato pote leyo.

Kitisene Wandakali Waka Tupa Epelewa Lamia-lapape Leane Oko

⁷⁻¹² Wamba Dapitito pii mindi Gote lamaiyane oko pepa peyoto, nambato wandakali yame waka tupana tombenenga atoto, nimbana gene oko laiyu loto, sojo tupa lokale lo pepa peleaiapia. Dee, potopisa akali Aisayato pii mindi pepa peyoto, akali Jesi yame okona kinji mindi wandakali yame waka tupa ando atolo epolopeya. Epola-kola, kinji okonemane utupane moyolo-peya nembo toto, utupane-mane maliyo atolopeyai layene eya. Dee, Gotena pii waka mindi pepa pelene eya mindimane loto, yame waka wandakali yakama Gotena wandakali tupa towa epelewa atalapape layene eya. Dee, Gotena pii waka mindimane loto, yame waka wandakali yakama pitaka-mane Akali Andane okona gene oko laiyu lo atalapape. Wandakali yame yuu waka tupa pitakana paleyai tupa yakama pitaka-mane balana gene oko laiyu lo atalapape layene eya. Gotena pii pepa pelene eya utupane-mane leya pua, wandakali yame waka tupamanne andolai-kola, Goteto utupane ondowa moyalane lo andoto, Gotena gene oko laiyu leakale. Utupane-mane balana gene oko laiyu leakale nembo toto, Goteto potomisa pii mindi Juta yame yumbane tupanga lo yata yane oko enene ya lo andeakale loto, Kataisa bala Juta yamenya piape akali oko ateane lo nambato yakama langeyo.

Wandakali pitaka-mane Gotena gene oko laiyu leakale nembo toto, wamba Kataisato yakama balana yame atalapale lo yakama lameapia. Wuane pua teke, andipa Kitisene wandakali waka tupa yakamana yame ateakale lo yakamatopi utupane epelewa lamialapape. *

¹³ Oli Sipitisa okomane yakamana bilipi oko minu tai laya ola-kola, Goteto yakama moyolo-peya lo yakamoto bilipi loto, epelewa maliyo atalapale lo nambato pote leyo. Goteto yakama moyolo-peya lo bilipi laya alane Gote okomane yakama epele wete wa atalapale loto, yakamana yamapanne tambo laya yakale lo, nambato pote leyo.

Poloto Misini Piape Wua Pua Atewane Leane Oko

¹⁴ Amene imalini yame, Kitisene mana epene tupa pitaka yakamanga eya-kola, yakama mindiki-mindiki katulo yakama teke-teke mindi mana lamaiki pua atalaini nembo teyo. Tene okonena, ole dindi lo yakamoto mana epene kambua wete minu atalaini lo nambato wayumane nemboto teyo.

¹⁵⁻¹⁶ Wuane tekeko, Goteto namba ondowa moyoto, namba Jisasa Kataisana pi-ape akali ata lea. Tene okonena, nambato yuku naene atoto, yakamana nembotene oko mina ika laya wato, pii minditupa yakama langeyo nayu loto, yakamana pepa oko peyo epe leyo. Oli Sipitisa okomane wandakali yame waka tupa Gotena yame gulaya ola-kola, utupane opa Goteto epele alane okonetaka guleakale nembo, balato namba pitisa akali mindi gulola lea-kola, nambato balana pii layene epene oko wandakali utupane lamauwa atewa. *

¹⁷⁻¹⁹ Nambato Gotena pii lamawua atewakola, wandakali yame waka tupamane Gotena pii oko wato minu ateakale loto, Jisasa Kataisato balana Oli Sipitisa oko namba geane okomane namba minu tai laya ya. Balato namba minu tai laya ya-kola, nambato Gotena piape puato, balana pii layene epene oko wandakali tupa lamauwatu, metekolo piape tai-lene mindipene-mindipene tupa pua atewane. Wuane pua atoto, nambato Jutusaleme yuu okona ato tewa Kataisana pii layene epene oko yuu pitakana wandakali tupa lamaima pulu, Iilitkame potopinjia okona gäu lewane. Jisasa Kataisato namba minu tai laya ya-kola, nambato Gotena piape utupane peane nembo toto, nambato Kataisana gene angu laiyu leyo. Nambato,

piape waka mindi pewane lo namba tanena gene oko nalolo-peyowa.

²⁰⁻²¹ Gotena pii pepa pelene eya mindimane Kataisa andayo loto, balato wua peane lo wamba akali mindimane wandakali minditupa lamai naapea-kola, utupane-mane ale naene ateaini tekeko, matili utupane-mane balana pii okone ale wato, nembo tolopeyai layene eya. Gotena pii okone nembo toto, nambato akali waka mindina anda kumu okona anda mindi napukale. Jia. Kataisana gene oko ale naene atalaini wandakali tupamane balana gene oko ale yakale nembo toto, nambato utupanena yuu tupana poto, Gotena pii layene epene oko lamauwa lakae lo nembo talawane. *

Poloto Lomo Tano Okona Epokale Leane Oko

²²⁻²³ Mali kambua tupana nambato yakama andolo ipuwa laka lo mee nemboto atewa tekeko, nambato Gotena pii layene epene oko Kataisana gene oko ale naene atalaini wandakali tupa lamauwa atewane. Piape okonemane ole kambua namba minandi lea-kola, nambato yakama andolo na-epewane. Wuane tekeko, andipa yuu namba ateyo ongane tane wandakali pitaka-mane Kataisana gene oko ale ayiakte leyai-kola, piape nambato piyawane okonepene mindi ongane yaa naapeya. *

²⁴ Tene okonena, matili namba Sepene kanditi okona moyale, Lomo tano okona epolowa-angi, nambato yakama andolo epoto, ole minditupa yakama towa epelewa atamakale nembo teyo. Namba yakama towa atalu, matili namba Sepene kanditi okona polowa angi, yakamato namba moyalapale nembo teyo.

²⁵⁻²⁷ Wamba Gotena wandakali Jutusaleme ateyai tupamane wandakali yame waka tupa moyo atoto, Gotena pii manapi, utupane lamauwa ateaini. Tene okonena, andipa wandakali yame waka utupanenga yano mindi eya. Andipa Gotena wandakali Jutusaleme ateyai tupa yakamana umbaininga minditaka jia yo ateyai-kola, Gotena wandakali yame waka tupamane utupanena yano peyoto, utupane moyo, minditaka maipe-pene. Yano okone peyape-pene nembo toto, Gotena wandakali yame waka Masetonia, Akaya-la, potopinjia okone-laponia atalaini tupamane pii mindi epelewa lo yake puato, Gotena wandakali Jutusaleme ateyai tupa moyo muni minditupa mayuale mo

* **15:7-12:** Lom 14:1-4; Mt 15:24; Ap 3:25; Sam 18:49; 117:1; Lo 32:43; Ais 11:10; Lap 5:5 * **15:15-16:** Lom 1:5; 11:13-15

* **15:20-21:** 2Ko 10:15-16; Ais 52:15 * **15:22-23:** Lom 1:13 * **15:25-27:** 1Ko 9:11; 16:1-4; 2Ko 8:1; 9:1-2,11-12; Ap 24:17

amunguli pua yata apiai. Wuane peakola, andipa nambato Gotena wandakali Jutusaleme ateyai tupa moyo, muni okone mandu poto, mauwakale. *

²⁸ Nambato muni okone mandu Jutusaleme pulu, Gotena wandakali minditaka jia yo ateyai tupa mauwakale. Maiyu, namba Sepene kanditi okona moyale Lomo tano okona peakaiyu lolowa-angi, namba yakama andolo epokane.

²⁹ Namba yakama ateyainga epolowa-angi, Kataisana belesini kambua nam-banga eya tupamane yakama wayumane moyolo-peya nembo teyo. *

³⁰⁻³² Amene imalini yame, Oli Sipitisa okomane yakamato namba epelewa yamapane yo ataya yaneko. Goteto katu yalua lo nembo teando, matili namba epele wato, yakama ateyainga epoto, ole minditupa yakama towa atu oto mo atokale nembo teyo. Wuane tekeko, wamba ini nambato muni minditupa mandu poto, Gotena wandakali Jutusaleme tano okona ateyai tupanga mauluwa-kola, utupanemane muni okone epelewa meakale lo nambato pote leyo. Nambato muni okone mandu polowa-angi, Gotena pii tanga lalaini Jutiya disitiki tane tupamane namba minu koya napeakale lo nambato pote leyo. Yakamatopi nanimana Akali Andane Jisasa Kataisa nembo toto, namba moyo, pote lalapape lo nambato yakama langeyo nayu leyo. *

³³ Yamapane epene pale laya alane Gote oko yakama pitaka towa atu atekale lo nambato pote leyo. Enene.

16

Polo Wandakali Kambua Kuai Lo Atalapape Leane Oko

¹⁻² Wanda Pipi balato Senekotiya tano okona sosa oko moyoyale, piape pimawu-ato, nanimana imalini gulo pituto, wandakali kambua moyalu, nambapi moyalu teke peane-ko. Bala yakama atolainga epola-angi, Kitisene wandakali yakamato Gotena mana epene tupa wato minuto, bala Akali Andane okona yame peteyta nembo talapape. Wuane nembo toto, bala wayu epeleya lo lamia-lapale loto, nambato bala wanda epene mindi lo yakama langeyo. Kenda-pene mindi balanga yando, yakamato bala moyalapale lo nambato pii utu-pane yakama langeyo.

³⁻⁴ Wamba Pitisila, Akuwilala, okonelapo namba towa atu Jisasa Kataisana piape mindiki pua atema-angi, liyamba tane omolopale lo yuku naene, namba molopeke leapi. Tene okonena, nambato

okonelapo ando wayu peapi leyo tekeko, nambato angu jia. Wandakali yame waka tupana sosa pitaka-mane okonelapo ando wayu peapi leyai teke. Nambato liyamba kuai lo atalapape lapia lo, yakamato okonelapo lamai-giyapape. *

⁵ Dee, okone-lapona andaka lotu loyale amunguli piyaini wandakali tupa ando nambato kuai lo atalapape lapia lo yakamato utupane lamai-giyapape. Akali Epainitusa balato Esia potopinjia tane waka tupa pitaka sia minuto, wamba ini bulupane Kataisa lo bilipi leane. Bala nambana yamapane yene akali ateya. Nambato bala kuai lo atape lapia lo yakamato bala lamai-giyapape.

⁶ Wanda Matiyato yakama moyoyale Gotena piape ayiawa wete peane. Nambato bala kuai lo pitipe lapia lo yakamato bala lamai-giyapape.

⁷ Wamba namba Kataisa lo bilipi nalene atewa-angi, nambana Juta yame yangone akali Endonikosa, Juniasa-la, okonelapo-mane wamba ini Kataisa lo bilipi leapilipia. Aposolo akali ateyai tupana akali okonelapo gene yene atoto, namba towa atu andi latane atemane. Nambato akali okonelapo ando liyamba kuai lo atalapape lapia lo yakamato okonelapo lamai-giyapape.

⁸ Nambana yamapane yene akali Ambilatasa bala Akali Andane okona yame ateya. Nambato bala kuai lo atape lapia lo yakamato bala lamai-giyapape.

⁹ Nanima towa atu Kataisana piape pimai-yamane akali Epane-la, nambana yamapane yene akali Satakisa-la, okonelapo kuai lo atalapape lapia lo yakamato okonelapo lamai-giyapape.

¹⁰ Wamba Sataneto akali Apelesa minu makande peane tekeko, balato Kataisa auwa tepa naene, bilipi lo ateane. Nambato bala kuai lo atape lapia lo yakamato bala lamai-giyapape. Dee, nambato akali Atitopulasa okona yame tupa kuai lo atalapape lapia lo yakamato utupane lamai-giyapape.

¹¹ Nambana Juta yame yangone akali Eti-tiane oko bala kuai lo atape lapia lo yakamato bala lamai-giyapape. Akali Nasisana andaka atalaini wandakali tupamane Akali Andane oko lo bilipi lalaini. Nambato utupane ando kuai lo atalapape lapia lo yakamato utupane lamai-giyapape.

¹² Akali Andane okona piape pua pitiyapili wanda Taipina, Taiposa-la okonelapo liyamba kuai lo pitiyapape lapia lo yakamato okonelapo lamai-giyapape. Nambana yamapane yene wanda Pesisa balato Akali Andane okona piape kambua pimawua pitiyane. Nambato bala kuai

lo pitipe lapia lo yakamato bala lamai-giyapape.

¹³ Nambato Akali Andane oko kuai lo wete wato minalane akali Lupasa ando, bala kuai lo atape lapia lo yakamato bala lamai-giyapape. Wamba balana angini oko nambana angini gulo pituto, namba moyo peteane. Nambato wanda okone kuai lo pitipe lapia lo yakamato bala lamai-giyapape. *

¹⁴ Nambato Asingo-tisapi, Pilikonepi, Emesapi, Emasapi, Patombasapi, utupane towa atu atalaini Kitisene yangone tupapi, utupane pitaka kuai lo atalapape lapia lo yakamato utupane lamai-giyapape.

¹⁵ Nambato Pilolo-kasapi, Juliapi, Netiasapi, balana imalini okopi, Olipasapi, Gotena wandakali utupane towa atu ateyai tupapi, utupane pitaka kuai lo atalapape lapia lo, yakamato utupane lamai-giyapape.

¹⁶ Gotena wandakali tupamane Kitisene yangone tupa epele wato, sikane lalawa piki puato, yakamato mindi akali kuai lo atape lalapape. Kataisana sosa yuu wakawaka eyai tupa pitakana Kitisene wandakali tupamane yakama languato, kuai lo atalapape leyai. *

Sosa Oko Yame Lapo Gulolane Andalapape Leane Oko

¹⁷⁻¹⁹ Amene imalini yame, yakamato Gotena pii oko wato minu ateyai lene oko wandakali pitaka-mane ale ayiake leainipia. Nambato yakamana mana epene okone nembo toto, epele wete eyo. Yakamato mana koo tupa nembo natene, mana epene tupa angu nemboto atapiai lakae lo nembo teyo. Wuane tekeko, wandakali minditupa-mane mana epene andokope, mana koo andokope lo wayumane nembo natalaini. Wayumane nembo nateai-kola, akali koo minditupa-mane nanimana Akali Andane Kataisana piape pimai napene, mee minditaka mia-makale nembo toto, piape pua atalaini. Wandakali minditupa-mane akali utupanena mana koo tupa nembo nateyai-kola, akali koo utupanemanane pii epene tende-pene minditupa loto, utupane minu tambo laya wato, minakasa alaini. Akali koo utupanemanane pii mana yakamato wamba meaini okone auwa na-epalaini. Jia. Utupanemanane pii mana waka mindi-pene mindi auwa epoto, wandakali tupa lamai-yaikola, yakama yapu lo yame lapo gulo atoto, pii yanda pua atalaini. Yakamato wuane pua ateyai-kola, wandakali minditupana bilipi oko koyalane. Akali koo utupane-mane

yakamana sosa oko yame lapo gulaya olaini lo ando atoto, yakamato utupane masia mauwa atalapape lo nambato yakama langeyo nayu leyo. *

²⁰ Yakamato mana utupane masia mawua ateaindo, yakamana yamapanne tambo laya alane Goteto yakama moyo atola-kola, yakamana kene tupamane Satane wamba kapoyale ango mangua olopeyai. Nanimana Akali Andane Jisasatayakama ondo wato, moyo atekale lo pote leyo. *

Akali Minditupa-mane Yakama Kuai Lo Atalapape Leyai Leane Oko

²¹ Namba towa Gotena piape pimai-yapale akali Timoti okomane yakama kuai lo atalapape leya. Dee, nambana Juta yame yangone akali Lusiasapi, Jesonepi, Sosipatapi, utupane-mane yakama kuai lo atalapape leyai teke. *

²² Poloto namba Tetisa languato, nimbatu wua lo pepa peya leya-kola, nambato bala moyo, yakamana pepa oko peleyo. Nambapi Akali Andane okona yame oko atoto, yakama kuai lo atalapape leyo.

²³ Wandakali minditupa akali Gayasa okona andaka poto, lotu lalaini. Balato namba yatawa paliyane teke. Balato yakama kuai lo atalapape leya. Dee, tano okona muni ando atalane akali Etasatusala, nanimana Kitisene amene Kuatusa-la, okonelapo-mane yakama kuai lo atalapape leyapi teke. *

²⁴ [Nanimana Akali Andane Jisasa Kataisato yakama pitaka ondo wato, moyo atekale lo pote leyo.]

Nanimato Gotena Gene Laiyu Lo Atamakale Leane Oko

²⁵⁻²⁶ Wamba mali kambua wete Gotena pii layene epene oko too pitane ateane tekeko, matili wandakali yame pitakamanane pii okone bilipi loto, wato mineakale loto, Goteto pii okone lo pana yaepia. Atapowa atalane Gote okonemane balana pii okone potopisa akali tupanga lo pana wato, utupane-mane pii okone pepa peyalapape lea-kola, pii okone panakame yaepia. Panakame ya-kola, Jisasa Kataisato wua peane loto, nambato Gotena pii layene epene oko yakama lamai-yawane. Nambato wuane piyawane okonemane Goteto yakamana bilipi oko katulo minu tai laya olopeya. *

²⁷ Nanimana Gote okomane angu mana pitaka andalane-ko. Jisasa Kataisato nanimayaolane nembo toto, matili-matilipi

* **16:13:** Mk 15:21 * **16:16:** 1Ko 16:20; 1Pi 5:14 * **16:17-19:** Mt 7:15-20; Tai 3:10-11; Pl 3:17-19; 2Pi 2:3; Lom 1:8; 1Ko 14:20 * **16:20:** Jen 3:15 * **16:21:** Ap 16:1-2; 19:21-22; 20:4 * **16:23:** Ap 19:9; 1Ko 1:14-15 * **16:25-26:** Ep 1:7-10; 3:5-10; Kol 1:26-27; Lom 1:5

nanimato Gotena gene oko laiyu lo ata-
makale. Enene.

1 KOTINI

Poloto Kotini Tane Tupana

Pepa Bulupane Peyo Pee

Leane Oko

¹⁻² Namba Polo. Goteto namba Jisasa Kataisana aposolo akali atola nembo toto, namba ee lo meane. Wamba Goteto yuu waka tupana wandakali minditupa balana yame epene wete gulaya ya-kola, utupanemanane nanimana Akali Andane Jisasa Kataisa lo pote lalaini. Wuane, Akali Andane oko bala nanimana angu jia. Bala wandakali waka utupanena Akali Andane oko ateya teke. Goteto Kotini tano okona tane Kitisene wandakali yakamapi ee lo moto, balana wandakali epene wete tupa gulaya ya-kola, yakama Jisasa Kataisana yame ateyai okoni. Nanimana Kitisene amene Sosetenesa nalipato yakamana pepa oko peyo epe leyapa.

³ Nanimana Ayiane Gote-la, Akali Andane Jisasa Kataisa-la, okonelapo-mane yakama ondowa moyoto, yakamana yamapane mo tambo laya yakale lo pote leyapa.

Poloto Gote Wayu Pele Leane Oko

⁴ Yakama Jisasa Kataisana yame ateyakola, Goteto yakama ondowa moyoto, mana epene tupa pitaka yakama langeane nembo toto, ole dindi lo nambato nambana Gote okone wayu pele lalawane.

⁵⁻⁶ Wamba Kataisato wua peane lo nanimato yakama langema-kola, yakamato pii okone bilipi leyama nayu leai okoni. Bilipi loto, yakama Jisasa Kataisana yame atoto, Gotena pii mana lamaulane mana moto, balana pii mana waka tupa pitaka meai.

⁷ Oli Sipitisa okomane Gotena piape waka-waka tupa pitaka pulane tai-lene yakama gea-kola, yakamato tai-lene okone mialu, piape utupane mindikipi mindina pulane tai-lene mindi jia yo ata naopeyai. Jia. Yakamato nanimana Akali Andane Jisasa Kataisa bala panakame epolopeya nembo toto, maliyo ateyai.

⁸⁻⁹ Yakama balana iwanane okone towa atu atalapale nembo toto, yakama ee lo meane Gote oko balato mangene mindi pukale lalu, mangene okone piyane. Tene okonena, balato yakama mo tai laya olakola, yakama Kitisene tai atoto, bala bilipi lo atolopeyai. Yakamato bilipi lo atolakola, matili nanimana Akali Andane Jisasa Kataisato wandakali pitaka yapa lo tale pulu epola-angi, balato koo tene mindikipi mindi yakamanga yata na-olopeya. Jia.

Goteto yakama moyoyale mangene utupane pitaka peane nembo toto, ole dindi lo nambato bala wayu pele lalawane.*

Poloto Yakama Yame Mindiki Atalapape Leane Oko

¹⁰⁻¹² Amene imalini yame, yakama tane teke-teke pii yanda pua ateyai lo wanda Kolowi yame tupamane namba langeai. Pii yanda puato, wandakali minditupamane namba Polo yame ateyo lalaini. Minditupa-mane namba Apolosa yame ateyo lalaini. Minditupa-mane namba Pita yame ateyo lalaini. Minditupa-mane namba Kataisa yame ateyo lalaini. Wuane loto, yakama yame waka-waka gulo ateyai lo, Kolowi yame tupamane namba langeai. Langeai-kola, namba nanimana Akali Andane Jisasa Kataisana piape akali atoto, pii mindi yakama langeyo nayu leyo. Nambana amene imalini yame, yakama yame waka-waka gulo ata napene, nembo mindiki palu atoto, yame mindiki atalalape. Yame mindiki atoto, wua pimakale loto, yakama pitaka-mane pii mindiki okone teke lalapape.*

¹³ Pee, yakama wandakali yame tukumindi ateyai tupamane Kataisa katu tukumindi puato, yale-yale mo yatawa ateyaipee. Pee, namba Poloto yakama moyoyale ita malamanda okona peyo yuka atane atoto, omewape. Pee, akali mindimane nambana gene oko loto, yakama ipa peya-geape. Jia wete.

¹⁴⁻¹⁵ Namba tane akali Kitisapasa, Gayasa-la okonelapo angu ipa peya-maewa. Yakamana waka mindimane namba Polona yame ateyo lolaini nembo toto, nambato wandakali waka mindikipi mindi ipa peyagii napewa okonena, nambato Gote wayu pele leyo.*

¹⁶ Enene, nambato akali Sepanasapi, balana andaka atalaini wandakali tupapi, utupane ipa peya-maewa teke. Nambato wandakali waka mindi ipa peya maewape, peya mai napewape lo nambato nembo nateyo.*

¹⁷ Kataisato namba wandakali tupa ipa peya-maulu puu nalea. Jia. Nambato balana pii layene epene oko wandakali tupa lamaulu puu leane. Wuane tekeko, wandakali wai-ene tupamane pii lalaini pua nambato pii lewando, bala ita malamanda okona omeane oko mo mee gulaya olowane nembo toto, balato piape okone nambato pulu puu lea-angi, wandakali wai-ene tupamane pii lalaini pua nimbato lape nalea. Jia.

Kataisato Gote Bala Wai-ene Wetete Ateya Lo Andawa Leane Oko

* ^{1:8-9:} 1Tes 3:12-13; 5:23-24; 1Jo 1:3 * ^{1:10-12:} Pl 2:2; 1Ko 3:2-4; Ap 18:24-28 * ^{1:14-15:} Ap 18:8; Lom 16:23
* ^{1:16:} 1Ko 16:15-16

18-21 Wamba Gote bala wai-ene wetete atoto, wandakali yakama tane wai-ene atoto, bala nembo teakale naleaipia. Jia. Akali minditupa-mane balana pii oko wandakali waka tupa lamaulai-kola, utupane-mane ale wato, Gote nembo teakale leaipia. Utupane-mane bala nembo toto, balana pii oko bilipi lolai-kola, balato utupane molo-peke lolopeya leaipia. Wandakali minditupa-mane pii okone ale wato, wandakali kee ene mindimane pii okone leane ya lo nembo talaini. Wuane tekeko, Gotena pii okonemane wandakali waka minditupa molo-peke loto, wandakali wai-ene utupane kee-ene ateyai lo andawa loto, utupanena nembo-tene tupa mo mee gulaya alu, mana andene akali tupapi, pii yanda piyaini wandakali tupapi, utupanena nembo-tene tupa mo mee gulaya alane teke. Wamba Goteto wuane pukale lea-kola, akali mindimane balana pii okone pepa peleaipia. Goteto pii okone loto, nambato wandakali wai-ene utupana nembo-tene tupa mo mee gulaya wato, minu koyolo-peyawa lea-kola, yuu koo okona moyale wandakali utupana nembo-tene tupa koyatane ateyai. Nanimato Kataisa bala wandakali molo-peke loyale, ita malamanda okona omeane leyama-kola, wandakali utupane-mane pii okone ale wato, wandakali kee ene mindimane pii okone leane ya lo nembo talaini. Wandakali utupane-mane wuane nembo talaini tekeko, pii okonemane nanima molo-peke leya-kola, Gotena tai-lene oko pii okonena paleya lo andalamane.*

22-23 Juta yame wandakali utupamane nanima languato, Jisasa bala Mesaya oko ateya lo nanima andawa loyale, ati kenga tawe metekolo piape mindi piyapa lalaini. Wuane leyai-kola, nanimato utupane lamawuato, Jisasato wandakali tupa moyoyale, ita malamanda okona peyo yuka atane ateane okomane bala tane Mesaya oko ateya lo nanima andawa leane lalamane. Nanimato wuane leyama-kola, utupane-mane Mesaya oko katulo ita malamanda okona oma napulu-peya nembo toto, nanimana pii okone ale wato, nanima towa embo alaini. Akali wai-ene utupamane pii leyai-kola, wandakali yame waka utupamane utupanena pii ale amakale nembo talaini. Kataisato wandakali molo-peke loyale, ita malamanda okona peyo yuka atane ateane leyama-kola, wandakali utupane-mane pii okone ale wato, nanima kee-ene gulo atoto, wuane leyai lalaini.*

24-25 Utupane-mane wuane lalaini tekeko,

nanim kee ene gulo atoto, Gotena pii okone lalamane mana okonemane wandakali pitakana nembo-tene tupa sia minuto, wai-ene wetete ateyama. Wandakali minditupa-mane Gotena pii okone tai-lene ya lalaini tekeko, Gotena pii tai-lene okone-mane wandakali pitakana tai-lene tupa sia minuto, tai-lene wete eya. Wuane, Goteto Juta yame wandakali minditupapi, yame waka wandakali minditupapi, utupane ee lo mialane. Uupane-mane andeyai-kola, Kataisato Gotena tai-lene okomane wandakali molo-peke loto, Gote bala wai-ene wetete ateyai lo andawa lalane.*

26-28 Anu peakale nambato wuane leyope. Amene imalini yame, wamba Goteto yakama balana yame atalapale loto, ee lo mea-angi, yakama tane wandakali anupene atemape nembo tolo-peke lalapape. Okone ang, wandakali-mane andeai-kola, Kotini tane Kitisene wandakali yakamana kambua wai-ene ata naapeaini lo nembo teaini. Utupane-mane wuane nembo teaini tekeko, nembo-tene kambua yene wandakali tupa yala yakale nembo toto, Goteto nembo-tene kambua nayene wandakali yakama balana yame ateakale ee lo mea okoni. Wuane pua teke, wamba yakamana kambua-mane katulo mangene andane tupa naapeaini tekeko, mangene andane piyaini wandakali tupa yala yakale nembo toto, Goteto mangene andane na-piyaini wandakali tupa balana yame atalapale loto, ee lo mea okoni. Wamba wandakali-mane andeai-kola, Kotini tane Kitisene wandakali yakamana kambua gene nayene atoto, wandakali waka utupana napinga wete ateaini oko andoto, yakama anda napi lo ateaini. Anda napi lo ateai-kola, gene yene wandakali wandakali tupa mee guleakale nembo toto, Goteto gene nayene wandakali tupa balana yame ateakale loto, yakama ee lo mea okoni.*

29 Wandakali mindikipi mindimane Gotena wenonga, bala tanena gene oko laiyu nalape-pene nembo toto, Goteto wuane peaipia.*

30-31 Gotena pii pepa pelene eya mindimane loto, wandakali mindimane mindina gene oko laiyu lokale nembo teando, balato Akali Andane okona gene oko laiyu lape-pene layene eya. Nanimato balana gene oko laiyu lalapale nembo toto, Gote bala tane angu nanima Jisasa Kataisana yame atalapale nembo toto, ee lo mea-kola, Jisasato nanima kambo molo-peke loto, tita lea. Tita loto, Gotena wenonga balato nanima mo tika piya wato, nanima Gotena wan-

* 1:18-21: Lom 1:16-17; Ais 19:12; 29:14; 33:18; 44:25; Jop 12:17; Mt 11:25-27 * 1:22-23: Lom 9:32-33; 1Ko 2:14

* 1:24-25: Kol 2:1-3; 2Ko 13:1-4 * 1:26-28: Mt 11:25-27; Jem 2:5-6 * 1:29: Ep 2:8-10

dakali epene wete tupa gulaya yaepia. Balato mangene utupane pitaka peane okomane Gote bala wai-ene wetete atoto, nanimana molo-peke leane lo andawa leya.*

2

¹⁻² Amene imalini yame, namba yakama ateasinga epewa-angi, nambato Gotena pii wamba too pitane ateane tupa yakama languato, piape Jisasa Kataisato peane tupa angu yakama langukale nembo tewa. Wuaneoko, balato yakama moyoyale, ita malamanda okona peyo yuka atane ateane lo pii langukale nembo tewa. Wuane nembo toto, nambato Gotena pii yakama languato, mana andene akali tupamane pii lalaini pua nalewa. Jia.

³ Namba yakama towa atu atema okone angi, nambanga tai-lene mindi naya-kola, namba yuku wato, puti-puti peyo atewa okoni.*

⁴⁻⁵ Mana andene akali tupamane pii lalaini pua teke, nambato Gotena pii oko yakama langewa-yale, yakamoto namba akali wai-ene ateyai nembo teayale. Wuane tekeko, yakamoto wuane na-piyapale nembo toto, nambato mana andene akali tupamane pii lalaini pua nalewa. Jia. Gotena tai-lene okomane yakamanga piape pula-kola, yakamoto balana pii oko bilipi lalapale nembo toto, nambato balana Sipitisa okona tai-lene oko yakamanga andawa lewa.*

Nanimato Gotena Pii Tupa Lalamane Leane Oko

⁶ Yuu okona akali kawane tupamane yuu okona tawe mana moto, wai-ene ateyai tekeko, utupanena tai-lene oko koyo puyale peya-kola, nanimato utupanena mana tupa wandakali waka tupa lamai na-piyamane. Wuane tekeko, Gotena pii mana kambua andene Kitisene tai tupamane nanimana pii ale wato, nanimana wai-ene atoto, Gotena pii lalaini ya lo andalaini.

⁷ Wamba wetete Goteto yuu ati-la, okonelapo yakale nalene atea-angi, bala wai-ene wetete atoto, nanimana balana yuu epene tii-pene okona polane asini epene mindi yata yane tekeko, asini okone too-pene yaepia. Wandakali-mane asini okone nembo natene, tatakewa ateyai-kola, nanimato Gotena pii oko utupane lamawuato, asini okone utupanenga andawa lalamane.

⁸ Yuu okona akali kawane tupamane asini okone nembo tapiai-yale, utupanemanne Akali Andane tai-lene wetete oko ita malamanda okona peyo ome nalapiai-yale

tekeko, utupanena mindikipi mindimane asini okone nembo nateainipia.

⁹⁻¹¹ Anu peakale nambato wuane leyope. Wandakali mindikipi mindimane yangone mindina nembo-tene oko anda na-piyaini. Jia. Bala tanena tandini ini anda-pangosa atalane okomane angu balana nembo-tene oko andalane. Wuane pua teke, wandakali mindikipi mindimane Gotena nembo-tene oko anda na-piyaini. Jia. Gotena Oli Sipitisa okomane angu andalane. Balato Gotena nembo-tene too-pene wetete tupa andoto, balana nembo-tene waka tupa pitaka andalane teke. Gotena nembo-tene too-pene utupane nembo toto, Gotena pii pepa pelene eya mindimane wua leya: Wamba Goteto bala epelewa yamapano yo atalaini wandakali tupa moyoyale, mangene minditupa pukale nembo toto, makande peane tekeko, okone angi wandakali mindikipi mindimane balana pii ale nayainipia. Mangene utupane lee-mane anda napene ato, mini-mane nembo nateaini layene eya. Goteto mangene pukale nembo teane utupane wamba too pitane yane tekeko, matili Gotena Oli Sipitisa okomane utupane nanimanga lapana yane.*

¹² Nanimato Sipitisa mindi mema oko yuu okona tawe mindi mia napema. Jia. Goteto nanimana moyoyale mangene piyane tupa pitaka nanimato andalapale nembo toto, balato balana Oli Sipitisa oko nanimana geane.

¹³ Gea-kola, nanimato wandakali waka tupa lamawuato, Goteto nanimana moyoyale mangene utupane piyane lalamane. Mana andene akali mindimane pii utupane nanimana langi napeai. Jia. Gotena Oli Sipitisa okomane nanimana mana langea-kola, nanimato balana pii utupane Oli Sipitisa atene wandakali tupa lamawuato, pii utupanena tene tupa lamai-yamane.

¹⁴ Oli Sipitisa atene wandakali tupamane angu katulo pii utupane yapa lo tale puato, epene wete ya lo nembo talaini. Wuaneoko, Oli Sipitisa ata napene wandakali tupamane pii utupanena tene tupa katulo nembo natene ato, kee wato leyai nembo toto, Gotena pii nanimato lalamane tupa ale wato teke, wandakali utupane-mane bilipi na-lalaini.

¹⁵⁻¹⁶ Gotena pii pepa pelene eya mindimane loto, apito Akali Andane okona nembo-tene oko andoto, bala mana lamalupayape layene eya. Wandakali mindikipi mindimane katulo bala mana lamai napulu-peya tekeko, Oli Sipitisa okomane nanimana mana languato, Kataisana nembo-tene oko nanimanga lo pana eya-kola,

* **1:30-31:** Jet 9:24; 23:5-6 * **2:3:** Ap 18:9-10; 2Ko 10:1-2

* **2:4-5:** 1Tes 1:4-5 * **2:9-11:** Ais 64:4

nanimato andalamane. Wuaneko, Oli Sipitisa atene wandakali nanimato katulo pitaka taka yapa lo tale piyamane tekeko, Oli Sipitisa ata napene wandakali mindikipi mindimane katulo nanima yapa lo tale napiyane.*

3

Gotena Piape Akali Ateyapa Leane Oko

¹ Amene imalini ima, wamba yakamoto Oli Sipitisa oko wayumane mina wato napene, yakamana nembo-tene wambane oko wato minu ateai-kola, nambato Oli Sipitisa atene wandakali tupanga Gotena pii oko lamai-yawane pua yakama langi napewa. Jia. Nambato nembo-tene wambane oko wato minalaini wandakali tupanga Gotena pii oko lamai-yawane pua, yakama langewa. Okone angi, yakamoto Kataisana mana oko kuai lo mia napene, andopane ajako gulo ateai.

²⁻⁴ Yakama andopane ajako gulo atoto, tomo tai katulo naa napulu-peyai nembo toto, nambato tomo tai tupa yakama gi napene, andu ipane gulene pii tupa yakama langewa. Wamba nambato wuane pewa tekeko, andipa yakamana minditupamanne nanima Polo yame ateyama leyai-kola, minditupamanne nanima Apolosa yame ateyama loto, yakama tane mindi apiangu piki pua, pii yanda piyaini. Nambato yakamana mana okone andeyo-kola, yakamoto Oli Sipitisa ata napene wandakali tupana mana koo tupa wato minuto, yakamana nembo-tene wambane oko mee wato minu ateyai lo andeyo. Yakamana nembo-tene wambane okone wato minuto, yakamoto Gotena pii oko katulo wayumane nembo nateyai-kola, nambato pai pua andu ipane gulene pii tupa yakama langeyo.*

⁵ Apolosa nalipa akali api ateyapa-kola, yakamoto nalipana yame ateyaipe. Akali Andane okomane piape waka-waka nalipa gea-kola, nalipato balana piape okonelapo pepa-kola, yakamoto bala lo bilipi leai okoni.*

⁶ Nambato tomo waini yandewa-kola, matili Apolosato ee okonena ipa mawua atea. Nalipato piape okonelapo angu pepa-kola, Goteto piape andane wete mindi puato, tomo tupa mo anda yane.

⁷ Wuaneko, tomo waini yandewane akali okola, ipa mayane akali okola, nalipa gene naeyene. Jia. Tomo andayalane Gote bala angu gene yene.

^{8-9a} Yakama Gotena ee gulo ateyai-kola, Apolosa nalipa piape akali yangone atoto,

balana eenga piape pua ateyapa. Wuaneko, ee yandewane akali namba-la, ipa mawua ateane akali bala-la, nalipato nembo mindiki palu atoto, balana piape okonelapo pepa. Gote bala tane nalipana piape yapa lo tale puato, nalipa mindiki-mindiki lo yole gulupeya.*

Mindimane Gotena Anda Minu Koyolane Leane Oko

^{9b} Yakama Gotena anda gulo ateyai.
¹⁰⁻¹¹ Goteto Jisasa Kataisa bala anda okonena pingina atekale lea-kola, wandakali mindikipi mindimane Gotena anda okone puyale, anda pingina waka mindi katulo peyo ate laa napulu-peyai. Jia. Goteto namba ondo wato moyo-kola, namba balana anda pulane mana kambua andene akali mindi gulo atoto, balana piape puato, nambato Kataisa bala Gotena anda pingina oko gulo atekale loto, peyata ewa. Nambato bala peyata ewa-kola, piape akali waka minditupa-mane pingina okona tokonga Gotena anda okone pua ateyai tekeko, akali utupane-mane mindiki-mindiki lo anda okone anu pua peyope lo wayumane nembo toto, pipe-pene.*

¹²⁻¹⁵ Anu peakale nambato wuane leyope. Goteto wandakali pitaka yapa lo tale bula oto oko ita kaiya-pene mindi gulo, wandakali mindiki-mindiki lo makande puato, piape okopene peaini ya lo mo pana olopeya. Gotena piape akali mindimane golopi, silipapi, ana epene wetete tupapi, utupane moto, Gotena anda oko peaindo, ita kaiya-pene okonemane akali okonena piape makande pula-angi, anda okone taa napulu-peyai. Taa napula-kola, akali okonemane piape kuai lo peane oko panakame yola-kola, balato yole epene mindi molopeya. Gotena piape akali mindimane itapi, yangipi, kambepi, utupane moto, Gotena anda peando, ita kaiya-pene okonemane balana piape makande pula-angi, anda okone tola-kola, akali okonemane piape kopeta peane lo panakame yola-kola, balato yole epene mindi mia napulu-peyai. Goteto bala molopeke lolopeya tekeko, anda mindi too atolakola, mindimane bala taputi pua mialane wuane pua teke, Goteto bala taputi pua mola-kola pulupeya.*

¹⁶ Gotena Oli Sipitisa oko yakamana tombenenga ateya-kola, yakama pitaka mina mindiki loto, Gote atalane anda epene wetete gulo ateyai oko yakamoto nembo nateyaipe.*

* **2:15-16:** Ais 40:13 * **3:2-4:** Ip 5:12-13; 1Pi 2:1-3; 1Ko 1:10-12 * **3:5:** Ap 18:4,11 * **3:8-9a:** Mt 13:3-9; Ep 2:20-22

* **3:10-11:** Ais 28:16; 1Pi 2:4-6 * **3:12-15:** 1Ko 4:5 * **3:16:** 1Ko 6:19-20; 2Ko 6:14-16

¹⁷ Kitisene yame mindiki ateyai wandakali yakama balana anda epene wetete gulo ateyai-kola, wandakali mindimane yakama mo toko laya wato, balana anda okone minu koyando, Goteto wandakali okone minu koyolo-peya.

¹⁸⁻²⁰ Goteto wuane pulupeya nembo toto, balana pii pepa pelene eya mindimane wua leya: Wandakali mindi bala tane wai-ene ateyo nembo toto, wandakali waka tupa minakasa oyale, mangene mindi peya-kola, Goteto mangene okone nongo mindi gulaya eya-kola, wandakali okone bala tane nongo okonena lialane layene eya. Dee, Gotena pii pepa pelene eya waka mindimane loto, Goteto andeya-kola, wandakali mindimane bala tane wai-ene ateyo nembo toto, mangene minditupa pukale nembo talane tupa dini epene mindi lia napulu-peyai lo andalane layene eya. Wuane ko, yuu okona wandakali tupamanne wai-ene ateyai nembo toto, mangene mindi piyaini tekeko, Goteto utupane kee-ene atoto, mangene okone peyai nembo talane lo andeyama. Tene okonena, wandakali mindikipi mindimane bala tane wai-ene ateyo nembo toto, bala tane minakasa aa nepe-pene. Jia. Wandakali mindimane bala tane wandakali waka tupana wengonga wai-ene ateyo nembo teando, wandakali okone bala Gotena wenonga wai-ene atokale nembo toto, wandakali waka tupana wenonga kuate minene gulo atape-pene. *

²¹⁻²³ Yakama Gotena wandakali ateyai-kola, minditaka eya tupa pitaka yakamana eya. Yakama saka ateyai okopi, yakama omolo-peyai okopi, minditaka andipa eya tupapi, minditaka matili yolopeya tupapi, yuu ati-la okone-lapopi, utupane pitaka yakamana eya. Apolosa, Pita, nanima pitaka yakamana piape akali ateyama tekeko, Kitisene wandakali yakama pitaka Kataisana yame oko ateyai. Kataisa bala Gotena ateyai. Tene okonena, wandakali mindikipi mindimane akali mindina gene oko laiyu nalape-pene. Jia.

4

Kataisana Piape Akali Tupa Koo Ya Lalaini Leane Oko

¹ Wandakali-mane nanima aposolo akali tupa nembo toto, nanima Kataisana piape akali tupa atoto, balana pii too-pene tupa ando ato maiyamane nembo tape-pene.

² Piape ando ata-maiyaini akali tupa-mane piape anduane okona pii ale wato, balato lola pua, piape pua atape-pene. *

³⁻⁴ Yakamoto nambana piape oko yapa lo tale peaindopi, wandakali waka minditupa-mane nambana piape oko yapa lo tale peaindopi, okone angini mindi jia. Koo tene mindi nambanga naeya nembo teyo tekeko, nambato wuane nembo teyo okomane koo tene mindi nambanga naeya lo andawa naleya. Tene okonena, nambata tane nambana piape oko yapa lo tale nappyawane. Jia. Akali Andane okomane nambana piape oko yapa lo tale piyane.

⁵ Andipa wandakali-mane mana koo minditupa minu ateyai-kola, mana koo utupane undupi pango too pitane ateyai tekeko, matili Akali Andane oko bala epoto, mana koo utupane tii-pene okona mo pana olopeya. Dee, wandakali minditupa-mane mana epene tupa mina-makale nembo talaini. Matili Akali Andane oko bala epoto, utupanena nembo-tene epene utupanena mo pana ola-kola, Goteto utupanena gene tupa laiyu lolopeya. Tene okonena, Akali Andane oko ipu ata naeya-kola, yakamoto Kataisana piape akali mindi yapa lo tale puato, bala piape akali koo ya na-lalapape. Jia. *

Nambana Mana Wato Minalapape Leane Oko

⁶⁻⁷ Amene imalini yame, nimbato wandakali waka tupa sia minuto, lipinga wete atele lo apito nimba langeape. Goteto minditaka nimbanga eya tupa pitaka nimba gii napiapia-yale, nimbato katulo nimba tanena gene oko laiyu loto, nambata tane minditupa mewane lapi-yale tekeko, balato utupane pitaka nimba gea-ko. Anu peakale nimbato nimba tanena gene oko laiyu lalenepe. Wuane pua teke, yakamoto Apolosa nalipana mindi anda napi loto, mindokona gene oko laiyu lolaini nembo teyo-ko. Yakamoto nalipana mana andoto, Gotena pii pepa pelene eya tupa kuai lo wato minulane mana tupa mialapale nembo teyo. Wamba nambato wuane nembo toto, yakama moyoyale, nalipa towa makande puato, kokoli pii minditupa loto, pii utupane yakama langiyo. *

⁸⁻⁹ Wandakali-mane nanima aposolo akali tupa peyo ome lamakale nembo toto, minu koyo eya-kola, wandakalipi, enjoipe, utupane-mane andatawa atalaini. Wandakali-mane nanima peyo ome lape-pene leai-kola, Goteto nanima wandakali waka tupana napinga wete gulo ateyai lo andawa leane nembo teyo. Nambato wuane nembo teyo tekeko, Kotini tane Kitisene wandakali yakamoto Gotena pii mana kumbua wetete mialu, yakama tane katu wete eyama nembo talaini yalua.

* 3:18-20: Jop 5:13; Sam 94:11 * 4:2: Lk 12:42 * 4:5: 1Ko 3:8-9 * 4:6-7: Lom 12:3-6

Nanima yakama towa atu ata napemakola, yakamato nanima sia minuto, wamba ini akali kawane kinji tupa gulo ateyama nembo talaini yalu. Yakama kinji enene tupa gulapai-yle, nanimapi katulo yakama towa atu kinji gulaima-yle. Wuane, yakama kinji enene tupa gulapai-yle, nanima kuai lo ataima-yle nembo teyo.

10-13 Wamba ato tewa aposolo akali nanimato Kataisana piape pua epoko pikli pemane pua teke, andipapi peyama okonena, nanima tanena anda mindi ata napiyane. Alu mindi ulia ipapi jia eyakola, atalamane. Alu mindi nanima tonu wambane lete-lene tupa piyamane. Alu mindi akali-mane nanima minu peyalaini. Ulia kambamakale nembo toto, nanima tanena kii-mane piape taimane piyamane. Kataisana piape puyale, nanimato kendapene utupane awua atalamane oko andoto, wandakali-mane nanima kee-ene ya lalaini. Wandakali-mane kenda-pene andane tupa nanima geyai-kola, nanimato kenda-pene utupane awua atalamane. Wandakali-mane nanima lamba leyai-kola, nanimato utupane lamauwato, Goteto yakama moyo ateakale lalamane. Wandakali-mane nanima andayo pii koo wete tupa leyai-kola, nanimato pii epene tupa tenga-mane lalamane. Wuane peyama-kola, wandakali-mane nanima akali tai nalene ateyai lalaini. Wandakalina wenonga nanima kangalamu yandopi, minditaka koo kunu apene yandopi, okonetaka gulo ateyama-kola, utupanemanne nanima anda napi lalaini. Mana utupane wamba yane pua teke yama ipapo eya. Wuane tekeko, Kotini tane Kitisene wandakali yakama tane mana andene wandakali tai ateyama nembo teyai-kola, wandakali-mane yakamana gene tupa laiyu lalaini.*

14-15 Nambato pepa peleyo utupa-mane yakama mo yala piya oyale pepa naopeleyo. Jia. Wamba ini bulupane nambato Kotini tane wandakali yakama Jisasa Kataisana yame atalapale nembo toto, Gotena pii layene epene oko yakama languato, yakama mandewa-kola, yakama Kitisene guleai. Wuane, akali kambua wete (10,000) tauense paiyasa-mane katulo yakama mana languato, Kataisa wato minuto, wua piyapape lolopeyai tekeko, namba angu yakamana ayiane gulo ateyo. Tene okonena, nambato yakama nambana andopane yamapanne yene yame ateyai nembo toto, yakama koyolaini ando atalapape lo mana languato, pepa oko

peleyo.*

¹⁶ Namba yakamana ayiane gulo atoto, yakamato nambana mana tupa wato minalapape lo yakama langeyo nayu leyo.*

¹⁷ Yakamato nambana mana utupane wato minalapale nembo toto, nambato Timoti bala yakama ateyainga epeakale lewa. Bala nambana iwanane yamapanne yene atoto, Akali Andane okona piape oko kuai lo piyane. Namba Jisasa Kataisana piape akali atoto, yuu kambuangga poto, Kitisenena mana tupa Gotena wandakali pitaka lamai-yawane. Timoti bala yakama ateyainga epola-angi, balato yakamana nembo-tene tupa mina ika laya wato, mana utupane dee lapone teke yakama langulu-peya.*

¹⁸ Nambato yakama andolo naepolo-peya nembo toto, yakamana minditupa-mane yakama tane gene yene ateyama nayuto, luawa ata apiane tene mo ateyai.

¹⁹⁻²⁰ Yakamato wuane pua ateyai tekeko, Akali Andane okomane namba yakama ateyainga epola nembo teando, namba wamba ini kapoyale epokale. Goteto wandakali tupa ando atoto, mee pii-mane angu ando ata napiyane. Jia. Balato balana tai-lene okomane towa utupane ando atalane. Wuane, namba epolowa-angi, luawa ateyai wandakali tupana pii angu ale naene, utupanenga tai-lene anu-pene mindi eyape lo andokale.*

²¹ Tene okonena, nambato anu pipi lakae lo yakamato nembo teyaipe. Nambato kelewa kanda mindi awua epoto, yakama taimane mo tika pipi lakae lo nembo teyaipe. Pee, nambato yakama epelewa yamapanne yoto, tambo lo yakama mo tika pipi lakae lo nembo teyaipe.

5

Akali Koo Wete Oko Peyo Wata-Alapape Leane Oko

¹ Nambato ale ewa-kola, wandakali-mane Kotini tano okona tane Kitisene akali yakamana mindimane bala ayiane okona wetene lapone oko towa pamuku pua peteyapi ale ewa. Aitene wandakali tupamanne mana koo wete okonepene mina na-piyaini.*

²⁻⁵ Enene, namba yakama towa atu ata naopeyama tekeko, namba yuu tepanda waka mindina atoto, akali okonena mana koo okone yapa lo tale puato, bala yuu koo okona pupe-pene ateyai leyo. Wuane pulane nembo toto, matili Akali Andane okomane wandakali pitaka yapa lo tale pulu epola-angi, balato akali okonena

* **4:10-13:** 2Ko 11:23-27; Ap 18:3; 2Tes 3:6-10; Mt 5:44-45

19:21-22 * **4:19-20:** 1Ko 2:4-5 * **5:1:** Pit 18:7-8; Lo 22:30

* **4:14-15:** Ga 4:19-20 * **4:16:** Pl 3:17-19 * **4:17:** Ap

tandini oko molo-peke leakale nembo teyo. Wuane, andipa Sataneto akali okonena umbaini oko minu koyola-kola, akali okonemane yamapane peke loto, mana koo okone konda yakale leyo. Balato wuane peakale nembo toto, yakama amunguli pulai-angi, nambana tandini oko yakama towa atu atolo-peyama. Okone angi, nanimana Akali Andane Jisasana tai-lene oko yakamanga yolopeya-ko. Yakamoto Akali Andane Jisasa okona gene oko loto, akali okone bala Satanena kinina yata ape-pene. Andipa balato mana koo wete okone minu ateya nembo toto, yakamoto mini kenda wato, bala peyo watape-pene tekeko, bala yakama towa atu ateyai-kola teke, yakamoto wandakali waka tupa sia minuto, Kitisene epene wete eyama nembo toto, yakama tanena gene tupa laiyu lalaini okonde.*

⁶ Yakama tanena gene tupa laiyu lalaini mana okone mana epene mindi jia. Palawa yangalaini pauta anjako minditupa palawa kambuanga tupa eyama-kola, palawa utupane pitaka anda yalane oko yakamoto nembo nateyaipe. Wuane pua teke, andipa mana koo wete minu ateya akali mindiki okone bala yakama towa atu ateyai-ko. Kitisene wandakali yakamana kambua-mane balana mana koo okone wato minulaini. Tika ando atalapape.

⁷⁻⁸ Juta yame wandakali tupamane Pasopa tomo tupa namakale nembo toto, palawa yangalaini pauta wamba tawe tupa pitaka apoto, palwawa yangalaini pauta napalene betesa neaini. Goteto Kataisa bala nanimana Pasopa sipisipi andopane oko atekale loto, bala opa maiya-kola, akali minditupa-mane bala peyo ome leainipia. Bala omeane okomane yakamana koo tupa apea-kola, yakama palawa yangalaini pauta wamba tawe napalene gulo ateyai. Wuane, nanimato wandakali waka tupa minu koyamakale nembo natene, palawa yangalaini pauta gulene mana koo tupa pitaka apoto, pii enene oko loto, mana epene tika-pene tupa wato minu atamakale. Yakamoto palawa yangalaini pauta napalene betesa wenene gulo atamakale nembo toto, palawa yangalaini pauta wamba tawe palene mana koo wete mindi minu ateya akali okone bala yakama towa atu atu napeakale loto, peyo wata alapape.*

⁹ Wamba nambato yakamana pepa mindi peyo epe loto, pamuku piyaini wandakali tupa towa atu atu na-piyapape lewa okoni.

¹⁰ Nambato wuane lewa tekeko, aitene wandakali kambua-mane pamuku piyaini.

Kambua-mane minditaka kambua miaima laka lo nembo talaini. Kambua-mane minditaka pake mialaini. Kambua-mane owato gote tupa lotu lalaini teke. Yakamoto aitene wandakali utupane pitaka peya wanju atamakale nembo tapia-yale, yakama yuunga yuu oko tepa alu, waka mindisa pupe-pene gulapua-yale.

¹¹⁻¹³ Aitene wandakali utupane yapa lo tale pulane piape oko nambana piape mindi jia. Gote bala tane utupane yapa lo tale pulupeya tekeko, balana pii pepa pelene eya mindimane loto, koo pua atalane Kitisene wandakali yangone mindi yakama towa atu atolane. Yakamoto bala peyo wata alapape layene eya. Gotena pii okonemane wuane leya-kola, Kitisene wandakali yakamato yakamana Kitisene yangone tupana mana tupa yapa lo tale pua atape-pene nembo teyama. Wuane nembo toto, wamba nambato yakamana pepa mindi peyot, Kitisene yangone mindimane pamuku piyane yandopi, minditaka kambua miawua laka lo nembo talane yandopi, owato gote mindi lotu lalane yandopi, lamba lalane yandopi, sipaki lalane yandopi, minditaka pake mialane yandopi, bala yakama towa atu ateakale lo ando konda na-piyapape. Dee, yakamoto Kitisene yangone okonepene mindi towa atu ulia naa na-piyapape lewa okoni.*

6

Kitisene Yangone Tupa Kosimi Nalalapape Leane Oko

¹⁻² Matili yuu oko koyo pula-angi, Gotena wandakali yakamato bala lo bilipi nalalaini wandakali tupa pitaka yapa lo tale pulupeyai oko yakamoto nembo nateyaipe. Yakamoto wuane pulupeyai okonena, andipapi yakamoto Kitisene wandakali yangone tupana kote anjako tupa katulo lo tika pipe-pene. Wuane tekeko, Kitisene wandakali yakamana minditupa-mane Kitisene wandakali yangone minditupa kosimi lamakale nembo toto, aitene akali tupamane yakamana kote okone lo tika peakale lalaini. Yakamoto wuane piyaini okonena, yakamoto yala ape-pene. Yakamoto Kitisene wandakali yangone minditupa kosimi lamakale nembo teaindo, Kitisene akali mindimane yakamana kote okone lo tika pip-pene.*

³ Matili yuu oko koyo pula-angi, Gotena wandakali nanimato enjole tupa yapa lo tale pulu-peyma oko yakamoto nembo nateyaipe. Matili nanimato katulo wuane

* 5:2-5: Kol 2:4-5; 1Ti 1:18-20 * 5:6: Ga 5:9 * 5:7-8: Ais 53:7; 1Pi 1:19; Lo 16:3 * 5:11-13: 2Tes 3:6-10; Tai 3:10-11; Lo 13:5; 17:7 * 6:1-2: Lap 3:21

pulu-peyama pua, andipapi nanimato Kitisene wandakali yangone tupana pii ale wato, pii yanda pulaini tupa katulo lo tika pulu-peyama teke.

⁴ Wuaneeko, Kitisene wandakali yakamanga kote okonepene tupa yando, anu peakale yakamoto sosa okona ata na-piyaini aitene wandakali tupamane yakamana kote okonepene tupa lo tika peakale lalainipe.

⁵⁻⁶ Yakamoto wuane piyaini okonena, yakama yala alapale nembo toto, nambato pii utupa pepa peleyo. Kitisene wandakali yakamoto Kitisene wandakali yangone tupa kosimi lamakale nembo toto, Kataisa lo bilipi na-lalaini akali tupamane yakamana kote tupa ale yakale lalaini. Kitisene utupanena kote lo tika pulane mana andene Kitisene akali mindikipi mindi ata neapeya-kola, yakamoto wuane piyainipe.

⁷ Kitisene wandakali yakama tane teke-teke mindi akali kosimi laka pua ateyai mana okonemane Kataisana mana epene oko awua tepa alu, yuunga peakoto ateyai lo andawa leya. Kitisene wandakali yangone mindimane yakama minakasa wato, yakamana minditaka mee wete meando, anu peakale yakamoto bala kosimi lalainipe. Balato mee wuane peakale lo yakamoto ando konda ape-pene.

⁸ Yakamoto Kitisene mana epene okone wato minape-pene tekeko, yakama tane Kitisene wandakali yangone tupa minakasa wato, utupanena minditaka eya tupa mee wete mialaini.

⁹⁻¹¹ Yakamoto mana koo tupa wato minu ateaindo, matili yakama katulo Gotena yuu epene okona napolo-peyama nembo toto teke, yakamoto mana koo okone wato minu ateyaipe. Wandakali-mane pamuku pua ateaindopi, owato gote mindi lotu leaindopi, akali yangone towa mana yalapene tupa mineaindopi, pake neaindopi, minditaka kambua miama laka lo nembo teaindopi, bia ipa tai no sipaki leaindopi, lamba leaindopi, makonga ene ateaindopi, Goteto wandakali utupane moyo ando ata napulu-peya. Wamba yakamana minditupa-mane mana koo okonepene tupa wato minu ateaini tekeko, yakama ipa meai-angi, Akali Andane Jisasa Kataisana gene oko yakamanga ya-kola, Goteto yakamana koo utupane apia-gea okoni. Wuane pea-kola, Oli Sipitisa okomane yakama nanimana Gote okona wandakali epene tika-pene tupa gulaya yane-ko. Yakama tane minakasa wato, mana koo utupane wato minulu-peke lolomane. Tika ando atalapape.*

Yakamana Umbaini Tupa Oli Sipitisa Okona Anda Ateyai Leane Oko

¹² Nambato mangene pulane tupa pitaka katulo piwa-yale tekeko, mangene utupanena minditupa-mane wandakali moya na-piyaini nembo toto, mangene utupanena mindikipi mindimane namba bosa lo ando ateakale lo nambato ando konda napulu-peyo.*

¹³⁻¹⁴ Tomo wandakali-mane nalaini tupa utupanena tombene okona poto paleakale nembo toto, Goteto tomo utupane yakale lalu, wandakali tupana tombene tupa waa peane tekeko, matili balato tomo tupapi, wandakali tupapi, lapotaka koyo piya olopeya. Okone enene tekeko, Goteto Akali Andane oko malinga ika laya yane wuane pua teke balana tai-lene okomane nanimana malinga ika laya olopeya. Balato nanimana umbaini tupa waa peane angi, pamuku pua atalapale nembo natea. Jia. Nanimana Akali Andane okona yame atalapale nembo toto, balato nanimana umbaini tupa waa peane. *

¹⁵⁻¹⁷ Wandakali mindi bala Akali Andane oko towa mina mindiki leando, Oli Sipitisa oko balanga epo tumbi lola-kola, balana tandini oko Akali Andane oko towa mina mindiki lene atolopeya. Wuane tekeko, Gotena pii pepa pelene eya mindimane nanimana languato, wanda, akali-la, liyamba mina mindiki lolapi-angi, liyamba umbaini mindiki gulo pitulu-peyapi layene eya. Wuaneeko, akali mindimane pamuku wanda mindi towa mina mindiki leyangi, okonelapo liyamba umbaini mindiki gulaya alane oko yakamoto nembo nateyaipe. Kitisene wandakali yakamana umbaini tupa Kataisana kinipi, kenepi, okonetaka tupa gulo ateyai oko yakamoto nembo nateyaipe. Yakama Kataisana kinipi, kenepi, okonetaka tupa gulo atoto, pamuku wanda mindina umbaini towa mina mindiki leaindo, yakamana mana okone katu lolo-peyape. Jia wete. *

¹⁸ Wandakali-mane mana koo waka tupa minalaini tupamane yakamana umbaini takita okona mangene minditupa puato, mana koo utupane pitaka minalaini tekeko, wandakali-mane pamuku peaindo, utupane-mane yakama tanena umbaini tupa minu koyalaini. Tene okonena, mindimane pamuku pipakale loto, nimba minu makande peando, nimbato bala masia maiyu pupe.

¹⁹⁻²⁰ Goteto yole andane wete mindimane nimba kambo molo-peke lea-kola, nimbara umbaini oko nimba tanena jia. Goteto

* **6:9-11:** Ga 5:19-21; Ep 5:3-5; Lap 22:15; Tai 3:3-7 * **6:12:** 1Ko 10:23-26 * **6:13-14:** 1Tes 4:3-5; Lom 8:11; 1Ko 15:20;
2Ko 4:13-15 * **6:15-17:** Ep 5:28-30; Mt 19:5; Jo 17:21-23; Lom 8:9-11

balana Oli Sipitisa oko nimba gea-kola, nimbana umbaini oko Oli Sipitisa okona anda ateya. Yakamoto wuane nembo nateyaipe. Wuane nembo toto, nimbato mangene mindi pule-angi, nimbana umbaini-mane Gotena gene oko laiyu lo atape. *

7

Akali-mane Wanda Kee Lalaini Mana Oko

¹ Wamba yakamoto nambana pepa mindi peyo epe loto, pii minditupa namba tipa peai okonena, andipa nimbato yakamana pii utupane yano peleyo. Enene, akali mindimane wanda kee nalene, bala angu ateando, mana okone epene.

² Mana okone epene tekeko, wandakali kambua-mane pamuku piyaini. Tene okonena, akali mindiki-mindiki lo wanda kee lalu, wanda mindiki-mindiki lo akali mindi pulu, pipe-pene.

³⁻⁴ Wanda mindimane bala tanena umbaini oko bosa lo ando piti napipe-pene. Jia. Bala akalini okomane bala wetene okona umbaini oko bosa lo ando atape-peneko. Akalini mindimane balana wetene oko towa mangene mindi pipakale nembo tola-angi, balana wetene okomane mangene okone pipe-pene. Wuane pua teke, akali mindimane bala tanena umbaini oko bosa lo ando ata napipe-pene. Jia. Bala wetene okomane bala akalini okona umbaini oko bosa lo ando pitipe-peneko. Wetene mindimane balana akalini oko towa mangene mindi pipakale nembo tola-angi, balana akalini okomane mangene okone pipe-pene.

⁵ Wetene akalini-la, lapotaka-mane pii mindi lo yake puato, nalipato pote kambua lo atapakale nembo toto, oto mindilapo mina mindiki nalene kondalu, matili pai pua mina mindiki lapakale leapindo, okone katu. Wuane tekeko, oto kambua okonelapo-mane mina mindiki nalene, liyamba tane wayumane bosa lo ando ata napeapindo, Sataneto okonelapo minu mandeke pula-kola, okonelapo-mane wandakali waka tupa towa pamuku pulapele. Tene okonena, liyambato mindoko masia mawuato, liyambana umbaini mawua yaya na-piyapape.

⁶ Nimbato loo minditupa yakamanga yata wato, yakamoto utupane wato minu atalapape lo pii tai mindi leyo nayu naleyo. Jia. Nimbato asini epene tupa yakama andawa loto, yakamoto nambana pii utupa wato minu ateaindo, okone katu olopeya leyo.

⁷ Namba wanda kee nalene, mee ateyo wuane pua teke, wandakali pitaka mee yakama tane angu atapiat laka lo nembo teyo tekeko, Goteto wandakali mindiki-mindiki lo mana epene waka-waka tupa maiyane. Akali mindimane bala wetene towa atu pitulane mana epene oko moto, mana okone wato minu atalane. Akali waka mindimane wanda kee nalene, mee atolane mana epene oko moto, mana okone wato minalane.

⁸ Andipa nimbato wandakali kinambulipi, wanda yalopi, utupane yakama andayo pii mindi leyo. Namba wanda kee nalene, mee ateyo wuane pua teke, utupane-mane mee ateaindo, mana okonemane utupane moyolo-peya.

⁹ Utupane-mane katulo mee ateaindo, mana okone epene tekeko, utupane-mane iya wato, yakama tane wayumane ando ata napeaindo, pamuku pulu-peyaiko. Akali-mane wanda kee lalu, wanda-mane akali pulu pipe-pene. *

¹⁰⁻¹¹ Akali mindimane wanda mindi kee lalu, balana wetene okone peakale peyo wata napipe-pene. Jia. Wanda mindimane akali mindi pulu, balana akalini okone tepa alu napupe-pene. Bala tuu puato, balana akalini tepa alu peando, bala akali waka mindi puu napene, mee pitipe-pene. Balato mee piti napukale nembo teando, balana akalini oko towa pii lo tika puato, bala towa pitulu-peke lape-pene. Namba tane mana okone yata naeyo. Jia. Akali Andane okomane mana okone wamba yata yane. *

¹²⁻¹⁴ Andipa nimbato wandakali waka tupa mana lamauwawayale, pii mindi tako pua leyo. Akali Andane okomane pii okone wamba nalea. Jia. Namba tane pii oko leyo. Kitisene wanda mindina akalini okomane Kataisa lo bilipi naleando, wanda okonemane balana akalini okone Gotena yame guleakale lalane. Wuane pua teke, Kitisene akali mindina wetene okomane Kataisa lo bilipi naleando, akali okonemane balana wetene okone Gotena yame guleakale lalane. Wuane napipiyale, Gotena wenonga okone-lapona andopane tupa kalato atene atapiat-yale tekeko, andipa Gotena wenonga okone-lapona andopane utupane balana yame ateyai. Wuaneko, Kataisa lo bilipi nalene akali mindi balana Kitisene wetene oko towa atu pitukale nembo teando, wanda okonemane akali okone tepa nayakale. Wuane pua teke, Kataisa lo bilipi nalene wanda mindi balana Kitisene akalini towa atu pitukale nembo teando, akali okonemane balana wetene okone puu

* **6:19-20:** 1Ko 7:20-23; 1Pi 1:18-19 * **7:9:** 1Ti 5:14-15

* **7:10-11:** Mt 5:32; 19:9

nalape-pene Jia.

15-16 Wuane tekeko, wetene akalini-la liyambato pii yanda pua ata napene, tambo lo atalapale nembo toto, Goteto liyamba ee lo meane. Kitisene wanda nimbana aitene akalini okone bala nimba towa atu peteando, balapi Kitisene mindi guleakale lo nimbato katulo bala moyolo-peyo nembo natele. Tene okonena, nimbana akalini okomane nimba tepa wakale nembo teando, nimba anana pitula. Nimbana akalini okone bala peakale lo ando kondape-pene. Wuane pua teke, Kitisene akali nimbana aitene wanda okone nimba towa peteando, balapi Kitisene guleakale lo nimbato katulo bala moyolo-peyo nembo natele. Tene okonena, nimbana wetene okomane nimba tepa wakale nembo teando, nimba anana atola. Bala peakale lo ando kondape-pene.*

Goteto Leane Pua Atalapape Leane Oko

17-19 Nanimato Gotena loo tupa wato minalamane mana okone mana angini mindi tekeko, akali mindina yala-pene umbaini katiyaini mana oko angini mindi jia-ko. Wamba Goteto akali mindi ee lo mea-angi, akali okonena yala-pene umbaini kati napene atae yando, kati napene ateakale lo ando kondape-pene. Dee, akali mindina yala-pene umbaini kati na-piyaini mana oko angini mindi jia teke. Wuaneko, Goteto akali mindi ee lo mea-angi, balana yala-pene umbaini wamba ini katene atae yando, katene ateakale lo ando kondape-pene. Wuane pua teke, wamba Goteto wandakali mindiki-mindiki lo ee lo mea-angi, wandakali-mane mana okonepene minu ateaini oko andipapi minu teke atape-pene. Nambato mana okone sosa waka-waka ateyai tupa pitakana yata alawane.*

20-23 Wamba Goteto wandakali mindi ee lo mea-angi, wandakali okonemane yole mia napene, katapusa atene gulo atoto, wandakali waka mindina piape pua atea yando, andipapi balato mee wuaneko pua atape-pene. Wuane pua teke, wamba Goteto wandakali waka tupa ee lo mea okone ang, utupane pitaka mindiki-mindiki lo mangene epene minditupa pua ateai. Andipapi utupane-mane mangene utupane pua atape-pene. Wuane tekeko, Kataisato yakama yole andane mindimane kambo molo-peke leane okonena, yakama wandakali waka mindina pangosa wetete atoto, balana pii angu wato mina napipe-pene. Jia. Yakama Kataisana pangosa wetete atoto, balana pii wato minuto, balana piape pua atape-pene. Kataisana pangosa wetete atoto, yakama yole mia

napene, wandakali waka mindina piape pua ateyai-kola teke, Akali Andane okona wenonga yakama tinga lo mene gulo ateyai-ko. Yakama yole mia napene, wandakali waka mindina katapusa piape pua atolai-kola, balato yakama tinga lolopeya yando, yakama tinga lo mene atape-pene. Wuane tekeko, yakama tinga lo mene atolane asini mindi nayando, yole mia napene atoto teke, yakama mini kenda naene, mee wandakali waka okonena piape tupa pua atalapape.*

24 Amene imalini yame, Goteto nanima ee lo mea-angi, nanima mindiki-mindiki lo mangene epene minditupa pua atema. Andipapi, nanima Gote towa atu atoto, mangene utupane pua atamakale.

25-28 Andipa ateyama oko ang, kenda-pene andane minditupa ika leya okonena, wanda akali ima andipa ateyai wuaneko teke mee ateaindo, nambato okone kuai lolopeya nembo teyo-ko. Nimba wetene petene ateendo, nimbato bala peyo watoyale, asini mindi aiya napipe. Nimba wetene napetene ateendo, nimbato wanda mindi kee lokale lo asini mindi aiya napipe. Jia. Nambato wuaneko tekeko, nimbato wanda mindi kee leendo, okone mana koo mindi jia. Wana mapokae mindi akali peando, okone mana koo mindi jia tekeko, wanda mindi akali peya-kola, kenda-pene kambua okone-laponga epalane. Kendapene utupane yakamanga na-epeakale nembo toto, nambato pii utupa yakama langeyo. Akali Andane okomane wana mapokaepi, iwana patanepi, utupane andayo pii oko namba langi napea tekeko, balato namba ondowa moyoto, namba enene pii lalawane akali mindi gulaya yane. Tene okonena, namba tane nembo teyo-pua, pii oko yakama langeyo.

29-34 Wana mapokae tupapi, akalini ata napene wanda waka tupapi, utupane-mane utupanena umbainipi, tandinipi, okonelapo lapotaka Gotena yakale nembo toto, Akali Andane okona piape nembo tatawa pityaini. Akalini atene wanda tupamane yakamana akalini tupa mo epele piya amakale nembo tatawa pituto, yuu okona mangene pulane tupa pimakale nembo talaini. Wuane pua teke, wanda napetene akali tupamane Akali Andane oko mo epele piya amakale nembo tatawa atoto, mangene balato epele alane tupa pimakale nembo talaini. Akali wanda petene tupamane yakamana wetene tupa mo epele piya amakale nembo tatawa atoto, yuu okona mangene pulane tupa pimakale nembo talaini. Wuaneko, akali utupane-mane utupanena wetene tupa mo

epele piya amape, Akali Andane oko mo epele piya amape lo nembo lapo palyaiini. Amene imalini yame, ee ana anjalapo minditupa pola-kola, yuu andipa eya oko koyo pulupeya. Tene okonena, mana andipa wato minalamane minditupa koyo pima-pima peyai. Yakamoto anu pimape lo nembo kambua natapai lakae lo nembo toto, nambato pii oko yakama langeyo. Andipa ato tewa wanda petene akali yame yakamoto wanda napetene akali tupana mana oko wato minuto, Akali Andane oko mo epele piya amakale nembo tatawa atoto, mangene balato epele alane tupa pua atape-pene. Dee, ai lo atalaini wandakali tupapi, epelewa atalaini wandakali tupapi, utupane-mane wuane angu pua ata napipe-pene. Wandakali-mane minditaka kamboto teke, okonetaka nayene gulo atoto, okonetaka utupanena eya nembo tatawa ata napipe-pene. Wandakali-mane yuu okona minditaka moto, piape pua atoto, utupanena piape okone angini wete mindi eya nembo natape-pene. Jia. Utupane-mane mangene utupane angu napene, Akali Andane oko mo epele piya amakale nembo tatawa atoto, mangene balato epele alane tupa pua atape-pene. *

³⁵ Yakamoto mangene waka tupa napiyapape naleyo tekeko, yakamoto mangene waka tupa nembo tatawa ateaindo, yakamoto Akali Andane okona piape nembo tatawa ata napulu-peyai leyo. Wuanecko, yakamoto mana epene tikapene tupa wato minuto, ole dindi lo Akali Andane okona piape pua atalapale nembo toto, nambato yakama moyoyale, pii utupa yakama langeyo.

³⁶ Akali mindimane wanda mindi mee baa lo atoto, iya wete wato, bala towa mana koo mindi minuluwane lo yuku wato, wanda okone kee leando, okone mana koo mindi jia. Balato wanda okone kee lauwa lakaes lo nembo teya pua, kee lape-pene.

³⁷ Balato wuane peakale tekeko, akali mindimane wanda mindi kee na-lokale nembo tatawa atoto, balana nembo-tene oko katulo wayumane bosa lo ando ateando, balato wanda mindi kee lolane tene angini mindi ata naopeya. Jia. Balato wanda mindi kee na-lokale nembo teya pua wanda okone kee naleaindo, balato mana epene mindi minula-kola pulupeya.

³⁸ Wuanecko, akali mindimane balana bakale lene wanda oko kee leando, balato mana epene mindi minula-kola pulupeya. Balato wuane pulupeya tekeko, akali mindimane wanda kee nalene, mee ateando, balato mana epene wete mindi

minula-kola pulupeya.

³⁹ Wanda mindina akalini oko saka ateya-kola, wanda okone balana wetene pitiyane tekeko, akali okone omeando, wanda okone bala anana pitiyane. Bala akali waka mindi pokale nembo teando, okone katu tekeko, balato Kataisa lo bilipi lene akali mindina pupe-pene. *

Bala akali waka mindi peando, bala katulo epele olopeya tekeko, bala akali waka mindi puu napene, mee peteando, bala katulo epele wete olopeya nembo teyo. Gotena Sipitasa oko nambanga ateya-kola, nambato pii utupa yakama langeyo lo nembo teyo.

8

Owato Gote Mindi Lo Minjuni Opa Maiyene Tupa

¹⁻⁴ Aitene wandakali-mane minjuni tupa owato gote mindi lo opa maiyu, matili salimi leyai-kola, Kitisene wandakali-mane minjuni okone neaindo, mana okone katu lolo-peyape, katu nalolo-peyape lo andipa nambato yakama langukale. Gote enene mindiki angu ateya-kola, yuu okona gote waka eya tupana mindikipi mindi Gote enene mindi ata naopeya nembo teyama. Wandakali minditupa-mane yakama tanena gene oko laiyu loto, nanima pitakamane okonetaka tupa nembo teyama leyai. Wandakali mindimane okonetaka tupa wayumane nembo toto, wuane leando, balato mana minditupa tako pua miapene. Wandakali mindi bala mana kambua meando, balato wandakali waka tupa sia mineyo nembo talane tekeko, wandakali-mane wandakali yangone tupa towa epelewa yamapanes yo atalaini mana okomane wandakali waka tupa minu tai laya alane. Wandakali mindimane Gote towa epelewa yamapanes yo ateando, Goteto bala wayumane andola-kola, balato wuane pulupeya. *

⁵ Enene, aitene wandakali tupamane yuu okona eya takapi, ati kenga okona eya takapi, okonetaka kambua utupanena gote tupa ateyai loto, okonetaka utupanena akali andane tupa ateyai lalaini.

⁶ Utupane-mane wuane lalaini tekeko, Kitisene wandakali nanimato Gotena pii ale wato, Ayiane Gote bala angu Gote enene oko atoto, minditaka eya tupa pitaka yakale loto, nanima balana wandakali tupa atalapale lo waa peane nembo teyama. Dee, Jisasa Kataisa bala angu Akali Andane oko ateya-kola, balana pii okonemane Goteto pitaka taka yakale loto, nanima saka ataya yane nembo teyama. *

* 7:29-34: 1Jo 2:15-17

* 7:39: Lom 7:2-3

* 8:1-4: Ap 15:29; Ga 4:8; 6:2-3; Lo 4:39; 6:4

* 8:6: Ep 4:4-6

⁷ Nanimato wuane nembo teyama tekeko, Kitisene wandakali minditupame wuane nembo nateyai. Jia. Wamba utupane-mane owato gote tupa Gote enene tupa ateyai nembo tama ipulu, andipapi wuane teke nembo teyai. Wuane nembo toto, utupane-mane minjuni owato gote mindi lo opa maiyene tupa neyai-angi, owato gote okone lotu leyama nayuto, Gote enene okona wenonga mana koo mindi mineyama nembo talaini.

⁸ Nanimato owato gote tupa Gote enene ata naapeyai nembo toto, minjuni opa maiyene tupa nemando, Goteto nanimato Kitisene waka tupa sia mineyai nembo natolo-peya. Jia. Nanimato minjuni okonepene tupa nanene kondemando, balato nanima yapa lo tale puato, nanima Kitisene waka tupana napinga ateyama ya lo nembo natolo-peya teke.

⁹⁻¹¹ Wuane tekeko, yakamato owato gote tupa Gote enene ata naapeyai nembo toto, owato gote mindina lotu andaka poto, minjuni bala lo opa maiyene minditupa no peteaindo, Kitisene wandakali yangone mindi epoto, nimbana mana okone andoto, balatopi minjuni okone nokale nembo tolopeya jiae. Kitisene wandakali tupamane minjuni okonepene tupa nanene kondape-pene nembo toto teke, balato minjuni minditupa neando, Gotena wenonga balato mana koo mindi minulakola pulupeya. Wuane, nimbato minjuni okonepene tupa katulo nolo-peyawa nembo toto, nole okonemane bala minu koyole-kola pulupeya. Kataisato nimbana Kitisene amene okone molo-peke loyale omeane-ko. Nimbato minjuni okonepene tupa katulo nolopeyo nembo toto, nole okonemane bala yuunga peakeakale laya olene. Tika ando atape. *

¹² Kitisene wandakali yangone minditupa-mane kuai lo nembo natene ato, minjuni okonepene tupa naa napipe-pene nembo toto teke, yakamana mana andoto, minjuni okonepene tupa neaindo, yakamato utupane yuunga peakeakale laya olai okonemane Kataisanga mana koo okone minulai-kola pulupeya.

¹³ Tene okonena, owato gote mindi lo opa maiyene minjuni tupa nolowa okomane nimbana Kitisene wandakali yangone tupamane koo peakale lo mo piya ape-pene guleando, matili-matilipi nimbato minjuni tupa dee lapone nanolopeyo. Jia. *

9

Gotena Piape Akali Tupamane Yole Miape-pene Leane Oko

¹⁻³ Wandakali minditupa-mane namba yapa lo tale puato, bala aposolo akali enene mindi ata naapeya lalaini. Wuane leyakola, nimbato utupanena pii okone yano peyoto, nimbato Akali Andane Jisasa lee-mane andalu, yakamana tombenenga balana piape pimawua atewa-kola, yakama Kitisene wandakali guleai lalawane. Yakama Kitisene wandakali ateyai okomane namba aposolo akali enene mindi ateya lo andawa leya-kola, yakamato namba aposolo akali enene mindi ateyo nembo teyai okoni. Namba aposolo akali mindi atoto, mangene mindi pukale nembo tewando, nimbato mangene okone katulo piyawane. *

⁴⁻⁷ Pitapi, aposolo akali waka tupapi, Akali Andane okona amene tupapi, utupane-mane Kitisene wanda kee lalu, utupane towa atu epoko pua atoto, Gotena piape pua atalaini. Banapasa nalipato wuane teke pipakale nembo tepe-yale, nalipato katulo wuane pepa-yale teke. Dee, akali apito ami piape puato, yole mia napene kondalanepe. Apito ee mindi yoko yandoto, ee okonena tomo mandu hanene kondalanepe. Apito bulumako kambua ati puato, utupanena andu ipane nanene kondalanepe. Wandakali-mane wuane na-piyaini. Tene okonena, wamba Banapasa nalipato Gotena piape pua atepale okonena, nalipato Kitisene wandakali tupa lamawuato, nalipa tomo ipapi nolane tupa nalipana yole gulo giyapape lepa-yale, mana okone katu lea-yale teke. Pee, nalipato angu piape waka mindi tako pua puato, yole moto, nalipana tomo nolane tupa kamboto, na-pe-penepe. *

⁸ Nimbato wandakali tupana nembotene tupa angu wato minuto, piape akali mindimane yole miape-pene leyalо yakamato nembo na-talapape. Gotena loo pepa pelene eya mindimane wuane teke leya.

⁹ Wamba Mosesato Gotena loo mindi pepa peyoto, yia bulumako mindimane balana kee-mane witi dini tupa ango andaku bua, nimbana piape pingeando, balato witi dini minditupa nolane nembo toto, nimbato balana nee asia oko yake pua tambuya naene kondape layene eya leaipia. Bulumako tupamane angu piape puato, yole meakale nembo toto, Goteto wuane leaipape. Jia. *

¹⁰ Balato nanima nembo toto, wuane leaipia. Ee yandoyale yuu ayalaini wandakali tupapi, tomo mandiyaini wandakali tupapi, nanima pitaka-mane

* **8:9-11:** Lom 14:13-15,20; Ga 5:13-14

* **8:13:** Lom 14:21

* **9:1-3:** Ap 22:17-18; 26:16; 1Ko 15:8-9; 2Ko 3:2-3

* **9:4-7:** Lk 10:8-9

* **9:9:** Lo 25:4; 1Ti 5:17-18

* **9:10:** 2Ti 2:6

yole molopeyama nembo toto, piape pua atalapale nayuto, Goteto loo okone yata yakola, Mosesato pii okone pepa peleaiapia. *

¹¹ Wuaneko, wamba Sailasa nalipato Gotena pii oko yakama languato, nalipa yakamana ee yandalapale akali gulo atepa okonena, nalipato tomo mandipakale nembo toto, yakamato yole giyapa laipayale, okone katu lapia-yale. *

¹² Andipa Gotena piape akali waka tupamane yakama moyoto, piape pua ateyai-kola, yakamato utupane yole maiyaini. Wuane pua teke, wamba nalipato yakama moyoto, Gotena piape pua atema okone angi, yakamato nalipa yole geai-yale, okone katu wete lapia-yale tekeko, yakamato yole giyapa nalepa. Jia. Wamba nalipato Jisasa Kataisana pii layene epene oko yakama langu atepa-angi, nalipato yole giyapa lepalyale, yakamato yole gii napimakale nembo toto, pii okone naniima langi napene kondalu, pulupa lolaini nembo tepa. Yakamato nalipa kondalu pulupa lolaini nembo toto, nalipato yole giyapa nalene, minditaka kambua jia yo atoto, kenda-pene kam-bua awuato, Gotena pii oko yakama langu atepa. *

¹³ Juta yame wandakali tupamane sipsipi tupapi, bulumako tupapi, okonetaka tupa Gote lo opa mayai-kola, pitisa akali tupamane minjuni minditupa Gotena alata toko okona yangoto, yakama tane minditupa tale pua neaini lo yakamato nembo nateyaipe. *

¹⁴ Wuane pua teke, wamba Akali Andane okomane mana mindi yata wato, Kitisene wandakali tupamane Gote lo opa maulai-kola, Gotena pii layene epene lamai-yaini akali tupamane opa muni tupana minditupa yole moto, tomo kambo nape-pene leaiapia. *

¹⁵ Balato mana okone yata ya-kola, nambato yole miape-pene tekeko, nambato yakama moyoyale piape puato teke, yole mia na-piyawane loto, namba tanena gene oko laiyu lalawane. Wandakali mindimane namba yole guato, namba tanena gene oko laiyu lalawane asini okone pai lolane nembo toto, namba yole mia napene atoto, ulia yambai-mane omewandopi, okone katu leyo. Wuaneko, andipa yakamato namba yole giyapale nembo nateyo. Jia. Tene waka mindi ateya-kola, nambato yakamana pepa oko peyo epe leyo.

¹⁶⁻¹⁷ Wamba nambato Gotena pii layene epene oko wandakali tupa lamai napukale nembo tewa tekeko, Goteto piape oko namba gea-kola, nambato piape okone pau

atewane oko mee pua ateyo. Nambato piape okone pua ata napene kondewando, kenda-pene andane mindi nambanga epolopeya. Wuaneko, nambato Gotena pii layene epene oko wandakali tupa lamai-pene guleya-kola, nambato lamawua teke ateyo. Tene okonena, nambato Gotena pii layene epene oko wandakali tupa lamai-yawane nembo toto, namba tanena gene oko laiyu lolane tene mindi ata napuya. Wuane tekeko, yakamato namba yole gimakale leyai-kola teke, nambato yole mia napukale loto, mee yakama moyoyale piape pua ateyo okonena, nambana yole waka mindi eya. *

¹⁸ Nambana yole waka okone aki mindi eyape. Nambato yole miape-pene tekeko, namba yole mia napukale nembo toto, yole mia napene ato, mee wete Gotena pii layene epene oko wandakali tupa lamawua atalawane. Nambato wuane piyawane nembo toto, epele wete alawane okone nambana yole waka okone gulo eya.

¹⁹ Wandakali mindikipi mindimane nambana piape oko bosa lo ando ata napiyane tekeko, wandakali kambua wete Kataisana yame guleakale nembo toto, nambato yole mia napene atoto, wandakali pitaka moyoyale piape puato, Gotena pii layene epene oko lamai-yawane.

²⁰ Wamba namba Juta yame wandakali tupa towa atu atewa-angi, nambato utupane molo-peke lokale nembo toto, utupanena mana tupa wato minu atewa. Namba tane Juta yamena loo tupana pangosa ata napewa tekeko, loo utupanena anda-pangosa ateaini wandakali tupa molo-peke lokale nembo toto, nambato wandakali utupane towa atu atewa okone angi, nambato Juta yamena loo tupana pangosa gulo atoto, loo utupane wato minu atewa. *

²¹ Wandakali yame waka tupa Juta yamena loo tupana pangosa ata napaei-kola, nambato utupane towa atu atewa-angi, utupane molo-peke lokale nembo toto, Juta yamena loo tupa wato mina napewa. Wuane tekeko, nambato Gotena loo tupana pangosa atoto, Kataisana loo oko wato minu atewa.

²² Wandakali minditupa Kitisene tai gulo ata napene, mana mindi epene ya, mana mindi koo ya lo wayumane yapa lo tale napeai. Wuaneko, namba utupane towa atewa-angi, utupane molo-peke lokale nembo toto, namba akali okonepene teke gulo atewa. Nambato yame waka-waka utupane pitakana wandakali minditupa molo-peke lokale nembo toto, namba

* ^{9:11:} Lom 15:25-27 * ^{9:12:} Ap 20:34; 2Ko 11:7-9

* ^{9:16-17:} Jet 20:9 * ^{9:20:} Ap 21:20-26

* ^{9:13:} Lo 18:1-3 * ^{9:14:} Mt 10:7-10; Lk 10:6-7; Ga 6:6

utupane towa atu ataka pewa okone angi, nambato utupanena mana waka-waka minalaini tupa wato minaka pewa. *

²³ Gotena pii layene epene okomane wandakali waka tupa moyalane pua teke, balana pii okonemane nambapi moyakale nembo teyo. Wuaneko, wandakali-mane Gotena pii layene epene okone bilipi lapiai lakae lo nembo toto, nambato mangene utupane pitaka piyawane.

²⁴⁻²⁵ Akali mindimane pataisa koyalane mindi yata eya-kola, wandakali kambuamane pataisa okone mia-makale nembo toto, asini tai wete lamakale loto, utupanena umbaini kuai lo bosa lo ando atoto, wayumane mandeke piyaini. Utupane pitaka asini tai lalaini tekeko, mindikimane angu sia minuto, pataisa okone mialane oko yakamoto nembo nateyaipe. Goteno pataisa koya napiyane mindi yata eya-kola, nanimato pataisa okone mia-makale nembo toto, nanimana umbaini kuai lo bosa lo ando atoto, wayumane mandeke pua atape-pene. Pataisi okone mia-makale nembo toto, yakamoto yakamana umbaini oko kuai lo bosa lo ando atoto, asini tai lalapape. *

²⁶ Namba tane pataisa okone miawa lakae lo nembo toto, waka minditaka eya tupa andamo nena pua ata napene, asia oko angu andatawo atoto, asia tai wete lalawane. Akali minditupa-mane bokosene loto, kii momanga-mane mee aimo nena puato, akali mindoko peya na-piyaini tekeko, nambato Goteno piape oko puato, akali utupanena mana okone wato mina-na-piyawane. Jia.

²⁷ Nambato Goteno pii layene epene oko wandakali waka tupa lamawua atolowakola, utupane-mane pataisa Goteto gukale leya okone katulo molopeyai. Wuane tekeko, namba tane pataisa okone mia napuluwane nayuto, nambato nembo teyo pua nambana umbaini okomane peakale nayuto, nambana umbaini oko wayumane wete bosa lo ando atalawane. *

10

Yakamoto Mana Koo Mindi Minulmane, Tika Ando Atape-pene Leane Oko

¹ Amene imalini yame, wamba Mosesa atea-angi, Goteto nanimana yumbane tupa pitaka moyoyale mangene kambua peane tupa yakamoto wayumane nembo tapiai lakae lo nembo teyo. Balato nanimana yumbane utupane pitaka mole mindimane yame peyoto, mole okonemane teke Isipi yuu oko tepa olane asini mindi andawa

lea-kola, utupane pitaka-mane ipa solewata angini Letasi lene oko kalo peainipia. *

² Goteto wuane pea-kola, utupane pitaka mole okone-la, solewata okone-la, okonelapo-mane ipa mialu, Mosesana yame guleainipia.

³⁻⁴ Kataisa bala Goteno ana oko gulo atoto, utupane towa atu epoko pua ateainipia. Goteto ana okonena ipa oko wandakali utupane maiya-kola, utupane pitaka-mane ipa mindiki okone teke neainipia. Balato tomo tupa wandakali utupane maiya-kola, utupane pitaka-mane tomo mindiki okone teke neainipia. *

⁵ Goteto utupane moyoyale, mangene utupane pitaka peane tekeko, wandakali utupanena kambua-mane mana koo tupa wato minaka peai-kola, Goteto utupanena mana koo utupane embo wete wato, utupane peyo ome laka pea-kola, kambua wandakali napalene yuu okona omapiane yaka peainipia. *

⁶⁻¹⁰ Okone angi, wandakali utupanena minditupa-mane Gote andayo mulu-mulu leai-kola, peyo ome lalane enjoje mindimane utupane peyo ome leaipia-ko. Utupane-mane Gote andayo mulu-mulu leaini pua, yakamoto bala andayo mulu-mulu lalaini mana oko kondalapape. Alu mindi wandakali kambua-mane Gote minu mandeke peai-kola, balato utupanena mana koo okone embo wete wato, etulu koo gepo tupamane utupane no omaya yaepia-ko. Nanimato utupanena mana koo okone wato minuto, Kataisa minu mandeke piyamane mana oko kondamakale. Goteno pii pepa pelene eya mindimane temane waka mindi loto, wandakali tupamane owato gote mindi lo opa maiyu, tomo ipapi no pitiyu, pamuku pulu makale lo ika leaini layene eya. Utupane-mane wuane peai-kola, wandakali (3,000) tausene tepo omeainipia-ko. Wandakali utupane-mane owato gote okone lotu leaini pua, yakamoto owato gote minditupa lo lotu lalaini mana oko kondalapape. Alu mindi wandakali kambua-mane pamuku peai-kola, ole mindikina Goteto akali (23,000) tausene paipayasa laponga tepo peyo ome leaipia-ko. Akali utupane-mane pamuku peaini pua teke, nanimato pamuku napene, kondamakale. Isatale tane wandakali nanimana yumbane tupamane mana koo utupane wato minaima laka lo nembo natape-pene lo nanimana andawa loyale, Goteto koo peaini

* 9:22: 2Ko 11:29 * 9:24-25: Pl 3:14; 2Ti 4:7-8; 2:3-5 *

* 9:27: Lom 8:12-13; 13:14 * 10:1: Ek 13:21-22; 14:22-29

* 10:3-4: Ek 16:35; 17:6; Nam 20:11 *

10:5: Nam 14:29-30 *

* 10:6-10: 1Ko 10:11; Nam 11:4,34; 16:41-49; 21:5-6;

25:1-9; Ek 32:6

wandakali utupane peyo ome leaipia. *

11 Wamba Isatale tane wandakali kambua-mane mana koo utupane wato minaka peai-kola, utupane-mane wuane napeakale lo andawa loto, Goteto wandakali koo utupane peyo ome laka peaipia. Andipa yuu koyo puyale peya-angi, nanimato temane utupane dii lo andoto, mana koo utupane wato mina napipe-pene nembo talapale nayuto, Goteto Mosesana nembo-tene mina ika lea-kola, balato pii temane utupane pepa peyo yata yaepia.

12-13 Wandakali pitaka-mane mana koo tupa wato mineakale nembo toto, Sataneto utupane minu mandeke piyane wuane pua teke, balato yakamapi minu mandeke piyane. Wuane tekeko, Goteto mangene mindi pukale leya pua piyane. Sataneto yakama minu mandeke pula-angi, balato yakama sia mineakale lo Goteto ando konda napulu-peya. Jia. Yakamoto mana koo okone minulaini nembo toto, Goteto yakama minu tai laya ola-kola, Sataneto katulo yakama sia mina napulu-peya. Wuane tekeko, wandakali mindi bala tane Kitisene tai wete mindi ateyo nembo toto, Gote nimbato namba minu tai laya ape lo pote naleando, Sataneto bala minu mandeke pula-kola, wandakali okonemane mana koo mindi minuluwane lo ando atape-pene.

14-18 Nambana yamapane yene yame yakama mana andene wandakali ateyai okonena, nambato pii mindi yakama langeyo-ko. Yakamoto nambana pii okone yapa lo tale piyapape. Goteto belesini mindi nanima geakale loto, balana piape akali mindimane bala wayu pele leyakola, nanimato waene kaponga petene oko nalamanne. Mana okonemane nanima Kataisana tundupa oko towa mina mindiki lalane. Kitisene wandakali nanimana kambua-mane betesa mindiki konde loto, nanima pitaka-mane betesa okone nalamanne. Betesa mindiki okone nalamanne mana okonemane nanima yame mindiki gulaya wato, nanima Kataisana umbaini oko towa mina mindiki lalane. Wuane pua teke, wamba Isatale tane wandakali tupamane Gote lo opa mawuato, sipisipi yandopi, bulumako yandopi, okonetaka tupana minjuni minditupa Gotena olata tokonga yangalu, yakama tane minditupa neainipia. Mana okonemane utupane Gote towa mina mindiki leane oko nembo talapape. Okone nembo toto, aitene wandakali tupamane owato gote mindi lo lotu loto, minjuni minditupa owato gote okone lo opa mai-yaindo, yakamoto

utupane towa minjuni okone nanene, amonga waka atalapape. *

19 Nambato owato gote mindi bala gote enene mindi ateya nembo toto, wuane leyope. Jia. Owato gote mindipi, bala lo opa maiyene tupapi, utupane angini mindi jia. *

20-21 Wuane tekeko, aitene wandakali tu pamane Gote enene oko lo opa mai na piyaini. Jia. Utupane-mane owato gote tupa opa mawuato, sипитиса koo tupa lo opa maiyai-kola, piyane. Yakama Kitisene wandakali yangone tupa towa Akali Andane okona tomo ipapi nalu, aitene wandakali tupa towa sипитиса koo tupana tomo ipapi nalu peaindo, mana okone katu nalolopeya. Yakamoto sипитиса koo utupane towa mina mindiki na-lapiae lakae lo nembo toto, nambato pii utupa leyo. *

22 Pee, yakamoto aitene wandakali tupa towa sипитиса koo tupana tomo ipapi noto, Akali Andane oko towa wanda yangone gulo mo yataka amakale nembo teyaipe. Yakamoto bala mo yataka olai-kola, bala yakama towa yataka wato, yanda pingeanjo, yakamana tai-lene okomane katulo balana tai-lene oko sia minulu-peyape. Jia wete. *

Gotena Gene Laiyu Lalapape Leane Oko

23-26 Yuu okopi, yuu okona minditaka eya tupapi, utupane pitaka Akali Andane oko balana angu eya. Wuaneko, makesangana wandakali-mane minjuni salimi lo atolai-kola, yakamoto minjuni owato gote mindi opa maiyene tupa kambo neaindo, yakamoto mana koo mindi mineyama nembo na-talapape. Jia. Utupane-mane minjuni okone owato gote mindi wamba ini maiyu, salimi leyaipe lo yakamoto utupane tipa napene, mee kambo nalapape. Yakamoto katulo mana okonepene tupa pitaka wato minulu-peyai tekeko, mana okonepene tupa pitaka-mane Kitisene wandakali yakama tai atalapale lo moyanapulu-peya. Jia. Kitisene wandakali mindikipi mindimane bala tane angu moyoyale mangene mindi napipe-pene Jia. Utupane pitaka-mane wandakali waka tupa moyoyale mana epene tupa pitaka wato minape-pene. *

27 Aitene wandakali mindimane yakama tomo nolo ipulupa lola-kola, yakamoto bala andaka tomo nolo makale nembo teaindo, nolo pulupape. Nolo poto, yakamoto minjuni utupa wamba owato gote mindi opa maiyu, nanima namakale gelepe lo bala

* 10:14-18: Mt 26:26-28; Lom 12:3-5; Pit 7:6 * 10:19: 1Ko 8:1-4 * 10:20-21: Lo 32:17; Lap 9:20; 2Ko 6:14-16

* 10:22: Lo 32:21 * 10:23-26: 1Ko 6:12; Lom 15:1-4; Sam 24:1

tipa na-piyapape. Jia. Yakamato tomo balato gula tupa pitaka mee nalapape.

²⁸ Nambato wuane leyo tekeko, Kitisene wandakali mindimane minjuni owato gote opa maiyene tupa nanene kondape-pene nembo tolopeya. Wuane nembo toto, balato yakama languato, minjuni oko owato gote mindi opa maiyene eya lolopeya. Wuane lola-kola teke, yakamato tuu puato, minjuni okone neaindo, balato yakamana mana okone yapa loto, yakamato mana koo mindi wato minuto, minjuni okone neyai nembo tolopeya. Balato wuane nembo tolane nayuto, yakamato minjuni okone naa na-piyapape. *

²⁹ Yakama tane mana koo mindi mineyama nembo tolopeyai lo nambato naleyo. Jia. Balato yakamana mana oko yapa loto, yakamato mana koo mindi mineyai nembo tolopeya leyo. Nambato wuane leyo-kola, wandakali mindimane namba tipa puato, wua lolopeya: Kitisene wandakali-mane minjuni okonepene naa nape-pene nembo toto, mindimane nambana mana yapa lo tale puato, koo ya leando, anu peakale balato wuane leakale lo nambato ando kondape-penepe.

³⁰ Nambato Gote wayu pele lalu, minjuni okonepene newando, anu peakale Kitisene wandakali yangone mindimane namba Kitisene koo mindi ateya lolo-peyape. *

³¹⁻³³ Wandakali mindimane wuane leando, nambato balana pii okonelapo yano peyoto, namba tane angu moyakale nembo toto, mana tupa wato mina na-piyawane lolopeyo. Jia. Goteto wandakali kam-bua molo-peke lapia lakae lo nembo toto, utupane pitaka-mane epele yakale nayuto, nambato utupane moyokale lo mana epene minditupa wato minalawane. Wuane pua teke, yakama tane angu moyolane mana tupa wato mina na-piyapape. Jia. Juta yame wandakali tupa yandopi, wandakali yame waka tupa yandopi, Kitisene wandakali yangone tupa yandopi, utupane-mane mana koo mindi wato mineakale lo yakamato utupane mo piya olomane ando atalapape. Dee, yakamato minjuni owato gote mindi opa maiyene tupa neaindopi, ipa mindi neaindopi, mangene waka mindi peaindopi, mangene pulai utupane pitaka-mane Gotena gene oko laiyu lalapape. *

11

¹ Nambato Kataisana mana tupa wato minalawane pua teke, yakamato nambana mana utupane wato minalapape. *

Kawangenga Tangi Anda Piyaini Mana Oko

² Wamba namba tane Kitisene mana minditupa moto, mana utupane yakama langewa okoni. Ole dindi lo yakamato namba nembo tolo-peke loto, mana utupane wato minalaini okonena, nambato yakamana gene tupa laiyu lalawane.

³ Gote bala Kataisana kawane oko ateya. Kataisa bala akali tupa pitakana kawane oko ateya. Wuane pua teke, akali mindi bala wanda mindina kawane oko ateya. Yakamato wuane nembo tapiai lakae lo nembo teyo. *

⁴⁻⁷ Akali-mane minditaka eya tupa ando atoto, Gotena tai-lenepi, gene andane okopi, okonelapo andawa lalaini. Wuaneko, akali mindimane balana kawanenga tangi anda pitawa atoto, pote leandopi, Gotena pii oko lamawua ateandopi, balato tangi anda pitawa atola okomane Gotena tai-lenepi, gene andane okopi, okonelapo ombo wato, balana akali kawane Kataisa oko mo yala piya ola-kola pulupeya. Tene okonena, akali-mane pote leandopi, Gotena pii lamawua ateandopi, okone angi balato kawanenga tangi anda pitawa ata napipe-pene. Jia. Wanda-mane utupanena akalini tupana tai-lenepi, gene andane okopi, okonelapo andawa lalaini tekeko, wanda mindimane balana kawanenga tangi anda pitawa piti napeando, bala kawa itini katu talakapa pua apene wanda mindi gulo pitulu-pey. Wuaneko, tangi anda napene wanda mindimane lotu anda okona ika lo atoto, pote leandopi, Gotena pii oko lamawua ateandopi, balato balana akalini oko mo yala piya ola-kola pulupeya. Tene okonena, wanda mindimane Gotena piape okone-lapona mindi puato, balana kawanenga tangi anda pitawa piti napeando, balana kawa itini katu talakapa pua apiape-pene teke. Wuane tekeko, wanda mindina kawa itini katu talakapa pua apoto, bala tane yala olopeya yando, balana kawanenga tangi anda pitawa ato, Gotena piape okonelapo pipe-pene. *

⁸⁻⁹ Akali-mane wanda tupa moyakale nembo toto, Goteto wanda bulupane okona patalini mindi moto, akali bulupane oko waa napeaipia. Jia. Wanda-mane akali tupa moyakale nembo toto, Goteto akali bulupane okona patalini mindi moto, wanda bulupane oko waa peaipia-ko. *

¹⁰ Wanda mindimane bala akalinina pangosa pitiyane lo enjole tupamane andeakale nembo toto, wanda okonemane

* **10:28:** 1Ko 8:7 * **10:30:** 1Ti 4:3-5 * **10:31-33:** Kol 3:17; Lom 14:13; 1Ko 9:20-22 * **11:1:** 1Ko 4:16 * **11:3:** Jen 3:16; Ep 5:22-23 * **11:4-7:** Jen 1:26-27 * **11:8-9:** Jen 2:18-23

balana kawanenga tangi anda pitawa pitipe-pene.

11-12 Wamba Goteto akali bulupane okona patalini mindi moto, okonemane wanda bulupane oko waa peaipia. Wuane pua teke, andipa wanda-mane andopane tupa manduto, akali yame mandiyane tekeko, wandakali pitakana tene oko bala Gote ateya. Tene okonena, wanda yame yakama angu piti napipe-pene. Akali yame yakamapi angu ata napipe-pene teke. Jia. Yakama pitaka Akali Andane okona pangosa atoto, mindi moyaka pua atape-pene.

13-15 Wanda tupana kawa itini luu epalane pua teke, akali mindimane balana kawa itini luu epeakale lo ando konda yando, balato nanimana mana kalo puato, yala ape-pene nembo talamanne. Wuane tekeko, wanda tupana kawane yame peleakale nembo toto, Goteto wanda tupana kawa itini luu epeakale leya-kola, nanimato okone yakamana yati pitane ateya nembo talamanne. Tene okonena, wanda mindi bala lotu anda okona pote loto, balana kawanenga tangi anda pita nayando, mana okone katupe, nakatupe lo yakama tane yapa lo tale piyapape.

16 Wandakali mindikipi mindimane namba towa pii yanda pinguato, wanda-mane lotu anda okona pote loto, utupanena kawanenga tangi anda pitawa napeteando, mana okone katu leando, sosa tupapi, aposolo akali tupapi, nanimato mana okone katu nalolo-peya leyama nembo tape-pene.

Akali Andane Okona Tomo Kuai Lo Nalaini Mana Oko

17-19 Goteto mana epele alane tupa apito kuai lo wato minalainipe lo andoyale, alu minditupa yakamato yapu lo lapo puato, yame lapo gulo atape-pene. Wuaneko, yakamato lotu loyale amunguli peyai-angi, yakama yapu loto, yame lapo gulo atalaini lene oko ale wato, nambato pii okone enene yalua nembo teyo tekeko, mana okone-mane yakama moya napiyane. Jia. Mana okonemane yakama minu koyalane nembo toto, nambato yakamana gene tupa laiyu nalene, wua leyo. *

20-21 Yakamato Akali Andane okona tomo namakale nembo toto, lotu anda okona epo amunguli piyaini tekeko, wandakali minditupa-mane tomo ipapi eya tupa pitaka wamba ini nokoyo puato, sipaki lo ateyai-kola, wandakali waka tupamane tomo ipapi nonowa atalaini. Mana yakamato wato minalaini okone Kitisene wandakali tupamane Akali Andane okona

tomo nalaini mana oko wato mina napeyai. Jia.

22 Anu peakale yakama wamba ini andaka atoto, tomo ipapi, naa na-piyainipe. Yakamana anda tupa ata napeya-kola, yakamato lotu anda okona poto, tomo ipapi eya tupa pitaka no koyo piyainipe. Pee, yakamato Gotena sosa oko anda napi loto, Kitisene wandakali yangone minditaka jia yo ateyai tupa mo yala piya amakale nembo toto, wuane piyainipe. Yakamato wuane piyaini okonena, nambato anu puape. Nambato yakamana gene tupa laiyu lape-penepe. Jia. yakamato wuane piyaini okonena, nambato yakamana gene tupa laiyu naleyo.

23 Wamba Akali Andane okomane pii temane mindi namba langea-kola, nambato yakama langewa okone andipa nambato yakama langulu-peke leyo. Jutasato Jisasa ene peteane utulu okone angi, Akali Andane Jisasato betesa mindi meaipia.

24 Moto, balato Gote wayu pele lalu, betesa okone konde loto, balana disaipolo tupa lamawuato, betesa oko nambana umbaini oko. Nambato yakama moyoyale geyo. Matili yakamato namba nembo tolo-peke loyale, mana nambato mineyo oko teke wato minaka pua atalapape leaipia.

25 Utupane-mane tomo no koyo peai-kola, wuane pua teke, balato kapo waene petene mindi moto, waene oko nambana tundupa oko leaipia. Nambana tundupa epola okomane yakama towa pii wenene mindi lo yata eyo. Matili yakamato namba nembo tolo-peke loyale, waene oko nolai angi, mana nambato mineyo oko teke yakamato wato minaka pua atalapape leaipia. *

26 Yakamato betesa okola, kapo okona waene petene okola, okonelapo nolai-angi, yakamato Akali Andane oko omeane lo lapano ama pulu, bala lapone epola oto oko ando molopeyai.

27-29 Wuaneko, wandakali mindimane Akali Andane okona umbaini oko neyo lo nembo natene, Akali Andane okona tomo oko mee neando, Goteto bala yapa lo tale puato, koo tene mindi balanga yata olopeya. Wandakali mindimane Akali Andane okona betesa okola, waene kaponga peteyea okola, okonelapo mee neando, balato Akali Andane okona umbaini, tundupala, okonelapo minu koyola-kola pulupeyia. Tene okonena, wandakali mindiki-mindiki lo bala tane wayumane yapa lo tale puato, betesa oko nalu, waene kaponga petene oko nape-pene. *

30 Yakamana kambua-mane Akali Andane okona umbaini oko neyo lo nembo

* 11:17-19: 1Ko 1:10-12 * 11:25: Ek 24:6-8; Ip 8:8-13

* 11:27-29: Ip 10:29

natene, betesa okola, waene kaponga peteya okola, okonelapo mee na-lalaini okonena, yakamana umbaini tai nalene eyakola, yakama siki mialaini. Tene mindiki okonena teke, yakama minditupa omapiai.

³¹ Nanimato nanima tane wamba ini wayumane yapa lo tale piyu, Akali Andane okona umbaini tundupa-la okonelapo neyama nembo toto naima-yale, Goteto nanima yapa lo tale puato, kenda-pene okone nanimanga yata napiapia-yale.

³² Wuane tekeko, matili Akali Andane okomane bilipi nalene wandakali tupa yapa lo tale pula-angi, balato nanima utupane towa yuu koo okona atapowa atama pulupa na-lokale nembo tewa. Wuane nembo toto, andipa balato nanima yapa lo tale puato, nanima mo tika puyale, kenda-pene utupane nanimanga yata eya.
*

³³⁻³⁴ Wuaneko, nambana amene imalini yame, yakamato Akali Andane okona tomo noyale amunguli pulai-angi, yakamato mana koo mindi mineaindo, Akali Andane okomane yakama yapa lo tale puato, kenda-pene mindi yakamanga yata olopeya. Tene okonena, wandakali mindi tomo nono andane yando, bala tane andaka atoto, tomo wamba ini nalu, bala lotu anda okona poto, Kitisene wandakali waka tupa towa amunguli pipe-pene. Kitisene wandakali waka tupa pitaka epeakale lo mali yo pitulai-kola, utupane epo atolai-angi, yakama pitaka-mane tomo nalapape. Matili nambato yakama atolainga epolowangi, nambato pii waka lolane eya tupa lo tika pukale.

12

Oli Sipitisa Okomane Gotena Piape Pulane Tai-lene Giyane Oko

¹⁻² Amene imalini yame, wamba yakama aitene wandakali ateai-angi, yakamato owato gote pii na-lalaini tupa lotu lo atalapale nembo toto, sipitisa koo tupamane yakama kilau lo meaini oko yakamato nembo teyai okoni. Andipa yakamato Oli Sipitisa okona piape oko wayumane nembo tapiai lakkae lo nembo teyo.

³ Wuane nembo toto, nambato yakama languato, Gotena Oli Sipitisa oko wandakali mindinga atoto, piape pua ateando, wandakali okonemane Jisasa bala yuu koo okona peakale na-lalane. Dee, Oli Sipitisa ata napene wandakali tupamane katulo Jisasa bala Akali Andane oko ateya na-lalaini teke. Jia.*

⁴ Gotena piape mindipene-mindipene pulane tai-lene kambua eya tekeko, Oli Sipitisa mindiki angu ateya okomane piape pulane tai-lene utupane tale puato, wandakali mindiki-mindiki lo maiyane.*

⁵ Wandakali mindiki-mindiki lo Gotena piape mindipene-mindipene tupa piyaini tekeko, Akali Andane mindiki angu ateya okomane wandakali utupane pitakana piape tupa ando atalane.

⁶ Gotena piape pulane mana mindipene-mindipene tupa eya tekeko, Gote mindiki angu ateya okomane balana piape pulane mana mindiki-mindiki lo balana wandakali tupa andawa leya-kola, utupane-mane katulo balana piape utupane pitaka piyaini.

⁷ Kitisene wandakali mindiki-mindiki lo wandakali waka tupa moyakale nemboto, Oli Sipitisa okomane Gotena piape mindipene-mindipene pulane tai-lene kambua tupa tale puato, utupane maiyakola, utupane-mane piape utupane pua atoto, Oli Sipitisa oko utupanenga ateya lo andawa lanale.

⁸ Oli Sipitisa okonemane wandakali minditupa mo wai-ene gulaya eya-kola, utupane-mane Gotena pii oko wayumane nembo toto, Goteto yakama wua piyapape leya lo wandakali tupa mana kuai lo lamai-yaini. Oli Sipitisa mindiki okonemane teke Gotena pii tene tupa wandakali minditupanga andawa leya-kola, utupane-mane Gotena pii tene tupa kuai lo mana lamai-yaini.

⁹ Oli Sipitisa mindiki okonemane teke wandakali minditupana bilipi oko minu tai wete laya alane. Oli Sipitisa mindiki okonemane teke wandakali siki pelene tupa mo atu yolane tai-lene oko wandakali minditupanga maiyane.

¹⁰ Wandakali minditupa-mane metekolo piape tupa peakale nembo toto, Oli Sipitisa mindiki okonemane teke metekolo piape pulane tai-lene okone wandakali utupanenga maiyane. Akali minditupamae Gotena pii oko wandakali tupa kuai lo lamai-yakale nembo toto, Oli Sipitisa mindiki okonemane teke tai-lene okone akali utupane maiyane. Wandakali mindimane mangene mindi peya-angi, sipitisa koo mindimane bala moyo ateya-kola, balato mangene okone katulo peyape, pee Oli Sipitisa okomane bala moyo ateya-kola, balato mangene okone katulo peyape lo wandakali minditupa-mane tatake alalaini. Wuaneko, wandakali minditupa-mane okonetaka yapa lo tale peakale nembo toto, Oli Sipitisa mindiki okonemane tai-lene okone wandakali utupane maiyane. Wandakali minditupa-mane wandakali

yame waka tupana pii lalaini oko mo leakale nembo toto, Oli Sipitisa mindiki okonemane tai-lene okone wandakali utupanenga maiyane. Wandakali minditunga mane wandakali utupanena pii lalaini tupa mopeke leakale nembo toto, Oli Sipitisa mindiki okonemane tai-lene okone wandakali utupanenga maiyane.

¹¹ Oli Sipitisa mindiki okonemane teke Gotena piape utupane pitakana pulane tai-lene tupa tale pukale nembo tolane pua teke tale puato, nanima mindiki-mindiki lo giyane.*

Nanima Pitaka Umbaini Mindiki Ateyama Leane Oko

¹²⁻¹⁴ Kini mindiki angu nimbana umbaini utumane ata naopeya. Jia. Kene mindiki angu nimbana umbaini utumane ata naopeya teke. Nimbana kinipi, kenepi, lenepi, alenepi, okonetaka tupa pitaka mina mindiki lene oko nimbana umbaini utumane ateya. Nimbana umbaini okona okonetaka kambua atalane tekeko, nimbana umbaini mindiki angu ateya. Wuane pua teke, wandakali yame wakawaka kambua ateyai tekeko, Kataisana sosa oko yame mindiki atoto, umbaini mindiki gulo ateya. Wandakali minditunga mane piape puato, yole mialaini tekeko, wandakali minditunga mane yole mia napene, katapusa atene gulo atoto, wandakali waka tupana piape mee pimaiyaini. Wandakali minditunga Juta yame ateyai. Wandakali minditunga yame waka mindi ateyai. Wuane tekeko, wandakali yame waka-waka nanima pitaka-mane Oli Sipitisa mindiki okona tai-lene oko mialapale nembo toto, Goteto balana Oli Sipitisa okone nanima geane. Nanima ipa mema-angi, Oli Sipitisa okonemane nanima pitaka Kataisana yame mindiki gulaya ya-kola, nanima Kataisana umbaini mindiki gulo ateyama.*

¹⁵ Nimbana kene mindimane nimba languato, namba kini mindi ata naopeyo okonena, namba nimbana umbaini okona ata naopeyo leando, kene okone nimbana umbaini okona mee atolopeya okoni.

¹⁶ Nimbana alene mindimane nimba languato, namba lene mindi ata naopeyo okonena, namba nimbana umbaini okona ata naopeyo leando, alene okone nimbana umbaini okona mee atolopeya okoni.

¹⁷ Nimbana umbaininga alene ata napene, lene angu atapia-yale, nimbato anu puato, pii ale api-yalepe. Nimbana umbaininga ingane ata napene, alene angu atapia-yale, nimbato anu puato, minditunga tupa tunduma api-yalepe.

¹⁸⁻¹⁹ Nimbana umbaini okona okonetaka mindiki angu atapia-yale, okone nimbana umbaini utumane ata napipia-yale. Jia. Wuane tekeko, Goteto nimbana lenepi, alenepi, kinipi, kenepi, okonetaka tupa pitaka mindiki-mindiki lo nimbana umbaini okona ateakale nembo teane pua teke waa puato, ate leaipia.

²⁰ Nimbana umbaini okona minditunga kambua ateya tekeko, nimbana umbaini mindiki angu ateya.

²¹⁻²² Nimbato nimbana umbaini okona okonetaka ateya tupana minditunga tai nalene ateya nembo talene tekeko, utupane ata napipia-yale, okone katu nalapia-yaleko. Nimbana lene okomane nimbana kini oko lamawuato, nimba ata napipia-yale, okone katu lapia-yale nalape-pene. Wuane pua teke, nimbana kawane okomane nimbana kene oko lamawuato, nimba ata napipia-yale, okone katu lapia-yale nalape-pene teke. Jia.

²³ Wandakali-mane nimbana umbaini okona yala-pene tupa andeaindo, nimba yala olowane nembo toto, nimbato utupane wayumane ombo alene. Wandakali-mane nimbana umbaini okona waka minditunga andeaindo, utupane-mane embo olopeyai nembo toto, nimbato utupane yati puyale, tono pilini.

²⁴ Wandakali-mane nimbana lee-inga andeaindo, utupane-mane epele olopeyai nembo toto, nimbato okone mee panakame yakale lo ando kondalene. Nimba tane umbaini okona minditunga mindi anda napi lapi-yale tekeko, okonemane piape andane mindi peakale nembo toto, Goteto nimbana umbaini oko kuai lo waa peaipia.

²⁵ Goteto nimbana kinipi, kenepi, lenepi, alenepi, okone taka tupa yame lapo gulo ata napene, mindi moyaka pua ateakale nembo toto, utupane pitaka mina mindiki loto, nimbana umbaini oko waa peaipia.

²⁶ Tene okonena, nimbana umbaini okona minditunga tandaka peando, nimbana umbaininga atalane tupa pitaka tandaka piyane. Wandakali-mane nimbana kini yandopi, kene yandopi, okonetaka mindi laiyu leaindo, nimbana kini yandopi, kene yandopi, okonemane angu epele naolopeyai. Jia. Nimbato epele olopele.

²⁷ Yakama mindiki-mindiki lo Kataisana kini yandopi, kene yandopi, okonetaka mindi gulo ateyai okonena, yakama pitaka mina mindiki lene atoto, balana umbaini gulo ateyai.*

²⁸ Wamba ini bulupane Goteto sosa okona akali minditunga aposolo akali ateakale leaipia. Lapone balato wandakali minditunga potopisa akali atoto, balana pii

* **12:11:** 1Ko 7:7 * **12:12-14:** 1Ko 10:14-18; Ga 3:26-28

* **12:27:** Lom 12:3-5

lamawua atekale leaipia. Tepone balato wandakali minditupa tisa atoto, balana pii mana lamawua atekale leaipia. Balato metekolo piape piyaini wandakali tupapi, yangone siki pelene tupa mo atu yalaini wandakali tupapi, yangone moyalaini wandakali tupapi, piape ando atalaini wandakali tupapi, yame waka tupana pii lalaini oko mo lalaini wandakali tupapi, utupane pitaka-mane piape utupane pua atekale leaipia.*

²⁹ Goteto piape utupane pitaka tale puato, yakama gea-kola, yakama pitaka aposolo akali ateyaipe. Yakama pitaka-mane balana pii lamawua atalainipe. Yakama pitaka tisa ateyaipe. Yakama pitaka-mane metekolo piape tupa piyainipe.

³⁰ Yakama pitaka-mane wandakali siki pelene tupa mo atu yalainipe. Yakama pitaka-mane wandakali waka tupa moyalainipe. Yakama pitaka-mane wandakali yame waka tupana pii lalaini tupa mo lalainipe. Yakama pitaka-mane wandakali utupanena pii lalaini tupa mopeke lalainipe. Jia.

^{31a} Yakama pitaka-mane wuane napiyaini tekeko, yakama mindiki-mindiki lo Gotena piape epene wete utupanena mindi piwa lakae lo nembo talapape.

Mana Epene Wetete Oko

^{31b} Andipa nambato mana epene wetete mindi yakama langeyo.*

13

¹ Wandakali yame waka tupana pii lolane tai-lene okola, enjole yame tupana pii lolane tai-lene okola, tai-lene okonelapo nambanga yando, okone epene tekeko, nambato wandakali tupa towa epelewa yamapane yo ata napewando, pii nambato lolowa okone mee beto pelene guleandopi, lawiyana pelene guleandopi, okonetaka gulola-kola, utupane katulo moya napulu-payai.

² Nambato Gote lo bilipi leyo nayu loto, balato ati andane peleya tupa lopalu, yuu waka mindinga yata yakale lo pote leyo-kola, balato wuane piyae yando, okone epene tekeko, nambato wandakali tupa towa epelewa yamapane yo ata napewando, namba akali angini mindi jia. Nambato Gotena nembo-tene too pene tupa pitaka andoto, mana waka tupa pitaka andalawane yandopi, Gotena pii lamaulane tai-lene oko nambanga yandopi, okone epene tekeko, nambato mangene utupane pitaka pua atoto teke, wandakali

tupa towa epelewa yamapane yo ata na-piyawane yando, namba akali angini mindi jia.*

³ Nambato wandakali tipia tupa moyoyale, nambana minditaka eya tupa pitaka tale puato, utupane maewando, nambana mana okone epene yolopeya. Anda mindi tola-angi, nambato anda okonena palulaini wandakali tupa taputi pua moyale makande puato, nambana umbaini teakale lo ando kondewando, nambana mana okone epene yolopeya teke. Mana okonelapo epene yolopeya tekeko, nambato wandakali tupa epelewa yamapane yo ata napene, mee tene waka mindi eya-kola, mangene okonelapo pewando, Goteto nambana mana okonelapo andoto, yole epene mindi namba gii napulu-peya. Jia.

⁴ Nanimato wandakali waka tupa towa epelewa yamapane yo atemando, nanimato utupane towa wamba ini kepa naene, utupane towa mana epene tupa minu atape-pene. Nanimato utupane towa epelewa yamapane yo atemando, utupane towa apiangu napipe-pene. Jia. Nanimato utupane towa epelewa yamapane yo atemando, nanima tane wandakali epene wete ateyama nembo toto, nanima tanena gene tupa laiyu nalape-pene. Jia.

⁵ Nanimato utupane epelewa yamapane yo atemando, nanima tane angu nembo toto, utupanenga mana koo tupa wato mina napipe-pene. Jia. Yangone tupamane nanimanga mana koo mindi mineaindo, nanimato utupane towa wamba ini kapoyale yataka wato, utupanena mana koo okone nembo tatawa atapowa ata napipe-pene. Jia.

⁶ Nanimato wandakali waka tupa epelewa yamapane yo atemando, nanimato utupanena mana koo tupa nembo toto, epele aa napipe-pene. Jia. Utupanemanen enene pii leaindo, nanimato epele ape-pene.*

⁷ Yangone tupamane kenda-pene minditupa nanima geaindo, nanimato wandakali utupane towa epelewa yamapane yo atoto, kenda-pene utupane awua atape-pene. Goteto yangone utupanena mana okone mo tika pulupeya lo tungi peyoto, Goteto wuane peakale lo mali yoto, kenda-pene utupane pitaka mee awua, tailo atape-pene.*

⁸⁻¹² Andopane ajako tupamane mana kambua anda na-piyaini pua teke, wamba namba andopane ajako atoto, mana kambua anda napene, andopane-mane

nembo talaini pua nembo toto, utupanemanee pii lalaini pua lewa. Andipa namba anda yalu, akali mini-yene atoto, andopanena mana utupane tepa wato, akali mini-yene tupamane nembo talaini pua nembo toto, utupane-manee pii lalaini pua lalawane. Galasa mindi kalato atene yando, nanimato nanimana lee-inga kuai lo anda na-piyamane pua teke, andipa nanimato Gotena pii mana tupa pitaka kuai lo anda napene, mee anda-geta eyama. Nanimato utupanena minditupa mee anda-geta wato, minditupa lamai-geta eyama tekeko, Akali Andane oko bala lapone epolaaangi, nanimato balana lee-inga andoto, Goteto nanimana wayumane andalane pua teke, nanimato bala wayumane andolopeyama. Bala epola-kola, nanimato bala wayumane wetete andoloma okone angi, balana pii mana anda-geta wato, lamai-geta alamane mana okone koyo pulupeya. Balana pii mana anda-geta wato, lamai-geta alamane mana okonelapo koyo pulaaangi, yame waka mindina pii lalaini oko mo lalamane mana oko koyo pulupeya tekeko, wandakali yangone epelewa yamapane yo atalamane mana oko koyo napulu-peya. Jia.

¹³ Wuane, andipa nanimato wandakali yangone epelewa yamapane yo atalamane mana okopi, Kataisato nanimana molo-peke lolopeya lo bilipi lalamane mana okopi, Goteto nanimana moyo atolopeya lo tungi peyalamanne mana okopi, mana tepo utupane pitaka mineyama tekeko, nanimato wandakali yangone epelewa yamapane yo atalamane mana okonemane mana waka tupa pitaka sia minuto, mana epene wetete mindi eya. *

14

Gotena Pii Lamaima Lakae Lo Nembo Talapape Leane Oko

¹ Yakamoto wandakali yangone tupa towa epelewa yamapane yo atoto, Gotena piape pulane tai-lene Oli Sipitisa okomane giyane tupa yakamoto mia-makale nembo talapape. Wuane nembo toto, Gotena pii kuai lo lamaulane tai-lene oko miaima lakae lo nembo talapape. *

²⁻⁵ Anu peakale nambato wuane leyope. Oli Sipitisa okomane wandakali mindina nembo-tene oko mina ika leya-kola, balato yame waka mindina pii lalaini oko mo loto, pii too pene tupa lalane. Yakama pitaka-mane wuane pua lapiak lakae lo nembo tey়ো tekeko, wandakali mindimane yame waka mindina pii lalaini oko mo lola-kola, mindimane balana pii lolane okone mopeke naleando, wandakali waka

tupamane balana pii lolane okone ale na-olaikola, balato pii okone wandakali utupane lamai napene, Gote angulamaulai-kola pulupeya. Mana okonemane yame waka mindina pii lalaini oko mo lolane akali okonena bilipi oko mo tai laya alane tekeko, wandakali mindimane Kitisene wandakali utupana bilipi oko mo tai laya oyale, wandakali okonena pii lolane okone mopeke naleando, balana pii okonemane wandakali utupane moya napulu-peya. Jia. Wandakali mindimane Gotena pii oko wandakali tupa lamai-yando, balato Kitisene wandakali tupa pitaka moyolopeya. Gotena pii okonemane Kitisene wandakali utupana nembo-tene oko mina ika loto, utupanena bilipi oko mo tai laya olopeya. Wandakali mindimane mini kendawa ateando, Gotena pii okomane balana yamapane oko mo tambo laya olopeya. Wuane, Gotena pii lamaiyane akali okonemane wandakali yame wakana pii lalaini oko mo lolane wandakali oko sia minuto, wandakali tupa wayumane wete moyalane. Tene okonena, yakama pitakamane Gotena pii oko wandakali tupa lamai-pai lakae lo nembo tey়ো.

⁶⁻⁷ Amene imalini ima, wandakali mindimane gita kuai lo naleandopi, pupe kuai lo naleandopi, wandakali-mane anu puato, sojo oko laluape nembo tolo-peye. Wuane pua teke, nambato yakama ateyasinga epoto, wandakali yame waka tupa pii lolowa-kola, yakamoto wandakali yame utupanena pii oko ale aa na-piyaini yando, nambato aki leyape lo yakamoto tatake olailoka, nambana mana okonemane yakama moya napulu-peya. Jia. Wuane tekeko, Goteto balana pii oko namba andawa lola-kola, nambato yakama pii lalaini oko loto, langewandopi, Gotena pii mana layene minditupa yakama mana langewandopi, mana waka mindi yakama langewandopi, mana okonemane yakama moyolo-peya.

⁸ Akali mindimane alo kuai lo naleando, apito ale wato, yanda puyale makande pulu-peye.

⁹ Wuane pua teke, yakamoto wandakali yame mindina pii tika pua nalene, yame waka mindina pii lalaini oko mo loto, pii mindi leaindo, wandakali-mane anu puato, yakamoto wua laluai lo ale olo-peye. Yakamoto pii okone mee wete lolai-kola pulupeya.

¹⁰ Yuu okona pii yame kambua yalane tupa pitakana tene atene teke yalane.

¹¹ Wuane tekeko, wandakali mindimane balana yame okona pii lola-kola, nambato

* 13:13: 1Tes 1:2-3 * 14:1: 1Ko 12:31; 14:39

balana pii okone ale wato teke, pii okone na tene oko nembo natewando, nambato bala wandakali opene mindi ya lo nembo tolopeyo. Balatopi namba akali opene mindi ya lo nembo tolopeya.

¹² Wuane pua teke, yakamatopi wandakali yame waka tupana pii leaindo, wandakali minditupa-mane yakamana pii okone ale wato teke, pii okonena tene oko nembo natolo-peyai. Nambato andeyo-kola, yakamato Gotena piape tupa pimakale nembo toto, Oli Sipitisa okomane Gotena piape utupane pulane tai-lene tupa yakama gipia laka lo nembo teyai-ko. Yakamato Kitisene wandalali tupana bilipi oko mo tai laya amakale nembo toto, Oli Sipitisa okomane piape okone pulane tai-lene tupa yakama gipia laka lo nembo talapape.

¹³⁻¹⁷ Nambato wandakali yame waka mindina pii lalaini oko mo loto, loma yewando, nambana sипитиса okomane loma yolopeya tekeko, nambana nembo-tene oko bala mee pangulu-peyako. Nambato anu pipe-penepe. Namba tanena pii loto, nambana sипитиса okola, nembo-tene okola, lapotaka-mane loma yolopeyo. Dee, namba tanena pii loto, nambana sипитиса okola, nembo-tene okola, lapotaka-mane teke wee lolopeyo. Nimbato wuane napene, wandakali yame waka mindina pii lalaini oko mo loto, nimbana sипитиса okomane angu Gote wayu pele leendo, nimbato Gote wayu pele kuai lo lolope tekeko, wandakali mindimane yame waka okonena pii oko ale aa napiyane yando, nimbato Gote wayu pele lo pote lokoyo pule-angi, nimbato aki lelepe lo bala tatake wato, enene nalolo-peyai. Jia. Nimbana loma yolene okonemane balana bilipi oko mo tai laya na-olopeya. Tene okonena, wandakali mindimane yame waka mindina pii lalaini oko mo loto, pii mindi leando, balato pii lolane okonena tene tupa mopeke lokale loto, Goteto tai-lene okone bala maiyakale lo balato pote lape-pene.

¹⁸ Oli Sipitisa okomane namba moyo ateya-kola, nambato yakama pitaka sia minuto, wandakali yame waka kambua wete tupana pii lalaini tupa mo lalawane okonena, nambato Gote wayu pele leyo.

¹⁹ Wandakali tupamane lotu lo atolai-kola, nambato wandakali yame waka mindina pii lalaini oko mo loto, pii kambua wetete lamalu-wakola teke, utupane-mane nambana pii okone ale na-olopeyai. Tene okonena, nambato wuane napukale. Jia. Wandakali utupane mana lamauwakale

nembo toto, nambato utupanena pii loto, Gotena pii oko utupane lamauwakale.

²⁰ Andopane kambolo tupamane mana koo tupa wato mina-makale nembo natalaini pua teke, amene imalini yame yakamato mana koo tupa wato mina-makale nembo na-talapape. Nambato wuane leyo tekeko, andopane kambolo tupamane Gotena pii oko nembo natalaini pua teke, yakamato Gotena pii oko nembo hatene gulo ata na-piyapape. Jia. Yakama wandakali wai-ene atoto, Gotena pii oko kuai lo nembo tatawa atalapape.*

²¹ Gotena pii pepa pelene eya mindimane loto, matili pii waka lalaini wandakali yame mindi nambana ambulini gulo atoto, nambana pii oko Isatale tane wandakali tupa lamaulai-kola teke, utupamane nambana pii okone ale na-olopeyai. Akali Andane okomane wuane leane layene eya.*

²² Wuaneko, wamba Goteto bala lo bilipi lene wandakali tupa pii mindi lamaeyang, balato wandakali yame waka mindina pii lalaini oko mo naleaipia. Jia. Isatale tane wandakali tupamane Gotena pii okone bilipi naleai-kola, utupane towa yanda peaini akali tupamane yakamana pii lalaini oko loto, Gotena pii oko utupane lamai-yainipia. Goteto wandakali yame waka mindina pii lalaini oko mo loto, balana pii okone bala lo bilipi nalene Isatale tane wandakali tupa lamaiyane okonemane bala utupane towa yataka yane lo andawa leipia. Nanimato Gotena pii oko wandakali yame mindi lamaulama-kola, utupane-mane pii okone bilipi naleaindo, Goteto utupane towa epele eya lo andawa nalolo-peyai tekeko, utupane-mane pii okone bilipi leaindo, balato utupane towa epele eya lo andawa lolopeya.

²³ Wuaneko, yakama pitaka lotu anda okona amunguli puato, wandakali yame waka tupana pii lalaini tupa mo laka pua atolai-kola, Gotena pii mana mia napene wandakali minditupa yandopi, Gote lo bilipi nalene wandakali minditupa yandopi, utupane lotu anda okona kolandaka loto, yakamato wandakali yame waka tupana pii lalaini oko mo loto leyai oko ale wato, yakama kee wato, pii leyai lolopeyai.*

²⁴ Wuane tekeko, alu mindi Gotena pii mana mia napene wandakali mindi yandopi, Gote bilipi nalene wandakali mindi yandopi, wandakali okonepene mindi lotu anda okona epo pitulu-peyai. Epo pitula-kola, yakama pitaka-mane Gotena pii oko wandakali tupa lamawua ateaindo,

yakama pitakana pii lolaini okonemane bala yapa lo tale pula-kola, balato mana koo tupa minalawae yalua nembo tolopeya. *

²⁵ Wuane nembo toto, balana yamanapenga nembo-tene koo too pitane atalane tupa panakame yola-kola, balato Gote yakama towa atu ateya lalu, tombawua loto, Gotena gene oko laiyu lolopeya.

Lotu Loto, Mana Tika-pene Tupa Kuai Lo Wato Minalapape Leane Oko

²⁶ Wuane, amene imalini yame yakamato lotu loyale amunguli pulai-angi, yakama mindiki-mindiki lo piape mindi pipe-pene. Yakamana mindimane sojo mindi yandopi, wee mindi yandopi, mindi lape-pene. Mindimane wandakali tupa mana lamaipe-pene. Goteto wandakali mindinga pii mindi lapana yando, wandakali okonemane pii okone lape-pene. Mindimane wandakali yame waka mindina pii lalaini oko mo loto, pii mindi leando, mindimane balana pii okone mopeke lape-pene. Yakamato Kitisene wandakali tupana bilipi oko mo tai laya oyale, piape utupane pitaka pipe-pene. *

²⁷ Oli Sipitisa okomane wandakali yame waka mindina pii lalaini oko mo lolane tai-lene oko wandakali minditupanga maiyando, lapo akali yandopi, tepo akali yandopi, utupane-mane angu lape-pene. Utupane pitaka-mane pii nimi nami lo laa ombowa nalape-pene. Jia. Mindimane wamba ini pii lokoyo pula-kola, matili mindimane pii laka pipe-pene. Mindimane wandakali yame waka mindina pii lalaini oko mo lola-angi, wandakali mindimane balana pii okone mopeke laka pipe-pene.

²⁸ Mindimane yame waka mindina pii lalaini oko mo loto, pii mindi lokale nembo tola-kola, balana pii okone mopeke lolane wandakali mindi piti naapeando, okone angi, balato wandakali yame waka okona pii lalaini oko mo loto, pii okone nalape-pene. Jia. Matili lotu lokoyo pulai-angi, bala angu Gote towa atu atoto, bala tanena bilipi oko mo tai laya oyale, wandakali yame waka okona pii lalaini oko mo loto, pii okone Gote lamaipe-pene.

²⁹ Yakamato lotu lo atolai okone angi, lapo akali yandopi, tepo akali yandopi, utupane-mane angu Gotena pii oko wandakali tupa lamaipe-pene. Akali utupane mindiki-mindiki lo Gotena pii oko lamawua atolai okone angi, wandakali waka tupamane utupanena pii ale wato, akali utupane-mane Gotena pii oko kuai lo langeyape lo yapa lape-pene. *

³⁰⁻³¹ Wuane tekeko, yakama pitaka-mane Gotena pii okona mana moto, yakamato

wua pipia lakae lo Goteto nembo tala ya lo yakamato nembo tape-peneko. Yakama pitaka mindiki-mindiki lo Gotena pii oko lape-pene. Tene okonena, wandakali mindimane Gotena pii oko alewa pitula-kola, Goteto pii mindi wandakali okonenga lapana yando, wandakali okonemane pii okone leakale nembo toto, Gotena pii langu atola akali okomane balana pii wamba ini lokoyo piyu, pii nalene pitipe-pene.

^{32-33a} Yakamato lotu lo atolai-angi, yakamato mana tika-pene tupa wato mina napene, mangene minditupa mee piki pua ateaindo, Goteto yakamana mana okone epele na-olopeya. Jia. Yakamato mana tika-pene tupa wato minuto, lotu lapiai lakae lo balato nembo teya-ko. Goteto balana pii lamaulane tai-lene oko akali mindi maula-kola, akali okonemane katulo tailene okone ando atoto, pii okone matili lokale lo maliyo atape-pene.

^{33b-34} Gotena pii mindi Mosesato pepa peleane okona leya pua, wanda tupamane akalini tupana pangosa pitipe-peneko. Amunguli pitane tupa pitaka-mane mana mindi yata wato, wandakali tupa lotu lo pitulai-angi, wanda tupamane pii nalape-pene leainipia. Tene okonena, yakamato lotu lo pitulai okone angi, wanda tupamane pii nalene, akali tupana pii alewa pitipe-pene. *

³⁵ Yakamato lotu lo pitulai-angi, wanda mindimane pii mindi taimane leando, balato mana yala-pene mindi minulakola pulu-peyako. Wanda mindimane mana mokale nembo teando, matili lotu lokoyo pulai-angi, bala andaka poto, balana akalini oko tipa pipe-pene.

³⁶⁻³⁷ Oli Sipitisa okomane nembo waka mindi nanima geya nembo toto, wandakali minditupa-mane pii nambato pepa peleyo oko wato mina napimakale nembo tolaini. Dee, Wandakali minditupaga yakama tane potopesa akali ateyama lo nayuto, nambana pii oko wato mina napimakale nembo tolaini teke. Wandakali mindimane wuane nembo teando, Akali Andane okomane mana utupane yata wato, utupane wato minalapape lea-kola, nambato pii oko pepa peyoye leya nembo toto, balato pii utupane wato minu atape-pene. Pee, yakamato angu Gotena pii oko ale yaipe. Pee, yakama tane wamba ini bulupane Gotena pii oko leainipie. Jia wete. *

³⁸ Wandakali mindimane nambana pii okone ale wato teke, wato mina naapeando, bala potopisa akali mindi ya lo nembo natalapape. Jia.

* ^{14:26:} 1Ko 12:8-10

* ^{14:29:} 1Tes 5:21-22

* ^{14:33b-34:} 1Ko 11:4-7; 1Ti 2:11-15

* ^{14:36-37:} 1Jo 4:6

³⁹ Nambana amene yame yakamoto lotu lolai-angi, yakamoto Gotena pii oko wandakali tupa lamaima lakae lo nembo tape-pene. Mindimane wandakali yame waka mindina pii lalaini oko mo loto, Gotena pii mindi lokale nembo teando, yakamoto jia nalape-pene.

⁴⁰ Balato pii okone leakale lo ando kondape-pene tekeko, yakamoto mana tika-pene tupa kuai lo wato minuto, mangene utupane pitaka piyapape.

15

Kataisa Bala Malinga Ika Leane Oko

¹⁻² Amene imalini yame, wamba nambato Gotena pii layene epene oko yakama langewa-kola, yakamoto pii okone alewa moto, bilipi leai okoni. Andipapi, yakamoto pii okone bilipi loto, pii okonena tokonga ateyai. Kataisa bala malinga ika nalea-yale, yakamoto pii okone bilipi leai-kola teke, yakamana bilipi okonemane dini epene mindi lia napipia-yale tekeko, Kataisa bala malinga ika lea-ko. Yakamoto Gotena pii layene epene nambato yakama langewa oko mina duli latawa ateaindo, Goteto yakama molo-peke lolo-peyako. Yakamoto pii okone mina duli latawa atalapale nembo toto, nambato yakamana nembo-tene tupa mina ika loto, pii okone yakama langulu-peke leyo.

³ Gotena pii pepa pelene eya mindimane leya pua teke, Kataisato nanimana koo piyamane tupa apoyale omeaipia. Namba tane pii andane wete okone wamba ini mana moto, yakama langewa okoni. *

⁴ Kataisa mali pitane atea-kola, Gotena pii pepa pelene eya mindimane leya pua teke, ole teponena Goteto bala malinga ika laya yaepia. *

⁵ Kataisa malinga ika lea-kola, Pitato bala andeapia. Matili aposolo akali alesa tupa-manepi bala andeaini tekepia. *

⁶ Alu mindi bala lo bilipi lene wandakali andete yaunga dee minditupa-mane yuu mindikinga amunguli pua atoto, bala andeaini-pia. Wandakali utupanena minditupa omapiai tekeko, kambua wete mee saka ateyai.

⁷ Matili Jemesato bala andea-kola, alu mindi aposolo akali tupa pitaka-mane bala andeaini-pia. *

⁸ Wandakali utupane pitaka-mane bala ando koyo penenga, nambato bala andewa. Andopane mandulane oto oko epeya-kola teke, wanda minditupa-mane andopane wamba ini kapoyale mandi napene, maliyo pituto, matili yale mandiyaini. Wuane pua

teke, namba aposolo akali mindi atolane oto oko epea-angi, namba aposolo akali wamba ini ata napene, maliyo atalu, matili yale aposolo akali mindi gulewa. *

⁹ Wamba namba aposolo akali ata napewa-angi, nambato kenda-pene andane minditupa Gotena sosa oko maiwane okonena, andipa aposolo akali waka tupa pitakana namba napinga ateyo-kola, wandakali-mane namba aposolo akali ateyai nalape-pene. Jia. *

¹⁰ Wuane nalape-pene tekeko, Goteto namba ondowa moyoto, aposolo akali atape leane okonemane balato mee katapusa piape pua apia napeane. Jia. Namba aposolo akali mindi atoto, aposolo akali waka tupa pitaka sia minuto, piape tailo wete piyawane. Namba tanena tai-lene mindimane piape utupane na-piyawane. Jia. Goteto namba ondowa moyoto, namba minu tai laya eya-kola, nambato balana piape utupane piyawane. *

¹¹ Tene okonena, nambato Gotena pii oko yakama langewandopi, aposolo akali waka tupamanne Gotena pii oko yakama langeain-dopi, okone angini mindi jia. Nanimi pitaka-mane Jisasa bala omalu, malinga ika leane lo yakama langema-kola, yakamoto pii okone bilipi leai okoni.

Wandakali Omene Tupa Malinga Ika Loloeyai Leane Oko

¹² Goteto Kataisa malinga ika laya yane loto, nanimato yakama langeyama-ko. Anu peakale yakamana minditupa-mane wandakali omene tupa katulo malinga ika nalolo-peyai lalainipe.

¹³ Goteto katulo wandakali omene tupa malinga ika laya naya-yale, balato katulo Kataisa malinga ika laya naya-yale.

¹⁴ Goteto katulo Kataisa malinga ika laya naya-yale, balato wuane peane lo nanimato yakama langema okone mee gulea-yale. Pii nanimi yakama langema okone mee gulea-yale, yakamoto bala lo bilipi lalaini oko mee gulea-yale teke.

¹⁵ Wamba nanimato yakama languato, Goteto Kataisa malinga ika laya yane langema tekeko, Goteto wandakali omene tupa katulo malinga ika laya na-alane piayale, balato katulo Kataisa malinga ika laya naya-yale. Balato Kataisa malinga ika laya naya-yale, nanimi owato pii lalamane akali tupa ataima-yale.

¹⁶ Goteto katulo wandakali omene tupa malinga ika laya naya-yale, balato katulo Kataisa malinga ika laya naya-yale.

¹⁷ Goteto Kataisa malinga ika laya naya-yale, yakamoto bala lo bilipi lalaini mana

* **15:3:** Ais 53:5-12 * **15:4:** Mt 12:40; Ap 2:24-32 * **15:5:** Lk 24:34; Mt 28:16-17 * **15:7:** Lk 24:50 * **15:8:** Ap 9:3-6 * **15:9:** Ep 3:7-10; 1Ti 1:15 * **15:10:** 2Ko 11:23

okomane yakama moya napiapia-kola, yakamato koo piyaini tupana yole koo tupa yakama tanenga mee yapia-yale.

¹⁸ Wuaneko, Goteto Kataisa malinga ika laya naya-yale, Kataisa bilipi lene wandakali wamba omeaini tupa Gote towa atu a napene, yuu koo okona atoto, tandaka no atapowa atapea-yale.

¹⁹ Nanimato wandakali minditupa ondo ape-pene tekeko, nanimato yuu okona angu epene atamakale nembo toto, Kataisato yuu okona minditaka epene tupa angu nanimaa geakale lo maliyo atemando, wandakali-mane nanimaa ondo wetete ape-pene.

²⁰ Goteto Kataisa malinga ika laya naya-yale, wandakali-mane nanimaa ondo wete ape-pene gulea-yale tekeko, Goteto bala malinga ika laya yaepia. Eenga tomo kambua eya-kola teke, wandakali-mane minditupa wamba ini mandiyaini. Wuane pua teke, wamba wandakali kambua omeakola teke, Goteto Kataisa wamba ini malinga ika laya yaepia.

²¹⁻²² Akali Atame mambele, Goteto wandakali omalamane mana oko mina ika lea-kola, wandakali nanimaa pitaka omalamane. Wuane pua teke, Akali Kataisa mambele Goteto wandakali malinga ika lalaini mana oko mina ika loto, matili balana yame wandakali tupa pitaka malinga ika laya wato, saka atapowa ateakale lo ataya olopeya.*

²³ Eenga tomo kambua eya-kola teke, wandakali-mane minditupa wamba ini mandiyu, matili waka tupa mandiyaini. Wuane pua teke, Goteto Kataisa wamba ini malinga ika laya alu, matili Kataisa bala dee lapone epola-angi, balato balana yame wandakali pitaka malinga ika laya wato, utupane saka atapowa ateakale lo ataya olopeya.*

²⁴⁻²⁵ Kataisa bala kinji gulo atoto, pitaka taka ando atama pulu, balana yanda-pene tupa pitaka sia minuto, utupane balana pangosa ataya olopeya. Okone angi, balato gapomane tupa pitakapi, sipitisa koo tupa pitakapi, waka minditaka tai-lene tupa pitakapi, utupane pitaka koyo piya wato, minditaka pitaka eya tupa ando atolane piape oko Ayiane Gotena kininga yata olopeya.*

²⁶⁻²⁷ Goteno pii pepa pelene eya mindimane loto, Goteto minditaka eya tupa pitaka Kataisana pangosa yakale leane layene eya. Wuaneko, Kataisato balana yanda-pene waka tupa pitaka koyo piyaike wete lalu, wandakali omalamane mana okopi koyo piya olopeya teke. Goteto

pitaka taka Kataisana pangosa yakale leane tekeko, bala tane Kataisana pangosa ata napeane nembo teyama. *

²⁸ Matili Goteto waka minditaka eya tupa pitaka Kataisana pangosa yata yiake lola okone angi, Goteto minditaka eya tupa pitaka wetete ando ateakale nembo toto, balana Iwanane oko Gotena pangosa atolopeya.

²⁹ Wandakali wamba ipa mia napene omeaini tupa ipa mene guleakale nembo toto, wandakali minditupa utupanene panda moto, ipa mialaini. Wandakali omene tupa katulo malinga ika nalolo-peyai yando, anu peakale wandakali minditupa-mane utupane moyoyale, ipa mialaini.

³⁰ Utulu, otongapi, nanimaa aposolo akali tupamane Kataisana piape tupa pua ateyama-kola, akali minditupa-mane yataka wato, nanimaa peyo ome lamakale nembo talaini-ko. Wandakali omene tupa katulo malinga ika nalolo-peyai yando, anu peakale nanimaa omolomane lo yuku naene atoto, piape okone pua atalamanepe. *

³¹ Amene imalini yame, nambato pii enene wete mindi yakama langeyo. Nanimana Akali Andane Jisasa Kataisa mambele, nambato balana piape pua ateyo-kola, yakama balana yame ateyao nembo toto, namba tanena gene oko laiyu leyo. Ole dindi lo nambato balana piape pua atoto, omape-pene gulo atalawane.

³² Namba omewando, namba malinga ika lolopeyawa nembo toto, wamba namba omolowane lo yuku naene atoto, Epesesa tano okona tane akali yia kapua gulene tupa towa yanda pewa. Nambato yuu okona wandakali tupamane nembo talaini pua nembo toto, wuanewe yale, nambato yole aki mindi mewa-yalepe. Wandakali omene tupa katulo malinga ika nalolo-peyai yando, nanimaa omoloma-angi, matili nanimaa malinga ika nalene, tomo dee lapone nanolo-peyama. Matili tomo nanolo-peyama pia-yale, andipa nanimato ulia ipa ima kambua naka pua atamakale laima-yale.*

³³ Wandakali mindi bala koo piyaini wandakali tupa towa atu ateando, utupanemanee balana mana epene tupa minu koyolo-peyai. Koo piyaini wandakali minditupa-mane yakama minakasa oyale, wandakali omene tupa malinga ika nalolo-peyai leyai. Utupane-mane yakama minakasa yakale lo yakamato ando konda aa na-piyapape.

* ^{15:21-22:} Lom 5:12-13 * ^{15:23:} 1Tes 4:15-16; Lap 20:5

* ^{15:24-25:} Mt 22:43-44

* ^{15:26-27:} Lap 20:14-15;

Sam 8:6 * ^{15:30:} Lom 8:35-36 * ^{15:32:} Ais 22:13

³⁴ Yakamana minditupa-mane Gote lo nembo natene, mana koo minditupa wato minu atalaini. Yakamoto kuai lo nembo toto, mana koo utupane awua tepa alapape. Yakamoto yala wato, mana koo utupane kondalapale nembo toto, nambato pii utupa leyo.

Nanimana Umbaini Waka Mindi-pene Atolopeya Leane Oko

³⁵ Nambato wandakali omene tupa malinga ika lolopeyai leyo-kola, wandakali mindimane namba tipa puato, mindimane anu puato, wandakali omene tupa malinga ika laya olo-peyape. Utupane umbaini anupene mindi atene ika lolopeyaipe lolopeyai.

³⁶ Wuane lola-kola, nambato balana pii okonelapo yano peyoto, nimba akali kee eue gulo atoto, pii okonelapo tipa pele lolopeyo. Nimbato tomo waini mindi yandole-kola, waini okone wamba ini omene gulo nayando, Goteto okone dee lapone saka ataya na-olopeya. Jia. Tomo waini okone wamba ini omene gulolakola, balato okone dee lapone saka ataya ollopeya.*

³⁷ Nimbato kanapa itane okopi, masiane tupapi, minditaka matili atolane utupane pitaka atene yanda napilini. Jia. Nimbato kanapa waini tupa angu yandalene. Nimbato eenga tomo waka minditupana waini tupa angu yandalene teke.

³⁸ Nimbato kanopa waini mindi yandelekola, Gote bala tane nembo teya pua, waini okone yoko pua atekale lalane. Bala tane nembo teya pua, tomo waini yame mindiki-mindiki lo mana waka minu yoko pua atekale lalane teke.

³⁹ Ema-pene yame tupa pitakana umbaini mindiki okonepene teke ata napiyane. Jia. Wandakali tupana umbaini waka mindi-pene eya-kola, yia tupana umbaini waka mindi-pene teke, eka tupana umbaini waka mindi-pene teke, pisa tupana umbaini waka mindi-pene teke ataka piyane.

⁴⁰⁻⁴¹ Nanimato minditaka ati kenga ateyama tupa andeyama-kola, utupane mindiki-mindiki lo yati waka mindi-pene pitane atalane. Nai ateya oko waka mindi-pene atalane. Ana ateya oko waka mindi-pene teke atalane. Kaiyanda mindiki-mindiki lo waka-waka atalaini. Nanimato minditaka yuu okona eyai tupa andeyama-kola, utupanena yati waka mindi-pene teke pitane atalane.

^{42-44a} Wuane pua teke, Goteto wandakali mindi malinga ika laya ola-angi, balana umbaini oko waka mindi-pene gulolopeya. Wandakali mindina umbaini oko yuu

okona tawe eya okonena, bala yuu okona atola-angi, balana umbaini tai nalene atola-kola, bala omolo-peya. Bala omola-angi, balana umbaini oko koo gulolakola, nanimato bala mali pulu-peyama. Mali puluma-kola, balana umbaini oko koyolo-peya tekeko, matili Goteto bala malinga ika laya ola-angi, Gotena Sipitisa okomane balana umbaini oko dee lapone saka ataya ola-kola, balana umbaini okone tai-lene wete atolopeya. Okone angi, balana umbaini okone epene wete atoto, katulo dee lapone koya napulu-peya. *

^{44b-45} Gotena pii pepa pelene eya mindimane loto, Goteto akali bulupane Atame oko waa puato, saka ataya yane layene eya tekeko, Atame koyo pua ateane oko balato wandakali saka atapowa atekale lo ataya alane sipitisa mindi gulea. Wuaneeko, andipa nanimana yuu okona atoto, umbaini ata-pata saka ateyama tekeko, matili Gotena Sipitisa okomane nanimana umbaini oko mo lawa puato, nanimana saka atapowa atekale lo ataya ollopeya. *

⁴⁶ Matili balato wuane pulupeya tekeko, Gotena Sipitisa okonemane nanimana umbaini oko wamba ini bulupane saka atapowa atekale lo ataya na-olopeya. Jia. Wamba ini bulupane nanimana yuu okona tawe umbaini oko ata-pata saka ateyama. Matili Gotena Sipitisa okomane nanimana umbaini oko saka atapowa atekale lo ataya ola-kola, nanimana umbaini okone ata-pata atolo-peyama.

⁴⁷⁻⁴⁸ Wamba Goteto yuu moto, akali bulupane oko waa pea-kola, bala yuu okona tawe akali mindi ateapia-ko. Yee okona wandakali nanimana pitaka yuu okona tawe akali bulupane tewa ateane Atame okonepene ateyama. Atame lapone Jisasa bala ati kenga atala epeaipia. Ati kenga atolai wandakali tupa pitaka ati kenga atala epeane Atame lapone okonepene atolopeyai.

⁴⁹ Andipa nanimana yuu okona tawe Atame okonepene ateyama. Wuane pua teke, matili nanimana ati kenga tawe atala epeane Atame okonepene gulolo-peyama.

⁵⁰ Amene imalini yame, ati kenga yuu epene Goteto ando atalane oko koyo napene, yapowa yalane tekeko, nanimana umbaini tundupa-la, okonelapo koyalane. Tene okonen, umbaini okopene ata-pata nanimana katulo balana yuu epene okone kolandaka nalolo-peyama lo nambato yakama langeyo.

⁵¹⁻⁵³ Nanimana umbaini okonepene ata-pata Gotena yuu epene okona katulo kolandaka nalolo-peyama okonena, nanimana umbaini tupa lawa puato, koya napene,

saka atapowa atolane umbaini tupa gulape-pene. Tene okonena, nambato pii too pene mindi yakama langeyo oko ale alapape. Nanimana pitaka oma napulu-peyama jia. Minditupa saka atolo-peyama tekeko, nanimana pitakan umbaini tupa lawa puato, waka mindi-pene gulolo-peyai. Matili enjole mindimane biakulu mindi peyola-kola, Goteto wandakali omene tupa malinga ika laya olopeya. Okone angi, balato utupanena umbaini tupa mo lawa pula-kola, utupane katulo dee lapone koyoto oma napulu-peyai. Enjole okonemane biakulu okone peyola-angi, wamba ini kapoyale wetete Goteto nanimana oma napene, mee saka atoloma wandakali tupana umbaini mo lawa pula-kola, matili-matilipi nanimana katulo dee lapone koyoto, oma napulu-peyama. Jia.*

⁵⁴⁻⁵⁶ Gotena loo okomane nanimana languato, yakamato mana koo tupa wato mineaindo, yakama omolo-peyai leya. Wuaneko, mana koo nanimato minalamane tupamanne loo okona tai-lene moto, yandate yale gulo atoto, nanimana peyo ome lalaini. Wuane tekeko, Gotena pii pepa pelene eya mindimane loto, Goteto wandakali omalaini mana oko yanda pimawuato, sia minea-kola, wandakali omaya olane yandate mindi naeya. Tene okonena, mana koo minalamane tupamanne, nanimana sia mina napulu-peyai layene eya. Andipa nanimana umbaini koyoto omolane tekeko, matili Goteto nanimana umbaini oko mo lawa puato, dee lapone koya napeakale loto, nanimana saka atapowa ateakale lo ataya ola-angi, Gotena pii pepa pelene eya okone enene gulolopeya.*

⁵⁷ Nanimana Akali Andane Jisasa Kataisato nanimana koo piyamane tupa apoyale omoto, wandakali omolomane mana oko sia minea-kola, nanimato Gote wayu pele leyama.

⁵⁸ Tene okonena, nambana yamapanne yene amene imalini yame yakamato pii nambato yakama langeyo tupa bilipi leyama nayu loto, mindimane yakamana bilipi okone mo lawa pulane. Waiwa ando atalapape. Yakamato Akali Andane okona piape pua ateyai oko mee katapusia piape pua apia napeyama nembo toto, ole dindi lo balana piape tailo pua atalapape.

16

Muni Minditupa Mo Amunguli Piyapape Leane Oko

¹ Wamba Galesia yuu okona sosa tupamane Gotena wandakali Jutusaleme tano

okona ateyai tupa moyoyale, muni minditupa maipe-pene nembo toto, nambato asini mindi utupane andawa loto, wua piyapape lewa. Andipa yakamatopi wuane teke piyapale nembo toto, nambato pii mindi yakama langeyo. *

² Yakamato wandakali utupane moyoyale, muni minditupa wamba ini mo amunguli naapeaindo, matili namba epolowa-angi, yakamato muni utupane mo amunguli puyale, ayiawa wete piape okone pipe-pene yolopeya. Wuane napimakale nembo toto, satete dindi lo yakama mindiki-mindiki lo muni molai tupa tale puato, wandakali tipia utupane moyoyale makande puato, minditupa tako pua yatawa atalapape.

³ Namba epolowa-angi, akali minditupamane muni utupane mandiyu, Jutusaleme peakale lo, yakama tane akali utupane makimi lolopeyai. Makimi lolai-kola, nambato pepa minditupa peyoto, akali utupane mindiki-mindiki lo pepa mindi mawuato, utupane-mane muni utupane mandiyu, Jutusaleme peakale lolopeyo.

⁴ Namba tane Jutusaleme pupe-pene guleando, akali utupane namba towa atu polo-peyama.

Nanimana Epolo-peyama Leane Oko

⁵⁻⁹ Nambato Epesasa tano okona ato, Gotena piape pua atola nembo toto, Gote bala tane asini andane mindi lumbu tega ya-kola, andipa wandakali kam-bua Kitisene guleyai tekeko, wandakali minditupa-mane nanimana yanda pinguato, piape okone kondalapa leyai. Tene okonena, namba Kitisene wenene tupa minu tai layawa atokale nembo toto, Epesasa tano oko wamba ini tega naene, Pendokosa oto epola oko ando molopeyo. Matili namba Masetonia potopinjia okona moyoyale asini polowa-angi, namba Kotini asini okona epewando, namba oto mindilapo angu yakama towa atu atalu, Masetonia potopinjia okona pupe-pene gulolo-peyai. Wuane tekeko, namba oto mindilapo angu yakama towa atu napukale. Jia. Namba yakama towa atu satete minditupa atauwa lakae lo nembo teyo. Akali Andane okomane namba wuane pula lo ando konda yando, nambato wuane pukale. Wuaneko, namba Masetonia potopinjia okona wamba ini pulu, matili asini okonena epoto, yakama atolainga epolopeyo. Matili namba epo atalu, yuu waka mindisa moyoyale atolowa-angi, namba yuu okonena pola nembo toto, yakamato namba moyolapale nembo teyo. Wuane nembo toto, nambato satete minditupa yakama towa atu atauwa

* **15:51-53:** 1Tes 4:15-17; Mt 24:31; 2Ko 5:2-4 * **15:54-56:** Ais 25:8; Ose 13:14; Lom 7:12-13 * **16:1:** Lom 15:25-27; 2Ko 8:1-9

lakae lo nembo teyo. Yuu oko upa wete peya-kola, popo andane lo awua epalane ana tupa epo koyo peakale loto, namba yakama towa atokalepe, ata napukalepe lo nambato nembo nateyo. *

¹⁰⁻¹¹ Nambato Akali Andane okona piape piywane wuane pua teke, Timoti balatopi Akali Andane okona piape piyane. Wuaneko, wandakali mindikipi mindimane bala akali mee mindi ya lo nembo toto, anda napi nalape-pene. Jia. Matili bala yakama ateyainga epeando, bala yakama towa atu atoto, yuku naene ateakalenga, yakamoto ando atalapape. Bala Kitisene amene minditupa towa atu namba ateyonga epeakale lo nambato maliyo ateyo. Tene okonena, bala yakama towa atu atalu, mini epene paluto, namba ateyonga peke leakale nembo toto, yakamoto bala moyalapale. *

¹² Ole kambuang nambato nanimana Kitisene amene Apolosa lamawuato, nimba Kitisene amene waka tupa towa Kotini tano okona puu laka piwa tekeko, balato yakama ateyainga na-epokale nembo toto, jia laka pipia. Wuane tekeko, matili bala epolane oto epene mindi epola-angi, bala yakama ateyainga epolopeya. *

Pii Lokoyo Pua Leane Tupa

¹³ Yakama yuku naene, Kitisene yame tai atalapape. Wandakali mindimane yakama bilipi oko minu koyolane. Waiwa ando atalapape.

¹⁴ Yakamoto wandakali yangone tupa towa epelewa yamapane yo atolaini mana oko wato minuto, mangene yakamoto pulai tupa pitaka piyapape.

¹⁵⁻¹⁶ Amene imalini yame, yakamoto akali Sepanasa balana yame ima, utupane nembo teyai okoni. Utupane-mane Akaya potopinjia tane wandakali waka tupa pitaka sia minuto, wamba ini bulupane Kitisene gulalu, yakama tane Gotena wandakali tupa moyo atamakale nembo toto, wuane pua ateyai lo yakamoto nembo teyai teke. Yakamoto wandakali utupanepi, Gotena piape tailo piyaini wandakali waka tupapi, utupanena pii wato minape-pene leyo. *

¹⁷ Yakama pitaka-mane katulo namba andolo naepolo-peyai nembo toto, akali Sepanasapi, Potunasapi, Akaikusapi, utupane-mane yakama pitakana panda moto, namba atalawane okona epeai-kola, namba epele ewa.

¹⁸ Utupane-mane epoto, nambana yamapane mo tambo laya yaini okomane yakama yamapane mo tambo laya yaini teke.

Yakamoto akali okonepene tupana gene tupa laiyu lapapape.

¹⁹ Esia potopinjia okona sosa waka-waka ateyai tupa pitaka-mane yakama kuai lo atalapape leyai. Akuwilapi, Pitisislapi, okone-lapona andaka amunguli piyaini Kitisene wandakali tupapi, utupane Akali Andane okona yame atoto, yakama towa epele wato, yakama kuai lo atalapape leyai. *

²⁰ Kitisene wandakali palu peyai tupa pitaka-mane yakama kuai lo atalapape leyai. Yakama teke-teke mindi akali epele aka puato, pitaka-mane sikane laka piyapape.

²¹ Namba Poloto yakama kuai lo atalapape loto, namba tanena kini-mane pii oko angu pepa okona peleyo.

²² Wandakali mindimane Akali Andane oto towa epelewa yamapane yo ata napeando, bala yuu koo okona peakale. Akali Andane, nimba ipu. *

²³ Akali Andane Jisasato yakama ondo wato, moyo atekale.

²⁴ Yakama pitaka Jisasa Kataisana yame ateyai okonena, nambato yakama pitaka towa epelewa yamapane yo ateyo.

* **16:5-9:** Ap 19:8-10,21-22; Lom 15:24; 2Ko 2:12 * **16:10-11:** 1Ko 4:17; 1Ti 4:12 * **16:12:** 1Ko 3:6 * **16:15-16:** 1Ko 1:16 * **16:19:** Ap 18:2,18,26 * **16:22:** Ga 1:7-10

2 KOTINI

Poloto Kotini Tane Tupana Pepa Lapone Peyo Pee Leane Oko

¹ Namba Polo. Goteto namba Jisasa Kataisana aposolo akali atola nembo tea-kola, namba balana aposolo akali ateyo. Amene Timoti nalipato Gotena sosa Kotini tano okona ateya okopi, Gotena wandalakali Akaya potopinjia okona ateyai tupapi, yakama pitakana pepa oko peyo epe leyapa.

² Nanimana Ayiane Gote-la, Akali Andane Jisasa Kataisa-la, okonelapo-mane yakama ondowa moyoto, yakamana yamapanne mo tambo laya yakale lo pote leyapa.

Poloto Gotena Gene Laiyu Leane Oko

³⁻⁷ Wamba Kataisa bala tandaka andane neane pua, nanimapi tandaka andane nalaman tekeko, Kataisana piape peane okomane Goteto nanimana mini mo epene wetete pale lalane. Goteto yakama taputi pua moto, yakamana mini epene mo pale leakale nembo toto, nanimato balana piape tupa pua ateyama-kola, kenda-pene tupa nanimanga epalane. Dee, nanimato kenda-pene awua atalamane pua teke, yakamatopi awua atoto, mini epene palu atalapale loto, Goteto nanimana mini epene mo pale lalane. Dee, nanimanda tandaka no ateyama pua teke, yakamapi tandaka no ateyai oko nembo teyama. Tene okonena, Goteto nanimana mini epene mo pale lalane pua, balato yakamana mini epene mo pale lalane teke nembo teyama. Goteto wuane piyane nembo toto, nanimato yakamapi tailo atolopeyai nemboto ateyama. Wandakali waka tupamane kenda-pene waka-waka tupa awua atolai-kola, nanimato utupanena mini epene mo pale lape-pene. Wuane, andipa nanimanda kenda-pene waka-waka tupa awua ateyama-kola, Goteto nanimana mini epene mo pale lalane. Bala nanimana Akali Andane Jisasa Kataisa okona ayiane oko atoto, Goteto wandakali ondowa moyalane mana okona tene oko bala ateya. Wuane, balato wandakali mini kendawa atalaini tupa pitakana mini epene mo pale lalane. Tene utupane pitaka nembo toto, nanimato Gotena gene oko laiyu lamakale.*

⁸⁻⁹ Amene imalini yame, Goteto wandalakali omene tupa malinga ika laya alane lo nanimato bilipi lalapale nembo toto, nanimanda Esia potopinjia okona atemangangi, balato kenda-pene andane minditupa

nanimanga epeakale lo ando konda yane. Balato ando kondea-kola, nanimato kenda-pene utupane auwa ateaini lo yakamato nembo talapale lo langeyapa. Nanimana tai-lene okomane katulo kenda-pene utupane sia mina napulu-peyama nembo talapale loto, Goteto kenda-pene andane nanimana tai-lene sia minene utupane nanimanga epeakale lo ando konda yane. Wuane pea-kola, jasa mindimane nanimapeyo ome lalapape lene gulene atoto, nanimapeyo omolo-peyama ya lo nemboto atema.*

¹⁰⁻¹¹ Nanimana omoyale pema-kola, Goteto nanimata putpi pua meane. Wuane pua teke, matilipi, balato nanimata putpi pua moyola-kola, wandalakali kambua-mane wayu pele leakale nembo teyama. Tene okonena, andipa Goteto nanimama moyo ateakale lo, wandalakali kambua yakamato loma yo atolai-kola teke, balato nanimama moyo atolopeya lo tungi peyo ateyama.*

Poloto Kotini Tano Okona Kapoyale Napepane Tene Oko

¹²⁻¹³ Nanimato yakama minakasa oyale, pii tene lapo palene tupa pepa peyo epe laa na-piyamane. Jia. Yakamato nanimana pepa tupa dii lo andoto, tene tupa pitaka nembo teyai. Nanimama yuu okona atoto, wandalakali minakasa naene, Gotena mana epene tika-pene tupa wato minu atalamane. Yuu okona wandalakali-mane mana utupane nanimama langi naapeai. Jia. Goteto nanimama ondowa moyoto, mana langeakola, nanimama yakama towa atu atoto, mana epene utupane wayumane wete wato minalamane. Nanimana mini okomane pii okone enene leyai lo nanimama langeyakola, nanimato epele alamane.

¹⁴ Tene okonena, nanimana Akali Andane Jisasa lapone epola-angi, nanimato yakama laiyu lolopeyama pua teke, yakamatopi nanimanda laiyu lolopeyai. Wamba nanimato wuane lema-kola, yakamato pii okone enene ya lo aja mee teke andeai. Matili yakamato pii okone enene ya lo wayumane wete andalapale nemboto teyo.*

¹⁵ Wuane nembo toto, ole lapoai nambato yakama moyoyale, yakama wamba ini andolo epokale nembo tewa.

¹⁶ Yakama andalu, matili namba Masetonia potopinjia okona pulu, dee lapone yakama andolo-peke lokale nembo tewa. Nambato yakama andolo-peke lolowa-angi, namba Jutiya disitiki okona pola lo yakamato namba moyalapale nembo tewa.*

¹⁷ Nambato yakama wamba ini andolo epokale nembo tewa tekeko, matili

* ^{1-3-7:} Lom 15:5-6; Sam 34:19 * ^{1-8-9:} Ap 19:23-24; 1Ko 15:32 * ^{1-10-11:} 2Ti 4:18 * ^{1-14:} 2Ko 5:11-13; Pl 2:14-16 * ^{1-16:} 1Ko 16:5-9

nambato wuane napewa. Tene okonena, yakamato namba mini lapo paluto, wuane pea ya lo nembo teyaipe. Nambana asia lapo yakale lo, nambato yuu okona wandakali tupana mana wato minuto, wamba ini epokale laa, na-epokale laa, peane ya lo nembo teyaipe. Jia. Nambato wuane napewa.

¹⁸⁻²⁰ Wamba Goteto potomisa pii minditupa loto, matili Kataisato wua pulupeya lea-kola, balana iwanane Jisasa Kataisato atu yalua, jia yalua lo pii lapo laka napeaipia. Jia. Balato katu yalua angu loto, Goteto leane pua peapipa. Tene okonena, nanimato Gotena gene oko layu loto, enene, balato wuane peane lalamane. Kataisato atu yalua lalu, jia lalu, pii lapo laa napiyane lo wamba Sailasapi, Timotipi, nambapi, nanimato yakamanga langema. Wuaneko, Goteto mangene pukale lalane tupa enene piyane nembo toto, nanimato mangene mindi pimakale, napimakale lo, pii okonelapo lapotaka laa na-piyamane.*

²¹⁻²² Wamba Goteto yakamapi, nanimata pitaka balana yame atalapale lata yaepia. Wuane piyu, matili balato nanimoyoyale, mangene waka minditupa pukale lo andawa loto, Oli Sipitisa oko nanimana yamapanne okonga epo ateakale leaipia. Balato nanimata pitaka Kataisa towa mina mindiki loto, nanimata minu tai laya alane. Goteto minditaka pukale lalane tupa enene piyane.*

²³⁻²⁴ Yakamato Gote lo bilipi loto, Kitisenai tai atalaini okonena, nanimato yakamana bilipi oko ando atu na-piyamane. Jia. Yakama epelewa atalapale loto, nanimato yakama towa atu piape pua atalamane. Tene okonena, nambato yakamana mini mo kenda piya olowane loto, Kotini tano okona dee lapone wamba ini naepene kondewa. Nambato owato pii naleyo. Goteto andeya.*

2

¹⁻⁴ Wamba yakamana akali mindimane mana koo wetete mindi minu atea-kola, yakamapi balana mana koo okone wato minulaini lo yuku wato, namba mini kenda andane wete wato, yakamana pepa mindi peyo epe lewa. Nambato yakamana pepa okone peyo epe lewa-angi, yakama mini kenda alapale nembo natewa. Jia. Nambato yakama towa wayumane wete yamapanne yo atalawane oko yakamato andalapale nembo toto, namba ai lo atoto, yakamana pepa okone peyo epe lewa. Namba epele eyo-angi, yakama pitaka epele teke alaini nembo tewa. Wuaneko, yakamato

namba mo epele ape-pene tekeko, nambato nembo teyo pua yakamato napulai-kola, namba wamba ini epewando, namba mini kenda olowane nembo tewa. Namba mini kenda olowa-kola, yakamapi mini kenda teke olopeyai. Nambato yakamana mini mo kenda piya olowa-kola, apito nambana mini oko mo epele piya olo-peyape nembo tewa. Tene okonena, namba mini kenda wato teke, dee lapone ini na-epokale nembo toto, yakamato wua piyapape loto, nambato yakamana pepa okone wamba ini peyo epe lewa.*

Akali Okona Koo Apialapape Leane Oko

⁵ Wamba akali mindimane mana koo minu ateane okomane nambana mini mo kenda piya yane tekeko, balato nambana mini angu mo kenda piya naya. Jia. Balato yakama pitakana mini mo kenda piya ya okoni. Nambato kenda-pene andane mindi balanga yata olowane nembo toto, wuane leyo.

⁶ Wandakali yakamana kambua-mane bala takita peakale leai-kola, bala mini kenda wato, mana koo okone konda yaepia.

⁷ Andipa akali okone bala mini kenda andane wetete wato koyolane-ko. Yakamato balana mana koo okone apia-mawuato, balana mini epene mo pale lalapape.

⁸⁻¹¹ Sataneto wandakali minu koyawakale nembo talane oko nanimato nembo teyama. Nanimato wandakali waka tupana mana koo tupa apia-mai napemando, balato nanimata sia minulu-peya. Wuaneko, yakamana akali okonemane mana koo mindi nambanga pea yandopi, Sataneto nanimata sia minulane nayuto, nambato yakama nembo toto, Kataisa wenonga, balana koo okone apia-maewa. Yakamato wandakali mindina koo apia maeyai-kola, nambatopi balana koo okone apia-maiyawane. Yakamato mangene mindi piyapape lolowa-kola, yakamato nambana pii pitaka wato minulu-peyaipe, napulu-peyaipe lo andokale nembo toto, wamba nambato yakamana pepa okone peyo epe lewa. Tene okonena, andipa yakamato akali okone towa epelewa yamapanne yo ateyama loto, mana epene tupa bala andawa lalapape.*

Nanimato Gotena Piape Katulo Piyanane Leane Oko

¹² Wamba nambato Kataisana pii layene epene oko wandakali tupa lamauwayale, Totasa tano okona pewa-angi, nambato wuane pula loto, Akali Andane okomane nambana asia okone lumbu tepa yanga andewa.*

* ^{1:18-20:} Ap 18:5; Lap 3:14 * ^{1:21-22:} Ep 1:13-14; 2Ko 5:5 * ^{1:23-24:} 1Pi 5:3 * ^{2:1-4:} 1Ko 4:21 Ap 20:31
* ^{2:8-11:} Lk 22:31 * ^{2:12:} Ap 14:27 1Ko 16:5-9

¹³ Nambato okone andewa tekeko, nambana amene Taitasa bala Totasa tano okonena ata napea oko andoto, nambana mini epene napalea. Mini epene napalea-kola, bala Masetonia potopinjia okona atolane nembo toto, namba Totasa tane wandakali tupa atalapape lalu, Masetonia potopinjia okona pewa.*

¹⁴ Kataisato nanimoto moyo piape peane mambele, nanimoto Satane sia minala-pale loto, ole dindi Goteto nanimoto atu palane-ko. Nanimoto Gote ando wayu pele lamakale. Goteto nanimoto atu peyakola, Kataisato piape wua peane lo nanimoto mana lamai-yamane. Wandakalimane minditaka yangeaya-kola, tua mindisa palane pua, mana nanimoto lamai-yamane oko yuu pitakana palane.

¹⁵⁻¹⁷ Nanimoto Gotena pii lamai-yamakola, yuu koo okona moyo piape wanda-kali ateyai tupamane pii okone minditaka omene guu piyane pua, guu-pene koo ya lo nembo talaini. Wuane nembo teyai-kola, Gotena pii okonemane wandakali utupane omeakale lalane. Wuane tekeko, Kataisato Gote opa mawuato, minditaka tunduma-pene yangeane pua, nanimoto Gotena pii oko wandakali tupa lamai-yamakola, Goteto nanimana opa okone tunduma alane. Taputi pua mene wandakali tupamane Gotena pii okone ale wato, minditaka saka atene tunduma piyane pua, pii okone epene tunduma-pene ya lo nembo talaini. Wuane nembo teyai-kola, pii okonemane wandakali utupane mo saka atapowa ateakale lo ataya alane. Wandakali kambua-mane muni mia-makale nembo toto, Gotena pii oko bisanisa piape gulo pii lamaima epoko piyaimi. Nanimoto wuane na-piyamane. Nanimoto Gotena wenonga balana pii oko lalamane. Balato piape okone nanimana gea-kola, nanimoto wandakali tupa minakasa naene, balana pii oko tika pua lamai-yamane. Nanimoto Gotena piape okonepene tupa katulo piyamane.*

3

Nanimoto Gotena Piape Katulo Piyamane Leane Oko

¹ Nanimoto Gotena piape oko katulo piyamane leyama okomane pai pua teke nanimana tanena gene tupa laiyu leyamape. Jia. Nanimoto Gotena piape oko katulo piyamane leyama oko yakamatopi enene ya lo nembo talapale nembo toto, wandakali waka tupamane pepa mindi peyoto, yakama geakale lamakale. Pee,

wandakali waka tupamane wuane nembo teakale lo, yakamato nanimana pepa mindi peyoto, utupanenga maiyapape lamakalepe. Jia wete.*

²⁻³ Kataisato piape wua peane lo nanimoto yakama langema-kola, Gote saka atapowa atene okona Sipitisa okomane pepa mindi nanimana nembo tenenga pelea. Wamba balana loo tupa ananga peleane pua, balato ana pata mindina pepa okone peya nape. Jia. Nanimoto Gotena pii yakama langema-angi, Gotena Sipitisa okomane balana pii okone yakamana nembo tenenga pepa okone pelea-kola, yakamato Kataisa lo bilipi leai okoni. Yakamato bilipi leai-kola, wandakali-mane pii pepa pelene eya tupa dii lo andalaini pua, utupane pitaka-mane yakamana bilipi oko andoto, nanimoto Gotena piape oko katulo peyai lo andalaini.*

⁴⁻⁶ Gotena loo pepa pelene eya okomane wandakali omeakale lalane tekeko, Gotena Sipitisa okomane wandakali saka atapowa atolane tene oko giyane. Wuane, Gotena mana wenene okomane balana loo angu wandakali tupanga mai napiyane. Jia. Balana mana wenene okomane Oli Sipitisa oko wandakali tupanga maiyane teke. Goteto nanimana balana mana wenene okona piape akali tupa atalapale loto, nanimana mo atu yane. Tene okonena, nanimana taliene mindimane nanimoto katulo Gotena piape okone piyamane nembo nateyama. Jia. Goteto nanimana minu tai laya eya-kola, nanimoto balana piape oko katulo piyamane. Kataisato piape peane okomane Goteto nanimana moyo ateya-kola, nanimoto katulo balana piape oko piyamane nembo teyama.*

⁷⁻¹¹ Wamba Goteto balana loo tupa ananga pepa peyoto, Mosesanga maya-angi, Moseto Gotena tii-pene oko andoto, Mosesana lee-inga ima tii wetete peaipia. Wamba iiri Mosesana lee-inga tii wetete pea-kola, Isatale tane wandakali tupamane balana lee-inga ima katulo andatawa yapo ape-pene guu naleaipia. Wuane peane tekeko, matili balana lee-inga tii peane oko koyo pima-pima piyu, koyo peaipia. Wandakali-mane Gotena loo tupa ango eyai-kola, Goteto wandakali utupane omeakale lalu, yuu koo okona pulupa lalane. Wamba Gotena loo utupane tii-pene oko towa atu epeaini tekeko, Mosesana lee-inga ima tii peane oko matili koyo pima-pima peane pua teke, andipa loo utupaneman piape piyane okona tii-pene oko koyo pima-pima peya. Nanimoto Gotena

* 2:13: Ap 20:1 * 2:15-17: Lk 2:34-35 2Ko 3:4-6 * 3:1: 2Ko 5:11-13; Ap 18:27-28 * 3:2-3: 1Ko 9:1-3; Ek 24:12;
Jet 31:33; Ese 36:26-27 * 3:4-6: Jet 31:31; 1Ko 11:25; Jo 6:63

pii layene epene oko wandakali lamauwa ateyama-kola, balana Sipitisa okomane wandakali utupane mo tika piyane. Gotena Sipitisa okomane piape piyane okone tii-pene wetete eya-kola, loo okona piape wamba tii peane oko andipa tii napene eya. Gotena Sipitisa okomane piape piyane oko koyo pima-pima napene, piape pua atapowa atalane. Wuaneko, Gotena Sipitisa okona piape piyane okomane Gotena loo okona piape piyane okone sia minuto, tii-pene wetete eya. *

¹²⁻¹⁴ Wamba Mosesana lee-inga ima tii peane oko koyo pima-pima peane oko Isatale tane wandakali tupamane andolaini nembo toto, Mosesato balana lee-inga ima lapa-lapa mindimane ombo yaepia. Balato Gotena loo tupa wandakali utupanenga lamaiyane tekeko, wandakali utupane yakamana yamapane keato yo ateainipia. Andipapi, wandakali-mane pii Goteto wamba lo yata yane oko dii lo andeyai-kola, pii okonena tene tupa lapa-lapa yale mindimane ombo atane atene guleya-kola, utupane-mane pii okonena tene tupa anda na-piyaini. Kataisato lapa-lapa yale okone katulo mo apialane tekeko, wandakali minditupana yamapane keato yo ateyai-kola, lapa-lapa yale okonemane pii okonena tene tupa mee ombo atane eya. Tene okonena, Mosesato balana lee-inga lapalapa-mane ombo wato, piape peane pua nanimato na-piyamane. Jia. Goteto nanimato mo katu laya alane nembo toto, nanimato yuku naene atoto, Gotena pii oko panakame lamai-yamane. *

¹⁵ Andipapi, Isatale tane wandakali tupamane pii Mosesato pepanga peleane tupa dii lo andeyai-angi, lapa-lapa yale mindi yakamana yamapanenga mee yalane.

¹⁶ Wuane tekeko, akali mindimane yamapane peke loto, Akali Andane oko lo bilipi leya-kola, Goteto lapa-lapa yale okone mo apialane. *

¹⁷ Akali Andane leyo okone bala Gotena Sipitisa oko ateya. Bala wandakali mindinga ateya-kola, wandakali okone tinglo mene atalane. *

¹⁸ Nanimana lee-inga ima lapa-lapa mindimane ombo naene ateyama-kola, Akali Andane okomane Sipitisa ateya okona tii-pene oko nanimana lee-inganga epeakale lalane. Epeakale leya-kola, nanimana balana tii-pene oko miama-miama poto, bala yale gulama-lama peyama. Wuaneko, wandakali-mane galasa andolaini pua teke, nanimana andoto, Akali Andane okona tii-pene oko andolaini.

Tene okonena, nanimato yuku naene atoto, Gotena piape oko katulo piyamane.

4

Nanima Yuu-mane Waa-pene Ateyama Leane Oko

¹ Goteto nanimato onto wato, balana piape oko nanimato geya-kola, nanimato balana piape oko puyale, kepa naene, pua atalamane.

² Gotena piape pua atoto, nanimato wandakali tupa andakasa na-alamane. Jia. Nanimato Gotena pii layene oko mo lawa na-piyamane teke. Wandakali-mane too pua mana koo yala-pene piyaini tupa nanimato masia maiyamane. Gotena wenonga ateyama nembo toto, nanimato balana pii enene oko panakame lamai-yamane. Lamai-yamakola, wandakali tupamane nanimana mana okone yapa lo tale puato, nanimato Gotena piape oko kuai lo peyay lo andalaini. *

³⁻⁶ Wamba yuu oko undupi latane atea-kola, Goteto yuu oko waa leakale leaipia. Matili nanimato balana tai-lene oko andalapale loto, balato Kataisana lee-inga nanimanga andawa leane okomane, nanimana yamapane oko tii piya yane. Goteto wuane peane oko nembo toto, nanimato tane wua piyamane na-lalamane. Jia. Jisasana gene oko laiyu lamakale nembo toto, nanimato Kotini tane wandakali yakamana piape akali ateyama lalu, Jisasa Kataisa bala Akali Andane oko ateya lalamane. Kataisa bala Gote paini wetete ateya tekeko, Gote lo bilipi nalene wandakali tupamane balana pii layene epene oko ale wato teke, Kataisana tii-pene oko anda napeakale nembo toto, yuu koo okona tane owato gote Sataneto utupanena nembo-tene oko mo undupi laya alane. Balato wuane peyakola, yuu koo okona moyale wandakali utupane-mane Gotena pii layene nanimato lalamane okona tene oko nembo natene ateyai-kola, pii okonena tene oko too pitane atene guleya. *

⁷ Nanima tanena tai-lene okomane Gotena piape na-piyamane. Jia. Goteto nanimato minu tai laya eya-kola, nanimato katulo balana pii layene epene wetete oko wandakali tupa lamauwa atalamane. Wandakali-mane pii okone enene ya lo andeakale nembo toto, nanimato ipa pene tai lanene yuu-mane waa-pene okonepene gulene atalamane. *

⁸ Nanima yuu-mane waa-pene ateyama-kola, kenda-pene kambua nanimanga epalane tekeko, Goteto nanimato minu

* **3:7-11:** Ek 34:29; Lo 27:26; Lom 1:16-17

* **3:12-14:** Ek 34:33

* **3:16:** Ek 34:34

* **3:17:** Jo 8:36; Lom 8:1-4

* **4:2:** 2Ko 2:15-17; 1Tes 2:5

* **4:3-6:** Ep 2:2; Kol 1:15-16; Ip 1:3; Jen 1:3; Ais 9:2; 2Ko 3:18

* **4:7:** 2Ko 5:1

tai laya eya-kola, kenda-pene utupane-mane nanima minu koya wete napiyane. Kenda-pene kambua nanimanga epeyakola, nanimato nembo kambua talamane tekeko, Goteto nanima moyolo-peya nembo talamane.*

⁹ Wandakali-mane kenda-pene andane tupa nanima giki piyaini tekeko, Goteto nanima awua tepa aa napiyane. Wandakali-mane nanima peyo tepa alaini tekeko, Goteto nanima omalapale lo ando konda napiyane. Jia.

¹⁰⁻¹¹ Nanimato Jisasa nembo toto, Gotena piape okone piyamane. Tene okonena, ole dindi lo akali minditupa-mane nanima peyo ome lamakale nembo talaini. Nanima umbaini tai nalene oko katulo omolo-peya tekeko, wandakali-mane Jisasa bala saka atapowa atolane tene oko ateya lo andeakale nembo toto, akali minditupa-mane nanima Kitisene saka ateyama tupa peyo ome loyale makande peakale lo Goteto ando kondalane. Wuane, wandakali-mane nanimana umbaini tupa andoto, Jisasa bala saka atapowa atolane tene oko ateya lo andeakale nembo talamane. Wuane nembo toto, wamba akali minditupa-mane Jisasa peyo ome leaini pua, matili akali minditupa-mane katulo nanima peyo ome lolopeyai nembo toto, ole dindi lo nanimato Gotena piape pua epoko pua atalamane.*

¹² Wandakali-mane katulo nanima peyo ome lolopeyai tekeko, nanimato Gotena pii layene epene yakama langeyama okomane yakama katulo saka atapowa atolopeyai.

*Nanimato Gote Lo Bilipi Loto, Balana Pii
Lalamane Leane Oko*

¹³⁻¹⁵ Goteto wandakali tupa ondo wato moyalane. Wandakali kambua-mane balana mana epene okone andaka pikli puato, balana gene oko laiyu loto, bala ando wayu pele leakale nembo teyama. Wuane nembo toto, nanimato kenda-pene lalo tupa pitaka awua atoto, yakama moyoyale, Gotena piape pua atalamane. Dee, Akali Andane Jisasa malinga ika laya yane Gote okomane nanimapi, yakamapi, malinga ika laya wato, nanima pitaka balana wenonga atolo ipulupa lolopeya nembo teyama. Gotena pii pepa pelene eya mindimane loto, nambato Gote lo bilipi loto, balana pii oko lewa layene eya. Gotena pii pepa pelene eya okonemane leya pua teke, nanimato Gote lo bilipi loto, balana pii oko lalamane.*

¹⁶⁻¹⁸ Minditaka nanimato lee-mane andalamane tupa ole minditupa yalu,

kapoyale alu piyane tekeko, minditaka nanimato lee-mane anda na-piyamane tupa ole dindi lo yapowa yalane. Tene okonena, minditaka nanimato lee-mane andalamane tupa nembo tatawa ata napene, minditaka lee-mane anda na-piyamane tupa nembo tatawa atalamane. Wuane, kenda-pene minditupa nanimanga epeyakola, nanimato utupane mee aŋako ya lo andalamane. Andipa nanimato kenda-pene utupane mali aŋjalapo minditupa angu awua ateyama-kola, matili Goteto nanima balana yuu epene okona kuai lo wetete atapowa atalapale lolopeya. Nanima kuai lo wetete atoloma okonemane kenda-pene andipa epeya utupane sia minulu-peya. Enene, kenda-pene utupane-mane nanimana umbaini oko minu koyalane tekeko, ole dindi lo Goteto nanimana yamapanes oko mo wenene gulaya alane. Tene okonena, nanimato kepa naene, Gotena piape oko pua atalamane.*

5

¹ Nanima yuu okona ateyama-angi, nanimana umbaini ateya oko sele anda gulene ateya. Mindimane nanimana sele anda okone minu koyando, nanimana anda waka mindi ati kenga ateya nembo teyama. Wandakali-mane anda okone napeaini. Jia. Gote bala tane anda okone peane. Nanimana anda ati kenga ateya okone atapowa atolopeya nembo teyama.*

²⁻⁴ Anu peakale nanimato wuane nembo teyama. Nanimana umbaini ateya oko tepa aimakae lo nembo nateyama tekeko, nanimana umbaini andipa ateya oko mee sele anda mindi gulene ateya-kola, nanimato kenda-pene kambua awua atoto, mini kendawa atalamane. Nanima omoloma-angi, umbaini wenene mindi memando, nanimana tandini oko tona napene, papata ata napulu-peya nembo teyama. Wuane, nanimato omoloma-angi, umbaini saka atapowa atolane mindimane nanimana umbaini omola okona panda meakale nembo teyama. Wuane nembo toto, nanimato tona piyamane pua, umbaini wenene okone miaimai laka lo nembo teyama. Umbaini wenene ati kenga tawe okone nanimana anda wenene gulolo-peya nembo toto, nanimana anda waka mindi ati kenga atolopeya leyama.*

⁵ Goteto nanimana yuunga wandakali tupa saka atapowa atolane tene oko mialapale loto, nanimato makande peaipia. Matili balato nanimana saka atapowa ateakale lo ataya olopeya lo nanimato nembo talapale loto,

* **4:8:** 2Ko 1:8-9; 7:5 * **4:10-11:** 1Ko 15:31; Lom 8:35-36
Lom 8:17-22; Kol 1:15-16 * **5:1:** 2Ko 4:7 * **5:2-4:** Lom 8:23-25

* **4:13-15:** Sam 116:10; 1Ko 6:13-14 * **4:16-18:** Ep 3:16;

wamba ini balato balana Sipitisa oko nanim geaipia.

6-7 Andipa nanimato bala lee-mane anda napene atoto teke, bala lo bilipi loto, balana mana tupa wato minuto, epoko pua atalamane. Tene okonena, nanimana omolomane lo yuku naene, Akali Andane okona piape pua atalamane. Wuane tekeko, nanimana umbaini oko nanimana anda guleya-kola, nanimana Akali Andane oko towa atu balana anda ati kenga ateya okona ata naaneyama nembo teyama.*

8 Tene okonena, nanimato nanimana umbaini oko tepa alu, nanimana yuu tene wetete okona poto, Akali Andane oko towa atu ataima lakae lo nembo teyama. Wuane nembo toto, nanimana omolomane lo yuku naeyama.*

9-10 Nanimana umbaini ata pata atoto, mana epene tupa minu atemando, matili nanimana yole epene molopeyama. Nanimato mana koo tupa minu atemando, nanimana yole koo molopeyama. Wuane, nanimana yole okone-lapona mindi moyale, matili nanimana pitaka Kataisana wenonga atoloma-kola, balato nanimana yapa lo tale pulupeya. Tene okonena, nanimana umbaini ata pata atemandopi, omoto, nanimana umbaini tepa alu, bala towa atu atemandopi, balato nanimana epele yakale nembo toto, nanimato mana epene tupa minu ataima lakae lo nembo talamane.*

Gote Towa Yamapane Mindiki Paliyape Leane Oko

11-13 Nanimato Gotena piape pimakale nembo toto, wuane pua ateyama-kola, wandakali minditupa-mane nanimana andayo, yakama kee wato, piape pua atalaini leyai tekeko, utupane-mane kopeta leyai. Nanimato yakama moyo-makale nembo toto, mini palu atoto, Gotena piape pua atalamane. Matili Akali Andane okomane nanimana yuunga wandakali pitaka yapa lo tale pulupeya nembo toto, nanimato yuku wato, wandakali waka tupamane bala lo bilipi leakale nembo toto, balana piape oko piyamane. Goteto nanimana manapi, nembo-teneipi, utupane pitaka andoto, enene leyai lo andalane. Nanimato Gotena piape kuai lo piyamane oko yakamatopi andapai laka lo nambato nembo teyo. Nambato pii okone loto, nanimana akali epene ateyama lo yakamoto dee lapone andalapale nembo toto, naleyo. Jia. Wandakali minditupa-mane wandakali yangone mindina nembo-tene oko anda napene, utupane umbaini kenga angu andoto, utupane laiyu laiaini. Utupane-mane wuane piyaini

okonena, yakamoto nanimana mana tupa nembo toto, akali utupanena pii okone yano peyoto, nanimana laiyu lalapale nembo toto, nambato pii okone yakama langeyo.

14-17 Saka ateyama wandakali nanimato nanimana tane angu epele amakale nembo natape-pene. Jia. Akali nanimomo moyo omalu, ika leane okomane epele yakale nayuto, nanimato balana piape pua atalapale nembo toto, Kataisa bala wandakali pitakana panda moto omeaipia. Bala akali mindiki okomane wandakali pitakana panda moto omeane okona, Goteto wenonga wandakali nanimana pitaka omene teke gulo atema. Tene okonena, wandakali mindi bala Kataisa towa mina mindiki lo atoto, omene gulo ateando, mana koo balato wamba minu atalane tupa alu piyane. Goteto wandakali okone mo wenene gulaya eya-kola, mana wenene minditupa balanga yalane. Wamba nanimato mana wambane oko wato minuto, wandakali waka tupa yapa lo tale pua atemane tekeko, Kataisato wandakali pitakana panda moto omeane oko nembo toto, andipa nanimato wandakali tupa yapa lo tale naaneyama. Jia. Wamba nanimato mana wambane oko wato minuto, Kataisa yapa lo tale pua atema tekeko, andipa nanimato mana okone wato minuto, bala yapa lo tale naaneyama. Kataisato nanimaya mapo yo atoto, nanimana moyo piape utupane pitaka peane oko nembo toto, nanimato balana piape oko pimakale nembo teyama.*

18-19 Wandakali pitaka-mane mana koo tupa minu atoto, Gote towa yanda-pene gulo atalaini. Wuane tekeko, utupane-mane yole koo mindi molaini nembo toto, Goteto piape Kataisato peane okomane utupanena koo tupa apoto, bala towa yamapane mindiki paliya alane. Bala towa yanda-pene wandakali tupa pitaka bala towa yamapane mindiki palu ateakale nembo toto, wamba ini Goteto nanimana bala towa yamapane mindiki paliya ya. Andipa wandakali waka tupapi bala towa yamapane mindiki palu atalapale nembo toto, balana pii oko nanimana mini yamapanenga pale lea. Pale lalu, nanimato pii okone wandakali waka utupane lamawua atalapale loto, balato piape okone nanimana geane. Mangene utupane pitakana tene oko Gote bala angu ateyama.*

20-21 Tene okonena, nanimana Gotena piape akali tupa atoto, balana pii oko wandakali waka tupa lamalu peyama-kola, Gote bala tane pii okone yakama langene gulalane.

* 5:6-7: Ip 11:13-16 * 5:8: Pl 1:23 * 5:9-10: Kol 1:9-11; 1Tes 4:1-2
* 5:18-19: Lom 3:21-26; 5:9-10

* 5:14-17: Lom 8:1-4; 14:7-9; Ga 6:14-15

Kataisato mana koo mindikipi mindi mina neapeane tekeko, nanimana Gotena wandakali tika-pene tupa atalapale nembo toto, Goteto nanima bala towa mina mindiki loto, nanimana mana koo tupa pitaka Kataisanga yata yaepia. Goteto wuane pea-kola, Kataisa bala koo piyane akali mindi gulo atoto, nanimana panda moto, omeaipia. Tene okonena, andipa nanimato balana ambulini pai puato, yakamato Gote towa yanda pua ateyai oko kondalu, bala towa yamapanne mindiki palu atalapape leyama.*

6

¹⁻² Wamba Goteto nanima languato, nambato wandakali taputi pua molane oto epene mindi yata ewane oko epea-kola, nambato nimbanda pii oko ale wato, nimba moyewa lea. Nanimato Kotini tane wandakali yakama languato, yakama taputi pua molane oto epene Goteto wamba yata yane oko andipa epo eya leyama. Taputi pua molane oto oko epo eya-kola, balato yakama ondowa moyo ateya-kola, yakamato okone mee ya lo nembo toto, tepa olaini. Yakamato wuane pulaini nayuto, nanimato Gote towa atu piape pua atoto, yakama langeyama nayu leyama.*

³ Nanimato mana koo mindi minemando, wandakali-mane loto, nanimato Gotena piape kopeta piyaini lolopeyai. Wuane lolaini nembo toto, wandakali yangone mindi yuunga peakolane lo ando atoto, nanimato mangene tupa piyamane.

⁴⁻⁵ Nanimato Gotena piape oko ayawa pua atoto, limu kuai lo pali napene, tomo nonowa atalamane. Gotena pii oko leyama-kola, wandakali minditupa-mane kenda-pene andane tupa nanimana giyaini. Wuane peyai-kola, gapomane okomane nanima andi loto, kunju-mane peyalaini. Kenda-pene mindipene-mindipene tupa nanimanga epeya-kola, nanimato nembo kambua toto, kenda-pene utupane awua atoto, piape piyamane. Kenda-pene wakawaka tupa nanimanga epalane tekeko, nanimato kepa naene, Gotena piape oko pua atalamane. Nanimato mana tupa pitaka kuai lo minalamane okomane nanima Gotena piape akali tupa ateyai lo andawa lalamane.*

⁶ Nanimato mana kalato atane tupa wato mina na-piyamane. Jia. Oli Sipitisa okomane nanima minu tai laya eya-kola, nanimato mana epene tika-pene tupa andoto, wato minalamane. Nanimato wamba ini yataka aa na-piyamane. Jia.

Nanimato wandakali ondo wato, moyalamane. Nanimato wandakali towa owato epelewa yamapa yele pua ata na-piyamane. Jia. Nanimato utupane towa enene wete epelewa yamapanne yo atalamane.*

⁷ Goteto nanima minu tai laya eya-kola, nanimato balana pii enene oko lalamane. Kini koya okomane mana epene tika-pene minalamane tupa nanimana sia umbi gulo yalane. Kii tika okomane mana epene tika-pene minalamane tupa nanimana yanda gulo yalane. Nanimato mana epene tika-pene utupane minu atoto, koo yame tupa towa yanda pua atalamane.

⁸ Wandakali yangi-mane nanimana gene tupa minu koyoto, nanimato Gotena piape kopeta puato, wandakali waka tupa minakasa alaini lalaini. Wandakali yangi-mane nanimana gene tupa laiyu loto, nanimato Gotena piape kuai lo puato, nanimato pii enene oko leyai lalaini.

⁹ Wandakali minditupa-mane nanimana mana epene tika-pene tupa anda na-piyaini tekeko, wandakali kambua-mane andalaini. Goteto nanima mo tika puyale kenda-pene geya-kola, nanima omoyale piyamane tekeko, balato nanima peyo ome wetete na-lalane. Jia. Nanima saka ateyama oko andalapape.*

¹⁰ Wandakali minditupa-mane nanimana mini mo kenda piya alaini tekeko, ole dindi lo nanima epelewa atalamane. Yuu okona minditaka eya tupa nanimanaga naeya-kola, nanima koo tipia gulo atalamane. Nanima tane tipia atalamane tekeko, Gotena minditaka epene tupa pitaka nanimanga eya-kola, nanimato Gotena minditaka epene utupane wandakali kambua tupa mawuato, mo amango gulaya alamanne.

¹¹⁻¹² Nanimato Kotini tane wandakali yakama masia gii napeyama. Jia. Nanimato yakama towa wayumane epelewa yamapa yo atoto, pii utupa pitaka panakame langeyama tekeko, yakamato nanima masia geyai.

¹³ Ayiane-mane balana andopane tupa lamaiyane pua, andipa nambato yakama languato, nanimato yakama towa wayumane epelewa yamapa yo atalamane okona paini yakamato nanima towa wayumane epelewa yamapa yo atalapape leyo.*

*Bilipi Nalene Wandakali Tupa Towa
Mina Mindiki Na-lalapape Leane Oko*

¹⁴⁻¹⁶ Wamba Goteto pii mindi leane oko loto, namba wandakali tupana tombe-nenga epoko puato, namba utupanena Gote oko atolowa-kola, utupane nambana yame

* 5:20-21: Ip 4:15 * 6:1-2: Ais 49:8 * 6:4-5: 2Ko 11:23-27 * 6:6: 1Ti 4:12 * 6:9: 2Ko 4:10-11 * 6:13: 1Ko 4:14-15

atolopeyai leapia. Goteto wuane leane okonéna, nanimaga Gote saka ateya okona lotu anda oko ateyama lo andeyama. Owato gote tupa katulo Gote enene okona lotu anda nanimanga atolo-peyapipe. Kataisa bala Satane towa nembo mindiki palu atalaape. Undupi-lene okola, tii-pene okola, okonelapo katulo mina mindiki lolopeyapipe. Kataisa lo bilipi lene wandakali mindi-la, Kataisa lo bilipi nalene wandakali mindi-la, okonelapo katulo nembo mindiki palu atolo-peyapipe. Nanimato mana epene tika-pene wato minalamane mana okola, utupane-mane Gotena loo tupa kalo piyaini mana okola, mana okonelapo katulo mana mindiki okonepene teke gulolo-peyape. Jia. Tene okonéna, Kataisa lo bilipi lene wandakali yakama Kataisa lo bilipi nalene wandakali utupane towa mina mindiki na-lalapape. *

¹⁷ Yakamato Kataisa lo bilipi nalene wandakali tupa towa potomane lo ata na-piyapale nembo toto, Akali Andane okomane pii mindi tako pua loto, wua leapia: Yakamato wandakali utupane tepe alu poto, waka mindinga atalapape. Yakamato mana kalato atene mindi minulumane. Tika ando atalapape. Yakamato nambana pii utupa wato mineaindo, yakama nambana andopane tupa atalapale lokale. *

¹⁸ Wuane lalu, namba yakamana ayiane oko atolowa-kola, yakama nambana wanane iwanane ima atolopeyai. Tai-lene tupa pitaka yene Akali Andane nambato wuane leyo leapia. *

7

Yakamato Nanimaga Towa Epelewa Yamapa Yo Atalapape Leane Oko

¹ Goteto wuane leane nembo toto, yamapané yene yame, nanimato Gote yuku wato, nanimana umbaini tandini okolaponga mana koo kalato atene tupa pitaka awua tepe alu, mana epene wete tupa minu atamakale.

² Nanimato wandakali mindi andakasa wato, balana minditaka mindikipi mindi mia napema. Jia. Nanimato mana koo mindi minuto, wandakali mindi minu koya napema teke. Tene okonéna, yakamato nanimaga towa epelewa yamapa yo atalapape.

³ Nambato yakamanga koo tene mindi epe loyale pii utupa pitaka naleyo. Jia. Nanimato yakama towa epelewa yamapa yo ateyama lo nambato yakama wamba langewa okoni. Yakama saka ateaindo,

nanimapi yakama towa atu saka atamakale nembo teyama. Yakama omeaindo, nanimapi yakama towa atu oma-makale nembo teyama.

⁴ Kenda-pene kambua nanimanga epalane tekeko, Goteto nanimana mini epene mo pale leya-kola, namba epele andane wete eyo. Yakamato mana epene tupa minalaini lo wayumane nembo toto, ole kambuanga nambato yakamana gene tupa laiyu lalawane.

⁵ Enene, wamba nanimaga Masetonia potopinjia okona peakaiyu lema-angi, nanimaga katulo oto ajako mindi mia napema. Jia. Wandakali waka tupamane nanimaga towa pii yanda pua atea-kola, kenda-pene mindipene-mindipene tupa nanimanga epea. Okone angi nanimaga yukuwa atema. *

⁶ Wuane tekeko, mini kendawa ateyai wandakali tupama mini epene mo pale lalane Gote oko balato Taitasa nanimaga epeakale leane okomane nanimana mini epene mo pale laya yane.

⁷ Taitasa epeane okomane nanimana mini epene pale laya yane tekeko, okonemane angu jia. Wamba yakamato nambato towa embowa ateaini tekeko, matili yakama mini kenda wato, yamapané peke leainipia. Yamapané peke loto, andipa yakama nambato towa nembo mindiki palu atamakale nembo toto, namba andaima laka lo nembo teyai. Yakamato wuane nembo teyama lo Taitasa lamawuato, balana mini epene mo pale laya yai-kola, bala nanimaga atemanga epoto, nanimaga langea. Langea-kola, Goteto nanimana mini epene mo pale laya yane okonéna, nambato epele wete eyo.

Nanimato Wandakali Mindi Minu Koya Napema Leane Oko

⁸⁻⁹ Wamba nambato yakamana pepa peyo epe lewa okomane yakamana mini mo kenda piya ewa nembo toto, nambapi mini kenda ewa. Wuane tekeko, pepa peyo epe lewa okonemane mee ole alu mindiki angu yakamana mini mo kenda piya ewa nembo toto, andipa nambato mini kenda naene, epele eyo. Nambato yakamana mini mo kenda piya ewa okonéna, nambato epele naeyo. Jia. Matili nanimaga yakama ateyalinga epoto, kendapene mindi yakama gulumane nembo toto, nambato yakamana pepa okone peyo epe lewa. Nambato wuane pewa okomane Goteto yakamana mini mo kenda piya ya-kola, yakamato yamapané peke leai. Tene okonéna, nambato epele eyo. *

* **6:14-16:** Ep 5:11-14; 1Ko 3:16; Pit 26:12 * **6:17:** Ais 52:11; Lap 18:4-5 * **6:18:** 2Sa 7:14; Jet 31:9 * **7:5:** 2Ko 2:13
* **7:8-9:** 2Ko 2:1-4

¹⁰ Yuu okona kenda-pene tupamane wandakali mindina mini mo kenda piya wato, bala ome laya alane tekeko, Goteto wandakali mindina mini mo kenda piya eyakola, wandakali okone bala yamapane peke lalane. Yamapane peke leya-kola, Goteto wandakali okone bala molo-peke lalane. Tene okonena, wandakali mindi bala yamapane peke leando, matili balato nembo tolo-peke loto, wamba namba yamapane peke lewane okonemane kopeta pewa nembo natolo-peya. Jia. *

¹¹ Nambato yakamana pepa peyo epe lewa okomane Goteto yakamana mini mo kenda piya ya-kola, yakamato yamapane peke loto, mana epene kambua miniyama nembo talapape. Wamba akali yakama towa atu atalane okonemane mana koo wete mindi minalane lo pepa peyo epe lewa okone yakamato dii lo andoto, bala towa yataka yainipia. Koo tene mindi yakamanga yolane nembo toto, yakamato Gote ando yuku yainipia. Akali okonemane mana koo mineane okone konda yakale nembo toto, yakamato kenda-pene minditupa balanga yata yainipia. Dee, yakamato namba towa nembo mindiki palu atamakale nembo toto, namba andaima lakae lo nembo teainipia. Yakamato mana epene utupane pitaka mineaini okonemane akali okonena koo tene yane okonena mindi yakamanga pata naeya lo andawa leainipia.

¹² Akali mana koo minu ateane okonena mana koo oko mo tika puyale yandopi, akali bala minu koyane oko moyoyale yandopi, piape okone-lapona mindi pukale nembo toto, nambato yakamana pepa okone peyo epe nalewa. Jia. Gotena wenonga yakamato nanima towa epelewa yamapane yo ateyai oko yakama tane andalapale nembo toto, nambato yakamana pepa okone peyo epe lewa.

¹³⁻¹⁵ Andipa yakamato nanima towa epelewa yamapane yo ateyai okone andoto, nanima mini epene palu ateyama. Wamba Taitasa bala yakama ateyaina epoyale atoto, nembo kambua tea-kola, nambato yakamana gene tupa laiyu loto, yakamato mana epene tupa minalaini lo bala lamaewa. Bala yakama ateainga epea-angi, yakamato bala yuku amawua, balato pii lola tupa watamakale nembo toto, wayu epeleya lo, bala lameainipia. Balato mangene minditupa piyapa lea-kola, yakamato pii balato leane tupa ale wato, mangene utupane peainipia. Wamba yakama pitaka-mane wuane pua, balana mini epene mo pale laya yai-kola, andipa balato yakamana mana epene utupane

nembo tolo-peke loto, epele wete eyakola, nanimapi epele wete eyama. Balato yakamana mana epene utupane nembo tolo-peke loto, yakama towa wayumane epelewa yamapane yo ateyia. Wamba nanimato pii enene tupa angu yakama langema okoni. Wuane pua teke, nanimato yakamana gene tupa laiyu loto, yakamato mana epene tupa minalaini lo Taitasa lamaema-kola, nanimana pii okone enene gulea. Yakamato mana epene utupane mineai-kola, namba yala naewa.

¹⁶ Andipa namba katulo yakamanga wayumane tungi peyo atolo-peyawa ya lo nembo toto, epele wete eyo.

8

Muni Kambua Mo Yomowa Mai-yapale Leane Oko

¹ Amene imalini yame, Goteto Masetonia potopinjia okona sosa ateyai tupa ondowa moyakola, utupane-mane mangene mindi peaini lo nanimato yakama langeyama. *

² Wamba kenda-pene andane wete mindi wandakali utupanenga epea-kola, utupane yakama koo tipia wetete ateyai. Kenda-pene utupanenga epeane okonemane utupane mandeke peane tekeko, Goteto utupane onto wato moyakola, utupane yakama epele wete wato, Jutiya disitiki okona Kitisene wandakali tipia tupa moyakola loto, muni kambua mo yomo yai.

³⁻⁵ Utupane-mane muni minditupa mo amunguli pipiai lakae lo nanimato nembo tema pua angu mo amunguli napeai. Jia. Utupane-mane Gotena nembo-tene oko wato minuto, wamba ini yakama tane Akali Andane oko mawuato, lapone gulo yakama tane nanima aposolo akali tupa geai. Giyu, ole kambuangga utupane-mane nanima tee loto, nanimato Kitisene wandakali tipia tupa moyakola. Yakamato atu yalu lalapa lo nanima langeai. Nanimato atu yalu lema-kola, yakama tane-mane muni katulo mo amunguli pulane tupa pitaka mo yomo wato, muni minditupa tako pua mo amunguli peaininga andewane lo nambato yakama langeyo.

⁶ Wamba Taitasa bala Kotini tane wandakali yakama towa atu ateyai-angi, balato yakama languato, yakamato muni minditupa mo amunguli piyapale lea okoni. Wuane lalu, balato yakamana tombenenga piape okone tewa mina ika lea okoni. Andipa Masetonia tane Kitisene wandakali tupamane muni kambua mo amunguli peai-kola, yakamatopi piape okone pikoyo piyapale nembo toto, Taitasato yakama moyakale loto, nanimato bala lamaiyama.

* 7:10: Mt 27:3-5; Ip 12:16-17 * 8:1: Lom 15:25-27; 2Ko 9:1-2

⁷⁻⁹ Wamba nanimana Akali Andane Jisasa Kataisa bala yuu okona naepene, ati kenga atea-angi, bala amango mindi ateaipia. Wuane tekeko, yakama amango gulo atalapale nembo toto, balato Kotini tane wandakali yakama ondowa moyoto, akali tipia mindi guleane. Balato wuane peane nembo toto, yakamatobalangawayumane tungi peyoto, balana piape pima laka lo nembo talaini. Yakamato mana kambua andoto, balana pii oko wandakali waka tupa kuai lo lamai-yaini. Yakamato nanimatowa wayumane epelewa yamapano yo atalaini. Yakamato mana epene utupane pitaka kuai lo minalaini pua teke, yakamato wandakali waka tupa ondowa moyoto, muni kambua mo yomo alu, mai-yapale leyama. Yakamato wuane piyapale lo, nambato yakama langeyo nayu naley. Jia. Mee, yakamato piwandakali yangone tupa towa wayumane epelewa yamapa yo ateyapi, ata napayape lo, nambato andokale nembo toto, Masetonia tane tupamane muni kambua mo amunguli puato, wandakali tipia tupa mayaini lo nambato temane okone yakama langeyo. *

¹⁰ Ee ana wamba ataima okona Kotini tane wandakali yakamato piape okone pima laka lo nembo toto, wamba ini bulupane tewa peai okoni. Wuane, andipa nambato leyo pua yakamato peaindo, mana okonemane yakama moyolo-peya lo nambato yakama langeyo.

¹¹⁻¹² Minditaka mindi wandakali mindi balanga nayola-kola, balato minditaka nayolane okone maiyakale lo Goteto nembo natalane. Jia. Wandakali mindinga minditaka mindi yola-kola, balato okone mauwakale nembo toto, maiyando, Goteto wandakali okonena mana okone andoto, katu ya lo nembo talane. Tene okonena, wamba yakamato piape okone tewa pima laka lo nembo teaini pua teke, andipa minditaka yakamanga eya tupamane piape okone pikoyo pimakale nembo toto, pikoyo piyape leyo. *

¹³ Wandakali tipia tupa kuai lo atekale nembo toto, yakamato minditaka kambua utupane mawua atolai-kola, yakamanga minditaka jia yakale atalapale nambato naley. Jia. Yakama tanepi, wandakali tipia tupapi, yakama pitakanga minditaka atutu yakale loto, yakamato minditaka mo amunguli puato, utupane maiyapape leyo.

¹⁴⁻¹⁵ Gotena pii pepa pelene eya mindi mane loto, wamba Isatale tane wandakali yangi-mane tomo gene mana lene mindi kambua mo yomo yaini tekeko, matili wandakali utupanenga tomo akenane nayaepia

layene eya. Isatale tane wandakali yangi-mane tomo mee ajalapo teke mo yomo yaini tekeko, matili wandakali utupanenga tomo jia nayaepia. Jia. Tomo kambua mo yomo yaini wandakali tupapi, tomo ajalapo mo yomo yaini wandakali tupapi, utupane pitakana tomo atutu yaepia layene eya. Wuane pua teke, andipa yakama tanepi, wandakali tipia tupapi, yakama pitakanga minditaka yola tupa atutu yakale nembo teyo. Matili Kotini tane wandakali yakamanga minditaka jia yola-angi, wandakali waka tupamane minditaka kambua yakamanga yola tupa tale puato, minditupa yakama geakale. Wuane nembo toto, andipa Kotini tane wandakali yakamato yakamana minditaka kambua eyai tupa tale puato, minditupa wandakali tipia tupa maiyapape. *

Poloto Akali Tepo Epeakale Leyama Leane Oko

¹⁶ Nanimato yakama moyaima laka lo nembo talamane pua, Taitasato yakama moyauwa laka lo nembo teakale nayuto, Goteto balana nembo-tene oko mina ika leane oko andoto, nanimato Gote ando wayu pele leyama.

¹⁷ Goteto Taitasana nembo-tene oko mina ika lea-kola, bala tane yakama moyolo puwa laka lo nemboto atea. Tene okohna, nanimato Taitasa nimbato Kotini tane wandakali tupa moyolo peke lolape lo tipa pema-angi, balato peke lauwa laka lo nembo teyo lea.

¹⁸⁻²¹ Masetonia potopinjia okona atalaini Kitisene tupamane Jutiya disitiki okona atalaini Kitisene tipia tupa ondowa moyamakale nembo toto, muni kambua mo yomo yaini tupa nanimana guato, malu pulupape leai. Wuane leai-kola, nanimato Akali Andane okona gene oko laiyu lamakale nembo toto, wandakali utupane moyaima laka lo nembo teyama oko andawa loyale, piape okone pua ateyama. Nanimato muni okone kuai lo ando ateyama oko Goteto andeya tekeko, mindimane koo tene mindi nanimanga yata wato, nanimato muni okone kopeta ando ateyai lolane nembo toto, Masetonia tane Kitisene tupamane akali mindi makimi loto, bala nanimatowa atu epoko pua atekale leai. Amunguli pitane tupa pitaka-mane akali okonena gene oko laiyu loto, balato Gotena pii oko kuai lo langiyane lalaini. Nanimato bala Taitasa towa atu yakama ateyaina epeakale leyama.

²² Nanimato Kitisene akali yangone waka mindi akali okonelapo towa atu epeakale leyama. Ole kambuangna nanimato bala

makande pua andeyama-kola, balato Gotena piape piwua laka lo nembo talane. Andipa yakamato Jutiya disitiki okona atalaini Kitisene tipia tupa moyoyale muni kambua mo yomo olopeyai nembo toto, balato yakama moyolo ipuwa laka lo nembo teya.

²³ Yakamato Taitasa andeyaini. Yakama moyoyale, balato namba towa potomane loto, piape mindiki okone teke piyane. Amunguli pitane tupamane akali okonelapo piape pulu peakale leai-kola, akali okonelapo-mane Kataisana gene oko laiyu loto, Gotena piape pua atalapele.

²⁴ Nanimato Kotini tane Kitisene yakamana gene tupa laiyu loto, yakamato wandakali yangone tupa towa epelewa yamapane yo atalaini lalamane-ko. Amunguli pitane waka tupamane yakamana mana okone andolai-kola, nanimato enene leyai oko andeakale nembo toto, yakamato akali tepo utupane towa epelewa yamapane yo ateyai oko andawa lalapape. *

9

Minditaka Epelewa Maiyapape Leane Oko

¹⁻² Ee ana wamba ataima okona Akaya potopinjia tane wandakali yakamato Gotena wandakali tipia Jutiya disitiki okona atalaini tupa moya-makale loto, muni minditupa mo yomo aim a laka lo nembo teai oko nambato andewa. Andalu, nambato Kotini tane wandakali yakamana gene oko laiyu loto, ee ana wamba ataima okona Akaya potopinjia okona wandakali tupamane piape okone tewa pimakale nembo toto, mandeke pua atapiat lo Masetonia potopinjia tane wandakali tupa lamaiki pua atewa. Nambato pii okone wandakali utupane lamaiki pua ate-wa-kola, wandakali utupanena kambua-mane pii okone ale wato, Gotena wandakali tipia tupa moyamakale loto, muni minditupa mo yomo aka pua atea. Kotini wandakali yakamato piape okone pimakale nemboto ateyai-kola, nambato yakamana pepa oko peyo epe loto, piape okonena pii kambua langulane tene mindi ata naopeya. *

³⁻⁵ Wamba yakamato muni minditupa mo yomo wato, mai-makale leai-kola, nambato yakamana gene tupa laiyu loto, yakamato wuane pulupeyai lo Masetonia potopinjia okona tane wandakali tupa lamai-yawane. Matili namba yakama ateyai-nga epolowangi, Masetonia tane akali minditupa atu epemando, utupane-mane yakamana mana andolopeyai. Okone angi, yakamato muni mo yomo naene, mee ateaini yando,

nanimato yakamana gene tupa laiyu loto, pii leyama okone owato pii lene gulolopeya. Owato pii lene gulola-kola, nanimato yakamanga tungi peyo ataima nembo toto, yala oloma-kola, yakamapi yala olaini. Nanimapi, yakamapi, yala olomane nembo toto, nanimato yakamana gene tupa laiyu leyama pua teke, yakamato piape okone piyapale leyama. Nambato pii taimane lolowa-kola, yakamato mini kenda wato teke, muni okone mo yomo yaindo, mana okone katu nalolo-peya. Yakamato muni okone epelewa mo yomo alapale nembo toto, nambato amene minditupa-mane Kotini tane wandakali yakama wamba ini moyolo epeakale lauwa.

⁶ Andipa yakamato wua lo nembo talapape. Wandakali mindimane ee anjako mindi yandeando, balato tomo anjako teke mandulu-peya. Akali mindimane ee andane mindi yandeando, balato tomo kambua teke mandulu-peya. *

⁷ Wuaneko, wandakali mindimane minditaka mindi mai lo ayia ola-kola, wandakali waka mindimane mini kenda wato, minditaka mindi maiyando, Goteto mana okone andoto, epele na-olopeya. Wandakali mindimane minditaka mindi epelewa maiyando, Goteto mana okone andoto, epele ollopeya. Tene okonena, yakama pitaka mindiki-mindiki lo, muni aki-tipi mauwakalepe nembo toto, okotuma mauwakale lo epele wato maipene.

⁸⁻⁹ Gotena pii pepa pelene eya mindimane loto, akali mindimane eenga tomo waini tupa papaka lalane pua, balana minditaka yalane tupa tale puato, wandakali tipia tupa moyo, kambua minditupa maiyane layene eya. Balana mana tika-pene okone matili-matilipi yapowa yolopeya layene eya. Wuane pua teke, yakamatopi minditaka kambua yatawa atoto, piape epene tupa pitaka piyapale loto, Goteto minditaka epene tupa pitaka yakamanga katulo gulupeya. *

¹⁰ Yakamato ee mindi yandalapale nembo toto, yakamana eenga tomo waini yandolane kambua tupa ateakale lalu, yakama tomo nalapale gulupeya teke. Balato yakama minu tai laya ola-kola, yakamato mana epene tika-pene kambua tupa wato minulu-peyai. *

¹¹⁻¹² Jutiya disitiki tane wandakali tipia tupa moyoyale, yakamato minditaka maulai-kola, utupane-mane okone mialu, ole kambuang Gote ando wayu pele ollopeyai. Tene okonena, yakamato

wandakali tipia tupa wayumane moy-alapale nembo toto, Goteto minditaka kambua yakama gulupeya. Gula-kola, yakamato wandakali tipia tupa moyamakale nembo toto, minditaka nanimageaindo, nanimato okone wandakali tipia utupanenga maluma-kola, utupane-mane Gote ando wayu pele lolopeyai.*

¹³ Yakamato Kataisana pii layene epene oko ale wato, bala yakamana Akali Andane ateya loto, balana pii oko wato minuto, minditaka kambua wandakali utupanengapi, wandakali tipia waka tupapi, utupane pitakanga mai-yaindo, wandakali utupane-mane yakamana mana epene okone andoto, Gotena gene oko laiyu lolopeyai.

¹⁴ Goteto Kotini tano okona tane Kitisene wandakali yakama ondo wete wato moyola-kola, yakamato Jutiya disitiki okona ateyai Kitisene tipia tupa moyolopeyai. Moyolai-kola, utupane-mane yakama epele wete wato, Goteto yakama ondo wato, wayumane moyo ateakale lo pote lolopeyai.

¹⁵ Goteto yakama ondo wete wato, wayumane moyo atalane mana okone petesene epene wete mindi guleya-kola, nanimato balana mana okone wua pene eya lo katulo laa yiake napiyamane. Goteto nanimaya wayumane wete ondowa moyalane nembo toto, nanimato bala ando wayu pele lamakale.

10

Poloto Piape Kuai Lo Piyamane Leane Oko

¹⁻² Wandakali minditupa-mane namba anda napi loto, Polo bala yuu tepanda tupa-na atoto, yuku naene, pii langeyo nayu loto, nanimana pepa tupa peyo epe larlane tekeko, nanimana towa atu ateyama-angi, bala nanimana napinga gulo atoto, pii tenga-mane larlane larlaini. Wamba Kataisa bala wuane pua teke, wandakali tupa towa tambo lo atoto, utupanenga napinga gulo ateapia. Tene okonena, nambato yakama towa atu atoto, balana mana okone wato minalawane. Kotini tane wandakali yakamana minditupa-mane aposolo akali nanimana mana okone andoto, nanimato mee yuunga wandakali tupa nembo-tene oko wato minuto, piape piyaini nembo talaini. Matili namba dee lapone Kotini tano okona epolowa-angi, wuane nembo larlane wandakali yakama nambato pii lolowa okomane yango apolowane. Tika ando atalapape lo andipa namba Poloto yakama langeyo nayu leyo.*

³ Enene, nanimana yuu okona ateyama tekeko, nanimato yuunga wandakalina mana tupa wato minuto, yanda napiyamane. Jia.

⁴⁻⁵ Yuu okona akali tupamane yanda, yandate ima awua atoto, yanda piyaini tekeko, nanimato wuane na-piyamane. Jia. Nanimato Gotena pii tai-lene oko loto, bala towa yanda-pene wandakali tupa towa yanda piyamane. Wandakali yangi-mane Gotena mana mia-makale nembo talaini tekeko, wandakali utupane-mane Gotena mana mia naapeakale nembo toto, Gote towa yanda-pene wandakali tupamane yakama tanena gene tupa laiyu loto, owato pii kambua larlaini. Owato pii larlaini mana okone utupanenga lome tai gulo yoto, Gotena mana molane asia oko pai leyakola, nanimato Gotena pii tai-lene oko loto, lome tai okone keao lalamane. Nanimato lome okone keao loto, wandakali utupane yakama tanena nembo-tene oko wato mina napene, Kataisana pii oko wato mineakale lalamane.*

⁶ Kotini tano okona tane wandakali yakamato Kataisana pii oko kuai lo wato minu atalapale lo nanimana maliyo atema. Yakamato wuane pulai-angi, matili wandakali minditupa-mane balana pii tanga leaindo, nanimato kenda-pene mindi utupanenga yatamatikale lo mandeke pitawa ateyama.

⁷⁻⁹ Yakama yuku alapale loto, nambato yakamana pepa tupa peyo epe leya lo yakamato nembo na-talapape. Jia. Wamba Akali Andane okomane balana piape oko nanimana gea-angi, nanimato wandakali tupa minu koyalapale lo balato nembo natea. Jia. Nanimato wandakali tupa minu tai laya alapale nembo toto, balato piape okone nanimana geane. Tene okonena, nambato nanimana gene tupa laiyu loto, Akali Andane okomane piape okone nanimana geane lewando, namba yala naolo-peyawa. Jia. Akali mindi bala tane Kataisana yame ateyo nembo teando, bala Kataisana yame atalane pua teke, nanimapi Kataisana yame ateyai nembo tape-pene. Kotini tano tane wandakali yakamato okonetaka tupa wayumane nembo talapape.*

¹⁰ Enene, wandakali minditupa-mane nambana mana oko andoto, wua larlane: Poloto pii langeyo nayu loto, nanimana pepa tupa peyo epe larlane tekeko, bala epo atoto, kuati minalane. Bala nanimana towa atu atoto, Gotena pii lolane mana anda napene atoto, pii kuai lo na-larlane larlaini.

11 Wuane lalaini wandakali utupane-mane wua lo nembo tape-pene: Andipa nanimato yuu waka mindinga atoto, yakamana pepa oko peyo epe loto, mangene mindi yakamanga pimakale leyama oko matili yakama ateyainga epoto, pulu-peyama.

12-14 Nanimato wuane pulu-peyama leyama okomane nanima towa yuu tombo yene oko kalo puato, akali waka mindina yuu okona poto, piape napayama. Jia. Wamba Goteto yuu eya tupa pitaka yapa lo tale puato, tombo mindi nanima geane. Yakamana tano oko tombo Goteto nanima geane okona anda-pangosa eya-kola, nanima wamba ini bulupane yakama ateyaina okona epoto, Kataisa andayo pii layene epene oko yakama langema. Nanimato wuane pemane lo nanimana gene tupa laiyu lolo-peyama tekeko, tombo Goteto nanima geane okone kalo puato, nanimana gene oko laiyu wete nalolo-peyama. Jia. Nanimato wuane napulu-peyama tekeko, owato aposolo akali tupamane wuane piyaini. Utupane-mane yakama tane kopeta yapa lo tale puato, yakama tanena mana tupa epene wetete eyai nembo teyai. Wuane nembo toto, yakama tane wandakali epene wetete ateyama loto, yakama tanena gene tupa laiyu lalaini. Nanima tane akali utupane towa mandeke puato, nanimapi akali okonepene teke ateyama lo nanima tanena gene tupa laiyu nalolo-peyama. Jia. *

15-16 Nanimato Gotena pii layene epene oko Kotini tano okona tane wandakali yakama wamba ini bulupane langema tekeko, owato aposolo akali tupamane tombo Goteto nanima geane oko kalo piyu, yakama ateyainga epeainipia. Epoto, piape nanimato wamba pemane oko yakamato pene gulo mee mo ata wato, yakama tanena gene tupa laiyu lalaini. Utupane-mane wuane piyaini tekeko, nanimato tombo Goteto nanima geane okone kalo puato, akali waka mindina yuu okona poto, piape balato wamba peane oko nanimato pene gulo mee mo ata wato, nanima tanena gene tupa laiyu na-lalamane. Matilipi, nanimato wuane napimakale. Nanimato Kotini tane wandakali yakamana masianesa-tole yuu waka eya tupana poto, Gotena pii layene epene oko yuu utupanena tane wandakali tupanga lamaima lakae lo nembo teyama. Matili nanimato wuane pimakale nembo teyama tekeko, andipa nanimato piape Goteto nanima geane oko puato, yakamana bilipi oko minu tai laya wato, yakamana tombenenga piape kambua pima lakae lo

nembo teyama.

¹⁷⁻¹⁸ Akali mindimane bala tanena gene oko laiyu leando, balana gene andane nayo-lopeya. Jia. Akali Andane okomane akali mindina gene oko laiyu leando, akali okonena gene andane yolopeya. Tene okonena, akali mindimane bala tanena gene oko laiyu nalape-pene. Jia. Balato Akali Andane okona gene oko laiyu lape-pene. *

11

Utupane-mane Yakama Minakasa Olaini, Waiwa Ando Atalapape Leane Oko

¹⁻⁴ Goteto wandakali pitaka Kataisana pangosa atapiak lakae lo nembo talane pua teke, nambato Kotini tane wandakali yakama Kataisana pangosa atapiak lakae lo nembo tewa. Wamba yakama wana mapokae mana koo mina napene pitiyanne okonepene gulo atea-kola, nambato yakama Kataisana wetene gulo pitiyapale lata alu, Gotena pii layene epene oko yakama langewa. Langewa-kola, yakamato pii okone ale wato, Oli Sipitisa oko meaimi tekeko, matili owato aposolo akali mindi bala yakama ateyainga epoto, balato pii layene epene waka mindi yakama languato, Jisasa bala akali mindi-pene ateyane lea. Wuane lea-kola, yakamato sipitisa waka mindi moto, balato piape okone pua atekale lo yakamato ando kondéai. Tene okonena, wamba Satane bala wai wato, etulu mindi gulo atoto, wanda Ipi minakasa yane pua teke, owato aposolo akali okonemaneyakama minakasa olane lo namba yuku eyo. Balato yakama minakasa yando, yakamato Kataisa angu minatawa atalaini mana oko awua tepa alu, owato aposolo akali okonena yame atolopeyai. Tene okonena, yakamato wuane na-piyapale nembo toto, andipa namba nembo napalene gulo atoto, namba tanena gene oko laiyu loto, pii mindi yakama langukale nembo teyo. Nambato wuane pula lo yakamato ando kondéyai pua teke, ando kondalapape leyo. *

⁵ Owato aposolo akali utupane-mane yakama tanena gene tupa laiyu loto, yakama tane aposolo akali epene wetete ateyama lalaini tekeko, namba akali utupanena aña napinga ata naapeyo nembo teyo. *

⁶ Nambato pii kuai lo lalawanepé, kuati minu lalawanepé lo, nambato wayumane nembo nateyo tekeko, nambato mana kam-bua wete moto, owato aposolo akali utupane sia minalawane loto, ole dindi lo nanimato yakamanga andawa langema. *

* 10:12-14: Lom 12:3-5 * 10:17-18: 1Ko 1:30-31; 4:3-4
15:10; 2Ko 12:11-12 * 11:6: 1Ko 2:1-2,13

* 11:1-4: Ep 5:25-27; Jen 3:4,13; Ga 1:7-10 * 11:5: 1Ko

⁷⁻⁹ Wamba namba Kotini tane wandakali yakama towa atu atema-angi, nambanga minditaka jia ya-kola, atewa tekeko, nambato Kotini tane wandakali yakamana mindikipi mindi kenda-pene mindi gii napewa. Jia. Masetonia potopinjia okona Kitisene akali minditupa epoto, nambanga minditaka jia yane tupa mee geai. Nambato Kotini tane wandakali yakama moyoyale, Gotena piape pukale nembo toto, Masetonia Kitisene utupanena minditaka namba mee geaini tupa mewa okonena, nambato utupanena minditaka tupa pake gulo mewa leyo. Nambato Kotini tane wandakali yakama minaiyu lokale nembo toto, namba tane akali gene nayene gulo atoto, yakamoto yole namba giyapa nalewa. Wuane nalene, nambato Gotena pii layene epene oko yakama mee langu atewa okone mana koo wete mindi guleape. Jia. Nambato kenda-pene mee anjakopi mindi yakama gii napukale nembo toto, yakamoto yolepi mindi giyapa nalene, Gotena pii layene epene oko yakama langu atewa. Matilipi, nambato kenda-pene mee anjakopi mindi yakamanga gii napukale lo namba tane tika ando atokale.*

¹⁰ Yakamoto yole namba giyapa nalene, nambato Gotena pii layene epene oko yakama langewa loto, namba tanena gene oko laiyu lokale. Kataisana pii enene oko nambanga eya-kola, nambato pii enene oko loto, wuane leyo. Tene okonena, Akaya potopinjia okona yuu tupa pitakana wandakali ateyai tupana mindikipi mindimane Polo nimbato owato pii lele oko kondaa loto, namba tanena gene oko laiyu lolane asini okone katulo pai nalolo-peya.

¹¹ Wamba nambato Gotena pii layene epene oko yakama langu atewa-angi, yakamoto yole namba giyapa nambato katulo lewa-yale tekeko, nambato wuane nalewa. Anu peakale nambato wuane nalewape. Nambato yakama towa epelewa yamapane yo ata napewa mambele, nambato wuane nalewape. Jia. Nambato yakama towa epelewa yamapa yo ateyo oko Goteto andeya.

¹² Owato aposolo akali tupamane yakama tanena gene tupa laiyu laima lakae lo nembo toto, nanima aposolo akali waka tupana mana tupa pitaka wato minuto, Gotena piape piyamane lalaini. Utupane-mane wuane lolaini asini oko pai lokale nembo toto, andipa nambato Gotena pii layene epene oko yakama mee langu atoto, yakamoto yole mindi namba giyapa nalalawane pua, matilipi wuane teke pukale.

¹³ Owato aposolo akali utupane-mane wandakali waka tupa minakasa oyale, yakama tane Kataisana aposolo akali enene ateyama lalaini.

¹⁴ Akali utupane-mane wuane lalaini okone ale wato, yakamoto moko nalape-pene. Jia. Satane bala tane wandakali tupa minakasa oyale, enjole tii-pene mindi gulo epalane.

¹⁵ Wuane, Satanena piape akali tupamane wandakali tupa minakasa oyale, mana tika-pene tupana piape akali tupa gulo atoto, Gotena piape piyaini oko nembo toto, nanima moko nalape-pene. Jia. Andipa akali utupane-mane mana koo tupa minuto, piape pua ateyai okonena, matili akali utupane yakama yole koo teke molopeyai.

*Poloto Kenda-pene Kambua Awua
Atewa Leane Oko*

¹⁶⁻¹⁹ Wandakali kambua-mane yuu okona mana tupa wato minuto, yakama tanena gene tupa laiyu lalaini. Owato aposolo akali tupamane mana okone wato minuto, nembo napalene gulo atoto, yakama tanene gene tupa laiyu lalaini. Wuane peyai-kola, Kotini tane wandakali yakama wai-ene ateyama nembo toto, utupane-mane wuane peakale lo ando kondalainiko. Nambatopi namba tanena gene oko laiyu lokale. Nambato Akali Andane okona mana oko wato mina napene, mee nembo napalene gulo atoto, nambana gene oko laiyu lokale. Nambato pii mindi wamba lalo okone teke dee lapone leyo. Wandakali mindikipi mindimane namba nembo napalene ateyama nembo natape-peneko. Yakamoto namba akali nembo napalene mindi ateyama nembo teaindo, okone katu tekeko, nambana gene tane mee teke laiyu lokale lo yakamoto ando kondalapape leyo.

²⁰ Owato aposolo akali ateyai utupane akali gene yene ateyai lo yakamoto andalapale nembo toto, utupane-mane mangene minditupa peyai-kola, utupane-mane wuane peakale lo, yakamoto ando kondalaini. Utupane-mane Kotini tane wandakali yakama minakasa wato, yakama minditaka eya tupa pitaka mia koyo peyai-kola, utupane-mane wuane peakale lo, yakamoto ando kondalaini. Owato aposolo akali tupamane yakama yole gii napiyaini. Jia. Yakamoto utupanena katapusa piape pua atalapale loto, utupane-mane yakamana lee-inganga peleyai-kola, utupane-mane wuane peakale lo, yakamoto ando kondalaini.

²¹ Nanimba akali tambo gulo atoto, mana utupane mina na-piyamane lo nambato yala ape-penepe. Jia. Owato aposolo akali

* ^{11:7-9:} 1Ko 9:18; Pl 4:15-16; 2Ko 12:13

utupane-mane yakama tane akali epene wete ateyama nembo toto, yakama tanena gene tupu laiyu leyai-ko. Nambapi akali okonepene ateyo lo namba tanena gene oko laiyu lokale. Namba nembo napalene, kee ene gulo atoto, wuane leyo. *

²² Owato aposolo akali utupane-mane yakama tanena gene tupu laiyu loto, nanima Iputu yame ateyama lalaini. Nambapi Iputu yame ateyo. Akali utupane-mane yakama Isatale tane akali ateyama lalaini. Nambapi Isatale tane akali mindi ateyo. Akali utupane-mane yakama Apatakamena mandiyene yame ateyama lalaini. Nambapi Apatakamena mandiyene yame ateyo.

²³ Utupane-mane yakama tanena gene tupu laiyu loto, Kataisana piapi piyamane lalaini. Wuane leyai-kola, akali nembo napalene mindimane pii lalane pua, namba tanena gene oko laiyu loto, nambato Kataisana piapi kambua puato, akali utupane sia minalawane leyo. Nambato utupane sia minuto, yuu kambuanga poto, Kataisana piapi oko tailo wete pua atewa-kola, ole kambuanga gapomane okomane namba andi lea. Ole kambuanga wete akali minditupa-mane namba minu peleai. Dee, ole kambuanga namba omape-pene gulo atewa. *

²⁴ Gii waka-waka yaunga Juta yame akali minditupa-mane namba kunju-mane ole (39) paiyasa teponga pilisa peleai. *

²⁵⁻²⁶ Gii waka-waka tepoinga akali minditupa-mane namba kelewa kandamanole kambuanga pelea. Alu mindi akali minditupa-mane namba peyo ome loyale, ana-mane peleai. Ole kambuanga namba asia luu tupana peyo-kola, kendapene minditupa nambanga epalane. Ole kambuanga namba sipinga pitiyu, ipa solewata angini andane okona tokonga puku pewa. Pewa-kola, ole tepoinga sipi namba pitiyu pewane tupu koyaka pea. Alu mindi sipi namba pitiyu pewane oko koya-kola, utulu otongapi, nambato ita palaja mindi minatawa atoto, ipa solewata okona petewa-kola, ipa angini andane okonemane namba awua epoko pea. Namba ipa epo pene andane tupu kalo peyo-kola, ole kambuanga ipa epo pene tupamane namba awua pupe-pene gulalane. Ole kambuanga pake nene akali tupamane namba minu koyoyale piyaini. Owato Kitisene amene tupapi, Juta yamepi, yame waka tupapi, utupane pitaka-mane namba minu koyoyale piyainiteke. Namba tano mindina atewa-kolapi, wandakali napalene yuu mindina epo peyo-kolapi,

ipa solewata tokonga epo peyo-kolapi, kenda-pene utupane nambanga epeyakola, namba omape-pene gulo atalawane. *

²⁷ Ole kambuanga utulu namba limu napalene, piapi kambua tupa ayiawa pua atalawane. Dee, ole kambuanga tomo, ipapi nolane naeya-kola, namba nonowa atalawane. Alu minditupa nambana umbaininga pulane tona epene mindi naeya-kola, namba upa wa atalawane.

²⁸ Kenda-pene waka minditupa nambanga epalane teke. Kenda-pene utupane pitakana tako puato, ole dindi lo nambato anu puato, sosa ateyai tupa pitaka wayumane moyo ando atokalepe lo nembo kambua talawane.

²⁹ Dee, Kitisene wandakali mindi tai nolene ateando, nambato bala ondo wato, nambapi tai nolene gulo atalawane teke. Wandakali yangone mindimane mana koo mindi mineakale nembo toto, wandakali waka mindimane bala mo piya yando, nambato yataka alawane.

³⁰⁻³³ Wamba namba Damasakasa tano okona atewa-angi, kinji Aletasa okona gapana okomane namba andi lokale nembo teaipia. Wuane nembo toto, balato ami yanda yene minditupa lamawuato, yakama poto, tano okona lome andane mapu pitane atene okonena asia lomba eya tupana atoto, Polo epolane lo andatawa atalapa leaipia. Wuane lea-kola, namba tane moyolane tai-lene mindi nambanga nayane tekeko, Kitisene amene minditupa-mane eyaka luu mindi basaketa nuu andane mindina andi leai-kola, namba basaketa nuu okonena petewa. Petewa-kola, amene utupane-mane eyaka luu okone minatawa atoto, namba tano okonena lome kenga okona windowa asia mindina takita peakale loto, namba basaketa nuu okonena piti-pata tenga-mane yuunga tepa yai-kola, namba palaka pewa. Wuaneko, mindina gene oko laiyu lape-pene guleando, Goteto tai-lene mindi nambanga nayane lo namba andawa lalu, namba moyane loto, nambato balana gene oko laiyu lokale. Nambato pii enene leyo oko nanimana Akali Andane Jisasana Ayiane Gote balato andeya. Matili-matilipi nanimoto balana gene angu laiyu lamakale. *

12

*Poloto Limu Tale-tale Gulo Minditaka
Andane Oko*

¹ Wandakali mindimane bala tanena gene oko laiyu lalane mana okonemane wandakali mindi moyo napiyane tekeko,

* 11:21: Pl 3:5 * 11:23: Ap 16:23 * 11:24: Lo 25:3

* 11:25-26: Ap 9:23; 14:5,19; 16:22 * 11:30-33: Ap 9:23-25

namba tanena gene oko laiyu lape-pene guleya. Wuaneko, wamba namba limu tale-tale gulo andewa-kola, Akali Andane okomane balana pii too pitane yene minditupa nambanga andawa leane loto, namba tanena gene oko laiyu lokale.

²⁻⁴ Wamba namba limu tale-tale gulo andewa-kola, Goteto Kitisene akali mindi lamo atu ati kenga wetete yuu epene Patandaisa lene okona pulu, peke lea. Andipa mali ingasa peya-kola, ateyama. Akali okone ati kenga umbaini ata-pata pulu-peke leape, pee, umbaini yakale, tandini angu pulu-peke leape lo nambato nembo nateyo. Goteto andeya. Akali okone ati kenga pea-angi, balato pii mindi ale yane tekeko, Goteto bala lamawuato, nimbato pii okone wandakali mindikipi mindi lamai napipe lea. Wuane lea-kola, akali okonemane pii okone wandakali waka mindikipi mindi katulo lamai napea. Jia.

⁵ Nambato akali okonena gene oko laiyu lokale tekeko, namba tane akali okone ateyo loto, namba tanena gene oko nalokale. Jia. Namba akali tai nalene mindi ateyo loto, namba tanena gene oko laiyu lokale.

⁶ Namba ati kenga pulu, peke lewane lo namba tanena gene oko laiyu lauwu-yale, wandakali-mane bala kee wato, mee leya nembo natape-pene. Jia. Nambato wuanewe lo pii enene leyo tekeko, yakamoto nambana mana tupa andoto, nambana pii ale alaini. Yakamoto utupane angu yapa lo tale puato, namba akali anu-pene mindi ateyape andalapale nembo teyo. Tene okonena, nambato pii waka minditupa takopuato, namba tanena gene oko laiyu nalokale.

⁷ Wamba Goteto namba angu ati kenga lamo atu poto, minditaka epene wete kambua nambanga andawa lea-kola, nambato wandakali waka tupa sia minalawane nembo tauwu-yale tekeko, nambato wuanewe nembo tolane nayuto, Goteto longai gulene mindi nambana umbaininga pale lea. Minditaka tandaka-pene okone Satanena piape akali gulo yoto, ole dindi lo kendapene minditupa namba geakale lo Goteto ando konda ya.*

⁸ Wuane pea-kola, Akali Andane okomane kenda-pene nambanga epeane okone mo apeakale loto, ole tepoainga nambato pote lewa.

⁹ Pote lewa-kola, Akali Andane okomane namba languato, wandakali mindi tai nalene ateya-angi, nambato bala moyole ya piape taimane peyo-kola, wandakali-mane

nambana tai-lene oko kuai lo andalaini. Nambato nimba ondowa moyolowa-kola, nimbato kenda-pene okone katulo awua atolopele lea. Wuane lea-kola, Kataisato namba minu tai layawa ateakale nembo toto, namba epele wato, namba tai nalene atalawane lo namba tanena gene oko laiyu lokale.*

¹⁰ Nambato Kataisana piape oko pua ateyo-angi, wandakali-mane namba andayo pii koo loto, kenda-pene andane tupa namba giki peyai-kola, namba kenda-pene kambua awuato, tai nalene gulo atalawane. Kenda-pene waka tupa nambanga epalane tekeko, namba tai nalene ateyo-angi, Goteto namba minu tai laya eya-kola namba tai-lene gulo atalawane. Tene okonena, kenda-pene utupane nambanga epeyai-angi, nambato okone katu ya lo nembo talawane.

Poloto Wandakali Tupa Minu Tai Laya Oyale Pii Leane Oko

¹¹⁻¹² Wamba namba yakama towa atu atema-angi, nambato kenda-pene awua atoto teke, kepa naene, Gotena piape oko pua atewa lo yakama andawa loyale, nambato metekolo piape waka-waka kambua pewa okoni. Wuane pewane okomane, namba aposolo akali enene mindi ateyo lo nambato yakama andawa lewa okoni. Enene, namba akali gene yene mindi ata napeyo tekeko, nambato owato aposolo akali ateyai tupana napinga ata napeyo. Jia. Nambato utupane sia minuto, Gotena piape oko kuai lo piyawane. Yakamoto wuanewe nembo toto, nambana gene oko laiyu lapiapai-yale, okone katulapiapai-yale tekeko, yakamoto nambana gene oko laiyu naleai. Tene okonena, namba akali nembo napalene gulo atoto, namba tanena gene oko laiyu leyo.*

¹³ Wamba namba sosa waka tupa towa atu atoto, nambanga minditaka jia ya-kola, nambato utupane lamawuato, yakamoto minditaka namba geakale lewa. Wuane tekeko, nambato Kotini tane wandakali yakama towa atu atoto, minditaka jia ya-kola, atewa-angi, yakamoto minditaka namba giyapa nalewa. Yakamoto minditaka giyapa nalewa okone mana koo mindi miniwae yando, yakamoto nambana mana koo okone apia-giyapape. Amunguli pitane waka tupa towa mana waka wato minewane tupa pitaka nambato Kotini tane wandakali yakama towa wato minewakola, yakama utupanena napinga ata napeyai.*

¹⁴ Wamba ini bulupane namba epoto, Gotena pii layene epene oko yakama

langewa mambele, andipa namba Kotini tane Kitisene yakamana ayiane gulo ateyo. Andopane anjako tupamane yakamana angini, ayiane-la, okonelapo moyoyale, minditaka pitaka mai naapepe-pene. Jia. Angini, ayiane-la, okonelapo-mane liyambana andopane anjako tupa moyoyale, minditaka maipe-pene. Wuaneko, andipa nambato yakama ole tepone gulo andolo epoyale mandeke pua ateyo tekeko, yakamato minditaka mindi namba giyapale loto, nambato kenda-pene mindi yakama gii napukale. Jia. Nambato yakamana minditaka mindi mokale nembo nateyo. Jia. Nambato yakama Gotena wandakali tupa atalapale nembo teyo.

¹⁵ Tene okonena, nambato yakama moyoyale piape pua atolowa-kola, nambana minditaka eya tupa pitaka koyo peandopi, namba omewandopi, namba epele olo-peyawa. Nambato yakama towa wayumane epelewa yamapane yalawane mana okomane yakamato namba towa mee teke epelewa yamapane yo atalapale laya alaepe.

¹⁶ Anu peakale yakamato namba towa wayumane epelewa yamapane yo ata naapeyaipe. Yakamana minditupa-mane pii mindi loto, enene, Poloto nanimana minditaka mindi panakame mia naapeane tekeko, balato nanima minakasa wato, nanimana minditaka mindi mea yaluia lalaini.

¹⁷ Enene, nambato akali minditupa yakama ateaiinga epeakale lewa tekeko, akali utupanena mindikipi mindimane yakama minakasa wato, yakamana minditaka mindi meakale lo nambato lamai napewa. Jia.

¹⁸ Nambato Taitasa-la, Kitisene amene mindoko-la, okonelapo yakama ateaiinga epeakale lewa tekeko, Taitasato yakama minakasa wato, yakamana minditaka mindi mia naapea. Jia. Taitasa, nalipa nembo mindiki palu atoto, mana epene mindiki okone teke wato minalapale.*

¹⁹ Koo tene minditupa nanimanga eyakola teke, nanimato mana koo mindi mina napema loto, pii utupa pitaka pepanga peyo epe leyai nembo teyaipe. Yakamato wuane nembo natape-pene. Jia. Yamapane yene yame, nanima Kataisana pi-ape akali tupa ateyama okoni. Wuaneko, Gotena wenonga, nanima yakamana bilipi oko minu tai laya oyale, pii utupa pitaka yakamana pepa okona peyo epe leyama.

²⁰⁻²¹ Wamba Kotini tane wandakali yakamana kambua-mane mana koo minditupa minaima laka lo nembo toto, pamuku puato, mana koo kalato atene waka-waka

tupa minu ateaai okoni. Matili namba pai pua teke yakama ateayainga epolowa-angi, yakamato yamapane peke nalene, mana koo utupane minu ateaini yando, namba ai lolo-peyawa. Yakamato mana koo utupane minu ateaindo, Goteto namba languato, nimbato wandakali utupanena mana koo tupa mo tika naapeene ya okonde lola-kola, namba yakamana wenonga atoto, yala olowane lo yuku piyua. Dee, namba pai pua teke epolowa-angi, yakamato mana kuai-lene tupa wato mina napene, wandakali waka tupa towa apiangu pua ateaindopi, yakama tane angu nembo toto, yataka wato, pii yanda pua ateaindopi, yakama tane gene yene ateyama nembo teaindopi, wandakali waka tupa laya-geaindopi, tiputipu leaindopi, nambato yakamana mana koo utupane embo olo-peyawa. Embo wato, nambato mangene mindi puluwa-kola, yakamato nambana mangene okone embo olaini lo namba yuku piyua. Yakamato wuane pulaini lo yuku wato, nanimato pii utupa pitaka yakamana pepa okona peyo epe leyama.*

13

Mana Koo Tupa Wato Mina Na-piyapape Leane Oko

¹⁻⁴ Wamba Kataisa bala ongo naene gulo atea-kola, wandakali-mane bala ita malamanda okona peyo yuka yaini tekeko, Goteto bala mo tai laya ya-kola, bala saka ongo ene atoto, yakamana tombenenga piape taimane pua atalane. Wuane pua teke, nanima aposolo akali tupapi ongo naene gulo ateyama tekeko, Goteto nanimmo tai laya ola-kola, nanima Kataisa towa saka atoto, yakamana tombenenga piape taimane pulu-peyama. Yakamato pii mindi loto, Poloto Kataisana pii oko nanima langiyane yando, balato wuane piyane lo nanima andawa lape-pene leyai okoni. Wamba ole lapone gulo namba yakama towa atu atema okone angi, wandakali minditupa-mane mana koo tupa minu atea-kola, nambato Kataisana pii oko yakama langewa. Pii okone yakama languato, ole tepone gulo namba epewando, nambato kenda-pene andane mindi koo pua atolaini wandakali tupa pitakanga yata wakale lewa okoni. Andipa namba yakama towa atu ata napene, wandakali utupanepi, wandakali waka tupa pitakapi, pii mindiki okone teke wamba ini langeyo. Tene okonena, ole tepone gulo namba yakama ateayainga epolowa-angi, wandakali lapo yandopi, tepo yandopi, utupane-mane koo tene mindi Kitisene yangone mindinga yata

* 12:18: 2Ko 8:6,16-21 * 12:20-21: 2Ko 13:1-4

wato, balato mana koo mindi minalane leaindo, nanimato pii okone enene ya lo nembo tape-pene. *

⁵ Jisasa Kataisa bala yakamanga ateya oko yakamoto nembo teyai okoni. Yakamoto bala bilipi leyama nayu leyamape lo andoyale, yakama tane yapa lo tale piyapape. Yakamoto balana mana tupa kuai lo wato minu ata naheyama lo andeaindo, yakamoto bala lo bilipi leyama nayu laa napiyama ya lo andolopeyai. *

⁶ Yakamoto nanima yapa lo tale peaindo, nanima Kataisana aposolo akali enene tupa ateyai lo yakamoto andolopeyai nembo teyo.

⁷⁻⁹ Okone enene tekeko, nanimato katulo pii enene oko yanda pimai napulu-peyama. Jia. Nanimato pii enene oko minu tai laya olo-peyama. Wuaneko, yakamoto mana epene tupa wato minu ateaindo, nanimato kenda-pene mindi yakamanga yata naoloma-kola, wandakali minditupamanne nanima ongo naene ateyai nembo tolopeyai tekeko, yakamoto Kataisana mana tupa kuai lo wato minulai oko andoto, nanimato epele olo-peyama. Tene okonena, wandakali-mane andolai-kola, nanima Kataisana aposolo akali enene tupa ateyama oko andeakale lo nanimato pote naleyama. Jia. Wandakali-mane naniima Kataisana aposolo akali enene ata naheyai nembo teaindo, okone angini wete mindi jia. Wuane nembo tolai-kola teke, yakamoto Kataisana mana epene tupa angu wato minu atalapale lo nanimato nembo teyama. Wuane nembo toto, nanimato Gote ando pote loto, balato yakamana mana tupa mo tika pula-kola, yakamoto mana koo mindikipi mindi wato mina na-piyapale leyama.

¹⁰ Wamba Akali Andane okomane balana piape oko namba gea-angi, wandakali tupa minu koyape nalea. Jia. Wandakali tupa minu tai laya ape loto, balato piape okone namba geane. Wuaneko, matili namba yakama towa atu atolowangi, nambato yakamana mana tupa mo tika puyale, yakama ando laiya na-lokale. Tene okonena, andipa namba yakama towa atu ata napene, nambato yakamana pepa oko peyo epe loto, yakamoto mana koo tupa pitaka kondalapape leyao. *

Pii Lo Koyo Pua Pepanga Peleane Tupa

¹¹ Amene imalini yame, andipa nambato pii oko lo koyo puato, yakamoto nambana pii oko wato minuto, mana tika-pene tupa kuai lo wato mina-makale lo taimane makande pua atalapape leyao. Yakamoto wuanne pua atoto, pii yanda pua ata

napene, nembo mindiki paluto, yakama epelewa atalapape. Yakamoto wuanne pua ateaindo, wandakali tupa towa yanda pua ata napene, utupane towa epelewa yamapanne yo atalane Gote oko yakama towa atu atalopeyai.

¹² Kitisene wandakali tupamane yangone towa epele aka puato, kii sikane lalaini mana oko wato minuto, Kotini tane Kitisene wandakali yakamoto mindi akali towa epele aka puato, kii sikane lalapape. Gotena wandakali pitaka-mane yakama kuai lo atalapape leyai.

¹³⁻¹⁴ Akali Andane Jisasa Kataisato yakama pitaka ondo wato, moyo atekale lo pote leyo. Dee, Goteto yakama pitaka towa epelewa yamapanne yo atola-kola, Oli Sipitisa oko yakama pitaka towa atu atekale lo pote leyo.

* **13:1-4:** Mt 18:16; 1Ti 5:19; Pl 2:7-8 * **13:5:** 1Ko 11:27-29 * **13:10:** 2Ko 10:7-9

GALESIA

Poloto Galesia Tane Tupana Pepa Peyo Pee Leane Oko

¹ Namba Polo. Yuu okona wandakali mee mindimane namba aposolo akali ata loto, piape okone namba gii napeane. Jia. Jisasa malinga ika laya yane Ayiane Gote okola, Jisasa Kataisa-la, okonelapo-mane namba aposolo akali ata leapele.

² Galesia potopinjia okona sosa ateyai tupa yakama pitaka-mane pepa oko andalapale loto, namba towa atu ateyama akali tupa pitaka-mane pepa oko peyo epe leyama.

³ Nanimana Aiyane Gote-la, Akali Andane Jisasa Kataisa-la, okonelapo-mane yakama ondowa moyoto, yakamana yamapano mo tambo laya yakale lo pote leyo.

⁴ Andipa nanimma yuu okona ateyamakola, mana koo tupamane nanimma andi lalane. Akali Andane Jisasa Kataisato nanimana Aiyane Gote okona nembo-tene oko wato minuto, nanimma titi lo moyale, nanimana koo tupana yano moto, omeaipia.*

⁵ Matili-matilipi, wandakali pitaka-mane Gotena gene oko laiyu lape-pene. Enene.

*Yakamato Gote Awua Tepa Eyai-kola,
Namba Moko Andane Leyo Leane Oko*

⁶ Wamba nambato Kataisana pii layene epene oko yakama langewa-kola, Kataisato yakama ondo wato moyane lo yakamoto andeai. Andeai-kola, Gotena Sipitisa okomane yakama ee lo mea okoni. Yakamato yakama ee lo meane Gote oko wamba kapoyale awua tepa alu, pii layene waka mindi wato mineyai oko andoto, namba moko andane leyo.

⁷⁻⁸ Yakamato pii layene epene waka mindi wato mineyama nembo teyai tekeko, pii layene epene waka mindi naeya. Jia. Wandakali minditupa-mane Kataisana pii layene epene oko mo lawa pima lakae lo nembo toto, yakama lo kee eyai-ko. Nanimana mindimane yandopi, ati kenga enjole mindimane yandopi, pii layene epene wamba nanimato yakama langema okone langi napene, pii waka mindi yakama langeando, wandakali okone bala ita too atene yuu koo okona katulo polopeya-ko. peakale leyo.*

⁹⁻¹⁰ Andipa wandakali-mane pii nambato leyo okone ale wato, Polo bala akali epene mindi ateya leakale lo leyope. Pee, Goteto Polo bala akali epene mindi ateya leakale lo leyope. Nambato wandakali tupa mo

epelewa pii okone leyope. Jia. Nambato wandakali tupa angu mo epelewa piape pua atauwa-yale, namba Kataisana piape akali ata napiwa-yale. Goteto epele yakale loto, wamba nanimato pii mindi yakama langema okone andipa nambato lapone teke yakama langeyo. Pii layene epene wamba yakamoto alewa bilipi lo ateai okone wandakali mindimane yakama langi napene, pii waka mindi langeando, wandakali okone bala ita too atene yuu koo okona katulo polopeya-ko. Peakale leyo.*

*Yuunga Wandakali Mindimane Namba
Mana Langi Nape Leane Oko*

¹¹⁻¹² Amene imalini ima, nambato yuunga wandakali mindina mee pii mindi yakama langewa-yale, yakamoto pii okone tepe alu, pii waka mindi wato minapiae-yale, okonena nambato moko andane nalauwa-yale. Wuane tekeko, yuunga wandakali mindimane Gotena pii layene epene nambato yakama langewa oko namba mana langi nape. Jia. Jisasa Kataisa bala tane-mane pii okone nambanga mo panawa langea-kola, nambato pii okone mana mewane. Tene okonena, pii layene epene nambato yakama langewa okone yuunga wandakali mindina mee pii mindi yakama langi napewa leyo.*

¹³⁻¹⁴ Nambato pii leyo okone enene ya lo yakamoto andalapape lo, pii temane mindi yakama langeyo. Wamba namba yumbane Juta yame-mane mana mineaini tupa pitaka yakale lo, nambato epelewa wato minu atewane. Nambato namba yame okona yangone namba yale kambua tupa sia minuto, Juta yamena mana yene tupa wato mina yiake wete lewa. Wuane piyu, nambato kenda-pene andane tupa Gotena sosa tupanga mawuato, minu koyo wetete atewane. Nambato Juta yamena mana wato minu atoto, wuane pua atewane oko yakamoto ale yai okoni. Yakamato pii okone ale wato, nambato Jisasana pii layene epene oko bilipi nalene ato, wuane pua atea-ya lo, yakamoto nembo teai okoni.*

¹⁵⁻¹⁶ Wuane tekeko, wamba namba angini-mane mandi napene angi, Goteto namba balana aposolo akali atola lata yaepia. Matili balato namba ondo wato, piape okone pula lo, namba ee lo meane. Balato namba ee lo moto, balana iwanane okona pii layene epene oko wandakali yame waka tupa lamaula lea. Waune loto, Goteto yamapano epene palu, balana iwanane oko nambanga andawa leane. Andawa lea-kola, nambato pii layene epene

* **1:4:** Ga 2:18-20 * **1:7-8:** Ap 15:1,24; 1Ko 16:22 * **1:9-10:** 1Tes 2:4 * **1:11-12:** Mt 16:17 * **1:13-14:** Ap 8:1-3;
22:3 * **1:15-16:** Ais 49:1; Ga 2:7-10

oko anu pua lamawuape lo, nambato wandakali mindi tipa napewa.*

¹⁷ Okone angi teke, nambato aposolo akali wamba bulupane piape pua ateaini tupa andolo puu nape. Jia. Jutusaleme puu napene, namba Atepia yuu pulu, Damasakasa tano okona peke lewa.

¹⁸ Matili mali tepo pea-kola, nambato Pita andolo Jutusaleme yuu okona po peakaiyu loto, ole (15) piayasanga yau angu bala towa atu atepa.*

¹⁹ Okone angi, nambato nanimana Akali Andane okona amene Jemesa oko andewa tekeko, aposolo akali utupanena waka mindi anda napewa.

²⁰ Pii layene epene wamba nambato yakama langewa okone yuunga wandakali mindimane namba mana langi nape leyo okone enene ya lo yakamoto andalapale loto, andipa nambato pii temane oko loto, pepa peyo epe leyo okomane owato pii mindi yakama langi napeyo. Goteto andeya.

²¹ Jutusaleme tano oko tepa alu, namba Sitiya, Silisia-la, potopinjia okone-lapona pewe.*

²² Pewa-kola, Kataisa lo bilipi lene wandakali Jutiya disitiki okona atalaini tupamane nambana lee-inga anda napeai.

²³ Utupane-mane namba anda napeaini tekeko, wandakali waka tupamane loto, wamba Poloto kenda-pene andane tupa nanimu guato, Gotena pii layene epene oko minu koyane tekeko, andipa akali okonemane teke Gotena pii layene epene okone wandakali tupa lamawua ateya leainipia.

²⁴ Goteto nambana mini mopeke leane pii okone ale wato, Jutia disitiki okona tane Kitisene wandakali tupamane Gotena gene oko laiyu leainipia.

2

Nimbato Pii Kopeta Lale Lo Aposolo Akali Tupamane Namba Langi Napeai

¹⁻³ Okone angi wandakali yame waka tupa matili Juta yamena mana yene tupana pangosa andi latane atolaini lo namba yukuwa atewa. Matili wandakali yame waka utupane-mane Juta yamena mana yene tupa wato mineaindo, nambato piape wamba pewane tupapi, andipa pua ateyo tupapi, utupane pitaka mee katapusa piape pua apolowane nembo tewa. Nambato wuane nembo tewa-kola, Goteto namba Jutusaleme pola lo asia andawa leane. Mali piayasanga tukumindi penenga, balato asia andawa lea-kola, namba dee lapone Jutusaleme pewe. Okone angi nambato Taitasa lamialu, Banapasa towa

atu pema. Pema-kola, Jutusaleme sosa okona akali kawane gulo ateaini utupane namba towa atoto, pii layene epene nambato wandakali yame waka tupa lamaiyawane okone teke mandeke pua, akali utupane lamaewa. Taitasa namba towa atu pepale akali okone bala Gitiki yame tane mindi ateyo tekeko, pii nambato lamaiyawane oko lamaewa-kola, akali kawane gulo ateaini tupamane ale wato, Taitasa balana yala-pene umbaini oko katepe-pene naleyai.*

⁴⁻⁶ Dee, akali utupane-mane nambana pii ale wato, nimbato pii waka mindi tako pua wua lape loto, namba langi napeai. Nambato akali utupane akali kawane gulo ateyai leyo tekeko, Goteto akali mindi bala gene yene ateyo nembo natalane. Tene okonena, akali utupane yakama gene andane yene ateaindopi, gene nayene ateaindopi, okonetaka angini mindi jia lo nembo teyo. Wuane tekeko, nambato pii utupane lewa-kola, akali kawane tupamane ale wato, nimbato pii minditupa kopeta lale lo namba langi napeai. Jia. Jisasa Kataisana piape peane okomane nanimu tita lo mene atalamane. Tita lo mene atoto, nanimato Juta yamena mana minditupa wato mina na-piyamane okone wandakali minditupa-mane ale yaini. Ale wato, utupane-mane nanimu Juta yamena mana yene tupana pangosa atolo-peke loto, dee lapone andi latane gulo atalapale nembo teaini. Wuane nembo toto, akali utupane-mane tenga-mane epoto, nanimato tita lo mene mana tupa anu pua wato minhalaini lo pake andoyale, utupane-mane mee atene gulo ateaini. Wuane piyu, akali utupane-mane owato langa-langa puato, nanimana amene gulo atoto, wandakali pitaka-mane Juta yamena mana yene tupa wato mineakale leaini. Wuane leai-kola, pii layene epene oko yakamanga yapowa yakale loto, nanimato akali utupanena pii leaini tupa ale wato, jia lema.*

⁷⁻¹⁰ Wamba Pita bala Juta yamena aposolo akali atekale loto, Gotena Sipitisa okomane bala minu tai laya wato, balato Gotena pii layene epene oko Juta yame wandakali lamai-yakale leaipia. Wuane pua teke, namba wandakali yame waka tupana aposolo akali atola loto, Gotena Sipitisa mindiki okonemane teke namba minu tai laya wato, nambato Gotena pii layene epene oko wandakali yame waka tupa lamauila leane. Jemesa, Pita, Jone ima akali kawane gulo ateaini utupane-mane pii nambato lewa oko ale wato, Goteto piape okone nambanga geae-ya lo andeai.

Andoto, akali utupane-mane nanima languato, nanimato Juta yame wandakali tupa na tombenenga piape pua atamakaleko. Banapasa liyambato wandakali yame waka tupa na tombenenga piape pua atalapele tekeko, liyambato Juta yame wandakali tipia ateyai tupa embesa naene, utupane moyo atalapape lo nalipa langeai. Nambato piape okone teke pukale nemboto atewa. Piape wuane pua tale peyama leai-kola, nanimato kii sikane lema. *

Pitato Mana Koo Mindi Mineakale Lo Poloto Ando Konda Nayane Oko

11-13 Alu mindi Pita bala Andiyoko tano okona epo atoto, Juta yamena mana yene mindi ango wato, wandakali yame waka tupa towa tomo no atea-kola, matili Jemesa bala towa atu atalaini Juta Kitisene wandakali minditupa Andiyoko tano okona epeai. Wandakali utupane epo atea-kola, Pitato wua lo nembo teapia. Nambato wandakali yame waka tupa towa tomo newando, Juta yame wandakali utupane namba towa yataka olopeyai. Wuane nembo toto, balato yuku wato, Juta yame Kitisene wandakali epeaini utupane andakasa wato, Juta yamena mana yene okone wato minene gulo atea. Balato wuane pea-kola, Andiyoko tano okona Juta yame Kitisene wandakali atalaini tupa pitaka-mane mana okone teke wato minu atea. Wandakali utupane pitaka-mane owato mana okone wato mineai-kola, Banapasa balapi wuane teke pea. Wandakali tupa pitaka-mane Pitana owato mana okone wato mineai-kola, balana mana koo okone panakame ya-kola, balato mana okone mineakale lo nambato ando konda naewa. *

14-16 Andiyoko tano okona Juta yame Kitisene wandakali pitaka-mane Pitana owato mana okone wato minu atoto, pii layene epene enene okona mana tupa tika pua wato mina napeai. Nambato okone andoto, wandakali pitakana wenonga Pita bala laiya loto, yuunga wandakali mindikipi mindimane Gotena loo tupa pitaka tika pua wato mina na-piyamane lewa. Tene okonena, Goteto yuunga wandakali mindimane balana loo tupa wato minula oko andoto, bala tika-pene ateya nalolo-peya. Wandakali yame waka tupamane mana koo kambua minalaini. Wuane pua nanima Juta yamena mandiyene tupamane mana koo utupanena minditupa mina na-piyamane tekeko, wandakali mindimane Gotena loo tupa wato minu atola-kola, Goteto wandakali okone bala tika-pene ateya

na-lalane. Okone nembo toto, nanimato Gotena loo tupa wato minuluma-kola, balato nanima wandakali tika-pene ateyai leakale nemboto ata napema. Wandakali mindimane Jisasa Kataisa lo bilipi loloka, Goteto wandakali okone bala tika-pene ateya lanale. Okone nembo toto, nanimato Kataisa lo bilipi loloma-kola, Goteto wandakali nanima tika-pene leakale nayuto, Jisasa Kataisa lo bilipi lema. Pita nimba Juta yamena mandiyene atele tekeko, nimbato Jisasa Kataisa lo bilipi loto, Juta yamena mana yene minditupa tupa alu, wandakali yame waka tupa mana minditupa wato minu atalene. Jemesa towa atu atalaini wandakali minditupa epo atapiai-kola, anu peakale nimbato wandakali yame waka tupa mana yene tupa tupa alu, Juta yamena mana yene tupa minulupo-peke lelepe. Nimbato wuane pele okomane wandakali yame waka tupamanepi Juta yamena mana yene tupa wato mineakale lo mana lamaele okonde lewa. Wuane lewa-kola, Pitato nambana pii ale alu, wato minea. *

*Yakamato Gotena Ondowa Moyene Oko
Mo Apialaini Leane Oko*

17 Galesia potopinjia tane wandakali yakamana minditupa-mane tatake wato, wua lo tipa peyai: Nanimato Kataisa lo bilipi leyama okonena, Goteto nanima tika-pene ateyai lolopeyai nembo teyama. Wuane nembo toto, wandakali waka tupamane mana koo minalaini pua nanimatopi minemando, Kataisa balato mana koo tupa mina ika lalane lamakalepe. Jia.

18-20 Wamba Gotena iwanane okomane namba epele wete wato, nambana panda mo bala omea-kola, andipa nambato bala lo bilipi leyo. Kataisa lo bilipi leyo okomane namba bala towa atu ita malamanda okona peyo yukatane atene gulo ateyo. Namba omene gulo ateyo wete, Kataisa bala nambanga saka ateya-kola, nambato Gotena piape tupa pimauwakale nembo teyo. Gotena loo tupa kuai lo wato mina napiyawane nembo toto, nambato Gotena loo tupa wato minuluwa-kola, Goteto namba akali tika-pene ateya nalolo-peya ya lo andeyo. Andoto, nambato Gotena loo tupa wato minuluwa-kola, Goteto namba akali tika-pene ateya lolopeya nemboto atewane okone kondeyo. Nambato Juta yamena loo wato minalawane mana wamba kondewane tupa minulu-peke lewando, wandakali-mane andolai-kola, namba koo piyane akali mindi ateya lo andolopeyai. *

* 2:7-10: Ap 11:29-30; 22:21

* 2:11-13: Ap 11:3

* 2:14-16: Ap 15:10-11; Lom 3:19-28; Ga 3:10-12

* 2:18-20: Ga 1:4

²¹ Wandakali-mane Gotena loo tupa wato minulai-kola, Goteto wandakali utupane tika-pene ateyai lolopeya pia-yale, Kataisa bala omeane oko mee omeane gulatane atapia-yale. Wuane tekeko, wandakali-mane Gotena loo tupa wato minulai-kola, Goteto wandakali utupane tika-pene ateyai nalolo-peya. Tene okonena, Goteto namba ondowa moyo ateya-kola, nambato okone mo apia na-piyawane. Jia wete.

3

¹ Goteto namba ondowa moyo ateya-kola, nambato okone mo apia na-piyawane tekeko, Goteto Galesia tane wandakali yakama moyo ateya-kola, yakama kee ene gulo atoto, okone mo apeyai. Wamba Kataisato yakama moyoyale ita malamanda okona yukatane ateane okone nambato yakama panakame wete langewa-kola, yakamoto Kataisa lee-mane andene gulo bilipi leai okoni. Andipa Goteto yakama ondowa moyo ateya-kola, apito yakama mina kee eya-kola, yakamoto okone mo apoto, Kataisa tepawa ateyaipe.

² Nambato pii mindiki angu tipa peyo oko yakamoto yano peyo namba mana langiyapape. Anu puato, yakamoto Gotena Sipitisa oko meaipe. Yakamoto balana loo tupa wato minuto, Gotena Sipitisa oko meaipe. Pee, yakamoto Gotena pii layene epene oko ale wato, bilipi leai-kola, Goteto balana Sipitisa oko yakama geape.

³ Wamba bulupane tewa Gotena Sipitisa okomane yakama minu tai laya ya-kola, yakamoto balana mana tupa wato minu atei okoni. Andipa yakamoto Gotena Sipitisa okona tai-lene oko tepa wato, yakama tanena tai-lene okomane mana epene wete mindi wato minuto, Gotena piape oko pikoyo pimakale nembo teyaipe. Enene, yakamoto kee ene gulo atoto, wuane pimakale nembo teyaipe.

⁴ Goteto yakama moyoyale piape andane peane tupa tene na-atene mee mindi peane nembo teyaipe. Goteto yakama ondowa moyo ateya lo nembo teyai-kola, yakamoto okone mo apialu, lapone balana loo tupa pangosa andi latane atamakale nembo teyaipe.

Yakamoto Gote Lo Bilipi Leyai-kola, Balato Yakama Moyalane Leane Oko

⁵ Yakamoto Gotena loo tupa wato minu atei oko andoto, Goteto balana Sipitisa oko yakama guato, metekolo piape andane, tai-lene minditupa yakamanga peape. Pee, yakamoto Gotena pii layene epene oko ale wato, bilipi leai oko andoto, balato wuane peape.

⁶⁻⁹ Wamba wetete Goteto wua lo nembo teaipia: Wandakali yame waka tupamane nambana pii layene epene oko bilipi lolai-kola, nambato wandakali utupane tika-pene ateyai lokale nembo teaipia. Wuane nembo toto, balato potomisa pii epene mindi Apatakame lamaiyane oko pepa pelene eya. Pii okonemane loto, nimbanta mandiyene yame mindimane yuunga wandakali yame palu peyai tupa pitaka moyolo-peya layene eya. Goteto wuane lea-kola, Apatakameto Gotena pii okone enene ya lo bilipi leaipia. Apatakameto Gote lo bilipi lea-kola, Goteto Apatakame bala akali tika-pene mindi ateya leaipia. Andipa Gotena pii layene epene oko ale wato, bilipi lo ateyama wandakali nanimi Apatakamena yame enene gulo ateyama. Wamba Apatakameto Gote lo bilipi leane pua teke, andipa nanimatopi Apatakamena yame atoto, Gote lo bilipi leyama. Wuane beyama-kola, wamba Goteto Apatakame moyane pua teke, andipa balato nanimi moyo, nanimi wandakali tika-pene ateyai lalu, metekolo piape andane tai-lene minditupa nanimanga piyu, balana Sipitisa oko nanimi giyu, piyane.*

¹⁰⁻¹² Wandakali mindimane Gotena pii layene epene oko bilipi leando, Goteto bala tika-pene ateya lola-kola, wandakali okone bala saka atapowa atolopeya. Wandakali mindimane Gotena loo tupa bilipi lola okomane bala saka atapowa ata napulu-peya. Wandakali mindimane Gotena loo tupa pitaka ole dindi kuai lo wetete wato minu ateando, wandakali okone bala saka atapowa atolopeya lo Gotena pii pepa pelene eya tekeko, wandakali mindikipi mindimane Gotena loo tupa pitaka ole dindi kuai lo wetete wato minu ata napiyane. Tene okonena, wandakali mindikipi mindimane Gotena loo tupa wato minula-kola, Goteto wandakali okone bala tika-pene ateya nalolo-peya. Gotena pii pepa pelene eya mindimane loto, Gotena loo tupa pitaka ole dindi lo kuai lo wetete wato minu ata napiyaini wandakali tupa pitaka Goteto ita too atene yuu koo okona pulupa lo peyo watolopeya layene eya. Tene okonena wandakali mindimane Gotena loo tupa wato minula mambele, Goteto bala akali tika-pene ateya lolopeya nembo teando, Goteto wandakali okone bala yuu koo okona puu lo peyo watolopeya.*

¹³⁻¹⁴ Goteto nanimi yuu koo okona pulupa lo peyo watapia-yale tekeko, balato wua lo nembo teaipia: Wamba Apatakameto namba lo bilipi lea-kola, nambato bala akali tika-pene ateya lewa. Andipa wuane pua teke, wandakali yame

* ^{3:6-9:} Jen 12:3; Lom 4:2-3,16-17 * ^{3:10-12:} Lo 27:26; Ga 2:14-16

waka tupamane Jisasa Kataisa lo bilipi lolai mambele, nambato wandakali utupane tika-pene ateyai lokale. Wuane lalu, wamba nambana Sipitisa mauwakale lewane oko wandakali utupanenga mauwakale nembo teaipia. Nanimato mana koo minalamane mambele, nanima yuu koo okona pulupa lo wato pee lape-pene atema tekeko, Gotena pii pepa pelene eya mindimane loto, wandakali ita malamandanga peyo yukatane atolai tupa pitaka yuu koo okona pupe-pene gulo atolopeyai layene eya. Pii okonemane wuane leya okona, Kataisato Gotena nembo-tene oko wato minuto, nanimana moyoyale, nanimana panda mo, ita malamanda okona omea-angi, bala yuu koo okona pupe-pene gulo ateaipia. Bala yuu koo okona pupe-pene gulo ato omeane okomane nanimana kambo molo-peke leaipia.*

Loo Tupamane Gotena Potomisa Pii Oko Mo Apia Napeane Leane Oko

15-18 Wamba Goteto pii mindi Apatakame lamawuato, nimba yame-mane mandiyene mindimane yuunga wandakali palu peya tupa pitaka moyolo-peya leane. Balato Apatakame mandiyene yame kambua ateyai tupa nembo toto, pii okone lamai napeaipia. Balato Apatakame yamena akali mindiki angu nembo toto, balato wandakali yame pitaka moyolo-peya leaipia. Akali okone bala Kataisa. Wamba Goteto yuu epene mindi paluni gulo nanimana mee gukale leaipia. Andipa nanimato balana loo tupa wato minuluma oko andoto, balato yuu epene okone nanimana geando, yuu okone nanimana yole gulo yolopeya. Yuu epene okone nanimana yole guleando, wamba Goteto yuu epene okone paluni gulo nanimana mee gukale leane oko mee lene gulolo-peya. Wuane tekeko, Goteto yuu epene mindi paluni Apatakame mee mauwakale leane okone balato Apatakame mee mayaepia. Wuane pua teke, Kataisato nanimana moyoyale omeane okonena, Goteto paluni gulo yuu epene mindi nanimana mee gukale leya. Amene imalini ima, andipa nambato nanimana yuunga wandakali-mane mana minalamane mindi mandeke pua leyo. Akali mindimane balana minditaka yolane tupa pitaka paluni tale puato, wandakali mindiki-mindiki lo wua pua mialapape lalu omeando, akali waka mindimane balana pii lolane okone mo apoto, pii waka mindi lo kimbu pua na-lalaini. Okonetaka gulo, Goteto Apatakame potomisa pii mindi lamaiyane oko lamawuato, nambato yuu epene mindi nimbapi, nimbana yame tupapi, paluni gulo mee gukale lo

wamba ini lamai-yaepia. Matili mali andete tukumindinga paiyasa tepo pea-kola, loo paiyasa tupa ananga pepa peyoto, Mosenga mayaepia. Wuane tekeko, balana mana matili yata yane okomane balana potomisa pii wamba bulupane leane okone mo apoto, mee gulaya naene, yapowa eya.*

19 Enene, loo Goteto matili yata yane okomane balana potomisa pii wamba bulupane leane okone mo apia napae yalue-ko. Anu peakale balato loo paiyasa tupa yata yaepia. Wamba Goteto potomisa pii mindi Apatakame lamawuato, nimba yame-mane mandiyene mindimane yuunga wandakali palu peya tupa pitaka moyolo-peya leane akali okone wamba ini na-epeaipia. Wamba ini naepea-kola, yuunga wandakali-mane mana koo minalamane utupane panakame yola-kola, koo ya lo andalapale loto, Goteto balana loo paiyasa tupa mayaepia. Goteto enjole tupamane balana loo utupane Mosesanga maiya-kola, Mosesa bala tombenenga akali mindi atoto, wandakali waka tupa lamai-yaepia.*

20 Tombenga akali mindi atoto, balato Gotena pii layene tupa wandakali tupa lamaiyu, wandakalina pii leaini tupa Gote lamaiyu pua ateaipia. Wuane tekeko, Goteto yuu epene mindi paluni gulo mee gukale lea-angi, tombenenga akali mindi ato napea-kola, Gote bala tane-mane potomisa pii okone Apatakame lamai-yaepia.

Andipa Gotena Sipitisa Okomane Nanimana Yatawa Ando Atalane Leane Oko

21 Wamba bulupane Goteto potomisa pii mindi leane oko loto, wandakali mindimane Jisasa Kataisa lo bilipi leando, nambato wandakali okone bala tika-pene ateya lolowa-kola, bala saka atapowa atolopeya leaipia. Matili balato balana loo tupa yata wato, wandakali mindimane nambana loo yata eyo tupa pitaka ole dindi lo kuai lo wetete wato minu ateaindo, wandakali okone bala saka atapowa atolopeyai leaipia. Balana pii okonelapo yanda-pene gulo eyapipe. Jia, pii okonelapo yanda-pene gulo nae. Gotena loo utupanena mindimane nanimana saka atapowa atalane tene oko katulo gulupeya pia-yale, nanimato balana loo tupa wato minu atoto, wandakali nanimana tika-pene ataima-yale.*

22 Wuane tekeko, wamba Goteto wua lo nembo teaipia: Wandakali-mane Jisasa lo bilipi lolai-kola, nambato wandakali utupane tika-pene ateyai lokale nembo teaipia. Wandakali-mane Jisasa lo bilipi leakale loto, Goteto pii mindi leane oko loto,

* 3:13-14: Lom 8:1-4; Lo 21:23

* 3:15-18: Jen 12:9; Ek 12:40; Lom 4:13-15

* 3:19: Lom 5:20-21; Ap 7:38

* 3:21:

4

yuu okona mana koo tupamane wandakali pitaka andi latane lo pepa pelene eya.

²³ Wamba yuunga wandakali-mane Kataisa lo bilipi naleai-angi, Gotena loo tupamane utupane andi lea-kola, utupane andi latane ateinipia. Andi latane ateyai wete, Goteto wandakali molo-peke lolane asini mindi waa puato, matili nambato Kataisa utupanenga mo pana olowa-angi, utupane-mane Kataisa lo bilipi lolai mambele, nambato utupane tinga lo mokale nembo teapia. *

²⁴ Wuane nembo toto, nanimato Kataisa lo bilipi loloma-kola, Goteto nanima wandakali tika-pene ateyai lokale leaipia. Wuaneko, nanimato Kataisa lo bilipi lalapale nayuto, Goteto balana loo tupamane nanima ando atekale lo yata ya-kola, balana loo tupamane nanima wua pua atalapa lo mana langeai. *

²⁵ Wuane tekeko, andipa nanimato Kataisa lo bilipi leyama-kola, Gotena loo tupamane nanima ando ata naopeya. Jia. Andipa Gotena Sipitisa okomane nanima mo tika pua ando ateya.

²⁶⁻²⁸ Wamba yakama Kataisana yame atamakale loto, ipa meai okoni. Okone angi, Goteto Kataisana mana epene tupa yakamanga yata ya-kola, yakama bala yale guleai. Yakama pitaka-mane Kataisa bilipi loto, yame mindiki ateyai. Andipa Goteto andeya-kola, Juta yamepi, wandakali yame waka tupapi, yakama yame waka-waka ata naopeyai. Wandakali minditupa-mane wandakali mindina katapusa piape pimawuato, yole mia napiyaini. Wandakali minditupa-mane piape puato, yole mialaini. Wuane tekeko, Goteto andeya-kola, wandakali yame okonelapo yame mindiki ateyapi. Balato andeyakola, wanda yamepi, akali yamepi, yame okonelapo mindiki gulo ateyapi. Yakama pitaka-mane Jisasa Kataisa bilipi leyai okomane Gotena mandiyene yame ateyai. Tene okonena, Gotena loo tupamane yakama yatawa ando ata naopeya. *

*Andipa Nimba Andi Latane Ata Napene,
Gotena Andopane Atele Leane Oko*

²⁹ Kataisa bala Apatakamenya yame ateyapi. Yakama Kataisana yame ateyai okonena, yakamapi Apatakame yame gulo ateyai. Wamba Goteto Apatakame lamawuato, nambato yuu epene mindi paluni gulo, nimbapi, nimba yamepi, mee gukale leaipia. Yakama Apatakamenya yame ateyai okonena, Goteto yuu epene mindi paluni gulo yakama mee gulueuya. *

¹ Matili balato wuane pulupeya tekeko, andipa nambato kokoli pii mindi yakama langeyo. Wandakali minditupa andi latane atoto, minditaka mindi ando ata napiyaini. Wandakali andi latane ateyai utupane palaka polaini loto, wandakali minditupa-mane utupane ando atalaini. Wuane pua teke, akali mindimane balana minditaka yolane tupa paluni gulo, balana andopane ajako mindi mauwakale lalu omeando, okone angi teke balana andopane ajako okonemane paluni okone ando ata napiyane.

² Enene, paluni okone balana yalane tekeko, bala andopane ajako atola-angi, wandakali waka tupamane balapi, balana paluni tupapi, yatawa ando atalaini. Matili bala ayiane-mane paluni miape lolane oto okone epola-angi, iwana okone mini-yene guloto, bala tane paluni okone mialu, ando atolopeya.

³ Wuane pua teke, wamba nanimato Kataisa lo bilipi nalene atema-angi, nanima andopane ajako tupa atalaini pua atema. okone angi yuu okona mana tupamane nanima andi lea-kola, nanimato katapusa piape pua atema. *

⁴⁻⁵ Katapusa piape pua atema-kola, Goteto wua lo nembo teapia: Nambana loo tupana pangosa andi latane ateyai wandakali tupa nambana andopane guleakale-ko. Nambana iwanane okomane wandakali utupane kambo molo-peke leakale nembo teapia. Matili wandakali kambo molo-peke lolane oto okone epeangai, Goteto balana iwanane oko epeakale lea-kola, wanda mindimane Kataisa mandeaipia. Mandea-kola, Kataisa bala loo tupana pangosa atoto, wandakali nanima loo tupana pangosa atemane tupa kambo molo-peke leaipia. Balato wuane peane okonena, andipa nanima Gotena andopane yame ateyama. *

⁶ Yakama Gotena andopane yame guleai-kola, balato balana iwanane okona Sipitisa oko yakamanga epo atekale lea okoni. Balana Sipitisa oko yakamanga epo ateyakola, yakamato Gote ando ayiane lo loma yo atalaini. *

⁷ Tene okonena, andipa nimba andi latane ata naopele. Nimba Gotena andopane atele okonena, Goteto balana paluni oko nimba mee gulueuya.

*Anu Peakale Yakamato Katapusa Piape
Pulu-peke Lamakale Nembo Teyaipe*

* 3:23: Ga 4:3 * 3:24: Lom 10:1-4 * 3:26-28: Jo 1:12; Lom 6:2-3; 10:11-12 * 3:29: Lom 4:13-15 * 4:3: Kol 2:20-23 * 4:4-5: Jo 1:14; Lom 1:3 * 4:6: Lom 8:14-17

⁸ Enene, wamba yakama Gotena andopane yame ateyama nembo natene ateai-angi, owato gote tupamane yakama andi leai-kola, yakamato utupanena katapusa piape pua ateai.

⁹⁻¹⁰ Wamba yakamato wuane pua ateaini tekeko, andipa yakamato Gote nembo teyai. Goteto yakama nembo teya leyo-kola, pii okone kuai lalua. Yakamato Gote nembo teyai tekeko, andipa Goteto yakama wandakali tika-pene ateyai leakale nembo toto, yakamato oto andane minditupa minu ateyai. Ana wenene mindi epeya-angipi, ee ana wenene mindi epeya-angipi, oto andane waka mindi epeya-angipi, Juta yame-mane mana minditupa wato minalaini pua teke, yakamatopi mana utupane wato minalaini. Juta yamena mana tai nalene utupane-mane yakama katulo moya napulu-peyako. Anu peakale yakamato dee lapone katapusa piape pulu-peke lamakale nembo toto, mana okonepene tupa wato miniyaipe.*

¹¹ Yakamato wuane pua ateyai oko andoto, wamba nambato yakama moyokale lo piape tandaka no pewa tupa mee katapusa piape pua apolowane lo yuku piyua.

Nambana Mana Tupa Wato Minalapape Leane Oko

¹²⁻¹⁵ Amene imalini ima, wamba nambato yakama moyokale nembo toto, tandaka no piape pewa tupa mee katapusa piape pua apolowane lo yuku wato, nambato pii mindi yakama langyeyo. Wamba namba Juta yamena mana yaini tupa wato minu atoto, mana utupanena pangosa andi latane gulo atewa. Okone angi wandakali yame waka yakamato Juta yamena mana yaini utupanena pangosa andi latane ata napeai. Namba yakama towa atu atema-angi, nambato yakamana mana okone wato minuto, Juta yamena mana yene tupana pangosa andi latane atolaini. Tika ando atalapape loto, nambato yakama tee lo langyeyo. Anu peakale nambato wuane leyope. Wamba namba yuu waka mindina moyale, Galesia potopinjia okona epewa-angi, namba siki mindi mewa okoni. Siki mialu atoto, namba yuu waka mindina puu napene, Galesia yuu okona atoto, Gotena pii layene epene oko bulupane tewa yakama langewa okone yakama tane nembo teyai okoni. Okone angi siki koo okonemane namba minu koya yane mambele, yakamato katulo Polo bala koo ya loto, namba masia geai-yale tekeko, yakamato namba anda napi nalene, ipu lo

lameai okoni. Gotena enjoje mindi epea-yalepi, Jisasa Kataisa bala tane epea-yalepi, okone-lapona mindi epeapi-yale, yakamato epele wete wato, bala ipu lo lameai-yale. Wuane pua teke, namba epewa-angi, yakamato epele wete wato, namba ipu lo lameai. Lameai-kola, namba yakama towa atu atema-angi, yakamato namba towa kopeta mindi pii napeai. Jia. Okone angi, yakamato yakamana lee okolapo lukuto, mindi akali maiyaini pia-yale, yakamana lene okolapo lukuto, namba geai-yale lo nambato yakama langyeyo. Wamba yakamato namba towa epele wete wa ateai-ko. Andipa anu peyanga yakamato namba towa epele naene kondeyaipe.

¹⁶ Wamba nambato pii layene enene oko yakama langewa okonemane namba yakamana yanda-pene akali gulo ateyope. Jia. owato potopesa akali tupamane yakama andakasa eyai-kola, yakamato namba towa embo alui.

¹⁷ Yakamato owato potopesa akali utupane epele wete alapale lo, utupane-mane yakama mo andiki piyawa ateyai. Akali utupane-mane wuane pua ateyai tekeko, utupanena mana okone koo. Yakamato namba tepa alapale nembo toto, utupane-mane yakama mo epelewa, andiki piyawa ateyai. Tene okonena, yakamato namba towa embowa ateyai nembo teyo.

¹⁸ Ole dindi lo akali mindimane piape epene mindi pukale nembo toto, wandakali waka tupa mo epele piya yando, mana okone epene. Wamba namba yakama towa atu atema-angi, yakamato pii layene enene oko epelewa minu ateai. Andipa namba yakama towa atu ata napeyo-kola, yakamato pii layene enene okone epelewa minu ateai napeyai.

¹⁹⁻²⁰ Galesia tane wandakali yakamato wuane peyai lene ale wato, nambato anu pukalepe lo nembo kambua teyo. Yakamato wuane peyai lene ale wato, nambato yakama ateyai epoto, pii waka mindi langukale nembo teyo tekeko, namba katulo naipupe-pene guleya. Wanda mindimane andopane manduyale pulu-angi, masia peleya-kola, bala tandaka andane nalane. Wuane pua teke, wamba yakamato Kataisa lo bilipi lalapale loto, namba tandaka andane no Gotena piape pua atewa. Piape pewane okonemane yakama nambana andopane yame gulo ateai. Andipa yakamato loo tupana pangosa dee lapone andi latane gulo atamakale nembo teyai. Wuane nembo teyai okonena, namba dee lapone tandaka no piape pua atolowa-kola teke, yakamato Kataisa lo bilipi leyama nayu lolai-angi,

* 4:9-10: Lom 14:5-6; Kol 2:16-17

namba tandaka no piape pua ateyo okone koyo pulupeya.

²¹ Goteto yakama wandakali tika-pene ateyai leakale nayuto, yakamana minditupa-mane balana loo tupana pangosa andi latane atamakale nembo teyai okonena, nambato pii mindi yakamanga tipa peyo oko yakamato yano peyo namba langi-yapape. Yakamato Gotena pii pepa pelene eya mindi ale naene ateyaipe.

²²⁻²³ Gotena pii pepa pelene okonemane loto, wamba Apatakameto iwana lapo mandeaipia layene eya. Katapusa piape piyane wanda Ekato wandakali-mane andopane mandiyaini pua iwana Isamale mandeaipia. Goteto andopane mindi liyamba gukale lo potomisa pii mindi lea-kola, mee anana pitiyane wanda Setato iwana Aisake mandeaipia.*

²⁴⁻²⁵ Wanda okonelapo pii lapo Goteto lo yata yane okolapo mandeke pua layene eya-kola, pii temane okonena kokoli pii mindi paleya. Atepia yuu okona Ati Sainai oko peleya. Mosesa bala Ati Sainai okona atea-angi, Goteto balana loo tupa yata yaepia. Eka bala Gotena loo oko mandeke peya. Wamba Eka bala yole mia napiyane selepe wanda pituto, katapusa piape pua peteaiapia. Bala selepe wanda petea-kola, balana mandiyene yame tupapi selepe atoto, katapusa piape pua teke ateaipia. Wuane pua teke, andipa Jutusaleme yuu okona wandakali ateyai tupa loo tupana mandiyene yame gulo atoto, Goteto nanima wandakali tika-pene leakale nembo toto, katapusa piape pua ateyai.

²⁶⁻²⁷ Gotena pii pepa pelene eya mindimane loto, wanda kinambuli wamba akalini-mane tepa ene okomane matili andopane kambua mandulu-peya. Mandulkola, wanda andipa akali towa atu peteyapi okomane andopane mandulane tupa sia minulu-peya layene eya. Tene okonena, wanda nimba masia peyo, andopane mandi napene, mee petele oko nimba epele wete wato, tama pua pitipe layene eya. Wanda wamba andopane mandi napene mee anana peteane okone bala Jutusaleme wenene ati kenga eya oko mandeke pitane eya. Jutusaleme wenene okonena wandakali ateyai tupamane oto mo, mee anana wete ateyai. Jutusaleme okone nanimana angini gulo, ati kenga eya.
*

²⁸ Amene imalini ima, wamba Goteto potomisa pii mindi Apatakame lamawato, nambato iwana mindi nimba gukale lea-kola, Setato iwana Aisake mandeaipia. Wuane pua teke, Goteto potomisa pii mindi

yakama languato, yuu epene mindi mee gukale leaipia. Yakamato balana pii okone enene ya nembo teyai okonena, yakama balana andopane yame ateyai.*

²⁹ Wandakali-mane andopane mandiyaini pua teke, wanda Eka balato iwana Isamale mandeaipia. Gotena Sipitisa okomane Seta minu tai laya ya-kola, balato Aisake mandeaipia. Aisake mandea-kola, wandakali-mane andopane mandiyaini pua mandeane iwana Isamaleto Aisake towa embo wato, kenda-pene andane minditupa bala mawua ateaipia. Wuane pua teke, andipa Gotena loo tupana pangosa andi latane wandakali ateyai tupamane Gotena Sipitisa okona pangosa ateyama wandakali nanima towa embo wato, kenda-pene andane minditupa nanima giyaini.*

³⁰ Wandakali utupane-mane wuane piyaini tekeko, Gotena pii pepa pelene eya mindimane loto, wanda anana mee peteane okona andopane okomane bala ayianena paluni tupa pitaka molopeya. Pitaka mola-kola, katapusa piape piyane wanda okona andopane okomane ayianena paluni mindi mia napulu-peya. Tene okonena, nimbato piape wanda okola, balana andopane okola, okonelapo yuu waka mindinga peakale lo peyo watape lo layene eya. Gotena pii pepa pelene eya mindimane wuane layene eya tekeko, owato potopesa akali utupane piape wanda okona andopane gulo ateyai-kola, yakamato utupane peyo wata napene, atekale lo ando kondeyai okonde. Yakamato owato potopesa akali tupa atekale lo ando kondeyai okonena, yakamato Gotena pii pepa pelene eya okone ale naene ateyai ya lo nambato andeyo.

Yakamato Dee Lapone Andi Latane Gulo Atolaini Andalapape Leane Oko

³¹ Amene imalini ima, nanima piape wanda okona andopane yame gulo ata napeyama. Nanima wanda anana mee peteane okonena andopane yame ateyama.

5

¹ Enene, wamba nanima andi latane atema-kola, Kataisato nanima titi lo mene atalapale nembo teaiapia. Wuane nembo toto, balato nanima titi lo meane tekeko, andipa owato potopesa akali tupamane yakama yuu okona loo tupana pangosa dee lapone andi latane atalapale nembo teyai-ko. Yakama tai gulo atoto, mana utupanena pangosa dee lapone teke andi latane atolaini. Tika ando atalapape.

* ^{4:22-23:} Jen 16:15; 21:2; Lom 9:6-9 * ^{4:26-27:} Ip 12:22; Lap 21:2,10; Ais 54:1 * ^{4:28:} Lom 9:6-9 * ^{4:29:} Jen 21:9-10; Jo 8:35

²⁻⁶ Anu peakale nambato wuane leyope. Jisasa Kataisa lo bilipi lene akali tupana yala-pene umbaini öko katene yandopi, kati napene yandopi, mana okonelapo angini mindi jia. Wandakali mindimane Jisasa lo bilipi loto, wandakali waka tupa epelewa yamapane yoto, utupane moyo ateando, mana okone angini wete mindi. Gotena Sipitisa okomane nanima minu tai laya eya-kola, Kataisato nanima tita lo meane lo bilipi leyama. Tene okonena, Goteto nanima wandakali tika-pene ateyai lolopeya nembo toto, nanimato epelewa maliyo ateyama. Nanimato wuane pua ateyama tekeko, yakamana minditupa-mane wuane naheyai. Jia. Yakamoto loo tupa wato minu ateaindo, Goteto yakama wandakali tika-pene ateyai lolopeya nembo teyai. Yakamoto wuane nembo teyai okonemane Kataisa awua tepa wato, Goteto yakama ondowa moyane okopi awua tepa eyai. Wuane, yakamoto loo Mosesata yata yane oko wato minuto, akali utupane-mane yakamana yala-pene umbaini öko kateakale lo ando konda yaindo, Kataisato yakama tita lo moyale piape peane okomane yakama anjaköpi mindi moyo napulu-peya. Kataisana piape peane okomane yakama moyo napulu-peya nembo toto, yakamana yala-pene umbaini kateakale lo ando kondalaini akali tupa yakama pitaka-mane loo tupa pitaka wetete wato minu atalapape. Namba Poloto pii okone dee lapone yakama langeyo oko yakamoto ale alapape. *

⁷ Wamba nambato Gotena pii layene epene oko yakama langewa-angi, Goteto yakama ee lo mea okoni. Ee lo mea-kola, yakamoto pii enene okone bilipi loto, kuai lo mango atea. Andipa apito yakamana asia okone pai leya-kola, yakamoto pii enene okone wato mina naheyai.

⁸ Yakamoto pii enene okone wata mina napene kondalapape loto, Goteto yakama langi nape.

⁹ Palawa yangalaini pauta anjako mindi palauwa towa atu mina mindiki leyama-kola, pauta anjako wete okonemane palauwa okone mo andayoto, waka gulaya alane. Wuane pua teke, wandakali mindikimane owato pii mana lamaula-kola, wandakali waka tupamanne pii mana okone wato mineaindo, utupane waka gulolo-peyai. *

¹⁰ Akali mindimane owato pii mana yakama langu ateya tekeko, Akali Andane okomane yakamapi, nambapi, nanima pitaka bala towa atu mina mindiki leaipia. Balato wuane pea-kola, yakamoto bala

lo bilipi loto, pii layene epene nambato langewa okone tepa naeme, wato minu atolopeyai nembo teyo. Nambato wuane nembo teyo tekeko, owato potopesa akali okone bala akali gene yene yandopi, gene nayene yandopi, Goteto bala yapa lo tale pulupeya. Goteto bala yapa lo tale pulangi, akali okonemane pii mana kopeta lalane okone nembo toto, Goteto bala yole koo mindi malupeya. *

¹¹ Amene yame, yakamana yala-pene umbaini öko kateakale lo ando kondalapale nembo toto, akali minditupa-mane owato pii loto, Poloto yakamana yala-pene umbaini öko kateakale lo ando kondalapa loto, mana lamawua ateya lalaini. Akali utupane-mane wuane lalaini tekeko, nambato akali utupane-mane yakamana yala-pene umbaini kateakale lo ando kondalapa loto, mana lamawua atalawae pia-yale, owato potopesa akali utupane-mane yataka wato, kenda-pene andane tupa namba gii napiapia-yale. Kataisa ita malamanda okona omeane okomane wandakali moyalane lo nambato mana lamawua atalawane okonena, owato potopesa akali utupane-mane namba towa yatakawa ateyai.

¹² Akali utupane-mane yakamana yala-pene umbaini kateakale lo ando kondalapa loto, yakama minu kee eyai. Akali wuane peyai utupane yakama tanena wangali okonelapo wetete too lo apeakale loto, nambato nembo teyo.

¹³⁻¹⁴ Amene imalini ima, yakama tita lo mene atalapale nembo toto, Goteto yakama ee lo meane tekeko, yakamoto tita lo mene ateyama lo nayuto, nembo-tene wambane okona mana koo tupa wato minulaini andalapape. Loo tupa pitakana tene andane mindiki angu eya okomane loto, nimba tane epele alene pua, nimbato wandakali yangone waka tupa epelewa atape leya. Loo tupana tene okone nembo toto, yakamoto mindi akali epele aka pua, wandakali yangone tupana piape akali gulo, mindi moyaya pua atalapape. *

¹⁵ Nambato wuane leyo tekeko, yakamoto nambana pii leyo okone tanga loto, yia piango gulo, yatakawa peya-peya puato, yakama tane mindi peyo naa-naa pulaini. Tika ando atalapape.

Sipitisa Okomane Mana Epene Yakama Langeya Tupa Wato Minalapape Leane Oko

¹⁶⁻¹⁸ Gotena Sipitisa okola, yakamana nembo-tene wambane okola, okonelapo yanda pua atalapele. Gotena Sipitisa okomane mana epene mindi minalapa leya-kola, yakamoto wuane pimakale nembo talaini tekeko, yakamoto mana

* 5:2-6: 1Ko 7:17-19; Ga 6:14-15

* 5:9: 1Ko 5:6

* 5:10: Ga 1:7-8; 2Ko 11:15

* 5:13-14: 1Pi 2:16; Lom 13:8-10

epene okone minulaini nembo toto, yakama nambato wambane okomane jia lalane. Yakamana nembo-tene wambane okomane mana koo mindi minalapa leyakola, yakamoto wuane pimakale nembo talaini. Wuane nembo talaini tekeko, yakamoto mana koo okone minulaini lo, Gotena Sipitisa okomane jia lalane. Yakamoto mana epene Gotena Sipitisa okomane yakama langeya tupa wato minu mangeaindo, yakama loo tupana pangosa andi latane ata napulu-peyai. Yakama tita lo mene atoto, Sipitisa okona mana epene tupa wato minu ateaindo, yakamana nembo-tene wambane okona mana koo tupa wato mina napulu-peyai. Yakamoto mana epene Gotena Sipitisa okomane yakama langeya tupa wato minu atalapape lo, nambato yakama langeyo.*

¹⁹ Wandakali pitaka-mane nembo-tene wambane okona mana koo tupa panakame andalamane. Nembo-tene wambane oko wato minu atalaini wandakali tupamane mana koo kalato atene tupa wato minu atoto, pamuku pua, mana yala-pene wete tupa puato, yala na-alaini.*

²⁰ Nembo-tene wambane oko wato minu atalaini wandakali utupane-mane owato gote tupa lo lotu lalaini. Utupane-mane tomepi, kamopi, utupane pitaka minalaini teke. Dee, utupane yanda-pene atoto, peyapeya piyaini. Utupane-mane apiangu puato, yataka alaini teke. Dee, yakama tane angu nembo toto, yame waka-waka gulo atoto, yame waka tupa embo wato, utupane sia mina-makale nembo talaini. Utupane-mane bia ipa tai kambua noto, keewa atalaini teke.

²¹ Nembo-tene wambane okona mana koo mindipene-mindipene kambua yalane. Wamba nambato mana koo utupane nembo toto, pii mindi yakama langewa. Andipa nambato pii okone teke dee lapone yakama langeyo. Mana koo okonepene minu atalaini wandakali tupa Gotena yuu epene okona katulo kolandaka nalooleyai.

²²⁻²³ Wuane tekeko, Gotena Sipitisa okomane wandakali mindinga piape peyakola, dini epene minditunga wua pua lalane: Gotena Sipitisa okomane piape peyakola, wandakali mindimane balana wandakali yangone tupa towa yamapanne yo atoto, muri epene palu epelewa atalane. Wandakali mindimane bala towa mana koo mindi miniyai-kola, Gotena Sipitisa atene wandakali okomane paini napene kondalane. Wandakali okone bala tambo lo atalane. Nembo-tene wambane okomane

mana koo mindi balanga mina ika lolane lo, bala tane pai lo ando atalane. Balato wandakali yangone tupa moyo, minditaka kambua maiyane. Balato minditaka mindi pukale lolane okone enene piyane. Gotena loo utupanena mindimane mana epene utupanena mindi minulaini kondalapa lo jia layene naeya.

²⁴ Yuunga wandakali nanima pitakanane nembo-tene wambane oko wato minuto, wandakali mindina minditaka yola tupa miauwa lakae lo nembo talamane. Molane asia mindi naeya-kola, nanima yataka wato, mana koo mindi mina-makale nembo talamane. Wuane tekeko, wamba nanima Jisasana Kataisana yame gulemangai, nanimato mana koo utupane masia maema okomane nanimana nembo-tene wambane oko Jisasana ita malamanda okona peyo ome lema.*

²⁵ Gotena Sipitisa okomane saka atene tene oko nanimi giyane okonena, balato leya pimakale.

²⁶ Nanimi tane laiyu lo atemando, wandakali yangone-mane minditaka nanimana eyama tupa miauwa lakae lo nembo teakale loto, mo yataka oloma-kola, pulu-peyama. Wuane pulumane nembo toto, nanimi tane laiyu nalene, kondamakale.*

6

¹ Amene imalinu ima, wandakali waka mindimane mana koo mindi mineando, Sataneto Gotena Sipitisa atene wandakali yakamapi mandeke pula-kola, yakamatopi mana koo okone minulumane nembo toto, yakamoto pii tenga-mane loto, wandakali okone lo tika piyapape.*

²⁻³ Akali gene nayene mindi bala tane akali gene yene mindi ateyo nembo teando, akali okone bala tane andakasa ola-kola pulupeya. Balato wuane pulupeya tekeko, wandakali mindimane wandakali yangone kenda-pene andane awua atolai tupa moyando, balato mana epene Kataisato yata yane oko wato minula-kola pulupeya. Tene okonena, yakama tane wandakali gene yene ateyama nembo natene, wandakali yangone kenda-pene andane awua atolai tupa moyaka pua atalapape.*

⁴⁻⁵ Yakamoto wandakali yangone tupa moyo atalapale tekeko, ole dindi lo kenda-pene ajako minditunga yakamanga epolopeya. Wandakali yakama tane mindiki-mindiki lo kenda-pene ajako utupane awua atolopeyai. Yakama tanena kenda-pene utupane awuato, piape kuai lo peaindo, wandakali waka tupamane yakamana gene tupa laiyu lolopeyai. Tene

* 5:16-18: Lom 7:14-23

* 5:19: 1Ko 6:9-11

* 5:24: Lom 6:4-7; Kol 3:5-6

* 5:26: Pl 2:3

* 6:1: Mt 18:15

* 6:2-3: Lom 15:1-4

okonena, wandakali waka mindimane piape anu peyape nembo natene, yakama tane piape anu peyope lo tale pua atalapape.*

⁶ Yakamoto wuane pua atape-pene tekeko, Gotena pii layene epene okona mana mo atolane wandakali okomane balana minditaka epene yolane tupa pitaka tale puato, minditupa mana langulane akali oko maipe-pene.*

⁷⁻⁸ Wandakali mindimane tomo waini mindi yandola-kola, yandolane tomo mindiki okometaka teke ika lolopeya. Ika loto, dini lula-kola, balato tomo okone teke mandu nolopeya. Wuane pua teke, Gotena Sipitisa okomane epele yakale nembo toto, wandakali mindimane waini epene minditupa yandeando, waini utupanena dini epene teke lula-kola, Oli Sipitisa okomane wandakali okone bala saka atapowa ateakale lolopeya. Balana nembotene wambane oko epele yakale nembo toto, waini koo minditupa yandeando, waini koo utupane-mane dini koo teke lula-kola, wandakali okone omoto, alu pulupeya. Wandakali mindimane waini koo yandoto, waini epene tupa yandewa leando, balato katulo Gote andakasa na-loopeya. Tene okonena, yakamoto Gote andakasa eyama nembo toto, yakama tane andakasa olaini. Tika ando atalapape.*

⁹ Nanimato piape epene tupa kepa naene, tailo pua atemando, tomo mandu nolane oto oko epola-angi, nanimato tomo epene tupa mandu nolo-peyama. Okone nembo toto, nanimato piape epene tupa pua atoto, kepawa ata napimakale.

¹⁰ Nanimato wandakali yangone tupa moyolane asia yola-angi, wandakali pitaka towa mana epene tupa minu atamakale. Wuane pimakale tekeko, Jisasa lo bilipi leyai wandakali yangone utupane-mane kenda-pene mindi awua ateaindo, nanimato utupane ini moyo-makale.

Poloto Pii Lo Koyo Pua Leane Tupa

¹¹ Andipa nambato yakamana pepa oko peyo epe loto, namba tanena kini-mane leta andane tupa peyalawane pua peleyo oko yakamoto andalapape.

¹²⁻¹³ Kataisa bala ita malamanda okona omeane okomane nshima moyolo-peyama nembo toto, Kitisene akali tupamane yala-pene umbaini katiyaini mana oko wato mina na-piyamane. Tene okonena, Juta yame-mane kenda-pene andane minditupa nshima giyaini. Juta yame-mane kenda-pene andane minditupa yakama gulaini nembo toto, akali minditupa-mane Juta

yamena mana yene tupa wato minene gulo atamakale nembo teyai. Wuane nembo toto, yakamana umbaini oko kateakale lalu, utupane-mane Galesia tane akali yakamana umbaini kateakale lo ando kondalapape lalaini. Yakamoto utupanena pii okone ale wato, yakamana umbaini kateakale lo ando konda yaindo, akali utupane-mane yakama tane laiyu loto, Juta yame wandakali tupa lamalu-peyai. Lamaulai-kola, Juta yame-mane kendapene andane minditupa akali utupane mai napulu-peyai. Akali utupane yakama tane loo tupa pitaka wato mina napiyaini tekeko, Juta yame-mane kendapene andane minditupa yakama gulaini nembo toto, Galesia tane akali yakamoto Juta yamena umbaini katene mana okone wato minalapa lalaini.

¹⁴⁻¹⁵ Akali utupane-mane wuane lalaini tekeko, yakamana yala-pene umbaini oko katene ateaindo, kati napene ateaindo, mana okonelapo angini mindi jia. Goteto nanima mo wenene gulaya alane mana okone angu mana angini wetete mindi eya. Namba mo wenene gulaya oyale, balato Jisasa ita malamanda okona omeakale leaipia. Jisasato nambana koo tupa apoyale omeane okonena, nambato yuu okona mana koo tupa epelewa minu ata na-piyawane. Nambato mana koo tupa epelewa minu ata napeyo-kola, yuu okona mana koo epelewa minu atalaini wandakali tupamane namba towa epelewa ata na-piyaini. Wuane tekeko, nambato yuu okona ato, mana epene mindi minyo loto, namba tane gene laiyu nalolo-peyao. Jia. Nanimana akali andane Jisasa Kataisa bala ita malamanda okona omeane oko nembo toto, nambato balana gene oko angu laiyu lo atokale.*

¹⁶ Mana okone wato minulai wandakali yakama pitaka Gotena Isatale tane enene atolopeyai okonena, balato yakama ondowa moyoto, yakamana yamapane mo tambo laya yakale lo nambato pote leyo.

¹⁷ Wamba nambato Jisasana piape pua atewa-angi, wandakali minditupa-mane namba peleai-kola, andipa nambana umbaininga panju minditupa eya-ko. Galesia tane wandakali yakamoto kendapene waka mindi konda pua namba gulaini. Tika ando atalapape.*

¹⁸ Amene imalini ima, nanimana Akali Andane Jisasa Kataisa yakamana tandini oko towa atu atoto, yakama ondo wato, moyo ateakale lo nambato pote leyo. Enene.

* **6:4-5:** Lom 14:10-12 * **6:6:** 1Ko 9:11,14 * **6:7-8:** Lom 8:12-13 * **6:14-15:** Ga 5:2-6; 2Ko 5:14-17 * **6:17:** 2Ko 4:10-11

EPESASA Poloto Epesasa Tane Tupana Pepa Poyo Pee Leane Oko

¹ Namba Polo. Gote bala tane-mane namba Jisasa Kataisana aposolo akali atola nembo tea-kola, namba balana aposolo akali ateyo. Epesasa tane wandakali yakama Gotena wandakali atoto, Jisasa Kataisa kuai lo wato minu atalaini. Nambato yakamana pepa oko peyo epe leyo.*

² Nanimana Ayiane Gote-la, Akali Andane Jisasa Kataisa-lamane yakama ondowa moyoto, yakamana yamapane mo tambo laya yakale lo pote leyo.

³ Goteto piape Kataisato peane tupu nembo toto, nanimana tandini moyoyale, ati kenga tawe minditaka epene tupu pitaka nanimana geane okonena, nanimato nanimana Akali Andane Jisasa Kataisana Ayiane Gote okona gene oko laiyu lamakale.*

⁴⁻⁵ Wamba Goteto yuu ati-la yakale nalene atoto, nanimana towa epelewa yamapane yoto, nembo-tene epene mindi meaipia. Moto, balana wenonga nanimanga koo tene mindi nayene, balana yame epene tikapene wete atalapale nembo teaipia. Wuane nembo toto, piape Jisasa Kataisato pula okomane Goteto nanimana balana andopane yame gulape-pene lata yaepia.*

⁶ Balana Iwanane yamapane yene okomane nanimana moyoyale piape peane mambele, Goteto nanimana wayumane wete ondowa moyoto, mangene utupane pitaka peane nembo toto, nanimato balana gene oko laiyu lape-pene.

⁷⁻¹⁰ Okone angi teke, Goteto nembo-tene epene waka mindi moto, matili gii mindi epola-angi, Kataisa bala minditaka yuu okona yalane tupapi, minditaka ati kenga yalane tupapi, utupane pitakana akali kawane atoto, utupane ando atekale nembo teaipia. Kataisato wuane peakale lo Goteto nembo teane okone wamba too pitane afeane tekeko, matili Goteto balana nembo-tene epene okone nanimanga andawa leane. Nembo-tene epene okonepi, mana epene tupapi, utupane pitaka Gote balanga ya-kola, balato nanimana ondowa moyoto, Kataisana tundupa okomane nanimana kambo molo-peke loto, mana koo nanimato minalamane tupa apeaipia.*

¹¹⁻¹² Goteto minditaka mindi pukale nembo talane tupa enene piyane. Kataisato

nanimana moyoyale lo bilipi leyama Juta yame wandakali nanimato Gote balanga tai lenepi, tii-penepi, utupane pitaka yene nembo toto, balana gene oko laiyu lo atalapale nembo toto, Goteto nanimana wamba ini bulupane balana yame atalapale lata yaepia.*

¹³ Wandakali mindimane yakama languato, Kataisato wandakali yame waka tupapi molo-peke lalane lea-kola, yakamato pii enene okone ale wato, Kataisa lo bilipi leai. Yakamato bala lo bilipi leai-kola, Goteto balana Oli Sipitisa oko yakama gukale lo potomisa pii leane oko nembo toto, balana Oli Sipitisa oko yakama gea okoni.

¹⁴ Nanimana pitaka-mane balana tai lenepi, tii-penepi, utupane pitaka nembo toto, balana gene oko laiyu lalapale loto, balato nanimana molo-peke leaipia. Balato wuane peane okonena, nanimana balana yame ateyama-kola, Goteto minditaka epene kambua tupu matili nanimana gukale loto, balana Oli Sipitisa oko wamba ini bulupane nanimana geane.*

Epesasa Tane Tupamane Mana Meakale Lo Poloto Pote Leane Oko

¹⁵ Goteto wuane peane okonena, yakamato Akali Andane Jisasa lo bilipi loto, Gotena wandakali pitaka towa epelewa yamapane yo ateyai lene oko nambato ale ewa.

¹⁶ Nambato pii okone ale wato, ole dindi lo yakama nembo toto, Gote wayu pele lo pote Lalawane.

¹⁷⁻¹⁸ Anu peakale nambato wuane piyawanepe. Tai-lene andane wete okopi, tii-pene wete okopi, okonelapo nanimana Akali Andane Jisasa Kataisa okona Ayiane Gote balanga yene. Balato ati kenga tawe minditaka epene kambua longo paluni gulo balana wandakali nanimana gukale leaipia. Yakamato minditaka epene utupane matili mia-makale nembo toto, maliyo atalapale nembo toto, Goteto yakama balana yame atalapale loto, ee lo meaipia. Balato wuane peane oko yakamato nembo talapale loto, Oli Sipitisa okomane yakamana nembo-tene okone tii piya wato, Gotena pii layene tupana tene tupa yakamanga mo panawa ateyia. Oli Sipitisa okomane wuane peyakola, yakamato mana kambua moto, Gotena mana tupa wayumane nembo-talapale loto, nambato pote lo atalawane.*

¹⁹ Dee, nanimato Gote lo bilipi leyama-kola, balana tai-lene andane wete okomane nanimanga piape tailo wete piyane.

* **1:1:** Ap 18:19-21; 19:1 * **1:3:** Ep 2:5-7 * **1:4-5:** Jo 1:12; 15:16 * **1:7-10:** Ep 2:5-7; Kol 1:12-16,18-20; Lom 16:25-26 * **1:11-12:** Lom 8:28-30 * **1:14:** 2Ko 1:21-22 * **1:17-18:** Kol 1:9-11 * **1:19:** Kol 1:9-11

Yakamato okone nembo talapale loto, nam-bato ole dindi lo pote lalawane teke.*

²⁰ Wamba Gotena tai-lene okonemane Kataisa malinga ika laya alu, ati kenga balana kii tikasa peteakale leaipia.*

²¹ Wuane lalu, Goteto minditaka eya tupa pitaka Kataisana pangosa yakale leaipia. Balato wuane lea-kola, sипитса tai-lene ateyai tupapi, yuu okona akali andane ateyai tupapi, gapomane ateyai tupapi, minditaka tai wete eya tupapi, dee minditaka gene andane yene andipa eya tupapi, matili yolopeya tupapi, utupane pitaka Kataisana pangosa ateyai.

²² Utupane pitaka Kataisana pangosa ateyai-kola, Goteto balana sosa oko moyoyale, Kataisa bala minditaka eya tupa pitakan kawane ateakale leaipia.*

²³ Kataisa bala minditaka eya tupa pitakan kawane atoto, utupane pitakanga tumbi latane atalane. Sosa oko balana umbaini ateyama-kola, balato nanimanga tumbi latane atalane.*

2

Goteto Yakama Ondo Wato, Molo-peke Leane Oko

¹ Wamba yame waka wandakali yakamato mana koo kambua minu ateaí okonemane yakama wandakali omene gulo ateaí.*

² Okone angi, wandakali waka tupamane sипитса koo yamenä akali kawane Satane okona mana koo tupa wato minu ateaí-kola, yakamatopi yuu okona mana koo tupa wato minu ateaí okoni. Andipapi, sипитса koo okonemane Gotena pii tanga lalaini wandakali tupana ini anda-pangosa atoto, balana piape koo tupa pua atalane.*

³ Wamba nanimato pitaka koo piyaini wandakali utupane towa atu atoto, nanimana umbaini epele yakale nembo toto, nanimana nembo-tene wambane oko wato minu atema. Okone angi, nanimato nanimana umbaini tupana mana koo minaima lakae lo nembo tema tupa wato minu atema-kola, Goteto wandakali koo piyaini tupa towa yataka wato, yole koo mindi malupeya okone katulo nanimana gea-yale.*

⁴⁻⁷ Wamba nanimato mana koo minu atema okonemane nanimana omene gulo atema. Wuane tekeko, matili-matilipi wandakali atolai tupamane andolai-kola, Goteto wandakali tupa wayumane wete ondowa moyalane oko andeakale nembo teaipia. Wuane nembo toto,

Jisasa Kataisato piape peane mambele, Goteto ondo andane wete wato, nanimana towa wayumane epelewa yamapanie yoto, nanimana epene wete mindi mineane. Balato mana epene okone minuto, nanimana Jisasa Kataisa towa mo saka ataya wato, nanimana bala towa malinga ika laya alu, nanimana Jisasa towa atu ati kenga yuu epene okona atalapale leaipia. Goteto mangene utupane pitaka peane okone nembo toto, balato yakama ondowa moyoto, molo-peke leane lo andeyama.*

⁸⁻⁹ Anu peakale nambato wuane leyope. Wandakali-mane yakama tanena gene tupa laiyu naleakale nembo toto, Goteto utupanen piape epene tupa andoto, utupane molo-peke na-lalane. Jia. Yakamoto Kataisa lo bilipi leai-kola, Goteto yakama mee ondowa moyoto, petesini epene mindi yakama mee guato, yakama molo-peke leane.*

¹⁰ Nanimato mana epene minditupa wato minu atalapale loto, wamba Goteto Jisasa Kataisana piape peane okomane nanimana mo wenene gulaya yane.

Yakama Pitaka Gotena Yame Mindiki Angu Gulo Ateyai Leane Oko

¹¹⁻¹² Wamba Juta yame-mane loto, nanimana yala-pene umbaini katene ateyama-kola, yame waka wandakali yakamana yala-pene umbaini kati napene ateyai lalaini. Wuane leai-kola, yame waka wandakali yakamato Isatale tane tupa towa mina mindiki lo ata napene, wandakali opene gulo ateaí okone nembo tolo-peke lalapape. Okone angi, yakama wandakali yame waka mindi gulo atoto, potomisa pii Goteto lo yata yane okone yakamato ale naene ateaí. Ale naene atoto, Kataisato yakama moyolo epolopeya nemboto maliyo ata napene, mee ateaí. Dee, Kataisa ateya oko yakamato nembo nateai-ko. Okone angi, yakama Gote towa atu ata napene, amonga waka gulo atema nembo talapape.*

¹³ Wamba yakama Gote ateanga mandaka gulo ata napene, amonga waka gulo ateaí tekeko, Jisasa Kataisana tundupan okomane yakamana koo tupa apeane okomane yakama Gote ateyanga mandaka gulo ateaí.*

¹⁴⁻¹⁶ Enene, wamba Mosesana loo okomane ende puato, tombo peyatane atea-kola, Juta yame-mane wandakali yame waka tupa towa yanda-pene gulo ateaipia. Yanda-pene gulo ateaí-kola,

* **1:20:** Sam 110:1; 2Ko 13:1-4; Kol 2:8-12; 1:15-16 * **1:22:** Sam 8:6 * **1:23:** Ep 4:10,15-16; Lom 12:3-5; Kol 1:18-20

* **2:1:** Kol 1:21 * **2:2:** Kol 3:7; Tai 3:3 * **2:3:** Kol 3:5-6 * **2:4-7:** Lom 6:13; Kol 2:11-14 * **2:8-9:** 1Ko 1:29-31;

2Ti 1:9-10; Tai 2:11-14 * **2:11-12:** Kol 1:21; Lom 9:1-5 * **2:13:** Kol 1:18-20

3

Kataisato wua lo nembo teaipia: Wandakali yame okonelapo yanda-pene gulo ata napeakale. Jia. Yame okonelapo namba tane towa yame wenene mindiki gulaya wakale. Dee, wandakali utupane-mane Gote towa yanda-pene gulo atalaini mana okone koyo peakale lo namba ita malamanda okona omokale. Namba omolowa okonemanee wandakali utupane pitaka sosa mindikinga atoto, Gote towa mini mindiki palu atekale lokale nembo teaipia. Wuane nembo toto, bala ita malamanda okona omeane okomane Mosesana loo yata yane okopi, Juta yamena mana waka-waka minalaini tupapi, utupane pitaka mee gulaya yaepia. Kataisato wuane peane okomane Juta yamena loo okomane ende pitane ateane oko keao lo apeaipia. Apoto, Juta yame-mane wandakali yame waka tupa towa yanda-pene gulo atalaini mana oko minu koyo piya yaepia. Wuane piyu, balato Juta yame Kitisene tupapi, wandakali yame waka Kitisene tupapi, utupane pitaka sosa mindiki gulaya yaepia. Kataisato wuane peane okonena, nanima pitaka-mane mini epene palu atalamane. *

¹⁷⁻¹⁸ Kataisato nanima mina mindiki leakola, Oli Sipitisa mindiki angu okomane nanima pitaka Ayiane Gote towa pii lalawa pulane asini oko lumbu tepa yaepia. Oli Sipitisa okomane wuane pea-kola, Kataisa epoto, Gote ateyanga mandaka gulo atalaini Juta yame wandakali tupapi, Gote ateyanga mandaka gulo ata napene, amonga gulo atalaini wandakali yame waka tupapi, utupane pitaka pii mindi lamawuato, yakama yamapane epene palu atalapape leane. *

¹⁹ Tene okonena, andipa yame waka wandakali yakama yuu nayene opene gulo ata napeyai. Jia. Yakama Gotena yame enene atoto, balana wandakali tupa towa yame mindiki gulo ateyai.

²⁰⁻²² Anu peakale nambato wuane leyope. Goteto Juta yame Kitisene yakamapi, wandakali yame waka tupapi, yakama pitaka balana lotu anda epene wete gulo atalapale nembo teaipia. Wuane nembo toto, balato potopesa akalipi, aposolo akalipi, utupane anda okonena keyo gulo atekale loto, Kataisa bala anda okonena anda pingina gulo atekale leaipi. Wuane lalu, andipa balato yakama pitaka anda okonena laeipi, pokoli-banapi, okonetaka gulo atoto, Kataisanga duli lo minatawa atalapale leya. Wuane loto, Goteto bala tane-la, Oli Sipitisa okola, okone lapona pangulane anda oko mee pua ateyai. *

Poloto Wandakali Yame Waka Tupa Moyo, Piape Piyawane Leane Oko

¹ Namba Poloto yame waka wandakali yakama moyoto, Jisasa Kataisana piape pimawua atalawane. Nambato wuane piyawane okonena, andipa namba katapusa ateyo. *

² Goteto namba ondowa moyoto, nambato yakama moyo balana piape pula lo geane okone yakama wamba ale yai okoni. *

³ Wamba Goteto wua pukale lo too pua nemboto ateane tupa balato nambanga mo pana yane. Goteto wuane peane lo, wamba nambato pii ukupini minditupa pepanga peyoto epe lewa okoni. *

⁴ Andipa wuane pua teke, nambato pii minditupa tako pua, pepa okona peyo epe leyo. Yakamato nambana pii utupane dii lo andolai-angi, Kataisana piape pula okomane wua pulupeya lo Goteto too pua nemboto ateane tupa nambato kuai lo nemboto ateyai lo yakamato andolopeyai.

⁵⁻⁶ Wamba Goteto wua lo too pua nembo teaipia: Jisasa Kataisato wandakali moyoyale piape pula okomane nambato minditaka Juta yame wandakali paluni gulo mauwakale lo potomisa pii mindi lo yata ewane. Matili nambato potomisa pii mindiki okone teke wandakali yame waka tupapi mauwakale nembo teaipia. Nambato potomisa pii okone wandakali utupane lamalu-wakola, Juta yame Kitisene tupapi, wandakali yame waka tupapi, utupane pitaka-mane nambana pii layene epene oko bilipi loto, yame mindiki atolopeyai nembo teaipia. Goteto wuane lo too pua nemboto ateane okone wandakali wamba ateaini tupanga lapana nayaepia. Wuane tekeko, andipa Gotena Oli Sipitisa okomane pii okone balana potopesa akali tupapi, aposolo tupapi, utupanenga lapana eya. *

⁷⁻¹⁰ Enene, wamba Goteto pitaka taka yakale laa yiake lalu, matili balato wua bukale nembo teane tupa too pitane atekale leaipi. Balato wuane leane tekeko, matili balana sosa okomane piape pula-kola, atinga sipitisa tai-lene tupapi, enjole tupapi, utupane-mane Gotena nembo-tene mindipene-mindipene utupane epene wete eya lo andeakale nembo teaipia. Wuane nembo toto, Goteto namba ondo wato, balana tai-lene okomane nambato balana piape pula leane. Wuane loto, balana nembo-tene too pitane

* **2:14-16:** 1Ko 12:12-14; Kol 1:18-20,22; 2:13-14; Sak 9:10

1Pi 2:4-5

* **3:1:** Pl 1:6-7,13

* **3:2:** Kol 1:24-25

* **3:3:** Ep 1:7-10; Kol 1:26-27

* **2:17-18:** Ais 57:19; Ep 3:5-6 * **2:20-22:** 1Ko 3:10-11,16;

* **3:5-6:** Ep 2:13,14-19

ateane okone nambato lapanawa lamawua atape leane. Namba Gotena wandakali pitakana pangosa wete gulo ateyo tekeko, Kataisato piape peane tupa epene wete eya lo nambato wandakali yame waka tupa lamawua atape leane. *

¹¹ Wamba wete Goteto Juta yame wandakali tupapi, yame waka wandakali tupapi, utupane Kataisa lo bilipi loto, sosa mindiki guleakale nembo teaipia. Matili nanimana Akali Andane Jisasa Kataisato piape peane okomane Goteto yame okonelapo sosa mindiki gulaya yaepia.

¹² Balato wuane pea-kola, andipa nanimato Kataisa lo bilipi loto, Gote yuku naene, katulo bala towa pii lalawa pua atalamane. *

¹³ Wuaneko, nambato yakama moyoyale tandaka no ateya nembo toto, yakama mini kendawa ata naopepe-pene. Jia. Nambato tandaka no ateyo okomane yakama Gote towa kuai lo atalapale leya nembo toto, yakama epelewa atape-pene.

Goteto Wandakali Utupane Minu Tai Laya Yakale Lo Poloto Pote Leane Oko

¹⁴⁻¹⁵ Gote bala minditaka ati kenga ateyai tupapi, yuu okona eya tupapi, utupane pitakana ayiane atoto, utupane pitaka gene maiyane nembo toto, nambato bala lo aiki leka alawane.

¹⁶ Gote epene tii-pene wete ateya okomane balana Oli Sipitisa oko yakamana ini anda-pangosa tumbi laya wato, balana tai-lene okomane yakama minu tai laya yakale lo nambato pote lalawane.

¹⁷⁻¹⁹ Mana epene wete Gotenga tumbi latane ateya tupa yakamanga epo tumbi leakale nembo toto, Kataisato wandakali towa epelewa yamapane yo atalane mana okone yakamoto wayumane mialapale nembo teyo. Yakamoto mana okone moto, Kataisato wandakali tupa towa epelewa yamapane yo atalane mana okone kenga wetepi, pangosa wetepi, luu wetepi, andane wete eya nembo tolopeyai. Gotena wandakali pitaka towa yakamoto wuane nembo tolai angi, ita mindina pini tupa yuu okona peya-kola, ita okone bala tai atalane pua teke, yakama Kitisene tai gulolo-peyai. Kitisene tai atamakale nembo toto, yakamoto Kataisa lo bilipi lolai-kola, Kataisa bala yakamana ini anda-pangosa atapowa ateakale lo nambato pote lalawane. *

²⁰ Nanimato Gotena mana epene tupa wato mina-makale lo pote leyama-kola, Gotena tai-lene okomane nanimana ini

anda-pangosa piape puato, nanima minu tai laya alane. Wuane peya-kola, nanimato minditaka pimakale nembo toto, pote lalamanne tupa pitaka sia minuto, balana tai-lene okomane piape andane wete tupa katulo piyane.

²¹ Tene okonena, Jisasa Kataisato piape andane peane nembo toto, matili-matilipi Gotena sosa okomane balana gene oko laiyu lape-pene eya. Enene.

4

Goteto Yakama Yame Mindiki Gulo Atalapale Loto, Ee Lo Meane Oko

¹ Nambato Akali Andane okona piape piyawane okonena, namba katapusatot, pii mindi yakama langeyo. Yakamoto balana mana epene tupa wato minu atalapale loto, Goteto yakama ee lo mea-ko. Yakama Gotena ee lo mene wandakali atoto, balana mana epene tupa wato minu atalapale loto, nambato pii utupane yakama langeyo nayu leyo. *

²⁻³ Oli Sipitisa okomane yakama mina mindiki leya okonena, yakama pitaka yame mindiki atamakale nembo toto, piape tailo piyapape. Yakama yame mindiki atamakale nembo toto, wandakali yangone tupana pangosa atoto, utupane towa tambo lo atalapape. Wandakali mindimane yakama towa mana koo mindi minulai-angi, yakamoto wamba ini kapoyale yataka aa na-piyapape. Jia. Wandakali okone towa epelewa yamapane yoto, kenda-pene okone awua atalapape lo nambato yakama langeyo. *

⁴⁻⁶ Anu peakale nambato wuane leyope. Ayiane Gote mindiki angu ateya. Bala nanimana pitaka tombenenga atoto, nanimana ini anda-pangosa piape puato, nanima pitaka ando atalane. Akali Andane mindiki angu ateya. Balato nanimana pitaka lamolo epolopeya lo nanimato malioyo ateyama. Oli Sipitisa mindiki angu ateya. Balato nanimana pitaka ee lo meane okomane nanimana pitaka umbaini mindiki gulo ateyama. Bilipi mindiki angu eya. Dee, ipa meyama okopi mindiki angu eya. *

⁷ Enene, nanimana yame mindiki ateyama tekeko, nanimana mindiki-mindiki lo Gotena piape waka-waka tupa piyapale loto, Kataisato nanimana ondo wato, petesene waka-waka tupa nanimana giyane. *

⁸ Tene okonena, Gotena pii pepa pelene eya mindimane loto, Goteto wandakali andi latane ateaini tupa andi lo awua ati kenga

* **3:7-10:** Kol 1:24-25; 1Ko 15:9-10 * **3:12:** Jo 14:6; Lom 5:2 * **3:17-19:** Jo 14:23-24; Kol 1:23; 2:6-7 * **4:1:** Kol 1:9-11 * **4:2-3:** Kol 3:12-15 * **4:4-6:** 1Ko 12:6 * **4:7:** Lom 12:3-6 * **4:8:** Sam 68:18

poto, petesene epene minditupa yuu okona wandakali tupanga geane layene eya. *

⁹ Pii layene okonemane Kataisa bala ati kenga peane leya oko andoto, akali okone bala wamba yuunga epeane ya lo andeyama. *

¹⁰ Yuunga epeane akali mindiki okone teke balato minditaka eya tupa pitaka mo tumbi laya wakale nembo toto, ati kenga wete peaipia.

¹¹⁻¹² Kataisa bala ati kenga pulu, sosa oko balana umbaini gulo atoto, tai guleakale nembo teaipia. Tai guleakale nembo toto, wandakali minditupa-mane balana sosa oko moyo piape pua ateakale nembo teaipia. Wuane nembo toto, Kataisato akali minditupa potopesa piape peakale lalane. Minditupa aposolo akali piape peakale lalane. Minditupa pii akali piape peakale lalane. Minditupa paso piape peakale lalane. Minditupa tisa piape peakale lalane. Kataisato piape akali utupane pitakanne balana sosa okona piape peakale lo mayaepia. *

¹³⁻¹⁴ Sipi mindi yuu mindina moyale peyakola, popo andane mindi lo awua epoto, sipi okone yuu waka mindina peakale lalane. Wuane piyane pua teke, nanima andopane yale gulo atemando, wandakali-mane nanima towa langa-langa puato, nanimana bilipi oko mo lawa pulupeyai. Wuane pulaini nembo toto, nanima pitaka-mane Gote iwanane okona mana tupa wayumane mana moto, bilipi mindiki angu minatawa atape-pene. Bilipi mindiki okone angu minatawa atoto, Kataisa bala akali wai eue ateanne pua teke, nanimapi wandakali wai eue atape-pene. *

¹⁵⁻¹⁶ Kitisene wandakali nanima Kataisana kinipi, kenepi, lenepi, okonetaka gulo ateyama-kola, Kataisa bala sosa okona kawane atoto, nanima ando atalane. Nanima pitaka balana umbaini mindiki guleakale lo, balato nanima mina mindiki lalane. Balato nanima mina mindiki loto, nanima mindiki-mindiki lo piape wakawaka tupa wua piyapape lalane. Wuane leya-kola, nanimato mindi akali towa epele aka pua yamapane yoto, balana piape pua ateyama-kola, balana umbaini oko andane tai yalane. Wuane piyane okonena, nanimato mindi akali towa epele aka pua yamapane yoto, pii enene tupa mindi lamai-lamai pua atape-pene. Wuane pua atoto, nanimato sosa okona akali kawane Kataisa balana mana epene tupa pitaka wato minuto, nanima Kitisene tai atape-pene. Nanimato wuane pua atalapale

loto, Goteto balana sosa okona piape akali utupane nanima giyane. *

Mana Wenene Oko Wato Minu Atalapape Leane Oko

¹⁷ Tene okonena, nambato Akali Andane okona gene oko loto, pii mindi yakama langeyo. Aitene wandakali tupa nembo napalene gulo atoto, mana koo tupa minu atalaini okonena, Kitisene wandakali yakamato aitene wandakali utupanena mana koo utupa wato mina na-piyapape leyo. *

¹⁸ Anu peakale nambato wuane leyope. Aitene wandakali utupane yakamanga mana nayene atoto, Gotena pii tanga lo atalaini okonena, wandakali utupanena nembo-tene oko undupi-lene gulo ateyai. Tene okonena, wandakali utupane Gotena yame ata napene, balana nembo-tene oko wato mina napiyaini.

¹⁹ Wandakali utupane yakama yala naene, mana koo yame-yame tupa pitaka minaima laka lo nembo toto, mana koo tupa angu minu atalaini.

²⁰ Aitene wandakali utupane-mane wuane piyaini tekeko, wamba nanimato Kataisana mana tupa yakama langemangangi, yakamato aitene wandakali utupanena mana koo utupane wato minalapape lo nanimato yakama mana langi napema. Jia.

²¹ Nanimato Jisasana pii layene enene oko yakama langema-kola, yakamato balana pii okone ale wato, balana mana epene tupa meai okoni.

²² Yakamana nembo-tene wambane okomane mana koo tupa wato minauwa laka lo nembo toto, yakama andakasa wato, minu koyolane. Yakama koyolaini loto, yakamana nembo-tene wambane okone awua apialapape lo nanimato yakama mana langema okoni. *

²³⁻²⁴ Nembo-tene wambane okone apoto, yakamato Gotena pii enene oko wato minuto, bala yale atoto, balana mana epene tika-pene wete tupa wato minu atape-pene. Yakamato wuane piyapale nembo toto, Goteto yakamana nembo-tene oko mo wenene gulaya alane okonena, yakamato Gotena nembo-tene wenene okone wato minu atape-pene. Yakamato wuane piyapale nembo toto, Goteto yakamana nembo-tene oko mo wenene gulaya yakale atalapale loto, nanimato yakama mana langeyama. *

²⁵ Nanimato mana epene utupane yakama langema okonena, yakamato owato pii lalaini mana oko kondalapape.

* **4:9:** Jo 3:12-13 * **4:11-12:** 1Ko 12:28 * **4:13-14:** Kol 1:28-29 * **4:15-16:** Kol 1:18-20; 2:18-19 * **4:17:** 1Pi 1:14; Lom 1:21 * **4:22:** Lom 8:12-13; Kol 3:9-10 * **4:23-24:** Lom 12:2; Jen 1:26; Kol 3:9-10

Nanima pitaka Kataisana umbaini okona kinipi, kenepi, okonetaka gulo ateyama nembo toto, yakama mindiki-mindiki lo yakamana yangone tupa towa pii enene tupa alapape.*

²⁶⁻²⁷ Yakamoto wandakali yangone mindi towa yataka olai-angi, yakamoto mana koo mindi minulumeane. Tika ando atalapape. Yakamoto bala towa yatakawa angu atolai-kola teke, nai andaka peando, Satane yakamana ini anda-pangosa epeakale lo yakamoto ando kondolai-kola pulupeya.*

²⁸ Pake nene wandakali tupamane dee lapone pake naa nape-pene. Jia. Utupanemanne wandakali tipia tupa moyo minditaka tupa tale pua mai-makale nembo toto, yakamana kini-mane piape epene tupa tailo pua atape-pene.

²⁹ pii koo mindikipi mindi yakamana ambulini okona kamaka epolane. Tika ando atalapape. Yakamoto pii lolai tupamane wandakali pii ale olai tupa moyakale nemboto, pii lalapape. Wandakali mindi bala mini kendawa atola-angi, yakamoto bala minu tai layawa, pii epene tupa angu lamawua atalapape.*

³⁰ Goteto yakama molo-peke lokale nembo toto, yakama balana wandakali atalapale lata alu, balana Oli Sipitisa oko yakama geane. Tene okonena, yakamoto Gotena Oli Sipitisa okona yamapane oko mo kenda piya aa na-piyapape.*

³¹ Yakamoto mini koo palu atalainipi, wandakali yangone tupa towa yataka alainipi, wandakali yangone tupa towa embo wete alainipi, pii taimane lalainipi, wandakali yangone tupa layanga alainipi, dee mana koo waka yakamoto minalaini tupapi, utupane pitaka tepe alapape.*

³² Kataisato piape peane okomane yakamana koo tupa apeane. Wuane pua teke, wandakali mindimane yakamanga koo mindi pulai-angi, yakamoto koo okone apia-maiyapape. Wuane pua, yakamoto mindi akali ondo wato, moyaka pua atalapape.*

5

Yangone Tupa Towa Epelewa Yamapane Yo Atalapape Leane Oko

¹⁻² Wamba Kataisato nanima towa epelewa yamapane yoto, bala tane opa tunduma-pene mindi gulo Gote mayaepia. Kataisato nanima moyoyale wuane peane pua teke, yakamatopi wandakali yangone

tupa towa epelewa yamapane yoto, utupane moyo atalapape. Wuane pua atolai okonemane, yakama Gotena yamapane yene andopane yame atoto, mana bala tane minalane tupa yakamoto wato minu atalapape.*

³⁻⁵ Pamuku piyaini wandakali tupapi, mana koo kalato atene minalaini wandakali tupapi, minditaka kambua miawa lakae lo nembo talaini wandakali tupapi, wandakali utupane owato gote tupa lo lotu lalaini wandakali gulo ateyai. Wuane piyaini wandakali utupane Kataisala, Gote-la, okone-lapona yuu epene okona katulo kolandaka nalolo-peyai. Yakamoto mana koo utupane wato minuto, wandakali-mane giwa yakale loto, pii koo yala-pene tupa leaindo, yakamana mana okone katu nalolo-peya. Yakama Gotena wandakali ateyama nembo toto, pamuku piyaini mana okopi, minditaka kambua miawa lakae lo nembo talaini mana okopi, mana koo kalato atene tupapi, mana koo okonepene tupa yakamoto wato mina napene konda yaindo, yakamana mana okone kuai-lene yolopeya. Tene okonena, yakamoto mana koo okonepene tupa wato mina napene, Gote wayu pele lalapape.*

⁶ Wandakali-mane Gotena pii tanga loto, mana koo okonepene tupa minulai-kola, Goteto wandakali utupane towa yataka wato, yole koo mindi maulupeya. Yakamoto yole koo okone molomane nembo toto, wandakali mindimane yakama minakasa olane. Waiwa ando atalapape. Yakamatopi mana koo okonepene tupa wato minalapale loto, wandakali mindimane mee owato pii tupa langeando, yakamoto balana pii okone wato mina napene kondalapape.*

⁷ Mana koo wato minalaini wandakali utupane-mane yakama minakasa olaini. Yakamoto wandakali utupane towa atu epoko pua ata na-piyapape.

⁸ Anu peakale nambato wuane leyope. Wamba yakama undupi-lene okona ateaini tekeko, andipa Akali Andane okomane yakama tii-pene okona mo ate leya-kola, tii-pene okona atalaini wandakali tupamane mana epene tupa minalaini pua teke, yakamoto mana epene utupane wato minu atalapape.*

⁹ Tii pene okonemane mana epene tika pene tupapi, pii enene lalaini mana okopi, mana utupane pitaka mina ika laya alane.

¹⁰ Akali Andane okomane mana anupene tupa epele alane yape lo yakamoto mana mo atalapape.

* **4:25:** Kol 3:8-10; Sak 8:16 * **4:26-27:** Sam 4:4; Jem 1:19-20 * **4:29:** Kol 4:5-6 * **4:30:** Ais 63:10; 1Tes 5:19; Ep 1:13-14 * **4:31:** Kol 3:8 * **4:32:** Mt 6:14; 18:22-35; Kol 3:12-13 * **5:1-2:** Mt 5:48; Ip 10:10; Ek 29:18 * **5:3-5:**
1Ko 6:9-11; Kol 3:5-6 * **5:6:** Kol 2:4-5,8-10; Lom 1:18-20 * **5:8:** Ep 2:13; Kol 1:12-14; 1Pi 2:9; Jo 12:36

11-14 Tii pene okonemane mana koo tupa pitaka mo pana eya-kola, tii-pene okonena minditaka eya tupa pitaka panakame yalane. Tene okonena, Gotena pii pepa pelene eya mindimane loto, limu palu atele akali nimba malinga ika laa. Ika lole-kola, Kataisato nimba mo tii piya olopeya layene eya. Pii okonemane wuane layene eya tekeko, wandakali minditupa-mane tengamane too pua atoto, mana koo wete tupa miniyai-kola, utupane-mane wua piyaini loyale namba yala piyua. Wandakali utupane-mane undupi-lene okona mana koo utupane minu ateyai-kola, yakamanga dini epene mindi lia napiyane. Tene okonena, yakamato wandakali utupane towa potomane lo ata napene, utupane-mane mana koo utupane kondalapa lo mana lamawua atalapape. *

Manu Anu-pene Mindi Minu Ateyope Lo Ando Atalapape Leane Oko

15-17 Andipa nanima gii koo okona ateyama nembo toto, yakama mini napalene kee ene gulo ata na-piyapape. Akali Andane okomane nanimoto wua pipiai lakae lo nembo talane tupa nembo tatawa atalapape. Mangene utupane nembo tatawa atoto, yakamato Gotena piape pulane oto eya tupa mee apia napene, balana piape pulane eya utupane pua atalapape. Balana piape pua atoto, yakama mana anda napene wandakali ata na-piyapape. Jia. Yakama mana andene wandakali atoto, mana anu-pene tupa minu ateyamape lo wayumane ando atalapape. *

18 Yakamato bia ipa tai kambua noto, kewa sipaki leaindo, mana okonemane yakama minu koyolo-peya. Tene okonena, yakamato kewa sipaki nalene kondalu, Gotena Oli Sipitisa oko yakamanga epo tumbi leakale lo ando kondalapape. *

19 Wuane pua atoto, yakamana nembotene okomane sojo wee tupa loto, Akali Andane okona gene oko laiyu lalapape. *

20 Ayiane Goteto nanima moyo minditaka pitaka taka giyane nembo toto, ole dindi lo yakamato nanimana Akali Andane Jisasa Kataisana gene oko loto, Ayiane Gote oko ando wayu pele lalapape. *

21 Wuane puato, Kataisa bala yakama pitakana Akali Andane oko ateya nembo toto, yakama mindiki-mindiki lo wandakali yangone tupana pangosa atalapape. *

Wetene, Akalini-la, Liyambato Wua Pua Pitiyapape Leane Oko

22-23 Sosa oko Kataisana umbaini gulo ateya-kola, balato okone molo-peke loto, sosa okona kawane ateya. Wuane pua teke, akali oko bala wetene okona kawane gulo ateya. Tene okonena, wanda yame yakamato Akali Andane okona pangosa pitiyaini pua teke, yakamana akalini tupana pangosa pitiyapape. *

24 Sosa oko bala Kataisana pangosa atalane. Wuane pua teke, ole dindi lo wanda yame yakamato yakamana akalini tupana pangosa pituto, utupane-mane pii lolai tupa pitaka ale amawua pitiyapape.

25-27 Wamba sosa oko Kataisana umbaini gulo atea-kola, Kataisato wua lo nembo teaipia. Sosa okonenga koo tenepi mindi nayene, epene tika-pene wete atekale nembo toto, nambato Gotena pii layene epene okola, ipa okola, okonelapo-mane sosa okonga kalato ateanie tupapi, koo tene yane tupapi, utupane wasa-wasa peyo apokale. Wuane puluwa-kola, sosa oko epene tii-pene wete gulolo-peya nembo teaipia. Wuane nembo toto, Kataisato sosa oko towa epelewa yamapane yoto, sosa oko moyoyole omeaipia. Wuane pua teke, akali tupa yakamato yakamana wetene tupa towa epelewa yamapane yo atalapape. *

28-30 Sosa oko Kataisana umbaini gulo eya-kola, nanima balana kinipi, kenepi, lenepi, okonetaka tupa gulo ateyama. Nanima okonetaka gulo ateyama-kola, Kataisato tomo epene tupa nanima guato, kuai lo moyo ando atalane. Kataisato wuane piyane pua teke, akali mindimane bala tanena umbaini oko towa mini koo mindi pali napene, balana umbaini oko moyo, tomo epene tupa neakale mawuato, kuai lo moyo ando atalane. Akali mindimane balana wetene oko towa epelewa yamapane yo atalane okonemane bala tane epelewa yamapane yo ateya-kola, piyane-ko. Akali yame yakamato yakama tanena umbaini oko epelewa yamapane yo atalaini pua teke, yakamato yakamana wetene tupa epelewa yamapane yo atape-pene.

31 Anu peakale nambato wuane leyope. Gotena pii pepa pelene eya mindimane loto, akali mindi balana angini, ayiane-la, okonelapo tepa alu, wanda mindi kee loto, wanda, akali-la, liyamba umbaini mindiki gulo pitulu-peyapi layene eya. *

32 Pii layene okonena tene angini oko too pitane ateya tekeko, pii okonemane Kataisa-la, balana sosa okola, okonelapo

* 5:11-14: Jo 3:19-21; Ais 26:19; Lom 13:11-12 * 5:15-17: Kol 4:5-6 * 5:18: Lk 21:34-35 * 5:19: Kol 3:16 * 5:20: Kol 3:17 * 5:21: 1Pi 5:5-7 * 5:22-23: Kol 3:18; 1Pi 3:1-6; 1Ko 11:3; Ep 1:22 * 5:25-27: Kol 1:22; 3:19; 1Pi 3:7; Tai 3:4-7; 2Ko 11:1-4 * 5:31: Mt 19:5 * 5:32: Lap 19:7-8

umbaini mindiki gulalane leya nembo toto, nambato pii okone leyo. *

³³ Nambato wuane nembo toto, pii okone leyo tekeko, akali mindiki-mindiki lo yakama tane epelewa yamapane yo atalaini pua teke, yakamana wetene tupa towa epelewa yamapane yo atape-pene. Dee, wetene oko balana akalini oko bala akali epene mindi ateya nembo toto, balana pangosa pituto, balato pii lola tupa alewa pitipe-pene.

6

Ayianepi, Andopanepi, Yakamoto Wua Pua Atalapape Leane Oko

¹⁻³ Gotena pii pepa pelene eya mindimane loto, nimbato nimbana angini, aiyane-la, okone-lapona pangosa atoto, okonelapomane pii lolapi tupa ale amawua, wato minu atape layene eya. Gotena loo waka minditupoma potomisa pii mindi towa eya tekeko, okone bulupane gulo eya. Potomisa pii okonemane loto, nimbato nimbana angini, aiyane-lamane pii lolapi tupa ale amawua, wato minu ateendo, nimba kuai lo atoto, nimba yuu okona ole kambua lo atolopele layene eya. Tene okonena, andopane yame yakamoto Akali Andane oko nembo toto, yakamana angini, aiyane-la, okonelapo-mane pii lolapi tupa ale amawua wato minu atalalape. Yakamoto wuane pua atearindo, yakamoto mana epene oko wato minu atolai-kola pulupeya. *

⁴ Yakama ayiane tupamane yakamana andopane tupa mo yataka aa na-piyapape. Jia. Yakamoto yakamana andopane tupana mana tupa mo tika puato, Akali Andane okona pii manapi, utupane lamawua atalapape. *

Piape Akalipi, Ando Atene Akalipi, Yakamoto Wua Piyapape Leane Oko

⁵⁻⁸ Wandakali mindimane piape kuai lo pula-kola, piape anduane okomane yole maiyandopi, mai naapeandopi, Akali Andane okomane yole epene mindi piape wandakali okonenga malupeya. Tene okonena, yakamoto akali mindina piape pua atolai-angi, yakamoto yuu okona akali mindina piape peyama nembo na-talapape. Jia. Yakamoto Akali Andane okona piape peyama nembo toto, yakama mini epene palu atoto, piape pulai tupa epelewa pua atalapape. Wuane pua atoto, piape ando atalane akali okonemane epele yakale nembo toto, balato andatawa atolai-kola angu, piape na-piyapape. Jia. Yakamoto

Kataisana piape peyama nembo toto, Goteto piape pipiai laka lo nembo teya pua, yakamoto epelewa kuai lo piape pua atalapape. Yakamoto Kataisa yuku amawua atoto, mini lapo napalene, balana pii ale amawua atalaini. Wuane piyaini pua teke, yakamoto yuu okona piape ando atalane akali tupa yuku amawua atoto, mini lapo napalene, utupanena pii ale amawua, piape pua atalapape. *

⁹ Piape ando atalaini akali yame yakamana Akali Andane okopi, yakamana piape akali tupana Akali Andane okopi, yakama pitakana Akali Andane mindiki okone angu ati kenga ateya nembo talapape. Balato mana mindiki angu wato minuto, yakama pitakana mana yapa lo tale piyane. Tene okonena, yakamoto yakamana piape akali tupa mo yuku naene, utupane towa mana epene tupa minu atalapape. *

Satane Towa Yanda Puyale Mandeke Pitawa Atalapape Leane Oko

¹⁰ Andipa nambato pii okone lo koyo pua wua leyo. Akali Andane okomane balana tai-lene andane wete okomane yakama minu tai laya eya-ko. Yakama tai gulo atalapape.

¹¹ Sataneto yakama andakasa oyale pulangi, yakamoto Satane towa yanda piyapale nembo toto, Goteto minditaka kambua tupa yakamana sia umbi guleakale lo yakama giyane. Yakamoto utupane pitaka minatawa atoto, Satane towa yanda puyale mandeke pitawa atalapape. *

¹² Anu peakale nambato wuane leyope. Nanimato wandakali towa angu yanda napeyama. Jia. Satanepi, balana sипитса koo ati kenga ateyai tupapi, yuu okona ateyai tupapi, utupane pitaka-mane yuu undupi-lene oko ando atoyale piape pua ateyai-kola, nanimato utupane towa yanda pimawua ateyama. *

¹³ Wuane peyama nembo toto, gii koo oko ang, yakamoto Satanena koo yame tupa towa yanda taimane pimawuato, sia minamakale nembo talapape. Wuane nembo toto, Goteto minditaka kambua tupa yakamana sia umbi gulo giyane tupa pitaka minatawa atoto, yakamoto Satane towa yanda puyale mandeke pitawa atalapape.

¹⁴⁻¹⁵ Akali-mane yanda puyale makande pitawa atoto, matipu piyu, singilisa kapamanne waa-pene mindi piyu, suu kee piyu, piyaini. Wuane piyaini pua teke, andipa yakamoto Satane yame towa yanda puyale makande pitawa atoto, Gotena pii enene

* **6:1-3:** Kol 3:20; Ek 20:12 * **6:4:** Kol 3:21; Sam 78:4; Man 22:6 * **6:5-8:** Kol 3:22-25; Tai 2:9-10; 1Pi 2:18; 2Ko 5:9-10
* **6:9:** Kol 4:1; Lom 2:9-11 * **6:11:** Lom 13:11-12; 2Ko 10:4-5 * **6:12:** 1Pi 5:8-11

oko nemboto minu atoto, mana epene tika-pene tupa wato minu atalapape. Wuane pua atoto, yakamoto Gote bala nanima wandakali tupa towa yamapane mindiki palu atamakale leya nembo talapape. Wuane nembo toto, balana pii layene epene oko wandakali tupa lamauyale, makande pitawa atalapape.*

¹⁶ Wuane pua atoto, yakamana bilipi oko sia umbi gulo awua atalapape. Yakamoto wuane pua atolai-kola, akali koo Sata-nena timu ita lungu tapeta tupamane yaka-manga paka lola-kola, utupane pitaka umbi okonéna tau loto, tee pulupeya.

¹⁷ Akali-mane tangi kapa-mane waa-pene mindi anda piyu, kandepa luu mindi aiyu, yanda pulu palaini. Wuane pua teke, Goteto yakama molo-peke leane nembo toto, yakamoto Gotena pii layene epene Oli Sipitisa okomane yakama langiyane okone bilipi loto, Satane yame tupa yanda pi-mawua atalapape.*

¹⁸ Wuane pua atoto, Oli Sipitisa okona tai-lene okomane ole dindi lo pote mindipene-mindipene tupa lalapape. Yakamoto Gotena wandakali pitaka moyape lo ando atalaini mana okone tepa olomane. Tika ando atalapape.*

¹⁹⁻²⁰ Nambato Gotena pii layene epene oko lamawua atalawane okonena, namba katapusa ateyo tekeko, nambato yuku naene atoto, balana pii layene epene oko wandakali tupa lamawua atape-pene. Tene okonena, nambato Gotena pii oko loyale puluwa-angi, balato namba moyo pii epene mindi namba geakale lo yakamoto pote lalapape. Dee, Goteto pii epene okone namba gula-kola, namba yuku naene atoto, balana pii layene epene too pitane ateane okone wandakali tupa lamawua ateakale lo yakamoto pote lalapape.*

Pii Koyo Pua Leane Tupa

²¹⁻²² Tikkikasa balato Akali Andane okona piapé kuai lo puato, bala nanima towa yamapane yo atoto, nanimana amene gulo ateya. Balato yakamana yamapane minu tai laya yakale loto, nambato bala epeakale leyo. Nanimato wua pua ateyai lo yakamoto nembo talapale nayuto, balato yakama langulu epeakale leyo. Bala yakama ateyasinga epoto, Polo bala wua peya lo, pii okonepene tupa pitaka yakama langulu-peya.*

²³ Ayiane Gote-la, Akali Andane Jisasa Kataisa-la, okonelapo-mane amene imalin-ipi yakamana yamapane mo tambo laya yakale loto, nambato pote leyo. Dee,

yakamoto wandakali yangone tupa towa wayumane epelewa yamapane yo atala-pale loto, balato yakamana bilipi oko mo tai laya yakale loto, nambato pote leyo teke.

²⁴ Dee, wandakali minditupa-mane nani-mana Akali Andane Jisasa Kataisa towa epelewa yamapane yo atapowa atolai-kola, Goteto wandakali utupane pitaka ondo wato, moyo ateakale lo nambato pote leyo.

* **6:14-15:** Ais 11:5; 59:17; 1Tes 5:8; Lom 10:14-15 * **6:17:** Ip 4:12 * **6:18:** Lk 18:1; Kol 4:2-4; 1Tes 5:17 * **6:19-20:** Kol 4:2-4; 2Tes 3:1; 2Ko 5:20-21; Pm 8-10 * **6:21-22:** Ap 20:4; Kol 4:7-8; 2Ti 4:9-12

PILIPAI

Poloto Pilipai Tane Tupana Pepa Peyo Pee Leane Oko

¹ Timoti, nalipa Jisasa Kataisana piape akali atoto, Gotena wandakali Pilipai tano okona atalaini tupapi, Pilipai sosa okona piape akali tupapi, ando atene akali tupapi, yakama pitakana pepa oko peyo epe leyapa.*

² Nanimana Akali Andane Jisasa Kataisala, Ayiane Gote-la, okolapo-mane yakama ondowa moyoto, yakamana yamapane oko mo tambo laya yakale lo pote leyapa.

Poloto Gote Ando Wayu Pele Leane Oko

³ Ole dindi lo nambato yakama nembo toto, nambana Gote oko ando wayu pele lalawane. Anu peakale nambato wuane piyawanepe.

⁴⁻⁵ Nanimato Gotena pii layene epene wamba ini bulupane yakama langemangangi tewa, yakama nanima towa atu potomane lo atama ipulu, andipa gii ateyama okona giāu leyai. Tene okonena, nambato yakama towa epele andane wete wato, Goteto yakama moyakale lo pote lalawane.

⁶⁻⁷ Nambato Gotena pii layene epene oko wandakali tupa lamawua ateyo-kola, akali minditupa-mane namba andi loto, kosimi lalaini. Utupane-mane namba kosimi leyai-kola, nambato Gotena pii lalawane okone pii enene mindi lalawane loto, Gotena pii layene epene oko mo tai laya alawane. Namba andi nalene, mee ateyo-angi, nambato wuane teke piyawane. Yakama pitakamanne namba towa potomane lo ateyai-kola, Goteto nanima pitaka ondowa moyalane okonena, yakama pitaka nambana yamapane yene yame ateyai nembo talawane okone katu leya.*

⁸ Anu peakale nambato wuane leyope. Jisasa Kataisato wandakali tupa towa epelewa yamapane yo atalane pua teke, nambatopi yakama towa epelewa yamapane yo atoto, yakama andauwa lakae lo nembo tatawa ateyo oko Goteto andeya.

⁹⁻¹¹ Nambato yakama nembo tatawa atoto, yakama moyo wua lo pote lalawane: Jisasa Kataisato mana tika-pene kambua tupa yakamanga mina ika lola-kola, wandakali waka tupamane yakamana mana utupane andoto, Gotena gene oko laiyu loto, bala epelewa tama pua ateakale lo pote lalawane. Mana tika-pene kambua yakamanga yola-kola, Kataisa lapone epola-angi, yakamanga koo tene mindikipi mindi nayene, epene kilini lene wete

atalapale nembo teyo. Wuane nembo toto, yakamato mana yame eya tupa pitaka yapa lo tale puato, mana epene tupa angu wato minu atapiai lakae lo nembo teyo. Yakamato wuane pimakale nembo toto, Kitisene mana epene tupa pitaka andoto, mana kuai lo molai-kola, wandakali yangone tupa pitaka towa epelewa yamapane yo atene mana okone yakamanga keato wete gulekale lo nambato pote lalawane.*

*Polo Bala Katapusa Ateane Okomane
Gotera Piape Moyane Oko*

¹² Amene imalini yame, kenda-pene nambanga epeane tupamane Gotena pii layene epene oko lo tawe yolane asia oko pai nalene, asia lumbu tepa yane lo yakamato nembo talapale loto, nambato yakama langeyo.

¹³ Nambato Gotena pii layene epene oko wandakali tupa lamawua atewa-kola, akali minditupa-mane namba andi leaini. Andi leai-kola, gapomane akali kawane Sisa okona anda ando atalaini ami yame tupapi, wandakali waka tupapi, utupane pitaka-mane namba Poloto Kataisana piape piyawane mambele, namba katapusa ateya lo andeaini.*

¹⁴ Andipa namba katapusa ateyo okonena, Gote lo bilipi lene amene kambua tupamane Akali Andane oko lo bilipi leyo nayu loto, yuku naene, Gotena pii layene epene oko lamawua ateyai.

¹⁵⁻¹⁶ Akali utupanena minditupa-mane andeyai-kola, nambato Gotena pii layene epene oko enene wete eya lalawane mambele, namba katapusa ateya lo andeyai. Andoto, akali utupane-mane namba towa epelewa yamapane yo atoto, Kataisana pii oko wandakali tupa lamawua ateyai. Akali utupane-mane wuane pua ateyai tekeko, akali waka minditupa-mane namba Polona gene andane eya nembo toto, namba towa apiangu pua ateyai. Utupane-mane namba sia mina-makale nembo toto, Kataisana pii oko lamawua ateyai.

¹⁷ Namba katapusa ateyo-kola, akali utupane-mane kuai lo nembo natene ato, kenda-pene minditupa tako pua gimakale nembo toto, Kataisana pii oko lamawua ateyai.

¹⁸ Akali utupane-mane kuai lo nembo natene, wuane peyai tekeko, mini koo paluto leaindopi, mini epene paluto leaindopi, utupane pitaka-mane Kataisana pii lamawua ateyai-kola, namba epele wete eyo.

*Nambato Yakama Moyo Atolopeyo
Leane Oko*

* 1:1: Ap 16:12-40

* 1:6-7: 1Ko 1:8-9

* 1:9-11: 1Tes 5:23

* 1:13: Ap 28:30

19-20 Dee, matilipi namba epelewa teke atolopeyo. Anu peakale nambato wuane leyope. Goteto namba moyakale lo yakamato pote leyai-kola, Jisasa Kataisana Sipitisa okomane namba moyalan. Matilipi, balato namba moyola-kola, namba kote sia minalu, katapusa tepa alu, anana mee atolopeyo nembo teyo. Nambato wuane nembo teyko, namba yala olowane nembo toto, nambato mana epene tupa wato minuto, Kataisana piape pua atokale. Balana piape pua atoto, namba saka atewandopi, omape-pene guleandopi, namba yuku naene atoto, Kataisana gene oko layu lalawane pua teke, ole dindilo layu lokale.*

21-22 Namba oma napene, saka atewando, nambato Kataisana piape puluwa-kola, piape okonemane dini epene minditung lulupeya teyko, namba omewando, namba Kataisa ateyanga poto, kuai lo wete atolopeyo. Tene okonena, namba saka atokalepe, omokalepe namba tane nembo nateyo.*

23 Wuane nembo natene atoto, namba mini lapo palu ateyo. Namba Kataisa ateyanga poto, bala towa atu atepando, namba kuai lo wete atolopeyo nembo toto, namba Kataisa bala ateyanga puwa lakae lo nembo teyo.*

24 Namba puwa lakae lo nembo teyo teyko, namba oma napene saka atoto, yakama moyo piape pua atape-pene guleya nembo teyo.

25-26 Namba dee lapone yakama towa atu atoto, Gotena piape puluwa-kola, yakamato Jisasa Kataisana gene oko wayumane layu lolopeyai. Yakamato wuane piyapale nembo toto, nambato yakamana bilipi oko mo tai laya oyale, Gotena piape tupa pukale. Wuane puluwa-kola, yakama epele wete olopeyai nayuto, andipa namba oma napene, yakama ateyainga peke loto, yakama moyo atolopeyo nembo teyo.

Kataisana Pii Okomane Leya Pua Atalapape Leane Oko

27 Nambato yakama andolo epewandopi, na-epewandopi, yakama nembo mindiki palu ateyai lolai oko ale wakale. Dee, wandakali-mane Gotena pii layene epene oko ale wato, bilipi leakale nembo toto, yakama pitaka potomane lo atoto, Gotena piape pua ateyai lolai okone nambato ale wakale teke. Wandakali-mane wuane lolai oko nambato ale yakale nembo toto, yakamato Kataisana pii layene epene okomane leya pua, Kitisene mana epene tupa wato minu atalapape.*

28-30 Wamba namba tandaka no atoto, Kataisana piape oko ayiawa wete pua atewa oko yakamato andeai okoni. Andipapi nambato wuane pua teke tandaka no atoto, balana piape pua ateya lene oko yakamato ale eyai. Yakamapi namba towa potomane lo atoto, tandaka no atoto, Kataisana piape oko ayiawa pua ateyama. Goteto yakama moyoto, yakamato Kataisa lo bilipi angu lalapape naleapia. Jia. Yakamato Kataisana piape pua atoto, tandaka no atalapape leane teke. Goteto wuane lea-kola teke, yakamato yakama towa yanda-pene tupa ando yuku naene ateaindo, Kataisa towa yanda-pene wandakali utupane-mane andolai-kola, Goteto yakama moyoto, utupane minu koyolo-peya ya lo andolopeyai.*

2

Mindi Akalina Pangosa Gulo Atalapape Leane Oko

1 Kataisa bala yakama towa atu atoto, yakamana mini, yamapa-la, okonelapo mo tai laya alanape. Bala yakama towa epelewa yamapano yo atoto, yakamana mini mo tambo laya alanape. Oli Sipitisa oko yakamanga ateya-kola, yakamato wandakali yangone tupa ondo wato, moyalainipe.

2 Wuane yando, yakamato namba mo epele wete piya oyale, mindi akali epele aka pua yamapano yoto, nembo-tene mindiki paluto, yamapa mindiki palu atalapape.

3 Yakama tanena gene andane yakale nembo toto, yakama tane angu moyoyale piape pua ata na-piyapape. Jia. Yakamato wandakali yangone tupana pangosa atoto, utupane-mane yakama sia minu lipinga yale ateyai nemboto atalapape.*

4 Wuane nembo toto, yakama mindiki-mindiki lo yakama tanena minditung yolaini tupa angu kuai-lene yakale lo ando atamakale nembo na-talapape. Jia. Wandakali waka tupana minditaka yolaini tupa kuai-lene teke yakale nembo toto, utupane moyo ando ata maiyapape.*

5 Jisasa Kataisato nembo teane pua teke, yakamatopi nembo-tene okonepene teke palu atalapape.

6 Bala Gote enene ateane teyko, balato Gote yale angu atokale nembo nateapia. Jia.*

7 Bala Gote ateane mana okone tupa alu, yuu okona akali enene mindi gulo atoto, bala piape akali mee mindi gulo ateapia.*

* 1:19-20: 2Ko 1:10-11 * 1:21-22: Ga 2:18-20 * 1:23: 2Ko 5:8 * 1:27: Ep 4:1; 1Tes 2:11-12 * 1:28-30: Ap 16:19-40 * 2:3: Ga 5:26 * 2:4: 1Ko 10:23-26 * 2:6: Jo 1:1-2; 17:4-5 * 2:7: 2Ko 8:7-9; Jo 1:14

8 Balato wuane pea-kola, wandakali-mane bala akali enene mindi ateya lo andeaini-pia. Bala Gotena pangosa gulo atoto, Gotena pii oko angu wato minu atama pulu, ita malamanda okona omeapia. *

9-11 Jisasato wuane peane okonena, ati kengapi, yuu okonapi, yuu pangosapi, utupanena atalaini tupa pitaka-mane Jisasana gene oko ale wato, aikini leka wato, bala Akali Andane oko ateya lape-pene. Utupane-mane wuane pulai okonemane, Ayiane Gotena gene oko laiyu leakale nembo toto, Goteto Jisasana gene oko laiyu loto, gene waka tupa pitaka sia minene gene andane wete mindi bala mayaepia. *

*Kaiyanda Tii Piyane Pua Yakamoto Tii
Piyawa Atalapape Leane Oko*

12-13 Nambana yamapanne yene yame, wamba namba yakama towa atu atemangai, ole dindi lo yakamoto Gotena pii wato minu ateaokoni. Yakamoto balana pii oko wato minuto, balato nembo teya pua piyapale nembo toto, bala tane yakamana yamapanne pangosa piape puato, balana nembo-tene wato minulane tai-lene oko yakama giyane-ko. Andipa namba yakama towa atu ata naaneyamangai, Goteto yakama molo-peke leakale nembo toto, yakamoto bala yuku amawua puti-puti peyo atoto, wua pua atamakale nembo talapape.

14-16 Gotena pii oko wato mina na-piyaini wandakali tupamane balana mana epene tika-pene tupa awua tepa wato, mana koo kambua minu atalaini tekeko, Kataisa bala lapone epola-angi, nambato yakama moyoyale piape pewane tupa mee katapusa piape pua apia napewa lo namba tanena gene oko laiyu lokale. Nambato wuane pula nembo toto, yakamoto wandakali koo utupanena tombenenga atoto, ati kenga kaiyanda tupamane tii piyawa atalaini pua teke, yakamatopi wandakali utupane tii piyawa atoto, Gotena pii okomane wandakali tupa saka atapowa ateakale lo ataya alane lalapape. Pii okone wandakali utupane lamawuato, yakamoto tii piyawa atamakale nayuto, yakamanga koo tene mindi nayene, Gotena andopane yame epene tika-pene atamakale nembo toto, pii-mane yanda napene, mulu-mulu nalene, yakamana piape pulaini tupa pua atalapape. *

17 Yakamoto Gote lo bilipi loto, namba moyoyale minditaka epe lapiai tupa Gote lo opa maiyene guleya. Nambato yakama moyoyale Gotena piape pua atoloua-kola,

wandakali-mane namba peyo ome leaindo, nambato nambana tundupa oko Gote lo opa mauluwa-kola teke pulupeya. Nambana opa okone yakamana opa okone towa tako peando, nambato yakama pitaka towa epelewa atape-pene.

18 Wuane pua teke, yakamatopi namba towa epele wato, epele wete wa atalapape. *

*Poloto Timoti Epeakale Lokale Leane
Oko*

19 Andipa yakama wua pua ateyai lene oko ale wato, namba epele wakale nembo teyo. Tene okonena, Akali Andane Jisasato katu leando, nambato Timoti bala yakama ateyaina wamba ini epeakale lokale.

20-21 Akali bala yale mindi namba towa atu wali atu naaneyama. Wandakali waka namba towa atu ateyama tupa pitaka-mane yakama tanena minditaka yalamini tupa angu kuai-lene yakale lo ando atoto, Jisasa Kataisana piape oko pimakale nembo natalaini. Timoti bala angu namba towa nembo-tene mindiki palu atoto, yakama moyauwa laka lo nembo talane. *

22 Iwanane-mane ayiane moyo piape piyane pua teke, wamba Timoti bala namba towa atu Gotena pii layene epene okona piape pua atepa. Okone angi, yakamoto balana mana epene okone andoto, balato Gotena piape oko kuai lo piyae-ya lo andeai okoni.

23 Tene okonena, jasa okomane namba andayo aki leyape lo nambato wamba ini ale alu, matili Timoti bala yakama ateyaina wamba ini epeakale lokale.

24 Dee, matili Akali Andane okomane namba epolane asia mindi lumbu tepa olakola, nambatopi yakama wamba ini andolo epokale nembo teyo.

*Poloto Ipapo-taitasa Epeakale Leyo
Leane Oko*

25 Matili nambato wuane pukale tekeko, andipa nambato akali Ipapo-taitasa bala yakama ateyaina peke leakale lokale. Wamba Ipapo-taitasato namba moyakale loto, yakamoto bala namba atewanga epeakale leai-kola, bala nambana amene gulo atoto, namba towa potomane lo atepa. Potomane lo atoto, nalipato Jisasa towa yanda-pene wandakali tupa towa yanda pimawua atepa. *

26-27 Matili Ipapo-taitasa bala siki andane mindi moto, omape-pene gulea-kola, Goteto bala ando wato, mo atu yane. Bala omapia-yale, kenda-pene okone nambanga ipupiayale tekeko, kenda-pene okonepi tako pua

* 2:8: Ip 5:8; 12:2-3 * 2:9-11: Ap 2:33-35; Ep 1:20-21; Ip 1:3-4; Lom 10:9-10; 14:10-12 * 2:14-16: Dan 12:3; Pl 1:9-11;

1Tes 2:17-20 * 2:18: Pl 3:1; 4:4 * 2:20-21: 2Ti 4:9-12

* 2:25: Pl 4:18

nambanga na-epeakale nembo toto, Goteto nambapi ondo wato, Ipapo-taitasa okona siki okone mo atu yane. Pilipai tane wandakali yakamato bala siki oma-yene eya lene okone angu ale wato, mini kendawa ateyai nembo toto, Ipapo-taitasa balapi mini kenda wato, yakama andauwa lakae lo nembo teyo.

²⁸ Wuaneko, bala yakama ateyainga epola oko andoto, yakamato epele olai-kola, namba mini kendawa ateyo okone mee gulolo-peyako. Nambato bala yakama ateyainga epe lauwu lakae lo nembo teyo.

²⁹⁻³⁰ Wamba yakamato katulo namba moyolo naepeai-kola, Ipapo-taitasa balato namba moyolo epea okoni. Epoto, bala tane kuai lo atokale nembo natene, namba moyo Kataisana piape oko pua atoto, bala omape-pene gulea-ko. Yakamato akali okonepene tupana gene tupa laiyu lapepene. Tene okonena, Ipapo-taitasa bala yakama ateyainga epola-angi, yakamato bala Akali Andane okona piape piyane nembo toto, bala towa epele andane wete wato, nimba wayu epeleya lo bala lamialapape.

3

Akali Koo Tupamane Yakama Minu Koyolaini, Waiwa Ando Atalapape Leane Oko

¹ Amene imalini yame, yakamato Akali Andane oko nembo toto, epelewa atalapape. Wamba nambato pii minditupa pepa peyo epe lewa tekeko, pii okonemane yakama moyolo-peya nembo toto, andipa namba kepa naene, pii mindiki okone teke dee lapone pepa peyo epe loto, wua leyo:

²⁻³ Gotena Oli Sipitisa oko nanimanga eya-kola, namimoto Gote lo lotu loto, Jisasa Kataisana gene oko laiyu lalamane. Nanimato wuane piyamane okonena, Gotena wenonga nanima yala-pene umbaini katene gulo ateyama-kola, akali mindimane nanimana yala-pene umbaini oko kateaindo, mana okone bala mee umbaini kenga yoto, nanima katulo moyo napulu-peyako. Peango anatope gulene akali tupamane mana koo mindi minuto, Pilipai tane akali yakamana yala-pene umbaini oko katiyapa lalaini okomane yakamana bilipi oko minu koyolaini. Waiwa ando atalapape.*

⁴ Wandakali minditupa-mane kopeta nembo toto, Goteto wandakalina umbaini kenga mana okonepene tupa andoto, utupane yapa lo tale pulupeya nembo talaini tekeko, Goteto wandakalina umbaini kenga mana tupa andoto, utupane yapa lo tale piyae pia-yale, balato namba Polona gene

oko laiyu loto, namba akali waka tupa sia minuto, akali epene tika-pene wete ateyo lapia-yale nembo teyo.*

⁵ Namba angini-mane namba mandu yatawa pituto, ole yanasa pea-kola, ole kitupane okona nambana yala-pene umbaini oko kateainipia. Namba Benjamene yame atoto, namba Isatale tane mindi ateyo. Nambana yumbane yame tupa pitaka Iputu yame angu ateinipia. Namba akali Patasai mindi atoto, Patasai yamena mana wato minuto, Juta yamena loo yene tupa pitaka kuai lo wete wato minu atewane.*

⁶ Nambato Juta yamena loo yene tupa kuai lo wete wato minu atewa-kola, wandakali mindimane katulo nambanga koo tene mindi yata nayaini. Jia. Nambato Gotena piape oko tika pua peyo nembo toto, kenda-pene andane tupa sosa okona wandakali tupanga maiki pua atewane.*

⁷ Wamba nambato mana utupane nembo toto, nambato akali waka tupa sia minuto, akali epene tika-pene wete ateyo nembo tewa tekeko, andipa nambato piape Kataisato peane tupa nembo toto, namba tane mana wamba minu atewa utupane pitaka angini mindi jia ya lo nembo teyo.*

⁸ Jisasa Kataisa bala nambana Akali Andane oko atoto, namba wayumane wete moyalane lo nayuto, bala towa atauwa lakae lo nembo teyo. Wuane nembo toto, nambato minditaka waka taka eya tupa pitaka angini mindi jia ya lo nembo toto, utupane masia mawua ateyo.

⁹⁻¹¹ Nambato Kataisa angu nemboto minatawa atama pulu, omolawa-kola, matili Goteto namba malinga ika laya yakale nembo teyo. Wuane nembo toto, wamba Kataisa bala tandaka nalu omeane wuane pua teke, nambapi tandaka nalu omokale. Omolawa-kola, Goteto Kataisa bala malinga ika laya yane pua teke, balato nambapi malinga ika laya ola-angi, nambato balana tai-lene oko andokale nembo teyo. Wuane pukale nembo toto, nambato Gotena loo tupa pitaka wato minu atolowa mana okonemane namba akali epene tika-pene gulolo-peyo nembo nateyo. Jia. Nambato Kataisa bilipi lo atolowa-kola, Goteto namba akali epene tika-pene ateyo lolopeya nembo toto, nambato Kataisa towa mina mindiki lo atokale.*

Yakamato Nambana Mana Oko Wato Minalapape Leane Oko

¹² Nambato Kataisana mana epene tika-pene tupa pitaka mia yiake loto, namba akali epene tika-pene gulo ateyo naleyo. Jia. Namba Jisasa Kataisana yame atola

* 3:2-3: Lom 2:28-29 * 3:4: 2Ko 11:16-19 * 3:5: Lk 1:59; 2Ko 11:22; Ap 23:6-8 * 3:6: Ap 8:1-3 * 3:7: Mt 13:44,46 * 3:9-11: Lom 3:21-23; 6:2-7; 8:17

lo balato namba minea-kola, nambato balana mana epene tika-pene tupa wato minu atokale nembo toto, piape tailo pua ateyo. *

¹³ Amene imalini yame, nambato Kataisana mana tupa kuai lo wato minalawane naleyo tekeko, nambato mangene wamba pewane tupa embesa wato, mangene matili pukale tupa nembo tatawa atoto, piape tailo pua ateyo.

¹⁴ Jisasa Kataisato namba moyo piape peane mambele, Goteto namba ati kenga yuu epene okona epola loto, ee lo meane. Balato wuane peane okonena, nambato ati kenga pataisa epene eya okone mokale nembo toto, maki okonena peakaiyu loyale asia tai leyo. *

¹⁵ Kitisene tai atalamane wandakali nanimma pitaka wuane teke pimakale nemboto atamakale. Yakamoto nembo-tene waka mindi palu ateaingad, Goteto okone yakama andawa lolopeya. *

¹⁶ Goteto wuane pulupeya nembo toto, andipa nanimato Kitisene mana epene wamba mema tupa wato minu atamakale.

¹⁷⁻¹⁹ Amene imalini yame, wamba ole kambuangka nambato pii yakama langewa okone teke andipapi namba ai lo atoto, dee lapone teke yakama langulu-peke leyo. Wandakali kambua-mane yuu okona minditaka eya tupa angu nembo toto, mana yala-pene tupa minu atoto, yakama tanena gene tupa laiyu lalaini. Wandakali utupane-mane yakamana umbainina epele ene tupa yakamana gote gulo minu atoto, Kataisana ita malamanda oko towa yanda-pene gulo atalaini. Wuane piyaini wandakali utupane yakama yuu koo ita too atapowa atene okona alu pulupeyai. Pilipai tane wandakali yakamoto mana koo okonepene tupa wato mina napiyapale nembo toto, nanimato mana epene minditupa yakama andawa loto, yakamoto wua pua atalapape lema-kola, wandakali minditupa-mane mana epene utupane wato mineai. Yakamoto wandakali utupanena mana epene utupane wayumane andoto, nambana mana epene utupane wato minu atalapape. *

²⁰ Ati kenga yuu epene oko nanimana yuu tene oko eya. Matili Akali Andane Jisasa Kataisa bala ati kenga yuu epene okone tepa alu, nanimana lamolo epolopeya lo malio ateyama. *

²¹ Bala epola-angi, balana tai-lene okomane balato minditaka eya tupa pitaka balana pangosa yakale lolopeya. Wuane loto, balana tai-lene okomane nanimana

umbainai tai nalene ateya tupa mo lawua puato, bala tanena umbainai epene wete ateya okonepene teke gulaya olopeya. *

4

¹ Amene imalini yame, nambato leyo pua, yakamoto Akali Andane okone tai-lene moto, Kitisene tai atalapape. Nambato Gotena piape pua atewa okonemane yakama Kitisene guleaini okonena, yakama nambana pataisa epene okonetaka gulo ateyai-kola, nambato yakama nembo toto, epele wete eyo. Tene okonena, nambato yakama towa epelewa yamapane yo atoto, yakama andauwa lakae lo nembo teyo. *

² Wanda Yutiya, Sindike-la liyamba lapotaka Akali Andane okona yame peteyapi. Tene okonena, liyambato pii yanda napene, nembo mindiki angu palu pitiyapale lo nambato liyamba tailo langeyo.

³ Wamba Kelemenepi, namba towa atu piape mindiki pemane wandakali waka tupapi, nanimato Gotena pii layene epene oko wandakali tupa lamawua atemanggi, wanda Yutiya, Sindike-la, okonelapo nanimma towa potomane loto, piape mindiki okone teke masiawa pua peteapili leyo. Wandakali utupane pitakana gene tupa Gotena wandakali saka atapowa atolane gene yalane buku okona gene peya-yene eya. Andipa wanda okonelapo liyamba nembo mindiki palu peteakale, namba towa atu piape mindiki pua atepa akali nimbatu okonelapo moyape lo tee leyo. *

⁴ Ole dindi lo yakamoto Akali Andane oko nembo toto, epele wete wa atalapape. Nambato dee lapone teke yakama languato, yakama epelewa atalapape leyo.

⁵ Yakamoto mana epene tupa miniyai lo wandakali pitaka-mane andeakalenga, yakama tenga-mane tambo lo atalapape. Akali Andane oko bala dee lapone epolane gii oko wamba mandaka guleya. *

⁶ Tene okonena, kenda-pene mindi yakamanga epolopeya nembo toto, yakamoto nembo kambua mia na-piyapape. Jia. Ole dindi lo Goteto yakama moyalane nembo toto, yakamoto bala wayu pele lalapape. Wuane lalu, balato yakama dee lapone moyakale lo pote loto, yakamanga kendapene yolane tupa pitaka bala lamai-yapape. *

⁷ Yakamoto wuane pua pote lolai-kola, Gote balato yakamana yamapane mo tambo laya olopeya. Goteto nanimana yamapane oko mo tambo laya oyale

* ^{3:12:} 1Ti 6:12,17-19 * ^{3:14:} 1Ko 9:24-25 * ^{3:15:} 1Ko 2:6 * ^{3:17-19:} 1Ko 4:16; Lom 16:17-19 * ^{3:20:} Ep 2:5-7,19 * ^{3:21:} 1Ko 15:28,42-53 * ^{4:1:} 1Tes 2:17-20
Mt 6:25-34; Kol 4:2-4

wua piyane lo nanimato katulo anda napiyamane tekeko, yakama Jisasa Kataisa towa atu atoto, yakamana mini yamapa-la, okonelapo epene palu atolopeyai. *

⁸ Amene imalini yame, andipa nambato pii oko lokoyo puato, wua leyo. Mana minditupa angini yalane. Mana minditupa gene yene yalane. Mana minditupa tikapene yalane. Mana minditupa epele-pene yalane. Mana minditupa kuai-lene yalane. Dee, mana minditupa epene wete eya-kola, nanimato mana utupane laiyu lalamane. Yakamato mana utupane nembo tatawa atalapape.

⁹ Wamba namba tane mana epene minditupa wato minuto, yakamato mana utupane wato minalapape lo mana langewakola, yakamato nambana pii oko ale wato, nambana mana utupane lee-mane andoto, mana meai. Yakamato mana okonepene tupa pitaka nembo tatawa atoto, wato minu atalapape. Yakamato wuane peaindo, yamapano mo tambo laya alane Gote oko yakama towa atu atolopeyai. *

Yakamato Wayu Peai Lo Leane Oko

¹⁰ Wamba yakamato namba moyamakale nembo teaini tekeko, okone angi yakamato namba moyo minditaka epe lolane asini mindi yaa napea. Ana minditupa pupia-kola, yakamato nembo tolo-peke loto, namba moyapia mambele, nambato Akali Andane oko towa epele wete wato, bala ando wayu pele leyo.

¹¹ Nambanga minditaka mindi jia eya-kola, nambato pii okone naleyo. Jia. Minditaka mindi nambanga yandopi, nayandopi, namba katulo atokale lo mana mewane.

¹² Alu mindi angi nambanga minditaka kambua eya-kola, nambato tomo kambua no atalawane. Alu mindi angi nambanga minditaka jia eya-kola, nambato nonowa atalawane. Tomo kambua no atewandopi, nanene mee atewandopi, ole dindi lo namba mini epene palu atalawane.

¹³ Kataisato namba minu tai laya eya-kola, balana tai-lene okomane nambato minditaka pitaka taka katulo piyawane. *

¹⁴ Nambato wuane piyawane tekeko, wamba kenda-pene mindi nambanga epeakola, yakamato mana epene mindi minuto, namba towa potomane lo atoto, namba moyai okoni.

¹⁵ Wamba nambato Gotena pii layene epene oko bulupane tewa yakama langiyu, Masetonia potopinjia oko tepa alu pewaangi, Pilipai tane Kitisene wandakali yakamato angu namba towa potomane loto, nambato Gotena piape oko pua atape leai. Wuane loto, yakamato namba moyoto,

minditaka geai okone yakama tane nembo teyai okoni. Yuu waka mindina Kitisene wandakali tupamane wuane pua namba moyo napeai. *

¹⁶ Dee, matili namba Tesalonaika yuu okona po atoto, Gotena piape pua atewangi, nambanga minditaka jia yo atewakola, ole kambuanga yakamato namba moyo minditaka epe leai okoni.

¹⁷ Andipa wuane pua teke yakamato minditaka namba giyapale lo tee leya nembo na-talapape. Jia. Yakamana mana epene okone yakamanga andane gulo yola-kola, Goteto yakama towa epele wato, minditaka mindi wete tako pua yakama geakale nembo toto, nambato pii okone leyo.

¹⁸ Yakamato nambana minditaka epe leaini tupa akali Ipapo-taitasa balato mandu epoto, namba geane. Nambato utupane moto, andipa nambanga minditaka kambua eya-kola, ateyo. Nambana yano mindi wamba yakamanga yane nembo teaindo, andipa yakamato minditaka nambana epe leai utupane-mane nambana yano yakamanga yane oko sia minuto, kambua epe leai. Yakamato minditaka epe leai utupane opa tunduma-pene mindi Gote maiyene okonetaka gulea-kola, Goteto yakama towa epele eya.

¹⁹ Epele wato, yakama Jisasa Kataisa towa mina mindiki lene ateyai nembo toto, nambana Gote okomane balana minditaka epene kambua wete yalane tupana minditupa moto, yakamanga minditaka jia yolane tupa pitaka mo katu laya olopeya.

²⁰ Balato wuane pulupeya okonena, matili-matilipi, nanimana Ayiane Gote okonena gene oko laiyu lo atamakale. Enene.

Pii Lokoyo Pua Leane Oko

²¹ Jisasa Kataisa bilipi lene wandakali yakama Gotena wandakali ateyai. Nambato yakama pitaka mindiki-mindiki lo kuai lo atalapape leya lo yakamato utupane lamai-yapape. Kitisene amene namba towa wali ateyama tupamanepi yakama ando kuai lo atalapape leyai.

²² Dee, Gotena wandakali wali atalaini tupa pitaka-manepi yakama ando kuai lo atalapape leyai teke. Dee, Lomo tane gapomane akali kawane Sisana andaka piape piyaini Kitisene wandakali tupamanepi, namba taimane languato, yakama kuai lo atalapape leyama oko nimbato Pilipai tane wandakali tupa lamaipe lapiai.

²³ Akali Andane Jisasa Kataisato yakama tandini oko towa atu atoto, yakama ondowa moyo atekale lo nambato pote leyo.

* **4:7:** Ais 26:3; Jo 14:27; Kol 3:15

* **4:9:** Lom 16:20

* **4:13:** 2Ko 12:10

* **4:15:** 2Ko 11:7-9

KOLOSI

Poloto Kolosi Tane Tupana Pepa Peyo Pee Leane Oko

1-2 Goteto namba Polo Jisasa Kataisana aposolo akali atola nembo tea-kola, namba balana aposolo akali ateyo. Kataisa lo bilipi lene Kolosi tane wandakali yakama Gotena wandakali tupa atoto, namba amene Timoti nalipana amene imalini yame ateyai-kola, nalipato yakamana pepa oko peyo epe leyapa. Nanimana Ayiane Goteto yakama ondowa moyoto, yakamana yamapane mo tambo laya yakale lo nambato pote leyo.

Polo Timoti-lamane Kolosi Tane Tupa Nembo Toto, Pote Leapele Oko

3-5 Matili Kataisato yakama ati kenga yuu epene okona pulupale lo yakama lamolo epolopeya loto, Ipapo-tasato Gotena pii layene epene oko yakama wamba langea okoni. Langea-kola, yakamato balana pii enene okone ale wato, ati kenga makale lo maliyo ateyai. Maliyo atoto, andipa yakamato Jisasa Kataisa lo bilipi loto, Gotena wandakali pitaka towa epelewa yamapane yo ateyai. Yakamato wuane pua ateyai loto, Ipapotasa bala epoto, nalipa langipia. Langipia-kola, ole dindi lo nalipato yakamana mana epene utupane nembo toto, nanimana Akali Andane Jisasa Kataisana Ayiane Gote oko ando wayu pele lo pote leyapa.*

6-7 Nalipana yamapane yene akali Ipapotasa balato piape Timoti nalipato piyapale mindiki okone teke piyane. Balato nalipa moyo, Kataisana piape oko kuai lo piyane. Gotena pii layene epene oko yuu yo peya tupa pitakana peya-kola, wandakali minditupa-mane Gotena pii okone ale wato, bilipi loto, mana epene tupa wato minalaini. Wuane pua teke, wamba Ipapo-tasato Gotena pii oko yakama langea-kola, yakamato pii okone bulupane tewa ale wato, Goteto yakama ondo wato moy-alane lo pii okone wayumane nembo toto, mana moto, mana epene utupane wato minu ateaini.*

8 Oli Sipitisa okomane yakama mina ika lapia-kola, yakamato mindi akali towa epele aka pua yamapane yo ateyai lo Ipapotasa namba langipia.*

9-11 Ipapotasa bala epoto, yakamato mana epene utupane pitaka wato minu ateyai lo Timoti nalipa langipia. Langipia-kola, okone angi teke tewa, ole dindi lo nalipato yakama moyo pote loto, kenda-pene mindi

yakamanga epola-angi, yakamato wamba ini kepa naene, kenda-pene okone awua atoto, epele wete wa atalapale lalapale. Yakamato wuane pua atalapale loto, Goteto yakama minu tai laya yakale lo nalipato pote lalapale. Dee, Gotena tai-lene epene wete okomane yakama wayumane minu tai laya ola-kola, yakamato Gotena mana tupa pitaka mialapale nembo teyapa. Yakamato mana utupane moto, balana piape epene tupa pitaka pua atoto, yakamanga dini kambua liyakale lo pote lalapale. Yakamato wuane pua atolai-kola, Akali Andane okomane yakamana mana utupane pitaka andoto, epele yakale nembo teyapa. Balato epele yakale nembo toto, Gotena wandakali tupamane mana epene wato minu atape-pene tupa yakamato wato minu atalapale loto, nalipato pote leyapa. Yakamato mana utupane wato minu atalapale loto, Oli Sipitisa okomane yakamana nembo-tene oko mina ika leakale nembo teyapa. Balato wuane pula-kola, yakama mana andene wandakali gulo atoto, Goteto yakama wua pua atapiai lakae lo nembo talane okone yakamato wayumane nembo talapale lo pote lalapale.*

12-14 Wamba undupi-lene okona tai-lene okomane nanima andi lea-kola, nanima okonena pangosa andi latane atema-kola, Ayiane Goteto nanima tinga lo molo-peke lalu, balana iwanane yamapane yene okomane nanima moyo ando ateakale leaipia. Wuane lea-kola, balana iwanane okomane nanima kambo molo-peke loto, nanimanga koo tene yane tupa apeaipia. Balato wuane peane okonena, matili minditaka epene Goteto yakama gukale leane tupa yakamana paluni gulo yola-kola, yakamapi Ayiane Gote balana wandakali tupa towa atu balana tii-pene okona atoto, minditaka utupane katulo molopeyai. Yakamato utupane molopeyama nembo toto, Gote ando wayu pele lalapale loto, nalipato pote leyapa.*

Kataisato Yakama Gote Towa Yamapane Mindiki Paliya Yane Oko

15-16 Nanimato Ayiane Gote lee-mane anda na-piyamane tekeko, Kataisa bala Gotena iwanane bulupane oko ateya okonena, Kataisa bala Ayiane Gote ateya mindiki okonepene teke ateya. Wamba Ayiane Goteto balana iwanane okonena pii okomane minditaka ati kenga eya tupapi, yuu okona eya tupapi, utupane pitaka yakale leaipia. Okone angi, balato enjole tai-lene tupapi, sipitisa tai-lene tupapi, tai-lene yame pitaka yakale loto,

* 1:3-5: Ep 1:15-16 * 1:6-7: Ep 1:13; 1Pi 1:3-4 * 1:8: Kol 4:12-13; Pm 23 * 1:9-11: Ep 1:16-19; 3:16 * 1:12-14:

minditaka nanimato lee-mane andalamane tupapi, anda na-piyamane tupapi, utupane pitaka yakale leaipia. Ayiane Goteto minditaka eya utupane pitaka Kataisana guleakale nembo toto, Kataisana pii okomane utupane pitaka yakale leaipia. Tene okonena, Kataisato minditaka eya utupane pitaka ando atalane.*

¹⁷ Wamba wete minditaka mindikipi mindi yaa napea-kola, Jisasa Kataisa bala wamba ini bulupane ateaiapia. Andipa balato minditaka eya tupa pitaka ando atalane.*

¹⁸⁻²⁰ Wamba minditaka yuu okona yalane tupapi, ati kenga yalane tupapi, utupanena minditunga-mane Gote towa yanda-pene gulo atea-kola, Goteto utupane pitaka towa yamapane mindiki palu atokale nembo teaipia. Kataisa bala ita malamanda okona omola-kola, balana tundupa kili lola okomane Goteto bala towa yanda piyaini mana okone minu koyo piya wakale nembo teaipia. Wuane nembo toto, Ayiane Gotena nembo-tenepi, manapi, tai-lenepi, utupane pitaka Jisasa Kataisanga tumbi laya yaepia. Jisasa Kataisa bala minditaka eya tupa pitakana kawane ateakale nembo toto, Goteto bala bulupane ini malinga ika laya yaepia. Kataisato ika loto, sosa oko bulupane tewa ataya wato, sosa okona kawane ateya-kola, sosa oko balana umbaini gulo ateyea.*

²¹ Wamba yakamoto mana koo tupa minu atoto, Gote towa yanda-pene wandakali gulo ateyama nembo toto, Gote towa atu atu napene, amonga waka gulo ateaini.*

²² Wuane tekeko, balana wenonga yakamanga koo tene mindi nayene, yakama epene wete atalalape loto, Kataisa bala epoto, ita malamanda okona omeaipia. Bala omeane okomane yakama bala towa yamapane mindiki palu atalapale loto, mina mindiki laya yaepia.*

²³ Namba Polo Gotena pii layene epene okonena piape akali atoto, nambapi, akali waka tupapi, nanimato pii layene epene okone yuu yo peya tupa pitakana wandakali tupa lamawua atema-kola, yakamoto pii okone ale yai okoni. Yakamoto nembo lapo pali napene, pii okone wayumane bilipi leyama nayu lo ateaindo, balana wenonga yakamanga koo tene mindi nayene, wandakali epene wete atolopeyai.

Poloto Gotena Piape Oko Tailo Pua Ateane Oko

²⁴⁻²⁵ Wamba Goteto balana pii layene epene oko yakamanga lapana wakale

nembo toto, nambato balana pii layene epene utupane pitaka lamawua atape lo langeane. Wuane lea-kola, namba balana sosa okona piape akali gulewa. Sosa oko Kataisana umbaini oko eya-kola, Kataisato balana sosa okone moyoyale, tandaka andane neane. Balato wuane peane pua teke, andipa nambato balana sosa oko moyoyale tandaka neane okonena tako bua tandaka no ateyo. Nambato yakama moyoyale tandaka no atoto, yamapane epene palu ateyo.*

²⁶⁻²⁷ Gotena pii layene epene okomane loto, Kataisa bala wandakali mindina ini anda-pangosa epo ateando, wandakali okone bala Gotena yuu epene tii-pene okona katulo polopeya layene eya. Wamba gii epo peane tupa pitakana wandakali-mane pii okone ale nayakale loto, Goteto pii okone too pitane ateakale leaipia. Wamba Goteto wuane leane tekeko, andipa wandakali yame waka-waka tupa pitakane balana pii okone epene wete eya oko nembo teakale loto, Goteto balana pii okone too-pene balana wandakali tupanga lapana eya.*

²⁸⁻²⁹ Lapana eya-kola, wandakali pitaka Kataisa towa mina mindiki loto, Gotena wenonga epene tika-pene wete gulo ateakale nembo teyama. Wuane peakale nembo toto, Kataisana tai-lene okomane namba minu tai laya eya-kola, nambato Gotena piape oko ayiawa pua atalawane. Nanimato piape okone puato, mana koo tupa mina napene kondalapa lalamane. Dee, nanimato Kitisene mana waka-waka tupa pitaka nembo toto, wandakali mindiki-mindiki lo mana lamai-yamane.*

2

Wandakali-mane Yakama Andakasa Olaini, Waiwa Ando Atalapape Leane Oko

¹⁻³ Gotena mana epene wete kambua tupapi, nembo-tene epene kambua tupapi, utupane too pitane ateane tupa pitaka Kataisa balanga eya-kola, bala pii too pitane ateane utupanena tene oko ateyo. Wamba pii utupane too pitane ateaini tekeko, andipa yakamoto pii utupane wayumane nembo talapale lo, nambato piape tailo pua ateyo. Enene, Leyotosia tane tupapi, Kolosi tane tupapi, wandakali waka minditungapi, yakamoto nambana lee inga anda napeaini tekeko, yakamoto Kataisa lo bilipi leyama nayu loto, mindi akali towa epele aka pua yamapane yo atalapale lo nambato nembo teyo. Nambato wuane nembo

* **1:15-16:** 2Ko 4:3-6; Jo 1:15-18 * **1:17:** Jo 1:1; 8:58 * **1:18-20:** Ep 1:7-10,22-23; 2:14-16; Ap 26:22-23; Lap 1:4-5; Kol 2:8-10 * **1:21:** Lom 5:9-10; Ep 2:11-12 * **1:22:** Ep 2:14-16; 5:25-27 * **1:24-25:** Ep 3:2,7-10 * **1:26-27:** Lom 16:25-26; Ep 3:5-10 * **1:28-29:** Ep 3:7-10,20; Pl 4:13

teyo okonena, yakama yame mindiki atoto, Kitisene tai atalapale lo, nambato piape tailo pua ateyo. Nambato yakama moyoyale piape okone masiawa wete pua atalane oko yakamato nembo talapale loto, nambato pii okone pepanga peyo epe leyo.
*

⁴⁻⁵ Enene, namba yakama towa atu ata napeyama tekeko, yakamato Kataisa lo bilipi leyama nayu loto, mana tika-pene tupa wato minu atalaini. Yakamato wuane pua atalaini lene okone ale wato, namba epelewa ateyo. Tene okonena, nambana nembo-tene okomane namba yakama towa atu atene gulo ateyama. Wandakali mindimane gitisa pii yakama languato, andakasa olaini loto, nambato pii utupane pitaka yakama langeyo. *

Yakama Jisasa Kataisa Towa Atu Epoko Pua Atalapape Leane Oko

⁶⁻⁷ Wamba nanimato Gotena pii oko yakama langema-kola, yakamato Jisasa Kataisa bala yakamana Akali Andane oko ateya leai okoni. Ita mindina pini yuu pangosa peya-kola, ita okone tailo atalane. Dee, anda pingina tai ateya-kola, anda okone tai atalane. Wuane pua teke, Gotena pii okomane yakama minu tai laya eya-kola, yakama Jisasa Kataisa lo bilipi leyama nayu loto, ole dindi bala towa atu epoko pua atoto, Gote ando wayu pele lalapape. *

⁸⁻¹⁰ Goteto balana nembo-tenepi, manapi, tai-lenepi, utupane pitaka Kataisana umbaininga tumbi laya yaepia. Wuane piyu, Goteto minditaka tai-lene tupa pitaka Kataisana pangosa yakale lea-kola, balato utupane pitaka ando atalane. Tene okonena, yakama Kataisa towa mina mindiki lo ateyai-kola, balato yakama mo kuai wete laya alane. Matili wandakali mindimane Kataisana pii oko yakama langi napene, bala mana andene akali gulo atoto, mee yuunga wandakali tupana pii minditupa yakama langulu-peyai. Langiyu, balato bala yumbanena pii minditupa yakama langulu-peya teke. Balato pii utupane yakama langula okomane yakama andakasa wato, andi lo awua pola-kola, yakamato balana pii mana tupa wato minu atalaini. Tika ando atalapape. *

¹¹⁻¹² Isatale tane tupamane akali tupana yala-pene umbaini oko katu apialaini. Wuane piyaini pua teke, wandakali mindimane yakama Kolosi tane akali tupana yala-pene umbaini oko katu apia neapeaini. Jia. Yakama ipa meai-angi, yakama Kataisa towa atu mali pitane gulo

ateai. Yakama mali pitane gulo ateai-kola, Kataisato yakamana nembo-tene wambane oko mo apeaipia. Wuane pea-kola, wamba Gotena tai-lene okomane Kataisa bala malinga ika laya yane lo yakamato bilipi leai. Yakamato wuane lo bilipi loto, ipa meai-angi, Goteto yakama Kataisa towa atu malinga ika laya ya. *

¹³⁻¹⁴ Wamba yakamato yakamana nembo-tene wambane koo oko wato minu atoto, mana koo kambua minu ateai. Yakamato mana koo utupane mineaini okonena, Gotena loo okomane yakama kosimi lea-kola, yakama omene gulo ateai. Omene gulo ateai-kola, Kataisa bala ita malamanda okona omeane-angi, Goteto yakama kosimi loyale pepa wamba peyo yata yane okone moto, ita malamanda okona nili peya mangua wato, mee gulaya yaepia. Goteto wuane peane okonemane yakamana koo tene yane tupa pitaka apoto, yakama Kataisa towa atu mo saka ataya yane. *

¹⁵ Kataisa bala ita malamanda okona omeane okomane yama koo yame ando atalaini tupapi, tai-lene yame waka tupapi, utupane pitaka towa yanda pimawiuto, utupane sia minuto, utupanena sia umbipi, yanda yandatepi, mo apoto, utupane yala yakale lo panakame andi lo awua peaipia.

Yakamato Juta Yamena Mana Tupa Wato Mina Na-piyapape Leane Oko

¹⁶⁻¹⁷ Wamba Juta yame wandakali tupamane tomo ipapi utupanena minditupa nanene konda yainipia. Dee Sambasa angipi, ana wenene peke leya-angipi, gii andane waka minditupa epeya-angipi, gii utupane epeya-kola, Juta yame wandakali tupamane lotu lalainipia. Utupane-mane wuane piyaini okonemane minditaka angini oko matili epolopeya lo makande pua piyaini tekeko, minditaka angini okone Kataisa bala epeaipia. Tene okonena, wandakali mindimane yakama languato, tomo ipapi utupanena minditupa naa napiyapape leandopi, lotu oko angi lalapape leandopi, yakamato balana pii okone ale wato, wato mina na-piyapape. *

¹⁸⁻¹⁹ Kulini kimbu piyane kungapuni tupamane nanimana umbaini mina mindiki leya-kola, nanimana kawane okomane nanimana umbaini tupa bosa lo ando atalane. Wuane piyane pua teke, Kataisa bala sosa okona kawane atoto, sosa oko bosa lo ando atalane. Balato wuane pua ateya-kola, Goteto sosa oko andane ateakale nembo talane pua, sosa oko

* 2:1-3: 1Ko 1:24-25,30-31 * 2:4-5: Lom 16:17-19; 1Ko 5:2-5 * 2:6-7: Ep 3:17-19 * 2:8-10: Jo 1:14-18; Ep 1:21-22
* 2:11-12: Lom 2:28-29; 6:4-7 * 2:13-14: Ep 2:1,4-7,14-16; 1Pi 2:24-25 * 2:16-17: Lom 14:1-12; Ip 8:4-5

andane gulo atalane. Wuane piyane tekeko, wandakali minditupa-mane Kataisa bala sosa okona kawane ateya lo bilipi laa na-piyaini. Wandakali utupane-mane yakama tanena nembo-tene wambane koo oko wato minuto, yakama lipinga yale ateyama nembo talaini. Wuane nembo toto teke, utupane-mane mee owato napinga gulo atoto, enjole tupa lo lotu lalaini. Lotu lo atoto, utupane-mane kombeya-mane minditaka andaima loto, pii kambua lalaini. Utupane-mane wuane puato, Kolosi tane wandakali yakamato wuane na-piyaini okonde lo yakama anda napi leakale lo yakamato ando konda na-piyapape.*

²⁰⁻²³ Yuunga wandakali-mane mana minditupa yata yai-kola, wandakali waka minditupa-mane mana utupane yakama mana langiyaini. Utupane-mane minditaka mindi waiyata wato, yakamato okone mina na-piyapape lalaini. Dee, utupane-mane minditaka waiyata wato, yakamana umbaininga okonetata pata olane. Tika ando atalapape lalaini. Utupane-mane tomo ipapi minditupa waiyata wato, yakamato utupa naa na-piyapape lalaini teke. Anu peakale Kolosi tane wandakali yakamato mana okonepene tupa wato minu atalainipe. Yakamato tomo ipapi utupane neyai-kola, utupane alu piyane. Enene, wandakali utupane-mane mana utupane wato minuto, napinga gulo atoto, yakamana umbaininga tandaka peakale loto, lotu lo atalaini. Utupane-mane wuane pua ateyai-kola, wandakali minditupa-mane andeyai-kola, wandakali utupane-mane kuai lo nembo toto, mana epene mindi wato minuto, wuane piyaini nembo talaini. Wandakali minditupa-mane wuane nembo talaini tekeko, mana okonepene tupamane wandakali tupana nembo-tene wambane okona mana koo tupa katulosia mina napiyane. Jia. Wamba yakama mee yuunga wandakali tupamane mana yata yaini tupana pangosa andi latane ateaini tekeko, matili yakama ipa meai-angi. Kataisa towa atu omeai okoneman, yakama tinga lo mene gulo ateai. Tene okonena, yakama dee lapone wandakali-mane mana yata yaini tupana pangosa andi latane atolo-peke lolaini. Tika ando atalapape.*

3

*Kataisana Pii Nembo Toto, Mana Epene
Tupa Minu Atalapape Leane Oko*

* **2:18-19:** Ep 2:20-22; 4:15-16 * **2:20-23:** Ga 4:3,9-10; 1Ti 4:3-5; Mt 15:9 * **3:1-3:** Mk 12:36; 16:19; Ep 1:20; Mt 6:33
* **3:5-6:** Lom 6:4-7,11; Ep 4:19; 5:3-6 * **3:8:** Ep 4:25-29; 5:4 * **3:9-10:** Ep 4:22-25

¹⁻³ Wamba yakama ipa meai-angi, yakama nembo-tene wambane koo oko omeakola, yakama saka atapowa atolane oko Kataisa towa atu Gote balanga too pitane ateane. Wuane tekeko, Goteto yakama Kataisa towa malinga ika laya yane. Tene okonena, yakamato yuu okona minditaka eya tupa nembo tatawa ata na-piyapape. Jia. Yakamato ati kenga Kataisa bala Gotena kii tikasa pitiyane yuu epene okonena minditaka eya tupa nembo tatawa atoto, utupane miaima laka lo nembo tatawa atalapape.*

⁴ Kataisa bala yakama saka atapowa atolane tene oko ateya. Matili balato balana tii-pene oko towa panakame epolangan, yakama bala towa atu panakame atolopeyai.

⁵⁻⁶ Wandakali minditupa-mane yuu okona mana koo kambua minaima laka lo nembo toto, mana kalato atene tupa minalaini. Utupane-mane mana yalapene tupa wato minu atoto, pamuku piyaini. Dee, yuu okona minditaka kambua minaima laka lo nembo talaini mana okone wandakali utupanena owato gote oko gulalane. Wandakali utupane-mane mana koo utupane wato minu atolai-kola, matili Goteto wandakali utupane towa yataka wato, yole koo mindi maluuya. Tene okonena, yakamato yuu okona mana koo utupane mina-makale nembo talaini mana okone peyo ome lalapape.*

⁷ Wamba Kolosi tane wandakali yakamato piyaini mana koo utupane wato minu atoto, koo piyaini wandakali utupane towa epoko pua ateaini.

⁸ Okone angi, yakamato yamapano koo palu atoto, wandakali yangone tupa towa embowa, yatakawa ateai. Wuane pua atoto, yakamato pii koo kalato atene tupa loto, wandakali waka tupa andayo pii koo tupa lo ateaini. Wamba yakamato wuane pua ateaini tekeko, andipa yakamato mana koo utupane pitaka awua apialapape.*

⁹⁻¹⁰ Goteto yakama bala ateya okonepene gulalapale nembo toto, ole dindi lo mana epene tupa yakama mana langguato, yakama balana yame wandakali wenene gulaya yane. Goteto wuane peakola, yakamato yakamana nembo-tene wambane koo tupapi, mana koo tupapi, utupane apoto, yakama balana yame wandakali wenene guleai okoni. Tene okonena, yakamato owato pii tupa mindi akali lamai-lamai na-piyapape. Jia.*

¹¹ Wenene gulo atalaini wandakali tupa pitaka yame mindiki atalaini. Tene okonena,

nena, wandakali mindi bala Juta yame ateandopi, wandakali yame waka ateandopi, yala-pene umbaini katene ateandopi, nakatene ateandopi, balato pii waka-waka lalane yandopi, bala peango anatope gullenateandopi, bala yole mia napene, mee katapusa piape piyane yandopi, yole piape piyane yandopi, mana utupane pitaka angini mindi jia. Kataisa bala angu angini gulo atoto, Kitisene wandakali pitakana ini anda-pangosa epo atalane. *

¹² Goteto yakama towa epelewa yamapano yo atoto, yakama balana wandakali epene wete gulalapale lata yane. Tene okonena, yakamato wandakali yangone tupa ondo wato, utupane moyo, utupane towa mana epene tupa minu atalapape. Wandakali mindimane yakamanga koo mindi peando, yakamato wamba ini yataka naene, tambo lo atoto, wandakali yangone tupana pangosa gulo atalapape. *

¹³ Wamba yakamato mana koo tupa minu ataei-kola, Akali Andane okomane koo yakamanga yane tupa apia-geane. Wuane pua teke, yakamana mindimane loto, wandakali mindimane nambanga mana koo mindi minapia leando, balato kenda-pene okone awua atoto, wandakali okonena mana koo okone apia-maipe-pene. *

¹⁴ Wandakali yangone towa epelewa yamapano yo atene mana okomane mana epene utupane pitaka mo epene wete gulaya wato, mina mindiki lalane. Tene okonena, yakamato wandakali yangone tupa towa epelewa yamapano yo atene mana okone mana epene waka tupa pitaka towa mo tako pua minalapape. *

¹⁵ Gote wayu pele lalapape. Yakama mini epene paluto, yame mindiki gulalapale loto, Goteto yakama ee lo meane. Tene okonena, yakamana mini epene mo pale laya alane Kataisato yakamana yamapano oko ando ateakale lalapape. *

¹⁶ Dee, Oli Sipitisa okomane yakamana nembo-tene oko mina ika leya-kola, yakamato Gote ando wayu pele loyale sojo lalaini tupapi, buku Sama okona yene sojo lalaini tupapi, lotu loyale sojo waka lalaini tupapi, utupane pitaka lalapape. Yakamato sojo utupane pitaka loto, Gotena pii mana oko kuai lo lamawuato, wua piyapape lo mindi akali mana lamaiki puato, Kataisana pii oko yakamana nembo-tene okona tumbi leakale lo ando kondalapape. *

¹⁷ Dee, yakamato Akali Andane Jisasana mana wato minuto, pii lolai tupapi, piape pulai tupapi, utupane pitaka pua atalapape. Wuane pua atoto, yakamato balana gene oko loto, Ayiane Gote oko ando wayu pele lalapape. *

Kitisene Wandakali Yakamato Wua Piyapape Leane Oko

¹⁸ Wanda yame yakamato yakamana akalini tupana pangosa pituto, utupanemanne pii lolai tupa ale amawua pitiyapape. Yakamato wuane pua peateaindo, Akali Andane okona wenonga yakamana mana okone tika-pene yolopeya. *

¹⁹ Akali yame yakama yakamana wetene tupana yamapano minu koya napene, utupane towa epelewa yamapano yo atalapape. *

²⁰ Andopane yame yakamato Akali Andane oko nembo toto, yakamana angini, ayiane-la, okonelapo-mane pii lolapi tupa pitaka ale amawua atalapape. Akali Andane okomane mana okone epele alane. *

²¹ Ayiane yame yakamato yakamana andopane tupana yamapano koo palu atalaini. Yakamato utupane mo yataka aya nalalapape. *

²²⁻²⁴ Akali Andane okomane minditaka mindi paluni gulo matili yakama piape wandakali tupa gukale leane oko yakamana yole gulo molopeyama lo yakamato nembo teyai okoni. Tene okonena, yakamato mee yuu okona akali mindina piape peyama nembo na-talapape. Jia. Yakamato Akali Andane okona piape peyama nembo toto, piape tailo pua atalapape. Dee, piape ando atalane akali okone bala epele yakale loto, balato yakama andatawa atokola angu piape tailo pua ata na-piyapape. Jia. Bala at napula-angipi, piape tailo teke pua atalapape. Yakamato Akali Andane oko yuku amawuato, yuu okona piape ando atalane akali okona pii lola tupa ale amawua atalapape. *

²⁵ Anu peakale nambato wuane leyope. Goteto wandakali gene yenepi, nayenepi, okonetaka nembo toto, yapa lo tale napiyane okonena, wandakali gene yenepi, nayenepi, mana koo minulaini tupa Goteto yole koo mindi malupeya. *

4

¹ Yuu okona piape ando atalaini akali yame yakamato yakamana piape ando atalane Akali Andane oko bala ati kenga ateya nembo talapape. Wuane nembo toto,

* **3:11:** Ga 3:26-28 * **3:12:** 1Pi 2:9 * **3:13:** Ep 4:2-3,32 * **3:14:** Lom 13:8-10 * **3:15:** Pl 4:7; 1Ko 12:27; Ep 4:4-6 * **3:16:** Ep 5:19 * **3:17:** 1Ko 10:31-33; Ep 5:20 * **3:18:** Ep 5:22-23 * **3:19:** Ep 5:25-27 * **3:20:** Ep 6:1-3
* **3:21:** Ep 6:4 * **3:22-24:** Ep 6:5-8 * **3:25:** Lom 2:9-11 * **4:1:** Ep 6:9

yakamato mana tika-pene tupa wato minuto, yakamana piape akali tupa minditaka maipe-pene tupa pitaka maiyapape. *

²⁻⁴ Wamba nambato Kataisana pii too pitane ateane oko wandakali tupa lamawua atewa-kola, akali minditupa-mane namba andi leai. Andipapi nambato Kataisana pii okone lamawua atape-pene guleya. Tene okonena, nanimato balana pii okone lamai-yapale loto, Goteto nanimana asini mindi lumbu tepa yakale lo, yakamato nanima moyo pote lalapape. Wuane puato, ole dindi lo yakama tane tika ando atoto, Gote ando wayu pele loto, pote lalapape. *

⁵⁻⁶ Yakama aitene wandakali tupana tombenenga atolai-angi, yakama wai ene atoto, utupane towa atu epoko pua atalapape. Atu epoko pua atoto, wandakali utupane-mane pii minditupa yakama tipa pulupeyai nembo toto, yakamato utupanena tipa pulaini utupane anu pua yano peyamakale yape lo wamba ini wayumane nembo talapape. Wuane puato, yakamato utupanena tipa pulaini tupa yano peyoto, pii epene tende-pene minditupa utupane lamai-yapape. *

Polo Polo Tikikasa Epeakale Leyo Leane Oko

⁷⁻⁸ Nambato Akali Andane okona piape piyawane. Tikikasa balatopi piape mindiki okone teke kuai lo piyane okonena, bala nambana yamapane yene amene wete gulo atalane. Bala yakama ateyainga epoto, nanna wua pua ateyai lo yakama langula okomane yakamana yamapane mo epele piya yakale nembo toto, nambato bala yakama ateyainga epeakale leyo. Bala yakama ateyainga epola-angi, Polo bala wua pua ateyai lo pii okonepene tupa pitaka yakama langulu-peya. *

⁹ Onesimasa bala yakama tepa alu epoto, namba wayumane moyo atalane okonena, bala nambana yamapane yene amene wete gulo atalane. Onesimasa bala Tikikasa towa atu yakama ateyainga epeakale leyo. Okonelapo-mane epoto, wali mangene peya tupa pitaka yakama langulu-peyapi. *

Pii Lo Koyo Pua Leane Tupa

¹⁰ Namba towa katapusa atepale akali Atitakusa-la, Banapasana aini Maki-la, okonelapo-mane yakama ando kuai lo atalapape leyapi. Maki bala yakama atolainga epeando, wamba nambato yakama langewa pua teke, yakamato bala wayu epeleya lo lamialapape. *

¹¹ Akali Jisasa gene mindi Jasatasa lene okomane yakama kuai lo atalapape leya. Juta yame okona Kitisene akali tepo utupane-mane angu namba towa atu atoto, Goteto wandakali tupa ando atekale loto, balana piape oko puato, nambana yamapane minu tai laya alaini.

¹²⁻¹³ Akali Ipapotasa bala yakama tepa alu epoto, namba towa atu ateyapa. Ipapotasa balato Leyotosia tanepi, Etapolisa tanepi, Kolosi tanepi, yakama pitaka Kitisene tai atalapale lo pote lalane. Dee, Goteto yakama wua pipiai lakaes lo nembo talya lo yakamato wayumane nembo talapale loto, balato ole dindi lo pote tailo lalane teke. Bala Jisasa Kataisana piape akali atoto, yakama kuai lo atalapape leya. *

¹⁴ Nanimana yamapane yene akali Dimasa-la, dokosa Luku-la, okonelapo-mane yakama kuai lo atalapape leyapi.

¹⁵ Yakamato Leyotosia tane Kitisene wandakali ateyai tupapi, wanda Nipapi, wandakali balana andaka amunguli pua lotu lalaini tupapi, utupane pitaka ando Poloto yakama kuai lo atalapape leya lo lamai-yapape.

¹⁶ Wandakali mindimane pepa yakamana nalipato peyo epe leyapa oko dii lo langula-kola, yakamato pii okone alewa koyi piyu, Leyotosia tane sosa okomane pepa okone dii lo andeakale loto, pee lalapape. Dee, Leyotosia tane tupana pepa waka mindi nalipato peyo pee leyapa oko yakamatopi dii lo andalapape.

¹⁷ Dee, yakamato akali Akipasa lamawato, piape mindi Akali Andane okomane nimba gea tupa pitaka nimbato pikoyo pukale nembo toto, kuai lo pua atape leya lo lamai-yapape. *

¹⁸ Yakama kuai lo atalapape loto, pii leyo okone namba tanena kii-mane pepa peyoto epe leyo. Namba Polo katapusa mee ateyo yakamato embesa olaini. Goteto yakama ondowa moyo atekale lo nambato pote leyo. *

* **4:2-4:** Ep 6:18-20; Pl 4:6; Lom 15:30-32 * **4:5-6:** Ep 4:29; 5:15-17; 1Pi 3:15 * **4:7-8:** Ep 6:21-22 * **4:9:** Pm 8:14
 * **4:10:** Ap 12:12; 15:37-39; 13:13 * **4:12-13:** Kol 1:6-7; 2Ti 4:9-12; Pm 23-24 * **4:17:** Pm 2 * **4:18:** 1Ko 16:21

1 TESALONAIIKA

Poloto Tesalonaika Tane Tupana Pepa Bulupane Peyo Pee Leane Oko

¹ Tesalonaika tane wandakali yakama nanimana Ayiane Gote-la, Akali Andane Jisasa Kataisa-la, okonelapo yakama towa atu atoto, yakama Gotena sosa ateyai-kola, Sailasapi, Timotipi, namba Polopi, nanimato yakamana pepa oko peyo epe leyama. Goteto yakama ondo wato, yakamana yamapane mo tambo laya yakale lo pote leyama.*

*Yakamato Bilipi Loto, Mana Epene Tupa
Wato Mineaini Leane Oko*

²⁻³ Yakamato Gote lo bilipi loto, balana piape tupa pua atalaini. Yakamato wandakali yangone tupa towa epelewa yamapa yo atoto, utupane moyo atalaini. Dee, nanimana Akali Andane Jisasa Kataisa bala dee lapone epolopeya lo yakamato bilipi leyama nayu loto, maliyo atalaini. Ole dindi lo nanimato yakama pitakana mana epene utupane nembo tolo-peke loto, nanimana Ayiane Gote lo pote loto, bala ando wayu pele lalamane.*

⁴⁻⁵ Wamba nanimato Gotena pii layene epene oko yakama langema-kola, Oli Sipitisa okomane pii okone minu tai laya ya-kola, yakamato pii okone angini wete mindi ya lo nembo teai okoni. Amene imalini yame, Goteto yakama towa epelewa yamapa yo atalane. Yakamato balana pii layene epene okone ale wato, bilipi leyai oko andoto, Goteto yakama balana yame atalapale lata yane ya lo nanimato andeyama. Wamba nanimana yakama towa atu atema-angi, yakama kuai lo atalapale loto, nanimato mana epene tupa minema oko yakamato andeai okoni.*

⁶ Andoto, yakamato nanimana mana utupanepi, Akali Andane okona mana tupapi, mana epene utupane wato minu ateaikola, wandakali minditupa-mane kenda-pene kambua yakama geai okoni. Geai-kola, yakamato tandaka kambua no ateaini tekeko, Oli Sipitisa okomane yakama mo epele wete piya ya-kola, yakamato Gotena pii okone epelewa alewa ateaikola.*

⁷ Yakamato mana epene utupane wato minu ateaikola, Gote lo bilipi lene wandakali Masetonia-la, Akaya-la, potopinjia okone-lapona atalaini tupa pitaka-mane yakamana mana epene utupane wato mina-makale nembo teaini.

⁸⁻¹⁰ Matili Goteto nanimana towa yataka olane nembo toto, Jisasa bala nanimana moyoyale omeaipia. Omea-kola, Goteto bala malinga ika laya yane okonena, yakamato Gote enene saka atene okona piape tupa pimakale nembo teai okoni. Wuane nembo toto, yakamato owato gote tupa masia mawuato, balana iwanane oko ati kenga ato epolopeya lo maliyo ateaikola. Maliyo atoto, yakamato Akali Andane okona pii layene epene oko Masetonia-la, Akaya-la, potopinjia okone-lapona lamawua ateaikola, wandakali-mane pii okone ale wato, yakamato Gote lo bilipi leyai lo pii temane okone yuu pitakana lo tawe yai. Tene okonena, nanimato pii temane okone wandakali utupane dee lapone teke lamaulane tene mindi napaleya.

2

*Pii Langema Okone Gotena Pii Enene
Leane Oko*

¹ Amene imalini yame, nanimana yakama ateainga epoto, piape pema okone mee pua apo katapusia piape mindi naapeaini ya lo yakama tane nembo teyai okoni.

² Wamba nanimana Pilipai tano okona piape pua atema-angi, akali minditupa-mane nanimana andayo pii koo loto, kendapene kambua nanimana geaini oko yakamato nembo teyai okoni. Utupane-mane wuane peaini tekeko, nanimana Gote okomane nanimana minu tai laya ya-kola, nanimana yuku naene atoto, aiya wete wato, Gotena pii layene epene oko yakama langu atema.*

³ Nanimato pii mindi yakama languato, mini koo palu atoto, yakama minakasa oyale, owato pii mindi yakama langi naipyamane. Jia.

⁴ Nanimato piape piyamane okone wandakali mindimane epele yakale loto, naipyamane. Jia. Goteto nanimana yamapane oko epenepe, koope andoyale yapa lo tale puato, nanimato katulo balana pii layene epene oko wandakali tupa lamawua atalapape lea-kola, nanimato bala epele yakale loto, balana pii layene epene oko wandakali tupa lamai-yamane.*

⁵ Wamba nanimato Gotena pii oko yakama langema-angi, yakama epele wato, minditaka mindi nanimana giyapale loto, nanimato gitisa pii mindi yakama langi naapeaini ya lo yakamato nembo teyai okoni. Nanimato yakamana minditaka mindi miama laka lo nembo toto, owato pii mindi yakama langi naapema oko Goteto andeaya.

⁶⁻⁷ Enene, nanimana Kataisana aposolo akali tupa atoto, akali gene yene ateyama

* **1:1:** Ap 17:1-9 * **1:2-3:** 1Ko 13:13; Kol 1:3-7 * **1:4-5:** 1Ko 2:4-5 * **1:6:** Ap 17:5-9 * **2:2:** Ap 16:19-24; 17:1-9

* **2:4:** Ga 1:9-10

laima-yale, okone katu lapia-yale tekeko, yakamatopi, wandakali waka tupamanepi, nanimana gene tupa laiyu lapia lakae lo nembo natema. Jia. Nanimana yakama towa atu atoto, tambo-tambo lo atoto, wanda mindimane balana andopane tupa kuai lo ando pitiyane pua teke, nanimatopi yakama kuai lo ando atema.

⁸⁻⁹ Amene imalini yame, nanimato kenda-pene mindi yakama gii napimakale nembo toto, utulu otongapi, nanimana tane-mane ayawa tandaka no piape puato, tomo kambo no atema. Wuane pua atoto, nanimato Gotena pii layene epene oko yakama langema oko yakamoto nembo tatawa ateyai okoni. Yakama nanimana yamapane yene wandakali ateai-kola, nanimato yakama towa epele wete wato, yakama moyoyale nanimana omemando, okone katu loto, Gotena pii layene epene oko yakama langu atema.*

¹⁰ Nanimato yakama Gote lo bilipi lene wandakali tupa towa mana koo mindi mina napene, mana epene tika-pene tupa angu minu atema oko Gotetopi, yakamatopi, andeai okoni.

¹¹⁻¹² Yakama Gotena yuu epene tii-pene okona atalapale loto, balato yakama ee lo meane. Wuaneko, yakamoto balana mana epene tupa wato minu atalapale nembo toto, ayiane-mane balana andopane tupa mana lamaiyane pua teke, nanimato yakama mindiki-mindiki lo mana langema okoni. Nanimato yakamana nembo-tene mina ika loto, yakama mo tai laya wato, wua pua atalapape lo mana langema oko yakamoto nembo teyai okoni.*

¹³ Nanimato Gotena pii layene epene oko yakama langema-kola, yakamoto pii okone ale wato, mee wandakalina pii mindi ya lo nembo natene, Gotena pii enene ya lo bilipi leai okoni. Yakamoto Gotena pii oko bilipi leyai-kola, pii okonemanekama minu tai laya alane okonena, nanimato Gote ando wayu pele lalamane.*

¹⁴ Amene imalini yame, wamba Jutiya tane wandakali minditupa Jisasa Kataisa towa atu atoto, Gotena sosa guleai-kola, Juta yame wandakali waka minditupa-mane kenda-pene kambua Juta yame Kitisene utupane maiyai. Andipa wuaneko pua teke, Tesalonaika tane wandakali yakamana minditupa Kitisene guleai-kola, yakama tanena yame akali minditupa-mane kenda-pene kambua yakama geai okoni. Geai-kola, wamba Jutiya tane Kitisene utupane-mane tandaka no ateaini pua teke, Tesalonaika tane Kitisene wandakali yakamatopi tandaka no ateai okoni.*

¹⁵⁻¹⁶ Wamba Juta yame-mane potopesa akali tupa peyo ome lalu, Akali Andane Jisasapi peyo ome leai. Wuane piyu, matili utupane-mane nanimana pulupa lo peyo wateainipia. Andipa Goteto wandakali yame waka tupa molo-peke leakale nembo toto, nanimato Gotena pii layene epene oko wandakali utupane lamawua ateyamakola, Juta yame-mane nanimato pii okone lamaulaini, jia loto, nanimana peyo wata alaini. Juta yame wandakali utupane-mane Gotena wandakali pitaka yanda pimawua ateyai-kola, Goteto utupane towa epele aa napiyane. Ole dindi lo Juta yame wandakali utupanena mana koo okone andane wete yama-yama epeya-kola, andipa Gotena yataka ene oko wandakali utupanenga epo eya.*

Nanimato Yakama Andaima Lakae Lo Nembo Tatawa Atema Leane Oko

¹⁷⁻²⁰ Wamba nanimato piape kuai lo pema-kola, Tesalonaika tane wandakali yakama Kitisene guleai oko andoto, nanimato piape kuai lo pema ya lo, epele eyama. Matili nanimana Akali Andane Jisasa lapone epola-angi, yakama nanimana towa atu balana wenonga atolo-peyama. Okone angi, nanimato epelewa bala lamawuato, nanimato piape kuai lo pema-kola, Tesalonaika tane wandakali utupane Kitisene guleaini oko nimbato anda, lolopeyama. Amene imalini yame, wamba nanimana yakama towa atu atema-angi, Juta yame-mane nanimana pulupa lo peyo wateai-kola, nanimato yakama tepa alu epema okoni. Oto ukupini minditupa nanimato yakama anda napene atema tekeko, nanimato yakama andaima lakae lo nembo tatawa atema. Wuane nembo toto, nanimana yakama ateyaina ipumakale nembo tema. Namba Poloto ole mindi yandopi, lapo yandopi, yakama andolo epoyale makande pewane tekeko, Sataneto nanimana minandi leane.

3

Timotito Yakamana Bilipi Oko Mo Tai Laya Yakale Lepa Leane Oko

¹⁻⁴ Wamba nanimana yakama towa atu atema-angi, nanimato yakama languato, matili wandakali minditupa-mane kenda-pene andane tupa nanimana gulupeyai lema okoni. Pii nanimato yakama langema okone matili enene gulea oko yakamoto nembo teyai okoni. Kenda-pene okonepene tupa Kitisene wandakali tupanga epalane lo yakamoto nembo teyai okoni. Wandakali-mane kenda-pene kambua yakama gulai-kola, yakamoto

* 2:8-9: Ap 20:34 * 2:11-12: Ap 20:31 * 2:13: 2Tes 2:13-14 * 2:14: Ap 17:5 * 2:15-16: Ap 9:23,29; 13:45,50;
14:2,5,19

Jisasa masia maulaini nayuto, nanimato yakama andolo ipumakale nembo tema tekeko, okone angi nanima pitaka katulo naepolo-peyama ya lo andema. Nanimana amene Timoti bala nanima towa atu Gotena piape pua atoto, Kataisana pii layene epene oko wandakali tupa lamawua atalane. Tene okonena, balato yakamana bilipi oko mo tai laya wato, yakama moyo atekale loto, Sailasa nalipato bala yakama ateyainga epeakale lalu, nalipa angu Atenesa tano okona atepa. *

⁵ Makande piyane akali Sataneto yakama minu mandeke pula-kola, nanimana piape pema tupa mee katapusa piape pua apolome nembo tema. Wuane nembo toto, yakamoto Gote lo bilipi anu pua leyaipe lo Timoti bala epoto andeakale loto, nambato bala kapoyale yakama ateyainga epeakale lewa.

⁶ Andipa Timoti bala yakama tepa alu, nanima ateyamanga peke loto, yakamoto Kataisa lo bilipi loto, wandakali yangone tupa epelewa yamapane yo ateyai lo nanima langipia. Dee, nanimato yakama andaima lakae lo nembo tatawa atalamane pua teke, yakamatopi ole dindi lo nanima towa epelewa nembo tatawa atoto, nanima andaima lakae lo nembo teyai lo balato nanima langipia teke. *

⁷ Amene imalini yame, wandakali-mane kenda-pene andane tupa nanima gipia-kola, nanima kenda-pene utupane awuato, tandaka no ataima tekeko, yakamoto Akali Andane oko lo bilipi loto, Timotito nanima langipia-kola, pii okonemane nanima mo tai laya apia. *

⁸ Yakamoto Akali Andane oko lo bilipi leyama nayu leyai lapia oko nanimato ale wato, andipa nanima mini epene palu kuai lo ateyama.

⁹ Nanimato yakama kuai lo ateyai nembo toto, Gotena wenonga epele andane wete wato, Gote ando wayu wete pele lo ateyama.

¹⁰⁻¹¹ Yakamoto Gotena pii minditupa bilipi leyama nayu nalene ateaindo, nanima yakama ateyainga epoto, yakamana bilipi oko mo tai laya amakale nembo teyama. Wuane nembo toto, nanimato yakama andolo ipumakale loto, nanimana Akali Andane Jisasa-la, Ayiane Gote-la, okonelapo-mane nanimana asia mindi yata yakake loto, nanimato utulu otongapi pote lalamane. *

¹²⁻¹³ Matili nanimana Akali Andane oko balana wandakali epene tika-pene tupa pitaka towa atu dee lapone epola-angi,

yakamanga koo tene mindi nayene, epene wete atalapale nembo teyama. Yakamoto wuane pua atalapale nembo toto, nanimato yakama towa epelewa yamapane yo atalamane pua teke, yakamatopi Kitisene wandakali tupapi, wandakali waka tupapi, utupane pitaka towa epelewa yamapane yo atapiak lakae lo nembo teyama. Wuane nembo teyama okonena, yakamoto wandakali yangone tupa towa epelewa yamapane yo atene mana okone Akali Andane okomane yakamanga mo andane gulaya yakale nembo teyama.

4

Yakamoto Mana Epene Tupa Tailo Wato Minu Atalapape Leane Oko

¹⁻² Amene imalini yame, Goteto yakama towa epele yakale loto, wamba Akali Andane Jisasana piape akali nanimato mana minditupa yakama languato, yakamoto wua puato, mana utupane wato minu atalapape lo yakama mana langema okoni. Yakamoto mana utupane wato minu atalaini tekeko, andipa nanimato Akali Andane Jisasana gene oko loto, yakamoto mana epene utupane wayumane wete wato minu atalapape leyama.

³⁻⁵ Gote lo nembo natene aitene wandakali tupamane pamuku pima lakae lo nembo toto, pamuku piyaini pua, Kitisene wandakali yakamoto wuane na-piyapape. Jia. Pamuku piyaini mana okone kembena peyo atalapape. Mana okone kembena peyo, akali-mane wanda kee lalu, wetene, akalini-la, liyambato mana epene tika pene tupa wato minu pitiyapape leyama. Yakamoto wuane pua atapiak lakae lo nembo toto, Goteto pii okone yakama langeya. *

⁶ Akali Andane okomane mana koo wato minalaini wandakali tupa yole koo mindi maiyane lo wamba nanimato yakama langema. Tene okonena, wandapi, akalipi, yakamoto wandakali yangone mindi andakasa wato, wandakali waka mindi balana wetenepi, akalinipi, utupane gitisa loto, mia mai na-piyapape. Jia.

⁷ Anu peakale nambato wuane leyope. Wamba Goteto nanimana ee lo mea-angi, nanimato mana koo guu-pene okonepene tupa wato minu atalapale nembo natea. Jia. Nanimato mana epene tika pene tupa wato minu atalapale loto, Goteto nanimana ee lo meane. *

⁸ Tene okonena, wandakali yakama mindimane pii nanimato yakama langeyama okone tanga leando, yuunga wandakali mindina pii tanga nalolo-peya.

* **3:1-4:** Ap 16:1-3; 17:15; 2Ti 3:12 * **3:6:** Ap 18:5 * **3:7:** 2Tes 1:3-4 * **3:10-11:** 2Tes 2:16 * **4:3-5:** 1Tes 5:23;
1Pi 1:15-16; 1Ko 6:13-14 * **4:7:** 1Pi 1:15-16 * **4:8:** Lk 10:13-16; 2Ko 1:21-22

Jia. Balato Oli Sipitisa giyane Gotena pii oko tanga lola-kola pulupeya. *

9-10 Tesalonaika tane Kitisene wandakali yakamoto Masetonia potopinjia okona Kitisene atalaini tupa pitaka towa epelewa yamapane yo atalaini. Nanimato andeyama-kola, Goteto mana okone yakama gea ya lo andeyama. Okone andoto, yakamoto wandakali yangone tupa towa epelewa yamapane yo atalapale loto, nanimato pii minditupa pepanga peyo epe lolane tene andane mindi naeya. Amene imalini yame, pii okone enene tekeko, yakamoto mindi akali wayumane epele aka pua, yamapane yo atalapale lo, nanimato yakama minu tai laya wato, pii oko pepanga peyo epe leyama. *

11-12 Yakamanga minditaka mindi jia eya-kola, atolaini loto, wamba nanimato yakama langema pua teke, yakama tanena kini-mane piape tailo pua atalapape. Yakamoto wuane pua ateaindo, aitene wandakali tupamane yakamana mana epene okone andoto, yakamoto mana epene minalaini lolopeyai. Utupane-manu wuane leakale nembo toto, yakamoto wandakali waka tupamane aki peyaipe lo mane wako pua andama epoko napene, yakama anda yuunga lo atoto, yakama tanena piape tupa pua atalapape lo nanimato yakama langeyama. *

Yakamoto Mindi Akali Mo Tai Laya Aka Piyapape Leane Oko

13-14 Amene imalini yame, wamba Jisasa bala omea-kola, Goteto bala malinga ika laya yane. Wuane pua teke, Goteto Jisasana tai-lene okomane wandakali omene tupa pitaka malinga ika laya ola-kola, wandakali utupane Jisasa towa atu epolopeyai lo nanimato bilipi leyama. Pii okone bilipi na-lalaini wandakali tupamane wandakali omeyai tupa dee lapone anda napulu-peyama nembo toto, ai andane lo atalaini. Wuane piyaini pua teke, Tesalonaika tane Kitisene wandakali yakamatopi wandakali omeyai tupa matili dee lapone anda napulu-peyama nembo toto, ai andane lolaini. Yakamoto ai andane lolaini loto, nanimato yakama mana languato, Kitisene wandakali omeyai tupa matili malinga ika lolopeyai lo yakama langeyama. *

15-16 Wamba Akali Andane okomane pii mindi leane. Andipa nanimato pii mindiki okone teke yakama langeyama. Akali Andane oko bala dee lapone epola-angi, oma

napene saka atolomane wandakali nanimina wandakali wamba omeaini tupa watapeke lalu, ati kenga ingane ini napolopeyama leyama. Jia. Oto okone angi, Gotena biakulu mindi peyola-kola, balana enjoje akali kawane okomane pii taimane lolopeya. Balato pii okone lola-angi, Akali Andane oko bala tane ati kenga atala epoto, wandakali omene tupa yakama ika lalapa lolopeya. Yakama ika lalapa lola-kola, Kataisa lo bilipi lo atalu omeaini wandakali tupa wamba ini bulupane malinga ika lolopeya. *

17 Wandakali utupane ika lolai-angi, oma napene saka atoloma wandakali nanimina utupane towa mina mindiki lalu, Akali Andane oko malanda amakale loto, mole tu-pamane nanimina pitaka mo awua ati kenga polopeya. Wuane pula-kola, ole dindi lo nanimina Akali Andane oko towa atu atapowata atolo-peyamako.

18 Kitisene wandakali mindi omola-angi, yakamoto pii utupane loto, mindi akali mo tai laya aka piyapape leyama.

5

Nanima Lee Tatawa, Mini Kimbu Piyene Yakale Atamakale Leane Oko

1-2 Amene imalini yame, pake mialane akali mindi bala oko angi epolopeya nembo natene, nanimato limu paleyama-kola, bala utulu epoto, pake mialane. Wuane piyaini pua teke, nanimato Akali Andane oko bala oko angi epolopeya nembo natene atoloma-kola, bala dee lapone epolopeya oko yakama tane wayumane nemboto ateyai okoni. Tene okonena, nanimato yakama languato, Akali Andane oko bala ee ana okona epolopeya, oto okona epolopeya lo, yakamana pepa mindi nanimato peyo epe loto, okonena yakama langulane tene mindi napaleya. *

3 Wanda mindi bala andopane tongo taka putito, ana kambua kuai lo pitiyane tekeko, matili masia peleya-kola, tandaka pene oko balanga kapoyale epalane. Wuane piyane pua teke, wandakali minditupamane loto, andipa nanimina yanda napene, epene kuai lo ateyama lalaini tekeko, okone angi teke kenda-pene andane mindi wandakali utupanenga epalane. Epeya-kola, kenda-pene okone wandakali utupane yakamanga epolane lo asia peyo wanjaluu palaka polane asini mindi nayalane. *

4 Pake mialane akali mindi undupi pango epeya-kola, wandakali-mane andoto, moko lalaini tekeko, amene imalini yame,

* 4:9-10: Jo 13:33-35 * 4:11-12: Ep 4:28 * 4:13-14: Lom 14:7-9; 1Ko 15:3-4,12 * 4:15-16: 1Ko 15:51-53 * 5:1-2:
Mt 24:42-43; 2Pi 3:10; Lap 3:3 * 5:3: Mt 24:39; Lk 21:34-35

yakama undupi-lene okona ata napeyai. Jia. Yakama pitaka otonga waa lene okona wandakali ateyai. Tene okonena Akali Andane oko bala dee lapone epola-angi, yakamato moko nalape-pene.

⁵⁻⁷ Limu paliyaini wandakali tupamane utulu limu paliyaini. Bia ipa kambua noto, sapake lo kewa atalaini wandakali tupamane utulu teke bia ipa tai noto, sapake lo kewa atalaini. Undupi-lene okona atalaini wandakali utupane-mane wuane piyaini tekeko, nanimu undupi-lene okona ata napeyama. Jia. Undupi-lene okona atalaini wandakali tupamane utulu limu paliyaini pua, nanimu limu pali napimakale. Jia. Kitisene wandakali nanimato lee tatawa mini kimbu piyene yakale atamakale.*

⁸ Wuane puato, nanimu otonga waa lene okona wandakali gulo atoto, Satane towa yanda puyale makande pitawa atamakale. Nanimato Gote lo bilipi lene mana okola, wandakali yangone tupa towa epelewa yamapane yo atene mana okola, mana okonelapo nanimana sia umbi gulo awua atamakale. Akali minditupa-mane yanda puyale tangi tai mindi anda piyaini pua, Goteto nanimu moyolo-peya lo maliyo atene mana okone nanimana tangi tai anda pitawa atamakale. Wuane pua atoto, nanimu mini kimbu piyene yakale atamakale.*

⁹ Anu peakale nambato wuane pimakale leyope. Goteto nanimu balana yataka ene oko mialapale loto, nanimu makimi lata nayaepia. Jia. Nanimana Akali Andane Jisasa Kataisato nanimu molo-peke leakale nembo toto, Goteto nanimu makimi lata yaepia.

¹⁰ Balato wuane peane okonena, nanimu saka atemandopi, omemandopi, Jisasato nanimu bala towa atu atalapale nembo toto, nanimu molo-peke loyale omeaipia.*

Yakamato Mindi Akali Mo Tai Laya Aka Pua Atalapape Leane Oko

¹¹ Jisasato wuane peane okonena, yakamato pii epene tupa mindi akali lamai-lamai puato, mindi akali mo tai laya aka pua atalaini pua teke atalapape.

¹² Amene imalini yame, akali minditupamane yakama moyo ando ateakale loto, Akali Andane okomane akali utupane ate leane. Akali utupane-mane Gotena piape puato, yakamato wua piyapape lo mana langua atalaini.

¹³ Akali utupane-mane Gotena piape pua ateyai nembo toto, yakamato akali utupane

towa epelewa yamapane yoto, akali utupanena gene tupa laiyu lalapape. Yakamato wuane puato, pii yanda napene, yamapane mindiki palu atalapape.

¹⁴ Amene imalini yame, nanimato yakama mo tai laya wato, yakama wua pua atalapape leyama. Wandakali minditupamane piape napene, kepawa mee atolai-kola, yakamato utupane mana lamawuato, piape pua atalapape lalapape. Yukuwa atalaini wandakali tupamane yuku olaini lo, yakamato wandakali utupane mo tai layawa atalapape. Tai nalene wandakali atolai tupa moyoto, yakamato kii mawua piape pimai-yapape. Yakamato wandakali yangone mindi towa kepa naene, wandakali pitaka towa tambo lo atalapape.*

¹⁵ Wandakali mindimane yakamanga mana koo mindi mineando, yakamato paini yano peyo balanga mana koo mindi mina na-piyapape. Yakamato wuane napene, ole dindi lo Kitisene wandakali tupapi, wandakali waka tupapi, utupane pitaka towa mana epene tupa minu atalapape.*

¹⁶ Wuane pua atoto, ole dindi lo yakama epelewa atalapape.*

¹⁷ Ole dindi lo pote lalapape.

¹⁸ Yakama kuai lo ateaindopi, kendapene awua ateaindopi, yakamato Gote ando wayu pele lalapape. Yakamato Jisasa Kataisa lo bilipi loto, mana epene utupane wato minalapape. Gote tane yakamato wuane piyapale nembo teyakola, yakamato wuane piyapape leyo.*

¹⁹ Yakamato piape epene mindi piyapale loto, Oli Sipitisa okomane yakama mina ika lola-kola, yakamato balana piape okone jia na-lalapape.*

²⁰ Akali mindimane Gotena pii layene oko yakama langula-kola, yakamato pii okone koo ya loto, masia mai na-piyapape.

²¹⁻²² Yakamato pii manapi, utupane pitaka yapa lo tale puato, pii koopi, mana koopi, utupane pitaka masia mawua atoto, pii epenepi, mana epenepi, utupane duli lo minatawa atalapape.*

²³ Nanimana yamapane mo epene paliya alane Gote okomane yakamana tandinipi, nembo-tenepi, umbainipi, utupane pitaka mo epene wete gulaya yakale loto, nanimato pote leyama. Goteto wuane pula-kola, nanimana Akali Andane Jisasa Kataisa bala dee lapone epola-angi, Gotena wenonga yakamanga koo tene mindi yaa napene atalapale loto, nanimato pote leyama.*

²⁴ Yakama ee lo meane Gote okomane mangene mindi pukale lalu, enene piyane.

* **5:5-7:** Lom 13:11-12 * **5:8:** Ais 59:17; Ep 6:14-15,17

* **5:15:** Lom 12:17-18; 1Pi 3:8-12 * **5:16:** Pl 4:4 * **5:18:** Ep 5:20 * **5:19:** Ep 4:30 * **5:21-22:** 1Jo 4:1-3 * **5:23:** 2Tes 3:3

* **5:10:** Lom 14:7-9; 1Tes 4:13-14 * **5:14:** 2Tes 3:6-11

* **5:21-22:** 1Jo 4:1-3 * **5:23:** 2Tes 3:6-11

Tene okonena, balato minditaka pukale
leane tupa katulo pulupeya.

²⁵ Amene imalini yame, Goteto nanimapi
moyakalenga, yakamato Gote lo pote lala-
pape. *

²⁶ Yakamato Kitisene mana tupa wato
minuto, Kitisene yangone tupa pitaka towa
epelewa sikane lalapape.

²⁷ Nambato Akali Andane okona gene oko
loto, yakama pii langeyo nayu loto, Kitisene
wandakali pitaka-mane pii pepanga peleyo
utupa ale yakalenga, yakamato pepa oko dii
loto, lamai-yapape leyo.

²⁸ Nanimana Akali Andane Jisasa
Kataisato yakama ondowa moyo atekale
lo pote leyo.

2 TESALONAIIKA

Poloto Tesalonaika Tane Tupana Pepa Lapone Peyo Pee Leane Oko

¹ Tesalonaika tane wandakali yakamato nanimana Ayiane Gote-la, Akali Andane Jisasa Kataisa-la, okonelapo towa atu atoto, yakama Gotena sosa ateyai-kola, Timotipi, Sailsapi, namba Polopi, nanimato yakamana pepa oko peyo epe leyama.

² Ayiane Gote-la, Akali Andane Jisasa Kataisa-la, okonelapo-mane yakama ondowa moyoto, yakamana mini epene mo pale laya yakale lo pote leyama.*

Yakama Kenda-pene Auwa Atoto, Kitisene Tai Gulo Atalaini Leane Oko

³⁻⁴ Amene imalini yame, ole kambuangga wandakali minditupa-mane kenda-pene andane tupa yakama giki peyai-kola, yakamato kenda-pene kambuangga awua atalaini. Kenda-pene auwa atoto teke, Gote lo bilipi lene mana okola, wandakali yangone towa epelewa yampa yoo atene mana okola, mana okonelapo yakamanga andane gulama lama peya. Tene okonena, ole dindi lo nanimato Gote ando wayu pele lape-pene. Nanimato wuane pemando, mana okone epene gulolo-peya. Nanimato yakamana gene tupa laiyu loto, Tesalonaika tane Kitisene tupamanne mana epene utupane wato minu ateyai lo Gotena sosa tupana wandakali ateyai tupa lamaiyamane.*

⁵⁻⁷ Yakama Gotena yuu epene okona makale nembo toto, balana piape tupa pua atoto, kenda-pene awuato, tandaka no atalaini. Yakamana mana epene okonemane yakama katulo balana yuu epene okona polopeyai lo andawa leya. Matili Akali Andane Jisasa balana enjoile tai-lene tupa towa atu ati kenga yuu oko tepa alu, panakame epolopeya. Bala epola-angi, balato mana epene tika-pene mindi wato minuto, wandakali andipa nanimata towa atu kenda-pene awua ateyama tupa oto mo atalapa lolopeya. Wuane lalu, yakamanga kenda-pene giyaini wandakali tupanga balato kenda-pene andane mindi malupeya. Wuane pula okomane Goteto wandakali tupa kuai lo yapa lo tale piyane lo andawa lolopeya.*

⁸⁻¹⁰ Wamba nanimato Gotena pii layene epene oko yakama langema-kola, yakamato pii okone bilipi leai okoni. Matili yakamapi, Kitisene wandakali waka

tupapi, Akali Andane oko lo bilipi lene wandakali pitaka-mane bala tama peakale nembo toto, bala dee lapone epolopeya. Bala epola-angi, wandakali minditupa-mane Gote ateya nembo natene atoto, nanimana Akali Andane Jisasa pii layene epene oko wato mina napene atolopeyai. Wuane pua atolai-kola, Jisasa bala ita lungu towa atu epoto, wandakali pitaka yapa lo tale puato, bilipi nalene wandakali utupane yole koo mindi malupeya. Maula-kola, wandakali utupane balana wenonga peyo watene atoto, balana tai-lene okopi, tiipene okopi, utupane anda napene atoto, koo wete atapowa atolopeyai.*

¹¹⁻¹² Tene okonena, ole dindi lo nanimato yakama nembo toto, Gote lo pote loto, nanimana Akali Andane Jisasa Kataisa-la, Ayiane Gote okola, okonelapo-mane yakama ondo wato, moyo ando atolapi-kola, yakamato Akali Andane Jisasa gene oko laiyu lalapale loto, nanimato pote lalamane. Balatopi yakamana gene tupa laiyu leakale lo pote lalamane teke. Yakamato bala lo bilipi loto, balana piape epene tupa pitaka piyapale loto, balato yakama minu tai laya yakale lo nanimato pote lalamane. Yakama ee lo meane Gote okomane mana yakamato minulaini utupane pitaka kuai lo mineyai leakale lo nanimato pote lalamane.*

2

Mindimane Yakama Minakasa Olane, Waiwa Ando Atalapape Leane Oko

¹⁻² Amene imalini yame, wandakali minditupa-mane yakama languato, Akali Andane dee lapone epolane oto oko wamba ipupia lo yakama langipia oko nanimato ale aimai. Akali utupanemanne yakama languato, Oli Sipitisa okomane nanima langipia-kola, nanimato yakama langeyama leaindo, yakama moko loto, mini kenda aa napipe-pene. Dee, utupane-mane yakama languato, Goteto nanima langipia-kola, nanimato yakama langeyama leaindopi, Poloto pepa mindi peyo epe lapia-kola, nanimato yakama langeyama leaindopi, yakamato pii okonepene mindi ale wato, moko loto, mini kenda aa napipe-pene teke. Matili nanimana Akali Andane Jisasa Kataisa bala dee lapone epola-angi, nanima pitaka bala towa amunguli pulu-peyama. Yakamato nanimana pii okone wayumane ale wato, duli lo minatawa atalapape.

³ Wandakali mindimane pii waka mindi-pene tupa loto, yakama minakasa olane. Waiwa ando atalapape. Akali Andane

* **1:2:** Lom 1:7 * **1:3-4:** 2Ko 7:4; 1Tes 2:17-20 * **1:5-7:** Lom 12:19; 1Tes 3:12-13 * **1:8-10:** Ais 2:10; 66:15; Kol 3:4

* **1:11-12:** Kol 1:9-11; 1Tes 1:2-3

oko dee lapone epolane oto oko wamba ini naepola-kola teke, wandakali kambuamane Gote masia malupeyai. Dee, Akali Andane oko bala ini naepola-kola teke, Gotena pii tanga lalane akali okone bala yuu koo okona moyale panakame atolopeya. *

⁴ Wandakali-mane minditaka mindi yatawu atoto, okone yakama gote gulo lotu lo atolai-kola, Gotena pii tanga lalane akali okomane owato gote utupane pitaka sia minuto, bala lipinga yale ateyo loto, bala tanena gene oko laiyu lolopeya. Bala gote ateyo lo andawa loyale, Gotena lotu anda okona pitulu-peya. Minditaka utupane pitaka wamba ini piyiake lola-kola, Akali Andane oko bala matili epolopeya. *

⁵ Wamba namba yakama towa atu atemangi, nambato pii minditupa yakama langewa okoni. Yakamoto pii utupane embesa eyaipe.

⁶⁻⁷ Gotena pii tanga lalane akali oko bala matili panakame epeakale lo ando konda wakale nembo toto, Goteto oto mindi yata yane tekeko, bala wamba ini panakame na-epeakale loto, Goteto balana asini pai leya oko yakamoto andeyai okoni. Andipa Gotena pii tanga lalane akali okonemane mana koo tupa tenga-mane too pua minu atalane tekeko, bala panakame epolane oto okone epola-angi, Goteto bala panakame epeakale lo ando kondolo-peya.

⁸⁻¹⁰ Goteto wandakali tupa molo-peke lapia lakaie lo nembo toto, utupane-mane balana pii enene oko epelewa ale ape-pene tekeko, wandakali minditupa-mane Gotena pii enene oko epelewa ale na-alaini mambele utupane koyolo-peyai. Sataneto Gotena pii tanga lalane akali oko minu tai laya ola-kola, bala panakame epoto, owato pii kambua wandakali utupane lamawuato, owato metekolo piape andane mindipene-mindipene tupa pulupuya. Wuane puato, balato wandakali utupane minakasa ola-kola, wandakali utupane yuu koo okona moyale atolopeyai. Gotena pii tanga lalane akali okomane mana koo utupane pitaka minu atola-kola, matili Akali Andane oko balana tai-lene andane oko towa atu panakame epoto, balana pii popone okomane Gotena pii tanga lalane akali okone wete minu koyoto, peyo ome lolopeya. *

¹¹⁻¹² Wandakali utupane-mane Gotena pii oko enene ya lo bilipi nalene atoto, mana koo tupa epelewa minu ateyai-kola, Goteto wandakali utupane yapa lo tale piyane. Goteto yole koo mindi utupane mauwakale nembo toto, wandakali utupane-mane Satanena owato pii oko enene ya lo bilipi

leakale nayuto, balato wandakali utupane nembo-tene oko mo kee aya alane.

¹³⁻¹⁴ Amene imalini yame, Goteto wuane piyane tekeko, Akali Andane okomane yakama towa epelewa yamapane yo atalane. Wamba Goteto yuu oko yakale lea-angi, balato yakama molo-peke loyale, yakama balana wandakali atalapale lata yaepia. Goteto wuane peane okonena, yakamoto nanimana Akali Andane Jisasa Kataisana tii-pene oko mialapale loto, nanimato Gotena pii layene epene oko yakama langema okonemane yakama ee lo mea okoni. Ee lo mea-kola, andipa yakamoto Gotena pii enene oko bilipi lo ateyai-kola, balana Oli Sipitisa okomane yakama mo kuai laya alane. Tene okonena, nanimato yakama nembo toto, ole dindi lo Gote ando wayu pele lape-pene. *

¹⁵ Amene imalini yame, yakamoto nambana pii utupane pitaka nembo toto, Kitisene tai atoto, pii-mane mana langema tupapi, pepa peyo epe loto, mana langema tupapi, mana utupane pitaka wato minu atalapape.

¹⁶ Nanimana Akali Andane Jisasa Kataisala, nanimana Ayiane Gote-la, okonelapomane nanima towa epelewa yamapane yoto, nanima ondowa moyo atalapele. Tene okonena, nanima mini epene palu atoto, matili Goteto nanimma wayumane moyolopeya nembo talamane.

¹⁷ Goteto yakamapi moyola-kola, yakamoto mana epene tupa pitaka wato minu atoto, pii epene tupa angu lo atolopeyai. Yakamoto wuane pua atalapale loto, Goteto yakamana nembo-tene epene tupa mo pale loto, yakama mo tai laya yakale loto, nanimato pote leyama.

3

Yakamoto Gote Lo Pote Lalapape Leane Oko

¹ Amene imalini yame, Akali Andane okona pii layene epene oko yakamanga kapoyale lo tawe eya-kola, yakamoto balana gene oko laiyu lo atalaini. Wuane pua teke, andipa balana pii layene epene okone wandakali yame waka tupanga kapoyale lo tawe yola-kola, utupane-mane balana gene oko laiyu lo ateakalenga, yakamoto Gote lo pote lalapape. Anu peakale nambato wuane leyope.

² Wandakali minditupa-mane Akali Andane oko lo bilipi nalene ateyai. Wandakali koo pua ateyai utupane-mane nanimma minu koyolaini. Goteto nanimma moyakale lo yakamoto pote lo atalapape.

* **2:3:** 1Ti 4:1-2; 1Jo 2:18; 4:1-3

* **2:4:** Dan 11:36; Ese 28:2

* **2:8-10:** Ais 11:4; Lap 13:11-13; 19:15

* **2:13-14:**

³ Akali Andane okomane mangene mindi pukale leando, balato okone enene piyane. Balato yakama mo tai laya wato, moyo ando atola-kola, akali koo Sataneto katulo yakama minu koya napulu-peya.

⁴ Tene okonena, Akali Andane okomane nanimana nembo-tene oko mina ika lapiakola, yakamato wua pua atalapape lo nanimato yakama mana langema tupa yakamato andipapi, matilipi, wato minu teke atolopeyai nembo teyama. *

⁵ Dee, Kataisato kenda-pene awua atoto, tai gulo ateane mana okola, Goteto wandakali towa epelewa yamapa yo atalanane mana okola, mana okonelapo yakamato wayumane nembo talapale loto, Akali Andane okomane yakama andawa leakale lo pote leyama.

*Wandakali Pitaka-mane Piape Puato,
Tomo Nape-pene Leane Oko*

⁶⁻¹⁰ Amene imalini yame, wamba nanimana yakama towa atu atema-angi, nanimato yakama languato, wandakali mindi bala piape napene, kepawa mee ateando, bala tomo nanene, mee atape-pene lema okoni. Okone angi, nanimana piape napene, mee kepawa ata napema. Jia. Wandakali mindimane tomo nolane mindi nanimaga gii napeai-kola, nanimato yakamanga kenda-pene mindi gii napimakale loto, tomo gii nalema. Jia. Utulu otongapi nanimato piape ayiawa puato, tomo nolane tupa kambo no atema. Nanimato Gotena pii layene epene oko yakama langeyai nembo toto, yakamato tomo nolane tupa nanimaa mee geai-yale, mana okone katu lea-yale tekeko, yakamato nanimana mana okone mialapale loto, nanimana tane-mane piape ayiawa puato, tomo kambo no atema. Yakamato mana epene nanimato minema utupane wato minu atape-pene okone yakama tane-mane nembo teyai okoni. Wandakali mindimane mana epene nanimato yakama langema utupane wato mina napene, kepawa wato, piape napeando, yakamato wandakali okone towa atu ata na-piyapape. Nanimato Akali Andane Jisasa Kataisana gene oko loto, pii utupane yakama langeyama nayu leyama. *

¹¹ Tene anu peakale nanimato wuane leyamape. Nanimato ale eyama-kola, yakama minditupa-mane piape mindikipi mindi napene, kepawa mee atalaini. Utupane-mane kepawa atoto, wandakali waka tupamane aki peyaipe lo mane wako pua andama epoko pua ateyai lene oko ale wato, nanimato wuane leyama. *

¹² Wandakali waka tupamane aki peyaipe lo mane wako pua andama epoko pua ata napene, wandakali utupane-mane yakama tanena tomo tupa namakale nembo toto, piape pua atape-pene. Nanimato Akali Andane Jisasa Kataisana gene oko loto, pii okone akali utupane lamaiyama nayu leyama. *

Pii Lokoyo Pua Leane Tupa

¹³ Amene imalini yame, yakamato kepa naene, mana epene tupa minu teke atalapape. *

¹⁴ Wandakali mindimane pii nanimato pepanga peyo epe leyama tupa tanga loto, wato mina napeando, bala yala yakalenga, bala yakama towa atu ata na-piyapape.

¹⁵ Wuane tekoko, bala yakama towa yanda-pene akali mindi ateya nembo natlapape. Jia. Balato mana koo okone konda yakale nembo toto, yakamato bala Kitise ne amene mindi ateya nayuto, bala mana lamai-yapape. *

¹⁶ Yakamato mana epene utupane pitaka minu atolai-kola, yamapanne mo tambo laya alane Akali Andane okomane ole dindi lo yakamana yamapanne mo tambo laya yakale nembo toto, nanimato Akali Andane oko bala yakama pitaka towa atu atekale lo pote leyama.

¹⁷ Namba Poloto pepa oko pelea ya lo wandakali-mane andekale nembo toto, nambato pepa peyalawane tupa pitakana namba tanena kini-mane yakama kuai lo atalapape lo peyalawane. Wuane pua teke, andipa namba tanena kini-mane yakamato kuai lo atalapape lo pepa peleyo oko yakamato andalapape.

¹⁸ Nanimana Akali Andane Jisasa Kataisato yakama pitaka ondowa moyo atekale lo pote leyo.

* **3:4:** 2Ko 7:16; Ga 5:10 * **3:6-10:** Lom 16:17-19; Pl 3:17-19; 1Tes 1:6; 2:8-9; 1Ko 9:4-7 * **3:11:** 1Ti 5:11-13 * **3:12:** 1Tes 4:11-12 * **3:13:** Ga 6:9 * **3:15:** 1Tes 5:14

1 TIMOTI

Poloto Timotina Pepa

Bulupane Peyo Pee Leane Oko

¹ Namba Polo. Goteto nanimma taputti pua molo-peke leane okonena, Jisasa Kataisato nanimma lamolo epolopeya lo maliyo ateyama. Okonelapo-mane namba aposolo akali ata leapi-kola, namba Jisasa Kataisana aposolo akali ateyo.

² Wamba nambato Gotena pii layene epene oko nimba langewa okone nimbatu bilipi lo atele mambele, Timoti nimba nambana iwanane enene gulo atele. Wuaneko, nanimana Akali Andane Jisasa Kataisala, Ayiane Gote-la, okonelapo-mane nimba ondowa moyoto, nimbanan yamapane mo tambo laya yakale lo nambato pote leyo.*

Ownato Tisa Tupamane Mana Kuai Lo Lamai Na-piyaini Leane Oko

³⁻⁴ Gotena pii okomane balana nembotene oko wandakali tupanga andawa leyakola, wandakali-mane balana pii okone bilipi loto, wua pua atape-pene lo andalaini. Wuane tekeko, akali minditupamane Gotena pii oko wandakali tupa lamai na-piyaini. Jia. Utupane-mane yakama yumbane wamba ateaini tupana gene tupa loto, mee pii temane minditupu loto, Gotena pii oko yakama langeyama leyai-kola, wandakali tupamane pii yanda pua atalaini. Akali utupanena pii okonemane wandakali tupana bilipi oko minu tai na-lalane. Tene okonena, wamba namba Masetonia potopinjia okona moyo atewa-angi, nambato Timoti nimbato Epesasa tano okona atoto, owato tisa tupa lamawuato, yakamato pii waka tupa wandakali tupanga lamai napene kondalapa lape lewa okoni.*

⁵ Wandakali-mane Kataisa lo bilipi leyama nayu leaindo, Goteto utupanena koo tupa apola-kola, balana wenonga koo tene mindi utupanenga nayolopeya. Koo tene mindi utupanenga nayola oko andoto, wandakali utupane-mane Gotepi, wandakali tupapi, utupane towa epelewa yamapane yo atolopeyai. Wandakali-mane wuane peakale nembo toto, Goteto balana piape oko nanimma geane.

⁶ Wandakali minditupu-mane mana epene utupane tepa alu, pii tene na-atene minditupu lalaini.

⁷ Wandakali utupane-mane Gotena loo okona tene tupa pitaka kuai lo nembo nateyai tekeko, utupane-mane tisa gulo atoto, balana loo tupa wandakali tupanga mana lamai-makale nembo talaini. Wuane

nembo toto, utupane-mane loo okona mana lamai-yaini tekeko, yakama tane-mane pii leyai tupana tene tupa pitaka kuai lo nembo natene ato, mee lalaini.

⁸⁻⁹ Goteto balana loo tupa yata yane okone angii, wandakali-mane balana loo tupa tika pua wato minu atolai-kola, balato wandakali utupane tika-pene ateyai lokale nembo nateaipia. Jia. Gotena pii tanga lalaini wandakali tupamane mana koo miniyama ya lo yakama tane andeakale loto, Goteto balana loo tupa yata yaepia. Nanimato pii okone enene ya lo nembo teyama. Wandakali-mane yakama tanena mana koo minalaini tupa koo ya lo andeakale nembo toto, akali mindimane Gotena loo tupa wandakali tupa lamawua ateando, balana mana okone epene yolopeya nembo teyama. Wuane tekeko, wandakali minditupu-mane Gotena pii tanga loto, balana loo tupa wato mina na-piyaini. Wandakali utupane-mane Gote masia mawuato, mana koo kambua minalaini. Utupane-mane Gotena mana epene tika-pene tupa wato mina napene, yuu okona mana koo tupa wato minalaini. Yuu okona mana koo tupa wato minuto, wandakali utupanena minditupu-mane yakamana angini ayanepi, wandakali yangonepi, utupane peyo ome lalaini.*

¹⁰ Wandakali minditupu-mane pamuku piyaini. Akali minditupu-mane akali yangone towa mana yala-pene wete tupa minalaini. Wandakali minditupu-mane wandakali yangone tupa andi lo awua poto, munu moyale, salimi lalaini. Wandakali minditupu-mane owato pii loto, enene wetete leyo lalaini. Wandakali utupane-mane mana epene nambato lamai-yawane tupa tanga loto, mana koo waka minditupu minu atalaini teke.

¹¹ Nambato balana piape katulo ando atolopeya lo Goteto nambanga tungi peyoto, nambato balana pii layene epene oko lamawua atape loto, balato balana piape okone namba geane. Geai-kola, nambato balana pii layene epene oko wandakali tupa mana lamawuato, Gote bala epene tikapene wete ateya lalawane.

¹²⁻¹⁴ Wamba nambato Gotena pii layene epene oko ale naene atoto, Jisasa lo bilipi nalewa. Okone angii, nambato atapiane tene moto, Kataisa ando lamba lalu, kenda-pene andane minditupu Kitisene wandakali tupa maiki pua atewa. Nambato wuane pua atewane tekeko, nanimana Akali Andane Jisasa Kataisato namba ondo wete wato moyo-kola, nambato bala lo bilipi loto, wandakali yangone tupa towa epelewa yamapane yo atewa. Tene

* 1:2: Ap 16:1-3; Tai 1:4 * 1:3-4: 1Ti 4:7-10; Tai 1:13-14

* 1:8-9: Lom 7:12-13,16

okonena, nambato balana piape tupa katulo pua atolopele nembo toto, balato namba minu tai laya wato, nambato balana piape tupa pua atape leane. Nanimana Akali Andane Jisasa Kataisato wuane peane okonena, nambato bala ando wayu pele leyo.*

¹⁵ Wamba nambato mana koo wete minditupa minu atoto, mana koo minalaini wandakali tupana akali kawane gulo atewane tekeko, Jisasa Kataisato koo piyaini wandakali tupa taputi pua molo-peke lokale nembo toto, ati kenga atala yuunga epeaipia. Pii layene okone enene wete eya-ko. Wandakali pitaka-mane pii okone nemboto minu atape-pene.*

¹⁶ Nambato mana koo wetete minditupa minu atewa-kola, Jisasa Kataisato wua lo nembo teapia: Nambato Polo ondowa moyolowa-kola, wandakali-mane andolai-kola, nambato wandakali tupa ondowa moyalane lo andolopeyai. Andoto, matili-matilipi, wandakali kambua-mane namba lo bilipi loto, saka atapowa atolane tene oko molopeyai nembo teapia. Wandakali-mane balana mana epene okone andoto, yamapanne peke leakable nembo toto, Jisasa-to ole kambua maliye atalane mana okone nanimato andalapale loto, balato namba towa yataka wamba ini naene, namba ondo wato, maliyo ateapia.

¹⁷ Balato wuane peane okonena, nambato balana gene oko laiyu loto, nanimato Gote lee-mane anda na-piyamane tekeko, bala angu Gote enene wetete ateya leyo. Bala katulo oma napiyane. Ole dindi lo bala yuu pitakana kinji atalane. Matili-matilipi, wandakali pitaka-mane balana gene oko laiyu loto, bala tama pua atape-pene. Enene.

Pii Nambato Leyo Utupa Nimbato Lamawua Atape Leane Oko

18-20 Sipi mindina ingane minalane akali mindimane ana andane mindi sipi polane asia okona yola oko andoto teke, tuu puato, sipi okone mopeke nalene, asia mindiki okonena teke peando, sipi okone ana okonena pambe loto, koyolo-peya. Wuane pua teke, owato tisa tupamane yakama tanena mana tupa yapa lo tale puato, mana koo minditupa mineyama lo andoto teke, tuu puato, yamapanne peke na-lalaini. Jia. Utupane-mane mana koo utupane minu atoto, Kataisa lo bilipi leaini mana oko awua tepa alaini. Wuane piyane pua teke, akali Aimeniasa, Alekesanda-la, okonelapomane liyambana bilipi oko awua tepa alu, Jisasa lamba leapi. Liyambato Jisasa lamba

nalape-pene ya lo andeakale loto, nambato akali okonelapo Satanena kinina maewa. Nambana iwanane Timoti, wamba akali minditupa-mane potopesa pii mindi loto, nimbato Gotena piape oko kuai lo pua atolopele leainipia. Andipa nimbato pii okone nembo tolo-peke loto, Kataisa lo bilipi leyo nayu loto, nimbana mana mina-lene tupa yapa lo tale puato, mana epene miniyope, mana koo miniyope lo andape. Gotena wenonga koo tene mindi nimbanga naeya lo andoto, nimbato owato tisa tupa towa yanda pimawuato, Gotena piape oko pua atape leyo.*

2

Wandakali Pitaka-mane Pote Lape-pene Leane Oko

¹⁻² Kitisene wandakali nanimato wandakali waka tupa towa yanda pua ata napene, tambo lo atoto, Gotena mana epene tika-pene tupa pitaka kuai lo wato minu atape-pene. Mana epene utupane wato mina-makale nembo toto, Goteto kinji, gapomanepi, utupane moyoto, nembo-tene epene maiyakale loto, nanimato pote lape-pene. Goteto wandakali pitaka moyakale lo tee loto, nanimato Gote tama puato, bala ando wayu pele lape-pene. Pote lolane mana okone Timoti nimbato wandakali waka tupa mana lamawua atola loto, nambato nimba wamba ini mana langeyo.

³ Nanimato mana epene utupane kuai lo wato minu atoloma-kola, nanimata putpi pua meane Gote okomane nanimana mana utupane andoto, nanimata towa epele olopeya nembo toto, nanimato wuane pua atamakale.

⁴⁻⁵ Gote mindiki angu ateya. Wandakali pitaka-mane balana pii layene enene tupa pitaka ale olai-kola, balato wandakali utupane pitaka taputi pua mokale nembo teya. Gotepi, nanimata yuunga wandakalipi, nanimana tombenenga akali mindiki angu ateya. Akali okone bala Jisasa Kataisa. Balato angu nanimata Gote towa mina mindiki latlane.

⁶ Balato wandakali pitaka kambo molo-peke lokale nembo toto, balato tandini saka atene oko yole gulo Gote maiyu, omeaipia. Balato wuane peane okonemane Goteto wandakali pitaka taputi pua mokale nembo teane oko andawa leaipia.*

⁷ Wandakali pitaka-mane balana pii okone ale yakale lo nambato utupane lamaula nembo toto, Goteto namba balana aposolo akali ate leane. Nambato owato pii naleyo. Jia. Nambato enene pii oko leyo. Nambato Gotena pii enene oko

* **1:12-14:** Ap 8:1-3; 9:1-5,15-16; Ga 1:15-16; 1Ko 15:9-10

* **2:6:** Lom 3:29-30; Ga 1:4

* **1:15:** Lk 19:9-10 * **1:18-20:** 2Ti 4:14-15; 1Ko 5:2-5

wandakali waka tupa lamawua atolowakola, utupane-mane Kataisa lo bilipileakale loto, Goteto namba wandakali utupanena tisa atola leane oko ateyo. *

⁸ Wuaneko, Gotena wandakali yuu pitakanga atalaini tupamane yataka naene, nembo lapo napalene, mana epene tika-pene tupa wato minuto, pote lapiai lakae lo nembo teyo.

*Wanda Yame-mane Mana Epene Tupa
Minu Petepe-pene Leane Oko*

⁹ Wanda minditupa-mane yakamana kawane itini andane ateakale loto, golomane waa-pene yati tupapi, mumbi epene wetete tupapi, kolosa muni andanemanne kambene tupapi, utupane-mane yakamana umbaininga wayumane wete yati piyaini. Wanda utupane-mane mana okone kondalu, mini palu, yala ele pua pituto, yakamana umbaininga mee teke yati pipiai lakae lo nembo teyo. *

¹⁰ Wanda minditupa-mane Gote nemboto peteyama leaindo, utupane-mane wandakali yangone tupa moyo piape epene tupa pua pitipe-pene. Piape epene utupane wanda utupanena yati epene gulo yolopeya. *

¹¹⁻¹⁵ Goteto akali Atame bulupane waa puato, matili wanda Ipi oko waa peaapia. Goteto wandakali okonelapo waa pea-kola, Atameto Satanena owato pii leane okone enene leya nembo nataipaia. Jia. Wanda okomane Satanena owato pii leane okone enene leya nembo toto, balato mana koo mindi mineaipia. Tene okonena, wanda mindimane akali mindi ando atoto, akali okone mana lamai-yakake lo nambato ando konda na-piyawane. Jia. Wandakali tupamane lotu lolai-angi, wanda-mane pii nalene, mee alewa pitipe-pene. Wanda-mane akalini tupana pangosa pituto, pii nalene, mana mo pitipe-pene tekeko, wanda yame-mane mini epene paluto, Kataisa lo bilipi loto, balana mana epene tupa minu pituto, wandakali yangone tupa towa epelewa pe-teaindo, wanda utupane-mane andopane mandulai-angi, Goteto utupane moyolopeya. *

3

*Gotena Piape Akali Tupamane Mana
Epene Tupa Minu Atape-pene*

¹ Akali mindimane Gotena piape oko ando atokale nembo teando, balato piape epene mindi pukale nembo tola-kola pulupeya. Pii okone enene wete eya. *

* 2:7: Ap 9:15-16; Ga 2:7-10; 2Ti 1:11 * 2:9: 1Pi 3:1-6
2:7,21-22; 2Ko 11:1-4; Ga 3:1-9 * 3:1: Ap 20:28-29 * 3:2-3: Tai 1:6-9

²⁻³ Tene okonena, akali mindimane bisopo piape oko pukale nembo teando, balanga koo tene mindi nayakale lo atape-pene. Balato yataka ini naene, bia ipa tai kambua noto, kee naene, peya-peya napene, wandakali yangone tupa towa tambo lo atape-pene. Balato bia ipa tai neando, anjako nape-pene. Ole dindi lo balato kuai lo nembo toto, tika pua atape-pene. Balato muni kambua miauwa lakae lo nembo natape-pene. Bala mana kuai lo lamaiyane akali mindi atape-pene. Bala wanda mindiki petene-mane atape-pene. *

⁴⁻⁵ Akali mindimane balana wetene andopane ima kuai lo ando ata napiyae yando, balato Gotena sosa okona piape tupa kuai lo ando ata napulu-peya teke. Tene okonena, wetene andopane ima kuai lo ando atalane akali mindimane bisopo piape oko pipe-pene. Balana andopane tupamane mini epene paluto, balana pangosa atoto, wandakali wenonga mana epene tupa mineakale loto, balato utupane kuai lo ando atape-pene.

⁶ Kitisene wenene mindimane bisopo piape oko peando, bala akali andane ateyo nembo tolane. Akali okonemane wuane nembo teando, wamba Goteto Satane kosimi leane pua teke, balato akali okone kosimi lolopeya. Wuane pulane nembo toto, Kitisene wenene mindimane bisopo piape oko napipe-pene.

⁷ Akali mindimane bisopo piape oko pua atola-kola, Sataneto bala minu makande pula-angi, akali okone bala Satanena nuu umbene okona peando, wandakali tupamane akali okone andayo pii koo lolai-kola, okone katu nlololo-peya. Sosa okona atalaini wandakali tupapi, takita atalaini wandakali tupapi, utupane pitaka-mane akali mindi yapa lo tale puato, bala akali epene tika-pene mindi ateya leaindo, balato katulo bisopo piape oko kuai lo pulupeya. *

⁸ Wuane pua teke, sosa tupana piape akali atolai tupanga koo tene mindi yolane. Tika ando atape-pene. Akali utupane-mane Gotena piape oko mee mo kindi-kindii pua ata napepe-pene. Yakama ambulini lapo atene gulo at aapene, waene ipa kambua nanene, munipi minditaka tupa kambua miwa lakae lo nembo natene, mana koo mindikipi mindi wato mina napipe-pene. Jia.

⁹ Akali utupane-mane Gotena pii layene wamba too pitane yane okone bilipi loto, pii okone kuai lo wato mineyamape, wato mina napeyamape nembo tape-pene.

* 2:10: 1Ti 5:9-10 * 2:11-15: 1Ko 11:8-9; 14:33-34; Jen 3:2-3: Tai 1:6-9 * 3:7: 2Ko 8:18-21

¹⁰ Tene okonena, akali utupane-mane Gotena piape tupa wamba ini mee mandeke pua atape-pene. Akali utupane-mane piape mandeke pua atolai-kola, utupanenga koo tene mindi nayando, utupane-mane Gotena piape oko pua atape-pene.

¹¹ Wuane pua teke, Gotena piape akali tupana wetene tupanga koo tene mindi nayakale lo pitipe-pene. Wanda utupane-mane mee kindi-kindii pua piti napene, wandakali yangone mindi layanga napene, bia ipa tai kambua noto, keewa napitipe-pene. Wanda utupane-mane piape pi makale lolai tupa pitaka enene pua pitipe-pene.*

¹² Gotena piape akali utupane yakama wetene mindiki petene-mane atape-pene. Wetene andopane ima kuai lo ando atlaini akali tupamane sosa tupana piape pua atape-pene.

¹³ Gotena piape kuai lo piyaini akali tupamane wandakali waka tupa ando yuku naene, Jisasa Kataisa lo bilipi leyama nayu lalaini. Tene okonena, akali utupanena gene oko epene yalane.

¹⁴⁻¹⁵ Saka atene Gotena sosa oko balana anda pingina gulo atoto, balana pii layene enene oko awua ateya. Kitisene wandakali nanima balana sosa ateyama. Nambato yuu nimba atele okona wamba ini epokale nembo teyko, minditaka mindimane namba minandi leando, namba wamba ini naepolo-peyo nembo toto, nambato nimbanapa pua oko peyo epe ley. Nimbato pepa oko dii lo andoto, Gotena wandakali tupamane wua pua atape-pene nembo tolopele.

Nimbato Mana Utupane Wandakali Tupa Lamawua Atape

¹⁶ Wamba Jisasa bala akali enene mindi guloto, yuu okona panakame epea-kola, enjole tupamane bala andeaini-pia. Oli Sipitisa okomane bala akali tika-pene wete ateya lo lapana ya-kola, wandakali tupamane balana pii oko lo tawe yainipia. Balana pii lo tawe yai-kola, yuunga wandakali tupamane bala lo bilipi leainipia. Goteto bala atu ati kenga peakale lo mea-kola, Jisasa bala gene andane wetete meaipia. Gotena pii layene wamba too pitane yane utupanena tene tupa andane wetete eya lo bilipi leyama nayu leyama.*

4

Gotena Piape Oko Kuai Lo Pua Atape Leane Oko

¹⁻² Oli Sipitisa okomane pii panakame loto, matili sipitisa koo atene akali minditupa-mane mana koo miniyama

nembo natene, wandakali yangone tupa andakasa wato, owato pii minditupa lolopeyai leya. Owato potopesa akali utupane-mane wandakali yangone tupa mana lamaulai-kola, wandakali minditupa-mane owato sipitisa utupanena pii lolai tupa ale wato, Gotena pii layene enene oko bilipi leyai okone awua tepa lolopeyai.

³⁻⁵ Owato pii lalaini akali utupane-mane pii lolai oko loto, akali yame yakamato wanda kee nalene kondalu, wanda yame yakama akali puu napene kondalu, piyapape lolopeyai. Gote lo bilipi lene wandakali nanimato Gotena pii enene oko kuai lo nembo teyama. Pii okonemanne loto, wamba Goteto minditaka eya tupa pitaka yakale lea-angi, balato utupane pitaka epene teke-teke eya leaipia. Nanimato Gotena pii okone nembo toto, bala ando pote loloma-kola, tunduma-pene yame tupa pitaka epene wete yolopeya. Goteto minditaka yakale leane utupane pitaka epene teke-teke yakale lea-angi, nanimato utupanena mindi koo ya loto, mo apia napipe-pene. Goteto minditaka yakale leane mindi moloma-angi, nanimato bala ando wayu pele lalu, miapse-pene. Gotena pii okonemanne nanimma languato, yakamato bala ando wayu pele loto, tomo balato yakale leane tupa pitaka nalapale nembo toto, balato tomo utupane pitaka yakale leane leya. Gotena pii okonemanne wuane leya teyko, owato pii lalaini akali tupamane Gotena pii okone awua tepa alu, tomo utupanena minditupa nanene kondalapa lolopeyai.*

⁶ Gotena pii layene eya tupamane nimba minu tai laya ola-kola, nimbato balana mana epene tupa wato minuto, mana utupane Kitisene amene imalinii ima mana lamawua ateendo, nimba Jisasa Kataisana piape akali epene atolopele.

⁷⁻¹⁰ Saka atalane Goteto wandakali pitaka taputi pua moyalane teyko, balato bala lo bilipi lene wandakali tupa wayumane wetete taputi pua moyalane. Tene okonena, balato nanimma moyolo-peya lo nanimato balanga tungi peyoto, ayiawa wete balana piape oko taimane pua atalamane. Wandakali mindimane bala tanena umbaini oko mo tailaya oyale, mangene minditupa peando, mana okonemanne bala ajako moyolo-peya teyko, balato Gotena mana tupa wato mineyo nayu mineando, mana okonemanne andipapi, matili matilipi, bala wayumane wete moyolo-peya layene eya. Wandakali pitaka-mane pii okone enene wete eya lo bilipi leyama nayu lape-pene. Tene okonena, owato potopisa akali tupa-

* 3:11: Tai 2:3-5

* 3:16: Jo 1:14; 2Pi 3:3-4; 1Jo 2:18

* 4:3-5: Jen 9:3; Lom 14:5-6; 1Ko 10:30-33

mane mee pii temane tupapi, pii okonepene waka tupapi, utupane lolai-angi, nimbato pii utupane ale naene masia mawua atoto, Gotena pii oko wato minukale nembo toto, balana mana oko mo atape. *

¹¹ Nimbato mana utupane wandakali waka tupa lamawuato, mana utupane wato minalapape lo lamaipe.

¹² Wandakali mindikipi mindimane nimba iwana patane atele loto, nimba anda napi leakale lo nimbato ando konda napipe. Jia. Kitisene wandakali tupamane nimbana mana wato mineakale nembo toto, nimbato Kataisa lo bilipi leyo nayu loto, wandakali tupa towa epelewa yamapane yo atoto, pii lole tupapi, mana minule tupapi, utupane pitaka kuai lo angu minu atape. *

¹³ Nimbato namba epolopeya lo maliyo atoto, wandakali-mane Gotena pii pepa pelene eya oko ale yakale nembo toto, nimbato Gotena pii dii lape. Dii lalu, pii okonena dini tupa mana lamawuato, wandakali tupamane Gotena mana epene tupa wato mineakale loto, nimbato utupane mina ika lape.

¹⁴ Wamba Gotena piape ando atalaini akali minditupa-mane nimbana kawanenga kii yata yai-kola, akali mindi bala potopesa akali mindi gulo atoto, nimbato Gotena piape tupa pulupele lea-kola, Goteto balana piape pulane tai-lene oko nimba gea. Balana piape pulane tai-lene nimbanga eya okone mee yakale lo ando konda naene, nimbato balana piape pua atape. *

¹⁵ Nimbato piape pua atele oko epene giu lama-lama peya oko wandakali pitakamane andeakale nembo toto, ole dindi lo nimbato Gotena piape peyo nayu, taimane puu atape.

¹⁶ Nimba tane mana minule tupa anu pua miniyope lo ando atoto, mana lamaule tupa nimbato anu pua mana lamaiyope lo ando atape. Nimbato wuane pua ateendo, Goteto nimbapi, nimbana pii alewa ateyai wandakali tupapi, yakama pitaka taputi pua molo-peke lolopeya. Goteto wuane pulupeya nembo toto, nimbato Gotena piape utupane pua atape.

5

Gotena Piape Ando Atolane Mana Tupa

¹ Akali mini-yene mindimane mana koo mindi minula-kola, nimbato bala mo tika pule-angi, bala peyoyale pua pii taimane nalape. Jia. Nimbana ayiane mo tika pilini wuane pua teke, akali mini-yene okone mo tika pipe. Nimbato iwana patane tupa mo

tika pule-angi, nimbana amene tupa mo tika pilini pua, utupane mo tika pipe.

² Nimbato wanda mini-yene tupa mo tika pule-angi, nimbana angini mo tika pilini pua, utupane mo tika pipe. Wana mapokae tupa mo tika pule-angi, nimbato mana tika-pene tupa wato minuto, nimbana imalini tupa mo tika pilini pua utupane mo tika pipe.

³⁻⁶ Wanda yalo mindimane balana umbaini okona epele ene tupa nembo toto, mana koo minditupa minu epoko peando, saka atapowa atolane tene oko balanga nayolo-peya. Nayola-kola, bala saka pituto teke, omene gulo pitulu-peya. Wanda yalo taputu napetene mindimane Goteto bala moyolo-peya lo tungi peyo pituto, utulu otongapi, balato Gote tee lo pote leando, sosa okomane wanda yalo okonepene tupa moyape-pene. Wuane tekeko, wandakali mindina angini yandopi, aputini yandopi, mindi yalo pitula-kola, wamba wanda okonemane bala moyo peteane oko nembo toto, andipa wandakali okonemane paini wanda yalo okone moyokale nembo tape-pene. Wandakali mindimane wuane nembo toto, Gotena pii layene oko wato minuto, wanda yalo okone moyando, Goteto mana okone epele olopeya. Tene okonena, wanda yalo mindina mandiyene yame mindi ateando, okonemane bala moyape-pene.

⁷⁻⁸ Wandakali mindimane balana yamepi, tundupa mindikipi, utupanena mindi moyo napeando, balato mana koo minula okonemane Gotena pii layene oko tanga loto, aitene wandakali tupa sia minuto, wandakali koo wetete mindi atolopeya. Koo tene mindi wanda yalo mindina mandiyene yame utupanenga nayakale nembo toto, wandakali utupanemane wanda yalo tupa moyakale loto, nimbato pii utupane mana lamawua atape.

⁹⁻¹⁰ Mana epene minu pitiyaini wanda tupamane yakamana andopane tupa kuai lo ando pitiyaini. Wandakali opene mindi epeya-kola, wanda okonemane bala pailo ando yatawa paliyane. Bala wandakali tupana nappinga gulo pituto, Gotena wandakali tupa moyo piape pimaiyane. Wandakali minditupa-mane kendapene awua ateyai-kola, balato utupane moyalanane. Bala akali mindikina wetene pituto, kuai lo pitiyane. Wuane pua peteyakola, wandakali tupamane loto, wanda okonemane piape epene tupa pua peteya lalaini. Wanda okonepene mindina akalini omola-kola, bala mali paiyasa wataka pene peteando, minditaka balanga jia yola-kola, sosa okomane bala moyo okonetaka tupa

bala maimakale loto, balana gene oko pepanga peyo yata ape-pene.

11-13 Wanda yalo saka yale akali waka pupe-pene pitiyaini minditupa-mane loto, nanimato akali waka mindi puu napene, Kataisana piape tupa pimawua pitimakale. Wuane puluma-kola, sosa okomane nanimia moyo minditaka jia yola tupa nanimia geekale lalaini. Wanda yalo utupane-mane wamba ini wuane lalaini tekeko, matili utupane-mane akali waka mindi pokale nembo toto, yakamana pii wamba lo yata yaini okone apialaini. Apialu, Kataisana piape oko kondalu, akali waka mindi peyakola, koo tene mindi utupanenga yalane. Wanda yalo saka yale minditaka jia eyakola, mee pitiyaini tupa moyoyale, sosa okomane minditaka mawua ateyai-kola, wanda utupane-mane piape angini mindi pii napene, mee wandakali yangone tupana anda ingane dii lo epoko piyaini. Wuane puato, wanda yalo utupane-mane mo ne-nenga atoto, tipu-tipu, pii nalape-pene tupa lo epoko piyaini. Tene okonena, sosa okomane wanda yalo saka yale utupanena gene tupa pepanga peyo yata napipe-pene. *

14-15 Wanda yalo utupane Gotena mana epene tupa awua tepa alu, Satanena mana koo tupa wato minalaini. Koo tene mindi wanda yalo tupanga yando, Kitisene tupa towa yanda-pene wandakali tupamanne sosa oko andayo pii koo lolane asini mindi yolopeya. Yanda-pene tupamanne pii koo lolane asini mindi nayakale nembo toto, wanda yalo saka yale pitulaini tupa akali waka tupanga poto, andopane manduto, yakamana anda tupana pailo ando pitipiai laka lo nembo teyo. *

16 Amunguli pitane okomane angu wanda yalo tupa pitaka moyo ateaindo, minditaka utupane maulane tupa jia yolakola, sosa okomane wanda yalo taputi napetene tupa moyoyale pitete olopeya. Tene okonena, sosa okomane wanda yalo taputi napetene tupa angu moyakale lo mana lamawua atape. Kataisa lo bilipi lene wanda mindina yame wanda yalo taputi napetene minditupa peteaindo, bilipi lene wanda okonemane wanda utupane moyo pitipe-pene.

Nimbato Gotena Piape Akali Tupa Kuai Lo Ando Atape Leane Oko

17-18 Gotena pii pepa pelene eya mindimane loto, yia bulumako mindimane balana kee-mane witi dini tupa ango andaku pua, nimbanza piape pingeando, balato witi

dini minditupa nolane nembo toto, nimbato balana nee asia oko yake pua tambuya naene kondape layene eya. Gotena pii pepa pelene eya waka mindimane loto, piape akali mindimane balana piape pulane okonena yole oko miape-pene layene eya. Gotena pii pepa pelene eya okonelapomane wuane leya nembo toto, sosa tupa-mane Gotena piape piyaini akali oko yole maipe-pene. Gotena piape piyane akali mindimane Gotena pii layene oko wandakali tupa kuai lo lamawuato, Gotena mana lamawua ateando, sosa okomane balana gene oko laiyu loto, yole minditupa tako puato, bala maipe-pene. *

19 Nimbato Gotena piape akali tupa ando atole-angi, wandakali mindiki mindimane angu nimba languato, Gotena piape akali mindimane mana koo mindi minu ateya leando, pii balato leya okone enene ya lo nimbatu wamba ini nembo natape. Jia. Wandakali lapopi, tepopi, utupane-mane piape akali okonena mana koo mindi lee-mane andoto, nimba langeaindo, nimbato pii okone enene ya lo nembo tape. *

20 Enene, balato mana koo okone minu atalae yando, Gotena piape akali waka tupa-mane mana koo mindi minuyale yuku yakale nembo toto, Gotena piape akali pitakana wenonga Timoti nimbato piape akali okone lo tika puato, nimbato mana koo minu atelene oko kondaa lape. *

21 Jisasa Kataisapi, Gotepi, balana enjole yapa lo mene tupapi, utupane pitakana wenonga nambato pii mindi nimba langeyo nayu langeyo. Nimbato bisopo piape utupane pua atole-angi, wandakali mindi bala gene yene yandopi, nimbanza yame yandopi, nimbato bala angu wayumane moyo napene, wandakali pitaka towa mana mindiki wato minape.

22-25 Akali minditupana mana epene tupa panakame yalane. Akali waka minditupana mana epene tupa wamba ini pana naene, mee too pitane yalane tekeko, matili utupanena mana epene utupane panakame yalane. Wuane pua teke, wandakali mindi kote naleya-kola teke, balana mana koo oko panakame yalane. Akali waka mindina mana koo oko wamba ini pana naene, mee too pitane yalane tekeko, matili wandakali-mane bala kote leyai-kola, balana mana koo okone panakame yalane. Nimbato akali okonepene mindina mana tupa pailo anda napene, wamba ini balana kawanenga kii yata wato, Gotena piape peyakale leendo, matili balato mana koo mindi minula-angi, balana koo tene oko nimbanga epolopeya.

* 5:11-13: 2Tes 3:11 * 5:14-15: 1Ko 7:9 * 5:17-18: 1Ko 9:9; Mt 10:7-10 * 5:19: 2Ko 13:1-4 * 5:20: Ep 5:11-14

Tene okonena, akali mindimane Gotena piape kapoyale peakale nembo toto, nimbana kini balana kawanenga wamba ini yata naene kondape. Timoti nimba tane mana epene tupa angu tika pua minu atape leyo tekeko, nimba tika pua atokale nembo toto, waene nanene kondoto, ipa enene angu nolene. Ole kambuanga nimba ininga siki mindi ika lalane oko dee lapone ika lolane nembo toto, nimba ipa angu nanene, waene anjako minditupa naka pua atape.

6

Piape Wandakali Tupamane Piape Kuai Lo Pimaipe-pene Leane Oko

¹ Kitisene wandakali tupamane yakama piape ando atalane akali okona pii tanga leaindo, wandakali waka minditupamane utupanena mana koo okone andoto, Gotena gene okopi, balana mana nanimato lamawua ateyama okopi, okonelapo koo ya lolopeyai. Wandakali waka tupamane wuane naleakale nembo toto, piape wandakali tupamane yakamania piape ando atalane akali okona pii lola tupa wato minape-pene.*

² Piape ando atalane akali mindi bala Kitisene mindi ateando, balana piape wandakali tupamane bala anda napi loto, bala mee Kitisene amene nanimama ateyama okopene teke ateya nalape-pene. Jia. Piape ando atalane akali okonemane minditaka epene tupa meakale nembo toto, Kitisene piape wandakali utupane-mane piape ando atalane akali okone towa epelewa yamapane yoto, balana piape kuai lo pimaipe-pene. Wandakali-mane mana utupane pitaka wato mineakale loto, Timoti nimbato mana lamawua atape.*

Gotena Piape Tupa Kuai Lo Pua Atape Leane Oko

³ Nanimama Akali Andane Jisasa Kataisato pii leane tupa enene wetete eya. Nanimato balana pii utupane nembo toto, Gotena mana epene tupa wandakali tupanga mana lamai-yamane. Akali minditupamane pii layene enene utupane awua tepa alu, pii waka mindi wandakali tupa mana lamawua atolopeyai.*

⁴⁻⁵ Akali mindimane wuane peando, Gotena pii layene enene oko balanga aakopi mindi yaa napeya-kola, bala atapene tene moto, mana andene gulo, wuane piyane. Akali okonepene tupamane mana andene atoto, Gotena pii layene enene okona aki leyape lo nanimama tupa pii-mane yanda piyaini. Kee ene gulo atalaini akali utupane-mane Gotena pii layene epene oko

nembo natene atoto, wua lalaini: Nanimato Gotena mana tupa wato minu atemando, nanimato katulo yuu okona minditaka eya tupa kambua molopeyama lalaini. Gotena piape akali waka mindimane Gotena piape puato, minditaka epene meaindo, kee ene gulo atalaini akali utupane-mane bala towa apiangu piyani. Akali utupane-mane Gotena piape akali waka tupa towa peyapeyapa puato, pii akali waka tupa ando lamba lalaini. Pii akali waka tupamane mana koo tupa miniyai nembo toto, akali kee ene utupane-mane utupane towa pii-mane yanda pua atalaini.*

⁶⁻⁸ Wamba nanimana angini tupamane nanimama manda-ang, nanimato minditaka mindikipi mindi kininga awua napema. Wuane pua teke, matili nanimama manda talu, yuu oko tepa alu polomangi, nanimato minditaka mindikipi mindi kininga awua napolo-peyama teke. Wuane, andipa nanimama yuu okona ateyama-ang, tomo nolanepi, umbaininga pulane tonapi, utupane nanimanga eya kola, nanimanga minditaka eya tupa katu leyama. Nanimato Gotena mana eya tupa wato minu atoto, nanimanga minditaka eya tupa katu leyama okonemane nanimama wayumane moyalane.*

⁹⁻¹⁰ Wandakali minditupa-mane muni kambua miaima laka lo nembo toto, Kataisa lo bilipi lalaini mana oko awua tepa eyai-kola, kenda-pene minditupa utupanenga epalane. Epeya-kola, wandakali utupane tandaka no atalaini. Muni epelewa yamapane yo atalaini mana okonemane koo tene kambua mina ika lalane. Yuu okona minditaka eya tupamane minditaka kambua miaiuwa laka lo nembo talaini wandakali tupa minu makande peya-kola, wandakali utupane kee ene gulo atalaini. Kee ene gulo atoto, utupane-mane minditaka kambua moyale, mana koo tupa mina-makale nembo talaini mana okonemane wandakali utupane Satanena umbene nuu koo okona pale laya ola-kola, wandakali utupane koyalu, tandaka no atoto, koo wetete atolopeyai.*

¹¹ Wandakali minditupa-mane mana koo utupane wato minu atalaini tekeko, Gotena piape akali nimbato mana koo utupane mlesia mawua atoto, Gotena mana epene tika-pene tupa wato minuyale, balana piape taimane pua atape. Nimbato Kataisa lo bilipi loto, wamba ini kepa naene, tambo lo atoto, wandakali yangone tupa towa epelewa yamapane yoto, Gotena piape tupa

* **6:1:** Ep 6:5-8 * **6:2:** Pm 16 * **6:3:** Ga 1:6-10 * **6:4-5:** 2Ti 3:8; 4:4; Tai 1:13-14 * **6:6-8:** 1Ti 4:7-10; Pl 4:11-12;
Ip 13:5; Jop 1:21 * **6:9-10:** Ep 5:3-5 * **6:11:** 2Ti 2:22

pua atape.*

¹² Wamba Goteto nimba saka atapowa atola loto, ee lo mea-angi, nimbato wandakali kambua tupana wenonga atoto, nimbana bilipi oko kuai lo wetete lapana ee okoni. Andipa nimbato Gote lo bilipi loto, saka atapowa atokale nembo toto, balana piape oko taimane pua atape.*

¹³⁻¹⁶ Gote bala epene tika-pene wetete ateya. Tai-lene tupa pitaka balanga yene ateya. Bala akali andane tupana akali andane atoto, kinji tupana kinji ateya. Gote bala angu oma napene, saka atapowa atalane. Yuu bala ateyanya tii wetete peya-kola, yuunga wandakali mindi Gote ateyanya mandaka pupe-pene guu na-lalane. Jia. Wamba wandakali mindikipi mindimane bala lee-mane anda neapeainipia. Andipapi, wandakali-mane katulo bala lee-mane anda neapayama. Jia. Balana tai-lene oko yapowa yola-kola, matili-matilipi wandakali pitaka-mane balana gene oko laiyu lo atape-pene. Pii okone enene. Wamba Goteto Jisasa dee lapone yuu okona epeakale lolane oto mindi yata yaepia. Oto okone epola-angi, Goteto balana iwanane okone nanimanga mo pana olopeya. Wamba Pondiasa Pailate wenonga, akali minditupa-mane Jisasa Kataisa kosimi leai-angi, Jisasato Gotena pii minditupa kuai lo lapana wato, Gotena piape peapipia. Andipa Gote, Jisasa-la, okone-lapona wenonga nambato nimba languato, Gotena piape tupa pua atape leyo. Gote balato pitaka tako saka ataya alane. Koo tene mindi nimbanga nayakale lo ando atoto, nimbato balana piape tupa kuai lo puato, nanimana Akali Andane Jisasa Kataisa bala dee lapone epolopeya oto okone ando mola.*

Minditaka Kambua Yene Wandakali Tupa Mana Lamawua Atape Leane Oko

¹⁷⁻¹⁹ Nanimo epelewa atalapale nembo toto, Goteto minditaka nanimanga yalane tupa pitaka nanimo giyane. Balato wuane piyane okonena, minditaka kambua yatawa ateyai wandakali tupamane atapene tene mo ata napipe-pene. Yuu okona minditaka koyalane kambua yatawa ateyai tupamane utupane moyolo-peya lo utupane-mane nembo natape-pene. Jia. Nanimato epelewa atalapale nembo toto, Goteto minditaka epene kambua nanimo giyane. Goteto utupane moyolo-peya lo balanga tungi peyo atoto, minditaka kambua yatawa ateyai wandakali utupane-mane matili kuai lo atamakale nayuto, saka atapowa atene enene oko mia-makale nembo tape-pene. Wuane nembo toto,

utupane-mane yamapane epene paluto, yakama minditaka kambua yolaini tupa tale puato, wandakali waka tupa moyo kambua mayuale atoto, piape epene kambua minditupa pua atape-pene. Minditaka kambua yatawa ateyai wandakali utupane-mane wuane peakale loto, Timoti nimbato utupane mana lamawua atape.*

Poloto Pii Lo Koyo Pua Leane Tupa

²⁰⁻²¹ Akali minditupa-mane Gotena pii layene enene oko tanga loto, utupane yakama mana andene akali ateyama lalaini, Wuane loto, akali utupane-mane pii tene na-atene minditupa wandakali tupa mana lamawua atalaini. Wandakali minditupa-mane akali utupanena pii leyai tupa ale wato, Gotena pii enene oko awua tepa alu, takita atalaini. Timoti nimbato akali utupanena pii leyai tupa ale naene, Gotena pii layene enene oko wato minuto, balana piape oko wayumane ando atape. Goteto nimba ondo wato moyakale loto, nimbato pote leyo. Enene.*

* 6:12: 1Ko 9:25-26; 2Ti 4:7 * 6:13-16: Jo 18:36-37; Lap 17:13-18 * 6:17-19: Lk 12:20; Mt 6:19-21 * 6:20-21: 1Ti 1:6; 2Ti 2:18

2 TIMOTI

Poloto Timotina Pepa Lapone Peyo Pee Leane Oko

¹ Namba Polo. Wamba Goteto potomisa pii mindi leane oko loto, Jisasa Kataisa lo bilipi lene wandakali tupa saka atapowa atekale ataya wakale leaipia. Nambato balana potomisa pii okone wandakali tupa lamawua atola nembo toto, balato namba Jisasa Kataisana aposolo akali ata leane.

² Andipa nambato nambana iwanane yamapanne yene Timoti nimbanda pepa oko peyo epe leyo. Nanimana Akali Andane Jisasa Kataisa-la, Ayiane Gote-la, okonelapo-mane nimba ondowa moyoto, nimbanda yamapanne mo tambo laya yakale lo pote leyo.*

Nimba Yala Naene, Gotena Piape Pua Atape Leane Oko

³ Gotena wenonga koo tene mindi nambana yumbane tupanga yaa napene atoto, utupane-mane balana piape pimawua ateachainipia. Wuane pua teke, Gotena wenonga koo tene mindi nambanga yaa napuya-kola, nambatopi balana piape pimawua atalawane. Utulu otongapi, nambato nimba nembo tolo-peke loto, pote loto, Gote ando wayu pele lalawane.*

⁴ Anu peakale nambato wuane piyawaepa. Wamba namba nimba tepa alu epewa-angi, nimbando ai lee oko nambato nembo tolo-peke leyo. Andipa nambato epele wete wakale nembo toto, nimba dee lapone andauwa laka lo nemboto ateyo.

⁵ Wamba bulupane nimbanda aputini Lowisa-la, nimbanda angini Yunisa-la, okonelapo-mane Kataisa lo bilipi leyapa nayu lo pitiyapili pua teke, nambatopi bala lo bilipi leyo nayu lele oko nambato andalawane. Nimbando Kataisa lo bilipi leyo nayu lalene okone nambato nembo tolo-peke loto, Gote ando wayu pele lalawane.*

⁶⁻⁷ Nimbando Kataisa lo bilipi leyo nayu lalene nembo toto, nambato nimbanda nembo-tene oko mina ika loto, wua leyo: Goteto balana Oli Sipitisa nanimanga geane okone nanimato yukuwa atalapale lo gii napyeane. Jia. Nanimato nshima tanena mana tupa kuai lo ando atoto, wandakali yangone tupa towa epelewa yamapanne yo atalapale loto, Goteto nshima minu tai laya oyale, balana Oli Sipitisa oko nshima geane. Wamba nambato nimbanda kawanenga kii yata ewa-angi, nimbando Gotena piape oko tailo pula loto, Goteto balana Oli Sipitisa oko

nimbanga geane. Ita lungu andane teakale nembo toto, wandakali-mane ita tola oko po lalaini. Wuane pua teke, nimbando Gotena piape andane oko kuai lo pukale nembo toto, nimbando Oli Sipitisa okonena tai-lene okomane Gotena piape tupa tailo pua atape.*

⁸ Nanimana yuku naene, balana piape tailo pua atalapale loto, Goteto balana Oli Sipitisa oko nanimana gea okoni. Tene okonena, nanimana Akali Andane okona pii layene epene oko lamauyale nimba yala olene. Jia. Matili nimbando Gotena pii layene epene oko lamawua atole-kola, kenda-pene minditupa nimbanda epolopeya. Kenda-pene mindi nimbanda epola-angi, Goteto nimba minu tai laya olopeya-ko. Nambato kenda-pene tupa awua atalawane pua teke, nimbandoppi kenda-pene tupa awua atoto, Gotena piape oko pua atape.

⁹⁻¹⁰ Wamba Goteto yuu ati-la yakale nalene atea-angi, balato nshima mee ondowa moyoto, Kataisato piape pula mambele, Goteto nshima bala tanena yame tupa gulaya wakale nembo teapia. Goteto wuane nembo teane okonena, matili Jisasa Kataisato nshima molo-peke loyale, wandakali omalaini mana okona tai-lene oko mo mee gulaya yaepia. Jisasato wuane peane okonena, nanimato mana epene mindi mina napema-kola teke, Goteto nshima balana wandakali epene tika-pene tupa atalapale loto, nshima ee lo molo-peke leaipia. Wandakali omalu, malinga ika lalu, dee lapone oma napene, saka atapowa atalaini lo wandakali-mane nembo teakale loto, Goteto balana pii layene epene okomane mana utupane nanimanga lo pana yaepia.*

¹¹ Nambato balana pii layene epene okone lamawua atoto, balana mana epene tupa wandakali lamawua atape loto, Jisasa Kataisato namba balana aposolo akali ate leane.*

¹² Balato namba balana aposolo ate leane mambele, nambato Gotena piape okone pua atewa-kola, akali minditupa-mane namba katapusa peaini. Katapusa peai-kola, nambato kenda-pene okone awua atoto teke, Jisasa lo bilipi leyo nayu lalawane. Piape Jisasato namba wamba geane okone bala tane ando atola-kola, balana piape okone koya napene atoto, bala dee lapone epolopeya oto okona giao lolopeya. Wuane pulupeya nembo toto,

* **1:2:** Ap 16:11; 1Ti 1:2 * **1:3:** Ap 23:1 * **1:5:** Ap 16:1 * **1:6-7:** 1Ti 4:14; Lom 8:14-16 * **1:9-10:** Ep 2:8-10;
Tai 3:4-7; Ip 2:14-15 * **1:11:** 1Ti 2:7

namba katapusa atoto, kenda-pene okone awua ateyo tekeko, namba yala naeyo.

¹³ Wamba nambato nimba languato, nimbatu Jisasa Kataisa lo bilipi leyo nayu loto, balapi, wandakali yangone tupapi, utupane pitaka towa epelewa yamapano yo atape lo langewa okoni. Nimbato Gotena pii tikapene nambato nimba langewa tupa pitaka nembo tatawa atoto, mana epene utupane wato minu atape.

¹⁴ Nimbato Gotena pii layene epene oko lamawua atola loto, Goteto piape oko nimba gea-kola, Oli Sipitisa okomane nimba moyo atolo-peyako. Nimbato Gotena pii okone kuai lamawakale lo ando atape.*

¹⁵ Namba katapusa atewa-kola, akali Pika-lasapi, Emonge-nesapi, dee Esia potopinjia okona Kitisene wandakali waka tupa pitaka-mane namba masia geaini oko Timoti nimbato nembo tele okoni.

¹⁶⁻¹⁷ Utupane-mane namba masia geaini tekeko, akali Onesi-potasa balato namba Lomo tano okona katapusa ateya lene ale wato, namba andolo epeane. Epoto, balato ayawa wete namba aiya pima epoko puato, matili namba andeane. Andalu, namba katapusa ateya nembo toto, bala yala naene, ole kambuangkatapusa anda okona epoto, namba mo epele aya yane. Tene okonena, Akali Andane okomane Onesi-potasana yame tupa pitaka ondowa moyakale lo nambato loma yalawane.

¹⁸ Wamba Onesi-potasa Epesasa tano okona atoto, namba moyo piape kambua peane oko Timoti nimbato nembo tele okoni. Balato wuane peane okonena, matili Akali Andane okomane wandakali tupa yapa lo tale pula-angi, balato Onesi-potasa ondo yakale lo nambato pote lalawane.

2

¹ Nambana iwanane Timoti, ole dindi lo Jisasa Kataisato nimba ondowa moyoto, nimba minu tai laya yakale atape.

² Wamba nambato wandakali kambua tupana wenonga atoto, Gotena pii layene epene oko wandakali utupane lamawua atewa-angi, nimbato pii okone alewa atee okoni. Andipa piape kuai lo piyaini akali minditupa-mane pii okone wandakali waka tupa lamai-yakale nembo toto, nimbato akali minditupa yapa lo moto, pii okone akali utupane mana lamaipe.

³⁻⁴ Akali mindimane ami piape piyane yando, balato piape waka mindi tako pua napiyane. Jia. Balana ami piape okone ando atalane akali okomane epele yakale nembo toto, balato ami piape okone angu

nembo tatawa atoto, piyane. Nimba Jisasa Kataisana ami yanda yene epene mindi gulo atoto, balana piape okone angu puato, kenda-pene epalane tupa nanimato awua atalamane pua, nimbatopi awua atape. *

⁵ Dee, wandakali-mane minditaka epene moyale atete puato, asia tai lalaini mana oko wato minalane. Balato mana okone kuai lo wato mina napene, asia tai leando, balato sia minuto teke, minditaka epene okone katulo mia napulu-pey. Tene okonena, akali mindimane asia tai leando, wandakali-mane asia tai lalaini mana oko wato minuto, balato asia tai lape-pene. *

⁶ Akali mindimane akali waka mindina ee mindi masiawa pimaiyu, ee okonena tomo yola-angi, tomo utupanena minditupa balana yole gulo yola-kola, balato minditupa ini bulupane mandu naope-pene. *

⁷ Akali Andane okomane nimba moyola-kola, pii nambato nimba langeyo utupane pitakana tene tupa nimbato katulo nembo tolopele-ko. Nimbato pii nambato leyo utupane nembo tatawa atape.

⁸ Nimbato pii nambato leyo utupane nembo toto, Jisasa Kataisa nembo tatawa atape. Bala Dapiti yame okonena mandiyene. Bala omea-kola, Goteto bala malinga ika laya yane loto, nambato Gotena pii layene epene oko wandakali tupa lamaiyawane. *

⁹ Tene okonena, wandakali minditupa-mane namba akali koo ya loto, kenda-pene kambua namba guato, namba andi leaini. Andi leai-kola, koo piyaini akali tupa andi latane atalaini pua teke, nambapi andi latane ateyo tekeko, Gotena pii layene epene oko andi latane ata naopeya. Jia. *

¹⁰ Wamba Goteto wandakali minditupa balana yame atekale lata ya-kola, Jisasa Kataisato piape peane mambele, wandakali utupane bala towa atu ati kenga yuu tiipene okona atapowa atekale nembo toto, nambato kenda-pene nambanga epalane tupa pitaka awua atalawane.

¹¹⁻¹² Anu peakale nambato wuane piyawanep. Nambato Gotena pii pepa pelene eya mindi nembo toto, kenda-pene utupane pitaka awua atalawane. Pii okoneman loto, nanimato Jisasa lo nembo toto, kenda-pene nanimanga epola tupa awua atemando, matili nanima bala towa atu kinji gulolo-peyama layene eya. Nanimato bala masia mawua atemando, balatopi nanima masia teke gulupey. Nanima bala towa atu omemando, matili nanima bala towa atu saka atapowa atolo-peyama. *

* ^{1:14:} 1Ti 6:20-21 * ^{2:3-4:} 2Ti 1:8 * ^{2:5:} 2Ti 4:8
3:1,13; Pl 1:12-14 * ^{2:11-12:} 2Ko 4:10-11; Mt 10:32-33

* ^{2:6:} 1Ko 9:4-7 * ^{2:8:} 1Ko 15:4; Lom 1:3 * ^{2:9:} Ep

¹³ Balato minditaka mindi pukale lolane okone mo lawa puato, mindi pipi napiyane. Nanimato Gotena pii oko wato minu atamakale loto teke, wato minu ata napene kondemando, Jisasato minditaka mindi pukale lolane tupa lawa napene, enene piyane. Gotena pii pepa pelene eya tupamanne wuane layene eya.*

*Nimbato Mana Koo Tupa Masia Mawua
Atape Leane Oko*

¹⁴ Wandakali-mane pii utupane nembo tolo-peke leakale loto, nimbato wandakali utupanena nembo-tene mina ika laya wato, pii utupane lamawua atape. Pii yanda piyaini mana okomane Gotena pii alewa pitiyaini wandakali tupa moya napiyane. Jia. Mana okonemane utupane minu koyalane. Tene okonena, Timoti nimba Gotena wenonga atoto, pii mindi Gotena wandakali tupa lamaiyo nayu lamauwato, yakamato pii mee mindi atete puato, pii yanda na-piyapape lo lamaipe.*

¹⁵ Nimbato Gotena pii enene oko kuai lo lamawua ateendo, nimba yala na-olopele. Jia. Goteto nimba piape akali epene mindi atele leakale nembo toto, nimbato balana piape taimane pua atape.*

¹⁶⁻¹⁷ Tete koo wete mindimane anda yama-yama poto, wandakali tupana umbaini minu yolane. Wuane pua teke, wandakali mindimane Gote masia mawua atoto, pii mee tene na-atene tupa wandakali waka tupa lamauwato, utupanena bilipi oko minu koyalane. Pii tene na-atene okonepene tupamanne wandakali tupa minakasa eya-kola, wandakali utupane Gote masia maiyaini asini koo okona puma-puma piyaini. Nimbato pii okonepene tupa peya wanju atape. Akali Aimeniasi, Piletasa-la, okonelapo-mane pii okonepene tupa lalapele.*

¹⁸ Akali okonelapo-mane Gotena pii enene oko mo lawa puato, nanima wamba malinga ika lema mambele, nanima dee lapone katulo ika nalolo-peyama lalapele. Liyambato wuane leapi okonemane wandakali minditupana bilipi oko minu koyalapele.

¹⁹ Goteto balana anda puyale atoto, anda pingina ate lea-kola, anda pingina okone keato gulo ateya. Gotena pii pepa pelene eya mindimane anda pingina oko andayo, Akali Andane okomane balana wandakali tupa andalane layene eya. Dee, Gotena pii pepa pelene eya waka mindimane anda pingina okone andayo, Akali Andane okona yame ateyama lalaini wandakali yakama

pitaka-mane mana koo tupa masia maiyu, waka atalapape layene eya.*

²⁰ Akali gene yene mindina anda okona sisopenepi, disapi, okonetaka tupa golo-mane waa-penepi, silipa-mane waapenepi, okonetaka tupa angu nayalane. Jia. Okonetaka minditupa ita-mane waapenepi, yuu-mane waa-penepi, utupane pitaka yalane teke. Wandakali-mane pene koo yale tupa moto, piape mee teke tupa piyaini. Wandakali-mane pene epene wete tupa moto, piape epene wete tupa piyaini.

²¹ Wandakali mindimane mana koo tupa pitaka masia mawua ateando, wandakali okone bala pene epene wete okonepene teke gulo atolopeya. Balato piape epene tupa pitaka puyale mandeksi pitawa atoto, Akali Andane okona piape epene tupa katulo pulupeya.

²² Iwana patanepi, wana mapokaepi, utupane-mane mana koo tupa minamakale nembo talaini tekeko, nimbato mana koo utupane minuluwane. Tika ando atape. Wandakali minditupa-mane yakamana angini umbainip, nembo-teneipi, utupane pitaka Gote mawua atoto, Akali Andane okona gene oko loto, loma yalaini. Nimbato wandakali utupanena mana epene okone wato minuto, Gote lo bilipi leyo nayu loto, wandakali yangone tupa towa mini epene palu atape. Mini epene palu atoto, nimbato wandakali utupane towa epelewa yamapane yoto, mana epene tika-pene tupa wato minu atape.*

²³⁻²⁴ Akali Andane okona piape akali tupamanne mana epene Goteto epele alane tupa lamaulane mana tupa andape-pene. Utupane-mane wandakali tupa towa pii yanda na-pepe-pene. Jia. Utupane-mane wandakali pitaka towa tambo-tambo lo atape-pene. Wandakali mindimane Akali Andane okona piape akali mindinga kendapene mindi maiyando, balato wuane peakale lo ando kondape-pene. Wandakali minditupa-mane mini napalene gulo atoto, pii tene na-atene minditupa tipa peyai-kola, pii okonepene tupamanne pii yanda piyaini mana oka mina ika lalane-ko. Wandakali mindimane Gotena piape akali mindi towa pii yanda puyale, pii okonepene mindi bala tipa peando, balato akali okonena pii yano peya napene, masia maipe-pene.*

²⁵⁻²⁶ Wandakali-mane balana nembo-tene wato mineakale nembo toto, Sataneto nongo minditupa yata alane. Gotena pii tangga lalaini wandakali tupamanne Sataneta nongo utupanena lua atalaini. Goteto

* **2:13:** Lom 3:3-4; Tai 1:2 * **2:14:** 1Ti 6:4-5; Tai 3:9 * **2:15:** 1Ti 4:6 * **2:16-17:** 1Ti 1:18-20; 4:7-10 * **2:19:** Jo 10:14-15; 1Ko 8:1-4; Ais 52:11 * **2:22:** 1Ti 6:11 * **2:23-24:** 1Ti 4:7-10

wandakali utupane moyando, utupane yakama Gotena pii enene oko wayumane nembo toto, yamapane peke loto, Satanena nembo-tene koo okone masia maluveyai. Wuane peakale nembo toto, Akali Andane okona piape akali tupamanne Gotena pii tanga lalaini wandakali utupanena nembo-tene oko mo tika puyale, pii tenga-mane tambo lo mana lamaipe-pene.

3

*Koo Piyaini Wandakali Tupa Towa Asia
Peya Warju Atape Leane Oko*

¹ Yuu oko koyo puyale pula-angi, wandakali minditupa-mane mana koo kambua minulai-kola, kenda-pene kambua epolopeya oko nimbato nembo tatawa atape.*

² Okone angi, wandakali minditupame yakama tane angu epelewa yamapane yoto, wandakali waka tupana lipinga yale ateyama nembo toto, yakama tanena gene tupa laiyu lo atolopeya. Utupane-mane Gote ando wayu pele nalene atoto, ayiane anginipi, utupanena pii tanga loto, Gotena mana epene tupa pitaka masia mawua atolopeyai. Utupane-mane Gotepi, wandakali yangonepi, utupane pitaka ando lamba lo atolopeyai. Utupane-mane muni epelewa yamapane yo atolopeyai.

³ Utupane-mane yakama tundupa mindiki tupa towa epelewa yamapane yo ata napulu-peyai. Utupane-mane yakama umbaini okona epele ene tupa kuai lo ando ata napulu-peyai. Utupane-mane yataka wato, yakama yangone tupa layangama epoko puato, utupane minu koyoto, taimane peyama epoko pulupeyai. Wuane puato, utupane-mane Gotena mana epene tupa pitaka yanda pimawua atolopeyai.

⁴ Wandakali utupane-mane yakama tane angu gene andane yene ateyama nembo toto, yakama nembo-tene koo tupa pitaka wamba kapoyale wato minuto, wandakali yangone tupa towa yanda-pene akali tupanga ene pitulu-peyai. Utupane-mane Gote towa epelewa yamapane yo ata napulu-peyai. Jia. Utupane-mane yuu okona mana epele-pene tupa angu epelewa atolopeyai.

⁵ Wandakali utupane-mane Gotena mana epene tupa angini mindi jia ya loto, mana utupane mee umbaini kenga-mane angu wato minu atolopeyai. Tene okonena, nimbato wandakali okonepene tupa atolainga mandaka gulo puu napene, waka atape.*

⁶⁻⁷ Ole dindi lo wanda minditupa-mane mana waka-waka tupa miaima lakae

lo nembo talaini tekeko, utupane-mane Gotena pii enene oko katulo mana mia na-piyaini. Gotena mana oko mia napene atoto, wanda utupane-mane mana koo tupa mina-makale nembo toto, mana koo kambua miniyai-kola, utupanena mana koo okonemanne yakamana nembo-tene oko mo kenda piya alane. Wuane peyakola, akali koo minditupa-mane gitisa pii minditupa wanda utupane lamawuato, utupanena andaka kolandaka loto, wanda utupanena nembo-tene oko tangu mia-maiyane.

⁸ Wamba Mosesato Gotena piape pua ateakola, akali Janisa, Jambitisala, okonelapo-mane Mosesa yanda pimawua ateaini. Wuane pua teke, andipa akali koo ateyai tupana nembo-tene oko koyeya-kola, utupane-mane Gote lo bilipi leyama nayu nalene, Gotena pii enene oko towa yanda pimawua atalaini.*

⁹ Wamba Isatale tane wandakali tupamanne andeai-kola, Janisa, Jambitisala, okone-lapona mana oko kee ene ya lo andeaini-pia. Wuane pua teke, matili wandakali pitaka-mane andolai-kola, akali utupane yakama kee ene gulo atoto, mana koo utupane mineyai lo andoto, akali utupanena mana koo utupane lo tawe nayolopeya. Jia.

*Nimbato Gotena Pii Duli Lo Minatawa
Atape Leane Oko*

¹⁰ Koo piyaini wandakali utupane-mane wuane pulupeyai tekeko, nimbato nambana mana tupa andelene. Nimbato Gote lo bilipi leyo nayu loto, wandakali yangone tupa towa epelewa yamapane yo atoto, Gotena pii mana tupa lamawua atalawane. Dee, kenda-pene kambua nambanga epeya-kola, nambana nembo-tene tai atoto, namba kepa naene, Gotena piape pua atalawane.

¹¹ Andiyoko tanepi, Aikoniame tanepi, Lisata tanepi, wandakali utupane-mane kenda-pene andane tupa nambanga giki peai-kola, namba tandaka no atewa oko Timoti nimbato nembo tele okoni. Wandakali utupane-mane kenda-pene andane tupa nambanga giki peai-kola, Akali Andane okomane namba moyoto, kenda-pene utupane pitaka mo apea.*

¹² Matilipi wandakali minditupa Jisasa Kataisa towa atu atoto, Gotena mana epene tupa wato minu atamakale nemboto atolai-kola, Gote towa yanda-pene wandakali tupamanne kenda-pene andane tupa Kitisene wandakali utupane pitaka maiki pulupeyai.*

* **3:1:** 1Ti 4:1-2 * **3:5:** Mt 7:15-21; Tai 1:16 * **3:8:** Ek 7:11 * **3:11:** Ap 13:14-52; 14:5,8-20 * **3:12:** Mt 16:24-26;
Jo 15:20; Ap 14:22

¹³ Okone angi, Sataneto mana koo minalaini wandakali tupa minakasa ola-kola, wandakali utupane-mane wandakali yan-gone tupa minakasa olopeyai. Wuane pima polai-kola, wandakali utupanena mana koo okone koo wete gulolo-peya.

¹⁴⁻¹⁵ Wamba nimba iwanana aŋakonga ato tewa, nimbato Gotena pii pepa pelene eya tupa ale wato, mana mo atee okone nimbato nembo tele okoni. Pii pepa pelene eya utupane-mane nimba mana langeyakola, nimbato Jisasa Kataisa lo bilipi lalene mambelle, Goteto katulo nimba molo-peke lolopeya-ko. Nimbato mana nanimato nimba langema oko nembo toto, Gotena pii layene epene nimbato wamba mana moto, bilipi leyo nayu lee okone duli lo minatawa atape.

¹⁶⁻¹⁷ Gotena wandakali tupamane balana piape epene tupa pitaka puyale makande pitawa atape-pene. Utupane-mane makande pitawa ateakale nembo toto, Goteto akali minditupana nembo-tene mina ika lea-kola, akali utupane-mane balana pii pepa pelene eya tupa pitaka pepa peleaini-pia. Balana pii okonemane wandakali nanima moyo mana languato, yakamoto mana koo tupa mina napene kondalu, mana epene tika-pene tupa angu wato minu atalapape lalane. Wuane loto, balana pii pepa pelene eya okonemane nanimana mana koo tupa mo tika puato, asia epene oko andawa lalane.*

4

Kenda-pene Awua Atoto, Gotena Piape Pua Atape Leane Oko

¹ Matili Jisasa Kataisa bala dee lapone epola-angi, bala kinji gulo atoto, wandakali omeneipi, sakapi, utupane pitaka yapa lo tale pulupeya. Wuane pulupeya nembo toto, Jisasa Kataisa-la, Gote-la, okone-lapona wenonga nambato pii leyo nayu loto, nimbato piape wua pua atape leyo.

² Wandakali-mane Gotena pii oko ale amakale lo mandeke pitane ateaindopi, mandeke napene ateaindopi, nimbato Gotena pii oko lamawua atape. Nimbato Gotena piape oko puyale wamba ini kepa naene, wandakali tupana mana mo tika puato, yakamoto mana koo tupa kondalu, Gotena mana epene tupa wato minu atalapa lo mana lamawua atape.

³ Matili wandakali-mane Gotena pii tika-pene okone ale aa napimakale loto, pii yakama tane epele alaini okonetaka tupa ale aimakale lo nembo tolopeyai. Wuane nembo toto, wandakali utupane-mane pii

okonepene tupa mana lamai-yaini akali tisa kambua yapa lo molopeyai.*

⁴ Wuane piyu, wandakali utupane-mane Gotena pii enene oko ale oyale kepawa masia mawuato, tisa utupanena mee pii temane tupa epelewa ale olopeyai.

⁵ Wandakali utupane-mane wuane pulupayeyai tekeko, ole dindi lo Timoti nimba tane mana kuai lo wete ando atoto, kenda-pene nimbanga epola tupa awua atape. Nimbato Gotena pii layene epene oko wandakali tupa lamawua atoto, piape Goteto nimba geane tupa pitaka peyo nayu pua atape.

⁶ Namba omolane oto oko mandaka gulo epeya-ko. Wandakali-mane minditaka Gote lo opa maiyaini pua teke, namba omolowang, nambana tundupa oko Gote lo opa maiyene okonepene gulolo-peya.*

⁷ Nimbato Jisasa lo bilipi lalawane oko awua tepa naene, bilipi leyo nayu loto, Satane towa yanda tailo puato, sia minewa. Nimbato Gotena asini epene okona tai lewane oko tai lama-lama ipulu, koyo pua epolane maki okona peakaiyu leyo.*

⁸ Tene okonena, Jisasato yole epene mindi namba gukale lo makande piyene eya. Matili yuu oko koyo pula-angi, wandakali kuai lo tale piyane Akali Andane okomane yole epene okone namba giyu, namba akali epene tika-pene ateya lolopeya. Balato yole okone namba angu gii napulu-peya. Jia. Akali Andane okomane yole epene okonepene tupa bala panakame epola oko andaima lakae lo maliyo atolai wandakali tupa pitakanga malupeya.*

Poloto Timoti Nimba Wamba Ini Ipupe Leane Oko

⁹⁻¹² Akali Dimasa bala yuu okona minditaka eya tupa epele wete wato, namba tepe alu, Tesalonaika tano okona pea. Akali Ketesenasa bala Galesia potopinjia okona pea. Taitasa bala Dalamesia disitiki okona pea. Nimbato akali Tikkasa bala Epesasa tano okona peakale lewa. Andipa Luku halipa angu ateyapa-ko. Nimba epolane asia mindi yando, Timoti nimba wamba ini ipupe. Maki balato namba moyo Gotena piape oko piyane-ko. Nimbato bala lamialu, atu ipulupape.*

¹³ Wamba namba Totasa tano oko tepe alu epewa-angi, nambana umbaininga pulane sakesa luu mindi buku minditupa towa akali Kapusa okona andaka yakale epewaepia-ko. Nimba epole-angi, utupane pitaka mo awua ipu-gipe. Buku sipisipi umbaini-mane waa-pene tupa yakale embesa olene. Mo awua ipu-gipe.*

* 3:16-17: Lom 15:1-4 * 4:3: 1Ti 4:1-2 * 4:6: Pl 2:17 * 4:7: 1Ti 6:12 * 4:8: 1Ko 9:24-25 * 4:9-12: 2Ko
8:23; Ap 15:37-39; Kol 4:14 * 4:13: Ap 20:6

Akali Andane Okomane Namba Molo-peke Lolopeya Leane Oko

¹⁴⁻¹⁵ Kopapi, batasapi, aenepi, okonetakamane minditaka waa piyane akali Alekesandato Gotena pii nanimato lalamane oko laa napene kondalapa loto, kendapene kambua namba geane. Aleke-sandato mana koo minia okonena, matili Akali Andane okomane paini yole koo mindi bala malupeya. Akali koo okonemane kendapene mindi nimba gulane. Waiwa ando atape. *

¹⁶ Wamba gapomane wenonga wandakali-mane namba kosimi leai-angi, akali mindikipi mindimane namba moyo ata napeai. Jia. Wandakali pitaka-mane namba awua tepa alu, peai-kola, nambato pote loto, Gote nimbato akali utupanemanane mana koo mineaini okone nembo natape lewa.

¹⁷ Nambato Gotena pii oko wandakali yame waka tupa lamalu-wakola, wandakali pitaka-mane pii okone ale yiake leakale nembo toto, Akali Andane oko bala namba towa atu atoto, namba minu tai laya yane. Alu mindi pusi kapua andane wete gene layone lene tupamane namba neai-yale tekeko, Akali Andane okomane namba molo-peke leane.

¹⁸ Wuane pua teke, matili wandakalimanane namba kenda-pene gulai-angi, Akali Andane okomane namba molo-peke lolopeya. Dee, namba omolowa-angi, balato namba ati kenga balana yuu epene okona atama ipu lolopeya. Matili-matilipi nanimato balana gene oko laiyu lamakale. Enene.

Pii Lokoyo Pua Leane Tupa

¹⁹ Nambato wanda Pitisilapi, akali Akuwilapi, Onesi-potasa okona yame tupapi, utupane ando kuai lo atalapape leylo oko nimbato utupane lamai-gipe. *

²⁰ Akali Etasatusa bala namba towa atu naepene, Kotini tano okona atea. Akali Topimasa bala siki pelea andala, nambato bala Mailitasa tano okona atekale lo tepa alu epewane. *

²¹ Nimba wamba ini epolane asia mindi yando, pipiya peyoto, aisa andane epolane ana oko naepola-kola, nimba wamba ini ipupe. Akali Yupulusapi, Putenesapi, Lainasapi, wanda Kolotiyapi, dee Kitisene wandakali waka tupapi, utupane pitakanemanane nimba kuai lo atape leyai.

²² Akali Andane oko bala nimbananandini oko towa atu atoto, yakama pitaka ondowa moyo atekale lo pote leylo.

* **4:14-15:** 1Ti 1:18-20; Sam 62:12; Lom 2:6

* **4:19:** Ap 18:2; 2Ti 1:16-17

* **4:20:** Ap 19:21-22; 20:4; Lom 16:23

TAITASA Poloto Taitasana Pepa Peyo Pee Leane Oko

¹ Namba Polo. Namba Gotena piape akali ateyo okoni. Balana yame atea kale lata yane wandakali tupamane balana pii enene oko mana moto, bala lo bilipi loto, balana mana epene tupa wato minu atea kale nembo toto, Goteto namba Jisasa Kataisa posolos akali oko ata leane.

² Wamba wetete Goteto yuu oko yakale nalene atea-angi, owato pii na-lalane Gote okonemane potomisa pii mindi leane oko loto, wandakali saka atapowa atalane tene oko nanima gukale leaipia.*

³ Balana potomisa pii okone lo pana olane oto oko epea-angi, nanima taputu pua meane Gote okonemane namba languato, nimba nambana pii oko wandakali tupa lamawua atape leane. Wuane lea-kola, nambato balana pii okone lamawua atalawane.

⁴ Nambato Kataisa lo bilipi leyo pua teke, Taitasa nimbatopi bala lo bilipi lele okonemane nimba nambana iwanane enene gulo atele. Nanima taputu pua meane akali Jisasa Kataisa-la, Ayiane Gote-la, okonelapo-mane nimba ondowa moyoto, nimba yampane mo tambo laya yakale lo pote loto, nambato nimba pepa oko peyo epe leyo.*

Akali Epene Tupamane Esamane Piape Tupa Peakale Lape Leane Oko

⁵ Wamba namba nimba towa yuu ailene Kitita okona piape pua atepa-angi, piape pingita epa tupa nimbatu pikoyo pula lewa okoni. Akali esamane tupamane sosa tupa pitaka ando atea kale loto, nimba tano tupa pitakana poto, akali esamane minditupa makimi lape lalu, nambato nimba Kitita yuu okona atola lalu, nimba tepa alu epewa okoni.

⁶ Esamane mindi bala wanda mindiki pene atape-pene. Balana andopane tupamane Kataisa lo bilipi loto, angini ayiane-la, okone-lapona pii tangna nalene, mana koo mindi mina napene atalaini yando, akali okonemane esamane piape oko pua atape-pene.*

⁷ Sosa ando atalane akali mindimane Gotena piape piyane. Tene okonena, balato bia ipa tai kambua noto, keewa ata napipe-pene. Jia. Balato wandakali waka tupa minu peya napene, munipi minditaka kambua miauwa lakae lo nembo natape-pene. Balato wamba ini kapoyale yataka naene,

atape-pene tene mia napipe-pene. Balato gene yene ateyo nembo natene, mana koo waka mindi mina napene atape-pene.

⁸ Balato kuai lo nembo toto, bala tane pailo ando atape-pene. Balato mana epene tika-pene tupa epelewa wato minuto, wandakali opene epolai tupa moyo ando atape-pene.

⁹ Wandakali-mane Gotena pii tangna leaindo, sosa ando atalane akali okonemane Gotena pii enene oko wandakali utupane kuai lo mana lamaula-kola, utupane-mane balana pii okone ale wato, akali okonemane pii enene leya nembo tape-pene. Balato wandakali tupa mana lamawuato, yakamato wua pua atalapape lape-pene. Balato piape utupane katulo pukale nembo toto, Gotena pii mana balato wamba meane tupa duli lo minu atoto, wandakali tupa mana lamawua atape-pene.

¹⁰ Anu peakale akali okonepene tupamane sosa oko ando atape-penepe. Wandakali kambua-mane Gotena pii tangna loto, pii mee tene na-atene tupa loto, wandakali tupa minakasa alaini. Wuane puato, Juta yame wandakali kambua-mane akali tupa yala-pene umbaini tupa katiyapale loto, wandakali tupa minakasa alaini.*

¹¹ Wandakali okonepene tupamane munipi minditaka mia-makale nembo toto, mana mina napipe-pene tupa lamawuato, anda mindina paliyaini wandakali tupa pitakana bilipi oko minu koyalaini. Wandakali utupane-mane wuane napeakale loto, sosa ando atalane akali okonemane wandakali utupane lamawuato, yakamato wuane na-piyapape lape-pene.*

¹² Wamba Kitita tane wandakali tupa potopesa akali mindimane pii mindi leane oko loto, Kitita tane wandakali tupamane wambapi, andipapi, ole dindi lo owato pii loto, piape mindi napene, mee kepawa atoto, tomo ipapi kambua noto, yia kapua gulo atalaini leaipia.

¹³⁻¹⁴ Pii okone enene. Wandakali utupane-mane Gotena pii enene oko masia lamawuato, Juta yamena mee pii temane tupa ale wato, yakama tane-mane loo minditupa yato wato, wua piyapape lalainiko. Wandakali waka tupa manna tupa wato mina napene, Kataisa lo bilipi leyama nayu leakale loto, nimbatu wandakali utupane laiya lape.*

¹⁵ Mana epene minalaini wandakali tupa manne andeyai-kola, Gotena wenonga minditaka eya tupa pitaka epene teke-teke eya lo andalaini. Wuane tekeko, Kataisa

* **1:2:** Kol 1:26-27

* **1:4:** 2Ko 8:23 Ga 2:1-3; 2Ti 4:9-12; Lom 1:7

* **1:6:** 1Ti 3:2-7; 2Ti 2:23-26

* **1:10:** 1Ti 4:7-10

* **1:11:** 1Pi 5:2; 2Ti 3:5-7

* **1:13-14:** 2Ti 4:2; 1Ti 4:7-10

lo bilipi nalene wandakali utupane yakama mini yamapa-la, lapotaka koyatane eya okonena, utupane-mane andeyai-kola, minditaka eya tupa pitaka koo teke-teke eya nembo talaini.

¹⁶ Wandakali utupane-mane mee ambulini-mane angu loto, nanimato Gotena mana tupa nembo teyama lalaini tekeko, utupane-mane Gotena pii tanga loto, mana koo embo-pene wete tupa minu atoto, mana epene mindikipi mindi katulo mina na-piyaini. Wandakali utupane-mane mana koo okonepene tupa angu minalaini okonemane utupanena mana tupa mo pana wato, utupane-mane Gotena mana tupa nembo nateyai lo andawa lalane.*

2

Akali Mini-yene Yakamoto Wua Piyapape Lo Mana Lamaipe Leane Oko

¹ Wandakali utupane-mane wuane piyaini tekeko, nimbato Gotena pii oko nembo toto, wandakali utupane wua pua ateakale lo utupane mana lamawua atape.

² Akali mini-yene tupamane bia ipa tai kambua no keewa ata napipe-pene. Jia. Utupane-mane kuai lo nembo toto, mana epene tupa angu wato minape-pene. Utupane-mane Gote lo bilipi leyama nayu loto, kenda-pene epalane tupa pitaka awua atape-pene. Utupane-mane Gotepi, wandakali yangone tupapi, utupane towa epelewa yamapane yo atape-pene.

³⁻⁵ Wuane pua teke, wanda mini-yene tupamane mana epene tika-pene tupa minu peteakale lo nimbato utupane mana lamaipe. Kitisene wandakali tupamane mana koo mindi mineaindo, wandakali waka tupamane Kitisene utupanena mana koo okone andoto, Gotena pii oko andayo lamba lolopeyai. Wandakali waka tupamane wuane napeakale loto, wanda tai tupamane yakama akalin tupa pangosa pituto, yakama akalinipi, andopanepi, utupane towa epelewa yamapane yo pitipe-pene. Utupane-mane kuai lo nembo toto, mana koo mindi mina napene, mana epene tika-pene tupa angu minu pitipe-pene. Wuane pua pituto, utupane-mane yakama andaka piape pulane yola tupa pua pitipe-pene. Wanda tai tupamane mana epene utupane pitaka mineakale loto, wanda mini-yene tupamane mana utupane pitaka wanda tai tupanga mana lamawua pitipe-pene. Mana utupane pitaka wanda tai tupanga mana lamaikale nembo toto, wanda mini-yene tupamane wandakali yangone tupa layangama epoko pua piti napene, ole dindi

lo bia ipa tai nauwa lakae lo nembo natapene. Jia. Utupane-mane mana Goteto epele alane tupa wato minu epoko pua pitipe-pene.*

Iwana Patane Tupa Wua Piyapape Lo Mana Lamaipe Leane Oko

⁶ Wuane pua teke, nimbato iwana patane tupa mana lamawuato, utupane-mane kuai lo nembo toto, mana epene tupa minu ateakale lo lamaipe.

⁷⁻⁸ Nimbato pii mee mo kindi-kindu pua nalape. Jia. Nimbato mana kuai lo lamawua atole-kola, nimba towa pii yanda piyaini wandakali tupamane nimbana pii okone ale wato, nanima andayo pii koo lolane tene mindi mia napene atoto, yala ape-pene. Wandakali utupane-mane yala yakale nembo toto, nimbato Gotena pii oko wandakali tupa lamaiyo nayu lamaipe. Iwana patane tupamane mana epene nimbato minule tupa pitaka andoto, wato mineakalenga, nimba tane mana epene tupa angu wato minu atape.*

Piape Akali Tupa Wua Piyapape Lo Mana Lamaipe Leane Oko

⁹⁻¹⁰ Kitisene piape akali tupamane mana epene tupa angu minuto, piape kuai lo pua ateaindo, wandakali waka tupamane utupanena mana epene okone andoto, nanima taputi pua meane Gote okona pii oko epene wete ya lo nembo tolopeyai. Wuane nembo teakale nayuto, Kitisene wandakali tupamane yakama piape ando atalane akali tupana pii tanga nalape-pene. Jia. Yakamoto utupanena pangosa atape-pene. Piape ando atalane akali oko epele yakale nembo toto, piape akali tupamane pii balato lola tupa pitaka ale ape-pene. Utupane-mane piape ando atalane akali okona minditaka mindi pake mia napene, mana epene tupa angu wato minu atape-pene. Taitasa nimbato mana utupane pitaka piape akali tupanga mana lamaipe.*

Nimbato Mana Utupane Pitaka Lamawua Atape Leane Oko

¹¹⁻¹⁴ Anu peakale nimbato mana epene utupane pitaka lamaipe lo nambato nimba langeyope. Wamba mana koo tupamane nanima andi leai-kola, Jisasa Kataisato nanima bala tanena yame atoto, balana mana epene tupa pitaka wato minalapale nembo teapia. Tene okonena, balato nanima tinga lo mokale nembo toto, nanimana koo tupa apoyale, omeaipia. Matili nanima taputi pua mialane akali Jisasa Kataisa bala nanimana Gote tai-lene oko atoto, balana tii-pene oko towa panakame epolopeya nembo toto, andipa nanimato bala maliyo

* 1:16: 1Jo 1:6; 2:3-6

* 2:3-5: 1Ti 3:11; Ep 5:22-23

* 2:7-8: 1Ti 4:12; 1Pi 2:13-15

* 2:9-10: 1Ti 6:1

ateyama. Maliyo atoto, nanimato yuu okona mana koo tupa wato mina napipe-pene. Jia. Nanimato Gote masia mai napene, kuai lo nembo toto, mana epene tika-pene tupa wato minu atape-pene. Nanimato wuane pua atalapale loto, Goteto wandakali pitaka molo-peke lokale nembo toto, nanimata puti pua mialane akali Jisasa Kataisa epeakale leaipia. Bala panakame epoto, wandakali pitaka ondowa moyoto, mana utupane lamai-yaepia. *

¹⁵ Wandakali mindimane nimba anda napi leakale lo nimbato ando kondala napipe. Jia. Nimbato koo piyaini wandakali tupa laya loto, mana koo tupa kondalapa lape. Wuane lalu, wandakali-mane mana epene tupa mineakale nembo toto, nimbato mana utupane lamawua atape. Nimbato pii utupane pitaka Gotena wandakali tupa lamaiyo nayu lamawua atape. *

3

Wandakali Tupana Nembo Tene Tupa Mina Ika Loto, Mana Lamaipe Leane Oko

¹⁻² Wandakali pitaka-mane gapomane okona pangosa atoto, pii gapomane akali kawane tupamane lolai tupa alewa wato, wato minu atape-pene. Utupane-mane wandakali waka tupa towa yanda napipe-pene. Jia. Utupane-mane wandakali waka tupa pitaka towa tambo-tambo lo atape-pene. Utupane-mane wandakali waka mindi andayo pii koo mindi nalene, piape epene tupa pitaka puyale makande pitawa atape-pene. Wandakali pitaka-mane mana epene utupane pitaka wato mineakale loto, nimbato utupanena nembo-tene mina ika loyale, mana lamawua atape. *

³ Anu peakale nambato nimba languato, nimbato mana utupane lamawua atape leyope. Wamba Sataneto nanimata andakasa yakkola, nanimata tane mini napalene gulo atoto, Gotena pii tanga lo atema. Okone ang, naniuma umbairina epele alamanne tupapi, minditaka miauwa lakae lo nembo talamanne tupapi, utupane pitaka-mane nanimata andi lea-kola, nanimato mana utupanena katapusa piape tupa pimawua atema. Nanimato katapusa piape utupane pimawua atoto, wandakali waka tupa towa apiangu puato, utupanena minditaka tupa miauwa lakae lo nembo tema. Nanimato wandakali tupa towa yataka aka pua atoto, utupane embo wete ema-kola, wandakali utupane-mane nanimata embo wete yaini teke. *

⁴⁻⁷ Okone ang, nanimato mana epene tika-pene mindi mina napema-kola teke,

nanimata taputi pua mialane Gote okomane nanimata ondo wato, balana wenonga nanimata wandakali epene tika-pene ateyai lokale nembo teaipia. Goteto wuane lokale nembo toto, nanimata taputi pua mialane akali Jisasa Kataisato nanimata ondowa moyoto, piape pula mambele, nanimata saka atapawa atolane oko paluni gulo mialapale nembo teaipia. Nanimato paluni okone molopeyama lo maliyo atalapale nembo toto, Goteto balana Oli Sipitisa okona tai-lene andane kambua tupa nanimanga epeakale leaipia. Balato wuane lea-kola, nanimata ipa mema-angi, Goteto nanimata moyoto, nanimata dee lapone waninaja anjako gulaya ya-kola, balana Oli Sipitisa okomane nanimata mo wenene gulaya wato, nanimata taputi pua meaipia. Balato wuane peane okone ang, nanimato andema-kola, balato wandakali tupa epelewa yamapanne yoto, utupane towa mana epene minalane oko panakame andema. *

Man Koopi, Wandakali Koopi, Utupane Masia Maipe Leane Oko

⁸ Pii nambato leyo utupane enene wete eya. Mana epene utupane-mane wandakali moyalane. Tene okonena, Gote lo bilipi lene wandakali tupamane mana epene utupane wayumane minu ateakale nembo toto, nimbato mana epene utupane wandakali tupa-panga lamaiyo nayu lamawua atape.

⁹ Wandakali minditupa-mane mana Mosesato yata yane tupa nembo toto teke, nembo napalene gulo atoto, tipa minditupa puato, wandakali waka tupa towa pii yanda piyaini. Dee, utupane-mane yakamana yumbane wamba ateaini tupana gene tupa nembo toto, pii kambua lalaini. Mana okonepene tupamane wandakali tupa moya piyane. Wuaneko, nimbato mana okonepene tupa wato minuluwane lo ando atape. *

¹⁰⁻¹¹ Wandakali mindimane sosa oko yapo lo lapo puato, mo waka-waka gulaya oyale mangene minditupa peando, nimbato bala laiya loto, mana koo nimbato minele okone kondaa lape. Wuane sole-kola, balato nimbana pii okone tanga loto, mana koo mindiki okone teke mineando, nimbato pai pua teke bala laiya loto, mana koo nimbato minele okone kondaa lape. Wuane sole-kola, balato mana koo mindiki okone teke minu ateando, balana mana koo okomane bala koo piyane akali mindi ateyia lo andawa lolopeya. Bala Gotena asini epene oko puyangi lola oko andoto, nimbato bala masia maiyu kondape. *

* **2:11-14:** 1Jo 2:15-17; Ga 1:4; Ek 19:5; Lo 4:20; 7:6; Ese 37:23; 1Pi 2:9 * **2:15:** 1Ti 4:12 * **3:1-2:** Lom 13:1-7; 1Pi

2:13-15 * **3:3:** 1Ko 6:9-11; Ep 2:2; 5:8 * **3:4-7:** 2Ti 1:9-10; Ep 5:25-27; Ap 2:17-18 * **3:9:** 2Ti 2:14,16-17 * **3:10-11:**

Pii Lokoyo Pua Leane Tupa

¹² Upa andane wete piyane ana oko epolangi, namba Nikapolisa tano okona poto atokale. Nambato yuu okonena po atoto, akali Atemasa yandopi, Tikikasa yandopi, okone-lapona mindi Kitita yuu nimba atele okona epeakale lokale. Okone angı, nimba Nikapolisa tano okona wamba ini ipupe.*

¹³ Akali Apolosa-la, loo tupana mana andene akali Sinasa-la, okonelapo asini moyale polapi-angi, minditaka mindi liyam-banga jia yola-kola, liyamba asini polapele nembo toto, nimbato okonelapo wayumane moyalu, asini peakale lape. *

¹⁴ Dee, Kitisene wandakali tupamane dini epene mindi lia napene, mee ata napipe-pene. Minditaka mindi wandakali waka tupanga jia yola-angi, Kitisene wandakali tupamane wandakali utupane moyape-pene nembo toto, utupane-mane piape epene tupa pua atape-pene. Utupane-mane mana okone wato mineakale loto, nimbato mana okone lamaipe. *

¹⁵ Wandakali namba towa atu ateyama tupa pitaka-mane nimba kuai lo atape leyai. Wandakali nimba towa atu ateyai tupamane Gote lo bilipi loto, nanima towa yamapano yo atalaini okoni. Nanimato utupane lamawuato, yakama kuai lo atalapape leyama oko nimbato utupane lamaipe. Goteto yakama pitaka ondowa moyakale lo nambato pote leyo.

* **3:12:** Ep 6:21-22; Kol 4:7-8 * **3:13:** Ap 18:24-25; 1Ko 3:5-6; 16:12 * **3:14:** Ep 4:28

PILIMONE Poloto Pilimonena Pepa Peyo Pee Leane Oko

¹ Namba Polo. Nambato Jisasa Kataisana piape piyawane mambele, namba andi latane ateyo. Kitisene amene Timoti bala namba towa atu ateyapa. Pilimone nimba nalipa towa piape mindiki piyamane nembo toto, nalipato nimba towa epelewa yamapa yoto, nimbania pepa oko peyo epeleya.

² Wamba nalipato Gotena piape oko pua atepa-kola, wandakali waka minditupa-mane nalipa yanda pingeai-kola, Akipasa balato nanima moyoto, Gotena piape pua ateane. Balapi, nanimana Kitisene imalini Apiapi, nimbania andaka amunguli piyaini Kitisene wandakali tupapi, utupane pitakania pepa oko andape-pene teke.*

³ Akali Andane Jisasa Kataisa-la, nanimana Ayiane Gote-la, okonelapo-mane yakama ondo wato, yakamana yamapane mo tambo laya yakale lo nambato pote leyo.

⁴⁻⁵ Pilimone nimbato Akali Andane Jisasa lo bilipi loto, Gotena wandakali pitaka towa epelewa yamapane yo atelene oko wandakali minditupa-mane namba langeai. Nambato pii okone ale wato, ole dindi lo nimba nembo toto, nambana Gote oko ando wayu pele lalawane.

⁶⁻⁷ Nambato ale ewa-kola, amene Pilimone nimbato Gotena wandakali tupa towa epelewa yamapane yoto, utupanena yamapane oko mo tai layawa atalane lene okone nambato ale wato, namba yamapane epene paluto, epele andane wete ewa. Matili nimba nanima towa potomane lo atole mambele, wandakali waka tupamane andolai-kola, wandakali-mane Kataisa wata alapale nembo toto, Goteto mangene epene tupa pitaka piyane oko andeakale lo nambato pote leyo.*

Pilimone Nimbato Onesimasa Lamolo-peke Lape Leane Oko

⁸⁻¹⁰ Namba Poloto Jisasa Kataisana piape puato, balana pii layene epene oko wandakali tupa lamai-yawane mambele, namba andi latane ateyo. Namba andi latane atoto, Gotena pii layene epene oko Onesimasa mana lamaiwa-kola, balato pii okone ale wato, Jisasa lo bilipi leane okonena, bala nambana iwanane gulo ateya. Namba Jisasa Kataisana piape akali atalawane mambele, nambato nimba languato, nimbato Onesimasa moyoyale, mangene pipe-pene mindi pipe lo nambato

nimba langiwa-yale, okone katu lapia-yale tekeko, nimbato mangene okone pipe naleyo. Jia. Nimbato wandakali tupa towa epelewa yamapane yo atalene mambele, nimbato Onesimasa moyoyale, mangene okone pula leyo.*

¹¹⁻¹⁴ Wamba nimbato Gotena pii layene epene oko wandakali tupa lamawua atewa-kola, akali minditupa-mane namba andi leai. Andi leai-kola, nambato Onesimasa bala nimbania panda moto, namba moyo ateakale nayuto, namba tepe nayakale nemboto atawua. Wuane tekeko, nambato nimba langeyo nayu loto, Onesimasa namba towa atu ateakale lo nimbato ando kondape lauwa-kola, nimbato katu lapi-yale, okone kuai lapia-yale. Jia. Nimba tane-mane Onesimasa bala namba towa ateakale lo ando konda wakale lapi-yale, okone kuai lapia-yale tekeko, nimbato bala namba towa atalapa nalapi. Tene okonena, nambato nambana yamapane yalawane Onesimasa bala namba towa ataipa oko kondalu, nimba atelenga peke leakale leyo. Wamba balato nimba moyo napeane tekeko, andipa balato katulo nimbapi, nambapi, nalipa lapotaka moyolo-peya.

¹⁵ Enene, wamba balato nimba tepe alu, wali epoto, ana minditupa namba towa atu ataipa tekeko, bala wali epo ateane mambele, balato Akali Andane oko lo bilipi leane. Wuane, Goteto andola-kola, nimbato Onesimasa lamolo-peke leendo, bala nimba towa atu atapowa atolo-peyapi guleya.

¹⁶ Andipa balato Akali Andane oko lo bilipi leya okonena, bala nimbania piape akali angu ata napeya. Jia. Bala nalipana Kitisene amene gulo ateya. Nambato bala towa wayumane epelewa yamapane yo atalawane tekeko, balato nimbania piape pulupeke leakale lo nimbato bala lamolo-peke leendo, nimbato bala towa wayumane wete epelewa yamapane yo atolopele.*

¹⁷ Wamba nimbato namba towa potomane loto, Jisasa Kataisana piape oko pua atepa okoni. Wuane pua teke, nimbato nalipa potomane lo atapakale nembo teendo, nimbato namba lamiapi-yale pua teke, Onesimasa lamolo-peke lape.

¹⁸ Wamba balato mana koo mindi nimbania peae yandopi, yano mindi balanga yandopi, nimbato balana gene oko kunu apoto, nambana gene oko peyo yata-gipe.

¹⁹ Balato yano mindi meae yando, nambato balana yano okone peyokale loto, namba Poloto pii oko pepa peleyo. Wamba nimbato Gotena pii layene epene oko nimba langewa-kola, nimba saka atapowa

* 1:2: Kol 4:17; 2Ti 2:3-4

* 1:6-7: 2Ko 7:4

* 1:8-10: Kol 4:9; 1Ko 4:14-15

* 1:16: 1Ti 6:2

atolane tene oko mee okoni. Tene okonena, nambana yano andane okone nimbanga eya. Nambato nimba languato, nimbato nambana yano okone peyape katulo lauwalyale tekeko, nambato wuane na-lokale.

²⁰ Enene, amene nimbato Akali Andane oko nembo toto, nambana yamapane mo kuai laya wato, Onesimasa lamolo-peke lapi lakae lo nembo teyo.

²¹ Nimbato mana epene minule okonemanane mana nambato minape leyo okone sia minuto, nimbato bala wayumane wete moyolo-pele lo nambato nimbanga tungi peyoto, nimbana pepa oko peyo epe leyo.

²² Wuane lalu, nambato pii mindi konda pua leyo. Namba katapusa ateyo-kola, yakamoto Gote lo pote leyai okone Goteto ale wato, namba yakama ateyainga puu lolopeya nembo teyo-ko. Namba pangulane panda mindi nimbato mandeke pingepe.*

Pii Lo Koyo Pua Leane Oko

²³ Ipapotasa balapi Jisasa Kataisana piape piyane okonena, balato namba towa atu andilatane atoto, nimba kuai lo atape leya.*

²⁴ Dee, namba towa piape mindiki piyamanane akali Makipi, Atitakusapi, Dimasapi, Lukupi, utupane pitaka-manne nimba kuai lo atape leyai teke.*

²⁵ Akali Andane Jisasa Kataisa bala nimbana tandini oko towa atu atoto, yakama pitaka ondowa moyo atekale lo nambato pote leyo.

* **1:22:** Pl 1:25-26; 2:24 * **1:23:** Kol 1:6-7 * **1:24:** Kol 4:10-14; 1Ti 4:7-11

IPUTU

Iputu Yame Tupamane Pepa Meaini Oko

*Jisasa Bala Akali Andane Wetete Ateya
Leane Oko*

¹ Wamba ole kambuangga, potopesa akali tupamane mana waka mindi-pene tupa wato minuto, Gotena pii oko nanimana yumbane tupangga lamaiki peainipia.

² Matili yuu oko koyo puyale pea-kola, balana iwanane okomane pii minditupa nanima langeaipia. Bala minditaka eya tupa pitaka paluni gulo meakale nembo toto, Goteto bala iwanane okona pii okomane yuu ati-la yakale leaipia.*

³ Iwanane oko bala Gote ateya mindiki okonepene teke atoto, Gotena tii-pene oko andawa lalane. Minditaka eya tupa koyolane loto, Jisasato balana pii tai-lene okomane minditaka eya tupa pitaka minawata atalane. Balato wandakali tupana koo tupa apoyale piape peane oko pikoyo piyu, ati kenga kinji tai-lene wetete okona sia toko yane okona kii tikasa peteaipia.*

⁴ Gotena iwanane oko gene andane meane okomane enjoje tupana gene tupa sia mineaipia Wuane pua teke, piape andane balato peane okomane enjoje tupana piape tupa sia mineaipia. Tene okonena, Gotena Iwanane okone bala enjoje tupa sia minu, Akali Andane wete ateya lo andeyama.*

⁵ Anu peakale nambato wuane leyope. Wamba Goteto balana iwanane okone andayo, namba balana ayiane atolowakola, bala nambana iwanane atolopeya leaipia. Matili balato balana iwanane oko lamawuato, andipa namba nimbanda ayiane ateyo-ko. Nimba nambana iwanane atele leaipia. Goteto Jisasa lamawuato, wuane leane tekeko, balato enjoje mindikipi mindi ando, pii okone naleaipia. Jia.*

⁶ Wamba Gotena iwanane bulupane oko bala ati kenga atea-kola, Goteto bala yunga epeakale loto, enjoje tupa pitakame bala lo lotu lape-pene leaipia.*

⁷ Goteto balana enjoje tupa nembo toto, nambato nambana enjoje tupa popo lo awua epalane okonetaka gulo atekale lalu, nambana piape pingiyaini enjoje utupane ita lungu yale teke gulo atekale lalu, piyawane leaipia.*

⁸ Goteto enjoje tupa okonetaka gulo ateyai leane tekeko, balato balana iwanane oko lamawuato, Gote nimbato pitaka taka ando atapowa atolopele. Nimbato mana epene tika-pene tupa angu minu atoto, Goteto bala pitaka taka kualo ando atalene leaipia.*

⁹ Mana yata yane tupa kalo piyaini mana okone nimbato embo wete wato, mana tika-pene tupa angu epele wete alene. Tene okonena, nimba kinji atola nembo toto, nimbanda Gote nambato nimbanda kawanenga wele gae lewa-kola, nimba kinji andane wetete mindi gulo atoto, enjoje nimba towa atalaini tupa sia minuto, epelewa atee okoni leaipia.

¹⁰ Wuane lalu, Goteto balana iwanane oko dee lapone lamawuato, Akali Andane, wamba nimbato yuu oko yakale lalu, ati kenga eya tupa pitaka nimbanda kini-mane waa peene leaipia.*

¹¹ Tona wambane gulalane pua teke, matili yuu ati-la wambane gulalu, koyolopeya tekeko, Akali Andane nimba atapowa atolopele.

¹² Wandakali-mane tona wambane mindi yokoto lekawa yata alu, wenene mindi mo piyaini. Wuane pua teke, yuu ati-la wambane gulola-angi, Akali Andane nimbato okonelapo mo lawa pulupele tekeko, nimba tane lawa napene, mee atalene okonepene teke mee atapowa atole-kola, nimbanda oto oko koyo napulu-peya leaipia.

¹³ Wamba Goteto balana iwanane oko lamawuato, nimba nambana kii tikasa pitule-kola, nambato nimba towa yandapene tupa pitaka sia minuto, utupane nimbanda pangosa atekale lokale leane tekeko, balato enjoje mindikipi mindi ando pii okone naleaipia. Jia.*

¹⁴ Enjole yame pitaka sипитса gulo atoto, Gotena piape piyaini. Goteto wandakali tupa molo-peke lokale nembo toto, enjoje tupamane wandakali utupane moyo piape pulu peakale lalane.*

2

Gotena Pii Wayumane Nemboto Atamakale Leane Oko

¹ Goteto wuane leane okonena, nanimato balana iwanane oko awua tepa wato, masia maulumanne. Tika ando atoto, balana pii wamba ale ema tupa wayumane nemboto tattawa atamakale.

² Anu peakale nambato wuane leyope. Wamba enjoje tupamane pii mindi leainangi, Mosesato Gotena loo paiyasa tupa

* **1:2:** Jo 1:3 * **1:3:** Ap 2:33-35; Kol 1:18-20; Ip 8:1 * **1:4:** Pl 2:9-11 * **1:5:** Ap 13:32-33; 2Sa 7:14; 1Tem 17:13
 * **1:6:** Lom 8:28-30 * **1:7:** Sam 104:4 * **1:8:** Sam 45:6-7 * **1:10:** Sam 102:25-27 * **1:13:** Sam 110:1 * **1:14:**
 Sam 34:7; 91:11

mo awua poto, wandakali tupa lamai-yaepia. Gotena loo paiyasa yata yane utupane tai gulo ya-kola, loo paiyasa utupane kalo piyu tanga leaini wandakali utupane pitaka yakama tanena mana koo mineaini okonena yole koo mindi miapene meaninipia.*

³⁻⁴ Matili Akali Andane okomane wandakali tupa lamawuato, nambato yakama molo-peke lokale leaipia. Balana pii okone ale yaini wandakali tupamane balana pii okone enene leaini. Wandakali waka tupamane pii okone enene ya lo nembo teakale nayuto, Goteto balana pii okone mo tai layawa, kokoli piapepi, metekolo piapepi, piape tai-lene waka-waka tupa kambua peapia. Wuane piyu, bala tanemanne nembo teane pua, Goteto Oli Sipitisa okona petesene tupa tale puato, wandakali mindiki-mindiki lo maiki peaipia. Matili Jisasato nanima molo-peke loyale piape andane minditunga peaipia. Nanimato balana piape peane utupane angini mindi jia ya lo nembo toto, bala masia mawua atemando, nanimana mana koo minulumane okonena yole koo wete mindi molopeyama. Yole koo okone molomane nembo toto, Goteno pii okomane aki leyape lo wayumane nembo tamakale.*

Goteto Gene Andane Mindi Jisasa Mayane Leane Oko

⁵ Yuu wenene mindi matili yolopeya leyama oko enjole tupamane ando ateakale Goteto naleaipia. Jia.

⁶ Wamba akali mindimane pii mindi Gote ando leane oko pepa peyo yata wato, yuu okona wandakali tupa nanima angini mindi jia. Anu peakale nimbato nanima nembo tatawa atoto, moyo ando atalenepe leaipia.*

⁷⁻⁸ Enene, nimbato akali Atame waa pee-anggi, nimbato minditaka pitaka taka balana pangosa yakale loto, balato utupane pitaka ando ateakale leene okomane nimbato bala laiyu loto, gene andane mindi bala maiyee-kola, bala aja mee teke enjole tupana nappinga yale ateane lo layene eya. Goteto minditaka mindikipi mindi mee yakale naleaipia. Jia. Balato pitaka taka akali Atame okona pangosa yakale leane tekeko, andipa nanimato andeyama-kola, pitaka taka nanimana yuunga wandakali tupana pangosa ata naapeya.

⁹ Okone enene tekeko, Goteto nanima ondo wato, nanima pitakana koo tupa apoyale, Jisasa bala omeakale nembo teaipia. Wuane nembo toto, ole ukupini mindilapo bala enjole tupana aja nappinga

gulo ateakale leaipia. Wuane lea-kola, Jisasato nanima moyoyale tandaka nalu omeane mambele, Goteto bala laiyu loto, gene andane mindi mayane oko nanimato nembo teyama.*

¹⁰ Wamba Goteto yuu ati-la yakale leane-angi, minditaka yola tupa pitaka bala Iwanane Jisasana yakale nembo teaipia. Wuane nembo toto, balana iwanane okonemane yuu ati-la okolapo yakale leaipia. Matili Goteno andopane kambua ati kenga yuu epene okona peakale nembo toto, Jisasato wandakali utupane ati kenga polane asini oko andawa loyale piape pua ateaiapia. Bala yuu okona wandakali enene mindi atoto, tandaka nalu omeane okonemane bala wandakali molo-peke lalane akali mindi guleaipia. Balato nanima moyo omeane mana okone epene tika-pene mindi eya.

¹¹ Anu peakale nambato wuane leyope. Jisasato wandakali minditunga mo kuai laya eya-kola, wandakali utupane kuai-lene wete gulalaini. Jisasapi, wandakali utupanepi, pitakana ayiane mindiki angu ateyai. Tene okonena, Jisasato wandakali utupane balana amene imalini ima ateyai loyale yala na-anale.*

¹² Wandakali utupane Jisasana amene imalini ima ateyai nembo toto, Goteno pii pepa pelene eya mindimane loto, Aiyane Gote, nambato nimbana gene oko nambana amene imalini yame tupanga lamauwakale. Utupane-manu lotu loyale amunguli pula-anggi, nambato wandakali utupanena tombenenga atoto, nimbana gene oko laiyu lo sojno lokale layene eya.*

¹³ Dee, pii mindi balato leane oko loto, nambato Gotenga tungi peyo atokale leane lo layene eya teke. Dee, pii waka mindi leane oko loto, andopane Goteto namba geane tupa namba towa atu ateyama oko andalapape layene eya. Goteno pii pepa pelene eya utupane pitaka-mane wuane loto, yuu okona wandakali tupa pitaka Jisasana amene imalini ima gulo ateyai layene eya.*

¹⁴⁻¹⁵ Wandakali nanima umbaini atalu, tundupa paliyu pene ateyama-kola, Satane bala tai atoto, katulo wandakali minu ome laya alane. Balato wuane piyane okonena, wandakali-mane omolomane lo yuku wato, ole dindi lo balana pangosa andi latane gulo ateai-kola, Jisasato utupane tinga lo moyale, omokale nembo teaipia. Bala omolowa okomane Satanena tai-lene oko

* 2:2: Ga 3:19 * 2:3-4: Ip 10:29; 12:25; Mk 16:20; 1Ko 12:4,11 * 2:6: Sam 8:4-6 * 2:9: Pl 2:8-11 * 2:11: Mt 25:40 * 2:12: Sam 22:22 * 2:13: Ais 8:17,18 * 2:14-15: 1Jo 3:7-8; Lap 12:10

minu koyokale nembo toto, Jisasa bala umbaini atalu, tundupa paliyu pene yuu okona wandakali mindi ateapia. *

¹⁶ Jisasato piape peane okone enjole tupa moyoyale naapeapia. Balato Apatakame yame tupa moyoyale piape okone peaapia.

¹⁷⁻¹⁸ Wamba mandeke pene minditupa Jisasanga epea-kola, bala tandaka no ateapia. Wuane pua teke, andipa mandeke pene minditupa wandakali tupanga epeyakola, Jisasato wandakali utupane katulo moyalan. Balato wandakali tupa ondo wato, utupanena koo tupa apoyale, Gotena piape kuai lo pimai-yane pitisa akali kawane atokale nembo teaapia. Pitisa piape okone puyale, bala yuu okona akali ateaini okonepene teke atape-pene guleapia. Tene okonena, bala yuu okona akali enene mindi ateapia.

3

Jisasa Bala Pitisa Akali Kawane Ateya Leane Oko

¹ Jisasa bala akali enene mindi atoto, Gotena pitisa akali kawane atalu, aposolo piape piyu, piyane lo nanimato lapana alaman. Kitisene amene imalini yame, Gote ati kenga ateya okomane yakamapi ee lo mea-kola, Jisasato yakama moyo Gotena piape utupane piyane lo yakamoto wayumane nemboto atalapape.*

² Wamba Mosesato pii Goteto Goteto leane tupa wato minuto, Gotena wandakali tupa pitaka moyo piape kuai lo pua ateapia. Wuane pua teke, Goteto Jisasa makimi loto, piape peakale lea-kola, Jisasato pii Goteto leane tupa wato minuto, piape utupane pitaka kuai lo wete pua ateapia.

³⁻⁴ Nanimato anda epene mindi andoto, anda okone epene ya lalamane tekeko, anda ateya tupa pitaka akali mindimane peya-kola, pitane atalane. Tene okonena, nanimato anda epene piyane akali okone wayumane wete laiyu lalamane. Okone taku gulo, nanimato Mosesa bala akali epene mindi ateane lalamane tekeko, wamba Goteto Jisasa lamawuato, nimbato pitaka taka yakale lape lea-kola, Jisasato utupane pitaka yakale lea-kola, yaepia. Tene okonena, nanimato Jisasa wayumane wete laiyu lape-pene.

⁵ Mosesa bala Gotena piape akali atoto, balana anda okona piape puato, pii Goteto leane tupa wato minuto, pii matili Goteto lapanawa olopeya tupana minditupa mandeke puato, Gotena pii minditupa wamba ini lamawua ateapia.*

⁶ Enene, Mosesa bala Gotena piape akali ateane tekeko, Kataisa bala Gotena iwanane ateya. Balato Gotena pii wato minu atoto, balana yame tupa moyo ando atalane-ko. Jisasato nanimoyolobeya nembo toto, nanimato bala laiyu lo atape-pene. Wuane lama pulu, nanimana omolane oto oko epola okona giaulemando, nanimana balana yame atoloma-kola pulupuya.

Yakamato Jisasa Masia Maulaini, Tika Ando Atalapape Leane Oko

⁷⁻⁹ Nanimato Gotena pii pepa pelene eya oko dii lo andeyama-kola, Oli Sipitisa okomane Gotena pii loto, wamba Isatale tane tupana yumbane tupa wandakali napalene yuu okona ateai-angi, mali (40) paiyasa tukumindi nambato utupane moyo piape kuai lo pua atewa. Nambato wuane pua atewa tekeko, wandakali utupane-mane nambana pii ale naene, tuu pua tanga lo atoto, namba minu mandeke peai-ko. Yakamato wuane pulaini. Yakamato Gotena pii okone ale yaindo, wato minalapape.*

¹⁰ Anu peakale nambana wuane leyope. Wamba yakamana yumbane tupamanne mana koo utupane minu ateai-kola, nambato wandakali utupane towa yataka andane wato, wandakali utupane pii lamawua ateyo-kola, utupane-mane nambana mana tupa anda napene ato, wato mina na-piyaini lewa.

¹¹ Utupane-mane nambana mana wato mina piyaini okonena, namba yataka andane wato, enene wetete matili-matilipi wandakali utupane nambana oto mo atolane yuu epene okona katulo naepolopayai lewa. Goteto wuane leaapia.*

¹² Amene imalini yame, yakamana mindimane Jisasa lo bilipi nalene atoto, yamapanne koo mindi pangula-kola, Gote saka atapowa atene oko masia maulaini. Tika ando atalapape.

¹³ Ole dindi lo Gotena pii pepa pelene eya mindimane nanim languato, andipa yakamoto Gotena pii oko ale aa napimakale lo tuu pua ata na-piyapape layene eya. Sataneto yakama minu makande pula-kola, yakamana mindimane mana koo tupa wato minuto, Gotena pii ale na-wakale lo tuu pua atoto, Jisasa masia mawua atolaini. Tika ando atoto, yakama pitaka-mane Jisasa lo bilipi lamakale lo, yakama teke-teke mindi akali mo tai laya wato, wua piyapape laka pua atalapape.

* **3:1:** Ip 4:14; 7:26-28; Nam 12:7

* **3:5:** Nam 12:7

* **3:7-9:** Sam 95:7-11; Ek 17:7; Nam 20:2-5

* **3:11:** Nam

¹⁴ Wamba bulupane nanima Kitisene gulema-angi, Kataisato nanima moyolopeya lo balanga tungi peyo atema. Andipapi wuane pua teke, nanimato balanga tungi peyo atemando, nanimato bala towa potomane lo atu atoloma-kola pulupeya.

¹⁵ Gotena pii pepa pelene mindimane loto, wamba yakamana yumbane tupamane Gotena pii oko ale aa napimakale lo tuu pua ateaini tekeko, andipa yakamato pii balato leane oko ale yaindo, yakamato Gotena pii oko ale aa napimakale lo tuu pua ataa na-piyapape layene eya.*

¹⁶ Wamba wandakali api tupamane pii Goteto leane tupa ale wato, tanga loto, luawa ateainipiape. Mosesa towa atu Isipi yuu oko tepa alu peaini wandakali utupane pitaka-mane mana koo okone wato meainipia.*

¹⁷ Mali (40) paiyasa tukumindi tupana Goteto wandakali api tupa towa yataka amawua ateaiipiape. Koo peaini wandakali utupane towa Goteto yataka amawua ateaiapia. Yatakawa atea-kola, wandakali utupane pitaka wandakali napalene yuu okona epoko pua atalu, lomba-pene yalu, omeainipia.*

¹⁸ Goteto wandakali api tupa andayo, enene wetete wandakali utupane oto mo atolane yuu Kenane okona katulo naepolopeyai leyo leaipiape. Balana pii tanga lo ateaini wandakali tupa andayo, balato wuane leaipi.

¹⁹ Wandakali utupane-mane pii Goteto leane tupa nemboto mina napeainipia. Tene okonena, wandakali utupane-mane oto mo atolane yuu okonena katulo kolandaka naleaini lo nanimato nembote yama.

4

Gotena Yuu Epene Okona Kolandaka Lamakale Leane Oko

¹⁻² Wamba Goteto potomisa pii epene mindi Isatale tane wandakali tupanga lamawuato, yakama nambana Kenane yuu epene okona katulo epolopeyai leaipi. Wuane lea-kola, wandakali utupane-mane pii okone mee alene-mane ale wato, bilipi naleainga, pii okonemane wandakali utupane katulo moyo napeaiopia. Wamba Goteto wandakali utupane towa potomisa pii mindi lamaiyane pua teke, balato potomisa pii mindi nanimapi langea okoni. Balato potomisa pii okone nanim languato, yakamato nambana oto mo atolane yuu epene okona katulo epolopeyai leaipi. Balana potomisa pii okone mee

yapowa eya-ko. Yakamana mindimane balana pii oko ale wato, bilipi lo ata napeando, wandakali okone bala Gotena yuu epene okona kolandaka nalolo-peya lo yuku wato, nanimato wayumane ando atamakale.

³⁻⁵ Ole yanane oko andayo Gotena pii pepa pelene eya mindimane loto, Goteto balana piape peane tupa pitaka pikoy piyu, ole yanane okona bala oto mo ateane layene eya. Dee, Gotena pii pepa pelene eya mindimane loto, matili-matilipi nambana pii tanga leaini wandakali utupane nambana oto molane yuu epene okona katulo naepolopeyai layene eya. Wamba Goteto yuu ati-la yakale leane-angi, balato Isatale tane wandakali tupana oto mo atolane yuu mindi yakale leane tekeko, matili balato pii mindi leane oko loto, namba yataka wato leyo-ko. Enene wetete, wandakali utupane nambana oto mo atolane yuu okonena katulo naepolopeyai leyo leaipi. Wamba Goteto wuane leane tekeko, Kataisa lo bilipi lene wandakali nanimato Gotena oto mo atolane yuu epene okona polo-peyama.*

⁶ Andipa nanimana minditupa-mane balana yuu epene ati kenga eya okona katulo kolandaka lolo-peyama tekeko, wamba Goteto Isatale tane wandakali tupa potomisa pii mindi lamawuato, nambato Kenane yuu oko yakama gukalenga, yakama yuu okonena pulupa leaipi. Wuane lea-kola, utupane-mane balana pii tanga loto, Kenane yuu okona kolandaka naleainipia.

⁷⁻⁸ Isatale tane wandakali utupane Akali Jasua towa atu Kenane yuu okona napeaini tekeko, matili wandakali utupanena andopane tupa bala towa atu Kenane yuu okonena peainipia. Gotena oto mo atolane yuu epene Kenane okone angu ya-yale, pii matili wete Dapitito pepa peleane okone Goteto nalea-yale. Balato Gotena pii pepa peyoto, andipa yakamato nambana pii oko ale yaindo, yakamana mini yamapa-la ana guleme atoto, nambana pii okone tanga lolaini andalapape leaipi.*

⁹⁻¹⁰ Wamba Goteto balana piape peane tupa pikoy piyu, bala oto mo ateane pua teke, Gotena oto mo atolane yuu epene okona po atolane wandakali okonemane balana piape pulane tupa pikoy piyu, bala oto mo atolane. Oto mo atolane gii okone ole yanane okonepene eya-kola, Gotena wandakali tupamane katulo oto okone mo atalaini.*

¹¹ Isatale tane wandakali tupamane wamba Gotena pii tanga leaini pua, andipa nanimana mindimane Gotena pii tanga loto, yuunga peakalu, alu pulumane.

* 3:15: Ip 3:7-9 * 3:16: Nam 14:1-35 * 3:17: 1Ko 10:6-10 * 4:3-5: Sam 95:11; Ip 3:11; Jen 2:2 * 4:7-8: Sam 95:7-8; Lo 31:7; Jas 22:4 * 4:9-10: Ip 4:3-4

Nanimato tika ando atoto, Gotena oto mo atolane yuu epene okona kolandaka lamakale nemboto atamakale.

¹² Anu peakale nambato wuane leyope. Gotena pii layene saka atene okonemane napia nene mindisa atata-pene tupa sia minuto, piape tailo piyane. Gotena pii okonemane nanimana nembo-tene yamapane-la, okone-lapona pangosa poto, nanimana kulini kimbu piyane tupapi, kulini tundapuni paliyane tupanapi, utupanera giao loto, nanimana yapa lo tale piyane.*

¹³ Tene okonena, minditaka Goteto yakale leane eya tupana mindikipi mindi katulo too pitane ata napiyane. Jia. Utupane pitaka panakame yola-kola, nanimana mana minalamane utupane pitaka Gotena wenonga panakame yolopeya. Tene okopene mindi atea-kola, nanimana mana utupane minema lo Gote lamaipe-pene gulolo-peya nembo toto, nanimato Gotena pii oko tanga nalene, wayumane wato mina-makale.

Jisasa Bala Pitisa Akali Kawane Wetete Ateya Leane Oko

¹⁴ Gotena iwanana Jisasa bala ati kenga poto, nanimana pitisa akali kawane wetete ateya. Pitisa piape okone pua atoto, balato nanimana katulo moyalane nembo teyama. Tene okonena, nanimato Jisasa andayo pii lapana alamane okone bilipi leyama nayu lamakale.*

¹⁵ Anu peakale nanimato wuane pi-makalepe. Wamba Sataneto Jisasa minu mandeke pea-kola, Jisasato koo mindi napene atoto, Satane sia mineaipia. Nanimana tane tai ata naopeyama-kola, Sataneto nanimana minu mandeke piyane tekeko, nanimana pitisa akali kawane Jisasa balato nanimana ondo wato moyalane.

¹⁶ Sataneto nanimana minu mandeke pulangangi, Jisasato nanimana ondo wato moyolopeya nembo toto, nanimato yuku naene, Gote lo pote lamakale. Pote loloma okonemane Gote bala yamapane epene palu pitiyane sia toko okona nanimana mandaka poloma-kola pulupeya.*

5

Jisasato Pitisa Piape Puato, Wandakali Molopeke Lalane Leane Oko

¹⁻³ Wandakali-mane Gotena pii oko wayumane nembo natene ato, balana asini epene oko awua tepa alu, koo tupa piyaini. Wuane pua teke, yuu okona pitisa akali kawane atalaini tupa pitakame Gotena mana tupa ole dindi lo

wayumane wato mina napene ato, koo piyaini teke. Tene okonena, pitisa akali kawane tupamane wandakali utupane laiya nalene, tenga-mane mo tika piyaini. Pitisa akali kawane okomane bala tanena koo piyane tupa apialu, wandakali waka tupana koo piyaini tupa apialu peakale nembo toto, yia memepi, bulumakaopi, okonetaka tupa peyoto, Gote lo opa mawua atalainipia. Wandakali-mane koo piyaini tupa Goteto apeakale loto, pitisa akali kawane okonemane opa tupa Gote maiyu, minditaka epene tupa petesini maiyu piyane. Goteto pitisa akali kawane utupane mindiki-mindiki lo yapa lo moto, wandakali tupa moyo balana piape utupane peakale lalane.*

⁴ Pitisa akali kawane oko bala tane-mane piape okone pukale loto, napiyane. Jia. Wamba Goteto akali Etone ee lo moto, pitisa akali kawane piape okone peakale leaipia. Wuane pua teke, andipa Goteto akali mindi ee lo meya-kola, balato pitisa akali kawane oko atoto, piape okone piyane.*

⁵ Wuane pua teke, Kataisato bala tanane gene oko laiyu loto, namba pitisa akali kawane atoto, piape okone pukale naleaipia. Jia. Wamba Goteto bala lamawuato, andipa namba nimbana ayiane ateyo-kola, nimba nambana iwanane atele leaipia.

⁶ Gotena pii pepa pelene eya waka mindi-mane Jisasa andayo loto, wamba akali Meleki-seteke bala pitisa akali atoto, piape pua ateane pua teke, nimbati piisa akali atoto, piape okone pua atapowa atolopele layene eya.*

⁷ Wamba Jisasa bala Gesemani yuu okona atea-angi, Goteto bala moyando, bala oma napulu-peya nembo toto, balato ai lo yamatata loto, Gote nimbato namba moyape lo pote leaipia. Jisasa bala Gotena pangosa atoto, pote lea-kola, Goteto Jisasana pote leane okone ale wato, bala minu tai laya yaepia.*

⁸ Jisasa bala Gotena iwanane ateane tekeko, bala tandaka neane okonemane Gotena pii wato minu atene mana oko meaipia.

⁹⁻¹⁰ Goteto Jisasa mo kuai wete laya alu, bala lamawuato, wamba akali Meleki-seteke bala pitisa akali atoto, piape okone pua ateane pua teke, nimbati piisa akali atoto, piape okone pua atolopele leaipia. Goteto wuane lea-kola, Jisasa bala wandakali molo-peke lolane akali oko atoto, balana pii wato minalaini wandakali

* 4:12: Ep 6:17; Lap 1:16; 19:13-15 * 4:14: Ip 3:1; 10:23

* 4:16: Ip 10:19-20 * 5:1-3: Pit 9:7; 16:6 * 5:4: Ek

28:1 * 5:6: Sam 110:4; Ip 6:19-20; 7:1-2 * 5:7: Mt 26:36-46; Pl 2:6-8

tupa pitaka saka atapowa atolane tene oko guleaipia.

*Nanima Kitisene Tai Gulamakale Leane
Oko*

¹¹ Wamba Meleki-seteke bala pitisa akali kawane ateane wuane pua teke, Jisasa balatopi pitisa akali kawane atoto, piape pua atalane okonena, nanimato mana kambua yakama langulane eya tekeko, yakamoto wamba ini kapoyale mana mia na-piyaina. Tene okonena, nanimato pii mana utupane pitaka yakama languale, pitete wete eyama.

¹² Yakama Kitisene gulalu ateai-kola, mali kambua pea-ko. Andipa yakamatopi Kitisene mana lamaiyane tisa atapepene tekeko, yakama tane-mane mana kuai lo mia napene mee atalaini. Tene okonena, wamba bulupane yakama Kitisene guloyale atoto, pii mana meaini utupane wandakali mindimane dee lapone teke yakama mana langulu-peke lapepene guleya-ko. Yakama tomo keato mindi nanape-pene. Jia. Yakama andu ipane nolo-peke lape-pene ateyai.*

¹³ Anu peakale nambato wuane leyope. Jisasato wandakali nanimana mo kuai laya yane lo nembo natalane wandakali okone bala andopane kambolo atoto, andu no atene atalane.

¹⁴ Akali mindimane pii mana lamaluka-kola, Kitisene mindimane balana pii okone ale wato, akali okonemane pii kuai lo langeya, kopeta langeya nembo talane akali okone bala Kitisene wandakali tai mindi atoto, tomo keato no atene atalane.

6

¹⁻² Wamba nanimato saka atapowa atolane asini tuma piyane mana koo tupa minu atema tekeko, nanimana ipa moyale atoto, Gote lo bilipi loto, mini peke lalu, mana koo utupane masia maipe-pene lo mana mema okoni. Dee, Gotena ipa mialaini mana oko waka-waka yalane tupana nanimato mana mialu, wandakali belesini moyale ateyai-kola, kawa minalaini mana oko mialu pema okoni. Dee, matili wandakali omene tupa pitaka malinga ika lolai-kola, Goteto wandakali pitaka yapa lo tale pulupeya lo nanimato wamba mana mema teke. Pii mana epene nanimato wamba bulupane mema utupane teke dee lapone molo-peke na-lamakale. Andipa nanimato pii mana wenene minditupa mana moto, Kitisene tai gulamakale.

³ Goteto nanima wuane pua atalapale nembo teando, nanimato wuane teke pulupeyama.

⁴ Anu peakale nambato wuane leyope. Gotena pii layene epene okomane wandakali mindina nembo-tene oko mo tii piya eya-kola, Oli Sipitisa oko balanga epo atalane. Dee, Gote ati kenga atalane okomane petesini mindi wandakali okone mauluka-kola, wandakali okonemane petesini okone moto, balana piape makande piyane.

⁵ Wandakali okonemane Gotena pii layene epene okone makande puato, pii okone epene wete ya lo nembo talane. Akali okonemane andeya-kola, Goteto piape tai-lene tupa piyane andoto, matili Goteto piape tai-lene wete tupa pulupeya nembo talane.

⁶ Goteto piape tai-lene utupane pitaka piyane lo andoto teke, matili wandakali okonemane Jisasa awua tepa alu, masia mawua ateando, balato Gotena iwanane oko lamba lola-kola pulupeya. Balato Jisasa lamba loto, bala dee lapone teke ita malamanda okona peyo yuka ola-kola pulupeya. Balato wuane peando, nanimato wandakali okone bala yamapane peke leakale lo lamalu-makola, balato katulo yamapane peke nalolo-peya. *

⁷ Anu peakale nambato wuane leyope. Ole kambuangga kingi epoto, yuu okona andaka peya-kola, wandakali-mane ee mindi yandalaini. Ee yandeyai-kola, tomo epene ika loto, andayalane tupamanee ee pulaini wandakali tupa moyalanee. Yuu okonena, tomo epene tupa ika loto, andayalane andoto, Goteto yuu okone mo kuai wete laya alane.

⁸ Balato wuane piyane tekeko, yuu okonena ikilimbu ani atene tupa angu ika loto, andayo ateando, Goteto yuu okone koo wete ya loto, yuu okone ita-mane yangolopeya. *

⁹⁻¹⁰ Nambana yamapane yene yame, Goteto yuu oko ita-mane yangolo-peya tekeko, wamba yakamoto Gotena wandakali tupa moyalu, andipapi utupane moyo ateyai mana okonemane yakamoto Gote towa epelewa yamapane yo ateyama lo andawa leyai okoni. Goteto mana koo mindikipi mindi wato mina napiyane. Jia. Piape epene yakamoto pua ateyai utupane balato embesa wato, yakama yanga napulu-peya. Jia. Balato yakama molo-peke lolopeya lo nanimato wayumane nembo teyama. *

¹¹⁻¹² Wamba Goteto potomisa pii mindi balana wandakali tupa lamawuato, nambato minditaka epene mindi yakama

* 5:12: 1Ko 3:1-4 * 6:6: Mt 12:31; Ip 10:26-27; 1Jo 5:16-17

* 6:8: Jen 3:17-18 * 6:9-10: Ip 10:32-34

gukale leaipia. Wuane lea-kola, wandakali utupane-mane balana potomisa pii leane okone enene gulolo-peya nembo toto, minditaka epene okone nanima gulupeya lo mali kambua pea-kola, maliyo mee ateaipia. Andipa yakamato wandakali utupanera mana epene okone wato minu atoto, Goteto minditaka yakama gulupeya nembo toto, kepa naene mee maliyo atape-pene. Yakama mindiki-mindiki lo minditaka epene okone mima lakae lo nembo toto, maliyo atalapape. Yakamato okone molopeyama nembo toto, maliyo atama pulu, yakamana gii koyo pulu okonena gian lalapale loto, nanimato pii utupane pitaka yakama langeyama.

*Jisasa Bala Pitisa Akali Meleki-seteke
Yale Ateya Leane Oko*

¹³⁻¹⁶ Wandakali-mane pii mindi loto, pii okone mo tai laya wato, utupane sia minalane akali andane mindina gene oko loto, pii okone enene leyo loto, akali andane okonemane andeya lalaini. Wuane leyakola, wandakali waka tupamane pii okone enene ya lo nembo talaini. Wandakali-mane akali andane okomane andeya lalaini tekeko, Gote sia minene akali andane waka mindi ata napeya. Tene okonena, Gote bala tanena gene oko loto, potomisa pii mindi Apatakame lamawuato, wua leaipia: Nambato belesini andane mindi nimba guluwa-kola, nimbana mandiyene tupana mandiyene yame kambua longo wete gulolo-peya. Namba nimbana Gote okomane pii okone enene wete eya leyo leaipia. Goteto wuane lea-kola, mali kambua peane tekeko, Apatakame bala wamba kapoyale kepa naene, mee maliyo ateaipia. Mee maliyo atea-kola, Goteto minditaka Apatakame gukale leane oko matili mayaepia.*

¹⁷ Goteto balana potomisa pii leane okone mo tai laya wato, enene wete nambato wuane pukale leaipia.

¹⁸ Owato pii na-lalane Gote okomane enene wetete, minditaka mindi pukale lo pii potomisa mindi lolane okone matili-matilipi mo lawa napiyane. Enene, wamba kenda-pene minditupa nanimanga epeakola, nanima palaka pema. Nanimana palaka pema tekeko, matili-matilipi Goteto nanima moyolo-peya lo nanimato balanga tungi peyo atalapale loto, Goteto enene wete nambato yakama moyokale lo potomisa pii okone leaipia.*

¹⁹⁻²⁰ Juta yamena lotu anda okona lapalapa andane mindi yukatane ateya-kola, pitisa akali kawane oko bala lapalapa okonena masianesa Gotena lumu epene wetete

lalaini okonena kolandaka lalane. Wuane pua teke, Jisasa bala Meleki-seteke yale pitisa akali kawane atapowa atolane mindi atoto, Gotena yuu epene ati kenga eya okona kolandaka leaipia. Andipa bala yuu epene okonena atoto, nanima moyo ateya-kola, matili nanimapi yuu okonena kolandaka loto, kuai lo wetete atolo-peyama lo bilipi leyama nayu leyama.*

7

¹⁻² Meleki-seteke bala Seleme tane wandakali tupana kinji oko atoto, bala Gote ati kenga wete atalane okona pitisa akali ateaipia. Nanimato balana gene Meleki-seteke okone mopeke loto, kinji okonemane mana tika-pene tupa wato minalane lalamane. Balana gene mindi Seleme tane wandakali tupana kinji lalaini. Nanimato gene okone mopeke loto, kinji okonemane mini epene palene mana oko wato minu atalane lalamane. Alu mindi Apatakameto kinji minditupa towa yanda piyu, utupane sia minalu, bala andaka peke loyale asininga pea-kola, Meleki-seteketo Apatakame malanda wato, belesini mindi mayaepia. Maya-kola, Apatakameto minditaka mo awua epeane tupa pitaka yomo paitasanga tale pua yata wato, yomo mindiki Meleki-seteke mayaepia.*

³ Gotena pii pepa pelene eya okomane Meleki-seteke okona anginipi, ayianepi, yumbanepi, bala angini-mane mandeane gii okopi, omeane gii okopi, utupane nanima langi napeya tekeko, bala Gotena iwanane okonepene atoto, pitisa piape pua atapowa atalane.

⁴ Meleki-seteke bala akali andane wete mindi ateanre nembo talapape. Anu peakale nambato bala akali andane mindi ateanre leyope. Wamba nanimana yumbane Apatakameto yanda piyu, minditaka mo awua epeane tupa pitaka yomo paitasanga tale pua yata wato, yomo mindiki Meleki-seteke mayaepia.

⁵ Jekopo iwanane alesa tupa pitaka Apatakame yamena mandiyene tupa atearini tekeko, Mosesato mana mindi yata wato, Jekopo iwanane waka tupana mandiyene tupa yakamato minditaka molaini tupa yomo paitasanga tale puato, yomo mindiki Jekopo iwanane Lipai yame pitisa akali tupa maiyapape layene eya.*

⁶ Meleki-seteke bala Lipai yame okonena mandiyene mindi jia tekeko, Apatakameto minditaka mo awua epeane tupa pitaka yomo paitasanga tale puato, yomo mindiki Meleki-seteke mayaepia. Gotena potomisa pii mindi Apatakamengya-kola,

Meleki-seteketo belesini mindi Apatakame mayaepia.

⁷ Belesini molane akali oko bala napinga ateya-kola, belesini maiyane akali okone bala lipinga atoto, belesini maiyane. Nanimato mana okone nembo toto, Meleki-setekete bala akali andane wete mindi atoto, belesini mindi Apatakame mayane nembo teyama.

⁸ Wamba Isatale tane wandakali tupamane minditaka miaka peaini tupa yomo pailasanga tale pua yata wato, yomo mindiki Lipai yame pitisa akali tupa maiki peainipia. Lipai yame pitisa akali utupane-mane okonetaka mo atoto, matili yakama mini yalu omeainipia. Meleki-setekete okonetaka meane tekeko, Gotena pii pepa pelene eya mindimane loto, Meleki-setekete bala saka atalane layene eya.

⁹⁻¹⁰ Apatakameto Lipai mandi napene angi, Meleki-setekete malanda wato, balana minditaka Meleki-setekete mayaepia. Matili Lipai bala Apatakamena mandiyene tundupa mindiki atolopeya okonena, minditaka Apatakameto Meleki-setekete mayane okone Lipaito maiyene maiya-kola teke peapia. Nanimato pii utupane pitaka ale wato, Meleki-setekete bala akali andane wete mindi ateane nembo teyama.

¹¹ Wamba Lipai yame tupamane pitisa piape okone pulupeyai nembo toto, Mosesato mana utupane yata yaepia. Lipai yame tupamane pitisa piape peaini okonemanekatulo wandakali tupa mo kuai wete leai-yale, Goteto pitisa akali waka mindi-pene mindi ate nalea-yale. Wuane tekeko, Lipai yame-mane pitisa piape peaini okonemanewandakali tupa mo kuai wete nalea andala, Goteto pitisa akali waka mindi ate leane. Akali okone bala Lipai yame pitisa akali Etone yale jia. Bala akali Meleki-setekete yale ateya.

¹²⁻¹⁴ Akali okone bala nanimana Akali Andane Jisasa. Bala Lipai yame okonena mandiyene mindi jia. Bala Jekopo iwanane Juta yame okona mandiyene mindi ateaya lo andeyama. Wamba Mosesato yame okonena akali mindimane pitisa piape oko peakale nalea-kola, yame okonena akali mindimane Gotena alata toko okona po atoto, pitisa piape pua ata naapeaipia. Wuane tekeko, Goteto pitisa akali waka mindi ate leane okonemanepitisa piape piyaini yame okone lawa piyu, loo Mosesato yata yane okone lawa pipe-pene teke guleaipia.*

¹⁵⁻¹⁷ Mosesato mana mindi yata wato, Lipai yame utupane-mane angu pitisa piape okone peakale lea-kola, Lipai yame

utupane-mane angu pitisa piape pua ateainipia. Okone enene tekeko, Gotena pii pepa pelene eya mindimane Jisasa andayo, nimba akali Meleki-setekete yale pitisa akali atoto, pitisa piape okone pua atapowa atolopele leaipia. Jisasa bala oma napene, saka atapowa atoto, pitisa piape oko tailo pulupeya nembo toto, Goteto bala pitisa piape oko pua ateakale leaipia. Jisasa bala pitisa akali Meleki-setekete yale atoto, pitisa piape oko pua ateya lo andeyama-kola, loo Mosesato yata yane okone lawa peane ya lo nanimato wayumane wete andeyama.

¹⁸⁻¹⁹ Wamba Goteto balana loo tupa Mosesa maiya-kola, loo utupane-mane wandakali mindikipi mindi mo kuai wete laya nayaepia. Tene okonena, Lipai yame tupamane angu pitisa piape peakale lo mana Mosesato yata yane okonemanewandakali mindikipi mindi katulo moya napea-kola, Goteto mana okone mo apialu, nanimana asini waka mindi waa pingeaipia. Asini wenene okonemanewana yata yane wambane oko sia minuto, epene wete eya-kola, nanimato asini wenene okone wato minu atoto, Gote ateyanga mandaka peyama.*

Jisasato Pitisa Piape Kuai Lo Wete Piyane Leane Oko

²⁰⁻²¹ Wamba Goteto Jisasa lamawuato, nambato pii enene wete leyo leaipia. Nimbato pitisa piape pua atapowa atolopele. Matili-matilipi nambana nembo-tene oko lawa napulu-peyo leaipia. Lipai yame akali tupa pitisa akali ateai-angi, Goteto pii okonepene mindi naleaipia. Jia. Utupanemanewana mana Mosesana yane oko angu wato minuto, yakama pitisa akali guleainipia.*

²² Goteto pii enene wete leyo leane okonemanewana pii wenene balato lo yata yane oko mo tai laya ya-kola, Jisasa bala pitisa akali mindi guleane. Wuaneko, pii wenene Goteto lo yata yane okone epene wete yoto, pii wambane lo yata yane oko sia mineane lo andeyama.*

²³ Wamba Lipai yame akali tupamane pitisa piape pua ateaini tekeko, utupane yakamoto pitisa piape pua atapo naene, omaka peai-kola, Lipai yame akali waka tupamane utupanena panda mo, pitisa piape okone pua ataka peainipia. Wuane pima peaini oko poto, Lipai yame akali kambua tupamane pitisa piape peainipia.

²⁴ Utupane-mane wuane peaini tekeko, Jisasa bala oma napene, saka atapowa atoto, pitisa piape oko piyane okonena, akali mindimane balana panda moto, pitisa piape okone napiyane.

* ^{7:12-14:} Ais 11:1; Mt 2:5-6; Lap 5:5 * ^{7:18-19:} Ip 9:9

* ^{7:20-21:} Ip 5:6 * ^{7:22:} Ip 8:6; 12:24

²⁵ Jisasa bala saka atapowa atoto, wandakali Gote-la tombenenga akali mindi ato, Gote nimbato wandakali tupa moyape lo pote lalane. Jisasato wuane lo pote leya-kola, wandakali utupane Gote ateyanga mandaka peyai-kola, Jisasato wandakali utupane yakama katulo wete molo-peke lalane.*

²⁶⁻²⁸ Sataneto yuu okona akali tupa minu makande peya-kola, utupane keato yo ata napene, koo piyaini. Mosesato mana yata yane okonemane yuu okona akali okonepene tupa pitisa akali kawane atekale lea-kola, utupane yakamanga koo eya-kola teke, pitisa piape piyaini. Ole dindi lo Goteto yakama tanena koo tupapi, wandakali waka tupana koo tupapi, utupane apeakale lo pitisa utupane-mane Gote opa maiyaini. Utupane-mane wuane piyaini tekeko, Gotena iwanane oko epene tika-pene wete atea-kola, Goteto pii enene wete leyo loto, Jisasa bala pitisa akali kawane atoto, piape okone pua atapowa atekale leyo leaipia. Wuane lea-kola, Jisasa bala pitisa akali kawane atoto, wandakali pitakana koo tupa apoyale, alu mindiki angu bala tane Gote opa maiyu, omeaipia. Balato opa alu mindiki angu mayane okonemane katu wete lea-kola, balato opa lapone waka mindi maulane tene mindi ata naapeaipia. Yuu okona wandakali-mane koo pua ateyai-kola, Jisasa bala utupane towa tako pua ata napene, ati kenga wete ateya. Goteto andeya-kola, Jisasanga koo tene mindikipi mindi naeya. Jia. Bala pitisa akali kawane epene tika-pene wete mindi atoto, katulo wete nanima moyalane.*

8

¹ Pii nanimato leyama okona tene angini oko Jisasa bala nanimana pitisa akali kawane okonepene ateya nembo teyama. Bala ati kenga yuu epene okona poto, kinji pitiyane sia toko okona kii tikasa po peteane leyama.

² Ati kenga yuu epene wete okone Goteno lotu anda atalane. Wandakali kini-mane lotu anda okone naapeaipia. Jia. Akali Andane oko bala tane-mane lotu anda okone peapapia. Andipa Jisasa bala lotu anda okonena pitisa akali kawane atoto, piape pua ateya.

³ Yuu okona pitisa akali kawane atalaini tupa pitaka-mane opapi, petesene waka tupapi, utupane Gote mayaini. Tene okonena, Jisasa balapi pitisa akali kawane atoto, opapi, petesene waka tupapi, utupane Gote maipe-pene guleaipia.

⁴⁻⁵ Wamba Mosesato lotu anda mindi selemane puyale pea-kola, Goteto bala lamawuato, wamba nimba ati Sainai okona ateeangi, ati kenga lotu anda okopene mindi ateyea lo, nambato nimba andawa lewa onki leaipia. Andipa nimbato lotu anda sele-mane puyale pele okone ati kenga lotu anda ateyea okonepene teke guleakape hayu pipe leaipia. Pitisa akali tupamane lotu anda Mosesato peane okona kolandaka loto, pitisa piape peaini oko mee pikisa mindi yoto, Jisasato pitisa piape pulupeya lo makande peainipia. Jisasa bala ati kenga lotu anda atalane okona kolandaka loto, pitisa piape piyane oko angini wete gulalane. Lipai yame pitisa akali tupamane mana Mosesato yata yane oko wato minuto, petesini mindipene-mindipene tupa Gote maiki peainipia. Tene okonena, Jisasa bala yuu okona mee atapia-yale, bala pitisa akali okonepene mindi ata napipia-yale tekeko, bala ati kenga peapapia.*

⁶ Poto, balato pitisa piape piyane okonemanne Lipai yame tupamane pitisa piape piyaini okone sia minuto, piape kuai lo wete piyane. Wamba Goteto Isatale tane wandakali tupa towa pii mindi lo yata wato, potomisa pii minditupa leane tekeko, matili balato pii waka wenene mindi lo yata wato, potomisa pii epene wete minditupa lo yata yane okomane pii wamba ini bulupane lo yata yane okone sia mineaipia. Jisasa bala wandakali, Gote-la, utupanena tombenenga akali atoto, pii wenene Goteto lo yata yane okone lo tai laya yaepia.*

⁷ Goteto pii wamba ini bulupane lo yata yane okomane piape kuai lo pea-yale, Goteto pii wenene waka mindi lo yata wakale nembo natea-yale. Lipai yame pitisa akali tupamane pii Goteto wamba ini bulupane lo yane oko wato minuto, balana piape oko pua atea-kola teke, wandakali tupana koo tupa mee yapowa ya-kola, Goteto wua leaipia:

⁸ Akali Andane nambato pii leyo oko ale alapape. Matili oto mindi epola-angi, nambato Isatale tanepi, Juta yamepi, utupane towa pii wenene waka mindi lo yata wakale leaipia.*

⁹ Wamba Isatale tane wandakali utupane Isipi yuu oko tepa alu peai-kola, nambato utupane kii minu awua pewa. Poto, nambato pii mindi wandakali utupane towa lo yata ewane tekeko, wandakali utupane-mane nambana pii okone wato mina naapeai-kola, nambato utupane masia maewane. Tene okonena, nambato pii wenene lo yata wakale okone wamba yakamana yumbane tupa towa pii lo yata

ewane okonepene jia. Akali Andane nam-bato wuane leyo, leaipia.

¹⁰ Oto utupane koyo pula-kola, matili nambato Isatale tane tupa towa pii wenene waka mindi lo yata wato, wua lokale: Nam-bato nambana loo tupa wandakali utu-panena nembo-tenenga yata alu, utu-panena yamapanenga pepa peyo yata alu pukale. Wuane piyu, namba wandakali utupanena Gote atolowa-kola, wandakali utupane nambana yame atolopeyai.

¹¹⁻¹² Nambato utupane ondo wato, utupanena koo pulaini tupa apia-maiyu, wandakali utupane-mane wamba koo peaini tupa nambato nembo tolo-peke na-lokale. Nambato wandakali utupane moyo wuane puluwa-kola, wandakali gene yenepi, nayenepi, utupane pitaka-mane namba Gote okopene ateya lo wayumane andolopeyai. Utupane-mane okone andolai-kola teke, wandakali mindimane balana amenepi, yangonepi, utupane mana lamawuato, nimbato Akali Andane oko lo nembo tape nalolo-peya. Jia. Wamba Goteto wuane leaipia.

¹³ Goteto pii wenene mindi lo yata wakale leane okonemane pii wamba ini bulupane lo yata yane okone wambane guleya lo andawa leaipia. Wuaneko, minditaka mindi wambane gulalu, koyo piyane pua, pii balato wamba lo yata yane okone koyo peae-ya lo andeyama.

9

Kataisa Bala Gote, Wandakali-la, Tombenenga Akali Ateya Leane Oko

¹ Goteto pii wamba ini bulupane lo yata yane okonemane lotu lolane mana mindi-tupa yata alu, yakamato wua puato, yuu okona lotu anda mindi piyapape leaipia. *

² Lotu anda sele-mane pene okonena lumu bulupane okona lamu, tepolo tokola, okonelapo ya-kola, Gotena betesa tepolo toko okonena yalaepia. Lotu anda lumu bulupane okonena gene oko Gotena lumu epene lalainipia.

³ Lumu epene okonena masianesa tole lapalapa andane mindi yukatane atalaepia. Lapalapa okonemane tombo peyatane eya-kola, lapalapa okonena masianesa tole lumu mindi yalane okonena gene oko Gotena lumu epene wetete lalainipia. *

⁴ Tua tunduma peakale lo minditaka yan-galaini alata toko okola, Gotena mawua pii ana laponga peyatane palene bokisa okola, okone-lapona kenganga golo-mane waa-pene okonelapo lumu epene wetete okonena yalaepia. Wamba Goteto balana

loo paipayasa tupa ana lapona pepa peyoto, yata yaepia. Gotena loo paipayasa peyatane atene ana okonelapo bokisa mindina pali-pata yalaepia. Tomo gene mana lene oko sisopene golo-mane waa-pene okona pali-pata okola, Etonena kalango poka lo ateane okola, okonelapo bokisa okonena pali-pata yalaec tekepia. *

⁵ Bokisa okonena tokonga Gotena tii-pene oko towa makande pua enjoje lapo waa pitane atalaepia. Goteto wandakali tupa ondo wato, utupanena koo tupa apeakale loto, pitisa akali kawane okomane bokisa okonena tokonga tundupa tupa gae lalaepia. Andipa nambato okonetaka tupana tene wee lo pii kambua lolane tene andane mindi ata naopeya-ko. Nambato okonetaka tupana pii kambua laa napukale. *

⁶ Minditaka utupane pitaka wuane pua mandeke pitane atea-kola, ole dindi lo pitisa akali tupamane lotu anda sele-mane pene lumu bulupane okona kolandaka loto, yakamana piaple pulane tupa piyainipia. *

⁷ Pitisa akali kawane oko bala angu mali dindi lo alu mindiki angu tundupa mo awua lumu lapone okona kolandaka lalaepia. Kolandaka loto, bala tanenga koo yolane tupa Goteto apeakale loto, balato bulumako maipa mindina tundupa tupa Gote lo opa mayaepia. Opa okone maiyu, wandakali waka tupamane koo peyama nembo natene piyaini tupa Goteto apeakale loto, balato yia meme mindina tundupa tupa Gote lo opa mayaepia. *

⁸ Pitisa akali kawane oko bala angu Gotena lumu epene wetete okone kolandaka loto, opa utupane maiyane lo nanimo andeyama-kola, Oli Sipitisa okomane mana mindi nanima andawa leya. Lotu anda sele-mane pene okonena lumu bulupane oko mee pitane atea-angi, Gotena lumu lapone epene wetete okonena kolandaka lolane asini oko panakame ya napeane lo andawa leaipia.

⁹ Okone pii kokoli mindi guleya. Lotu anda okonena pitisa akali tupamane Gote lo petesini maiyaini tupapi, opa maiyaini tu-papi, okonetaka tupamane wandakali Gote lo lotu lalaini tupana nembo-tene oko katulo mo kuai loto, epene wete gulaya na-alane. *

¹⁰ Enene, wamba Goteto mana minditupa yata wato, tomopi, ipapi, minditupa nolaini lalu, minditaka wua pua wasa-wasa peyalapape leane tekeko, wandakali-mane mana utupane wato minama pulu, Goteto mana wenene waka mindi yata ollopeya okonena

* 9:1: Ek 26:1-30; 25:23-40 * 9:3: Ek 26:31-33 * 9:4: Ek 16:33; 25:10-16; 30:1-6; Nam 17:8-11; Lo 10:3-5 * 9:5: Ek 25:18-22 * 9:6: Nam 18:2-6 * 9:7: Pit 16:2-34 * 9:9: Ip 10:1-2

angg giao leakale loto, balato mana utupane yata yaepia.

¹¹⁻¹² Wuane tekeko, Kataisa bala epoto, mana epene Goteto mina ika leane tupana pitisa akali kawane ateaipia. Balato pitisa piapokone pua atoto, yia meme tupana tundupapi, bulumako andopane tupana tundupapi, okonetaka mindimane nanimana kambo molo-peke naleaipia. Jia. Bala Gotena lumu epene weteate ati kenga ateya okona kolandaka loto, bala tanena tundupa epene okomane nanimana kambo molo-peke loto, nanimana tinga lo meane. Tene okonena, nanimana tinga lo mene atapowa atolopeyama. Jisassato nanimana tinga lo mialu, ati kenga lotu anda ateya okonena alu mindiki angg kolandaka leaipia. Lotu anda okone wandakali kii-mane pene yuu okona tawe mindi jia. Lotu anda ati kenga ateya okonemanne lotu anda sele-mane peaini okone sia minene epene wete mindi ateya.

¹³ Wamba Gotena wandakali mindi bala Gotena wenonga kalato atene atea yando, pitisa akali tupamane bulumako angini mindi itanga yango tosia teaipia. Tosia toto, pete gulaya alu, utupanemanne pete okone moto, kalato atene wandakali atolane okonenga tau lo peyaka peainipia. Wuane piyu, utupanemanne meme tupana tundupapi, bulumako maipa tupana tundupapi, okonetaka tupa moto, kalato atene ateane wandakali okonenga tandu peyaka peainipia. Wuane peyai-kola, Gotena wenonga wandakali utupane kalato na-atene epene wete kilini lene gulalaepia. *

¹⁴ Memepi, bulumakaopi, utupanena tundupa tupamane wuane piyaini tekeko, Kataisana tundupa okomane utupane sia mineaipia. Balanga koo mindikipi mindi nayene atea-kola, Oli Sipitisa atapowa atalane okomane bala mo tai laya ya-kola, Kataisa bala tane Gote lo opa mayaepia. Nanimato Gote saka atapowa atalane okona piapokone pimai-yapale loto, Kataisana tundupa okonemanne nanimana ini andapangosa koo yalane tupa apialane. *

¹⁵ Wamba yuunga wandakali pitakanemanne pii Goteto bulupane lo yata yane okonena pangosa atoto, koo pua ateaipia. Koo pua atea-kola, Goteto utupane ee lo moto, potomisa pii mindi wandakali utupane lamawuato, yakama katulo saka atapowa atolopeyai leaipia. Goteto wuane lea-kola, Kataisato wandakali utupane kambo molo-peke lalu, koo utupanemanne piyaini tupa apoyale bala omeaipia. Wandakali utupane saka atapowa atekale

nembo toto, Kataisa bala wandakali, Gote-la tombenga akali oko atoto, pii wenene Goteto lo yata yane oko mo tai layawa atalane.

¹⁶⁻¹⁷ Akali mindi bala omoyale ato, balana yame tupa lamawuato, namba omolowangi, yakamato nambana minditaka eya tupa wua pua tale puato, paluni mialapape lanane. Balato wuane lalane tekeko, akali okone bala oma napene saka ateya-kola, wandakali-mane balana minditaka yalane tupa katulo paluni mia na-piyaini. Matili akali okone omeya-kola, balana pii wamba lolane okone angini gulalane. Wuane peyakola, akali okone bala omeya lo andoto, balana yame tupamane balana minditaka yalane tupa katulo paluni mialaini.

¹⁸ Wamba Mosesato yia bulumakaopi, memepi, okonetaka tupa peyoto, utupanena tundupa tupamane pii Goteto wamba ini bulupane lo yata yane oko minu tai laya yaepia.

¹⁹⁻²⁰ Wuane puyale atoto, balato pii Goteto wamba ini bulupane lo yata yane tupa pitaka wandakali pitakanga lamai-yaepia. Balato utupane lamawuato, yakamato pii Goteto lo yata yane oko wato minu atalapale nembo toto, balato bulumakaopi, memepi, utupanena tundupa okomane balana pii okone minu tai laya eya leaipia. Wuane lalu, Mosesato bulumako andopane tupana tundupapi, meme tupana tundupapi, okonelapo ipa towa mina mindiki lalu, balato sipisipi itini tundupanepene mindi moto, isopo kembone mindina puta puato, tundupa peteane okonena aindaka leaipia. Aindaka loto, tundupa okonena tanda pua moto, Gotena pii layene buku okonapi, wandakalipi, utupanenganda tundupa oko tandu peyaka peainipia. *

²¹ Wuane pua teke, Mosesato tundupa okone moto, lotu anda sele-mane pene okongapi, lotu anda okona piapokone piyaini minditaka yatawa ateaipia. Utupane pitakanga tundupa okonemanne tandu peyaka peainipia. *

²² Mana Goteto wamba yata yane okonemanne pii mindi loto, tundupa-mane angu minditaka pitaka taka Gotena wenonga mo kuai laya alane leaipia. Tene okonena, tundupa-mane wandakali mindina koo tupa apia-mai naapeaindo, Goteto wandakali okone balana koo tupa apia-mai napiyane. *

²³ Lotu anda sele-mane pene ateane okonena minditaka yane tupa ati kenga minditaka yalane tupa towa makande pene mee pikisa yaepia. Minditaka utupane pitaka

* ^{9:13:} Pit 16:15-16; Ip 10:3-4; Nam 19:9,17-19

* ^{9:14:} 1Pi 1:18-19

* ^{9:19-20:} Ek 24:6-8

* ^{9:21:} Pit 8:15,19

* ^{9:22:} Pit 17:11

* ^{9:23:} Ip 8:4-5; 10:1-2

tundupa-mane mo kuai lepe-pene guleane tekeko, opa mindi-pene epene wete mindi-mane minditaka angini ati kenga yalane tupa mo kuai wete lepe-pene guleaipia. *

²⁴ Lotu anda angini ati kenga ateya oko bala okonepene ateya lo Mosesato wandakali tupa mana lamaiya-kola, yuu okona wandakali tupamane yakamana kini-mane lotu anda okone peainipia. Jisasa bala lotu anda okonena lumu epene wete okona kolandaka naleaipia. Jia. Bala Gotena wenonga atoto, nanima moyokale nembo toto, ati kenga lotu anda ateya okonena kolandaka loto, pitisa piape pua ateya.

²⁵ Mali dindi lo pitisa akali kawane okomane yia memepi, bulumakaopi, utupanena tundupa tupa mo awua poto, lotu anda sele-mane pene okona lumu epene wete okona kolandaka loto, Gote lo opa maiki piyaepia. Pitisa akali kawane okomane wuane piyane tekeko, Jisasa balato mali dindi lo wuane napeaipia. Alu mindiki angu Jisasa bala tane Gote opa mauwakale nembo toto, ati kenga yuu epene okona kolandaka leaipia.

²⁶ Ole kambuangga Jisasa bala tane Gote opa maiya-yale, wamba Goteto yuu ati-la yakale leane gii okonena ato, ipapo wato andipa giau loto, bala ole kambuangga tandaka no atapia-yale. Balato wuane pipi-yale tekeko, yuu gii oko koyo puyale peakola, wandakali tupana koo tupa apoyale, alu mindiki angu Jisasa bala tane Gote opa mayuale, bala ati kenga atala yuunga epeaipia. *

²⁷ Wandakali pitaka alu mindiki angu omalaini. Matili Goteto wandakali utupane pitaka yapa lo tale pulupeya.

²⁸ Wuane pua teke, Kataisato wandakali kambua tupana koo tupa apoyale, alu mindiki angu bala tane Gote opa mawuato, omeaipia. Matili bala lapone peke lolangi, balato wandakali tupana koo tupa apoyale naepolo-peya. Jia. Bala epolopeya lo maliyo atolaini wandakali tupa molo-peke lolo epolopeya.

10

Jisasato Nanim Mo Kuai Wete Laya Yane Leane Oko

1-2 Isatale tane wandakali tupamane mana Mosesato yata yane okone wato minuto, mali dindi lo Gote lo opa minditupa mayainipia. Opa utupa-mane wandakali utupane mo kuai wete laya ya-yale, koo tene mindi yakamanga naeya nembo toto, wandakali utupane-mane pai pua opa waka mindi Gote lo mai napeai-yale. Matili Jisasa bala epoto, opa epene wete

mindi maulupeya lo, opa maiyaini mana Mosesato yata yane okonemane wandakali wamba ateaini tupa kuai lo andawa naleaipia. Opa maiyaini mana okone matili opa Jisasato malupeya okonena pikisa angu ya-kola, opa malu epeaini wandakali utupane katulo mo kuai layawa tika wete piya nayaepia.

³⁻⁴ Pitisa akali tupamane bulumako maipapi, memepi, okonetaka tupana tundupa tupa moto, opa maiyaini utupanemanne wandakali tupana koo tupa katulo apia-mai napea-kola, opa utupane-mane wandakali utupane wayumane moya napiyaepia. Opa maiyaini mana okonemane wandakali yakamana koo piyaini tupa lapone teke nembo tolo-peke leakale laya yaepia. *

⁵⁻⁶ Wuane peanga, Jisasa bala yuu okona epeane-angi, bala ayiane Gote oko lamawuato, Aiyane Gote, nimbato wandakali tupana koo tupa apola nemboto, wandakali-mane bulumakaopi, memepi, okonetaka tupa peyoto, itanga yango tosia toto, nimba lo opa giyaini mana okone nimbato epele na-alene leaipia. Dee, wandakali-mane opa waka-waka tupapi, petesini giyaini tupapi, okonetaka tupa nimba geekale nembo natene, nimbato umbaini mindi namba gukale lo makande peenepia. *

⁷ Nimbato wuane pee-kola, nambato nimba languato, Gote nimbana pii pepa pelene eya mindimane leya pua teke, nambato nimba nembo-tene oko wato minu atokale loto, ati kenga atala yuunga epoto ateyo oko andape lewa. Jisasato balana ayiane lamawuato, wuane leaipia.

⁸ Matili Jisasato Gote lamawuato, Aiyane Gote nimbato wandakali tupana koo tupa apola nembo toto, wandakali utupanemanne mana Mosesato yata yane okone wato minuto, bulumakaopi, memepi, okonetaka tupa peyoto, itanga yango tosia toto, nimba lo opa giyaini leaipia. Dee, wandakali utupane-mane opa waka-waka tupapi, petesini tupapi, okonetaka tupa nimba giyaini teke. Andipa nimbato mana utupane epele naene, wandakali utupanemanne okonetaka tupa nimba geekale lo nimbato nembo natalene leaipia.

⁹ Wuane lalu, matili Jisasato balana ayiane lamawuato, nambato nimbana nembo-tene oko wato minu atokale loto, ati kenga atala yuunga epoto ateyo-ko andape leaipia. Jisasato pii okonelapo leane okonemane bala tane opa mayane mana okone yata wakale nembo toto, Lipai yame pitisa akali-mane opa maiyaini mana okone mo apeaipia.

* 9:26: Ip 10:10 * 10:3-4: Ip 9:13 * 10:5-6: Sam 40:6-8

¹⁰ Mo apialu, Jisasato Gotena nembo-tene oko wato minuto, alu mindiki angu balana umbaini oko Gote opa mayaepia. Opa mayane okonemane nanimana mo kuai wete laya yaepia. *

¹¹⁻¹⁴ Lipai yame pitisa akali tupa pitaka ika lo atoto, ole dindi lo opa kambua maiyaini tekeko, opa utupane-mane wandakali tupana koo tupa katulo apia napyaepia. Wuane tekeko, alu mindiki angu Jisasa bala tane Gote opa mayane okonemane wandakali Goteto mo epene gulaya alane utupane mo kuai wete leaipia. Alu mindiki angu bala tane Gote opa mayane okonemane wandakali moyo atapowa atlante. Matili Jisasa towa yanda-pene tupa sia minalu, Goteto utupane Jisasana kene pangosa mo ate lolopeya. Balato wuane peakale nembo toto, Jisasato balana piape pikoyo piyu, Gotena kii tikasa pituto, gii okone maliyo ateya. *

¹⁵ Dee, nanimato Gotena pii pepa pelene eya oko dii lo andeyama-kola, Oli Sipitisa okomane nanimana languato, wua lalamane:

¹⁶ Akali Andane okomane pii mindi leane oko loto, wandakali-mane pii nambato wamba ini bulupane lo yata ewane oko wato minu ateyai gii okone koyo pulupeya. Gii okone koyo pula-angi, nambato pii wenene waka mindi lo yata wato, nambana loo tupa wandakali utupanena nembo-tenenga yata alu, utupanena yamapanenga pepa peyo yatalu, pukale layene eya. *

¹⁷ Dee, Gotena pii pepa pelene eya waka mindimane loto, nambato utupanena koo piyaini tupa apialu, dee lapone nembo tolopeke nalolo-peyo layene eya. *

¹⁸ Goteto wandakali mindina koo piyane tupa apola-kola, balato dee lapone teke koo utupane apeakale lo opa maulane tene mindi ata napeya.

Jisasa Masia Mai Na-piyapape Leane Oko

¹⁹⁻²⁰ Wamba lotu anda sele-mane pene okonena lumu epene wetete okona lapalapa andane mindimane asia lomba yukatane atalaepia. Jisasa bala ita malamanda okona yukatane atoto, ome-angi, lapalapa okone liti lo lapo peane okonemane Jisasato nanimana saka atapowa atolane asini wenene mindi lumbu yata yaepia. Amene imalinu yame, Jisasana tundupa okomane nanimana koo tupa apia yiake leane okonena andipa nanimana yuku naene, Gotena yuu epene wete okona katulo kolandaka lolo-peyama. *

²¹ Jisasa bala nanimana pitisa akali kawane atoto, Gotena wandakali nanimana moyo ando atalane.

²² Balato nanimana umbaini oko ipa kaka-ene epene okomane wasa-wasa peyoto, nanimana koo tupa apea-kola, andipa nanimanga koo tene mindi naeyakola, ateyama-ko. Goteto nanimana moyolopeya lo nanimato balanga tungi peyoto, mini epene palu atoto, bala ateyanga mandaka makale. *

²³ Wamba nanimato pii mindi loto, matili Goteto nanimana moyoyale wua pulupeya lema okonena, nanimana mini lapo pali napi-makale. Jia. Goteto minditaka pukale leane utupane pitaka enene wete piyane-ko. Goteto nanimana moyoyale mangene minditupa pukale leane tupa pulupeya nembo toto, nanimato wayumane nembo tatawaa atamakale.

²⁴⁻²⁵ Wamba Kitisene wandakali kambuamane Gotena pii oko ale oyale amunguli pua ateaini tekeko, andipa Kitisene minditupa-mane mana okone kepa alu, kondeyai-ko. Nanimato mana okone konda haene, Jisasa bala lapone epolopeya oto oko mandaka guleya nembo tamakale. Wuane nembo toto, Kitisene wandakali yangone tupa towa amunguli puato, mindi minu tai laya aka pua atamakale. Nanimato wandakali yangone waka tupa towa yamapanane yo atoto, mana epene tupa angu wato minu atamakale nembo toto, nanimato mindi akali moyaka pua atamakale. *

²⁶ Anu peakale nanimato wuane pimakale leyamape. Nanimato Gotena pii layene enene oko mana moto teke, dee lapone koo tupa pima laka lo nembo toto, koo pua atemando, Goteto koo utupane apeakale nembo toto, nanimato bala opa waka mindi maulumka-kola, katu nalolopeya. Jia. *

²⁷ Goteto bala towa yanda-pene atolaini wandakali tupa yapa lo tale puato, ita toto andane wete pene mindimane yangolopeyako. Nanimato koo pua atemando, balato nanimana wandakali utupane towa atu yangolane lo yuku andane wete wato, nanimana maliyo atape-pene guleya. *

²⁸ Anu peakale nambato wuane leyope. Gote balana loo paiyasa Mosesanga mayane tupa wandakali mindimane kalo puato, koo pula-kola, wandakali lapo yandopi, tepo yandopi, minditupa-mane balana koo pulane okone andoto, lapana yaindo, wandakali-mane wandakali koo

* **10:10:** Ip 9:11-12 * **10:11-14:** Ek 29:38; Sam 110:1 * **10:16:** Jet 31:33; Ip 8:10 * **10:17:** Jet 31:34 * **10:19-20:** Ip 4:16; Mt 27:51 * **10:22:** Pit 8:30; Ese 36:25; Ep 5:25-27 * **10:24-25:** Ip 3:13 * **10:26:** Ip 6:4-8 * **10:27:** Ais 26:11 * **10:28:** Lo 17:6; 19:15

pulane okone ondo naene, peyo ome lalaini. *

²⁹ Wandakali koo pulane okonemane yole koo okone molopeya tekeko, wandakali waka mindimane bala sia minuto, yole koo wete mindi molopeya. Wamba ini wandakali okonemane pii wenene Goteto lo yata yane okona pangosa atola-kola, Gote Iwanane okona tundupa okomane wandakali okone mo epene wete gulaya olakola, Oli Sipitisa okomane wandakali okone bala ondo wato, moyolo-peya. Wuane tekeko, matili wandakali okonemane Gote iwanane okona tundupa oko mee ya lo nembo toto, bala masia mawuato, Oli Sipitisa oko andayo pii koo lola-kola, wandakali okone yole koo wete mindi molopeya. *

³⁰ Wamba Goteto pii leane oko loto, wandakali-mane koo piyane okonena, namba tane yole koo oko mauwakale leaipia. Dee lapone Goteto loto, Akali Andane okomane balana wandakali tupa yapalo tale pulupeya leaipia. Balato wuane leane okone nanimato nembo teyama. *

³¹ Gote saka atene okomane wandakali koo piyane oko yole koo mindi mauyale wandakali okone bala minula-kola, wandakali okone bala yuku andane wete olopeya.

³² Wamba Goteta Oli Sipitisa okomane yakamana nembo-tene oko mo tii piya yakkola, yakama Kitisene ateaini. Yakama Kitisene ateai-kola, Jisasa towa yanda-pene wandakali minditupa-mane kenda-pene andane minditupa yakama geaini. Kenda-pene geai-kola, yakama tandaka andane kambua no atoto, Kitisene wandakali tai atema lo yakamato nembo tolo-peke lalapape.

³³⁻³⁴ Ole minditupana wandakali utupane-mane yakama wandakali waka tupana wenonga mo ate loto, yakama ando lamba loto, kenda-pene andane minditupa yakama geai okoni. Kitisene wandakali minditupa katapusa ateai-kola, yakamato utupane ondowa moyoto, kenda-pene andane awua ateaini wandakali utupane towa potomane lo ateai okoni. Wamba Jisasa towa yanda-pene wandakali tupamanne yakamana minditaka yaini tupa pake meai okoni. Pake meai-kola, yakamana minditaka epene wete yapowa yolane tupa ati kenga yolopeya nembo toto, yakama mini epene paluto, yakamana minditaka meaini tupa meakale lo ando kondalu, epelewa ateai okoni. *

³⁵⁻³⁶ Goteto minditaka epene matili yakama gukale leane okone yakamato mia-

makale nembo talapape. Utupane mia-makale toto, yakamato Goteta nembo-tene oko wato minu atoto, kepa naene, yakama Kitisene wandakali tai atalapape. Yakamato kepa naene, tai ateaindo, yakamato yole andane wete mindi molopeyai-ko. Yakamato Jisasa lo bilipi leyama nayu lalaini mana oko tepa olaini.

³⁷ Anu peakale nambato wuane leyope. Yakamato Jisasa masia maulaini nembo toto, Goteta pii pepa pelene eya mindimane loto, Akali Andane oko bala mali kambua wete maliyo ata napulu-peya layene eya. Bala mali arjako mindilapo angu maliyo atalu, epolopeya. *

³⁸ Akali Andane oko bala epola-angi, wandakali bala lo bilipi lolaini tupa wandakali tika-pene atoto, saka atapowa atolopeya. Wandakali mindimane Akali Andane oko bilipi nalene, bala towa kembena peyo ateando, nambato wandakali okone towa epele na-olopeyo layene eya.

³⁹ Pii okone enene tekeko, nanima Jisasa towa kembena peyalu poto, alu pipe-pene wandakali jia. Nanimato Jisasa lo bilipi loloma-kola, Goteta nanima molo-peke lolopeya.

11

Goteto Bala Lo Bilipi Leaini Wandakali Tupa Moyane Leane Oko

¹ Gote lo bilipi lene mana oko wua pene eya: Gote lo bilipi lene wandakali-mane mangene epene Goteto pukale leane tupa lee-mane anda na-piyaini tekeko, utupane-mane mini lapo pali napene, mangene epene Goteto pukale leane utupane katulo pulupeya nembo toto, maliyo atoto, bilipi leyama nayu lalaini. *

²⁻³ Wamba wete Goteto minditaka nanimato lee-mane anda na-piyamane tupa moto, balana pii okonemane yuu ati-la okone-lapona minditaka nanimato lee-mane andalamane tupa pitaka yakale leane lo nanimato bilipi leyama. Matili Goteta potomisa pii minditupa nanimana yumbane tupanga lamaiya-kola, utupane-mane minditupa-mane balana potomisa pii leane utupane enene pii leya lo bilipi leainipia. Bilipi loto, utupane-mane mangene minditupa peai-kola, Goteto wandakali utupanena mana utupane andoto, mana kuai lo miniyai leaipia.

⁴ Wamba Epoloto Gote lo bilipi loto, Gote opa mayane okomane Kenena opa Gote mayane oko sia mineaipia. Epoloto Gote lo bilipi loto, opa maiya-kola, Goteto Epolona opa mayane okone epele yane okonemane Epolo bala akali tika-pene mindi ateaya lo

* **10:29:** Ek 24:8 * **10:30:** Lo 32:25-36 * **10:33-34:** Mt 6:19-21; 19:29 * **10:37:** Ip 2:3-4 * **11:1:** 2Ko 5:6-7; Jen 1:1; Sam 33:6; Jo 1:3

andawa leaipia. Epolo bala wamba omeane tekeko, balato Gote lo bilipi loto, opa epene wete mindi Gote mayane okonemane nanimana mana languato, nanimatopi Gote lo bilipi loto, opa maiyapape leaipia. *

⁵⁻⁶ Wandakali mindimane Gote lo bilipi naleando, Goteto wandakali okone epele na-alane. Wandakali mindimane Gote ateya lo bilipi loto, Gote andawua lakae lo nembo toto, ayia pua ateando, Goteto wandakali okone bala epele wato, yole epene mindi bala maulupeya. Wuane pula-kola, wandakali okone bala Gote lo bilipi loto, bala ateyanya mandaka atolakola pulupeya. Inokoto Gote lo bilipi leakola, Goteto bala oma napeakale nembo toto, bala ati kenga peakale lo meaipia. Ati kenga peakale lo mea-kola, wandakalimane Inoko bala ayia pua ateaini tekeko, utupane-mane bala anda napeainipia. *

⁷ Wamba Goteto Nowa lamawuato, matili kingi andane wete mindi epolopeya leaipia. Wuane lea-kola, kingi andane epolopeya leane okone Nowato lee-mane anda napene atoto teke, pii Goteto leane okone enene pii leya lo bilipi leaipia. Kingi andane epolopeya okonemane balana wetenepi, andopanepi, utupane peyo ome lolane nembo toto, Nowato pii Goteto leane oko wato minuto, sipi anda mindi peaipia. Balato Gote lo bilipi loto, wuane peakola, Goteto Nowa bala akali tika-pene mindi ateya leaipia. Nowato gote lo bilipi leane okonemane Gote lo bilipi nalene yuunga wandakali tupana mana koo wete minu ateaini tupa mo pana ya-kola, Goteto wandakali utupane pitaka peyo ome leaipia. *

⁸ Goteto potomisa pii mindi Apatakame lamawuato, nambato yuu mindi paluni nimba gukalenga, nimbato yuu okone molo puu leaipia. Wuane lea-kola, yuu Goteto molo puu leane okone aninga eyape lo Apatakame bala tatake alu, konda naene, potomisa pii Goteto leane okone bilipi loto, yuu Kenane okonena poyale peaipia. *

⁹⁻¹⁰ Apatakame bala Kenane yuu okonena po atoto, matili Gote bala tanena nembotene okomane tano yapowa yolane mindi waa pulupeya lo bilipi loto, matili tano okonena pokale nembo toto, maliyo ateaipia. Apatakame bala tano okonena poyale maliyo atoto, yuu Kenane Goteto gukale lo potomisa pii leane okonena ato bala akali opene mindi atene atoto, mee sele anda mindi puato, yuu okonena ateaipia. Goteto potomisa pii Apatakame lamaiyane

mindiki okone teke Aisake, Jekopola, okonelapo lamaiai-kola, okonelapomanepi mee sele anda teke puato, yuu okonena ateaapele-pia. *

¹¹ Wanda Sata bala andopane mandulane gii tupa koyo peane tekeko, balato Gote lo bilipi loto, mangene mindi Goteto pukale lo potomisa pii Lalane tupa balato enene wete piyane nembo teaipia. Wanda Satato wuane nembo toto, Gote lo bilipi lo peteane okonena, Goteto bala minu tai laya ya-kola, balato andopane mindi katulo mandaipia. *

¹² Mandea-kola, Apatakame bala akali mini-yene omape-pene gulene ateaane tekeko, bala wandakali kambua wete tupana yumbane guleaipia. Apatakame balana mandiyene tupana yame kambua wete ati kenga kaiyanda ateya okotuma, ipa mau eya oko-tuma, guleai-kola, wandakali mindimane katulo dii nalape-bene guleaipia. *

¹³ Wamba Goteto Apatakamepi, Aisakepi, Jekopopi, utupane potomisa pii mindi lamawuato, nambato yuu epene mindi yakama giyu, waka minditaka tupa piyu, yakama moyo atokale leaipia. Goteto wuane leane okonena, utupane-mane yuu epene okone molopeyama nembo toto, Gote lo bilipi lo atalu teke omeainipia. Wandakali utupane yakama oma napene, saka ateai-angi teke, yuu epene Goteto gukale leane okone mia napeainipia. Yuu epene okone iyunga wete tepanjia ya-kola, wandakali utupane yakamana nembo-tene okomane angu yuu epene okone andene atoto, utupane-mane pii mindi leaini oko loto, yuu okona ole ukupini mindilapo angu atoto, nanimana wandakali opene ateyama leainipia. *

¹⁴ Pii okonepene lalaini wandakali tupamane yakamana yuu mindi ayia pua ateyama lo andawa lalaini.

¹⁵ Wandakali utupane-mane yakamana yuu tene wamba tepa alu epeaini okone nembo tatawa atoto, Kenane yuu okona nanimana opene ateyama leai-yale, yakama katulo yakamana yuu tene okonena peke loto, yakama opene ata napeai-yale.

¹⁶ Wandakali utupane-mane ati kenga yuu epene wetete okonena atama puma lakae lo nembo teai-kola, Goteto utupane atolane tano mindi waa peaipia. Tene okonena, utupane-mane bala andayo, nimba nanimana Gote atele leyai-kola, bala yala na-alane.

¹⁷⁻¹⁹ Wamba Goteto potomisa pii mindi Apatakame lamawuato, nimba iwanane

* **11:4:** Jen 4:3-10

* **11:5-6:** Jen 5:21-24

* **11:7:** Jen 6:13-22; 7:1

* **11:8:** Jen 12:1-5

* **11:9-10:** Jen 35:12

* **11:11:** Jen 18:11-14; 21:2; Lom 4:18-21

* **11:12:** Jen 15:5; 22:17

* **11:13:** Jen 23:4; 1Tem 29:15; Sam 39:12; 1Pi

Aisakena mandiyene yame atolai tupa angu nimbana yame atolopeyai leaipia. Wuane lalu, matili Goteto Apatakame minu mandeke puato, nimbato nimbana iwanane Aisake okone peyo ome loto, bala opa mindi namba gipe leaipia. Goteto wuane lea-kola, Apatakameto Gotena potomisa pii wamba leane okone nembo toto, nimbato Aisake peyo ome lewando, Goteto bala katulo ika laya olopeya nembo teaipia. Goteto katulo wuane pulupeya lo bilipi loto, Apatakameto Gote opa mauyale Aisake peyo ome lea-yale, Aisake bala omea-yale tekeko, Goteto Apatakame lamawuato, nimbato Aisake peyo ome lolene leaipia. Goteto wuane leane okonemane, Aisake bala omalu, malinga ika lene gulea-kola, Apatakameto bala molo-peke leane lo nanimato nembo tape-pene.*

²⁰ Matili Aisaketo Gote lo bilipi loto, Goteto Jekopo, Iso-la, okonelapo moyoto, wua pulupeya lo belesini mindi mayaepia. *

²¹ Jekopoto Gote lo bilipi lo atalu teke, matili bala omoyale atea-angi, Goteto Josepena iwanane lapo okonelapo moyoto, wua pulupeya lo belesini mindi mayaepia. Maiyu, balana kalango okona duninga minatawa atoto, anda yuunga loto, Gote lo lotu leaipia. *

²² Josepe bala omoyale pea-angi, balato Gote bilipi loto, Isatale tane wandakali tupa lamawuato, matili Goteto yakama moyola-kola, yakama Isipi yuu oko tepa alu polopeyai. Okone angi, yakamato nambana kulini tupa lopo awua pulupape leaipia. *

²³ Wamba Isipi tane kinji okomane loo mindi yata wato, Isatale tane wandakali yakamatu iwanaja mindi mandaendo, bala peyo ome lalapape leaipia. Wuane lea-kola, Mosesa angini, ayiane-lamane bala mandeapi-angi, wua nembo teapele-pia: Nalipato Mosesa peyo ome nalepando, nalipato loo Isipi tane kinji okomane yata yane okone kalo pulupa-kola pulupeya nembo teapele-pia. Wuane tekeko, Mosesa bala iwanaja epene wete mindi ya lo andoto, okonelapo-mane Gote lo bilipi loto, kinji okonemane kenda-pene mindi liyamba gulane lo yuku naene, Mosesa too pitawa peteapi-kola, ana tepo peaipia.*

²⁴⁻²⁶ Mosesa bala andayalu, akali angini mindi atea-angi, bala Isipi tane kinji Peto okona wanane okonena iwanane atea-yale, balato Isipi tane tupana muni tupapi, minditaka epene waka tupapi, utupane kambua wetete yatawa atea-yale. Wuane utupane yatawa atea-yale tekeko, balato ole

ukupini mindilapo angu epelewa atoyale, Isipi tane tupana mana koo tupa wato minukale nembo nateaipia. Jia. Balato nembo toto, Mesaya okomane namba moyolo epolopeya lo bilipi lolowa-kola, Isipi tane wandakali tupamane namba ando lamba lolopeyai. Lamba lolai-kola, namba yalawa atoto, Gotena wandakali tupa towa atu kenda-pene epola tupa awua atewando, matili Goteto yole andane mindi namba gulupeya nembo teaipia. Yole okonemane Isipi tane tupana munipi, minditaka epene tupa pitaka sia minulupuya nembo toto, Mosesato Mesaya oko namba moyolo epolopeya lo bilipi loto, wandakali-mane bala Isipi tane kinji wanane okonena iwanane ateya leakale lo ando konda naapeapia.

²⁷ Wandakali-mane katulo Gote lee-mane anda na-piyaini tekeko, Mosesato Gote lo bilipi leane okonemane Gote lee-mane andene atoto, bala watama pua apowa yaepia. Isipi tane kinji okomane Mosesa towa yatakawa atea-kola teke, Mosesato Gote lo bilipi loto, kinji okonemane kendapene mindi bala gulane lo yuku naene, Isipi yuu oko tepa alu, peaipia.

²⁸ Gotena enjoje mindimane Isipi tane wandakali tupana andopane bulupane tupa peyo ome lololo epoyale pea-kola, Mosesato Gote lo bilipi loto, Pasopa tomo nolane mana oko tewa yata yaepia. Balato mana okone yata ya-kola, Enjole okomane Isatale tane wandakali tupana andopane bulupane tupa peyo ome lolane nembo toto, Isatale tane wandakali utupane-mane sipisipi tundupa tupa yakamana anda asia lomba tupana aiya aka peainipia.*

²⁹ Goteto ipa solewata Letesi oko yapu lo lapo puato, tombenenga asini yakale lea-kola, ipa mau kapu tene yaepia. Kapu tene ya-kola, Isatale tane wandakali tupamane Gote lo bilipi loto, asini okonena poto, ipa Letesi okone kalo piyu, amo yaingi peainipia. Isipi tane yanda yene ami tupamanne Isatale tane watama epoto, ipa Letesi oko kalo puyale tombenenga peai-kola, ipa okonemane Isipi yame utupane peyo pulu pea-kola, Isipi tane utupane pitaka ipa nalu, omeainipia.*

³⁰⁻³¹ Isatale tane akali lapo-mane Jetiko tano okona tenga-mane kambo andolo peapi-kola, pamuku pima epoko piyane wanda Leapa lene okomane Gote lo bilipi loto, yuu kambo andolo peapele akali lapo okonelapo lamawuato, liyamba wayu epeyapi leaipia. Matili Isatale tane-mane Gote lo bilipi loto, Jetiko tano okona

* **11:17-19:** Jen 21:12; 22:1-14; Lom 4:16-17 * **11:20:** Jen 27:27-29,39-40 * **11:21:** Jen 47:31-48:20 * **11:22:** Jen 50:24-25; Ek 13:19 * **11:23:** Ek 1:22; 2:2 * **11:28:** Ek 12:21-30 * **11:29:** Ek 14:21-31

ende ana-mane pitane atene okona ole yanasanga mapu peai-kola, ende okone kulembu lo yuunga tepa yaepia. Tepa yakola, Isatale tane akali utupane-mane Gote lo bilipi nalene wandakali tupa pitaka peyo ome leaini tekeko, Leapato Gote lo bilipi leya lo andoto, utupane-mane bala peyo ome naleainipia.*

³² Nambato pii temane utupane pitaka lalu ato, pii temane andoko tako pua loto, pepa peyokalepe. Nambato Gitiyonepi, Batakapi, Samesonepi, Jepetapi, Dapitipi, Samualepi, potopesa akali tupapi, utupanena temane loto, yakama langulane gii mindi naeya.*

³³⁻³⁴ Goteto potomisa pii minditupa akali utupane lamawuato, yakama moyoyale nambato wua pukale lalu, matili balato utupane moyo wuane teke peaipia. Akali utupane-mane Gote bilipi loto, balana mana epene tika-pene tupa wato minuto, piape tai-lene minditupa peainipia. Akali utupanena minditupa-mane pusi kapua andane layone tupana nee asia minu tuma peainipia. Gote towa yanda-pene akali minditupa-mane Gotena akali minditupa teakale lo ita andane yuku-pene mindi yangeai-kola, akali utupu-mane ita teane okonena tai-lene oko sia mineaini-pia. Minditupa-mane kinji waka tupana ami tupa towa yanda puato, sia mineaini-pia. Minditupa-mane wamba ini bulupane tai nalene ateaini tekeko, matili Goteto utupane minu tai laya ya-kola, utupane yakama yanda piyaini akali tai atoto, yuu waka tane ami tupa sia mineaini-pia. Akali minditupa-mane wandakali utupane peyo ome loyale peaini tekeko, utupane yakama palaka peai-kola, katulo peyo ome naleainipia.*

³⁵ Andopane omeaini tupa ika leai-kola, yakama angini tupamane utupane molo-peke leainipia. Wandakali utupanemane Gote bilipi lo atoto, wuane peaini tekeko, Gotena wandakali minditupamane kenda-pene andane wete tupa awua ateainipia. Gote towa yanda-pene akali tupamane Gotena wandakali minditupa andi loto, yakamato Gote masia mai-yaindo, nanimato yakama pulupa lo tepa amakale leainipia. Wuane leai-kola, Gotena wandakali utupane-mane bala bilipi lo atoto, utupane yakama malinga ika loto, saka atoto kuai lo wete atolopeyama nembo toto, Gote masia mai napulu-peyama leainipia. Wuane leai-kola, Gote towa yanda-pene wandakali utupane-

mane Gotena wandakali utupane tandaka andane wete mayainipia.*

³⁶ Gote towa yanda-pene wandakali utupane-mane Gotena wandakali tupa andayo lamba loto, minditupa kunju-mane peyalu, minditupa sene ende tupamane andi loto, katapusa piyu, peainipia.*

³⁷ Gote towa yanda-pene wandakali utupane-mane balana wandakali minditupa soo-mane katu tingipi lapo piyu, minditupa ana-mane peyo ome lalu, minditupa kandepa luu-mane yoko ome lalu, peainipia. Gote towa yanda-pene wandakali utupane-mane Gotena wandakali minditupa kenda-pene kambua mawuato, kenda-pene andane tupa mai-yaikola, Gotena wandakali utupane yakamanga minditaka nayene, jia yene atoto, sipisipi umbainipi, meme umbainipi, okonetaka tupana umbaini taka lo moto, tona piyu, epoko pua ateainipia.*

³⁸ Gotena wandakali utupane yakama palaka poto, wandakali napalene yuu tupaapi, yuu wangiane tupapi, utupanena epoko pua atoto, ana andapi, yuu lau latanepi, okonetaka tupana ata too pua ateainipia. Utupane-mane Gote bilipi loto, mana epene wete tupa minu ateainipia. Tene okonena, yuu okona koo pua atalaini wandakali utupane towa mina mindiki lo atape-pene guu naleaiapia.

³⁹ Wandakali utupane pitaka-mane Gote lo bilipi loto, mangene minditupa peai-kola, Goteto wandakali utupanena mana utupane andoto, mana kuai lo miniyai leaiapia. Goteto wuane leane tekeko, wamba balato potomisa pii mindi wandakali utupane lamawuato, yakama moyoyale nambato wua pukale leane oko balato okone angi teke napeipia. Jia.

⁴⁰ Anu peakale Goteto mangene okone wamba ini kapoyale napeai-piape. Andipa ateyama wandakali nanima wandakali wamba ateaini utupane towa epene wete gulalapale nembo toto, Goteto nanima pitaka moyoyale piape epene wete mindi pukale lo mandeke peaiapia.

12

Goteto Leya Pua Yakamoto Pua Atalapape Leane Oko

¹ Wamba Gote lo bilipi lene wandakali kambua utupane yakama yuu okona atoto, kenda-pene kambua awua atalu, omalu, ati kenga po atoto, utupane-mane yuu okona wandakali nanima ato mapu puato, anu pua ateyaipe lo

* **11:30-31:** Jas 2:1-21; 6:12-25; Jem 2:24-26 * **11:32:** Akal 6:11-8:32; 4:6-5:31; 13:2-16:31; 11:1-12:7; 1Sa 16:1-1Ki 2:11; 2Ki 1:1-25:1 * **11:33-34:** Dan 3:23-27; 6:1-2 * **11:35:** 1Ki 17:17-24; 2Ki 4:25-37 * **11:36:** 1Ki 22:26-27; 2Tem 18:25-26; Jet 20:2; 37:15; 38:6 * **11:37:** 2Tem 24:21

naniman andatawa ateyai. Utupane-mane naniman andatawa ateyai-kola, Gotena pii pepa pelene eya okomane naniman languato, yakamato namba lo bilipi loto, nambana mana epene tupa tailo wato minu atalapape layene eya. Wuane layene eya-kola, nanimato wuane pua atamakale nembo talaman tekeko, koo nanimanga pata atanate atalane tupapi, yuu okona minditaka epele-pene eya tupapi, utupane-mane naniman minandi lalane. Okonetaka tupamane naniman minandi lolane nembo toto, nanimato mana koo minalamane tupapi, yuu okona minditaka epele-pene eya tupapi, utupane pitaka masia mawua atamakale. Wuane pua atoto, wandakali-mane asia tai lalaini wuane pua teke, nanimato Jisasa lo bilipi loto, balana mana epene tupa tailo wato minu atamakale.*

²⁻³ Nanimato kepa alu konda naene, Jisasana mana epene utupane tailo wato minu atoto, balana mana tupa wayumane nembo tatawa atamakale. Wamba koo piyaini wandakali tupamane Jisasa towa yanda andane pimawua atea-kola, Jisasato kenda-pene utupane awua atoto, Goteto pi-ape pipe leane pua teke, tailo pua ateaipia. Okone ang, Jisasato wua lo nembo teaipia: Namba ita malamanda okona yukatane atoto, yala olopeyo tekeko, matili omalu, malinga ika loto, epele andane wete olopeyo nembo teaipia. Wuane nembo toto, bala tandaka andane nalu, ita malamanda okona omalu, malinga ika lalu poto, Gotena kii tikasa-tole pitulane toko okona peteya. Tene okonena, nanimato Jisasa lo bilipi leyama-kola, balato nanimana bilipi oko mo kuai laya alane. Jisasato wuane piyane okonena, nanimato bala lo bilipi loto, balana mana epene tupa tailo wato minu atamakale.

⁴ Yakamato Jisasa masia mawuato, koo tupa piyapale loto, koo piyaini wandakali tupamane kenda-pene andane minditupa yakamanga giyaini. Geyai-kola, yakamato utupanena pii tanga loto, Jisasa masia mai napulu-peyama lalaini. Yakamato wuane leyai-kola, Jisasa towa yanda-pene wandakali tupamane kenda-pene minditupa yakamanga giyaini tekeko, yakamana umbaininga tundupa kili laa napiyane.

⁵⁻⁶ Goteto yakama balana andopane yame ateyai nembo toto, wamba balato yakama mo tai layawa pii mindi yakama langeane okone yakamato embesa yai. Gotena pii pepa pelene eya okonemane loto, nambana andopane, Akali Andane okomane wandakali mindi yamapanne yo atoto, balana andopane ateyai leando,

balato wandakali okonena mana koo minalane tupa mo tika puyale, kunju-mane peyalane layene eya-ko. Goteto nimbana mana minalene tupa mo tika puyale kendapene mindi nimba geando, nimbato mini kenda wete olene. Dee, balato nimba mo tika puyale kenda-pene mindi nimba gula-kola, nimbato okone angini mindi jia ya, mee ya lo nembo natape layene eya.*

⁷⁻⁸ Yuu okona ayiane-mane balana andopane mo tika piyane pua teke, Goteto balana andopane tupa pitaka mana languato, mo tika piyane. Goteto yakama mo tika napiapia-yale, yakama balana andopane ata napene, mandu apene atapia-yale tekeko, yakama Gotena andopane yame ateyai-kola, balato yakama mana languto, mo tika piyane-ko. Goteto yakama mo tika peakale nembo toto, yakamato kenda-pene awua atoto, balato yakama wua pua atalapa leya pua atalapape.*

⁹⁻¹⁰ Anu peakale nambato wuane leyope. Nanimana ayiane yuu okona atalaini tupamane yakama tane-mane nembo talaini pua ole ukupini mindilapo naniman mana languato, yakama wua pua atalapape lo naniman mo tika piyaini. Wuane peyai-kola, nanimato utupanena pii ale wato, mana wato minu atalaman tekeko, nanimana tandini okona ayiane yuu okona atalaini tupa sia minene. Gote bala tane epene tika-pene wete ateya. Tene okonena, balato nanimapi tika wete pua atalapale loto, naniman mo tika piyane-ko. Nanimato balana pii ale wato, balana mana epene tupa wayumane wete wato minu atamakale. Wuane pua atemando, naniman saka atapowa atolopeyama.

¹¹ Goteto naniman mo tika puyale kendapene mindi geya-kola, okone ang naniman epele naene, mini kenda alaman tekeko, balato naniman mo tika piyake leya-kola, matili nanimato balana mana epene tika-pene tupa wato minu atoto, mini epene palu atalaman.*

¹² Jisasa towa yanda-pene wandakali tupamane Kitisene wandakali tupa kendapene kambua mai-yaikola, Kitisene wandakali utupane yakamana kini kenepi tai nalene manda tene atalaini. Yakamato wandakali utupane mo tai laya alapape.*

¹³ Kitisene minditupa kee koo atoto, Gotena asini epene oko awua tepa alu puyangi lolaini. Tika ando atalapape. Wandakali kee koo ateyai utupane-mane yakama polai oko andoto, watama epeakale

* **12:1:** 1Ko 9:24-25 * **12:5-6:** Jop 5:17; Man 3:11-12; Lap 3:19 * **12:7-8:** Lo 8:5 * **12:11:** Jem 3:17-18 * **12:12:** Ais 35:3 * **12:13:** Man 4:26

nembo toto, yakamato Gotena asini epene okona tika pua pulupape. *

¹⁴ Gotena mana epene tika-pene tupa wato mina napiyane wandakali okone-mane Akali Andane oko katulo anda napulu-peya. Tene okonena, yakamato Gotena mana epene tika-pene tupa wato minu atamakale nembo toto, piape tailo pua atalapape. Wuane pua atoto, wandakali pitaka towa mini epene palu atene mana oko mina-makale lo makande pua atalapape.

¹⁵ Goteto wandakali mindi ondowa moyola-kola, balato Gote awua tepa olane. Tika ando atalapape. Yakamana mindikipi mindimane nembo-tene koo palu atoto, yakamanga kenda-pene minditupa mina ika laya wato, sosa oko minu koyolaini. Tika ando atalapape.

¹⁶⁻¹⁷ Wamba Iso bala Aisake iwanane bulupane atoto, balana belesini okopi, minditaka epene kambua tupa katulo meayale tekeko, balato tomo alu mindiki angu nolane oko kamboyale, minditaka epene utupane pitaka Jekopoto meakale leaipia. Matili Isoto belesini okone tane mokale nembo toto, belesini molane asia ayia pua atoto, ai leane tekeko, belesini molane asia mindi naya-kola, balana ayiane okomane belesini okone gii napukale. Jia leaipia. Isoto tomo alu mindiki nolane okone kamboyale ayianena belesini epene oko awua apeaipia. Wuane pua teke, yakamana mindikipi mindimane yuu okona minditaka epene eya tupa mokale nembo toto, Gotena belesini epene oko awua apialu, bala pasiandia wandakali mindi gulolane. Tika ando atalapape. *

¹⁸ Wamba Gote bala ati Sainai okona epo ateakola, Isatale tane wandakali tupa ati wangiane okonena mandaka poto ateainipia. Ongane atoto, andeakola, ati okonena ita lungu andane mindi talu, yuu undupi andane wete mindi lalu, popo andane mindi lalu, pea-kola, ati Sainai okone andoto, utupane-mane yuku yainipia. Ati Sainai okone kini-mane minape-pene peleane tekeko, wandakali andipa ateyai tupa yakama ati wangiane okonepene mindina mandaka poto ata napeyai. *

¹⁹⁻²¹ Mosesato andea-kola, Ati Sainai okonena mangene Goteto peane tupa yuku-pene wete gulea oko andoto, Mosesato namba yuku wete wato, puti-puti peleyo leaipia. Okone angi, biakulu mindi peleakola, Goteto pii mindi loto, alu mindiki wete nambato yuu oko taimane yundukumi mineakale lokale layene eya. Yuu oko angu

okonetaka mindi ati Sainai okona epeando, yakamato bala ana-mane peyo ome lalapape leaipia. Goteto wuane lea-kola, Isatale tane wandakali utupane-mane pii Goteto leane okone ale wato, yuku wato, pii Goteto lala okonepene mindi dee lapone nanimla langi napeakale leainipia. *

²² Wandakali andipa ateyai tupa yakama ati Sayone wangiane eya okonena moyale mandaka ateyai. Gote saka atapowa atene okona ati kenga tano wenene Jutusaleme oko Sayone wangiane okonena eya. Enjole tausene kambua wete tupa tano okonena amunguli pua atoto, epelewa ateyai.

²³ Wamba Goteto balana andopane gulene yame wandakali utupanena gene tupa pepa peyo yata yaepia. Andipa utupane ati kenga atoto, amunguli pua ateyai. Wandakali pitaka yapa lo tale piyane Gote okonemane wandakali utupanena tandini mo kuai wete laya ya-kola, utupane wandakali epene tika-pene atoto, tano wenene Jutusaleme okonena ateyai.

²⁴ Wamba Keneto Epolo peyo ome leangti, Epolona tundupa okomane Gote lamawuato, nimbato paini kenda-pene mindi Kene maipe leaipia. Matili Jisasa bala omea-kola, balana tundupa okomane pii epene mindi Gote lamawuato, nimbato wandakali tupa ondo wato moyape leaipia. Wuane pea-kola, Jisasa bala wandakali, Gote-la, tombenenga akali atoto, pii wenene Goteto lo yata yane oko mo tai laya yaepia. Andipa yakamato Jisasa lo bilipi loto, Jutusaleme wenene ati kenga eya okonena moyale mandaka ateyai. *

²⁵ Wamba Mosesato Gotena pii keato mindi Isatale tane wandakali tupa lamaiyakola, utupane-mane pii balato leane okone ale wato teke, tanga leainipia. Tanga leaikola, Goteto yole koo mindi wandakali utupane maiyakola, wandakali utupane katulo palaka polane asini mindi nayaepia. Andipa Gote bala ati kenga atoto, pii keato mindi nanimla langeya teke. Nanimato balana pii tanga loto, Jisasa masia mawua atemando, Goteto yole koo mindi nanimla gulupeya. Okone angi, nanimla palaka polane asini mindi katulo nayolopeya. Tene okonena, yakamana ale tuma puato, pii andipa yakama langeya okone tanga lolaini. Tika ando atalapape. *

²⁶ Wamba Gote bala ati Sainai okonena atoto, pii taimane leane okomane yuu yundukumi mineaipia. Andipa balato potomisa pii mindi loto, alu mindiki wete nambato yuu oko taimane yundukumi mineakale lokale layene eya. Yuu oko angu

* ^{12:16-17:} Jen 25:29-34; 27:30-40 * ^{12:18:} Ek 19:16-20; Lo 4:11-12 * ^{12:19-21:} Ek 19:12-13; 20:18-21; Lo 5:22-27; 9:19 * ^{12:24:} Ip 8:6; Jen 4:10 * ^{12:25:} Ip 2:1-4; 10:26-29 * ^{12:26:} Akai 2:6

jia. Ati kenga okopi taimane yundukumi mineakale lokale teke layene eya.*

²⁷ Minditaka katulo ema napula tupa angu yapowa yakale nembo toto, Goteto pii leya okonemane minditaka yakale leane tupa pitaka yuu yundukumi minuto mo apolopeya lo andawa leya.

²⁸⁻²⁹ Nanimana Gote okone bala ita lungu andane tai wete mindimane minditaka eya tupa pitaka katulo taa yiake lape-pene gulene ateya. Tene okonena, nanimato Gote yuku amawua atoto, balana pangosa atape-pene. Wandakali mindimane Gotena tano Jutusaleme wenene oko katulo mo ema napulu-peya. Nanimana Jutusaleme okonena moyale maliyo ateyama-angi, nanimato mana Goteto epele alane tupa minu atoto, Gote ando wayu pele lo bala lo lotu lamakale.*

13

Yakamato Mana Epene Utupane Wato Minu Atalapape Leane Oko

¹ Yakamato ole dindi lo wandakali yan-gone tupa towa epelewa yamapa yo atalapape.

² Wamba enjole minditupa akali mindina andaka epeai-kola, akali anda anduane okonemane akali epeaini utupane enjole minditupa epeyai nembo nateainipia. Akali enene minditupa epeyai nembo toto, balato enjole utupane moyo yatawa paleapipa-ko. Andipa wandakali opene mindi yakamana andaka epeando, yakamato bala moyoto, yatawa palipe-pene oko embesa aa na-piyapape.*

³ Kitisene wandakali waka mindi katapusa paleando, yakamapi utupane towa atu katapusa palene atoto, katapusa pangulane wandakali okone ondo wato moyalapape. Wandakali-mane Kitisene wandakali mindinga kenda-pene mindi maula-kola, Kitisene okonemane kenda-pene okone awua ateando, yakamapi wandakali okone towa atu kenda-pene okone awua atene atoto, wandakali okone ondo wato moyalapape.

⁴ Goteto pamuku pima epoko piyaini wandakali tupa yapa lo tale puato, yole koo mindi malupeya. Tene okonena, akali-mane wanda kee lalu, wanda-mane akali pulu, piyaini mana okone epene tikapene yakale loto, wetene, akalini-la, mina mindiki lo piyaini mana okone minu koya na-piyapape.*

⁵ Yakamato minditaka yakamanga eya tupa atu ya lo nembo toto, muni yamapan

yo ata na-piyapape. Wamba Goteto potomisa pii mindi nanima languato, matili-matilipi nambato nimba mee atola loto, awua tepa alu, konda napulu-peyo. Jia wete leaipia.*

⁶ Goteto wuane leane okone nembo toto, nanimana mini epene paluto, wua lamakale. Akali Andane okomane namba moyalane. Tene okonena, wandakali-mane katulo namba minu koya napulu-peyai-ko. Namba yuku naene ateyo lamakale.*

⁷ Wamba sosa okona akali kawane minditupa-mane Gotena pii layene oko yakama langeai. Utupane-mane Gote lo bilipi loto, mana epene tupa minu ateaini utupane yakamato nembo tolo-peke loto, wuane teke piyapape.*

⁸⁻⁹ Wandakali waka minditupa-mane Gotena pii mana langeyama loto, yakamato tomo utupa nalapape, tomo utupa nanalapape lalaini tekko, mana okonepene tupamane wandakali moyo na-piyaini. Goteto nanimana ondowa moyoto nanimana bilipi mo tai laya eya-kola, nanimana kuai lo atalamane. Jisasa Kataisato wambapi, andipapi, mana epene tupa minu atalan. Wuane pua teke, matili-matilipi balato mana epene mindiki okonepene teke minu atapowa atolopeya. Wandakali mindimane pii mana epene okonepene tupa yakama langi napene atoto, pii mana waka mindi-pene tupa yakama langulai-kola, yakamato Gotena pii enene oko awua tepa alu, puyangi lolaini. Tika ando atalapape.*

¹⁰ Lipai yamena lotu anda sele-mane pene okonena pitisa piape piyaini akali tupa-mane katulo Kitisene wandakali nanimana alata toko okona tomo yalane tupa naa na-piyaini.

¹¹ Anu peakale nambato wuane leyope. Pitisa akali kawane okomane mempi, bulumakaopi, okonetaka tupana tundupa tupa ambu awua poto, lotu anda lumu epene wete okona palane. Poto, Goteto wandakali tupana koo tupa apeakale loto, pitisa akali kawane okonemane opa maiyane. Wuane piyu, balato meme ima, bulumako ima, utupanena angini tupa keme okona takita awua poto, itanga too tosia teakale lo yangalaini-pia.*

¹² Wuane piyaini pua teke, Jisasato balana tundupa okomane wandakali tupa mo epene tika-pene wete gulaya wakale nembo toto, Jutusaleme tano okona takita poto, tandaka nalu omeainipia.*

¹³⁻¹⁴ Nanimana yuu okona ateyama-angi, nanimana tano yapowa yolane mindi yaa

* **12:28-29:** Lo 4:24; 9:3 * **13:2:** Lom 12:13; Jen 18:1-8; 19:1-3 * **13:4:** Ep 5:3-5 * **13:5:** Lo 31:6,8; Jas 1:5 * **13:6:** Sam 11:8:6 * **13:7:** 1Ko 4:16 * **13:8-9:** Lom 14:16-17 * **13:11:** Pit 16:27 * **13:12:** Jo 19:16-17

napea-kola, nanima Jutusaleme wenene ati kenga ato epolopeya okonena makale lo maliyo ateyama. Tene okonena, nanima ando lamba lalaini wandakali utupane masia mawua atoto, nanima Jisasana yame atamakale. *

¹⁵ Jisasato piape wua pua peane lo lapanawa wandakali tupa lamai-yamane mana okone Gote bala opa mayamakola, piyane. Tene okonena, ole dindi lo nanimato Jisasana gene oko lapana wato, balana gene oko laiyu lamakale. *

¹⁶ Wuane pua atoto, yakamoto mana epene tupa minuto, yakamana minditaka yolai tupa tale puato, minditaka nayene jia yo atolaini wandakali tupa moyo maiyapape. Wandakali yangone moyo minditaka maiyaini mana okone Gote lo opa maiyaini mana okonepene eya-kola, Goteto mana okone epele alane-ko. Yakamoto mana epene okone embesa naene, wato minu atlalapape. *

¹⁷ Yakama Gotena yia sipisipi tupa ateyakola, sosa okona akali kawane ateyai tupamanne yakama moyo ando atalaini. Matili utupane-mane Gote lamawuato, nanimato nimbana piape pua atema-kola, wandakali tupamanne wua peaini lolopeyai. Sosa okona akali kawane utupane-mane mini kenda wato piape okone pua ateaindo, okonemane yakama katulo moya napulupuya. Akali kawane utupane-mane piape okone epelewa peakale nembo toto, yakama akali utupanena pangosa atoto, utupanena pii ale amawua, wato minu atlalapane. *

¹⁸ Gotena wenonga nanimato mana epene tika-pene tupa minaima lakae lo nembo toto, yamapane epene palu ateyama-ko. Goteto nanima moyakale lo yakamoto pote lo atalapape. *

¹⁹ Namba yakama ateyainga wamba ini epokale. Goteto namba moyakale nembo toto, yakamoto Gote lo pote lalapape lo nambato yakama langeyo nayu leyo.

Pii Koyo Pua Leane Tupa

²⁰ Nanimana Akali Andane Jisasa bala Gotena sipisipi tupa yatawa ando atalane akali kawane oko atoto, bala tanena tundupa okomane pii wenene yapowa yolane Goteto lo yata yane oko minu tai laya yaepia. Balato pii okone minu tai laya yakola, Goteto bala malinga ika laya yaepia. Jisasa bala malinga ika loto, nanimana mini epene pale laya alane okona tene oko ateya. *

²¹ Yakamoto Gotena nembo-tene oko wato minuto, mana epene tupa pitaka wato minu atalapale loto, Jisasa Kataisato Gotena nembo-tene oko wato minuto, piape peane okomane mana Goteto epele alane tupa nanima andawa leaipia. Matili-matilipi ole dindi lo nanimato balana gene oko laiyu lamakale. Enene.

²² Amene imalini yame, nambato yakamana bilipi oko tai layawa pii okone pepanga peyo epe leyo. Okone pii luu andane wete mindi jia-ko. Yakamoto kepa naene, pii okone wayumane ale alapape.

²³ Gapomane okomane nanima amene Timoti tinga lea-kola, andipa bala katapusa ata nafea. Bala namba ateyonga wamba ini epeando, nalipa lapotaka yakama andolo epolo-peyapa.

²⁴ Akali yakama ando atalaini tupapi, Gotena wandakalipi, yakama pitaka kuai lo atalapape leyama. Itali kanditi tane Kitisesene tupamane yakama kuai lo atalapape leyai teke.

²⁵ Goteto yakama pitaka ondo wato, moyo ateakale lo pote leyo.

* **13:13-14:** Ip 11:9-10,16; 12:2-3,22 * **13:15:** Sam 50:14,23 * **13:16:** Pl 4:18 * **13:17:** 1Tes 5:12 * **13:18:** Ap 24:16; 2Ko 1:12-13 * **13:20:** Jet 32:40; Ese 37:26; 1Pi 2:25

JEMESA

Jemesato Pepa Pedy Pee Leane Oko

¹ Namba Jemesa. Nambato Akali Andane Jisasa Kataisa, Gote-la, okone-lapona piape pimawua atalawane. Wamba Isatale tane wandakali yame alesa tupana wandakali minditupa yakamato yakamana yuu tene tupa tepa alu, yuu waka tupana peainipia. Andipa yakama yuu waka utupanena ateyai-kola, nambato yakamana pepa oko peyo epe loto, yakama kuai lo atalapape leyo.*

Kenda-pene Epola Tupa Auwa Atalapape Leane Oko

²⁻³ Nambana amene imalini yame, yakamato Gote lo bilipi leyama nayu leyaipe, naleyaipe lo andoyale, Goteto kenda-pene mindipene-mindipene tupa yakamanga epeakale lo ando kondalane. Dee, yakama Kitisene tai atalapale nembo toto, Goteto kenda-pene utupane yakamanga epeakale loto, yakamana bilipi oko minu mandeke peakale lo ando kondalane teke. Tene okonena, kenda-pene utupane yakamanga epola-angi, yakamato epelewa teke atape-pene nembo talapape.*

⁴ Goteno mana epene tupana mindikipi mindi yakamanga jia nayola-kola, yakama Goteno wandakali epene tika-pene wete atamakale nembo toto, yakamato kenda-pene epola tupa awua atalapape.

Bilipi Leyo Nayu Loto, Pote Lape-pene Leane Oko

⁵ Goteto mangene mindi peakale lo wandakali mindimane pote leya-kola, Goteto wandakali okone ando laiya nalene, mangene okone piyane. Wuane, kenda-pene mindi yakamana mindinga epola-kola, balato anu puape lo tatake yando, Gote nimbo-tene epene mindi gipe lo balato pote lape-pene. Pote lola-kola, Goteto nembo-tene epene mindi bala malupeya.*

⁶⁻⁸ Wuane tekeko, popo leya-kola, ita tupana mane tupa yangisa puu-puu piyane. Wuane piyane pua teke, wandakali minditupana nembo-tene waka-waka paliyaini. Wandakali utupanena mindimane mini lapo paluto, Goteto mangene mindi pulu-peyape, napulu-peyape lo pote leando, Akali Andane okomane mangene okone puluveya nembo natape-peneko. Wandakali mindimane mini lapo paluto pote nalene, Goteto mangene okone enene

puluveya nemboto toto, pote leyo nayu lape-pene.

Wandakali Tipia Tupa Epelewa Atape-pene Leane Oko

⁹⁻¹¹ Nai tandaka pua teya-kola, palawa dini yati-pene tupa kapu talane. Kapu teya-kola, popo epoto, palawa dini epene utupane yuunga longo tepa aya eya-kola, palawa dini yati-pene tupa koyalu, alu piyane. Wuane piyane pua teke, yuu okona minditaka yati-pene epene kambua yatawa atalaini akali amango tupamane yakamana bisanisa piape tupa pua atoto teke, yakama omalu, alu puluveyai. YUU okona akali amango tupa omalu, alu piyaini tekeko, Goteno wenonga Kitisene wandakali tipia tupana gene andane yalane okonena, wandakali tipia utupane epelewa atape-pene. Tene okonena, Goteto yuu okona akali amango mindi bala mo tipia gulaya yando, bala epelewa atape-pene.*

Mindimane Yakama Minakasa Yakale Lo Yakamato Ando Konda Na-piyapape Leane Oko

¹² Wamba Goteto potomisa pii mindi leone oko loto, wandakali mindimane namba towa epelewa yamapano yo ateando, matili nambato wandakali okone bala saka atapowa ateakale lokale leaipia. Wuane, Sataneto wandakali mindi minu mandeke pula-angi, wandakali okone bala tai atape-pene. Bala tai atoto, mandeke pene okone sia mineando, Goteto balana potomisa pii leane okone nembo toto, wandakali okone bala saka atapowa ateakale lo ataya olopeya. Goteto wuane puluveya nembo toto, wandakali mindi bala tai atoto, kenda-pene awua ateando, bala epelewa atape-pene.

¹³ Mana koo tupamane katulo Gote minu mandeke napiyane. Dee, wandakali mindimane mana koo tupa mineakale loto, Goteto wandakali okone bala minu mandeke napiyane teke. Tene okonena, mana koo tupamane wandakali mindi minu mandeke pula-angi, Goteto namba minu mandeke peya nalape-pene. Jia.

¹⁴ Wandakali nanima mindiki-mindimane minditaka miauwa laka lo nembo talaman tekeko, molane asini tika-pene mindi nayando, mana koo mindi wato minuto, mia-makale nembo talaman.

¹⁵ Wuane nembo toto, wanda-mane andopane mandiyane pua teke, nanimato minditaka miauwa laka lo nembo talaman okonemane mana koo tupa mandeya-kola, nanimato mana koo tupa minalamane. Nanimato mana koo tupa minu atoto, yamapano peke nalemendo,

* **1:1:** Mt 13:54-56; Ga 1:19; Ap 15:23; 1Pi 1:1

* **1:2-3:** Lom 5:3-5; 1Pi 1:7

* **1:5:** Man 2:3-6

* **1:9-11:** Ais 40:6-7

nanima katulo Gote towa atapowa ata napulu-peyamako.

¹⁶ Nambana yamapane yene yame, wandakali mindimane yakama minakasa yakale lo yakamoto ando konda napiyape.

¹⁷⁻¹⁸ Nai teya-kola, minditaka eya tupana tandini oko mo tomaki gula, luu gula piyane tekeko, nai anapi minditaka atinga atoto, tii piyane utupane pitaka yakale leane Ayiane Gote oko bala lawa puapi, mindi napiyane. Jia. Nanima Kitisene wandakali tupamanne waka minditaka balato yakale leane tupa pitaka sia minu, balana yame bulupane atalapale nembo toto, nanimana Ayiane Gote okonemane balana pii enene okomane nanima mandiyu, ati kenga atoto, minditaka epene wete tupa pitaka nanima mee gyane.*

Gotena Pii Okomane Leya Pua Piyapape Leane Oko

¹⁹⁻²⁰ Nambana yamapane yene yame, wandakali mindimane wandakali yangone mindi towa yataka wato, bala minu koyando, balato Gotena mana epene tika-pene oko wato mina napula-kola pulupeyako. Kitisene wandakali yakamoto wandakali yangone tupa towa wamba ini kapoyale yatakawa, pii ini laa napene, yakama pitaka-mane pii ini ale ape-pene. Yakamoto nambana pii okone wayumane nembo toto, wato minalapape.

²¹ Yakamoto mana koo kalato atene kam-bua minalaini mana oko masia mawuato, gene nayene atalapape. Goteto pii layene epene yakamana yamapanenga yandeane okomane katulo yakamana tandini oko molo-peke lolopeya nembo toto, yakamoto Gotena pii layene epene oko epelewa ale alapape.*

²² Yakamoto Gotena pii okone mee alene-mane angu ale yaindo, yakama tane minakasa olai-kola pulupeyako. Wuane pulumane nembo toto, balana pii okonemane leya pua piyapape.*

²³⁻²⁴ Anu peakale nambato wuane leyope. Wandakali mindimane balana leeinga galasanga andalu poto, balana leeinga opokene ateya nembo natene, wamba kapoyale embesa alone. Wuane pua teke, wandakali mindimane Gotena pii oko mee alene-mane angu ale yando, mana okone-mane katulo bala moya napulu-peyako.

²⁵ Wuane tekeko, wandakali mindimane Gotena pii oko ale eyo nayu wato, embesa naene, pii okonemane leya pua teke

peando, Gotena pii layene epene okone-mane bala tinga lo mene atola-kola pulupeyako. Tinga lo mene atola-kola, Goteto wandakali okonena mana tupa mo epene gulaya olopeya.*

²⁶ Wandakali minditupa-mane pii koo mindi lolomane lo tika ando ata napene, pii koo kambua lalaini. Wandakali utupanena mindimane bala tanena gene oko laiyu loto, namba Kitisene epene wete mindi ateyo leando, bala tane andakasa ola-kola pulupeyako. Balana mana koo okonemane balana bilipi okola, lotu lolane okola, okonelapo mee gulaya olopeya.*

²⁷ Nanimana bilipi okola, lotu lalamane okola, okonelapo mee gulolane nembo toto, nanimato yuu okona mana koo tupa wato minulumane tika ando atoto, andopane manyanipi, wanda yalopi, utupane moyo, kenda-pene utupanenga yola tupa awua atape-pene. Nanimato wuane pemando, Goteto andola-kola, balana wenonga nanimato Kitisene mana epene tika-pene tupa wato minu atoloma-kola pulupeyako.

2

Mana Epene Tupa Minu Atalapape Leane Oko

¹ Nambana amene imalini yame, yakamoto nanimana Akali Andane epene wete Jisasa Kataisa lo bilipi lalaini-ko. Yakamoto wandakali gene yene tupa towa angu epele wato, wandakali gene nayene tupa embowa, masia maulaini. Tika ando atalapape.*

²⁻⁴ Anu peakale nambato wuane leyope. Akali amango mindi bala tona epene wete tupa piyu, balana kii ondenenga linji golomane waa-pene mindi piyu, yakamana lotu anda okona epo kolandaka leando, yakamoto bala andoto, nimba toko epene okona pitulu ipu lolopeyai. Wuane tekeko, akali koo tipia mindi balana tona lete-lene tupa piyu, yakamana lotu anda okona kolandaka leando, yakamoto bala lamawuato, nimba ambinga ika lo ateendopi, nambana kee eyonga peteendopi, mindi pii leaindo, yakama jasa nembo-tene koo palene atoto, wandakali kopeta yapa lo tale pulai-kola pulupeyako.

⁵⁻⁶ Nambana yamapane yene amene imalini yame, wamba Goteto potomisa pii mindi bala towa epelewa yamapanene yo ateaini wandakali tupa lamawuato, matili nambato yakama nambana yuu epene okona atama ipulupa lokale leaipia. Andipa yuunga wandakali tipia ateyai tupamanne Gote towa epelewa yamapanene yo atoto,

* **1:17-18:** Jo 1:13 * **1:21:** Kol 3:8; 1Pi 2:1-3 * **1:22:** Mt 7:26-27; Lom 2:12-13 * **1:25:** Lom 8:1-4; Jem 2:12-13
* **1:26:** Sam 14:13 * **2:1:** Ap 10:34; Jem 2:9-11

Gote lo bilipi leyama nayu leyai. Goteto balana yuu epene okone paluni wandalaki tipia utupane mauwakale lata yane tekeko, yakamoto utupane mo yala aya alaini. Yakamoto akali amango tupa epelewa lamialaini tekeko, amango tupamanne yakama kenda-pene guato, yakama kosimi lalaini.*

⁷ Dee, amango utupane-mane Kataisana gene epene Goteto yakamanga geane okone lamba lalaini. Lamba leyai-kola teke, yakamoto utupane towa epelewa atoto, wandalaki koo tipia tupa masia mawua ateaindo, yakama jasa nembo-tene koo palene atoto, wandalaki kopeta yapa lo tale pulai-kola pulupeyai.

⁸ Gote bala nanimana kinji oko atoto, balana pii pepa pelene eya okona loo mindi yata wato, nimbato nimba tane epele alene pua teke, nimbana wandalaki yangone tupa towa epelewa yamapanne yo atape leaipia. Yakamoto loo okone wayumane wato minu ateaindo, yakamoto mana epene mindi wato minulai-kola pulupeyai.*

9-11 Wuane pulupeyai tekeko, wamba Goteto loo minditupa yata wato, nimbato pamuku napipe, wandalaki yangone mindi peyo ome nalape leaipia. Wuane, nimbato pamuku napene atoto teke, wandalaki yangone mindi peyo ome leendo, nimbato Gotena loo tupa kalo pilini wandalaki atolopele. Wandalaki mindimane loo waka Goteto yata yane tupa pitaka wato minu atoto teke, mindiki angu kalo peando, balato Gotena loo tupa pitaka kalo pula-kola pulupeyai. Tene okonena, yakamoto wandalaki gene yene tupa towa epele wato, wandalaki gene nayene tupa mo yala aya yaindo, yakamoto loo Goteto yata yane tupa kalo pulai-kola pulupeyai. Yakamoto wuane peaindo, koo tene yakamanga yolopeyai.*

12-13 Wandalaki mindimane balana wandalaki yangone tupa ondo nayando, matili Goteto wandalaki kote lo tale pula-angi, Goteto wandalaki okone ondo na-olopeya. Wuane tekeko, wandalaki mindimane wandalaki yangone tupa ondo yando, Goteto wandalaki okone ondo wato, bala tinga lo molo-peke lolopeya. Goteto loo okone wato minuto, yakama kote lo tale pulupeyai nembo talapape. Wuane nembo toto, yakamoto wandalaki yangone tupa ondo wato, pii epene tupa loto, utupane towa mana epene tupa minu atalapape.*

*Mana Epene Mina Napiyane Wandakali
Tupana Bilipi Mee Gulalane Leane Oko*

¹⁴ Nambana amene imalini yame, wandalaki mindimane Gote lo bilipi leyo loto teke, mana epene tupa mina napeando, balana bilipi okone mee gulolo-peya. Mee guloa-kola, balana bilipi okonemane katulo bala molo-peke nalolo-peya. Jia wete.

¹⁵ Wuane pua teke, yakamana Kitisene amenepi, imalinipi, mindi balanga tona pulanepi, tomo nolanepi, mindi jia yene atolopeyai.*

¹⁶ Minditaka jia yene atola-kola, yakamana mindimane tonapi, tomopi, mindi bala moyo mai napene atoto, mee pii-mane loto, nimba upa naene, tomo nono naene, mini epene palu pupe leendo, nimbanba pii okonemane bala anu pua moyolo-peyape.

¹⁷ Kitisene wandalaki mindimane lola oko loto, nambato Gote lo bilipi leyo loto teke, wandalaki yangone tupa ondo wato moyo napeando, balana bilipi lolane okone mee gulolo-peya.

¹⁸ Wandalaki mindimane bala lamawato, nimbato Gote lo bilipi lalene tekeko, nambato mana epene tupa minu atalawane lolopeyai. Nimbato mana epene mindi mina napene, mee bilipi angu leendo, nambato nimbanba bilipi okone katulo anda napulopeyo tekeko, mana epene minuluwa okomane nambato Gote lo bilipi leya lo nimba andawa lolopeyai.*

¹⁹ Nimbato Gote mindiki angu ateya lo bilipi lele okone mana epene tekeko, sipi-tisa koo tupamanne Gotete mindiki angu ateya lo bilipi loto, balato kenda-pene mindi utupane yakama gulane lo yukuwa putu-putu peyo atalaini.

²⁰ Nimbato mana epene mindi mina napene, mee Gotete ateya lo bilipi leendo, nimbanba bilipi okone mee gulolo-peya. Nimbato okone enene ya lo nembo nateando, nimba wandalaki kee ene mindi atele. Nambato wuane leyo okona tene tupa nimba langeyo oko nimbato ale ape.

²¹⁻²³ Gotena pii pepa pelene mindimane loto, wamba Goteto potomisa pii mindi Apatakame lamaiya-kola, Apatakameto balana potomisa pii okone bilipi leane okonena, Goteto bala akali epene tika-pene mindi ateya leane layene eya. Matili nanimana yumbane Apatakameto pii Gotete leane oko wato minuto, Gote opa mayuale balana iwanane Aisake alata toko okona peyo yangoyale peaipia. Yangoyale pea-kola, Goteto Apatakamena mana epene okone andoto, bala akali epene tika-pene mindi ateya leaipia. Wuane lea-kola,

* 2:5-6: 1Ko 1:26-28 * 2:8: Mt 19:19; Ga 5:13-14 * 2:9-11: Lo 1:17; Mt 5:19-20; Ek 20:13-14; Lom 13:8-10 * 2:12-13:
Ga 6:2-3; Jem 1:25; 1Pi 2:16; Mt 5:7; 18:32-35 * 2:15: 1Jo 3:17 * 2:18: Ga 5:2-6

Gotena pii pepa pelene eya okone enene guleaipia. Enene gulea-kola, wandakalimane Apatakame bala Gotena yamapane yene mindi ateane leainipia. Apatakameto Gote lo bilipi loto, mana epene okone minea-kola, mana epene balato mineane okomane balana bilipi okone mo epene wete gulaya yane oko nimbato andele okoni.*

24-26 Wuane pua teke, akali lapo Jetiko tano oko kambo andolo peapi-kola, pamuku piyane wanda Leapato akali okonelapo mo too piyu, asia waka mindina peke leakale leaipia. Balato mana epene okone minea-kola, Goteto bala wanda epene tika-pene mindi peteya leaipia. Wandakali mindi omeya-angi, balana tandini okomane umbaini oko tepa alu peya-kola, balana umbaini oko omene mee yalane. Wuane piyane pua teke, wandakali mindimane Gote lo bilipi angu loto, mana epene mindi mina napeando, balana bilipi oko omene yola-kola pulupeya. Goteto wandakali okone bala epene tika-pene mindi ateya na-lalane tekeko, wandakali mindimane Gote lo bilipi loto, mana epene tupa minu ateya-kola, Goteto wandakali okone bala epene tika-pene ateya lalane okone yakamato nembo teyai okoni.*

3

Yakamana Ekene, Ambulini-la, Kuai Lo Ando Atalapape Leane Oko

1-2 Nambana amene imalini yame, wandakali mindimane pii koo mindi nalene, balana ekene ambulini oko kuai lo ando ateando, wandakali okone bala epene tika-pene wete mindi atolopeyai. Balato balana umbaininga ateya tupa pitaka katulo kuai lo ando atolopeya tekeko, yuu okona wandakali nanimana pitaka-mane mana koo kambua minalamane. Nanimato mana koo minalamane okonena, Goteto yuunga wandakali pitaka kote lo tale pulupeya tekeko, balato nanimana tisa tupa kote keato wete mindimane yapa lo tale pulupeya-ko. Akali kambua yakamato wandakali mana lamai-yaini akali atamakale nembo na-talapape. Jia.

3 Nanimato yia osa mindina masianenga pituto, asia makale nembo tolomane okona bala peakale loto, balana nee asianga aene ajako mindi pale lalamane. Wuane pua-to, aene ajako okonemane nanimato balana ingane mo tika peyama-kola, balana umbaini andane oko pitaka balana ingane ajako oko watama palane.

4 Dee, ipanga pitiyu palaini sipi andane tupa nembo talapape. Popo andane mindi loto, sipi andane tupa awua palane. Sipi andane utupanena ingane oko ajako wete atalane tekeko, sipi ingane minalane akali okomane asini pokale nembo tolane okona peakale loto, sipi ingane ajako oko mo tika peyama-kola, sipi andane oko asia okonena palane.

5 Wuane piyane pua teke, nanimana ekene ambulini ajako ateyama okomane katulo piapé andane mindi piyane. Ita lengane ajako mindimane tata too awua poto, ita kambua wete too koyo piyane. Wuane pua teke, nanimana ekene ambulini ajako okomane pii koo mindi loto, mindi-taka kambua minu koyalu, wuane pewa lo, katulo bala tane laiyu lalane.

6 Wuane piyane pua teke, Satane oko bala yuu koo ita too atene okona atoto, wandakali mindina ekene ambulini oko ita lungu yale gulaya alane. Wandakali okonena ekene ambulini oko ita lungu too ateya-kola, balato mana koo mindipene-mindipene tupa mina ika lalane. Balana ekene ambulini ajako okomane wandakali waka tupa towa kenda-pene kambua mina ika laya wato, wandakali okone minu koy-alane teke.*

7 Yia kapuapi, piango anatopepi, ekapi, etulupi, dee ipa pangosa pitiyanie tupapi, utupane pitaka wandakali-mane mo tambo laya alamane.

8 Nanimato wuane piyamane tekeko, wandakali mindikipi mindimane bala tanena ekene ambulini okolapo katulo mo tambo laya na-alane. Wandakali peyo ome lalane posini koo tupa wandakalina ekene ambulini okona tumbi latane ateya-kola, ole kambuangga ekene ambulini okonelapomane pii koo kambua tupa loto, piapé koo kambua tupa piyapele.*

9-12 Nambana amene imalini yame, ita piki mindina olipi dini mindi katulo lialaepe. Pee, getepe eyaka mindina piki dini mindi katulo lialaepe. Ipa solewata kaa-pene okola, ipa enene okola, lapotaka kendo mindikina katulo epalaepé. Jia wete. Ipa kendo mindiki okonena teke ipa solewata kaa-pene okola, ipa enene okola, okonelapo lapotaka na-epalane tekeko, nanimana ekene ambulini mindiki okomane nanimato pii epene-la, koo-la, okonelapo lapotaka lalamane. Nanimana Ayiane Gote bala nanimana Akali Andane oko ateya nembo toto, nanimana ekene ambulini okonemane balana gene oko laiyu lalamane. Bala laiyu lalu, nanimana ekene mindiki okonemane teke pii koo

* 2:21-23: Jen 15:6; 22:9-12; Ip 11:17-19; 2Tem 20:7; Ais 41:8
15:11,18-20 * 3:8: Lom 3:13-14

* 2:24-26: Jas 2:1-21; Ip 11:30-31 * 3:6: Mt 12:36-37;

loto, nanimato wandakali Gote bala tane yale waa peane tupa minu koyalamane. Nambana amene imalini yame, nanimana mana okone kuai naleya-ko. Nanimato mana okone kondamakale.

Yakamato Pii Enene Oko Ango Aiya Olaini, Tika Ando Atalapape Leane Oko

¹³ Yakamana mindi bala wai-ene atoto, mana epene tupa wayumane andalanep. Wandakali okonepene mindi ateando, bala wandakali waka tupana pangosa atoto, mana epene tupa wato minu atolane mana okomane bala wai ene ateyo lo andawa lape-pene.

¹⁴ Yakamato okone andawa lape-pene eya-kola teke, yakama tane gene andane miama lakae lo nembo talaini. Wuane nembo toto, yakamato wandakali gene yene tupa towa apiangu pua ateaindo, yakamato owato pii loto, yakama tanena gene tupa laiyu lolai okomane pii enene oko anga aya olaini. Tika ando atalapape.

¹⁵⁻¹⁶ Gene andane miama lakae lo nembo talaini wandakali tupamanne yangone gene yene tupa towa apiangu pua atoto, utupane towa kuai lo potomane nalene, mana koo tupa pitaka minu atalaini. Gote ati kenga ateya okomane mana koo okonepene tupa gii napiyane. Jia. Sataneto yuu okona tawe mana utupane geya-kola, wandakali-mane utupanena nembo-tene wambane okowato minu atoto, mana koo tupa minu atalaini.

¹⁷ Wandakali utupane-mane mana koo tupa minu atalaini tekeko, Gote ati kenga ateya okomane nembo-tene epene tupa balana wandakali tupanga maiya-kola, utupane-mane nembo-tene epene tupa wato minalaini. Utupane-mane wandakali mindi minakasa oyale, bala ando gitisa pii mindi laa na-piyaini. Jia. Wamba ini bulupane wandakali utupane-mane nembo-tene epene wete tupa wato minuto, utupane-mane wandakali yangone tupa towa tambo-tambo lo mini mindiki palu atoto, wandakali yangone tupana pii ale amaiyaini. Utupane-mane wandakali gene yene tupa angu epele naene, wandakali pitaka epele alaini. Dee, utupane-mane wandakali yangone tupa ondo wete wato, utupane moyo, mana epene kambua minu atalaini.

¹⁸ Wandakali-mane tomo waini epene yandeya-kola, tomo epene okonepene teke ika lalane. Wuane pua teke, wandakali mindimane wandakali yangone tupa towa nembo mindiki palu atoto, utupanenga mana epene tupa minu ateya-kola, wandakali utupane-mane balana mana epene tika-pene okonepene teke minalaini.*

4

Yakama Gotena Pangosa Atalapape Leane Oko

¹ Anu peakale yakamato yatakawa pii-mane yanda puato, peya-peya pua atalainipe. Yakamana umbaini-mane minditaka epele alane tupa miaima lakae lo nembo toto, yakamato peya-peya pua atalaini jiape.*

²⁻³ Yakamana umbaini okomane epele yakale nembo toto, Goteto minditaka geakale lo yakamato pote leyai-kola, alu mindi yakamato utupane yakama gii napene kondalane. Dee, ole mindi tupana Goteto minditaka gii lo yakamato pote nalene kondalaini. Tene okone-lapona, yakamanga minditaka jia yene ateyai. Yakamanga minditaka jia yene atoto, yakamato minditaka mia-makale nembo talaini tekeko, molane asia mindi nayalane. Molane asia mindi naeya-kola, yakamato wandakali mindina minditaka eya tupa miaima lakae lo nembo toto, utupane towa yataka wato, yanda pimawuato, utupane peyo ome laraini.

⁴⁻⁵ Gotena pii pepa pelene eya mindimane loto, nanimota Gotena pangosa atoto, bala angu epelewa yamapane yo atalapale nembo toto, Goteto balana Oli Sipitisa oko nanimota geane layene eya. Yakamato pii Goteto leya okone mee leya nembo teyaipe. Yakamato Gotena pii okone tanga loto, yuu okona minditaka eya tupa epelewa yamapane yo ateaindo, yakama pamuku piyaini wandakali atolai-kola pulupeya. Yakamato wuane peaindo, yakamato Gote embo wete olai-kola pulupeya oko yakamato nembo nateyaipe. YUU okona minditaka eya tupa epelewa yamapane yo atalane wandakali oko bala Gote towa yanda-pene atalane.*

⁶ Wuane tekeko, Goteto nanimota ondo wato, wayumane moyalane. Tene okonena, Gotena pii pepa pelene eya okomane loto, wandakali mindimane bala lipinga yale ateyo nembo toto, bala tanena gene oko laiyu leando, Goteto wandakali okone mo ainapi lalane. Wandakali mindimane bala tane wandakali waka tupana nappinga yale ateyo nembo toto, wandakali yangonena pangosa ateando, Goteto wandakali okone ondo wato moyalane layene eya.*

⁷ Yakamato Gotena pii pepa pelene eya okone nembo toto, balana pangosa atalapape. Sataneto yakama minu makande puato, koo piyapapape lola-angi, yakamato balana pii okone tanga loto, jia leaindo, Sataneto yakama tepa alu, palaka polopeya.*

* **3:18:** Mt 5:9; Ip 12:11 * **4:1:** Lom 7:21-23 * **4:4-5:** Lom 8:5-8; 1Jo 2:15-17 * **4:6:** Man 3:34; 1Pi 5:5-7 * **4:7:**

8-9 Yakama Gote town mandaka atalapape. Mandaka atolai-kola, Gote bala yakama town mandaka teke atolopeya. Nembo lapo palene wandakali yakamato andipa mana koo minu atoto, epelewa giwawa ateyai. Yakamato mana okone tepa alu, mini kenda wato, yakamana kinina kalato ateya tupa wasa-wasa peyoto, yakamanga nembo koo paleya tupa apialapape. Apialu, mana koo utupane minu ataima nembo toto, yakama mini kendawa, ai lo, yali wete lo atalapape. *

10 Mini kenda wato, Akali Andane okona wenonga yakama wandakali koo atoto, balana pangosa atalapape. Yakamato wuan peaindo, balato yakama laiyu lolopeya. *

Yangone Layanga-laini Mana Tupa Tepa Alapape Leane Oko

11-12 Gotena loo okomane pii mindi loto, nimbato wandakali yangone tupa town epelewa yamapane yo atape leya. Wandakali mindimane wandakali yangone mindi laya-geando, balato Gotena loo okone koo ya lola-kola pulupeya. Nimbato Gotena loo okone koo ya loto, wato mina napeendo, nimba Gotena loo tale piyane jasa mindi atolopele. Ayiane Gote bala tane angu loo utupane yata yaepia. Bala tane angu wandakali yapa lo tale piyane jasa ateya. Balato wandakali tupa minu koyandopi, molo-peke leandopi, piape okone bala tanenga angu eya. Wuane, nimba apito jasa atoto, nimbana wandakali yangone tupa yapa lo tale pua atelepe. Amene imalini yame yakamato wandakali yangone layanga-laini mana okone tepa alapape. *

Mana Epene Wato Mina Napiyane Wandakali Mindimane Koo Piyane Leane Oko

13-16 Ita tua tupa ole ukupini mindilapo angu talu, wamba kapoyale alu piyane. Wuane piyane pua teke, wandakali yakama yuu okona ole ukupini mindilapo angu atalu, wamba kapoyale alu piyaini. Tene okonena, anati yakama wua pua atolopeyama nembo nateyai teke, yakamana minditupa-mane yakama tane gene tupa laiyu lalaini. Laiyu loto, andipa yandopi, anati yandopi mindi, nanima tano okona poto, mali mindiki bisanisa piape puato, muni kambua molopeyama lalaini. Wuane loto, yakama tane gene tupa laiyu lalaini mana tupa pitaka koo teke-teke eya. Tene okonena, yakamato wuan lalaini mana okone kondalu, Akali Andane okomane nanimato wuan piyapale nembo teando,

nanimaka saka atoto, piape okone pemandopi, dee waka mindi pemandopi, mindi pulu-peyama lape-pene.*

17 Wandakali mindimane mana epene mindi wato minape-pene eya oko andoto teke, mana okone wato mina napeando, balato mana koo mindi minula-kola pulupopeya. *

5

Yuu Okona Amango Tupa Yakamato Ai Taimane Lalapape Leane Oko

1-3 Andipa nambato yuu okona amango tupa pii mindi lamaiyo. Yuu gii oko koyo puyale peyaa-kola teke, yakamato minditaka kambua mo amunguli pua yatawa ateyai tekeko, puya-puya tupamane yakamana tona epene yatawa ateyai tupa neyakola, koyalane. Yakamana minditaka epene yatawa ateyai utupane pitaka tamualu, alu piyane. Goteto yakamana golopi, silipapi, utupane ipakula tene eya oko andoto, yakamato wandakali tipia tupa wayumane moya napeaini ya lo andolopeya. Yakamana mana koo okone andoto, balato yakama yapa lo tale puato, yuu koo okona pulupa lola-kola, ita too atapowa atene okomane yakamana umbaini oko yangolopeya. Kenda-pene utupane pitaka amango yame yakamanga epolopeya nembo toto, yakama tane ondowa, ai taimane loto, yamatata lo atalapape leyo. *

4-6 Anu peakale kenda-pene utupane yakamanga epolo-peyape. Piape akali minditupa-mane yakamana eenga tomo mandu geyai-kola teke, yakamato utupane minakasa wato, yole minditupa mai napene, kondalaini. Kondalu, yakama yuu okona atoto, muni okonemane yakama tanena minditaka epene kambua tupa kamboto, epelewa kuai lo atalaini. Yakamato tomo kambua noto, ini andane ateyai-ko. Yakama peyo ome lolane gii oko wamba kapoyale epeya. Yakamana piape akali tupamane Akali Andane tai-lene wetete oko lamawuato, amango tupamane yole minditupa nanima gii napene kondapia, leyai-kola, balato alewa ateya. Dee, amango yame yakamato akali epene tika-pene mindi kosimi loto, bala peyo ome loyale peai-kola, yakamato wuan peakale lo balato ando konda ya-kola, yakamato bala peyo ome leainipia. Yakamato bala peyo ome leainipia, kenda-pene utupane yakamanga epolopeya nembo toto, yakama tane ondo wato, ai taimane loto, yamatata lo atalapape. *

* 4:8-9: Sak 1:3; Mal 3:7; Ais 1:16 * 4:10: Jop 5:11; 1Pi 5:5-7 * 4:11-12: Lom 2:1; 14:1-4 * 4:13-16: Lk 12:18-20;
Man 27:1; Sam 39:5,11 * 4:17: Lk 12:47-48 * 5:1-3: Mt 6:19-21 * 5:4-6: Lo 24:14-15; Lk 16:25

7-8 Wandakali mindimane ee mindi yoko yandoto, nai kingi-lamane andayakale lo mini tongewa atoto, kepa naene, dini nape yakale lo mee maliyo atalane. Wuane pua teke, Akali Andane oko bala lapone epolopeya nembo toto, Kitisene wandakali yakamato kepa naene, mee maliyo atalapape. Akali Andane oko bala lapone epolane gii oko mandaka guleya nembo toto, yakama mini tongewa atalapape. Amene imalini yame yakamato bala lo bilipi loto, ini kepa naene, maliyo atama pulu, Akali Andane lapone epolane gii okonena giau lalapape. *

9 Akali Andane okomane wandakali yapa lo tale pulu epoyale, bala asia lombanga epo ateya. Balato yakama yapa lo tale pulane nembo toto, yakamato wandakali yangone mindi layango atolaini ando atalapape.

10-11 Wamba kenda-pene kambua akali Jopo oko balanga epea-kola, balato kenda-pene utupane awua atoto teke, keato yo ateapia. Wuane pua ateakola, Akali Andane okomane Jopo ondo wato, moyakola, Jopo bala kuai lo ateane okone yakamato ale yai okoni. Kenda-pene tupa awua atoto, keato yo atalane wandakali okone bala epelewa atoto, kuai lo atalane lalamane. Wamba potopesa akali tupamane Akali Andane okona piape pimawua atoto, wandakali tupa balana pii lamawua ateainangi, kenda-pene kambua potopesa akali utupanenga epea-kola teke, utupane-mane kepa naene, keato yo ateainipia. Amene imalini yame, yakamato potopesa akali utupanena mana epene okone wato minu atalapape. *

Yakamato Enene Wete Leyo Loto, Weno Minulaini Leane Oko

12 Nambana amene imalini yame, andipa nambato pii andane mindi yakama langeyo. Yakamato pii mindi mo tai laya oyale, yuu yandopi, ati kenga yandopi, dee waka minditaka yandopi, mindi gene loto, enene wete leylo loto weno minalaini. Yakamato wuane piyaini okonena, Akali Andane okomane yakama kosimi lolane nembo toto, yakamato enene leylo leaindo, weno mina napene, mee enene leylo lalu, kondalapape. Dee, yakamato loto, nambato wuane nape leaindo, weno mina napene, nambato wuane nape angu lalu, kondalapape. *

Yakamato Mindi Akali Moyaka Pua Gote Lo Pote Lalapape Leane Oko

13 Yakamana mindi balanga kenda-pene mindi yando, balato Gote ando pote lape-pene. Yakamana mindi bala epelewa atando, balato Gotena gene oko laiyu lo sojo lape-pene.

14 Yakamana mindi bala siki peleando, balato sosa okona akali kawane tupa ipulupa lo ee lo miape-pene. Ee lo mola-kola, akali utupane-mane Akali Andane okona gene oko loto, wandakali siki pelene okona umbaininga wele aiya mawuato, pote lape-pene. *

15 Akali utupane-mane Gote lo bilipi loto, pote leaindo, Akali Andane okomane wandakali okonena siki okone mo atu yoto, bala saka ataya olopeya. Wandakali siki pelene okonemane koo mindi piyae yando, akali utupane-mane pote lolai-kola, Goteto balana koo utupane apia-malupeya. *

16-18 Tene okonena, yakamato yakamana koo pulaini tupa wandakali yangonenga lapana aka pua atalapape. Wamba potopesa akali Ilainja bala akali nanima yale teke atoto, kingi na-epeakale lo pote leyo nayu lea-kola, mali teponga ana wataka kingi naepene, panyu angu pua ateapia. Okone angi, balato kingi lapone epeakale lo Gote ando pote lea-kola, ati kenga ato kingi epea-kola, yuu okona tomo tupa ika leaipia. Wuane pua teke, andipapi wandakali epene tika-pene mindimane Gote ando pote leando, balana pote lolane okonemane piape tailo pulupeya. Tene okonena, Goteto yakamana siki tupa mo atu yakale loto, yakamato mindi moyaka pua, Gote ando pote lalapape. *

19-20 Nambana amene imalini yame, yakamana mindimane Gotena pii enene oko awua tepa alu, puu yangi lolopeya. Bala puyangi lola-angi, yakamana mindimane bala lamo atu Gotena asini epene okona peke leaindo, Goteto wandakali peke lolane okonena koo pulane tupa apia maulakola, balana tandini oko oma napulu-peya nembo talapape. *

* 5:7-8: Lo 11:14; Jet 5:24; Lom 13:11-12; 1Pi 4:7 * 5:10-11: Ek 34:6; Jop 1:21-22; 2:10; Sam 103:8 * 5:12: Mt 5:34-37
* 5:14: Mk 6:13 * 5:15: Mk 16:17-18 * 5:16-18: 1Ki 17:1; 18:1,42-45 * 5:19-20: Ga 6:1; Man 10:12; 1Pi 4:8

1 PITA

Pitato Pepa Bulupane Peyo

Pee Leane Oko

¹ Namba Pita. Namba Jisasa Kataisana aposolo akali mindi ateyo. Wamba Goteto yakama balana wandakali atalapale lata ya-kola, yakamato yakamana yuu tene tupa tepe alu poto, Pondasapi, Galesiapi, Kapatosiapi, Esiapi, Bitiniapi, yuu utupanena peai okoni. Andipa nambato yuu utupanena opene ateyai wandakali yakamana pepa oko peyo epe leyo.

² Wamba Ayiane Goteto nembo toto, matili Jisasa Kataisana tundupa okomane yakamana koo tupa wasa-wasa peyo apola-kola, yakamato balana pii oko wato minalapale nembo teaipia. Wuane nembo toto, balato yakama balana wandakali tupa atalapale lata ya-kola, balana Oli Sipitisa okomane yakama Gotena wandakali tupa gulaya yaepia. Andipa Goteto yakama ondo wete wato, wayumane moyoto, yakamana yamapanane mo tambo laya yakale lo pote leyo.*

³⁻⁴ Nanimato nanimana Akali Andane Jisasa Kataisana Ayiane Gote okona gene oko laiyu lo atamakale. Anu peakale nanimato wuane pua atamakalepe. Goteto nanima ondo wete wato, Jisasa Kataisa malinga ika laya yane okonemane nanimana mo wenene gulaya yane. Balato wuane peane okonena, matili nanimato Kataisanga minditaka epene wete mindi molopeyama lo maliyo ateyama. Nanimana minditaka epene wete Goteto ati kenga yatawa ando ateyai okone tamuapi, koyopi, alu puapi mindi napene, epene wete yapowa yolopeya.*

⁵ Matili yuu koyo puyale pula-angi, kenda-pene kambua epolopeya. Okone angi, Goteto yakama molo-peke lolane asini oko panakame yolopeya. Goteto yakama molo-peke lolopeya loto, yakamato Kataisa lo bilipi leyai-kola, Gotena tai-lene okomane yakama moyo ando atalane.*

⁶ Tene okonena, yakama epelewa ateyai tekeko, kenda-pene waka-waka kambua yakamanga epeando, andipa oto ukupini ateyama tupana yakamato kenda-pene utupane awua atoto, tandaka no yamapanane kendawa atape-pene atolopeyai.*

⁷ Anu peakale kenda-pene utupane yakamanga epolo-peyape. Matili Jisasa Kataisa bala ama tombenga panakame epola-angi, yakamana bilipi okone angini

* **1:2:** Lom 8:28-30; 2Tes 2:13-14 * **1:3-4:** Kol 1:12-14

* **1:7:** Man 17:3; Sak 13:9; Mal 3:3; Jem 1:2-3

Lk 24:25-27

guleando, Goteto yakama towa epele wato, gene andane mindi yakama giyu, tiipene oko giyu, pulupeya. Goteto wuane pukale nembo toto, wandakali-mane golo mindi enene guleyape lo andoyale itanga yangoto makande piyaini pua teke, Goteto yakamana bilipi oko enene guleyape lo andoyale, kenda-pene waka-waka kambua yakamanga epeakale lalane. Golo bala epene tekeko, golo koyalane. Yakamana bilipi okonemane golo tupa sia minuto, epene wete eya.*

⁸⁻⁹ Wamba yakamato Jisasa Kataisa anda naapeaini tekeko, yakamato bala towa epelewa yamapanane yo atalaini. Andipapi yakamato bala anda napene ateyai tekeko, yakamato bala lo bilipi leyai okonena, Goteto yakama molo-peke leya. Tene okonena, yakama epele andane wete wa ateyai-kola, yakamana epele ene andane wete okone wandakali-mane waka minditaka mindi towa katulo mandeke napulu-peyai.*

¹⁰⁻¹¹ Wamba Kataisana Sipitisa okomane potopesa akali tupa lamawuato, matili Kataisato wandakali tupa ondo wato, utupane molo-peke loyale, tandaka nalu, gene andane mindi molopeya leaipia. Kataisana Sipitisa okomane wuane lea-kola, potopesa akali utupane-mane Gote tipa piki puato, mangene aki mindi pula-kola, Kataisato wuane pulu-peyape. Andoko angi Kataisato wandakali tupa molo-peke lolo-peyape leanipia.*

¹² Enjole tupamanepi pii utupane mana miaima laka lo nembo talaini. Potopesa akali tupamanepi pii utupane Gote tipa piki peai-kola, Oli Sipitisa okomane utupane lamawuato, yakama ateyai-angi, Kataisa bala ini naepolo-peyape leaipia. Matili wandakali waka minditupa atolai-angi, bala epolopeya. Yakamato wandakali matili atolai utupane moyoyale, potopesa pii loto, pepa peyalaini leaipia. Wuane lea-kola, matili Goteto Oli Sipitisa oko lamawuato, nimba poto, nambana piape akali tupa minu tai laya ape leaipia. Oli Sipitisa okomane Gotena piape akali tupa minu tai laya ya-kola, utupane-mane balana pii layene epene oko andipa ateyai wandakali yakamanga langeai okoni.

*Yakama Wandakali Epene Tika-Pene
Wete Gulalapape Leane Oko*

¹³ Tene okonena, yakamato Gotena mana epene tupa wato minu atamakale nembo toto, yakamana nembo-tene oko mandeke pitawa atalapape. Mandeke pitawa atoto, yakama tane mana minulai tupa kuai lo

* **1:5:** Jo 10:28-30; 17:11-12 * **1:6:** 1Pi 5:9-11; Jem 1:2-3

* **1:8-9:** Jo 20:29; 2Ko 5:6-7 * **1:10-11:** Mt 13:16-17; Sam 22; Ais 53;

ando atalapape. Kuai lo ando atoto, matili Jisasa Kataisa bala panakame epola-angi, balato yakama ondo wato moyolo-peya nembo toto, yakamato maliyo atalapape.

¹⁴ Wamba Gotena pii mana tupa yakamanga naya-angi, yakamato mana koo yame tupa wato minaima laka lo nembo teaini tekeko, andipa yakamato mana koo yame utupane wato mina napene, andopane-mane ayianena pii ale alaini pua Gotena pii alewa atalapape.*

¹⁵⁻¹⁶ Yakamato wuane pua atalapale loto, Gotena pii pepa pelene eya mindimane loto, namba yakamana Gote epene tika-pene wete ateyo. Tene okonena, yakamapi epene tika-pene wete atalapape layene eya. Gotena pii okomane wuane leya okonena, yakama ee lo meane Gote okomane mana epene tika-pene tupa angu wato minu atalane pua teke, yakamatopi mana epene tika-pene tupa angu wato minu atalapape.*

¹⁷ Yakamato pote loto, Gote ando Ayiane lalaini. Ayiane okonemane wandakalina gene oko andoto, yapa lo tale napiyane. Jia. Balato wandakali nanima mindiki-mindiki lo namimana mana minalamane tupa andoto, nanima yapa lo tale piyane. Tene okonena, yakama yuu okona ateyai-angi, yakama atapowa atolane yuu oko ati kenga eya nembo toto, yakamato Gote yukuwa epelewa atoto, balana pangosa atalapape.*

¹⁸ Anu peakale yakamato wuane piyapape leyope. Wamba yakamana yumbane tupamane Gotena mana epene tupa wato mina napene, yakama moyo napiyane mana minditupa wato minu ateainipia. Andipa ateyai wandakali yakamato yakamana yumbane tupana mana tupa wato minu ateai-kola, Goteto yakama kambo molo-peke leane tekeko, balato golopi, silipapi minditaka koyo piyane okonetaka mindimane yakama kambo molo-peke naleane lo yakamato nembo teyai okoni.

¹⁹ Kataisa balanga koopi, tetepi, mindi napene sipisipi andopane epene wete mindi ateai-kola, Goteto Kataisana tundupa oko yole andane wete pupe-pene okone-mane yakama kambo molo-peke leaipia.*

²⁰ Wamba wete Goteto yuu ati-la yakale nalenenga, Kataisato yakama kambo molo-peke leakale lo lata ya-kola, matili yuu oko koyo puyale pea-kola, Goteto yakama moyoyale Kataisa mo pana yaepia.*

²¹ Kataisato namimana moyoyale piape peane mambele, yakamato Gote lo bilipi leainipia. Goteto Kataisa malinga ika

laya wato, gene andane wete mindi bala mayaepia. Tene okonena, balato yakama moyo mangene mindi pukale lo potomisa pii leane okone enene pulupeya nemboto, yakama maliyo ateyai.*

Wandakali Yangone Tupa Towa Epelewa Yamapane Yo Atalapape Leane Oko

²²⁻²⁵ Gotena pii pepa pelene eya mindimane loto, tani tupa kapu teya-kola, dini tupa yuunga tupa alane layene eya. Wuane pua teke, wandakali pitakana gene andane tupa alu piyane tekeko, Akali Andane okona pii layene oko yapowa yalane layene eya. Tomo waini manda talu, alu piyane tupamane yakama mo wenene gulaya nayane. Jia. Gotena pii saka atene oko alu napene, yapowa yalane okomane yakama mo wenene gulaya yane. Wamba akali minditupa-mane Gotena pii saka atene okone yakama langea-kola, Gotena pii okonemane yakama mo wenene gulaya ya okoni. Yakamato Gotena pii enene okone wato minu atalaini mana okonemane Gotena wenonga yakamana ini anda-pangosa kalato yane tupa kunu apea. Kunu apea-kola, yakamato wandakali yangone tupa towa mee epelewa atene ata napiyaini. Jia yakama utupane towa enene wete epelewa atalaini. Andipapi yakamato mana epene okone teke wato minu atoto, Kitisene wandakali yangone tupa wayumane wete epelewa yamapane yo atalapape.*

2

¹⁻³ Wandakali yangone tupamane yakama wandakali epene ateyai nembo teakale nayuto, yakamato owato pii loto, utupane andakasawa atalaini. Yakamato wandakali yangone mindina minditaka eya tupa miaima laka lo nembo toto, utupane towa apiangu puato, layango atalaini teke. Yakamato mana koo utupane pitaka wato minu atalaini tekeko, andipa Akali Andane okomane yakama ondo wato moyo ateya lo yakamato nembo teyai okoni. Tene okonena, yakamato mana koo utupane pitaka kondal, Goteto yakama molo-peke leakale nayuto, Kitisene tai wete atamakale nembo talapape. Kitisene tai wete atamakale nembo toto, andopane kambolo tupamane andu ipane naima laka lo nembo talaini pua teke, yakamatopi Akali Andane okona pii epene wete oko ale aimak laka lo nemboto atalapape.*

Akali Andane Oko Bala Anda Pingina Saka Atene Oko Ateya Leane Oko

* **1:14:** Lom 12:2; Ep 2:3; 4:17-18 * **1:15-16:** Pit 11:44-45; Mt 5:48 * **1:17:** Lom 2:9-11; Lap 2:23 * **1:19:** Ap 20:28-29; Ip 9:11-14 * **1:20:** Ep 1:1-4 * **1:21:** Jo 14:6; Lom 5:1-2 * **1:22-25:** Jo 13:33-35; Lom 12:10; Ais 40:6-8
* **2:1-3:** Ep 4:22; Jem 1:21; Sam 34:8

4-5 Wamba Goteto balana anda pukale nembo toto, Akali Andane oko bala anda pingina saka atene epene wete oko atekale lata yaepia. Goteto wuane peane tekeko, wandakali minditupa-mane Akali Andane oko bala koo ya loto, masia maiyaini. Yakamato wuane napene, bala ateyanga epeyai-kola, Goteto yakama balana pitisa akali epene wete tupa atoto, Oli Sipitisa okomane leya pua yakamana opa tupa bala giyapale nembo teya. Jisasa Kataisato pi-ape peane mambele, Goteto yakamana opa maulaini tupa epelewa mokale nembo teya. Wuane nembo toto, Oli Sipitisa okona tailene okomane yakama balana anda okone pokoli-bana, laepi, saka ataya wato, balana anda okone mee pua ateya. *

6 Akali Andane oko bala Goteno anda okonena pingina yapa lo mene ateya loto, Goteno pii pepa pelene eya mindimane loto, ale alapape layene eya. Nambato anda pingina epene wete mindi yapa lo moto, Sayone wangiane okona ate leyo. Anda pingina okone lo bilipi lene wandakali tupa yala na-olopeyai layene eya. *

7 Wuane layene eya okonena, Kataisa lo bilipi lene wandakali yakamato bala anda pingina epene wete ateya nembo talaini tekeko, Kataisa lo bilipi nalene wandakali tupamane wuane nembo natalaini. Jia. Goteno pii pepa pelene eya mindimane wandakali utupane andayo, wandakali minditupa-mane Goteno anda puyale ato, ita oko koo ya nembo toto, mo apeaini okone bala Goteno anda okona anda pingina ateya layene eya. *

8 Goteno pii pepa pelene eya waka mindimane loto, Akali Andane oko bala wandakali palaini asininga ana gulo yolopeyai. Ana okone asininga yola-kola, bala lo bilipi nalene wandakali minditupa epoto, ana okonena kee tau loto, aiya peyoto, lomba yene yolopeyai layene eya. Wandakali utupane-mane Goteno pii tanga loto, Akali Andane oko lo bilipi naleainga, Goteto wandakali utupane aiya peyoto, lomba-pene yakale leaipia. *

9 Wandakali utupane-mane mana koo utupane minu atalaini tekeko, Kataisa lo bilipi lene wandakali yakamato wuane na-piyaini. Jia. Wamba yakama undupilene okona pangosa atawai-kola, Goteto yakama balana tii-pene epene wete okona ipulupa loto, ee lo meaipi. Goteto yakama ee lo meane okone yakamato wandakali yangone tupa lamawua atalapale nembo toto, balato yakama balana wandakali yame epene wete atalapale lata yaepia.

* 2:4-5: Ep 2:20-22; Lap 1:6 * 2:6: Ais 28:16; Ep 2:20-22

14:2; Ais 9:2; Tai 2:11-14; Ap 26:17-18; Ep 5:8 * 2:10: Ose 2:23

Tai 3:1-2; 1Pi 3:16

Wuaneko, andipa yakama Akali Andane kinji okona pitisa wandakali tupa ateyai. *

10 Wamba Goteto yakama ondowa moya napea-kola, yakama Goteno wandakali yame ata naapeaini tekeko, andipa Goteto yakama ondowa moyo ateya-kola, yakama Goteno wandakali yame ateyai. *

Nanima Gotena Piape Wandakali Gulo Ateyama Leane Oko

11 Nambana yamapane yene yame, yakama atapowa atolane yuu epene oko ati kenga eya-kola, yuu okona atoto, yakama opene ateyai. Wandakali opene ateyai-kola, yakamana nembo-tene wambane okomane mana koo tupa wato minu atalapale nembo toto, yakamana tandini wenene oko yanda pimai-yane. Tene okonena, yakamato mana koo tupa minaima lakae lo nembo talaini mana okone masia mawua atalapape lo nambato yakama langeyo. *

12 Aitene wandakali minditupa-mane yakama Kitisene wandakali tupana mana tupa kuai lo anda napene, yakama kosimi loto, yakamato mana koo minalaini ollopeyai. Utupane-mane wuane lolopeyai tekeko, andipa utupane-mane mana epene yakamato minalaini tupa andoto, matili Goteto wandakali yapa lo tale pulu epolangi, utupane-mane balana gene oko laiyu leakale nembo talapape. Wuane peakale nembo toto, yakamato aitene wandakali tupana tombenga epoko pua atoto, tika-pene wete atalapape. *

13-15 Yakamato mana epene minu ateyai-kola teke, wandakali minditupa-mane yakamana mana tupa kuai lo anda napene ato, yakamato mana koo tupa mineyai lolaini. Utupane-mane pii koo okone yakama ando nalene, nee asia tambu leakale, yakamato mana epene tupa angu wato minu atalapale lo Goteto nembo teya. Yakamato Akali Andane oko nembo toto, gapomane yame pitakana pangosa atalapape. Akali kinji oko bala gapomane akali kawane wete ateya nembo toto, yakamato balana pii wato minu atalapape. Potopinjia tupana akali kawane tupamane mana koo minalaini wandakali tupa yole koo maiyu, wandakali mana epene minalaini tupana gene tupa laiyu lalu piyaini. Wuane peakale loto, kinji okomane potopinjia tupana akali kawane utupane ate lalane. Tene okonena, yakamato utupanena pii wato minu atalapape. *

16 Enene, yakama loo okona pangosa andi latane ata naopeyai tekeko, yakama

* 2:7: Sam 118:22 * 2:8: Ais 8:14-15 * 2:9: Lo 7:6;

* 2:11: Ga 5:16-18,24 * 2:12: Mt 5:16 * 2:13-15:

mee anana ateyama nembo toto, yakamato mana koo tupu wato mina na-piyapape. Jia. Yakama Gotena piape wandakali tupu ateyama nembo toto, balana mana epene tupu wato minu atalapape.

¹⁷ Wandakali yangone tupu pitaka towa mana epene tupu minu atoto, yakamato Gotena wandakali tupu towa epelewa yamapane yoto, Gote yuku amawua, gapomane akali kawane kinji okona gene oko laiyu lalapape. *

Piape Wandakali Yakamato Wua Piyapape Leane Oko

¹⁸ Piape akali tupu yakamato piape ando atalaini akali tupu yuku amawua, utupanena pangosa atalapape. Wuane pua atoto, yakamato piape ando atalaini akali epene tambo-lene tupana angu pii wato minu ata napene, piape ando atalaini akali yataka ene koo tupana pii wato minu atalapape. *

¹⁹⁻²⁰ Anu peakale yakamato wuan piyapape leyope. Alu mindi Goteto nembo teya pua teke, yakamato mana epene mindi minu atolai-kola, piape ando atalane akali yataka ene koo mindimane yakama mee wete tandaka guato, peyolo-peya. Balato wuan peakale lo yakamato ando konda yaindo, yakamana mana okone kuailene yolopeya. Wuane tekeko, yakamato mana koo mindi minulai-kola, piape ando atalane akali okomane yakama peyolakola, peleakale lo yakamato ando konda yaindo, apito yakamana mana okone andoto, yakamato kuai lo peyai lolopeyape. Yakamato mana epene tupu minu atolai-kola, utupane-mane yakama mee wete minu peyolai-kola, peleakale lo yakamato ando konda yaindo, Goteto yakamana mana okone andoto, yakamato kuai lo peyai lolopeyape. *

²¹⁻²³ Kataisato owato pii mindi nalene, mana koo waka mindi mina napeane teke. Jia. Wandakali-mane bala ando pii koo leai-kola, utupane-mane pii koo leaini okonena yano peyoto, balato pii koo mindi lapeke naleane. Wandakali-mane bala tandaka mayai-kola, balato utupane paini tandaka mauwakale naleane. Jia. Wandakali pitakana mana kuai lo tale piyane jasa okomane bala moyolo-peya nembo toto, Kataisa bala tane Gotena kininga yata yaepia. Kataisato mana epene utupane mineane pua, yakamatopi mana epene utupane wato minu atalapale loto, yakama moyoyale bala tandaka no atoto, mana epene tupu angu wato minu ateane. Tene okonena, yakamatopi mana epene tupu minu atolai-kola, wandakali mindimane

yakama mee peleando, peleakale lo yakamato ando kondalapale loto, Goteto yakama ee lo meane oko nambato andeyo. *

²⁴⁻²⁵ Nanimato mana koo minalamane tupu pitaka tepa alu, Gotena mana epene tika-pene tupu wato minu atalapale nembo toto, Kataisa bala tane umbaini okomane nanimana koo piyamane tupu mo aiyu, bala ita malamanda okona omeane. Yia sиписи tupamane yakama ando atalane akalioko tepa alu poto, kewa epoko pua atlalaini. Sиписи tupamane wuan piyaini pua teke, wamba yakamapi yakamana tandini ando atalane akalioko tepa alu poto, keewa epoko pua atapiai. Wuane tekeko, yakama Gote towa kuai lo atalapale loto, Kataisa bala tandaka neane okonemane yakamana koo tupu apoto, yakama mo atu ya-kola, andipa yakama balana yame atolo-peke lamakale loto, peke lapiai. *

3

Wanda, Akali-la, Liyambato Wua Piayapape Leane Oko

¹⁻⁶ Wanda minditupa-mane tona epene wete tupu piyu, minditaka golo-mane waa-pene tupamane yati piyu, yakamana kawa itini tupu wayumane wete yati piyu, piyaini. Utupane-mane wuan piyaini tekeko, Kitisene wanda yakamato yakamana umbaini kenga wayumane yati na-piyapape. Jia. Yakama yamapane epene palu, teng-a-mane tambo lo pitiyapape. Mana epene okonelapo-mane yakamana yamapane anda-pangosa yati pitane atolakola, yakamana yati okone koyo napulopeya. Goteto yakamana mana okonelapo andoto, yakamana yati okonelapo epene wete eya nembo tolopeya. Wamba wanda Satato wuan pua, balana akalini Apatakanema pangosa pituto, bala ando akali andane loto, pii balato leane tupu wato minu peteaipia. Wuane pua teke, matili wanda epene wete minditupa-mane Gote lo bilipi loto, wua pukale lo potomisa pii leane okone enene pulupeya lo maliyo peteainipia. Bilipi lo peteaini wanda utupane-mane mana epene okonepene tupu wato minu pituto, yakamana akalini tupana pangosa peteainipia. Wanda utupane-mane mana epene okonepene tupu mineaini okonemane yakamana yamapane anda-pangosa yati peainipia. Andipa Kitisene wanda yakamatopi minditaka mindi yuku naene pituto, mana epene utupane wato minu peteaindo, yakama Sata wanane yame pitulu-peyai. Yakamana akalini mindimane Gotena pii oko ale naene, tanga

* 2:17: Lom 12:10 * 2:18: Ep 6:5-8 * 2:19-20: 1Pi 3:14,17 * 2:21-23: Mt 16:24-26; Jo 13:14-16; Ais 53:7,9; 1Pi 3:8-12 * 2:24-25: Lom 6:11; Ais 53:5-6; Ese 34:5-6; Mt 9:36; Jo 10:14-15; Ip 13:20-21

lo ateando, balato Gotena pii oko wato mineakale loto, yakamato pii kambua bala lamai na-piyapape. Jia. Yakamato pii manapi mindi lamai napene, Gote yuku amawua mana epene wete tupa minu pituto, yakamana akalini tupana pangosa pitiyapape. Wuane pulai-kola, balato yakamana mana epene minulai utupane andoto, bala Kitisene gulolo-peya nembo toto, yakamato wuane pua pitiyapape *

⁷ Akali yame, yakamana wetene tupanga tai-lene andane mindi nayene peteyai nembo toto, yakamato utupane moyo, mana epene tupa wato minu atalapape. Goteto utupanepi ondo wato, mee moyoto, saka atapowa atalapa lolopeya. Yakamana wetene tupa towa mana koo tupa minu atolai-kola, mana koo utupane-mane yakamana pote lolaini asini oko kando lolane nembo talapape. Wuane nembo toto, akalini yame yakamato yakamana wetene tupa towa mana epene tupa wato minuto, utupane towa kuai lo pitiyapape. *

*Mana Epene Tupa Angu Wato Minu Ata-
lape Leane Oko*

⁸⁻¹² Gotena pii pepa pelene eya mindi-mane loto, wandakali epene tika-pene tupamane pote leyai-kola, Akali Andane okomane pailo ale wato, utupane moyo atalane layene eya. Balato utupane moyo atalane tekeko, mana koo minu atalaini wandakali tupa balato masia maiyane. Tene okonena, wandakali mindimane mali kambua wete epelewa kuai lo atokale nembo teando, balato pii koopi, owato piipi, mindi nalene kondape-pene. Kondalu, balato mana koo tupa masia mawua atoto, mana epene tupa angu wato minu atape-pene. Wuane pua atoto, balato wandakali waka tupa towa peya-peya napene, wandakali waka tupa towa mini epene palu epelewa atene mana tupa aiya pua moto, mana utupane tailo wato minu atape-pene. Gotena pii pepa pelene eya mindimane wuane leya okonena, andipa nambato pii utupane lo koyo puato, yakamato wandakali gene yene lipinga yale ateyama nembo natene, yakama wandakali waka nappinga yale ateyama nemboto atalapape leyo. Wuane nembo toto, yakama pitaka nembo-tene mindiki palu atoto, Gotena wandakali waka tupa towa epelewa, yamapano yo atalapape. Yamapano yo atoto, wandakali utupane-mane kenda-pene mindi awua atolai-angi, yakamato utupane ondo wato, kenda-pene okone wandakali utupane towa atu awua atalapape. Wandakali mindimane

yakamanga koo mindi peando, yakamato paini yano peyo, koo mindi na-piyapape. Dee, wandakali mindimane yakama ando pii koo mindi leando, yakamato paini wandakali okone ando pii koo mindi laa na-piyapape. Jia. Yakamato Gotena belesini tupa mialapale loto, balato yakama ee lo meane. Goteto wuane peane okonena, wandakali mindimane yakama ando pii koo mindi lola-angi, yakamato Gote lo pote loto, Gote nimbato wandakali okone moyape lapapape. *

*Yakamato Mana Epene Minulai Oko-
nena Tandaka Neaindo, Katu Leane Oko*

¹³ Yakamato mana epene tupa angu minu ataima laka lo nembo teaindo, apito yakama minu koyolo-peyape.

¹⁴ Yakamato mana epene mineaindo, wandakali mindimane yakama minu koya napulu-peya tekeko, yakamato mana tikapene tupa minu atolai-kola, wandakali-mane yakama tandaka geaindo, Goteto yakama moyola-kola, yakama kuai lo atolopeyai. Tene okonena, wandakali-mane yakama tandaka gulaini lo yuku wato, yakama nembo kambua na-talapape. *

¹⁵ Dee, Goteto yakama moyolo-peyai nembo toto, yakama maliyo atolai-kola, wandakali-mane yakama tipa puato, anu peakale yakamato wuane peyapipe lolopeyai. Yakamato utupanena pii okone yano peyamakale nembo toto, ole dindi mandeke pitawa atalapape. Mandeke pitawa atolai-kola, wandakali-mane pii okone yakama tipa peaindo, yakamana yamapanengna Kataisa bala Akali Andane ateya nembo toto, yakamato balana gene oko laiyu loto, utupanena pii okone yano peya-maiyapepe.

¹⁶ Yakamato Kataisa lo bilipi loto, mana epene tupa wato minu ateanindo, yakama tane mana koo mindi mina napeyama nembo tolopeyai. Yakamato wuane nembo tolai-kola teke, wandakali minditupa-mane loto, yakamato mana koo mindi miniyai leaindo, wandakali utupane-mane yala yakale nembo toto, yakamato Gote angu yuku wato, utupane-mane pii lolaini tupa pii tenga-mane tambo loto, yano peyamaiyapepe. *

¹⁷ Yakamato mana koo minulaini okonena yakama tandaka neaindo, yakamana mana koo okonemane Gotena gene oko minu koyola-kola, okone katu nalolo-peya. Wuane tekeko, Goteto yakama tandaka nalapale nembo tola-kola, yakamato mana

* **3:1-6:** Ep 5:22-23; 1Ti 2:9; Jen 18:12 * **3:7:** Ep 5:25-27

1Pi 2:19-20; 4:14 * **3:16:** 1Pi 2:12

* **3:8-12:** Sam 34:12-16 * **3:14:** Ais 8:12-13; Mt 5:10;

epene tupa wato minu atoto, tandaka neaindo, okone katu lolopeya.

¹⁸ Anu peakale nambato wuane leyope. Kataisa bala akali epene tika-pene wete okomane koo piyaini wandakali yakama Gote ateyanga lamo atu pokale nembo teaipia. Wuane pukale nembo toto, bala nanimana mana koo minalamane tupa apoyale, nanimana panda moto, alu mindiki angu omeaipia. Wandakali-mane balana umbaini oko peyo ome leaini tekeko, Oli Sipitisa okomane bala mo saka ataya yaepia.

¹⁹⁻²⁰ Wamba Nowato Gotena pii oko wandakali tupa lamawua atea-kola, wandakali utupane-mane Gotena pii tanga lo ateainipia. Tanga lo atea-kola, Goteto wandakali utupane wamba kapoyale kenda-pene andane mindi mai naapeaipia. Jia. Nowato sipi anda pua atea-angi, Wandakali utupane yakama yamapane peke leakale nembo toto, Goteto mee maliyo atama peaipia. Maliyo atama pea-kola, Nowato sipi anda okone pikoyo pea wete, wandakali ajalapo kitupasa angu sipi anda okonena kolandaka leainipia. Kolandaka leai-kola, ipa andane epeane okomane wandakali sipi anda okona peteaini utupane piti-pata awua aiyu leaipia. Goteto wandakali utupane molo-peke leane tekeko, balana pii tanga lo ateaini wandakali utupane pitaka omeaikola, Goteto utupanena tandini tupa yuu koo okona andi latane ateakale leaipia. Andi latane ateakale lalu, matili balato Kataisana tandini mo saka ataya yane-angi, Kataisana tandini oko poto, wandakali utupanena tandini andi latane ateaini utupane Gotena pii layene oko lamai-yaepia.*

²¹ Ipa andane wamba epeane okone kokoli mindi eya. Ipa okone epea-kola, Goteto Nowa yame tupa molo-peke leane pua teke, yakama ipa meaini okonemane Goteto yakama molo-peke lea. Yakamato ipa meaini okonemane yakamana umbaininga kalato ateane tupa mee wasawasa peyo apia naapeai. Jia. Yakama ipa meai okone angu, yakama Gotena wenonga atoto, mana koo tupa masia mai-makale lo potomisa leai. Potomisa pii okone lalu, yakama ipa meai-kola, Jisasa Kataisato yakamana koo piyaini tupa apialu, bala malinga ika leane okonemane yakama molo-peke leane.

²² Kataisato yakama molo-peke lalu, bala ati kenga pea-kola, Goteto enjole tupapi, sipitisa tai-lene tupapi, minditaka tai-lene tupapi, utupane pitaka Kataisana pangosa

yakale lea-kola, Kataisa bala Gotena kii titikasa peteane oko mee peteya.

4

Gotena Mana Tupa Angu Wato Minape-pene Leane Oko

¹⁻² Wandakali mindimane balana umbaininga tandaka no ateando, balato mana koo tupa mina napukale nembo talane. Wuane nembo toto, wandakali okone bala yuu okona ateya-angi, wandakali-mane mana koo mina-makale nembo talaini tupa balato minukale nembo natalane. Jia. Balato Gotena nembo-tene oko angu wato minukale nembo talane. Wuane, wamba Kataisato Gotena nembo-tene oko wato minuto, balana umbaininga tandaka neane, wuane pua teke, andipa yakamatopi Gotena nembo-tene oko angu wato minu atamatakale nembo talapape. *

³ Anu peakale nambato wuane leyope. Wamba yakamato aitene wandakali tupana mana koo tupa wato minuto, pati andane tupa loto, bia ipa tai kambua tupa noto, sapake lo keewa atea. Okone angu, yakamato pamuku puato, mana koo kambua minuto, Gotena loo yata yane tupa tanga loto, owato gote tupa lo lotu leai. Wamba yakamato aitene mana koo utupane wato minu atoto, gii andane luu mindi apeaini tekeko, andipa yakamato mana koo utupane wato mina napene kondeyai. *

⁴ Kondeyai-kola, andipa aitene wandakali tupa moko loto, Kitisene wandakali yakamato nanimana aitene wandakali tupa towa mana koo atu mina naheyai loto, yakama ando pii koo leyai.

⁵ Aitene wandakali utupane-mane wuane leyai tekeko, Goteto wandakali omeneipi, sakapi, utupane pitaka yapa lo tale pukale loto, mandeke pitawa ateya. Tene okonena, matili aitene wandakali utupane yakama Gotena wenonga atoto, bala lamawuato, Kitisene wandakali tupamane wua peaini okonena, nanimato utupane ando pii koo lema lo Gote lamaipe-pene gulolo-peya. *

⁶ Enene, wandakali pitaka-mane mana koo minalaini okonena, Goteto utupane yapa lo tale peya-kola, utupane omalaini. Utupane omalaini tekeko, Gote bala saka atapowa atlalone pua teke, balato wandakali omene tupana tandini tupa saka atapowa ateakale nembo teaipia. Wuane nembo toto, wandakali wamba ateaini tupa oma napene, saka atea-kola teke, Goteto akali minditupa-mane balana pii layene oko wandakali utupane lamai-yakale leaipia.

* 3:19-20: Jen 6:1-7:24 * 4:1-2: Lom 6:2-7 * 4:3: Ep 2:2-3 * 4:5: Ap 10:42

Mindi Akali Moyaka Pua Atalapape Leane Oko

⁷ Minditaka eya tupa pitaka koyo pulupuya oto oko wamba mandaka guleya okonena, yakamato pote kuai lo lamakale nembo talapape. Wuane nembo toto, yakamato kuai lo nembo toto, yakama tane paili ando atalapape. *

⁸ Wandakali-mane koo kambua peyai-kola, wandakali mindimane balana wandakali yangone tupa towa epelewa yamanane yo ateando, balato utupanena mana koo kambua tupa apialane. Tene okonena, mana epene okonemane mana waka tupa pitaka sia minalane oko nembo toto, yakamato mindi akali epele aka pua, mindi akali yamapanne yaka pua atalapape. *

⁹ Gotena wandakali waka mindi yakama atolainga epeando, yakamato bala anu peakale epeyape lo mulu-mulu nalene, bala kuai lo yatawa paliyapape. *

¹⁰ Goteto yakama pitaka mindiki-mindiki lo ondowa moyoto, balana piape pulane mana mindipene-mindipene tupa tale pua giyane. Tene okonena, yakama pitaka mindiki-mindiki lo Gotena piape wandakali epene atoto, wandakali waka tupa moyaka pua atalapape. *

¹¹ Yakama pitaka-mane wuane pua ateaindo, wandakali waka tupamane yakamana mana epene okone andoto, Jisasa Kataisana gene oko laiyu loto, Gotena gene oko laiyu lolopeyai. Utupanemanne wuane peakale nembo toto, Goteto wandakali mindinga pii kuai lo lolane petesini oko maiyando, wandakali okonemane Gotena pii layene oko wandakali tupa kuai lo lamawua atape-pene. Dee, Goteto wandakali mindinga yangone tupa moyolane tai-lene oko maiyando, balato yangone tupa moyo atape-pene. Tai-lene okola, tii-pene okola, Jisasa Kataisa balanga yapowa yolopeya oko yakale. Enene.

Yakama Kitisene Ateyai Okonena Tandaka Neaindo, Gotena Gene Laiyu Lape-pene Leane Oko

¹² Yamapanne yene yame, makande pene koo mindi yakamanga epola-kola, makande pene okone wenene waka mindi epeya nembo toto, yakama moko nalamapape. Jia.

¹³ Matili Kataisa balana tai-lene oko towa panakame epola-angi, yakama epele andane wete olo-peyama nembo talapape. Wuane nembo toto, wamba Kataisa bala tandaka neane pua teke, andipa yakamapi tandaka no atoto, epelewa atalapape. *

¹⁴ Andipa yakamato Kataisana gene oko laiyu lo ateyai okonena, wandakali-mane yakama andayo pii koo leaindo, Gotena Sipitisa tai-lene oko yakamanga atalane okomane yakama moyalane nembo toto, yakama epelewa atape-pene. *

¹⁵⁻¹⁸ Andipa Goteto balana wandakali tupa yapa lo tale pulane gii oko wamba mandaka guleya. Goteto Kitisene wandakali nanima ini bulupane yapa lo tale piyu, kenda-pene minditupa nanimanga geando, balana pii layene epene oko tanga lalaini wandakali tupa yapa lo tale pikoyo puato, balato kenda-pene anu-pene mindi utupanenga malupeyape. Balato kenda-pene andane mindi wandakali utupanenga malupeya loto, balana pii pepa pelene eya mindimane loto, Goteto wandakali epene tika-pene tupa ayiawa wete molo-peke lolopeya yando, Gote masia mawua atoto, koo pua atalaini wandakali utupane towa anu pulu-peyape layene eya. Wuaneko, yakamato wandakali yangone mindi peyo ome lolai-kola yandopi, minditaka mindi pake lolai-kola yandopi, wandakali mindina piape mindi minu koyolai-kola yandopi, dee mana koo waka mindi minulai-kola yandopi, mana okonetaka mindi minulai-kola, wandakali-mane yakama tandaka gulaini lo yakamato ando atape-pene. Yakamato ando atape-pene tekeko, yakamana mindi Kitisene ateya okonena, bala tandaka neando, bala yala aa naapepe-pene. Jia. Bala Kitisene ateya okonena, bala tandaka neya nembo toto, wandakali okonemane Gotena gene oko laiyu lape-pene. *

¹⁹ Minditaka eya tupa pitaka yakale leane Gote okomane mangene pukale lolane tupa enene piyane. Tene okonena, Goteto Kitisene wandakali mindi tandaka no ateakale nembo teando, Goteto bala waa piyu, moyalane nembo toto, wandakali okonemane mana epene tupa angu wato minu atape-pene.

5

Sosa Okona Piape Wandakali Tupa Yakamato Wua Piayapape Leane Oko

¹ Wamba Kataisa bala tandaka neane oko nambato lee-mane andewane. Andipa nambato wandakali tupa lamawuato, Kataisa bala wua pua tandaka neane lo lamawua atalawane. Matili Goteto balana tii-pene oko mo pana ola-angi, balato tii-pene okone nambapi, yakamapi, Kitisene wandakali nanima nanima pitaka gulupeya. Tene okonena, namba sosa

* **4:7:** Lom 13:11-12 * **4:8:** 1Pi 1:22-25 * **4:9:** Ip 13:2 * **4:10:** Lom 12:6-8 * **4:13:** Ap 5:41; Jem 1:2-3; 1Pi 1:6-7 * **4:14:** 1Pi 2:19-20 * **4:15-18:** Man 11:31

okona piape akali mindi atoto, sosa okona piape akali waka yakama mana langeyo-ko.

² Wandakali waka tupamane pii taimane yakama languato, yakamato sosa okona piape oko piyapa lolai-kola, yakamato yole miaima lakae lo angu nembo toto, piape okone na-piyapape. Jia. Goteto yakamato piape okone pipiai lakae lo nembo teya nayuto, yakamato piape okone epelewa pua atoto, Gotena sipisipi yakamana kininga ateyai utupane kuai lo moyo ando atalapape.*

³ Sosa okona piape akali yakama akali andane gene yene ateyama nembo toto, Gotena wandakali yakamato wua piyapape lo pii taimane na-lalapape. Jia. Gotena sipisipi tupamane balana asini epene okona peakale lo yakamato andawa lalapape.*

⁴ Yakamato sipisipi yatawa atalane akali kawane okona piape kuai lo pua ateaindo, matili bala epola-angi, yakama yole epene wete koyo napiyane oko molopeyai. Yakamana yole okone yapowa yolopeya.

Yakama Gotena Pangosa Atalapape Leane Oko

⁵⁻⁷ Gotena pii pepa pelene eya mindimane loto, wandakali mindimane bala gene yene lipinga yale ateyo nembo teando, Goteto balana gene oko nayakale lalane tekeko, wandakali mindimane bala gene nayene napinga yale ateyo nembo teando, Goteto balana gene oko laiyu lalane layene eya. Tene okonena, iwana patane yame yakama pitaka gene nayene atoto, wandakali waka tupana pangosa atoto, sosana piape akali tupana pangosa atalapape. Akali utupanena pangosa atoto, Goteto yakama kuai lo atalapale nembo talane nayuto, yakamato kenda-pene awua atolai tupa balana kininga aimo lalapape. Aimo lalu, matili Goteto oto yata yane oko epola-angi, balato yakamana gene tupa laiyu leakale nembo toto, andipa yakama gene nayene atoto, Gotena kini tai-lene wete okona pangosa atalapape.*

Yakamato Gote Lo Bilipi Leyo Loto, Satanena Pii Oko Tanga Lalapape Leane Oko

⁸ Pusi kapua andane wetete layone tupamane njili-njili taimane loto, wandakali andoko peyo noape lo aiya pua epoko piyaini. Utupane-mane wuane piyaini pua teke, yakamana yanda-pene akali Sataneto wandakali andoko minu mandeke puato, minu koyowape lo yuu okona epoko pua atalane. Tene okonena, Yakamato kuai lo nembo toto, Sataneto yakama minu makande pulane. Waiwa ando atalapape.*

⁹⁻¹¹ Sataneto yakama minu mandeke puato tandaka geya-kola, yakama tandaka no atalaini pua teke, yuu tupa pitakana Kitisene wandakali tupapi, tandaka no teke atalaini. Wuane tekeko, Gote bala nanimba towa mini epene wete paluto, nanimba ondo alane. Jisasa Kataisato yakama moyo piape peane okomane Goteto yakama bala towa atu balana yuu epene tui-pene okona atapowa atalapale lo ee lo mea okoni. Balanga tai-lene pitaka yapowa yalane. Andipa oto ukupini mindi angu yakamato tandaka no atolai-kola, matili balato yakama minu kuai lolopeke loto, yakamana bilipi oko minu tai laya olopeya nembo talapape. Wuane nembo toto, yakamato Gote lo bilipi leyama nayu loto, Satanena pii oko tanga lo atalapape. Enene.*

Pii Lokoyo Pua Leane Tupa

¹² Sailasa bala nambana amene wete ateya nembo teyo okonena, balato pii ukupini utupa pepanga peleakale leyo. Enene wete, Goteto wandakali tupa ondowa moyalanane. Goteto yakama ondowa moyo ateyako-kola, yakamato bala minatawa atalapale loto, nambato yakama minu tai laya wato, yakamana pepa ukupini oko peyo epe leyo.*

¹³ Goteto yakama balana wandakali atalapale lata yane pua teke, wamba balato Babilone tane wandakali minditupa balana wandakali tupa ateakale lata ya-kola, utupane balana wandakali guleainipia. Andipa utupane-mane yakama kuai lo atalapa leyai. Dee, Maki bala nambana iwanane atoto, yakama kuai lo atalapa leya teke.*

¹⁴ Yakamato Kitisene wandakali waka tupa towa epelewa yamapano yoto, sikane lalapape. Yakama pitaka Kataisa towa atu atoto, mini epene palu atalapape.

* 5:2: Jo 21:15-17; Ap 20:28-29 * 5:3: 2Ko 1:23-24; Pl 3:17-19; Tai 2:7-8 * 5:5-7: Ep 5:21; Jem 4:6,10; Mt 6:25-30; 23:12; Lk 14:8-11 * 5:8: 1Tes 5:5-7 * 5:9-11: Ep 6:11-13; Jem 4:7 * 5:12: Ap 15:22,37-40; 12:2,25; 13:13 * 5:13: 2Ti 4:9-12

2 PITA

Pitato Pepa Lapone Peyo Pee Peleane Oko

¹ Namba Saimone Pita. Namba Jisasa Kataisana aposolo akali atoto, balana pi-ape pimawua atalawane. Bala nanimana Gote oko atoto, nanima molo-peke lalane. Wamba balato mana epene tika-pene mindi minuto, bilipi epene wete mindi nanima aposolo akali tupanga geane. Balato bilipi mindiki okonepene teke yakamanga geane mambele, nambato yakamana pepa oko peyo epe leyo.

² Yakamato nanimana Ayiane Gote-la, Akali Andane Jisasa-la, okone-lapona mana tupa wayumane nembo teyai-kola, okonelapo-mane yakama onto wete wato, yakamana yamapane mo tambo wete laya yakale lo nambato pote lalawane.

Gotena Mana Epene Tupa Wato Minu Atalapape Leane Oko

³ Kataisato mana epene wetete mindi wato minuto, bala tanena tai-lene okomane nanima ee lo mea-kola, nanimato Gotena mana epene tika-pene tupa mana mema. Balato mana epene tika-pene utupane nanima langeane okomane, balato mana Goteto epele alane tupa wato minulane tai-lene oko nanima gea.

⁴ Enene, nanima yuunga wandakali tumpame mana koo tupa minaima lakaе lo nembo talamane mana okomane nanima minu koyalane tekeko, yakamato mana koo utupane peya wanju atoto, balana mana epene tika-pene tupa angu wato minu atalapale loto, Goteto yakama moyokale lo potomisa pii mindi lo yata yane.

⁵ Tene okonena, yakamato Gote lo bilipi loto teke, balana mana epene tika-pene tupa angu wato minu atamakale nembo toto, taimane makande pua atalapape. Mana epene tupa angu wato minu atoto, yakamato Gotena pii okona mana mia-makale nembo toto, taimane makande pua atalapape.

⁶ Yakamato Gotena pii okona mana wayumane moto, yakama tane pailo ando atamakale nembo toto, taimane makande pua atalapape. Yakama tane pailo ando atoto, kenda-pene tupa awua keato yo atamakale nembo toto, taimane makande pua atalapape. Kenda-pene awua keato yo atoto, yakamato Gotena mana epene tupa wato minu epoko pua atamakale nembo toto, taimane makande pua atalapape.*

⁷ Gotena mana epene tupa wato minu epoko pua atoto, yakamato wandakali

yangone tupa towa epelewa atamakale nembo toto, taimane makande pua atalapape. Wandakali yangone tupa towa epelewa atoto, yakamato utupane towa yamapane yo atamakale nembo toto, taimane makande pua atalapape.

⁸ Anu peakale nambato yakama ando wuane pua atalapape leyope. Yakamato mana utupane moto, wayumane wato mineaindo, yakamato nanimana Akali Andane Jisasa Kataisana mana epene utupane wayumane nembo tolai-kola pulupeya. Yakamato balana mana utupane nembo tolai okonemane yakamanga dini kambua lulupeya.

⁹ Yakamato wuane pulupeyai tekeko, wandakali minditupa-mane mana epene utupane wato mina napene kondolo-peyai. Wamba utupane-mane mana koo mineakola, Goteto koo utupane apoto, utupane mo wenene gulaya yane tekeko, matili utupane-mane mangene epene Goteto wamba peane okone embesa olopeyai. Embasa wato, yakama lene koo atoto, mangene epene Goteto matili pulupeya tupa anda napulu-peyai. Tene okonena, utupane-mane Gotena mana epene tupa wato mina napene, kondolo-peyai.

¹⁰ Amene imalini yame, Goteto yakama balana yame tupa atalapale lata wato, ee lo meane mambele, yakamato balana yame atamakale lo wayumane makande pitawa atalapape. Yakamato wuane pua ateaindo, matili-matilipi yakamato bala awua tepa alu, yuunga peaka napulu-peyai.

¹¹ Yakamato bala awua tepa naene, balana yame atolai-kola, yakama molo-peke lolane Akali Andane Jisasa Kataisana yuu epene yapowa yalane okona polane asini oko Goteto wayumane lumbu tepa olopeya.

¹² Nambato pii enene leyo utupane yakamato nembo toto, bilipi leyama nayu leyai tekeko, yakamato pii utupane embesa naene, nembo tatawa atalapale nembo teyo. Wuane nembo toto, ole kambuangka nambato yakamana nembo-tene oko mina ika lauwa lakaе lo nembo teyo.

¹³⁻¹⁴ Ole ukupini mindilapo namba saka atalu, nambana umbaini oko tepa olopeyo. Nanimana Akali Andane Jisasa Kataisato wuane lo namba langeane okonena, nambato katulo wuane pulupeyo nembo teyo. Wuane nembo toto, namba yuu okona saka ateyo angi, ole kambuangka nambato yakamana nembo-tene oko mina ika lewando, okone kuai lolopeya nembo teyo.*

¹⁵ Dee matili namba omolowa-kola, yakamato pii nambato leyo utupane nembo tatawa atalapale nembo toto, andipa nambato piape taimane pukale.

* **1:6:** Ga 5:22-23 * **1:13-14:** 2Ko 5:1; Jo 21:18-19

*Nanimato Potopesa Akali Tupana Pii
Epene Oko Yatawa Ateyama Leane Oko*

¹⁶ Wamba nanimato yakama languato, nanimana Akali Andane Jisasa Kataisa oko bala tai-lene wete ateya lo yakama langema okoni. Wuane loto, nanimato bala lapone peke lolopeya lo yakama langema tekeko, nanimato pii okonelapo yakama langema-angi, nanimato mee wandakali mindina nembo-tenenga ato ika leane pii temane mindi ale wato yakama langi napemane. Jia. Wamba nanimato lee-mane andema-kola, Gotena tii-pene okola, balana tai-lene okola, Jisasanga epeanga andalu, matili yakama langema.*

¹⁷⁻¹⁸ Aposolo akali tepo nanima Jisasa towa atu Gotena yuu wangiane epene wete okona atema-angi, nanimato okone lee-mane andema. Andema-kola, Gote tii-pene wete okomane ati kenga atoto, pii mindi Jisasa andayo leane oko loto, akali oo ateya oko nambana iwanane oko. Nambato bala towa epele wete wato, yamapano yo atalawane leane. Ayiane Goteto wuane leane okonemane Jisasa gene andane mindi maiya-kola, nanimato ale ema. Pii okone ale wato, nanimato Gotena tii-pene oko Jisasanga epea-kola, nanimato andema.*

¹⁹⁻²¹ Dee, wamba potopesa akali tupame-nane Gotena pii enene wete pepa pelene eya tupa nanimato yatava ateyama teke. Wamba potopesa akali utupane-mane mee yakama tanena nembo-tene okomane potopesa pii mindikipi mindi naleainipia. Jia. Oli Sipitisa okomane potopesa akali utupanena nembo-tene oko mina ika loto, Gotena pii pepa pelene eya oko utupanenga maiyakola, utupane-mane potopesa pii utupane leainipia. Tene okonena, wandakali mindimane bala tanena nembo-tene oko wato minuto, potopesa pii pepa pelene eya tupana tene tupa lapanawa nalape-pene ya lo yakamato bulupane nembo talapape. Utulu pangosa lamu mindi tii pua yo waa lanane pua teke, potopesa akali tupamanane Gotena pii lo yata yaini tupa tii pima-pima pulu, upa pitane kaiyanda oko bala epoto, yakamana nembo-tene tupana mo tii pulanggi gian lolopeya. Yakamato potopesa akali utupanena pii leaini tupa nembotu minatawa ateaindo, okone kuai lolopeya.*

2

*Owato Potopesa Tupamane Mana Koo
Minalaini Leane Oko*

¹ Wamba potopesa akali utupane-mane Gotena pii enene oko leaini tekeko, owato potopesa akali minditupa Isatale

tane wandakali tupana tombenenga ateainipia. Wuane pua teke, andipapi owato potopesa akali minditupa Kitisene wandakali yakamana tombenga atolopeyai teke. Akali Andane okomane wandakali utupane kambo molo-peke leane tekeko, wandakali utupane-mane Akali Andane oko masia mawua atalaini. Wuane pua atoto, utupane-mane langa-langga puato, Gotena pii mana yakama langeyama loto, wandakali tupana bilipi oko minu koyoyale owato pii mana tupa yakama langu atolopeyai. Wuane pua atolai okonemane utupane yakama tane kapoyale minu koyolo-peyai.*

² Wandakali utupane-mane mana koo mindipene-mindipene tupa wato minu atolai-kola, wandakali kambua-mane wandakali utupanena mana koo utupane wato minu atolopeyai. Utupane-mane wuane pua atolai okonena, wandakali waka minditupa-mane Gotena pii mana enene oko andayo pii koo loto, lamba lolopeyai.

³ Owato pii mana lalaini tisa utupane-mane yakama Kitisene yamena munipi, minditaka yolaini tupa kambua miaima lakae lo nembo toto, owato pii kambua lolopeyai. Utupane-mane wuane pulupayai tekeko, wamba wete Goteto gii mindi yata wato, okone anggi nambato wandakali koo utupane kosimi loto, minu koyawakale leaipia. Wuane lalu, Gote bala limu pali napene, wandakali utupane kosimi lokale lo gii yata yane okone epeakale lo mee maliyo ateya.

⁴ Anu peakale Goteto wandakali utupane katulo minu koyolo-peya leyope. Wamba enjole minditupa-mane mana koo tupa minu ateai-kola, utupane-mane mee wuane pua atekale lo Goteto ando kondanyaepia. Jia. Balato utupane kote andane mindi matili leakale nembo toto, utupane yuu koo okona mee andi latane atekale loto, andi lo aindaka leaipia.*

⁵ D5, wuane pua teke, wandakali wamba wete ateaini tupamane Gote masia mawua ateai-kola, Goteto wandakali utupane-mane mee wuane pua atekale lo ando kondanyaepia. Jia. Balato ipa lii andane mindi epeakale leane okomane utupane pitaka peyo ome leane tekeko, akali Nowa balato Gotena mana epene tika-pene tupa mana lamawua ateai-kola, Goteto balapi, balana yame wandakali yanasa tupapi, utupane angu moyo ando ateaiapia.*

⁶ Goteto Sotomo, Gomota-la, tano okonelapo koya yakale loto, ita-mane yangea-kola, tano okonelapo sia pete angu

* **1:16:** Mt 17:1-5 * **1:17-18:** Mt 17:5 * **1:19-21:** 2Ti 3:16-17; 1Pi 1:10-12 * **2:1:** Mt 24:11; Ju 3-4 * **2:4:** Ju 6
* **2:5:** Jen 6:1-7:24; 2Pi 3:6

guleaipia. Goteto tano okonelapo ita-mane yangeane okonemane wandakali matili bala masia mawua atolaini tupa mana lamawuato, yakamato wuane pua ateaindo, nambato wuane pua teke yakamapi yangokale lo manalamai-yaepia.
*

⁷⁻⁸ Wamba Sotomo tane wandakali ataeini tupamanne Gotena loo tupa kalo puato, pamuku mana waka-waka tupa minu atoto, mana koo kambua tupa minu ateainipia. Wuane pua ateai-kola, ole dindi lo akali tika-pene Lote bala Sotomo tano okonena atoto, utupane-mane mana koo miniaiaini utupane balato lee-mane andaka, pii koo leaini tupa alene-mane ale aka pua ateaiapia. Wuane pua atoto, akali tika-pene Lote bala mini kendawa atoto, balana yamapanenga tandaka andane wete pea-kola, ateane okonena, Goteto Sotomo tane wandakali tupa minu koya-angi, balato akali tika-pene Lote okone molo-peke leaipia.*

⁹ Kenda-pene utupane Gote wato minu atalaini wandakali utupanenga epea-kola, Akali Andane okomane wandakali utupane katulo molo-peke leaipia. Balato utupane molo-peke leane okonena, Akali Andane okomane Gote wato minu atalaini wandakali tupa molo-peke lalane asini tupa andalane lo nanimato andeyama. Wuane tekeko, wandakali minditupa-mane mana koo tupa wato minu atolai-kola, Akali Andane okomane wandakali koo utupane tandaka maima pulu, matili wandakali yapa lo tale pulupeya gii okona giau lolopeya.

¹⁰ Wandakali utupanena minditupa-mane Gotena pii layene oko angini mindi jia ya nayuto, atapene tene moto, yakama tanena nembo-tene oko wato minalaini. Utupane-mane ati kenga enjole epene wete ateyai tupa ando lamba loyale, anjakopi mindi yuku aa na-piyaini. Yakamana nembo-tene koo oko ika leya-kola, utupane-mane pamuku piyaini. Gotena wenonga mana koo wato minalaini wandakali utupane kalato atene atoto, yole koo wete mindi molopeyai.*

¹¹ Enjole tupa yakamanga tai-lene andane wete yene atoto, wandakali utupane sia minu atalaini. Tene okonena, enjole utupane-mane Akali Andane okona wenonga atoto, katulo wandakali utupane lamba loto, kosimi lapia-yale tekeko, utupane-mane wuane na-piyaini.*

¹² Wandakali-mane yia kapuapi, peango anatopepi, okonetaka tupa wato minuto, peyo ome leakale nembo toto, Goteto

yia kapuapi, peango anatopepi, utupane yuu okona ateakale leaipia. Yia peango tupa mini napalene atoto, minditaka mindi pimakale nembo teyai tupa mee wuane pua teke, owato potopesa akali utupane yakama yia peango ima mini napalene atalane okonepene atoto, minditaka mindi pimakale nembo talaini tupa mee wuane bua teke atalaini. Wuane pua atoto, utupane-mane minditaka nembo natalaini tupa ando lamba lo atalaini. Wandakali utupane-mane mana koo utupane minalaini okonena, Goteto utupane minu koyolo-peya.*

¹³ Wandakali utupane-mane mana koo minalaini okonena, Goteto paini yole koo mindi utupane mawuato, minu koyolo-peya. Otonga nai teya-kola, yakama towa atu tomo no atoto, wandakali utupane-mane yakama andakasa wato, tomopi, ipa taipi, utupanena kambua tupa epelewa nalaini. Wandakali utupane-mane mana koo okone minalaini okonemane yakama mo kalato ataya wato, Kitisene wandakali waka yakamana gene tupa minu koyalaini.

¹⁴ Wandakali utupane-mane mana koo minalaini utupane konda na-piyaini. Jia. Ole dindi lo utupane-mane pamuku piyaini mana oko mina-makale nembo toto, ai gitisa lalaini. Wandakali mindimane Gote lo bilipi leyo nayu naleando, wandakali utupane-mane bala gitisa lo moto, mana koo tupa mineakale lalaini. Utupane-mane wandakali waka mindina minditaka yatawa ateyai tupa miauwa laka lo nembo tatawa atalaini. Wandakali utupane-mane mana koo utupane wato minalaini okonena, Goteto utupane minu koyolo-peya.

¹⁵⁻¹⁶ Wamba akali Beyo iwanane Belame lene okomane mana koo mindi minuluwa okonemane yole epene mindi mokale nembo toto, epele wete yaepia. Yia dongi tupamanne wandakali-mane pii lalaini pua na-lalaini tekeko, potopesa akali Belameto kee ene atoto, mana koo mindi minuyale bea-kola, yia dongi mindimane wandakali-mane pii lalaini pua loto, Belame laiya loto, nimbato mana koo minuyale pele okone mina napii leaipia. Yia dongi okonemane pii okone leane okonemane Belameto mana koo minuyale peane okone mina napeakale loto, asini kando leaipia. Wamba akali Belameto Gotena asini epene tika-pene oko awua tepa alu, mana koo minalaini asini okone watama peaipia. Wuane pua teke, owato potopesa akali utupane-mane akali Belamena mana koo okone wato minu atalaini.*

* ^{2:6:} Jen 19:24; Ju 7 * ^{2:7-8:} Jen 19:1-16 * ^{2:10:} Ju 7-8,16 * ^{2:11:} Ju 9 * ^{2:12:} Ju 10 * ^{2:15-16:} Nam
22:7,28-35; Ju 11; Lap 2:14-15

17-19 Mana mindimane bala bosa lo ando ateakale lo wandakali mindimane ando konda yando, wandakali okone bala mana okonena katapusa piape piyane wandakali atola-kola pulupeya. Mana koo lamayaini wandakali utupane-mane mana koo tupamane yakama bosa lo ando ateakale lo ando kondalaini mana okonemane, utupane yakama mana koo utupanena katapusa piape piyaini. Wandakali utupane yakama tane wuane piyaini tekeko, utupane yakama luawa atoto, wandakali waka tupa lamawuato, mana nanimato minalamane tupa yakamato wato minu ateaindo, yakama andi latane ata napene, mee anana atolopeyai. Anana atoto, yakamato minditaka mindi pimakale nembo tolaini tupa katulo pulupeyai lalaini. Wandakali utupane-mane gitisa pii lalaini okonemane, wandakali epapu teke aiteine mana tupa awua tepa alu, Kitisene wenene ateyai utupanena nembotene koo oko mina ika lamayaini. Wuane peyai-kola, Kitisene wenene utupane-mane pamuku piyaini mana okopi, mana koo mindipene-mindipene tupa wato minu atalaini. Mana koo lamayaini wandakali utupane-mane wandakali waka tupa wuane pua minu koyalaini okonena, koo piyaini wandakali utupane yakama ipa tae tee peya-kola, kapu-tene yalane okonepene ateyai. Dee, popo andane mindi epoto, mole tupa mindisa awua puku peya-kola, kingi na-epalane wuane pua teke, owato potopesa akali utupane-mane wandakali waka tupa moyo napene, minu koyalaini. Tene okonena, Goteto wandakali utupane yakama yuu koo undupi-lene wete mindina atama peakale loto, yuu koo okone makande pua yata yaepia. *

20-21 Wamba wandakali utupane-mane mana koo tupa wato minu atoto, utupane yakama kopeta ateaini tekeko, matili nanimana Akali Andane Jisasa Kataisa balato nanima molo-peke leane lo utupane-mane mana meaini. Mana okone mialu, utupane-mane Gotena loo epene wete tupa ale wato, balana mana tika-pene tupa wayumane mana meaini. Mana meaini utupane-mane wandakali utupane moyo Gotena asia epene oko andawa lea-kola, wandakali utupane-mane yuu okona mana koo kalato atene tupana asia peya wanju ateaini. Wuane tekeko, andipa wandakali utupane-mane Gotena loo epene wete tupa masia mwuato, mana koo kalato atene tupa wato minulu-peke lapiai-kola, mana koo utupane-mane wandakali utupane andi lolo-peke lapia. Wuane pipia-kola,

andipa wandakali utupane kopeta wete ateyai. Wamba wandakali utupane-mane Gotena mana epene wete tupa mia neapeiyale, andipa utupane yakama kopeta wete ateyai pua ata napipiai-yale. *

22 Pii kokoli enene mindimane wandakali utupane-mane mana mineaini okone lapana wato, yia-mane balana umbaini wasa-wasa pelene guratane ateya-kola teke, yuu tala koo tupana yongo-yongo pangulapeke lalane. Dee, pii kokoli enene waka mindimane loto, peango tupamane miangu tangu apoto, dee lapone nolo-peke lalaini. Koo pulu-peke lalaini wandakali tupamane wuane teke peyai-kola, piyane. *

3

Akali Andane Oko Bala Epolopeya Leane Oko

1-2 Nambana yamapanne yene yame, wamba Gotena potopesa akali tupamane mangene Goteto matili pulupeya tupana pii lapanawa leainpipa. Wuane leai-kola, matili yakamana aposolo akali tupamane pii yakama molo-peke lalane Akali Andane Jisasato leane tupa yakama languato, wua piyapape leai okoni. Andipa yakamato pii akali utupane-mane wamba leaini tupa nembo tolo-peke lapiai lakae lo nembo toto, nambato yakamana nembo-tene epene oko lapone mina ika loto, yakamana pepa lapone oko peyo epe leyo. *

3-4 Wamba apsololo akali utupane-mane pii mindi yakama languato, yuu oko koyo puyale pula-angi, lamba lalaini wandakali minditupa atolopeyai leai okoni. Yakamato pii okone bulupane nembo talapape. Lamba lalaini wandakali utupane-mane yakamana nembo-tene koo oko wato minuto, yakama ando lamba loto, wua lolopeyai: Wamba Jisasato potomisa pii mindi leane oko loto, namba peke lokale leane tekeko, wamba wete Goteto yuu atila yakale leane gii okonena atoto, andipa ateyama okona giao loto, minditaka eya tupa pitaka lawa napene, mee wamba yane okonepene teke eya okonde. Nanimana yumbane tupa oma yiake leaini tekeko, bala peke naleya okonde lolopeyai. *

5 Goteto minditaka wamba mo lawa peane tupa wayumane nembo tolopeke nalene ato, utupane-mane wuane lolopeyai. Wamba wete Goteto ati lipi oko ateakale lalu, yuu oko ipa tupana tombenenga yakale lalu, peapia. *

6 Wuane piyu, matili Goteto ipa lii andane mindi epeakale lea-kola, ipa lii epeane

* 2:17-19: Ju 12:13 * 2:20-21: Mt 12:45; Lk 12:47-48
18; Mt 24:48 * 3:5: Jen 1:6-9 * 3:6: Jen 7:11; 2Pi 2:5

* 2:22: Man 26:11 * 3:1-2: Ju 17 * 3:3-4: 1Ti 4:1-2; Ju

okonemane minditaka wamba yuu okona
yane tupa pitaka wetete minu koyaepia. *

⁷ Dee, andipa Goteto pii mindiki okone-
mane teke yuu ati-la, okolapo mee yakale lo
ando ateya tekeko, matili Goteto bala ma-
sia mawua atolaini wandakali tupa kosimi
loto, minu koyola-angi, balato yuu ati-la,
okonelapo ita-mane yangokale lo maliyo
ateya.

⁸⁻⁹ Balato okonelapo yangokale lo maliyo
ateya okonena, wandakali minditupa-
mane loto, Akali Andane oko bala peke
lokale lo potomisa pii leane tekeko, bala
wamba ini peke naleya, okonde lalaini.
Utupane-manu wuane lalaini tekeko,
nambana yamapane yene yame, yakamato
pii mindiki oko embesa naene, wua lo
nembo talapape: Akali Andane okomane
andeya-kola, oto mindiki angu mali tausene
mindi gulalane. Dee, balato andeya-kola,
mali tausene mindi ole mindiki angu
gulalane nembo toto, balato mangene
minditupa wamba ini kapoyale napiyane.
Tene okonena, wandakali-mane loto, Akali
Andane okomane mangene mindi pukale lo
potomisa pii leane okone balato wamba ini
pii napuya, okonde nalape-pene. Jia. Balato
wandakali mindikipi mindi alu napeakale
nembo toto, yakama towa wamba ini kepa
na-alane. Jia. Wandakali pitaka yamapane
peke leakale lo maliyo atoto, bala ati kenga
atala yuunga ini kapoyale peke naleya. *

*Yakamato Bilipi Oko Auwa Tepa Olaini,
Tika Ando Atalapape Leane Oko*

¹⁰ Andipa Akali Andane oko bala wamba
ini naepene, mee maliyo ateya tekeko, pake
nalane akali mindi bala oko angi epolopeya
lo nanimato nembo natene atoloma-kola,
bala epalane. Wuane pua teke, Akali
Andane bala oko angi epolopeya lo nani-
mato nembo natene atoloma-kola, bala
epolopeya. Okone angi, ati lipi oko tula
andane loto, alu pulupeya. Wuane pula-
angi, ati lipi okona minditaka eya tupa
pitaka ita-mane taa yiake lola-kola, alu
pulupeyai. Dee, yuu okopi, yuu okona
minditaka yakale lene eya tupapi, utupane
pitaka taa yiake loto, alu pulupeyai. *

¹¹ Matili minditaka eya utupane pitaka
ita-mane taa yiake loto, alu pulu-peyako.
Andipa yakama tane Gote mawuato,
yakamato Gotena mana epene tupa wato
minu atape-pene.

¹² Wuane puato, yakamato Gotena gii
okone wamba ini kapoyale ipupia lakae lo
nembo toto, maliyo atalapape. Gii okone
epola-angi, ati lipi oko ita-mane taa yiake
lola-kola, alu pulupeya. Wuane pula-angi,

ita-mane tolane okone toto andane wete
pula-kola, yuu oko koyalu, mee ipa yale
yolopeya.

¹³ Matili yuu ati-la andipa eya okolapo
wuane pua koyolo-peyapi tekeko, wamba
Goteto potomisa pii mindi leane oko loto,
matili nambato yuu ati-la wenene mindi
yakale lolowa-kola, yuu wenene okonena
wandakali atolai utupane-mane mana
epene tika-pene tupa angu wato minu
atolopeyai leaipia. Goteto yuu wenene
mindi yakale lokale leane okone yata
yakale lo nanimato maliyo ateyama. *

¹⁴ Nambana yamapane yene yame,
Goteto wuane peakale lo yakamato
maliyo atoto, bala yanda pimawua ata
napene, bala towa yamapane mindiki
palu atalapape. Wuane pua atoto, balana
wenonga yakamanga koo tene mindi
nayene, yakama kilini lene epene wete
atamakale nembo toto, yakamato piape
taimane pua atalapape. Yakamato wuane
pua atolai-kola, matili Akali Andane oko
bala epola-angi, yakamato mana epene
minu atolaini utupane balato andolopeya.

¹⁵ Akali Andane okomane wandakali
kambua tupa molo-peke lokale nembo
toto, bala yuunga kapoyale peke naleya
lo yakamato nembo talapape. Wamba
Goteto nanimana yamapane yene amene
Polo balanga nembo-tene epene mindi
maya-kola, balato pii nambato pepa peleyo
mindiki okonepene teke mindi pepanga
peyo epe loto, yakama langea okoni. *

¹⁶ Pii nambato pepa peyo epe leyo
okonepene teke loto, Polo balatopi balana
pepa tupa pitakana pii okonepene tupa teke
loto, peyalane. Pii balato pepanga peyo
yata yane eya utupanena minditupana tene
tupa ayiawa wete andape-pene guleya-
kola, Gotena pii tupa wayumane mana
mia napene wandakali atalaini tupamanne
pii utupanena tene tupa tatake alaini.
Wandakali utupanena bilipi oko tai ya
napeya-kola, utupane-mane Polona pii
tupapi, Gotena pii waka pepa pelene eya
tupapi, pii utupane pitakana tene enene
oko lamai napene, pii waka tupa lamawua
atalaini. Tene okonena, matili Goteto
wandakali utupane minu koyolo-peya.

¹⁷ Nambana yamapane yene yame,
Gotena loo tangga lalaini wandakali
utupane-mane epoto, owato pii mana
minditupa yakama langulu-peyai oko
yakamato nemboto ateyai okoni. Utupane-
mane wuane puato, yakama kilau lo molai-
kola, yakamato yakamana bilipi oko awua
tepa olomane. Tika ando atalapape. *

* 3:8-9: Sam 90:4; Ip 2:3; 1Ti 2:4-5 * 3:10: Lk 12:39; 1Tes 5:1-2; Mt 24:29,35 * 3:13: Ais 65:17; 66:22; Lap 21:1,27
* 3:15: Lom 2:4 * 3:17: Mk 13:33; 1Ko 10:12-13

18 Yakamoto wuane pulumane lo ando atoto, nanima molo-peke lalane Akali Andane Jisasa Kataisa balato wua puato, yakama ondo wete alane lo yakamoto wayumane wete mana mo atalapape. Mana okone mo atoto, andipapi, matilipi, wandakali-mane balana gene oko laiyu lo atape-pene. Enene.

1 JONE

Joneto Pepa Bulupane Peyo

Pee Leane Oko

*Wandakali Saka Atapowa Ataya Alane
Pii Oko*

¹⁻² Wamba wete Goteto yuu ati-la yakale lene atea-angi, wandakali saka atapowa ateaake lo ataya alane pii oko bala Ayiane Gote oko towa atu ateapele-pia. Goteto pii okone bala nanimanga mo pana ya-kola, nanimato bala lee-mane andalu, kii-mane minuto, bala okopene ya lo andema. Nanimato pii balato leane oko wisanisa atoto, balana pii ale emane tupapi, minditaka andema tupapi, utupane pitaka yakama langeyama.*

³ Ayiane Gote okola, balana Iwanane Jisasa Kataisa-la, okonelapo towa nanimma nembo mindiki palu ateyama-kola, yakamapi nanimma towa nembo mindiki palu atalapale loto, nanimato minditaka andemane tupapi, ale emane tupapi, utupane yakama langeyama.

⁴ Nanimato epele wete amakale nembo toto, nanimato yakamana pepa oko peyo epe leyama.*

*Yakamato Mana Koo Minalaini Tupa La-
pana Alapape Leane Oko*

⁵ Wamba Jisasa Kataisato pii mindi lea-kola, nanimato pii okone ale ema. Nanimato pii okone teke yakama languato, Gote bala tii-pene eya-kola, balanga undupi-lene anjakopi mindi nayene ateya leyama.*

⁶ Tene okonena, nanimato bala towa nembo mindiki palu ateyama loto teke, mana koo tupa wato minuto, undupi-lene okona epoko pua atemando, nanimato pii enene oko nalene, owato pii loloma-kola pulupeya.*

⁷ Wuane tekeko, Gote bala epene tii-pene okona pangosa ateya pua, nanimato tii-pene okona epoko pua atemando, nanimato balana wandakali tupa towa nembo mindiki palu atoloma-kola, balana Iwanane Jisasa okona tundupa okomane nanimana mana koo minalamane tupa pitaka apialane.

⁸ Nanimato mana koo mindi mina napiyamane lemando, Gotena pii enene oko nanimanga nayola-kola, nanimana tane minakasa oloma-kola pulupeya.*

⁹⁻¹⁰ Nanimato mana koo mindi mina napema lemando, Gotena pii oko nanimanga nayola-kola, Goteto owato pii lalane loloma-kola pulupeya tekeko, Gote bala epene tika-pene wete. Balato mangene pukale lalane tupa enene piyane. Tene okonena, nanimato mana koo minalamane tupa lapana emando, mana koo minalamane utupanena yanotupa kondalu, balato nanimanga koo tene yalane tupa pitaka apolopeya.

2

*Jisasa Kataisato Nanimoyolo-peya
Leane Oko*

¹⁻² Nambana andopane yame, yakamato koo mindi na-piyapape loto, nambato pii utupane pepa peyo epe leyo tekeko, Kitisene wandakali nanimana mindimane koo mindi pemando, akali epene tika-pene Jisasa Kataisa balato wandakali okone moyolo-peya. Wamba nanimato koo pema-kola, Jisasato nanimana koo utupane apoyale, bala tane Gote opa mindi mawuato, omeaipia. Balato nanimana koo tupa angu apokale nembo nateaipia. Jia. Balato yuunga wandakali paleyai tupa pitakana koo tupa apoyale omeaipia. Tene okonena, nanimato koo mindi pemando, balato nanimana moyoto, Ayiane Gote oko towa pii lo tika pulupeya.*

*Yangone Towa Epelewa Yamapane Yo
Atalane Wandakali Bala Tii-pene Okona
Ateya Leane Oko*

³⁻⁶ Wandakali mindimane Gote towa atu atalawane leando, wamba Jisasa Kataisato mana epene tupa minu epoko pua ateanne, wuane pua teke wandakali okonemane mana epene tupa minu epoko pua atapepene. Nanimato wuane pua atemando, nanimato Gote towa atu ateyama lo andolopeyama. Wuane tekeko, nanimato Gotena loo tupa wato minu atemando, nanimato Gote towa atu atoloma-kola pulupeya. Wandakali mindimane Gotena mana tupa wayumane nembo teyo loto teke, Gotena loo tupa wato mina napeando, Gotena enene pii oko balanga nayola-kola, balato owato pii lola-kola pulupeya. Wuane tekeko, wandakali mindimane Gotena pii oko wato minu atehando, bala Gote towa wayumane epelewa yamapane yo atolakola pulupeya.*

⁷ Yamapane yene yame, loo mindi nambato yakamana pepanga peyo epe leyo oko

* **1:1-2:** Jo 1:1,14 * **1:4:** Jo 16:23-24 * **1:5:** 1Ti 6:13-16; Jem 1:17-18 * **1:6:** 1Jo 2:3-6 * **1:8:** Sam 32:5; Man 28:13 * **2:1-2:** Ip 9:24; Jo 1:29; Kol 1:18-20; 1Jo 4:9-10 * **2:3-6:** Jo 14:21,23-24 * **2:7:** Jo 13:33-35; 2Jo 5-6

bala loo wenene mindi jia. Wamba bulupane yakamoto Gotena pii oko tewa ale yai-angi, yakamoto loo wambane okone ale yai okoni.*

⁸ Loo okone wambane eya tekeko, Kataisato mana epene mineane tupamane loo okone mo wenene gulaya yane. Nanimato balana mana andeyama-kola, pii nambato leyo okone enene guleya. Bala tii-pene enene wete oko atoto, tii pua ateya-kola, yakamanga undupi-lene yane oko koyo pima-pima peya. Tene okonena, nambato yakamana mana andeyo-kola, loo wambane okone loo wenene mindi guleya leyo.*

⁹ Wandakali mindimane namba tii-pene okona ateyo loto teke, balato wandakali yangone mindi towa mini koo paleando, bala undupi-lene okona pangosa mee atama ipulu, andipa ateyama okona giao lola-kola pulupeya.*

10-11 Bala undupi-lene okona pangosa epoko pua atalane mambele, bala aninga peyope nembo natalane. Wandakali mindimane wandakali yangone tupa towa epelewa yamapane yo ateando, bala tii-pene okona atapowa atola-kola, bala ayia peyoto, lombape-pene yolane tene mindi ata napiyane.*

12-14 Kitisene mini-yene yame, wamba Goteto yuu ati-la yakale lea-angi, Jisasa bala ateane okone yakamoto nembo tatawa ateyai okonena, nambato yakamana pepa oko peyo epe leyo. Kitisene wandakali tai yame, Gotena pii layene oko yakamanga eya-kola, yakama tai atoto, akali koo Satane oko sia minapiae mambele, nambato yakamana pepa oko peyo epe leyo. Kitisene wandakali minditupa yakama andopane yame gulo atoto, Ayiane Gote oko nembo tatawa ateyai mambele, nambato yakamana pepa oko peyo epe leyo. Jisasa Kataisato yakama molo-peke loyale ita malamanda okona omeane oko nembo toto, Ayiane Goteto yakamana koo tupa api yiake mambele, nambato yakamana pepa oko peyo epe leyo.

Yuu Okona Mana Koo Tupa Epele Olaini Leane Oko

15-17 Wandakali-mane minditaka lee-mane andoto, miama laka lo nembo talaini. Dee, wandakali tupana umbaini-mane mana koo tupa minaima laka lo nembo talaini teke. Wandakali-mane lipinga yale ateyama nembo talaini teke. Ayiane Gote balato yuu okona mana koo utupane mina ika naleaipia. Jia. wandakali-mane mana koo okonepene

tupa mina ika leainipia. Wuaneeko, yuu okona mana koo utupane epelewa yamapane yo atalane wandakali okomane Ayiane Gote oko towa epelewa yamapane yo ata napiyane. Goteto nembo teya pua piyane wandakali oko bala saka atapowa atolopeya tekeko, yuu okona minditaka eya tupa pitakapi, minditaka eya utupane miaima laka lo nembo talamane mana okopi, utupane pitaka koyo pulupeya. Tene okonena, yakamoto yuu okona mana koo utupanepi, yuu okona minditaka eya tupapi, utupane epelewa yamapane yo ata na-piyapape.*

Kataisa Towa Yanda-pene Akali Bala Epo Ateya Leane Oko

18 Andopane yame, yuu koyo pulane oto oko epoyale peya. Kataisa towa yanda-pene akali oko bala epolopeya lo pii lene oko yakamoto ale yai okoni. Andipa Kataisa towa yanda-pene akali kambua epo ateyai okonena, yuu koyo pulane oto oko epeya lo nanimato andeyama.*

19 Wamba Kataisa towa yanda-pene akali utupane nanima towa atu atoto, nanima andakasa oyale, nanimana yame atei. Utupane nanimana yame enene atei-ayale, andipapi utupane nanima towa atu mee ataima-ayale tekeko, utupane pitaka nanimana yame enene ata napeai oko mo pana oyale, matili utupane-mane nanima awua tepa alu poto, yame waka mindi atei. Yame waka atei-kola, akali utupane yakama wambapi, nanimana yame enene ata napeaini ya lo andema.*

20-23 Apito owato pii loto, Kataisa towa yanda-pene akali atalaepo. Akali mindimane Jisasa bala Mesaya oko jia leando, bala owato pii loto, Kataisa towa yanda-pene akali mindi atolo-kola pulupeya. Balato Gotena Iwanane oko masia maiyando, Ayiane Gote okopi masia maula-kola teke pulupeya. Tene okonena, wandakali mindimane Gotena Iwanane oko masia maiyando, Ayiane Gote oko bala towa atu ata napulu-peya. Wuane tekeko, wandakali mindimane Jisasa bala Gotena Iwanane oko ateyalolapana yando, Jisasa-la, Ayiane Gote okola, okonelapo lapotaka bala towa atu atolopeya. Nambato yakamana pepa peyo epe leyo okone, yakamoto enene pii oko nembo nateyai nayuto, naleyko. Jia. Akali epene tika-pene wetete Jisasa Kataisato Oli Sipitisa oko yakama gea-kola, yakamoto Gotena pii enene oko nembo toto, Gotena pii enene okomane owato pii mindi laa napiyane nembo teyai. Yakamoto wuane nembo

* **2:8:** Lom 13:11-12; Jo 1:9 * **2:9:** 1Jo 4:20-21 * **2:10-11:** Lom 14:13; Jo 12:35 * **2:15-17:** Lom 8:5-8; 13:14; Mt 7:21-22 * **2:18:** Mt 24:4-5,23-24; 2Jo 7 * **2:19:** Ap 20:30

teyai okonena, nambato yakamana pepa oko peyo epe leyo. *

Yakama Jisasa Kataisa Towa Atu Atalapape Leane Oko

²⁴⁻²⁵ Wamba Kataisato potomisa pii mindi nanimata languato, nanimato bala towa atu atemando, balato nanimata saka atapowa atalapale lo ataya wakale lea. Yakamato pii wamba bulupane ale yai okone teke bilipi leyo nayu lo atapowa ataeindo, yakama Gotena Iwanane okola, balana Ayiane Gote okola, okonelapo towa atu atapowa atolopeyai. Tene okonena, yakamato pii okone bilipi leyama nayu lo atalapape.

²⁶ Kataisa towa yanda-pene akali tupa-mane yakama minakasa olaini loto, nambato pii utupane yakamana pepa okona peyo epe leyo.

²⁷ Oli Sipitisa wamba Jisasato yakama geane oko yakama towa atu ateyai okoni. Oli Sipitisa okonemane owato pii mindi yakama langi napiyane. Jia. Balato enene pii angu loto, mana epene tupa pitaka yakama langiyane. Wuane, wandakali waka mindimane yakama mana langualane tene mindi ata naopeya. Jia. Oli Sipitisa okomane yakama mana langeane pua teke, yakama Jisasa towa atu atalapape. *

²⁸⁻²⁹ Nambana andopane yame, yakamato Jisasa Kataisa bala epene tika-pene wetete ateya nembo talaini. Wuane nembo toto, mana tika-pene minu atalaini wandakali yakama pitaka balana mandiyene yame ateyai nembo teyai teke. Tene okonena, matili bala panakame epola-angi, nanimata balana wenonga atoto, yukuwa yala naene atamakale nembo toto, andipa yakama bala towa atu atalapape. *

3

Mindimane Yakama Minakasa Olane, Waiwa Ando Atalapape Leane Oko

¹ Ayiane Goteto nanimata balana andopane yame ateyai leane okomane balato nanimata towa epelewa yamapane yo atalawane lo andawa leane oko andalapape. Nanimata balana andopane yame ateyai leane okonena, nanimata balana andopane yame tupa ateyama-ko. Yuu okona wandakali tupa-mane Gote nembo natalaini. Tene okonena, utupane-mane nanimata balana andopane yame ateyai nembo natalaini. *

² Yamapane yene yame, andipa nanimata Gotena andopane yame ateyama. Matili

nanimata anu pua atolo-peyamape lo nanimato wayumane nembo nateyama tekeko, matili Kataisa bala panakame epola-angi, nanimato bala akali okopene ateya lo andoto, nanimapi bala yale teke atolo-peyama nembo teyama. *

³ Kataisa bala epene tika-pene wete ateya pua teke ataima lakae lo nembo maliyo atalaini wandakali tupa pitaka-mane mana koo minalaini tupa awua tepa amakale lo makande pua atalaini.

⁴⁻⁶ Mana koo mindi Kataisa balanga nayene atoto, balato nanimata yuunga wandakali-mane koo piyamane tupa apoye epeane oko yakamato nembo teyai okoni. Tene okonena, bala towa atu atalane wandakali okomane mana koo tupa wato mina napiyane. Mana koo wato minalane wandakali okomane Kataisa wamba anda napene atoto, bala nembo natalane. Kataisa nembo natene atoto, balato mana koo tupa wato minuto, Gotena loo tupa kalo piyane. Gotena loo kalo piyane mana okone mana koo wete mindi. *

⁷⁻⁸ Nambana andopane yame, Gotena iwanane oko epene tika-pene atalane pua teke, mana epene tika-pene minalaini wandakali tupa epene tika-pene gulalaini. Wuane tekeko, wamba bulupane wete tewa Sataneto mana koo tupa mineane okonena, andipa mana koo tupa wato minalaini wandakali tupa pitaka balana yame atalaini. Balana yame ateyai-kola, Gotena iwanane okomane Satanena piape koo piyaini tupa minu koyo piya wakale loto, bala ati kenga atala yuunga panakame epeane. Tene okonena, yakamato mana koo mindi wato minu atalapale loto, wandakali yangone mindimane yakama minakasa olane. Waiwa ando atalapape. *

⁹ Wandakali mindi bala Gotena andopane gulola-angi, Goteto mana epene minditupa bala lamaiya-kola, balato mana epene utupane wato minalane. Tene okonena, balato mana koo tupa minu atapowa atu napiyane. Jia. Gotena andopane atoto, balato mana koo tupa katulo wato minu atapowa atu napiyane. *

¹⁰ Wuane, wandakali mindimane Gotena mana epene tika-pene tupa wato mina napene atoto, wandakali yangone tupa towa epelewa yamapane yo ata naopeando, nanimato wandakali okone bala Gotena andopane ata naopeya lo panakame andalamane. Mana epene utupane wato mina napiyane akali okone bala Satanena andopane ateya.

* **2:20-23:** 1Ko 2:15-16; 1Jo 4:1-3,14-15; 5:1-5; 2Jo 7; Jo 5:19-23 * **2:27:** Jo 16:13 * **2:28-29:** 1Jo 3:10 * **3:1:** Jo 1:12-13; 16:1-4 * **3:2:** 2Ko 3:18 * **3:4-6:** Jo 1:29; 1Pi 2:21-25; 1Jo 2:1-2 * **3:7-8:** Jo 8:43-44 * **3:9:** 1Jo 5:18-19

*Yangone Tupa Towa Epelewa Yamapane
Yo Atalapape Leane Oko*

¹¹ Wamba yakamato Gotena pii oko bulupane tewa ale yai-angi, mindimane yakama languato, yakamato mindi akali towa epelewa yamapane yaka pua atalapape lea-kola, yakamato pii okone ale yai okoni. *

¹² Nanimana akali Kene yale ata napi-makale. Jia. Balana amene Epoloto mana epene tika-pene tupa wato minu ateane tekeko, Keneto mana koo tupa wato minu ateaiapia. Balato mana koo mindi minuto, akali koo Satane okona andopane atoto, balana amene Epolo oko peyo ome leaipia. *

¹³ Tene okonena, amene imalini yame yakamato mana epene tika-pene tupa wato minu atolai-kola teke, yuunga wandakali tupamane yakama towa nembo koo wete mindi palu ateaindo, yakama moko nalalapape. *

¹⁴⁻¹⁵ Wandakali mindimane wandakali yangone mindi towa nembo koo wete palu ateando, balato wandakali okone peyo ome lola-kola pulupeya. Wandakali yangone peyo ome lolai wandakali tupa saka atapowa ata napulu-peyai lo yakamato nembo teyai okoni. Wuaneko, wandakali yangone tupa towa epelewa yamapane yo ata napiyane wandakali okone bala omene atoto, mee atalane tekeko, nanimato wandakali yangone tupa towa epelewa yamapane yo atalamane. Tene okonena, nanimana omene atene mana okone awua tepa alu, saka atapowa atene mana oko wato minu ateyama nembo teyama. *

¹⁶ Jisasato nanimana moyoyale bala omeane mana okomane wandakali yangone towa epelewa yamapane yo atene mana oko nanimana andawa lea. Tene okonena, nanimato balana mana okone wato minuto, wandakali yangone tupa moyoyale omape-pene. *

¹⁷ Wuaneko, wandakali mindi bala yuu okona minditaka tupa yatawa atoto, wandakali yangone minditaka jia yo atola mindi andoto teke, bala ondowa moya napeando, Goteto wandakali tupa towa epelewa yamapane yo atalane mana okone wandakali okone balanga nayola-kola pulupeya. *

¹⁸ Nambana andopane yame, nanimato wandakali yangone tupa towa epelewa yamapane yo atalamane leyama okone mee ambulini-mane angu laa napimakale. Jia. Nanimato utupane towa enene wete

epelewa yamapane yoto, utupane moyoyale mana epene tupa wato mina-makale. *

*Gote Nanima Towa Atu Eya Nembo
Teyama Leane Oko*

¹⁹⁻²⁰ Nanimana nembo-tene okomane nanima yapa lo tale puato, Gotena pii enene oko wato mina napeyai leando, okone enene ya lo nembo natape-pene. Jia. Gotena nembo-tene okomane nanimana nembo-tene oko sia minuto, pitaka taka nembo talane. Wuaneko, nanimato wandakali yangone tupa towa wayumane epelewa yamapane yo atemando, nanimato Gotena pii enene oko wato mineyama nembo toto, balana wenonga nanima mini epene palu atolo-peyama.

²¹ Yamapane yene yame, nanimana nembo-tene okomane nanimanga koo tene mindi naeya leando, Gotena wenonga nanima yuku naene atolo-peyama. *

²² Yuku naene atoto, nanimato Gotena loo tupa wato minuto, mana balato epele alane tupa minalamane mambele, nanimato bala ando nimbato nanima moyo mangene mindi pii lo tee lemando, balato nanima moyo mangene okone pulupeya.

²³ Wamba balato loo mindi yata wato, nanimato balana iwanane Jisasa Kataisa oko lo bilipi loto, mindi akali towa epele aka pua yamapane yo atape-pene leaipia. balato nanima langeane pua, nanimato mana okonelapo wato minu atape-pene *

²⁴ Goteno loo tupa wato minalamane wandakali okone bala Gote towa atu ateya-kola, Gote bala wandakali okone towa atu atalane. Goteto balana Oli Sipitisa oko nanimana gea-kola, Oli Sipitisa okonemane Gote bala nanimana towa atu ateya lo andawa lalane. Tene okonena, Gote bala nanimana towa atu ateya nembo teyama. *

4

*Sipitisa Andoko-mane Pii Langeyape Lo
Tale Piayapape Leane Oko*

¹⁻³ Yamapane yene yame, Kataisa towa yanda-pene akali oko bala epolopeya lene oko yakamato wamba ale yai okoni. Andipa Kataisa towa yanda-pene okona sipitisa oko yuu okona epoto ateya-kola, balana owato potopesa akali kambua tupa yuu okona epoko pua ateyai. Wuaneko, wandakali mindi bala epoto, Gotena Sipitisa okomane pii mindi namba langeane oko nambato yakama langeyo leando, balato enene pii leya nembo na-talapape. Jia. Gotena Sipitisa okomane pii mindi bala lamaiya-kola,

* 3:11: Jo 13:33-35 * 3:12: Jen 4:8 * 3:13: Jo 5:18-23

* 3:17: Lo 15:7 * 3:18: Jem 2:15-16 * 3:21: Ip 4:16

* 3:14-15: Jo 5:24; Lap 21:8 * 3:16: Jo 13:1-3; Ga 1:4

* 3:23: Jo 6:29; 13:33-35 * 3:24: 1Jo 4:13

wandakali okomane pii okone langeyape lo yakama tane-mane wamba ini yapa lo tale pua andalapape. Wandakali mindimane Jisasa Kataisa bala akali enene umbaini atene epeane lo lapana yando, Gotena Sipitisa okomane pii okone bala lamaula-kola, balato wuane lolopeya. Wuane tekeko, wandakali mindimane Jisasa Kataisa bala akali enene umbaini atene mindi ata napéane leando, Gotena Sipitisa okomane pii okone bala lamai napula-kola, balato wuane lolopeya. Kataisa towa yanda-pene akali okona sипитиса okomane pii okone bala lamaula-kola, balato wuane lolopeya. Tene okonena, wandakali mindimane pii mindi lola-kola, yakamato balana pii oko yapa lo tale puato, sипитиса andoko-mane pii okone bala lamaiya-kola, balato pii okone leyape lo yakamato katulo andolopeyai. *

⁴ Nambana andopane yame, yakama Gotena yame ateyai. Balana Sipitisa yakamanga ateya oko tai-lene wete atoto, yuunga wandakali tupanga sипитиса koo ateya oko sia minalane. Wuaneko, Gotena Sipitisa tai-lene wetete oko yakamanga ateya-kola, yakamato owato potopesa akali tupa sia minalaini. *

⁵ Owato potopesa akali utupane yakama yuu okona akali tupa atoto, yuunga wandakali tupana mana tupa nembo toto, pii leyai-kola, yuunga wandakali waka tupa-mane utupanera pii oko ale alaini. *

⁶ Nanimota yame ateyama-kola, Gote lo nembo talaini wandakali tupamane nanimana pii oko ale alaini. Wuane tekeko, Gotena yame ata na-piyaini wandakali tupamane nanimana pii oko ale naene kondalaini. Wuaneko, wandakali mindimane nanimana pii oko ale yando, Gotena Sipitisa oko wandakali okonenga ateya-kola, balato nanimana pii oko ale eya lo andolopeyama. Wuane tekeko, wandakali mindimane nanimana pii oko ale nayando, owato pii lanale akali Satane okona sипитиса oko wandakali okone balanga ateya-kola, balato nanimana pii oko ale naene kondyea lo andolo-peyama.

Wandakali Yangone Tupa Towa Epelewa Yamapane Yo Atape-pene Leane Oko

⁷⁻⁸ Yamapane yene yame, Goteto wandakali pitaka towa epelewa yamapane yo atalane. Wuaneko, wandakali yangone towa epelewa yamapane yo ata na-piyaini wandakali tupamane Gotena mana tupa nembo natene atoto, wuane na-piyaini. Wandakali-mane yakamana yangone tupa towa epelewa yamapane yo ateakale lo Goteto ataya alane. Wuaneko, wandakali

mindi Gotena andopane gulola-angi, balato Gotena mana tupa andoto, wandakali yangone tupa towa epelewa yamapane yo atalane. Tene okonena, nanimato mindi akali towa epele aka pua yamapane yo atamakale.

⁹⁻¹⁰ Nanimato wamba ini bulupane Gote towa epelewa yamapane yo ata napemane. Jia. Balato wamba ini bulupane nanimota towa epelewa yamapane yo ateapia. Yamapane yo atoto, Goteto nanimata saka atapowa atalapale nembo toto, balana iwanane mindiki okomane nanimana koo tupa apeakale loto, ati kenga atala yuunga epeakale leaipia. Jisasa bala ati kenga atala yuunga epeane okonemane Goteto nanimota towa wayumane wete epelewa yamapane yo atalawane lo andawa leaipia. *

¹¹ Yamapane yene yame, Goteto wuane puato, nanimota towa wayumane epelewa yamapane yo atalawane lo andawa leaipia. Tene okonena, nanimatopi mindi akali towa epele aka pua yamapane yo atapen-pene.

¹² Wambapi, andipapi, wandakali mindikipi mindimane Gote lee-mane anda napiyane tekeko, nanimato mindi akali towa epele aka pua yamapane yo atalamane. Nanimato wuane piyamane okonena, Gote bala nanimota towa atu atoto, nanimato wandakali yangone tupa towa wayumane wete epelewa yamapane yo atalapale loto, ataya alane lo andeyama. *

¹³ Dee, Goteto balana Oli Sipitisa oko nanimota geane mambele, bala nanimota towa atu ateya-kola, nanimota bala towa atu ateyama nembo teyama. *

¹⁴⁻¹⁵ Wandakali mindimane Jisasa bala Gotena Iwanane ateya leando, Gote bala wandakali okone towa atu ateya-kola, wandakali okone bala Gote towa atu atalane. Wamba nanimato andema-kola, balana iwanane Jisasato yuunga wandakali pitaka molo-peke leakale loto, Ayiane Goteto bala ati kenga atala yuunga epeakale leane lo andema. Andoto, balato wuane peane loto, nanimato wandakali waka tupa lamai-yamane.

¹⁶ Balato nanimota towa wayumane epelewa yamapane yoto, wuane peane lo nanimato bilipi leyama. Goteto wandakali tupa towa epelewa yamapane yo atalane okonena, wandakali yangone towa epelewa yamapane yo atalane wandakali oko bala Gote towa atu ateya-kola, Gote bala wandakali okone towa atu atalane.

* **4:1-3:** Mt 7:15-20; 1Jo 2:18; 2Jo 7; 1Tes 5:21-22; 1Ko 12:3

* **4:9-10:** Jo 3:16-17; Lom 5:6-10; 1Jo 2:1-2

* **4:12:** Jo 1:15-18

* **4:4:** Mt 12:28-29; 1Jo 5:1-5

* **4:5:** Jo 8:47; 15:18-19

* **4:13:** 2Ko 1:21-22; 1Jo 3:24

¹⁷ Nanimyuu okona ateyama-angi, Goteto wandakali tupa towa epelewa yamapane yo atalane pua teke, nanimatopi wandakali yangone tupa towa epelewa yamapane yo atemando, matili Goteto wandakali tupa yapa lo tale pulu epolangi, nanimyukuwa atolane tene mindi ata napulu-peya. Wuaneko, matili nanimyuku olomane nembo toto, andipa nanimato wandakali yangone tupa towa wayumane wete epelewa yamapane yo atalapale lo Goteto ataya alane.

¹⁸ Wandakali mindimane kenda-pene mindi nanimyuluane nembo temando, nanimato bala ando yuku alaman. Goteto nanimyuluane kenda-pene mindi gulane nembo temando, nanimato Gote towa wayumane epelewa yamapane yo ata napulu-peyama. Wandakali mindimane nanimyuluane tupa wayumane epelewa yamapane yo ateando, balato kenda-pene mindi nanimyuluane lo nanimyukuwa ata na-piyamane. Goteto nanimyuluane tupa epelewa yamapane yo atalane nembo toto, nanimato bala ando yukuwa ata na-piyamane teke.

¹⁹ Wamba ini bulupane Goteto nanimyuluane epelewa yamapane yo ateane okonena paini nanimato bala epelewa yamapane yo atalamane.

²⁰⁻²¹ Wamba Goteto loo mindi yata wato, Gote towa epelewa yamapane yo atalaini wandakali tupamane wandakali yangone tupa towa epelewa yamapane yo atapepene. Wuaneko, wandakali mindimane balana wandakali yangone tupa leemane andoto teke, utupane towa epelewa yamapane yo ata napeando, balato leemane anda napiyane Gote oko towa katullo epelewa yamapane yo ata napulu-peya. Tene okonena, wandakali mindimane wandakali yangone mindi towa embo wete wato teke, Gote towa epelewa yamapane yo ateyo leando, balato owato pii lola-kola pulupeya.*

5

Nanimato Gotena Andopane Tupa Towa Yamapane Yo Atalamane Leane Oko

¹⁻⁵ Apito yuu okona mana koo tupa sia minalanep. Jisasa bala Gote iwanane ateya lo bilipi lalane wandakali okomane mana koo utupane sia minalane. Jisasa bala Mesaya oko ateya lo bilipi lalamanane wandakali nanimyuluane pitaka Gotena andopane tupa ateyama. Gotena andopane yame nanimyuluane pitaka-mane yuu okona wandakali koo tupa sia minuto, Gote lo bilipi lalamanane. Tene okonena, nanimato Gotena loo tupa wato minalapale nembo toto, balato

kenda-pene mindi nanimyuluane nembo natalamane. Jia. Nanimato Gote towa epelewa yamapane yoto, balana loo tupa wato minaima laka lo nembo talaman. Gote towa epelewa yamapane yo atalamane wandakali nanimyuluane pitaka-mane balana andopane tupa towa epelewa yamapane yo atalamane. Nanimato Gote towa epelewa yamapane yo atoto, balana loo tupa wato minalamane mambele, nanimato balana andopane tupa towa epelewa yamapane yo atalamane nembo teyama.*

Jisasa Towa Atu Atalane Wandakali Oko Saka Atapowa Atolopeya Leane Oko

⁶⁻⁹ Wandakali mindi bala wisanisa mindi atoto, pii mindi leya-kola, balato enene pii leya lo nanimato nembo talaman. Tene okonena, wamba Gote bala wisanisa mindi atoto, pii mindi lea-kola, balato pii enene wete mindi leane lo nanimato nembo tapepene. Gote bala wisanisa mindi atoto, balana iwanane oko andayo pii mindi leane oko loto, Jisasa Kataisa bala ati kenga atala yunga epoto, ipa mialu, matili bala omeangani, balana tundupa kili leane leaipia. Balato ipa molo angu na-epeane. Jia. Balato ipa mialu, omolo epeane. Gotena Sipitisa okomane enene pii oko loto, Jisasa Kataisato wuane peane lalane. Jisasato ipa meane okopi, balana tundupa kili leane okopi, Gotena Sipitisa okomane pii leane okopi, tepo utupane wisanisa atoto, pii mindiki okone teke lalaini.*

¹⁰⁻¹² Wisanisa utupane-mane pii mindi loto, balana iwanane okomane piapipe peane mambele, Goteto nanimyuluane saka atapowa atalapale loto, asini oko lumbu tepa yane lalaini. Gotena Iwanane oko towa atu atu napiyane wandakali oko bala saka atapowa atu napulu-peya tekko, Gotena Iwanane oko towa atu atalane wandakali oko bala saka atapowa atolopeya. Gote bala wisanisa mindi atoto, balana Iwanane okone andayo pii wuane leane lo bilipi nalola wandakali okomane Goteto owato pii lalane lola-kola pulupeya. Gotena Iwanane okone lo bilipi lalane wandakali okomane Gotena wisanisa pii oko ale wato, balana nembo-tenenga yakale atalane.*

Owato Gote Tupa Mawua Atalapape Leane Oko

¹³ Gotena Iwanane oko lo bilipi lalaini wandakali yakama saka atapowa atolopeyama nembo talapale loto, nambato yakamana pepa oko peyo epe leyo.*

¹⁴ Gote bala tane mangene mindi pukale nembo teando, balato wuane napene kondolane lo nanimato yuku aa na-piyamane.

* 4:20-21: Mk 12:29-31 * 5:1-5: 1Jo 4:14-15; Jo 14:15,23-24

* 5:6-9: Jo 1:29-34; 5:32-37; 15:26

* 5:10-12: Ga 4:6;

Jia. Balato wuane peakale lo pote le-mando, balato nanimana pote okone ale wato, wuane pulupeya lo nanimato wayu-mane nembo teyama. *

¹⁵ Tene okonena, nanimato Gote ando pote loloma-kola, Goteto ale olopeya nembo teyama. Wuaneko, balato mangene mindi peakale lo nanimato pote loloma-kola, balato wuane pulupeya nembo teyama.

¹⁶⁻¹⁷ Mana koo tupa pitaka koo tekeko, mana koo minditupa-mane wandakali tupa yuu koo okona peakale lo mo pee laya aa napiyane. Wandakali mindimane mana koo okonepene mindi wato minula-kola, wandakali yangone mindimane balana mana koo okone andoto, pote leando, Goteto wandakali okonena koo okone apoto, bala saka atapowa atekale lo ataya olopeya. Mana koo mindimane wandakali tupa yuu koo okona peakale lo mo pee laya alane. Wandakali mindimane mana koo okone wato minula-kola, Goteto balana mana koo okone apeakale lo yakamato pote lalapale loto, nambato naleyo. *

¹⁸⁻¹⁹ Akali koo Satane balato yuu okona koo piyaini wandakali tupa pitaka bosa lo ando atalane tekeko, nanimma Gotena andopane tupa ateyama nembo teyama. Goteto balana andopane tupa moyo ando ateya-kola, Sataneto utupane minu koya napiyane. Tene okonena, Gotena andopane tupamane mana koo tupa minu atapowa ata na-piyaini nembo teyama. *

²⁰ Nanimato Gote enene oko nembo talapale loto, balana Iwanane oko epoto, nembo-tene epene minditupa nanimma geane nembo teyama. Balato wuane peane okonena, nanimma Gote enene oko towa atu atoto, balana Iwanane Jisasa Kataisa towa atu ateyama. Bala Gote enene oko atoto, wandakali saka atapowa atekale lo ataya alane-ko.

²¹ Nambana andopane yame, yakamato owato gote tupa masia mawua atalapape.

2 JONE

Joneto Pepa Lapone Peyo Pee Leane Oko

¹⁻² Wanda, Goteto nimbapi, nimbana andopane tupapi, yakama pitaka balana yame pitiyapale lata ya-kola, sosa okona akali kawane nambato yakama pitaka wayumane epelewa, yamapanne yoto, yakamana pepa oko peyo epe leyo. Nambapi, wandakali waka minditupapi, nanimato Gotena pii enene oko nembo teyama. Bala nanimana tombenenga atoto, nanimana towa atapowa atolopeya okonena, nanimana pitaka-mane yakama wayumane epelewa, yamapanne yo ateyama.

³ Nanimato Gotena pii enene oko bilipi loto, yakama towa epelewa yamapanne yo ateyama-kola, nanimana Ayiane Gote-la, balana Iwanane Jisasa Kataisana-la, okonelapo-mane nanima ondowa moyoto, nanimana yamapanne mo tambo laya olo-peyapi.

Yangone Tupa Towa Epelewa Yamapanne Yo Atalapape Leane Oko

⁴ Wamba nanimana Ayiane Goteto loo mindi yata wato, yakamato pii enene oko wato minu atalapape leaipia. Wanda nimbana andopane minditupa-mane pii enene okone wato minu atea oko andoto, namba epele wete ewa.*

⁵ Goteto loo waka mindi yata wato, yakamato wandakali yangone tupa epelewa yamapanne yo atalapape leaipia. Tene okonena, andipa nambato wanda nimbana pepa oko peyo epe loto, loo wenene mindi yata naevo. Jia. Nanimana wamba ini bulupane Gotena pii oko ale ema-angi, loo mindi ale ema okone teke nambato dee lapone nimba langulu-peke loto, nanimato mindi akali epele aka pua yamapanne yo atamakale leyo.

⁶ Yakamato loo okone wato minu atalapale loto, Goteto pii okone leane. Yakamato pii okone wamba ini bulupane ale yai okoni. Nanimato wandakali yangone tupa towa epelewa yamapanne yo atemando, nanimato Gotena loo tupa pitaka wato minuluma-kola pulupeya.

Yakamato Kataisana Pii Enene Oko Apolomane, Tika Ando Atalapape Leane Oko

⁷ Anu peakale nanimato Gotena loo utupane wato minu atamakalepe. Wandakali kambua yuu okona epoko pua atoto, wandakali yangone tupa minakasawa atalaini. Utupane-mane Jisasa Kataisa bala nanimana umbaini ateyama okopene

ata napeane lalaini. Wuane lalaini wandakali utupane-mane Kataisa towa yanda pimawuato, wandakali yangone tupa minakasawa, owato pii lalaini.*

⁸⁻⁹ Wandakali mindimane Kataisana pii layene enene oko duli lo mina napene, pii waka mindi wato minu ateando, Gote bala wandakali okone towa atu atu napiyane. Wandakali mindimane Kataisana pii layene enene oko duli lo minu ateando, Ayiane Gote-la, balana iwanane-la, okonelapo bala towa atu atalapele. Tene okonena, yakamato yole epene Goteto yakama gukale leane utupane pitaka mia-makale nembo toto, Kataisana pii enene nanimato yakama langema tupa apolomane. Tika ando atalapape.

¹⁰⁻¹¹ Wandakali mindi yakama atolainga epoto, Kataisana pii layene enene oko yakama langi napene, yakama minakasa wato, pii waka mindi-pene mindi lange-ando, yakamato wandakali okone ando, nimba wayu epeleya leaindo, yakamato balana piapé koo piyane okone moyolai-kola pulu-peyako. Yakamato bala ando wayu epeleya nalene, kondalapape. Yakamato wandakali okonepene tupa moyo, yakama andaka yatawa pali na-piyapape.

Pii Lokoyo Pua Leane Tupa

¹² Nambato pii kambua yakama langulane eya tupa katulo pepanga peyo epe lauwa-yale tekeko, namba yakama ateyaina epoto, yakama towa epelewa, pii lalawa pua atamakale nembo teyo. Wuane nembo toto, nambato pii yakama langulane eya tupa pitaka pepanga peyo epe na-lokale.

¹³ Goteto nimbana akini oko balana yame peteakale lata ya-kola, nimba akini okona andopane tupamane nimba kuai lo pitipe leyai.

* 1:4: 3Jo 2-4 * 1:5: 1Jo 2:7 * 1:7: 1Jo 4:1-3

3 JONE

Joneto Pepa Tepone Peyo Pee Leane Oko

¹ Namba sosa okona akali kawane okomane nambana yamapane yene amene Gayasa nimba pepa oko peyo epe leyo. Nambato nimba towa wayumane epelewa yamapane yo atalawane.*

²⁻⁴ Nambana yamapane yene amene, wamba Kitsene minditupa namba atewanga epoto, nimba Gotena pii enene oko wato minu atoto, pii okonemane pipe leya pua pilini lo namba langeai-kola, namba epele andane wete ewa. Nambana andopane yame tupamane Gotena pii enene oko wato minu ateyai lene oko ale wato, namba epele andane wete alawane okonemane waka minditaka epele alawane tupa pitaka sia minalane. Wandakali utupane-mane wuane leai oko ale wato, nambato nimba tandini oko kuai leya nembo teyo. Wuane pua teke nimba umbaini okopi kuai lola-kola, nimba piape pule tupa pitaka kuai leakale lo nambato pote leyo.*

Nanimato Gotena Piape Akali Tupa Moyo Atamakale Leane Oko

⁵ Nambana yamapane yene amene, nimba Gotena minditupa tupa moyo, piape kuai lo pilini. Nimba wandakali utupanena minditupa wamba lee-mane anda nappee tekeko, nimba wandakali utupanepi moyalene.

⁶ Nimba wandakali utupane moyekola, wandakali utupanena minditupa epoto, nimba utupane towa epelewa yamapane yoto, moyalene lo nanimana sosa oko lamai-yaini. Akali utupane yuu waka mindina moyeekola, nimba mana Goteto epele alane oko wato minuto, akali utupane wayumane moyalu, pulupa leendo, nimba mana epene wete mindi wato minule-kola pulupeya.*

⁷ Anu peakale nambato wuane leyope. Akali utupane-mane Jisasana piape oko pimakale nembo toto, balana pii oko aitene wandakali tupa lamalu peyai wete, aitene wandakali utupane-mane pii lamayaini akali utupane moyo minditaka mindi mai na-piyaini.*

⁸ Tene okonena, nanimato Gotena pii enene oko lamayaini akali utupane towa potomane lo atamakale nembo toto, piape akali utupane moyo, minditaka utupane maipe-pene.

Diyote-pasato Gotena Piape Akali Tupa Moya Napiyane Leane Oko

⁹ Kitsene wandakali tupamane Gotena piape akali tupa moyakale loto, wamba nambato pepa mindi peyoto, sosa okona pee lewa tekeko, akali Diyote-pasa bala tane sosa okona akali kawane atokale nembo toto, nanimana pii oko ale na-alane. Jia.

¹⁰ Balato nanimana ando lamba loto, mana koo minditupa tako pua minalane. Kitsene amene minditupa yuu waka mindisa atalu epeyai-kola, balato akali utupane moyo yatawa pali napiyane. Dee, sosa memba waka mindimane akali utupane moyo yatawa palimakale nembo teya-kola, Diyote-pasato wandakali utupane yatawa palulaini lo asia kando laka piyane. Sosa memba mindimane balana pii tanga loto, Kitsene amene utupane yatawa palea-kola, Diyote-pasato sosa memba okone bala sosa memba ata napene, takita ateakale lo peyo wata alane. Balato mana koo utupane pitaka minalane okonena, matili namba nimba atelenga epewando, wandakali pitakana wenonga nambato balana mana koo minalane utupane pitaka lapana wakale.

Nimbato Mana Epene Tupa Wato Minu Atape Leane Oko

¹¹ Nambana yamapane yene amene, koo piyaini wandakali utupane-mane Gote anda na-piyaini. Tene okonena, wandakali mindimane mana koo mindi mineando, nimba balana mana koo okone wato mina napipe. Jia. Mana epene minalaini wandakali tupa Gotena yame atalaini. Tene okonena, wandakali mindimane mana epene mindi wato minu ateando, nimba balana mana epene okone wato minu atape.*

¹² Wandakali pitaka-manepi, Gotena pii enene okomanepi, nambatopi, nanimana pitaka-mane akali Dimiti-yasa balato mana epene tupa wato minu ateyai leyama okone enene leyai lo nimba nembo tele okoni.

Pii Lokoyo Pua Leane Tupa

¹³⁻¹⁴ Nimbato pii kambua nimba languane eya tupa nimba pepa okona peyo epe lauwa-yale tekeko, pii utupane pitaka pepanga peyo epe na-lokale. Jia. Namba wamba ini nimba atelenga epoto, nimba towa pii lauwa pua atapakale nembo teyo.*

¹⁵ Nimba mini epene palu atape. Nimba towa potomane lo atalaini wandakali wali ateyai tupamane nimba kuai lo atalapape leyai. Namba towa potomane lo atalaini wandakali yuu nimba atele okona ateyai

* **1:1:** Ap 19:29; Lom 16:23

* **1:2-4:** 2Jo 4

* **1:6:** Tai 3:13

* **1:7:** 1Ko 9:12

* **1:11:** 1Jo 3:4-10

* **1:13-14:**

tupa pitaka mindiki-mindiki lo kuai lo ata-
lapa leyo oko nimbato utupane lamaipe.

JUTU

Jututo Pepa Peyo Pee Leane Oko

¹ Namba Jemesa amene Jutu oko. Ayiane Goteto namba ee lo mea-kola, Jisasa Kataisana piape akali nambato yakamana pepa oko peyo epe leyo. Ayiane Goteto yakama towa epelewa yamapane yo ateyakola, Jisasa Kataisato yakama moyo ando atlane.*

² Goteto yakama towa wayumane epelewa yamapane yoto, yakama ondo wete wato, yakamana yamapane mo tambo wete laya yakale lo nambato pote leyo.

Yakamoto Gote Lo Bilipi Leyo Nayu Lala-pape Leane Oko

³⁻⁴ Nambana yamapane yene yame, Goteto nambapi, yakampi, nanima pitaka molo-peke leane okona pii loto, nambato yakamana pepa mindi peyo epe lauwa laka lo nembo tewa tekeko, andipa nambato pii okone kondalu, pii waka mindi loto, pepa oko peleyo. Wamba Goteto bilipi tika-pene oko balana wandakali yakamanga geane. Balato pii okone lawa napulu-peya tekeko, andipa owato Kitisene minditupa teng-a-mane epoto, Kitisene enene yakama towa atu ateyai. Owato Kitisene utupane-mane nanimana akali kawane mindiki Jisasa Kataisa bala akali andane mindi atu naapeya loto, Gote masia mawua atlaini. Utupane-mane Gotena pii oko mo lawa puato, Goteto nanima ondo wato moyalane okonena, nanimato Gotena loo tupa wato mina napene, mana koo tupa wato minemando, okone katu lalaini. Wamba wete Goteto pii mindi leane oko pepa pelene eya mindimane loto, Goteto koo piyaini wandakali okonepene tupa yapa lo tale puato, yole koo mindi utupanenga malupeya layene eya. Owato Kitisene utupane-mane Kitisene enene yakamana bilipi okone minu koyolaini lo yuku eyo. yakamoto yakamana bilipi okone wayumane ando atoto, utupane towa pii yanda pua atalapale lo, nambato yakamana pepa oko wamba kapoyale peyo epe leyo.*

⁵ Yakamoto pii nambato yakama langeyo utupane pitaka nembo teyai tekeko, yakamoto pii utupane dee lapone teke nembo tolopeke lalapale nembo teyo. Nembo tolopeke lalapale nembo toto, nambato yakamana bilipi oko mina ika laya wato, pii utupane dee lapone teke yakama langeyo. Wamba Akali Andane okomane Isatale tane

wandakali tupa molo-peke lea-kola, wandakali utupane Isipi yuu oko tepa alu peaini tekeko, wandakali utupanena minditupane Gote lo bilipi naleai-kola, balato utupane minu koyaepia leyo.*

⁶ Dee, wamba Goteto enjoje tupamane piape peakale lo tale pua maiya-kola, enjoje minditupa-mane piape okone kepa wato, piape waka andane yale mindi pimakale nembo teainga, yakamana atalaini panda okone tepa yainipia. Utupane-mane wuane peai-kola, Goteto sene ende yapowa yalane tupamane enjoje utupane andi leaipia. Wuane pea-kola, enjoje utupane yuu undupi-lene okona andi latane atoto, kote lolane oto oko maliyo ateyai.*

⁷ Dee, enjoje utupane-mane mana koo mineaini pua teke, Sotomopi, Gomotapi, dee tano waka organe mandaka yane tupapi, tano utupanena tane wandakali ateaini tupamane pamuku mana koo waka mindi-pene tupa minuto, akali yangone lapo-lapo mindi pamuku piki pua ateapelebia. Pamuku piki pua ateai-kola, Goteto ita too atene tandaka-pene koo mindimane wandakali utupane yango apeaplia. Mana koo okonepene minalaini wandakali-mane ita too atapowa atene okona yole koo oko molopeyai lo Goteto nanima andawa laya wato, wuane peaipia.*

⁸ Wamba wandakali utupane-mane mana koo utupane minu ateaini pua teke, andipa owato Kitisene yakama towa atu ateyai tupamane mana koo kalato atene tupa minu atlaini. Kombyea-mane wandakali utupanena nembo-tene mina ika leya-kola, utupane-mane mana koo minalaini okonemanekama tanena umbaini oko minu koyalaini. Dee, utupane-mane Gotena pangosa ata napimakale nembo toto, enjoje tii-pene ateyai tupa ando pii koo lalaini.

⁹ Utupane-mane wuane piyaini tekeko, wamba Mosesa omea-angi, enjoje kawane Maikolo balato Satane towa pii yanda puato, Mosesana umbaini oko apito meakalepe lo atete peapelebia. Okone angi, Maikoloto Satane ando, pii koo mindi naleaipia. Jia. Balato Satane lamawuato, Akali Andane oko bala tane nimba laya loto, nimba pii nalene kondaa lolopeya oko leakale leaipia.*

¹⁰ Maikoloto Satane ando pii koo mindi naleane tekeko, owato Kitisene utupane-mane minditaka tene okonepene ya lo anda na-piyaini tupa ando pii koo lalaini. Yia peango tupamane kuai lo nembo natene ato, mana minditupa mee wato minalaini.

* **1:1:** Mt 13:54-56 * **1:3-4:** Ga 2:4-6; 2Pi 2:1 * **1:5:** Ek 12:51; Nam 14:29-30 * **1:6:** 2Pi 2:4 * **1:7:** Jen 19:1-25;
2Pi 2:6,10 * **1:9:** Dan 10:13,21; 12:1; 2Pi 2:11; Lap 12:7; Sak 3:2

Wuane pua teke, owato Kitisene utupane-mane kuai lo nembo natene, mee mana koo minditupa wato minaima laka lo nembo toto, wato minu ateyai-kola, mana koo utupane-mane wandakali utupane minu koyalane.*

¹¹ Wandakali utupane-mane akali Kene okona mana koo mineane oko wato minu atalaini. Dee, utupane-mane akali Belame okona mana koo oko wato minu atoto, muni moyale, mana koo tupa minu atalaini. Dee, wamba akali Kota balato Gotena pii tanga leanga, bala koyaya. Wuane pua teke, andipa Gotena pii tanga lalaini wandakali utupane yakama koyolo-peyai.*

¹² Kitisene enene yakama amunguli puato, Kitisene yangone tupa towa epelewa yamapane yo, tomo no peteyai-kola, owato Kitisene utupane epoto, yakama towa atu tomo no pityaini. No pituto, akali utupane-mane yala naene, yakama tane angu nembo toto, tomo kambua nalaini. Akali utupanena mana koo okonemane Kitisene enene yakama amunguli pua tomo no pityaini mana epene oko minu koyalane. Popo-mane mole tupa mindisa awua puku peya-kola, ole minditupa kingi na-epalane. Mole okonepene tupamane wandakali moya na-piyaini pua teke, owato Kitisene utupane-mane wandakali tupa moya na-piyaini. Dee, ita mindi pini towa lopeyakola, ita okone kapu talane. Kapu teya-kola, dini lulane gii oko epola-angi, ita okonena dini mindi lia napiyane. Wuane pua teke, owato Kitisene utupane yakamanga dini epene mindi lia napiyane. Jia. Utupane dee lapone omene atalaini.*

¹³ Dee, ipa solewata oko taimane epoko puato, minditaka koo guu-pene tupa ipa matene okona yata eya-kola, minditaka koo utupane panakame yalaini. Wuane pua teke, owato Kitisene utupane-mane mana koo guu-pene minditupa wato miniyai-kola, utupanena mana yala-pene utupane panakame yalane. Dee, kaiyanda minditupa-mane ati kenga mindiki ongane teke atapowa ata napene, mindinga ataka piyaini. Wuane pua teke, wandakali utupane-mane bilipi mindiki oko angu lape-pene oko kondoto, bilipi waka-waka tupa lalaini. Koo piyaini wandakali utupane-mane wuane pua atolopeyai nembo toto, Goteto utupane yuu undupilene koo okona atapowa atama peakale loto, yuu koo okone wamba makande pua yaea.

¹⁴⁻¹⁵ Akali Atame okona mandiyene tupana yumbane yanane ateane akali

Inokoto wandakali koo utupane andayo potopesa pii mindi leane oko loto, wua leaipia. Ale alapape leaipia. Nambato andeyo-kola, wandakali minditupa-mane Gote masia maiyu, bala wato minu ata na-piyaini. Jia. Utupane-mane mana koo kambua minuto, Gote ando pii koo lalaini. Wandakali utupane yakama fane mana koo minu ateyama nembo teakale loto, Akali Andane okomane wandakali pitaka yapa lo tale puato, kosimi lokale nembo toto, balana enjole tausene kambua tupa towa epolopeya. Inokoto wuane leaipia.*

¹⁶ Wandakali utupane-mane Gotepi, wandakali waka tupapi, utupane towa epele naene, utupane ando pii koo kambua lalaini. Dee, utupane-mane mana koo mindi mina-makale nembo talaini tupa wato minalaini. Wandakali waka tupamane yakamana nembo-tene oko wato minu atekale loto, wandakali utupane-mane yakama tanena gene tupa laiyu loto, gitisa pii lalaini.

*Yakamana Bilipi Oko Minu Tai Layawa
Atalapape Leane Oko*

¹⁷ Wandakali utupane-mane wuane piyaini tekeko, nambana yamapane yene yame, wamba nanimana Akali Andane Jisasa Kataisana aposolo akali tupamane pii mindi yakama langeai okone andipa yakamato dee lapone teke nembo tolo-peke lalapape.

¹⁸ Wamba aposolo akali utupane-mane yakama languato, yuu gii oko koyo puyale pula-angi, akali minditupa-mane Gote masia mawua atoto, bala lamba loto, mana koo mina-makale nembo tolaini tupa wato minulu-peyai leanipia.*

¹⁹ Andipa Oli Sipitisa oko owato Kitisene utupanenga ata napeya-kola, akali utupane-mane yakama tanena nembo-tene wato minuto, Gotena wandakali tupa wato toko laya alaini.

²⁰ Akali utupane-mane wuane piyaini tekeko, Kitisene enene yame yakamato Gote bilipi leyama nayu lalapale loto, balato bilipi okone yakama geane-ko. Yamapane yene yame, yakamana bilipi okone tai gulekale loto, ole dindi lo yakamato Oli Sipitisa okona tai-lene oko moto, pote lo atalapape.*

²¹ Nanimana Akali Andane Jisasa Kataisato yakama ondo wato, yakama saka atapowa atalapale leakale lo yakama maliyo atolai-angi, Goteto yakama towa epelewa yamapane yo atekale lo atalapape.

* **1:10:** 2Pi 2:12 * **1:11:** Jen 4:7-8; 1Jo 3:12; 2Pi 2:15-16; Nam 16:1-35 * **1:12:** 2Pi 2:13,17-19 * **1:14-15:** Jen 5:18,21-24 * **1:18:** 2Pi 3:3-4 * **1:20:** Kol 2:6-7

²² Wandakali minditupa-mane Jisasa lo bilipi leyama nayu naleyai-ko. Yakamoto utupane ondo wato moyalapape.

²³ Wandakali utupanena minditupa ita too atene yuu koo okona moyale ateyai-ko. Yakamoto utupane ondo wato, wamba ini kapoyale molo-peke lalapape. Wuane tekeko, wandakali utupanena minditupa-mane mana koo kalato atene tupa minu ateyai-kola, utupanena tonia piyaini tupapi kalato atene gülalane. Yakamoto wandakali utupanena mana koo utupane minulumane lo yukuwa atoto teke, utupane ondo wato, moyalapape.*

*Gotena Gene Laiyu Lo Atamakale Leane
Oko*

²⁴ Yakama yuunga peakoto, Jisasa masia maulaini lo, Goteto katulo yakama moyo ando atola-kola, yakamanga koo tene mindi nayolopeya. Nayola-kola, balato katulo yakama lamo atu balana yuu epene okona polopeya. Wuane pula-kola, yakama balana wenonga atoto, epelewa wete olopeyai.

²⁵ Nanimana Akali Andane Jisasa Kataisato piape peane okomane nanimana Gote mindiki angu ateya okomane nanimana molo-peke leane. Bala kinji bulupane atoto, balanga tai-lene andane yalane. Bala minditaka eya tupa pitakana kawane ateya. Wamba balato yuu ati-la yakale nalenenga, bala okonepene ateane. Matilimati lipi, bala okonepene teke mee atapowa atolopeya lo nanimato balana gene oko layu lo atamakale. Enene.*

LAPANA YANE

Kataisato Jonenga Pii Lapana Yane Oko

¹ Wamba Goteto Jisasa Kataisa lamawuato, nambato mangene minditupa kapoyale pulu-peyawa tupa nimbato nambana piape wandakali tupanga lapana aa leaipia. Wuane lea-kola, Jisasa to enjole mindi lamawuato, nimbato nambana piape akali Jone ateyanga poto, mangene utupane balanga lapana aa leaipia.*

² Wuane lea-kola, namba wisanisa mindi atoto, Gotena pii Jisasa Kataisato nambanga lo panawa langeane tupapi, minditaka lee-mane andewane tupapi, utupane pitaka nambato buku okona pepa peyo yata eyo.

³ Goteto mangene minditupa pulupeya leane utupane pulane oto oko mandaka guleya. Tene okonena, Goteto wua pulupeya lo potopesa pii pepa peleyo dii lo andolai wandakali tupapi, pii okone ale alu, wato minulai wandakali tupapi, utupane epelewa atape-pene.*

Joneto Pii Mindi Sosa Yanasa Tupa Lamaiyane Oko

⁴⁻⁵ Namba Joneto Esia potopinjia tane sosa yanasa ateyai wandakali yakamana pepa oko peyo epe langeyo. Goteno pii tika pua lo pana yane akali Jisasa Kataisa oko bala wamba bulupane malinga ika lalu, yuu okona kinji ateyai tupa pitakana Akali Andane wete ateyai. Balana Ayiane Gote wamba wete ateanie, andipapi ateyai, matilipi epolopeya. Jisasa Kataisa okopi, Ayiane Gote okopi, balana pitiyane toko okona mandaka ongane atalaini sипитиса yanasa tupapi, utupane pitaka-mane yakama ondowa moyoto, yakamana mini epene mindi pale laya yakale. Wamba Jisasa to nanima epelewa yamarapane yoto, balana tundupa okomane nanimana koo tupa apeane.*

⁶ Apoto, balato nanima balana Ayiane Gote okona pitisa piape pimayamane yame gulaya yane. Matili-matilipi minditaka bosa lo ando atalane okona tai-lene okopi, gene andane okopi, okonelapo balanga yapowa yolopeya oko yakale. Enene.*

⁷ Matili Jisasa bala mole tupa towa epolakola, wandakali pitaka-mane bala andolopeyai nembo talapape. Bala yandate-mane peleaini wandakali tupamanne bala andolopeyai teke. Yuu okona wandakali yame palu pula tupa pitaka-mane bala

andoto, ai lo yamataka lolopeyai. Pii utupane enene wete.*

⁸ Wamba Akali Andane Gote tai wetete okomane loto, wamba ini bulupane wetete namba atewane. Matilipi, namba atapowa-atapowa atolo-peyawa leaipia. Gote mindiki okone teke bala wamba wete ateane, andipapi ateya, matilipi epolopeya.*

Joneto Jisasa Lee Mane-mane Andene Gulo Andeane Oko

⁹ Namba yakamana Kitisene amene Jone. Yakamapi, nambapi, nanima Jisasa towa yame mindiki ateyama-kola, Goteto nanima moyo ando atalane. Tene okonena, wandakali minditupa-mane kenda-pene kambua nanima geyai-kola, nanimato kenda-pene tupa awua atalamane tekko, nanimato Jisasa nembo toto, kepa naene, piape taimane pua atalamane. Jisasa to wua peane loto, wamba nambato Gotena pii layene oko wandakali tupa lamauwa atewa okonena, gapomane okomane namba andi leane. Andi lea-kola, yanda yene tupamane namba andi lo auwa epoto, ipa solewata andane oko tombenga yuu aŋako Patamosa lene mindi yene okona katapusa pua aindaka leaini.

¹⁰ Wuane peai-kola, Sande mindina Oli Sipitsa oko nambanga epo tumbi lea-kola, nambato pii mindi ale ewa. Ale ewa-kola, biakulu mindimane pii taimane lalane pua, nambana masianesa-tole mindimane pii mindi taimane wete lea.

¹¹ Pii leane okonemane loto, nimbato andele tupa pitaka pepa peyo yata wato, Epesesapi, Semenapi, Pekemamapi, Tayataitapi, Satisapi, Pila-telepiapi, Leyotosiapi, tano utupanena sosa yanasa ateyai utupanenga pee lape leane.

¹² Nambana masianesa pii okone lea-kola, akali pii langeane okone apito langeyape lo namba mopeke loto andewa-kola, lamu yata olane toko golo-mane waapene yanasa tupa tokonga ya-kola andewa.

¹³ Lamu yata olane toko yanasa utupanena tombenenga Akalina Iwanane yale mindi ateanga andewa. Balato tonu luu kenenga puyoko lene mindi puato, matipu golo-mane waa-pene mindi balana kanganuninga pitawa atea.*

¹⁴ Balana kawa itini oko sipisipi itini ake-pene wete, mole ake-pene okopene gulea-kola, balana lene okolapo ita lungu tene gulea.*

* **1:1:** Lap 22:6 * **1:3:** Lap 22:7,10 * **1:4-5:** Ek 3:14-15; Lap 3:1; 4:5; Kol 1:18-20; Sam 89:27 * **1:6:** 1Pi 2:9; Lap 5:9-10; 20:6 * **1:7:** Dan 7:13; Sak 12:10; Mt 24:30; Jo 19:34-37; 1Tes 4:17 * **1:8:** Lap 21:5-6; 22:13 * **1:13:** Dan 7:13; 10:5 * **1:14:** Ese 43:2; Dan 7:9; 10:6; Lap 2:18; 19:12; 14:2-3

¹⁵ Akali mindimane ita andane toto-pene wete mindi yangoto, aene batasa yangeyakola, aene batasa okone nembeiyawe puto, pole-pole piyane. Akalina Iwanane yale mindi ateane oko balana kene okolapo aene batasa okonemane waa-pene gulene atea. Nambato pii balato taimane leane oko ale ewa-kola, ipa andane mindi peakoto, taimane uu kulu lalane pua lea.

¹⁶ Balana kii tika-mane kaiyanda yanasa aitawa ateakola, balana nee asianga bainate yangisa, yangisa-la, lapotakana nene wetete atene mindi apu latane atea. Dee, otonga nai wanga-wanga piyane pua balana lee-inga wanga-wanga pea.*

¹⁷ Wuane pea-kola, nambato bala andoto, yuku-mane omoto, balana kene yane ongane omene tombawua lewa. Tombawua lewa-kola, balato balana kii tika oko nambanga yata wato, nimba yuku olene lea. Wamba Goteto yuu ati-la yakale nalenenga, namba ini bulupane wetete atewane oko atama ipulu, matili wetete namba oma napene, saka atapowa atolo-peyawa.*

¹⁸ Namba saka atalawane akali oko ateyo. Enene, wamba namba omewa tekeko, andipa namba saka atapowa ateyo oko anda. Nambato wandakali omalaini mana oko bosa lo ando atoto, wandakali omene atalaini yuu okona asia lumbulane kii tupa awua atalawane.

¹⁹⁻²⁰ Nimbato andale-kola, nambana kii tika-mane kaiyanda yanasa aitawa atalo tupapi, lamu golo-mane waa-pene yanasa yala tupapi, utupane kokoli mindi andale. Lamu yata olane toko golo-mane waa-pene yanasa andale utupane sosa yanasa ateyai tupa makande pua yala-kola, andale. Kaiyanda yanasa atala-kola, andale utupane sosa yanasa utupanera enjole tupa makande pua atala-kola, andale. Minditaka ya-kola andale utupapi, mangene mindi matili pula-kola, minditaka andolopele tupapi, utupane pitaka nimbato pepanga peyo yata ape. Akalina Iwanane gulene akali okonemane wuane lea.

2

*Epesasa Tano Okona Sosa Ateya Okona
Pepa Peyape Leane Oko*

¹ Wuane lalu, Akalina Iwanane yale ateane okonemane pii mindi leane oko loto, nimbato Epesasa tano okona sosa ateya okona enjole ateya oko pii mindi lamawuato, pepa mindi wua lo peyape lea. Nambana kii tika-mane kaiyanda yanasa aitauba atoto, lamu yata olane toko golo-mane waa-pene yanasa tupana

tombenenga namba puamo nena pua atalawane. Nambato pii oko nimba langeyo.*

² Nambato mana nimbatu minalene tupa andalawane. Nimba tane akali keato mindi atoto, piapetilao pilini. Nimbato akali koo tupa towa embo wete alene. Wamba akali minditupa-mane owato pii loto, utupane yakama tane aposolo akali ateyama leakola, nimbato utupanera pii yapalo tale puto, utupane owato pii lalaini akali ateyai lo andee.*

³ Nimbato namba nembo toto, nambana piapetimane pua atele-kola, wandakali minditupa-mane nimba minu koyalaini tekeko, nimbato kenda-pene okone auwa atoto teke, kepa naene, nambana yame atele lo nimbato andalawane.

⁴⁻⁶ Nimbato mana epene mindi minalene lo nimbato andalawane. Akali koo Nekolaso oko wato minu atalaini wandakali tupa mana koo tupa nimbato embo wete alawane. Nimbatopi wandakali utupanera mana koo utupane embo wete alene lo andoto, nimbato nimbana mana okone epene eyaleyo. Wamba bulupane nimbato namba lo bilipi lee-angi, nimbato nambapi, Kitisene wandakali yangone tupapi, epelewa yamapanre yo atee tekeko, andipa wuane pua teke, nimbato epelewa yamapanre yo atapele okonena, nimbanga koo tene mindi eya. Nimbato mana epene wamba minu atalene okone auwa tepa alu, nimba yuunga peaka-ene atele-ko. Andipa nimbato mana epene okone nembo tolo-peke lalu, yamapanre peke loto, dee lapone mana epene okone minulu-peke lape. Nimbato wuane napene konda eendo, namba nimba atelenga epoto, nimbana lamu yata olane toko oko mo auwa pokale.*

⁷ Mana koo tupa yanda pimawuato, sia minula wandakali okonemane Gotena Patandaisa yuu epene okona wandakali saka atapowa atekale lo ataya alane ita okona dini oko yo neakale lokale. Oli Sipitisa okomane pii okone sosa tupa lamaeya oko wandakali ale asia yene tupamane wayumane ale ape-pene. Akalina Iwanane gulene akali okonemane wuane lea.*

*Semena Tano Okona Sosa Ateya Okona
Pepa Peyape Leane Oko*

⁸ Wuane lalu, Akalina Iwanane gulene akali okonemane pii mindi leane oko loto, nimbato Semena tano okona sosa ateya okona enjole ateya oko pii mindi lamawuato, pepa mindi wua lo peyape lea. Namba wamba bulupane tewa atama

* ^{1:16:} Ip 4:12; Lap 2:12; 19:15 * ^{1:17:} Ais 44:6; 48:12; Lap 2:8; 22:13 * ^{2:1:} Lap 1:16 * ^{2:2:} 1Jo 4:1-3 * ^{2:4-6:} Lap 3:3 * ^{2:7:} Jen 2:9; Lap 22:1-2,19

ipulu, matilipi atapowa atolo-peyawa. Wamba namba omalu, saka atolo-peke lewa. Andipa nambato pii oko nimba langeyo.

⁹ Wandakali minditupa-mane Juta yame ateyama lalaini tekeko, utupane Juta yame enene ata naopeyai. Jia. Wandakali utupane Sataneto yame atoto, nimba andayo lamba lo atalaini. Utupane-mane lamba lo ateyai-kola, nimbanga kenda-pene kambua auwa atoto, nimbanga minditaka naeyakola, nimba koo wete atele lo nambato andeyo. Nimba koo atele tekeko, nimbato namba lo bilipi leyo nayu lo atele okonena, ati kenga nimbana minditaka kambua wete eya. *

¹⁰ Ale ape. Sataneto Kitisene wandakali yakamana minditupa minu mandeke pukale nembo toto, yakama andi loyale peya. Balato yakama andi loto, katapusa anda okona aindaka lola-kola, ole paifasa yakamato kenda-pene andane minditupa auwa atolopeyai tekeko, nimba yuku olene. Nimbato nimbana bilipi oko minatawa atama pulu, nimba omole oto oko ando miape. Wuane pule-kola, nambato petesene mindi nimba mee guato, nimba saka atapowa atola loto, ataya olo-peyawa. *

¹¹ Wuane puluwa-kola, mana koo tupa yanda pimawuato, sia minula wandakali okonemane bala lapone omoto, koya napulu-peya. Jia. Oli Sipitisa okomane pii okone loto, sosa tupa lamaeya wandakali ale asia yene tupamane wayumane ale ape-pene. Akalina Iwanane gulene akali okonemane wuane lea. *

Pekemama Tano Okona Sosa Ateya Okona Pepa Peyape Leane Oko

¹² Wuane lalu, Akalina Iwanane gulene akali okonemane pii mindi leane oko loto, nimbato Pekemama tano okona sosa ateya okona enjoje ateya oko pii mindi lamawuato, pepa mindi wua lo peyape lea. Bainate yangisa, yangisa-la, lapotakana nene wete ataka pene mindi auwa atalawane akali nambato pii oko nimba langeyo.

¹³ Sataneto yuu nimba atalene okone bosa lo ando atalane lo nambato nembo teyo. Wamba akali Andipasa bala yakama towa atu Satane atalane yuu okonena atoto, nambana pii oko tika pua lapanawa atea-kola, Satane yamena wandakali utupane-mane bala peyo ome leaimi. Utupane-mane bala peyo ome leai-kola teke, nimbato okone andoto, namba masia gii nape.

Jia. Nimbato nambana gene oko auwa tepa naene, namba lo bilipi leyo nayu lalene.

¹⁴⁻¹⁵ Nimbato namba lo bilipi leyo nayu lalene tekeko, nimbanga koo tene minditupa eya. Wamba akali Belameto mana koo mindi Beleke mana lamawuato, Isatale tane wandakali tupamane owato gote tupa lo opa mayene tupa nalu, pamuku pua ateakale lo mo piya oyale wua pipe leaipia. Andipa Pekemama tane Kitisene minditupa-mane akali Belamena mana koo okonelapo wato minu atalaini. Wuane pua teke, Pekemama tane Kitisene minditupa-mane akali Nikolasana mana koo tupa wato minu atalaini teke. Wandakali utupane-mane wuane pua ateakale lo nimbato ando konda alene mambele, nimbanga koo tene mindi eya-ko. *

¹⁶ Nimba yamapane peke lape. Nimbato yamapane peke naleendo, namba nimba atelenga wamba kapoyale epoto, nambana nee asianga bainate apu latane ateya okomane wandakali utupane yanda pimauwakale. *

¹⁷ Wandakali mindimane mana koo tupa yanda pimawuato, sia miniando, ati kenga tawe tomo epeane too pitane atene minditupa bala maiyu, nambato ana ake-pene mindi bala mauwakale. Gene wenene mindi ana ake-pene okonena pepa peyatane atola-kola, ana okone mola wandakali okonemane angu gene okone andolopeya. Wandakali waka mindikipi mindimane gene okone anda napulupeyai. Oli Sipitisa okomane pii okone loto, sosa tupa lamaeya oko ale asia yene wandakali tupamane wayumane ale ape-pene. Akalina Iwanane gulene akali okonemane wuane lea. *

Tayataita Tano Okona Sosa Ateya Okona Pepa Peyape Leane Oko

¹⁸ Wuane lalu, Akalina Iwanane gulene akali okonemane pii mindi leane oko loto, nimbato Tayataita tano okona sosa ateya okona enjoje ateya oko pii mindi lamawuato, pepa mindi wua lo peyape lea. Namba Gotena Iwanane ateyo. Nambana lene okolapo ita lungu yale too ateya. Aene batasa pole-pole piyane pua nambana kene okolapo pole-pole piyane. Nambato pii oko nimba langeyo. *

¹⁹ Nambato mana nimbato minalene tupa pitaka andeyawane. Nimbanga kenda-pene minditupa epeya-kola, nimbato namba lo bilipi loto, kenda-pene utupane auwa atalene. Dee, nimbato wandakali yangone tupa towa epelewa yamapane

* 2:9: 2Ko 11:14-15; Lap 3:9 * 2:10: 2Ti 4:8; Jem 1:12 * 2:11: Lap 20:14-15; 21:8 * 2:14-15: Nam 22:1-24:25; 25:1-2; 31:16; 2Pi 2:15-16 * 2:16: Lap 3:11 * 2:17: Ek 16:4,14-15,33-34; Jo 6:47-51; Ais 62:2 * 2:18: Lap 1:14-15

yoto, utupane moyo atalene. Nimbato mana epene minu atele tupamane mana wamba minu atee tupa sia minuto, epene wete eyai.

²⁰ Wuane tekeko, nimbanga koo tene mindi eya. Wanda Jesepeleto potopesa wanda mindi peteyo loto, nambana piape wandakali tupa minakasa wato, owato gote tupa lo opa maiyene minjuni tupa nalu, pamuku pua atekale lo mana lamaiyane. Wanda okonemane mana koo okonelapo nambana piape wandakali tupanga mana lamauiwa peteyea-kola, nimbato bala wuane pua peteakale lo ando konda alene okonena, nimbanga koo tene mindi eya.*

²¹ Wamba wanda okone bala yamapanne peke leakale nembo toto, nambato bala peteakale lo ando kondewa tekeko, balato mee pamuku pua pitukale nembo toto, yamapanne peke na-lokale nembo teya.

²² Tene okonena, nambato wanda okonenga siki mindi epeakale loto, bala siki yene toko okona yakale lokale. Dee, wanda okone towa pamuku pua atalaini akali utupane yakama yamapanne pekeloto, wanda okonena mana koo okone masia mai napeaindo, nimbato kenda-pene andane mindi akali utupanenga peakale lolowa-kola, utupane tandaka andane no atlopeyai.

²³ Nimbato wanda okonena andopane tupa peyo ome lolowa-kola, sosa okona wandakali ateyai tupa pitaka-mane nambato wandakali pitakana mini yamapa-la, okonelapo wayumane wete yapa lo andeya lo andlopeyai. Dee, nambato yakama pitakana mini yamapa-la, okonelapo yapa lo andoto, yakama mindiki-mindiki lo mana minulai pua yole gulupeya lo utupane-mane andlopeyai teke.*

²⁴⁻²⁵ Nimbato wuane pukale tekeko, Tayataita yuu okona ateyai wandakali yakamana minditupa-mane mana koo Jesepeleto wandakali lamaiyane tupa wato mina na-piayini. Dee, yakamato mana koo waka mindi Satanena pii too-pene lalaini oko mia napeaini teke. Tene okonena, andipa yakamato mana epene wato minu atalaini tupa pitaka wayumane wato minu atama pulu, namba epolowa oto okona gäu lalu, nambato kenda-pene waka mindi yakamanga yata na-wakale.*

²⁶ Wandakali mindimane mana koo tupa yanda pimawuani, sia minalu, nambana mana epene tupa wato minu atama pulu, bala saka atalene oto tupa koyo pula gäu okona gäu leando, balato wandakali yame waka tupa bosa lo ando atekale lokale.*

²⁷⁻²⁸ Nimbato wandakali tupa bosa lo ando atola loto, nambana Ayiane okomane piape okone namba geane, wuane pua teke nambato wandakali okonenga piape okone mauluwa-kola, balato wandakali tupa taimane bosa lo ando atlopeyai. Utupanemanne mana koo mindi mineaindo, wandakali-mane sisopene yuu-mane waapene koo mindi peyo pambu lalaini pua, balato wandakali koo utupane minu koyolo-peya. Balato nambana piape okone kuai lo pua atola-kola, yuu waa loyale piyane-angi kaiyanda mindi atalane oko nambato bala mauwakale.*

²⁹ Oli Sipitisa okomane pii okone sosa tupa lamaeyaa oko wandakali ale asia yene tupamane wayumane ale ape-pene. Akalina Iwanane gulene akali okonemane wuane lea.

3

Satisa Tano Okona Sosa Ateya Okona Pepa Peyape Leane Oko

¹ Wuane lalu, Akalina Iwanane yale ateane okonemane pii mindi leane oko loto, nimbato Satisa tano okona sosa ateya okona enjole ateya oko pii mindi lamawuato, pepa mindi wua lo peyape lea. Gotena sipitisa yanasa tupa nambanga ateya-kola, nambana kini okomane kaiyanda yanasa tupa aitawa atalawane. Nimbato pii oko nimba langeyo. Nimbato nimbana mana minalene tupa andalawane. Wandakali-mane Satisa tano tane tupana sosa oko saka ateya lalaini tekeko, nimbato nimbana sosa okona mana tupa andeyo-kola, nimbana sosa okone omene gulene eya leyo.*

² Nimbato andeyo-kola, nimbato mana minalene tupana mindikipi mindi nambana Gote okona wenonga tika-pene wete naeyaa. Wuaneeko, nimbato mana epene wamba wato minu atalene tupana minditupa auwa tepe oyale pele mambele, nimba limu palu atene atele. Nimbato wuane pua atele okone kondalu, ika lo atoto, mana epene utupane wayumane wato minulu-peke lape.

³ Wuane puato, nimbana yamapanne peke loto, nimbato Gotena pii layene epene wamba ale wato mana meene okone nembo tolo-peke loto, wato minu atape. Nimba lee too ata napene, mee limu palu atapowa ateendo, pake nene akali mindi epalane pua, namba epolopeyo. Andoko angi namba nimba atelenga epolopeya lo nimbato anda napulupele.*

* **2:20:** 1Ki 16:31; 2Ki 9:22

* **2:23:** Sam 7:9; Jet 17:10; Lap 20:12-13

* **2:24-25:** Lap 3:11

* **2:26:** Sam 2:8-9

* **2:27-28:** Lap 22:16

* **3:1:** Lap 1:4,16

* **3:3:** Mt 24:43-44; Lap 2:5; 16:15-16; 1Tes 5:1-2

⁴Satisa tano okona sosa ateya okona wandakali yakamana minditupa-mane yakamana tona tupa mo kalato ataya alaini wandakali ata naheyai. Wandakali utupane-mane mana epene tupa wato minalaini mambele, utupane yakama tona ake-pene tupa piyu, namba towa atu epoko pua atolopeyama.*

⁵Wandakali mindimane mana koo tupa yanda pimawuato, sia mineando, nambato balanga wuane pua teke tona ake-pene okonepene mindi mo piya wakale. Mo piya olowa-kola, balana gene oko wandakali saka atapowa atolane tupana gene yalane buku okona pepa peyatane yola-kola, nambato gene okone kunu apia napulu-peyo. Jia. Namba Ayiane okona wenongapi, balana enjoje tupana wenongapi, nambato wandakali okonena gene oko lapana olopeyo.*

⁶Oli Sipitisa okomane pii okone sosa tupa lamaeza oko wandakali ale asia yene tupamane wayumane ale ape-pene. Akalina Iwanane gulene akali okonemane wuane lea.

Pila-telepia Tano Okona Sosa Ateya Okona Pepa Poyo Pee Lamai Leane Oko

⁷Wuane lalu, Akalina Iwanane gulene akali okonemane pii mindi leane oko loto, nimbato Pila-telepia tano okona sosa ateya okona enjoje ateya oko pii mindi lamawuato, pepa mindi wua lo peyape lamaipe: Nambato Gotena mana epene wete tupa kuai lo wato minuto, mana epene wato minukale lalawane tupa enene wete wato minalawane. Nambato pii oko nimba langeyo. Wandakali bosa lo ando atalane tai-lene mindi wamba kinji Dapiti balanga yane oko andipa nambanga eya. Tai-lene okone asia lumbalan kii eya. Nambato asini mindi tuma piyu, loko pelewando, wandakali mindimane asini okone katulo lumbu tepa na-olopeya. Dee, nambato asini mindi lumbu tepa ewando, wandakali mindimane asini okone katulo tuma napulu-peya.*

⁸Nimbanga tai-lene ajako angu eya tekeko, nimbato namba masia gii napene, nambana pii oko wato minu atalene lo nambato andeyo. Nambato nimbana mana epene utupane andoto, nimbato mee wuane pua teke atola loto, nambato nimbana asini lumbu tepa olowa-kola, nimbato mana epene utupane wato minulene loto, wandakali mindimane nimbana asini okone katulo tuma napulu-peya.*

⁹Wandakali minditupa-mane owato pii loto, yakama Juta yame ateyama lalaini tekeko, utupane yakama Juta yame enene jia. Nimbato nambana pii wato minu atolene loto, utupane-mane nimbana asini kando lamakale lo piape pua ateyai okomane wandakali utupane yakama Satanena yame ateyai. Nambato nimba epelewa yamapano yo atalae-ya lo wandakali utupane-mane andeakale lo andawa loto, utupane-mane nimbana kee yolenga epoto, aiki leka yakale lokale.*

¹⁰Wamba kenda-pene minditupa nimbanga epea-kola, nimbato nambana pii oko wato minuto, kepa naene atoto, kenda-pene utupane awua atee. Tene okonena, andipa nambato nimba moyolowa-kola, makandepene mindi yuu yo peya tupa pitakana wandakali tupa makande pulu epoyale peya okonemane nimba minu koya napulu-peya.*

¹¹Namba wamba ini epokale-ko. Kinjimane tangi anda piyaini nimbato molopele oko mindimane molane nembo toto, nimbato nambana piipi, mana epenepi, utupane wayumane wato minu atape.

¹²Wandakali mindimane mana koo tupa yanda pimawuato, sia mineando, balato nambana Gote okona lotu anda oko minu tai laya yakale loto, nambato bala lotu anda okonena anda mau mindi gulaya olopeyo. Wuane puluwa-kola, bala lapone Gotena lotu anda okone tepa alu, kamaka napolopeya. Jia. Matili nambana Gote okomane Jutusaleme wenene oko atti kenga ato epe lolopeya nembo toto, nambato balana tano okonena gene okopi, nambana Gote okona gene okopi, namba tanena gene wenene okopi, gene tepo utupane nambato wandakali okone balanga pepa peyo ate lokale.*

¹³Oli Sipitisa okomane pii okone sosa tupa lamaeza oko wandakali ale asia yene tupamane wayumane ale ape-pene. Akalina Iwanane gulene akali okonemane wuane lea.

Leyotosiya Tano Okona Sosa Ateya Okona Pepa Peyape Leane Oko

¹⁴Wuane Lalu, Akalina Iwanane gulene akali okonemane pii mindi leane oko loto, nimbato Leyotosiya tano okona sosa ateya okona enjoje ateya oko pii mindi lamawuato, pepa mindi wua lo peyape lea. Nambana gene oko Enene lalaini. Namba Gotena wisanisa enene oko atoto, balana pii oko wandakali tupa tika pua lamaiyawane. Goteto minditaka yakale leane

* **3:4:** Ju 23 * **3:5:** Ek 32:32-33; Mt 10:32-33; Lk 10:2; 12:8-9 * **3:7:** Ais 22:22 * **3:8:** 1Ko 16:5-9 * **3:9:** Lap 2:9; Ais 45:14; 49:23; 60:14 * **3:10:** Lk 21:19; 2Ti 2:11-12

* **3:12:** Ais 62:2; 65:15; Lap 14:1; 21:2

tupa pitakana tene oko namba. Nambato pii oko nimba langeyo.

¹⁵ Nimbato nambana pii oko ale naene kondapi-yale, nimba ipa kina-kina pene yale atele lauwa-yale. Nimbato nambana pii oko epelewa wayumane ale api-yale, nimba ipa toto-pene yale atele lauwa-yale. Nimba ipa toto-pene yandopi, ipa kina-kina pene yandopi, okone-lapona mindi atapi-yale, nimbana mana okone katu lapia-yale tekeko, nambato nimbana mana andeyo-kola, nimba toto-pene yandopi, kina-kina pene yandopi, okone-lapona mindi ata napele.*

¹⁶ Nimba ipa toto-pene jia. Nimba ipa kina-kina penepi, jia teke. Nimba okone-lapona tombenenga atele okonena, nambato nimba ipa no pulu lo apiauwa laka lo nembo teyo.

¹⁷ Nimbato nambana pii oko wayumane ale naene kondalene okonena, nimba lee koo atele. Lee koo atoto, Gotena pii oko nimbanga naeya-kola, nimba papata atoto, kopeta wete atele. Wandakali-mane nimba andoto, ondo ape-pene oko nimba tane anda napele. Nimbato okone anda napene, nimbanga munipi, pinjupi, utupane kambua wete eya nembo toto, nimbanga minditaka mindi jia naeya lalene.*

¹⁸ Tene okonena, nambato nimba mana languato, wua leyo: Nimbato kuai lo andokale nembo toto, lene matasini epene nimbana lene okolapona aiya olane oko nimbanga kambape. Nimba papata atele oko wandakali-mane andolai-kola, nimba yala olene. Nimbato tona ake-pene mindi pula nimbanga kambape. Nimbato minditaka kambua yauwa laka lo nembo toto, golo nambato ita-mane yangoto, mo kuai laya ewane oko nimbanga kambape.*

¹⁹ Nambato wandakali mindi epelewa yamapanne yo atewando, nambato bala laiya loto, balana mana tupa mo tika piyawane-ko. Nimbato nambana pii oko epelewa wayumane ale wato, yamapanne wayumane peke lape.*

²⁰ Namba anda asia lombanga atoto, asia lomba peyo geao-geao lo ateyo oko ale ape. Wandakali mindimane nambana pii oko ale wato, asia lumbiando, namba balana andaka kolandaka loto, bala towa atu tomo no pitulu-peyapa.*

²¹ Wamba nambato mana koo tupa yanda pimawuato, sia minalu, andipa namba Ayiane oko towa atu kinji pitiyane toko okona peteyapa. Wuane pua teke, wandakali mindimane mana koo tupa yanda

pimawuato, sia mineando, bala namba towa atu kinji pitiyane toko okona pitipakale epeakale lokale.

²² Oli Sipitisa okomane pii okone sosa tupa lamaeaya oko wandakali ale asia yene tupamane wayumane ale ape-pene. Akalina Iwanane gulene akali okonemane wuane lea.

4

Ati Kenga Ateyai Tupamane Gote Lo Lotu Leaininga Andewa Leane Oko

¹ Matili nambato andewa-kola, ati kenga asini mindi lumba-yene yanga andewa. Okone anggi nambato ale ewa-kola, biakulu mindimane pii taimane lalane pua, pii mindi wamba namba langeane akali okomane dee lapone pii mindi namba languato, mangene Goteto pulupeya tupa nambato nimba andawa lokalenga, nimba kenga onga ipu lea.*

² Okone anggi, Oli Sipitisa oko nambanga epo tumbi lea wete, nambato andewa-kola, ati kenga yuu epene okona kinji pitiyane toko mindi ya-kola, Gote bala toko okonena peteanga andewa.*

³ Gote bala ana gene jasapa lene okola, ana tundupa-pene kaniliane lene okola, ana epene wete okonelapo tii pua yapele wuane pua teke, kinji pitiyane toko okonena peteane Gote okone bala tii wete pea. Ana epene wete emetele lene oko kaka-ene yalane mandilauwa kaka-ene okonepene mindimane kinji pitiyane toko andane oko wata andaka latane ya-kola, nambato andewa.*

⁴ Kinji pitiyane toko waka (24) paipayasa laponga tukumindi tupa kinji pitiyane toko andane okonena yo mapu pua yai-kola, ando atalaini akali (24) paipayasa laponga tukumindi tupa toko utupanena peteai. Akali utupane-mane tona ake-pene tupa puato, yakamana kawanenga kinji-mane piyaini tangi golo-mane waa-pene okonetaka tupa anda pitawa peteai.*

⁵ Kinji pitiyane toko okonena andapangosa atoto, yuu tapale puato, ati kulu lea. Kinji pitiyane toko okonena wenosa-tole ale yanasa too ateaini tupa Gotena sipitisa yanasa tupa ateasinga andewa.*

⁶ Dee, kinji pitiyane toko okonena wenonga ipa angini anjako windowa galasamane waa-pene gulene mindi peteanga andewa. Minditaka saka atene tukumindi tupamane kinji pitiyane toko oko ato mapu bua ateai. Utupanena inisapi, masianesapi, lapotakana lene kambua tene ateai.*

* 3:15: Lom 12:11 * 3:17: 1Ko 4:8-9; Lk 12:21 * 3:18: Ais 55:1; Lap 4:4 * 3:19: 1Ko 11:32; Ip 12:5-6; Lap 2:5
 * 3:20: Jo 14:23-24 * 4:1: Lap 1:1,10 * 4:2: Ais 6:1 * 4:3: Ese 1:28 * 4:4: Lap 3:18 * 4:5: Ese 1:13; Sak 4:2; Lap 1:4-5; 8:5; 11:19; 16:18 * 4:6: Ese 1:5-10,22; 10:14

⁷ Minditaka saka atene ateaini utupanena bulupane oko pusi andane gene layone okonepene gulene mindi atea. Lapone oko yia bulumako andopane yale mindi atea. Tepone okona lee-inga oko wandakalina lee-inga atene yale mindi atea. Tukuni oko eka aiyawe yale mindi yuu lo epoko pua atalane mindi atea.

⁸ Minditaka utupane mindiki-mindiki lo papakane wataka ataka pene atea-kola, utupanena umbaini kengapi, papakane pangosapi, lene kambua wete tene atea. Utulu otongapi utupane-mane oto mo mee ata napene, pii mindi laka puato, Akali Andane Gote balanga tai-lene wetete yene. Bala wamba wetete ateane oko, andipapi atoto, matilipi epolopeya. Bala epene wetete, epene wetete, epene wetete laka peai.*

⁹ Minditaka saka atene tukumindi utupane-mane Kinji pitiyane toko okonena pitiyane Gote saka atapowa atene okona gene oko laiyu loto, balato pitaka taka kuai lo angu piyane loto, bala ando wayu pele laka peai.

¹⁰ Wuane laka peai-kola, ando atalaini akali paiyasa laponga tukumindi utupane-mane kinji pitiyane toko okonena peteane Gote saka atapowa atene okona gene oko laiyu laka piyaini teke. Wuane piki puato, utupane-mane yakamana tangi golo-mane waa-pene tupa ako lo moto, kinji pitiyane toko okona wenosa-tole yata alu, kinji pitiyane toko okona wenosa-tole tombawua laka piyaini.*

¹¹ Utupane-mane loto, Akali Andane, nimba nanimana Gote oko atele. Nimbato minditaka eya tupa pitaka yakale nembo toto, yakale lee-kola, utupane pitaka eya. Tene okonena, utupane pifaka-mane nimba tai-lene wetete atoto, piape kuai lo wetete pilini loto, nimbana gene oko laiyu lape-pene laka piyaini.

5

Joneto Buku Mindi Andeane Oko

¹ Nimbato andewa-kola, kinji pitiyane toko okonena pitiyane Goteto balana kii tika-mane buku mindi minatawa ateanga andewa. Pii minditupa buku okona yangisa-yangisa-la lapotakana pepa peyatane atea. Wandakali mindimane buku okone opimi lolane loto, buku okonena eyaka yanasa-mane tongo pitane atene ya. Wandakali mindimane eyaka utupane tita lolane loto, eyaka utupane ipa wakaiya yale mindimane minu patawa mangua atane atea.*

* **4:8:** Ais 6:2,3; Ese 1:18; 10:12 * **4:10:** Lap 7:10,15; 19:4
Lap 22:16 * **5:6:** Sak 4:10; Jo 1:36; Lap 13:8 * **5:8:** Lap 8:3-4; Sam 14:2

² Nimbato okone andewa-kola, enjole tai mindimane pii taimane wetete loto, ipa wakaiya yale mindimane minu patawa mangua atane ateane tupa laka lalu, eyaka tupa tita loto, buku oko minu opimi lape-pene wandakali epene api ateyape lea.

³⁻⁴ Wuane lea-kola, yuu okonapi, yuu pangosapi, ati kenga yuu epene okonapi, yuu utupanena wandakali epene mindi atolane lo ayia pitete ema-kola, buku okone minu opimi loto, andape-pene wandakali epene mindikipi mindi ata nafea-kola, namba ai lo yamataka lewa.

⁵ Ai lo yamataka lewa-kola, ando atalaini akali utupanena mindimane namba languato, Dapiti yamena mandiyene oko bala Jekopo iwanane Juta yamena layone andane wete atoto, balana yanda-pene tupa yanda pimauwato, sia mineane. Tene okonena, balato ipa wakaiya yale mindimane minu patawa mangua atane yanasa ateaini tupa laka loto, buku oko minu opimi lape-pene akali epene mindiki ateya-ko. Nimba ai lo atele oko ai lo ata napene kondaa lea.*

Sipisipi Andopane Okona Gene Laiyu Leaini Oko

⁶ Wuane lea-kola, nimbato Sipisipi Andopane mindi ika latawa ateanga andewa. Sipitisa yanasa Goteto wamba yuu tupa pitakana peakale leane tupa Sipisipi Andopane okonena lene yanasa ateai-kola, balana kawanenga nene yanasa teke ateai. Wamba wandakali-mane bala peyo ome leaini tekeko, matili bala saka atolo-peke loto, minditaka saka atene tukumindi tupa-papi, ando atalaini akali tupapi, utupanena tombenenga kinji pitiyane toko okona mandaka atea.*

⁷ Gote balana pitiyane toko okona pituto, buku mindi balana kii tika-mane aitawa atea-kola, Sipisipi Andopane okonemane Gote ateanga mandaka poto, buku okone mea.

⁸ Mea-kola, minditaka saka atene tukumindi tupapi, ando atalaini akali (24) paiyasa laponga tukumindi tupapi, utupane-mane Sipisipi Andopane okonena wenonga aiki leka wato tombawua leai. Akali utupane yakama mindiki-mindiki lo disa golo-mane waa-pene mindi-la, gita yale gene apa lene mindi-la, okonelapo aitawa ateai. Ita tua tunduma peakale loto, minditaka yangalaini tupa disa utupanena tumbi latane yane okone Gotena wandakali tupamane pote lalaini tupa makande pua tumbi latane yane.*

⁹⁻¹⁰ Akali utupane-mane sojo wenene mindi loto, pii mindi Sipisipi Andopane

* **5:1:** Ais 29:11; Ese 2:9-10 * **5:5:** Jen 49:9; Ais 11:1,10;

okone lamawuato, wandakali-mane nimba peyo ome leai-kola, nimbanan tundupa epeane okomane wandakali yame wakawaka ateaini tupapi, pii waka-waka lalaini wandakali tupapi, umbaini waka-waka atene wandakali tupapi, yuu waka-waka tane wandakali tupapi, utupane pitakanan wandakali minditupa kambo molo-peke lee leai. Nimbato wandakali utupane kambo molo-peke lalu, wandakali utupane nanimana Gote okona pitisa piape pimaiyaini yame oko gulaya ee. Tene okonena, matili wandakali utupane yakama balana kinji tupa atoto, yuu pitakana wandakali tupa bosa lo ando atolopeyai. Nimbato wandakali utupane moyee mambele, nimbato buku oko moto, ipa wakaiya yale mindimane minu patawa mangua atane ateane tupa laka loto, buku okone minu opimi lape-pene nimba akali epene atele.

Akali utupane-mane wuane lo sonjo leai. *

¹¹ Okone ang i nambato andewa-kola, enjole tausene kambua wetete yuku-pene tupa kinji pitiyane toko okopi, minditaka saka atene tukumindi tupapi, ando atalaini akali tupapi, utupane pitaka ato mapu pua atoto, pii mindi leai-kola, nambato ale ewa. *

¹² Ale ewa-kola, utupane-mane pii mindi taimane loto, wandakali-mane Sipisipi Andopane oko peyo ome leai-kola, balana gene andanepi, tai-lenepi, nembo-tene epenepi, minditaka kambua wetepi, utupane miape-pene. Dee, balato piape kuai lo piyane loto, wandakali-mane balana gene oko laiyu loto, bala ando wayu pele lape-pene leai.

¹³ Wuane leai-kola, minditaka lee tene ati kenga bulu lo mangalane tupapi, yuu okona atalaini tupapi, yuu pangosa paliyane tupapi, ipa solewata okona pitiyaini tupapi, minditaka lee tene Goteto yakale leane utupane pitaka-mane pii mindi leai. Pii leaini okone nambato ale ewa-kola, utupane-mane loto, kinji pitiyane toko okona peteane Gote okola, Sipisipi Andopane okola, okonelapo tai wetete atoto, piape kuai lo wetete pua atalapele nembo toto, matili-matilipi nanimato okone-lapona gene laiyu loto, wayu peyapi lape-pene leai.

¹⁴ Utupane-mane wuane leai-angi, minditaka saka atene tukumindi utupane-mane pii okone enene leai. Enene leai-kola, ando atalaini akali tupamane aiki lekawa tombawua loto, Sipisipi Andopane okola, Gote-la, okonelapo lo lotu leai.

6

Sipisipi Andopane Okomane Ipa Wakaiya Pata Atane Tupa Laka Leane Oko

¹ Okone ang i nambato andewa-kola, sipisipi andopane okomane buku tongo pitane ateane okona ipa wakaiya yale mindimane minu patawa mangua atane yanasa ateane tupana mindi taka lea. Balato wakaiya okone taka lea-angi, nambato ale ewa-kola, minditaka saka atene tukumindi ateaini tupana mindimane nimba ipu lea. Ati kilikulu lalane pua teke, balato pii okone lea. *

² Nimba ipu lea wete, yia osa ake-pene mindi epea-kola, nambato bala andewa. Yia osa okonena masianesa peteane akali okomane yanda mindi aitawa petea-kola, mindimane kinji-mane tangi anda piyaini mindi akali okone maya. Maya-kola, akali okone bala yanda pua sia minulu poto, yanda puato, sia minama pea. *

³ Sipisipi Andopane okomane buku tongo pitane ateane okona wakaiya lapone oko taka lea-angi, nambato ale ewa-kola, minditaka saka atene tukumindi ateaini tupana lapone okomane nimba ipu lea.

⁴ Nimba ipu lea wete, yia osa tundupapene mindi epea-kola, nambato bala andewa. Wandakali-mane yakamana yangone tupa towa kuai lo ata napene, mindi akali peyo ome lekale nembo toto, akali mindimane kandepa luu andane mindi yia osa okonena masianesa peteane akali oko maya.

⁵ Sipisipi Andopane okomane buku tongo pitane ateane okona wakaiya tepone oko taka lea-angi, nambato ale ewa-kola, minditaka saka atene tukumindi ateaini tupana tepone okomane nimba ipu lea. Nimba ipu lea wete, yia osa pombo-tene mindi epea-kola, nambato bala andewa. Yia osa okonena masianesa peteane akali okomane minditaka kenda aki-tupi ateyape lo andalane sekele mindi aitawa petea.

⁶ Aitawa petea-kola, minditaka lee tene tukumindi ateaini tupana tombenenga ateane mindimane pii mindi leane oko loto, wandakali-mane oto mindina yole molai tupa pitaka-mane witi dini kapo mindiki angu yandopi, bali dini kapo tepo angu yandopi, okone-lapona mindi katulo kambolo-peyai. Wuane tekeko, olipi ipanepi, waenepi, utupane kuai lo yakale loto, nimbato minu koya napipe lea-kola, nambato ale ewa.

⁷ Sipisipi Andopane okomane buku tongo pitane ateane okona wakaiya tukuni oko taka lea-angi, nambato ale ewa-kola, minditaka saka atene tukumindi ateaini tupana tukuni okomane nimba ipu lea.

* **5:9-10:** Sam 33:3; 40:3; 96:1; 98:1; Ek 19:6; Ais 61:6; Lap 1:6; 20:6 * **5:11:** Dan 7:10; Ip 12:22 * **6:1:** Lap 4:6; 5:1
* **6:2:** Sak 1:8; 6:1-6

⁸ Nimba ipu lea wete, yia osa ambua-pene mindi epea-kola, nambato bala andewa. Akali mindi osa okonena masianesa petea. Akali okonena gene oko Omene lalaini ya. Omene oko asini pea-kola, akali mindi bala watama pea. Akali okonena gene oko wandakali omene atalaini yuu oko lalaini ya. Okonelapo epeapi-kola, mindimane wandakali peyo ome lolane okona tai-lene oko okonelapo mawuato, liyambato wandakali pitaka yame tukumindi ateakale lo tale puato, kandepa luu tupapi, siki yame wakawaka tupapi, yia kapua yame waka-waka tupapi, ulia nono andane tupapi, utupanemanane yame tukumindi utupanena yame mindiki peyo ome lalapa lea. *

⁹ Sipisipi Andopane okomane buku tongo pitane ateane okona wakaiya yauwini oko takala-angi, nambato andewa-kola, wandakali omene minditupana tandini tupa Gotena alata toko okona pangosa peteaiinga andewa. Wamba wandakali utupanemanane Gotena pii layene epene oko bilipi lo atoto, Jisasato piape wua peane lo wandakali tupa lamauwa ateai-kola, wandakali minditupanemanane utupane peyo ome leainipia.

¹⁰ Wandakali omene utupanena tandini tupamane pii taimane loto, Akali Andane epene wetete, nimba tai-lene wetete atoto, wua pukale lalene tupa enene wuane pilini. Mali ana aki-tupi pola-kola, nimbato yuu okona wandakali tupa yapa lo tale puato, wandakali nanima peyo ome leaini tupanga paini kenda-pene minditupa maulape leai.

¹¹ Wandakali omene utupanena tandini tupamane wuane leai-kola, mindimane tona ake-pene luu minditupana wandakali utupane mindiki-mindiki lo tale pua maya. Maya-kola, balato wua lea: Wandakali koo utupane-manane yakama peyo ome leaini pua teke, Gotena piape piyaini Kitisene yangone minditupana peyo ome lolo-peyai. Wamba Goteto wandakali utupanemanane Kitisene wandakali oko-tuma peyo ome lolopeyai leane okonena giao leakale, yakama mee oto mo mali yo atalapape. Wuane pulai-kola, matili Goteto wandakali tupa yapa lo tale puato, wandakali yakama peyo ome leaini tupanga paini kenda-pene minditupana malupeya lea. *

¹² Sipisipi Andopane okomane buku tongo pitane ateane okona wakaiya watakanne oko takala-angi, nambato andewa-kola, yuu yundukumi andane wetete mindi minea. Yundukumi minea wete, nai oko pombo wetete toto, anda tua iki gulea-kola, ati kenga atalane ana

oko tundupa puato, tundupa-pene wetete gulea. *

¹³ Dee, popo andane wete mindi leyakola, ita pikil dini saka minditupa ondo yuunga tepa alane pua, atinga kaiyanda atlaini tupa yuunga ondo tepa ya. *

¹⁴ Wandakali-manane tulu mindi leka wato, yata alamanne wuane pua teke, Goteto ati kenga yalane oko leka wato, mindisa yata ya-kola, ati kenga yalane oko latakopea. Dee, ati peleya tupapi, ipa angini andane wetete tupana tombenenga yuu yalane tupapi, utupane pitaka lopa alu, yakama yalaini yuu oko tepa alu, mindisa peai. *

¹⁵ Wuane peai-kola, yuu okona kinjipi, gene yene wandakalipi, ami yame akali kawanepi, amangopi, akali tai-lenepi, katapusa piape piyaini akalipi, mee anana atlaini wandakalipi, utupane pitaka palaka poto, ana anda tupana anda-pangosapi, yuu wangianenga ana andane yalane tupa manane masianengapi, utupanena too pua ataeai. *

¹⁶⁻¹⁷ Too pua atoto, wandakali utupanemanane yuu wangianepi, anapi, utupane lamawuato, kinji pitiyane toko okona petene Gote okopi, Sipisipi Andopane okopi, okonelapo-manane nanima towa yataka wato, paini kenda-pene andane tupa nanima gulane oto andane oko ipupakola, apito katulo lee too atolo-peyape leai. Gotena wenonga atoloma-kola, Sipisipi Andopane okomane nanima ando yataka wato, kenda-pene minditupana gulane. Yuu wangianepi, anapi, yakama longo aiya epoto, nanima ombo alapa leai. *

7

Akali Tupana Wenonenga Gotena Maki Ate Leaini Oko

¹ Mangene peaini utupane pitaka pikoyo pea-kola, popo andane mindi lo auwa epea. Epoto, yuupi, ipa solewatapi, itapi, utupane minu koyolane nembo toto, enjoje tukumindi yuu kona tukumindi tupa atoto, popo lo auwa epolane asini tukumindi tupa tuma pitawa ateaiinga andewa. *

² Matili enjoje tukumindi utupanemanane yuu-la, solewata-la, okonelapo minu koyakale nembo toto, wamba Goteto utupanenga tai-lene mayane tekeko, nambato andewa-kola, enjoje waka mindi bala nai epolane ukusane ato epea. Balato Gote saka atene okona gene oko wandakali tupa wenonga ate lalane sili mindi auwa epoto, pii mindi enjoje tukumindi ateaini utupane taimane lamaiya.

* **6:8:** Jet 15:1-3; Ese 5:12,17; 14:21 * **6:11:** Lap 7:9,13; 19:14 * **6:12:** Mt 24:29; Ap 2:20; Lap 8:12; 11:13; 16:18
 * **6:13:** Ais 34:4 * **6:14:** Lap 16:20 * **6:15:** Ais 2:10,19,21 * **6:16-17:** Lk 23:28-31; Jol 2:11; Mal 3:2 * **7:1:** Jet 49:36; Dan 7:2

³ Pii okonemane enjoje utupane lamawuto, wamba ini Gotena piape pimai-yaini akali tupana wenonenga nanimato balana gene oko ate lamakale nembo toto, yakamato yuupi, ipa solewatapi, itapi, utupane wamba ini minu koya na-piyapape lea. *

⁴⁻⁸ Wuane lea-kola, enjoje utupanemanek Jekopo iwanane Jutapi, Lupenepi, Gatepi, Asapi, Napatalipi, Manasapi, Simiyonepi, Lipaipi, Isakapi, Sepulanepi, Josepepi, Benjamenepi, yame alesa utupane pitakana wandakali (12,000) tualo tausene utupanena wenonenga Gotena maki oko ate lamayai. Isatale tane yame wandakali utupane pitaka laa mindiki loto, (144,000) wane andete poti poa tausene wandakali utupane Gotena yame ateyai lo andawa loyale, balana maki oko utupanena wenonga pepa peyo ate lalama leai-kola, ale ewa. *

Gote Lo Lotu Leaini Oko

⁹ Matili nambato andewa-kola, yuu okona umbaini waka-waka atene wandakalipi, pii waka-waka lene wandakalipi, yuu yo peya tupa pitakana tane wandakalipi, yame waka-wakapi, utupane pitakana wandakali kambua epo amunguli peai-kola, dii nalape-pene ateyai. Utupane-mane tona luu ake-pene tupa puato, kinji pitiyane toko okona mandaka atoto, Sipisipi Andopane ateane okona wenonga amunguli pua ateyai. Sipisipi Andopane okone-la, Gote-la, okone-lapona gene laiyu lamakale nembo toto, utupane-mane ita pama yokone tupa aitawa ateyai.

¹⁰ Yokone utupane aitawa atoto, utupanemanek pii taimane loto, nanimana Gote bala kinji pitiyane toko okona peteaya okola, Sipisipi Andopane okola, okonelapo-mane nanima molo-peke leapili leai. *

¹¹⁻¹² Okone ang, ando atalaini akali tuppapi, minditukana saka atene tukumindi tuppapi, kinji pitiyane toko okopi, utupane pitaka ya-kola, enjoje pitaka-mane utupane ato mapu pua atoto, tombawua loto, Gote lo lotu leai. Lotu loto, enene wete, nanimana Gote oko bala tai-lene wetete atoto, kuai lo wetete nembo toto, piape pitaka katulo tika pua piyane leai. Balana gene andane wetete yalane okonena, nanimato bala epele wete wa, balana gene oko laiyu loto, bala ando wayu pele lo atapowa-atapowa atape-pene. Enene. Enjole utupane-mane wuane leai. *

Wandakali Utupanenga Kenda-pene Yane Tupa Koyo Peane Oko

¹³ Okone ang, ando atalaini akali utupanena mindimane namba tipa puato, wandakali tona luu ake-pene pua ateyai utupapi tupape. Utupane ani ato epalaipe lea.

¹⁴ Wuane lea-kola, nambato balana pii okone yano peyoto, akali andane, nimba tane nembo fele okoni lewa. Wuane lewakola, balato namba languato, wandakali minditupa-mane kenda-pene andane kam-bua wandakali utupane mayai-kola, Sipisipi Andopane okona tundupa okomane yakamana tona luu tupa wasa-wasa peleakola, yakamana tona utupane ake wete peane lea. *

¹⁵ Tene okonena, utulu otongapi, wandakali utupane-mane Gotena lotu anda epene wete okona atoto, balana piape pimai-yaini. Bala pitiyane toko okona wenonga atoto, utupane-mane bala lo lotu lolai-kola, kinji pitiyane toko okona pitiyane Gote okomane utupane towa atu atoto, moyo ando atolopeya.

¹⁶⁻¹⁷ Balato wandakali utupanena lenenga ai ipane epola tupa pitaka kunu apia-maulupeya. Wuane pula-kola, kinji pitiyane toko okona wenosa-tole atalane Sipisipi Andopane okomane wandakali utupane moyo ando atolopeya. Balato utupane atu poto, wandakali saka atapowa ateakale lo ataya alane ipa lai yungu epalane yuu okonena giau lola-kola, wandakali utupane-mane tomo ipapi mindi nono naene atolopeyai. Dee, nai toto andane mindimane wandakali utupane minu koya napulu-peya teke. Ando atalane akali okonemane wuane lea. *

8

Sipisipi Andopane Okomane Ipa Wakaiya Pata Atane Yanane Oko Taka Leane Oko

¹ Sipisipi Andopane okomane buku tongo pitane ateane okona wakaiya yanane oko taka lea-angi, ati kenga yuu epene okona pii mindi nalene, kiki-keke ajakopi mindi nalene, mee wete ya-kola, miniti paiyasa tepopi mindi pea.

² Wuane pea-kola, nambato enjoje yanasa Gotena wenonga ateaini tupa andewa-kola, mindimane biakulu yanasa enjoje utupane maya.

³ Okone ang, enjoje waka mindimane ita tua tunduma peakale lo pauta yangalaini pelesa golo-mane waa-pene mindi awua epoto, kinji pitiyane toko okona wenosa-tole alata toko golo-mane waa-pene mindi yane organe mandaka poto atea. Enjole okonemane ita tua tunduma peakale lo yangalaini pauta okone moto, Gotena

* 7:3: Ese 9:4,6; Lap 9:4 * 7:4-8: Lap 14:1-3 * 7:10: Lap 4:10 * 7:11-12: Lap 5:12 * 7:14: Dan 12:1; Mt 24:20-21 * 7:16-17: Ais 25:8; 49:10; Sam 23:2; Lap 21:4

wandakali pitaka-mane pote lalaini tupa pauta okone towa mina mindiki lea. Mina mindiki loto, Gote lo opa mindi alata okonena maiyakale nembo toto, mindimane ita tua tunduma peakale lo yangalaini pauta kambua minditupa enjole okone maya.*

⁴ Balato opa okone maya-angi, enjole okonena kinina tua tunduma-pene ateane okopi, Gotena wandakali tupamane pote lalaini tupapi, utupane Gote peteanga pea.

⁵ Pea-kola, enjole okonemane alata toko okona ita lengane yane tupa moto, tua tunduma peakale loto pauta yangalaini pelesa okone mo tumbi laya wato, yuunga ainena lea. Yuunga ainena lea-kola, yuu tapale puato, ati kulu lalu, yuu yundukumi minu dii-dee lalu, pea.*

Enjole Tukumindi-mane Biakulu Peleaini Oko

⁶ Wuane pea-kola, enjole yanasa tupamane biakulu auwa ateaini utupane biakulu peyoyale makande peai.

⁷ Makande peai-kola, enjole bulupane okomane balana biakulu oko pelea. Peleakola, Goteto kingi apanepi, ita kaiyapianepi, tundupapi, utupane mina mindiki loto, yuunga ainena lea. Yuunga ainena lea-kola, Goteto yuupi, itapi, utupane pitaka wamba tombo peyoto, tale pua tepo peane utupanena yomo mindina tani kaka-enepi, itapi, utupane pitaka ita-mane tokoyo pea.*

⁸ Tokoyo pea-kola, enjole lapone okomane balana biakulu oko pelea. Peleakola, Goteto yuu wangiane andane wetete ita too atene gulene mindi ipa solewata tombenenga auwa tepa ya. Tepa ya-kola, Goteto ipa solewata wamba tombo peyoto, tepo peane utupanena tepone oko tundupa gulea.

⁹ Ipa solewata okone tundupa gulea-kola, minditaka saka atene Goteto ipa solewata pangosa yakale leane utupane tale pua tepo peane utupanena yomo mindi oma yiake leai. Dee, Goteto sipi tupa tale pua tepo pea-kola, sipi utupanena yomo mindi koya yiake leai.

¹⁰⁻¹¹ Sipi utupane koya yiake leai-kola, enjole tepone okomane balana biakulu oko pelea. Peleakola, ita lungu tapata mindimane talane wuane pua teke, kaiyanda andane ita lungu tapeta mindi yuu okona tepa ya. Kaiyanda okonena gene oko matasini kaa-pene lalaini. Kaiyanda okonemane yuu Goteto tombo tepo peleane tupana tombo mindina ipa lai yungalane tupapi, ipa epo pene tupapi, utupanena tepa wato, utupane

mo kaa piya ya-kola, wandakali kambua-mane ipa kaa-pene utupane noto omeai.*

¹² Omeai-kola, enjole tukuni okomane balana biakulu oko pelea. Pelea-kola, Goteto nai oko tale puato, tepo gulaya yane okonena tepone oko mo undupi laya ya. Wuane pea-kola, otonga awa tukumindipi mindi nai lene oko taa naapea-kola, undupi lamangua ya. Wuane pua teke, Goteto ana okopi, kaiyanda tupapi, utupane tale pua tombo tepo puato, utupanena tombo mindi mo undupi laya ya. Undupi latane ateakola, awa tukumindipi mindi ana okopi, kaiyanda tupapi, utupane taa naapea-kola, undupi lamangua ya.*

¹³ Okone ang i nambato andewa-kola, eka aiyawane andane mindi ati kenga yuu lo awua epea. Nambato ale ewa-kola, eka okonemane pii taimane wete loto, enjole tepo mee maliyo ateyai tupamane yakamana biakulu peyolai-angi, kenda-pene andane wete minditupa yuu pitakana wandakali tupanga epola-kola, utupane ondo wetete ape-pene atolopeyai lea.*

9

Enjole Yawini Okomane Balana Biakulu Peleane Oko

¹ Enjole yawini okomane balana biakulu oko pelea-angi, nambato andewa-kola, kaiyanda wamba atinga atalu, yuunga tepa yane mindi yuu okona atea. Ateakola, Goteto yuu kundu koo pango nenanga wete yene okona asia lumbalaini kii oko kaiyanda okonenga maya.*

² Maya-kola, kaiyanda okonemane yuu kundu koo okonena asia lomba oko lumbea. Asia okone lumbaea-angi, wandakali-mane tata andane kambua yangeyai-kola, ita tua andane kambua piyane wuane pua teke, tua andane wetete mindi yuu kundu koo okona atoto, kamaka epea. Kamaka epoto, ati kenga okona kulayoko loto, yame peya mangua ya-kola, nai oko alu puato, undupi lamangua ya.*

³ Wuane pea-kola, temala kambua sia tua andane okonena ato tii lo awua epoto, yuunga peteai. Ana lika-likia mindimane wandakali mindi neya-kola, tandaka andane piyane wuane pua teke temala epo peteaini utupane-mane wandakali tupa nolai-kola, tandaka andane wete yakale loto, Goteto temala utupane minu tai laya ya.

⁴ Balato utupane tai laya alu, utupane lamawuato, yakamato tanipi, itapi, minditaka kaka-ene yuunga ika lalane tupapi, utupanena mindi minu koya na-piyapape.

* ^{8:3:} Lap 5:8; Ek 30:1-3 * ^{8:5:} Pit 16:12; Ek 19:16-19; Lap 11:19; 16:18 * ^{8:7:} Ek 9:23-26; Ese 38:22; Jol 2:30
* ^{8:10-11:} Jet 9:15 * ^{8:12:} Ese 32:7; Lap 6:12-13 * ^{8:13:} Lap 9:12; 11:14 * ^{9:1:} Lap 20:1 * ^{9:2:} Jen 19:28;
Jol 2:2,10; Ek 10:12-15

Jia. Gotena maki oko wandakali minditupana wenonga ata napeya. Yakamoto wandakali utupane angu minu koyalapape lea.
*

⁵ Temala utupane-mane wandakali utupane minu ome leakale nalea. Jia. Balato temala utupane-mane wandakali utupane tandaka andane wete mauwa ana yau atekale lea. Ana lika-likia mindimane wandakali mindi neya-kola, tandaka andane piyane wuane pua teke, temala utupane-mane wandakali utupane nola-kola, tandaka andane wete pulupeya.

⁶ Ana yau utupanena wandakali utupane tandaka andane wete no atoto, omaima lakae lo nembo toto, utupane-mane omolane asini mindi aiya pua atolopeyai tekeko, utupane katulo oma napulu-peyai.
*

⁷⁻⁹ Nambato temala utupane andewakola, wandakali-mane yia osa mindina masianenga pitiyu yanda pulu pokale nembo toto, yia osa mindi makande piyane, wuane pua teke, temala utupane-mane yanda pulu moyale makande pitane atea. Sia umbi aene-mane waa-pene tupamane temala utupanena kangaluane tupa ombo atane ataka pea. Dee, yia osa kambua-mane yanda piyaini katesa kambua tupa yo lo auwa peyai-kola, yakamana kene tupamane taimane limbu lambu lo atalane, wuane pua teke, temala utupanena papakane tupa yapu-yapu andane mindi lo atea. Temala utupanena lee-inga wandakalina lee-inga gulea-kola, utupanena kawa itini tupa wandana kawa itini gulea. Utupanena nene tupa pusi kapua andane layone lene okona nene gulea-kola, utupanena kawanenga kinjimane piyaini tangi golo-mane waa-pene gulene tupa anda pitawa atea.
*

¹⁰ Temala utupanena etene tupa nene atene ya-kola, ana lika-likia tupana etene yale gulea. Wandakali tupa ana yau minu koyo atolane tai-lene oko temala utupanena etene nene atene tupana palea.

¹¹ Yuu kundu koo nenanga wete okona enjole oko bala temala utupanena kinji atalaepia. Iputu pii loto, kinji okonena gene oko Apatone lalaini. Gitiki pii loto, balana gene oko Apalone lalaini. Nanimana pii loto, balana gene oko pitaka taka minu koyalane akali lalamane.

¹² Ana yau pea-kola, kenda-pene andane bulupane okone koyo peane tekeko, kenda-pene lapo matili epolopeya leyo oko ale alapape.

Enjole Watakane Okomane Balana Bi-akulu Peleane Oko

¹³ Enjole watakane okomane balana bi-akulu oko pelea-angi, nambato ale ewakola, Gotena wenonga alata toko golo-mane waa-pene yane okona duni waa pitane atene tukumindi tupana tombenenga atoto, mindimane pii mindi lea.

¹⁴ Pii leane okomane biakulu aitawa enjole watakane ateane oko lamawuato, ipa andane Yuptesha matenenga enjole tukumindi andi latane ateyai utupane nimbato tita lo tepe ape lea.

¹⁵ Wuane lea-kola, enjole watakane okomane enjole utupane tita lo tepe ya. Enjole tukumindi utupane-mane yuu okona wandakali pitaka tale pua yame tepo gulaya wato, yame mindi peyo ome leakale loto, Goteto utupane wamba makande pitane atekale leaipia. Enjole tukumindi utupane makande pitane ateaini tekeko, andi latane atoto, wandakali utupane peyo ome lolane malipi, anapi, otopi, taemepi, utupane epeakale lo mee maliyo atea.
*

¹⁶ Enjole tukumindi utupanena ami yanda yene minditupa yia osa masianenga pituto, yanda piyaini. Nambato ale ewakola, mindimane ami yanda yene utupane dii lo mindiki loto, (200,000,000) miliyone angu andete lapo ateyai lea.

¹⁷ Nambato minditaka andewa utupane pitaka lee mane-mane andene andewakola, yia osa masianenga peteaini akali tupamane singilisa aene-mane waa-pene tupa kala bulupi, tundupa-penepi, ambua-penepi, utupane pitawa peteai. Dee, yia osa tupanakawane tupa pusi kapua andane layone lene tupana kawane yale gulea-kola, ana gene salapa lene ita-mane too atenepi, ita lungupi, ita tuapi, utupane yia osa utupanena nee asianga kamaka epea.

¹⁸⁻¹⁹ Ya osa utupanena etene tupa etulu yale gulea-kola, puya kawane gulene mindi yia osa utupanena etenenga atea. Wandakali minu koyolane tai-lene oko utupanena etenenga ya-kola, utupanena etene-mane wandakali tupa minu koyai. Ana gene salapa lene too atenepi, ita lungupi, ita tuapi, utupane yia osa utupanena nee asianga kamaka epea-kola, wandakali ome lolane tai-lene oko utupanena nee asianga ya. Wuaneko, Goteto wandakali tupa tale puato, yame tepo gulaya ya-kola, yia osa utupanena nee asianga minditaka koo tepo epeane utupane-mane yame tepo ateaini utupanena yame mindi peyo ome leai.

²⁰ Wamba wandakali utupane-mane golopi, silipapi, batasapi, anapi, itapi, utupane moto, owato gote minditupa waa peai. Waa pea-kola, owato gote utupane-mane katulo lee taa napene, pii ale naene, asia puu napene, mee ateaini

tekeko, wandakali utupane-mane owato gote utupanepi, sipitisa koo minditupapi, utupane nanimana gote tupa ateyai lo lotu lalainipia. Wuane peai-kola, yia osa epeaini utupane-mane wandakali yame mindi peyo ome leaini tekeko, wandakali waka mee saka ateaini tupamane yamapane peke naleai. Jia. *

²¹ Wandakali utupane-mane wandakali yangone peyo ome lalaini mana okopi, posini piyaini mana okopi, pamuku piyaini mana okopi, pake mialaimi mana okopi, mana koo utupane masia mai napaei. Jia. Utupane-mane yamapane peke nalene, mana koo utupane mee wato minu teke ateai.

10

Enjole Mindimane Buku Mindi Jone Maya-kola, Balato Okone Mo Neane Oko

¹ Okone ang i nambato andewa-kola, enjole tai-lene waka wete mindi ati kenga ato yuunga epea. Mole mindi balana toni pitane atea-kola, balana kawanenga mandilauwa mindi ya. Enjole okonena lee-inga nai-lene, tii wetete pea-kola, balana kene okolapo anda keyo lapo ita too atene yale gulea.

² Balana kene tikasa-tole ipa solewata okona tokonga kee atoto, kene koyasa-tole yuu okona kee atea. Balana kinina buku anjako minu opimi layene mindi aitawa atea.

³ Buku okone aitawa atoto, pusi kapua andane layone lene tupamane taimane njili-njili lalane pua balato pii taimane lea-kola, ati kulu yanasa leane tupamane balana pii okone yano peyoto, pii leai.

⁴ Pii leai-kola, nambato utupanena pii tupa pepanga peyoyale pewa tekeko, ati kenga ato pii mindi leane okomane loto, ati kulu yanasa lala tupamane pii lalai tupa nimbatu pepa peya napene, wamo piyu kondaa lea. *

⁵ Wuane lea-kola, kene mindi ipa solewata okona tokonga kee atoto, kene mindi yuu okona kee ateane enjole andewane okomane balana kii tika oko ati kenga aiyu loto, wua lea: *

⁶⁻⁷ Ati okopi, ati kenga minditaka eya tupapi, yuu okopi, yuu okona minditaka eya tupapi, solewata okopi, solewata andapangosa minditaka eya tupapi, utupane pitaka yakale leane Gote saka atapowa atene okona gene oko loto, nambato pii enene wetete mindi yakama langeyo lea. Wamba Goteto balana piape pimai-yaini potopesa akali tupa lamawuato, matili nambato piape mindi pukale leane tekeko,

pii okone mee too pitane yaepia. Andipa enjole yanane okomane balana biakulu oko peyola-angi, Gote bala mee maliyo atapowa ata napene, piape matili pukale leane okone enene pulupeya. Enjole okonemane wuane lea. *

⁸ Enjole okonemane wuane lea-angi, nambato ale ewa-kola, mindimane ati kenga atoto, pii mindi namba wamba langeane okonemane dee lapone teke pii mindi namba langea. Pii okone namba languato, kene mindi ipa solewata okona tokonga kee atoto, kene mindi yuu okona kee ateya enjole okomane buku mindi minu anga layene aitawa ateya okone molo puu lea.

⁹ Molo puu lea-kola, nambato enjole okone ateanga poto, nimbato buku anjako okone namba gii lewa. Gii lewa-kola, balato buku okone namba languato, nimbato buku oko mo naa. Nole-kola, nimbana nee asianga buku oko iya tende piyane wuane pua tende pulupeya tekeko, nimbana ininga kaa pulupeya lea. *

¹⁰ Wuane lea-kola, nambato enjole okonena kinina yane buku anjako okone mo newa. Newa-kola, nimbana nee asianga iya tende piyane wuane pua tende peane tekeko, buku okone no goae lewa-angi, nimbana ini anda-pangosa kaa pea.

¹¹ Okone ang i, mindimane namba languato, nimba lapone potopesa akali mindi atoto, kinji kambua tupapi, yuu waka-waka tanepi, umbaini waka-waka atene wandakalipi, pii waka-waka lalaini wandakalipi, utupane ando pii Goteto nimba langeya tupa nimbato wandakali utupanenga lamaipe-pene lea.

11

Akali Lapo-mane Gotena Pii Oko Lolo-peyapi Leane Oko

¹ Okone ang i, mindimane minditaka tupa tombo mialane kalango yale mindi namba guato, nimba ika lalu, Gotena lotu anda andane okona poto, wandakali aki-tupi bala lo lotu leyaipe lo dii lape lea. Dii lalu, Gotena lotu anda andane okola, alata toko okola, okonelapo andane anu-pene eyape lo andoyale tombo mia. *

² Okonelapo tombo mia leyo tekeko, lotu anda andane okona kamakasa-tole ende pitane ateya okona anda-pangosa ama mindi eya oko nambato wandakali yame waka tupa maewa-ko. Nimbato ama okone andane anu-pene eyape lo tombo mia napene kondape. Wandakali yame waka tupamane Gotena tano epene wete okona wandakali

* **9:20:** Lap 16:9,11; Sam 115:4-7; 135:15-17; Dan 5:23 * **10:4:** Dan 12:4,9 * **10:5:** Lo 32:40; Dan 12:7 * **10:6-7:** Emo 3:7 * **10:9:** Ese 2:8; 3:1-3 * **11:1:** Ese 40:3; Sak 2:1-2

tupa yanda pimawuato, sia minalu, tano okone ando atolai-kola, ana (42) paiyasa tukumindinga lapo polopeya.*

³ Nambato nambana pii oko lo pana alapele akali lapo minu tai laya olowa-kola, akali okonelapo-mane nambana pii oko lo panawa atolapi-kola, ole (1,260) wane tausene tu andete sikitu tupa polopeya. Okonelapo-mane nambana pii oko lo panawa atolapi-angi, okonelapo-mane tonu wandakali-mane mini kendawa piyaini okonepene mindi pulu-peyapi lea.

⁴ Akali okonelapo yuu palu peya tupa pitakana Akali Andane okona wenonga atoto, ita olipi lapo, lamu lapo, okonelapo ateyapi.*

⁵ Akali okone-lapona yanda-pene wandakali tupamane akali okonelapo minu koyamakale nembo teaindo, akali okonelapo-mane liyambana nee asianga ita lungu kamaka epeakale loto, wandakali utupane too koyo peakale lolo-peyapi.*

⁶ Akali okonelapo-mane Gotena pii oko lo panawa atolapi-angi, kingi na-epeakale loto, ati kenga asini tuma pulane tai-lene oko liyambanga yolopeya. Dee, ipa epo pola tupa mo tundupa piya olane tai-lene oko akali okone-laponga yolopeya. Dee, akali okonelapo-mane kenda-pene waka-waka tupa yuu okona wandakali tupa maipakale nembo tolapi pua teke, wandakali utupane minu koyolane tai-lene oko akali okone-laponga yolopeya teke.*

⁷ Tai-lene utupane akali okone-laponga yolopeya tekeko, akali okonelapo-mane Gotena pii oko wandakali tupa lamai koyo pulapi-angi, yia kapua mindi-pene mindi yuu kundu koo nenanga wetete okona atoto, kamaka peakaiyu lo epoto, akali okonelapo yanda pimawuato, sia minalu, peyo ome lolopeya.*

⁸ Yia kapua okonemane akali okonelapo peyo ome lola-kola, akali okonelapo omoto, tano andane okona asia tenenga mee oma-yene yolo-peyapi. Wandakali minditupamane pii kokoli loto, tano andane okonena gene oko Sotomo yandopi, Isipi yandopi, lalaini. Wamba akali okone-lapona Akali Andane oko bala tano andane okonena atea-kola, wandakali-mane bala ita malamandanga peyo yuku yaini.*

⁹⁻¹⁰ Akali okonelapo omolapi-kola, yuu waka-waka tanepi, umbaini waka-waka atene wandakalipi, pii waka-waka lalaini wandakalipi, wandakali yame waka-wakapi, utupanera minditupamane akali

omene okonelapo andoto, wandakali waka mindimane akali okonelapo mali peakale lo ando konda napulu-peya. Jia. Potopesa akali okonelapo-mane wamba kenda-pene minditupa yuu pitakana wandakali tupa mauwa atalapili nembo toto, utupanemanne akali okonelapo wayu omalapi ya lo epele olopeyai. Epele wato, yakama tanena minditaka yolaini minditupa wandakali yangone mindi mai-mai pua atolai-kola, ole tepo pola-kola, ole tukuni okona taeme tualo kiloko giao lolopeyai.

¹¹ Ole tukuni okona taeme tualo kiloko giao lola-kola, Goteto wandakali saka ataya alane popo mindi potopesa akali okone-laponga poo lo aindaka lola-kola, akali okonelapo ika lo atolo-peyapi. Ika lo atolapi-kola, wandakali minditupa-mane okonelapo andoto, yuku-mane omolopeyai.*

¹² Okone angi, potopesa akali okonelapo-mane ale olapi-kola, mindimane ati kenga atoto, pii taimane akali okonelapo lamawatu, liyamba ati kenga onga ipulupa lolopeya. Wuane lola-kola, potopesa akali okonelapo mole mindina pitiyu, ati kenga polapi-angi, okonelapo towa yanda-pene akali tupamane andolopeyai.*

¹³ Okone angi teke, yuu yundukumi andane wetete mindi minula-kola, Goteto tano okone wamba yapu loto, paiyasa gulaya yane okonena yapu-lene paiyane oko yuu yundukumi minula okonemane minu koyolo-peya. Yuu yundukumi minula okonemane wandakali (7,000) tausene yanasa tupa peyo ome lola-kola, wandakali mee saka atolai tupamane yuku-mane omoto, ati kenga atalane Gote okona gene oko laiyu lolopeyai.*

¹⁴ Kenda-pene andane lapone okone koyo peane tekeko, kenda-pene andane tepone oko wamba kapoyale epolopeya lo andalapape.*

Enjole Yanane Okomane Balana Biakulu Peleane Oko

¹⁵ Enjole yanane okomane balana biakulu oko peleane-kola, ati kenga ateaini tupamane pii taimane wetete loto, andipa nanimana Akali Andane Gote-la, balana Mesaya okola, okonelapo-mane yuu yoo peya tupa pitaka bosa lo ando atolo-peyapi. Akali Andane oko bala kinji atapowa atolopeya leai.*

¹⁶ Wuane leai-kola, wandakali ando atalaini akali (24) paitasa laponga tukumindi Gotena wenonga yakamana kinji pitiyaini

* **11:2:** Lk 21:23-24; Lap 13:5 * **11:4:** Sak 4:3,11-14 * **11:5:** 2Sa 22:9; Sam 97:3 * **11:6:** 1Ki 17:1; Ek 7:17-20;
1Sa 4:8 * **11:7:** Dan 7:21; Lap 12:17; 13:7; 17:8 * **11:8:** Lk 13:34 * **11:11:** Ese 37:5,10 * **11:12:** 2Ki 2:11
* **11:13:** Lap 6:12; 16:18 * **11:14:** Lap 9:12 * **11:15:** Ek 15:18; Sam 10:16; Dan 2:44; 7:14

tokonga peteaini tupamane aiki lekawa tombawua loto, Gote lo lotu leai.

¹⁷⁻¹⁸ Lotu loto, utupane-mane bala lamawuato, Akali Andane Gote tai wetete, wamba nimba atene, andipapi atele leai. Wamba aitene wandakali tupamane yataka wete wato, yuu okona wandakali tupa minu koyaka piki pua atea. Wuane tekeko, Andipa nimbato yataka wato, wandakali koo utupane minu koyape-pene oto oko epo eya-kola, nimbato nimbana tai-lene andane oko tane moto, pitaka taka tewa bosa lo ando atele okonena, nanimoto nimba wayu pele leyama. Wandakali omene tupa yapa lo tale pipe-pene oto oko epo eya-kola, nimbato nimbana piyaini potopesa akali tupapi, nimba yuku amawua atalaini wandakali tupapi, nimbana wandakali gene yenepi, nayenepi, utupane pitaka yole epene mindi maipe-pene oto oko epo eya teke. *

¹⁹ Ati kenga ateaini tupamane wuane leai-kola, Gotena lotu anda ati kenga atene okona asia lumba-yene ya-kola, Gotena mawua pii ana laponga peyatane palene bokisa oko lotu anda okonena andapangosa yanga andewa. Okone angi, yuu tapale pua, ati tula loto, kili kulu lea wete, yuu yundukumi minea-kola, kingi apane kambua epea. *

12

Joneto Puya Andane Mindi-la, Wanda Mindi-la, Andeane Oko

¹ Okone angi, kokoli andane mindi ati kenga mo pana wato, wua pea: Wanda mindimane nai oko balana tona pitawa petea-kola, ana oko balana kene pangosa atea. Kinji-mane tangi anda piyaini pua teke, wanda okone balana kawanenga kaiyanda alesa ateaini tupa balana tangi anda pitawa petea.

² Wanda okone bala andopane manduyale pituto, masia pelea-kola, bala tandaka andane noto, taimane ala lea. *

³ Wanda okonemane ala lea-angi, kokoli waka mindi teke ati kenga panakame peane oko wua pea: Puya andane tundupa-pene kawane yanasa atene mindina kawanenga nene paiyasa atea-kola, kinji-mane tangi anda piyaini okonetaka yanasa balana kawane yanasa tupana tangi anda pitane atea. *

⁴ Wamba Goteto ati kenga kaiyanda ateya tupa tombo peyo tepo pea-kola, puya okonena etene okomane tombo mindina kaiyanda tupa yoo lo moto, utupane

yuunga auwa ainena lea. Wuane piyu, bala wanda andopane manduyale peane oko peteanga pea. Wanda okonemane andopane mindi mandula-angi, puya okonemane andopane okone nokale nembo toto, wanda okonena wenosa-tole maliyo ya. *

⁵ Puya okonemane andopane okone nokale lo maliyo ya-kola, wanda okonemane iwana mindi mandeane tekeko, wamba Goteto iwana okone makimi loto, matili balato muli aene-mane waa-pene mindi auwa atoto, yuu okona wandakali yame palu pula tupa pitaka bosa lo ando ateakale leaipia. Tene okonena, puya okonemane iwana okone nolane nembo toto, mindimane iwana okone baini kapoyale mo auwa poto, Gotena pitiyane toko yane okona mandakanga yata yaepia. *

⁶ Wuane pea-kola, wanda okone bala wandakali napalene yuu mindina palaka pea. Wanda okone bala ole (1,260) wane tausene tu andete sikitu tupa yuu okonena peteakale nembo toto, Goteto wanda okonena pitulane panda mindi makande peaiapia. Makande piyu, balato wandakali minditupa lamawuato, yakamoto bala moyo tomo maiki piyapape leaipia.

⁷ Wanda okone bala yuu okonena peteakola, enjole Maikolo lene okopi, balana enjole tupapi, utupane-mane puya andane oko yanda pimawua ateai-kola, puya andane okopi, balana enjole koo tupapi, utupane-mane enjole utupane paini yanda pimawua atea. *

⁸ Utupane-mane yanda pimawua ateaini tekeko, Maikolopi, balana enjole tupapi, utupane-mane yanda pua sia mineai-kola, puya andane okonepi, balana enjole koo tupapi, utupane ati kenga atolane panda mindi ya nafea.

⁹ Puya andane gene Satane lene okone bala wamba wetete ateaiapia. Balana gene mindi wandakali pitaka kosimi lalane akali oko lene. Balato yuu pitakana wandakali pitaka minakasa alane. Bala ati kenga atolane panda mindi ya nafea-kola, enjole Maikolo lene okopi, balana enjole tupapi, utupane yakama ati kenga atoto, puya andane okopi, balana enjole koo tupapi, utupane yuunga auwa ainena leainipia. *

¹⁰ Wuane peai-kola, mindimane ati kenga atoto, pii taimane wete loto, utulu otongapi, Satane bala nanimana Gote okona wenonga atoto, nanimana Kitisene amene imalini tupa kosimi loto, utupanenga koo

* **11:17-18:** Sam 110:5; Lom 2:5; Lap 20:11-13; Sam 115:13

* **11:19:** Ip 9:4; Lap 8:5; 15:5; 16:21 * **12:2:** Mai 4:10

* **12:3:** Dan 7:7 * **12:4:** Dan 8:10 * **12:5:** Ais 7:14; 66:7; Sam 2:9; Lap 19:15

* **12:7:** Ju 9 * **12:9:** Jen 3:1,14;

Lk 10:18-19; 22:31; Lap 20:2-3

tene yata alane tekeko, andipa Gotena enjole tupamane bala yuu okona auwa ainena leaini lea. Andipa nanimana Gote oko bala nanimana kinji atoto, piape taimane puato, nanima molo-peke lea. Balato gene andane mindi Jisasa Kataisanga mawuato, bala Mesaya oka ateakale lata wato, pitaka taka bosa lo ando atolane tai-lene oko bala maiyepia.*

¹¹ Maya-kola, nanimana Kitisene amene imalini tupamane saka atamakale nembo toto, Satane towa yanda pimawua atolane mana oko konda nayai. Jia. Goteto utupane molo-peke lea-kola, utupane-mane omolomane lo yuku naene, Gotena pii oko wandakali tupa lamauwu atoto, sipisipi andopane okona tundupa okomane Satane sia miineai.

¹² Tene okonena, ati kenga nimbapi, ati kenga atalaini tupapi, yakama epele alapape. Yamamoto epelewa atape-pene tekeko, wamba Satane bala ati kenga ato, yuu okona epoto, ee ana ajalapo angu balana piape koo tupa katulo pua atolopeyawa ya lo nembo toto, yataka wete eya. Yataka wete wato, balana piape koo tupa pua atola-kola, ipa solewata okopi, yuu okopi, liyambanga kenda-pene andane minditupa epolopeya nembo toto, liyamba ondo ape-pene atolo-peyapi. Mindimane ati kenga atoto, wuane lea.*

¹³ Enjole tupamane puya okone yuunga auwa ainena leaini okone angi, balato iwana mandeane wanda oko taimane watama pea.

¹⁴ Taimane watama pea-kola, puya okonemane wanda okone minu koyolane nayuto, Goteto wua nembo teaipia: Wanda okone bala wandakali napalene yuu okona poto, mali teponga ana wataka pitulakola, mindimane bala moyo tomo neakale mauwa ateakale nembo tea. Wuane nembo toto, wanda okone balana pitulane panda okonena moyale bulu lo auwa peakale loto, Goteto eka aiyawee andane mindina papakane lapo bala maya.*

¹⁵ Ipa lii mindi epoto, wanda okone auwa pola-kola, bala omeakale nembo toto, puya okonemane wanda okonena masianesa atoto, ipa kambua wete miangu tangua gae lo apea.

¹⁶ Puya okonemane ipa kambua wete miangu tangua gae lo apeane tekeko, Goteto wanda okone moyoto, yuu oko anga laya yakkola, ipa andane puya okonemane miangu tangua gae leane okone yuu pangosa pea.

¹⁷ Ipa okone yuu pangosa pea-kola, puya okonemane wanda okone towa yataka-

mane omea. Wanda okonena andopane waka tupamane Gotena loo tupa wato minu atoto, pii Jisasato leane tupa wandakali waka tupa lamauwu ateai-kola, puya okonemane yataka wato, utupane yanda pimal peia.*

¹⁸ Poto, bala ipa solewata matenenga ya.

13

*Joneto Pusi Kapua Andane Wete Mindi
Andeane Oko*

¹ Okone anggi nambato andewa-kola, pusi kapua andane wete mindi ipa solewata okona pangosa paliyu, kamaka epea. Pusi kapua okonena kawane yanasa ateakola, Gote ando lamba lene gene mindi balana kawane yanasa utupanena pepa peyatane atea. Balana kawanenga nene paiyasa ateakola, utupanena mindiki-mindiki lo kinjimane tangi anda piyaini okonetaka mindi anda pitane atea.*

² Pusi kapua nambato andewane okone bala pusi kapua andane wete gene leptata lene okonetaka guleane tekeko, balana kene tupa piango anatope andane wete gene bea lene okona kene gulea. Balana nee asia oko pusi kapua andane wete gene layone lene okona nee asia gulea. Pusi kapua andane wete okone bala epea-kola, puya andane okomane bala tanena tai-lene okopi, gene andane okopi, kinji piape piyane okopi, utupane tale puato, minditupa pusi kapua andane okone maya.*

³⁻⁴ Puya okomane balana piape piyane tai-lene oko tale puato, minditupa pusi kapua andane wete okone mayane mambele, wandakali-mane puya okone lo lotu leai. Wamba akali mindimane pusi kapua andane wete okona kawane yanasa ateane tupa mindi kandepa luu mindimane yoko ya-kola, tete koo mindi peaipia. Tete koo mindi pea-kola, bala omape-pene guleane tekeko, matilibalana tete koo andane peane okone panju peyoto, mee gulea. Mee guleakola, yuu okona wandakali pitaka-mane moko loto, pusi kapua okone watama poto, bala lo lotu loto, bala towa akali api katu lenepe. Apito bala yanda pimawuato, katuloi sia minulu-peyape leai.*

⁵ Puya okomane balana piape piyane tai-lene okona minditupa pusi kapua andane wete okonenga maiya-kola, ana (24) paiyasa laponga tukumindi balato bala tanena gene oko laiyu loto, Gote lamba leakale lo Goteto ando konda ya.*

⁶ Wuane lea-kola, pusi okonemane Gote lamba loto, Gotena gene okopi, ati kenga

* **12:10:** Jop 1:11; Sak 3:1 * **12:12:** Ais 44:23; 49:13 *
12:3; 17:3,7-12 * **13:2:** Dan 7:4-6 * **13:3-4:** Lap 17:8

* **12:14:** Dan 7:25; 12:7 * **12:17:** Lap 11:7 * **13:1:** Lap
* **13:5:** Dan 7:8,25; 11:36; Lap 11:2

yuu epene bala atalane okopi, yuu okonena atalaini tupapi, utupane pitaka ando lamba teke lea.

⁷ Pusi okonemane nambana wandakali tupa yanda pimawuato, sia mineakale lo Goteto ando konda wakale lea teke. Wuane lea-kola, pusi okonemane pii wakawaka lene wandakalipi, umbaini wakawaka atene wandakalipi, yuu pitakanana wandakali yame waka-waka palu peya tupapi, utupane pitaka bosa lo ando atolane okona tai-lene oko mea. *

⁸ Balato tai-lene okone mea-kola, yuu okona wandakali kambua wete-mane bala lo lotu lolopeyai. Wamba wete tewa Goteto yuu ati-la yakale lea-angi, balato wandakali minditupa saka atapawa atolopeyai loto, utupanena gene tupa Sipisipi Andopane okona bukunga peyo yata yaepia. Matili wandakali-mane Sipisipi Andopane okone peyo ome leaini. Balana buku okonena gene pelene wandakali utupanemanne angu pusi kapua andane wete okone lo lotu nalolalo-peyai. *

⁹⁻¹⁰ Utupane-mane bala lo lotu nalolai-kola, pusi kapua andane wete okonemane wandakali tupa bosa lo ando atoto, wandakali utupanena mindi katapusa pupe-pene leando, Goteto wandakali okone bala katapusa peakale lo ando kondolo-peya. Pusi okonemane wandakali mindi kandepa luu-mane yokowa ome lape-pene leando, balato lolane pua mindimane bala kandepa luu-mane yokowa ome leakale lo Goteto ando kondolo-peya. Pusi kapua andane okona piape akali tupamane mana koo utupane minulai-angi, Gotena wandakali tupamane Gote lo bilipi leyo nayu loto, kendapene utupane awua atape-pene. Ale asia yene wandakali-mane pii oko wayumane ale ape-pene. *

Joneto Yia Kapua Mindi-pene Mindi Andeane Oko

¹¹ Okone angi nambato andewa-kola, yia kapua mindi-pene mindi yuu pangosa palyu kamaka epea. Balana kawanenga nene lapo ateane okonelapo sipisipi andopane tupana kawanenga nene atalane okonepene guleane tekeko, pii leane oko puya andane wete tupamane pii taimane lalaini pua lea.

¹² Yia kapua okone bala pusi kapua andane wete oko towa atu ateapi. Wamba mindimane pusi okonena kawane yanasa ateane utupanena mindi kandepa luu andane mindimane yoko ya-kola, bala omape-pene guleane tekeko, matili balana tete peane okone panju peyoto, mee gulea. Yia

kapua okonemane pusi okona tai-lene oko moto, yuu okopi, yuu okona wandakali palu peya tupapi, utupane-mane pusi okone lo lotu leakale lo mo laya ya.

¹³ Wandakali tupamane balana tai-lene oko andeakale nembo toto, yia kapua okonemane metekolo piape andane mindipene-mindipene tupa puato, ita kaiyapiane tupa ati lipinga ato yuu okona epeakale lea. *

¹⁴ Goteto ando konda ya-kola, yia kapua oko bala pusi andane wete okona wenonga atoto, metekolo piape pua ateane tupamane yuu okona wandakali tupa minakasa ya. Utupane minakasa wato, balato utupane lamawuato, wamba mindimane pusi oko kandepa luu mindimane yokowa ome lea-kola teke, bala saka atolo-peke lea okoni. Andipa yakamato pusi kapua okonema gene oko laiyu loyale, bala yale minditaka mindi makande pua waa piyapape lea.

¹⁵ Wuane lea-kola, utupane-mane pusi kapua okonema gene oko laiyu loyale, bala yale minditaka mindi makande pua waa peai-kola, yia kapua okonemane pusi kapua yale minditaka waa peaini okone lo lotu nalolai wandakali tupa omeakale nembo teaipia. Wuane nembo toto, yia kapua okonemane pusi kapua yale minditaka waa peaini okonemane pii leakale loto, saka ataya ya-kola, balato wuane peakale lo Goteto ando konda ya.

¹⁶⁻¹⁸ Goteto ando konda ya-kola, yia kapua okonemane wandakali gene yenepi, nayenepi, amangopi, tipiapi, katapusa piape piyainipi, mee anana atalainipi, wandakali utupane pitakana kii tika okonga yandopi, wenonenga yandopi, okone-lapona mindinga (666) sikisa andete sikiti sikisa namba oko pepa peleakale lea. Namba okone kokoli mindi guloto, pusi kapua andane wete okona gene oko makande pua ya. Pusi okonema 666 namba okone wandakali mindinga pepa peyatane ata naapeando, wandakali okone balato minditaka mindi katulo kamba napulu-peya. Dee, wandakali-mane balana minditaka mindi katulo kamba napulu-peyai teke. Pusi kapua andane okona 666 namba okone akali mindina gene oko kokoli mindi makande pene eya. Wandakali nembo-tene epene palene okonemane 666 namba okonemane akali api makande pua leyape lo wayumane nembo tape-pene. *

14

Sojo Wenene Mindi Leaini Oko

* ^{13:7:} Lap 11:7 * ^{13:8:} Sam 69:28; Lap 17:8; 20:12-15; 21:27 * ^{13:9-10:} Jet 15:2; 43:11; Lap 14:12 * ^{13:13:} Mt 24:23-24; 1Ki 18:24-39; Lap 19:20 * ^{13:16-18:} Lap 14:9-11; 16:1-2; 20:4

¹ Okone angi nambato andewa-kola, Sipisipi Andopane oko bala Sayone wangiane okona atea-kola, wandakali (144,000) andete poti poa tausene tupa bala towa atu atea. Sipisipi andopane okona gene okola, bala ayianena gene okola, okonelapo wandakali utupanena wenonga gene peyatane atea.

²⁻³ Goteto wandakali (144,000) andete poti poa tausene utupane angu wamba bulupane kambo mea-kola, utupane yakama kinji pitiyane tokopi, minditaka saka atene tukumindi tupapi, ando atalaini akali tupapi, utupanena wenonga atea. Ongane atoto, utupane-mane sojo wenene mindi leaini tekeko, wandakali waka mindikipi mindimane sojo wenene okone katulo mana mia napeai. Nambato ale ewa-kola, ati kenga atoto, sojo leaini okone ipa andane mindi peakoto, oo kulu laa apowa lalane pua utupane-mane sojo laa apowa leai. Ati kulu taimane lalane pua teke, utupane-mane sojo taimane leaini oko wandakali kambua-mane gitu kuai lo peyalaini okonepene gulea. *

⁴ Utupane yakama Sipisipi Andopane okola, Gote-la, okone-lapona wandakali yame wamba bulupane kambo mene atoto, Gotena Sipisipi Andopane okone watama palaini. Akali utupane yakama wanda towa pali napene, yakama patane ilili pene atoto, kalato atene ata na-piyaini.

⁵ Utupane-mane owato pii na-lalaini teke. Jia. Wandakali utupanenga koo tene mindi nayalane.

Enjole Tepo-mane Pii Leaini Oko

⁶ Okone angi, nambato enjoje waka mindi andewa. Yuu okona pii waka-waka lene wandakalipi, umbaini waka-waka atene wandakalipi, yuu tupa pitakana wandakali yame waka-waka tupapi, utupane pitaka Gotena pii layene epene yapowa yalane oko lamauwayale, enjoje okone ati kenga yuu lo epoko pua atea.

⁷ Yuu lo epoko pua atoto, balato pii taimane loto, wamba Goteto yuupi, ati ken-gapi, ipa solewatapi, ipa lai yunganepi, utupane pitaka yakale leane lea. Andipa balato wandakali yapa lo tale pulane oto oko wamba mandaka guleya-ko. Yakamato balana gene oko laiyu loto, lotu lalapape lea.

⁸ Wuane lea-kola, enjoje waka mindi epea. Enjole lapone okonemane enjoje bulupane epeane oko watama epoto, wamba Bapilone tano andane okona tane wandakali tupamane pamuku pua atea lea. Utupane-mane wuane pua

atoto, yuu waka tupa pitakana wandakali tupamane mana koo okone wato mineakale lo mo piya ya-kola, Goteto yatakawa atea. Goteto yatakawa ateane okone ipa waene okonetaka gulea-kola, yuu yoo peya tupa pitakana wandakali tupamane Gotena yataka ene oko nape-pene guleane okonena, tano andane Bapilone okone koyaepia. Enene, tano okone wetete koyaepia. Enjole lapone okonemane wuane lea. *

⁹⁻¹⁰ Wuane lea-kola, enjoje waka mindi epa. Enjole tepone okonemane enjoje lapo akali wamba epeapili okonelapo watama epoto, pii taimane loto, wandakali minditunga-mane pusi okonena kokoli pitane namba (666) sikisa andete sikit sikisa oko yakamana wenonga yandopi, kininga yandopi, okonelapo mindina pepa peyatane atekale lolopeya lea. Utupane-mane wuane loto, pusi kapua andane wete okola, bala yale minditaka waa peaini okola, okonelapo lo lotu lolopeyai. Wandakali mindimane wuane peando, Goteto wandakali okone towa yataka olane oko ipa waene tai koo okonepene gulolo-peya. Ipa waene tai okonetaka gulene okone ipa enene towa mina mindiki nalene, Goteto balana yataka ene okone kapo mindina gae lola oko wandakali okonemane nolopeya. Wandakali okone bala Gotena enjoje epene wetete tupapi, Sipisipi Andopane okopi, utupanena wenonga atolai-kola, ana salapa lene itamane too nembeyawé pua atola okomane bala tola-kola, bala tandaka andane koo wete no atolopeya. *

¹¹ Wandakali-mane pusi okonena kokoli pitane namba (666) sikisa andete sikit sikisa oko yakamanga peyatane atekale lalu, pusi kapua andane wete okola, bala yale minditaka waa peaini okola, okonelapo lo lotu leaindo, utulu otongapi utupane-mane katulo oto mia napulu-peya. Jia. Wandakali utupane tandaka no atapowa atekale lo ita too atapowa atola-kola, ole dindi lo ita tua oko ati kenga polopeya. Wuane pula-kola, wandakali utupane yakama tandaka no atapowa atolopeyai. Enjole tepone okomane wuane lea. *

¹² Wuaneeko, matili kenda-pene okonepene tupa Gotena wandakali tupanga epolopeya nembo toto, wandakali utupane-mane Jisasa lo bilipi loto, Gotena loo tupa wato minuto, Kitisene tai wete atape-pene. *

¹³ Okone angi nambato ale ewa-kola, ati kenga ato pii mindi leane okomane loto,

* **14:2-3:** Lap 1:15; 5:9-10; 7:4-8; 19:6; Ais 42:10 * **14:8:** Ais 21:9; Jet 51:7,8; Lap 17:1-2; 18:2-3 * **14:9-10:** Lap 13:12-18; 16:19; 20:10; 21:8; Jen 19:24; Sam 75:8; Ais 51:17,22; Jet 25:15-16; Ese 38:22 * **14:11:** Ais 34:10 * **14:12:** Lap 13:9-10

nimbato pepa mindi wua lo peya: Andi-papi, matili-matilipi, Akali Andane oko bilipi loto, omolai wandakali tupa epele ape-pene lea. Wuane lea-kola, Oli Sipitisa okomane loto, wandakali utupane omolai-angi, mana epene minalaini tupa utupanenga yapata polopeyai lea. Wandakali utupane yakama piape ayiawa pua atalaini tupa tepe alu, oto mo atolo-peyaiko. Wandakali utupane epele wete ape-pene. Oli Sipitisa okomane wuane leya oko pepa peya lea.

Tomo Nape Yane Tupa Mandulane Oto Epeane Oko

¹⁴ Okone angi nambato andewa-kola, nanimu yuunga akali ateyama okonepene mindi mole ake-pene mindina tokonga petea. Akali okone balana kawananga kinji-mane piyaini tangi golo-mane waapene mindi anda pitawa atea-kola, balana kinina kandepa luu nene atene mindi aitawa petea.*

¹⁵ Petea-kola, Gotena lotu anda ati kenga atalane okona atalu, enjoje waka mindi-mane kamaka epote, mole okonena peteane akali okone pii taimane lamawuato, yuu okona tomo tupa nape yaa yiake leyako. Andipa tomo mandulane oto oko epo eya-kola, nimbana kandepa okomane tomo utupane yokowa mandi lea.

¹⁶ Wuane lea-kola, mole okona tokonga peteane akali okonemane balana kandepa luu aitawa peteane okomane yuu okona tomo nape yane tupa yokowa manda.

¹⁷ Mandea-kola, enjoje waka mindi ati kenga lotu anda okona atalu, kamaka epeane oko bala kandepa luu nene atene mindi aitawa atea teke.

¹⁸ Ita too atene oko bosa lo ando atalane tai-lene oko enjoje waka okonenga yane. Bala Gotena alata toko okona mandaka atalu epote, enjoje mindi kandepa luu nene atene aitawa ateani okone pii taimane lamawuato, yuu okona getepe eyaka tupana dini tupa nape eya-ko. Nimbato nimbana kandepa nene atene okonemane getepe ene tupa yoka wato, getepe tupa mo amunguli pii lea.*

¹⁹ Wuane lea-kola, enjoje okonemane balana kandepa luu okomane yuu okona getepe ene utupane yoka wato, getepe tupa mo amunguli puato, getepe dini ipane penge lalaini yuli andane mindina aindaka lea. Getepe dini ipane penge lalaini yuli andane okone Gotena yataka ene oko towa makande puato, pii kokoli mindi wuane lea.

²⁰ Yuli andane okone tano okona kamaka ya-kola, mindimane getepe ipane

penge loto, getepe dini utupane ango tele lea. Wuane pea-kola, getepe ipane oko tundupa peakoto, yuli andane okonena pitu tumbi wete loto, kamaka epea. Epoto, yuu amonga wetete kilomita (300) andete tepopi mindi lua auwa pea. Tundupa epo tumbi lo pitu maka lama-lama peane okonemane wandakali tupana manenga pitu, lita pea.*

15

*Enjole Yanasa-mane Kenda-pene Yanasa
Wandakali Tupanga Mauwayale Ateaini
Oko*

¹ Okone angi, ati kenga kokoli andane waka mindi-pene mindi pea-kola, nambato okone andoto, moko andane lewa. Nambato andewa-kola, enjoje yanasa kenda-pene yanasa teke wandakalinga maulane tai-lene oko ya. Kenda-pene utupane wandakali tupanga epola-angi, Gotena yataka ene oko koyo pula-kola, matili kenda-pene waka mindi utupanenga naepolo-peya.

² Dee, Nambato andewa-kola, ipa sole-wata angini gulene mindi andewa oko ita lungu too atene okola, galasa-la, okonelapo mina mindiki lene gulea. Wamba wandakali minditupa-mane pus kapua andane wete okola, bala yale minditaka waa peaini okola, okonelapo yanda pimawuato, sia mineai. Sia minuto, balana gene okona kokoli pitane namba (666) sikisa andete sikiti sikisa oko mia napulu-peyama, jia leai. Wuane lalu, utupane ipa solewata galasa gulene okonena matenenga atoto, gitu gulene minditaka apa lene Goteto utupane mayane tupa aitawa ateai.

³ Wuane pua atoto, wandakali utupane-mane Sipisipi Andopane okola, Gotena pi-ape akali Mosesa-la, okone-lapona sonjo oko loto, Akali Andane Gote, nimbanga tai-lene tupa pitaka eya-kola, nimbato piape andane tupa pitaka kuai lo wete pilini leai. Nimba wandakali yame palu peya tupa pitakana kinji atoto, pii enene oko wato minuto, mana epene tika-pene tupa minu atalene.*

⁴ Akali Andane, nimbana piape epene tika-pene tupa panakame eya-kola, wandakali yame palu peyai tupa pitaka-mane nimba lo lotu lolololo epolopeyai. Nimba angu Gote epene wetete atele. Tene okonena, wandakali pitaka-mane nimba ando yuku anguato, nimbana gene oko laiyu lolopeyai. Wandakali utupane-mane wuane lo sonjo leai.*

⁵ Wandakali utupane-mane sonjo okone lokoyo peai-angi, nambato andewa-kola,

* 14:14: Dan 7:13 * 14:18: Jol 3:13 * 14:20: Ais 63:3; Lap 19:15 * 15:3: Ek 15:1; Sam 139:14; 145:17 * 15:4:

Jet 10:6-7; Sam 86:9 * 15:5: Ek 38:21

Gotena pii lapana yane lotu anda sele-mane pene okona lumu epene wetete ati kenga atene oko lumbapiane ya. *

⁶ Kenda-pene yanasa teke wandakalinga maulane tai-lene yene enjoje yanasa tupa lotu anda okonena atalu, kamaka epeai. Utupanena tona kalato ata napene, tii-pene wete tupa puato, matipu golo-mane waapene tupa yakamana kangaluninga pitawa ateai.

⁷ Gote saka atapowa atene okona yataka ene oko disa golo-mane waapene yanasa tumba latane atea-kola, minditaka saka atene tukumindi tupana mindimane disa yanasa utupane auwa epoto, enjoje yanasa epeaini utupane disa mindiki-mindiki lo maya.

⁸ Maya-kola, sia tua kambua peane okomane Gotena tii-pene okola, tai-lene okola, okonelapo makande puato, balana lotu anda okona tumba latane atea-kola, mindimane anda okonena katulo kolandaka nalape-pene gulea. Jia. Enjole yanasa tupamane kenda-pene yanasa teke wandakali tupanga mai koyo pulai-kola, matili kolandaka lamakale loto, mali yo atape-pene gulea. *

16

Gotena Yataka Ene Oko Disa Yanasa Tupa Peteane Oko

¹⁻² Okone anggi, nambato ale ewa-kola, Gotena lotu anda okona atoto, mindimane enjoje yanasa tupa pii taimane lamawuato, yakama poto, Gotena yataka ene disa yanasa tupana peteya oko yuu pitakana gae lalapape lea. Wuane lea-kola, enjoje bulupane okomane poto, Gotena yataka ene balana disa okona peteane oko yuu pitakana gae lea. Gae lea-kola, wandakali wamba pusi kapua andane wete okona kokoli pitane namba (666) sikisa andete sikiti sikisa oko yakamana umbaininga pepa peyatane atekale lalu, bala yale minditaka waa peaini oko lo lotu leaini utupane pitakana umbaininga tete guu-pene koo wete tupa pea. *

³ Wuane pea-kola, enjoje lapone okomane Gotena yataka ene balana disa okona peteane oko ipa solewata okona gae lea. Gae lea-kola, ipa solewata okona wandakali omene tupana tundupa yale gulea. Wuane pea-angi, ipa solewata okona minditaka ema-pene pitiyane tupa pitaka oma yiake leai. *

⁴ Enjole tepone okomane Gotena yataka ene balana disa okona peteane oko ipa epo

pene tupapi, ipa lai yungalane tupapi, utupanena gae lea-kola, ipa utupane pitaka tundupa gulea.

⁵⁻⁶ Okone anggi, nambato ale ewa-kola, ipa tupa bosa lo ando atalane enjoje okomane Gote lamawuato, Gote nimba wamba wetete atene, andipapi atele teke lea. Wamba wandakali koo tupamane nimbanwa wandakali tupapi, potopesa akali tupapi, utupane peyo ome leai-kola, utupanena tundupa oko gae lea. Tene okonena, wandakali koo utupane-manetundupa nape-pene ateai-kola, nimbatoma epene tika-pene oko wato minuto, utupane yapa lo tale puato, utupane-manetundupa neakale maele. Nimbatomo wuane pele okonena, nimba Gote epene tika-pene oko atele lo andeyo. Enjole okonemane wuane lea.

⁷ Wuane lea-kola, mindimane alata toko okona mandaka atoto, pii mindi leane oko loto, Akali Andane Gote tai-lene wetete nimbatoma epene tika-pene oko wato minuto, wandakali tupa yapa lo tale puato, pii enene oko lalene lea. *

⁸ Wuane lea-angi, enjoje tukuni okomane Gotena yataka ene balana disa okona peteane oko nai lene okona gae lea-kola, Goteto nai okomane wandakali koo tupa yangeakale lo ando konda ya.

⁹ Ando konda ya-kola, nai toto andane wetete peane okomane wandakali tupa yango kapu teane tekeko, utupane yakama yamapanpe keke naleai. Jia. Utupane-manekenda-pene utupane bosa lo ando atolane okona tai-lene yene Gote okona gene oko laiyu nalene kondoto, bala ando lamba leai. *

¹⁰ Lamba leai-kola, enjoje yauwini okomane Gotena yataka ene balana disa okona peteane oko pusi kapua andane wete okona pitiyane toko okona gae lea. Balato Gotena yataka ene oko gae lea-angi, yuu koo mindi pusi kapua andane wete okonemane ando ateane oko undupi lamangga ya-kola, pusi okonemane ando ateane wandakali tupa yakama tandaka andane wete noto, yakama tanena ekene no tango peai. *

¹¹ Wandakali utupane tandaka andane neaini tekeko, utupane yakama yamapanpe keke naleai. Jia. Utupane-manekoo mineaini tupa masia mai napene, yakamanga tete peane tupapi, tandaka neaini tupapi, utupane nembo toto, ati kenga atalane Gote oko ando lamba leai.

¹² Lamba leai-kola, enjoje watakane okomane nai epalanesa atalaini kinji tupana epolane asia wapukale nembo teaplia.

* **15:8:** 1Ki 8:10-11; 2Tem 5:13-14; Ais 6:4 * **16:1-2:** Ek 9:10; Lap 13:12-18 * **16:3:** Ek 7:17-21 * **16:7:** Sam 19:9;

Lap 15:3 * **16:9:** Lap 9:20-21 * **16:10:** Ek 10:22; Ais 8:21-22

Wuane nembo toto, balato Gotena yataka ene balana disa okona peteane oko ipa epo pene andane Yupotesa okona gae lea-kola, ipa epo palane andane Yupotesa okone tee pea. *

¹³ Okone angi, nambato andewa-kola, puya andane okopi, pusi kapua andane okopi, owato potopesa akali okopi, utupanena nee asianga sipitisa koo monge gulene tepo kamaka epeainga andewa.

¹⁴ Sipitisa koo utupane-mane katulo metekolo piape mindipene-mindipene tupa pua atea. Gote tai-lene wetete okomane wandakali tupa yapa lo tale pulu epolanganji, yuu pitakana kinji tupamane yanda pulu epeakale nembo toto, sipitisa koo utupane-mane kinji utupane pitaka mo amunguli pulu peai. *

¹⁵⁻¹⁶ Pulu, Sipitisa koo utupane-mane kinji utupane pitaka lamo atu poto, yuu mindina amunguli peai. Yuu okonena gene oko Iputu pii loto, Amaketone lalaini. Sipitisa koo utupane-mane kinji utupane mo amunguli peaini tekeko, Akali Andane okomane loto, pake mialane akali epalanane wuane pua teke namba epokale lea. Wandakali mindi bala papata atola-kola, wandakali yangone mindi epoto, bala andando, bala yala olopeya. Wandakali mindimane yala olowane nembo toto, utulu limu pali napene, balana tonia piyane tupa mandaka ongane yakale leando, namba epolowa-angi, wandakali okone bala epele olopeya lea. *

¹⁷ Okone angi, enjole yanane okomane Gotena yataka ene balana disa okona peteane oko ati kenga ato gae lea. Balato Gotena yata ene oko gae lea-angi, Gotena lotu anda andane okona anda-pangosa kinji pitiyane toko ongane mandaka atoto, pii mindi taimane wete loto, kenda-pene andane yanane oko epolane oto oko ipupia lea.

¹⁸ Wuane lea-kola, yuu tapale puato, ati kulu lea-angi, yuu yundukumi andane wetete mindi minuto, yuu oko dii-dee lea. Wamba bulupane tewa wandakali yuu okona palu atea-angi atoto, ipapo wato, andipa ateyama okona giao loto, yuu yundukumi andane wetete mineane onkopepe mindi wamba mina naapeaipia. *

¹⁹ Yuu yundukumi andane wetete mineane okonemane wandakali yame pitakana tano tupa koyaya. Okone angi, Goteto Bapilone tano andane okona tane wandakali tupana mana koo tupa nembo

tolo-peke lea-kola, balato utupane towa yatakawa ateane oko ipa waene kapo pene mindina peteane okone towa mandeke pene petene gulea. Utupane-mane balana yataka ene okone neakale loto, yuu yundukumi andane okone mineakale lea-angi, utupanena Bapilone tano andane okone tale pua yapu lo tepo pea. *

²⁰ Yuu yundukumi andane wetete okone minea-kola, yuu wangianepi, ipa angini andane tupana tombenenga yuu ailene yane tupapi, utupane pitaka latako pea. *

²¹ Latako pea-kola, kingi apane andane wetete mindiki-mindiki lo epeane utupanena kenda-pene oko laisa beke andane lapona kenda-pene sia minuto, andane wetete epea. Kingi apane utupane ati kenga ato epoto, wandakali tupa peyote, minu koya-kola, Goteto kingi apane andane epeakale leya loto, wandakali utupane-mane bala ando lamba leai. *

17

Pamuku Wanda Okomane Yole Koo Mindi Meane Oko

¹⁻² Okone angi, disa yanasa aitawa ateaini enjole yanasa utupanena mindi bala namba atewanga epoto, namba languato, ipa epo pene kambua tupana matenenga mandaka pamuku wanda gene yene mindi petea-kola, yuu okona kinji tupamane wanda okone towa pamuku pua atea lea. Yuu okona akali tupamane wanda okone towa pamuku puato, utupane yakama bia ipa tai noto, sipaki lo keewa atalaini akali okonetaka gulo atea. Andipa pamuku wanda okone balana yole koo mindi molopeya oko nambato nimba andawa lokalenga, nimba bakale ipu lea. *

³ Enjole okonemane wuane lea-angi, Oli Sipitisa oko nambanga epo tumbi lea-kola, enjole okonemane namba mo auwa wandakali napalene yuu mindina pea. Nambato yuu okonena poto andewa-kola, pamuku wanda okone bala yia pusi tundupapene mindina masianenga petea. Pusi kapua okonena umbaini pitakanga Gote ando lamba lene gene kambua tupa pepa peyatane atea. Balana kawane yanasa ateakola, kawane utupanena nene paiyasa atea. *

⁴ Pamuku wanda okonemane balana umbaininga kolosa tundupapene mindila, pepolo mindi-la, okonelapo puato, ana epene wete muni kambua-mane kambenepi, golopi, mumbi epene wetepi, utupane-mane yati pitawa petea. Wanda

* **16:12:** Ais 11:15 * **16:14:** Lap 19:19 * **16:15-16:** Mt 24:43-44; Lap 3:3; Sak 12:11 * **16:18:** Lap 4:5; 8:5

* **16:19:** Lap 14:9-10 * **16:20:** Lap 6:14 * **16:21:** Ek 9:23-24; Lap 11:19 * **17:1-2:** Jet 51:7,12-13; Ais 23:17; Lap

14:8 * **17:3:** Lap 13:1

okonena pamuku mana kalato atene tupapi, Gotena wenonga mana koo guupene waka tupapi, utupane pitaka kapo golo-mane waa-pene mindina tumbi latane atea-kola, wandakali-mane minditaka kapo okonena peteane tupa neakale loto, pamuku wanda okonemane kapo okone aitawa petea. *

⁵ Balato pamuku piyaini wanda waka tupa pitakana angini pituto, yuu okona mana koo guu-pene tupa wamba ini bulupane mina ika leaipia. Wuaneko, balana gene oko kokoli mindi yoto, balana wenonga Bapilone Tano Andane pepa peytanate atea.

⁶ Jisasato piape puato, wua peane loto, wamba Gotena wandakali minditupamanane wandakali waka tupa lamauwu atea-kola, wandakali minditupamanane utupane peyo ome lea. Ome leai-kola, pamuku wanda okonemane Gotena wandakali omeaini utupanena tundupa noto, sapake lo petea. Nambato balana mana koo okone andoto, moko loto, nembo kambua tewa. *

⁷ Nembo kambua tewa-kola, enjole okonemane namba languato, anu peakale nimba moko loto, nembo kambua telepe lea. Nimbatu andale-kola, kawane yanaspasi, kawanenga nene paiyasa, utupane atene pusi kapua mindi balana masianenga wanda mindi mandu pala. Pusi kapua okola, wanda okola, okonelapo kokoli mindi eya-kola, nambato kokoli okonena tene oko nimba langukale. *

⁸ Pusi kapua nimbato andale okone bala wamba ateane tekeko, andipa bala yuu okona ata naopeya. Jia. Bala yuu kundu nenanga wete okona atoto, kamaka epoyale peya. Wamba Goteto yuu oko yakale lea-angi, saka atapowa atolaini wandakali tupa gene yalane buku okona balato wandakali minditupana gene tupa peyo yata yaepia. Buku okona gene nayene wandakali tupamane pusi kapua okone wamba ateane nembo teyai tekeko, andipa bala ata naopeya nembo teyai. Tene okonena, bala lapone epo atola-angi, utupane-mane bala andalu, moko loto, nembo kambua tolopeyai. Pusi okone epo atola-kola, matili Goteto bala minu koyolo-peya. *

⁹ Nembo kuai lo talaini wandakali tupa manne pii nambato leyo oko wayumane nembo tape-pene. Pusi kapua okonena kawane yanasa tupa yuu wangiane yanasa tupa towa makande pitane ateya. Wanda oko bala yuu wangiane yanasa utupanena pitiyane.

¹⁰ Dee, pusi kapua okonena kawane yanasa utupane kinji yanasa tupa towa makande pitane ateyai. Akali kinji yanasa utupanena yau tupa yakama akali mindina panda miaka peai-kola, andipa watakane oko bala kinji atoto, piape pua ateya. Matili akali yanane oko bala kinji atolopeya tekeko, balato ole ukupini mindilapo angu piape okone pua atape-pene.

¹¹ Pusi kapua wamba ateane oko bala kinji yanasa utupanena mindi ateya. Wamba bala kinji atalu, yuunga peane tekeko, matili bala kinji piape pulu-peke loto, kinji kitupane atola-kola, matili Goteto bala minu koyolopeya.

¹² Nimbato andapi-kola, pusi kapua okonena kawanenga nene paiyasa atapia. Nene utupane akali paitasa makande pitane atapia. Andipa akali utupane kinji ata naopeya tekeko, matili pusi kapua oko bala kinji gulola-angi, akali paitasa utupane yakamapi kinji gulolo-peyai teke. Wuane tekeko, utupane-mane piape okone gii ukupini wane awa angu puluveyai. *

¹³⁻¹⁸ Goteto akali kinji paitasa utupanena nembo-tene oko mina ika lola-kola, kinji paitasa utupane yakama nembo mindiki palu atoto, Gotena nembo-tene oko wato minulu-peyai. Balana nembo tene oko wato minuto, yakama tanena tai-lene okonemanne pusi kapua oko minu tai layawa piape pima pulu, piape Goteto yakama maiyane tupa pikoyo pulai oto okona gian loloheyai. Enjole okonemane wuane lalu, pii mindi tako pua namba languato, pamuku wanda nimbato andale oko bala tano andane wete mindi towa makande pitane eya lea. Tano okonena kinji okomane yuu okona kinji waka tupa bosa lo ando atolopeya. Wanda okone bala pitiya ongane mandaka ipa kambua epo pene tupa pii waka-waka lene wandakalipi, umbaini waka-waka atene wandakalipi, yuu tupa pitakana wandakali yame waka-waka palayai tupapi, wandakali utupane makande piya-kola, andale. Wandakali utupane tano andane okonena mandaka ongane epoto, amunguli puluveyai lo makande piya-kola, nimbato andale. Pusi kapua okopi, balana kawanenga nene paitasa atala-kola, nimbato andale tupapi, utupane-mane pamuku wanda okone towa embo wete wato, balana umbaininga tona tupa yoko apoto, balana umbaini oko nolopeyai. Utupane-mane pamuku wanda gulene tano andane okonena anda tupa ukuna ataya alu, itamane yango apolopeyai. Wuane piyu, utupane-mane Gotena sipisipi andopane oko yanda pimalu-peyai tekeko, bala akali

* 17:4: Jet 51:7 Lap 18:16-17

* 17:6: Lap 18:21-24; 19:1-2

* 17:7: Lap 13:1

* 17:8: Dan 12:1; Lap 11:7; 13:7

* 17:12: Dan 7:7,24

andane tupana akali andane wete atoto, bala kinji tupana kinji oko ateya. Tene okonena, Sipisipi Andopane okonemane yia kapua okopi, kinji paiyasa tupapi, utupane yanda pimawuato, sia minulu-peya. Balato wuane pula-angi, Gotena yapa lo mene wandakali yakamato Sipisipi Andopane oko tepa naene, balana pii wato minuto, yia kapua okopi, kinji paiyasa tupapi, utupane sia minulu-peya teke. Enjole okonemane wuane lea. *

18

Goteto Bapilone Tano Oko Yapa Lo Tale Pulupeya Leane Oko

¹ Matili nambato andewa-kola, enjole waka mindi ati kenga atoto, yuunga epea. Balanga tai-lene andane wete ya-kola, balana tii-pene okomane yuu pitakana tii pikoyo pea.

²⁻³ Balato pii taimane wete loto, wamba Bapilone tano andane okona tane wandakali tupamane minditaka kambua wetete tupa kambo yatawa ataima lakae lo nembo teai lea. Wuane nembo teai-kola, bisanisa piape piyaini wandakali minditupa yuu waka tupana atoto, pinju kambua mandu epoto, muni kambua wetete meai. Dee, Bapilone tane wandakali tupamane pamuku pua atea-kola, yuu tupa pitakana wandakali yame palu peya tupana minditupa-mane utupane towa pamuku pua atoto, Bapilone tane tupana bia ipa tai tupa no atene atea. Yuu tupa pitakana kinji tupamanepi, Bapilone tano andane okone towa pamuku pua atene ateaini teke. Tene okonena, Goteto yataka wato, tano andane okone minu koyane oko koyatane eya. Enene, wetete koyatane eya. Tano okone koyalu, ukuna ateya-kola, andipa eka koo embo-pene yame wakawaka tupa pitakapi, Satanena sипитса koo yame waka-waka tupa pitakapi, utupane angu tano okonena epo ateyai. Enjole okonemane wuane lea. *

⁴⁻⁵ Enjole okonemane wuane lea-angi, nambato ale ewa-kola, mindimane ati kenga atoto, pii mindi leane oko loto, Bapilone tane wandakali tupamane mana koo kambua wetete minu atalaini lea. Wandakali utupanena mana koo utupane yomo atane atama poto, ati kenga giao latane ateya-kola, Goteto wandakali utupanena mana koo utupane nembo tatawa ateya. Wandakali utupane-mane mana koo mindi minulai-angi, nambana wandakali yakamato wandakali utupane towa atu atoto, mana koo okone mineaindo,

matili Goteto yole koo mindi wandakali utupane maula-angi, yakamatopi yole koo okone molopeyai. Nambana wandakali yakamato wuane pulumane nembo toto, Bapilone tepa alu, ipulupape. *

⁶ Pamuku wanda okonemane yakama minu koyane, wuane pua teke yakamatopi bala minu koyalapape. Balato kenda-pene mindiki-mindiki lo oko-tuma yakama geane nembo toto, yakamato paini yano peyoto, kenda-pene lapo-lapo lo bala maiyapape. Balato ipa koo wete mindi kapo mindikina pete loto, yakama nalapale loto geane nembo toto, yakamato ipa koo tainele wete kapo laponga pete loto, lapotaka bala neakale maiyapape. *

⁷ Pamuku wanda okonemane mana koo mindi wato minuto, bala tane angu nembo toto, minditaka kambua wete moto, bala tanena gene oko laiyu loto, namba wanda yalo mindi piti napeyo. Jia. Namba wanda kuwini peteyo okonena, namba yamapano mo kenda piya alane mindi ando mia napulu-peyo lalane. Balato bala tanena gene oko laiyu loto, wuane lalane nembo toto, yakamato tandaka okone-tuma teke bala mawuato, mo ai andane wete laya alapape. *

⁸ Bapilone tano andane yapa lo tale pulane Akali Andane Gote oko bala tai-lene wetete ateya okomane kenda-pene kambua tano okonenga malupeya. Ulia nono andanepi, siki waka-waka tupapi, utupane epola-kola, wandakali minditupa omolo-peyai. Dee, yanda-pene akali tupamane Bapilone tano okone yango apolopeyai teke. Kenda-pene utupane pitaka oto mindiki okone anga teke Bapilone tane wandakali utupanenga epola-kola, utupane-mane ai lo atolopeyai. *

⁹ Wamba yuu tupa pitakana kinji tupa tano okonena poto, tano okonena minditaka kambua yane tupa epele wato, tano okonena tane wandakali tupa towa pamuku pua ateaini. Wuaneko, matili tano okone tola okona ita tua pula oko andoto, kinji utupane-mane ai lo yamataka lolopeyai. *

¹⁰ Bapilone tola-angi, tano okonena tane wandakali tupamane tandaka andane wete nolai-kola, kinji utupane yakama yuku wato, tano okonena mandaka napolopeyai. Jia. Utupane yakama tepanda amonga waka mindinga atoto, pii mindi leaini oko loto, yali, ae, Bapilone, wamba nimba tano andane tai-lene wete mindi yee tekeko, Goteto nimba yapa lo tale

* 17:13-18: Lap 18:8 * 18:2-3: Lap 14:8; Ais 13:21; 34:11-14; Jet 50:39 * 18:4-5: Ais 48:20; Jet 50:8; 51:6,9,45; 2Ko 6:17; Jen 18:20-21 * 18:6: Sam 137:8; Jet 50:15,29; 2Tes 1:5-7 * 18:7: Ais 47:7-9 * 18:8: Lap 17:13-18 * 18:9: Ese 26:17; 27:30-35

puato, yole koo mindi nimba giya-kola, wane awa angu pala-kola, nimba koyale. Tene okonena, nanimato nimba ondo wete eyama lolopeyai.

¹¹ Dee, Bapilone tola-angi, tano okonena tane wandakali tupamane yuu waka tupana bisanisa piape piyaini wandakali tupana pinju tupa kamba napulu-peyai nembo toto, yuu waka tupana bisanisa piape piyaini wandakali utupane-mane yamapane kenda wato, ai lolopeyai.*

¹² Wamba Bapilone tane wandakali tupamane bisanisa piape piyaini wandakali utupanena golopi, silipapi, ana epene wete muni kambua-mane kambenepi, mamakupi, utupane pitaka kambaka piki pua ateai. Dee, Bapilone tane tupamane lapalapa epene wete ake-penepi, tundupapene waka-wakapi, lemba-lemba penepi, utupane kambeai. Dee, wamba wandakalimane ita tunduma-pene yame waka-waka tupa pitakapi, ita muni kambua-mane kambenepi, yia elepenena nenepi, aenepi, batasapi, ana yati penepi, okonetaka minditupa moto, minditaka tupa waa peaki-kola, Bapilone tane tupamane okonetaka tupa pitaka kambeai.*

¹³ Wamba utupane-mane tomo mo tende piyalane sinamonepi, wele tunduma-pene waka-waka tupapi, ita tua tunduma peakale lo minditaka yangalaini tupapi, dee ipa waenepi, olipi ipanepi, palawa epenepi, witi dinipi, utupane kambeai. Dee, utupane-mane yia osapi, yia osa-mane kilau lo auwa palaini wandakali pitulane katesa tupapi, bulumakaopi, sipisipipi, utupane pitaka kambeai. Utupane-mane katapusa piape piyaini selepe wandakali tupa kambeai-kola, wandakali utupanena tandini tupa kambele ateaini teke.

¹⁴⁻¹⁵ Wamba Bapilone tane wandakali tupamane okonetaka tupa kambua wete kambeai-kola, yuu waka tane bisanisa piape piyaini wandakali tupamane muni kambua wete moto, amango guleai. Matili Bapilone tano okone tola-angi, tano okonena tane wandakali tupamane tandaka andane wete nolai-kola, yuu waka tane bisanisa piape piyaini wandakali utupane yakama yuku wato, Bapilone okona mandaka puu napene, amonga tepanda waka mindinga atoto, yamapane kenda wato, ai lo atolopeyai. Ai lo atoto, utupane-mane Bapilone tane wandakali tupa lamawuato, yakama yati epene tupapi, minditaka epene wete tupapi, minditaka waka-waka muni andane-mane kambene tupapi, utupane pitaka tala

lolopeyai. Tala-kola, yakamato utupane dee lapone anda napulu-peyai. Enene, wamba yakamato minditaka utupane miauwa lakae lo nembo toto, kambo yatawa ateaini tekeko, andipa utupane pitaka tokoyo piyakola, yakamanga naeya.*

¹⁶⁻¹⁷ Wamba Bapilone tane wandakali tupamane tona epene wete ake-penepi, tundupapene yame lapopi, utupane puato, golopi, ana epene muni andanemanne kambenepi, mamaku yale mumbipi, okonetaka tupamane yakamana umbaini tupa yati pitane ateai. Yali, ae, andipa wane awa angu pala-kola, yakamana minditaka kambua wete muni andanemanne kambene tupa pitaka koyala. Tene okonena, nanimato Bapilone tano andane okona tane wandakali tupa ondo wete eyama lolopeyai. Dee, tano oko tola-angi, sipi ando atalaini akali tupapi, sipi tupana piape piyaini akali tupapi, sipinga pitiyu yuu waka tupana palaini wandakali tupapi, sipinga pitiyu yuu waka tupana poto bisanisa piape piyaini wandakali tupapi, wandakali utupane yakama Bapilone tano okona mandaka puu napene kondalu, tepanda amonga waka mindinga atolopeyai.*

¹⁸ Tano okone tola-kola, utupane-mane sia tua andoto, tano andane okonepene tano andoko eyape lolopeyai.*

¹⁹ Bapilone tane wandakali tupamane minditaka kambua kambamakale loto, muni kambua yatawa ateai-kola, sipi yalaini akali tupamane pinju kambua tano okonena mandu poto, yakamana muni kambua mialu, amango guleai-ko. Yali, ae, andipa awa mindiki angu pala-kola, tano andane oko koyapia okonena, nanimato ondo wete eyama lolopeyai. Wuane loto, utupane-mane yamapane kenda wato, yuu yeayu puato, ai lo atolopeyai.

²⁰ Wamba Bapilone tane wandakali utupane-mane Gotena wandakalipi, potopesa akalipi, utupane minu koyoto, kenda-pene minditupa maiki pua ateaini okonena, Goteto Bapilone tane wandakali utupane yapa lo tale puato, kenda-pene utupane maipia. Tene okonena, yakamapi, ati kenga atalaini tupapi, yakama pitakamane epele alapape. Enjole okonemane wuane lea.*

²¹⁻²⁴ Wuane lea-kola, matili enjole tai-lene mindimane ana andane wetete mindi minaiyu loto, ipa solewata okona taimane peya amo loto, Bapilone tane wandakali tupa lamawuato, wua lea: Wamba yakamato posini pua atoto, yuu yoo peya tupa

* **18:11:** Ese 27:36 * **18:12:** Ese 27:12,13,22 * **18:14-15:** Ese 27:31,36 * **18:16-17:** Lap 17:4; Ais 23:14; Ese 27:27-29 * **18:18:** Ese 27:32 * **18:20:** Ais 44:23; Lo 32:43; Jet 51:48

pitakana wandakali tupa minakasa yai. Wuane puato, yakamana bisanisa piape piyaini wandakali tupamane yuu waka tane wandakali tupa pitaka sia minuto, gene andane yene ateai. Dee, yakamato potopesa akali tupapi, Gotena wandakali tupapi, utupanena minditupa peyo ome laka piki pua ateai okonena, koo tene mindi yakamanga eya. Yuu waka tupa pitakana wandakali minditupa-mane wandakali minditupa peyo ome leaini okonena, koo tene okone Bapilone tane wandakali yakamanga eya teke. Tene okonena, nambato wua leyo. Nambato ana andane oko ipa solewata okona taimane peya amo lalokola, latako piya. Wuane pua teke, matili Goteto Bapilone tano andane oko taimane peya amo lola-kola, tano okona wandakali atalaini tupa latako pulupeyai. Wuaneko, matili-matilipi gitapi, pupepi, biakulipi, musikipi, utupanena mindi peyolane wandakali mindi tano okonena ata napulakola, mindimane musiki ale na-olopeya. Minditaka waa piyaini wandakali mindi ata napulu-peya teke. Dee, witi dini minu kokope lolane wandakali mindi ata napulakola, witi dini minu kokope lalane ana oko gili galoo laa napulu-peya teke. Wanda kee lolane akalipi, akali polane wandapi, okonelapo tano okonena pii lo ata napulupeyapi teke. Wandakali mindikipi mindi tano okonena ata napulai-kola, tano okonena lamu mindikipi mindi taa napulupeyapi teke. Wandakali mindikipi mindi tano okonena ata napulai-kola, tano okonena lamu mindikipi mindi taa napulupeyapi teke. Enjole okonemane wuane lea. *

19

Bapilone Tano Koya-kola, Wandakali-mane Epele Yaini Oko

1-2 Matili nambato ale ewa-kola, ati kenga kili kalae leane oko wandakali kambua-mane pii taimane lene gulea. Utupane-mane pii mindi leane oko loto, Bapilone tano oko pamuku wanda mindi gulo atoto, mana koo tupa minuto, yuu okona wandakali tupa minu koyoto, Gotena piape akali minditupa peyo ome leako leai. Goteto pamuku wanda andane okone yapa lo tale puato, mana koo okonena tene oko balanga yata wato, yole koo mindi bala maya. Wuaneko, Goteto mana epene tika-pene oko wato minuto, pii enene oko loto, wandakali yapa lo tale piyane lo nanimato andeyama. Andoto, nanimana Gote okomane nanimana molo-peke leane nembo toto, nanimato balana gene oko laiyu loto, balanga tai-lene wete eya-kola, balana gene andane wete eya lamakale. Wandakali utupane-mane wuane leai. *

³ Wuane lalu, utupane-mane pii pai pua teke taimane loto, Goteto Bapilone tano oko yangea-kola, ole dindi lo tano okone too atapo eya-kola, sia tua too atapowa atalane. Goteto wuane peane okonena, nanimato balana gene oko laiyu lo atamatiale leai.

⁴ Wuane leai-kola, ando atalaini akali (24) paitiyane laponga tukumindi tupapi, minditaka saka atene tukumindi tupapi, utupane-mane tombawua lo atoto, kinji pitiyane toko okona peteane Gote oko lo lotu loto, enene, nanimato Gotena gene oko laiyu lamakale leai.

⁵ Wuane leai-kola, mindimane Gote pitiyane toko yane organe mandaka atoto, pii mindi leane oko loto, Gotena piape wandakali gene yenepi, nayenepi, yakama pitaka-mane Gote yuku amawuato atoto, balana gene oko laiyu lo atalapape lea.

Sipisipi Andopane Oko Bala Wanda Kee Lolepey Leane Oko

⁶ Balato wuane lea-angi, nambato ale ewa-kola, ipa andane mindi epo peakoto, oo lalane wuane pua teke wandakali kambua epo amunguli puato, pii taimane leaini oko ati kili-kulu taimane lene gulea. Utupane-mane pii mindi leaini oko loto, nanimana Akali Andane Gote tai wetete okomane wandakali pitaka bosa lo ando atalane loto, balana gene oko laiyu lamakale leai. *

⁷⁻⁸ Gotena Sipisipi Andopane oko bala wanda kee lolane oto oko epea-kola, Goteto wanda okone bala kolosa epene ake-pene wete kalato natene tupa pua peteakale nembo tea. Wamba Gotena wandakali tupamane mana epene tika-pene tupa wato mineai-kola, yakamana mana utupane kolosa epene ake-pene wete gulea. Goteto kolosa epene wete ake-pene utupane wanda okone maya-kola, wanda okone bala Sipisipi Andopane okonena wetene gulo makande pea. Tene okonena, nanimana mini epene palu atoto, epele wete wato, balana gene oko laiyu lo atamatiale. Wandakali utupane-mane wuane leai. *

⁹ Wuane leai-kola, enjole okomane namba languato, nimbato pepa mindi peyoto, wua lape: Sipisipi Andopane oko bala wanda okone kee lola-angi, Goteto tomo kambua yangola-kola, wandakali minditupa-mane tomo okone nolo polopeyai lea. Wamba Goteto wandakali utupane lamawuato, matili yakamato nambana tomo okone nolo ipulupale leane okonena, andipa wandakali utupane yakama epelewa atape-pene lo pepa peyape lea. Wuane lalu, balato pii utupane Gotena pii enene wete lea. *

* **18:21-24:** Jet 7:34; 16:9; 25:10; 51:49,63-64; Ese 26:13,21; Ais 24:8; Lap 17:6 * **19:1-2:** Lo 32:43; Lap 6:10 * **19:6:** Lap 14:2-3 * **19:7-8:** Ais 61:10; Lap 21:2 * **19:9:** Mt 22:1-3

¹⁰ Wuane lea-kola, nambato bala lo lotu loyale, balana kene yane ongane aiki leka wato, tombawua lewa tekeko, balato namba languato, wamba Oli Sipitisa okomane potopesa akali tupa lamawuato, Jisasato wua pulupeya lo yakamato wandakali tupa lamai-yapape leane lea. Oli Sipitisa okomane wuane lea-kola, potopesa akali utupane-mane wuane leai. Andipa Oli Sipitisa okomane nimbapi, nimba towa piape mindiki piyaini amene tupapi, yakama languato, wamba Jisasato wua peane lo wandakali tupa lamauwa atalapape leya-kola, yakamato wuane lalaini leya. Namba yakama towa atu Gotena piape akali atoto, nanimato piape mindiki okone teke piyamane. Tene okonema, nimbato namba lo lotu nalene kondalu, Gote lo angu lotu lape. Enjole okonemane wuane lea. *

Yia Osa Ake-pene Okona Masianesa Pe-teane Akali Oko

¹¹ Okone angi, ati kenga okona asia lomba oko lumba-yene ya-kola, nambato akali mindi yia osa ake-pene mindina masianesa peteanga andewa. Wandakali-mane akali okone andayo pii mindi lalaini oko loto, akali okone balato pii enene loto, minditaka pukale lalane tupa enene piyane lalaini. Balato mana epene tika-pene tupa wato minu atoto, wandakali tupa yapa lo tale puato, akali koo tupa yanda pimawua atalane. *

¹² Balana lene okolapo ita lungu tene gulea-kola, balato kinji tupamane tangi anda piyaini okonetaka tupa kambua anda pitawa atea. Gene mindi balana umbaininga pepa peyatane ateane oko bala tane-mane angu nembo talane. Waka mindimane gene oko nembo natalane. *

¹³ Wandakali-mane balana gene okone nembo natene ato, balana gene oko Gotena Pii Oko lalaini. Balana tonanga tundupa kambua pata atane atea. *

¹⁴ Ati kenga atalaini ami tupamane tona kalato natene epene wete ake-pene tupa piyu, yia osa ake-pene tupana masianesa pituto, akali okone watama peai.

¹⁵ Aitene wandakali tupa yoko oyale kandepa nene atene mindi balana nee asianga apu latane atea. Balato utupane yokowa sia minuto, muli aene-mane waa-pene mindi auwa atoto, wandakali pitaka taimane bosa lo ando atolopeya. Ipane yoo penge lalaini yuli andane mindina getepe dini minditupa yola-kola, akali okonemane dini utupane balana kene-mane ango wato, utupanena

ipane tupa penge lolopeya. Getepe ipane epola oko Gote tai-lene wetete okona yataka ene oko makande peya. *

¹⁶ Akali okonena gene mindi kinji tupana kinji lalaini. Balana gene mindi akali andane tupana Akali Andane lalaini. Gene okonelapo balana tona okola, balana kene pelendene okola, okone-lapona pepa peyatanate atea. *

¹⁷⁻¹⁸ Okone angi, nambato andewa-kola, enjole mindi nai lene okona atea. Balato eka ati kenga yuu lo epoko pua ateaini tupa pitaka pii mindi taimane lamawuato, ami ando atalaini akali kawane tupapi, kinjipi, akali tai tupapi, yia osapi, yia osa masianesa pitiyane akalipi, katapusa piape piyaini akalipi, mee anana atalaini akalipi, akali gene yenepi, nayenepi, akali yame utupanena kambua omolo-peyai lea. Omolai-kola, Goteto tomo andane mindi yakama gulupeya nembo toto, yakamato akali utupanena umbaini tupa namakale lo epo amunguli piyapape lea. *

¹⁹ Enjole okonemane wuane lea-angi, nambato pusi kapua andane wetete okopi, yuu okona kinji tupapi, utupanena ami tupapi, utupane andewa. Utupane-mane yia osanga peteane akali tupapi, balana ami okopi, utupane yanda pimauyale epo amunguli pua atawai.

²⁰ Wamba owato potopesa akali oko bala pusi kapua okona wenonga atoto, metekolo piape minditupa puato, wandakali minditupa minakasa ya-kola, mindimane pusi okonena gene oko makande puato, kokoli pitane namba (666) sikisa andete sikiti sikisa wandakali utupanena wenonenga pepa pelea. Wuane pea-kola, wandakali utupane-mane pusi kapua okone bala yale minditaka waa peaini okone lo lotu leai. Matili yia osanga peteane akali oko epea-angi, balato pusi kapua andane wete okola, balana owato potopesa akali okola, okonelapo andi lea. Okonelapo saka ateapi-kola teke, akali okonemane okonelapo andi lo auwa poto, ana gene salapa lene tupa itamane too nembeyawe pua atene yuli koo okona auwa aindaka lea. *

²¹ Wuane piyu, yia osanga peteane akali okonemane kandepa luu nene atene mindi balana nee asianga apu latane ateane okomane kinji tupapi, utupanena ami tupapi, utupane yokowa ome lea. Omeai-kola, eka epeaini tupa pitaka-mane akali utupanena umbaini tupa no embo alu, atawai.

* ^{19:10:} Ap 10:25-26; Lap 22:8-9 * ^{19:11:} Lap 1:4-5; 6:2; Sam 96:13; Ais 11:4 * ^{19:12:} Dan 10:6; Lap 1:14; 2:17
 * ^{19:13:} Ais 63:1-3; Jo 1:1,14 * ^{19:15:} Sam 2:9; Lap 1:16; 14:20 * ^{19:16:} Lap 17:13-18 * ^{19:17-18:} Ese 39:17-20
 * ^{19:20:} Lap 13:12-18; 20:10

20

*Satane Bala Andi Latane Atalu, Wetete
Koyolo-peya Leane Oko*

¹ Okone angi, nambato andewa-kola, enjole mindi ati kenga atoto, yuunga epea. Balato yuu kundu koo nenanga wetete okona asia lomba loko peyolane kii okola, sene ende andane mindi-la, okonelapo auwa epea.*

²⁻³ Epoto, balato puya andane wete gene Satane lene oko minatawa atoto, sene ende andane okomane bala andi lea. Wamba wetete Sataneto yuu pitakana wandakali tupa minakasawa atama ipulu, andipa giau lea-kola, wandakali utupane-mane mana koo tupa minu ateai-kola, Sataneto utupanenga koo tene yatawa atea. Mali tausene mindiki balato wandakali tupa minakasa nayakale nembo toto, enjole okonemane bala andi loto, yuu kundu koo nenanga wetete okona auwa aindaka loto, yuu kundu okonena asia lomba oko tuma puato, duli lo wete loko pelea. Loko pelea-kola, mali tausene mindiki polopeya. Pola-kola, Satane bala dee lapone mali mindilapo ako-lene ateakale loto, bala tinga lo tepa ape-pene.*

⁴ Okone angi nambato andewa-kola, kinji pitiyane toko minditupa ya-kola, wandakali minditupa toko utupanena peteainga andewa. Wamba mindimane pusi kapua andane okonena gene oko makande puato, kokoli pitane namba (666) sikisa andete sikiti sikisa oko wandakali utupanena wenone okola, kini okola, okone-lapona pepa peyoyale peane tekeko, utupane-mane balato wuane peakale lo ando konda nayai. Dee, utupane-mane pusi kapua andane okone-la, bala yale mindi makande pua minditaka waa peane okola, okonelapo lo lotu naleai teke. Jia. Wuane pua ata napene, utupane-mane Gotena pii oko wandakali waka tupa lamawuato, piape Jisasato peane tupapi, pii balato leane tupapi, utupane lamauwa ateai-kola, akali mindimane wandakali utupanena mane pai lea. Pai lea-kola, matili Goteto wandakali utupane saka atolo-peke laya wato, utupane-mane wandakali waka tupa yapa lo tale pulane tai-lene oko maya. Maya-kola, wandakali utupane yakama Kataisa towa atu kinji atoto, mali (1,000) tausene mindiki wandakali waka tupa ando ateai.*

⁵ Wandakali utupane yakama wamba ini bulupane malinga ika leai. Mali (1,000) tausene mindiki pea-angi, wandakali waka omeaini tupa saka atolo-peke leai.

⁶ Wandakali wamba ini bulupane malinga ika lolai utupane lapone oma napulupayai. Jia. Goteto utupane balana wandakali yame ateyai lola-kola, utupane Gote-la, Katisa-la, okone-lapona pitisa akali tupa atoto, mali tausene mindi Kataisa towa atu potomane loto, wandakali waka tupa ando atolopeyai. Tene okonena, utupane yakama epelewa atape-pene.*

⁷ Matili mali (1,000) tausene mindiki epo pola-angi, enjole mindimane yuu kundu koo nenanga wetete okona asia lomba oko lumbalu, Satane titi lola-kola, Satane bala katapusa anda okone tepa alu, kamaka epolopeya.

⁸ Kamaka ipulu, bala yuu Gokopi, Mekokopi, yuu tupa pitakana polopeya. Poto, yuu utupane pitakana wandakali tupamane Gotena wandakali tupa yanda pimai-yakale nembo toto, balato utupane minakasa wato, mo amunguli pulupeya. Wuane pula-kola, balana ami yanda yene utupane dii nalape-pene ipa mau eya okotuma epo amunguli pulupeyai.*

⁹ Wandakali utupane yuu waka tupa pitakana atoto, epo amunguli puato, Gotena wandakali amunguli pua paliyaini tano Goteto epelewa yamapano yo atalane oko yanda pimai-yakale loto, tano okone ato mapu pulupeyai. Utupane-mane wuane pulupeyai tekeko, ati kenga ato ita kaiya-pene oko tepa wato, Satanena ami wandakali utupane yango koyo pulupeyai.*

¹⁰ Sataneto wandakali utupane minakasa yane mambele, Goteto bala ana gene salapa lene tupa ita-mane too nembeyawe pua atene yuli koo okona auwa aindaka lolopeya. Aindaka lola-kola, Satane bala pusi kapua andane wetete okola, owato potopesa akali okola, okonelapo towa atu yuu koo okonena atolopeyai. Yuu koo okonena atoto, utulu otongapi, ole dindi lo utupane tandaka koo andane wetete no atapowa atolopeyai.*

*Goteto Wandakali Tupa Yapa Lo Tale
Peane Oko*

¹¹ Okone angi nambato andewa-kola, Gote bala kinji pitiyane toko andane ake-pene yane mindina petea. Petea-kola, yuu ati-la okonelapo-mane bala ando yuku wato, palaka puapo wato, latako peapi.

¹²⁻¹³ Wamba wandakali minditupa sipinga pitiyu epoko puato, omeai tupa ipa solewata okona pangosa mali pitane ateai. Dee, wandakali minditupa omeai-kola, wandakali-mane utupane yuu pangosa mali peai. Utupane-mane wuane peaini

* **20:1:** Lap 9:1 * **20:2-3:** Jen 3:1; Lap 12:9 * **20:4:** Dan 7:9,22,27; 1Ko 6:1-2; Lap 13:16-18 * **20:6:** Lap 1:6
* **20:8:** Ese 38:2,9,15-16 * **20:9:** 2Ki 1:10 * **20:10:** Sam 11:6; Lap 19:20; 21:8

tekeko, nambato andewa-kola, wandakali omene utupane pitaka saka atolo-peke loto, wandakali gene yenepi, nayenepi, utupane pitaka kinji pitiyane toko okona wenosatole epo atea. Utupane epo atea-angi, mindimane buku minditupa opimi leai. Wandakali wamba omalu, saka atolo-peke leaini utupane yakamana mana mineaini tupa buku utupanenga pepa pelene ya-kola, Goteto buku utupane dii loto, wandakali utupane mindiki-mindiki lo wua peane ya lo andoto, utupane yapa lo tale pea. Dee, mindimane buku waka mindi minu opimi lea teke. Saka atapowa atolane wandakali tupana gene tupa buku okonena pepa pelene ya-kola, Goteto buku okone dii loto, buku okonena wandakali apina gene peyayene eyape lo andea.*

¹⁴⁻¹⁵ Wandakali minditupana gene tupa buku okonena peya-yene naya-kola, Goteto wandakali utupane yuu koo wetete ita too atapowa atene okona auwa aindaka lea. Goteto wandakali mindi yuu koo wetete okonena auwa aindaka lea-kola, wandakali-mane bala andayo pii mindi leaini oko loto, wandakali okone lapone omea leai. Goteto wandakali utupane yuu koo wetete okonena auwa aindaka lalu, wandakali omalaini mana okola, wandakali omene atalaini yuu okola, okonelapo yuu koo wetete ita too atapowa atene okona auwa aindaka lea teke.

21

Yuu Ati-la Wenene Okolapo Andewa

¹ Yuu ati-la bulupane okolapo latako peapi-kola, ipa solewata okopi piti napene, latako pea teke. Utupane pitaka latako peaki-kola, nambato yuu ati-la wenene okolapo andewa.*

² Andewa-kola, Goteto balana tano epene wetete Jutusaleme wenene ati kenga yane oko yuunga epe lea. Wana mapokae mindi akali payole peya-kola, balana yame tupamanne bala yati pimai-yaimi. Wuane pua teke, Goteto balana Jutusaleme wenene oko yati piya wato, yuunga epe lea.*

³ Okone angi nambato ale ewa-kola, mindimane kinji pitiyane toko okona pituto, pii mindi taimane leane oko loto, ale alapape lea. Andipa Gotena anda oko wandakali tupana tombenenga epo ateyakola, bala utupanena Gote atoto, utupane towa atu atola-kola, utupane balana yame atolopeyai.*

⁴ Kenda-pene wamba yane tupa koyo pula-kola, Gotena wandakali tupa tandaka no ata napulu-peyai. Dee, wandakali mindi oma napulai-kola, wandakali yangone tupa yakama yamapane kendawa ai nalolo-peyai teke. Jia. Goteto balana wandakali tupana lenenga ai ipane epolane tupa pitaka kunu apia-maulupeya lea.*

⁵⁻⁶ Wuane lalu, kinji pitiyane toko okona peteane mindimane pii mindi leane oko loto, ale alapape. Minditaka wamba yapia tupa pitaka nambato mo wenene gulaya eyo lea. Wuane lalu, balato pii mindi tako pua loto, pii nambato leyo tupa enene wetete eya-ko lea. Wandakali-mane pii utupane bilipi lo atape-pene. Tene okonena, niimbato nambana pii utupane pepanga peyoto, wua lape: Namba wamba ini bulupane wetete atewane oko mee atama ipulu, minditaka waka tupa pitaka sia minuto, matili wetete atapowa atolopeyo. Minditaka eya tupa pitakana tene oko namba. Nambato minditaka pipe-pene tupa pitaka pikoyo piyawane. Nambato piape pipe-pene tupa pitaka piyiake lauwa. Wandakali mindi bala ipa nono ola-kola, nambato bala ipa kambeakale nalolo-peyoy. Jia. Nambato wandakali okone lamawuato, nimba wandakali saka atapowa atekale lo ataya alane ipa lai yungu epalane oko mee naa lolopeyo.*

⁷ Wandakali mindimane mana koo tupa yanda pimawuato, sia mineando, namba balana Gote oko atolowa-kola, bala nambana andopane atolopeya. Bala nambana andopane atola-kola, minditaka epene utupane pitaka balana paluni yolopeya.*

⁸ Wuane tekeko, wandakali minditupamanne Gote lo bilipi nalene, mee yukuwa atalaini. Wandakali minditupamanne owato gote tupa lo lotu lalaini. Dee, wandakali minditupamanne wandakali yangone peyo ome lalainipi, posini piyainipi, owato pii lalainipi, pamuku piyainipi, mana koo wete waka-waka tupa minalaini. Wandakali utupane pitaka ana gene salapa lene tupa ita-mane too nembeyawe pua atene yuli koo okona poto atolopeyai. Wandakali utupane yuu koo okonena polai-angi, utupane yakama lapone omolai-kola pulupeya. Kinji pitiyane toko okona peteane Goteto wuane lea.*

Joneto Jutusaleme Wenene Oko Andeane Oko

* **20:12-13:** Dan 7:9-10; Mt 25:31-46; Ap 17:30-31; 2Ko 5:9-10; Lap 2:23; 13:8; 22:12; Lom 2:6; 1Pi 1:17 * **21:1:** Ais 65:17; 2Pi 3:13 * **21:2:** Ais 52:1; 61:10; Ip 11:16; 12:22; Lap 3:12 * **21:3:** Pit 26:11,12; Ese 37:27; Sak 2:10; 2Ko 6:14-16 * **21:4:** Ais 35:10; 65:19; Lap 7:16-17 * **21:5-6:** 2Ko 5:14-17; Ais 55:1; Jet 2:13; Jo 7:37-38; Lap 1:8,17; 22:17 * **21:7:** 2Sa 7:14; Sam 89:26-27 * **21:8:** Mt 25:41-43; Ip 10:38-39; Lap 20:14-15; 22:15

⁹ Wamba nambato andewa-kola, wandalaki kenda-pene yanasa koyo pua epolopeya tupa disa yanasanga tumbi latane ateai. Ateai-kola, enjoje yanasa tupamane disa utupane aitawa ateai. Enjole utupanena mindi namba atewanga epoto, Sipisipi Andopane okomane wanda kee lolopeya oko nambato nimba andawa lokale, ipu lea.

¹⁰ Wuane lea-kola, Oli Sipitisa oko nambanga epo tumbi lea-kola, enjoje okonemane namba mo auwa yuu wangiane andane kenga wete mindina pea. Okone angi, Goteto balana tano epene wetete Jutusaleme wenene ati kenga yane oko yuunga epe lea-kola, enjoje okonemane namba andawa lea.*

¹¹ Muni kambua-mane kambalaini ana epene wete Jasapa lene oko galasa yale yoto, lemba-lemba piyane. Wuane pua teke, Gotena tii-pene andane okomane Jutusaleme wenene okone mo tii piya ya-kola, tano okone tii wetete pea.*

¹²⁻¹⁴ Tano okone mapu pua ende andane kenga wete mindi pitane atea. Ende okone keato guleakale loto, ana andane luu wetete alesa tupamane ende okonena tenenga pte latane ataka pea. Sipisipi Andopane okona aposolo akali alesa tupana gene tupa ana utupanena mindiki-mindiki lo peyatane ataka pea. Nai epalanesa-tole ende pitane ateane okonena asia lomba tepo ya-kola, nai andaka palanesa-tole ende pitane ateane okonena asia lomba tepo teke ya. Wanguni mindisa-tole lapotaka asia lomba tepo teke yaka pea. Asia lomba alesa yane utupanena mindiki-mindiki lo Isatale tane yame alesa tupana gene tupa peyatane ataka pea. Dee, enjoje mindiki-mindiki lo asia lomba alesa utupanena mindiki-mindiki lo andatawa ataka peai.*

¹⁵ Tano okopi, tano okona ende pitane ateane tupapi, ende pitane ateane okona asia lomba tupapi, utupane luu aki-tupi eyape lo mandeke pua andokale nembo toto, namba pii langeane enjoje okonemane luu aki-tupi eyape lo makande piyane lula golo-mane waa-pene mindi aitawa atea.*

¹⁶⁻¹⁷ Lula okone aitawa atoto, wandalaki-mane minditaka tupa luu aki-tupi eyape lo andoyale makande piyaini wuanne pua teke, enjoje okonemane tano okonena ende pitane ateane okonena kenga mita aki-tupi eyape lo andoyale makande pea. Makande pea-kola, ende oko kenga (65) sikit paepe mita ateanga andewa. Dee, balato tano okonena tipinisapi, asia lombasapi, yangisa-yangisapi, utupane

pitakana yuunga malamanda puato, luu aki-tupi eyape lo andoyale makande pea-kola, utupane pitakana luu tupa (2,200) tu tausene tu andete kilomita teke-teke yanga andewa. Balato tano okonena anda tupana kenga kilomita aki-tupi eyape andoyale makande pea-kola, anda utupane kenga (2,200) tu tausene tu andete kilomita teke ateanga andewa. Wuaneko, tano okonena makande peane utupane pitaka luu mindiki atutu teke ya andewa.

¹⁸ Tano okone golo epene wete-mane waa-pene ya-kola, galasa-mane waa-pene gulea. Tano okonena ende pitane ateane oko ana epene wete jasapa lene tupamane ende pitane atea.*

¹⁹ Tano okona ende pitane ateane okone keato guleakale loto, ende okonena tenenga ana andane luu yata yane tupa ana epene yame-yame yole andane-mane kambene tupamane yati pitane atea. Ende okona ana yati-pene epene wete yane utupanena bulupane oko gene jasapa lene oko ya. Lapone oko bulu kala ana gene sapaya lene oko ya. Ana tepone oko gene aketa lene oko ya. Tukuni oko ana kaka-ene gene emetele lene oko ya.

²⁰ Yawini oko tundupa-pene pali, ake-pene pali pene ana gene satonikisa lene oko ya. Watakane oko ana tundupa-pene gene kaniliante lene oko ya. Yanane oko ana ambua-pene kitisolaita lene oko ya. Kitupane oko ana kaka-ene mindi-pene gene betila lene oko ya. Pilini oko ana ambua-pene waka mindi-pene gene topasa lene oko ya. Paiyane oko kaka-ene pali, ambua-pene pali pene ana gene kitisopesa lene oko ya. Mane oko ana gene ayasini lene oko ya. Dee, alene oko ana tundupa-pene waka mindi-pene gene ametisa lene oko ya.

²¹ Ende okonena asia lomba mindiki-mindiki lo mamaku yale mumbi andane wetete mindiki-mane waa pitane ya. Tano okonena asini tupa golo epene wete tupamane waa pitane ya-kola, galasa-mane waa-pene gulea.

²² Akali Andane Gote tai-lene wetete okola, Sipisipi Andopane okola, okonelapo Jutusaleme tano wenene okona lotu anda ateapi. Tene okonena, tano okonena lotu anda waka mindi ata naapea.

²³ Sipisipi Andopane oko bala tano okonena lamu ya-kola, Gotena tii-pene okonemane tano okone mo tii piyawa atea. Tene okonena, nai ana-la, okonelapo-mane tano okone mo tii piya olane tene mindi ya naapea.*

²⁴ Tano okone tii pula-kola, yuu yo peya tupa pitakana wandalaki yame

* ^{21:10:} Ese 40:2 * ^{21:11:} Ais 60:1-2,19 * ^{21:12-14:} Ese 48:30-35 * ^{21:15:} Ese 40:3; Lap 11:1 * ^{21:18:} Ais 54:11-12 * ^{21:23:} Ais 60:19-20; Lap 22:4-5

tupamane asia oko kuai lo andoto, epoko pua atolopeyai. Yuu utupane pitakana kinji tupamane yakamana minditaka epene wetete tupa awuato, tano okonena epolopeyai.*

²⁵ Tano okonena yuu undupi nalolakola, tano okonena atalaini wandakali tupamane tano okonena ende tupana asia lomba tupa tuma napene, ole dindi lo mee lumbapijane yakale lo ando kondolo-peyai.*

²⁶ Asia lomba tupa lumbapijane yai-kola, yuu pitakana wandakali tupamane yakamana minditaka epene tupapi, minditaka gene yene tupapi, utupane auwa tano okonena epolopeyai.

²⁷ Wuane tekeko, wandakali mindimane minditaka koo kalato atene mindi auwato, tano okonena katulo naepolo-peyai. Dee, owato pii lalaini wandakalipi, mana koo yala-pene tupa wato minu atalaini wandakalipi, utupane yakama tano okonena katulo kolandaka nalolo-peyai teke. Jia wete. Sipisipi Andopane okona wandakali saka atapowa atolai tupana gene yalane buku okona gene yolane wandakali tupa angu katulo tano okonena epolopeyai.*

22

Gotena Yuu Epene Oko

¹⁻² Okone angi enjole okonemane ipa epo pene mindi galasa lemba-lemba pene oko namba andawa lea. Wandakali saka atapowa ateakale lo saka ataya alane ipa epo pene okone Sipisipi Andopane okola, Gote-la, okone-lapona pityapele toko okona pangosa lai yunguto, Jutusaleme wenene okonena asini andane yene okona tombenenga epo pea. Ipa okonena ayangipi, amo yangipi, lapotakanga wandakali saka atapowa ateakale lo ataya alane ita minditupa ateai. Ana dindi lo ita utupanena dini liya-kola, mali mindikina ole alesanga dini lialaini-pia. Ita utupanena yokone tupamane yuu pitakana wandakali tupa pitaka mo kuai laya oyale atalaepia.*

³ Goteto minditaka embo wato mo apokale nembo talane tupana mindikipi mindi tano okonena ata napulu-peyai. Jia wete. Sipisipi Andopane okola, Gote-la, okone-lapona pityapele toko oko tano okonena yola-kola, Gotena piape wandakali tupamane bala lo lotu lolopeyai.

⁴⁻⁵ Ole dindi lo Akali Andane Gotena tii-pene okomane wandakali utupane mo tii piya apo ola-kola, yuu okonena undupi nalolo-peyai. Undupi nalola-kola, nai oko

yandopi, lamu mindi yandopi, okonetaka mindimane mo tii pulane tene mindi ata napulu-peyai. Wandakali utupanemanne Gotena lee-inga andolopeyai. Wandakali utupanena wenonga balana gene oko peyatane atolopeya. Wandakali utupane yakama ole dindi lo kinji atapowa atolopeyai.*

Jisasa Bala Wamba Ini Kapoyale Epokale Leane Oko

⁶ Enjole okonemane okonetaka tupa namba andawa lalu, balato namba languato, buku okona pii pepa pelene eya tupa pitaka enene wete eya okonena, wandakali-mane pii utupane bilipilo atapebene lea. Potopesa akali tupana nembotene tupa mina ika leane Akali Andane Gote okomane namba languato, nimbato nambana piape akali tupa ateyai okona poto, mangene wamba kapoyale pulupeya tupa akali utupanenga andawa lape lea.*

⁷ Wuane lea-kola, Jisasato pii mindi leane oko loto, ale alapape. Namba wamba kapoyale epokale lea. Namba Joneto yakama languato, wandakali mindimane pepa oko dii lo andoto, potopesa pii oko nembo tatawa ateando, bala epele olopeya leyo.*

⁸ Namba Joneto pii utupa pitaka ale wato, minditaka enjole okonemane namba andawa leane tupa andewa. Andalu, pii utupane ale wato, nimbato enjole okone lo lotu loyale, balana kene yane organe mandaka poto, aiki leka ewa.*

⁹ Nimbato wuane pewane tekeko, enjole okonemane namba languato, buku okona pii pepa pelene eya tupa nembo tatawa ateyai wandakali tupapi, nimbana potopesa akali yangone tupapi, nimbapi, yakama pitaka towa atu namba Gotena piape akali atoto, piape mindiki okone teke piyamane. Tene okonena, nimbato namba lo lotu laa napene kondalu, Gote lo angu lotu lape lea.

¹⁰ Wuane lalu, balato namba languato, minditaka wua pulupeya lo buku okona pepa pelene eya tupa wamba kapoyale wuane pulupeya lea. Wuane pulupeya okonena, Gotena potopesa pii pepa pelene eya utupa nimbato mo too napipe. Jia.

¹¹ Pii utupane panakame eya-kola teke, wandakali mindimane tuu pua atoto, mana koo kalato atene tupa wato minu ateando, balato wuane pua ateakale lo ando kondape-pene. Dee, wandakali mindi bala Gotena yame atoto, balana mana epene tika-pene tupa wato minu

* ^{21:24:} Ais 60:3,5 * ^{21:25:} Ais 60:11 * ^{21:27:} Ais 52:1; Ese 44:9; 1Ko 6:9-11 * ^{22:1-2:} Ese 47:1,12; Jen 2:9; Jol 3:18; Sak 14:8 * ^{22:4-5:} Mt 5:8; Lap 3:12; 5:9-10; 20:6; 21:23,25; Dan 7:18,27 * ^{22:6:} Lap 1:1 * ^{22:7:} Lap 1:3

* ^{22:8:} Lap 19:10

ateando, balato wuane pua ateakale lo ando kondape-pene. Enjole okonemane wuane lea.*

¹² Enjole okonemane wuane lea-angi, Jisasato pii mindi leane oko loto, ale alapape lea. Namba wamba kapoyale epokale. Namba epolowa-angi, nambato wandakali pitaka yapa lo tale puato, utupanena mana tupa nembo toto, mindiki-mindiki lo yole mindi mauwakale.*

¹³ Namba wamba ini bulupane wetete atewane oko mee atama ipulu, minditaka waka tupa pitaka sia minuto, matili wetete atapowa atolopeyo. Namba minditaka eya tupa pitakana tene oko atoto, nambato pi-ape pukale larawane tupa pitaka pikoyo piyawane.*

¹⁴ Wandakali minditupa-mane wandakali saka atapowa ateakale lo mo saka ataya alane ita okonena dini tupa naima lakae lo nembo talaini. Wuane nembo toto, utupane yakama Jutusaleme wenene okona kolandaka lamawuato, yakamana tona tupa wasa-wasa peyo atalaini. Wandakali utupane yakama matili epele olopeyai.*

¹⁵ Wuane tekeko, yia peango atalaini wandakali tupapi, pamuku pima epoko piyaini wandakali tupapi, wandakali yangone peyo ome laraini wandakali tupapi, posini piyaini wandakali tupapi, owato pii lauwa lakae lo atalaini wandakali tupapi, owato gote tupa lo lotu laraini wandakali tupapi, wandakali okonepene tupa pitaka tano okonena katulo kolandaka nalolopeyai. Jia. Utupane takita atoto, yamapane kendawa atolopeyai.

¹⁶ Namba kinji Dapitina mandiyene tupana mandiyene Jisasa. Dee, waa lama-lama upa pitane kaiyanda tii-pene wete mindi atalane oko namba. Yakamoto pii utupane pitaka sosa tupana Kitisene wandakali tupa lamai-yapale nembo

toto, nambana enjole okomane yakama langeakale loto, nambato bala yakama ateyinga peakale lewa. Jisasato wuane lea.*

¹⁷ Wuane lea-kola, Oli Sipitisa okola, Sipisipi Andopane okona wetene okola, okonelapo-mane bala lamawuato, Jisasa nimba ipu leyapi. Goteno pii ale alaini wandakali utupa pitaka-mane Jisasa nimba ipu lape-pene teke. Wandakali mindimane ipa nono yando, bala epoto, wandakali saka atapowa ateakale lo mo saka ataya alane ipa Goteto mee giyane oko nape-pene.*

Joneto Pii Lokoyo Puato, Pii Leane Tupa

¹⁸ Buku okonga potopesa pii pepa pelenye eya tupa ale olai wandakali pitakamanie ale yakale nembo toto, nambato pii mindi leyo nayu leyo. Wandakali mindimane buku okona pii pepa peyatane eya tupa angu nalene, pii waka minditupa mo tako pua leando, kenda-pene minditupa epolopeya lo buku okona pepa peyatane eya tupana minditupa Goteto wandakali okonenga epeakale lolopeya.*

¹⁹ Buku okomane loto, tano epene wetete Jutusaleme wenene mindi yola-kola, wandakali saka atapowa ateakale lo saka ataya alane ita mindi tano okonena atolopeya layene eya. Wandakali mindimane buku okona pii pepa peyatane eya utupanena minditupa tepa yando, Goteto wandakali okone bala tano okonena kolandaka leakale lo ando konda naene, ita okonena dini tupa neakale lo ando konda napulu-peya teke. Jia.

²⁰ Pii utupa leya akali okonemane enene wete, namba wamba ini kapoyale epokale leya. Balato wuane leya-kola, nambato bala lamawuato, enene, Akali Andane Jisasa nimba ipu leyo.*

²¹ Akali Andane Jisasato wandakali pitaka ondo wato, moyakale lo pote leyo.

* **22:11:** Dan 12:10 * **22:12:** Ais 40:10; Jet 17:10; Lap 2:23 * **22:13:** Ais 44:6; Lap 1:8,17; 21:5-6 * **22:14:** Jen 2:9;
3:22 * **22:16:** Nam 24:17; Ais 11:1,10; Lom 1:3; Lap 2:27-28; 5:5 * **22:17:** Ais 55:1; Lap 21:5-6 * **22:18:** Lo 4:2;
12:32 * **22:20:** Lap 2:16